


Ke meupiya ne tudtul
mekeatag ki Hisu
Kristu



Manobo, Ilisanen: Ke meupiya ne tudtul mekeatag ki Hisu
Kristu New Testament

**Ke meupiya ne tudtul mekeatag ki Hisu Kristu
Manobo, Ilianen: Ke meupiya ne tudtul mekeatag ki Hisu Kristu
New Testament**

copyright © 1989 Wycliffe Bible Translators, Inc.

Language: Manobo, Ilianen

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 25 Nov 2022 from source files dated 29 Jan 2022
8fce2a78-a796-51ec-acdb-22430c0b7b13

Contents

Mateo	1
Marcos	77
Lucas	125
Juan	206
Ke Nenged-ulaula	261
Ruma	332
1 Kurintu	369
2 Kurintu	403
Gelasiya	425
Ipisu	438
Pilipus	450
Kulasi	458
1 Tiselunika	466
2 Tiselunika	473
1 Timoteo	477
2 Timoteo	487
Tito	494
Filemon	498
Hibruhanen	500
Santiago	528
1 Pedro	537
2 Pedro	547
1 Juan	553
2 Juan	561
3 Juan	562
Hudas	564
Ke Imperayag	567

Ke Meupiya ne Tuditul Mekeatag ki Hisu Kristu ne Miguhud ni Mateo

Ke Kepuun ni Hisu Kristu

(Lucas 3:23-38)

¹ Ini se guhud te kepuun ni Hisu Kristu, kevuwaran ni David wey kevuwaran dema ni Abraham.

² Si Abraham ke amey ni Isaac,

ne si Isaac ne amey ni Jacob,

si Jacob ne amey ni Hudah wey ke menge suled din.

³ Ne si Hudah ne amey en ni Paris ki Sara,

(si Tamar ke iney ran);

ne si Paris ne amey ni Iserum,

ne si Iserum ne amey ni Aram;

⁴ ne si Aram ne amey ni Aminadab,

ne si Aminadab ne amey ni Naasun,

ne si Naasun ne amey ni Salmun,

⁵ ne si Salmun ne amey ni Buus

(si Rahab ke iney rin),

si Buus ne amey ni Ubud

(si Ruth ke iney rin),

si Ubud ne amey ni Isai,

⁶ ne si Isai ne amey ni Datù David.

Si David ke amey ni Salomon

(ke iney rin ne esawa rengan ni Uriya);

⁷ Si Salomon ne amey ni Rubuam,

si Rubuam ne amey ni Abiyas,

si Abiyas ne amey ni Asa,

⁸ si Asa ne amey ni Husapat,

si Husapat ne amey ni Huram,

si Huram ne amey ni Usiyas,

⁹ si Husiyas ne amey ni Hutam,

si Hutam ne amey ni Akas,

si Akas ne amey ni Isikyas,

¹⁰ si Isikyas ne amey ni Manasis,

si Manasis ne amey ni Amun,

si Amun ne amey ni Husyas,

¹¹ ne si Husyas ne amey ni Hikunyas wey ke menge suled din. Ini se hewii ne neviyag ke menge Israyil diyà te inged ne Bebilunya.

¹² Guna su diyà dan en te inged ne Bebilunya ne nevuwad si Hikunyas ne iyan din anak ne si Selatil,

si Selatil ne amey ni Serubabil,

¹³ si Serubabil ne amey ni Abiyud,

si Abiyud ne amey ne Iliyakim,

si Iliyakim ne amey ni Asur,

¹⁴ si Asur ne amey ni Saduk,

si Saduk ne amey ni Akim,

si Akim ne amey ni Iliyud,
 15 si Iliyud ne amey ni Iliasar,
 si Iliasar ne amey ni Matan,
 si Matan ne amey ni Jacob,

16 si Jacob ne amey ni Jose, ke esawa ni Maria ne iney ni Hisus ne ed-ingaranan ki Mesiyas, ne iyan din meana ne impasad te Eleteala ne Ebperetuen te langun.

17 Ketà be ne igenat ki Abraham taman te kineanak ki David ne sepulù wey epat ne lapis. Ne igenat ki David taman te kinekeviyag dan diyà te inged ne Bebilunya ne sepulù wey epat ded ne lapis. Ne igenat te kinekeviyag dan taman te kineanak ki Hisu Kristu ne sepulù ded dema wey epat ne lapis.

*Ke kineanak ki Hisu Kristu
 (Lucas 2:1-7)*

18 Iring kayi se ned-ulaula te kineanak ki Hisu Kristu. Nepesaran en se ed-esawaen ke iney rin ne si Maria ni Jose, ugaid ne warà den pà mekedimpung ne netuenan ni Maria te mehingey sikandin egenat te gehem te Kedesenan ne Ebpetuntul te Menusiyà. 19 Si Jose ini ne egkeesawa rin ne metidtu ne etew, ugaid ne warà din metueni ke engkey se amey rut te vatà. Tembù be nepigitung din se kenà din edleusan te ed-esawa si Maria asal ed-usayen dà te meeles su apey kenà meyeyai si Maria.

20 Ne gewii rin te ebpegpegitung kayi ne nekelipereng sikandin ne mibpekita ke suluhuen te Kerenan kayi te tehinep din se egkahi te, “Jose, sikuna ne kevuwaran ni David, kenà ka egkeandek ne ebpengesawa ki Maria su arà se ibmehingey rin ne egenat te gehem dut te Kedesenan ne Ebpetuntul te Menusiyà. 21 Ne ed-anak sikandin te meama ne iyan nu id-ingaran ne si Hisus su sikandin ke ebpelihau te menge etew rin dut te menge salà dan,” ke se suluhuen.

22 Langun kayi ne ned-ulaula su apey metuman ke impekah rengan te Kerenan dut te ebpelambas te lalag din ne egkahi te, 23 “Ebmehingey ini se raha ne warà pà mebeyugi ne ed-anak te meama ne iyan id-ingaran ne si Imanwil” (ne iyan din meana ne “Ke Eleteala ne kayi en te kenitew”).

24 Guna su nekehimerat si Jose ne midtuman din ke insuhù dut te suluhuen te Kerenan ne mid-esawa rin si Maria. 25 Ugaid ne warà din pà uvaya si Maria taman te warà pà mid-anak. Guna su mid-anak en ne mid-ingaranan ni Jose ini se batà ne meama ki Hisus.

2

*Nekeuma ke Menge Etew ne riyà ebpuun te Edsilaan su Ebpengarap
 ki Hisus*

¹ Diyà in-anak si Hisus te inged ne Bitlihim lusud te Hudiya te gewii te iyan egkamal te inged ne datù ne ed-ingeranan ki Hirudis. Warà meuhet ne ruen menge etew ne metau te bituen riyà ebpuun te Edsilaan ne nekeuma riyà te Hirusalim. ² Nekeuma ran ne mid-insà dan se egkahi te, “Endei ke behu pà ne in-anak ne vatà ne midtendù ne edetuen te menge etew ne Hudiyanen? Su nekita rey ke bituen ne edlepew riyà te inged dey ne rapit te Edsilaan ne tuus te in-anak en sikandin, tembù be mibpengkayi key su ebpengarap key kandin.”

³ Guna su nerineg ni Hirudis ini ne warà meupiya ne itungan din, ne iring ded dema ketà ke langun ne menge etew te inged ne Hirusalim. ⁴ Ketà ne miburun din ke langun ne menge mepurù te terebpelengesa te menge Hudiyanen wey ke menge meyerù te penduan dan ne mid-insaan din sikandan te, “Endei igkeanak ke Impasad te Eleteala rengan ne Ebperetuen te langun?”

⁵ “Diyà te inged ne Bitlihim lusud kayi te Hudiya,” ke sikandan, “su ini ke impesurat dut te ebpelambas te Lalag te Eleteala rengan se egkahi te,

⁶ ‘Sikiyu ne menge etew te inged ne Bitlihim lusud te Hudiya,
misan deisek ke inged niyu ne kenà sikiyu ke mewri
dut te menge inged ketà;
su riyà te kenyu ne ruen edlepew
ne ebpeneheewit dut te menge sakup ku
ne menge kevuwaran ni Israyil.’ ”

⁷ Guna su nerineg ni Hirudis ini ne midtawag din ke behu pà ne nekeuma ne riyà ebpuun te Edsilaan te in-eles din ne mid-insaan din sikandan ke keenu medlepew ini se bituen ne nekita ran, ne netuenan din ketà te kandan. ⁸ Ketà ne impependiyà din en sikandan te Bitlihim se egkahi te, “Pendiyà kew en ne ey-eyari niyu te ebpemengà arà se vatà. Ne embiya egketuen niyu ne lived kew kayi ne peketueni niyu kedì su apey a mekependiyà su ebpengarap a rema.”

⁹ Nerineg den dà ini ne mid-ipanew ran en. Ne gewii te ed-ipanew ran ne ketà en maa ke bituen ne nekita ran te riyà dan pà te Edsilaan su mid-una kandan taman te edrenged en ketà te neubpaan te batà. ¹⁰ Nekita ran dà ke bituen ne nehalew ran nevenar. ¹¹ Midlusud dan ketà te valey ne nekita ran ke vatà wey ke iney rin ne si Maria ne midlumpeng dan se ebpengarap kandin. Ne ketà ne mibukaan dan ke midtehuan te ibehey ran kandin ne indenà dan diyà te kandin ke bulawan, mepurù ne rukut, wey periyemut ne ed-ingaranan te mira.

¹² Ne guna su ed-ulì dan en ne impesabut kandan te Eleteala impepevayà te tehinep te kenà dan en medlived diyà te ki Hirudis. Ne ketà ne riyà dan en mibpevayà te seveka ne ralan te kineulì dan en.

Impelahuy ni Jose wey si Maria ke vatà Diyà te inged ne Ihiptu

¹³ Guna su migenat en ke menge meama ne riyà ebpuun te Edsilaan ne mibpetehinep en ke suluhuen te Kerenan ki Jose se egkahi te, “Enew ke en ne kua nu ke vatà wey ke iney rin ne pelahuy kew riyà te inged ne Ihiptu. Ne kenà kew awà diyà taman te kenà ku ebpeulien sikiyu su ebpemengaan ni Hirudis ayan se vatà su ed-imetayan din.”

¹⁴ Ne arà dà ne mid-enew si Jose ne mid-ewit din ke vatà wey ke iney rin te arà dà ne kerukileman te ebpendiyà te inged ne Ihiptu. ¹⁵ Ne riyà dan mid-uppà taman te minatey en si Hirudis.

Ned-ulaula ini su apey metuman ke impekahi te Kerenan rengan dut te ebpelambas te Lalag din ne si Husiyas ne egkahi te, “Impeulì ku ke Anak ku riyà ebpuun te inged ne Ihiptu.”

Mibpeimetayan ni Hirudis ke menge Batà ne Meama Diyà te Bitlihim

¹⁶ Guna su netuenan ni Hirudis te negaga rà sikandin te itungan dut te menge meama ne riyà ebpuun te Edsilaan ne nereggreg sikandin te langet din. Ne insuhù din te ebpeimetayan ke langun ne menge vatà

ne meama diyà te inged ne Bitlihim wey ketà te nekelingut ne menge inged ne egenat te deruwa pà ne rahun taman te behu pà ne in-anak su mid-antap din dut te nerineg din ketà te menge etew ne riyà ebpuun te Edsilaan ne nekederuwa en ne rahun igenat dutun te nekita ran ke bituen.

¹⁷ Ne ketà ne netuman en ke impekahi rut te ebpelambas te Lalag te Eleteala rengan ne si Jeremias ne egkahi te,

¹⁸ "Duen nerangkub ne egkerineg diyà te inged ne Rama, ne edsinehew wey ebpenderawit.

Su ebpenderewitan ni Raquel ke menge anak din, ne kenè en egkelangan ke hinawa rin su warè en ke menge anak din."

Ke Kineulì en en ni Jose Riyà Ebpuun te Ihiptu

¹⁹ Guna su minatey en si Hirudis ne mibpetehinep en maa ke suluhuen te Kerenan ki Jose diyà te inged ne Ihiptu, ²⁰ ne migkahi te, "Enew ka ne kua nu ke vatà wey ke iney rin ne ulì kew en diyà te inged ne Israyil su minatey en ke menge etew ne egkiyug ne ebpeimatey rut te vatà."

²¹ Ne mid-enew si Jose ne migkuwa rin ke vatà wey ke iney rin ne mid-ulì dan en diyà te inged te Israyil. ²² Ugaid ne guna su nerineg ni Jose te si Arkilew se egkamal dut te inged ne Hudiya nekesambì dut te amey rin ne si Hirudis ne neandek sikandin ne ed-ulì ketà. Ne mibpetehinep ma ke Eleteala ne mibaag kandin ne ketà ne riyà dan mibpesinaru te lusud te Geliliya, ²³ ne mid-ubpà dan ketà te inged ne ed-ingaranan te Nesarit. Ned-ulaula rin ini su apey metuman ke impekahi rut te ebpelambas te Lalag te Eleteala rengan ne egkahi te, "Ed-ingeranan sikandin te etew te Nesarit."

3

Ke Kinepesabut ni Juan ke Ebpembunyag

(Marcos 1:1-8; Lucas 3:1-18; Juan 1:19-28)

¹ Ketà ne hewii ne nekeuma si Juan ne Ebpembunyag kayi te tanà ne kenà egkeubpaan te menge etew diyà te lusud te Hudiya, ne impesabut din ke Lalag te Eleteala riyà te menge etew ne ed-uvety kandin. ² Migkahi sikandin diyà te menge etew te, "Pemedsendit kew ne engkeri niyu ke menge meraat ne ulaula niyu su mehaan en Edatù ke Eleteala kenitew." ³ Si Juan ini ke nekahi ni Isayas ke mibpelambas te Lalag te Eleteala rengan se egkahi te,

"Duen etew riyà te tanà ne kenà egkeubpaan te menge etew ne ebpenawag dut te menge etew

ne ed-uvety kandin, ke sikandin te,

'Mehaan ebpekeuma ke Kerenan,

ne ihewani niyu ke ralan,

ne tidtuwa niyu ke ibayà din,

ne iyan din meana ne tilaka niyu ke hinawa niyu

su apey kew egkepenehana te kebpekeuma rin.' "

⁴ Si Juan ini ne iyan din belegkas ne mid-avel ne bulvul te binatang ne ed-ingeranan te kemilu, ne iyan din insebitan ne lundis ded dut te binatang. Ne iyan din keuyehan se tepurì wey teneb. ⁵ Ne merakel ne menge etew ne mibpendiyà su ebpmineg kandin ne riyà ebpemuun

te inged ne Hirusalim, ne riyà ebpemuun te lusud te tivuuk ne inged te Hudiya, wey langun ne menge inged ne nekepesuvà te wayig ne Hurdan.⁶ Ne intarem dan te nekedsendit dan dut te langun ne meraat ne ulaula ran ne arà pà ne mibpebunyag dan ki Juan diyà te wayig ne Hurdan.

⁷ Guna su nekita ni Juan ke merakel ne Peresiyu wey Sadusiyu ne mibpengkayi su ebpebunyag ne migkehiyan din sikandan te, “Iring kew te menge uled ne ebbelahuy dut te apuy! Mehaan en egkeuma ke kedusa te Eleteala keniyu. Engkey se midtarem keniyu te ebpekeliyu kew ketà te ebpebunyag kew?⁸ Embiya benar ne mid-engkeran niyu ke meraat ne ulaula niyu, ne ipekita niyu kayi te ulaula niyu.⁹ Ne kenà kew egkahi te sikiyu ne kenà edusaan te Eleteala su geina te kevuwaran kew ni Abraham. Su igkahi ku keniyu,” ke si Juan, “misan ini se menge batu ne egkepebaluy te Eleteala ne etew ne tuney ne kevuwaran ni Abraham ne igkesambi keniyu.¹⁰ Ne sikiyu ne iring te menge kayu ne kenà ebahtas te meupiya, tembù be ebpilayen. Ne iring te nekekayew en ke adsu su ebpmilayen su idtimbag diyà te apuy.

¹¹ “Wayig se ibunyag ku keniyu ne tuus te mid-engkeran niyu ke meraat ne ulaula niyu,” ke si Juan. “Ugaid ne ruen ebpeketundug kediey ne mepurù pà kediey, su misan ke telumpà din ne kenà a edait ne ebitbit. Ne iyan din ibunyag keniyu ke Kedesenan ne Ebpetuntul te Menusiyà ne ebunyahan din ke ruma te apuy.¹² Geina te ibpesivey rin ke menge etew ne ebperetiyaya rut te menge etew ne kenà ebperetiyaya,” ke si Juan, “ne iring sikandin te etew ne ruen teluung din su ed-ukap ne ibpelayap din ke ukap rut te rimahas. Ke rimahas ne idtahù din diyà te patil, ne ke ukap ne ebinsulan din te apuy ne kenà egkeevukan.”

Mibunyahan ni Juan si Hisus

(Marcos 1:9-11; Lucas 3:21-22)

¹³ Warà meuhet ne nekeuma en si Hisus kayi te wayig ne Hurdan se riyà ebpuun te lusud te Geliliya su ebpebunyag ki Juan.¹⁴ Ugaid ne kenà perem ebunyag si Juan kandin, ke sikandin te, “Meambe ke ebpengkayi ka te kedi se ebpebunyag? Su iyan edait ne ebpebunyag a kenikew.”

¹⁵ Ne midtavak si Hisus kandin te, “Ed-iringen ta en kayi ne bunyah ad nikuna su apey ta metuman ke langun ne insuhù te Eleteala.” Ne ketà ne migkiyug si Juan ne mibunyahan din en si Hisus.

¹⁶ Guna su nebunyahan en si Hisus ne migau en ketà te wayig. Ne nevukaan ke langit ne nekita rin ke Kedesenan ne Ebpetuntul te Menusiyà ne midragid te melepati ne mibpehunrerènà ne midlatun kayi te kandin.¹⁷ Ketà ne ruen suwara ne riyà ebpuun te langit ne nerineg din se egkahi te, “Sikew ke Anak ku ne igkelimù ku nevenar, ne utew en ne ingkesuatsuat ku sikew.”

4

Ke Kinepenggeram ki Hisus

(Marcos 1:12-13; Lucas 4:1-13)

¹ Ne ketà ne mid-ewit en si Hisus dut te Kedesenan ne Ebpetuntul te Menusiyà diyà te tanà ne kenà egkeubpaan te menge etew su ebpenggeraman dut te datù te pekaid.² Ne lusud te epat nepulù

ne andew wey kerukileman ne warà bulug mekekaan sikandin, ne nevitil nevenar. ³ Ne mid-uvey kandin si Setanas ke datù te pekaid ne mibpenggeraman din se egkahi te, “Embiya sikuna en ke Anak te Eleteala ne pebeluya nu ini se menge batu ne pan ne egkekaan.”

⁴ Ne migkahi si Hisus te, “Iyan insurat ne Lalag te Eleteala ne egkahi te, ‘Kenà egkeenen dà se igkeuyag te etew, ugaid ne iyan ebpekeuyag kandin ne uman senge tahà ne lalag te Eleteala.’ ”

⁵ Ne ketà ne mid-ewit dut te datù te pekaid si Hisus diyà te inged ne Hirusalim ne ed-ingaranan te Berekat ne Siyudad ne rutun ne miduma rin si Hisus diyà te migketikangan dut te Nekebpuru ne Valev te Eleteala. ⁶ Ne migkahi ke datù te pekaid te, “Embiya benar ne sikew ke Anak te Eleteala ne umpak ka ruen. Su ruen impesurat ne Lalag te Eleteala ne egkahi te,

‘Edsuñù ke Eleteala te menge suluhuen din ne ebbetugenuren keykew.

Ne edsepirawen ka nikandin su apey kenà egkerudruri ke paa nu te batu.’ ”

⁷ Ne migkahi si Hisus te, “Ugaid ne ruen dema Lalag ne impesurat te Eleteala ne egkahi te, ‘Kenà kew baal te ralan ne ibpenggeram te gehem dut te Kerenan ne Eleteala niyu.’ ”

⁸ Neipus ketà ne mid-ewit maa si Hisus dut te datù te pekaid diyà te metmetikang ne buvungan ne impekita rin ki Hisus ke langun ne menge inged kayi te ampew te dunya wey ke kekewesai ran. ⁹ “Ini se kebayàbayà kayi te langun ne inged ini ne ibehey ku keykew,” ke se datù te pekaid, “wey langun ini ne kekewesai embiya ebpenimbuel ka ne ed-arap ka kedì.”

¹⁰ Ne migkahi si Hisus te, “Awà ka kayi, Setanas! Duen impesurat ne Lalag te Eleteala ne egkahi te, ‘Iyan niyu rà erapa ne Kerenan ne Eleteala niyu, ne sikandin dà se edsenguren niyu.’ ”

¹¹ Ne ketà ne mid-ewaan en dut te datù te pekaid sikandin ne nekeuma en ke menge suluhuen te Eleteala ne midtuganur kandin.

Midrudisù si Hisus te Ebpesabut Mekeatag te Kedatù te Eleteala te Menge Etw

(Marcos 1:14-15; Lucas 4:14-15)

¹² Guna su nerineg ni Hisus te impevilanggù en si Juan ke Ebpebun-yag ne mibpendiyà sikandin te inged ne Geliliya. ¹³ Nekeuma sikandin diyà te inged ne Nesarit ugaid ne warà ketà mid-ubpà su mibpendiyà sikandin te inged ne Kapirnawum diyà te beyvey te ranew te Geliliya diyà te tanà ne imbehey rengan dut te keep-epuan ni Sibulun wey Neptali. ¹⁴ Ned-ulaula rin ini su apey metuman ke impesurat ki Isayas ke mibpelambas te Lalag te Eleteala rengan ne egkahi te,

¹⁵ “Tanà te Sibulun wey tanà te Neptali

diyà te beyvey te rahat,

diyà te ripag te wayig ne Hurdan,

ne ed-ingeranan te Geliliya ne ed-ubpaan te kenà Hudiyenan!

¹⁶ Ke menge etew ne ed-ubpà ketà

ne rengan ne iring te nerusireman,

ugaid ne nekekita en te mesmesihey ne rayag.

Uya, ini se riyà te merusirem

ne mid-ubpà te alung te kepepatey,
ugaid ne mid-endlahan en te rayag!"

¹⁷ Ne igenat ketà ne midrudsù en si Hisus se ebpesabut te menge etew, ke sikandin te, "Pedsendit kew en ne engkeri niyu en ke meraat ne ulaula niyu su mehaan en ebpekeuma ke Kedatù te Eleteala keniyu."

*Mibpemilì ni Hisus ke Epat ne Etew ne Ebpemiyala te Eduma Kandin
(Marcos 1:6-20; Lucas 5:1-11)*

¹⁸ Gewii te mid-ip-ipanew si Hisus diyà te beyvey te Ranew te Geliliya ne nekita rin ke deruwa ne teleari, si Simon (ne ed-ingeranan ki Pedro) wey si Andres ke ari rin. Ebpemiyala ran diyà te ranew su arà ke helevèk dan. ¹⁹ Ne migkehiyan dan ni Hisus te, "Pengkayi kew en ne duma kew kediey," ke sikandin, "su serà se ebpemiyalaan niyu guntaani, ugaid ne ebpenuruen ku pà sikiyu te iyan niyu mulà egkeutel ne menge etew ne eduma kedi." ²⁰ Arà dà ne mid-ewaan dan en ke biyala ran su miduma ran en ki Hisus.

²¹ Guna su midlevundus en si Hisus ne nekita rin se deruwa pà maa ne teleari ne si Santiago wey ke ari rin ne si Juan, ke menge anak ni Sibidiyu. Diyà dan te avang dan ne elin ke amey ran ne ebpengumbayà te biyala ran. Midtawag dan ni Hisus, ²² ne arà dà ne mid-ewaan dan en ke amey ran dutun te avang ne miduma ran en ki Hisus.

Impesabut ni Hisus Ke Meupiya ne Tudtul wey Nengeulian Din Ke Menge Ederaru

(Lucas 6:17-19)

²³ Ne mid-eneb-eneb en si Hisus dut te langun ne menge inged diyà te lusud te inged ne Geliliya se ebpenurù ketà te menge valey ne ebpengedian te menge Hudiyanen te penduan dan. Impesabut din te menge etew ke Meupiya ne Tudtul mekeatag te Kedatù te Eleteala kandan, ne nengeulian din ke piya engkey en ne sakit wey menge daru te menge etew. ²⁴ Ne nekeeneb en ke bantug ni Hisus diyà te tivuuk ne inged te Siriya ne mibpeneheewit te menge etew diyà te kandin ke langun ne egkerasey te piya engkey ne sakit wey daru, menge midsuukan te vusew, menge ebevuyen, wey menge etew ne minatey se lawa rin, ne nengeulian ni Hisus ke langun dan. ²⁵ Ne medmerakel ne menge etew ne miduma kandin egenat te lusud te inged ne Geliliya, lusud te inged ne Dikapulis, inged ne Hirusalim, lusud te inged ne Hudiya wey menge inged diyà te ripag te wayig ne Hurdan.

5

Ke Impesabut ni Hisus Mekeatag te ke Benar ne Kehelawan

(Lucas 6:20-23)

¹ Guna su nekita ni Hisus ke denda ne menge etew ne miduma kandin ne midtekereg sikandin diyà te buvungan ne rutun mibpinuu. Ne mid-uvety kandin ke menge edumdumaan din. ² Ne mibpenurù din sikandan se egkahi te,

³ "Dayirayi ke menge etew ne netuenan dan
te kenà dan ebpekeulaula te meupiya
ke kenà dan edtevangan te Eleteala,
su sikandan ke ebpekeamung dut te Edetuan te Eleteala!
⁴ Dayirayi ke menge egkemutuwana,

su edlenganen te Eleteala ke hinawa ran!
 5 Dayirayi ke menge mepeembavà te hinawa rin,
 su ebpeketelimà dan te impasad te Eleteala!
 6 Dayirayi ke menge ebpeuna te hinawa ran
 se kedtuman te kiyug te Eleteala,
 su edtevangan dan te Eleteala te kedtuman kayi!
 7 Dayirayi ke menge iiruwen te menge ruma ran,
 su egkeyruwan dan dema te Eleteala!
 8 Dayirayi ke menge kenà egkereruwa se hinawa rin,
 te kedtumana ran te metidtu ne ulaula,
 su sikandan se ebpekekita te Eleteala keuremà!
 9 Dayirayi ke menge ebpemedtuney te menge etew,
 su sikandan ke ed-engkunan te Eleteala ne anak din!
 10 Dayirayi ke menge ebpekesekitan te kedtuman dan
 te engkey se metidtu diyà te etuvangan te Eleteala,
 su sikandan ke ebpekelusud dut te Edetuan te Eleteala!
 11 Dayirayi kew ke ebpeneempelaan kew, wey ebpekesekitan kew, wey
 edtevuan kew te langun ne edsusunan te mereatey ne ulaula su sabap
 te keduma niyu kediey. 12 Kehalew kew misan iring kayi te ini kew te
 ampew te dunya su dekelà se idlalew keniyu diyà te langit. Su iring ded
 dema ke impekaid dan dut te menge mibpelambas te Lalag te Eleteala
 rengan.”

*Insempità ni Hisus te ini se Keduma Kandin ne Ebpekeiring te Timus
wey Sulù*

(Marcos 9:50; Lucas 14:34-35)

13 “Sikiyu ne eduma kedi,” ke si Hisus, “ne iring kew te timus ne
 ibmeupiya te nanam te egkeenen su iyan kew ibmeupiya dut te langun
 ne menusiyà. Ugaid ne upama ke egkeawà en ke nanam din, ne warà
 en dalan te kebmetimus din pà maa. Warà egkeetahan din, tembù be
 idtimbag dà ne egiekan dà te menge etew.

14 “Ne iring kew te sulù ne ebpeketeyew diyà te langun ne menusiyà.
 Su ruen beseanan ne egkahi te, ‘Ke inged ne riyà meketahù te puntur
 te buvungan ne kenà ebpekeeles.’ 15 Su warà etew ne midtemtem te
 sulù ne ebpelengkevan din etawa ibperalung din, ugaid ne riyà din
 ibpeluukluuk te saag su apey egkerayahan ke etew ne edlusud. 16 Ne
 iring ded te sulù ne impeluukluuk te saag ne ebpekerayag te langun
 ne menge etew ketà te lusud te baley, ne pekereyaha niyu ke sulù niyu
 riyà te menge etew su apey ranmekita ke meupiya ne ed-ul-ulaan niyu
 ne ebpekereyù dan dut te Amey niyu ne Eleteala diyà te langit.”

Ke Penurù ni Hisus Mekeatag te Penduan ne Intahak ni Moises

17 “Kenà niyu pegitunga,” ke si Hisus, “te iyan ku impengkayi
 te ampew te dunya ne apey egkeawà ke penduan ne intelau ni
 Moises rengan wey ke impenurù te menge mibpelambas te Lalag te
 Eleteala rengan. Kenà ku iyan impengkayi se id-awà ku ini, ugaid ne
 mibpengkayi a su apey ku meup-upiani metuman ke langun ne nekahì.

18 Tentenuri niyu ini, su taman te duen pà langit wey tanà ne warà
 senge tahà ne egkeawà dut te penduan. Su egkeawà ke langit wey
 tanà ne warà pà meawà ke penduan. 19 Tembù be piya entei ne etew
 ne edsurang te misan deisek dà dut te penduan ne ibpenurù din te

ruma se edsurang iring kandin, ne sikandin ke egkevaluy ne kevevaan ne etew diyà te menge etew ne Edetuan te Eleteala diyà te langit. Ugaid ne ke etew ne edtuman dut te penduan ne ibpenurù din te ruma se kedtuman, ne egkevaluy sikandin ne mepurù ne etew diyà te menge etew ne Edetuan te Eleteala diyà te langit.²⁰ Su idtarem ku keniyu,” ke si Hisus, “wey kew rà ebpekeamung diyà te menge etew ne Edetuan te Eleteala diyà te langit embiya iyan kew pà metidtu diyà te etuvangan din dut te menge meyerù te penduan wey menge Peresiyu.”

Ke Penurù ni Hisus te Kenà Egkeepes te Ruma Ta wey Edlalag te Meraat

²¹ Ne migkahi pà maa si Hisus te, “Iyan niyu nerineg ne impenurù te menge lukes tew rengan ne egkahi te, ‘Kenà kew ed-imatey, su ke etew ne ed-imatey ne egkesuhat te kukuman.’²² Ugaid ne igkahi ku keniyu te piya entei ne egkeepes te ruma rin ne egkesuhat dema te kukuman. Ne piya entei ne egkahi te ruma rin te, ‘Warà itungan nu!’ ne ebpeneheewitan sikandin diyà te punggus en dut te kukuman. Ne piya entei ne egkahi te ruma rin te, ‘Buneg ka ne warà rantek nu!’ ne dait ne ebpekednerakà sikandin.

²³ “Tembù be embiya diyà ke en te edenaan su ebehey ka te Eleteala ne netenuran nu te ruen nesakit se hinawa rin kenikew,²⁴ ne itahak nu pà arà se ibehey nu ne beyai nu pà ne pekid-ulit ka pà ketà te ruma nu, ne arà pà ne lived ka su ebehey ke en diyà te Eleteala.

²⁵ “Ne embiya ruen etew ne edwagib kenikew ne ed-ewiten ka riyà te kukuman, ne gaangaan ke en pekituntay kandin te kenà ka pà ebpekeetuvang diyà te kukuman. Su embiya ebpekeetuvang ka en diyà te kukuman, ne ibehey ka en diyà te uwis, ne ibehey ka riyà te menge pulis ne ke menge pulis ne ebilanggù keykew.²⁶ Idtarem ku keniyu,” ke si Hisus, “kenà kew ebpekeliawang ketà taman te kenà niyu egkevayaran ke langun ne keselaan nu.”

Ke Penurù ni Hisus Mekeatag te Etew ne Edlangkadlangkad te Esawa Rin

²⁷ Ne migkahi pà maa si Hisus te, “Iyan niyu nerineg dema ne impenurù dengan te, ‘Kenà kew edlanglangkad te esawa nu.’²⁸ Ugaid ne igkahi ku keniyu te piya entei ne meama se edtengteng te meritan ne kenà din esawa ne igkeerihi rin, ne timbang te nepengingniyuhan din en arà se meritan.²⁹ Su embiya iyan ebpekepeneheewit keykew te kebpekedsalà nu ke kewanana ne mata nu, ne lesika nu ne itimbag! Su iyan pà tumù ne dibdivaluy rà se mata nu tumin dè be ke langun ne lawa nu ne igkeantug diyà te apuy nerakà.³⁰ Ne embiya iyan ebpekepeneheewit keykew te kebpekedsalà nu ke kewanana ne belad nu, ne tempera nu ne itimbag nu! Su iyan pà tumù ne egkesarir ka tumin dè be ke langun ne lawa nu ne igkeantug diyà te apuy nerakà.”

*Ke Penurù ni Hisus Mekeatag te Etew ne Ebpekidbelag te Esawa rin
(Mateo 19:9; Marcos 10:11-12; Lucas 16:18)*

³¹ Ne migkahi maa si Hisus te, “Impesurat rema dengan te, ‘Embiya ruen meama ne ebpekid-engked te esawa rin, ne edsurat pà te ebpeketaenan te ebpekid-engked en sikandin.’³² Ugaid ne igkahi ku keniyu embiya ruen meama ne ebpekid-engked te esawa rin, misan kenà edlangkadlangkad ini se esawa rin kandin, ne ini se meama se

puunan te salà te esawa rin su embiya edsaup ed-esawa ke meritan ne timbang te nekelangkadlangkad en sikandin. Ne engketà ded dema timbang te nekelangkadlangkad en ke meama ne ed-esawa kandin.”

Ke Penurù ni Hisus Mekeatag te Pasad te Menge Etew

³³ Ne migkahi pà maa si Hisus te, “Nerineg niyu red dema se impenurù te menge lukes tew dengan, ‘Kenà niyu perisa ke impasad niyu, su embiya ruen impasad niyu te Kerenan ne tumana niyu iya.’ ³⁴ Ugaid ne igkahi ku keniyu, embiya ruen ibpasad niyu ne kenà kew sesapà. Kenà kew sesapà te langit su arà ke ubpaan te Eleteala, ³⁵ ne kenà kew sesapà kayi te ampew te dunya su imi ne iring te edtembaran te paa rin. Ne kenà ka sesapà te inged ne Hirusalim su arà ke inged dut te pinekemepurù ne Datù. ³⁶ Ne kenà kew rema sesapà te ulu niyu su warà gehem niyu te ebpekeputì te misan senge waru rà ne bulvul niyu etawa ebpekeitem. ³⁷ Embiya iyan netahù te hinawa niyu se ‘uya’ ne kehiya niyu te ‘uya’, ugaid embiya iyan netahù te hinawa niyu se ‘kenà’ ne kehiya niyu rà te ‘kenà’. Su embiya ed-umanan niyu pà te sapà ne riyan en arà ebpuun te datù te pekaid.”

*Ke Penurù ni Hisus te Kenà ki Edsuli te Menge Kunterà ta
(Lucas 6:29-30)*

³⁸ “Nerineg niyu rema,” ke si Hisus, “ke impenurù dengan se egkahi te, ‘Embiya ruen etew ne ebpekereraat te mata te ruma rin, ne edereetan dema ke mata rin. Ne embiya ruen ebpekehevang te ngipen te ruma rin ne egevangen dema te ngipen din.’ ³⁹ Ugaid ne igkahi ku keniyu te kenà kew edsuli dut te etew ne mid-ulaula te mereatey keniyu. Upama ke ruen edtabpi te buked nu, ne kenà nu ivangen ke edtebpien din ke divaluy. ⁴⁰ Ne embiya ruen ed-ewit keykew riyawà te kukuman ne edlukgasan ka rin en te kemisita nu, ne kenà nu ivangen kandin te egkuwa ketà, ugaid ne ivehey nu kandin ke kumbalà nu rema. ⁴¹ Ne embiya ruen sundaru ne ebpehes keykew te ebpevava te kesengkapan din taman te senge kilumitru se keriyù din, ne bevaa nu misan taman te deruwa ne kilumitru. ⁴² Ne embiya ruen ebuyù keykew, ne behayi nu. Ne embiya ruen edsambey keykew, ne pesembaya nu.”

*Ke Penurù ni Hisus Mekeatag te Kedlimù ta te Menge Kunterà ta
(Lucas 6:27-28, 32-36)*

⁴³ “Nerineg niyu rema,” ke si Hisus, “ke nekah ran dengan te, ‘Limui nu ke menge sepakat nu ne keepesi nu ke menge kunterà nu.’ ⁴⁴ Ugaid ne igkahi ku keniyu te limui niyu ke menge kunterà niyu, ne ipengeningeni niyu te ebpeneuven te Eleteala ke menge etew ne ebpekesakit kenikew. ⁴⁵ Su embiya ini se ed-ul-ulaan niyu, ne egkekita kayi te keniyu te sikiyu ne menge anak en te Amey niyu ne Eleteala diyawà te langit. Su ini se Eleteala ne kenà iyan din dà ebpesilaan te andew ke menge metidtu rà su elin ded dema ke menge etew ne meraat se ulaula rin. Ne ebpeuranan din ded dema ke menge metidtu wey ke menge etew ne ed-ulaula te meraat. ⁴⁶ Su embiya iyan niyu rà igkelimù ke menge etew ne egkelimù keniyu, ne meambe ke ebpenareng kew te kebpenuaub te Eleteala keniyu? Misan ke ebpevayad te buwis ne limbungan ne igkelimù dan dema ke menge etew ne egkelimù kandan. ⁴⁷ Ne embiya iyan niyu rà edsehipaan ke menge sepakat niyu, ne

engkey se kegkereyui kenyiu? Warà! Su misan ke menge etew ne kenà ebperetiyyaya te Eleteala ne ed-ulaula red dema te iring ketà.⁴⁸ Tembù be sikiyu ne pekeimpit kew te ulaula niyu riyà te menge etew, su ke Amey niyu riyà te langit ne impit ke langun ne ulaula rin.”

6

Ke Penurù ni Hisus Mekeatag te Kebehey ta te Menge Egkeayuayu

¹ Migkahi pà maa si Hisus te, “Itahù niyu ini te itungan niyu te kenà iyan niyu keppengeningeni te Eleteala ne apey kew mekita te menge etew. Su embiya ini se ed-ululaan niyu ne kenà niyu egketelimà ke idlalew ketà dut te Amey niyu riyà te langit.

² “Tembù be embiya ruen ibehey niyu te egkeayuayu ne kenà niyu ibpekitakita te menge etew iring dut te menge etew ne egkiyug ne ebpekitakita te keupiya ran. Su sikandan ini ke ebehey ran ne riyà den dà ibehey te lusud te valey ne ebpengedian te penduan dan wey riyà te ralan su apey egkekita ne egkereyù dan te menge etew. Ugaid ne igkahi ku kenyiu te ini se mid-ulaula ran ne nekuwa ran en ke lalew ran.³ Ugaid ne embiya ruen ibehey niyu te egkeayuayu, ne kenà niyu peketueni te misan sepakat niyu,⁴ su apey ini se ibehey niyu ne warà ruma ne egketau. Ne ke Amey niyu rà se nekekita dut te mid-ulaula niyu ne iyan edlalew kenyiu.”

Ke Penurù ni Hisus Mekeatag te Kebpengeningeni

(Lucas 11:2-4)

⁵ “Ne embiyà ebpengeningeni ka,” ke si Hisus, “ne kenà ka ed-iring te engkungkun ne metidtu. Su embiya ebpengeningeni ran ne egkiyug dan ne ed-itindeg diyà te lusud te valey ne ebpengedian te menge Hudiyanan te penduan dan wey riyà te lirig te kelesada su apey egkekita te menge etew. Ugaid ne igkahi ku kenyiu te ini se mid-ulaula ran ne nekuwa ran en ke lalew ran.⁶ Ugaid ne sikiyu, ke ebpengeningeni kew ne lusud kew riyà te sungkù niyu ne lelekeb kew ne pengeningeni kew riyà te Amey niyu ne Eleteala ne kenà egkekita. Ne ke Amey niyu ne iyan dà ebpekekita kenyiu ne iyan edlalew kenyiu.

⁷ “Ne kayi te kebpengeningeni niyu,” ke si Hisus, “ne kenà niyu edlumlumbayi ke pengeningeni niyu iring dut te menge etew ne kenà ebperetiyyaya te Eleteala. Su iyan dan kunaan ke ebpeminehen te Eleteala ke pengeningeni ran ke ebpekelayaten dan.⁸ Kenà kew ve ed-iring kandan! Su sikiyu, ne netuenan en te Amey niyu ke kurang niyu te warà kew pà mebuyù.

⁹ “Embiya ebpengeningeni kew ne iringa niyu kayi,
‘Ah, Amà diyà te langit,

berekat ne edati te menusiyà ke ngaran nu.

¹⁰ Ne berekat ne ebayàbabayà ka rut te langun ne menusiyà,
su apey metuman ke kiyug nu kayi te ampew te dunya
iring dut te diyà te langit.

¹¹ Behayi key te sesangan ne egkekaan dey te ini ne andew.

¹² Ne pesehara nu ke salà dey
iring dut te nepesehad dey en ke nekedsalà kenami.

¹³ Ne ipekeriyyù key nikuna dut te menge mevaher
ne penggeram, ne pekelangi key dut te datù te pekaid.”

¹⁴ Su embiya ebpesehareni niyu ke menge etew ne nekedsalà keniyu,” ke si Hisus, “ne egkepesehad kew rema te Eleteala ne Amey niyu ne riyà te langit. ¹⁵ Ugaid ne embiya kenà niyu egkepesehad ke menge etew ne nekedsalà keniyu, ne kenà dema ebpesehareni ke salà niyu dut te Amey niyu ne riyà te langit.”

Ke Penurù ni Hisus Mekeatag te Kedlimpas te Kegkaan su apey kenà ki Mevangan se Ebpengeningeni

¹⁶ Ne migkahi pà maa si Hisus te, “Embiya edlimpas kew te egkaan su ebpengeningeni, ne kenà kew ebpekerumbahat te paras niyu iring dut te menge etew ne engkungkun ne metidtu. Su sikandan ke edlimpas dan te egkaan ne ebpebparas dan te merupaas su apey mekita te edlimpas dan te egkaan. Ne igkahi ku keniyu te kayi te ini se mid-ulaula ran ne nekuwa ran en ke lalew ran. ¹⁷ Ugaid ne iyan meupiya ke edlimpas kew te egkaan ne pendapug kew ne penuwat kew, ¹⁸ su apey kenà metueni te menge etew te edlimpas kew te egkaan. Ne iyan dà netau ke Amey niyu ne Eleteala ne kenà egkekita. Ne iyan sikandin edlalew kenikew dut te mid-ulaula nu te sebseveka nu.”

Ke Penurù ni Hisus Mekeatag te Kedlimud ta te Kekewesai Tew Riyà te Langit

(Lucas 12:33-34)

¹⁹ “Kenà kew edlimud te kekewesai niyu kayi te ampew te dunya,” ke si Hisus, “su kayi ne ruen egketketen, ne ruen edtengisen, ne ruen menge tekawen ne edlusud te menge valey niyu su ebpemenakew. ²⁰ Ugaid ne iyan meupiya,” ke si Hisus, “ne edtuman kew te kiyug te Eleteala ne egkevaluy ne ruen kekewesai niyu riyà te langit ne kenà egketketen, ne kenà edtengisen, ne warà tekawen ne edlusud su ebpemenakew. ²¹ Su piya endei niyu idtahù ke kekewesai niyu, ne ketà dema ke hinawa niyu.”

Ke Sempità ni Hisus Mekeatag te Engkey se Ebpekerayag te Lawa ta (Lucas 11:34-36)

²² Ne migkahi pà maa si Hisus te, “Ke mata te etew ne iring te sulù dut te lawa rin su embiya merayag se kedmengteng din ne iyan din meana ne metidtu se ulaula rin, ne iring te egkerayahan ke langun ne lawa rin. ²³ Ugaid ne embiya edsehulepunen se kdmengteng din ne iyan din meana ne mereatey se ulaula rin, ne iring te egkerusireman ke langun ne lawa rin!”

Ke Penurù ni Hisus te Kenà Egkepakey ne Deruwa ke Edtehiuripen keyta

(Lucas 16:13; 12:22-31)

²⁴ “Warà edsugsuhuen,” ke si Hisus, “ne deruwa se edtehiuripen kandin. Su embiya deruwa se ebpengunguripen kandin, ne egkeepesan din ke seveka ne ed-edatan din ke seveka. Etawa ebperumaduma sikandin dut te seveka ne kenà din edsehipaan ke seveka. Su iring be kayi embiya iyan dekelà te hinawa nu ne kureta, ne kenà ka ebpeketuman te kiyug te Eleteala.

²⁵ “Tembù be iyan ku igkahi keniyu,” ke si Hisus, “kenà kew meuru te egkekaan wey ed-inumen ne igkeuyag niyu etawa ke engkey se ibevelegkas niyu. Su ke hinawa wey lawa niyu ne imbehey te Eleteala, ne maa kenà belielehà pà arà dut te egkekaan niyu wey belegkas niyu?”

²⁶ Keniyan niyu rè ma te menge uwak, warà kebpemula ran, ne warà ked-ehani ran, ne warà edtehuhan dan te egkekaan dan, ugaid ne ke Amey nu ne riyà te langit se ebpesavud kandan! Ne meambe, kenà belielehà kew pà dut te menge pepenuk? ²⁷ Ne engkey kenyi se nekesumpat te umur din te impelevayà te kegkeuru rin?

²⁸ “Embiya kenà ka ebpekegaga kayi, ne meambe ke egkeuru ka te ibevelegkas nu? Keniyan niyu rè ma te kevukaran ke engkey se kedtuvù dan. Kenà dan egelevek ne kenà dan ed-avel. ²⁹ Ne misan iring ketà ne igkahi ku kenyi te misan ke kewasa ne datù dengan ne si Salomon, ne ke keupiya te belegkas din ne warà dà mekesusuluwan dut te keupiya te seveka kenyi ne kevukaran. ³⁰ Embiya Eleteala se ebpebparas te kevukaran te sagbet iring ketà, misan mehaan dà se kedtuvù din su egkekita niyu guntaan ne keremà ne nehangu en ne egkevinsulan en, ne maa iyan kew pè be kenà behayi te ibevelegkas niyu? Sikiyu ne deisek se kedsarig niyu!

³¹ “Ketà be ne kenà kew meuru se egkahi te, ‘Engkey se egkekaan wey egkeinum dey? Ne engkey se ibevelegkas dey?’ ³²(Su ini imbe ke layun intahù te hinawa rut te menge etew ne kenà ebperetiyyaya te Eleteala.) Ugaid ne sikiyu, ne kenà kew meuru su netuenan dut te Amey niyu ne Eleteala ke engkey se kurang niyu. ³³Iyan niyu ipeuna te hinawa niyu ke kiyug te Eleteala wey ke Kedatù din kenyi, ne arà pè be ne ebehayan kew te Eleteala dut te langun ne kurang niyu. ³⁴Tembù be kenà kew meuru ke engkey se egketemanan niyu dut te menge hewii ne egkeuma. Su uman hewii ne idsengebias ke kerehenan din, ugaid ne wey niyu en pegitunga ke egkeuma en.”

7

Ke Penurù ni Hisus Mekeatag te Kedsawey ta te Menge Ruma Ta (Lucas 6:37-38, 41-42)

¹ Ne migkahi pà maa si Hisus te, “Kenà kew edsauey te ruma ne etew apey kenà kew edsewayan te Eleteala. ² Su edtimbangtimbangen kew te Eleteala iring te keditimbangtimbang niyu te ruma ne etew. Ne iyan din meana ne taman ne kerekelà te keditimbangtimbang niyu te ruma ne etew, ne arà en dema ke kerekelà ne keditimbangtimbang te Eleteala kenyi.

³ “Engketà be,” ke si Hisus, “ne meambe ke edturikan nu ke salà te ruma nu ne iring te pesek, ugaid ne warà ma te hinawa nu te ruen salà nu ne iring te gedgeran kerekelà din? ⁴ Engkey se keditikà nu te egkahi riyà te ruma nu te id-awà nu ke pesek din, ugaid ne ruen ma nekepesek kenikew ne iring te gedgeran kerekelà din ne kenà nu egketuusan? ⁵ Engkey en ayan ne keditarùtarù nu! Unai nu pà te ed-awà ke nekepesek kenikew ne iring te gedgeran, ne an pà ne ebpekekita ke en ne ebpengawà te pesek te ruma nu.”

Ke Sempità ni Hisus Mekeatag te Menge Etew ne Warà Adat din te Eleteala wey ke Lalag din

⁶ “Kayi te kebpenurù niyu ne kenà niyu ibpehes te ebpepemineg dut te menge etew ne warà adat din. Su ebpekeiring kew te idtimbag niyu riyà te asu ke kearen ne egkeedatan te Eleteala, ne eberiyung dan ne

ebuntalen kew. Ne kenà niyu idtimbag ke pirlas niyu riyà te menge bavuy su egiekan dan dà ini.”

*Mekeatag te Ebudemuyù diyà te Eleteala
(Lucas 11:9-13)*

⁷ Migkahi si Hisus te, “Embiya ebpengeningeni kew riyà te Eleteala ne buyù kew ne ebehayan kew rin. Pemengà kew ne ruen arà egketuen niyu. Penehetiat kew ne ebpuwasan kew rin. ⁸ Su langun ne ebuyù diyà te Eleteala ne ebehayan, ne ke etew ne ebpmengà ne ebpeketaen, ne ke etew ne ebpenetiat ne ebpuwasan ke lekeb kandin.

⁹ “Menu sikiyu ne menge lukes, embiya ebuyuan ka te anak nu te pan, maa batu se ibehey nu? ¹⁰ Etawa ebuyuan ka rin te serà, maa uled se ibehey nu? ¹¹ Sikiyu ne menusiyà ne kenà metidtu ne metau kew ne ebehey te meupiya riyà te anak niyu, na iyan pè be ke Amey niyu ne Eleteala ne riyà te langit kenà mebehey keykew te meupiya embiya ebuyù kew riyà te kandin.

¹² “Ne misan engkey ne egkiyuhana niyu ne ibped-ulaula te menge etew keniyu, ne iring ketà dema se ul-ulaa niyu riyà te kandan. Su ini se meana dut te penduan ne intelau ni Moises wey ke menge penurù dut te menge ebpelambas te Lalag te Eleteala rengan.”

*Ke Melihet wey ke Meluag ne Gumawan
(Lucas 13:24)*

¹³ “Lusud kew riyà te melihet ne gumawan,” ke si Hisus, “ne ebpependiyà te umur ne kenà edtaman. Su meluag ke gumawan ne merayun ke dalan ne ebpependiyà te apuy nerakà, ne merakel ke edtuntul ketà. ¹⁴ Ugaid ne melihet ke gumawan wey mepassang ne ibayà ke dalan ne ebpependiyà te umur ne kenà edtaman, ne merelag dà se ebpeketaen ketà.”

Ke Sempità ni Hisus Mekeatag te menge Etew ne Kenà Benar ne Ebpelambas te Lalag te Eleteala

(Lucas 6:43-44)

¹⁵ “Uram kew dut te menge etew ne engkungkun ne ebpelambas te Lalag te Eleteala. Su ebpendiyà dan te keniyu ne iring te paras te bilibili ne meamuk, ugaid ne riyà te hinawa ran ne iring dan te mewalew ne asu ne ebpekekaid. ¹⁶ Egkekilala niyu ke kenà benar ne ebpelambas te Lalag te Eleteala kayi te ulaula ran. Su iring te kayu, kenà ebahtas ke sepinit te paras ne kenà ebahtas ke degiyangas te igira. ¹⁷ Iring din ded dema ke kayu ne meupiya se kegueyhuey rin ne iyan din dà bahas ne meupiya. Ugaid ne ke kayu ne ruen sakit din ne iyan din bahas ne meraat. ¹⁸ Su ke kayu ne meupiya se kegueyhuey rin ne kenà ebahtas te mereatey, ne ke kayu ne ruen sakit din ne kenà ebahtas te meupiya. ¹⁹ Ne langun ne menge kayu ne kenà ebahtas te meupiya ne ebpiley ne idrapug su ebinsulan. ²⁰ Tembù be igkahi ku keniyu te egkekilala niyu ke kenà benar ne ebpelambas te Lalag te Eleteala kayi te ed-ul-ulaa dan.”

*Mekeatag te Menge Etew ne Kenà Ebpekelusud dut te Menge Etew ne Edetuan te Eleteala
(Lucas 13:25-27)*

²¹ Ne migkahi si Hisus te, “Kenà langun te menge etew ne edtawag kedì te ‘Is Kerenan, Kerenan’ ne ebpekelusud dut te menge etew ne

Edetuan te Eleteala ke kenà sikandan dà arà se edtuman dut te kiyug te Amey ku ne Eleteala ne riyà te langit. ²² Su embiya egkeuma arà se hewii te kegkukum te Eleteala ne merakel se ebpeyiruwiru kedi se egkahi te, ‘Is Kerenan, Kerenan, mibpesabut key te Lalag te Eleteala impepevayà te gehem te ngaran nu, ne mibpenegseg dey ke vusew ne ed-amung-amung te menge etew, ne merakel pà se mekegeyip ne neveelan dey! ²³ Ugaid ne iyan ku igkahi kandan te, ‘Sikiyu ne meraat se ulaula, kenà ku egketuenan sikiyu. Awà kew kayi! ”

Ke Deruwa ne Etew ne Ebevaley

(Lucas 6:47-49)

²⁴ “Tembù be,” ke si Hisus, “langun dut te nekerineg te lalag ku ne mibperumaruma, ne ebpekeiring dan te bereitungan ne etew ne riyà mebevaley te meresen. ²⁵ Ne midadsang ke uran ne midalem ke wayig ne nesuhat te keramag ini se valey, ugaid ne warà ini mepiley su riyà mekeitindeg te meresen.

²⁶ “Ugaid ne langun ne menge etew,” ke si Hisus, “ne nekerineg te lalag ku ne kenà dan ebperumaruma, ne iring dan te etew ne warà itungan din ne mebevaley riyà te pantad. ²⁷ Ne midadsang ke uran ne midalem ke wayig ne nesuhat te keramag ini se valey, ne arà dà ne nerundus en su neawet dà dut te keramag.”

Ruen Gehem te Kebpenurù ni Hisus

²⁸ Nekeipus si Hisus se ebpenurù te menge etew ne neinuinu ran nevenar, ²⁹ su kenà iring dut te kebpenurù te menge etew ne ebpenurù te penduan te menge Hudiyanan su ruen gehem din ini se penurù din.

8

*Neulian ni Hisus ke Senge Etew ne Kevuwaen ne muna pà te It-it
(Marcos 1:40-45; Lucas 5:12-16)*

¹ Guna su midtupang si Hisus ketà te buvungan ne mibpenuruuan din te menge etew, ne medmerakel se miduma kandin. ² Ne ruen etew ne egkevuwaen ne muna pà te it-it ne mid-uvvey ki Hisus. Ne midlumpeng en sikandin diyà te sineruwan ni Hisus se ebpemuyù te, “Mama, embiya perem egkiyug ke rà ne egkeulian nu ini se meredsik ne sakit ku.”

³ Ne midampen ni Hisus sikandin se egkahi te, “Uya, egkiyug a,” ke sikandin. “Meulii ka!” Arà dà ne neawà en ke sakit dut te meama su neulian en. ⁴ Ne migkahi si Hisus kandin te, “Kenà nu ve imbe kegkehiya ini te misan endei en, ugaid ne riyà ka tilandeng te terebpelengesa ne ibpekita nu kandin te neulian ke en. Ne ivehey nu te Eleteala ke ibpelengesa ne insuhù dengan ni Moises su apey metueni te langun te neulian ka.”

*Neulian ni Hisus ke Edsugsuhuen dut te Senge Etew ne Kepitan
(Lucas 7:1-10)*

⁵ Guna su nekeuma si Hisus diyà te inged ne Kapirnawum, ne ruen kepitinan ne kenà Hudiyanan ne egkamal te menge sundaru ne mid-uvvey kandin se ebpemuyù te tavang din. ⁶ “Mama,” ke sikandin, “duen edsugsuhuen ku ne ederaru riyà te valey ku su minatey ke divaluy ne lawa rin ne merasey nevenar se egeramen din.”

⁷ Ne migkahi si Hisus te, “Ebpendiyan a su apey ku meulii sikandin.”

⁸ “Mama,” ke se kepitan, “misan kenà ke en edlaus diyà te valey ku, su kenà a dait ne ebpmemeneyikan nu. Su dekelà se gehem nu ne misan igkahi nu te, ‘Meulii sikandin,’ ne egkeulian ini se edsugsuhuen ku. ⁹ Nesebutan ku ini su siaken ne ruen mepurù ku ne meperumaruma a kandin. Ne ruen menge sundaru ne egkemalan ku ne meperumaruma ran kediey. Su egkahi e rà te, ‘Diyà kew,’ ne iring dan te ebelesiken. Ne engketà ded ke egkahi a te, ‘Kayi kew,’ ne seperek mata ne kayi ran en. Ne embiya edsuhuen ku ini se edsugsuhuen ku te, ‘Ul-ulaa nu ini,’ ne arà en iya rema se ed-ul-ulaan din. Iring de be kayi,” ke se kepitan, “misan edlelehan nu rà ne egkeulian ini se edsugsuhuen ku.”

¹⁰ Nerineg ni Hisus ini ne neinuinu nevenar sikandin ne migkehiyan din ke menge etew ne miduma kandin te, “Sevenarbenar ne igkahi ku keniyu te warà e pà mekeuma te etew ne iring kayi kerekelà se sarig din kediey misan kayi te langun ne kevuwaran ni Israyil. ¹¹ Ini ve se idtarem ku keniyu ne merakel se menge etew ne egenat te edsilaan taman te edsenlepan ne ebpekeuma su ebpekepinuu te egkaan duma en ni Abraham wey ke anak din ne si Isaac wey ke apù din ne si Jacob diyà te menge etew ne Edetuan te Eleteala. ¹² Ugaid ne merakel ne menge kevuwaran ni Israyil ne mibpenehenaan perem te Eleteala dut te Edetuan din ne ibpependiyà te merusirem, ne ketà ne ebpekependerawit wey ebpekengingitel.”

¹³ Ne migkahi si Hisus dut te kepitan te, “Uli ke en. Su ke sarig nu kedi ne netuman en.” Ne ketà dà dema ne ke edsugsuhuen din diyà te valey ne neulian en.

*Neulian ni Hisus ke Mibpenderaru ne Etew
(Marcos 1:29-34; Lucas 4:38-41)*

¹⁴ Ne mibpendiyà si Hisus te baley ni Pedro ne ketà ne nekita rin ke enuhang ni Pedro ne meritan ne ed-id-irehà su edetengen. ¹⁵ Ne midampen ni Hisus ke velad din ne neawà en ke rateng din, ne mid-enew sikandin ne mid-ilutù en te ibpekaan kandan.

¹⁶ Guna su midsanlep en ke andew ne ruen merakel ne menge etew ne midsukan te vusew ne mibpeneheewit dan kayi te ki Hisus. Ne mibpenegseg ni Hisus ke menge vusew te impepevayà dà te lalag din, ne nengeulian din langun ne ebpenderaru. ¹⁷ Mid-ulaula rin ini su apey metuman ke impesurat ki Isayas ne ebpelambas te Lalag te Eleteala rengan se egkahi te,

“Sikandin en iya ke nekeulì te daru tew,
ne nekeawà te menge sakit tew.”

*Ke Menge Etew ne Egkiyug Perem ne Eduma ki Hisus
(Lucas 9:57-62)*

¹⁸ Guna su nekita ni Hisus ke medmerakel ne menge etew ne edlingut kandin ne migkehiyan din ke edumdumaan din te, “Kuwa kiyu en su ed-apet kiyu riyà te ripag te ranew.” ¹⁹ Ketà ne ruen senge etew ne mibpenurù te penduan ni Moises ne mid-uvey kandin ne migkahi te, “Meyterù, eduma a kenikew misan ebpependei ka.”

²⁰ Ne migkahi si Hisus kandin te, “Ke menge laku ne ruen takub ne ed-ul-ulian dan, ke menge pepenuk ne ruen kandan ne salag, ugaid ne ke Impeanak te Menusiyà ne misan endei en memekeirehà su warà ubpaan din.”

²¹ Ne ruen dema senge etew ne edumdumaan ni Hisus ne migkahi te, “Mama, ed-ulì e pà ne embiya egkepupusan en te ebpeneytayen ke amey ku ne arà pà ne eduma a kenicew, su siaken ded se edleveng kandin.”

²² “Kenà,” ke si Hisus, “su duma ka kedi. Ne iyan nu pelevenga rut te minatey ke menge rumu nu ne kenà ebperetiyaya kediey.”

*Impeengked ni Hisus ke Keramag Diyà te Ranew
(Marcos 4:35-41; Lucas 8:22-25)*

²³ Ketà maa ne mid-untud si Hisus te avang ne miduma ke menge edumdumaan din. ²⁴ Ne midtekewtekew se mevaher ne keramag ne nekesuhat ketà te ranew ne nelikuvungan en te baleg ini se avang dan. Ugaid ne nekelipereng si Hisus. ²⁵ Ne mid-uvey ran si Hisus ne mibpukew ran en se egkahi te, “Tevangi key, Kerenan, su egkekahem ini se avang ne egkeherà ki en!”

²⁶ Ne migkahi si Hisus te, “Meambe ke nengeandek-andek kew? Kurang kew te sarig kedi!” Ne mid-enew en ne pineengked din en ke keramag wey menge baleg, ne midlengen en ke ranew.

²⁷ Ne neinuinu ke menge edumdumaan din se egkahi te, “Engkey ini ne etew? Su misan ke keramag wey menge baleg ne ebperumaruma rut te lalag din!”

*Neulian ni Hisus ke Deruwa ne Etew ne Midsuukan te Menge Vusew
(Marcos 5:1-20; Lucas 8:26-39)*

²⁸ Nekerunggù en ensi Hisus diyà te ripag te ranew riyà te sakup te inged te Gadara, ne ketà ne ruen midsinuhung kandin ne deruwa ne etew ne riyà ebpuun te menge surung ne penlelevengan. Midsuukan te vusew ini se deruwa ne etew ne laus ne ebpekekaid ne igkeandek en sikandan te menge etew ne warà en editkà ne ebpevayà ketà te ralan. ²⁹ Ne migkuleyì dan te, “Sikuna ke Anak te Eleteala, ne engkey ma se kememeniyà nu kediey? Maa mibpengkayi ka su ebpemekeiran key nu misan kenà pà ini ke timpu?”

³⁰ Ruen ketà te uvey ran medmerakel ne bavuy ne ebpememenumal.

³¹ Ne mibpemuyù ke menge vusew ki Hisus te, “Embiya edsegsehen key nikuna ne ketà key nu ipeawuk te menge bavuy.”

³² Migkahi si Hisus kandan te, “Kuwa kew en!” Ketà dà ne mid-ewaan dan en ke meama ne mibpengasuk dan en dut te menge bavuy, ne mibpemelelahuy en ke menge bavuy se ed-umpak diyà te dempilas ne nengelened dan en diyà te ranew. ³³ Nekita ini rut te menge etew ne edtuganur ketà te menge bavuy ne mibpemelelahuy ran en diyà te inged su impemenudtul dan ini wey ke ned-ulaula rut te menge etew ne midsuukan te vusew. ³⁴ Guna su netuenan dut te menge etew ketà te inged ne midsamasama ran mibayà ki Hisus. Guna su nekeuma ran ne mibpemuyù dan kandin te menu ke med-awà sikandin ketà te inged dan.

9

*Neulian ni Hisus ke Meama ne Minatey ke Lawa Rin
(Marcos 2:1-12; Lucas 5:17-26)*

¹ Ne mid-untud en maa si Hisus te avang ne mid-apet dut te ranew ne mid-ulì diyà te inged din. ² Ne ruen menge etew ne nekeuma ne

ed-ewit te etew ne mid-irehà diyà te duyanà ne minatey se teví ne lawa rin. Guna su netuenan ni Hisus te rekèlà ke sarig dan kandin ne migkehiyan din en ke minatey se teví ne lawa rin te, “Kenà ka egkeuru, Mama. Nepesehad en ke keberedusaan nu.”

³ Ketà ne ruen dema ebpipinuu ne menge etew ne ebpenurù te penduan ne guna su nerineg dan ini ne iyan netahù te hinawa ran te, “Ini ne etew ne edsumpalit te Eleteala!”

⁴ Ugaid ne netuenan en ni Hisus ke netahù te itungan dan, ne migkahi en sikandin diyà te kandan te, “Meambe ke netahù te itungan niyu se iring keniyen ne meraat? ⁵ Endei rapit se melemu,” ke si Hisus, “te egkahi riyà te minatey se lawa rin te, ‘Ke menge salà nu ne nepesehad en’ etawa ve ke egkahi te, ‘Enew ka ne luluna nu ke ikam nu na ipanew ke en’”? ke sikandin. ⁶ “Ugaid ne guntaani ne ibpekita ku keniyen te ruen gehem dut te Impeanak te Menusiyà te ebpesahad te salà kayi te ampew te dunya.” Ketà ne migkehiyan din ke etew ne minatey ke lawa rin te, “Mama, enew ke en ne luluna nu ke ikam nu ne ulì ke en!” ⁷ Ne mid-enew en ke etew, ne midlulun din ke ikam din ne mid-ulì en. ⁸ Guna su nekita rut te langun ne menge etew ketà ne nengeandek dan, ne nereyù dan ke Eleteala su imbehey rin te menusiyà ini se gehem ne iring kayi.

*Mibpemilì ni Hisus si Mateo te Eduma Kandin
(Marcos 2:13-17; Lucas 5:27-32)*

⁹ Ne mid-awà en si Hisus ketà, ne gewii rin te ed-ipanew ne nekita rin ke senge etew ne meama ne ebpevayad te buwis ne ed-ingaranan ki Mateo ne ebpipinuu riyà te upisinà din. Ne migkehiyan ni Hisus sikandin te, “Duma ka kediey.” Arà dà ne mid-itindeg si Mateo ne miduma en kandin.

¹⁰ Ne senge hewii ne pinekaan si Hisus wey ke menge edumdumaan din diyà te valey ni Mateo, ne merakel ne ebpevayad te buwis wey ke menge kenè en birang ne menge etew ne nekeuma ne elin dan ki Hisus se migkaan ketà. ¹¹ Guna su nekita rut te menge Peresiyu ne dutun te uvey te valey ne nevurunan te ini se menge etew su egkaan, ne netegtehaad ne mibpendiyà dan te menge edumdumaan ni Hisus ne mid-insà te, “Meambe ke edseveka sikandin se egkaan ketà te menge etew ne ebpevayad te buwis wey ke menge kenè en birang ne menge etew?”

¹² Nerineg dà ni Hisus arà ne migkehiyan din en sikandan te sempità te, “Ke menge etew ne warà daru rin ne kenà dan ebpendiyà te terevawì, ugaid ne ke menge etew rà ne duen daru rin. ¹³ Ne iring din ded be rema kayi ini se menge etew su kenà iyan ku kinepengkayi se iyan ku ebpeuvayan ke menge metidtu kun se ulaula rin, ugaid ke menge etew ne kenà en birang apey ran mekedsendit,” ke si Hisus. “Ne ketà ne pegpegitunga niyu ke engkey se meana rut te impesurat ne Lalag te Eleteala ne egkahi te, ‘Kenà ku iyan egkiyuhan ke menge binatang ne ibehey niyu kedi ne ibpelengesa, ugaid ke kegkeyru niyu rut te menge rumu niyu.’ ”

*Ruen Menge Etew ne Mid-insà ki Hisus ke Meambe ke Kenà Edlimpas te Egkaan ke Menge Edumdumaan Din
(Marcos 2:18-22; Lucas 5:33-39)*

14 Ne ruen menge edumdumaan ni Juan ke Ebpembunyag ne nekeuma kayi te ki Hisus ne mid-insà te, “Sikami wey ke menge Pere-siyu ne layun edlimpas te egkaan, ugaid ne ke menge edumdumaan nu ne kenà edlimpas te egkaan. Ne meambe ini?”

Impeiring ni Hisus ke Hinawa Rin te Ibpengesawa

15 Ne midtavak si Hisus te, “Embiya ruen egkewingen, maa edlimpas ves maa te kegkaan ke menge etew ne pinetelavuk te ini pà ke ibpengesawa te kandan? Kenà en iya! Ugaid ne ruen hewii ne egkeuma ne egkeawà ke ibpengesawa diyà te kandan, ne ketà dan pà edlimpas te egkaan.”

Insempità ni Hisus te Kenà Egkepakey ne Ebpegembiten ke Behu ne Penurù din wey ke Raan ne Penurù dut te Keep-epuan Dan

16 Ne migkahi maa si Hisus te, “Kenà edait ne idapi nu ke behu ne saput ketà te neredit en ne velegkas, su embiya ebpedepiyen nu ne ketà te kebpipii nu ne egkenseng ke vehu ne saput ne egkevindas ke redit en ne velegkas ne tuwas pà te keluag te bisey rin. 17 Ne iring din ded dema,” ke si Hisus, “ke behu ne tebà su kenà egkepakey ne riyà nu idtahù te raan en ne edtehuan ne mibeelan ne lundis. Su embiya arà se ed-ul-ulaan nu ne edsevu ke tebà ne ebetu ke lundis ne midtehuan, ne edturayas ke tebà ne egkereetan, ne egkereetan dema ke midtehuan ne lundis. Tembù be iyan nu iya tehui te behu pà ne tebà ini se edtehuan ne behu pà ne mibeelan apey kenà egkereetan arà se tebà wey ke midtehuan.”

Neulian ni Hisus ke anak ni Jairo wey ke Meritan ne Mid-amì dà te Belegkas Din

(Marcos 5:21-43; Lucas 8:40-56)

18 Gewii te edlalag pà si Hisus kayi ne nekeuma se senge etew ne egkeunutan te menge Hudiyanan ne midlumpeng en diyà te etuvangan ni Hisus se egkahi te, “Behu pà ne minatey ke anak ku ne meritan, ugaid ne pengkayi ke en apey nu dempena sikandin ne egkeuyag ded.” 19 Ne mid-itindeg si Hisus ne midumaan kandin te ed-ulì abpeg ke menge edumdumaan din.

20 Ne ruen meritan ketà dema ne nerasey neveran su nekedsepulù en wey deruwa ne rahun se kebpemundasa rin te lengesa ne kenà egkeengked. Mibpenelektelek en sikandin diyà te uriyani ni Hisus ne mid-amì din dà ke belegkas ni Hisus. 21 Su kehinggaanawa rin te, “Embiya egkeamì ku rà misan ke belegkas din ne egkeulian en ini se sakit ku.”

22 Midlingì si Hisus ne nekita rin ini se meritan ne migkahi te, “Bayi, kenà ka egkeuru! Neulian ke en su sabap dut te kinesarig nu kediey.” Arà dà ne neulian en ke meritan.

23 Ketà ne mibpendiyan en si Hisus te baley te egkeunutan te menge Hudiyanan. Guna su nekita rin ke menge ebpememulendag te ediyaga te minatey, ne nerineg din en se ebpemenderawit, 24 ne migkehiyan din sikandan te, “Awà kew langun! Warà minatey ayan se vatà su nekelipereng dà sikandin!” Nerineg dan dà ini ne mid-engitan dan en sikandin.

25 Guna su mibpengawà en ke menge etew ne midlusud en si Hisus diyà te mibpereyanan dut te vatà ne migeweran din ke velad te vatà

ne mid-enew en se ed-ipanew. ²⁶ Ne nekeeneb en ke tudtul mekeatag dut te ini ne ned-ulaula diyà te langun ne nekeerivey ne inged ketà.

Neulian ni Hisus ke Deruwa ne Etew ne Nepisek

²⁷ Ne mid-awà si Hisus ketà ne gewii rin te ed-ipanew ne ruen deruwa ne etew ne pisek ne edtundug kandin. Midtawag dan kandin se ebpermuyù te, “Ey, sikuna ne kevuwaran ni David, ikeyru key nikuna!”

²⁸ Guna su nekepemenayik en si Hisus diyà te valey ne mid-uvey ke deruwa ne etew ne nepisek. Ne mid-insaan din sikandan te, “Menu, ebperetiyaya kew ve te egkeulian ku sikiyu?”

“Uya, Mama, ebperetiyaya key,” ke se menge pisek.

²⁹ Ne midampen ni Hisus ke mata ran ne migkahi te, “Sabap te kebperetiyaya niyu ne meulii kew en!” ³⁰ Arà dà ne nekekita ran en. Ne mid-il-ilutan ni Hisus te egkahi kandan te, “Kenà niyu penudtula ini te misan entei!”

³¹ Ugaid ne mid-awà dan ketà ne nasì dan en in-eneb ke tudtul mekeatag ki Hisus diyà te langun ne nekeerivey ne inged ketà.

Neulian ni Hisus ke Senge Etew ne Emew

³² Gewii te ed-awà en ke menge etew ne ruen maa menge etew ne nekeuma kayi te ki Hisus ne ed-ewit te senge etew ne neemew su midsukan te vusew. ³³ Ugaid ne guna su midsegseg en ni Hisus ke vusew ne mibpemekaid, ne nekelalag en ini se meama. Ne negeyip nevenar ke langun ne menge etew ketà ne mibpein-inseey ran te, “Taman te taman en ne warà tew pà mekita se iring kayi kayi te bansa tew te Israyil.”

³⁴ Ugaid ne migkahi ke menge Peresiyu ketà te, “Ke unuten te menge vusew se mibehey kandin te gehem te kebpenegseg te menge vusew.”

Neyruwan ni Hisus Ke Menge Etew

³⁵ Ne mid-eneb ni Hisus te ebayà ke langun ne reisek dekelà ne menge inged. Mibpenurù diyà te menge valey ne ebpengedian te menge Hudiyenan te penduan dan, ne impesabut din kandan ini se Meupiya ne Tudtul te Kedetui te Eleteala te menge etew, wey nengeulian ke menge etew ne ebpenderaru te misan engkey en ne ebpenggeramen. ³⁶ Ne uman din mekita ke medmerakel ne etew ketà ne egkeyruwan din sikandan su merungkug dan wey mekeyruwiru su iyan dan neiringan ne menge bilibili ne warà tumetuganur. ³⁷ Ne migkahi si Hisus diyà te menge edumdumaan din te, “Medmerakel se menge etew ne warà pà meketelimà dut te Meupiya ne Tudtul mekeatag te Eleteala. Iring dan te nelutuan ne parey. Meluag nevenar ini se pareyanan, ugaid ne warà utew ruma ne ebpengehani. ³⁸ Pemuyù kew riyà te kemuney te pareyanan te medsuhù pà sikandin te ruma ne ed-ehani diyà te pareyanan din.”

10

*Mibpemili ni Hisus ke Sepulù wey Deruwa ne Edumdumaan Din
(Marcos 3:13-19; Lucas 6:12-16)*

¹ Ne miburun ni Hisus ke sepulù wey deruwa ne edumdumaan din ne mibehayan din te gehem te kebpekesegseg te vusew ne ed-amung-amung te menge etew, wey gehem ne ebpekeuli te misan engkey ne daru wey sakit.

² Ini ke menge ngaran dut te sepulù wey deruwa ne edumdumaan din ne mid-ingaranan ni Hisus te epustulis: ke egkeuna ne si Simon (ke ed-ingaranan dema ki Pedro) wey ke ari rin ne si Andres; si Santiago wey ke ari rin si Juan ke menge anak ni Sibidiyu; ³ Si Felipe wey si Bartolome; si Tomas wey si Mateo ke ebpevayad te buwis; si Santiago ke anak ni Alpiyu, wey si Tediyu; ⁴ si Simon ke Patriat ne iyan din meana ne diralem se lengesa rin dut te inged din, wey si Hudas Iskeriyuti ke ed-ulug ki Hisus te ked-imetayi.

*Impeipanew ni Hisus ke Sepulù wey Deruwa ne Edumdumaan Din
(Marcos 6:7-13; Lucas 9:1-6)*

⁵ Ini se sepulù wey deruwa ne impeipanew ni Hisus ne midteleenan din te, “Kenà kew ebpendiyà te menge inged te menge etew ne kenà Hudiyenan wey menge inged te Semeriya. ⁶ Ugaid ne diyà kew te menge ruma tew ne menge kevuwaran ni Israyil ne iring te menge bilibili ne nelaag. ⁷ Diyà kew pesabut kandan te mehaan en ebpekeuma ke Kedetui te Eleteala te menge etew. ⁸ Bewii niyu ke menge ederaru, benawa niyu ke menge minatey, bewii niyu ke menge kevuwaen, wey penegseha niyu ke menge vusew ne ed-amung-amung te menge etew. Ini se netelimà niyu ne riyaw ebpuun te Eleteala ne warà niyu mevayari, ne kenà niyu rema buyui ke egketevangan niyu. ⁹ Kenà kew ewit te bulawan, pirak etawa pelatà kayi te kemuyut nu. ¹⁰ Kenà kew ewit te kempiru te ked-ipanew niyu, etawa idsambì ne belegkas wey telumpà, wey misan tuked. Su ke egelevek ne dait ne ebehayan te igkeuyag din.

¹¹ “Piya endei ne inged ne egkeumaan niyu, misan dekelà ne inged etawa deisek dà, ne pemengà kew te etew ne ebpepemenayik keniyu, ne ketà kew rà rateng taman te ked-awà niyu ketà te inged. ¹² Embiya ebpemenayik kew te valey ne penubtuvari niyu ke ed-upbà ketà te valey te, ‘Ebpeneuvan kew te Eleteala!’ ¹³ Ne embiya edtelimaen kew rut te etew ketà te valey, ne ke kinepenuvadtuvad niyu ne egketuman ketà te kandan. Ugaid ne embiya kenà dan edtelimà keniyu, ne ke kinepenuvadtuvad niyu ne keniyu red. ¹⁴ Ne embiya ruen inged ne warà ketà ne edtelimà keniyu etawa kenà dan ebpmineg dut te ibpesabut niyu, ne ewai niyu sikandan wey pendegdeha niyu ke lipupuk diyà te menge paa niyu. ¹⁵ Sevenarbenar ini se idtarem ku keniyu,” ke si Hisus, “muna pà ke kedusai te Eleteala kandan ketà te hewii ne keditimbang din te menusiyà dut te kinerusa rin te menge mehinged ketà te Sudum wey Gemura.”

Migkahi ni Hisus ke Keresayan wey Kebpekesakit ne Ebpekeuma kayi te Menge Etew

(Marcos 13:9-13; Lucas 21:12-17)

¹⁶ “Pemineg kew,” ke si Hisus, “su edsuhuen ku sikiyu riyaw te menge etew ne ebpekekaid, ne iring kew te menge bilibili ne ebpekeseruk diyà te senge ingeren en ne mewalew ne asu. Tembù be ingat kew ne pekeibpes kew iring te uled, ugaid ne kayi te ulaula niyu ne iring kew te melepati ne meamuk. ¹⁷ Uram kew su ebpenigkemen kew te menge

etew ne ibpepemenayik kew riyà te kukuman. Ne ebpenruuhen kew riyà te valey ne ebpengedian te penduan te menge Hudiyanan. ¹⁸ Ne edtuyuken kew riyà te menge egkeunutan wey menge mepurù su atag dut te kedsarig niyu kediey, ugaid ne ini en imbe ke ralan te kebpesabut niyu kandan wey ke menge kenà Hudiyanan dut te Meupiya ne Tudtul mekeatag kediey. ¹⁹ Ketà te ibpepemenayik kew riyà te kukuman, ne kenà kew meuru ke ebmenmenuwen niyu se kedlalag niyu te keddindeg te hinawa niyu wey engkey se ralan te kegkahi niyu, su ketà ne iyan niyu egkekahi ne lalag ne ibpekahai keniyu. ²⁰ Su iyan niyu egkekahi ne kenà keniyu ne lalag, ugaid ne lalag ne riyà ebpuun te Kedesenan ne Ebpetuntul te Menusiyà ne midsuhù te Amey tew ne Eleteala.

²¹ “Su ketà ne hewii ne ruen menge etew ne misan ke temperà dan te pused ne ed-uluhen dan su ebpeimetayan, ne iring din ded dema ke ed-ul-ulaan te amey dut te menge anak din. Ne ruen menge anak ne ebpekid-atu te menge lukes dan su ebpeimatayan dan. ²² Ne egkunteraan kew te langun su atag te keduma niyu kediey, ugaid ne ke etew ne kenà edsuwey te keduma rin kediey taman te kayi pà sikandin te ampew te dunya ne ebpekehaked te umur ne kenà edtaman. ²³ Embiyà ebpekesekitan kew nikandan diyà te senge inged su sabap te kebpesabut niyu ne pelahuy kew riyà te ruma pà ne inged. Su sevenarbenar ne igkahi ku keniyu te kenà niyu pà egkepasad ke helevek niyu riyà te langun ne menge inged te Israyil ne edlived en ke Impeanak te Menusiyà.

²⁴ “Su warà etew,” ke si Hisus, “ne ebpepenurù pà ne iyan en mepurù dut te ebpenurù kandin, ne warà uripen ne iyan en mepurù dut te mibpengunguripen kandin. ²⁵ Tembù be ebmehalew ke etew ne ebpepenurù pà ke egketamat din en ke ibpenurù kandin su apey ebpekeiring en sikandin dut te ebpenurù kandin. Ne iring din ded dema ke uripen ke ebpekeiring en dut te mibpengunguripen kandin. Ne embiya ke pengulu dut te telteleaanak ne ed-ingaranan ki Bilsibul ke egkeunutan te busew ne iyan pè be kenà tuwas pà ne meraat ke id-ingaran dut te menge anak din.”

*Ke Engkey se Dait ne Igkeendeki
(Lucas 12:2-7)*

²⁶ “Iyan se kenà kew meandek,” ke si Hisus, “dut te menge etew. Su langun te netelevan guntaani, ne ebpekepehawahawa red keuremà. Ne langun ne impegelesà, ne egkepayahan ded.

²⁷ Ini se ingkahi ku keniyu te merusirem, ne ipenudtul niyu en diyà te kerayahan. Ne ini se lalag ku ne sikiyu rà se nekerineg, ne ibpesabut niyu riyà te langun ne menge etew.

²⁸ Ne kenà kew meandek dut te menge etew ne iyan dà egkepatey se lawa niyu, ugaid ne kenà dan ebpekepatey te himukud niyu. Ugaid ne iyan niyu ikeandek ne Eleteala, su kenà lawa niyu rà se egkepatey rin su ruen gehem din te kebpekeantug te himukud niyu riyà te apuy nerakà. ²⁹ Su ruen deisek ne pepenuk ne egkepemasa te lelima ne timan ne deruwa rà ne tumba. Ne misan iring ketà se kevavà te

elehà din, ne warà seveka kandan ne egkeulug diyà te tanà embiyà kenà egkiyug ke Amey niyu ne Eleteala.³⁰ Ne iyan kew pè be melipati te Eleteala su misan ke editiweruwan te bulvul niyu ne nevirang din en.³¹ Engketà be ne kenà kew meandek su iyan kew pà belielehà diyà te kandin dut te merakel ne pepenuk.”

*Ke Imbaag ni Hisus Mekeatag Dut te Menge Etew ne Ebparew Kandin
(Lucas 12:8-9)*

³² “Piya engkey ne etew,” ke si Hisus, “se ebpayag diyà te menge etew se ebpesakup kediey, ne iyan ku rema ibpayag diyà te suluhuen te Amey ku ne Eleteala diyà te langit ne ed-engkunen ku sikandin te kediey ne sakup.³³ Ugaid,” ke si Hisus, “piya engkey ne etew se ebparew riyà te menge etew te sakup ku sikandin, ne kenà ku rema ed-engkunen te sakup ku sikandin diyà te menge suluhuen te Amey ku ne Eleteala diyà te langit.”

*Ke Kebperetiyyaya ki Hisus ke Puunan te Kebpemekedsinggey te Hinawa Dut te Telteleanan
(Lucas 12:51-53; 14:26-27)*

³⁴ “Maa, iyan niyu kunaan,” ke si Hisus, “ke ini se kinepengkayi ku ne ed-ewit a te kebmelinew kayi te kelibutan? Kenà iring ketà! Su idtarem ku keniyu te kenà kebmelinew, ugaid ne kayi ebuun te kinepengkayi ku ne ebpekunkuntereey ke itungan dut te menge etew.³⁵ Su sabap te mibpengkayi a

ne egkunterà ke menge anak ne meama dut te amey ran,
ne egkunterà ke menge anak ne meritan dut te iney ran,
ne egkunterà ke enuhang ne meritan dut te ambey ran,

³⁶ ne iyan mepasang ne egkekunterà te menge etew
ke megeget ne sikandan ded ne ebpenusuled.

³⁷ “Embiyà ruen etew ne iyan pà dekelà se limù din dut te amey rin wey iney rin kenà siaken, ne kenà edait sikandin ne edumduaan ku. Iring din ded dema ke etew ne iyan pà dekelà se limù din dut te anak din kenà siaken, ne kenà edait sikandin ne edumduaan ku.³⁸ Ke etew ne egkiyug ne eduma kediey ne iyan iya se lipati rin ke kandin ne kiyug ne tianga rin ke kandin ne pinebelavag ne kayu ne ed-ingaranan te krus ne iyan din meana ne tumana rin ke menge suhù ku misan ibpatey rin. Su embiya kenà, ne kenà edait sikandin ne edumduaan ku.³⁹ Su ke etew ne egkenuhun te umur din, ne ebpatet lavew. Ugaid ke etew ne iyan din ibpatey se keduma rin kediey te kebpemesabut dut te Meupiya ne Tudtul, ne ruen umur ne ibehey kandin ne warà edtemenan din.”

*Mekeatag te Kebehey te Eleteala te Lalew
(Marcos 9:41)*

⁴⁰ “Piya entei ne etew,” ke si Hisus, “ne edtelimà keniyu, ne midtelimà dema kediey. Ne misan entei ne etew ne edtelimà kediey, ne kenà siak dà se midtelimà din su ke Amey ku rema ne Eleteala ne midsuhù kediey ne midtelimà din ded.⁴¹ Ne piya entei ne etew ne edtelimà te etew ne ebpelambas te Lalag te Eleteala su midtendù te Eleteala ini se etew ne ebpelambas te lalag din, ne egkevehayan te Eleteala arà se etew te lalew iring dut te lalew te midtendù din ne ebpelambas te lalag din. Ne iring din ded dema ke etew ne edtelimà te metidtu

ne etew su sabap te ketidtu rin, ne egkevehayan te Eleteala te lalew iring te lalew dut te metidtu ne etew.⁴² Ne benar ini se egkehiyen ku keniyu, misan meadsil dà ne wayig se ibpeinum dut te senge etew ne edumdumaan ku su atag dut te keduma rin kediey, ne ruen lalew rin. Misan ke kevevaan en dut te edumdumaan ku ini se pineinum din.”

11

*Ke Menge Midsuhù ni Juan Diyà te ki Hisus
(Lucas 7:18-35)*

¹ Nekepasad si Hisus te kebpenurù din dut te sepulù wey deruwa ne edumdumaan din, ne mid-awà sikandin ketà ne mibpendiyà te menge sepiiring ded ne inged su ebpenurù wey ebpesabut te Lalag te Eleteala.

² Ugaid ne riyan en te bilengguan si Juan ke Ebpebunyang. Ne guna su nerineg din ke mekegeyip ne mid-ulaula ni Hisu Kristu, ne ruen menge edumdumaan din ne midsuhù din diyà te ki Hisus te ebpeinsaen.³ Nekeuma ran ne migkahi ran te, “Menu, sikuna ke impesabut ni Juan ne ibpepengkayi te Eleteala etawa ruen duma pà ne egkepenareng dey?”

⁴ Ne midtavak si Hisus te, “Ulì kew en diyà te ki Juan ne penudtula niyu kandin ini se nekita niyu ne mid-ulaula ku wey ini se nerineg niyu ne migkahi ku.⁵ Iyan niyu peketueni kandin ne kayi ebpun te kediey ne nekeulit en se kebpekekita rut te menge pisek, nekeipanew en ke menge pungkù, neulian en ke menge kevuwaen, nekerineg en ke menge bengel, neuyag en ke menge minatey wey impesabut ku ke Meupiya ne Tudtul diyà te menge ayuayu,” ke si Hisus.⁶ “Ne peketueni niyu kandin te dayirayi nevenar ke etew ne kenà eduwaruwa kediey.”

⁷ Guna su nekehenat en ke menge edumdumaan ni Juan, ne middlag en si Hisus mekeatag ki Juan diyà te denda ne menge etew ne nevurun, ke sikandin te, “Ketà te kinependiyà niyu te ki Juan diyà te tanà ne kenà egkeubpaan te menge etew, ne engkey se mibpenareng niyu? Maa, ebpenareng kew te ebpekekita kew te etew ne iring te karan ne edsemsemberen te keramag?⁸ Engkey ve iya, etew ne mibevelegkas te nepenù te rayandayan? Kenà buwa, su ke etew ne mibevelegkas te iring ketà ne riyà niyu rà egkekita te turuhan te menge ratù.⁹ Na, engkey ve iya se mid-intengan niyu? Engkey, etew ne ebpelambas te Lalag te Eleteala? Arà imbe! Ugaid ne igkahi ku keniyu te arà se nekita niyu ne labi pà dut te etew ne ebpelambas te Lalag te Eleteala.¹⁰ Su si Juan ini ke nekahi te Eleteala rut te impesurat ne Lalag din rengan se egkahi te,

‘Duen edsuhuen ku ne ibpeuna ku keykew
te kebpekepenehana rut te menge etew te kebpekeuma nu.’

¹¹ Sebenarvenar ini,” ke si Hisus, “warà pà etew ne in-anak kayi te ampew te dunya ne ebpekerekrepeng ki Juan ke Ebpebunyang. Ugaid ne misan ke kevevaan en ne etew dut te langun ne Edetuan te Eleteala diyà te langit keuremà ne muna pà sikandin ki Juan.¹² Igenat dut te kebpesabut ni Juan taman guntaani ne mibpekepesangan ini se menge Edetuan te Eleteala riyà te langit, ne ruen menge etew ne edtehel edahew te Kedatù.¹³ Su ini se Edetuan te Eleteala ne impesabut dengan dut te langun ne ebpelambas te Lalag te Eleteala wey riyà te penduan ni Moises taman te hewii ne migemew en si Juan.¹⁴ Ne impesabut

dan dema te edlived ded si Elias, senge etew ne ebpelambas te Lalag te Eleteala rengan. Ne embiya egkiyug kew ne ebperetiyaya dut te impesabut dan, ne si Juan ne si Elias ded. ¹⁵ Tembù be,” ke si Hisus, “itaan niyu ke telinga niyu kayi te migkahi ku ini!”

¹⁶ “Ugaid ne ini se menge etew te hunttaani en,” ke si Hisus, “engkey se ebpeiringan ku? Iring dan en iya te menge vatà ne ebpermimpinuu riyà te kevurunan. Ed-umew ini se senge puntu diyà te menge rumaran te,

¹⁷ ‘Middlebpad key, ugaid ne warà kew medsayew!

Mibminudar key, ugaid ne warà kew medsinehew!’

¹⁸ Iring din ded dema ke kebpekeuma ni Juan, su nekita niyu te edlimpas te kegkaan si Juan ne kenà dema ed-inum te piya engkey ne ebpeketevereg ne iyan niyu migkahi se, ‘Midsukan sikandin te vusew!’ ¹⁹ Ne mibpengkayi ke Impeanak te Menusiyà ne nekita niyu te migkaan sikandin wey med-inum ne iyan niyu maa migkahi se, ‘Tengtengi niyu ma ayan se midelungan te bilil! Ne metehel ne ed-inum! Ne teleduma kayi te ebpevayad te buwis wey misan ke menge etew ne kenà en birang.’ Ugaid, ke si Hisus, ketà te menge ulaula te menge etew ne tidtu ne mibperetiyaya te Eleteala ne nekeheram te limù din, ne egkekita te utew metau ke Eleteala te langun ne petiralan din.”

Mekeatag te menge Etew ne Warà Med-engked te meraat ne Ulaula Ran

(Lucas 10:13-15)

²⁰ Ne midsewayen ni Hisus ke menge etew ketà te inged ne merakel se impekita rin ne menge mekegeyip, su warà dan engkeri ke menge meraat ne ulaula ran. ²¹ “Sikiyu ne menge etew riyà te inged ne Kurasin,” ke si Hisus, “mekeandek-andek se egketemanan niyu! Ne sikiyu riyà te inged ne Bitsaida, mekeandek-andek dema se egketemanan niyu! Su embiya ke menge etew rà diyà te menge inged ne Tiru wey Sidun se nekekita kayi te menge mekegeyip ne mid-ulaula ku riyà te kenyi, ne neuhet dà ne mid-ewaan dan en ke meraat ne ulaula ran ne mibevelegkas dan en te sakù ne mid-evuwan dan ke ulu ran su tuus te nekedsendit dan. ²² Tentenuri niyu ini su ketà te hewii ne kedtimbang te Eleteala te menusiyà ne iyan pà dekelà se kedusa te Eleteala kenyi rut te menge mehinged te Tiru wey Sidun. ²³ Ne sikiyu rema ne menge etew riyà te inged ne Kapirnawum,” ke si Hisus, “egkesuat kew perem ne ebpekesugkur diyà te langit, ugaid ne ibpeantug kew riyà te apuy nerakà. Su ini se mekegeyip ne mid-ulaula ku ne impekita ku kenyi ne embiya ingkepekita ku rà ini riyà te inged ne Sudum, ne warà dan dereeti te Eleteala ne kemulu ran pà guntaani. ²⁴ Tembù be tentenuri niyu ini su ketà te hewii ne kedtimbang te Eleteala te menusiyà, ne muna pà se kedusai rin kenyi rut te mehinged diyà te Sudum!”

“Pengkayi kew te kediey,” ke si Hisus, “ne Imeley kew”

(Lucas 10:21-22)

²⁵ Ne ketà ne mibpengeningi si Hisus se egkahi te, “Ew Amà, sikuna ke Kerenan diyà te langit wey kayi rema te ampew te dunya. Dekelà se kebpselamat ku kenikew su impayag nu ke ketau nu rut te menge etew ne warà egketütuenan din, ne in-eles nu ini se ketau

nu rut te menge etew ne dekelà se netuenan din. ²⁶ Uya, dekelà se kebpeselamat ku kenikew, Amà, su ini se mid-ulaula nu ne ini ke kiyug nu.”

²⁷ Ne migkahi si Hisus diyà te menge etew te, “Ke Amey ku se mibpesarig kediey te langun taman. Warà netau kedì te Anak a te Eleteala liyu rà te Amey ku ne Eleteala. Ne warà netau te Amey ku ne Eleteala liyu rà te siaken ne Anak din wey ke menge etew ne egkiyuhan ku te ebpayag mekeatag dut te Amey ku.”

²⁸ “Pengkayi kew te kediey,” ke si Hisus, “langun niyu ne nengeluhat wey nengevahatan, su ebpeimelayen ku sikiyu. ²⁹ Isangan niyu ke ingkul ku diyà te keniyu ne iyan din meana ne guru kew kayi te kedì ne tumana niyu ke penurù ku, ne ebpekeimeley kew su siaken ne metmetulanged wey dekelà se kegkeyru ku. ³⁰ Su ini se penurù ku ne melemu ne edtumanen, ne meagkap ini se ibpevava ku keniyu.”

12

Ke Impenurù ni Hisus Mekeatag te Hewii ne Id-imeley

(Marcos 2:23-28; Lucas 6:1-5)

¹ Senge hewii te Sepetu, ke Hewii ne Id-imeley, ne midtarà en si Hisus diyà te pareyanan. Nevitil ini se menge edumdumaan ni Hisus ne mibpengetu ran ke tiugkayan ne mibpengurib su idsungit dan.

² Nekita rà ini dut te menge Peresiyu ne migkehiyan dan en si Hisus te, “Tengtengi nu ma ayan se menge edumdumaan nu su nekesurang en ayan se ed-ul-ulaan dan dut te Penduan tew ne egkahi te warà egelevek te Andew te Id-imeley.”

³ Ne migkehiyan ni Hisus sikandan te, “Maa, warà niyu ves mevasa ke impesurat te Eleteala mekeatag te mid-ulaula ni David, ke ratù tew rengan? Su ruen hewii ne sikandin wey ke menge sundaru rin ne nengevitil dan. ⁴ Ne midlusud si David diyà te Valey te Eleteala ne migkuwa rin ke egkeenen ne indenà diyà te Eleteala ne migkaan din ne mibehayan din ke menge ruma rin. Ugaid ne kayi te Penduan tew ne kenà arà egkekaan te piya entei ne etew su ke menge terebpelengesa rà te Eleteala. ⁵ Nevasa niyu red ura kayi te Penduan tew ne impesurat ki Moises ne egelevek ded ke menge terebpelengesa riyà te Nekebpuru ne Valey te Eleteala ketà te Hewii ne Id-imeley misan ebpekesurang dut te Penduan tew te arà ne hewii, ugaid ne warà mekedsalà. ⁶ Benar ini se igkahi ku keniyu,” ke si Hisus, “te ruen nekeuma en kayi ne muna pà se gehem din dut te Nekebpuru ne Valey te Eleteala. ⁷ Su ruen impesurat ne Lalag te Eleteala ne egkahi te, ‘Kenà ku iyan egkiyuhan ke menge binatang ne ibehey niyu kedì ne ibpelengesa, ugaid ke kegkeyru niyu rut te menge ruma niyu.’ Embiya nesebutan niyu ke meana kayi te impesurat ini,” ke si Hisus, “ne warà kew mekekahi geina te nekedsalà ini se menge etew ne warà meraat ne mid-ulaula ran. ⁸ Su ke Impeanak te Menusiyà ke ebayàbabayà se egkahi te engkey se edait ne ed-ul-ulaan dut te Hewii ne Id-imeley.”

Ke Meama ne Nekeyengkeng ke Belad Din

(Marcos 3:1-6; Lucas 6:6-11)

⁹ Mid-awà si Hisus ketà ne mibpendiyà te baley ne ebpengedian te menge Hudianen te penduan dan. ¹⁰ Ne ruen ketà senge etew ne meama ne nekeyengkeng se belad din. Duen dema ketà menge

Peresiyu ne ebpenipat ki Hisus su ebpemengà dan te kebpekesurang din te penduan dan kayi te Hewii ne Id-imeley apey ruen id-isuhat dan kandin ne kevenar. Ne mid-insà dan ki Hisus te, “Kayi te penduan tew menu, idtuhut be kenitew se ebpmawì te Hewii ne Id-imeley?”

¹¹ Ne migkahi en si Hisus kandan te, “Embiya ruen senge etew keniyu ne ruen bilibili rin ne neulug diyà te meralem ne kalut te Hewii ne Id-imeley, ne maa kenà niyu edegdehawan te ebpehaun su geina ne Hewii ne Id-imeley? ¹² Ne muna pà ne belielehà ke etew dut te bilibili! Tembù be kayi te penduan tew ne kenà ki ebpekesurang ke edtevangan ta te ruma ta misan Hewii ne Id-imeley.”

¹³ Ne migkehiyan en ni Hisus ke meama ne nekeyengkeng ke velad din te, “Mama, ketenga nu ayan se velad nu.” Ne ketà ne migketeng dut te meama ke velad din ne neulian en, ne warà ded bira rin dut te divaluy ne velad din. ¹⁴ Ketà ne mid-awà ke menge Peresiyu ne mibpemengà dan se ralan te kegkeimetayi ran ki Hisus.

Si Hisus ke Mibpemili ne Edsugsuhuen te Eleteala

¹⁵ Guna su nerineg ni Hisus ini se netahù te itungan rut te menge Peresiyu, ne mid-awà sikandin ketà te inged ne denda ne menge etew se miduma kandin. Ne neulian din ke langun ne ebpenderaru, ¹⁶ ugaid ne mibenduan ni Hisus sikandan te kenà dan peketueni te ruma ne etew ini se mid-ulaula rin. ¹⁷ Iyan din kinekahи kayi su apey metuman ke impesurat te Lalag te Eleteala ne impekahi ki Isayas te,

¹⁸ “Ini ke sugsuhuen ku ne mibpemili ku,
sikandin ke igkelimù ku,
ne ebpekesuhat sikandin te hinawa ku.

Ebpelumunan ku sikandin
dut te Kedesenan ne Ebpetuntul te Menusiyà,
ne ini se metidtu ne kukuman ku
ne ibpesabut din diyà te langun ne menusiyà.

¹⁹ Ugaid ne kenà sikandin ebpekidlawan etawa ebpemensag,
ne kenà sikandin edwaakwaak en se edlalag
diyà te kevurunan te menge etew.

²⁰ Embiya idsempità ta ke ulaula rin kayi te menusiyà,
ne kenà din ebedtien en ke etew ne iring te subpang ne migerì en,
ne edtulengeran din ke etew
ne iring te ebmelatmelat ne sulù ke sarig din,
ne kenà ed-engked ke tavang din taman te egketalew rin
langun ne kenà metidtu.

²¹ Ne kayi te kandin ne ebpekesarig
ke langun ne menusiyà.”

*Iyan Kunaan te Menge Etew ne Riyà Ebpuun te ki Bilsibul ke Unuten
te Busew ini se Gehem ni Hisus
(Marcos 3:20-30; Lucas 11:14-23)*

²² Ne ruen menge etew ne mid-ewit kayi te ki Hisus te etew ne nepisek wey neemew su midsuukan te vusew. Midsegseg ni Hisus ke vusew kayi te meama ne neulian en, ne nekelalag wey nekekita en.

²³ Nengegeyip ke menge etew ketà ne ke sikandan te, “Menu, sikandin be buwa ini ke nekahи te Eleteala ne kevuwaran ni David ke datù tew rengan?”

²⁴ Guna nerineg ini rut te menge Peresiyu ketà ne migkahi ran te, “Si Bilsibul ke unutan te menge vusew se mibehey kandin te gehem te kebpenegseg te menge vusew.”

²⁵ Ugaid ne netuenan ni Hisus ke netahù te itungan dan ne migkahi en te, “Upama ke ruen datù te inged ne iyan ded ed-uney ebpevunuey ke menge sakup din, ne egketunggad arà se inged din. Ne iring din ded dema ke ruen pehinged etawa telteleanan ne iyan ded ed-uney egkewaha, ne warà ebpengkusan din ke kenà egkevurahey. ²⁶ Iring din ded be ketà ke midetuan ni Setanas ke unuten te menge vusew. Embiya iyan ded ed-uney ebpevunuey ke sakup din ne kenà meuhet se kedadù din su egketunggad arà se edetuan din. ²⁷ Embiya benar ne iyan ku ibpenegseg te vusew ke gehem ni Bilsibul, ne endei ve ebpuun ke gehem dut te edumaruma keniyu te ebpengseg te vusew? Sikandan be ayan se ebpekekahi te warà mekesuhat ke egkehiyen niyu. ²⁸ Ugaid ne iyan benar ne riyà ebpuun te Kedesenan ne Ebpetuntul te Menusiyà ini se gehem ku te ebpengseg te vusew. Sabap kayi ne egketuenan niyu te neuma en ke hewii te Kedadù te Eleteala keniyu.

²⁹ “Ugaid ne netalew ku en si Setanas ke unuten te menge vusew,” ke si Hisus, “tembù be ebpekesegseg a te menge sakup din. Su warà etew ne ebpekelusud te valey te etew ne mevaher apey eppenakew te menge kearen din embiya kenà din ed-unaan pà te ebakù arà se etew ne mevaher. Ugaid ne embiya nevakù din en, ne arà pà ne ebpekekua sikandin dut te kearen.

³⁰ “Su ke etew ne kenà ku ruma ne kunterà ku,” ke si Hisus. “Ne ke etew ne kenà ed-amung kediey te eburun kayi te menge etew, ne ebpemburahey. ³¹ Tembù be igkahi ku keniyu,” ke si Hisus, “te egkepesahad te Eleteala ke langun ne menge salà te menge etew ne misan engkey ne meraat ne edlelehan dan kandin. Ugaid ke etew ne edlalag te meraatey mekeatag dut te Kedesenan ne Ebpetuntul te Menusiyà, ne kenà en vulug egkepesahad te Eleteala ke salà din. ³² Ne misan engkey en ne etew ne edlalag te meraatey mekeatag dut te Impeanak te Menusiyà ne egkepesahad te Eleteala te salà din, ugaid ne misan engkey ne etew ne edlalag te meraatey mekeatag dut te Kedesenan ne Ebpetuntul te Menusiyà, ne kenà en vulug egkepesahad te Eleteala ke salà din taman te taman.”

Ke Ulaula te Menge Etew ne Ebpekeiring te Ebahas ne Kayu (Lucas 6:43-45)

³³ “Upama ke iring te kayu,” ke si Hisus, “embiya meupiya se kegueyhuey rin ne kayu, ne kenà ebahtas te meraatey. Ne engketà ded maa ke kayu ne ruen sakit din, ne kenà ebahtas te meupiya. Ketà be ne egketuenan ta embiya meupiya ke kayu kayi te bahas din. ³⁴ Engketà ded dema te sikiyu. Iring kew te menge uled ne ebpekekaid, ne warà meupiya ne egkekahi niyu geina te memeraatey ini se netahù te hinawa niyu. Su piya engkey se intahù te etew te hinawa rin, ne ini se egemew te bëbà din. ³⁵ Su ke etew ne meupiya se ulaula rin, ne meupiya rema se kedlalag din su meupiya se intahù te hinawa rin. Ugaid ke etew ne meraatey se ulaula rin, ne meraatey rema se kedlalag din su iyan din intahù te hinawa rin ne meraatey. ³⁶ Tentenuri niyu ini su ketà te hewii ne kedtimbang te Eleteala te menusiyà, ne ibpetavak te Eleteala te menge etew ke uman senge tahà ne nelalag dan ne warà

rantek din. ³⁷ Su ke langun ne menge lalag niyu ne migemew te bèbà niyu, ne ketà kew edtimbanga ke edusaan kew ve etawa kenà.”

*Mibuyù ki Hisus ke Menge Peresiyu te Ed-inteng Dan te Ed-ul-ulaan
Din ne Mekegeyip*

(*Marcos 8:11-12; Lucas 11:29-32*)

³⁸ Ketà te menge etew ne nevurun ne ruen menge meyterù te penduan wey menge Peresiyu ne migkahi te, “Meyterù, egkiyug key ne ed-inteng te mekegeyip ne ed-ul-ulaan nu tuus te gehem nu.”

³⁹ Ugaid ne migkahi si Hisus te, “Sikiyu ne menge etew te guntaani en, meraatey nevenar se ed-ul-ulaan niyu su warà kebperetiyyaya niyu te Eleteala! Ugaid ne warà en ma tuus ne ibpekita keniyu liyu rà ketà te netemanan ni Jonas ne mibpelambas te Lalag te Eleteala rengan.

⁴⁰ Su mid-iveleng te dekelà ne serà si Jonas ne taman te tetelu ne hewii ne riyà dà sikandin te hetek te rekelà ne serà. Ne engketà ded dema ke Impeanak te Menusiyà ne riyà sikandin te diralem te tanà lusud te tetelu ne hewii. ⁴¹ Su ketà te akir din ne hewii te kedtimbang te Eleteala te menusiyà ne ed-itindeg ini se menge etew ne riyà ebpuun te Niniva rengan su ed-isuhat keniyu te kewagib. Su sikandan mulà ne nerineg dan dà ke Lalag te Eleteala ne impesabut ni Jonas kandan ne nekedsendit dan en ne mid-ewaan dan en ke meraat ne mid-ulaula ran. Guntaan ne ruen mepurù pà ki Jonas ne kayi te keniyu, ugaid ne kenà niyu edtelimaan ke penurù din ne kenà kew ebpedsendit te meraat ne ulaula niyu. ⁴² Su ketà te akir din ne hewii te kedtimbang te Eleteala te menusiyà,” ke si Hisus, “ne duen Bai ne riyà ebpuun te inged ne Siba ne ed-itindeg ne ed-isuhat te kewagib dut te sikiyu ne menge etew guntaan. Su mibpengkayi sikandin se riyà ebpuun te divaluy te pehiliran su apey mekerineg dà ki Salomon ke Ratù dengan ne metmetau. Ne ruen en guntaan seveka ne mepurù pà ki Salomon ne ini en te keniyu!”

*Ke Kedlived te Busew Dut te Etew ne Midsuukan Din
(Lucas 11:24-26)*

⁴³ Ne migkahi pà maa si Hisus te, “Embiya ruen busew ne edsuuk te etew ne ed-awà en, ne riyà ebpevayà te memara ne tanà su ebpmengà te ubpaan din. Ne embiya warà egketuen din, ⁴⁴ ne iyan egketahù te hinawa rin se, ‘Edliveran ku red ke mid-ubpaan ku.’ Nekeuma ini se busew, ne nekita rin te metilak en wey nekeulit en ke langun ketà te lusud. ⁴⁵ Ne midlihawang pà sikandin su mid-ewit te pitu ne vusew ne tuwas pà kandin keraat, ne langun dan ne ketà dà mid-ubpà. Ne ini se egketemanan dut te etew ne muna pà se kepasang din dut te neuna. Engketà ded dema se egketemanan dut te menge meraat ne etew te guntaani en.”

*Ke Impetimbang ni Hisus te Iney Rin wey Menge Suled Din
(Marcos 3:31-35; Lucas 8:19-21)*

⁴⁶ Edlagal pà si Hisus ne nekeuma en ke iney rin wey ke menge ari rin ne meama. Ne riyà dan dà te luwal meketaman ne mibpesuhuan dan dà si Hisus. ⁴⁷ Ne senge etew ketà se migkahi ki Hisus te, “Ke iney nu wey ke menge ari nu ne riyà te lihewangan su ebpekibalak dan keykew.”

⁴⁸ Ne migkahi si Hisus te, “Duen pà ibpekita ku keniyu ne iring te iney ku wey ke menge suled ku.” ⁴⁹ Ne interù din ke menge edumdumaan din ne ke sikandin te, “Sikandan ini ke iney ku wey ke menge suled ku! ⁵⁰ Su misan engkey se ebperumaruma te kiyug te Eleteala, ne sikandan en imbe ke menge suled ku ne meama, ke menge etevey ku, wey ke iney ku.”

13

*Mibpenempità si Hisus Mekeatag te Etew ne Midsawed te Benì
(Marcos 4:1-9; Lucas 8:4-8)*

¹ Arà ne hewii ne mid-awà si Hisus ketà te valey ne mibpendiyà te beyvey te ranew, ne ketà mibpinuu su ebpenurù. ² Ne geina te medmerakel ne menge etew ne midlingut kandin ne mid-untud sikandin te avang diyà te gebgevasan su ebpenurù. Ne riyà dà te beyvey te ranew ke menge etew ne ebpemineg kandin. ³ Ne merakel se impenurù din kandan ne impepevayà te sempità.

“Ruen etew,” ke si Hisus, “ne mibpendiyà te pengengewiran din su edsawed te benì. ⁴ Ne ketà te kinesawed din ne ruen benì ne nengeulug diyà te kilid te ralan ne midtuktuk en te menge pepenuk. ⁵ Ruen ruma ne insawed din ne riyà nengeulug te kebetuwan ne mevavew se tanà din. Ne geina te mevavew ini se tanà din, ne mehaan dà se kinetuvù din. ⁶ Ugaid ne guna su mid-endawan en ne petuluy ne migkuley ke dawun din geina te warà meketuneb ke ralid din, ne neebmas en. ⁷ Ke ruma pà ne riyà nengeulug te sepinitan ne guna su midtuvù en ini ne migkubmusan en dut te sepinit. ⁸ Ugaid ne ruen ruma pà ne riyà nengeulug te meupiya ne tanà, ne midretek ne meselinuvù se tuvù din, ne nekevahas te meupiya su ruen mibpengupiya neverar se bahas din, ne ruen migkakey, ne ke ruma pà ne ruen ded neehani. ⁹ Itaan niyu ke telinga niyu,” ke si Hisus, “kayi te migkahi ku ini.”

*Midseysey ni Hisus Ke Atag Dut te Menge Sempità
(Marcos 4:10-12; Lucas 8:9-10)*

¹⁰ Ne mid-uevy ki Hisus ke menge edumdumaan din ne migkahi ran te, “Meambé ke ibpepevayà nu ke lalag nu te sempità ke ebpenurù ka kayi te menge etew?”

¹¹ Migkahi si Hisus te, “Sikiyu ne edurumaruma kediey, ne ebpe-sebutan en te Eleteala rut te in-eles dengan mekeatag te Kedatù te Eleteala te menge etew, ugaid ke ruma ne menge etew ne ibpenurù kandan te ibpepevayà te menge sempità. ¹² Su ke etew ne idtahù din te hinawa ke ibpesabut kandin te Eleteala, ne ed-umanan pà te Eleteala ini se kebakesabut din su apey mehaked din ke muna pà dut te ebpegingewaan din. Ugaid ke etew ne kenà din idtahù te hinawa ke ibpesabut kandin te Eleteala ne egkeawà arà se reisek ne nesebutan din. ¹³ Tembù be ebpenurù a kandan ne ibpepevayà te sempità su apey ran mekesabut.

Su edtengteng dan, ugaid ne kenà dan ebpekekita;
ne ebpemineg dan, ugaid ne iring be te warà dan mekerineg.

¹⁴ Ne netuman en kayi te kandan ke impekahi te Eleteala ki Isayas ne egkahi te,

‘Lelayun dan ebpemineg, ugaid ne kenà dan egkesebutan.
Ne lelayun dan edtengteng, ugaid ne kenà dan ebpekekita.

15 Su ini se menge etew ne meresen se ulu ran,
ne timbang te midsabpeng dan ke telinga ran,
wey midlipereng dan ke mata ran.

Su embiya kenà, ne ebpekekita ran en,
ne ebpekerineg dan en,
ne ebpekesabut dan en,
ne ke hinawa ran ne edlived en kayi te kediey,
ne ibpekepiyu ku en sikandan dut te salà dan.’”

16 Ne migkahi pà maa si Hisus te, “Ne sikiyu, dayirai kew nevenar su nesebutan niyu ini se nekita niyu wey ini se nerineg niyu.

17 Sebenarvenar ne ini se egkehiyen ku keniyu te kenà pira rà se ebpelambas te Lalag te Eleteala wey menge metidtu ne etew te Eleteala rengan ne ed-inteng perem kayi te nengekita niyu te guntaani en, ugaid ne warà dan en mekita. Ne ebpemineg dan perem kayi te nengerineg niyu te guntaani en, ugaid ne warà dan en mekerineg.”

Mibpesebutan ni Hisus Ke Meana Dut te Sempità Mekeatag te Etew ne Midsawed te Beni

(Marcos 4:13-20; Lucas 8:11-15)

18 “Na pemineg kew” ke si Hisus, “su apey niyu mesebuti ke engkey se meana kenyan te sempità ku mekeatag te etew ne midsawed te beni. 19 Su ini se beni ne insawed din ne ini ke lalag mekeatag te Edetuan te Eleteala. Ne ke ralan ne neuluhan te benì ne arà ke menge etew ne nekerineg te Lalag te Eleteala, ugaid ne warà dan mesebuti ne warà meketahù te hinawa ran. Nekeuma si Setanas ke datù te pekaid ne midegdehawan din te ed-ahew ke lalag ne nerineg dan. 20 Ne ke kebetuwan ne neuluhan te benì, ne arà ke menge etew ne nekerineg te Lalag te Eleteala ne ingkehalew ran te ebpmineg ne mibperetiyyaya ran. 21 Ugaid ne mehaan dà su warà mekedalid diyà te hinawa ran. Ne wey ran penggerami ni Setanas dut te peretiyyaya ran te Lalag te Eleteala, ne middlekà dan en. 22 Ne ke sepinitan ne neuluhan te benì, ne arà ke menge etew ne nekerineg te lalag te Eleteala, ugaid ne gewii ran te ebpetindalan ne merakel se egkubmus dut te Lalag ne nerineg dan, iring te kemutuwān dan te ked-ubpà-ubpà wey ke kegkelilingey ran dut te kearen dan, ne warà en mekeuma te kebehas dan. 23 Ne ke meupiya ne tanà ne neuluhan te benì, ne arà ke menge etew ne nekerineg te Lalag te Eleteala ne impetuneb dan te hinawa ran su nesebutan dan. Né mibahas dan su ruen mibpengupiya nevenar se bahas din, ne ruen migkakey, ne ke ruma pà ne ruen ded neehani.”

Ke Sempità ni Hisus Mekeatag te Utan ne Insawed Dut te Kunterà Din Ke Datù te Pekaid

24 Ne mibpenurù si Hisus te seveka maa ne sempità, ke sikandin te, “Ke Kedatù te Eleteala rut te menge etew ne iring te etew ne mibpesawed te meupiya ne benì diyà te pengengewiran din. 25 Senge kerukileman ketà te nekelipereng dan langun, ne nekeuma ini se kunterà din ne midsawed te utan ketà te pengengewiran din ne mid-awà en. 26 Guna su midtuvù ke pinemula ne ebmemehingey en, ne midtuvù en dema ke utan.

27 “Ne mid-uvvey ke edsugsuhuen kayi te kemuney ne migkahi en te, ‘Mama, meupiya ne benì ke impesawed nu riyà te pengengewiran nu, ne endei ve ebpuun arà se menge utan ne midtuvù ketà?’

²⁸ “‘Riyà ebpuun ini te kunterà ku,’ ke se kemuney kayi te tanà.

“Ke se menge edsugsuhuen din te, ‘Menu, Mama, ibpevarut nu kenami ayan se utan?’

²⁹ “Kenà,’ ke se kemuney, ‘su gewii te kebarut niyu te utan ne kema ke ebpekeragkes ke meupiya ne pinemula. ³⁰ Ebeleharen tew pà taman te egkeuma en ke ked-ehani, ne ebpeunaan ku pà te ebpepemarut rut te ebpenggehani ne ibpemagkes ku kandan su ebinsulan. Ne anpà ne ibpeehani ku ini se pinemula ku ne ibpetahù ku kayi te kemalig ku.’”

Insempità ni Hisus ke Kedatù te Eleteala te Menge Etew Dut te Pinekemerimet ne Lahas ne Ed-ingeranan te Mustasa

(Marcos 4:30-32; Lucas 13:18-19)

³¹ Ne mibpenurù maa si Hisus te ruma pà ne sempità. “Ini se Kedatù te Eleteala kayi te menge etew,” ke sikandin, “ne ebpekeiring te merimet nevenar ne lahas ne ed-ingeranan te Mustasa ne ibpemula te etew. ³² Ini ke pinekemerimet ne lahas kayi te ampew te dunya, ugaid ne embiya ibpemula ini ne ebpeketuvù ne egkevaluy ne iyan dekelà dut te langun ne pinemula. Ne edsubpang te derekelà, ne rutun ebpenesalag ke menge pepenuk.”

Insempità ni Hisus ke Kedatù te Eleteala te Menge Etew dut te Ibpelevag te Pan

(Lucas 13:20-21)

³³ Ne mibpenurù pà lavew si Hisus te ruma pà ne sempità. Ke sikandin te, “Ini se Kedatù te Eleteala kayi te menge etew ne iring te ibpelevag te pan. Migkuwa ini te meritan ne insawug din dut te senge asad ne tapung su apey ebpeketuvù ke mibawug din ne tapung.”

³⁴ Langun ini ne impesabut ni Hisus diyà te denda ne menge etew ne impepevayà din te sempità. Warà misan engkey en ne impemenudtul din kandan ke kenà impenempità din. ³⁵ Mid-ulaula rin ini su apey metuman ke impesurat ne Lalag te Eleteala dut te ebpelambas te lalag din rengan ne egkahi te,

“Ebpenunderà a kandan te kayi ibpepevayà te menge sempità; ibpenudtul ku kandan arà se warà pà mepayahi igenat dut te kinelimbaha kayi te kelibutan.”

Midseysey ni Hisus ini se Sempità Din Mekeatag te Utan ne Insawed Dut te Kunterà Din Ke Datù te Pekaid

³⁶ Ketà ne mid-ewaan ni Hisus ke denda ne menge etew ne mibpemenayik sikandin diyà te baley. Midtundug kandin ini se menge edumduamaan din ne ke sikandan te, “Ibpayag nu kenami ke engkey se meana dut te sempità nu mekeatag te utan ne insawed diyà te pengengewiran.”

³⁷ Migkahi si Hisus te, “Ke meama ne midsawed te meupiya ne benì ne sikandin ke Impeanak dut te Menusiyà; ³⁸ ne ke pengengewiran ne ini se kelibutan. Ne ke meupiya ne benì ne arà ke menge etew ne Edetuan dut te Eleteala. Ke utan ne arà ke menge etew ne sakup ni Setanas ke egkeunutan te menge vusew, ³⁹ ini se kunterà dut te kemuney te pengengewiran su midsawed te utan, ne sikandin ke egkeunutan te menge vusew. Ke hewii te ked-ehani ne arà ke ketepusan kayi te kelibutan, ne ke ebpenggehani ne sikandan ke menge suluhuen te Eleteala. ⁴⁰ Ne arà se utan ne ebpmemeruten ne ebinsulan

dan, ne arà ke egketemanan dut te sakup te egkeunutan te busew kayi te ketepusan te kelibutan. ⁴¹ Su kayi te ketepusan te kelibutan ne edsuhuen dut te Impeanak te Menusiyà ke menge suluhuen din su ibpeawà ketà te Edetuan din ke langun ne mibpeneheewit te kebpekedsalà te rumah ran wey langun ne mid-ulaula te meraat ⁴² ne ibpeantug diyà te apuy nerakà. Ne ketà dan ebpekependerawit wey ebpekengingitel. ⁴³ Ugaid ne ke menge metidtu ne etew su sakup te Eleteala, ne ed-anlag dan iring te andew diyà te Edetuan te Amey ran ne Eleteala. Ne itaan niyu ke telinga niyu kayi te nerineg niyu.”

Insempità ni Hisus Ke Kedatù te Menge Etew Dut te In-eles ne Kearen diyà te Pengengewiran

⁴⁴ Migkahi pà maa si Hisus te, “Ini se Kedatù te Eleteala ne iring te kearen ne in-eles diyà te pengengewiran. Netuen ini te senge etew ne nesuatsuat nevenar sikandin, ne midtelevan din ne mid-ulì en. Ne mibpasa rin ke langun taman ne kearen din, ne midlived sikandin ne mibpemasa rin arà se pengengewiran.”

Insempità ni Hisus ke Kedatù te Eleteala Dut te Senge Timan ne Ebelinehne Mepmepurù ne Ed-ingaranan te Pirlas

⁴⁵ “Ini se Kedatù te Eleteala,” ke si Hisus, “ne ebpekeiring dema te etew ne ebpemengà te menge pirlas ne ebpemesaan din. ⁴⁶ Guna su neketuen sikandin te seveka ne pirlas ne mepmepurù nevenar, ne arà dà ne mibpasa rin ke langun taman ne kearen din ne mibpemasa rin arà se pirlas.”

Insempità ni Hisus ke Kedatù te Eleteala Dut te Biyala

⁴⁷ “Ne seveka rema ne ebpekeiring te Kedatù te Eleteala,” ke si Hisus, “ne ini se biyala ne id-antug diyà te ranew su apey ebpekeutel te langun ne edsusunan te serà. ⁴⁸ Guna su nepenuen ini se biyala, ne midtuyuk dan en diyà te geunan. Ne mibpinuu ran su ebpengeraman dan ke serà. Su ke meupiya ne serà ne id-awuk diyà te ambung su ibpendehang dan, ne ke kenà meupiya ne idtimbag dan. ⁴⁹ Iring be ketà dema se egketemanan kayi te menge etew ketà te kegkepupus te ini se kelibutan su ebpemenkayi ke menge suluhuen te Eleteala ne ibpedisivey ran ke menge etew ne meraat se mid-ulaula rin dut te menge etew ne metidtu. ⁵⁰ Ne ini se menge meraat ne etew ne ibpeantug diyà te apuy nerakà, ne ketà dan ebpekependerawit wey ebpekengingitel.”

Ke Upama ni Hisus Mekeatag te Etew ne Metau ne Ebpenurù te Raan wey Behu ne Penurù

⁵¹ Ne mid-insaan ni Hisus ke edumdumaan din te, “Menu, egkesebutan niyu ini se langun ne mibpengahi ku?”

“Uya,” ke se menge edumdumaan din.

⁵² Ketà ne migkahi maa si Hisus te, “Ne geina te nesebutan niyu en arà, ne misan engkey ne etew ne ebpenurù te penduan ne miduma kayi te Kedatù te Eleteala ne iring sikandin dut te senge etew ne kemuney te valey ne merakel se kearen din megidsan se raan wey behu. Iring sikandin ketà su metau ne ebpenurù te raan ne penurù wey igkepenurù din dema ke behu.”

*Warà Mibperetiyyaya te Penurù ni Hisus Diyà te Inged Din ne Nesarit
(Marcos 6:1-6; Lucas 4:16-30)*

⁵³ Guna su nekepasad en si Hisus te kebpenurù din te ibpepevayà te menge sempità, ne mid-awà en sikandin ketà te inged ⁵⁴ ne mid-ulì en diyà te inged din ne mibpenurù diyà te baley ne ebpengedian te menge Hudiyanan te penduan dan. Ne nengegeyip ke menge etew ne nekerineg te penurù din. Ke sikandan te, “Endei rin be buwa mekuwa ini se ketau rin? Ne ebmenuwen din te ebaal ini se menge mekegeyip? ⁵⁵ Maa, kenà uvag sikandin ke anak te pandey? Ne maa, kenà si Maria ke iney rin wey si Santiago, si Jose, si Simon wey si Hudas ke menge ari rin? ⁵⁶ Ne maa,” ke sikandan, “kenà ini red dema med-upbà ke langun ne etevey rin? Endei rin be buwa mehuruwi ini se ketau rin?” ⁵⁷ Ketà ne mid-engkenà dan kandin.

Ne migkehiyan ni Hisus sikandan te, “Ke etew ne ebpelambas te Lalag te Eleteala ne egkeedatan te piya endei sikandin egketahù, liyu rà dut te muney ne inged din wey ke kereremigey rin.”

⁵⁸ Tembù be kenà utew merakel ne mekegeyip ne ingkepekita ni Hisus ketà te inged din su warà mibperetiyyaya ke menge etew kandin.

14

*Ke Guhud Mekeatag te Kinepatey ni Juan ke Ebpembunyag
(Marcos 6:14-29; Lucas 9:7-9)*

¹ Nerineg ne Hirudis ini se tudtul mekeatag te mid-ulaula ni Hisus su arà ne hewii ne sikandin ke egkeunutan ketà te Geliliya. ² Migkahi sikandin kayi te menge kedserihan din te, “Neuyag ded maa si Juan ke Ebpembunyag, tembù be ruen gehem din te kebpekevaal te menge mekegeyip.”

³ Ini se nekahni ni Hirudis su sikandin en iya ke mibpeimatey ki Juan su sikandin pà ke mibpesikem, ne mibpevakù ne mibpevilanggù. Iyan din kineul-ulaa kayi su mid-esawa rin si Hirudiyas ke ipag din misan si Hirudiyas ne esawa rut te tuney ne suled din ne si Felipe.

⁴ Su uman dà ebpenggekehiji ni Juan si Hirudis te, “Kenà meupiya ne ed-esawaan nu ke ipag nu su esawa en te tuney ne suled nu!” ke si Juan. ⁵ Ne ebpeimetayan perem ni Hirudis sikandin, ugaid ne neandek sikandin te menge Hudiyanan su migkahi ran te ebpelambas te Lalag te Eleteala si Juan.

⁶ Ugaid ne guna su neuma ke hewii te kineanaka ki Hirudis ne ruen kevurunan, ne ketà ne pinesayew ke anak ni Hirudiyas ne raha. Ne ingkesuatsuat ni Hirudis ini, ⁷ tembù be mibpesaran din ke midsayew te, “Langun tew te nevurun kayi ne titihus te misan engkey se ebuyuen nu ne ibehey ku keykew!”

⁸ Ne intelaan en neraan te iney kayi te raha ne midsayew te ibpevuyù diyà te ki Hirudis ke ulu ni Juan ke Ebpemunyag. Tembù be migkahi sikandin te, “Iyan ku ebuyuen te guntaani ne ivehey nu kediey ke ulu ni Juan ke Ebpemunyag!”

⁹ Nerineg dà ni Hirudis ne nekebmutu sikandin, ugaid ne tehaad te ingkepasad din en diyà te etuvangan te pinetelavuk din, ne impetuman din en ke mibuyù dut te raha. ¹⁰ Ketà be ne mibpepungelan din en si Juan diyà te bilenguan. ¹¹ Ne impetahù din en te pelatu ke ulu ni Juan

ne mibpeneheneewit en ini ne imbehey en diyà te raha, ne imbehey en dema dut te raha diyà te iney rin.

¹² Guna su nerineg ini dut te menge edumdumaan ni Juan, ne mibayaan dan diyà te bilengguan ke bangkey rin ne inleveng dan. Neipus dan ne mibpendiyà dan te ki Hisus su impenudtul dan ini se netamanan.

*Pinekaan ni Hisus ke Lelima Nengivu ne Etew
(Marcos 6:30-44; Lucas 9:10-17; Juan 6:1-14)*

¹³ Guna su nerineg eni Hisus ke tudtul dut te netemanan ni Juan, ne mid-awà dan ketà ne mid-untud dan te avang te sikandan dà se ebpendiyà te warà etew rin. Guna su netuenan dut te menge etew te mid-avang-avang en ensi Hisus ne mibpenggenat dan en se ebpmeyvey ran su edtelukun kandin. ¹⁴ Guna su nekerunggù en ensi Hisus ne iyan dan nekita se merakel ne menge etew ne nevurun, ne neyruwan din nevenar sikandan ne neulian din ke ebpendeleraru.

¹⁵ Guna su meapun en nevenar ne mid-uvay en kandin ke menge edumdumaan din se egkahi te, “Meapun en ini ne warà dè be menge etew kayi te inged ini. Iyan tumù ne ibpeipanew nu en ke menge etew su apey ran ebpekependiyà te endei se ruen menge valey ne ebpekepemasa ran te egkeaan dan.”

¹⁶ Ne migkehiyan dan ni Hisus te, “Kenà dan en ebpeipanewen,” ke sikandin, “su sikiyu se ebpekaan kandan.”

¹⁷ “Ini se kuwa tew,” ke sikandan, “ne lelima rà ne timan ne pan wey deruwa ne timan ne serà.”

¹⁸ Ne migkahi si Hisus te, “Ewita niyu kayi.” ¹⁹ Ketà ne pinepinuu rin diyà te gumegebà ke menge etew. Ne migkuwa rin ke lelima ne timan ne pan wey ke deruwa ne timan ne serà, ne midlingakà sikandin diyà te langit ne impeselamat din te Eleteala. Ne mibpenevitevì din en ke pan ne imbehey rin en dut te menge edumdumaan din su ibpetukid diyà te merakel ne etew. ²⁰ Migkaan dan langun ne nengevulung dan. Guna su nekeipus dan en se egkaan, ne mibpunpun dut te sepulu wey deruwa ne edumdumaan din ke nesamà ne iyan din nepunpunan ne sepulu wey deruwa ne binevey ne nengepenù. ²¹ Ne ke menge etew ne migkaan ketà ne menge lelima nengivu ke meama, liyu pà ke menge meritan batà.

*Mid-ipanew si Hisus Diyà te Divavew te Wayig te Ranew
(Marcos 6:45-52; Juan 6:15-21)*

²² Ne pineuntud en ni Hisus te avang ke menge edumdumaan din su ibpeuna rin en sikandan te ed-apet te ranew su ibpepeuli din pà ke menge etew. ²³ Guna su impeipanew rin en ke menge etew, ne midtekereg en sikandin te sebseveka rin diyà te buvungan su ebpengeningeni. Guna su egkesagkup en ne ketà pà si Hisus te sikandin dà. ²⁴ Ugaid ke menge edumdumaan din ne meriyù en se ebpengavang-avang ne diyan en te kalud te ranew ne nesuhat te mevaher ne baleg su egkesurang dan ke mevandes ne keramag.

²⁵ Egkepkepawà ketà ne midtelukun en si Hisus kandan se ed-ip- ipanew riyà te divavew te wayig. ²⁶ Guna su nekita sikandin dut te menge edumdumaan din se ed-ip-ipanew riyà te divavew te wayig, ne nengeandek dan nevenar. “Gimukud!” ke sikandan, ne migkuleyì dan te kegkeandek dan.

²⁷ Ketà ne migkahi si Hisus kandan te, “Pedtihel kew te hinawa niyu su siaken ini! Kenà kew meandek!”

²⁸ Ne migkahi en si Pedro te, “Kerenan, embiya benar ne sikuna ayan, ne peipenawa a kayi te divavew te wayig te ebpeengkeniyan te kenikew.”

²⁹ “Pengkayi ke en!” ke si Hisus. Ne ketà ne midrenà si Pedro dut te avang ne mid-ipanew en diyà te divavew te wayig se ebpendiyà te ki Hisus. ³⁰ Ne guna su neheram din ke mevandes ne keramag ne netekew sikandin meandek ne idteledded en sikandin. “Kerenan, tevangi a!” ke sikandin.

³¹ Arà dà ne migeweran ni Hisus sikandin ne migkahi en te, “Kurang bes ke kebperetiyya nu kediey! Meambe ke ruen keduwaruwa nu?”

³² Ne mid-untud dan ketà te avang ne mid-engked en ke keramag.

³³ Guna su diyan dan en te avang, ne mibpengarap ini se menge edumdumaan din kandin. “Benar iya ne Anak ka te Eleteala!” ke sikandan.

*Neulian ni Hisus ke Menge Ebpayeraru Diyà te Inged ne Hinisarit
(Marcos 6:53-56)*

³⁴ Guna su mid-apet dan en te ranew ne iyan dan nerungguan ne inged ne Hinisarit, ³⁵ ne petuluy ne nekilala dut te menge etew si Hisus. Tembù be pinesugkew ran ke menge etew ne ebpayeraru ketà te nekeerivey ne inged, ne mibpeneheewit dan kayi te ki Hisus. ³⁶ Ne ini se mibpeneheewit te ebpayeraru ne mibuyù ki Hisus te menu ma ke mekeamì ke ebpayeraru misan dut te belegkas din dà, ne langun ne nekeamì ketà ne neulian.

15

Mid-insà ke Menge Peresiyyu ki Hisus ke Meambe Ke Kenà Eduma ke Menge Edumdumaan Dut te Penurù te Keep-epuan Dan ne Hudiyenan Mekeatag te Kebpenlülù

(Marcos 7:1-13)

¹ Senge hewii ne ruen menge Peresiyyu wey menge meyterù te penduan ne riyà eppuun te Hirusalim ne mibpengkayi te ki Hisus. ² Ne migkahi ran te, “Meambe ke kenà edtuman ini se menge edumdumaan nu rut te impenurù ne betasan ne intelau dut te keep-epuan tew? Su matag dan en migkaan ne warà dan tumana ke edturan te kedlülù!”

³ “Ne sikiyu,” ke si Hisus, “meambe ke iyan niyu edtumanen ke betasan ne intelau kenyu rut te menge keep-epuan niyu, ne midsurang kew ma rut te penurù te Eleteala? ⁴ Su migkahi te Eleteala te, ‘Edati niyu ke amey niyu wey ke iney niyu.’ Ne ingkahi rema te, ‘Misan engkey ne etew ne edlalag te meraatey dut te amey rin etawa iney rin ne ibpeimetayan.’ ⁵ Ugaid ne sikiyu,” ke si Hisus, “ne iyan niyu ibpenurù ne embiya ruen etew ne ruen igketavang din dut te amey rin etawa iney rin ne egkepakey ne egkehiyen din te ‘Imbehey ini te Eleteala’ ⁶ ne ketà ne kenè en sikandin ebpeketavang dut te amey rin wey iney rin. Kayi ve te penurù niyu ini ne mid-iniyuhan niyu ke Lalag te Eleteala su iyan niyu ibpeiseg ke betasan ne intelau dut te keep-epuan niyu. ⁷ Sikiyu ne uvag en kun ne ebperetiyya! Benar iya ke lalag mekeatag kenyu ne impesurat te Eleteala ki Isayas ne mibpelambas te Lalag te Eleteala rengan su migkahi te,

8 ‘Ini se menge etew,
ne kayi rà te bivig dan se ked-arap dan kediey,
ugaid ne ke hinawa ran ne medmeriyù kediey.
9 Warà ded be lalew rin se kebpengarap dan kediey,
su ke ibpenurù dan ne mibèbeelan dà te etew,
ugaid ne egkehiyen dan ne kayi ebpuun te penduan ku.’ ”

*Ke Menge Ebpekeredsik te Etew
(Marcos 7:14-23)*

10 Ne pineuvey en ni Hisus ke menge etew se egkahi te, “Pemineha niyu ve ini,” ke sikandin, “se edlelehan ku su apey niyu egkesebuti.
11 Kenà iyan ebpekeredsik te etew ini se egkeenen ne ebpekeawuk te bèbà din, ugaid ne iyan ebpekeredsik te etew ini se netahù te hinawa rin ne ebpekelihawang kayi te bèbà din.”

12 Ne mid-uvey kandin ke menge edumdumaan din ne migkahi te, “Maa, netuenan nu red te neepesan ka te menge Peresiyu dut te migkahi nu geina?”

13 Ne migkahi si Hisus te impepevayà te sempità te, “Langun ne pinemula ne warà ipemula te Amey ku ne riyà te langit ne eberuten.
14 Belehra niyu sikandan! Su iring dan te menge pisek ne edtuyuk te pisek ded dema. Ne embiya ruen pisek ne edtuyuk te pisek ded dema, ne elin dan egkeulug diyà te lepak.”

15 Ne migkahi si Pedro te, “Ipayag nu kenami ke meana rut te sempità nu geina.”

16 Ne migkahi si Hisus kandan te, “Iring kew rà dut te rumा ne etew ne mevavew se kebpekesabut dan. 17 Meambe, warà niyu ves mesebuti te ini se egkeenen ne ebpekeawuk te bèbà te etew ne ebpevayà te hetek din ne an pà ne edlihawang diyà te kandin? 18 Ugaid iyan ebpekeredsik te etew ne ini se netahù te hinawa rin ne ebpekelihawang te bèbà din.
19 Su ini se neketahù te hinawa rin ke ebpuunan te meraat ne itungan ne ebpekepeneheewit kandin te meraat ne ed-ul-ulaan iring te kedimatey, kedlangkadlangkad te esawa rin, ne rumा pà ne meredsik ne ed-ul-ulaan, kebpenakew, kedarütarù wey kedlalag te ebpekereraat te pekinegan te rumा ne etew. 20 Langun din ini ne ebpekeredsik te etew, ugaid ne kenà ebpekeredsik te etew ke egkaan sikandin te warà mekepenlùlù ne ayan ke betasan te menge Peresiyu.”

*Ke Guhud Mekeatag te Sarig te Senge Etew ne Meritan ki Hisus
(Marcos 7:24-30)*

21 Ne mid-awà si Hisus ketà ne mibpendiyà te inged ne uvey te menge inged ne Tiru wey Sidun. 22 Ne ruen nekeubpà ketà ne meritan ne riyà ebpuun te inged ne Kenaan ne midtelavuk ki Hisus. “Kerenan, sikuna ne inenakan ni David,” ke sikandin, “igkeyru a nikuna! Su ruen anak ku ne meritan ne midsuukan te busew ne egkepesangan nevenar.”

23 Ugaid ne warà kegkehiyan ni Hisus. Ne ketà ne mid-uvey ki Hisus ke menge edumdumaan din ne mibpemuyù te, “Ipeulì nu ayan se meritan su edtundugtundug kenitew ne ebpekeuringer.”

24 Ne migkahi si Hisus te, “Midsuhù a te Eleteala te iyan dà ebpetevangan ke menge kevuwaran ni Israyil ne iring te menge bilibili ne nengelaag.”

²⁵ Guna su nerineg ini kayi te meritan ne mid-uvvey rin en si Hisus ne midlumpeng en diyà te sineruwan din se ebpemuyù te, “Kerenan, tevangi a nikuna!”

²⁶ Ne mibpenempità si Hisus kandin te, “Kenà edait ne egkuan ta ke ibpekaan te menge vatà ne idsavud te menge asu.”

²⁷ “Benar ayan, Kerenan,” ke se meritan, “ugaid ne misan ke menge asu ne eppenelisim dut te momu te menge vatà ne ebpengeulug diyà te lemisaan dut te ebpgemuney.”

²⁸ Ne migkehiyan ni Hisus ke meritan te, “E, Bayi, mevaher nevenar se kedsarig nu te Eleteala! Ini se mibpemuyù nu ne ibehey ku keykew.” Arà dà ne neulian en ke anak dut te meritan.

Neulian ni Hisus Ke Denda ne Ebpendesararu

²⁹ Mid-awà si Hisus ketà ne mibpemeyvey te Ranew te Geliliya. Ne midtekereg diyà te buvungan ne mibpinuu. ³⁰ Ne denda ne menge etew se mibpengkayi te kandin se ebpeneheewit te menge pungkù, menge pisek, menge nekeyengkeng, menge emew, wey ruma pà ne ebpendesararu. Ne riyà dan indenà te etuvangan ni Hisus, ne neulian din ke langun dan. ³¹ Ne nengegeyip ke menge etew ketà te nekita ran te nekelalag en ke menge emew, neketidtu en ke nekeyengkeng, nekeipanew en ke menge pungkù wey nekekita en ke menge pisek. Ne ketà nekereyù dan te Eleteala ne iyan ebpgengerapan dut te bansa ne Israyil.

Pinekaan ni Hisus ke Epat Nengivu ne Etew

(Marcos 8:1-10)

³² Ne pineuvey ni Hisus ke menge edumdumaan din ne migkahi te, “Igkeyruwi ku nevenar ini se menge etew,” ke si Hisus, “su nekedtetelu en ne hewii se kinepekiduma ran keytew ne warà en egkekaan dan. Kenà meupiya ne ebpeulen te kenà dan ebpekekaan su kalu ke ruen edlunusan diyà te ralan.”

³³ Migkahi ke menge edumdumaan ni Hisus te, “Endei ki mulà ebpekekuwa te egkekaan ne ibpekaan tew kayi te merakel ne menge etew se ini kiyu te inged ne warà bulug etew rin?”

³⁴ “Engkey ma taman ne kerakel te lutù tew?” ke si Hisus.

“Pitu rè be ne timan ini se lutù tew ne pan,” ke sikandan, “ne ruen pipira ne timan ne serà.”

³⁵ Ne pinepinuu ni Hisus ke menge etew diyà te tanà. ³⁶ Ne migkuwa rin ke pitu ne timan ne pan wey menge serà ne impeselamat din en diyà te Eleteala. Ne mibpenevitevi din en ke pan, ne imbehey rin en dut te menge edumdumaan din su ibpetukid diyà te menge etew.

³⁷ Langun dan ne migkaan, ne nengevulung. Ne ketà ne mibpunpun dut te edumdumaan din ke nengesamà ne iyan din nepunpunan se pitu ne binevey. ³⁸ Ne epat nengivu ke menge etew ne migkaan ketà liyu ke meritan batà.

³⁹ Arà pà ne impeuli ni Hisus ke menge etew. Ne mid-untud en ensi Hisus te avang ne mid-avang-avang dan en se ebpendiyà te inged ne Magadan.

16

*Ke Menge Etew ne Metau ne Ebpenipat te Hewii Ugaid ne uvag Kun Warà Dan Mesebuti Ke Tuus Dut te Ned-ulaula te Arà ne Hewii
(Marcos 8:11-13; Lucas 12:54-56)*

¹ Ne ruen menge Peresiyu wey menge Sadusiyu ne mibpendiyà te ki Hisus se ebpekidlewanà kandin su ebeelan dan te litag si Hisus. Tembù be mibuyù dan te mebaal si Hisus te mekegeyip ne tuus te midsuhù sikandin te Eleteala.

² Migkahi si Hisus te, “Embiya edsanlep ke andew ke ebpemurawag ne egkahi kew te, ‘Ebpengupiya ke hewii.’ ³ Ne embiya egkepkepawà ke ruen pemurawag wey kivel ne egkahi kew te, ‘Ed-uran.’ Embiya edtengteng kew diyà te langit ne metau kew nevenar ne ebpenipat te hewii, ugaid ne kenà niyu egkekilala ke menge tuus mekeatag kediey guntaan. ⁴ Sikiyu ne menge etew te guntaani en, ne meraatey nevenar se ed-ul-ulaan niyu su warà kebperetiyyaya niyu te Eleteala! Menu, ebuyù kew te ebaal a te mekegeyip ne tuus te gehem ku? Kenà, su warà en tuus ne ibpekita kenyi liyu rà ketà te netemanan ni Jonas ne mibpelambas te Lalag te Eleteala rengan.”

Ketà ne mid-ewaan din sikandan.

*Ke Meraat ne Penurù Dut te Menge Peresiyu wey Sadusiyu ne Impeiring ni Hisus te Ibpelevag te Pan
(Marcos 8:14-21)*

⁵ Mid-apet ke menge edumdumaan ni Hisus te ranew, ugaid ne nelipat dan ne ed-ewit te lutù dan ne pan. ⁶ Ne mibpenempità si Hisus kandan te, “Andam kew,” ke sikandin, “ne ingati niyu te kenà kew egkepeneheewit te ibpelevag te pan dut te menge Peresiyu wey Sadusiyu.”

⁷ Ugaid ne geina te warà dan mesebuti ne mibpelelalahey ran te, “Iyan din kinepekekahi kayi ne geina te warà kiyu mekeewit te lutù tew ne pan.”

⁸ Ne netuenan ni Hisus ke engkey se ibpelelalahey ran ne migkehiyan din en sikandan te, “Meambe ke iyan niyu egkepengasak se warà niyu kebpekekewit te pan? Kurang nevenar ke kedsarig niyu kediey? ⁹ Maa, warà kew pè bes mekesabut? Maa, kenà niyu en egketenuran ke kinepenevitevi ku rut te lelima ne timan ne pan ne impekaan ku rut te lelima nengivu ne menge etew? Maa, pira ne binevey se nepenù te nengesamà ne nepunpun niyu? ¹⁰ Ne menu, kenà niyu en egketenuran ke kinepenevitevi ku rut te pitu ne timan ne pan ne impekaan ku rut te epat nengivu ne menge etew? Maa, pira ne binevey se nepenù te nengesamà ne nepunpun niyu? ¹¹ Meambe ke warà niyu mesebuti te kena ini se pan ne warà niyu meewit se egkehiyen ku? Su ingati niyu te kenà kew egkepeneheewit te ibpelevag te pan dut te menge Peresiyu wey Sadusiyu.”

¹² Arà pà ne nekesabut ke menge edumdumaan din te iyan din ebpeingatan kandan ne kenà arà se ibpelevag te pan, ugaid ne arà se ibpenurù te menge Peresiyu wey Sadusiyu.

*Ke In-insà ni Hisus Dut te Edumdumaan Din Ke Engkey Sikandin
(Marcos 8:27-30; Lucas 9:18-21)*

¹³ Ketà ne mibpendiyà en ensi Hisus te inged uvey te inged ne Sisariya Pilipus. Guna su nekeuma ran en ne mid-insaan ni Hisus ke

menge edumdumaan din te, "Engkey kun ke Impeanak te Menusiyà riyà te pegitungan te menge etew?"

¹⁴ "Ruen egkahi te sikuna si Juan ke Ebpermunyaag," ke sikandan. "Ne ruen duma ne egkahi te sikuna si Elias ke mibpelambas te Lalag te Eleteala rengan. Ne ruen pà rumा ne egkahi te sikuna si Jeremias etawa seveka ne mibpelambas te Lalag te Eleteala rengan."

¹⁵ "Ne menu sikiyu," ke si Hisus, "engkey e ma diyà te pegitungan niyu?"

¹⁶ Ne midtavak si Pedro te, "Sikuna ke Impasad ne Ebperetuen te langun ne menge etew dut te Eleteala ne warà kemetayan din, ne sikuna ke Anak din."

¹⁷ "Mibpenaub ka, Simon ne anak ni Juan!" ke si Hisus. "Su benar ini se migkahi nu, ugaid ne kenà etew se mibpayag kayi te kenikew su ke Amey ku riyà te langit. ¹⁸ Tembù be ebpeketuenan ku kenikew te ed-ingeranan ku sikew ki Pedro (ne iyan din meana ne 'batu'). Iring ka te batu ne ebpeunsaran ku te simbaan ku su ini ke langun ne menge etew ne mibperetiyyaya kediey. Ne misan ke gehem dut te kemetayan ne kenà ebpeketunggad kandan. ¹⁹ Ibehey ku kenikew ke ketau te kebpemenudtul diyà te langun ne menusiyà dut te Meupiya ne Tudtul mekeatag dut te Kedatù te Eleteala ne embiya idsempità ta ini ne iring te ibehey ku kenikew ke gunsì te gumawan ne ebpependiyà te lusud te Edetuan te Eleteala. Ne ini se idawey nu kayi te kelibutan ne arà se indawey en dema te Eleteala riyà te langit. Engketà ded dema ke idtuhut niyu kayi te kelibutan ne arà ke intuhut en dema te Eleteala riyà te langit."

²⁰ Ne mid-il-ilutan ni Hisus te egkahi kandan te kenà dan ibpenudtul te misan engkey ne etew te sikandin ke Impasad te Eleteala ne Ebperetuen te menge etew.

Mibpayag en Neraan ni Hisus ke Kebpatey Rin

(Marcos 8:31–9:1; Lucas 9:22–27)

²¹ Igenat dè be ketà ne mibpehayan en ni Hisus ke menge edumduaan din mekeatag te egketemanan din. Ke sikandin te, "Iyan iya se ebpekependian a te inged ne Hirusalim ne edresayen a nevenar su ebpeheweran a te menge pekilukesen te Hudiyanan, menge mepurù te terebpelengesa, wey ke menge meyterù te penduan. Ed-imetayan a, ugaid ne ketà te iketelu ne hewii ne egkevanew e red."

²² Nerineg ni Pedro ne impesivey rin si Hisus ne pineengked din se egkahi te, "E Kerenan, berekat ne ibpemekeryù dà ini te Eleteala! Kenà ayan med-ulaula kenikew!"

²³ Ugaid ne midlingì si Hisus ne migkehiyan din si Pedro te, "Awà ka su iring ka ki Setanas! Maa, ebengenen a nu kayi te ibpetuman kediey? Su ke itungan nu ne kenà diyà ebpun te Eleteala, ugaid ne kayi rà te itungan te menusiyà."

²⁴ Ne migkahi si Hisus dut te menge edumdumaan din te, "Embiya ruen etew ne egkiyug ne eduma kediey, ne iyan iya se pekelipati rin ke kandin ne kiyug wey tianga rin ke kandin ne pinebelavag ne kayu ne ed-ingaranan te krus ne iyan din meana ne tumana rin ke menge suhù ku misan ibpatey rin pà se keduma rin kediey. ²⁵ Su ke etew ne egkenuhun te umur din ne ebpatey lavew, ugaid ke etew ne iyan din ibpatey se keduma rin kediey ne ruen umur ne ibehey kandin ne

warà edtemanan din. ²⁶ Menu, embiya ruen etew ne ebpekehaked te langun taman kayi te ampew te dunya, maa engkey se rantek din embiya egkerasey ke himukud din diyà te apuy nerakà? Warà! Su warà misan engkey ne kearen ne igkevehey te etew apey rin meawì ke gimukud din. ²⁷ Su sikandin ke Impeanak te Menusiyà ne mehaan ne edlived kayi te ampew te dunya ne edumaan te menge suluhuen din wey ruen raman din ne iring te raman te Amey rin ne Eleteala. Ne ketà ne eberasan din ke menge etew dut te mid-ulaula ran kayi te ampew te dunya ke meupiya etawa meraat. ²⁸ Tentenuri nu ini,” ke si Hisus, “ruen ruma niyu kayi ne kenà pà ebpatey taman ketà te hewii ne egkekita ran ke Impeanak te Menusiyà ne ebpekeuma su Edatù te menusiyà kayi te ampew te dunya.”

17

Nedsalin ke Kebparas ni Hisus

(Marcos 9:2-13; Lucas 9:28-36)

¹ Guna su neked-enem en new hewii, ne pineruma ni Hisus ensi Pedro wey ke teleari ne si Santiago wey si Juan ne midtekereg dan diyà te mehantur ne buvungan te sikandan dà. ² Guna su ketà dan en ne midtengtengan dan si Hisus ne netekew nedsalin ke kebpeparas din su mid-anlag ini se buked din iring te andew. Ne mibpeneringsing ke velegkas din te keputì. ³ Netekew ran dema nekita se deruwa ne etew se ebpekidlalag ki Hisus, si Moises wey si Elias, ke menge mibpelambas te Lalag te Eleteala rengan.

⁴ Ne migkahi en si Pedro ki Hisus te, “Kerenan, meupiya su kayi ki! Embiya egkiyug ka ne edsesabung a kayi te tetelu, seveka te keykew, seveka te ki Moises, wey seveka rema te ki Elias.”

⁵ Edlalag pà si Pedro, ne ruen mermerayag ne sehulapun ne nekelikuvung kandan ne ruen suwara ne ketà ebpun te sehulapun ne migkahi te, “Ini ke Anak ku ne igkelimù ku nevenar, ne ebpekesuhat nevenar sikandin te hinawa ku. Pemineha niyu ke edlelahen din!”

⁶ Guna su nerineg kayi te menge edumdumaan ni Hisus ke suwara ne nekelumpeng dan su neandek dan nevenar. ⁷ Ne mid-uvvey ran ni Hisus ne migeweran din se egkahi te, “Enew kew, ne kenà kew meandek!” ⁸ Guna su midlingakà dan ne warà duma ne nekita ran su si Hisus dà.

⁹ Gewii ran te edtupang ne mibenduan dan ni Hisus te, “Ini se nekita niyu ne kenà niyu imbe ibpenudtl te misan entei taman te egkevanew en ke Impeanak te Menusiyà.”

¹⁰ Ne ketà ne mid-insà kandin ke menge edumdumaan din te, “Meambe ke egkehiyen te menge meyterù te penduan te iyan ed-una ebpengkayi ne si Elias ke etew ne mibpelambas te Lalag te Eleteala rengan, ne arà pà ke Impasad te Eleteala ne Edatù?”

¹¹ “Benar ne ed-una ebpengkayi si Elias,” ke si Hisus, “su ed-endamen din ke langun te kebpekeuma dut te Impasad te Eleteala ne Edatù. ¹² Ugaid ne igkahi ku keniyu te nekeuma en si Elias asal warà dan mekilala, ne nasì dan midrasey sikandin te endei se kiyug dan. Engketà ded dema te kedresaya ran dut te Impeanak te Menusiyà.”

¹³ Arà pà ne nekesabut ke menge edumdumaan ni Hisus te iyan din egkehiyen ne mekeatag ki Juan ke Ebpmembunyang.

*Neulian ni Hisus ke Vatà ne Midsuukan te Busew
(Marcos 9:14-29; Lucas 9:37-43a)*

¹⁴ Guna su midlived en ensi Hisus diyà te merakel ne etew ne ruen ketà mid-veye ki Hisus, ne midlumpeng diyà te sineruhan din, ¹⁵ ne migkahi te, “Mama, igkeyru nu ke anak ku! Ebevuyen sikandin ke edsuuk en ke busew ne egkerasey nevenar su ruen ke egkepiley riyà te apuy wey ruen ke riyà te wayig. ¹⁶ Ne mid-ewit ku en sikandin kayi te menge edumdumaan nu su ebpevewian ku, ugaid ne warà dan megaga.”

¹⁷ Migkahi si Hisus te, “Sikiyu ne menge etew guntaan, ne warà kebperetiyya niyu te Eleteala wey menge suer kew!” ke sikandin. “Neuhet en se kebpekiduma ku keniyu, ne engkey pà se taman ne kebperetiyya niyu? Engkey pà taman se keuhet din se kadtigkeri ku keniyu? Ipengkayi niyu ayan se vatà!” ¹⁸ Ne pineawà ni Hisus ke vusew ne mid-awà en diyà te kandin, ne arà dà dema ne neulian en.

¹⁹ Ne mid-veye ki Hisus ke menge edumdumaan din te sikandan dà ne mid-insà te, “Meambe ke warà dey megaga te edsegseg ke vusew ne midsuuk ketà te vatà?”

²⁰ “Wara niyu megaga,” ke si Hisus, “su kurang nevenar ke kedsarig niyu te Eleteala. Tentenuri niyu ini su embiya ruen kebperetiyya niyu te Eleteala ne reisek, misan iring dà dut te reisek ne lahas te mustasa ne ebpekegaga kew te merehen ne egketemanan. Su embiya idsempità ta ne ebpekegaga ka ne eblearat te buvungan ke egkehiyan niyu te, ‘Meawà ka.’ [²¹ Migkahi maa si Hisus te, ‘Ayan ne vusew ne kenà egkesegseg embiya kenà kew ed-una ebpengeningen wey edlimpas te egkaan.’]”

*Impayag pà maa ni Hisus Ke Kebpatey rin
(Marcos 9:30-32; Lucas 9:43-45)*

²² Guna su nevurun en ke langun ne edumdumaan ni Hisus diyà te Geliliya ne migkahi si Hisus kandan te, “Mehaan en ibpalad ke Impeanak te Menusiyà diyà te menge kunterà din ²³ ne ed-imetayan sikandin, ugaid ne ketà te iketelu ne hewii ne ebenawen ded sikandin.” Ne ketà ne nekebmutu nevenar ke menge edumdumaan din.

Ke Midlalag ni Hisus Mekeatag te Kebayad te Buwis Diyà te Nekebpuru ne Vale te Eleteala

²⁴ Guna su nekeuma en si Hisus wey ke menge edumdumaan din diyà te inged ne Kapirnawum, ne mid-veye ki Pedro ke menge ebpevayad te buwis dut te Nekebpuru ne Vale te Eleteala, ne mid-insà dan te, “Menu, ebayad ayan se meyterù niyu te buwis dut te Nekebpuru ne Vale te Eleteala?”

²⁵ “Uya,” ke si Pedro.

Guna su mibpemenayik en si Pedro diyà te baley ne mid-unaan en ni Hisus te egkahi te, “Diyà te itungan nu, Pedro, entei se ebayad te buwis diyà te egkamal te inged kayi te ampew te dunya? Engkey, ke mehinged kayi te inged din etawa ke riyà ebpuun te meriyù?”

²⁶ “Ke riyà ebpuun te meriyù,” ke si Pedro. “Embiya iring ketà,” ke si Hisus, “ne kenà ki ebpekevayad diyà te Nekebpuru ne Vale te Eleteala su iyan ebpengemuney ketà ne ke Amey ta ne Eleteala. ²⁷ Ugaid ne kenà meupiya,” ke si Hisus, “ke ebmeraat ke hinawa rut te ebpevayad te buwis keyta. Pendiyà ka te ranew ne pemunuwit ka ne ke egkeuna

ne edtugtug diyà te bunuwit nu ne bigkata nu en. Ne ketà te bèbà te neutel nu ne egkekita nu ke kureta ne ereg ne ibayad ta te buwis. Kua nu ini ne pendiyà ka te Nekebpuru ne Valey te Eleteala su ivayad nu ini te buwis ta.”

18

*Mid-insà ki Hisus ke Menge Edumdumaan Din ke Engkey se Mepurù
Diyà te Menge Etew ne Edetuan te Eleteala*

(Marcos 9:33-37; Lucas 9:46-48)

¹ Ketà ne hewii ne mid-uvey ki Hisus ke menge edumdumaan din se egkahi te, “Engkey se mepurù diyà te menge etew ne Edetuan te Eleteala riyà te langit?”

² Ketà ne mid-umew si Hisus te senge etew ne vatà ne impeitindeg din kayi te etuvangan dan ³ ne migkahi te, “Tentenuri niyu ini embiya kenà kew edsambì te itungan niyu iring te itungan kayi te vatà ini ne kenà ebpegitung te kebmepurù din, ne kenà kew ebpekelusud dut te menge etew ne Edetuan te Eleteala. ⁴ Su ke etew ne mepurù diyà te Edetuan te Eleteala ne sikandin ke mepeembavà se hinawa rin iring kayi te vatà. ⁵ Su misan engkey ne etew ne edtelimà te kevevaan en ne etew iring kayi te vatà su atag te keduma rin kediey ne iring te siaken se midtelimà din.”

Ke Ebepeneheewit Keytew te Ebaal te Meraat

(Marcos 9:42-48; Lucas 17:1-2)

⁶ “Ne mekeatag be te ini se menge vatà ne mibperetiyyaya kediey,” ke si Hisus, “ne embiya ruen etew ne ebpekevelavag dut te sarig te vatà ne iring kayi ne iyan pà meupiya ne ebperiwetawan ke lieg din te mevehat ne batu ne id-antug diyà te rahat tumin dè be ke egkevelevahan ke sarig te vatà kediey. ⁷ Keyru nevenar te menge etew kayi te ampew te dunya su ruen kebpenggeram kandan te ebpekedsalà. Kenà egkepakey ne kenà egkeuma ini se kebpenggerami te menge etew, ugaid ne ke etew ne ebpenggeram te rumu rin su apey ebpekedsalà ne mekeyruwiru nevenar!

⁸ “Embiya iyan ebpekepeneheewit keykew te kebkedsalà nu ke belad nu etawa paa nu, ne tempera nu ne itimbag nu! Su iyan pà tumù ne egkesarir ka tumin dè be ke deruwa red ke velad nu wey paa nu ne igkeantug ka diyà te apuy nerakà. ⁹ Ne embiya iyan ebpekepeneheewit keykew te kebkedsalà nu ke mata nu, ne lesika nu ne itimbag! Su iyan pà tumù ne dibdivaluy se mata nu tumin dè be ke deruwa red ke mata nu ne igkeantug ka riyà te apuy nerakà.”

*Ke Sempità ni Hisus Mekeatag te Bilibili ne Nelaag ne Netuen Ded ne
Impeiring Din Dut te Etew ne Mibpedsendit te Salà Din*

(Lucas 15:3-7)

¹⁰ “Urami niyu,” ke si Hisus, “te kenà kew edsudì kayi te eduma kediey ne iring te vatà se kedsarig dan. Su ke menge suluhuen ne ebantey kandan ne layun diyà te etuvangan te Eleteala ne Amey ku diyà te langit. [¹¹ Su mibpengkayi te ampew te dunya ke Impeanak te Menusiyà su apey ebpeliyu te menusiyà ne nelaag.]

¹² “Engkey se pegitungan niyu ne ed-ul-ulaan te senge etew ne ruen mehatus ne bilibili rin ne seveka se nelaag? Ini imbe se ed-ul-ulaan

din, ed-ewaan din arà te siyew nepulù wey siyew ne ebpemenabtab su ebpenuntulen din arà se seveka ne nelaag taman te egketuen din. ¹³ Igkahi ku keniyu,” ke si Hisus, “te embiya egketuen din en arà se nelaag ne dekelà pà se kegkehalew rin kayi te seveka ne netuen din dut te siyew nepulù wey siyew ne warà nelaag. ¹⁴ Ne engketà ded dema ke Amey tew ne Eleteala su kenà din egkiyuhan ne misan seveka dut te mibpesakup kandin ne egkelaag.”

Ke Penurù ni Hisus Mekeatag te Kebpesahad te Salà te Menge Ruma Ta

¹⁵ “Embiya ruen duma nu ne nekedsalà kenikew,” ke si Hisus, “ne pendiyà ka te kandin ne kehiya nu ke salà din te deruwa kew rà. Embiya ebpevenar sikandin ne netevangan nu sikandin su ebpeked-uliey kew te meupiya ne itungan. ¹⁶ Ugaid ne embiya kenà ebpehibenar sikandin, ne kuwa ka te senge etew etawa deruwa ne etew ne ebpeketitihu te kebitiyara niyu apey niyu egkerumai ke impesurat ne Lalag te Eleteala. ¹⁷ Ne embiya kenà sikandin ebpemineg kandan, ne peketueni nu en dut te langun ne egkevurun ne ebperetiyaya te Eleteala. Ne embiya kenà sikandin ebpemineg kandan, ne iringa niyu en sikandin te kenà niyu ruma te ebperetiyaya te Eleteala etawa iringa niyu en sikandin dut te tenlimbungun ne ebpevayad te buwis.

¹⁸ “Tembù be igkahi ku ini keniyu,” ke si Hisus, “te ini se idawey nu kayi te kelibutan ne arà se indawey en dema te Eleteala riyà te langit. Engketà ded dema arà se idtuhut niyu kayi te kelibutan ne arà ke intuhut en dema te Eleteala riyà te langit.

¹⁹ “Ne igkahi ku maa keniyu: embiya duen deruwa keniyu kayi te ampew te dunya ne egkeseveka ne ebpemuyù te Eleteala te misan engkey en, ne ibehey kandan dut te Amey ku ne Eleteala riyà te langit. ²⁰ Su embiya ruen deruwa etawa tetelu ne etew ne egkevurun su atag dut te kedsarig dan kediey, ne ketà a red dema te kandan.”

Ke Sempità ni Hisus Mekeatag te Edsugsuhuen ne Warà Mibpesahad te Ruma Rin

²¹ Ketà ne mid-uvvey si Pedro ki Hisus ne mid-insà te, “Kerenan, kepipira a ebpesahad ke ebpekesalà ke ruma ku kediey? Maa, kepipitu rè be?”

²² “Kenà kepipitu rà,” ke si Hisus, “su egngivuwan. ²³ Su ke Kedatù te Eleteala dut te menge etew ne ebpekeiring kayi. Duen senge etew ne datù ne ebpevayad en te menge utang kandin dut te menge edsugsuhuen din. ²⁴ Guna su nekerudsù en se ebpevayad, ne ruen senge etew kandan ne mid-ewit kayi te ratù ne nekeutang kandin te egngivungivuwan ne pirak. ²⁵ Tehaad te kenà sikandin ebpekevayad, ne migkahi en dut te datù te ibpepasa sikandin, iring te uripen abpeg ke esawa rin wey menge anak din wey ke langun taman ne kearen din, su apey mevayari ke utang din.

²⁶ “Ne midlumpeng sikandin kayi te etuvangan dut te datù se ebpemuyù te, ‘Kenà e pà nikuna sesawi su edlahud e pà,’ ke sikandin, ‘ne ebayaran ku sikuna te langun.’ ²⁷ Ne neyruwan sikandin dut te datù, ne warà din en peveyari ke utang din ne pineulì din en sikandin.

²⁸ “Guna su mid-ipanew en ini se edsugsuhuen ne nesinuhung din en ke ruma rin te edsugsuhuen ne nekeutang kandin te deisek da. Ne

migeweran din en su ebpekelen din en se egkahi te, ‘Beyari nu en ke utang nu kediey’

²⁹ “Ne midlumpeng en ini se duma rin te edsugsuhuen se ebpemuyù te, ‘Kenà e pà nikuna sesawi su edlahud e pà,’ ke sikandin, ‘ne ebayaran ku sikuna te langun.’

³⁰ “Ugaid ne warà migkiyug, nasi pà te impevilanggù din ne kenà sikandin ebpekelihawang taman te kenà din egkevayaran ke langun ne utang din. ³¹ Guna su nekita ini dut te ruma pà ne edsugsuhuen ne nengeepes dan ne mibpendiyà dan en te datù ne intarem dan ke langun.

³² “Ne impetawag sikandin dut te datù ne migkehiyan din te, ‘Warà rantek nu ne edsugsuhuen! Warà ku en pevayari keykew su in-awà ku en te itungan ku ke langun ne utang nu kediey su atag dà dut te mibpemuyù ka kediey. ³³ Ne meambe ke warà ka meyru dut te ruma nu ne edsugsuhuen te iring dut te kinekeyru ku keykew?’ ³⁴ Neepes nevenar ke datù ne impevilanggù din en ini se edsugsuhuen ne kenà ebpekelihawang sikandin taman te kenà ebpekevayad te langun ne utang din.

³⁵ “Ne engketà imbe rema,” ke si Hisus, “ke ed-ul-ulaan kenyu dut te Amey ku ne diyà te langit ke kenà niyu ebpeseharen ke menge ruma niyu se edlipatan en ke meraat ne mid-ulaula ran kenyu su iawà niyu en iya te pegitungan niyu.”

19

*Ke Kebpenurù ni Hisus Mekeatag te Ebpekid-engked te Esawa
(Marcos 10:1-12)*

¹ Nekeipus si Hisus te ebpenurù ne mid-awà ketà te pruvinsiya te Geliliya ne mibpendiyà te pruvinsiya ne Hudiya. ² Ne mibpenduma kandin ke denda ne menge etew, ne nengeulian din ke ebpenderaru.

³ Ne ruen menge Peresiyu ne mibpengkayi te ki Hisus su ebaal dan te idseligkat kandin. “Menu, idluhut be te penduan tew,” ke sikandan, “se ebpekid-engked ke meama te esawa rin te misan engkey ne ibpuun din?”

⁴ Migkahi si Hisus te, “Meambe, warà niyu ves mevasa ke impesurat ne Lalag te Eleteala ne egkahi te, ‘Inngenat te aney en ne midlimbag te Eleteala ke meama wey meritan?’ ⁵ ne migkahi ke Eleteala te, ‘Tembù ed-ewaan dut te meama ke amey rin wey iney rin su riyaw ebpekidseveka sikandin te esawa rin, ne ini se teled-esawa ne nevaluy ne seyeka.’ ⁶ Ketà ne kenà dan en deruwa ne etew su neseveka rà. Tembù be ini se deruwa ne midseveka te Eleteala ne kenà egkepebelag dut te piya entei ne etew,” ke si Hisus.

⁷ Ne mid-insà ke menge Peresiyu te, “Embiya iring ketà ne meambe ke inluhut ni Moises dut te meama ne ebpekid-engked te esawa rin embiya ed-una edsurat te kesebenaran te ebpekid-engked en sikandin, ne arà pà ne egkeengkeran din ke esawa rin?”

⁸ Ne midtavak si Hisus kandan te, “Inluhut ini ni Moises se kebpekid-engked niyu su meresen ke ulu rut te menge keep-epuan niyu su warà dan mebpemineg te kebpenurù din, ne engketà kew red dema. Ugaid ne kenà arà ke kiyug te Eleteala rut te pehaney en ne midlimbag din ke meama wey meritan. ⁹ Tembù be igkahi ku kenyu

embiya ruen meama ne ebpekid-engked te esawa rin, misan kenà edlangkadlangkad ini se esawa rin kandin, ne edsaup ded maa edesawa ne nekelangkadlangkad te esawa rin.”

¹⁰ Migkahi ke menge edumdumaan ni Hisus te, “Embiya iring ketà se egketemanan te teled-esawa, ne iyan tumù ne kenà ebpees-eseweey te etew.”

¹¹ Migkahi si Hisus te, “Duen menge etew, meama wey meritan, ne intandà kandan te Eleteala se kenà ebpeesewaan ne meupiya arà kandan, ugaid ne kenà meupiya arà dut te ruma. ¹² Su merakel ke puunan te meambe ke kenà dan ed-esawa. Duen kenà ebpekeesawa su ketà te kineanak kandan ne netuenan en te kenà dan ebpekeesawa. Ne ruen duma ne kenà ebpekeesawa su migkapun dan te menge etew. Ne ruen duma pà ne kenà ed-esawa su apey ran ebpekepesabut dut te Lalag te Eleteala mekeatag te Kedatù din dut te menge etew. Piya entei se ebpeketuman kayi te penurù ku ini, ne tumana rin en iya.”

Midpenubtuvaran ni Hisus Ke Menge Vatà

(Marcos 10:13-16; Lucas 18:15-17)

¹³ Ne ruen ketà menge etew ne mibpemava te menge anak dan diyà te ki Hisus su ibperampen dan kandin su ebpepenubtuvaran dan, ugaid ne midawey ini dut te menge edumdumaan din.

¹⁴ Ugaid ne migkahi si Hisus te, “Kenà niyu dewaya sikandan! Ugaid ne ibperekayi niyu te kediey ke menge vatà, su ke menge etew ne Edetuan te Eleteala ne iring ke sarig dan kediey kayi te menge vatà ini.” ¹⁵ Ketà ne midampen din sikandan su ebpenubtuvaran din, ne mid-awà en.

Ke Kewasa ne Meama ne Migkiyug ne Ebpekehaked te Umur ne Warà Edtemanan Din

(Marcos 10:17-31; Lucas 18:18-30)

¹⁶ Duen senge etew ne kenakan ketà ne mibpendiyà te ki Hisus. “Meyerù,” ke sikandin, “engkey iyan se meupiya pà ne ed-ul-ulaan ku apey a mekekuwa te umur ne warà edtemanan din?”

¹⁷ Ne midtavak si Hisus te, “Meambe ke id-insà nu kedì ke engkey se meupiya pà ne ed-ul-ulaan nu?” ke si Hisus. “Su sebseveka rà ke meupiya se ed-ul-ulaan din ne Eleteala rà. Embiya egkuwa ka te umur ne warà edtemanan din, ne tumana nu ke langun te penduan te Eleteala.”

¹⁸ Ke se kenakan te, “Engkey ne menge penduan?”

Ne midtavak si Hisus te, “Ke penduan ne iring te, ‘Kenà ka ed-imatey, kenà ka edlangkadlangkad te esawa nu, kenà ka ebpenakew, kenà ka edtariutarù, ¹⁹ edati nu ke amey nu wey ke iney nu, wey ikelimù nu ke ruma nu iring te kegkelimù nu te hinawa nu,’” ke si Hisus.

²⁰ “Langun keniyan ne midumaan ku,” ke se kenakan, “engkey pè ma se kurang ne ed-ul-ulaan ku?”

²¹ “Embiya iyan nu kiyug ne warè en kurang te ed-ul-ulaan nu,” ke si Hisus, “ne ulì ka ne pesaa ke langun ne kearen nu ne ipemehey nu ve ke elehà din diyà te menge ayuayu su apey ruen kekewesai nu riyà te langit ne muna pà dut te kearen nu kayi. Ne arà pà ne pengkayi ka te eduma kedì.”

²² Nerineg ini rut te kenakan ne mid-ipanew en se merungkug su kewasa nevenar.

²³ Ketà ne migkahi si Hisus kayi te edumdumaan din te, “Benar ini te merehen nevenar dut te kewasa ne etew se kebpsakup din te menge etew ne Edetuan te Eleteala. ²⁴ Ne igkahi ku pà lavew keniyu te embiya id-upama ta ne iyan pà melemu ne ebpevayà diyà te vudsi te rahum ini se binatang ne kemilu tumin dè be ke kebpsakup te etew ne kewasa dut te menge etew ne Edetuan te Eleteala.”

²⁵ Guna su nerineg ini kayi te menge edumdumaan din ne ingkegeyip dan nevenar ne mid-insà dan te, “Embiya iring ketà se kerehen din te etew ne kewasa te kebpsakup din dut te menge etew ne ebeyveyaan te Eleteala, ne engkey rè be buwa se ebpekehaked te umur ne warà edtemenan din?”

²⁶ Ne midtengteng si Hisus kandan ne migkahi en te, “Embiya etew rà ne kenà dan ebpekegaga ne egaked te umur ne warà edtemenan din, ugaid ne Eleteala se ebpekegaga ne ebehey kandan su egkegaga te Eleteala ke langun taman.”

²⁷ Ketà ne migkahi si Pedro te, “Netuenan nu te mid-ewaan dey ke langun taman dey su miduma key keykew. Ne engkey ve se lalew rey?”

²⁸ Ne migkahi si Hisus kandan te, “Sebenarvenar ne ini se egkehiyen ku keniyu te embiya egkeuma ke hewii te egkevehu en ini se kelibutan, ne Sikandin ke Impeanak te Menusiyà ne eppinuu en diyà te eppinuuwan te punggus ne datù se Edatù te langun. Ne sikiyu ke sepulù wey deruwa ne edumdumaan ku ne ebpepinuuwan ku sikiyu se egkamal dut te sepulù wey deruwa ne bansa te inenakan ni Israyil. ²⁹ Ne misan entei ne etew se neewaan din ke ubpaan din, menge suled din, menge etevey rin, ke amey rin etawa iney rin, menge anak din etawa ke tanà din su atag dut te keduma rin kediye, ne ebpeketalimà sikandin te kemehatus egketakep se neewaan din ne ebehayan pà te umur ne warà edtemenan din. ³⁰ Ugaid ne merakel ne menge etew guntaan,” ke si Hisus, “ne mepurù se ketengdanan din ne ketà te akir din ne hewii ne sikandan ke pinekemevavà te langun. Ne ruen menge etew guntaan ne mevavà dan nevenar, ne ketà te akir din ne hewii ne sikandan se pinekebmepurù se ketengdanan din.”

20

Ke Sempità ni Hisus Mekeatag te Menge Etew Ne Egelevek te Eleteala

¹ Ne mibpenempità si Hisus se egkahi te, “Ini se Kedatù te Eleteala te menge etew ne iring kayi. Ruen senge etew ne meluag se impemula rin ne wahed ne ed-ingaranan te paras. Mibpaneypaney ini se kemuney se ebepemengà te edsukeyan din ne egelevek kayi te pemulaan din.

² Guna su ruen en nekita rin ne in-upakat din en te edsukeyan din te senge elad ne pelatà su arà ke nelayaman ne sukey te senge hewii, ne pinehelevek din en kayi te pemulaan din.

³ “Guna su edluuk en ebpmemenayik ke andew ne midlived pà ke kemuney diyà te pedian ne ruen nekita rin ne ebpimpinuu su warà helevek din. ⁴ Tembù be migkahi ini se kemuney te, ‘Gelevek kew rema diyà te pemulaan ku ne edsukeyan ku sikiyu te sesangan.’ ⁵ Ne mibpendiyà dan en.

“Guna su neudtu en ke andew ne midlived pà maa se ebpmengà te rumá ne egelevek kandin, ne engketà ded ke mid-ulaula rin te edluuk en ebpmenaug ke andew. ⁶ Guna su meapun en nevenar ne midlived

pà sikandin diyà te pedian ne ruen ruma ne nekita rin ne ebpimpinuu rà. ‘Meambe ke ebpimpinuu kew rà kayi ne kenà niyu ebpekinuhunan ke hewii?’ ke sikandin.

⁷ “‘Su warà ebpehelevk kenami,’ ke sikandan.

“Ne migkahi sikandin kandan te, ‘Gelevek kew rema diyà te pemulaan ku.’

⁸ “Ketà te ebpengirum-irum en ne migkahi ini se kemuney ketà te kedserihan din te, ‘Tewaha nu ke mibpenggelevek ne sukayi nu en. Unai nu te edsukekey ke mewri ne pinelusud ku, ne arà pà ke neuna.’

⁹ “Ne ini se menge etew ne pinelusud din te egelevek te meapun en ne midsukeyan te sukey te senge hewii. ¹⁰ Guna su edsukayen en ini se neuna ne pinelusud din, ne iyan dan pegitungan ne labi pà ke egkekuwa ran su migelevek dan te neep-epunan. Ugaid ne andang ded ne sukey te senge hewii ke nekuwa ran. ¹¹ Nekuwa ran ke sukey ran ne mibpemivig dan dut te kemuney. ¹² Ke sikandan te, ‘Meambe ke neked-iring dà ke sukey rey dut te mewri ne pinelusud nu te senge uras dà se kinehelevek dan? Ugaid ne sikami,’ ke sikandan, ‘ne kayi en minatey ke andew te peka rey.’

¹³ “Ne migkahi en ini se kemuney te, ‘Suleren, warà a midlimbung kenyi, su migkiyug kew ma ne egelevek dut te andang ne sukey te senge hewii. ¹⁴ Na, telimaa niyu en ini se sukey niyu, ke se kemuney, ne ulì kew en. Su kediey ne kiyug ini se mewri ne pinelusud ku ne edsukayan ku te iring ded dut te insukey ku kenyi. ¹⁵ Meambe, kenà ku egkeveyveyaan ke kedi ne kureta? Maa, egkeima kew su metulanged a dut te menge etew?’

¹⁶ “Ne migkahi pà maa si Hisus te, “Duen merakel ne menge etew ne mepurù se ketengdanan din guntaan ne ketà te akir din ne hewii ne sikandan ke pinekemevavà. Ne ruen merakel ne menge etew ne kevevaan guntaan, ne ketà te akir din ne hewii sikandan se pinekemepurù se ketengdanan din.”

*Iketelu en ne Kebpayag ni Hisus Atag te Kebpatey Rin
(Marcos 10:32-34; Lucas 18:31-34)*

¹⁷ Ketà ne mibpendiyan en ensi Hisus te Hirusalim. Ne impesivey ni Hisus ke sepulù wey deruwa ne edumdumaan din ne gewii ran te ed-ip-ipanew ne migkehiyan din sikandin te, ¹⁸ “Netuenan niyu en,” ke si Hisus, “ne ebpendiyà kiyu te Hirusalim ne ketà sikandin ke Impeanak te Menusiyà ne ibpalad en diyà te menge mepurù te terebpelengesa wey ke menge meyerù te penduan. Ne ebpegumpung dan en te kukuman te ed-imetayan sikandin, ¹⁹ ne arà ne ibpalad dan diyà te menge etew ne kenà Hudiyenan, ne ed-undaunda kandin, ebpenlambit kandin, arà pà ne ed-imetayan. Ugaid ne keta te iketelu ne hewii ne egkevanew red sikandin.”

*Ke Mibuyù te Esawa ni Sibidiyu
(Marcos 10:35-45)*

²⁰ Ne mibpengkayi te ki Hisus ke esawa ni Sibidiyu abpeg ke deruwa ne anak din ne meama ne midlumpeng sikandin kayi te sineruwan ni Hisus su ruen ebpemuyuen din.

²¹ Ne mid-insà si Hisus te, “Engkey se ebpemuyuen nu?”

“Ini se ebpemuyuen ku,” ke sikandin, “ne ketà te akir din ne hewii te kedadù nu en ne pepinuuwa nu ini se deruwa ne anak ku ne rumu nu te edatù, seveka riyà te egkekewanu nu ne seveka riyà te egkehivang nu.”

22 “Matag niyu en ini ebuyua,” ke si Hisus, “ne warà niyu mesebuti an se ebuyuen niyu. Maa, ebpeketigker kew ve dut te kemeresayan ne mehaan ku en ibpevaya?”

“Uya,” ke sikandan, “egketigkeran dey.”

23 “Benar iya ne edresayan kew iring dut te kemeresayan ku,” ke si Hisus, “ugaid ne warà ketengdanan ku te eppemili ke engkey se ebpepinuuwen ku kayi te egkekewanu ku wey kayi te egkehivang ku. Su ini ne intail dut te Amey ku ne Eleteala dut te mibpemili din.”

24 Guna su nerineg kayi te sepulù ne edumdumaan ni Hisus arà se ebuyuen dut te esawa ni Sibidiyu, ne nengeepes dan kayi te deruwa ne teleari. 25 Tembù be midtawag dan langun ni Hisus se egkahi te, “Netuenan tew se ini te menge pengulu te inged kayi te ampew te dunya ne metehel ne edsuhù te langun ne menge etew, ne ini se menge unuten ne kandan dà ne kiyug se edumaan. 26 Ugaid ne sikiyu,” ke si Hisus, “ne kenà kew ed-iring ketà. Su embiya ruen seveka keniyu ne egkiyug ne ebmepurù, ne iyan iya se mebppeembavà te hinawa rin wey ebpevayabayaò dut te menge rumu rin; 27 ne embiya ruen seveka keniyu ne egkiyug te sikandin se ebpekeuna te langun niyu, ne iyan iya se mebppeembavà te hinawa rin wey ebpevayabayaò dut te menge rumu rin. 28 Med-iring sikandin dut te Impeanak te Menusiyà te kenà iyan din kinepengkayi te ampew te dunya ne apey metevangi te menusiyà. Ugaid ne iyan din kinepengkayi ne apey rin metevangi sikandan, ne egkeimetayan su apey merakel se egkevelukasan.”

*Neulian ni Hisus Ke Deruwa ne Meama ne Pisek
(Marcos 10:46-52; Lucas 18:35-43)*

29 Guna su ed-awà en ensi Hisus te inged ne Hiriku ne ruen merakel ne menge etew ne mibpenduma kandan. 30 Ne diyà te kilid te ebpevayaan dan ne ruen deruwa ne meama ne pisek ebpimpinuu. Guna su nerineg kayi te deruwa ne pisek te edsahad si Hisus ne midtawag dan te, “Igkeyru key nikuna! Su sikuna ke inenakan dut te datù tew rengan ne si David!”

31 Ke merakel ne menge etew ketà se midawey kandan te mebdeeneng-eneng dan ugaid ne lemban en ne egkeilut se ebpemensag te, “Kerenan, igkeyru key nikuna! Su sikuna ke inenakan dut te datù tew rengan ne si David!”

32 Guna su nerineg ni Hisus ne mid-itindeg pà ne midtawag din sikandan se egkahi te, “Engkey ma se ebpetevangni niyu kediey?”

33 Ne migkahi ke menge pisek te, “Kerenan, kiyug dey ne mekekita key red perem!”

34 Neyru si Hisus kandan ne midampen din ini se menge mata ran. Arà dà iya ne nekekita ran en, ne miduma ran en ki Hisus te ked-ip-panew ran.

21

*Ke Kinelusud ni Hisus Diyà te Hirusalim ne Mid-untud te Nati ne Kudà su Tuus ini te Datù Sikandin Dut te Menge Hudiyanan
(Marcos 11:1-11; Lucas 19:28-40; Juan 12:12-19)*

¹ Guna su ebpelundani ran en te Hirusalim ne nekeuma ran en te inged ne Bitpahi ne egkelingakà ke buvungan ne ed-ingaranan te Ulivuwen. Midsuhù en ni Hisus ke deruwa ne edumdumaan din te ebpeunaan dan, ² ke sikandin te, “Una kew en be ketà te inged ne an te unaan ta, ne ketà te kebpekeuma niyu ne egkekita niyu se in-iket ne kudà wey ke nati rin. Ekari niyu be ne ewita niyu kayi,” ke si Hisus. ³ “Ne embiya ruen ed-insà keniyu ke maan ke ed-ekaran niyu ne iyan niyu kehiya te, ‘Ke Kerenan dey se ebpegingawà kayi te egkeunturan din’ ne seguguneey ne ibehey rin keniyu.”

⁴ Ne ned-ulaula ini su apey metuman ke impesurat te Eleteala dut te senge etew ne mibpelambas te lalag din rengan ne egkahi te,

⁵ “Kehiya niyu diyà te menge etew te Hirusalim te,

‘Ebpekeuma en ke datù niyu!

Meamuk sikandin
ne ed-untud te nati te kudà,
uya, ed-untud te anak te kudà, ke binatang ne eduranañ.’ ”

⁶ Tembù mid-una mid-ipanew ini se deruwa ne edumdumaan din ne midtuman dan ke migkahi ni Hisus. ⁷ Ne mid-ewit dan en ini se kudà wey ke nati rin kayi te ki Hisus, ne midebpasan dan te kumbalà dan ne mid-untud en ketà si Hisus. ⁸ Merakel ne menge etew ketà se midtulid te menge kumbalà dan te ebpepevayaan ki Hisus, ne ke rumah ne mibpenibpù dan te menge subpang ne rawunen su intulid dan diyà te ralan su ini ke tuus te adat te menge Hudiyanan dut te menge mepurù dan. ⁹ Ne ke menge etew ne mid-una ki Hisus wey engketà ded ke midtundug kandin ne migkerag te,

“Edeyuen tew ke inenakan ni David!

Menu ma ke ebpeneuven te Eleteala
ini se midtendù din ne edatù te langun!
Edeyuen tew ke Eleteala!”

¹⁰ Ketà te kedlusud en ni Hisus te Hirusalim, ne mibmehurub ke langun ne menge etew dutun. “Engkey ini etawa?” ke sikandan.

¹¹ Midtavak ini se menge miduma ki Hisus te, “Si Hisus ini ne ebpelambas te Lalag te Eleteala ne riyà ebpnuun te Nesarit diyà te lusud te Geliliya.”

*Mibpenegseg ni Hisus ke Ebpmendahang Diyà te Nekebpuru ne Valey te Eleteala
(Marcos 11:15-19; Lucas 19:45-48; Juan 2:13-22)*

¹² Guna su nekeuma en si Hisus diyà te Hirusalim, ne midlusud sikandin diyà te Nekebpuru ne Valey te Eleteala ne mibpemengseg din en ke menge etew ne ebpememasa wey ke menge ebpmendehang ketà. Ne mibpenunggad din ke menge lemisaan dut te menge etew ne ebpemambi te kureta wey ke menge ebpeminuuwan dut te menge etew ne ebpmendahang te menge melepati ne ibpemelengesa rut te menge Hudiyanan diyà te Eleteala. ¹³ Ne migkehiyan din sikandan te, “Duen en ura impesurat ne Lalag te Eleteala ne egkahi te, ‘Ini se baley ku ne ed-ingaranan te baley ne ebpengeningiyan te menge etew.’ Ugaid

ne sikiyu,” ke si Hisus, “ne mibaluy niyu en ini ne ubpaan te menge tenlimbungén!”

¹⁴ Ne gewii te diyà si Hisus te Nekebpuru ne Valey te Eleteala ne mid-uvvey kandin ke menge pisek wey menge pungkù ne neulian din. ¹⁵ Ne nengeepes neveran ki Hisus ke menge mepurù te terebpelengesa wey ke menge meyterù te penduan te nekita ran ini se mekegeyip ne mid-ulaula ni Hisus wey ke menge vatà ne egkerag te kedeyù dan kandin te, “Edeyuen tew ini se inenakan dut te datù tew rengan ne si David!”

¹⁶ Tembù be migkehiyan dan si Hisus te, “Menu, nerineg nu red ayan se migkahi ran?”

“Nerineg ku,” ke si Hisus. “Ne maa, warà niyu bes mevasa ke impesurat ne Lalag te Eleteala ne egkahi te,
‘Misan ke deisek ne menge vatà
ne mibpenurù te Eleteala te edeyù kandin.’”

¹⁷ Ketà ne mid-awà en si Hisus se ebpependiyà te inged ne Bitanya ne dutun en mid-irehà.

*Ke Kayu ne ed-ingaranan te Igira ne Mibpenrewakan ni Hisus
(Marcos 11:12-14, 20-24)*

¹⁸ Nepawà ketà te kedlived dan diyà te Hirusalim, ne nevitil si Hisus.

¹⁹ Ne nekekita sikandin te kayu ne igira uvvey te ibpevayà dan. Mid-uvvey rin su ed-inteng sikandin ke ruen bahas din, ugaid ne warà nekita rin su tibal rawun. Ne migkehiyan ni Hisus ke kayu te, “Igenat guntaani ne kenà ke en imbe ebpekevahas!” Arà dà ne nehangu en ke kayu.

²⁰ Nekita ini rut te menge edumdumaan din ne negeyip dan. Ke sikandan te, “Meambe ke megmehaan nehangu ke kayu?”

²¹ “Sebenarvenar ne ini se egkehiyen ku kenyi,” ke si Hisus, “embiya edsarig kew te Eleteala te warà keduwaruwa te hinawa niyu, ne ebpekegaga kew te iring kayi te mid-ulaula ku ini kayi te kayu. Ne kenà ketà dà taman su misan ke kenà egkegaga te menusiyà ne egkegaga niyu iring te egkehiyan niyu ini se buvungan te, ‘Awà ka keniyan ne riyà ka te rahat,’ ne egketuman ini se egkehiyen niyu. ²² Tembù be,” ke si Hisus, “idtarem ku kenyi te embiya ruen ebuyuen niyu te Eleteala, ne eheta niyu ke hinawa niyu te warà keduwaruwa rin ne egketelimà niyu ini.”

*Mid-insaan si Hisus Mekeatag te Kewagib din dut te Mibpenegseg Din
ke Menge Ebudemahang Diyà te Nekebpuru ne Valey te Eleteala
(Marcos 11:27-33; Lucas 20:1-8)*

²³ Guna su nekeuma ran en maa diyà te Hirusalim, ne midlived en maa si Hisus ketà te Nekebpuru ne Valey te Eleteala. Gewii rin te ebpenurù kayi te lusud ne ruen menge mepurù te terebpelengesa wey menge pekilukesen te Hudiyenan ne mid-uvvey kandin ne mid-insaan dan si Hisus te, “Ini se mid-ulaula nu kayi te Nekebpuru ne Valey te Eleteala, engkey se kewagib nu te ed-ulaula te iring kayi? Ne engkey se mibehey keykew te kewagib?”

²⁴ Midtavak si Hisus te, “Duen seveka rà ne id-insà ku kenyi, ne embiya egketavak niyu ne idtarem ku kenyi ke engkey se mibehey kedì te kewagib kayi te mid-ulaula ku. ²⁵ Entei se mibehey ki Juan ke

Ebpembunyag te kewagib te ebpembunyag, diyà be te Eleteala etawa kayi rà dè duen te menusiyà?”

Ne mibpein-insey ran te, “Engkey se idtavak tew? Su embiya iyan tew egkehiyen se, ‘Riyà ebpun te Eleteala,’ ne ed-insà maa sikandin te, ‘Meambe ke warà kew mebperetiyaya ki Juan?’²⁶ Ugaid ne embiya egkahi ki te, ‘Kayi red ebpun te menusiyà,’ ne egkekeiran ki su mibperetiyaya ke langun ne menge etew te mibpelambas te Lalag te Eleteala si Juan.”²⁷ Ketà be ne midtavak dan ki Hisus te, “Kenà dey egketuenan.”

Ne migkahi rema si Hisus kandan te, “Embiya iring ketà, ne kenà ku rema egkehiyen ke engkey se mibehey kedi te kewagib te mid-ulaula kayi.”

Ke Sempità ni Hisus Mekeatag te Deruwa ne Teleari ne Meama

²⁸ Mibpenurù pà maa si Hisus te, “Peg-pegitunga niyu ke engkey se meana rin ini se sempità ku. Duen senge etew ne deruwa se anak din me meama. Mid-uvey rin ini se kakey ne migkahi te, ‘Gelevek ka, Mama, diyà te pemulaan ta.’

²⁹ “Ah, kenà a!” ke se anak din. Ugaid ne nekepegpegitung ded ne ketà ne mibpendiyà te pemulaan dan.

³⁰ “Ne mid-uvey rut te meama ini se ari ne anak din ne engketà ded maa ke migkahi rin. ‘Uya, Amà,’ ke se anak din, ‘ebpendiyan a.’ Ugaid ne warà medtuman.

³¹ “Na, endei ve rapit kayi te deruwa ne teleari,” ke si Hisus, “se midtuman dut te suhù te amey ran?”

“Ke kakey,” ke sikandan.

“Idtarem ku keniyu,” ke si Hisus, “te ini se menge etew ne kenà meupiya kayi te etuvangan niyu iring te menge ebpevayad te buwis wey menge meritan ne warà en keeleran din ne ebpekeiring dut te kakey dut te teleari su edtuman dan guntaan te Lalag te Eleteala ne tembù be egkeuna ran keniyu ne ebpekulusud dut te menge etew ne Edetuan te Eleteala.³² Su mibpengkayi te keniyu si Juan ke Ebpembunyag,” ke si Hisus, “su ebpenturù te metidtu ne ralan diyà te Eleteala, ne warà kew mebperetiyaya. Ugaid ne ini se ebpevayad te buwis wey ke menge meritan ne warà en keeleran din ne mibperetiyaya ran mulà. Ne sikiyu, misan nekita niyu en te nesembian dan ke ulaula ran su sabap te kebperetiyaya ran, ne warà kew mebpedsendit wey mebperetiyaya kandin.”

Ke Sempità ni Hisus mekeatag te Menge Etew ne Pinetuganur te Pemulaan

(Marcos 12:1-12; Lucas 20:9-19)

³³ “Pemineg kew pà,” ke si Hisus, “te ruma pà ne sempità ku. Ruen senge etew ne ruen tanà din ne mibpemulaan din te wahed ne ed-ingaranan te paras. Ne mid-alad din arà, ne mibaal te edtehuan dut te egkekeres ne bahas te paras, ne midsebungan din te ebpeubpaan dut te ebpeventayen din. Ne ruen pinekamal din dut te impemula rin, ne arà pà ne mid-ipanew se ebpendiyà te meriyù ne inged.³⁴ Guna su midsabpet en ke pinemula rin, ne midsuhù din ke menge edsugsuhuen din su ibpekuwa ke kandin ne umun.³⁵ Ugaid ne nekeuma ini se midsuhù din, ne migeweran dut te pinekemal din ne mibedasan dan ne ruen mid-imetayan dan ne ruen mibpenrumbag dan te vatu.³⁶ Ne

misan iring ketà, ne ruen pà maa midsuhù din ne merakel pà dut te neuna. Nekeuma ran ketà ne engketà ded lavew ke imped-ulaula rut te pinekamal te pemulaan.

³⁷ “Ketà te ketepusan en ne iyan din en midsuhù ne ke anak din. Ke hingginawa rin te, ‘Kenà egkepakey ne kenà dan ed-edatan ini se anak ku.’

³⁸ “Ugaid ne guna su nekeuma ini se anak din ne mibpeglelahey ke menge pinekamal din te, ‘Ini en bes ke anak dut te kemuney kayi te tanà. Kuwa kew en su ed-imetayan tew su apey sikitew en se ebpekegkemuney kayi te tanà.’ ³⁹ Arà dà ne migeweran dan ne miguyud dan diyà te luwal dut te pemulaan ne mid-imetayan dan en.

⁴⁰ “Na,” ke si Hisus, “ketà te ked-uli dut te kemuney te tanà, ne engkey ve se ibped-ulaula rin dut te pinekamal din?”

⁴¹ Midtavak dan te, “Ebeyaan din arà se menge meraat ne etew ne ebpengimetayan din ne ebpekemalan din te ruma ne etew ne ebehey kandin te umun din ke egkeuma te kedsebpét.”

⁴² Ne migkahi pà maa si Hisus te, “Maa, warà niyu ves mevasa ke impesurat ne Lalag te Eleteala mekeatag te ini? Su nekahí ketà te, ‘Ke pelaus ne mid-eng-engkeran
dut te menge etew ne ebpmemealey
su kunaan dan ke warà rantek din,
ne iyan en iya ini
nepemilì ne segkad te valey.
Ini se mid-ulaula te Kerenan,
ne mekegeyip nevenar!’

⁴³ “Igkahí ku keniyu,” ke si Hisus, “te ini se umun niyu kayi te Edetuan te Eleteala ne id-awà kayi te keniyu ne ibehey diyà te ruma ne menge etew ne ebperumaruma te Lalag te Eleteala.

[⁴⁴ Ne geina te siaken ini se segkad ne egkerupet ke langun ne egkeulug ketà, ugaid ne egkepiginì ke langun ne egkepilayan din.]

⁴⁵ Guna su nerineg dut te menge mepurù te terebpelengesa wey ke menge Peresiyu ini se sempità ni Hisus, ne netuenan dan te sikandan ke nesuhat ketà, ⁴⁶ tembù be ibpesigkem dan perem si Hisus. Ugaid ne neandek dan dut te merakel ne etew su mibperetiyyaya ini se menge etew te ebpelambas te Lalag te Eleteala si Hisus.

22

Ke Sempità ni Hisus Mekeatag te Kevurunan te Kewingan ne Ibpeiring Din dut te Kevurunan te Eleteala te menge Etew ne Edetuan Din

(Lucas 14:15-24)

¹ Mibpenempità pà maa si Hisus te kebpenurù din kayi te menge etew. ² “Ke Kedatù te Eleteala dut te menge etew,” ke si Hisus, “ne iring kayi. Duen senge etew ne datù ne mibair te kevurunan te kegkawing te anak din ne meama. ³ Ne midsuhù din ke menge edsugsuhuen din diyà te menge etew ne mid-inggat din te ebpesabut kandan te ibpetelavuk dan te kevurunan. Ugaid ne warà dan sehipaa ke menge edsugsuhuen.

⁴ “Ketà ne midsuhù pà maa te ruma ne edsugsuhuen din se egkahí te, ‘Kehiyi niyu ke menge etew ne neinggat ku te ebpehedad en su nelutù en ke sapi wey menge nati. Kuwa kew en su ebpekaan en!’

⁵ “Ugaid ne warà dan medsehipà su iyan dan midsinaru ke kandan ne ed-ul-ulaan. Ini se senge etew ne mibpendiyà te pengengewiran din, ne ke senge etew ne diyà te tindà din, ⁶ ne ruma pà dut te neinggat te datù ne migawed dut te menge edsugsuhuen din ne mibedasan ne mid-emetayan dan. ⁷ Nerineg ini dut te datù ne neepes nevenar sikandin ne midsuhù din ke menge sundaru rin ne mibpeimetayan din arà se mid-imatey rut te edsugsuhuen din ne mibpevinsulan din ke inged dan.

⁸ “Ne midtawag din ini se menge edsugsuhuen din ne migkahi te, ‘Nekepehendad en ke ibpekaan ku te kevurunan te kegkawing te anak ku, ugaid ne arà se menge etew ne mid-inggat ku ne kenà dan ebpekekaan su mid-engkenà dan dut te kineinggat ku kandan. ⁹ Pekehaan kew tuntula niyu ke menge meluag ne dalan ne ebpevayaan te merakel ne etew ne inggata niyu ke langun ne menge etew ne egkeuma niyu te ibpetelavuk kayi te kevurunan.’ ¹⁰ Ketà ne mibpendiyà ke menge edsugsuhuen ne midtuntul dan ke dalan, ne langun ne neumaan dan ne meupiya se ulaula rin etawa meraat ne mid-inggat dan te edtelavuk te kevurunan. Guna su nekeuma ran, ne nepenu en ke baley dut te egkewingan.

¹¹ “Midlusud ini se datù ne mibair te kevurunan su ed-intengan din ke menge etew ne midtelavuk ne nekita rin ini se senge etew ne warà mekebevelegkas te belegkas ne idtelavuk te kewangan. ¹² ‘Mama,’ ke se datù, ‘engkey se kinepekelusud nu kayi te warà ka mibevelegkas te idtelavuk te kewangan?’ Ugaid ne warà migkahikahi ke meama.

¹³ “Ketà ne migkehiyan dut te datù ke menge edsugsuhuen din te, ‘Bekua niyu ke belad din wey ke paa rin ne iantug niyu riyà te kerusireman. Ne ketà ne ebpekependerawit wey ebpekengingitel.’ ”

¹⁴ Ne migkahi pà maa si Hisus te, “Merakel ne menge etew se ed-inggaten te edlusud kayi te Edetuan te Eleteala, ugaid ne merelag se egkepemili din.”

Edlitahen perem si Hisus dut te Menge Peresiyo atag te Ked-insà dan Mekeatag te kebayad te Buwis

(Marcos 12:13-17; Lucas 20:20-26)

¹⁵ Ketà ne mid-awà ke menge Peresiyo ne mid-upakat dan te edseligkaten dan te menge insà si Hisus. ¹⁶ Ne ruen en midsuhù dan diyà te ki Hisus ne menge edumdumaan dan wey menge sakup ni Hirudis. “Meyterù,” ke sikandan, “netuenan dey te edlalag ka te benar. Ne ibpenurù nu ke benar mekeatag te kiyug te Eleteala rut te menge etew. Ne kenà ka egkepeneheewit dut te lalag te menge etew su warà etew ne ebpelebiyen nu. ¹⁷ Kehiya nu kenami ke engkey se pegitungan nu kayi te id-insà dey kenikew. Maa ibpekerimpas kiyu ve dut te penduan tew embiya ebayad ki te buwis riyà te ratù tew diyà te inged ne Ruma, etawa kena?”

¹⁸ Ugaid ne netuenan ni Hisus ini se meraat ne netahù te itungan dan ne migkahi te, “Sikiyu ne uvag kun ne ruen id-insà niyu kedi! Ugaid ne iyan se ebaal kew rà te ralan te kegkelitag niyu kediey! ¹⁹ Peintenga a niyu kun te kureta ne ibayad te buwis!” Impekita ran kandin ke kureta, ²⁰ ne migkahi sikandin te, “Engkey ki paras wey ngaran kayi?”

²¹ “Paras wey ngaran dut te ratù tew kayi te inged ne Ruma,” ke sikandan.

“Embiya iring ketà,” ke si Hisus, “ne ivehey niyu diyà te datù ayan se buwis kandin, ne ivehey niyu riyà te Eleteala ke endei rema ke kandin.”

²² Nerineg dan ini se migkahi ni Hisus ne ingkeinuinu ran nevenar, ne mid-ewaan dan en sikandin.

Mid-insà ke menge Sadyusiyu ki Hisus Mekeatag te Kegkevanew te Menge Minatey

(*Marcos 12:18-27; Lucas 20:27-40*)

²³ Arà ne hewii ne ruen menge Sadyusiyu ne mibpengkayi te ki Hisus. (Ini se menge Sadyusiyu ke menge etew ne warà mebperetiyyaya te egkevanew pà te Eleteala ke menge minatey.) ²⁴ “Meyterù,” ke sikandan, “impenorù dengan ni Moises te, ‘Embiya ruen meama ne ebpatey ne neketahak te esawa rin ugaid ne warà anak dan, ne ebpmeluwen dut te suled din ne meama su apey ruen ded anak dut te minatey ne ebpekesumpat.’ ²⁵ Su ruen nekeubpà kayi,” ke sikandan, “pitu ne meama ne telteleari ne mid-esawa en ke kakey, ugaid ne minatey te warà dan med-anak. Ne mibpemalu en dut te nesikupu rin arà se ipag dan. ²⁶ Ugaid ne minatey red dema te warà dan med-anak. Ne engketà ded dema ke iketelu. Ne engketà ded ke nesamà, langun dan te pitu ne etew se nekpemalu ketà te ipag dan, ugaid ne warà dan med-anak. ²⁷ Netaman ne minatey en ini se meritan. ²⁸ Ne ini ve se id-insà day keykew,” ke se menge Sadyusiyu. “Embiya benar ne egkevanew red te Eleteala ke menge minatey keuremà, ne entei ve rapit kandan se tehiesawa ketà te meritan? Su langun dan te pitu ne telteleari ne nekedtundug se nekeesawa kandin.”

²⁹ Ne migkahi si Hisus kandan te, “Warà en iya ebpekesuhat ne itungan niyu! Su warà niyu mesebuti ke impesurat ne Lalag te Eleteala, ne warà niyu mesebuti ke rekelà ne gehem din. ³⁰ Su ketà te hewii ne kegkevanew te menge minatey, ne warà en kebpees-eseweey su iyan dan en egkeiringan ke menge suluhuen te Eleteala riyà te langit ne kenà ebpees-eseweey. ³¹ Ne ini se id-insà niyu mekeatag te kegkevanew te menge minatey, ne maa warà niyu ves mevasa ke migkahi te Eleteala kenyi kayi te impesurat din? Su migkahi te, ³² ‘Siaken ke Eleteala ne ebengerapen ni Abraham, ni Isaac, wey si Jacob.’ Tembù be netuenan tew,” ke si Hisus, “te misan minatey ran en ne biviyag dan pà diyà te etuvangan te Eleteala su iyan dà ebpekepengarap te Eleteala ke biviyag, kenà ke minatey.”

³³ Guna su nerineg ini dut te menge etew, ne negeyip dan nevenar dut te kebpenorù din.

Duen Meyterù te Penduan ne Edlitag Perem ki Hisus atag te Insà Din ke Engkey se Pinekemepurù ne Penduan

(*Marcos 12:28-34; Lucas 10:25-28*)

³⁴ Guna su nerineg kayi te menge Peresiyu te nekepeeneng-eneng ke menge Sadyusiyu dut te penurù ni Hisus, ne mibpengkayi ran te ki Hisus. ³⁵ Senge etew kandan se edlitag ki Hisus dut te menge insà din su metmetau sikandin ne meyerù te penduan dan. ³⁶ “Meyterù,” ke sikandin, “engkey ma rut te penduan tew se pinekemepurù te langun?”

³⁷ Ne midtavak si Hisus te, “Iamin nu ke hinawa nu te edlimù te Kerenan ne Eleteala nu, ne iamin nu ke baher nu wey ke itungan nu te ed-ulaula ke engkey se ebpekesuhat te hinawa rin.” ³⁸ Ini ke

pinekemepurù ne penduan ne egkeuna rut te langun. ³⁹ Ne ini ke ikeruwa ne pinekemepurù dut te langun: 'Kelimù nu ke ruma nu iring te kegkelimù nu te hinawa nu.' ⁴⁰ Ne langun te penduan ne intelaan ni Moises kenitew wey ke impenurù dut te mibpelambas te Lalag te Eleteala rengan ne kayi ebpuun se deruwa ini."

Impesabut ni Hisus te Sikandin ke Impasad te Eleteala ne Ebayàbayà te Langun

(Marcos 12:35-37; Lucas 20:41-44)

⁴¹ Ketà te kinekevurun te menge Peresiyu ne mid-insaan dan ni Hisus te, ⁴² "Menu, engkey se pegitungan niyu mekeatag dut te Mesiyas, ini se Impasad te Eleteala rengan ne Ebperetuen te langun? Engkey ki inenakan sikandin?"

"Inenakan sikandin dut te ratù tew rengan ne si David," ke sikandan.

⁴³ "Benar;" ke si Hisus, "ne geina te iring ketà ne meambe ke migkahi si David te arà se Impasad te Eleteala ne Ebperetuen te langun ne Kerenan din? Su midlumunan te Kedesenan ne Ebpetuntul te Menusiyà si David ne impesurat din te,

⁴⁴ "Migkahi ke Eleteala ketà te Kerenan ku te,
Kayi ka pinuu te rapit te egkekewanen ku
taman te ebpenggiikan ku
ke menge kunterà nu."

⁴⁵ Na," ke si Hisus, "embiya ini ke nekahi ni David te arà se Impasad te Eleteala ne Ebperetuen te langun ne Kerenan din, ne maa egkepakey ve ne kayi red ini te inenakan din?"

⁴⁶ Ne warà etew ne ebpekekahi ketà. Ne inggenat dè be ketà ne warà en ebpeketikà ne ed-insà ki Hisus.

23

Duen Imbaag ni Hisus Mekeatag te Ed-ul-ulaan te Menge Meyterù te Penduan wey ke Menge Peresiyu

(Marcos 12:38-39; Lucas 11:43, 46; 20:45-46)

¹ Ne migkehiyan ni Hisus ke denda ne etew wey ke menge edumduaan din te, ² "Ini se menge meyterù te penduan wey ke menge Peresiyu te ruen ketenged din te edseysey rut te Penduan ne intelaan ki Moises. ³ Iyan iya se medtuman kew te langun ne penurù dan, ugaid ne kenà kew ed-iring dut te ed-ul-ulaan dan su kenà dan edtumanen ke ibpenurù dan te menge etew. ⁴ Ebpekevahatan dan ke menge etew te penduan ne kenà dan egkegaga te edtuman, ugaid ne warà misan deisek dà ne idtavang dan te edtuman ketà.

⁵ "Langun ne ed-ul-ulaan dan ne iyan dan ked-ulaula ne ibpereyùdeyù dan dut te menge etew. Intengi niyu ma ke derekèla ne imbevengkeleng dan wey ke imbagkes te velad dan ne midtehuan te insurat ne Lalag te Eleteala! Ne engketà ded ayan se melayat ne peyapey te belegkas dan! ⁶ Embiya edtelavuk dan te kevurunan ne riyà dan ebpinuu te insivey ne meupiya ne ebpepinuuwan te egkeedatan, ne embiya riyà dan en te valey ne ebpengedian te penduan dan ne ebpmili dan te meupiya ne ebpepinuuwan diyà te sineruwan. ⁷ Iyan dan kiyug ne ed-edatan dan te menge etew riyà te kevurunan, ne kiyug dan dema ne ed-ingaranan te 'Meyterù.'

8 "Ugaid ne sikiyu ve ne kenà kew peingaran te 'Meyterù,' su langun niyu ne iring te ebpenusuled su seveka rà ke Meyterù. ⁹ Liyu rà te tuney ne amey niyu, ne kenà kew ed-amey te piya entei kayi te ampew te dunya su seveka rà ke amey niyu ne Eleteala riyà te langit. ¹⁰ Ne kenà kew rema peingaran te Pengulu su seveka rà ke pengulu niyu ne arà dà se Mesiyas ke Impasad te Eleteala ne Ebperetuen te langun. ¹¹ Ne embiya ruen seveka keniyu ne egkiyug ne ebmepurù ne iyan iya se mebpeembavà te hinawa rin wey ebpevayàbayà dut te langun. ¹² Su piya engkey ne etew ne ebpepurùpurù te hinawa rin ne ibpevavà te Eleteala, ugaid ne piya engkey ne etew ne mepeembavà te hinawa rin ne ibpepurù sikandin te Eleteala."

Mid-isuhat ni Hisus te Kewagib ke Menge Meyterù te Penduan wey Menge Peresiyu

(Marcos 12:40; Lucas 11:39-42, 52; 20:47)

13 Ne migkahi pà maa si Hisus te, "Mekeyruwiru kew ne menge meyterù te Penduan wey menge Peresiyu su edusaan kew dut te Eleteala! Uvag en kun ne eduma kew te kiyug te Eleteala! Ugaid ne ebelevahan niyu ke ibayà te menge etew ne ebpesakup perem te Eleteala. Sikiyu ne kenà kew ebpesakup dut te Kedatù te Eleteala, ne ed-alang kew pà maa dut te menge etew ne edlusud perem. [¹⁴ Mekeyruwiru kew ne menge meyterù te Penduan wey menge Peresiyu su edusaan kew te Eleteala! Uvag en kun ne eduma kew te kiyug te Eleteala! Ne ebpeedleyedley kew te kebpengeningeni niyu te Eleteala su uvag kun se rekelà se sarig niyu te Eleteala. Ugaid ne kayi te ed-ul-ulaan niyu ne misan iring te edtavang kew te menge valu ne meritan, ne iyan niyu ma kedadavang su apey niyu meahew ke kearen dan.]

15 "Mekeyruwiru kew ne menge meyterù te Penduan wey menge Peresiyu su edusaan kew te Eleteala! Uvag en kun ne eduma kew te kiyug te Eleteala! Medmeriyù se ed-ipanewan niyu te tanà wey edlayag kew te rahat su ed-eneb te penurù niyu apey ruen ebpekeperumaruma keniyu. Ne embiya ruen ebpekeperumaruma keniyu, ne nasi en be maa ne warà pelahuy rin te ebpekependiyà te apuy nerakà dut te sikiyu.

16 "Mekeyruwiru kew! Su iring kew te pisek ne edtuyuk te pisek ded dema! Mibpenurù kew te, 'Embiya ruen etew ne edsesapà te edreviten din ke Nekebpuru ne Valey te Eleteala, ne misan kenà din edtumanen ne warà kereetayan din. Ugaid ne embiya edsesapà te edreviten din ke bulawan ketà te lusud te Nekebpuru ne Valey te Eleteala, ne iyan iya se medtuman sikandin te ini se insapà din.' ¹⁷ Warà itungan niyu su kayi te ini se ed-ul-ulaan niyu ne iring kew te pisek! Meambe, endei rapit se mevahat ne idsesapà niyu, ke bulawan etawa ke Nekebpuru ne Valey te Eleteala? Su ini se Nekebpuru ne Valey te Eleteala ne berekat, ne nevaluy ne berekat ke bulawan su kayi intahù. ¹⁸ Ne impenurù niyu rema te, 'Embiya ruen etew ne edsesapà te edreviten din ke edenaan te ibpelengesa te Eleteala, ne misan kenà din edtumanen ne warà kereetayan din. Ugaid ne embiya ruen etew ne edsesapà te edreviten din ke indenà ne ibpelengesa, ne iyan iya se medtuman sikandin te ini se insapà din.' ¹⁹ Benar iya ne iring kew te pisek! Meambe, endei rapit se mevahat ne idsesapà niyu, ke indenà ne ibpelengesa

etawa ke edenaan te ibpelengesa? Su ini se edenaan se ibpelengesa ne berekat, ne nevaluy ne berekat ke langun ne idenà ne ibpelengesa ketà. ²⁰ Tembù be embiya ruen etew ne edsesapà te edreviten ke edenaan te ibpelengesa, ne ebekeragkes en ke langun ne indenà ne ibpelengesa ketà. ²¹ Engketà ded dema ke ruen etew ne edsesapà ne edreviten ke Nekebpuru ne Valey te Eleteala, kenà ke Nekebpuru rà ne Valey te Eleteala ke idsesapà din su elin dema ke Eleteala ne ed-ubpà ketà. ²² Ne engketà ded dema ke ruen etew ne edsesapà ne edreviten din ke langit, ne kenà ke langit dà ke idsapà din su elin dema ke Eleteala su ketà ebpinuu se edatù te langun.

²³ “Mekeyruwiru kew ne menge meyerù te Penduan wey menge Peresiyu su edusaan kew te Eleteala! Uvag kun ne eduma kew te kiyug te Eleteala! Ebehey kew te Eleteala te kandin ne umun ne ikesepulù dut te pinemula niyu ne peninù iring te tandlad wey bawing, ugaid ne warà niyu tumana ke didis en dut te Penduan. Su kenà metidtu ke ulaula niyu ne kenà kew egkeyru te menge ruma niyu, ne kenà kew egkeserihan. Benar ne ebehey kew te Eleteala te kandin ne umun, ugaid ne warà niyu ma tumana ke didis en dut te Penduan. ²⁴ Ne iring kew te pisek ne edtuyuk te pisek ded dema! Embiya idsempità ta ne iring te id-awà niyu ke rengit diyà te ed-inumen niyu kayi te betasan niyu te edtuman te kenà utew benar ne penurù te Penduan. Ugaid ne iring te ed-iveleng kew te dekelà ne binatang ne kemilu kayi te warà niyu kedmuman dut te didis en te Penduan.

²⁵ “Mekeyruwiru kew ne menge meyerù te Penduan wey menge Peresiyu su edusaan kew te Eleteala! Uvag en kun ne eduma kew te kiyug te Eleteala! Su iring kew te menge basu wey pelatu ne midlinisan diyà te luwal, ugaid ne kayi te diralem niyu ne meredsik su iyan niyu ed-ul-ulaan ne edlimbung kew te menge ruma niyu ne ed-ahew kew te menge kearen dan. ²⁶ Sikiyu ne menge Peresiyu, benar iya ne iring kew te pisek! Unai niyu te edlinis ini se meredsik ne kenà egkekita ne kayi te diralem niyu su apey ebmetidtu ini se ed-ul-ulaan niyu!

²⁷ “Mekeyruwiru kew ne menge meyerù te Penduan wey menge Peresiyu su edusaan kew te Eleteala! Uvag en kun ne eduma kew te kiyug te Eleteala! Iring kew ma te simintù ne edtehuan te lungun ne mibintulaan te meputì su apey meupiya ne edtengtengan, ugaid ne diyà te lusud ne nepenù te menge tulan wey sahu. ²⁸ Ne iring kew ve ketà! Su iyan niyu ibpekita te menge etew ne metidtu kew, ugaid ne diyà te diralem niyu ne nepenù kew te meredsik su uvag en kun ne eduma kew te kiyug te Eleteala.”

Migkehiyen ni Hisus ke menge Meyerù te Penduan wey ke Menge Peresiyu te Edusaan dan te Eleteala atag dut te Meraat ne Ed-ul-ulaan Dan

(Lucas 11:47-51)

²⁹ “Mekeyruwiru kew ne menge meyerù te Penduan wey menge Peresiyu su edusaan kew te Eleteala! Uvag en kun ne eduma kew te Eleteala! Su mibpengumbeyaan niyu ke simintù ne edtehuan te lungun dut te menge mibpelambas te Lalag te Eleteala rengan, ne mideyreyanan niyu ke menge pantyun dut te menge metidtu. ³⁰ Ugaid ne egkahi kew te, ‘Embiya ketà key en te gewii rut te keep-epuan dey, ne kenà dey ed-ul-ulaan ke mid-ulaula ran ne kenà dey ed-imetayan ke

menge mibpelambas te Lalag te Eleteala.’³¹ Ew, na tembù pà nekahì niyu arà su telimà niyu te sikiyu iya ke menge inenakan dut te midimatey ketà te menge mibpelambas te Lalag te Eleteala rengan!³² Na kua niyu en be, imesara ke meraat ne ulaula te menge keep-epuan niyu!

³³ “Iring kew te pispis te uled! Ebmemenu kew te ed-elihu te kedusa keniyu diyà te apuy nerakà? ³⁴ Ne ebpeketuenan ku keniyu te ruen etew ne edsuhuen ku kayi te keniyu ne ebpelambas te Lalag te Eleteala, menge etew ne dekelà se netuenan din mekeatag te Eleteala, wey menge etew ne ebpenurù. Ugaid ne ruen ed-imetayan niyu, ne ruen idlansang niyu riyà te kayu, ne ebpembedasan niyu ke ruma diyà te lusud te baley ne ebpengedian te penduan niyu, wey ke ruma ne ebpenuntulen niyu riyà te menge inged su ebpmemekeiran niyu. ³⁵ Tembù be edusaan kew te Eleteala atag dut te kineimatey te langun ne menge etew ne kenà egkevenaran igenat dut te kineimatey ki Abel taman en dut te kineimatey ki Zacarias ke anak ni Berekiyas ne midimetayan te keep-epuan niyu diyà te elet te edenaan te ibpelengesa te Eleteala wey ke mibpeheletan diyà te Nekebpuru ne Valey te Eleteala. ³⁶ Sebenarvenar ne ini se egkehiyen ku keniyu,” ke si Hisus, “sikiyu ne menge etew guntaan, ne igkeragkes kew te Eleteala te kedusa rin dut te kinepengimatey ran dengan.”

*Bayuk ni Hisus te Kegkerurunù din dut te Menge Mehinged te Hirusalim
(Lucas 13:34-35)*

³⁷ “Ey, igkerurunù ku sikiyu ne menge mehinged te Hirusalim!
Su sikiyu ke mibpengimatey
te menge etew ne mibpelambas te Lalag te Eleteala,
wey mibpenrumbag niyu te batu
ke menge etew ne midsuhù te Eleteala kenian te keniyu!
Kenà kepipira ku rà perem eburuna sikiyu
su edtugenuren ku sikiyu
ebpekeiring te upa ne edlekup te anak din,
ugaid ne kenà kew ebpelekup kediey!”

³⁸ Na guntaan ne ed-ewaan en te Eleteala ke inged niyu.

³⁹ Ne ini se igkahi ku keniyu,
igenat guntaani ne kenà a niyu en egkekita
taman te egkeuma arà se hewii
ne ebpekekahi kew te, ‘Edeyuen tew ini se nekeuma,
ne midsuhù te Eleteala ke Kerenan tew.’ ”

24

Migkahi ni Hisus ke Kegkerundus Dut te Nekebpuru ne Valey te Eleteala diyà te Hirusalim

(Marcos 13:1-2; Lucas 21:5-6)

¹ Guna su mid-awà en si Hisus ketà te Nekebpuru ne Valey te Eleteala ne mid-uvey ke menge edumduaan din ne midterù dan ke menge pengawid dut te melmeluag ne Nekebpuru ne Valey te Eleteala.
² “Uya,” ke si Hisus, “intengi niyu ma ini se rekèlè ne valey ne batu ke pengengawid din. Su idtarem ku keniyu te ruen hewii ne egkeuma

ne ini se egkekita niyu ne egkerundus ne warà seveka rà ne vatu ne egkesamà su egkevurahey an langun.”

Migkahi ni Hisus ke Keresayan wey Kebpekesakit ne Ebpekeuma kayi te Menge Etew

(*Marcos 13:3-13; Lucas 21:7-19*)

³ Guna su riyau dan en te buvungan ne ed-ingaranan te Ulivuwen ne mibpinuu si Hisus, ne mid-uvay kandin ke menge edumdumaan din te sikandan dà. “Ikahi nu kenami,” ke sikandan, “ke keenu egketuman ini se migkahi nu ne kegkerundus dut te Nekebpuru ne Valey te Eleteala. Ne engkey se idtuus dey su apey rey egketueni ke mehaan en egkepupus ini se kelibutan ne egkeuma arà ke hewii ne edlived ka kayi te ampew te dunya?”

⁴ Ne migkahi si Hisus te, “Uram kew su apey kew kenà mee kali dut te menge etew ne metau ne edliyuk. ⁵ Su merakel se edlepew ne engkungkun ne siaken en ne egkahi ran te, ‘Siaken en ini ke Impasad te Eleteala ne Edatù te langun ne menge etew!’ Ne ketà, ke si Hisus, “ne merakel ne menge etew se ebpekeperetiwaya te tarù dan. ⁶ Ne egkerineg niyu se ebpevunbunuey diyà te meriyù merani, ugaid ne kenà kew meandek. Su ini pà iya se egkeuna ne egked-ulaula, ugaid ne warà pà meuma ke hewii te kebpupusa kayi te kelibutan. ⁷ Ebpmekabunuey pà ke idsenge inged ne engketà ded dema ke idsenge retuan. Ne egetab se bitil wey edlinug te mevaher te piya endei en. ⁸ Ugaid ne rudsuan dà ini dut te keresayan ne egeramen niyu, iring dut te belilit te meritan ne ed-anak.

⁹ “Egkeepesan kew te langun ne menusiyà su atag te keduma niyu kediey. Eppenigkemen kew ne ibpalad kew riya te ruen ketengdanen din ne edresayen kew nikandan wey ruen pà ebpengimetayan. ¹⁰ Ketà te arà ne hewii ne merakel se edlekà te kebperetiwaya ran kediey, ne ebpmeked-epesey ran wey ebpeul-uluhay ran diyà te ruen ketengdanen din. ¹¹ Ne merakel se edlepew ne engkungkun ne ebpelambas te Lalag te Eleteala, ne merakel se menge etew ne ebpekepehimbenar dut te tarù dan. ¹² Ne tehaad te ed-iseg ke meraat ne ulaula kayi te ampew te dunya, ne edlugkà ke limù dut te merakel ne etew. ¹³ Ugaid ke etew ne misan egkerasey en sikandin ne kenà edsuwey dut te keduma rin kediey taman te ini pà sikandin te ampew te dunya, ne ebpekehaked te umur ne warà edtemanan din. ¹⁴ Ne iyan pà ibpeuna ibpesabut kayi te tivuuk ne kelibutan ini se Meupiya ne Tudtul mekeatag te Kedatù te Eleteala dut te menge etew ne arà pà ne egkeuma ke hewii te kebpupusa kayi te kelibutan.”

Imbaag ni Hisus Mekeatag te Kebpekeuma Dut te Ebpekekaid ne Ebpekelusud Diyà te Nekebpuru ne Valey te Eleteala su Edsevuen Din ke Ed-edatan

(*Marcos 13:14-23; Lucas 21:20-24*)

¹⁵ Ne migkahi pà maa si Hisus te, “Ruen migkahi ni Daniel rengan, senge etew ne mibpelambas te Lalag te Eleteala, te ruen ebpekeuma ne ‘Ebpekekaid’ ne ebpekelusud diyà te Nekebpuru ne Valey te Eleteala su edsevuen din ke ed-edatan. (Sikiyu ne ebpekevasa kayi te insurat din ne pegpegitunga niyu ke meana rin.) ¹⁶ Ketà te egkeuma arà ne hewii ne ke menge etew ne riya te pruvinsiya te Hudiya ne mebpelahu

ran diyà te buvungan. ¹⁷ Ne ke etew ne riyà te ruwangen te valey rin ne kenà din en lilingaya ke kelelahan din su mebpelahuy en sikandin. ¹⁸ Ne ke etew ne riyà te pengengewiran din, ne kenè en meduli se egkuwa te kumbalà din. ¹⁹ Ne egkeyruwan ke menge meritan ne mehingey te arà ne hewii wey ke menge meritan ne edseruru. ²⁰ Ipengeningeni niyu te Eleteala te kenà ini med-ulaula te hewii te kedrengreng etawa Hewii te Id-imeley! ²¹ Su ini se kemeresayan ne ebpekeuma ne warà repeng din igenat dà dut te aney en limbaha ini se kelibutan, ne kenà en egkerepengan te misan keenu. ²² Ugaid ne sabap dut te raat te nanam te Eleteala ne migkurangan din en ke menge hewii rut te kemeresayan su embiya warà, ne warà egkesamà ne biviyag. Uya, su geina ne rekelà te limù din dut te menge etew ne mibpemili din, ne migkurangan din ke hewii rut te kemeresayan.

²³ “Su ketà ne hewii embiya ruen egkahi te, ‘Ini en ke Impasad te Eleteala ne Ebperetuen te langun ne menge etew!’ etawa ruen egkahi te, ‘Ayan en sikandin!’ ne kenà kew peretiyyaya su apey kew kenà egkelimbungi. ²⁴ Su ruen ebpenlepew ne menge etew ne engkungkun te sikandan ke Impasad te Eleteala ne Ebperetuen etawa sikandan ke ebpelambas te Lalag te Eleteala. Ne ebpekita ran te mekegeyip ne edul-ulaan su apey ran perem meekali ini se menge etew ne mibpemili te Eleteala. ²⁵ Tembù be idtarem ku keniyu ini,” ke si Hisus, “su apey niyu meingati te kenà pà ini egked-ulaula.

²⁶ “Su embiya ruen egkahi keniyu te, ‘Diyan en te tanà ne kenà egkeubpaan te menge etew ini se Impasad te Eleteala ne Ebperetuen,’ ne kenà kew peretiyyaya ne kenà kew pendiyà. Etawa ruen egkahi te, ‘Kayi en sikandin ed-eles-eles su warà pà mibpipayag,’ ne kenà kew peretiyyaya. ²⁷ Su ketà te kedlived te Impeanak te Menusiyà kayi te ampew te dunya ne iring te kehaan din te kilat ne ebpekayew te langun ne linengkevan egenat te edsilaan taman te edsenlepan.

²⁸ “Su iring dut te besaanan ne egkahi te, ‘Piya endei se ruen minatey rin, ne ketà eburun ke menge uwak.’ ”

Tuus te Mehaan en ke Kedlived dut te Impeanak te Menusiyà kayi te Ampew te Dunya

(Marcos 13:24-27; Lucas 21:25-28)

²⁹ “Ne ketà ke egkeipus en arà ne menge hewii te kemeresayan,” ke si Hisus,

“Ne ebmerusirem ke andew,
ne kenà en edsilà ke vulan,
ne ebpengeulug ke menge bituen genat te langit,
ne egkeparin en dut te netehuan din ke edtenuran ne menge bituen.”

³⁰ “Ne ketà ne edlepew riyà te langit ke tuus te edlived en ke Impeanak te Menusiyà. Ne egkekita te langun ne menusiyà te ebpekeuma en sikandin ne egkerumaan te sehulapun, ne egkekita rema ke gehem din wey raman din ne ed-anlag, ne ketà ne ebpeninehew ke menge etew. ³¹ Ne ibperahing en ke budyung ne edsuhuen din ke menge suluhuen din diyà te epat ne pediyulu te dunya su apey ran egkevurun ke langun ne mibpemili te Eleteala igenat te pehiliran taman te binunsuran.”

*Ke Sempità ni Hisus Mekeatag te Kayu ne Igira ne In-upama Rin te Tuus te Mehaan en te Kedlived Dut te Impeanak te Menusiyà
(Marcos 13:28-31; Lucas 21:29-33)*

³² “Kenyan niyu rè ma te kayu ne igira,” ke si Hisus, “su ruen ibpenurù din keyta. Embiya nekepasad en te edrawrew ne ed-umbus en wey ebpenlumbey, ne tuus te ed-andew en. ³³ Ne engketà ded dema embiya egkekita niyu en se netuman en ke langun ne tuus ne impenurù ku keniyu, ne egketuenan niyu te mehaan en se kedlived dut te Impeanak te Menusiyà. ³⁴ Tentenuri niyu ini se egkehiyen ku keniyu su ruen pà kayi te keniyu guntaani ebpekesaut pà ketà te kegketuman din ini. ³⁵ Su egkeawà ini se langit wey tanà ugaid ne ini se migkahi ku ne kenà bulug ebperis.”

Warà Metueni ke Hewii te Kedlived dut te Impeanak te Menusiyà Kayi te Ampew te Dunya

(Marcos 13:32-37; Lucas 17:26-30, 34-36)

³⁶ “Ugaid ne ini se idtarem ku keniyu,” ke si Hisus, “warà netau te hewii etawa endei egketahù ke andew ke kedlived kayi ke Impeanak te Menusiyà su ke Amey ku rà ne Eleteala. Misan ke suluhuen te Eleteala diyà te langit wey misan dema siaken ke Anak te Eleteala ne warà netau ke keenu se edlived din. ³⁷ Su ketà te kedlived dut te Impeanak te Menusiyà kayi te ampew te dunya, ne ebpekeiring ke menge ed-ul-ulaan te menge etew rut te ed-ul-ulaan te menge etew rengan te gewii pà ni Noa. ³⁸ Su rengan te warà pà ke dalem, ne warà sanggel dan se ebpengevurun su egkaankaan dan ne ebpenginum wey ebpees-eseweey taman te arà en ne hewii te midlusud en ensi Noa ketà te rekелà ne avang ne ed-ingaranan te arka. ³⁹ Ugaid ke menge etew ne warà utew mekesabut ke engkey se egketemanan dan taman te netekew en ke dalem ne neherà dan langun. Ne iring din ded be ketà ke edlived ke Impeanak te Menusiyà kayi te ampew te dunya. ⁴⁰ Su ketà ne hewii ke ruen deruwa ne meama ne ebpeemungey diyà te pengengewiran, ebpekeruma kedì ke senge etew ne egketahak ke seveka. ⁴¹ Engketà ded dema ke ruen deruwa ne meritan ne ebpeemungey te egaling, ne ebpekeruma kedì se senge etew ne egketahak ke seveka.

⁴² “Uram kew ve ne ebpenehana kew en, su warà niyu metueni ke hewii ne edlived ke Kerenan niyu. ⁴³ Ugaid ne ini se idtahù niyu te hinawa,” ke si Hisus, “embiya ebpekeingat ke kemuney te valey ke keenu ebpekeuma ke tekawen, ne ebpenehana neraan sikandin su apey kenà ebpekelusud te valey rin ke ebpenakew. ⁴⁴ Ne engketà kew red dema, penehena kew neraan su ebpekeuma ke Impeanak te Menusiyà dut te endei se netehuan te andew ne kenà niyu ebpenerengen.”

Ke Sempità ni Hisus Mekeatag te Edsugsuhuen ne Ebpekemalen ne Meperumaruma te Idsuhù Kandin wey ke Kenà Meperumaruma

(Lucas 12:41-48)

⁴⁵ Ne ketà ne mibpenempità si Hisus te, “Ke edsugsuhuen ne egkedserihan wey metmetau su edtuman dut te edsuhù kandin, ne ebpekemalen en dut te rumा ne edsugsuhuen. Ne sikandin se ebehey te egkekaan dut te rumा ne edsugsuhuen ketà te kegkaan dan. ⁴⁶ Meupiya nevenar se hinawa dut te edsugsuhuen ne ebpekemalen

ke ebpekeuma ke ebpengemuney kandin ne iyan din egkekita se midtuman din ke langun ne insarig kandin.⁴⁷ Idtarem ku keniyu,” ke si Hisus, “te ini se edsugsuhuen ne ebpekemalen ne midtuman te langun ne insarig kandin, ne sikandin en se ebpekekamal dut te langun ne kearen te ebpengemuney kandin.⁴⁸ Ugaid ne embiya kenà meupiya ne edsugsuhuen su warà te hinawa rin ke insuhù kandin ne kehinggaawa rin te, ‘A kalu ke meuhet pà ebpekeuma ke ebpengemuney kenami,’⁴⁹ ne ketà ne mibpemedasan din en ke ruma ne edsugsuhuen ne migkaankaan dè be sikandin wey ebpenginum elin dut te menge hubug.⁵⁰ Ne ketà ne netekew mekeuma ini se ebpengemuney kandin te hewii ne warà din penerenga su warà din metueni ke endei egketahù ke andew te kedlived din.⁵¹ Ne ebpekesangan sikandin te edrasey dut te ebpengemuney kandin su idragkes sikandin dut te menge meraat ne etew ne engkungkun ne eduma te kiyug te Eleteala. Ne ketà ne ebpekependerawit wey ebpekengingitel.”

25

Ke Sempità ni Hisus te Sepulù ne Menge Raha ne In-upama rin dut te Menge Etew ne Egkiyug ne Eduma te Edetuan te Eleteala

¹ Ne mibpenempità pà maa si Hisus te, “Ketà te edlived ku kayi te ampew te dunya, ne ke menge etew ne egkiyug ne ebpekiduma dut te menge etew ne Edetuan te Eleteala ne iring kayi. Ruen sepulù ne etew ne menge raha ne ebpengemkem te sulù dan su edtelevuken dan ini se kenakan ne ibpengesawa.² Lelima kandan se lengab wey lelima red maa se bereitungan ebpenehana.³ Ini se lelima ne lengab ne migkuwa ran te sulù, ugaid ne warà lana ne mid-ewit dan ke egkeibperan ke sulù dan.⁴ Ugaid ke lelima ne bereitungan ne mid-ewit dan mulà te edtchuan te lana.⁵ Ne nelangan se kebpekeuma rut te kenakan ne ibpengesawa, ne edtureturen en ke menge raha ne edtahad ne nekelipereng dan en.

⁶ “Ne ketà te edluuk en ke kerukileman ne ruen migkerag te, ‘Ini en ke kenakan ne ibpengesawa! Pengkayi kew en su sinuhunga niyu en sikandin!

⁷ “Nekehimerat ini se sepulù ne menge raha ne mibpengumbayaan dan ke sulù dan.⁸ Na, neibperan en te lana ini se sulù dut te lelima ne lengab ne migkahi ran en diyà te menge ruma ran te, ‘Behayi key pà te lana su egkeevukan en ini se sulù dey.’

⁹ “‘Kenà egkepakey,’ ke se bereitungan ne menge raha, ‘su kenà ebpekegaga kenitew ini. Pendiyà kew te tindà ne pemasa kew.’

¹⁰ “Ketà ne mibpendiyan en te tindà ke lelima ne menge lengab. Ne lius dan dà ne nekeuma en ke kenakan ne ibpengesawa. Tembù be ke lelima rà ne etew ke nekepenehana ne nekeruma dut te kenakan diyà te baley ne egkewingan. Guna su nekepemenayik dan en ne mibpintuan en ke gumawan.

¹¹ “Ne iseg-iseg ne nekeuma en ini se lelima ne menge raha ne lengab ne mibpenehetiat dan en se egkahi te, ‘E, Mama, pelusura key.’

¹² “Ugaid ne migkahi ke kenakan ne ibpengesawa te, ‘Kenà, su kenà ku egketuenan sikiyu.’

¹³ “Iring kayi,” ke si Hisus, “ke ed-ul-ulaan te menge etew ketà te kedlived ku kayi, tembù be layun kew pempenehana su warà niyu metueni ke hewii etawa endei egketahù ke andew te kebpekeuma ku.”

*Ke Sempità ni Hisus Mekeatag te Menge Edsugsuhuen ne midserihan te kureta su Ebpeisehen ne In-upama rin dut te Menge Etew ne Egkiyug ne Eduma te Edetuan te Eleteala
(Lucas 19:11-27)*

¹⁴ Ne mibpenempità pà maa si Hisus te, “Ini se kedlived ku kayi te ampew te dunya ne ebpekeiring te senge etew ne mibpendiyà te meriyù ne inged. Ne ketà te warà pà mekehenat ne midtawag din ke menge edsugsuhuen din ne insarig din kandan ke kearen din. ¹⁵ Uman senge etew kandan ne mibehayan din te endei se taman ne egkegaga rin. Kayi te senge etew ne dekelà se egkegaga rin, ne mibehayan din te lelima nengivu. Kayi te rumu ne mibehayan din te deruwa nengivu su arà se egkegaga rin. Ne ketà te iketelu ne mibehayan din te sengivu su arà dema ke egkegaga rin. Ne ketà ne mid-ipanew en sikandin. ¹⁶ Ini se edsugsuhuen ne nekekuwa te lelima nengivu, ne midahewrahew en migkuwa te dehangan din ne netaman ne nekeuntung en sikandin te lelima pà nengivu. ¹⁷ Ne engketà ded dema ke edsugsuhuen ne nekekuwa te deruwa nengivu, su nekeuntung sikandin te deruwa pà nengivu. ¹⁸ Ugaid ne ini se edsugsuhuen ne migkuwa te sengivu, ne migkekalut dà ne inleveng din ke kureta ne insarig kandin.

¹⁹ “Guna su neuhet en ne mid-uli en ke ebpengemuney kayi te menge edsugsuhuen. Ne midtawag din sikandan su ed-intengan din ini se insarig din kandan. ²⁰ Nekeuma ini se edsugsuhuen ne midserihan te lelima nengivu ne migkahi te, ‘Kerenan, ini en ke lelima nengivu ne insarig nu kedi, ne ruen pà ini lelima nengivu ne neuntung ku keniyan te kureta nu ne impemuunan ku te kedititindàtindà ku.’

²¹ “Migkahi ini se ebpengemuney te, ‘Ara be! Meupiya ka su mibpegelep ke ves su midtinidtuwanan nu ini se insarig ku keykew. Geina te egkeserihan ka te deisek ne kureta, ne ed-umanan ku pà ke idsarig ku kenikew te rekelà pà. Pengkayi ka su apey ka ebpekeamung te kegkehalew ku!

²² “Ne midlusud en maa ke edsugsuhuen ne midserihan te deruwa nengivu ne migkahi te, ‘Kerenan, ini en ke deruwa nengivu ne insarig nu kedi, ne ruen pà ini deruwa nengivu ne neuntung ku keniyan te kureta nu ne impemuunan ku te kedititindàtindà ku.’

²³ “Migkahi ini se ebpengemuney te, ‘Arà be! Meupiya ka su mibpegelep ke ves su midtinidtuwanan nu ini se insarig ku keykew. Geina te egkeserihan ka te deisek ne kureta, ne ed-umanan ku pà ke idsarig ku kenikew te rekelà pà. Pengkayi ka su apey ka ebpekeamung te kegkahalew ku!’

²⁴ “Ne midlusud en maa ke edsugsuhuen ne midserihan te sengivu ne migkahi te, ‘Kerenan, warà ku ipemuunan ke kureta nu te kedititindàtindà su netuenan ku te mepasang ka ne etew. Ebpepemulaan nu ke menge edsugsuhuen nu su apey ka ebpekekuwa kayi te helevèk dan. Ne ed-untung ka te kenà keykew ne helevèk ke midtitindàtindà. ²⁵ Neandek a kenikew ne inleveng ku rà ini se kureta nu. Ini red ke kureta ne insarig nu kediye’.

26 “Warà rantek nu ne pehulen ne edsugsuhuen!” ke se ebpengemuney. ‘Netuenan nu ves te ebpepemulaan ku ke menge edsugsuhuen ku su apey a ebpekekuwa te helevek dan, ne ed-untung a te kenà kedi ne helevek te editindàtindà. ²⁷ Ne meambe ke warà nu intahù diyà te bangkù ini se kureta ne insarig ku kenikew su apey ketà te kedlived ku ne egketelimà ku ke kureta ku te ruen iseg din?’

28 “Ne migkahi ke pengemuney kayi te ruma ne edsugsuhuen din te, ‘Kua niyu arà se kureta ne keniyan te kandin ne ivehey niyu ketà te edsugsuhuen ne mibpeiseg te sepulù nengivu ini se kureta rin. ²⁹ Su ke etew,’ ke si Hisus, ‘ne egkeserihan dut te insarig kandin, ne edumanan pà apey edsawadsawad pà ke kandin. Ugaid ke etew ne kenà egkeserihan, ne ed-ewien pà misan ke reisek ne insarig kandin. ³⁰ Ne ini se edsugsuhuen ne warà rantek din ne iantug niyu ipekeriyù diyà te merusirem, ne ketà ebpekependerawit wey ebpekengingitel.’”

Kedenà ni Hisus te Kukuman Dut Impeanak te Menusiyà ketà te Kedlived Din Kayi te Ampew te Dunya

31 “Ketà te edlived kayi te ampew te dunya,” ke si Hisus, “ke Impeanak te Menusiyà ne edumaan te langun ne menge suluhuen din, ne ebpinuu sikandin ketà te ebpinuuwan te punggus ne ratù su edatù te langun ne menusiyà. ³² Ne eburunen din ke langun ne menusiyà diyà te etuvangan din, ne ketà ne ebpedsivayen din te deruwa ne puntuks ne ebpekeiring dut te tumetuganur ne ebpemilien din ke bilibili ne idsivey rin ke kambing. ³³ Ne ke menge etew ne ebpekeiring te bilibili su metidtu ne kayi rin idtahù te egkekewanen din, ne ke menge etew ne ebpekeiring te kambing ne kayi rin te egkehivang din.

34 “Ne egkahi en ini se punggus ne ratù kayi te menge etew te egkekewanen din te, ‘Sikiyu ne mibehayan te keupianan dut te Eleteala ne Amey ku, ne lusud kew dut te Kedetuan te Eleteala ne impenehana kenyi igenat dut te kinelimbaha te kelibutan. ³⁵ Su ketà te nevitil a ne mibehayan a niyu te egkekaan, ne nemeraan a ne pineinum a niyu. Ne ketà te nekeuma a riyà te kenyi ne misan kenà a niyu egkekilala ne pinepemenayik a niyu. ³⁶ Ne ketà te warà belegkas ku, ne mibehayan a niyu te belegkas. Ne nekedaru a, ne midtuganur a nikiyu. Ne nevilanggù a, ne midlauy a nikiyu.’

37 “Ne egkahi ini se menge metidtu kayi te egkekewanen te, ‘Kerenan, keenu ka nevitil ne pinekaan dey sikuna, etawa nemeraan ka ne pineinum dey sikuna? ³⁸ Keenu ka mibpengkayi te kenami ne misan warà dey mekilala sikuna ne pinepemenayik dey sikew? Ne keenu ka mewerai te belegkas ne mibehayan day sikuna? ³⁹ Keenu ka medaru etawa nevilanggù ne midlauy rey sikuna?’

40 “Ne egkahi ke punggus ne ratù te, ‘Sebenarvenar ne ini se egkehiyen ku, ketà te mid-ulaula niyu ini diyà te misan engkey dut te kevevaan en ne eduma kedi ne iring te mid-ulaula niyu ini kayi te kediey!’

41 “Ne ketà ne egkehiyan din ke menge etew kayi te egkehivang din te, ‘Sikiyu ne mibpenrewakan te Eleteala su nesuhat kew te sakit te hinawa rin, awà kew kayi te kediey! Pendiyà kew te apuy nerakà ne kenà egkeevukan ne impenehana ki Setanas ke datù te pekaid wey ke menge sakup din. ⁴² Su nevitil a ne warà a niyu behay te egkekaan, ne

nemeraan a ne warà a niyu peinuma. ⁴³ Ne ketà te nekeuma a riyà te keniyu, ne warà a niyu pepemenayika. Ne warà belegkas ku, ne warà a niyu behayi. Nekedaru a, ne warà a niyu tugenura. Nevilanggù a, ne warà a niyu leuya.'

⁴⁴ "Ne ketà ne egkahi ini se menge etew kayi te egkegivang te, 'Kerenan, keenu ka nevitil etawa nemaaran, etawa nekeuma ka kayi te kenami, etawa warà velegkas nu, etawa nekedaru ka, etawa nevilanggù ka ne warà key medtavang keykew?'

⁴⁵ "Ne egkahi ke punggus ne ratù te, 'Sebenarvenar ne ini se egkehiyen ku keniyu, uman kew warà medtavang dut te kevevaan en ne eduma kedi ne iring te mid-ulaula niyu ini kayi te kediey?'

⁴⁶ "Tembù be," ke si Hisus, "ini se menge etew ne ibpendiyà te apuy nerakà su edusaan te warà edtemanan din. Ne ini se menge metidtu ne ibpendiyà te surugà su ruen umur dan ne warà edtemanan din."

26

*Mibentaan ke menge Mepurù te Terebpelengesa wey ke menge Egkeunutan te Hudiyanen te Kedsigkem ki Hisus su Ebpeimetayan
(Marcos 14:1-2; Lucas 22:1-2; Juan 11:45-53)*

¹ Guna su nekeipus si Hisus se ebpenurù ne migkehiyan din ke edumduaan din te, ² "Netuenan niyu te deruwa rà ne hewii ne kegkeuma ke Pista ne edtenuran tew te Kedsehari te Suluhuen dut te menge apù tew rengan. Ne arà en ke kepalad dut te Impeanak te Menusiyà diyà te menge etew ne ibpelansang en diyà te pinebelavag ne kayu."

³ Ne arà dema ne hewii ne miburun ke menge mepurù te terebpelengesa wey ke menge pekilukesen te Hudiyanen diyà te turuhan ni Kayipas, ke pinekemepurù dut te langun ne terebpelengesa ⁴ su ebpmengà dan te ralan te kedsigkem dan ki Hisus te kenà egketuenan dut te menge etew su apey ran ebpeimetayi. ⁵ "Ugaid ne iyan be kayi se kenà ta ini ed-ul-ulaan te ebpekeatuk dut te pista," ke sikandan, "su kema ke egkekita rut te menge etew ne egkeepes dan keytew ne egkehuvut en ketà."

*Mibperiyemutan en Neraan ke Lawa ni Hisus te Kedleveng Kandin
(Marcos 14:3-9; Juan 12:1-8)*

⁶ Guna su riyà si Hisus te inged ne Bitanya ne riyà sikandin te valey ni Simon, senge etew ini ne kevuwaen muna pà te it-it ne neulian.

⁷ Gewii te egkaan si Hisus ne nekeuma en ini se meritan ne mid-ewit te pelenaan ne mibeelan te elibastru ne midtehuan te periyemut ne mepurù nevenar. Ne mid-uvey en kandin ne imbusbus din en ke periyemut kayi te ulu ni Hisus.

⁸ Nekita ini rut te edumduaan din ne neepes dan. "Babeba! Meambe ke midereetan din dà ini se periyemut?" ke sikandan. ⁹ "Iyan tumù ne indahang din ini ne ruen dekelà ne kureta ne igkepemehey pà diyà te menge ayuayu."

¹⁰ Nesehipà ni Hisus ke edlelahen dan ne migkehiyan din sikandan te, "Meambe ke edsewayan niyu sikandin? Su meupiya nevenar ini se mid-ulaula rin kediey. ¹¹ Su ke menge ayuayu ne egketevangan niyu su lelayun kew red ebpmekeduma, ugaid ne siaken ne kenà ad

meuhet kayi te keniyu. ¹² Su iyan din kinevusbus te periyemut kayi te lawa ku ne ibpenehana te kedleveng kediey. ¹³ Sebenarvenar ne ini se egkehiyen ku keniyu,” ke si Hisus, “te misan endei kayi te ampew te dunya ibpesabut ini se Meupiya ne Tudtul mekeatag kediey, ne egkepenudtl ded dema ini se mid-ulaula rin kediey ne kenà sikandin egkelipatan.”

Mibpendiyà si Hudas Iskeriyuti te Menge Mepurù te Terebpelengesa su Ebpekidsungkit ke Ebmemenuwen Din te Ed-ulug si Hisus

(Marcos 14:10-11; Lucas 22:3-6)

¹⁴ Ne senge etew rut te sepulù wey deruwa ne edumdumaan ni Hisus, si Hudas Iskeriyuti, se mibpendiyà te menge mepurù te terebpelengesa ¹⁵ ne migkahi te, “Pira se ibehey niyu kediey embiya ibpalad ku si Hisus diyà te keniyu?” Ne nesebutan dan en te tetelu nepulù ne pirak ne pelatà se imbehey ran en ki Hudas. ¹⁶ In-awà dè be ketà ne ebpmengaan en ni Hudas te ralan te kegkeulug din ki Hisus su apey ran mesikem en.

Mibpekidseveka te Edlavung si Hisus wey ke Menge Edumdumaan Din te Kedlavung te Pista te Kedtenuri ran te Kedsehari te Suluhuen te Eleteala dut te Menge apù dan

(Marcos 14:12-21; Lucas 22:7-13; Juan 13:21-30)

¹⁷ Ne ketà te egkeuna ne andew te Pista te menge Hudiyanan te Egkaan te Pan ne Warà Insawug ne Ibpelevag ne mid-uvey ki Hisus ke menge edumdumaan din se egkahi te, “Endei rey ve ini ebpegetura se idlavung te Pista te kedsanud tew te Kedsehari te Suluhuen dut te menge apù tew rengan?”

¹⁸ Ne migkahi si Hisus te, “Pendiyà kew te inged ketà te senge etew ne meama ne kehiya niyu kandin te, ‘Kiyug te meyterù tew te ini se baley nu ke edlevungan din wey ke menge edumdumaan din te ini se Pista su mehaan en ed-awà kayi te kelibutan.’ ” ¹⁹ Ne midtuman en dut te menge edumdumaan ni Hisus ke migkahi rin, ne mibpegatur dan en te idlavung dan te Pista te Kedsehari te Suluhuen.

²⁰ Guna su merukilem en ne nekeuma en ensi Hisus ne mibpinuu en sikandin wey ke menge edumdumaan din su egkaan dan. ²¹ Ne gewii ran te egkaan ne migkahi si Hisus te, “Benar ini se egkehiyen ku keniyu, ruen senge etew kayi te keniyu se ed-ulug kediey.”

²² Ne ketà ne mibmerungkug ini se menge edumdumaan din ne uman senge etew ne mid-insà te, “Entei, Kerenan, kenà ma siaken?”

²³ Ne migkahi si Hisus te, “Ini se ebpekidtuhen ne edeluwit en te pan din ke ed-ulug kediey. ²⁴ Su egkeimetayan ke Impeanak te Menusiyà iring dut te nekah te impesurat ne Lalag te Eleteala rengan, ugaid ne meraat nevenar se egketemanan din ini se etew ne ed-ulug kandin. Iyan pà tumù ne warà ianak sikandin.”

²⁵ Ne si Hudas ke ebpesigkem ki Hisus ne migkahi te, “Entei, Meyterù, kenà ma siaken?” Ne migkahi si Hisus te, “Na, wey migkahi nu en iya.”

Ke Ketepusan ne Kinelavung te Kerenan Tew wey ke Edumdumaan Din

(Marcos 14:22-26; Lucas 22:14-20; 1 Kurintu 11:23-25)

²⁶ Gewii te egkaan dan ne migkuwa ni Hisus ini se egkeenen dan ne pan ne impeselamat din te Eleteala, ne mibpenevitevi din ne imbehey

rin diyà te menge edumdumaan din se egkahi te, "Kua niyu ini ne keena niyu, su ini ke lawa ku."

²⁷ Ne ketà ne migkuwa ni Hisus ke ed-inumen ne impeselamat din te Eleteala ne imbehey rin kandan se egkahi te, "Inum kew kayi, langun niyu. ²⁸ Ini ke lengesa ku," ke si Hisus, "ne ebpeketedà ne ibavas te menge etew, su tuus ini te egketuman en ke impasad te Eleteala rengan te ebpekepelihau en ke menge etew dut te keberedusaan dan. ²⁹ Egkehiyen ku ini keniyu te kenà ad maa ed-inum kayi te ed-inumen ini taman te kenà egkeuma ke hewii keuremà te ebpekeamung kew en te Edetuan te Amey ku ne Eleteala ne ketà ne egkevehu en ke ed-inumen tew."

³⁰ Nekepasad dan ketà ne migkanta ran te kedeyù dan te Eleteala ne riya dan en mebpesinaru te buvungan ne ed-ingaranan te Ulivuwen.

*Impayag neraan ni Hisus ke Kebparew ni Pedro te Teleduma Ran
(Marcos 14:27-31; Lucas 22:31-34; Juan 13:36-38)*

³¹ Ne migkahi pà maa si Hisus dut te edumdumaan din te, "Ini ne kerukileman ne langun niyu ne ebpelahuy ne edtehaken a niyu su ruen Lalag te Eleteala ne impesurat din ne egkahi te,
'Ebpeimetayan ku ke tumetuganur
rut te menge bilibili,
ne egurunsuwey ke menge bilibili rin.'

³² Ugaid," ke si Hisus, "ne embiya egkevanew ad, ne ed-una ad keniyu riya te inged ne Geliliya."

³³ Ne migkahi si Pedro te, "Misan edtehaken ka rut te langun dan, ne siaken ne kenà!"

³⁴ Ugaid ne migkehiyan sikandin ni Hisus te, "Tentenuri nu ini te kenà pà ed-ukarà ke manuk te ini en ne kerukileman ne ketetelu a nu en ibparew te kenà a nu rumा."

³⁵ Ugaid ne migkahi si Pedro te, "Kenà a ebpekekahi te iring ketà te kenà ki teleduma misan ebpekeunung a keykew te ed-imetayan!" Ne langun dut te menge edumdumaan ni Hisus, ne engketà ded dema se migkahi ran.

*Mibpengeningeni si Hisus diyà te Gitsimani
(Marcos 14:32-42; Lucas 22:39-46)*

³⁶ Ne ketà ne midlevundus en si Hisus wey ke menge edumdumaan din diyà te inged ne ed-ingaranan te Gitsimani. Guna su riyà dan en ne migkehiyan din sikandin te, "Pinuu kew rè be kayi su ebpengeningeni a keniyà te ubpu." ³⁷ Ne miduma rin si Pedro wey ke teleari, ke menge anak ni Sibidyu. Ne nemutu nevenar sikandin wey nerurunù ke hinawa rin. ³⁸ Ne migkahi sikandin kandan te, "Merasey nevenar ini se hinawa ku su iring te egkevidtew en. Kayi kew rè be ne unung kew kediey."

³⁹ Ne midlaus pà sikandin diyà te unaan dan ne midlangkeb en se ebpengeningeni te Eleteala te, "E, Amà, embiya egkepakey kenian te kenikew, ne ipesahad nu en kediey ini se keresayan ku! Ugaid ne misan iring en ketà se kiyug ku, ne iyan nu tumana ke keykew ne kiyug."

⁴⁰ Neiseg-iseg ketà ne midliveran din ke tetelu ne etew ne edumdu-maan din ne iyan din neumaan se nekelipereng dan. Ne migkehiyan din si Pedro te, "Meambe ke kenà kew ebpekektigker te ed-unung kediey te senge uras dà? ⁴¹ Kenà kew lipereng, ugaid ne pengeningeni

kew,” ke si Hisus, “su apey kew kenà ebpekeruma kayi te ebpenggeram keniyu. Su meveher perem ke hinawa niyu te eduma te lalag ku, ugaid ne midtaman dè be te kenà eduma ke lawa niyu.”

⁴² Ne mid-awà en maa si Hisus ne midsaup mibpengeningeni se egkahi te, “E, Amà, embiya kenà egkepakey ne ibpesahad kediey ini se keresayan ku, ne metuman en.”

⁴³ Ne ketà ne midlived en maa sikandin kayi te tetelu ne edumduaan din ne iyan din neumaan se nekelipereng dan su midseharan dan en te turug. ⁴⁴ Ne mid-awà en maa si Hisus ne mibpengeningeni en maa te iketelu te arà ded ne pengeningeni rin.

⁴⁵ Ne midliveran din maa ke menge edumduaan din te iketelu en ne migkahi te, “Maa, nekelipereng kew pè bes lavew? Ini en ke kebpalad dut te Impeanak te Menusiyà diyà te menge etew ne beniyagà. ⁴⁶ Enew kew en,” ke si Hisus, “su ini en ke etew ne ed-ulug kediey. Kuwa kiyu en su edtelavuk ki.”

Ke Kedsigkem ki Hisus

(Marcos 14:43-50; Lucas 22:47-53; Juan 18:3-12)

⁴⁷ Gewii te edlagat pà si Hisus ne nekeuma en si Hudas, senge etew ini rut te sepulù wey deruwa ne edumduaan din. Ne nerumaan dut te denda ne menge etew ne mibmemetarem dan te menge sundang wey menge behuval, su midsuhù dan dut te menge mepurù te terebpelengesa, ke menge meyterù te penduan, wey ke menge pekilukesen te menge Hudiyanan. ⁴⁸ Ugaid ne ketà te warà dan pà medipanew ne ruen ingkahi ni Hudas kandan te, “Ke etew ne ed-uvayen ku ne ed-erekán ku ne arà imbe ke ebpemengaan niyu. Sigkema niyu!” ⁴⁹ Nekeuma rà si Hudas ne mid-uvayen rin en si Hisus se egkahi te, “Mebmelinew se egketemanan nu, Meyterù!” Ne arà pà ne mid-erekán din.

⁵⁰ Ne migkahi si Hisus te, “Suled, degdehawi nu en ini se impengkayi nu!”

Ketà ne migeweran dan en si Hisus ne midsigkem dan en, ne midesdesenan dan te egawed. ⁵¹ Ugaid ne ruen senge etew dut te rumani Hisus se mid-ulavut te sundang din ne midtibas din en ke sugsuhuen dut te pinekebmepurù te terebpelengesa ne nesempingan en te telinga rin.

⁵² “Ilipi nu ke sundang nu,” ke si Hisus, “su ke etew ne ebpengimatey te sundang ne sundang ded dema ke id-imatey kandin. ⁵³ Maa, warà nu ves metueni te egkepakey ne ebuyù a te tavang diyà te Amey ku ne Eleteala, ne seguguneey ne ibpepkayi rin ke egngivuwan ne suluhuen din? ⁵⁴ Ugaid,” ke si Hisus, “ne kenà a su embiya ed-ul-ulaan ku arà ne memenu ve se kegketuman dut te impesurat ne Lalag te Eleteala ne egkahi te iyan iya se metuman te iring kayi?”

⁵⁵ Ne migkehiyan ni Hisus ke menge etew ne edsikem kandin te, “Maa, tulisan a ne ebmatereman niyu te sundang wey behuval te edsikem kediey? Su uman ded ma hewii ne rian a te Nekebpuru ne Valey te Eleteala se ebpenurù, ne warà e ma nikiyu sigkema ketà. ⁵⁶ Ugaid ne egked-ulaula ini langun su apey egketuman en ke Lalag te Eleteala ne impesurat dut te menge etew ne mibpelambas te lalag din dengan.” Arà dà ne mibpelahuy en ke menge edumduaan din ne intahak dan en sikandin.

*Mibpeneheewit si Hisus Diyà te Valey te Kukuman
(Marcos 14:53-65; Lucas 22:54-55, 63-71; Juan 18:13-14, 19-24)*

⁵⁷ Ne mid-ewit si Hisus dut te menge etew ne midsigkem kandin diyà te baley ni Kayipas, ke Pinekemepurù te langun ne menge Terebpelengesa. Su rutun nevurun ke menge meyterù te penduan wey ke menge pekilukesen te menge Hudiyanan. ⁵⁸ Ugaid ne si Pedro, ne midtundugtundug ded kandan taman te nekeuma sikandin diyà te lama te valey dut te pinekemepurù te menge terebpelengesa. Ne rutun ne midlusud sikandin dut te lama ne mibpekid-amur en mibpinuu dut te menge bantey te baley su edtengtengan din ke engkey se ibpedaula ran ki Hisus.

⁵⁹ Ne ini se menge mepurù te terebpelengesa wey langun ne Perekukum ne mibpegelep dan mibpemengà ke engkey se id-isuhat dan ne kewagib ki Hisus misan kenà benar, su apey ran egkeimetayi. ⁶⁰ Ne misan duen merakel ne etew ne midtitihus te kenà benar, ne warà netuen dan ne dait ne id-imatey ki Hisus.

Netaman ne ruen en deruwa ne etew ne mid-etuvang ki Hisus ⁶¹ ne migkahi te, “Nerineg dey,” ke sikandan, “se egkahi ini se etew te, ‘Egkerundus ku ini se Nekebpuru ne Valey te Eleteala ne mibeelan te etew, ugaid ne ketà te tetelu ne hewii ne igkepeitindeg ku en ke behu ne valey ne kenà bineelan te etew.’ ”

⁶² Ketà ne mid-itindeg en ke Pinekemepurù te menge terebpelengesa ne migkehiyan din si Hisus te, “Engkey ve se keykew ne egkekahi? Engkey, benar ini se id-isuhat dan ne kewagib keykew?” ⁶³ Ugaid ne mibpeeneng-eneng dà si Hisus.

Ne migkahi pà maa ini se Pinekemepurù dut te menge terebpelengesa te, “Ini ka te etuvangan te Eleteala ne sesapà ka embiya sikuna ke Anak din ne Impasad din ne Ebperetuen te langun.”

⁶⁴ Ne migkahi si Hisus te, “Benar ayan se nekah nu su siaken en iya. Ne sebenarvenar ini se egkehiyen ku kenyi te kenà meuhet ne egkekita niyu ke Impeanak te Menusiyà ne ebpekepinuu riyà te egkekewanen te Eleteala ne warà repeng te gehem din. Ne ketà te edlived sikandin kayi ne egkekita niyu te edumaan te sehulapun.”

⁶⁵ Nerineg dà dut te Pinekemepurù te Terebpelengesa ke migkahi ni Hisus ne mibisey rin en ke kumbalà din te kegkeepes din. Ne migkahi te, “Nekesumpalit en sikandin te Eleteala kayi te lalag din. Kenà ki en ebpemengà te ruma pà ne titihus su nerineg niyu en ini se kedsumpalit din! ⁶⁶ Ne engkey en se kenyi ne kukuman?”

Ne midtavak dan te, “Egkewegiban sikandin ne ed-imetayan en.”

⁶⁷ Ne ketà ne mibpengilevan dan ke buked ni Hisus, ne mibedasan dan. Ne ruen midtabpì kandin ⁶⁸ ne migkahi te, “Na, embiya sikuna ke Impasad te Eleteala ne Ebperetuen te langun, ne kehiya nu ke entei se midtabpì keykew.”

*Imparew ni Pedro te Teleduma Ran ki Hisus
(Marcos 14:66-72; Lucas 22:56-62; Juan 18:15, 25-27)*

⁶⁹ Ne kayi pà lavew te lama kayi te valey te Pinekemepurù te Terebpelengesa si Pedro, ne ruen meritan ne edsugsuhuen ketà te valey ne mid-uvey kandin. Ne migkahi te, “Sikuna rema ne ruma ka ni Hisus ke ebpuun te Geliliya.”

⁷⁰ Ugaid ne mibparew si Pedro ketà te etuvangan te langun ne menge etew se egkahi te, “Kenà ku egkesebutan ayan se egkehiyen nu.”

⁷¹ Ne mid-ip-ipanew en sikandin se ebpependiyà te bengawan te lama. Nekita en maa si Pedro te senge etew ne meritan ne edsugsuhuen ketà ne migkahi diyà te menge etew ne nevurun te, “Ayan se etew ne teleduma ki Hisus ne riyà ebpun te Nesarit.”

⁷² Nerineg ni Pedro, ne mibparew rin ded maa se egkahi te, “Mekahat e pà te sapà ku ke teleduma key!”

⁷³ Neiseg-iseg manen ne mid-uvay ketà ke menge etew ki Pedro ne migkahi te, “Benar iya ne teleduma kew,” ke sikandan, “su kayi rà te lalag nu ne egketuusan en!”

⁷⁴ “Dusa kedi,” ke si Pedro, “ke embiya teleduma key keniyan te etew ne egkehiyen niyu!”

Arà dà iya ne mid-ukarà en ke manuk. ⁷⁵ Ne ketà ne netenuran ni Pedro ke migkahi ni Hisus kandin te, “Kenà pà ed-ukarà ke manuk te ini en ne kerukileman, ne ketetelu a nu en ibparew te kenà ki teleduma.” Ne midlihawang si Pedro ne midrahukrahuk te kedsinehew rin.

27

*Mid-ewit dan si Hisus Diyà te ki Pilatu
(Marcos 15:1; Lucas 23:1-2; Juan 18:28-32)*

¹ Mesmeselem pà ne nevurun en ke langun ne menge mepurù te terebpelengesa wey ke menge pekilukesen te Hudianen ne neumpung dan en ke engkey se ed-ul-ulaan dan te ked-imatey ki Hisus. ² Ne mibakù dan te kedina si Hisus ne mibpeneheewit dan sikandin diyà te ki Pilatu, ke gubinedur ne Rumanu.

*Ke Kinepatey ni Hudas Iskeriyuti ke Mid-ulug ki Hisus
(Naged-ulaula 1:18-19)*

³ Guna su netuenan ni Hudas, ini se senge etew ne mid-ulug ki Hisus, te riyan en si Hisus te etuvangan ni Pilatu su egkukumen en te ebpeimetayan ne nekedsendit nevenar sikandin kayi te mid-ulaula rin. Ne mibpendiyà te menge mepurù te terebpelengesa wey menge pekilukesen te menge Hudianen ne in-ulì din ke tetelu nepulù ne pirak ne pelatà. ⁴ “Nekesalà a,” ke sikandin, “su impesigkem ku arà se etew ne warà salà din!”

Ne migkahi ran te, “Engkey se kenami ketà? Keykew rà ayan!”

⁵ Ne insewirà din ke kureta diyà te lusud te Nekebpuru ne Valey te Eleteala, ne mid-ipanew en se ed-ehet te lawa rin ne mid-iket te lieg din ne mid-umpak.

⁶ Ne mibpemurut dut te menge mepurù te terebpelengesa ini se kureta se egkahi te, “Ini se kureta ne imbabayad te ibpeimatey te etew ne ebpekesurang ki te Penduan tew embiya idtahù ta ini kayi te edtehuan te kureta kayi te Nekebpuru ne Valey te Eleteala.” ⁷ Na geina te iring ketà ne mibpengasak dan ke engkey se ebpeetahan dan kayi te kureta, ne neumpungan dan te ibpemasa te tanà dut te etew ne ediyun te kuren su ebelynun ne penlelevengan te menge etew ne ebpekevehu ne ebpatey ketà. ⁸ Tembù be igenat ketà ne hewii ne mid-ingaranan arà se tanà te “Tanà ne Mibayaran te Lengesa” ne iyan din meana ne nepemasa te imbabayad te ebpeimatey.

⁹ Ne ini se ned-ulaula ne netuman ke impesurat te Eleteala ki Jeremias senge etew rengan ne mibpelambas te Lalag din se egkahi te, “Migkuwa ran ke tetelu nepulù ne kureta ne pelatà, ini se mid-umpungan te menge etew te Israyil ne ibayad te ebpeimatey kandin, ¹⁰ ne arà se impemasa ran te tanà te etew ne ediyun te kuren. Ini se impesabut kediey te Kerenan,” ke si Jeremias rengan.

*Mid-ewit Dan si Hisus Diyà te ki Pilatu ke Gubinedur ne Rumanu
(Marcos 15:2-5; Lucas 23:3-5; Juan 18:33-38)*

¹¹ Ne mibpeneheewit dan si Hisus diyà te ki Pilatu ke gubinedur ne impeetuvang dan ki Pilatu su ed-insaan. “Menu,” ke si Pilatu, “sikuna en iya ke ratù te menge Hudiyanen?”

“Uya, ayan iya se migkahi nu,” ke si Hisus.

¹² Ugaid ne langun ne in-isuhat dan kandin ne kewagib dut te menge mepurù te terebpelengesa wey ke menge pekilukesen te menge Hudiyanen ne warà din tevaka. ¹³ Ne ketà ne migkahi en maa si Pilatu ki Hisus te, “Menu, kenà ke en be edtavak kayi te langun ini ne in-isuhat dan kenikew?” ¹⁴ Ugaid ne warà en megkahikahi si Hisus te misan senge tahà dà, ne ketà ne neinuinu nevenar si Pilatu.

*Migkukum Dan te Ed-imetayan si Hisus
(Marcos 15:6-15; Lucas 23:13-25; Juan 18:39-19:16)*

¹⁵ Ne iyan nelayaman ni Pilatu te uman egkeuma ke Pista te Kedsehari te Suluhuen ne ruen ibpelihawang din ne senge etew ne vilanggù ne ebuyuen dut te menge etew. ¹⁶ Ketà dema ne hewii ne ruen senge etew ne nevilanggù ne ed-ingaranan ki Barabas su nevantug te meraat ne mid-ulaula rin. ¹⁷ Guna su ruen en denda ne menge etew ne nevurun ne mid-insà si Pilatu te, “Menu, endei rapit se ibpelihawang ku, Si Barabas etawa si Hisus ke Impasad te Eleteala ne Ebperetuen te langun?” ¹⁸ Iyan din migkahi ini su netuenan din se ini se id-isuhat ne kewagib ki Hisus dut te menge mepurù te terebpelengesa ne sabap dut te kegkesihi ran kandin.

¹⁹ Ikeruwa rin ne gewii te kebpinuu diyà te kukuman ne ruen nekeuma ne telaan te esawa rin ne egkahi te, “Kenà ka ebpekid-ubpu dut te meraat ne idwagib dan keniyan te etew ne warà salà din. Su geina te merukilem ne ruen tehinepen ku mekeatag kandin ne nepesangan a.”

²⁰ Ugaid ne ini se menge mepurù te terebpelengesa wey ke menge pekilukesen te Hudiyanen ne mibpemitiyeraan dan ke menge etew te iyan dan buyua ki Pilatu ne ibpelihawang si Barabas ne ebpeimetayan si Hisus.

²¹ Ne migkahi en maa si Pilatu ke gubinedur te, “Menu, endei rapit kayi te deruwa ini se egkiyuhan niyu ne ibpelihawang ku?”

“Si Barabas!” ke sikandan.

²² “Embiya iring ketà se egkiyuhan niyu,” ke si Pilatu, “ne ebmemenuwen ku be si Hisus ini se Impasad te Eleteala ne Ebperetuen te langun?”

“Ibpelansang nu riyà te ebpebelevahen ne kayu!” ke se menge etew.

²³ “Meambe?” ke si Pilatu. “Engkey se meraat ne mid-ulaula rin?”

Ugaid ne nasi en ne mid-iseg se kebpemensag dan te, “Ibpelansang nu sikandin diyà te ebpebelevahen ne kayu!”

²⁴ Guna su nesebutan ni Pilatu te kenà en egkepakey ne ibpeengked ke menge etew su deisek dà ne egkehuvut en, ne migkuwa sikandin te wayig ne mibpenlulu sikandin te velad din dutun te etuvangan te menge etew su tuus ini te kenà sikandin ebpekid-ubpu dut te kedimetayi ki Hisus. Ke sikandin te, “Warà kediey ke egkevudsi te lengesa keniyan te etew! Keniyu rà ayan!”

²⁵ Ne migkahi ke langun ne menge etew te, “Dusai key en abpeg ke menge kevuwaran dey ke egkevudsi ke lengesa rin!”

²⁶ Ketà ne impelihawang en ni Pilatu si Barabas. Ne si Hisus embe ke imperuug din ne imbehey rin en kandan te ibpelansang diyà te pinebelavag ne kayu.

Pinebparas si Hisus te Datù Dut te Menge Sundaru te Kedsumpalit dan kandin su uvag kun Datù

(Marcos 15:16-20; Juan 19:2-3)

²⁷ Ne impelusud en te menge sundaru si Hisus dut te turuhan te gubinedur, ne miburun ketà ke langun ne menge sundaru. ²⁸ Ne midluungan dan te velegkas din ne pinelelembung dan te merihà su uvag kun ne ratù. ²⁹ Ruen impetengkulu kandin ne mibeelan dan ne ruhiyen ne wahed, ne ruen kayu ne mibpeheweran dan kayi te kewanana din. Ne ketà ne mibpenimbuel dan kayi te sineruwan din su uvag kun ed-adat dan kandin se egkahi te, “Mebereumur ka ne ratù te menge Hudiyanen!” ³⁰ Ne mibpengilevan dan sikandin, ne migkuwa ran ke kayu kayi te velad din ne imbadas dan dut te ulu rin. ³¹ Guna su neipus ke kedsumpalit dan kandin, ne midluung dan en ke merihà ne impelelembung kandin ne inseluub dan ded ke kandin ne belegkas ne mid-ewit dan en sikandin diyà te ebpelensangan kandin.

Inlansang si Hisus Diyà te Pinebelavag ne Kayu

(Marcos 15:21-32; Lucas 23:26-43; Juan 19:17-27)

³² Guna su riyà dan en te ralan te kebpeneheewita ran en kandin ne ruen etew ne ed-ingaranan ki Simon ne riyà ebpun te Sirini ne nesinuhung dan, ne mibpehes dan te ibpetiang ke pinebelavag ne kayu ne editiangen ni Hisus. ³³ Nekeuma ran diyà te dapit ne midingaranan te Gulguta, ne iyan din meana ne “Tulan te Ulu.” ³⁴ Ne ketà ne ebpeinumen dan perem si Hisus te binu ne midsewuhan dan te memait ne wavì, ugaid ne guna su neheraman din ne warà din inuma.

³⁵ Arà dà ne inlansang dan en si Hisus diyà te pinebelavag ne kayu. Neipus dan ne mibunutbunutan dan ke velegkas din ke entei se ebpekegkemuney kandan. ³⁶ Ne mibpinuu ran se ebanter kandin. ³⁷ Ne riyà te divavew te ulu rin ne impikit dan ke midsuratan te insuhat dan ne kewagib ki Hisus se egkahi te, “Si Hisus ini Ke Ratù te menge Hudiyanen.” ³⁸ Ne ruen deruwa ne tulisan ne inlansang dan dema duma ki Hisus, seveka kayi te egkekewanan din, ne seveka kayi te egkehivang din.

³⁹ Ke menge etew ne midsahad kandin ne mibpendungkàdungkà dan te ked-undaunda ran kandin se egkahi te, ⁴⁰ “Na, endei embe ke migkahi nu ne egkerundus nu ini se Nekebpuru ne Valey te Eleteala ne ketà te tetelu ne hewii ne igkepeitindeg nu manen ke venu pà? Embiya benar ne Anak ka te Eleteala, ne ibpelihau nu ke hinawa nu! Pemenaug ke en keniyan te midlensangan keykew!”

⁴¹ Ne engketà ded dema ke ked-undaunda rut te menge mepurù te terebpelengesa, menge meyterù te penduan wey ke menge pekilukesen te Hudiyanan se ebpelelahey ran te, ⁴² “Nekepelihauun kun sikandin te menge ruma rin, ugaid ne ke kandin ne hinawa ne kenà din egkegaga. Menu, kenà sikandin ke ratù te menge Hudiyanan? Embiyya ebpekepemenaug sikandin keniyan te midlensangan kandin, ne ebpekeperetiyaya ki te sikandin ke Impasad te Eleteala ne Ebperetuen te langun. ⁴³ Migkahi rin te Eleteala se edserihan din ne migkahi rin pà te Anak sikandin te Eleteala. Na ed-intengan ta ve ke Eleteala se edtavang kandin!” ⁴⁴ Ne misan dema ke deruwa ne tulisan ne inlansang diyà te idsengeriveluyà din ne elin en ne ed-undaunda kandin.

Ke Kinepatey ni Hisus

(Marcos 15:33-41; Lucas 23:44-49; Juan 19:28-30)

⁴⁵ Ne ketà te neudtu en ke andew ne mibmerusirem en ke tiyuuk ne kelibutan lusud te tetelu ne uras. ⁴⁶ Ketà te tetelu ne uras ne migkuleyi si Hisus te merahing se egkahi te, “Ili, ili, lama sebaktani?” Ne iyan din meana se, “Ey, Eleteala ku, Eleteala ku, meambe ke mid-ewaan a nu?”

⁴⁷ Ne ruen menge etew ne nekeitindeg ketà ne nekerineg kandin ne migkahi te, “Pemineha niyu ma su ebpengumawen din en si Elias.”

⁴⁸ Senge etew ketà se midahewrahew migkuwa kayi te in-ered te tebà ne midtiyuk din en te deisek ne terekayu ne insugkar din diyà te bëbà ni Hisus su ibpeesep. ⁴⁹ Ugaid ne ruen migkahi te, “Na ed-intengan tew ve ke edlepew si Elias se ebpeawà kandin ketà!”

⁵⁰ Ne migkuleyi en maa si Hisus te merahing ne nependusan en sikandin te hinawa.

⁵¹ Diyà te Nekebpuru ne Valey te Eleteala ne ruen mekepal ne saput ne impehelet dut te insivey ne ed-ubpaan te Eleteala, ne ketà te kinepatey ni Hisus ne nevindas kayi te luuk ini igenat te divavew taman te diralem. Ne midlinug ne nengetevì ke derekelà ne vatu. ⁵² Ne ruen menge penlelevengan ne surung ne nengepuwasan, ne merakel ke minatey ne mibperetiyaya ki Hisus ne nengevanew en. ⁵³ Ne mibpenlihawang dan dut te leveng dan ne ketà te nevanew en si Hisus ne mibpendiyà dan te inged ne Hirusalim ne riyà dan mekita te merakel ne etew.

⁵⁴ Ne ini se kepitan wey ke menge ruma rin ne sundaru ne ebanterey ki Hisus, ne nengeandek dan neveran dut te neheram dan ke linug wey nekita ran ke langun ne ned-ulaula ketà. Ke sikandan te, “Benar ini ne Anak te Eleteala!”

⁵⁵ Ne ruen dema ketà merakel ne menge meritan ne miduma ki Hisus ne egenat te Geliliya ne midtavang kandin. Ed-it-itindeg dan ini diyà te malù meriyù su edtengteng kandin. ⁵⁶ Ne elin ketà si Maria Magdalina, si Maria ke iney ni Santiago ki Jose, wey ke esawa ni Sibidiyu.

Ke Kineleveng ki Hisus

(Marcos 15:42-47; Lucas 23:50-56; Juan 19:38-42)

⁵⁷ Guna su malù en edsanlep ke andew ne ruen nekeuma ne senge etew ne meama ne kewasa ne riyà ebpuun te Eremetiya. Iyan din ngaran ne si Jose ne sakup dema sikandin ni Hisus. ⁵⁸ Mibpendiyà sikandin te ki Pilatu ne mibuyù din ke bangkey ni Hisus, ne insuhù en ni Pilatu te ibpevehey. ⁵⁹ Ne migkuwa rin en ke vangkey diyà

te midlensangan kandin, ne mibukusan din te behu ne malung ne meputi,⁶⁰ ne in-awuk din en ketà te behu pà ne leveng ne imbangbang diyà te dempilas ne intail ne kandin ne leveng. Ne ruen dekelà ne batu ne midlilik din ne inlekeb ketà te bengawan te leveng ne mid-ewaan din en.⁶¹ Ne si Maria Magdalena wey senge etew pà ne Maria ne mibpinuu ketà se edsinaru dut te leveng.

Mibpeventayan ke Leveng ni Hisus

⁶² Ne ketà te neketundug ne andew, ne Sepetu ini, ne mibpendiyà te ki Pilatu ke menge mepurù te terebpelengesa wey ke menge Peresiyu, ⁶³ ne migkahi kandin te, “Datù, netenuran dey te biviyag pà arà se teruen ne migkahi te, ‘Egkevanew e red ketà te iketelu ne hewii.’⁶⁴ Tembù be peventayi nu neveran ke leveng din lusud te tetelu ne hewii, su kalu ke penekawa ke vangkey rin dut te menge edumdumaan din ne ebpenudtulan dan ke menge etew te nevanew sikandin. Ne embiya arà se egkehiyen dan ne ebpehimbenaren dut te menge etew ne egkeumanan pà ke kegkelimbungi rut te menge etew.”

⁶⁵ “Kuwa kew en te menge sundaru,” ke si Pilatu, “ne peventayi niyu neveran ke leveng.”⁶⁶ Ne ketà ne mibayaan dan en ke leveng ne midtehuan dan te tuus ke batu ne inlekeb su apey ran egketueni ke newaleng te misan deisek dà, ne mibpeventayan dan en te menge sundaru.

28

Ke Kinekevanew ni Hisus

(Marcos 16:1-10; Lucas 24:1-12; Juan 20:1-10)

¹ Guna su neipus ke Hewii te Id-imeley ne mehaan en egkepawà te hewii te Akad ne mibpendiyà si Maria Magdalina wey ke senge etew ne Maria su ed-intengan dan ke leveng ni Hisus.

² Ne ketà ne ruen midtekew ne linug, ne ruen mibpehunrerena ne suluhuen te Eleteala ne midlilik din ke batu ne inlekeb dut te leveng ne mibpinuuwan din en. ³ Ne ke paras din ne egkinrab iring te kilat, ne mibpeneringsing te keputi te velegkas din. ⁴ Ne migkerker ini se menge ebantay te kegkeandek dan ne nevidtawan dan iring te minatey en.

⁵ Ugaid ne migkahi ke suluhuen kayi te menge meritan te, “Kenà kew meandek!” ke sikandin. “Su netuenan ku te ebpmemengà kew ki Hisus ke inlansang dan diyà te pinebelavag ne kayu. ⁶ Ugaid ne warè en kayi su nevanew en iring dut te migkahi rin. Pengkayi kew ne intengi niyu ini se midtehuan dan kandin. ⁷ Ne pekehaan kew se ed-ipanew ne penudtula niyu riyà te menge edumdumaan din te nevanew en sikandin ne mid-una en sikandin kenyi riyà te Geliliya ne riyà kew ebpmemekegkita. Na kenà niyu lipati ini se migkahi ku kenyi.”

⁸ Arà dà ne migaangaan mid-awà ke menge meritan dut te leveng. Nengeandek dan ugaid ne netehuan dan te dekelà ne kegkehalew ne mibpelelahuy ran se ebpenudtul diyà te menge edumdumaan ni Hisus.

⁹ Ugaid ne gewii ran te ed-ipanew ne midtekew mibalak si Hisus kandan ne migkahi en te, “Mebmerinew se egketemanan niyu!” Ne mid-uvey ran kandin ne midlumpeng dan se egawed te paa rin te ebpengarap kandin.¹⁰ “Kenà kew meandek!” ke si Hisus. “Beyai niyu ke menge edumdumaan ku ne pependiyana niyu sikandan te Geliliya ne diyan a nikandan egkekita.”

Midselipsipan dut te Menge Mepurù te Terebpelengesa te dekelà ne pirak ke Menge Sundaru ne Mibantey te Leveng ni Hisus apey ran Mekepenudtul te Nepenakew ke Bangkey ni Hisus

¹¹ Ne ketà te kineipanew en dut te menge meritan se ed-awà kayi te leveng, ne mibpendiyan en te Hirusalim ke menge sundaru ne ebantey te leveng su mibpenudtulan dan ke menge mepurù te terebpelengesa te langun ne ned-ulaula kayi. ¹² Arà dà ne miburun en dut te menge mepurù te terebpelengesa ke menge pekilukesen te Hudiyenan ne mibpengasak dan ke engkey se ed-ul-ulaan dan. Guna su neupakat dan en ne mibehayan dan te dekelà ne pirak ke menge sundaru ¹³ ne migkahi ran te, “Penudtula niyu diyà te menge etew te mibpenakew dut te menge edumdumaan ni Hisus ke bangkey rin te merukilem te gewii niyu te nekelipereng. ¹⁴ Ne embiya egkerineg ini dut te gubinedur,” ke sikandan, “ne kenà kew egkeuru su sikami rà se ebpetuntey kandin su apey kew kenà ed-isuhata.” ¹⁵ Ne midtelimà dut te menge sundaru ini se kureta ne midtuman dan arà se insuhù kandan. Tembù be taman te ini en ne hewii ne ini red ke ebpemenudtulen te menge Hudiyenan.

Mibpekita si Hisus Dut te Sepulù wey Seveka ne Edumdumaan Din (Marcos 16:14-18; Lucas 24:36-49; Juan 20:19-23; Nenged-ulaula 1:6-8)

¹⁶ Ne ini se sepulù wey seveka ne edumdumaan ni Hisus, ne mibpendiyà dan te Geliliya ketà te buvungan ne migkahi ni Hisus kandan. ¹⁷ Guna su nekita ran sikandin ne mibpengarap dan kandin, misan duen kandan eduwaruwa se hinawa ran ke si Hisus ini se nekita ran. ¹⁸ Ugaid ne mid-uvey si Hisus kandan ne migkahi te, “Langun ne gehem te kebayàbayà diyà te langit wey kayi te ampew te dunya ne imbehey en kediey.” ¹⁹ Na, pendiyà kew te langun ne menge etew kayi te ampew te dunya ne penurua niyu sikandan ke memenu se kebpsakup dan kediey. Ne pembunyahni niyu ke menge etew ne ebpsakup kediey te tuus te keduma ran te Eleteala, wey siaken ke Anak din, wey ke Kedesenan ne Ebpetuntul te Menusiyà. ²⁰ Ne penurua niyu sikandan te kedtuman dut te langun ne impenurù ku keniyu. Ne ini se idtahù niyu te hinawa te layun a eduma keniyu taman te taman.

Ke Meupiya ne Tuditul Mekeatag ki Hisu Kristu ne Miguhud ni Marcos

*Ke Kebpesabut ni Juan ne ed-ingeranan te Ebpembunyag
(Mateo 3:1-12; Lucas 3:1-18; Juan 1:19-28)*

¹ Ini ve ke Meupiya ne Tuditul mekeatag ki Hisu Kristu, ke Anak te Eleteala. ²Iyan din ini rudsuān ne nekedsuhatey dut te impesurat te etew ne mibpelambas te Lalag te Eleteala ne si Isaias su impesurat kandin te Eleteala se egkahi te,
“Duen edsuhuen ku ne ibpeuna ku keykew,”
ke se Eleteala,
‘te kebpekepenehana rut te menge etew
te kebpekeuma nu.’

³ Su riyà sikandin te tanà ne kenà egkeubpaan te etew
ne ebpenawag dut te menge etew
ne ed-uvvey kandin, ke sikandin te,
‘Mehaan ne ebpekeuma ke Kerenan,
ne ihewani niyu ke ralan,
ne tidtuwa niyu ke ibayà din,
ne iyan din meana ne tilaka niyu ke hinawa niyu
su apey kew egkepenehana te kebpekeuma rin!”

⁴ Ne netuman en ini ke impesurat te Eleteala ki Isaias mekeatag ki Juan su riyà sikandin mid-ubpà te tanà ne kenà egkeubpaan te etew se ebpembunyag wey ebpeketuenan dut te menge etew, ke sikandin te, “Pedsendit kew ne ewai niyu ke meraat ne betasan niyu ne pebunyag kew en,” ke sikandin “ne egkepesahad en te Eleteala ke salà niyu,” ke si Juan. ⁵ Ne merakel ne menge etew ne mibpendiyà su ebpmineg kandin ne riyà ebpmuuñ te lusud te inged ne Hudiya wey riyà ebpuun te inged ne Hirusalim. Ne intarem dan te nekedsendit dan dut te langun ne meraat ne ulaula ran ne arà pà ne mibpebunyag dan ki Juan diyà te wayig ne Hurdan.

⁶ Si Juan ini ne iyan din belegkas ne mid-avel ne bulvul te binatang ne ed-ingaranan te kemilu, ne iyan din insebitan se lundis ded dut te binatang. Ne iyan din keuyahan se tepuri wey teneb. ⁷ Ne migkahi sikandin diyà te menge etew te, “Duen ebpeketundug kediey ne mepurù pà kediey, su misan ke telumpà din ne kenà a edait ne ed-ekar dà. ⁸ Ebunyahan ku sikiyu te wayig, ugaid ne sikandin ne ebpeketundug kediey ne ibunyag din kenyi te ked-ulin dut te Kedesenan ne Ebpetuntul te Menusiyà.”

*Ke Kinebunyag wey Kinepenggeram ki Hisus
(Mateo 3:13-4:11; Lucas 3:21-22; 4:1-13)*

⁹ Ne warà dà meuhet ne nekeuma en si Hisus se riyà ebpuun te inged ne Nasarit lusud te inged ne Geliliya, ne mibunyahan sikandin ni Juan diyà te wayig ne Hurdan. ¹⁰Guna su egemew en si Hisus diyà te wayig ne nekita rin en ke langit ne nevukaan ne mibpehunrerenà en kayi te kandin ke Kedesenan ne Ebpetuntul te Menusiyà ne midragid

te melepati. ¹¹ Ketà ne ruen suwara ne riyà ebpun te langit ne nerineg din se egkahi te, “Sikew ke Anak ku ne igkelimù ku nevenar, ne ebpekesuhat ka nevenar te hinawa ku.”

¹² Arà dà se nerineg din ne seguguneey ne impependiyà sikandin dut te Kedesenan ne Ebpetuntul te Menusiyà diyà te tanà ne kenà egkeubpaan te etew. ¹³ Ne rutun mid-ubpà sikandin taman te neked-epat nepulù ne hewii, ne mibpenggeraman sikandin ni Setanas ke datù te pekaid, ke ebpekedsalà. Ne ruen dema mehintelunan ne binatang ketà ne ebpekekaid, ugaid ne ruen ma menge suluhuen te Eleteala ne mibpendiyà te ki Hisus su edtuganur kandin.

*Mibpemili ni Hisus ke epat ne Etew ne Ebpmiyala te Eduma Kandin
(Mateo 4:12-22; Lucas 4:14-15; 5:1-11)*

¹⁴ Guna ve su impevilanggù en si Juan ni Hirudis, ke ratù dut te inged din, ne midlived en si Hisus diyà te lusud te inged ne Geliliya se ebpesabut dut te Meupiya ne Tudtul te Eleteala. ¹⁵ Ke sikandin te, “Netuman en ke hewii ne impasad dut te keep-epuan tew,” ke sikandin, “su neuma en ke hewii te kedetui te Eleteala keniyu.” “Engkeri niyu en ke meraat ne ulaula niyu ne peretiyayaa niyu en ke Meupiya ne Tudtul,” ke sikandin.

¹⁶ Senge hewii ketà ne mid-ip-ipanew si Hisus diyà te veyvey te Ranew te Geliliya ne nekita rin si Simon wey ke ari rin ne si Andres se ebpmiyala riyà te veyvey te ranew su arà ke helevek dan. ¹⁷ Ne migkehiyan en ni Hisus sikandan te, “Pengkayi kew en ne dumakew kediey,” ke sikandin, “su serà se ebpmiyalaan niyu guntaani, ugaid ne ebpenuruun ku pà sikiyu te iyan niyu mulà egkeutel ne menge etew ne eduma kedì.” ¹⁸ Arà dà ne mid-ewaan dan en ke biyala ran su miduma ran en ki Hisus.

¹⁹ Guna su neketantal en si Hisus ne nekita rin en si Santiago wey ke ari rin ne si Juan, ke menge anak ni Sibidyu, se riyà te avang dan ne ebpengumbayà te biyala ran. ²⁰ Nekita ran dà ni Hisus ne mid-umew rin en te ebperumaan dan kandin. Arà dà ne mid-ewaan dan en ke amey ran ne si Sibidyu abpeg ke menge etew ne midsukayan dan te ebpmiyala su miduma ran en ki Hisus.

*Midsegseg ni Hisus ke Busew ne Midsuuk te Etew
(Lucas 4:31-37)*

²¹ Nekeuma ran diyà te inged ne Kapirnawum ne guna su neuma en ke Hewii te Id-imeley rut te menge Hudiyanan ne mibpendiyan en si Hisus dut te valey ne ebpengedian te menge Hudiyanan te penduan dan ne mibpenurù. ²² Guna su nerineg dut te menge etew se kebpenurù din ne neinuinu ran nevenar, su kenà iring dut te kebpenurù te menge etew ne ebpenurù te penduan te menge Hudiyanan su ruen gehem din ini se penurù din.

²³ Ketà ne ruen meama ne midlusud te kevurunan dan ne midsukan te vusew ne migkuleyì te, ²⁴ “Hisus ne riyà ebpun te Nesarat, engkey se kememeniyà nu kayi te sikami ne vusew? Maa, edereetan key nikuna? Egkekilala ku sikuna su sikuna ke Berekat ne Midsuhù te Eleteala.”

²⁵ Ne migkehiyan en ni Hisus ke vusew te, “Engked ka rà, ne awà ka kenian te meama ayan!” ²⁶ Arà dà ne pinekerker en te mevaher dut te vusew ke meama ne pinekuleyì din te merahing, ne mid-ewaan din en ke meama.

27 Ne rekèlà se kinekegeyip dut te langun ne menge etew ketà ne mibpein-inseey ran te, “Engkey ve vuwa ini? Kema ke ini en ke behu ne penurù. Su utew rekèlà se gehem din su ebpeawà te menge vusew ne ebpemineg dan kandin.” 28 Arà dà iya ne nekeeneb en ke bentuhan dut te mid-ulaula ni Hisus diyà te lusud te langun ne inged te Geliliya.

*Neulian ni Hisus ke Merakel ne Etew
(Mateo 8:14-17; Lucas 4:38-41)*

29 Guna su mid-awà en si Hisus wey ke edumdumaan din ketà te valey ne ebpengedian te menge Hudiyanan te penduan dan ne diyà dan en medturedu te valey enni Simon ki Andres, ne miduma rema ensi Santiago ki Juan. 30 Seretà din ketà ne mid-irehà ke enuhang ni Simon ne meritan su edetengen. Nekeuma rà si Hisus ne migkehiyan dan en sikandin mekeatag dut te ederaru. 31 Mid-uvvey en si Hisus diyà te kandin, ne migeweran din en ke velad din, ne pineenew rin en. Arà dà ne neawà en ke rateng din, ne mid-ilutù en sikandin te ibpekaan kandan.

32 Guna su midsanlep en ke endew ne mibpeneheewit en kayi te ki Hisus te menge etew ke langun ne ebpemekedaru, wey ke menge midsuukan te vusew. 33 Ne langun te menge etew ketà te inged ne nevurun kayi te lama te valey ne midtumpaan ni Hisus. 34 Ne merakel se eppenderaru ne nengeulian ni Hisus, ne mibpenegseg din ke menge vusew ne midsuuk dut te menge etew. Ugaid ne warà din pekegkehiya ke menge vusew su nekilala ran en ma ke engkey sikandin.

*Mibpesabut si Hisus te menge etew diyà te Lusud te Geliliya
(Lucas 4:42-44)*

35 Guna su egkepkepawà en, ne mid-enew en si Hisus ne mibpemenaug en ne mibpendiyà te endei se warà etew rin ne ketà sikandin mibpengeningeni. 36 Ne mibpemengà en ni Simon wey ke menge ruma rin ke endei en sikandin. 37 Guna su netuen dan en si Hisus ne migkahi ran en te, “Ebpemengaan ka te langun ne menge etew.”

38 Ugaid ne migkahi si Hisus kandan te, “Ebpependiyà kiyu pà te ruma ne inged kayi se ebpesabut kandan dema, su arà ke kinekepengkayi ku,” ke sikandin. 39 Ne mid-eneb-eneb en si Hisus dut te langun ne inged kayi te lusud te Geliliya se ebpesabut ketà te menge valey ne ebpengidian te menge Hudiyanan te penduan dan, ne mibpenegseg din ke menge vusew ne midsuuk te menge etew.

*Neulian ni Hisus ke senge etew ne Kevuwaen ne Muna pà te It-it
(Mateo 8:1-4; Lucas 5:12-16)*

40 Senge hewii ne ruen etew ne egkevuwaen ne muna pà te it-it ne mid-uvvey ki Hisus. Mibpenimbuel en sikandin diyà te sineruwan ni Hisus se ebpemuyù te, “Embiya perem egkiyug ke rà, ne egkeulian nu ini se meredsik ne sakin ku,” ke sikandin.

41 Ne ingkeyru ni Hisus sikandin ne midampen din en se egkahi te, “Uya, egkiyug a, meulii ka!” 42 Arà dà se nekahie rin, ne neawà en ke sakin dut te meama su neulian en.

43 Ketà ne impeipanew en ni Hisus sikandin te mid-il-ilutan din te egkahi te, 44 “Kenà nu ve imbe kegkehiya ini te misan endei en, ugaid ne riyà ka tilandeng te terebpelengesa ne ibpekita nu kandin te neulian ke en. Ne ivehey nu ve kandin ke ibpelengesa te Eleteala ne insuhù

dengan ni Moises dut te menge etew ne neulian te sakit dan ne kevuwa apey metueni te langun ne menge etew te neulian ke en,” ke sikandin.⁴⁵ Ugaid ne mid-awà dà arà se etew ne nasi din en impenudtul te misan engkey en ne etew ke ned-ulaula rin. Ne ketà dà puunan te kebpemenudtul din ne kenà en ebpekeliglihawang si Hisus diyà te ruma ne inged su egkevurunburun ke menge etew. Ketà be ne riyà dà med-ubpà sikandin te warà etew rin, ugaid ne mid-ebpet en kandin ke menge etew ne riyà ebuun te ruma pà ne inged.

2

Neulian ni Hisus ke Meama ne Minatey ke Tevi ne Lawa Rin

(Mateo 9:1-8; Lucas 5:17-26)

¹ Nengepiraan be ketà ne mid-uli en si Hisus diyà te inged ne Kapirnawum, ne nerineg en dut te menge etew te nekeulì en. ² Ne ketà ne midasek se merakel ne etew su warà dan en meamin diyà te valey, misan diyà te edsempawan en. Ne gewii te ebpesabut si Hisus dut te Meupiya ne Tuditul kandan, ³ ne ruen nekeuma ne epat ne etew ne edyayung te etew ne minatey ke tevi ne lawa rin. ⁴ Ugaid ne geina te merakel ne menge etew ne warà dan mekeuvvey ki Hisus. Ketà be ne iyan dan mid-ulaula ne midlekatan dan ke atep ne renged ni Hisus, ne ketà ne midtuntun dan en ke ederaru kayi te ed-irehaan din diyà te ki Hisus. ⁵ Guna su netuenan ni Hisus te rekela ke sarig dan kandin, ne migkehiyan din en ke minatey se tevi ne lawa rin te, “Mama, nepesehad en ke menge salà nu.”

⁶ Ketà ne ruen dema ebpipinuu ne menge etew ne ebpenurù te penduan, ne guna su nerineg dan ke migkahi ni Hisus ne iyan netahù te hinawa ran te, ⁷ “Meambe ke egkahi ini se etew te iring sikandin te ebpekepesehad te salà? Edsumpalit sikandin te Eleteala su warà etew ne ebpekepesehad te salà embiya kenà ke Eleteala rà!” ke hingginawa ran.

⁸ Arà dà ne netuenan en ni Hisus ke netahù te itungan dan, ne migkahi en sikandin diyà te kandan te, “Meambe ke netahù te itungan niyu se iring keniyan? ⁹ Endei rapit se melemu,” ke si Hisus, “te egkahi riyà te minatey se lawa rin te, ‘Ke menge salà nu ne nepesehad en’ etawa ve egkahi te, ‘Enew ke en ne luluna nu ke ikam nu ne ipanew ke en?’ ¹⁰ Ugaid ne guntaani ne ibpekita ku keniyu te ruen gehem rut te Impeanak te Menusiyà te ebpesehad te salà kayi te ampew te dunya.” Ketà ne migkehiyan din ke etew ne minatey ke tevi ne lawa rin te, ¹¹ “Mama, enew ke en ne luluna nu ke ikam nu ne ulì ke en.” ¹² Ne mid-enew en ke etew, ne arà dà ne midlulun din ke ikam din, ne mibpemehilanggilang en se ed-ipanew kayi te etuvangan dan langun. Guna su nekita rut te langun ne menge etew ketà, ne rekdekelà se kinekegeyip dan ne nereyù dan ke Eleteala se egkahi te, “Taman te taman ne warà tew pà mekita se iring kayi!”

Mibpemili ni Hisus si Levi te Eduma Kandin

(Mateo 9:9-13; Lucas 5:27-32)

¹³ Neipus arà ne midlived en maa si Hisus diyà te beyvey te ranew te Geliliya. Ne ruen migkuludkulud ne menge etew ne mibpendiyà te kandin ne mibpenurù din en sikandan. ¹⁴ Guna su nekeipus sikandin

se ebpenurù ne midlaus en sikandin se ed-ipanew, ne gewii te ked-ipanew rin ne nekita rin ke senge etew ne meama ne ebpevayad te buwis ne si Levi, ke anak ni Alfeo, ne ebpinuu riyà te upisinà din. Ne migkehiyan din en te, "Duma ka kediey." Arà dà ne mid-itindeg si Levi ne miduma en kandin.

¹⁵ Ne senge hewii ne pinekaan si Hisus wey ke menge edumdumaan din diyà te baley ni Levi ne ruen merakel ne ebpevayad te buwis wey ke menge kenè en birang ne menge etew ne midtundug ki Hisus ne elin dan ki Hisus se migkaan ketà. ¹⁶ Ne dutun te uvey te baley ne ruen menge Peresiyu ne ebpenurù te penduan ne nekita ran te egkaan si Hisus ne duma te menge etew ne ebpevayad te buwis wey ke menge kenè en birang ne menge etew. Ne netegtehaad ne mibpendiyà dan te menge edumdumaan ni Hisus ne mid-insà te, "Meambe ke edseveka sikandin se egkaan ketà te menge etew ne ebpevayad te buwis wey ke menge kenè en birang ne menge etew?"

¹⁷ Nerineg dà ni Hisus arà ne migkehiyan din en sikandan te sempità te, "Ke menge etew ne warà daru rin ne kenà dan ebpegungayà te terebawì, ugaid ne ke menge etew rà ne duen daru rin. Ne iring din ded be rema kayi ini se menge etew su kenà iyan ku kinepengkayi se iyan ku ebpeuveyen ne ke menge metidtu kun se ulaula ran, ugaid ne ke menge kenà en birang ne menge etew apey ran mekedsendit," ke si Hisus.

Ruen Menge Etew ne Mid-insà ki Hisus ke Meambe ke kenà Edlimpas te Egkaan ke Menge Edumdumaan Din

(Mateo 9:14-17; Lucas 5:33-39)

¹⁸ Senge hewii ne midlimpas te kegkaan ke menge edumdumaan ni Juan ke Ebpembunyag wey ke menge Peresiyu su edtumanen dan ke betasan dut te keep-epuan dan. Ne ruen menge etew ne mibpendiyà te ki Hisus ne migkahi te, "Edlimpas te kegkaan ke menge edumdumaan ni Juan ke Ebpembunyag wey ke menge edumdumaan dut te menge Peresiyu ne meambe ke kenà edlimpas te kegkaan ke menge edumdumaan nu?" ke sikandan.

¹⁹ Ne midtavak si Hisus te sempità, ke sikandin te, "Embiya ruen egkewingen, maa edlimpas ves maa te kegkaan ke menge etew ne mid-ingat te ini pà ke ibpengesawa te kandan? Kenà en iya! Ne iring din ded dema kayi te edumdumaan ku su taman te ini e pà te kandan ne kenà dan arà ed-ul-ulaan. ²⁰ Ugaid ne ruen hewii ne egkeuma ne egkeawà ke ibpengesawa diyà te kandan, ne ketà dan pà edlimpas te kegkaan."

²¹ Ne ketà maa ne insempità ni Hisus te kenà egkeapey ne ebpegebiten ke behu ne penurù din wey ke raan ne betasan te keep-epuan dan, ke sikandin te, "Kenà edait ne idapi nu ke behu ne saput ketà te neredit en ne velegkas, su embiya ebpedepiyen nu ne ketà te kebpìpii nu ne egkenseng ke behu ne saput ne egkevindas ke redit en ne velegkas ne tuwas pà ke keluag te bisey rin. ²² Ne iring din ded dema," ke si Hisus, "ke behu pà ne tebà su kenà egkeapey ne riyà nu idtahù te raan en ne edtehuan ne mibeelan ne lundis. Su embiya arà se ed-ul-ulaan nu ne edsevu ke tebà ne ebetu ke lundis ne midtehuan, ne edturayas ke tebà ne egkereetan, ne egkereetan dema ke midtehuan

ne lundis. Tembù be iyan din kemeyidan ne ke behu pà ne tebà ne riyà nu itahù te edtehuan ne behu pà ne mibeelan,” ke si Hisus.

Ke Impenurù ni Hisus Mekeatag te Hewii ne Id-imeley

(Mateo 12:1-8; Lucas 6:1-5)

²³ Senge hewii te Sepetu, ke Hewii ne Id-imeley, ne midtarà si Hisus wey ke menge edumdumaan din diyà te pareyanan. Ne arà se kebpetindalan dan ketà te pareyanan ne mibpengetu te tiugkayan ini se menge edumdumaan ni Hisus ne mibpengurib su idsungit dan. ²⁴ Nekita rà ini dut te menge Paresiyu ne migkehiyan dan en si Hisus te, “Tengtengi nu ma ayan se menge edumdumaan nu su nekesurang en ayan se ed-ul-ulaan dan dut te Penduan tew ne egkahi te warà egelevek te Andew te Id-imeley.” ²⁵ Ne migkehiyan ni Hisus te, “Maa, warà niyu mevasa ke impesurat te Eleteala mekeatag te mid-ulaula ni David, ke ratù tew rengan? Su ruen hewii ne mibpelahuy si David wey ke menge ruma rin dut te menge kunterà dan ne nengevitil dan. ²⁶ Ketà ne hewii ne iyan pà mepurù dut te menge terebpelengesa ne si Abiyatar ne midlusud si David diyà te insivey ne Baley te Eleteala ne migkuwa rin ke egkeenen ne indenà diyà te Eleteala ne migkaan sikandin ne mibehayan din ke menge ruma rin. Ugaid ne kayi te Penduan tew ne kenà arà egkeakaan te piya engkey ne etew su ke menge terebpelengesa rà te Eleteala.” ²⁷ Ne migkahi en maa si Hisus diyà te menge Paresiyu te, “Ini se Hewii te Id-imeley ne mibeelan te keupianan dut te menge etew te kebpekeimeley ran, ugaid ne warà beeli ke menge etew te keupianan dut te Hewii ne Id-imeley. ²⁸ Tembù be ke Impeanak te Menusiyà ne iyan ebayàbayà te egkahi te engkey se edait ne ed-ul-ulaan dut te Hewii ne Id-imeley.”

3

Ke Meama ne Nekeyengkeng se Belad Din

(Mateo 12:9-14; Lucas 6:6-11)

¹ Ne ruen maa Hewii te Id-imeley ne midlived si Hisus diyà te valey ne ebpengedian te menge Hudiyanen te penduan dan, ne ruen ketà senge etew ne meama ne nekeyengkeng se seveka ne velad din.

² Ruen dema ketà menge Peresiyu ne egkunterà ki Hisus ne ebpenipat nevenar ki Hisus ke embiya ebewian din ini se etew kayi te Hewii ne Id-imeley apey ruen id-isuhat dan kandin ne kevenar. ³ Ne migkehiyan ni Hisus ke etew ne nekeyengkeng se velad din te, “Mama, pengkayi ka te etuvangan.”

⁴ Ne mid-insaan din en ke menge etew ne nevurun ketà te, “Engkey ma se nekahi te penduan tew ne idtuhut ne ed-ul-ulaan tew te Hewii ne Id-imeley? Maa, edtevangan tew ke menge ruma ta etawa ebpemekeiran tew sikandan? Maa, edsumpatan tew ke umur te menge ruma ta etawa ed-imetayan tew?” ke si Hisus. Ugaid ne warà den ma medtavak.

⁵ Ne neepes si Hisus ne insihid din ke mata rin dut te menge etew ugaid ne ingkeuru rin ded manen su netuenan din te meresen se ulu ran su warà kegkeyru ran dut te menge ruma ran. Ne migkehiyan din manen ke etew ne nekeyengkeng se velad din te, “Mama, ketenga nu ayan se velad nu.” Arà dà ne migketeng en dut te meama ke velad din, ne neulian en. ⁶ Nekita rà dut te menge Peresiyu ne midlihawang dan

en ketà te valey ne ebpengedian te menge Hudianen, ne mibpeing-inggumaey ran en dut te menge sakup ni Hirudis su ebpemengaen dan se ralan te kegkeimetayi ran ki Hisus.

Neulian ni Hisus ke menge Ebpenderaru Diyà te Beyvey te Ranew

⁷ Guna su mid-awà en si Hisus ketà ne diyan en maa mibpesinaru sikandin wey ke menge edumdumaan din te beyvey te Ranew te Geliliya. Ne midtundug kandin ke medmerakel ne menge etew ketà te lusud te inged ne Geliliya wey riyà ebpuun te lusud te inged ne Hudiya, ⁸ ne ruen dema riyà ebpuun te inged ne Hirusalim, wey riyà ebpuun te lusud te inged ne Idumea, wey riyà ebpuun te inged ne ripag te wayig ne Hurdan, wey ke menge inged ne nekeuvey te menge inged ne Tiru wey Sidun. Mibpendiyà te ki Hisus ke merakel ne menge etew su nerineg dan ke tudtul mekeatag te ed-ul-ulaan din ne mekegeyip. ⁹ Ne geina te denda ke menge etew ne midsuhù ni Hisus ke edumdumaan din te ebpenehana te avang ne ed-unturan din su apey kenà melipit sikandin dut te merakel ne etew. ¹⁰ Su merakel se nengeulian din, ne langun dut te egkereruwan ne ebpesinsinumahey ran se ed-uvvey ki Hisus su apey ran merampen en nikandin ne egkeulian. ¹¹ Ne embiya egkekita si Hisus dut te menge etew ne mibpenuukan te menge vusew ne midlumpeng dan en diya te sineruwan din se ebensag te, “Sikuna ke Anak te Eleteala!” ¹² Ugaid ne mibenduan ni Hisus ke menge vusew te kenà dan ebpeketaun te menge etew ke engkey sikandin.

*Mibpemilì ni Hisus ke Sepulù wey Deruwa ne Edumdumaan Din
(Mateo 10:1-4; Lucas 6:12-16)*

¹³ Ketà ne midtekereg si Hisus diyà te buvungan ne midtawag din en ke menge meama ne egkiyuhan din ne nekeuma ran en. ¹⁴ Ne midtendù din en ke sepulù wey deruwa ne edumdumaan din ne edingeranan te Apustulis ne migkehiyan din sikandan te, “Midtendù ku sikiyu ne ebpekiduma kediey,” ke sikandin, “ne edsuhuen ku sikiyu te ebpmesabut dut te Meupiya ne Tudtul, ¹⁵ ne ebehayan kew te gehem te kebpekesegseg dut te menge vusew ne ebpenuuk te menge etew.” ¹⁶ Ini ke menge ngaran dut te sepulù wey deruwa ne midtendù din: si Simon (ke mid-ingaranan din ki Pedro), ¹⁷ si Santiago wey ke ari rin si Juan (ke mid-ingaranan ni Hisus te Buwanirgis ne iyan din meana ne “Menge etew ne iring te Ruhung”) ini se deruwa ne menge anak ni Sibidy. ¹⁸ Ne elin dema si Andres, si Felipe, si Bartolome, si Mateo, si Tomas, si Santiago ke anak ni Alpiyu, si Tediyu, si Simon ke Patriat ne iyan din meana ne diralem se lengesa rin dut te inged din, ¹⁹ wey si Hudas Iskeriyuti ke ed-ulug ki Hisus te ked-imatey.

*Iyan Kunaan te Menge Etew ne Riyà Ebpuun te Egkeunuten te Vusew ini se Gehem ni Hisus
(Mateo 12:22-32; Lucas 11:14-23; 12:10)*

²⁰ Guna su netendù din en sikandan ne mid-ulì dan en. Ne ketà ne merakel en maa se menge etew ne nevurun ne kenà dan en ebpekeselet te kegkaan dan. ²¹ Nerineg dà ini dut te menge suled din, ne mibeyaan dan su ed-engayen dan sikandin su ruen migkahi te, “Nevuneg sikandin!”

²² Ne ruen menge meyterù te penduan ne riyà ebpuun te inged ne Hirusalim ne migkahi te, “Midsuukan en si Hisus ini ni Belsibul!” Ne

ruen ruma pà ne migkahi te, “Uya, ke egkeunuten te menge vusew se mibehey kandin te gehem te kebpekesegseg din dut te menge vusew ne edsuuk te menge etew,” ke sikandan.

²³ Guna su nerineg ini ni Hisus ne impeuvvey rin ke menge etew ne migkehiyan din te sempità te, “Kenà egkepakey ne edsegseg si Setanas ke egkeunuten te menge vusew te ruma rin ne vusew! ²⁴ Su upama ruen datù te senge inged ne ed-uney ebpevuneey ke menge sakup din ne egketunggad arà se inged din. ²⁵ Ne embiya ruen telteleanan ne ed-uney egkewaha, ne warà ebpengkusan din ke kenà egkevurahey. ²⁶ Iring din ded be ketà ke midetuan ni Setanas ke egkeunuten te menge vusew, embiya ed-uney ebpevuneey ke sakup din ne kenà meuhet se kedadù din su egketunggad arà se edetuan din.

²⁷ “Ugaid ne netalew ku en si Setanas ke egkeunuten te menge vusew, tembù be ebpekesegseg a te menge sakup din, su warà etew ne ebpekelusud te valey te mevaher ne etew su eppenakew te menge kearen din embiya kenà din ed-unaan pà te ebakù arà se mevaher ne etew. Ugaid ne embiya nevakù din en, ne arà pà ne ebpekekuwa sikandin dut te kearen din.

²⁸ “Idtahù niyu imbe ini te hinawa,” ke si Hisus, “te egkepesahad te Eleteala ke langun ne menge salà te menge etew ne misan engkey en ne meraat ne edleahan dan kandin. ²⁹ Ugaid ke etew ne edlag te meraatey mekeatag dut te Kedesenan ne Ebpetuntul te Menusiyà, ne kenà en vulug egkepesahad ke salà din su nekevaal sikandin te salà taman te taman.”

³⁰ (Migkahi ni Hisus ini geina te ruen migkahi te ke gehem din ne riyà ebpuu te vusew ne midsuuk kandin.)

Ke Impetimbang ni Hisus te Iney Rin wey Menge Suled Din (Mateo 12:46-50; Lucas 8:19-21)

³¹ Nekeuma en ke iney ni Hisus wey ke menge ari rin ne meama, ne riyà dan dà te luwal meketaman ne milbesuhuan den dà si Hisus. ³² Su neterektek te merakel ne etew si Hisus, ne migkahi ran en kandin te, “Ke iney nu wey ke menge ari nu ne riyà te lihewangan ne ebpekibalak keykew.”

³³ Migkahi si Hisus te, “Duen pà ibpekita ku keniyu,” ke sikandin, “ne iring te iney ku wey menge suled ku.” ³⁴ Ne insihid din ke mata rin dut te menge etew ne nekelingut kandin, ne ke sikandin te, “Sikandin ini ke iney ku wey ke menge suled ku! ³⁵ Su misan engkey en se ebperumaruma te kiyug te Eleteala ne sikandan en imbe ke menge suled ku ne meama, ke menge etevey ku, wey ke iney ku,” ke si Hisus.

4

Mibpenempità si Hisus Mekeatag te etew ne Midsawed te Benì (Mateo 13:1-9; Lucas 8:4-8)

¹ Senge hewii maa ketà ne riyà si Hisus te veyvey te ranew se ebpenurù te menge etew. Ne geina te merakel ne menge etew se nevurun ketà, ne mid-untud sikandin diyà te avang te gebgevasan te ranew se ebpenurù. Ne riyà dà te beyvey te ranew ke menge etew ne ebpeyneq kandin. ² Ne merakel se impenurù din kandan ne impepevayà te sempità, ke sikandin te.

3 "Itaan niyu ve ke telinga niyu, su ruen etew ne mibpendiyà te pengengewiran din su edsawed te benì. 4 Ne ketà te kinesawed din ne ruen benì ne nengeulug diyà te kilid te ralan ne midtuktuk en te menge pepenuk. 5 Ruen ruma ne insawed din ne riyà nengeulug te kebetuwan ne mevavew se tanà din. Ne geina te mevavew ini se tanà din, ne mehaan dà se kinetuvù din. 6 Ugaid ne guna su mid-endawan en ne petuluy ne migkuley ke dawun din ne geina te warà meketuneb ke ralid din ne neebmas en. 7 Ne ruma pà ne riyà nengeulug te sepinitan ne guna su midtuvù en ini ne migkubmusen en dut te sepinit ne warà en mekevahas. 8 Ugaid ne ruen ruma pà ne riyà nengeulug te meupiya ne tanà, ne midretek, ne meselinuvù se tuvù din, ne nekevahas te meupiya su ruen mibpengupiya nevenar se bahas din, ne ruen migkakey, ne ke ruma pà ne ruen ded neehani.

9 "Tembù be," ke si Hisus, "itaan niyu ke telinga niyu kayi te migkahi ku ini."

*Midseysey ni Hisus Ke Atag Dut te Menge Sempità
(Mateo 13:10-17; Lucas 8:9-10)*

10 Guna su mid-awà en ke menge etew ne nevurun ketà ne ruen menge etew ne nekerineg dut te impenurù din ne mid-uvey ran kandin abpeg ke sepulù wey deruwa ne edumduaan din ne mibuyù dan kandin te ibpesabut kandan ke meana te sempità. 11 Ne migkahi si Hisus te, "Sikiyu ne edurumaruma kediey, ne ebpebuten en te Eleteala rut te in-eles dengan mekeatag te kedatù te Eleteala te menge etew, ugaid ke ruma ne menge etew ne ibpenurù kandan te ibpepevayà te menge sempità,¹² su apey

'Misan edtengteng dan, ne kenà dan ebpekekita;
ne misan ebpemineg dan, ne kenà dan ebpekesabut.
Su embiya nesebutan dan,
ne edlived dan ke hinawa ran diyà te Eleteala
ne egkepesehad din sikandan.'

*Mibpesebutan ni Hisus ke Meana dut te Sempità mekeatag te Etew ne Midsawed te Beni
(Mateo 13:18-23; Lucas 8:11-15)*

13 Ne migkahi si Hisus kandan te, "Maa warà niyu ves mesebuti ayan se sempità ku? Embiya warà niyu mesebuti ini, ne engkey embe se ralan te kebpekesabut niyu rut te ruma pà ne idsempità ku? 14 Su iyan ku midsempitaan ketà te etew ne edsawed te benì ne ke etew ne ebpemenudtul dut te Lalag te Eleteala. 15 Ne ini se ralan ne neuluhan te benì, ne arà ke menge etew ne nekerineg te Lalag te Eleteala, ugaid ne midegdehawan ni Setanas ke datù te pekaid te ed-ahew ini nerineg dan su apey kenà dan mekeperetiyyaya. 16 Ne ke kebetuwan ne neuluhan te benì, ne arà ke menge etew ne nekerineg te Lalag te Eleteala ne ingkehalew ran te ebpemineg ne mibperetiyyaya ran. 17 Ugaid ne mehaan dà su warà mekedalid te hinawa ran. Ne embiya ebpekedtarà dan te kemerehenan sabap dut te kedduman dan te Lalag te Eleteala ne nerineg dan, ne ed-engked dan su edlived dan diyà te andang ne ed-ul-ulaan dan. 18 Ne ke sepinitan ne neuluhan te benì, ne arà ke menge etew ne nekerineg te Lalag te Eleteala,¹⁹ ugaid ne gewii ran te ebpetindalan ne merakel se egkubmus dut te lalag ne nerineg dan iring te kemutuwan dan te ked-ubpà-ubpà, ne kegkelilingey ran

dut te menge kearen dan, wey ke pegungayà te kebpata te nanam, ne ketà ne kenà dan ebpekevehas. ²⁰ Ugaid ne ke meupiya ne tanà ne neuluhan te benì ne arà ke menge etew ne nekerineg dut te Lalag te Eleteala, ne midtelimà dan, ne mibahas dan su ruen mibpengupiya nevenar se bahas din, ne ruen migkakey, ne ke ruma pà ne ruen ded neehani,” ke si Hisus.

Ke Penurù ni Hisus Mekeatag te Sulù ne Ibpeluukluuk te Saag Su apey Egkerayahan ke langun

(Lucas 8:16-18)

²¹ Ne migkahi en maa si Hisus te sempità kandan te, “Warà etew ne edtemtem te sulù ne ebpelengkevan din etawa ibperalung din. Ugaid ne riyà din ibpeluuukluuk te saag su apey egkerayahan ke langun. ²² Iring din ded dema,” ke si Hisus,

“langun te netelevan guntaani ne ebpekepehawa red keuremà.
Ne langun ne impegelesà ne egkepayahan ded.

²³ Itaan niyu ve ke telinga niyu kayi te migkahi ku ini,” ke si Hisus.

²⁴ Ne migkahi pà maa si Hisus te, “Uya, pemineha niyu ve imbe ini su apey niyu egkesebuti! Su endei taman se id-isuhat nu te ruma nu, ne engketà ded dema ke id-isuhat te Eleteala kenikew, ne ebpseseharan din pà. ²⁵ Su ke etew ne idtahù din te hinawa ke ibpesabut kandin te Eleteala, ne ed-umanan pà te Eleteala ini se kebpekesabut din. Ugaid ke etew ne kenà din idtahù te hinawa ke ibpesabut kandin te Eleteala, ne egkeawà arà se reisek ne nesebutan din.”

Ke Sempità Mekeatag te Kedtuvù te Benì ne Insawed

²⁶ Ne migkahi en maa si Hisus te kebpenuurù din te, “Ke kedatù te Eleteala rut te menge etew ne iring te etew ne midsawed te benì diyà te pengengewiran din. ²⁷ Neipus din dà te edsawed ne mid-ewaan din en, ne gewii rin te egelevek dut te ruma pà ne helevek din te uman gewii ne edtuvù en lavew ini se insawed din. Ugaid ne warà din mesebuti ke memenumenu se kebpeketuvù din. ²⁸ Iyan ebbpetuvù te benì ne ke tanà su apey mekevehas. Iyan ed-una ke lawa, ne edtundug ne ebpenlesut, ne arà pà ke tiugkayan. ²⁹ Ne embiya ve egkelutuan en ke bahas din ne ed-eheniyen dut te kemuney su timpu en te kebpengehani,” ke sikandin.

Insempità ni Hisus ke Edetuan te Eleteala te Pinekemerimet ne Lahas ne Ed-ingaranan te Mustasa

(Mateo 13:31-32, 34; Lucas 13:18-19)

³⁰ Ne migkahi pà maa si Hisus te, “Engkey ma se edait ne ebpeiringan ta te kedatù te Eleteala dut te menge etew? Engkey ma se meupiya ne sempità ta te kedseyseya ketà? ³¹ Su ini se kedtuvù te kedatù te Eleteala te menge etew ne ebpekeiring dut te merimet nevenar ne lahas ne ed-ingeranan te Mustasa. Ini ke pinekemerimet ne lahas kayi te ampew te dunya. ³² Ugaid ne embiya ibpemula ini ne ebpeketuvù ne egkevaluy ne iyan dekelà dut te langun ne pinemula. Ne edsubpang te derekelà, ne rutun ebpenesalag ke menge pepenuk,” ke sikandin.

³³ Mibpesabut si Hisus te Lalag te Eleteala diyà te menge etew te impepevayà din te sempità iring kayi, te endei taman se netuenan din ne egkesebutan dan. ³⁴ Warà sikandin mibpenurù kandan ke kenà ibpepevayà te menge sempità. Ugaid ne embiya iyan din dà dumà

ke menge edumdumaan din, ne impesabut din kandan ke langun ne meana rin.

*Impeengked ni Hisus ke Keramag Diyà te Ranew
(Mateo 8:23-27; Lucas 8:22-25)*

³⁵ Guna su merukilem en te arà ne hewii ne migkehiyan ni Hisus ke menge edumdumaan din te, “Kuwa kew en su ed-apet kiyu riyà te ripag,” ke sikandin. ³⁶ Arà dà ne mid-ewaan dan en ke merakel ne menge etew, ne mid-untud dan en ketà te avang ne mibpinuuwan ni Hisus ne mibpuridtas dan en ki Hisus. Ne ruen duma ne avang ne eduma rema kandan. ³⁷ Guna su ed-avang-avang dan en, ne midtekewtekew en se mebmevandes ne keramag ne egkelikuvungan dan en te menge baleg ne egkesimbuhan en te wayig ke avang dan ne deisek samà ne egkekahem dan en. ³⁸ Ne si Hisus ne riyà te ulinan su nekelipereng diyà te ulunan din. Ne mibpemukew en dut te menge edumdumaan din se egkahi te, “Meyterù, egkeherà ki en! Maa, warà te hinawa nu se kegkeherà tew?”

³⁹ Nepukew si Hisus ne mid-enew en ne pineengked din en ke keramag wey baleg ne migkahi te, “Engked kew!” Arà dà ne mid-eneng-eneng ke keramag, ne midlengen en ke ranew.

⁴⁰ Ne migkehiyan din en ke menge edumdumaan din te, “Meambé ke nengeandek-andek kew? Maa, kenà kew edsarig kediey?”

⁴¹ Ne neandek-andek dan nevenar ne mibpein-inseey ran te, “Engkey ini ne etew? Su misan ke keramag wey menge baleg ne ebperumaruma rut te lalag din,” ke sikandan.

5

*Neulian ni Hisus ke Meama ne midsuukan te Menge Vusew
(Mateo 8:28-34; Lucas 8:26-39)*

¹ Ne nekerunggù en ensi Hisus diyà te ripag te ranew te Geliliya riyà te sakup te inged te menge Gerisiyanu. ² Guna su mibpemenaug en si Hisus ketà te avang ne midsinuhung en sikandin te senge etew ne riyà ebpuun te menge surung ne penlelevengan te minatey. ³ Su ini se etew ne midsuukan te vusew, tembù be diyan en mid-ubpà sikandin te menge surung ne penlelevengan te minatey. Ne kenà en egkeehenan sikandin misan pà egkedinaan. ⁴ Ne kenà kepipira rà bekua ke paa rin wey ke velad din, ugaid ne ebpengividew rin ded ke kedina ne ebpengetamped din ke putew ne impatung te paa rin. Warà etew ne ebpekeehan kandin su mevaher. ⁵ Merukilem meandew ne edlauglaug sikandin diyà te menge surung ne penlelevengan te minatey wey riyà te menge buvungan se ebpulung ebpengulayi, ne ebpemelian din pà ke lawa rin te menge vatuu.

⁶ Guna su nesandeng din si Hisus ne mibpelelahuy rin en te edsinuhung, ne midlumpeng en sikandin diyà te sineruwani ni Hisus.

⁷ Ne mibensag en sikandin se egkahi te, “Sikuna ini si Hisus ke Anak te Eleteala ne warà repeng din. Engkey ma se kememeniyà nu kediey? Isapà nu te etuvangan te Eleteala te kenà a nu pemekeiri,” ke sikandin.

⁸ (Ini se mibuyù din geina te migkehiyan en ni Hisus sikandin te, “Sikuna ini se vusew, ewai nu en ayan se etew!”)

⁹ Ketà ne mid-insaan ni Hisus ke meama te, “Engkey ma se ngaran nu?”

Ne midtavak ke vusew te, "Iyan ku ngaran ne si Selasà su medmerakel dey," ke sikandin. ¹⁰ Ne mibpemuyù te mevaher ki Hisus te kenà din ebpepeewaan sikandan ketà te inged.

¹¹ Ne ruen ketà te uvey ran medmerakel ne bavuy ne ebpemenumal diyà te kelendihan. ¹² Ne mibpemuyù en ke menge vusew ki Hisus se egkahi te, "Ibpependiyà key nu te menge bavuy arà su apey key ketà mekeawuk te kandan." ¹³ Ne midtuhutan en ni Hisus sikandan. Arà dà ne mid-awà en ke menge vusew rut te meama ne riyan dan en mibpengasuk te menge bavuy. Ne mibpemelelahuy en ke menge bavuy se ed-umpak diyà te dempilas ne nengelened dan en diyà te ranew su ruen en buwa menge deruwa ne ngivu se kerakel dan.

¹⁴ Guna su nekita ini rut te menge etew ne edtuganur ketà te menge bavuy ne mibpemelelahuy ran en su impemenudtul dan ini diyà te inged dan wey ke nekeerivey ne pengengewiran. Nerineg ini rut te menge etew, ne mibayaan dan en su midsusi ran. ¹⁵ Nekeuma ran ketà te ki Hisus ne nekita ran en te ebspinuu ke meama ne midsuukan te medmerakel ne menge vusew pehaney, ne duen en belegkas din ne nekeulit en ke itungan din. Ketà ne nengeandek dan nevenar. ¹⁶ Ne ini se menge etew ne nekekita rut te mid-ulaula ni Hisus ne impenudtul dan en dut te rumा pà ne etew ke kegkeulii rut te meama ne midsuukan te menge vusew wey ke ned-ulaula rema rut te menge bavuy. ¹⁷ Ne mibpemuyù dan ki Hisus te menu med-awà sikandin ketà te inged dan.

¹⁸ Ne midlived en ensi Hisus diyà te avang dan, ne guna su ed-untud en sikandin te avang ne migkahi en ini se meama ne neulian en te, "Egkiyug a ne ebpekiduma kenikew," ke sikandin. ¹⁹ Ugaid ne warà megkiyug si Hisus te ebpekeruma sikandin ne iyan din migkahi se, "Ulì ke en diyà te keniyu ne ipenudtul nu ini se meupiya ne mid-ulaula te Kerenan kenikew wey ke kinekeyru rin kenikew." ²⁰ Arà dà ne miduli en ini se meama ne mibpemenudtul en diyà te langun ne menge inged diyà te lusud te inged ne Dikapulis ini se meupiya ne mid-ulaula ni Hisus kandin. Ne langun ne menge etew ne nekerineg kandin ne nengegeyip dan nevenar.

Neulian ni Hisus ke Anak ni Jairo wey ke Meritan ne Mid-amì dà te Belegkas ni Hisus

(Mateo 9:18-26; Lucas 8:40-56)

²¹ Guna su mid-apet en maa si Hisus diyà te ranew ne midunggù dan ne merakel se menge etew ne nengevurun ne midlingut kandin.

²² Duen ketà meama ne ed-ingaranan ki Jairo, su seveka sikandin ne egkeunutan te baley ne ebpengedian te menge Hudiyanan te penduan dan. Guna su nekita rin si Hisus ne midlumpeng en diyà te etuvangan din, ²³ ne midsebenar mibpemuyù en sikandin se egkahi te, "Ruen deisek ne anak ku ne meritan ne edaru ne edtiviltil te kepatey," ke sikandin, "kuwa ki en be su apey nu mesamsam sikandin ne egkeulian." ²⁴ Ne miduma en si Hisus kandin te ed-ulì. Ne mid-eguyut en kandan ke merakel ne menge etew, ne ketà ne egkelipitlipit en si Hisus.

²⁵ Ne ruen meritan ketà dema ne nerasey nevenar su nekedsepulù en wey deruwa ne rahun se kebpemundasa rin te lengesa ne kenà egkeengked. ²⁶ Misan mibpevewian din en te merakel ne terevawì ne

warà dan megaga. Neamin din en ke kureta rin su apey egkeulii, ugaid ne lemban en ne ed-iseg. ²⁷ Nerineg din ke meupiya ne ulaula ni Hisus, ne mibpenelektelek en sikandin diyà te uriyan din. ²⁸ Su kehingginawa rin te, “Misan egkeamì ku rà ke velegkas din, ne egkeulian en ini se sakit ku,” ke sikandin. ²⁹ Guna su neamì din en ke velegkas ni Hisus ne netibpek en ke kebpermundasa rin, ne netuenan din te warà en ke sakit din.

³⁰ Arà dà ne neheram ni Hisus te ruen gehem te kebpekeulì ne midlihawang kandin, ne mid-itindeg sikandin se ebpenlangulangu. “Engkey ma se mid-amì te velegkas ku?” ke sikandin.

³¹ Migkahi ke menge edumdumaan din te, “Ey, netuenan nu en se merakel ne menge etew ne ebpekeli坑 kenikew, ne meambe ke ed-insà ka ke engkey se mid-amì te velegkas nu?”

³² Ugaid ne mibpenlangulangu pà manen si Hisus ke entei arà se mid-amì dut te velegkas din. ³³ Ne ini se meritan ne netau te ned-ulaula rin ne mid-uvay en ki Hisus se egkerkeren te kinekeandek din. Ne midlumpeng en diyà te sineruwan ni Hisus ne impenundtul din en langun ke ned-ulaula rin. ³⁴ Ne migkehiyan en ni Hisus sikandin te, “Bayi, neulian ke en su sabap dut te kinesarig nu kediey. Ulì ke en be ne barasbaras ka su neulian ke en dut te keresayan nu,” ke sikandin.

³⁵ Ne gewii te ebpekidlalag pà si Hisus dut te meritan ne ruen en nekeuma ne ibpetundug ki Jairo se egkahi te, “Ke anak nu ne nekerudtanà en. Kenà ta en ebengenen si Hisus,” ke sikandan.

³⁶ Ugaid ne warà impememantag ni Hisus ke nerineg din ne lalag dan inemulà se iyan din migkahi diyà te ki Jairo te, “Kenà ka egewhewana kayi te anak nu, ugaid ne sarig ke rà kediey.”

³⁷ Arà dà ne iyan din dà pineruma kandan ki Jairo ne si Pedro, wey ke teleari si Santiago ki Juan. ³⁸ Guna su nekeuma ran diyà te valey ni Jairo ne nekita ni Hisus se egkehisaweg ke menge etew, ne nerineg din en se ebpmenderawit. ³⁹ Guna su midlusud en si Hisus ketà te valey ne migkehiyan din en sikandan te, “Meambe ini se egkehisaweg kew? Ne meambe ke ebpmenderawit kew? Warà minatey ayan se vatà su nekelipereng dà.”

⁴⁰ Nerineg den dà ke migkahi ni Hisus ne mid-engitan den dà sikandin. Arà dà ne impeawà dan en ni Hisus diyà te valey, ne midtawag din en ke amey wey iney rut te batà wey ke tetelu ne edumdumaan din ne midlusud dan en diyà te mibpereyasan dut te vatà. ⁴¹ Guna su nekelusud dan ketà ne migeweran ni Hisus ke velad din ne migkahi te, “Talita kumi,” ne iyan din meana se, “Payi, enew ke en.” ⁴² Arà dà ne mid-enew en ke vatà ne mid-ipanew en. Ini se vatà ne edraharaha en su sepulù wey deruwa se rahun din. Guna su nekita ini rut te menge etew ne nengegeyip dan nevenar. ⁴³ Ugaid ne mibenduan dan ni Hisus te kenà ibpepenudtul ini se ned-ulaula te misan entei en. Ne migkahi rema sikandin te pekeena ran ke vatà.

6

*Warà Mibperetiyyaya te Penurù ni Hisus Diyà te Inged Din ne Nesarit
(Mateo 13:53-58; Lucas 4:16-30)*

¹ Mid-awà en si Hisus wey ke edumdumaan din ketà te arà ne inged, ne mid-ulì en diyà te inged din ne Nesarit. ² Guna su neuma

en ke Hewii te Id-imeley, ne mibpendiyan en si Hisus te baley ne ebpengedian te menge Hudiyanen te penduan dan se ebpenurù, ne merakel se menge etew ne nevurun ketà.

Guna su nerineg dan se kebpenurù din ne neinuinu ran nevenar se egkahi te, “Endei rin be buwa mehuruwi ini?” ke sikandan. “Engkey ini se ketau rin ne nekuwa rin? Ne ebmenuwen din te ebaal ini se menge mekegeyip? ³ Maa, kenà uvag ayan ke pandey, ne anak ni Maria, ne kakey en ni Santiago, ki Jose, ki Hudas wey ki Simon? Maa, kenà be ke menge etevey rin ne ini red dema med-uppà?” ke sikandan. Ne ketà ne mid-engkenà dan kandin.

⁴ Ne migkahi si Hisus kandan te, “Ke etew ne ebpelembas te Lalag te Eleteala ne egkeedatan te piya endei en sikandin egketahù, liyu rà dut te muney ne inged din wey ke kereremigey rin.” ⁵ Tembù be warà mekegeyip ne ingkepekita ni Hisus ketà te inged din. Ne merelag dà se mibpendampen din ne ebpenderaru ne neulian. ⁶ Ne ingkeinuinu nevenar ni Hisus su warà mebperetiyyaya ke menge etew kandin.

*Impeipanew ni Hisus ke Sepulù wey Deruwa ne Edumdumaan Din
(Mateo 10:5-15; Lucas 9:1-6)*

Ne mid-ipanew rin ke langun ne nekeerivey ne menge inged diyà te lusud te inged ne Nesarit su ebpenurù sikandin dut te menge etew.

⁷ Miburun ni Hisus ke sepulù wey deruwa ne edumdumaan din ne impeipanew rin sikandan te igihiruwa. Ne mibehayan din te gehem te kebpenegseg te menge vusew ne ebpenuuk dut te menge etew.

⁸ Ne intelaan din kandan te, “Kayi te ked-ipanew niyu ne iyan niyu rà peneheewita ne ke tuked niyu, kenà kew ewit te lutù, kenà kew ewit te kemuyut etawa kureta. ⁹ Ne tetelumpà kew, ugaid ne kenà kew ewit te belegkas ne idsambì niyu.” ¹⁰ Intelaan din kandan dema te, “Embiya ebpekeuma kew riyà te inged ne riyà kew rateng te baley ne ruen ebpepemenayik keniyu, ne ketà kew rà rateng taman te ked-awà niyu ketà te inged. ¹¹ Ugaid ne embiya ebpekeuma kew te inged ne warà edtelimà keniyu etawa kenà dan ebpmineg dut te ibpesabut niyu, ne levundus kew ne pendegdaha niyu ke lipupuk diyà te paa niyu gewii te ed-awà kew ketà te inged dan. Su tuus ini te baag kandan te kenè en be kilid keniyu ketà te hewii ne keditimbang te Eleteala kandan.”

¹² Arà dà ne mid-ipanew ran en se ebpmesabut diyà te menge etew se med-engked dan en te meraat ne menge ulaula ran. ¹³ Ne mibpenegseg dan ke menge vusew ne mibpenuuk te menge etew, ne midsepuwan dan te lana ke menge ebpenderaru ne neulian en.

*Ke Guhud Mekeatag te Kinepatey ni Juan ke Ebpembunyag
(Mateo 14:1-12; Lucas 9:7-9)*

¹⁴ Nekeeneb en ini se tudtul mekeatag te ed-ul-ulaan ni Hisus taman te nekeuma en diyà te ki Hirudis, ke egkeunutan kayi te inged ne Geliliya, su nevantug en si Hisus diyà te langun ne inged ketà. Ruen menge etew ne migkahi te, “Neuyag ded maa si Juan ke Ebpembunyag, tembù be ruen gehem din te kebpekevala din te menge mekegeyip.”

¹⁵ Ruen duma ne migkahi te, “Si Elias ded ini, ke mibpelambas te Lalag te Eleteala rengan.” Ruen duma pà ne migkahi te, “Sikandin ini ke ebpelambas te Lalag te Eleteala iring te senge etew rut te menge mibpelembas te Lalag te Eleteala rengan.”

¹⁶ Guna su nerineg ni Hirudis ini se lalag dan ne iyan din migkahi se, “Ini red si Juan ke Ebpembunyag. Impepungel ku en ke ulu rin, ugaid ne neuyag ded sikandin.”

¹⁷ Ini se nekahni Hirudis su sikandin en iya ke mibpeimatey ki Juan, su sikandin pà ke mibpesigkem, ne mibpevakù ne mibpevilanggù kandin. Iyan din kineul-ulaa kayi su mid-esawa rin si Hirudiyas ke ipag din misan si Hirudiyas ne esawa rut te tuney ne suled din ne si Felipe. ¹⁸ Ne uman dà ebpengegkehiyi ni Juan si Hirudis te, “Kenà meupiya ne ed-esawaan nu ke ipag nu su esawa en te tuney ne suled nu!” ¹⁹ Arà be ke ingkeepes ni Hirudiyas ki Juan, ne ebpeimetayan din perem, ugaid ne warà din med-ulaula ini su warà megkiyug si Hirudis. ²⁰ Su neandek si Hirudis ki Juan su netuenan din ne metidtu sikandin ne iyan ebpelupandù kandin ne Eleteala. Tembù be kenà din ebpeimetayan si Juan. Ne ingkesuati rin te ebpmineg ke penurù ni Juan misan ebpekevehey te kemutuwani te hinawa rin.

²¹ Ugaid ne guna su neuma en ke hewii te kineanaka ki Hirudis ne ketà metuen ni Hirudiyas se ralan te kegkeimetayi ki Juan. Su mibaal si Hirudis te kevurunan dut te langun ne menge mepurù ne egkeunutan, wey ke menge mepurù dut te sundaru rin, wey ke menge etew ne egkamal kayi te lusud te inged dan ne Geliliya. ²² Ketà te kevurunan ne pinesayew ke anak ni Hirudiyas ne raha, ne ingkesuatsuat ni Hirudis wey ke menge etew ne impetelavuk din.

Tembù be migkahi si Hirudis dut te raha te, “Engkey ma se egkiyuhan nu? Su misan engkey en ne egkekuwa nu, ne ibehey ku keykew.” ²³ Ne impasad din te mevaher te, “Misan pà engkey se ebpentunen nu ne ibehey ku keykew, misan egketengà pà ke langun ne kearen ku.”

²⁴ Arà dà ne midlihawang en ke raha su eppendiyà te iney rin ne mid-insà te, “Engkey se ebuyuen ku?”

Ne midtavak ke iney rin te, “Iyan nu buyua ke ulu ni Juan ke Ebpemunyag.”

²⁵ Ne midahewrahew en midlived ke raha riyà te egkeunutan ne si Hirudis ne migkehiyan din en te, “Iyan ku ebuyuen te guntaani ne ivehey nu kediey ke ulu ni Juan ke Ebpembunyag ne edsenaren te pelatu.”

²⁶ Nerineg dà ni Hirudis ne nekebmutu nevenar sikandin, ugaid ne kenà din arà egkeparew su ingkepasad din en diyà te etuvangan te langun ne pinetelavuk din. ²⁷ Ketà be ne midsuhù din en se sundaru rin te ibpekuwa ke ulu ni Juan, ne mibpendiyà en ke sundaru te bilengguan ne mibpungelan din en si Juan. ²⁸ Ne intahù din en te pelatu ke ulu ni Juan ne mibpeneheewit din en ne imbehey rin diyà te raha, ne imbehey en dema dut te raha diyà te iney rin. ²⁹ Guna su nerineg ini dut te menge edumdumaan ni Juan, ne mibayaan dan diyà te bilengguan ne migkuwa ran ke lawa ni Juan ne inleveng dan.

*Pinekaan ni Hisus ke Lelima ne Ngivi ne Etew
(Mateo 14:13-21; Lucas 9:10-17; Juan 6:1-14)*

³⁰ Guna su mibpenguli ke menge edumdumaan ni Hisus kayi te kandin ne mibpenudtul dan kandin ke langun ne mid-ulaula ran wey ke impemenurù dan. ³¹ Ketà ne misan ke kegkaan dan ne kenà dan ebpekeselest su ebpmekedsuvar se merakel ne menge etew ne ebpekeuma kayi te kandan. Tembù be migkehiyan ni Hisus ke

edumdumaan din te, “Kuwa kew en su ebpendiyà kiyu pà te endei se warà etew rin su apey kew ebpekeimeley pà.”

³² Ketà be ne mid-erà dan en te avang ne mid-avang-avang dan en se ebpendiyà te endei se warà etew rin. ³³ Ugaid ne guna su ed-ipanew ran en ne merakel ded ne etew se nekekita kandan ne nekilala ran. Ketà be ne mibpemelelahuy ke merakel ne menge etew ne ebbetiuna en ketà te inged ne ebpesinerawan ni Hisus. ³⁴ Guna su nekerunggù en ensi Hisus ne iyan dan en nekita se merakel ne menge etew ne nevurun, ne neyruwan nevenar ni Hisus sikandan su iyan dan neiringan ne menge bilibili ne warà tumetuganur. Ketà be ne merakel se impenurù din kandan.

³⁵ Guna su meapun en nevenar ne mid-uvey en kandin ke menge edumdumaan din se egkahi te, “Meapun en ini ne warà dè be menge etew kayi te inged ini. ³⁶ Iyan tumù ne ibpeipanew nu en ini se merakel ne etew su apey ran ebpekependiyà te endei se ruen menge valey rin ne ebpekepemasa ran te egkekaan dan.”

³⁷ Ugaid ne migkehiyan dan ni Hisus te, “Sikiyu se ebpekaan kandan.”

Ne migkahi ran te, “Maa, sikami pè be se ebpepemasaan nu te ibpekaan kandan? Misan buwa duen kureta tew ne ed-elehà te deruwa nehatus ne denariyu ne ibpemasa te egkekaan, ne kurang pà.”

³⁸ Ne migkahi en si Hisus te, “Engkey ma taman se kerakel te lutù tew? Intengi niyu kun.”

Guna su mid-intengan dan ne migkahi ran en te, “Ruen lelima ne timan se pan wey deruwa ne timan se serà.”

³⁹ Nerineg din dà ne migkehiyan en ni Hisus ke sepulù wey deruwa ne edumdumaan din te, “Pemepinuuwa niyu sikandan te idsengepuntuk keniyan te gumegebà.” ⁴⁰ Arà dà ne mibpepinuu ran en te igihilima nepulù etawa ibmehatus ne etew te idsenge puntuk.

⁴¹ Ne migkuwa ni Hisus ke lelima ne timan ne pan wey ke deruwa ne timan ne serà, ne midlingakà sikandin diyà te langit ne impeselamat din te Eleteala. Ne mibpenevitèvi din en ke pan ne imbehey rin en dut te menge edumdumaan din su ibpetukid dut te merakel ne etew. Ne iring din ded dema ke serà, mibpenevitèvi din ne impetukid din dut te langun ne menge etew. ⁴² Migkaan dan langun ne nengevulung dan. ⁴³ Guna su nekeipus dan en se egkaan ne mibpunpun dut te sepulù wey deruwa ne edumdumaan din ke nengesamà, ne iyan din nepunpunan ne sepulù wey deruwa ne binevey ne nengepenù. ⁴⁴ Ne ke menge etew ne migkaan ketà ne lelima nengivu ke meama, liyu pà ke menge meritan batà.

*Mid-ipanew si Hisus Diyà te Divavew te Wayig
(Mateo 14:22-33; Juan 6:15-21)*

⁴⁵ Nekeipus dan dà ketà, ne impeuntud en ni Hisus te avang ke menge edumdumaan din su ibpeuna rin en sikandan te ed-apet te ranew riyà te inged ne Bitsaida, su ibpepeuli din pà ke menge etew.

⁴⁶ Guna su impeipanew rin en ke menge etew ne midtekereg en sikandin te buvungan su ebpengeningeni.

⁴⁷ Guna su egkesagkup en ne riyan en ke edumdumaan ni Hisus te kalud te ranew se ed-avang-avang, ne kayi pà te buvungan si Hisus se ebpengeningeni. ⁴⁸ Ne nesandeng ni Hisus se egkepesangan ke

menge edumdumaan din te ebpemura su egkesurang dan ke mevandes ne keramag. Guna su egkepkepawà en ne midtelukun en si Hisus kandan se ed-ip-ipanew riyà te rivavew te wayig, ne iring te edsahad dà kandan.⁴⁹ Ne guna su nekita sikandin dut te menge edumdumaan din se riyà ed-ip-ipanew te rivavew te wayig ne kunaan dan ke angkal sikandin, ne migkuleyi dan te kegkeandek dan.⁵⁰ Su langun dan ne nekekita kandin ne nengeandek dan nevenar.

Ketà ne migkahi si Hisus kandan te, “Pedtihel kew te hinawa niyu, su siaken ini! Kenà kew meandek!”⁵¹ Arà dà ne mid-erà en si Hisus te avang dan ne netekew en mid-engked ke keramag. Ketà ne nengeinuunu nevenar ke menge edumdumaan din.⁵² Su misan nekita ran en ke mekegeyip ne mid-ulaula ni Hisus te kinepekaan din te merakel ne etew, ne warà den pà mesebuti ke benar ne meana rut te nekita ran, su warà metegkad dut te itungan dan.

*Neulian ni Hisus Ke Menge Ebpenderaru Diyà te Inged ne Hiniserit
(Mateo 14:34-36)*

⁵³ Guna su mid-apet dan te ranew ne iyan dan nerungguan ne inged ne Hiniserit, ne ketà ne migauan dan en ne in-iket en ke avang dan.⁵⁴ Guna su nekehaun dan en ne petuluy ne nekilala dut te menge etew si Hisus.⁵⁵ Arà dà ne mibpelelahuy ran en se ebbesabut dut te menge etew ne ebpenderaru riyà te menge inged ne nekeerivey. Ne misan endei ran egkerineg se egketehuan ni Hisus ne edyeyungen en ke menge ebpenderaru su ebbeneheewiten dan diyà te kandin.⁵⁶ Ne misan endei ebbesinaru si Hisus te menge pengengewiran etawa riyà te lihewangan sikandin, ne edyeyungen dan maa ke menge ebpenderaru riyà te kandin. Su ebbeneheewiten dan diyà te menge pedian su ebpemuyuen dan ki Hisus te menu mà ke mekeamì ke ebpenderaru misan dut te velegkas din dà, ne ketà ne langun ne nekeamì ne neulian.

7

*Mid-insà ke Menge Peresiyu ki Hisus ke meambe ke kenà eduma ke
Menge Edumdumaan din Dut te Penurù te Keep-epuan Dan ne Hudiyanan
mekeatag te kebpenlùlù*

(Mateo 15:1-9)

¹ Senge hewii ne ruen menge Peresiyu wey menge meyterù te penduan ne riyà ebpun te Hirusalim ne mibpengkayi te ki Hisus.² Nekita ran te ruen edumdumaan ni Hisus ne nekerimpas dut te betasan ne edtenuran dut te menge Peresiyu su migkaan dan ne warà dan dumai ke edtenuran ne kebpenlùlù te menge belad dan.

³ Su ke menge Peresiyu wey ruma pà ne menge Hudiyanan ne kenà dan ebpekekaan embiya kenà iyan dan ibpeuna ke kedadumana te edtenuran ne betasan te kedlùlù te velad ne impenurù dut te keep-epuan dan.⁴ Misan ed-uli dan ke riyà ebpun te pedian ne kenà dan ebpekekaan embiya kenà dan ed-unaan te edtuman ke edtenuran ne betasan te kedlùlù. Ne ruen pà ruma ne betasan ne edtumanan dan iring te edtenuran ne kedlùlù te menge sangkap te egkaan, menge kelalew, menge halang ne kendidu, wey menge ed-irehaan.

⁵ Ketà be ne mid-insaan dut te menge Peresiyu wey ke menge meyterù te penduan si Hisus te, “Meambe ke kenà edtuman ini se

menge edumdumaan nu rut te impenurù ne betasan dut te keep-epuan tew? Su matag dan en migkaan ne warà dan tumana ke edtenuran te kedlùlùlù!”

⁶ Ne midtavak si Hisus kandan te, “Benar iya ke lalag mekeatag keniyu ne impesurat te Eleteala ki Isaia ne mibpelambas te Lalag te Eleteala rengan. Su sikiyu ne uvag en kun ne ebperetiyaya iring dut te insurat din ne egkahi te,

‘Ini se menge etew, ke se Eleteala,
ne kayi rà te bivig dan se ked-arap dan kediey,
ugaid ne ke hinawa ran ne medmeriyù kediey.

⁷ Warà ded be lalew rin se kebpenggarap dan kediey,
su ke impenurù dan ne mibèbeelan dà te etew,
ugaid ne iyan dan migkahi ne kayi ini ebpuun te penduan ku,’ ”
ke se impesurat ki Isaia.

⁸ “Ne iring din ded dema te sikiyu,” ke si Hisus, “su mid-lekaan niyu ke penduan te Eleteala, ne iyan niyu egeweran ke betasan ne bineelan dà te menusiyà.”

⁹ Ne migkahi pà maa si Hisus te, “Metau kew nevenar te ralan te kedengked niyu te penduan te Eleteala su apey niyu metuman ke keniyu rà dè duen ne betasan. ¹⁰ Su,” ke si Hisus, “ruen penduan te Eleteala ne impesurat din ki Moises dengan ne egkahi te, ‘Edati niyu ke amey niyu wey ke iney niyu.’ Ne ingkahi rema te, ‘Misan engkey en ne etew ne edlalag te meraatey riyà te menge lukes din ne ebpeimetayan,’ ke se impesurat ki Moises. ¹¹ Ugaid ne sikiyu,” ke si Hisus, “ne iyan niyu ibpenurù ne embiya ruen etew ne ruen igketavang din dut te menge lukes din ne egkepakey ne egkehiyen din se ‘Kurban ini’ ne iyan din meana ne ‘Eleteala se kemuney kayi’. ¹² Ne ketà,” ke si Hisus, “ne kenà en sikandin ebpeketavang rut te amey rin wey iney rin. ¹³ Kayi ve te penurù niyu ini ne mid-iniyuhan niyu ke Lalag te Eleteala su iyan niyu ibpeiseg ke betasan ne intelau dut te keep-epuan niyu. Ne ruen merakel pà ne iring kayi ne ed-ul-ulaan niyu.”

Ke Menge Ebpekeredsik te Etew (Mateo 15:10-20)

¹⁴ Arà dà ne pineuvvey en ni Hisus ke merakel ne menge etew se egkahi te, “Pemineha niyu ve ini,” ke sikandin, “se edlelehan ku su apey niyu egkesebuti. ¹⁵ Kenà iyan ebpekeredsik te etew ini se egkeenen ne ebpekeawuk te bèbà din, ugaid ne iyan ebpekeredsik te etew ini se netahù te hinawa rin ne ebpekelihawang kayi te bèbà din. [¹⁶ Itaan niyu ve ke telinga niyu kayi te migkahi ku ini!]”

¹⁷ Nekeipus te edlalag si Hisus ne mid-ewaan din ke merakel ne etew ne midlusud en diyà te valey, ne mid-insaan en dut te menge edumdumaan din ke engkey se meana ketà te sempità din. ¹⁸ Ne migkahi si Hisus te, “Iring kew rà dut te rumah ne etew ne mevavew se kebpekesabut din. Meambe warà niyu ves mesebuti te kenà iyan ebpekeredsik te etew ini se egkeenen ne ebpekeawuk te bèbà din? ¹⁹ Su kenà ini edlusud te hinawa rin, ugaid ne kayi ebpevayà te hetek din ne edlihawang en diyà te kandin.” (Ne ini se lalag ni Hisus ne iyan din ibpesabut ne egkepakey ne egkeenen se misan engkey en ne egkeakan.)

²⁰ Ne impelevundus ni Hisus se kegkahi rin te, “Iyan ebpekeredsik te etew ne ini se netahù te hinawa rin ne ebpekeliwang te bèbà din. ²¹ Su ini se kayi ebpnuun te lusud te diralem te etew, ini se neketahù te hinawa rin, ke ebpnuunan te meraat ne itungan ne ebpeneneewit kandin te meraat ne ed-ul-ulaan iring te ed-ulaula te meredsik, kebpenakew, ked-imatey, ²² kedlangkadlangkad te esawa rin, kegkeima, kereatey te itungan mekeatag te ruma rin, kebpen-limbung, kedimayà, kebpengelikud, kebpenerupet, kebmeperayù, wey kerupangan. ²³ Langun din ini ne menge meraat ne ulaula ne kayi ebpnuun te lusud te hinawa te etew ne ebpekeredsik kandin.”

*Ke Guhud mekeatag te Sarig te Senge Etew ne Meritan ki Hisus
(Mateo 15:21-28)*

²⁴ Ne mid-awà si Hisus ketà te lusud te inged ne Geliliya ne mibpendiyà te inged ne Tiru. Guna su nekeuma en ne mibpemenayik sikandin dutun te valey su kenà din egkesuatan ne egketendekan te menge etew ke valey ne midetengan din, ugaid ne kenà ma iya ebpekeeles sikandin. ²⁵ Ne ruen meritan ketà te inged ne ruen anak din ne meritan ne midsuukan te vusew. Guna su nerineg din se nekeuma en si Hisus ne mibayaan din ne midlumpeng en diyà te sineruhan ni Hisus. ²⁶ Ne mibpemuyù kandin te ibpesegseg ke vusew ne midsuuk te anak din. Ini se meritan ne kenà Hudiyanan su etew te inged ne Punisiya, lusud te inged ne Siriya, ne iyan din kedlalag ne Gerisiyanu.

²⁷ Ugaid ne midsempità si Hisus kandin te, “Ed-unaan ta te ebpekaan ke menge vatà su kenà edait ne egkuan ta ke ibpekaan te menge vatà ne idsavud te menge asu.”

²⁸ “Benar ayan, Kerenan,” ke se meritan, “ugaid misan ke menge asu ne ebpenelisim dut te momu te menge vatà ne ebpengeulug diyà te lemisaan.”

²⁹ Ne migkahi si Hisus te, “Geina te iring ketà se lalag nu, ne ebpekeulì ke en su mid-awà en ke vusew ne midsuuk te anak nu!”

³⁰ Arà dà ne mid-ulì en ke meritan, ne iyan din nekita ne ed-id-irehà ke anak din su mid-awà en iya ke vusew ne midsuuk kandin.

Ruen Senge Etew ne Bengel wey Emew ne Neulian ni Hisus

³¹ Guna su mid-awà si Hisus kayi te inged ne Tiru ne riyà pà mibpevayà te inged ne Sidun, ne arà pà ne mibetikù kayi te ranew ne Geliliya ne midlusud en te inged ne Dikapulis. ³² Ne ruen menge etew ketà ne mibpeneheewit te etew ne bengel, ne timalù te egkeemew kayi te ki Hisus. Ne mibpemuyù dan ki Hisus te ibperampen kandin su apey meulii.

³³ Arà dà ne migkuwa en ni Hisus ini se etew ne impesivey rin en dut te merakel ne etew, ne intiyuk en ni Hisus ke terù din dut te telinga te bengel. Ne an pà ne mid-ames din te ileb ke terù din ne impendaras din dut te rilà ketà te etew. ³⁴ Midlingakà si Hisus diyà te langit ne merahing se kinepeudsur din te hinawa rin se egkahi te, “Ipata!” ne iyan din meana se “Mepuwasi!” ³⁵ Arà dà iya ne nekerineg en ini se vengel, ne mepayag en ke kebpekelalag din su nekeulit en.

³⁶ Ketà ne imbandù ni Hisus dut te menge etew te kenà dan penudtula ini se nekita ran te misan entei en. Ugaid ne makin ne impemees ni Hisus ne lemban en be ne in-eneb-eneb dan ini se nekita

ran. ³⁷ Ne langun ne nekerineg ketà ne negeyip nevenar su iyan dan nekahí se, “Meupiya nevenar ini se langun ne vaal din! Misan ke bengel ne ebpekerineg en, ne ke emew ne ebpekelalag en!”

8

Pinekaan ni Hisus Ke Epat ne Ngivu ne Etew (Mateo 15:32-39)

¹ Senge hewii ketà ne nevurun maa ke merakel ne menge etew. Guna su neeminan dan en te egkekaan, ne pineuvvey ni Hisus ke menge edumdumaan din se egkahi te, ² “Igkeyruwi ku nevenar ini se menge etew,” ke si Hisus, “su nekedtetelu en ne hewii se kinepekiduma ran keytew ne warè en egkekaan dan. ³ Embiya ebpeulien ku sikandan te kenà dan ebpekekaan, ne edlunusan dan diyà te ralan te kegkevitil su ruen duma ne meriyù se ed-ulian din.”

⁴ Migkahi ke menge edumdumaan ni Hisus te, “Endei ki mulà ebpekekuwa te egkekaan ne ibpekaan tew kayi te merakel ne menge etew se ini kiyu te inged ne warà bulug etew rin?”

⁵ “Engkey ma taman ke kerakel te lutù tew?” ke si Hisus.

Ne migkahi ran te, “Pitu rè be ne timan ini se lutù tew ne pan.”

⁶ Ne pinepinuu ni Hisus ke menge etew diyà te tanà. Ne migkuwa rin ke pitu ne timan ne pan ne impeselamat din en diyà te Eleteala. Arà dà ne mibpenevitevi din en ke pan, ne imbehey rin en dut te menge edumdumaan din su ibpetukid diyà te menge etew. Ne arè en iya rema ke mid-ulaula ran. ⁷ Ne ruen dema ketà pira ne timan ne reisek ne serà. Ne migkuwa ini ni Hisus ne impeselamat din diyà te Eleteala, ne imbehey rin diyà te edumdumaan din su ibpemehey ran dema riyà te merakel ne etew. ⁸⁻⁹ Langun dan ne migkaan ne nengevulung, ne ruen menge epat ne ngivu se menge etew ne nevurun ketà ne migkaan. Guna su nekeipus dan se ebpengaan, ne mibpunpun dut te edumdumaan din ke nengesamà ne iyan din nepunpunan se pitu ne binevey. Ne pineuli ni Hisus ke menge etew, ¹⁰ ne arà dà ne mid-untud en sikandin te avang wey ke menge edumdumaan din ne mid-avang-avang dan en se ependiyà te inged ne Delmanuta.

Mibuyù ki Hisus ke Menge Peresiyu te Ed-inteng Dan te Ed-ul-ulaan Din ne Mekegeyip (Mateo 16:1-4)

¹¹ Guna su nekerunggù dan, ne ruen en menge Peresiyu ne mibpengkayi te ki Hisus se ebpekidlewanà kandin su ebeelan dan te litag si Hisus. Ne mibuyuan dan sikandin te mebpekita te mekegeyip ne tuus te sikandin ke benar ne midsuhù te Eleteala. ¹² Ketà ne mibmerahing se kinepeudsur ni Hisus te hinawa rin se egkahi te, “Sikiyu ne menge etew te guntaani en, meambe ke ed-inteng kew pà te menge mekegeyip ne arà pà ne ebperetiyaya kew? Ugaid ne igkahi ku keniyu ke benar te warà ibpekita ku keniyu ne mekegeyip ne tuus!” ¹³ Arà dà ne mid-ewaan din en sikandan ne mid-erà te avang se ed-apet diyà te ranew.

Ke Meraat ne Penurù Dut te Menge Peresiyu wey ni Hirudis ne Impeiring ni Hisus te Ibpelevag te Pan (Mateo 16:5-12)

14 Ne nelipat ke edumdumaan ni Hisus te ed-ewit te lutù dan ne pan, ugaid ne senge timan dè be ne pan se kayi te avang dan. 15 Ne midsempità si Hisus kandan se egkahi te, “Andam kew,” ke sikandin, “ne ingati niyu te kenà kew egkepeneheewit te ibpelevag te pan dut te menge Peresiyu, abpeg ki Hirudis.”

16 Ugaid ne geina te warà dan mesebuti ne mibpeglelahey ran te, “Iyan din kinepekekahi kayi ne geina te warà kiyu mekeewit te lutù tew ne pan.”

17 Ne netuenan ni Hisus ke engkey se ibpeglelahey ran ne migkehiyan din en sikandan te, “Meambé ke iyan niyu egkepengasak se warà niyu kebpekeewit te pan? Maa, warà kew pè bes mekasabut? Maa mevavew pè be se itungan niyu? 18 Duen ded ura mata niyu, ne meambe ke kenà niyu egkekita? Ne duen ded ura telinga niyu, ne meambe ke kenà niyu egkerineg? Maa kenà niyu en egketenuran ke mid-ulaula ku? 19 Ketà te kinepenevìtevi ku rut te lelima ne timan ne pan ne impekaan ku rut te lelima ne ngivu ne menge etew, ne pira ne binevey se nepenù te nengesamà ne nepunpun?”

“Sepulù wey deruwa ne binevey,” ke sikandan.

20 Ne migkahi pà maa si Hisus te, “Arà se kinepenevìtevi ku rut te pitu ne timan ne pan ne impekaan ku rut te epat ne ngivu ne menge etew,” ke si Hisus, “ne pira ne binevey se nepenù te nengesamà?”

“Pitu ne binevey,” ke sikandan.

21 “Maa warà kew pè be lavew mekesabut te ini se penurù ku ne kenà mekeatag te egkeenen tew?”

Neulian ni Hisus ke senge etew ne Pisek Diyà te Inged ne Bitsaida

22 Nekerunggù dan kayi te inged ne Betsaida, ne ruen menge etew ne mibpeneheewit te pisek kayi te ki Hisus ne mibpemuyù dan te ibperampen kandin su apey meulii. 23 Arà dà ne mibpiket en ni Hisus ke pisek ne midlihwang dan en dut te inged. Nekelihwang den dà ne mid-ilevan en ni Hisus ke mata ketà te pisek, ne midampen din se egkahi te, “Maa, ruen en egkekita nu?”

24 Ne midlingakà ke pisek ne migkahi te, “Egkekita ku en ke menge etew, ugaid ne iring dan te menge kayu ne ebpengip-ipanew.”

25 Ne midampen en maa ni Hisus ke mata rut te pisek ne ketà ne mibutatek din te edtengteng ke meama, ne nekeulit en ke kadtengteng din su mepayag en se kebpekekita rin. 26 Ne pineulì ni Hisus sikandin se egkahi te, “Kenà ke en be awet kayi te inged ini.”

Ke In-insà ni Hisus dut te Edumdumaan din ke Engkey Sikandin (Mateo 16:13-20; Lucas 9:18-21)

27 Ketà ne mid-ipanew en si Hisus wey ke menge edumdumaan din te ebpendiyà te menge inged uvey te inged ne Sisariya Pilipus. Gewii ran te ed-ip-ipanew ne mid-insaan ni Hisus ke menge edumdumaan din te, “Engkey a kun ma riyaw te pegitungan te menge etew?”

28 “Ruen egkahi te sikuna si Juan ke Ebpemunyag,” ke sikandan. “Ne ruen duma ne egkahi te sikuna si Elias ke mibpelambas te Lalag te Eleteala rengan. Ne ruen pà rumu ne egkahi te sikuna ke seveka ne mibpelambas te Lalag te Eleteala rengan.”

29 “Ne menu sikiyu,” ke si Hisus, “engkey a ma diyà te pegitungan niyu?”

Ne midtavak si Pedro te, "Sikuna si Kristu ke midtendù te Eleteala ne ebperetuen dut te menge etew."

³⁰ Ne mid-il-ilutan ni Hisus te egkahi kandan te kenà dan ibpenudtul ini te misan entei ne etew.

Migkahi en ni Hisus ke Kebpatey Rin

(Mateo 16:21-28; Lucas 9:22-27)

³¹ Ketà ne impesabut en ni Hisus dut te menge edumdumaan din te, "Iyan iya se edresayen nevenar ini se Impeanak te Menusiyà su ebpeheweran diyà te menge egkeunutan te Hudianen wey ke menge mepurù te terebpelengesa wey ke menge meyterù te penduan. Edimetayan, ugaid ne ketà te iketetelu ne hewii ne egkevanew red." ³² Mibpeketauenan ni Hisus kandan ke langun ne ibped-ulaula kandin. Nerineg ni Pedro ne impekeriyù din si Hisus ne migkehiyan din te kenà en ebpeisehen te eddalag te iring ketà.

³³ Ugaid ne midlingì si Hisus se edtengteng diyà te menge edumduaan din ne midawey rin si Pedro se egkahi te, "Awà ka su iring ka ki Setanas. Su ke itungan nu ne kenà diyà ebpuun te Eleteala, ugaid ne kayi rà ebpuun te itungan te menusiyà!"

³⁴ Ne miburun en ni Hisus ke menge etew abpeg dut te menge edumdumaan din ne migkahi te, "Embiya ruen etew ne egkiyug ne eduma kediey ne iyan iya se pekelipati rin ke kandin ne kiyug, ne tianga rin ke kandin ne pinebelavag ne kayu ne ed-ingaranan te krus ne iyan din meana ne tumana rin ke menge suhù ku misan ibpatey rin pà se keduma rin kediey. ³⁵ Su ke etew ne egkenuhun te umur din ne ebpatey lavew, ugaid ke etew ne iyan din ibpatey se keduma rin kediey te kebpemesabut dut te Meupiya ne Tuttul ne ruen umur ne ibehey kandin ne warà edtemanan din. ³⁶ Menu, ke ruen etew ne ebpekeangkun te langun taman kayi te ampew te dunya, maa engkey se rantek din embiya egkerasey ke himukud din diyà te apuy ne rakà? Warà! ³⁷ Su warà misan engkey ne kearen ne igkevehey te etew apey rin meawi ke gimukud din. ³⁸ Embiya ruen etew ne igkeyeyai a rin wey ini se ibpenurù ku kayi te ini ne timpu ne merakel ne menge etew ne mekesesalà wey edsumpalit te Eleteala, ne ke Impeanak te Menusiyà ne igkeyeyai rin dema sikandin ketà te kedlived din kayi te ampew te dunya. Su ketà ne hewii ne ruen raman din ne riyà ebpuun te Amey rin ne Eleteala, ne edumaan sikandin dema rut te menge berekat ne suluhuen diyà te langit."

9

¹ Ne migkahi pà maa si Hisus te, "Tentenuri niyu ini, ruen ruma tew kayi ne kenà pà ebpatey taman ketà te hewii ne egkekita ran ke kedetui te Eleteala te menge etew rut te gehem din."

Medsalin Nevenar ni Hisus ke Paras Din

(Mateo 17:1-13; Lucas 9:28-36)

² Guna su neked-enem en ne hewii, ne miduma en ni Hisus ensi Pedro, si Santiago wey si Juan ne midtekereg dan en te mehantur ne buvungan te sikandan dà. Guna su ketà dan en ne midtengtengan dan si Hisus ne netekew nedsalin ke paras din. ³ Ne mibpeneringsing ke velegkas din te keputì su warà misan engkey ne kayi te ampew te dunya ne ebpekemeputì iring kayi. ⁴ Netekew ran en dema nekita se

deruwa ne etew se ebpekidlalag ki Hisus, si Elias wey si Moises, ke menge mibpelambas te Lalag te Eleteala rengan.

⁵ Ne migkahi en si Pedro ki Hisus te, “Meyterù, meupiya su kayi ki! Edsesabung key te tetelu, seveka keykew, seveka ki Moises, wey seveka rema ki Elias,” ke sikandin. ⁶ Ugaid ne matag be migkahi si Pedro te iring ketà ne warà din metueni ke engkey se egkehiyen din su neandek dan.

⁷ Arà dà ne ruen sehulapun ne nekelikuvung kandan ne ruen suwara ne ketà ebpun te sehulapun ne migkahi te, “Ini ke Anak ku ne egkelimù ku nevenar. Pemineha niyu ke edlelahen din!”

⁸ Ne mibpenlangulangu ran ketà, ugaid ne warà en etew ne nekita ran liyu rà ki Hisus ke ruma ran.

⁹ Gwii ran te edtupang ne mibenduan dan en ni Hisus te, “Kenà niyu ve imbe ibpenudful te misan entei en ini se nekita niyu taman te egkevanew en ke Impeanak te Menusiyà.”

¹⁰ Ne midtuman dan ini se ingkahi ni Hisus, ugaid ne mibpein-inseey ran te, “Engkey se meana rin ini se ebenawen?”

¹¹ Ne mid-insaan dan si Hisus te, “Meambe ke egkehiyen te menge meyterù te penduan te iyan ed-una ebpengkayi ne si Elias ke etew ne mibpelambas te Lalag te Eleteala rengan, ne arà pà ke midtendù te Eleteala ne edatù?”

¹² Ne midtavak si Hisus te, “Benar ne ed-una ebpengkayi si Elias su ed-endamen din ke langun te kebpekeuma dut te midtendù te Eleteala ne edatù. Ugaid ne maa,” ke sikandin, “ke ruen dema impesurat ne Lalag te Eleteala rengan te merakel se kemeresayan dut te Impeanak te Menusiyà ne idumili dan sikandin? ¹³ Ugaid ne igkahi ku keniyu te nekeuma en si Elias. Nasì dan midrasey sikandin te endei se kiyug dan iring dut te impesurat dengan ne Lalag te Eleteala mekeatag kandin.”

*Neulian ni Hisus ke Vatà ne Midsuukan te Busew
(Mateo 17:14-21; Lucas 9:37-43a)*

¹⁴ Guna su nekeuma en ensi Hisus kayi te ruma ne edumdumaan din, ne nekita ran te midlingutan dan te merakel ne menge etew. Ruen kayi menge meyterù te penduan ne ebpekidlewanà kandan. ¹⁵ Guna su nekita rut te menge etew se ebpingguma en si Hisus ne nengeinuinu ran nevenar su warà kebpenareng dan kandin, ne mibpemelelahuy ran en su midsinuhung dan en sikandin.

¹⁶ Ne mid-insaan ni Hisus ke menge edumdumaan din te, “Engkey se ibpelewaney niyu?”

¹⁷ Ne ruen ketà te nevurun senge etew ne meama ne midselet se egkahi te, “Meyterù, ruen ini se anak ku ne mibpeneheewit ku kayi te keykew su midsuukan te vusew ne kenè en ebpekalalag. ¹⁸ Embiya edsuukan sikandin te vusew ne ebpekebadas sikandin diyà te tanà, eburvuraan ke bèbà din, edyengketen ke ngipen din, ne egkereg ke lawa rin. Ne mibpemuyù ku rut te edumdumaan nu te ibpesegseg ini se vusew ne midsuuk kayi te anak ku, ugaid ne warà dan ma megaga.”

¹⁹ Migkahi si Hisus te, “Sikiyu ne menge etew guntaan, warà kebperetiyyaya niyu te Eleteala! Neuhet en se kebpekiduma ku keniyu, ne engkey pà taman te kebperetiyyaya niyu? Engkey pà taman se keuhet din se keditigkeri ku keniyu? Ipengkayi niyu ayan se vatà!” ke si Hisus.

²⁰ Ne mid-ewit dan en ke vatà riyà te ki Hisus. Guna su nekita rut te vusew si Hisus ne midsukan din en ke vatà te nehurivid, ne nekebadas en diyà te tanà, ne midteltilid en, ne miburàburà ke bèbà din.

²¹ Mid-insaan ni Hisus ke amey rut te vatà te, “Keenu rudsui sikandin kayi te egeraman din ini?”

Midtavak ke amey rin te, “Inggenat dà te vatà pà sikandin. ²² Su kenà kepipira rà ed-imetayi perem kayi te vusew su ruen ke riyà ebpeketimbag sikandin te apuy wey ruen ke riyà te wayig. Keyruwi key nikuna ne tevangi key embiya egkegaga nu.”

²³ “Ne meambe ke id-insà nu pà embiya egkegaga ku?” ke si Hisus. “Su langun ne egkegaga te etew embiya ruen peretiyaya rin te Eleteala.”

²⁴ Arà dà ne nekekahi ke amey rut te vatà te, “Duen peretiyaya ku, ugaid ne kurang pà. Ebuyuen ku ne umani nu pà!”

²⁵ Nekita ni Hisus te edadseg en kandan ke merakel ne menge etew ne migkehiyan din en ke vusew ne midsuuk dut te vatà te, “Sikew ne vusew ne igkeemew wey igkevengel te menge etew,” ke sikandin, “ewai nu ayan se vatà ne kenà ke en be imbe edlived!”

²⁶ Arà dà ne migkulayi en ke vusew ne mibidbid din en ke vatà, ne mid-awà en diyà te kandin. Ne iring en te minatey ini se vatà su warà en mekewaleng, ne migkahi en ke menge etew ketà te, “Minatey en!”

²⁷ Ugaid ne migewaran ni Hisus ke velad dut te vatà ne pineenew rin, ne mid-itindeg en ke vatà.

²⁸ Guna su riyà en ensi Hisus te lusud te valey ne mid-insaan en dut te edumdumaan din te, “Meambe ke warà dey megaga te edsegseg ke vusew ne midsuuk ketà te vatà?”

²⁹ Ne migkahi si Hisus kandan te, “Warà duma ne ebpekegaga te kedsegseg te iring keniyan ne vusew embiya kenà kayi rà te kebpengeningeni.”

Migkahi pà maa ni Hisus Ke Kebpatey Rin

(Mateo 17:22-23; Lucas 9:43-45)

³⁰ Ne mid-awà dan ketà ne midlaus dan en se ed-ipanew diyà te lusud te Geliliya. Ne kenà egkiyug si Hisus ne egketuenan te menge etew ke endei sikandin egketahù, ³¹ su apey warà ebpekesambar te kebpenurù din dut te menge edumdumaan din. Migkahi sikandin diyà te kandan te, “Ini se Impeanak te Menusiyà ne ed-uluhen dut te menge egkunterà kandin ne ebpeimetayan dan, ugaid ne ketà te iketelu ne hewii ne egkevanew red.” ³² Ne warà dan mesebuti ke meana rut te migkahi ni Hisus kandan, ugaid ne neandek dan te ed-insà kandin.

Mibpein-inseey Ke Menge Edumdumaan ni Hisus Ke Engkey Kandan se Mepurù

(Mateo 18:1-5; Lucas 9:46-48)

³³ Nekeuma ran diyà te inged ne Kapirnawum ne guna su diyan dan en te lusud te valey ne mid-insaan en ni Hisus ke menge edumdumaan din te, “Engkey ma se ibpelewewaney niyu riyà te ralan?” ³⁴ Ugaid ne warà senge etew kandan ne neketekab su iyan dan ibpelewewaney ke engkey kandan se mepurù.

³⁵ Ne mibpinuu si Hisus, ne miburun din en ke sepulù wey deruwa ne edumdumaan din ne midlag en kandan se egkahi te, “Misan engkey

ne etew ne egkiyug ne ebmepurù, ne iyan iya se mebpeembavà te hinawa rin wey ebpevayàbayà sikandin dut te langun ne menge ruma rin.”

³⁶ Ketà be ne migkuwa si Hisus te senge etew ne vatà ne midsepipi rin ne impeitindeg din diyà te etuvangan dan se egkahi te, ³⁷ “Misan engkey ne etew se edtelimà te vatà iring kayi su atag te keduma rin kediey, ne midtelimà dema sikandin kediey. Ne misan engkey ne etew ne edtelimà kediey, ne kenà siak dà se midtelimà din su ke Amey ku rema ne Eleteala ne midsuhù kediey ne midtelimà din ded.”

*Ke Etew Ne Kenà Egkunterà Kenitew ne Ruma Tew
(Lucas 9:49-50)*

³⁸ Ne migkahi en si Juan diyà te ki Hisus te, “Meyerù, duen neuma rey ne etew ne ebpenegseg te menge vusew te ibpepevayà dut te gehem te ngaran nu. Ne midawey rey sikandin su kenà tew ma ruma.”

³⁹ Ne migkahi si Hisus te, “Kenà niyu sikandin edewaya su warà etew ne ebpekevaal te mekegeyip te ibpepevayà te ngaran ku ne melemu ne edlag te mereatey mekeatag kediey. ⁴⁰ Su ke etew ne kenà tew kunterà ne ruma tew. ⁴¹ Benar ini se egkehiyen ku, piya engkey ne etew ne ebpeinum keniyu te wayig su sabap te kineruma niyu kediey, ne ebpeketelimà en iya sikandin te idlalew te Eleteala.”

*Ke Ebeneheewit Keytew te Ebaal te Meraat
(Mateo 18:6-9; Lucas 17:1-2)*

⁴² “Ne mekeatag be te ini se menge vatà ne mibperetiyyaya kediey, embiya ruen etew ne ebpekepeengked te sarig dan kediey, ne iyan pà meupiya,” ke si Hisus, “ne ebperiwetawan ke lieg din te mevehat ne vatu ne id-antug diyà te rahat tumin dè be ke ebpekepeengked ke sarig te vatà. ⁴³ Embiya iyan ebpekepeneheewit keykew te kebpekedsalà nu ke belad nu, ne tempera nu! Su iyan pà tumù ne egkesarir ka ne ebpekeangkun ka te umur ne kenà edtaman tumin dè be ke deruwa red ke velad nu ugaid ne riyà ka ma ebpesinaru te apuy nerakà ne warà igkeevuki rin. [⁴⁴ Su ketà ne ruen menge tagkey rin ne kenà ebpatey, ne ke apuy ne kenà egkeevukan.] ⁴⁵ Ne embiya iyan ebpekepeneheewit keykew te kebpekedsalà nu ke paa nu, ne tempera nu! Su iyan pà tumù ne egkesarir ka ne ebpekeangkun ka te umur ne kenà edtaman, tumin dè be ke deruwa red ke paa nu ugaid ne igkeantug ka diyà te apuy nerakà. [⁴⁶ Su ketà ne ruen menge tagkey rin ne kenà ebpatey, ne ke apuy ne kenà egkeevukan.] ⁴⁷ Ne embiya iyan ebpekepeneheewit keykew te kebpekedsalà nu ke mata nu, ne lesika nu! Su iyan pà tumù ne kebpekelusud nu rut te edetuan te Eleteala ne dibdivaluy rà ke mata nu, tumin dè be ke deruwa red ke mata nu ugaid ne igkeantug ka riyà te apuy nerakà. [⁴⁸ Su ketà ne ruen menge tagkey rin, ne kenà ebpatey, ne ke apuy ne kenà egkeevukan.]

⁴⁹ “Su uman senge etew ne eduma kediey ne egkepenedsal pà te apuy wey timus ne iyan din meana ne ebpekeheram pà te kemeresayan su apey mebmevag-et ke kedsarig din kediey.

⁵⁰ “Ne meupiya iri se timus su ibmeupiya te nanam dut te egkeenen tew, ugaid ne embiya egkeawà en ke nanam kayi te timus ne warà en dalan te kebmetimus din pà maa. Ne iring te timus ini se ed-ul-ulaan

te menge etew ne mibperetiyaya kediey,” ke si Hisus, “tembù be iyan iya se pelimlimuey kew ne peup-upianey kew.”

10

*Ke Kebpenurù ni Hisus Mekeatag Te Ebpekid-engked te Esawa
(Mateo 19:1-12; Lucas 16:18)*

¹ Mid-awà si Hisus ketà te inged ne Kapirnawum ne mibpendiyan te lusud te inged ne Hudiya ne mid-apet diyà te wayig ne Hurdan. Ketà ne ruen en maa merakel ne menge etew ne nevurun diyà te kandin ne mibpenurù din en maa sikandan su arà ke tatap ne ed-ul-ulaan din.

² Ne ruen menge Peresiyu ne mibpengkayi te ki Hisus su ebaal dan te idseligkat kandin. “Menu, idluhut be te penduan tew,” ke sikandan, “se ebpekid-engked ke meama te esawa rin?”

³ Ugaid ne in-insà ni Hisus kandan te, “Engkey ma se nekahì rut te impesurat ni Moises ne penduan tew mekeatag te kebpeked-engked te esawa?”

⁴ Ke sikandan te, “Inluhut ni Moises ini, ugaid ne ed-una edsurat te kesebenaran te ebpekid-engked en sikandin ne an pà ne egkeengkeran din ke esawa rin.”

⁵ Ne migkahi si Hisus kandan te, “Inluhut ini ni Moises se kebpekid-engked niyu geina te meresen ke ulu niyu te kebpemineg niyu te kebpenurù din. ⁶ Ugaid ne rut te kinelimbaha kayi te dunya, ‘Ne midlimbag te Eleteala ke meama wey meritan. ⁷ Tembù be ed-ewaan dut te meama ke amey rin wey iney rin su riyà ebpekidseveka sikandin te esawa rin, ⁸ ne ini se teled-esawa ne nevaluy ne seveka.’ Ketà ne kenà dan en deruwa ne etew su neseveka rà. ⁹ Tembù be ini se deruwa ne etew ne midseveka te Eleteala, ne kenà egkepebelag dut te etew,” ke si Hisus.

¹⁰ Guna su riyan dan en te valey ne mid-insà maa ki Hisus ke menge edumdumaan din mekeatag te ked-engked te esawa. ¹¹ Ne migkahi en si Hisus kandan te, “Embiya ruen meama ne ebpekid-engked te esawa rin ne edsaup ded maa ed-esawa, ne nekelangkad te esawa rin. ¹² Engketà ded dema ke meritan, embiya ruen ebpekid-engked te esawa rin ne edsaup ded maa ed-esawa, ne nekelangkad ded dema te esawa rin.”

*Mibpenubtuvaran ni Hisus ke Menge Vatà
(Mateo 19:13-15; Lucas 18:15-17)*

¹³ Ne ruen menge etew ketà ne mibpemava te menge anak dan diyà te ki Hisus su ibperampen dan kandin su ebpepenubtuvaran, ugaid ne midawey ran dut te menge edumdumaan din. ¹⁴ Guna su nekita ini ni Hisus ne ingkeepesi rin ne ke sikandin te, “Kenà niyu dewaya sikandin! Ugaid ne ipepengkayi niyu te kediey ke menge vatà, su ke menge etew ne iring te menge vatà se kedsarig dan kediey ne sikandin ke ebpekeamung te Edetuan te Eleteala. ¹⁵ Sebenarvenar ini se egkehiyen ku, ke etew ne kenà edtelimà te Kedetui kandin te Eleteala iring te kedtelimà kayi te reisek ne vatà, ne kenà sikandin ebpekulusud dut te menge etew ne Edetuan te Eleteala,” ke si Hisus. ¹⁶ Arà dà ne mibpenikupu rin ke menge vatà ne midampen din sikandan su ebpenubtuvaran.

*Ke Kewasa ne Meama ne Migkiyug ne Ebpekeangkun te Umur ne Warà Edtemanan Din
(Mateo 19:16-30; Lucas 18:18-30)*

17 Guna su ed-ipanew en maa ensi Hisus ne ruen meama ne mibpelelahuy se eppendiyà te kandin. Ne midlumpeng en diyà te sineruwan ni Hisus se egkahi te, “Meyterù, langun ne ed-ul-ulaan nu ne meupiya! Engkey iyan se ed-ul-ulaan ku apey a mekekuwa te umur ne warà edtemanan din?”

18 Ne midtavak si Hisus te, “Meambe ke nekahi nu te meupiya ke langun ne ed-ul-ulaan ku? Su seveka rà se meupiya se ed-ul-ulaan din ne Eleteala rà. 19 Ugaid ne embiyà arà se id-insà nu mekeatag te umur ne kenà edtaman, ne netuenan nu en ke penduan ne egkahi te: ‘Kenà ka ed-imatey, kenà ka edlangkadlangkad te esawa nu, kenà ka ebpenakew, kenà ka edtarùtarù, kenà ka edlimbung, ne edati nu ke amey nu wey ke iney nu.’”

20 Ne midtavak ke meama ki Hisus te, “Meyterù, igenat te vatà e pà ne langun keniyan ne midumaan ku.”

21 Nerineg dà ni Hisus ne midtengtengan din ke meama su neyruwan din se egkahi te, “Duen pà lavew kurang nu. Iyan be se uli ka ne pesaa nu ke langun ne kearen nu ne ipemehey nu ve ke elehà din diyà te menge ayuayu su apey ruen kekewesai nu riyà te langit ne muna pà dut te kearen nu kayi. Ne arà pà ne pengkayi ka te eduma kedi,” ke si Hisus.

22 Nerineg din dà ke lalag ni Hisus ne mibmerumbahat ke buvuked din ne mid-ipanew en se merungkug su kewasa nevenar.

23 Ne mibpenlangulangu si Hisus diyà te menge edumdumaan din se egkahi te, “Merehen nevenar te kewasa ne etew se kebpsakup din dut te Edetuan te Eleteala!”

24 Ne nengegeyip ke menge edumdumaan ni Hisus ketà te lalag din. Ugaid ne migkahi en maa si Hisus kandan te, “Menge anak, merehen nevenar te etew se kebpsakup din dut te Edetuan te Eleteala. 25 Iyan pà melemu ne ebpevayà diyà te vудsi te rahum ini se binatang ne kemilu tumin dè be ke kebpsakup te etew ne kewasa dut te Edetuan te Eleteala.”

26 Nerineg dà dut te menge edumdumaan din ne ingkegeyip dan nevenar ne mibpein-inseey ran te, “Embiya iring ketà se kerehen din te etew ne kewasa te kebpsakup din dut te Edetuan te Eleteala, ne engkey rè be buwa se ebpekekuwa te umur ne warà edtemanan din?”

27 Ne midtengteng si Hisus kandan ne migkahi en te, “Embiya etew rà ne kenà dan ebpekegaga te eboejeywa te umur ne warà edtemanan din, ugaid ne Eleteala se ebpekegaga ne ebehey kandan su egkegaga te Eleteala ke langun.”

28 Ne midlalag en si Pedro te, “Netuenan nu te mid-ewaan dey ke langun taman dey su miduma key keykew.”

29 Ne migkahi si Hisus kandan te, “Benar ayan, ugaid ne sebenarvenar ini se egkehiyen ku kenyi te misan engkey ne etew se neewaan din ke ubpaan din, menge suled din, menge etevey rin, ke iney rin wey amey rin, menge anak din, wey ke tanà din su atag dut te keduma rin kediey wey ke kebpsabut din dut te Meupiya ne Tudtul, 30 ne ebpeketelimà sikandin te kemeheatus egketakep se neewaan din ne ubpaan din, menge suled din, menge etevey rin, ke iney rin wey

amey rin, menge anak din, wey ke tanà din te biviyag pà sikandin kayi te ampew te dunya, ne ebpekepevayà pà rema te kemeresayan. Ne ketà te akir din ne hewii ne egketelimà din ke umur ne kenà edtaman. ³¹ Ugaid ne merakel ne menge etew guntaan,” ke si Hisus, “ne mepurù se ketengdanan din, ugaid ne riyà te akir din ne hewii ne sikandan ke pinekemevavà. Ne ruen menge etew guntaani ne mevavà dan nevenar, ugaid ne ketà te akir din ne hewii ne sikandan se pinekemepurù se ketengdanan din.”

Impesabut ni Hisus te Iketelu en Ke Kebpatey Rin

(Mateo 20:17-19; Lucas 18:31-34)

³² Gewii te ed-ip-ipanew ensi Hisus wey ke menge edumdumaan din te ebpependiyà te Hirusalim ne mid-unauna si Hisus, ne neipeng dan nevenar su ebpependiyà sikandin te Hirusalim. Ne ke menge etew ne midtinundug kandan ne nengeandek dan. Ne impesivey en ni Hisus ke menge edumdumaan din ne impesabut din en maa kandan ke ibped-ulaula kandin. ³³ Ke sikandin te, “Netuenan niyu en ne ebpendiyà kiyu te Hirusalim ne riyà ne sikandin ke Impeanak te Menusiyà ne ibpalad en diyà te menge mepurù te terebpelengesa wey ke menge meyerù te penduan. Ne ebpegumpung dan en te kukuman dan te ed-imetayan sikandin ne ibpalad sikandin diyà te menge etew ne kenà Hudiyanan. ³⁴ Ne ed-unda-unda ran kandin, ne ebpengileb, ebpenlambit, wey ed-imatey ran kandin, ugaid ne ketà te iketelu ne hewii ne egkevanew sikandin.”

Ke Mibuyù ni Santiago wey Si Juan ki Hisus

(Mateo 20:20-28)

³⁵ Ne ketà ne mid-uvey en ki Hisus ke menge anak ni Sibidiyu, si Santiago wey si Juan, se egkahi te, “Meyerù, ruen ebuyuen dey keykew.”

³⁶ “Engkey ma se ebuyuen niyu?” ke si Hisus.

³⁷ Ke sikandan te, “Ketà te akir din ne hewii te kedadù nu en, ne ebuyuen dey keykew te pepinuuwa key ne rumu nu, seveka se riyà te egkekewanen nu, ne seveka ne riyà te egkehivang nu.”

³⁸ Ne migkahi ni Hisus kandan te, “Matag niyu en ini ebuyua ne warà niyu mesebuti an se ebuyuen niyu. Maa, ebpeketigker kew ve dut te kemeresayan ne mehaan ku en ibpevayà? Ne maa, ebpeketikà kew ve ne ebpevayà te kemetayen iring te ibpekepevayà ku?”

³⁹ “Uya,” ke sikandan, “egketigkeran dey.”

Ne migkahi si Hisus kandan te, “Benar iya ne edresayan kew iring te kemeresayan ku. Ne iring ded dut te ked-imetayi kediey se kedresaya rema keniyu. ⁴⁰ Ugaid ne mekeatag te ayan se ebuyuen niyu, ne warà ketengdanan ku te ebpemilì te engkey se ebpepinuuwen kayi te egkekewanen ku wey kayi te egkehivang ku. Su ini ne intail dut te Amey ku ne Eleteala dut te mibpemilì din.”

⁴¹ Guna su nerineg kayi te sepulù ne edumdumaan ni Hisus arà se ebuyuen enni Santiago ki Juan, ne nengeepes dan. ⁴² Tembù be impeuvay ran langun ni Hisus se egkahi te, “Netuenan tew ne ini se menge pengulu te inged kayi te ampew te dunya ne metehel ne edsuhù te langun ne menge etew, ne ini se menge unuten dan ne kandan dà ne kiyug se edumaan. ⁴³ Ugaid ne kenà kew ed-iring ketà, su embiya ruen seveka keniyu ne egkiyug ne ebmepurù, ne

ian iya se mebpeembavà te hinawa rin wey ebpevayàbayà dut te langun. ⁴⁴ Ne embiya ruen seveka keniyu ne egkiyug te sikandin se ebpekeuna te langun niyu, ne iyan iya se mebpeembavà te hinawa rin wey ebpevayàbayà dut te langun. ⁴⁵ Su misan ke Impeanak te Menusiyà ne kenà iyan din kinepengkayi te ampew te dunya ne apey sikandin metevangi te menge etew. Ugaid ne iyan din kinekepengkayi ne apey rin metevangi ke langun ne menge etew, ne egkeimetayan sikandin su apey egkevelukasi ke langun ne menge etew.”

*Neulian ni Hisus si Bartimeo ne Pisek
(Mateo 20:29-34; Lucas 18:35-43)*

⁴⁶ Nekeuma en si Hisus wey ke menge edumdumaan din diyà te Hiriku. Ne guna su ed-awà dan en ne merakel ne menge etew se mibpenduma kandan, ne kayi te kelid te ebpevayaan dan ne ruen meama ne pisek ne ebpipinuu su ebpmuyù ne ed-ingaranan ki Bertimeo, anak ni Timiyu. ⁴⁷ Guna su nerineg din te edsahad en si Hisus ne riyà ebpuun te Nesarit ne mibensag en te, “Hisus, ke inenakan ni David rengan, igkeyru a nu nevenar!”

⁴⁸ Ne merakel ne menge etew ketà se midawey kandin te ebpeen-enengen ugaid ne lemban en ne egkeilut se ebpmensag te, “Sikuna ne inenakan ni David rengan, igkeyru a nu nevenar!”

⁴⁹ Guna su nerineg ni Hisus ne mid-itindeg pà sikandin se egkahi te, “Pikita niyu ayan kayi!”

Arà dà ne mid-umew ran en ke pisek se egkahi te, “Kehalew ka en, ne itindeg ka, su ed-umawen ke en nikandin.”

⁵⁰ Arà dà ne mibpelis din ke kumbalà din, ne mid-itindeg en, ne mid-uvey en ki Hisus.

⁵¹ “Engkey ma se ebpetevangan nu kediey?” ke si Hisus.

Ne migkahi ke pisek te, “Meyterù, kiyug ku ne mekekita a red perem!”

⁵² “Su kenà duwaruwa se kedsarig nu kediey,” ke si Hisus, “ne ebpekeulit en ke kebpekekita nu. Ipanew ke en.” Arà dà iya ne nekekita en ini se meama, ne miduma en ki Hisus te ked-ip-ipanew ran.

11

*Ke Kinclusud ni Hisus Diyà te Hirusalim ne Mid-untud te Nati te Kudà su Tuus Ini te Datù Sikandin dut te menge Hudiyanan
(Mateo 21:1-11; Lucas 19:28-40; Juan 12:12-19)*

¹ Guna su ebpelundani ran en te Hirusalim ne neuma ran en ke buvungan ne ed-ingaranan te Ulivuwen, elet te inged ne Bitpahi wey inged ne Bitaniya. Midsuhù en ni Hisus ke deruwa ne edumdumaan din te ebpeunaan dan, ² ke sikandin te, “Una kew en be ketà te inged ne an te unaan ta, ne ketà te ebpekeuma kew ne egkekita niyu ke nati ne kudà ne in-iket ketà ne warà pà bulug meunturi. Ekari niyu be ne ewita niyu en kayi. ³ Ne embiya ruen ed-insà keniyu te, ‘Meambe ke ed-ekaran niyu ke nati ne kudà?’ ne iyan niyu kehiya te, ‘Ke Kerenan dey se ebpegin-awà kayi te egkeunturan din ne mehaan dà id-ulì.’”

⁴ Arà dà ne mid-ipanew en ke deruwa ne etew. Guna su nekeuma ran ne nekita ran en ke nati ne kudà diyà te uvey te ralan ne in-iket diyà te bengawan te valey. ⁵ Ne gewii te ed-ekaran dan en ne ruen

menge etew ketà ne mid-insà kandan te, "Ebmenuwen niyu ve ayan se nati ne kudà?"⁶ Ne midtavak dan dut te ingkahi ni Hisus kandan, ne ketà ne pineipanew ran en.⁷ Ne mid-ewit dan en ini se nati ne kudà kayi te ki Hisus, ne midebpasan dan en te kumbalà dan ke nati ne kudà, ne mid-untud en si Hisus.⁸ Merakel ne menge etew ketà se midtulid te menge kumbalà dan te ebpepeveyaan ki Hisus, ne ruma pà ne mibpenguwa te menge rasang ne rawunen su intulid dan su ini ke tuus te adat te menge Hudiyanan dut te menge mepurù dan.⁹ Ke menge etew ne mid-una ki Hisus wey engketà ded dema ke midtundug kandin ne migkerag te,

"Edeyuen tew ke Eleteala!

Menu ma ke ebpeneuven te Eleteala
ini se midtendù din ne edatù te langun!

¹⁰ Menu ma ke ebpeneuven te Eleteala
ini se nekeuma ne edatù keykew
su sikandin ke insambì
dut te ratù tew si David,
ke keep-epuan tew rengan!
Edeyuen tew te Eleteala!"

¹¹ Guna su nekeuma en si Hisus kayi te Hirusalim ne mibpendiyan en sikandin te Nekebpuru ne Valey te Eleteala ne mid-usug-usug din ke langun ne diyà te lusud, ne midlihawang en. Ne geina te meapun en ne mibpendiyà sikandin te inged ne Bitaniya se midumaan dut te edumdumaan din.

*Ke Kayu ne Ed-ingaranan te Igira ne Mibpenrewakan ni Hisus
(Mateo 21:18-19)*

¹² Nepawà ketà ne mid-awà dan en te inged ne Bitanya su edlived dan maa kayi te Hirusalim, ne gewii te ini ran pà te ralan ne nevitil si Hisus.¹³ Ne ruen en nesandeng din ne merapung ne kayu ne ed-ingaranan te igira, ne mid-uvvey rin su ed-intengan din ke ruen bahas din. Guna su nekeuma sikandin diyà te levut ne warà nekita rin ne bahas su tibal rawun su kenà ma ini ke gewii te kebpemehas din.¹⁴ Ne migkahi en si Hisus ketà te kayu te, "Igenat guntaani ne kenà ke en imbe egkekeenan te bahas nu!" Ini se lalag ni Hisus ne nerineg dut te menge edumdumaan din.

Mibpenegseg ni Hisus ke menge Ebpmendahang Diyà te Nekebpuru ne Valey te Eleteala

(Mateo 21:12-17; Lucas 19:45-48; Juan 2:13-22)

¹⁵ Guna su nekeuma ran en diyà te Hirusalim ne midlusud en si Hisus ketà te Nekebpuru ne Valey te Eleteala ne mibpemenegseg din en ke menge etew ne ebpmemasa wey ke menge ebpmendehang ketà. Ne mibpemelintuad din ke menge lemisaan dut te menge etew ne ebpenambì te kureta wey ke menge ebpmeluwan dut te menge etew ne ebpmendahang te menge melepati ne ibpemelengesa rut te menge Hudiyanan diyà te Eleteala.¹⁶ Ne kenà din idluhut ne ruen ed-ewit te rehangan dan ne kayi ebpevayà te lamalama te Nekebpuru ne Valey te Eleteala.¹⁷ Ne mibpenurù din ke menge etew ketà se egkahi te, "Duen en ura impesurat ne Lalag te Eleteala ne egkahi te, 'Ini se baley ku ne ed-ingaranan te valey ne ebpengeningiyan dut te langun

ne menge etew te misan endei en.' Ugaid ne sikiyu," ke si Hisus, "ne mibaluy niyu en ini se baley ne ubpaan te menge tenlimbungén!"

¹⁸ Guna su nerineg dut te menge mepurù te terebpelengesa wey ke menge meyterù te penduan ini se mid-ulaula ni Hisus ne mibpemengà dan te ralan te kegkeimetayi ran ki Hisus su neandek dan kandin geina te merakel ne menge etew ne negeyip rut te penurù din.

¹⁹ Guna su midsanlep en ke andew ne mid-awà en si Hisus wey ke menge edumdumaan din kayi te inged ne Hirusalim.

Nehangu Ke Kayu ne Igira

(Mateo 21:20-22)

²⁰ Guna su nepawà en ne edlived dan en maa riyà te Hirusalim, ne kayi te ibayà dan ne nekita ran en ke kayu ne igira ne nehangu en taman te ralid din. ²¹ Ne netenuran ni Pedro ke midlalag ni Hisus ketà te kayu ne migkehiyan din si Hisus te, "Meyterù, tengtengi nu ma arà se kayu ne mibpendrawakan nu gevii ne nehangu en."

²² Ne migkahi si Hisus te, "Tentenuri niyu ini ne sarig kew te Eleteala.

²³ Su sevenarbenar ini se egkehiyen ku keniyu ne embiya meilut se kedsarig niyu te Eleteala te warà keduwaruwa rin, ne misan ke kenà egkegaga te menusiyà ne egkegaga niyu iring te ne misan egkehiyen niyu ini se buvungan te, 'Awà ka kayi ne riyan ka te rahat,' ne egketuman ini se egkehiyen niyu. ²⁴ Tembhù be idtarem ku keniyu te embiya ruen ebpemuyuen niyu te Eleteala, ne eheta niyu ke hinawa niyu te warà keduwaruwa rin ne egketelimà niyu ini. ²⁵ Ne embiya ebpengeningeni kew riyà te Eleteala ugaid ne ruen meraat ne neketahù te hinawa niyu mekeatag te ruma niyu, ne pesehara niyu sikandin su apey egkepesehad kew rema te Eleteala ke Amey niyu riyà te langit. [²⁶ Su embiya kenà niyu egkepesehad ke ruma niyu, ne kenà kew rema egkepesehad dut te Amey niyu ne Eleteala riyà te langit.]"

Mid-insaan si Hisus Mekeatag te Kewagib Din Dut te Mibpenegseg din ke menge Ebpemendahang Diyà te Nekebpuru ne Baley te Eleteala

(Mateo 21:23-27; Lucas 20:1-8)

²⁷ Guna su nekeuma ran en maa diyà te Hirusalim, ne midlived en maa si Hisus ketà te Nekebpuru ne Valey te Eleteala. Gewii rin te ed-ip-ipanew kayi te lusud ne ruen menge mepurù te terebpelengesa, menge meyterù te penduan, wey menge egkeunutan te Hudianen ne mid-uvey kandin. ²⁸ Ne mid-insaan dan si Hisus te, "Ini se mid-ulaula nu kayi te nekebpuru ne valey te Eleteala, ne engkey se kewagib nu te ed-ulaula te iring kayi? Ne engkey se mibehey keykew te kewagib?"

²⁹ Midtavak si Hisus te, "Ruen dema id-insà ku keniyu ne embiya egketavak niyu ne idtarem ku keniyu ke engkey se mibehey kedi te kewagib kayi te mid-ulaula ku. ³⁰ Engkey ke mibehey ki Juan ke Ebpembunyag te kewagib te ebunyag, diyà be te Eleteala etawa kayi rà dè duen te menusiyà? Kehiya niyu kediey."

³¹ Ne mibpein-inseey ran en te, "Engkey se idtavak tew? Su egkehiyen embiya iyan tew se, 'Riyà ebpuun te Eleteala,' ne ed-insà maa sikandin te, 'Meambe ke warà kew mebperetiyyaya ki Juan?' ³² Ugaid ne embiya egkahi ki te, 'Kayi red ebpuun te menusiyà,' ne egkeepesan kiyu te menge etew." (Ini se impein-inseey ran su nengeandek dan dut te menge etew su langun ne mibperetiyyaya te

si Juan ne mibpelambas te Lalag te Eleteala.) ³³ Ketà be ne midtavak dan ki Hisus te, “Kenà dey egketuenan.”

Ne migkahi si Hisus kandan te, “Embiya iring ketà, na kenà ku rema egkehiyen ke engkey se mibehey kedi te kewagib ku te ed-ulaula kayi.”

12

*Ke Sempità ni Hisus Mekeatag te Etew ne Pinekamal te Pemulaan
(Mateo 21:33-46; Lucas 20:9-19)*

¹ Ne mibpenurù din en sikandin te impepevayà te sempità, ke sikandin te, “Ruen senge etew ne ruen tanà din ne mibpemulaan din te wahed ne ed-ingaranan te paras. Ne mid-alad din arà, ne mibaal din te edtehuan dut te egkekeres te bahas te paras, ne midsebungan din te ebpeubpaan dut te ebpeventayen din. Ne ruen pinekamal din dut te impemula rin, ne arà pa ne mid-ipanew en se ebpendediyà te meriyù ne inged. ² Guna su midsabpet en ke pinemula rin ne ruen senge etew ne edsugsuhuen din ne midsuhù din su ibpekuwa ke kandin ne umun. ³ Ugaid ne nekeuma ini se midsuhù din, ne migeweran dut te pinekamal ne mibedasan dan ne impeulì dan te warè en iya imbehey kandin. ⁴ Ne misan iring ketà, ne midsuhù en maa se senge etew. Ugaid ne nekeuma ini ne mibedasan ded maa ke ulu rin dut te pinekamal, ne pinegkeyà dan. ⁵ Nekita maa kayi te kemuney ini, ne midsuhù pà lavew te senge etew. Nekeuma maa ini, ne mid-imetayan dan. Ne iring din ded dema se imped-ulaula ran dut te ruma pà ne midsuhù su ruen en se mibpenruug, ne ruen se mid-imetayan dan.

⁶ “Guna su iyan dè be nesamà ke tuney en ne anak din ne igkelimù din neverar, ne iyan din en midsuhù diyà te kandan su iyan netahù te itungan din ne ke sikandin te, ‘Kenà en be iya maa egkepakey ne kenà dan ini ed-edatan.’

⁷ “Ugaid ne guna su nekeuma ini se anak din ne mibpeglelahey ke menge pinekamal din te, ‘Ini en bes ke anak dut te kemuney kayi te tanà. Kuwa kew en su ed-imetayan tew su apey sikitew en se ebpekegkemuney kayi te tanà.’ ⁸ Arà dà ne migeweran dan en sikandin ne mid-imetayan dan en, ne intimbag dan ke bangkey rin diyà te luwal dut te pemulaan.

⁹ “Na geina te iring kayi,” ke si Hisus, “se mid-ulaula rut te pinekamal dut te pemulaan, engkey ve se ed-ul-ulaan dut te kemuney ketà te pinekamal din? Idtarem ku keniyu te ebayaan din arà se menge etew ne ebpengimetayan din, ne ebpelemalan din te ruma pà ne menge etew.” ¹⁰ Ne migkahi pà maa si Hisus te, “Nevasa niyu red ura ke impesurat ne Lalag te Eleteala ne egkahi te,

‘Ke pelaus ne mid-eng-engkeran
dut te menge etew ne ebpemevaley,
su kunaan dan ke warà rantek din
ne iyan en iya ini
nepemilì ne segkad te valey.

¹¹ Ini se mid-ulaula te Kerenan
ne mekegeyip neverar!” ”

¹² Ne edsikmenen en perem si Hisus dut te menge egkeunutan te menge Hudiyenan su netuenan dan te sikandin ke nesuhat ketà te sempità din. Ugaid ne neandek dan dut te merakel ne etew ne egkiyug ne

ebpemineg ki Hisus, ne arà dà ne mid-ewaan dan en sikandin ne mid-ipanew ran en.

Edlitahen perem si Hisus te menge Paresiyu kayi te ked-insà dan Mekeatag te Kebayad te Buwis

(Mateo 22:15-22; Lucas 20:20-26)

¹³ Guna su mid-awà en ke menge egkeunuten te menge Hudiyenan, ne ruen en maa ruma pà ne menge Peresiyu wey menge etew ni Hirudis ne midsuhù dan te ebaal te menge penginsà su apey ruen dalan ne idlitag dan ki Hisus. ¹⁴ Guna su nekeuma ran ne migkahi ran en te, “Meyterù, netuenan dey te edlalag ka te benar ne kenà ka egkepeneheewit dut te lalag te menge etew. Su misan ke mepurù mevavà ne menge etew ne warà ebiraan te keppenurù nu, ugaid ne ebpenurù ka te benar dut te kiyug te Eleteala ne ed-ul-ulaan tew. Tembù be ruen. Ed-insà dey keykew. Maa, ebpekerimpas kiyu ve dut te penduan tew embiya ebayad ki te buwis diyà te ratù tew te inged ne Ruma, etawa kenà? Engkey, ebayad ki etawa kenà?”

¹⁵ Ugaid ne netuenan en ni Hisus se ebpemengaan den dà se ralan te igkeisuhat dan kandin ne ke sikandin te, “Meambe ke ebaal kew te ralan te kegkelitag niyu kediey? Peintenga a niyu kun te pelatà.”

¹⁶ Impekita ran kandin ke pelatà ne migkahi sikandin te, “Engkey ki paras wey ngaran kayi?”

Midtavak dan te, “Paras wey ngaran dut te ratù tew kayi te inged ne Ruma.”

¹⁷ “Embiya iring ketà,” ke si Hisus, “ne ivehey niyu diyà te datù ayan se bayad te buwis ne kandin, ne ivehey niyu riyà te Eleteala ke endei rema ke kandin.”

Ne ingkeinuin ran nevenar ini se migkahi ni Hisus.

Mid-insà ke Menge Sedyusiyu ki Hisus Mekeatag te Kegkevanew te Menge Minatey

(Mateo 22:23-33; Lucas 20:27-40)

¹⁸ Ne ruen dema menge etew ne ed-ingaranan te Sedyusiyu ne mibpendiyà te ki Hisus. (Ini se menge Sedyusiyu ke menge etew ne warà mebperetiyyaya te egkevanew pà te Eleteala ke menge minatey.)

¹⁹ Ke sikandan te, “Meyterù, ruen penduan ne insurat ni Moises dengan ne egkahi te, ‘Embiya ruen meama ne ebpatey ne neketahak te esawa rin ugaid ne warà anak dan, ne ebpmeluwen dut te suled din ne meama su apey ruen ded anak dut te minatey ne ebpekesumpat.’

²⁰ Su ruen dengan,” ke sikandan, “pitu ne meama ne telteleari ne mid-esawa en ke kakey, ugaid ne minatey te warà dan med-anak. ²¹ Ne mibpemalu en dut te nesikupu rin arà se ipag dan, ne minatey red dema te warà dan med-anak. Ne iring din ded dema ke iketelu. ²² Ne engketà ded ke nesamà, langun dan te pitu ne etew se nekepemalu ketà te ipag dan, ugaid ne warà dan med-anak. Netaman ne minatey en ini se meritan. ²³ Ne ini ve se id-insà dey keykew,” ke se menge Sedyusiyu, “embiya benar ne egkevanew red te Eleteala ke menge minatey keuremà, ne endei rapit kandan se tehiesawa ketà te meritan? Su langun dan te pitu ne telteleari ne nekettundug se nekeesawa kandin.”

²⁴ Midtavak si Hisus te, “Warà en iya ebpekesuhat ne itungan niyu! Su warà niyu mesebuti ke impesurat ne Lalag te Eleteala, ne warà

niyu mesebuti ke rekèlè ne gehem din. ²⁵ Su ketà te hewii ne egkevanew ke menge minatey ne warè en kebpees-eseweey su iyan dan en egkeiringan ke menge suluhuen te Eleteala riyà te langit ne kenà ebpees-eseweey. ²⁶ Ne ini se id-insà niyu mekeatag te kegkevanew te menge minatey, ne maa warà niyu ves mevasa ke impesurat ne lalag ni Moises dengan mekeatag te kinepekidlag te Eleteala kandin ne riyà ebpuun te neregreg ne sagbet? Su misan neuhet en ne minatey en si Abraham, si Isaac, wey si Jacob ne migkahi ke Eleteala ki Moises te, ‘Siaken ke Eleteala ne ebpengerapan ni Abraham, ni Isaac, wey si Jacob,’ ke se Eleteala. ²⁷ Tembù be netuenan tew,” ke si Hisus, “ne misan minatey ran en, ne viviyag den pà diyà te etuvangan te Eleteala su iyan dà ebpekepengarap te Eleteala ne viviyag, kenà ke minatey. Warè bulug ebpekesuhat ne itungan niyu!”

*Duen Meyterù te Penduan ne Edlitag Perem ki Hisus kayi te insà din ke Engkey se Ebpekeuna ne Penduan
(Mateo 22:34-40; Lucas 10:25-28)*

²⁸ Ruen ketà meyterù te penduan ne ebpemineg te lalag ni Hisus dut te menge Sedyusiyu. Guna su netuenan din te metau nevenar ne ebpenavak si Hisus dut te menge Sedyusiyu ne midubpù en sikandin ne mid-inseen te, “Engkey ma rut te penduan tew se ebpekeuna te langun?”

²⁹ Ne midtavak ni Hisus te, “Ini ke ebpekeuna te langun: ‘Sikiyu ne inenakan ni Israyil ne pemineha niyu ini! Ke Kerenan ne Eleteala tew ne iyan dà iya Kerenan! ³⁰ Iamin nu ke hinawa nu te edlimù te Kerenan ne Eleteala nu, ne iamin nu ke baher nu wey ke itungan nu te ed-ulaula ke engkey se ebpekesuhat te hinawa rin.’ ³¹ Ne ini ke ikeruwa ne pinekemepurù dut te langun: ‘Ikelimù nu ke ruma nu iring te kegkelimù nu te hinawa nu.’ Warà en be,” ke si Hisus, “ruma pà ne penduan ne pinekemepurù pà kayi te ini se deruwa.”

³² “Benar arà, Meyterù, se migkahi nu,” ke se meyterù te penduan, “su sebseveka rà ke Eleteala, ne warè en duma. ³³ Ne ini se lalag nu ne id-amin ta ke hinawa ta te edlimù te Eleteala, ne iyan ta ibpeuna sikandin te itungan ta wey rut te langun ne ed-ul-ulaan ta, ne igkelimù ta ke ruma ta iring dut te kegkelimù ta kayi te keytew ne hinawa,” ke se meyterù, “ne iyan pà ini meupiya ne edtumanen ta tumin dè be rut te langun ne binatang ne edtutungen wey ruma pà ne ibpelengesa ne ibhehey tew te Eleteala.”

³⁴ Guna su nerineg ni Hisus te neketidtu ke tavak din ne migkahi en sikandin te, “Benar imbe ayan, deisek dà ne ebpekelusud ka rut te Edetuan te Eleteala.” Ne igenat dè be ketà ne warà en ebpeketicà ne ed-insà ki Hisus.

Impesabut ni Hisus te Sikandin Ke Impasad te Eleteala ne Ebperetuen te Langun

(Mateo 22:41-46; Lucas 20:41-44)

³⁵ Gewii te ebpenurù si Hisus ketà te Nekebpuru ne Valey te Eleteala ne mid-insaan din sikandin te, “Menu ne egkahi ke menge meyterù niyu te arà se Impasad te Eleteala ne Ebperetuen dut te langun ne etew ne inenakan sikandin ni Davíd? ³⁶ Su mid-ulinan te Kedesenan ne Ebpetuntul te Menusiyà si David ne impesurat din te, ‘Migkahi ke Eleteala ketà te Kerenan ku te:

Kayi ka pinuu te rapit te egkekewanen ku taman te ebpenggiekan ku ke menge kunterà nu.”

³⁷ Ne migkahi pà maa si Hisus te, “Embiya ini ke nekah ni David te arà se Impasad te Eleteala ne Ebperetuen te langun ne Kerenan din, ne maa egkepakey ve ne kayi red ini te inenakan din?”

Ne ketà ne nengesuatsuat ke merakel ne menge etew ne ebpemineg dut te kebpenuurù ni Hisus.

Duen Imbaag ni Hisus Mekeatag te Ed-ul-ulaan te Menge Meyterù te Penduan
(Mateo 23:1-36; Lucas 20:45-47)

³⁸ Gewii ni Hisus te ebpenurù kandan ne migkahi te, “Uram kew su apey kenà kew egkepeneheewit dut te menge meyterù te penduan ne ebpengip-ipanew se ebevelegkas te lembung ne sida ne melayat su ebpeadat te menge etew diyà te menge pedian. ³⁹ Ne embiya riyà dan en te valey ne ebpengedian te penduan te menge Hudiyanan ne ebpemilì dan te meupiya ne ebpnuuwan diyà te sineruwan, etawa ke edtelavuk dan te kevurunan ne riyà dan ebpnuu te insivey ne meupiya ne ebpnuuwan te egkeedatan. ⁴⁰ Ne ebpeey-eyunan dan ke menge kearen dut te menge valu ne meritan, ne ebpeedleyedley ran te kebpengeningeni ran diyà te Eleteala su uvag kun se rekelà se sarig dan te Eleteala. Ugaid ne keuremà ne labi pà ne mekeandek-andek ke ibadas ne kerusaan kandan te Eleteala!”

Ke Imbehey te Valu ne Meritan Diyà te Eleteala
(Lucas 21:1-4)

⁴¹ Senge hewii ne riyà si Hisus te Nekebpuru ne Valey te Eleteala, ne mibpinuu sikandin diyà te uvey te edtegtuhan te kureta ne midtengtengan din ke menge etew ne ed-ulug dut te ibehey ran te Eleteala. Duen ketà menge kewasa ne rekelà se imbehey ran. ⁴² Ugaid ne ruen nekeuma ketà ne valu ne meritan ne ayuayu nevenar, ne iyan din dà neulug se deruwa ne tumba.

⁴³ Arà dà ne impeuvev en ni Hisus ke menge edumdumaan din ne migkahi en te, “Benar ini se egkehiyen ku keniyu ne riyà te etuvangan te Eleteala ne iyan pà rekelà se imbehey kayi te ini se valu ne meritan dut te langun ne imbehey te menge kewasa. ⁴⁴ Su ke ruma ne menge etew ne iyan dan imbehey ne sawad dà dut te kekewesai ran, ugaid ne ini se ayuayu ne valu ne imbehey rin te Eleteala ke namànamà ne kureta rin ne edserihan te hinawa rin.”

13

Migkahi ni Hisus ke Kegkerundus Dut te Nekebpuru ne Valey te Eleteala Diyà te Hirusalim

(Mateo 24:1-2; Lucas 21:5-6)

¹ Guna su mid-awà en si Hisus ketà te Nekebpuru ne Valey te Eleteala ne ruen seveka ne edumdumaan din ne migkahi te, “Meyterù, tengtengi nu ma ini se menge vatu ne derekelà ne pengawid kayi, ne kebperasan nevenar ke kineveeli!”

² Ne midtavak si Hisus te, “Uya, intengi nu ma ini se rekelà ne valey ne iyan din pengawid ne vatu! Su ruen gewii ne egkeuma ne ini se

egkekita niyu ne egkerundus ne warà misan seveka rà ne vatu ne egkesamà su egkevurahey langun."

Migkahi ni Hisus ke Keresayan wey Kebpekesakit ne Ebpekeuma Kayi te Menge Etew
(Mateo 24:3-14; Lucas 21:7-19)

³ Guna su riyan dan en te buvungan ne ed-ingaranan te Ulivuwan ne mibpinuu si Hisus ne egkesineruwan din ke Nekebpuru ne Valey te Eleteala. Ne mid-vey kandin si Pedro, si Santiago, si Juan, wey si Andres te sikandan dà se egkahi te, ⁴ "Ikahi nu kenami ke keenuegketuman ini se langun ne migkahi nu ne kegkerundus dut te Nekebpuru ne Valey te Eleteala, ne engkey se idtuus dey su apey rey egketueni te neuma en ke hewii te kegketuman din."

⁵ Ne migkahi si Hisus kandan te, "Uram kew su apey kenà kew meekali dut te menge etew ne metau ne edliyuk. ⁶ Su merakel se edlepew ne engkunkun te siaken en ne egkahi ran te, 'Siaken en ini ke Impasad te Eleteala ne Ebperetuen te langun ne menge etew!' Ne ketà," ke si Hisus, "ne merakel ne menge etew se ebpekeperetiyyaya te tarù dan. ⁷ Ne embiya egkerineg niyu se ebpevunbunuey riyà te meriyù merani ne kenà kew meandek. Su ini pà iya se egkeuna ne egked-ulaula, ugaid ne warà pà meuma ke hewii te kebpupusa kayi te dunya. ⁸ Su ebpmemekebunuey pà ke idsenge inged, ne engketà ded dema ke idsenge retuan. Ne edlinug te mevaher te piya endei en, ne egetab se bitil. Ugaid ne rudsuan dà ini dut te keresayan ne egeramen niyu, iring dut te belilit te meritan ne ed-anak.

⁹ "Ne sikiyu, ne ingat kew nevenar su ebpenigkemen kew te menge etew ne ibpepemenayik kew riyà te valey te kukuman. Ne ebpenruuhen kew riyà te valey ne ebpengedian te penduan te menge Hudiyanan, ne ebeneheewiten kew riyà te menge egkeunutan wey harì te inged su atag dut te kedsarig niyu kediey, ugaid ne ini en imbe ke ralan te kebpekesabut niyu kandan dut te Meupiya ne Tuditul mekeatag kediey. ¹⁰ Su iyan pà ibpeuna ibpesabut ini se Meupiya ne Tuditul dut te langun ne menge etew kayi te ampew te dunya te kenà pà egkeuma ke hewii te kebpupusa kayi te dunya. ¹¹ Ne ketà te edsikmen kew ne ebeneheewiten kew riyà te kukuman, ne kenà kew meuru ke ebmemenuwen niyu se kedlalag niyu te keditindeg te hinawa niyu su ketà ne iyan niyu rà egkekahi ne lalag ne ibpekahen niyu su riyà ebpuun te Kedesenan ne Ebpetuntul te Menusiyà ne kenà kayi rà ebpuun te itungan niyu rà dè duen.

¹² "Su ketà ne hewii ne ruen menge etew ne misan ke temperà dan te pused ne ed-uluhen dan su ebpeimetayan, ne iring din ded dema ke ed-ul-ulaan te amey dut te menge anak dan. Ne ruen menge anak ne ebpekid-atu te menge lukes dan su ebpeimetayan dan. ¹³ Ne egkeepesan kew dut te langun ne menge etew su atag te keduma niyu kediey. Ugaid ke etew ne misan egkerasey sikandin ne kenà edsuwey dut te keduma rin kediey taman te ini pà sikandin te ampew te dunya, ne ebpekehaked te umur ne kenà edtaman."

Imbaag ni Hisus Mekeatag te Kebpekeuma dut te Ebpekekaid ne Ebpekelusud Diyà te Nekebpuru ne Valey te Eleteala su Edsevuen Din ke Ed-edaten

(*Mateo 24:15-28; Lucas 21:20-24*)

¹⁴ Ne embiya egkekita niyu en ini se “Ebpekekaid ne Kunterà ku” diyà te lusud te Nekebpuru ne Valey te Eleteala ke warà iluhut kandin, ne sikiyu riyà te pruvinsiya te Hudiya ne pelahuy kew riyà te buvungan. (Sikiyu ke ebpekevasa kayi ne pegpegitunga niyu ke meana rin ini.)

¹⁵ Ne ke etew ne riyà te ruwangen te valey rin ne kenà din en lilingaya ke keleglahan din su mebpelahuy en sikandin. ¹⁶ Ne ke etew ne riyà te pengengewiren din, ne kenà en med-ulì se egkuwa te kumbalà din.

¹⁷ Ne egkeyruwan ke menge meritan ne mehingey te arà ne hewii wey ke menge meritan ne edseruru. ¹⁸ Ipengeningeni niyu te Eleteala te kenà ini med-ulaula te hewii te kedrengreng. ¹⁹ Su ini se kemeresayan ne ebpekeuma ne warà repeng din igenat dut te aney en limbaha te Eleteala ini se dunya, ne kenà en egkerepengan te misan keenu.

²⁰ Ugaid ne sabap dut te raat te nanam te Eleteala ne migkurangan din en ke menge hewii rut te kemeresayan su embiya warà, ne warà en egkesamà ne biviyag. Uya, su geina te rekelà ke limù din dut te menge etew ne mibpemili din, ne migkurangan din ke menge hewii rut te kemeresayan.

²¹ “Su ketà ne hewii embiya ruen egkahi keniyu te, ‘Ini en ke Impasad te Eleteala ne Ebperetuen din te langun ne menge etew!’ etawa ruen egkahi te, ‘Ayan en sikandin!’ ne kenà kew peretiyyaya su apey kenà kew egkelimbungi. ²² Su ruen ebpenlepew ne menge etew ne engkunkun te sikandan ke Impasad te Eleteala ne Ebperetuen etawa sikandan ke ebpelambas te Lalag te Eleteala. Ne ebpekita dan te mekegeyip ne ed-ul-ulaan su apey ran perem meekali ayan se menge etew ne mibpemili te Eleteala. ²³ Tembù be idtarem ku ini,” ke si Hisus, “su apey niyu meingati te kenà pà ini egked-ulaula.”

Tuus te Mehaan en ke Kedlived Dut te Impeanak te Menusiyà kayi te Ampew te Dunya

(*Mateo 24:29-31; Lucas 21:25-28*)

²⁴ “Ne ebpeketundug be ketà te egkeipus ke hewii te kemeresayan,” ke si Hisus,

“Ne ebmerusirem ke andew,
ne kenà en edsilà ke vulan,

²⁵ ne ebpengeulug ke menge bituen diyà te langit,
ne egkeparin dut te netehuan dan ke edtenuran ne menge bituen.”

²⁶ “Né ketà be ne egkekita niyu se kedlived dut te Impeanak te Menusiyà, ne egkerumaan te sehulapun, ne egkekita niyu ke gehem din wey raman din ne ed-anlag. ²⁷ Ne edsuhuen din diyà te epat ne pediyulu kayi te dunya ini se menge suluhuen din su apey ran egkevurun ke langun ne menge etew ne mibpemili te Eleteala igenat te pehiliran taman te binunsuran.”

Ke Sempità ni Hisus Mekeatag te Kayu ne Igira Ne In-upama Rin te Tuus te Mehaan en ke Kedlived Dut te Impeanak te Menusiyà

(*Mateo 24:32-35; Lucas 21:29-33*)

²⁸ “Kenian niyu rè ma te kayu ne Igira,” ke si Hisus, “su ruen ibpenurù din keyta. Embiya nekpasad en te edrewrew ne ed-umbus

en wey ebpeneringsing, ne tuus te ed-andew en. ²⁹ Ne iring din ded dema embiya egkekita niyu en se netuman en ke langun ne tuus ne impenurù ku keniyu, ne egketuenan niyu te mehaan en se kedlived dut te Impeanak te Menusiyà. ³⁰Tentenuri niyu ini se egkehiyen ku keniyu, su ruen pà kayi te keniyu guntaani ebpekesaut pà ketà te kegketuman din ini. ³¹ Su egkeawà ini se langit wey tanà, ugaid ne ini se migkahi ku ne kenà bulug ebperis.”

*Warà Metueni ke Hewii Etawa Endei Egketahù ke Andew te Kedlived Dut te Impeanak te Menusiyà Kayi te Danya
(Mateo 24:36-44)*

³² “Ugaid ne ini se idtarem ku keniyu,” ke si Hisus, “warà netau te hewii etawa endei egketahù ke andew ke edlived kayi ke Impeanak te Menusiyà su ke Amey ku rà ne Eleteala. Misan ke suluhuen te Eleteala diyà te langit wey misan dema siaken ke Anak te Eleteala ne warà netau ke keenu se kedlived din. ³³ Uram kew ve ne penehana kew en, su warà niyu metueni ke hewii ne egkeuma ini. ³⁴ Su ini se hewii te kedlived din kayi ne iyan ta ed-upamaan ne etew ne mid-ipanew riyà te meriyù ne inged ne warà din kehiya ke keenu ed-ulì. Ne ruen sugsuhuen din ne pinetuganur din te valey rin te warà pà migenat, ne ruen helevrek ne imbehey rin te uman seveka. Ne migkehiyan din ke tumetameng te eheran te mebpekevantey neveran.

³⁵ “Ne sikiyu,” ke si Hisus “ne iring kew rut te tumetameng te eheran ne pekevantey kew su warà niyu metueni ke hewii te edlived din ini se kemuney te baley, ke embiya meapun be, ke edluuk be se kerukileman, ke ebpengelet en be ke manuk, etawa ve ke edsilà en ke andew. ³⁶ Tembù be uram kew, su embiya ebpeketekew ebpekeuma sikandin ne iyan din kemeyidan ne kenà kew nikandin egkeumaan se edlipereng. ³⁷ Ini se egkehiyen ku keniyu ne igkahi ku red dema diyà te langun ne menge etew te mebpekevantey ran te kedlived ku kayi.”

14

*Mibentaan ke Menge Mepurù te Terebpelengesa wey ke menge Meyterù te Penduan te Kedsigkem ki Hisus su Ebpeimetayan
(Mateo 26:1-5; Lucas 22:1-2; Juan 11:45-53)*

¹ Deruwa pà ne hewii ne egkeuma ke kevurunan ne edtenuran tew ne ed-ingaranan te Pista te Kedsehari te Suluhuen dut te menge apù tew rengan wey ke Pista te Kegkaan dan te Pan ne Warà Idsawug ne Ibpelevag. Ne ebpemengà ke menge mepurù te terebpelengesa wey ke menge meyterù te penduan te ralan te kedsigkem dan ki Hisus te kenà egketuenan dut te menge etew apey ebpeimetayan dan en. ² Ne mibpelelahey ran te, “Kenà ta ini ed-ul-ulaan dut te kevurunan te pista su kema ke egkekita rut te menge etew ne egkeepes dan keytew ne egkehuvut en ketà.”

*Mibperiyemutan en Neraan Ke Lawa ni Hisus te Kedleveng Kandin
(Mateo 26:6-13; Juan 12:1-8)*

³ Guna su riyà si Hisus te inged ne Bitanya ne riyà sikandin te valey ni Simon, senge etew ini ne kevuwaen muna pà te it-it ne neulian. Gewii te egkaan si Hisus ne nekeuma en ini se meritan ne mid-ewit te pelenaan ne mibeelan te elibastru, ne midtehuan te periyemut ne

mepurù nevenar su mibeealan dut te lunsey ne Nardu. Ne mid-uvéy en kandin, ne imbusbus din en ke periyemut kayi te ulu ni Hisus.

⁴ Ne ruen menge etew ketà ne neepes ne mibpelelahey ran te, "Babeba! Meambe ke midereetan din dà ini se periyemut? ⁵ Iyan tumù ne indahang din ini ne igkepemehey pà diyà te menge ayuayu su labi tetelu nehatus ne pirak se elehà din!" ke sikandan. Ne nesewayan dan ini se meritan.

⁶ Ugaid ne migkahi si Hisus te, "Pedteraya niyu sikandin! Meambe ke edsewayan niyu sikandin? Su meupiya nevenar ini se mid-ulaula rin kediey! ⁷ Su ke menge ayuayu ne lelayun kew red ebpermekeduma ne egketevangan niyu sikandan, ugaid ne siaken ne kenà ad meuhet kayi te keniyu. ⁸ Su ini se meritan," ke si Hisus, "ne mid-ulaula rin en ke taman ne egkegaga rin, su mibperiyemutan din en ke lawa ku te kebpenehana te kedleveng kediey. ⁹ Sevenarbenar ini se egkehiyen ku keniyu," ke si Hisus, "te misan endei kayi te ampew te dunya ibpesabut ini se Meupiya ne Tudtul mekeatag kediey, ne egkepenudtul ded dema ini se mid-ulaula rin kediey ne kenà egkelipatan."

Mibpendiyà si Hudas Iskeriyuti te Menge Mepurù te Terebpelengesa su Ebpekidsabut ke Ebmemenuwen Din te Ed-ulug si Hisus

(Mateo 26:14-16; Lucas 22:3-6)

¹⁰ Ne ketà ne si Hudas Iskeriyuti, seveka rut te sepulù wey deruwa ne edumdumaan ni Hisus, ne mibpendiyà te menge mepurù te terebpelengesa su igkahi rin kandan te egkeulug en si Hisus diyà te kandan. ¹¹ Guna su nerineg dan ne nengesuatsuat dan nevenar, ne impasad dan kandin te ebehayan te pirak. In-awà dè be ketà ne ebpermengaen en ni Hudas ke ralan te kegkeulug din ki Hisus su apey mesikem dan en.

Mibpekidseveka te Egkaan si Hisus dut te Menge Edumdumaan Din te Kedlavung te Pista te kedtenuri ran te Kedsehari te Suluhuen te Menge Apù dan

(Mateo 26:17-25; Lucas 22:7-13, 21-23; Juan 13:21-30)

¹² Ne ketà te egkeuma ne hewii te Pista te menge Hudiyanan te kegkaan dan te Pan ne Warà Insawug ne Ibpelevag, ne edsusumbali dan te nati te bilibili ne egkeenen dan te kedtenuri ran dut te hewii rengan te Kedsehari te Suluhuen dut te menge Apù dan. Ne mid-insaan si Hisus dut te menge edumdumaan din te, "Endei rey ve ini ebpegetura se idlavung tew te Pista te Kedsehari te Suluhuen?"

¹³ Ne ketà ne midsuhù ni Hisus se deruwa rut te menge edumdumaan din se egkahi te, "Una kew en be riyà te inged ne ruen ne edsinuhung keniyu ne meama ne ed-utuk te kelalew ne ruen wayig din. ¹⁴ Tundug kew en be kandin, ne embiya ebpekeuma kew riyà te ed-ubpaan din ne kehiyi niyu ve ke kemuney te valey te, 'Ibpeinsà dut te meyterù tew te, Endei ne ruhu ke edlevungan ku wey ke menge edumdumaan ku dut te Pista te Kedsehari te Suluhuen?' ¹⁵ Ne ketà ne ibpekita rin keniyu ke meluag ne ruhu diyà te ikeruwa ne pangkat ne saag ne nepegediran en, ne ketà kew be pegatur te idlavung tew."

¹⁶ Arà dà se nerineg dan ne mid-ipanew en ini se deruwa ne edumdumaan ni Hisus se ebpendiyà te inged, ne langun dut te ingkahi

kandan ni Hisus ne arè en iya rema se nekita ran. Ne ketà dan en mibpegatur te idlavung dan te Pista te Kedsehari te Suluhuen.

¹⁷ Guna su merukilem en ne nekeuma en si Hisus wey ke sepulù wey deruwa ne menge edumdumaan din ketà te valey. ¹⁸ Ne gewii ran te egkaan ne migkahi si Hisus te, “Benar ini se egkehiyen ku keniyu, ruen senge etew kayi te keniyu se ed-ulug kediey su apey a meimetayi.”

¹⁹ Guna su nerineg dut te menge edumdumaan din ini, ne mibmerungkug dan ne uman senge etew ne mid-insà te, “Entei, kenà ma siaken?”

²⁰ Midtavak si Hisus te, “Senge etew keniyu rut te sepulù wey deruwa ne ebpekitduhen te edeluwit te pan din kayi ke ed-ulug kediey.

²¹ Su egkeimetayan ke Impeanak te Menusiyà iring dut te nekahiey impesurat ne Lalag te Eleteala rengan, ugaid ne meraat nevenar se egketemanaan din ini se etew ne ed-ulug kandin su iyan pà tumù ne warà sikandin ianak.”

Ke Ketepusan ne Kinelavung te Kerenan Tew Wey Ke Edumdumaan Din

(Mateo 26:26-30; Lucas 22:14-20; 1 Kurintu 11:23-25)

²² Gewii te egkaan dan ne migkuwa ni Hisus ini se egkeenen dan ne pan ne impeselamat din te Eleteala, ne mibpenevitevì din ne imbehey rin diyà te menge edumdumaan din se egkahi te, “Kua niyu ini, su ini ke lawa ku.”

²³ Ne ketà ne migkuwa ni Hisus ke ed-inumen ne impeselamat din te Eleteala ne imbehey rin kandan, ne langun dan ne mid-inum ketà. ²⁴ “Ini ke lengesa ku,” ke si Hisus, “ne ebpeketudà ne ibavas te menge etew, su tuus ini te egketuman en ke impasad te Eleteala rengan te ebpekepelihaun en ke menge etew dut te keberedusaan dan. ²⁵ Benar ini se egkehiyen ku keniyu te kenà ad maa ed-inum kayi te ed-inumen ini taman te kenà egkeuma ke hewii keuremà te kedatu te Eleteala ne egkevehu en ke ed-inumen tew.”

²⁶ Arà dà ne mideyù dan ke Eleteala te kanta ran ne midlihawang dan en ne riyà dan en mebpesinaru te buvungan ne ed-ingaranan te Ulivuwen.

Impayag neraan ni Hisus ke Kebparew ni Pedro te Teleduma Ran
(Mateo 26:31-35; Lucas 22:31-34; Juan 13:36-38)

²⁷ Ne migkahi pà maa si Hisus dut te edumdumaan din te, “Langun niyu ne ebpelahuy ne edtehaken a niyu su ruen Lalag te Eleteala ne impesurat din ne egkahi te,

‘Ebpeimetayan ku ke tumetuganur

dut te menge bilibili,

ne egerunsuwey ke menge bilibili rin.’

²⁸ Ugaid,” ke si Hisus, “embiya egkevanew ad, ne ed-una ad keniyu riyà te inged ne Geliliya.”

²⁹ Ne migkahi si Pedro te, “Misan edtehaken ka rut te langun dan, ne siaken ne kenà!”

³⁰ Ugaid ne migkehiyan sikandin ni Hisus te, “Tentenuri nu ini te kenà pà ed-ukarà ke manuk te kereruwa te ini en ne kerukileman, ne ketetelu nu en ibparew te kenà a nu ruma.”

³¹ Ugaid ne warà mebpehimbenar si Pedro se egkahi te, “Kenà a ebpekekahi te iring ketà te kenà ki teleduma misan ebpekeunung a

keykew te ed-imetayan.” Ne iring ded dema ketà ke migkahi rut te menge ruma rin.

*Mibpengeningeni si Hisus diyà te Gitsimani
(Mateo 26:36-46; Lucas 22:39-46)*

³² Nekeuma ran en diyà te inged ne ed-ingaranan te Gitsimani ne migkehiyan ni Hisus ke menge edumdumaan din te, “Pinuu kew rè be kayi gewii ku te ebpengeningeni.” ³³ Ne miduma rin si Pedro ki Santiago wey ki Juan diyà te unaan. Ne nemutu nevenar sikandin wey nerurunù ke hinawa rin. ³⁴ Ne migkahi sikandin kandan te, “Merasey nevenar ini se hinawa ku su iring te egkevidtew en. Kayi kew rè be ne kenà kew lipereng kediey.”

³⁵ Ne midlaus pà sikandin diyà te unaan dan ne midlangkeb en se ebpengeningeni te Eleteala te embiya egkepakey rà ne kenà ibpepevayà kandin ini se kemeresayan. ³⁶ Ne ini se migkahi rin te kebpengeningeni rin, “Amà, su sikew se Amey ku, netuenan ku te egkegaga nu ke langun! Ne embiya egkiyug ke rà ne iawà nu ini se keresayan ku, ugaid ne misan iring en ketà se kiyug ku ne iyan nu tumana ke keykew ne kiyug.”

³⁷ Neiseg-iseg ketà ne midliveran din ke tetelu ne etew ne edumduaan din ne iyan din neumaan se nekelipereng dan. Ne migkehiyan din en si Pedro te, “Simon, maa nekelipereng ke ves? Maa, kenà ka ebpeketigker misan mehaan dà? ³⁸ Kenà kew edlipereng, ugaid ne pengeningeni kew,” ke si Hisus, “su apey kenà kew ebpekeruma kayi te ebpenggeram keniyu. Su mevaher perem ke hinawa niyu te edtuman te lalag ku, ugaid ne midtaman dè be te kenà eduma ke lawa niyu.”

³⁹ Ne mid-awà en maa si Hisus se ebpengeningeni te iring ded ketà te neuna ne pengeningeni rin. ⁴⁰ Ne ketà ne midlived maa sikandin kayi te tetelu ne edumdumaan din ne iyan din neumaan se nekelipereng dan su midseharan dan te turug. Ne warà dan metau ke engkey se egkehiyen dan.

⁴¹ Guna su midlived en sikandin kayi te menge edumdumaan din te iketelu rin en te ebpengeningeni ne migkahi en te, “Maa, nekelipereng kew pè bes lavew? Sesangen en ayan! Su ini en ke ked-uluhà dut te Impeanak te Menusiyà diyà te palad te menge etew ne beniyagà. ⁴² Enew kew,” ke si Hisus, “su ini en ke etew ne ed-ulug kediey. Kuwa kew en su edtelavuk ki.”

*Ke Kedsikem ki Hisus
(Mateo 26:47-56; Lucas 22:47-53; Juan 18:3-12)*

⁴³ Gewii te edlalag pà si Hisus ne nekeuma en si Hudas, senge etew ini rut te sepulù wey deruwa ne edumdumaan din. Ne nerumaan dut te merakel ne menge etew ne midmemetarem dan te menge sundang wey menge behuval, su midsuhù dan dut te menge mepurù te terebpelengesa, ke menge meyterù te penduan, wey ke menge egkeunutan te menge Hudiyanan. ⁴⁴ Ugaid ketà te warà den pà medipanew ne ruen ingkahi ni Hudas kandan te, “Ke etew ne ed-uvayan ku ne ed-erekán ku ne arà imbe ke ebpemengaan niyu. Sigmaka niyu ne pekeventayi niyu nevenar te ked-ewit niyu.”

⁴⁵ Nekeuma rà si Hudas, ne mid-uvayen rin si Hisus se egkahi te, “Na Meyterù!” Ne arà pà ne mid-erekán din. ⁴⁶ Ketà ne migeweran dan en

si Hisus ne midsigkem dan en. ⁴⁷ Ugaid ne ruen senge etew diyà te uvey ran ne mid-ulavut te sundang din ne midtibas din en ke sugsuhuen dut te Pinekebmepurù te Terebpelengesa ne nesempingan en te telinga rin.

⁴⁸ Ne migkahi si Hisus dut te menge etew ne midsigkem kandin te, "Maa, tulisan a ne ebmetereman niyu te sundang wey behuval te edsigkem kediey? ⁴⁹ Su uman ded ma hewii ne riyan a te Nekebpuru ne Valev te Eleteala se ebpenurù," ke si Hisus, "ne warà a ma nikiyu sigkema ketà. Ugaid ne egked-ulaula ini su apey egketuman en ke Lalag te Eleteala ne impesurat dengan." ⁵⁰ Arà dà ne mibpelahuy en ke menge edumdumaan din ne mintahaky dan en sikandin.

⁵¹ Ne ruen kenakan ketà ne migkukumbung te malung dà se edtundugtundug ki Hisus. Gewii te ked-ewita ran ki Hisus ne idragkes dan perem te edsigkem sikandin. ⁵² Ugaid ne mibpelahuy sikandin te warà seseberen din su neluung ke malung din te kineheweri ran kandin.

Mibpeneheewit si Hisus Diyà te Valev te Kukuman

(Mateo 26:57-68; Lucas 22:54-55, 63-71; Juan 18:13-14, 19-24)

⁵³ Ne mid-ewit dan si Hisus diyà te baley te pinekemepurù dut te menge terebpelengesa su rutun egkevurun ke menge mepurù te terebpelengesa, ke menge egkeunutan te menge Hudiyanan, wey ke menge meyerù te penduan. ⁵⁴ Ne midtutundugtundug en si Pedro kandan taman te nekeuma sikandin diyà te lama te valey dut te pinekemepurù te menge terebpelengesa. Na kayi mibpekid-amur en milpinuu dut te menge bantey te valey se ed-inarang.

⁵⁵ Ne ini se menge mepurù te terebpelengesa wey ke menge egkeunutan te menge Hudiyanan ne nevurun kayi, ne mibpegelep dan mibpemengà ke engkey se id-isuhat dan ne kewagib ki Hisus su apey ran egkeimetayi, ugaid ne warà netuen dan. ⁵⁶ Merakel se in-isuhat dan ne kewagib kandin, ugaid ne warà memeked-ayun su mibèbeelan dan dè ma.

⁵⁷ Ne ruen en maa menge etew ne mid-etuvang ki Hisus su ed-isuhat kandin te kenà benar se egkahi te, ⁵⁸ "Nering dey," ke sikandan, "se egkahi ini se etew te, 'Egkerundus ku ini se Nekebpuru ne Valev te Eleteala ne mibbeelan te etew, ugaid ne ketà te tetelu ne hewii ne igkepeitindeg ku en ke behu ne valey ne kenà bineelan te etew.'"

⁵⁹ Ugaid ne misan engkey en kandan se egkahi ne kenà ebpmeked-ayun.

⁶⁰ Ketà ne mid-itindeg en ke pinekemepurù te menge terebpelengesa ne migkehiyan din si Hisus te, "Engkey ve se keykew ne egkekahi?

Engkey, benar ini se id-isuhat dan ne kewagib keykew?" ⁶¹ Ugaid ne mibpeeneng-eneng dà si Hisus.

Ne migkahi pà maa ini se pinekemepurù dut te menge terebpelengesa te, "Maa, sikuna en iya ini ke Anak te Eleteala ne midtendù din ne ebperetuen din?"

⁶² Ne midtavak si Hisus te, "Uya, siaken en iya. Ne egkekita niyu red keuremà ke Impeanak te Menusiyà ne ebpekepinuu riyà te egkekewanan te Eleteala ne warà repeng te gehem din. Ne ketà te kedlived din a kayi ne egkekita niyu en te edumaan te seholapun."

⁶³ Nering dà dut te pinekemepurù te menge terebpelengesa ke migkahi ni Hisus ne mibisey rin ke velegkas din te kegkeepes din ne

migkahi en te, "Kenà ki en ebpemengà te ruma pà ne titihus! ⁶⁴ Su nerineg niyu en ini se kedsumpalit din! Ne engkey en be se keniyu ne kukuman?"

Ne langun dan ne mid-isuhat kandin te kewagib ne ebpeimetayan. ⁶⁵ Ne ruen en ketà se mibpengileb ki Hisus, ne ruen duma ne mibegkesan ke mata rin ne midsuntuk dan en se egkahi te, "Entuka nu ke entei se midsuntuk keykew." Ne migkuwa sikandin dut te menge sundaru ne ebanter kandin ne mibpenabpì dan en sikandin.

Imparew ni Pedro Te Teleduma ran ki Hisus

(Mateo 26:69-75; Lucas 22:56-62; Juan 18:15-18, 25-27)

⁶⁶ Ne riyà pà lavew te lama te valey te Pinekemepurù te Terebpelengesa si Pedro, ne ruen meritan ne edsugsuhuen ketà te valey ne mid-uvey kandin. ⁶⁷ Nekita rin si Pedro se ed-in-inarang ne mibpeututengen din te edtengteng se egkahi te, "Sikuna rema ne ruma ka ni Hisus ke ebpuun te Nasarit."

⁶⁸ Ugaid ne mibparew sikandin se egkahi te, "Kenà ku egketuenan, kenà ku egkesebutan ayan se egkehiyen nu." Ne mid-ip-ipanew sikandin se ebpependiyà te bengawan te lama ne arà dà ne ruen midukarà ne manuk.

⁶⁹ Nekita en maa si Pedro dut te meritan ne migkahi en sikandin diyà te menge etew ne nevurun ketà te, "Ayan se etew ne teleduma ki Hisus." ⁷⁰ Nerineg ni Pedro ne mibparew rin ded maa.

Neiseg-iseg manen ne migkahi ke menge etew ketà ki Pedro te, "Benar iya ne teleduma kew su egketuusan te riyà ka ebpuun te Geliliya."

⁷¹ Ne migkahi si Pedro te, "Dusa kedi te Eleteala embiya teleduma key keniyan te etew ne egkehiyen niyu!"

⁷² Arà dà iya ne mid-ukarà en ke manuk te ikeruwa. Ketà ne netenuran ni Pedro ke migkahi ni Hisus kandin te, "Kenà pà ed-ukarà ke manuk te kereruwa te ini en ne kerukileman ne ketetelu a nu en ibparew te kenà ki teleduma." Ne midrahukrahuk en si Pedro te kedsinehew rin.

15

Mid-ewit Dan si Hisus Diyà te Ki Pilatu ke Gubinedur te Ruma

(Mateo 27:1-2, 11-14; Lucas 23:1-5; Juan 18:28-38)

¹ Guna su mesmeselem pà ne nevurun en ke menge mepurù te terebpelengesa, ke menge egkeunutan te menge Hudiyanan, ke menge meyerù te penduan, wey ke ruma pà ne egkedserihan dan te menge Hudiyanan ne neumpung dan en ke engkey se ed-ul-ulaan dan ki Hisus. Ne mibakù dan si Hisus ne mibpeneheewit dan sikandin diyà te ki Pilatu, ke gubinedur te Ruma. ² Ne mid-insaan en ni Pilatu si Hisus te, "Menu, sikuna en iya ke ratù te menge Hudiyanan?"

Midtavak ni Hisus te, "Uya, ayan iya se migkahi nu."

³ Ne merakel se in-isuhat ne kewagib dut te menge mepurù te terebpelengesa ki Hisus. ⁴ Ne ketà ne migkahi en maa si Pilatu ki Hisus te, "Menu, kenà ke en be edtavak kayi te in-isuhat dan kenikew? Su merakel ini!"

⁵ Ugaid ne warè en megkahikahi si Hisus, ne ketà ne neinuinu nevenar si Pilatu.

*Migukum dan te Ed-imetayan si Hisus
(Mateo 27:15-26; Lucas 23:13-25; Juan 18:39-19:16)*

⁶ Ne iyan nelayaman ni Pilatu te uman egkeuma ke Pista te Kedsehari te Suluhuen ne ruen ibpelihawang din ne senge etew ne vilanggù ne ebuyuen dut te menge etew. ⁷ Ne ketà ne hewii ne ruen senge etew ne nevilanggù ne ed-ingaranan ki Barabas su mid-amung sikandin te ebpekidkunterà te gubirnu ne ruen nepatey rin. ⁸ Guna su mid-uvey en ke menge etew ki Pilatu su ebuyuen dan te ibpelihawang din ini se senge etew ne vilanggù iring dut te raan ne betasan din.

⁹ Ne mid-insà si Pilatu te, “Menu, egkiyug kew ve te ibpelihawang ku ini se ratù niyu te menge Hudiyanan?” ¹⁰ Iyan din migkahi ini su netuenan din se ini se id-isuhat ne kewagib ki Hisus dut te menge mepurù te terebpelengesa ne sabap dut te kegkesihi ran kandin. ¹¹ Ugaid ne migkumbida dut te menge mepurù te terebpelengesa ke menge etew te iyan dan ibpevuyù ne ibpelihawang si Barabas, kenà si Hisus. Ne arà en iya rema ke mibuyù dan.

¹² Ne migkahi en maa si Pilatu te, “Embiya arà se egkiyuhan niyu, ne ebmemenuwen ku be ini se ed-ingeranan niyu ne ratù niyu te menge Hudiyanan?”

¹³ Ne mibpemensag den dà te, “Ibpelansang nu sikandin diyà te ebpebelevahen ne kayu!”

¹⁴ “Meambe?” ke si Pilatu. “Engkey se meraat ne mid-ulaula rin?”
Ugaid ne nasì en be ne mid-iseg pà se kebpemensag dan te, “Ibpelansang nu sikandin diyà te ebpebelevahen ne kayu!”

¹⁵ Ketà ne impelihawang en ni Pilatu si Barabas su apey igkesuat sikandin dut te menge etew. Ne si Hisus embe ke imperuug din en ne imbehey rin en kandan te ibpelansang diyà te pinebelavag ne kayu.

*Pinelembung Si Hisus te Datù Dut Te Menge Sundaru te Kedsumpalit
Dan Kandin su uvag kun Datù sikandin*

(Mateo 27:27-31; Juan 19:2-3)

¹⁶ Ne mid-ewit en te menge sundaru si Hisus diyà te lamalama te turuhan te gubinedur ne midtawag dan ke langun ne menge sundaru.

¹⁷ Ne pinelembung dan si Hisus te merihà su uvag kun ne ratù, ne ruen impetengkulu kandin ne mibeelan dan ne ruhiyen ne wahed.

¹⁸ Ne uvag kun ed-adat dan kandin se egkahi te, “Mebereumur ka ne ratù te menge Hudiyanan!” ¹⁹ Ne mibedasan dan ke ulu rin, ne mibpengilevan dan sikandin, ne midlangkeb dan diyà te etuvangan din su uvag kun se ebpengerap dan. ²⁰ Guna su neipus ke kedsumpalit kandin, ne midluung dan en ke merihà ne impelembung kandin ne inseluub dan ded ke kandin ne belegkas ne mid-ewit dan en sikandin diyà te ebpelensangan kandin.

*Inlansang si Hisus Diyà te Pinebelavag ne Kayu
(Mateo 27:32-44; Lucas 23:26-43; Juan 19:17-27)*

²¹ Guna su riyà dan en te ralan te kebpeneheewita ran en kandin, ne ruen etew ne ed-ingaranan ki Simon ne nesinuhung dan ne iyan pà ebpekeuma ne riyà ebpuun te taneb, ne mibpehes dan te ibpetiang ke pinebelevag ne kayu ne editiangen ni Hisus. (Si Simon ini ne riyà ebpuun te Sirini, ke amey ni Alejandro ki Rufo.) ²² Ne mid-ewit dan en si Hisus diyà te rapit ne ed-ingaranan te Gulguta, ne iyan din meana ne

“Tulan te Ulu.”²³ Ne ketà ne ebpeinumen dan perem si Hisus te binu ne midsewuhan dan te vawì ne ed-ingaranan te mira, ugaid ne warà din inuma.²⁴ Arà dà ne inlansang dan en si Hisus diyà te pinebelavag ne kayu. Neipus dan ne mibunutbunutan dan ke velegkas din ke entei se ebpekegkemuney kandan.

²⁵ Ne ketà ne menge siyew en ne uras te keseleman te kedlansang dan ki Hisus.²⁶ Ne insurat dan ke in-isuhat dan ne kewagib ki Hisus se egkahi te, “Ke ratù te menge Hudiyanan.”²⁷ Ne ruen deruwa ne tulisan ne inlansang dan dema duma ki Hisus, seveka kayi te egkekewanan din, ne seveka kayi te egkehivang din. [²⁸ Ini se ned-ulaula apey metuman ke impesurat ne Lalag te Eleteala rengan ne egkahi te, “Iyan dan pegitungan ne rumu sikandin te menge tulisan.”]

²⁹ Ke menge etew ne midsahad kandin ne mibpendungkàdungkà dan te ked-undaunda ran kandin se egkahi te, “Na, endei embe ke migkahi nu ne edrundusen nu ini se Nekebpuru ne Valev te Eleteala, ne ketà te tetelu ne hewii ne igkepeitindeg nu manen te vehu pà?³⁰ Na ed-intengan ta kun imbe ke ruen ketehel nu, ibpelihau nu ke hinawa nu ne pemenaug ke en keniyan te midlensangan keykew.”

³¹ Ne iring ded dema ketà ke ked-undaunda rut te menge mepurù te terebpelengesa wey ke menge meyterù te penduan se ebpelelelahay ran te, “Nekepelihau kun sikandin te menge rumu rin, ugaid ne ke kandin en ne hinawa ne kenà din egkegaga.”³² Na kun be imbe embiya sikuna ke Impasad te Eleteala ne Ebperetuen, ke ratù te menge Hudiyanan, ne pemenaug ke en keniyan te midlensangan keykew su apey key ebpekeperetiyya.”

Ne misan dema ke deruwa ne inlansang diyà te idsengeriveluyà din ne elin en ne ed-undaunda.

Ke Kinepatey Ni Hisus

(Mateo 27:45-56; Lucas 23:44-49; Juan 19:28-30)

³³ Ketà te neudtu en ke andew ne mibmerusirem en ke tivuuk ne dunya lusud te tetelu ne uras.³⁴ Guna su tetelu en ne uras ne migkuleyi si Hisus te merahing se egkahi te, “Ili, ili, lama sebaktani?” Ne iyan din meana se, “Ey, Eleteala ku, Eleteala ku, meambe ke mid-ewaan a nu?”

³⁵ Duen menge etew ketà ne nekerineg kandin ne migkahi te, “Pemineha niyu ma su ebpengumawen din en si Elias.”

³⁶ Senge etew ketà se midahewrahew migkuwa kayi te in-ered te tebà ne midtiyuk din en te deisek ne terekayu. Ne ketà ne insugkar din diyà te bèbà ni Hisus su apey rin meesep ne midlalag, sikandin kayi te menge rumu rin te, “Na ed-intengan tew ve ke edlepew si Elias se ebpeawà kandin ketà.”

³⁷ Ne migkuleyi en maa si Hisus te merahing ne nependusan en sikandin te hinawa.

³⁸ Diyà te Nekebpuru ne Valev te Eleteala ne ruen mekepal ne saput ne impehelet dut te insivey ne ed-ubpaan te Eleteala, ne ketà te kinepatey ni Hisus ne nevindas kayi te luuk ini igenat te divavew taman te diralem.

³⁹ Ne ini se kepitan te sundaru ne ed-it-itindeg kayi te egkesineruwan ni Hisus, ne guna su nerineg din ke kegkuleyi ni Hisus wey nekita rin ke ned-ulaula te kebpatey en ni Hisus ne nekekahi sikandin te, “Benar ini ne Anak te Eleteala!”

⁴⁰ Ne ruen dema ketà menge meritan ne nekeitindeg diyà te malù meriyù su edtengteng ki Hisus, elin ketà si Maria Magdalina, si Salumi, wey si Maria ke iney ni Jose ki Santiago ke ari rin. ⁴¹ Mibpekiduma ran en ki Hisus su edtavang dan kandan gewii te riyà dan pà te Geliliya. Ne ruen pà rumu ne menge meritan ne mibpekiduma kandan te kebpendiyà dan en te Hirusalim.

Ke Kineleveng ki Hisus

(Mateo 27:57-61; Lucas 23:50-56; Juan 19:38-42)

⁴² Ne ini se kinepatey ni Hisus ne meapun te Diyemaat ne ini ke hewii te menge Hudiyanan te kebpenehana ran dut te Hewii ne Id-imeley ran. Guna su malù en edsanlep ke andew, ne nekeuma en si Jose ke ebpuun te Eremetiya. ⁴³ Senge etew ini ne egkeedatan dut te menge egkeunutan te menge Hudiyanan, ne seveka red dema sikandin ne ebpenareng dut te kegketuman te impesurat ne Lalag te Eleteala mekeatag te kedetui rin te menge etew kayi te ampew te dunya. Mibpengarew en se ebpendiyà te ki Pilatu ne mibuyù din ke vangkey ni Hisus. ⁴⁴ Guna su mibuyù en ni Jose ke vangkey ni Hisus, ne neinuinu si Pilatu su kunean din ke warà pà minatey si Hisus. Ketà ne midtawag din ke mepurù te menge sundaru su id-insà din ke minatey en si Hisus. ⁴⁵ Guna su nerineg ni Pilatu ke migkahi rut te mepurù te sundaru, ne migkehiyan din en si Jose te egkepakey ne egkuhan din ke vangkey ni Hisus. ⁴⁶ Arà dà ne mid-ipanew en si Jose su ebpemasa te meputì ne saput ne ibukus dut te bangkey ni Hisus te kedleveng kandin, ne migkuwa rin en ke vangkey ne mibukusan din en ketà te saput. Nepasad din ne inleveng din en ketà te imbangbang ne leveng diyà te dempilas. Dutun ne ruen dekelà ne vatu ne midlilid din ne inlekeb ketà te bengawan te leveng. ⁴⁷ Ne nekita en ni Maria Magdalena wey si Maria ke iney ni Jose ke langun ne mid-ulaula rin wey endei rin inleveng ke bangkey ni Hisus.

16

Ke Kinekevanew ni Hisus

(Mateo 28:1-8; Lucas 24:1-12; Juan 20:1-10)

¹ Guna su neipus en ke Hewii te Id-imeley ne mibpemasa ensi Maria Magdalena, si Salumi, wey si Maria ke iney ni Santiago te periyemut su ebpendiyà dan te midlevengan ki Hisus su ebperiyemutan dan ke lawa rin. ² Mesmeselem pà te hewii ne Akad ne mibpendiyà dan en te midlevengan ki Hisus. ³ Gewii ran te ed-ip-ipanew ne mibpengasak dan te, “Engkey se ebbelilirene tew rut te batu ne inlekeb dut te leveng din?” ⁴ (Su dekelà nevenar ini se vatu.)

Nekeuma ran ne nekita ran te nelilid en ke vatu ketà. ⁵ Ne mid-awuk dan en ne iyan dan nekita ne menguwed ne meama ne mivelelegkas te meputì ne riyà mebpinuu te egkekewanen dan, ne nengeandek dan.

⁶ Ne migkahi en ini se suluhuen te, “Kenà kew meandek!” ke sikandin. “Ebpemengà kew ki Hisus ne ebpuun diyà te Nasarit ne inlansang dan te pinebelevag ne kayu, ugaid ne warè en kayi su nevanew en. Intengi niyu ma ini se midtehuan dan kandin. ⁷ Na, ipanew kew en ne penudtula niyu ve riyà te menge edumdumaan din abpeg ki Pedro te, ‘Si Hisus ne ed-una en kenyi riyà te Geliliya, ne riyà niyu en egkekita sikandin su arà ke impasad din rengan kenyi.’ ”

⁸ Arà dà ne midlihawang dan en se ebpelelahuy su nekiyab se atey ran te kegkeandek dan. Ne warà dan kegkehiya te misan entei en su neandek dan.

KE RAAN NE KETEPUSAN

Mibpekita si Hisus ki Maria Magdalena (Mateo 28:9-10; Juan 20:11-18)

[⁹ Guna su nevanew en si Hisus ne mesmeselem pà te hewii ne Akad, ne riyà mid-una mibpekita sikandin te ki Maria Magdalena. Ini ke meritan ne midsukan te pitu ne vusew ne midsegseg ni Hisus dengan. ¹⁰ Nekita rà ni Maria ne mid-ipanew sikandin su ebeyaan din ke menge edumdumaan ni Hisus. Neuma rin sikandan ne ebpeninehew ran te kegkemutu ran te kinepatey ni Hisus. ¹¹ Guna su mibpenudtulan dan en ni Maria te nekita rin en si Hisus su nevanew en, ne warà dan mebperetiyyaya.

Mibpekita si Hisus Dut te Deruwa ne Edumdumaan Din (Lucas 24:13-35)

¹² Neipus ini se kinepekita ni Hisus ki Maria Magdalena, ne mibpekita maa sikandin te nesalin ke paras din diyà dut te deruwa ne edumdumaan din gewii te ed-ipanew ran se ebpendiyà te taneb. ¹³ Ne midlived dan kayi te Hirusalim su ebpenudtulan dan ke menge rumah ran te nekita ran en si Hisus, ugaid ne warà dan mibperetiyyaya.

Mibpekita si Hisus Dut te Sepulù wey Seveka ne Edumdumaan Din (Mateo 28:16-20; Lucas 24:36-49; Juan 20:19-23; Nenged-ulaula 1:6-8)

¹⁴ Ketepusan be ne mibpekita si Hisus dut te sepulù wey seveka ne edumdumaan din gewii te egkaan dan. Midseweyan din sikandan su kurang ke sarig dan ne merehen te hinawa ran te kebperetiyyaya rut te lalag te menge etew ne nekekita kandin te nevanew en.

¹⁵ Migkehiyan din sikandan te, “Pendiyà kew te langun ne menge inged kayi te ampew te dunya ne ibpesabut niyu ke Meupiya ne Tudtul mekeatag kediey riyà te langun ne menusiyà. ¹⁶ Ne piya engkey ne etew ne ebperetiyyaya wey ebpebunyag dan ne ebpeketelimà te umur ne kenà edtaman, ugaid ne ke etew ne kenà ebperetiyyaya ne ebetetayan te salà te kepatey. ¹⁷ Ne ke menge etew ne ebperetiyyaya kediey ne egkevehayan ku te gehem su apey ran ebpekeval te mekegeyip. Su kayi te gehem ne ibehey ku kandan ne ebpekegaga ran ne ebpenegseg te menge vusew, ne ebpekelalag dan te menge lalag ne kenà kandan ne kinehiyen; ¹⁸ ne embiya ebpekehawed dan te uled etawa ebpekeinum dan te ed-ilu, ne kenà dan egkekeiran; ne edsamsam dan te ebpenderaru ne ebpengeulian.”

¹⁹ Guna su nekeipus si Hisus ke Kerenan se edlalag kayi te menge edumdumaan din ne nevatun en diyà te langit, ne mibpinuu en diyà te egkekewanian te Eleteala. ²⁰ Ne mid-ipanew en dema ini se menge edumdumaan din se ibpesabut dut te Meupiya ne Tudtul mekeatag kandin diyà te langun ne menge inged. Ne Eleteala se midtavang kandan su nekeval dan te menge mekegeyip apey mekeperetiyyaya ke menge etew te benar ini se ibpesabut dan.]

RUMA PÀ NE RAAN NE KETEPUSAN

[(9) Mibpendiyà ke menge meritan te enki Pedro ne intarem dan ke langun ne nerineg dan. (10) Neipus ini ne pineipanew ni Hisus ke menge edumdumaan din egenat te edsilaan ne ebpependiyà te edsenlepan su ebpesabut dan te berekat ne lalag mekeatag te umur ne warà edtaman din.]

Ke Meupiya ne Tudtul Mekeatag ki Hisu Kristu ne Miguhud ni Lucas

¹ Diyà te ki Teofilo:

Merakel en se menge etew ne migeram midsurat te guhud mekeatag te ned-ulaula ni Hisus kayi te kenami. ² Iyan dan insurat ke nengeguhud kandan dut te menge etew ne nekekita en iya kayi te ned-ulaula igenat te rudsuan wey iyan dan dema mibpesabut te Lalag te Eleteala. ³ Na Teofilo, langun ini ne ned-ulaula ne midsusi ku upupiani, tembù be netahù te itungan ku se edsuratan ku sikuna kayi te ned-ulaula endei se kegkeatur din. ⁴ Idsurat ku ini su apey nu metueni en iya te benar ini langun se impenurù keykew.

Impesabut Ke Ked-anak Ki Juan ne Ebppembunyaag

⁵ Iyan ku egkepengguhud ne timpu te iyan pà edatù si Hirudis dut te pruvinsiya te Hudiya ne ruen etew ketà ne ed-ingaranan ki Zacarias. Si Zacarias ini ne senge etew ne terebpelengesa rut te kevuwaran te keepepuan dan dengan ne ed-ingeranan ki Ebija su ke kevuwaran te Ebija se menge terebpelengesa te Eleteala. Iyan din esawa ne ed-ingeranan ki Elisabet ne kevuwaran te bansa te Arun ne terebpelengesa rema te Eleteala. ⁶ Ne ini se senge tiwelayan ne metidtu se hinawa ran diyà te etuvangan te Eleteala ne warà igkesawey kandan dut te kedmuman dan te langun ne suhù wey penduan te Eleteala. ⁷ Ugaid ne warà anak dan su kenà ed-anak si Elisabet su elin dan en nelukes.

⁸ Ne neuma en ke menge gewii te iyan ebpekepelengesa ne si Zacarias wey ke menge rumा rin ne kevuwaran ni Ebija diyà te Nekebpuru ne Valey te Eleteala. ⁹ Na duen betasan dut te menge terebpelengesa te Eleteala ne engkey ki ngaran se egemew ne sikandin se edlusud diyà te Nekebpuru ne Valey te Eleteala su edtutung te rukut. Ne arà ne hewii ne ki Zacarias se migemew ne midlusud en sikandin diyà te Nekebpuru ne Valey te Eleteala su edtutung te rukut. ¹⁰ Ne gewii rin te edtutung te rukut kayi te lusud, ne riyà te luwal ebpengeningeni ke merakel ne etew.

¹¹ Kemulu pà ne ed-ulaula si Zacarias kayi ne ruen suluhuen te Eleteala ne mibpekita kandin, kayi nekeitindeg te rapit te egkekewanan dut te edtutungan te rukut. ¹² Nekita rà ni Zacarias ne netekawen sikandin ne neandek-andek nevenar. ¹³ Ugaid ne migkahi ke suluhuen te Eleteala te, “Kenà ka meandek, Zacarias, su nerineg te Eleteala ke pengeningeni nu ne ke esawa nu ne ebpekeanak te meama, ne iyan nu iingaran ne si Juan. ¹⁴ Egkehalew ka nevenar kandin, ne kenà ketà dà taman su kehelawan dema dut te rumा ne etew ketà te ked-enaka kandin. ¹⁵ Su egkevaluy sikandin ne mepurù ne etew diyà te etuvangan te Eleteala. Kenà sikandin edinum te piya engkey ne ebpeketevereg ne ed-inumen. Ne misan igenat te kenà pà sikandin id-anak ne edlumunan en sikandin dut te Kedesenan ne Ebpetuntul te Menusiyà. ¹⁶ Ne kayi te kebpenurù din ne ebpekepelilived te merakel ne Hudiyanen riyà te Kerenan dan ne Eleteala ne andang ne ebpengeningienyan dan. ¹⁷ Ini se anak nu si

Juan,” ke se suluhuen te Eleteala, “ne edsuhuen te Eleteala ne ibpeuna te ebpeketuenan te mehaan ne ebpekeuma ke Kerenan. Ne ebabayen sikandin te baher wey edlumunan dut te Kedesenan ne Ebpetuntul te Menusiyà iring ki Elias ke etew ne mibpelambas te Lalag te Eleteala rengan. Kayi ebpnuun te kebpenurù ni Juan ne ebpemeked-ulitey ke hinawa rut te menge amey wey ke menge anak. Ne ke menge etew ne warà mebperumaruma te suhù te Eleteala ne ebpekedsendit ne arà pà ne ebpekeulit te metidtu ne itungan. Ne kayi te penurù din ne ebpekepenehana ke menge etew dut te kebpekeuma ni Hisus ke Kerenan.”

¹⁸ Mighahi si Zacarias diyà te suluhuen te Eleteala te, “Maan engkey ve se idtuus ku te benar ini se migkahi nu? Su siaken ne lukes en, ne lukes en dema ke esawa ku.”

¹⁹ Migkahi ke suluhuen te Eleteala maa te, “Siak imbe si Gabriel ke suluhuen te Eleteala ne layun diyà te etuvangan din. Sikandin iya se midsuhù kedi su ebpeketuenan keykew ini se meupiya ne egked-ulaula. ²⁰ Ne warà ke ma mibpehimbenar dut te migkahi ku, Zacarias,” ke se suluhuen te Eleteala, “ugaid ne egkeuma ke enget ne hewii ne egketuman imbe iya. Na geina te warà ka mibpehimbenar, ne egkeemew ka taman te egked-ulaula ini se migkahi ku.”

²¹ Ne ini se menge etew ne mibpulung midtahad ki Zacarias diyà te luwal, ne neinuinu ran su malù neuhet sikandin diyà te lusud te Nekebpuru ne Valey te Eleteala. ²² Guna su midlihawang en si Zacarias ne kenà en ebpekekahi riyà te menge etew su ebpenguyew-uyew rè be ne ketà ne neemew en sikandin. Ne netuenan dut te menge etew te ruen en impekita kandin te Eleteala diyà te lusud te valey te Eleteala.

²³ Neipus ni Zacarias ke kandin ne hewii te egelevek diyà te Nekebpuru ne Valey te Eleteala ne mid-uli en. ²⁴ Warà meuhet ne mibpenehipuun en ke esawa ni Zacarias, ne nekedlelima ne vulan ne mid-ubpaubpà sikandin te valey. ²⁵ “Ne ini pè be ne ingkeyru a te Eleteala su ebpekeanak ad,” ke sikandin. “Ne ebpekeengked en ke menge etew ne edtekudi kedi.”

Impesabut ke Ked-anak Ki Hisus

²⁶ Guna su ikeenem en ne vulan te kehingeyan dut te esawa ni Zacarias ne midsuhù te Eleteala ke suluhuen din ne si Gabriel diyà te inged ne Nesarit lusud te Geliliya. ²⁷ Iyan mibpeveyaan kandin ne riyà te senge etew ne raha ne nepesaran en se ed-esawaen te kenakan ne ed-ingeranan ki Jose, ke kevuwaran dut te ratù dan dengan ne si David. ²⁸ Nekeuma ke suluhuen te Eleteala riyà te ki Maria ne migkahi en te, “Na kehalew ka, Maria! Bebegian ka ne etew su kayi en ke Eleteala te kenikew.”

²⁹ Guna su nerineg ni Maria ke lalag dut te suluhuen te Eleteala ne neliveg nevenar sikandin, ne mibpegpegitung din te engkey vuwa se meana rin. ³⁰ Ne migkahi ke suluhuen te Eleteala kandin te, “Kenà ka meandek, Maria, su midtuvaran ka te Eleteala. ³¹ Ebmehingey ka ne ed-anak ka te meama ne iyan nu iingeran ne si Hisus. ³² Ebmepurù sikandin ne iyan duma ne id-umew kandin ne Anak en iya te Eleteala ne pinekemepurù te langun. Iyan ebpepurù kandin ne Eleteala,” ke se suluhuen, “su ibehey rin kandin ke edetuan dut te apù din dengan ne si David. ³³ Ne ini se anak nu ne edatù te langun ne menge Hudiyansen,

ke menge kevuwaran ni Jacob. Uya, ini se kegkeratù din ne warà ketepusan din.”

³⁴ Migkahi si Maria riyà te suluhuen te, “Egkemenumenu be buwa ini? Su siaken ne matag nepasad se selenggunì ne warà key pà mepakey ketà te meama.”

³⁵ Migkahi maa ke suluhuen te Eleteala te, “Iyan ma edalandan keykew ke Kedesenan ne Ebpetuntul te Menusiyà, ne ke gehem te Eleteala ne ini en te keykew. Tembù be ini se igkeanak nu ne berekat ne vatà ne iyan id-ingaran kandin ke Anak te Eleteala.” ³⁶ Ne kenà ini rà se tudtul ku,” ke se suluhuen te Eleteala, “su arà se ayà nu si Elisabet ne kenà kun ed-anak ne ikeenem din en ne vulan te kehingeyan din misan lukes en sikandin. ³⁷ Su embiya Eleteala, ne egkeveelan din ke misan engkey en.”

³⁸ Nerineg dà ni Maria ne migkahi en te, “Berekat ne ed-ul-ulaan din en ini se migkahi nu kayi te kedi. Su siaken, ne Eleteala se ebayàbayà kedi.” Arà dà ne mid-ewean en dut te suluhuen te Eleteala si Maria.

Mibpendiyà si Maria Diyà te ki Elisabet

³⁹ Warà meuhet ne mibpenines si Maria ne migangaan migenat su ebpendediyà te senge inged diyà te buvungan lusud te Hudiya.

⁴⁰ Nekeuma si Maria riyà te valey en ni Zacarias ki Elisabet ne mibpenehetiat sikandin ki Elisabet. ⁴¹ Guna su nerineg ni Elisabet ke penehetiat ni Maria ne midwaleng ke vatà kayi te hetek din. Ne ke Kedesenan ne Ebpetuntul te Menusiyà se midlumun ki Elisabet.

⁴² Ne ruen impekahri rin ki Maria ne mibmerahing ke suwara rin te nekepemensag sikandin su kegkehalew rin se egkahi te, “Warà idsan nu ne meritan ne midtuvaran te Eleteala ne iring kayi! Ne engketà ded se keduvari dut te egkeanak nu!” ⁴³ Maan buwa ke midekdekelà a te hinawa te Eleteala se iyan en ebpeengkayi te kedi ke iney rut te Kerenan ku? ⁴⁴ Su nerineg ku rà sikew se ebpenehetiat ne midlehuwat te kegkehalew rin ini se kayi te hetek ku. ⁴⁵ Tembù be midtuvaran ka, Maria,” ke si Elisabet, “su mibperetiyyaya ka te egketuman iya ke impesabut kenikew dut te suluhuen te Eleteala.”

Ke Bayuk ni Maria te Edeyù te Eleteala

⁴⁶ Migkahi si Maria te,

“Mesarig se kedeyù ku rut te Kerenan ku,

⁴⁷ ne dekelà se kegkehalew ku

dut te Eleteala ne ebpeliyu kedi;

⁴⁸ Su mibpemilì a nikandin ne edtuvaran din,

misan engkayi te kevevaan a ne edsugsuhuen din.

Igenat guntaani ne ini se kevuwaran,

ne idtitinudtlà dan te siaken kun

se midtuvaran te Eleteala

dut te langun ne memeritan,

⁴⁹ su mekegeyip ke menge mid-ulaula

dut te Eleteala kediey.

Su Eleteala ne mekegegehem

ne warà repeng din ke ngaran din.

⁵⁰ Igenat dut te pehaney ne kevuwaran

taman te ketepusan ne kevuwaran,

ne ibpekita rin ke kegkeyru rin

dut te langun ne ebperumaruma kandin.

⁵¹ Impekita rin ke gehem din dut te mid-ulaula rin,
ne miburehey rin ke menge etew ne mepereyù
su apey kenà dan en metuman ke intahù te itungan dan.

⁵² Ruen menge ratù ne metehel ne mibpekevavà din,
ne ke mepeembavà ne menge etew ne mibpekepurù din.

⁵³ Ke menge etew ne layun en neirui,
ne mibehayan te Eleteala te kurang dan;
ugaid ke menge etew ne kewasa,
ne pineulì din te kuyaskuyas.

⁵⁴⁻⁵⁵ Warà melipati te Eleteala ke pasad din dengan
dut te keep-epuan tew si Abraham
wey ke menge kevuwaran din.
Su midtevangan kiyu rin,
ini se menge sugsuhuen din
ne kevuwaran ni Israyil.

Egkeyruwan kiyu rin dema
te warà edtemanan din,” ke si Maria,
“ini se menge kevuwaran ni Abraham ne nepemili din.”

⁵⁶ Nekedtetelu buwa ne vulan se ked-ubpà ni Maria riyà te engki
Elisabet ne arà pà ne mid-uli sikandin.

Ke Kineanak Ki Juan Ke Ebpermelayang

⁵⁷ Neuma ke hewii ne mid-anak si Elisabet ne iyan din anak ne
meama. ⁵⁸ Guna su nerineg dut te menge etew riyà te menge valey ne
uvey ran wey ke menge suled dan ini se keupiya te Eleteala ki Elisabet
ne nengehalew ran dema.

⁵⁹ Neuma ke ikewalu ne hewii ne miburun dan kayi te valey su
edtumanen dan ini se betasan dan te menge Hudiyanen te ed-etus.
Iyan dan perem id-ingaran kayi te vatà ne si Zacarias, idsangey red
dut te amey rin, ⁶⁰ ugaid ne migkahi ke iney rin te, “Kenà egkepakey!
Si Juan se ngaran din!”

⁶¹ Ne migkahi ran kayi te ki Elisabet te, “Ini se id-ingaran nu ne warà
suled nu ne egkesangayan.”

⁶² Ne mid-uyawan dan ke amey rin ke engkey se kandin ne id-
ingaran. ⁶³ Mid-uyew rema si Zacarias te ebpevehey sikandin te
egkesuratan te ngaran, ne iyan din insurat se “Si Juan se ngaran din.”
Guna su insurat din arà ne neinuinu nevenar ke menge etew. ⁶⁴ Arà dà
iya ne nekelalag en si Zacarias ne nereyù din te Eleteala. ⁶⁵ Langun dut
te rumu rin ne neandek, ne nekeeneb en ke tudtul dan dut te langun ne
menge etew ne mid-ubpà ketà te buvungan lusud te Hudiya. ⁶⁶ Langun
te nekerineg ne neketahù te itungan dan ne mid-insà te, “Engkey buwa
se ebuwatan kayi te batà ini?” Su mepayag nevenar se Eleteala se
mibpenglintau kayi te vatà.

Ke Bayuk ni Zacarias

⁶⁷ Midlumunan dut te Kedesenan ne Ebpetuntul te Menusiyà si
Zacarias ne ini se impelambas din ne lalag din, ke sikandin te,

⁶⁸ “Edeyù kiyu te Kerenan,
ke Eleteala tew te menge kevuwaran ni Israyil.
Su mibpengkayi sikandin te edtavang

dut te sikitew ne menge etew rin,
ne ebehey kenitew te kebpekepeleyu kenitew.

⁶⁹ Ibepengkayi rin en te keytew
arà se mekegehem ne ebpelihauun keytew,
ne kayi egketuntun te kevuwaran
dut te edsugsuhuen din

ne ratù tew rengan ne si David.

⁷⁰ Ini ve ke migkahi rin rengan
impepevayà dut te menge etew ne ebpelambas te lalag din.

⁷¹ Su migkahi rin te ibpelihawang kiyu
rut te menge kunterà tew

wey riyà te edtingkungan te palad
dut te menge etew ne egkeepes kenitew.

⁷² Migkahi rin dema te igkeyru rin
ke menge keep-epuan tew,
ne kenà din edlipatan ke pasad din kandan dengan.

⁷³ Mevaher ke pasad din dengan
dut te keep-epuan tew ne si Abraham,

⁷⁴ su impasad din te ibpeliyu kiyu

rut te palad te menge kunterà tew,
su apey edtuman kiyu te kiyug din te warà kegkeandek,

⁷⁵ su apey egkelunsey se ked-erapa tew kandin

wey metidtu kiyu riyà te etuvangan din
taman te biviyag kiyu pà.”

Ne migkahi maa si Zacarias kayi te anak din te,

⁷⁶ “Ne sikew ini ne anak ku,
iyan idtawag keykew ne ebpelambas te Lalag
te Eleteala ne warà repeng din.

Su edsuhuen ka nikandin
te ibpeuna dut te Kerenan tew,
su ebpeketuenan te menge etew
te ebpenehana rut te kebpekeuma rin.

⁷⁷ Sikuna ke ebpesabut
te menge kevuwaran ni Israyil
te igkepeliyu dan
dut te kedusai kandan
embiya ebuyu dan te Eleteala
te kebpesehad te menge salà dan.

⁷⁸ Su ke Eleteala tew ne iiruwen wey melimù.

Ne ini se kebpeliyu rin kenitew te kerusaan tew,
ne iring te kedsilà te andew
ne egkesilaan ke kerusireman.

⁷⁹ Ebpekereyahen te Eleteala ke kerusireman tew
su apey kenà kiyu en ed-elungen te kepepatey;
su apey langun tew ne melintad se kegingginawa.”

⁸⁰ Ne nekeiseg-iseg en ke kerekelà te anak en ni Zacarias ne mid-iseg en dema ke ketau rin mekeatag te Eleteala. Guna su dekelà en sikandin ne mibpendiyan en te tanà ne kenà egkeubpaan te etew, ne ketà mid-upà taman te neuma ke hewii te kebpenurù din te menge kevuwaran ni Israyil mekeatag te Lalag te Eleteala.

2*Ke Kineanak ki Hisus
(Mateo 1:18-25)*

¹ Guna su iyan pà mepurù si Agustu rut te inged ne Ruma ne ruen suhù din te langun te menge etew ne ed-uppà kayi te menge inged ne egkekemalan din ne ebpesurat te ngaran dan. ² Ini pà ke neuna ne kebpesurat dan te ngaran dan gewii te iyan midtendù ni Agustu ne gubinedur diyà te inged ne Siriya ne si Cirenio. ³ Ne langun ne menge etew ne mibpendiyà te uman inged ne mid-enakan kandan su ebpesurat te ngaran din.

⁴ Tembù be mibpendiyà si Jose kayi ebpuun te inged ne Nesarit lusud te Geliliya diyà te inged ne Bitlihim lusud te Hudiya su ini se inged ne Bitlihim ke mid-enakan dut te keep-epuan din ne datù dengan, si David. ⁵ Ne miduma ni Jose si Maria ini se raha ne nepenelenggunian din en su ebpesurat si Jose te ngaran din. Ne edrendayan en si Maria. ⁶ Guna su diyan dan en te Bitlihim ne neuma en ke hewii te ked-anak din. ⁷ Ne iyan din anak ne meama ne penganey rin pà ini. Ne midsemputan din ini se vatà ne impeirehà din diyà te ebpekeenan te kudà su warà neirehaan dan diyà te valey ne ed-eranan su nepengkeg en te etew.

Mibpekitakita ke Menge Suluhuen te Eleteala te Menge Edtuganur te Menge Bilibili

⁸ Ne arà ne kerukileman ne ruen menge etew ne ebanter te menge bilibili ran diyà te ebpmemetebtavan dan uvey te Bitlihim. ⁹ Ne netekew se ruen mibpekita kandan ne suluhuen te Kerenan riyà ebpuun te langit, ne mibpesilaan te Kerenan sikandan te raman din. Ne nengeandek dan nevenar. ¹⁰ Ne migkahi ke suluhuen kayi te kandan te, “Kenà kew meandek! Su midsuhù a ini te ebpepenudtulen keniyu te meupiya ne tudtul ne ebpekehalew te langun ne etew. ¹¹ Su ini ne kerukileman diyà te Bitlihim ke inged ni David rengan ne in-anak ke ebpeliyu keniyu dut te salà niyu. Su sikandin si Kristo ke Kerenan ne Impasad te Eleteala rengan ne Ebperetuen te langun. ¹² Ini se idtuus niyu te benar ini se migkahi ku keniyu te ebpekeuma kew riyà ne egkekita niyu ini se vatà ne midsemputan ne impeirehà riyà te ebpmemekeenan te kudà.”

¹³ Ne seguguneey ne ruen mibpekita ne rumा rut te suluhuen ne medmerakel riyà ebpuun te langit ne mideyù dan ke Eleteala se egkahi te,

¹⁴ “Edeyù kiyu te Eleteala

riyà te lesang te langit.

Ne kayi te ampew te dunya

ne mebmelintad ke hinawa rut te menge etew

ne ebpekesuhat te hinawa rin.”

¹⁵ Guna su mid-ulì en diyà te langit ini se menge suluhuen ne mibpelelehahay ke menge ebanter te bilibili te, “Kuwa kew en su ebpendiyà kiyu te Bitlihim su apey tew egkekita ini se ned-ulaula ne mibpeketaunen te Kerenan keytew.”

¹⁶ Arà dà ne midahewrahew ran en mid-ipanew ne netuen dan en si Maria ki Jose ne nekita ran en ini se vatà ne impeirehà diyà te ebpmemekeenan te kudà. Ne nekita ran dema si Maria wey si Jose

ketà. ¹⁷ Guna su nekita en kayi te ebantey te bilibili ini se vatà ne impenudtul dan en kandan ke migkahi rut te suluhuen mekeatag kayi te vatà. ¹⁸ Langun te nekerineg kayi te tudtul dut te ebantey te bilibili ne nengegeyip dan dut te nerineg dan. ¹⁹ Ne si Maria, ne kenà egkeawà te itungan din ini se tudtul dan su mibpegpegitung din up-upiani. ²⁰ Ne ini se ebantey te bilibili, ne mid-ulì en. Ne wey ran mideyù te Eleteala rut te langun ne nerineg dan wey nekita ran su netuman en langun ke impenudtul kandan dut te suluhuen te Eleteala.

Mid-ingeranan ke Vatà ki Hisus

²¹ Guna su neume en ke ikewalu ne hewii ne mid-etusan dan en ini se vatà, su arà ke betasan te menge Hudiyanan, ne mid-ingaranan dan en ki Hisus. Su ini ke ngaran ne impenudtul ki Maria rut te suluhuen te Eleteala te misan warà pà sikandin mibpengeraring.

Intepeney si Hisus Dut te Lukes Din Diyà te Nekebpuru ne Valey te Eleteala

²² Neuma ke hewii ne edtumanen ni Jose ki Maria ini se betasan dan te ebehey te ibpelengesa riyà te Nekebpuru ne Valey te Eleteala riyà te Hirusalim su edumaan dan ke penduan ne intahak ni Moises rengan mekeatag te meritan ne behu pà ne mid-anak. Ne mibpeneheewit dan ke vatà diyà te Hirusalim su apey ran idtepeney te Eleteala. ²³ Su edtumanen dan ke penduan ne impesurat te Eleteala rengan ne egkahi te, “Langun ne penganey ne meama ne idtepeney niyu te Eleteala.” ²⁴ Ne ibehey ran dema ke ibpelengesa ne nekahi rut te penduan te Kerenan ne “deruwa ne timan ne limukan etawa deruwa ne timan ne melepati.”

²⁵ Duen senge etew ne meama ne ed-ubpà ketà te Hirusalim ne ed-ingaranan ki Simeon. Metidtu se ulaula rin wey in-amin din ke hinawa rin te egelevek te Eleteala. Ne ebpememati sikandin ke keenu ibpeliyu te Eleteala ke menge etew rin ne menge kevuwaran ni Israyil. Ne ke Kedesenan ne Ebpetuntul ne Menusiyà ne midlumun en ki Simeon. ²⁶ Ne daan en ne mibpeketaunen kandin dut te Kedesenan ne Ebpetuntul te Menusiyà te kenà pà ebpatey sikandin taman te kenà din mekita ke Mesiyas arà se Impasad te Eleteala ne Kerenan dengan ne Ebperetuen te langun. ²⁷ Ketà te hewii ne mibpeneheewit dut te lukes din si Hisus te edlusud kayi te Nekebpuru ne Valey te Eleteala su edtumanen ini se nekahi rut te penduan ne ketà en te lusud si Simeon su impelusud sikandin dut te Kedesenan ne Ebpetuntul te Menusiyà. ²⁸ Ne midsepipi ni Simeon ke vatà ne mideyù en te Eleteala se egkahi te,

²⁹ “Is Kerenan, midtuman nu en iya
ke impasad nu kedì.

Ne misan keenu nu ebugkuta se niyawa ku
ne egkeapey en,
su mibmelintad en se hinawa ku.

³⁰ Su nebentangan en iya kayi te mata ku
ini se midtendù nu ne ebpeliyu kenami
rut te keberedusaan dey.

³¹ Su mibpenehana nu sikandin
su apey langun ne menge bansa ne ebpekekita.

³² Iring sikandin te rayag

dut te menge etew ne kenà Hudiyanan
su apey ebmerayag ke tidtu ne ibayà dan
te ebpendediyà te kenikew.

Uya, ini ve se vatà se ralan te kegkereyù
dut te sikami ne menge kevuwaran ni Israyil
ne nepemilì nu.”

³³ Neselekawan ini se menge lukes dut te vatà kayi te migkahi ni Simeon mekeatag te anak dan. ³⁴ Impengeningeni ni Simeon te ebpeneuven dan te Eleteala, ne migkahi en sikandin kayi te ki Maria ke iney ni Hisus te, “Ini se batà ne daan en ne mibpemilì te Eleteala ne tuus te Eleteala kayi te menge kevuwaran ni Israyil. Ke menge etew ne ed-engkenà kandin ne edusaan, ne ke menge etew ne edtelimà kandin ne ibpeliyu te Eleteala. Sikandin iya ke tuus ne riyà ebuun te Eleteala kayi te sikandan, ugaid ne merakel se ed-engkenà kandin. ³⁵ Ne kayi te menge ulaula ran ne egkepeyahan ke intahù te itungan dan, ini se itungan dan ne in-eles dan dut te rumा ran. Ne sikuna, Maria,” ke si Simeon, “ne egkerupet se hinawa nu iring te nesuhat ka te meharang ne sundang.”

³⁶ Ne ruen dema meritan ne mibpelambas te Lalag te Eleteala ne ed-ingaranan ki Ana, anak ni Panuwil, ne kevuwaran ni Asir. Lukes en nevenar ini se meritan ne nekeesawa taman te pitu rà ne rahun ³⁷ ne nevalu en, ne nekedwalu nepulù en wey epat ne rahun se kegkevalu rin. Warà mid-awà sikandin kayi te Nekebpuru ne Valey te Eleteala. Merukilem meandew ne mideyù din ke Eleteala, ne ruen menge hewii ne kenà sikandin egkaan su apey rin meilut se kebpengeningeni rin te Eleteala. ³⁸ Nesaretaan dema sikandin te kinepeneheewit dut te vatà kayi te Nekebpuru ne Valey te Eleteala ne mid-uvey sikandin engki Maria ne mideyù ke Eleteala mekeatag ketà te vatà. Ne igenat ketà ne impesabut din en mekeatag kayi te vatà diyà te langun ne ebpenareng te Eleteala te kebpekepeliyu te menge kevuwaran ni Israyil.

Mid-ulì Dan Diyà te Inged ne Nesarit

³⁹ Guna su nepasad en ni Jose ki Maria te kedmuman dut te langun ne nekahai kayi te penduan te Kerenan ne mid-ulì dan en diyà te inged dan ne Nesarit, lusud te Geliliya. ⁴⁰ Ne mid-iseg en ini se vatà ne mekaherkaher se lawa rin ne metautau sikandin, ne dekelà se penaub te Eleteala kandin.

Ke Vatà ne si Hisus Diyà te Nekebpuru ne Valey te Eleteala

⁴¹ Uman rahun ne ebpendediyà ke lukes ni Hisus te Hirusalim su edtelavuk te Pista te Kedsehari te Suluhuen te Eleteala dut te menge apù dan dengan. ⁴² Guna su sepulù en wey deruwa ne rahun si Hisus, ne mibpendiyà dan en te Pista maan. ⁴³ Guna su neipus en ke menge hewii te pista ne migenat dan en se ed-ulì, ugaid ne mibpelintetahak si Hisus diyà te Hirusalim te warà metueni rut te menge lukes din. ⁴⁴ Iyan dan kunaan ke kayi red sikandin te menge rumा ran ne midlevundus dan en se ed-ipanew te neep-epunan. Ne arà pà ne mibpemengà dan si Hisus kayi te menge suled dan wey menge rumা ran. ⁴⁵ Ugaid ne warà dan metuen, ne ketà ne midlived dan diyà te Hirusalim se ebpmengà. ⁴⁶ Ne iketelu rin ne andew ne arà pà ne netuen dan diyà te Nekebpuru ne Valey te Eleteala. Su riyà ebpmekibityara sikandin te menge

meyterù te Hudiyanen se ebpemineg te lalag dan wey ebpenginginsaan din sikandan.⁴⁷ Langun dan te ebpemineg ki Hisus ne negeyip dut te ketau rin te edtavak te menge insà kandin.⁴⁸ Nekita rà dut te menge lukes din ne neinuinu ran nevenar ne migkahi ke iney rin kayi te ki Hisus te, "Anak ku, maan ke mid-ulaula nu ini kenami? Neipeng-ipeng key te amey nu se ebpemengà kenikew."

⁴⁹ Ne migkahi si Hisus kandan te, "Meambe ke mibpemengà kew pà kediey? Maa warà niyu metueni se kayi a mulà te valey te amey ku?"
⁵⁰ Ugaid ne warà dan mekesabut dut te meana kayi te migkahi rin.

⁵¹ Ne miduma en si Hisus kandan te ed-uli diyà te Nesarit ne mibperumaruma sikandin kandan. Ne si Maria mulà ne intahù din langun ini te itungan din.⁵² Ne nekeiseg en se kerekelà te lawa ni Hisus ne ke itungan din ne mid-iseg dema. Ne mid-iseg-iseg en se kebpekesuhat din te hinawa te Eleteala, ne engketà ded dema ke menge etew.

3

Ke Kebpenurù ni Juan ke Ebpembunyag (Mateo 3:1-12; Marcos 1:1-8; Juan 1:19-28)

¹ Midsahadsahad en se menge rahun ne ini en ke ikesepulù en wey lelima ne rahun te kegkamal ni Tibiriyu rut te inged ne Ruma. Si Punsiyu Pilatu se midtendù din ne gubinedur dut te pruvinsiya ne Hudiya, si Hirudis se migkamal te pruvinsiya ne Geliliya, ne ke ari rin ne si Felipe se migkamal te menge pruvinsiya te Ituriya wey Terekunita, wey iyan migkamal te pruvinsiya te Ebeliniya ne si Lisanyas.² Ne iyan menge mepurù dut te langun ne terebbelengesa te Eleteala rut te menge Hudiyanen ne si Anas wey Kayipas.

Si Juan be ini, ke anak ni Zacarias, ne riyà pà te tanà ne kenà egkeubpaan te etew ne diyan en meumai sikandin te lalag te Eleteala te ebperudsuen te helevèk din.³ Ketà ne migemew en si Juan ne mibayaan din ke langun ne menge inged uvey te wayig ne Hurdan. Ne mibpemesabut din ke menge etew se egkahi te, "Pemedsendit kew ne engkeri niyu ke meraat ne menge ulaula niyu, ne pemebunyag kew su apey ebpesehareni te Eleteala ke menge keberedusaan niyu."

⁴ Ini se impenurù ni Juan ne netuman en ke impesurat ki Isayas ke mibpelambas te Lalag te Eleteala rengan se egkahi te,

"Duen etew riyà te tanà ne kenà egkeubpaan te etew
ne ebpewawag dut te menge etew
ne ed-uvey kandin, ke sikandin te,
'Mehaan ebpekeuma ke Kerenan,
ihewani niyu ke ralan
ne tidtuwa niyu ke ibayà din,
ne iyan din meana ne tilaka niyu ke hinawa niyu
su apey kew egkepenehana te kebpekeuma rin."

⁵ Langun te netempag ne edtembakan,
ne langun ne ebpenuhartuhar ne ebpetahen.
Ke dalan ne ebpénikütikù ne ebpeketidtuwen
ne kë mibuketur ne ralan ne editlaken.

⁶ Ne ketà ne ibpekita te Eleteala te langun ne menusiyà
ke edsuhuen din ne ebpeliyu kandan."

⁷ Migkuludkulud ma se menge etew ne mibpengkayi te ki Juan su ebpemebunyag. Migkehiyan din sikandan te, “Iring kew te menge uled ne ebpelahuy dut te apuy! Mehaan en egkeuma ke kedusa te Eleteala kenyu. Engkey se midtarem kenyu te ebpekeliyu kew ketà ke ebpebunyag kew? ⁸ Embiya benar ne mid-engkeran niyu ke meraat ne ulaula niyu, ne ipekita niyu kayi te ulaula niyu. Ne kenà kew egkahi te sikiyu ne kenà edusaan te Eleteala su kevuwaran kew ni Abraham. Su igkahi ku kenyu,” ke si Juan, “misan ini se menge batu ne egkepebaluy te Eleteala ne etew ne tuney ne kevuwaran ni Abraham ne igkesambi kenyu. ⁹ Ne sikiyu ne iring te menge kayu ne kenà ebahas te meupiya, tembù be ebpilayen. Ne iring te nekekayew en ke adsa su ebpmilayen en ne edtimbag diyà te apuy.”

¹⁰ Mid-insà ke menge etew kandin te, “Engkey en be se ed-ul-ulaan dey su apey keymekeliyu kenyian te egkehiyen nu?”

¹¹ Ne migkahi si Juan te, “Ini se ul-ulaa nu, ke etew ne deruwa se velegkas din ne mebehey te etew ne warà velegkas din. Engketà ded maa ke egkekaan, ke etew ne ruen egkekaan din ne mebehey dut te etew ne warà kandin.”

¹² Duen menge ebpevayad te buwis ne mibpengkayi te ki Juan su ebpembunyag. Ke sikandan te, “Meyterù, engkey en be se kenami ne ed-ul-ulaan?”

¹³ Ne migkahi si Juan te, “Embiya ebpevayad kew te buwis, ne kenà niyu ed-umani ke ibpevayad niyu.”

¹⁴ Ne ruen dema menge sundaru ne mid-insà kandin, ke sikandan te, “Nemenu sikami? Engkey se kenami ne ed-ul-ulaan?”

Ne migkahi si Juan te, “Engkeri niyu ini se kebpenguwa te pirak te kebpemehes niyu wey ini se kebpenguwa te pirak te etew ne edtevuan niyu. Kenà kew ebpeuman te sukey niyu kayi te kedlimbung niyu.”

¹⁵ Gewii rut te menge etew ne ebpmineg ki Juan ne mid-ilut se kebpenareng dan su iyan dan pegitungan ne si Juan ini ke Impasad te Eleteala dengan ne Ebperetuen te langun ne ed-ingeranan te Mesiyas.

¹⁶ Tembù migkahi si Juan diyà te kandan te, “Duen ebpeketedundug kediey ne mepurù pà kedi su misan ke telumpà din ne kenà a edait ne ed-ekar. Wayig se ibunyag ku kenyu, ne sikandin ke migkahi ku ne ebpeketedundug kedi ne ibunyag dema kenyu. Ke menge ebperetiyaya ne ebunyahan din te Kedesenan ne Ebpetuntul te Menusiyà, ne ke kenà ebperetiyaya ne iyan din ibunyag ne apuy. ¹⁷ Geina te ibpesivey rin ke menge etew ne ebperetiyaya rut te menge etew ne kenà ebperetiyaya, ne iring sikandin te etew ne ruen teluung din su ed-ukap ne ibpelayap din ke ukap rut te rimahas. Ke rimahas ne idtahù din diyà te patil, ne ke ukap ne ebinsulan din te apuy ne kenà egkeevukan.”

¹⁸ Gewii te ibpesabut ni Juan te menge etew ini se Meupiya ne Tudtul te Eleteala ne inlehetlehet din kandan te mebpenehana ran ketà te migkahi rin ne ebpekeuma.

¹⁹ Ugaid ne si Hirudis ke egkamal kayi te inged ne Geliliya ne mibpengegkehiyan ni Juan su mid-ahew ni Hirudis ke ipag din ne si Hirudiyas ke esawa te ari rin ne si Felipe. Ne kenà arà dà se meraat ne mid-ulaula ni Hirudis ne impengahikahi ni Juan kandin su merakel pà lavew se meraat ne mid-ulaula rin. ²⁰ Huna su nerineg ini ni Hirudis,

ne midruntuwan din pà lavew ke meraat ne ulaula rin su impevilanggù din si Juan.

Ke Kebunyag ki Hisus

(Mateo 3:13-17; Marcos 1:9-11)

²¹ Guna su langun dut te etew ne nebunyehan en ni Juan ne arà pà ne mibpengkayi si Jesus te ki Juan su ebpebunyag kandin. Ne ketà ne mibpengeningeni si Hisus te Eleteala, ne gewii rin te ebpengeningeni ne iring te nevukaan ke langit ²² ne midudsuk ke Kedesenan ne Ebpetuntul te Menusiyà kayi te ki Hisus ne midragid te melepati. Ne ruen suwara ne riyà ebpnuun te langit ne migkahi te, “Sikew ke anak ku ne igkelimù ku nevenar, ne nekesuhat ka nevenar te hinawa ku.”

Ke Keep-epuan ni Hisus

(Mateo 1:1-17)

²³ Guna su menge tetelu en nepulù se rahun ni Hisus ne midrudsù te helevèk din ne mibpeveelan kandin te Eleteala. Iyan itungan te menge etew ne tuney ne anak sikandin ni Jose.

Si Jose ini ne anak ni Heli,

²⁴ si Heli ne anak ni Matat,
si Matat ne anak ni Levi,
si Levi ne anak ni Milki,
ne si Milki ne anak ni Hani,
si Hani ne anak ni Jose,

²⁵ si Jose ne anak ni Matatiyas,
si Matatiyas ne anak ni Amos,
si Amos ne anak ni Nahum,
si Nahum ne anak ni Isli,
si Isli ne anak ni Nagey,

²⁶ si Nagey ne anak ni Maat,
ne si Maat ne anak ni Matatiyas,
si Matatiyas ne anak ni Simi,
si Simi ne anak ni Jose,
si Jose ne anak ni Huda,

²⁷ si Huda ne anak ni Huwana,
si Huwana ne anak ni Risa,
si Risa ne anak ni Surubabil,
si Surubabil ne anak ni Selatil,
si Selatil ne anak ni Niri,

²⁸ si Niri ne anak ni Milki,
si Milki ne anak ni Adi,
si Adi ne anak ni Kusam,
si Kusam ne anak ni Ilmudam,
si Ilmudam ne anak ni Iyir,

²⁹ si Iyir ne anak ni Josue,
si Josue ne anak ni Eliezer,
si Eliezer ne anak ni Hurim,
si Hurim ne anak ni Matat,
si Matat ne anak ni Levi,

³⁰ si Levi ne anak ni Simeon,
si Simeon ne anak ni Huda,
si Huda ne anak ni Jose,
si Jose ne anak ni Hunan,

si Hunan ne anak ni Iliyakim,
³¹ si Iliyakim ne anak ni Miliya,
 si Miliya ne anak ni Meinan,
 si Meinan ne anak ni Matata,
 si Matata ne anak ni Natan,
 si Natan ne anak ni David,
³² si David ne anak ni Isai,
 si Isai ne anak ni Obid,
 si Obid ne anak ni Buus,
 si Buus ne anak ni Salmun,
 si Salmun ne anak ni Naasun,
³³ si Naasun ne anak ni Aminadab,
 si Aminadab ne anak ni Admin,
 si Admin ne anak ni Arni,
 si Arni ne anak ni Isrum,
 si Isrum ne anak ni Piris,
 si Piris ne anak ni Huda,
³⁴ si Huda ne anak ni Hakub,
 si Hakub ne anak ni Isaac,
 si Isaac ne anak ni Abraham,
 si Abraham ne anak ni Tiri,
 si Tiri ne anak ni Nakur,
³⁵ si Nakur ne anak ni Serug,
 si Serug ne anak ni Ragaw,
 si Ragaw ne anak ni Peleg,
 si Peleg ne anak ni Ibir,
 si Ibir ne anak ni Sala,
³⁶ si Sala ne anak ni Kainan,
 si Kainan ne anak ni Erpaksad,
 si Erpaksad ne anak ni Sim,
 si Sim ne anak ni Noe,
 si Noe ne anak ni Lamic,
³⁷ si Lamic ne anak ni Matusalin,
 si Matusalin ne anak ni Enok,
 si Enok ne anak ni Harid,
 si Harid ne anak ni Mehelelil,
 si Mehelelil ne anak ni Kainan,
³⁸ si Kainan ne anak ni Inus,
 si Inus ne anak ni Sit,
 si Sit ne anak ni Adan,
 si Adan ne anak te Eleteala.

4

*Ke Kinenggeram ki Hisus
 (Mateo 4:1-11; Marcos 1:12-13)*

¹ Guna su nebunyehan en si Hisus diyà te wayig te Hurdan, ne mid-awà dutun ne midlumunan nevenar dut te Kedesenan ne Ebpetuntul te Menusiyà ne mid-ewit en sikandin diyà te tanà ne kenà egkeubpaan te menge etew. ² Ne ketà ne lusud te neked-epat nepulù ne hewii ne mibpenggeraman en si Hisus ni Setanas ke datù te pekaid. Ne ini ne menge hewii ne warà bulug mekekaan sikandin ne ketà ne nevitil nevenar si Hisus.

³ Ne migkehiyan ni Setanas ke datù te pekaid si Hisus te, “Embiya sikuna en ke Anak te Eleteala ne pebeluya nu ini se batu ne pan.”

⁴ Ne migkahi si Hisus te, “Iyan insurat ne Lalag te Eleteala ne egkahi te, ‘Kenà egkeenen dà se igkeuyag te etew.’”

⁵ Ne ketà ne mid-ewit ni Setanas si Hisus te edtegkereg ne seperek mata ne impekita rin ki Hisus ke langun ne inged kayi te ampew te dunya. ⁶ “Ini se kebayàbayà kayi te langun ne inged ini ne ibehey ku keykew,” ke se datù te pekaid, “wey langun ini ne kekewesai, su langun imbe kayi ne imbehey kedi ne igkevehey ku te piya engkey ne egkesuatan ku. ⁷ Langun din ini ne kenikew en embiya ed-arap ka kedi.”

⁸ Ne migkahi si Hisus te, “Ruen impesurat ne Lalag te Eleteala ne egkahi te, ‘Iyan niyu rà erapa ne Kerenan ne Eleteala niyu, ne sikandin dà se ebperumduaan niyu.’”

⁹ Ne ketà maa ne mid-ewit dut te datù te pekaid si Hisus diyà te inged ne Hirusalim dutun te migketikangan dut te Nekebpuru ne Valey te Eleteala ne migkahi sikandin te, “Embiya benar ne sikew ke Anak te Eleteala ne umpak ka ruen. ¹⁰ Su ruen impesurat ne Lalag te Eleteala ne egkahi te,

‘Edsuhù ke Eleteala te menge suluhuen din
ne ebpetugenuren keykew.’

¹¹ Ne ruen dema ketà ne egkahi te,
‘Edsepirawen ka nikandan
su apey kenà egkerudruri
ke menge paa nu te batu.’”

¹² Ne migkahi si Hisus te, “Ugaid ne ruen dema Lalag ne impesurat te Eleteala ne egkahi te, ‘Kenà kew baal te ralan ne ibpenggeram niyu te gehem dut te Kerenan ne Eleteala niyu.’”

¹³ Guna su netuenan dut te datù te pekaid te kenà din egkepenggeraman si Hisus ne mid-ewaan din pà.

*Midrudsù si Hisus te Helevèk Din
(Mateo 4:12-17; Marcos 1:14-15)*

¹⁴ Mid-ulì en si Hisus diyà te Geliliya ne ke gehem te Kedesenan ne Ebpetuntul te Menusiyà ne ini en te kandin. Ne nekeeneb en dut te langun ne nekelingut ne inged ke tudtul mekeatag ki Hisus.

¹⁵ Mibpenurù sikandin diyà te menge valey ne ebpengedian te menge Hudiyanan ne nekereyù kandin ke langun ne menge etew.

*Warà Mibperetiyaya te Penurù ni Hisus Diyà te Inged Din ne Nesarit
(Mateo 13:53-58; Marcos 6:1-6)*

¹⁶ Ne arà pà ne midlaus si Hisus diyà te Nesarit, ke inged ini ne kayi en mibukelid sikandin. Neuma se Hewii ne Id-imeley ne mibpendiyà sikandin te valey ne ebpengedian te Hudiyanan te penduan dan su ini se kandin ne ulaula. Guna su nevurun dan en ne mid-itindeg en si Hisus su ebasa te Lalag te Eleteala. ¹⁷ Induwal dan en kandin ke insurat ni Isayas, senge etew ne mibpelambas te Lalag te Eleteala rengan. Ne mibekar ni Hisus ini se insurat ketà te egkahi te,

¹⁸ “Ke Kedesenan ne Ebpetuntul te Menusiyà
ne riyà ebpuun te Kerenan ne Eleteala
ne midlumun en kediey,
ne mibpemilì a te Kerenan ne Eleteala

su apey ku ibpesabut
 dut te menge etew ne ayuayu
 ke Meupiya ne Tuditul.
 Ne mibpeveyaan din kedi
 apey ku mepenudtuli te egkevelukasan
 ke menge etew ne nevakù ni Setanas;
 ne ebpengueilian ke menge pisek
 su apey ran ebpekekita;
 ne ebpelihawang dut te menge edtekutaken.

¹⁹ Midsuhù a rin dema su apey ku mepenudtul
 te ini en ke timpu te kebpeliyu te Kerenan ne Eleteala
 te kandin ne menge etew."

²⁰ Ne midlulun ni Hisus ke ebesaan ne in-ulì din diyà te mibehey
 kandin ne mibpinuu sikandin se ebpenurù kandan. Ne langun ne
 menge etew ketà ne rutun dà mepuhuy ke mata ran te kandin su
 ebpemineg. ²¹ Ne migkahi sikandin kayi te kandan te, "Ini se nekah
 rut te impesurat te Eleteala ne mibasa ku ne netuman en gunteani te
 ini ini en iya ne nerineg niyu."

²² Langun dut te nevurun ketà ne nevenaran dut te kebpenuurù din,
 ne negeyip dan dut te keupiya te kedlalag din, ke sikandan te, "Maa,
 kenà anak ni Jose ayan?"

²³ Migkahi si Hisus te, "Ruen beseenan tew ne igkesuati niyu ves te
 egkahi kayi te kedi ini se egkahi te, 'Embiya ebpemawì ka ne etew, ne
 bawii nu ke lawa nu.' Ne seveka maa buwa ne egkekahi niyu te, 'Ruen
 nerineg dey ne mid-ulaula nu riyà te inged ne Kapirnawum, ne kun
 imbe ul-ulaa nu rema kayi te keykew ne inged.' ²⁴ Ugaid," ke si Hisus,
 "ini se igkahi ku keniyu, warà etew ne ebpelambas te Lalag te Eleteala
 ne ebpeminehen te menge etew diyà te kandin ne inged. ²⁵ Benar
 ini se egkehiyen ku keniyu, iring ini se ed-ul-ulaan niyu guntaani rut
 te timpu rengan ne biviyag pà si Elias ke mibpelambas te Lalag te
 Eleteala. Su nekedtetelu ne rahun wey enim ne vulan ne warà uran,
 ne nesuhat te bitil ke langun ne inged din, ne merakel se menge ruma
 tew ne Hudiyansen ne nevalu ne meritan ne ebpengerehenan ketà te
 bitil. ²⁶ Ugaid ne warà ma suhua te Eleteala si Elias te ebpetevangan te
 senge etew kandan, nasì ne impependiyà si Elias te senge etew ne valu
 ne ed-ubpà te Scripta, lusud te Sidun. ²⁷ Ne ruen pà maa," ke si Hisus,
 "gewii rema ni Eliseo te mibpelambas te Lalag te Eleteala ne merakel
 se menge Hudiyansen ne mibpendaru te kevuwa ne muna te it-it. Ugaid
 ne warà seveka kandan ne mibpevawian te Eleteala ki Eliseo, nasì ne
 impependiyà si Eliseo te senge etew ne kenà Hudiyansen ne si Naaman
 lusud te inged ne Siriya."

²⁸ Nerineg dut te menge etew ne nevurun ketà se migkahi ni
 Hisus te edtavang ke Eleteala te kenà Hudiyansen, ne neepes-epes dan
 nevenar. ²⁹ Mid-itindeg dan ne migeweran dan si Hisus ne midtuyuk
 dan se ebpependiyà te puntur te tuhar su ketà metahù ke inged
 dan, ne idtimbag dan perem si Hisus diyà te dempilas. ³⁰ Ugaid ne
 mibpeniyuksiyuk si Hisus diyà te kandan ne midlevundus en se ed-
 ipanew.

*Midsegseg ni Hisus ke Vusew ne Midsuuk te Meama
 (Marcos 1:21-28)*

³¹ Ne midlaus si Hisus diyà te Kapirnawum, inged ne lusud te Geliliya. Ne neuma ke Hewii ne Id-imeley ne mibpenurù din ke menge etew. ³² Nerineg dan ke kebpenurù din, ne neinuinu ran nevenar su ruen gehem te kebpenurù din.

³³ Ketà te valey ne ebpengedian dan te penduan dan ne ruen senge etew ne midsuukan te vusew. Nekita rin dà si Hisus ne migkuleyi te, ³⁴ “Hey Hisus ne riyaw ebpuun te Nesarat, engkey se kememeniyà nu kayi te sikami ne vusew? Maa, edereetan key nikuna? Egkekilala ku sikuna su sikuna ke Berekat ne Anak te Eleteala!”

³⁵ Ne pineengked en ni Hisus ke vusew se egkahi te, “Engked ka rà, ne awà ka keniyan te meama ayan!” Ne intimbag pà dut te vusew ini se meama kayi te etuvangan te menge etew, ne mid-awà sikandin ugaid ne warà din mekeiri ini se meama.

³⁶ Ne rekелà se kinekegeyip dut te langun ne menge etew ketà ne mibpein-inseey ran te, “Engkey ve vuwa ini? Su utew rekелà se gehem din te ebpeawà te menge vusew, ne ebpemineg dan kandin.” ³⁷ Arà dà ne nekeeneb en ke tudtul te mid-ulaula ni Hisus diyà te langun ne nekelingut ne inged.

*Neulian ni Hisus ke Mibpenderaru ne Etew
(Mateo 8:14-17; Marcos 1:29-34)*

³⁸ Guna su mid-awà si Hisus kayi te valey ne ebpengedian te menge Hudiyenan te penduan dan, ne mibpendiyà te valey ni Simon. Seretà din ketà ne edetengen ke enuhang ni Simon ne meritan, ne mibuyù dan ki Hisus te bawii rin. ³⁹ Mid-uvey si Hisus dut te meritan ne pineawà din ke rateng. Arà dà ne neawà en ke rateng din ne mid-enew sikandin ne mid-ilutù en te ibpeakaan kandan.

⁴⁰ Guna su ebpengirum-irum en ne langun ne menge etew ne ruen duma ran ne ebpenderaru te misan engkey en ne daru ne mibpeneheewit dan kayi te ki Hisus. Ne midampen din ke uman senge etew ne neulian en. ⁴¹ Ne misan ke menge vusew ne impeawà din dut te menge etew ne edteverehan dan. Ne embiya ebpeewaan en ini se vusew ne egkuleyi dan te, “Sikuna ke Anak te Eleteala!”

Ugaid ne pineengked ni Hisus sikandan su kenà din idluhut ne edlalag dan su netuenan dan te sikandin ke Impasad te Eleteala rengan ne Ebperetuen te langun.

⁴² Guna su egkeriwaswas en ne mid-awà si Hisus ketà te inged ne mibpendiyà sikandin te sibsiveyan. Mibpemengà sikandin dut te menge etew ne guna su netuen dan sikandin ne imbangen dan perem su apey kenà mekeawà diyà te kandan. ⁴³ Ugaid ne migkahi si Hisus kandan te, “Kenà egkepakey ne kenà ku ibpendiyà te menge etew diyà te ruma ne inged su ibpesabut ku rema kandan ini se Meupiya ne Tudtul mekeatag dut te Impasad te Eleteala ne Ebperetuen te langun su ini ke insuhù kediey te Eleteala.” ⁴⁴ Ketà ne midlevundus en mebpenurù si Hisus diyà te menge valey ne ebpengedian te Hudiyenan diyà te lusud te Hudiya.

5

*Duen Menge Meama ne Mibpemilì ni Hisus ne Edumdumaan Din
(Mateo 4:18-22; Marcos 1:16-20)*

¹ Senge hewii ne riyaw si Hisus te beyvey te ranew ne ed-ingaranan te Ginisarit, ne merakel se etew ne egkeasek su ed-uvvey ran su ebpeamineg dan te Lalag te Eleteala ne ibpenurù din. ² Nekekita si Hisus te deruwa ne avang ne in-ampil diyà te gebgevasan su mid-ewaan pà te menge kemuney su ebpenggasgas te biyala ran. ³ Mid-erà si Hisus diyà te seveka ne avang ne avang ni Simon, ne migkehiyan din si Simon te, "Ibpeturud pà arà se avang din te malù ebpekeriyù dut te beyvey." Ketà ne mibpinuu si Hisus se ibpenurù dut te merakel ne etew.

⁴ Nekeipus si Hisus se ibpenurù ne migkehiyan din si Simon te, "Purai niyu en be ini se avang nu riyaw te kalud ne pemiyala kew en su apey kew ebpekeutel."

⁵ Migkahi si Simon te, "Nepewpewaan key en se ebpeamiyalan ne warà key en iya mekeutel, ugaid embiya arà se kahi nu ne ebpeamiyalan key maa."

⁶ In-antug dan ke biyala ran ne nevenbenaran dan te serà ne neutel dan su reisek samà ne egkereetan ke biyala ran. ⁷ Ne nekekapey ran dut te menge ruma ran diyà te senge evangan su ebpeamung dan. Nekeuma ran ne wey ran intahù kayi te deruwa ne avang ini se serà ne neutel dan ne reisek dà ne egkeered dan en su elin nepenùpenù.

⁸ Nekita rà ni Simon Pedro ini se ned-ulaula ne nekepenimbuel sikandin diyà te etuvangan ni Hisus se egkahi te, "Kenà ka ed-uvvey kedi, Kerenan, su beredusa a ne etew." ⁹ Iyan din kinekahia ketà ne negeyipgeyip neverar sikandin abpeg ke menge ruma rin dut te neutel dan. ¹⁰ Ne neinuinu rema ini se menge ruma ni Simon te ebpeamiyalan ne en si Santiago wey si Juan, ke menge anak ni Sibidu.

Ne migkehiyan ni Hisus si Simon te, "Kenà ka meandek! Engkayi kew en ne duma kew kediey su serà se ebpeamiyalan niyu guntaani, ugaid ne ibpenuruuen ku pà sikiyu te iyan niyu mulà egkeutel ne menge etew ne eduma kedi." ¹¹ Ne in-ampil dan ke menge avang dan diyà te gebgevasan ne mid-ewaan dan en ini langun su miduma ran ki Hisus.

*Neulian ni Hisus ke Senge Etew ne Kevuwaen ne Muna pà te It-it
(Mateo 8:1-4; Marcos 1:40-45)*

¹² Senge hewii ne riyaw si Hisus te inged ne ruen meama ne nelumbus ke lawa rin te kevuwa ne muna pà te it-it. Nekita rin si Hisus ne midnunutnunut en se ed-uvvey kandin ne mibpemuyù en se egkahi te, "Mama, embiya perem egkiyug ke rà ne egkeulian nu ini se meredsik ne sakit ku."

¹³ Arà dà ne midampen ni Hisus ke meama se egkahi te, "Uya, egkiyug a, meulii ka!" Arà dà se nekahi rin ne neawà en ke sakit dut te meama su neulian en. ¹⁴ Ne mid-il-ilutan en ni Hisus te egkahi dut te meama te, "Kenà nu ve imbe kegkehiya ini te misan endei en, ugaid ne riyaw ka tilandeng te terebpelengesa ne ibpekita nu kandin te neulian ke en. Ne ivehey nu ve kandin ke ibpelengesa te Eleteala ne insuhù dengan ni Moises dut te menge etew ne neulian te sakit dan ne kevuwa su apey metueni te langun te neulian ke en."

¹⁵ Ugaid ne nasì en ne nekeeneb ke tudtul mekeatag te mid-ulaula ni Hisus, ne migkuludkulud se menge etew ne mibpengkayi te kandin su ebpeamineg te penurù din wey ebpmewawì te menge raru ran. ¹⁶ Ugaid ne mid-ewaan din ke merakel ne menge etew su mibpendiyà sikandin te tanà ne warà etew rin ne ketà mibpengeningeni.

*Neulian ni Hisus ke Meama ne Minatey se Tevi ne Lawa Rin
(Mateo 9:1-8; Marcos 2:1-12)*

17 Senge hewii ne ebpenurù si Hisus ne ruen menge Peresiyu wey menge meyterù te penduan te Hudiyanan ne midtelavuk ketà. Riyà dan ebpuun te uman inged lusud te Geliliya, ne uman inged lusud te Hudiya, wey diyà dema ebpuun te inged ne Hirusalem. Ne ruen gehem te Eleteala te kebpemawì te raru ne riyà te ki Hisus. 18 Ne ruen nekeuma ne menge etew ne ed-ewit te meama ne ed-id-irehà dà diyà te duyanà ne minatey se tevi ne lawa rin. Edlusud perem ini se menge etew ne edyayung su apey ran igkerenà diyà te sineruhan ni Hisus. 19 Ugaid ne geina te merakel ne etew ne warà egkepeveyaan dan diyà te kandin. Ketà be ne mibatun dan ne midlekatan dan ke atep ne midtuntun dan ini se meama diyà te luuk te menge etew diyà te sineruhan ni Hisus.

20 Guna su netuenan ni Hisus te rekelà ke sarig dan kandin ne migkehiyan din ke ederaru te, “Mama, nepesehad en ke keberedusaan nu.”

21 Guna su nerineg dut te menge meyterù te penduan te Hudiyanan wey ke menge Peresiyu ne ebpinuu ketà ne kehingginawa ran te, “Engkey uvag etawa ini se edsumpalit te Eleteala? Warà etew ne ebpekepesahad te salà embiya kenà ke Eleteala!”

22 Ugaid ne netuenan ni Hisus ke netahù te itungan dan ne migkehiyan din sikandan te, “Meambe ke netahù te itungan niyu se iring keniyan? 23 Endei rapit se melemu,” ke si Hisus, “te egkahi riyà te minatey se lawa rin te, ‘Ke menge salà nu ne nepesehad en’ etawa ve egkahi te, ‘Enew ke en ne luluna nu ke ikam nu ne ipanew ke en?’ 24 Guntaani ne ibpekita ku keniyan,” ke si Hisus, “te ruen gehem dut te Impeanak te Menusiyà te ebpesehad te salà kayi te ampew te dunya.” Ne migkehiyan din en ke meama ne minatey se tevi ne lawa rin te, “Mama, enew ke en ne luluna nu ke ikam nu ne ulì ke en.”

25 Arà dà iya ne mid-enew en ke meama ne midlulun din ke ikam din ne mid-ulì en se edeyù te Eleteala dut te keupiya rin kandin.

26 Langun dan ne netemenengan dan kayi te nekita ran. Ne mideyù dan te Eleteala se egkahi te, “Mekegeyip iya nevenar ini se nekita tew guntean!”

*Mibpemilì ni Hisus si Levi
(Mateo 9:9-13; Marcos 2:13-17)*

27 Guna su neipus ini ne mid-ipanew en si Hisus ne nekita rin ini se senge etew ne meama ne ebpevayad te buwis ne ed-ingeranan ki Levi ne ebpinuu riyà te upisinà din. Ne migkehiyan ni Hisus sikandin te, “Duma ka kedi.” 28 Arà dà ne mid-itindeg si Levi ne mid-ewaan din ke langun su miduma ki Hisus.

29 Ne senge hewii ne mibair si Levi te kevurunan diyà te baley rin su ed-inggaten din si Hisus. Merakel se midtelavuk, ne menge ruma ni Levi ne ebpevayad te buwis wey merakel pà ne etew rema se mibpengaan ne ruma ran. 30 Guna su nekita rut te menge Peresiyu wey ruma ne menge sakup dan ne menge meyterù te penduan ne dutun te uvey te valey ne nevurunan te ini se menge etew ne ebpemeked-erungut ki Hisus ne netegtehaad ne mibpendiyà dan te menge edumdumaan ni Hisus se ebpmivig te, “Meambe ke edseveka

kew se egkaan kayi te menge etew ne ebpevayad te buwis wey ini se menge etew ne mekesesalà?”

³¹ Migkahi si Hisus te, “Ke menge etew ne warà daru ran ne kenà dan ebpegungeyà te terebawì, ugaid ne ke menge etew rà ne duen daru ran. ³² Iring din ded be rema kayi te ini se menge etew su kenà iyan ku kinepengkayi se iyan ku ebpeuvuyen ne ke menge metidtu kun se ulaula ran, ugaid ne apey ebpekedsendit ke menge etew ne meraat se ulaula ran.”

Ke Insà Mekeatag te Menge Edumdumaan ni Hisus ne Edlimpas te Egkaan

(Mateo 9:14-17; Marcos 2:18-22)

³³ Duen menge etew ne mibpengkayi te ki Hisus ne migkahi te, “Duen hewii dut te menge edumdumaan ni Juan ne edlimpas dan te egkaan su apey kenà dan egkevangan dut te kebpengeningeni ran. Ne iring din ded dema ke menge edumdumaan te menge Peresiyo. Ugaid ne keykew ne menge edumdumaan ne kenà edlimpas se egkaan wey ed-inum.”

³⁴ Ne midsempità si Hisus te, “Embiya ruen egkewingan, maa edlimpas be te egkaan ke menge etew ne mid-inggat te ini pà ke ibpengesawa te kandan? Kenà en iya! ³⁵ Ugaid ne ruen hewii ne egkeuma ne egkeawà ke ibpengesawa diyà te kandan, ne ketà pà sikandin edlimpas te egkaan.”

³⁶ Ne ketà maa ne insempità ni Hisus te kenà egkepakey ne ebpegembiten ke behu ne penurù din wey ke raan ne betasan te keep-epuan dan, ke sikandin te, “Warà etew ne ebisey te behu pà ne belegkas su idapi te belegkas ne redit en. Su embiya ini se ed-ul-ulaan din ne midereetan din ke behu ne belegkas, ne ini se dapi ne behu pà ne kenà edait dut te redit en ne velegkas. ³⁷ Ne iring din ded dema,” ke si Hisus, “ke behu pà ne tebà su kenà egkepakey ne riyaw idtahù ini te raan en ne edtehuan ne lundis te kambing. Su embiya ini se ed-ul-ulaan din ne edsevu ke tebà ne ebetu ke raan ne lundis ne midtehuan, ne edturayas ke tebà ne egkereetan dema ke midtehuan ne lundis. ³⁸ Tembù be iyan be kemeyidan ne ke behu pà ne tebà ne idtahù te edtehuan ne behu pà ne mibeelan. ³⁹ Ne warà etew,” ke si Hisus, “ne nekeinum en te raan en ne tebà ne egkiyug ne ed-inum pà te behu ne tebà su egkahi sikandin te, ‘Ke raan en se meupiya ne teba.’”

6

Ke Insà Mekeatag te Hewii ne Id-imeley

(Mateo 12:1-8; Marcos 2:23-28)

¹ Senge hewii ne Sepetu, ke Hewii ne Id-imeley, ne midtarà si Hisus wey ke menge edumdumaan din diyà te pareyanan. Ne gewii ran te edtarà ne ebpengurib ke menge edumdumaan ni Hisus te parey ne idsungit dan. ² Ne ruen ketà menge Peresiyo ne migkahi te, “Meambe ke ed-ul-ulaan niyu ini se ebpekesurang te Penduan tew ne egkahi te warà egelevek te hewii ne id-imeley?”

³ Ne migkahi si Hisus te, “Maa, warà niyu mevasa ke impesurat te Eleteala mekeatag te mid-ulaula ni David, ke datù tew rengan? Su ruen hewii ne sikandin wey ini se menge sundaru rin ne nengevitil dan. ⁴ Ne midlusud si David diyà te insivey ne Valev te Eleteala ne migkuwa

rin ke egkeenen ne indenà diyà te Eleteala ne migkaan sikandin ne mibehayan din ke menge ruma rin. Ugaid ne kayi te penduan tew ne kenà arà egkekaan te piya engkey ne etew su ke menge terebpelengesa rà te Eleteala.”⁵ Ne migkahi pà maa si Hisus te, “Ke Impeanak te Menusiyà ke ebayàbayà te egkahi te engkey se edait ne ed-ul-ulaan dut te Hewii ne Id-imeley.”

Ke Meama ne Nekeyengkeng se Belad Din

(Mateo 12:9-14; Marcos 3:1-6)

⁶ Senge Hewii maa ne Id-imeley ne mibpendiyà si Hisus te valey ne ebpengedian te menge Hudiyanen ne mibpenurù. Ne ruen ketà senge etew ne meama ne nekeyengkeng se kewanan ne velad din.⁷ Duen dema ketà menge Peresiyu wey menge meyterù te penduan ne ebpenipat ki Hisus embiya egkeulian din ini se etew te arà ne hewii ne id-imeley su ebpemengaan dan ke engkey se kegkesuhat dan ki Hisus te kevenar.⁸ Ugaid ne netuenan en ni Hisus ke netahù te itungan dan ne migkehiyan din en ke meama ne nekeyengkeng se velad din te, “Mama, itindeg ka kayi te uvey ku.” Ne mid-itindeg en ke meama ne mid-uvey en ki Hisus.

⁹ Ne migkahi en si Hisus dut te menge etew ne nevurun ketà te, “Duen id-insà ku keniyu: Engkey ma se nekahi te penduan tew ne idtuhut ne ed-ul-ulaan tew te hewii ne id-imeley? Maa, edtavangan tew ke menge ruma tew etawa ebpemekeiran tew sikandan? Maa, edsumpatan tew ke umur te menge ruma tew etawa ed-imetayan tew?”

¹⁰ Ne insihid din ke mata rin dut te langun ne menge etew ne migkehiyan din ke meama ne nekeyengkeng se velad din te, “Mama, ketenga nu ayan se velad nu.” Ne ketà ne migketeng dut te meama ke velad din, ne neulian en.¹¹ Ketà ne nereggreg te langet dan ke menge Peresiyu wey ke menge meyterù te penduan ne mibpein-inseey ran en ke engkey se ed-ul-ulaan dan ki Hisus.

Mibpemilì ni Hisus Ke Sepulù wey Deruwa ne Edumdumaan Din

(Mateo 10:1-4; Marcos 3:13-19)

¹² Nengepiraan ketà ne midtekereg si Hisus diyà te buvungan su ebpengeningen, ne nepewpewaan se kebpengeningen, rin te Eleteala.¹³ Nepawà ne miburun din ke langun ne menge etew ne edurumaruma kandin ne mibpemilì sikandin te sepulù wey deruwa ne edumdumaan din ne mid-ingeranan din te Apustulis.¹⁴ Iyan dan ngaran ini se nepemilì din ne si Simon (ke ed-ingaranan dema ki Pedro) wey ke ari rin ne si Andres, si Santiago wey si Juan, si Felipe wey si Bartolome,¹⁵ si Mateo wey si Tomas, si Santiago ne anak ni Alfeo, wey si Simon (ne ed-ingaranan dema te Patriat ne iyan din meana ne diralem se lengesa rin dut te inged din),¹⁶ si Hudas ne anak ni Santiago wey si Hudas Iskeriyuti ne ed-ulug ki Hisus diyà te menge kunterà din.

Neulian ni Hisus Ke Menge Ebpenderaru

(Mateo 4:23-25)

¹⁷ Ne midtupang si Hisus wey ke menge nepemilì din ne mid-engked dan ketà te malù mepatag. Ne ketà ne ruen nevurun ne merakel ne etew ne edurumaruma kandin wey menge etew ne riyà ebpun te langun ne menge inged lusud te Hudiya, ne riyà ebpun dema te Hirusalim, wey riyà ebpun te menge inged ne Tiru wey Sidun diyà

te beyvey te rahat. ¹⁸ Mibpengkayi ran su ebpemineg te kebpenurù ni Hisus wey ebpevawì dema te menge raru ran. Duen kayi te menge etew ini midtevereg te vusew ne neulian ni Hisus. ¹⁹ Ne langun ne menge etew ne migeram midsinagkew ki Hisus su ruen gehem din ne ketà ebpun te kandin ne ebpekeulì te menge raru dut te langun dan.

Ke Benar ne Kehelawan

(Mateo 5:1-12)

²⁰ Ne midtengtengan ni Hisus ke menge edumdumaan din ne migkahi en te,

“Dayirayi kew ne menge ayuayu,
su sikiyu ke edetuan te Eleteala.

²¹ Dayirayi kew ne menge egkevitil guntaan,
su ebpekevulungan kew te Eleteala keuremà.
Dayirayi kew ne menge egkemutu guntaan,
su egkehalewhalew kew keuremà.

²² Dayirayi kew ke egkeepesan kew te menge etew
ne kenà kew nikandan edsehipaan,
ne ebpennempelaen kew,
wey egkahi ran te mereatey kew
su kayi egenat dut te keduma niyu
ke Impeanak te Menusiyà.”

²³ “Su iring kayi ke imped-ulaula te keep-epuan dan dut te menge etew ne mibpelambas te Lalag te Eleteala rengan. Egkehalew kew ke ini se egketemanan niyu ne id-idangdang kew su dekelà se lalew ne ebpenerengen niyu diyà te langit.

²⁴ Ugaid ne mekeruanduan kew ne menge kewasa guntaan,
su nepehinlelawan niyu ke meupiya ne egketemanan niyu kayi.

²⁵ Mekeruanduan kew ne ebpengevulung guntaan,
su ruen timpu ne egkevitil kew keurema.
Mekeruanduan kew ne nengehalew guntaan,
su ruen timpu ne egkemutu kew
wey ebpekesinehew kew keuremà.

²⁶ Mekeruanduan kew ke edeyuen
dut te langun ne menge rumu niyu,
su ini se mid-ulaula te keep-epuan dan dengan,
su mibpendeyù dan ke mibèbeelan dà
ne mibpelambas te Lalag te Eleteala.”

Ke Penurù ni Hisus Mekeatag te Kedlimù Ta te Menge Kunterà Ta

(Mateo 5:38-48; 7:12a)

²⁷ Ne migkahi pà maa si Hisus te, “Iyan ku igkahi keniyu, langun niyu ne edtaan te telinga niyu, ne limui niyu ke menge kunterà niyu, ne upiani niyu ke hinawa niyu rut te egkengeepes keniyu.

²⁸ Ipengeningeni niyu te ebpeneuvan te Eleteala ke menge etew ne ebpennrawak keniyu, ne ke menge etew ne ed-ayuaya keniyu ne ipengeningeni niyu sikandan. ²⁹ Embiya ruen etew ne edtabpì te naping niyu ne kenà kew bangen ke edtebpien din ke divaluy. Embiya ruen etew ne ed-ahew te kumbalà niyu ne kenà kew bangen ke egkuau din ke belagkas niyu ne kemisita. ³⁰ Embiya ruen etew ne ebuyù keniyu ne behayi niyu, ne embiya ruen etew ne egkuwa te keglehan

niyu ne kenà niyu en ewia. ³¹ Ne misan engkey ne egkiyuhana niyu ne ibped-ulaula te menge etew kenyi, ne iring ketà dema se ul-ulaa niyu riyà te kandan.

³² “Embiya iyan niyu rà igkelimù ke menge etew ne egkelimù kenyi, ne meambe ke ebpenareng kew te kebpenuab te Eleteala kenyi? Su misan ke menge beredusa ne igkelimù dan dema ke menge etew ne egkelimù kandan. ³³ Ne embiya iyan niyu rà ed-upianan ke menge etew ne ed-upiya kenyi, ne meambe ke ebpenareng kew te kebpenuab te Eleteala kenyi? Su misan ke menge beredusa ne ed-upiya ran dema rut te menge etew ne ed-upiya kandan. ³⁴ Ne embiya iyan niyu rà ebpeutangen ke menge etew ne kenà duwaruwa ne ebpekevayad, ne meambe ke ebpenareng kew te kebpenuab te Eleteala? Su misan ke menge beredusa ne ebpeutang dema rut te menge beredusa embiya kenà duwaruwa ne ebpekevayad. ³⁵ Ugaid ne sikiyu, iyan ku igkahi kenyi ne limui niyu ke menge kunterà niyu ne upiani niyu ke ed-ul-ulaaan niyu kandan. Embiya ebpeutang kew ne kenà niyu peginuga te kebpevayad ne ketà ne rekèlè se idlalew kenyi. Su embiya ini se ed-ul-ulaaan niyu, ne egkekita kayi te kenyi te sikiyu ne menge anak en te Eleteala ke mepmepurù te langun. Su melimù ke Eleteala misan diyà te menge etew ne warà te hinawa ran ke tavang din wey ke menge etew ne meraat se ulaula ran. ³⁶ Tembù be keyru kew te ruma ne etew iring dut te kegkeyru te Amey niyu riyà te langit kayi te langun niyu.”

*Ke Penurù ni Hisus Mekeatag te Kedsawey ta
(Mateo 7:1-5)*

³⁷ Ne migkahi pà maa si Hisus te, “Kenà kew edsawey te ruma ne etew, ne kenà kew edsewayan te Eleteala. Kenà niyu imesara te egkahi te nevenaran ke ruma ne etew ne kenà ed-imasad ke Eleteala te egkahi te nevenaran kew. Pesehara niyu ke salà te ruma ne etew ne ebpeseharen te Eleteala ke salà niyu. ³⁸ Behayi niyu ke ruma ne menge etew ne ebehayan kew rema te Eleteala. Ne iyan din ibehey kenyi ne ed-ip-ipuen din ne ed-es-eseken din ne arà pà ne eberundtuwan din ke ibusbus ketà te edtehuan niyu. Su ke kerekelà te ibehey niyu te ruma ne etew ne iyan ded kerekelà te ibehey te Eleteala kenyi.”

³⁹ Ne mibpenempità si Hisus te, “Embiya ruen etew ne pisek, ne kenà egkepakey ne edtuyuk te etew ne pisek ded dema. Su embiya elin dan pisek ne ebpeked-unung dan se egkeulug diyà te lepak. ⁴⁰ Ne warà etew ne ebpenurù pà ne iyan en mepurù dut te ebpenurù kandin, ugaid ne embiya netamat din en ke langun ne impenurù kandin ne ebpekeiring en dut te mibpenurù kandin.”

⁴¹ Ne ruen pà maa migkahi ni Hisus, ke sikandin te, “Meambe ke edturikan nu ke salà te ruma nu ne iring te pesek, ugaid ne warà ma te hinawa nu te ruen salà nu ne iring te gedgeran kerekelà din?

⁴² Engkey se keditikà nu te egkahi riyà te ruma nu te id-awà nu ke pesek din, ugaid ne ruen ma nekepesek kenikew ne iring te gedgeran kerekelà din ne kenà nu egketusan? Engkey en ayan ne kedarütarù! Unai nu pà te ed-awà ke nekepesek kenikew ne iring te gedgaran ne an pà ne ebpekekita ke en ne ebpengawà te pesek te ruma nu.”

*Ke Ulaula te Menge Etew ne Ebpekeiring te Bahas te Kayu
(Mateo 7:16-20; 12:33-35)*

⁴³ Duen pà maa migkahi ni Hisus, ke sikandin te, “Ke kayu ne meupiya se kegueyhuey rin, ne kenà ebahas te meraatey. Ne iring ded maa ke kayu ne ruen sakit din, ne kenà ebahas te meupiya. ⁴⁴ Su piya engkey ne kayu ne kayi nu egketueni te bahas din. Su kenà ebahas ke sepinit te paras, ne kenà ebahas ke merevuaya te igira. ⁴⁵ Ne engketà ded dema se menge etew,” ke si Hisus, “su ke etew ne meupiya se ulaula rin, ne meupiya rema se kedlalag din su meupiya se intahù te hinawa rin. Ugaid ke etew ne mereatey se ulaula rin, ne mereatey rema se kedlalag din su iyan din intahù te hinawa rin ne mereatey. Su piya engkey se intahù te etew te hinawa rin ne ini se egemew te bëbà din.”

*Ke Deruwa ne Etew ne Ebevaley
(Mateo 7:24-27)*

⁴⁶ Ne ruen pà lavew migkahi ni Hisus, ke sikandin te, “Meambe ke layun a niyu ed-ingerani te ‘Kerenan’, ugaid ne kenà kew ma eduma rut te igkahi ku keniyu? ⁴⁷ Idtarem ku keniyu ke engkey se egkeiringan dut te menge etew ne ed-uvey kedì ne ebpemineg te lalag ku ne ebperumduaan dan. ⁴⁸ Embiya idsempita ta ne iring sikandin te etew ne riyà mebevaley te mevaher. Pehaney ne migkekakut sikandin te meralem ne midtehuan din te rekèlà ne batu ne arà pà ne imbunsud din ke pelaus. Nepasad ini se valey ne midalem ke wayig ne nerumpak te wayig ini se valey, ugaid ne waràmekugal ke valey su midtegtelehaman ma. ⁴⁹ Ugaid ne ke etew,” ke si Hisus, “ne ebpemineg kedì ne kenà din ebperumduaan ke lalag ku ne iring sikandin te etew ne riyà mebevaley te ebpengesal-esalen dà diyà te pantad. Nepasad ini se valey ne nerumpak te dalem, ne arà dà ne nerundus en ne newahey en.”

7

*Neulian ni Hisus ke Edsugsuhuen dut te Senge Etew ne Mepurù
(Mateo 8:5-13)*

¹ Nekeipus si Hisus se ebpenurù te menge etew ne mibpendiyà sikandin te inged ne Kapirnawum. ² Duen ketà te inged kepitan ne kenà Hudiyanan ne egkamal te menge sundaru ne ruen edsugsuhuen din ne meama ne egkepesangan su iyan deruwa se kebpatey. Ne dekelà te hinawa te kepitan ini se edsugsuhuen din. ³ Guna su nerineg dut te kepitan se kebpemawì ni Hisus te daru ne midsuhù sikandin te menge pekilukesen ne Hudiyanan su ebpeengayen ki Hisus su apey meulii ini se edsugsuhuen din. ⁴ Nekeuma ran kayi te ki Hisus ne midsebenar dan mibpemuyù kandin se egkahi te, “Metidtevangi arà se kepitan ne dait ne edtevangan nu sikandin. ⁵ Ne kenà deisek dà ke hinawa rin kayi te langun tew ne menge Hudiyanan, su sikandin se mibpeitindeg ketà te valey ne ebpengedian tew.” ⁶ Ne miduma en si Hisus kandan.

Iyan dan kebpelingguma riyà te valey te kepitan ne impesinuhung en dut te kepitan te menge ruma rin ne ini se impekahi rin dut te midsinuhung ki Hisus, “Mama,” ke sikandin, “misan kenà ke en edlaus diyà te valey ku su kenà a dait ne ebpemenayikan nu. ⁷ Tembù be warà a medsinuhung keykew su kenà a rema edait. Dekelà se gehem nu ne misan igkahi nu te, ‘Meulii sikandin,’ ne egkeulian ini se edsugsuhuen ku. ⁸ Nesebutan ku ini su siaken ne ruen mepurù ku ne

meperumaruma a kandin. Ne ruen menge sundaru ne egkemalan ku ne meperumaruma ran kediey. Su egkahi e rà te, 'Diyà kew,' ne iring dan te ebelesiken. Ne engketà ded ke egkahi a te, 'Kayi kew,' ne seperek mata ne kayi ran en. Ne embiya edsuhuen ku ini se edsugsuhuen ku te, 'Ul-ulaa nu ini,' ne arà en iya rema se ed-ul-ulaan din. Iring de be kayi misan edlelehan nu rà ne egkeulian ini se sugsuhuen ku."

⁹ Nerineg ni Hisus ini, ne neinuinu nevenar sikandin. Ne mibengkiring sikandin dut te merakel ne etew ne ed-eguyut kandin ne migkahi en te, "Igkahi ku ini te warà pà mekeuma te etew ne iring kayi kerekèla se sarig din kediey misan kayi te langun ne kevuwaran ni Israyil!" ¹⁰ Miduli en ini se impesinuhung ki Hisus, ne guna su nekeuma ran diyà te valey te kepitán ne neulian en ini se edsugsuhuen.

Mibanew ni Hisus ke Anak ne Meama Dut te Valu ne Meritan

¹¹ Nengepiraan be maa ketà ne mibpendiyà si Hisus te inged ne ed-ingaranan te Nain. Ne denda se menge etew ne miduma kandin abpeg ke menge edumdumaan din. ¹² Guna su ebpingguma ran ketà te belvelakan te inged ne nekesinuhung dan te merakel ne etew ne ebelanting te minatey. Ini se ebelentingan ne minatey ne budtung ne anak ne meama te meritan ne valu, ne merakel se menge etew riyà ebpuun te inged ne miduma kayi te valu te edleveng. ¹³ Nekita ni Hisus ke iney rut te minatey ne neyru nevenar sikandin ne migkahi en te, "Kenà ka edsinehew, Ayà."

¹⁴ Ne mid-uvay en si Hisus ne migeweran din ke lungun ne midindeg ke menge meama ne ebelanting. Ne migkehiyan ni Hisus ke minatey te, "Mama, enew ka!" ¹⁵ Arà dà ne mid-enew en ke minatey ne midlalag en. Ne migkahi en si Hisus kayi te iney rin te, "Ini en, Ayà, ke anak nu."

¹⁶ Langun dan te nekekita ne netemenengan, ne nekereyù dan te Eleteala se egkahi te, "Ini pè be ne neumaan ki te metmetehel ne ebpelambas te Lalag te Eleteala. Benar, impekita te Eleteala ke kedadavang din te ebpeleyu dut te menge etew ne mibpemili din." ¹⁷ Nekeeneb en ini se mid-ulaula ni Hisus kayi te lusud te Hudiya wey riyà dema te nekelingut ne inged.

Ke Menge Midsuhù ni Juan Diyà te ki Hisus

(Mateo 11:2-19)

¹⁸ Guna su nerineg dut te menge edumdumaan ni Juan ke Ebpebunyang ini se langun ne mid-ulaula ni Hisus ne imperineg dan ki Juan diyà te bilengguan. Ne midtawag si Juan te deruwa rut te edumdumaan din, ¹⁹ ne midsuhù din diyà te ki Hisus te ebpeinsà kandin te, "Menu, sikuna ke impesabut ni Juan ne ibpepengkayi te Eleteala etawa ruen duma pà ne egkepenareng dey?"

²⁰ Nekeuma ran ne migkahi ran te, "Iyan dey lakew te mibpengkayi ne midsuhù key ni Juan ke Ebpebunyang su ibpeinsà kenikew ke embiya sikuna en iya ke impesabut din ne ibpepengkayi te Eleteala etawa ruen ruma pà ne egkepenareng dey?"

²¹ Ne arà dema ne hewii ne ruen merakel ne etew ne neulian ni Hisus dut te menge daru ran wey menge sakit. Mibpenegseg din ke menge vusew ne edamung-amung kandan, ne impeulit din ke kebpekekita rut te menge pisek. ²² Ne migkahi si Hisus diyà te menge suhù ni Juan te, "Uli kew en diyà te ki Juan ne penudtula niyu kandin ini se nekita

niyu ne mid-ulaula ku wey ini se nerineg niyu ne migkahi ku. Iyan niyu peketueni kandin ne kayi ebpuun te kediey ne nekeulit en se kebpekekita rut te menge pisek, nekeipanew en ke menge pungkù, neulian en ke menge kevuwaen, nekerineg en ke menge bengel, neuyag en ke menge minatey wey impesabut ku ke Meupiya ne Tudtul diyà te menge ayuayu. ²³ Ne peketueni niyu kandin,” ke si Hisus, “te dayirai nevenar ke etew ne kenà eduwaruwa kediey.”

²⁴ Guna su mid-ulì en ke menge suhù ni Juan ne midlalag en si Hisus mekeatag ki Juan diyà te denda ne menge etew ne nevurun, ke sikandin te, “Ketà te kinependiyà niyu te ki Juan diyà te tanà ne kenà egkeubpaan te menge etew, ne engkey se mibpenareng niyu ne egkekita niyu? Maa, ebpenareng kew te ebpekekita kew te etew ne iring te karan ne edsemsemberen te keramag? ²⁵ Engkey ve iya, etew ne mibevelegkas te nepenù te rayandayan? Kenà buwa su ke etew ne mibevelegkas te iring ketà ne meupiya nevenar se egketemanan din ne riyà niyu rà egkekita te turuhan te menge ratù. ²⁶ Engkey ve iyan se mid-intengan niyu? Engkey, etew ne ebpelambas te Lalag te Eleteala? Arà imbe! Ugaid ne igkahi ku keniyu te arà se nekita niyu ne labi pà dut te etew ne ebpelambas te Lalag te Eleteala. ²⁷ Su si Juan ini ke impeuna kediey ne nekahi te Eleteala rut te impesurat ne Lalag din rengan ne egkahi te,

‘Duen edsuhsuen ku ne ibpeuna ku keykew

te kebpekepenehana rut te menge etew te kebpekeuma nu.’”

²⁸ Ne migkahi pà maa si Hisus te, “Tentenuri niyu ini, warà pà etew ne in-anak kayi te ampew te dunya ne ebpekerepeng ki Juan ke Ebpembunyag. Ugaid ne misan ke kevevaan en ne etew dut te langun ne Edetuan te Eleteala diyà te langit ne labi pà ki Juan.”

²⁹ Ini se migkahi ni Hisus ne nerineg en dut te langun ne etew ketà misan ke menge ebpevayad te buwis ne egkehiyen ne mekebeberedusa. Ne mibpehimbenar dan te metidtu ke menge petiralan te Eleteala ne mibpebunyag dan ki Juan. ³⁰ Ugaid ke menge Peresiyu wey ke menge meyteru te penduan te Hudiyanan ne mid-engkenà dan dut te ibpetuman te Eleteala kandan, ne warà dan mebpebunyag ki Juan.

³¹ Ne migkahi pà maa si Hisus te, “Ini se menge etew te huntanai en, engkey se ebpeiringan ku? ³² Iring dan en iya te menge vatà ne ebpmimpinuu riyà te kevurunan. Ed-umew ini se senge puntuk diyà te menge rumah ran te,

‘Midlebpad key, ugaid ne warà kew medsayew!

Mibminudar key, ugaid ne warà kew medsinehew!’

³³ Iring din ded dema ke kebpekeuma ni Juan ke Ebpembunyag, su nekita niyu te edlimpas te kegkaan si Juan ne kenà dema ed-inum te piya engkey ne ebpeketevereg ne iyan niyu migkahi se, ‘Midsuukan sikandin te vusew!’ ³⁴ Ne mibpengkayi ke Impeanak te Menusiyà ne nekita niyu te migkaan sikandin wey mid-inum ne iyan niyu maa migkahi se, ‘Tengtengi niyu ma ayan se midelungan te bitil! Ne metehel ne ed-inum! Ne teleduma kayi te ebpevayad te buwis wey misan ke menge etew ne kenè en birang.’ ³⁵ Ugaid,” ke si Hisus, “ketà te menge ulaula te menge etew ne tidtu ne mibperetiyyaya te Eleteala ne

nekeheram te limù din ne egkekita te utew metau ke Eleteala te langun ne petiralan din.”

Diyà si Hisus te Baley ni Simon, senge Etew ne Peresiyo

³⁶ Duen senge etew ne Peresiyo ne mid-inggat ki Hisus diyà te valey rin su riyà din ebpekeena. Ne miduma si Hisus kandin ne nekeuma ran ne mibpeer-erungutey ran en se egkaan. ³⁷ Ketà te inged ne ruen senge etew ne meritan ne warà keeleran din. Nerineg din se riyà egkaan si Hisus te valey te Peresiyo ne mibpendiyà sikandin se ed-ewit te pelenaan ne mibeelan te elibastru ne midtehuan te periyemut ne mepurù nevenar. ³⁸ Ne mid-uvey ki Hisus dapit te paa rin se edsinehew ne nengeulug se luwà din kayi te paa ni Hisus. Ketà ne mibusasan din en te bulvul din, ne mid-erekán din, ne mibusasan din en kayi te lana ne meemut nevenar.

³⁹ Nekita kayi te Peresiyo ne mid-inggat ki Hisus, ne ke hingginawa rin te, “Embiya benar ne ebpelambas te Lalag te Eleteala si Hisus ne egketuenan din ke engkey ini se meritan ne edsapu kandin wey ini se warà keeleran din!”

⁴⁰ Ketà ne migkahi en si Hisus kandin te, “Simon, duen igkahi ku kenikew.”

“Ew, engkey?” ke si Simon. “Kehiya nu en.”

⁴¹ Ne mibpenempità si Hisus kandin, ke sikandin te, “Duen deruwa ne etew ne nekeutang diyà te etew ne ebpmemeutang te kureta ne lelima nehatus se mid-utang dut te senge etew, ne mid-utang ke seveka te lelima nepulù ne pirak. ⁴² Ne guna su kenè en ebpekevayad ini se deruwa ne mid-utang ne migkahi ke mid-utangan dan te, ‘Beleharen en ke utang niyu.’ Ne mid-insà si Hisus ki Simon te, ‘Endei rapit kandan ini te deruwa se egkelimù nevenar ketà te meama ne mibpeutang kandan?’”

⁴³ Ke si Simon te, “Arà buwa se dekelà se utang din ne warà din en peveyari.”

Ke si Hisus te, “Arà iya!”

⁴⁴ Midsineruwan ni Hisus ke meritan ne migkehiyan din si Simon te, “Iring ded be imbe kayi te meritan ini. Su mibpemenayik a kayi te valey nu ne warà a nu behayi te ibpepenlìlì te paa ku misan ini ke betasan tew. Ugaid ne sikandin mulà ne midlìluan din te luwà din ke paa ku ne mibusasan din te bulvul din. ⁴⁵ Warà a nu en iya gelhelawa te ked-arek dut te kebpemenayik ku te valey nu misan ini ke betasan tew. Ugaid ne ini mulà se meritan ne mibpulungpulung en mid-arek te paa ku igenat te kebpekeuma ku. ⁴⁶ Warà nu petehisi ke ulu ku te lana misan ini ke betasan tew te kebpeed-edatey. Ugaid ne sikandin mulà ne mibusasan din ke menge paa ku te belielehà ne periyemut. ⁴⁷ Tembù migkahi ku ini,” ke si Hisus, “su misan dekdekelà se salà din ne mibpesahad en te Eleteala su dekdekelà se limù ne impekita rin kediey. Ugaid ke etew ne reisek se keberedusaan din ne mibpesahad te Eleteala, ne reisek dema se limù ne ibpekita rin.”

⁴⁸ Ne migkahi en si Hisus ketà te meritan te, “Mibpesahad en te Eleteala ke keberedusaan nu.”

⁴⁹ Ne ruen netahù te hinawa rut te menge etew ne migkaan ketà ki Hisus, ke hingginawa ran te, “Engkey ini ne etew se ebpekepesehad te keberedusaan te etew?”

⁵⁰ Ne migkahi pà maa si Hisus ketà te meritan te, “Nekeliyu ke en te kedusa te Eleteala te salà nu su kenà duwaruwa ke kedsarig nu te Eleteala. Na, ulì ke en, ne menu ma ke edumaan ka te Eleteala!”

8

Ke Menge Meritan ne Midtuganur ki Hisus

¹ Nengepiraan ne hewii ketà ne mibpendiyà si Hisus te ruma ne menge inged, dekelà wey deisek, ne mibpesebutan din dut te menge etew keta ke Meupiya ne Tudtul mekeatag te Kedetui te Eleteala te menge etew. Ne miduma kandin ke sepulù wey deruwa ne edumdumaan din. ² Duen dema ketà menge meritan ne miduma kandan ne nengeulian te menge daru ran, ne ruma kandan ne pehaney ne mid-em-emungan te vusew ugaid ne midsegseg ni Hisus. Senge etew kandan ne si Maria (ne mid-ingaranan dema ki Magdalena) ne mibpenegsehan ni Hisus te pitu ne vusew. ³ Ne ruen dema ketà si Juana ke esawa ni Kusa, ne midserihan ni Hirudis ke mepurù dan diyà te turuhan din. Si Susana rema wey merakel pà ne meritan ne miduma engki Hisus su edtuganur kandan te egenat te pentiyari ran.

Ke Etew ne Midsawed te Benì (Mateo 13:1-9; Marcos 4:1-9)

⁴ Iring ma te edtevir se menge etew ne mibpengkayi te ki Hisus ne kayi egenat te ebalàbala ne menge inged. Guna su merakel se nevurun ketà ne mibpenempità si Hisus kandan se egkahi te,

⁵ “Ruen etew ne mibpendiyà te pengengewiran din su edsawed te benì. Ne ketà te kinesawed din ne ruen benì ne nengeulug diyà te kilid te ralan ne nengehiekan te etew ne midtuktuk en te menge pepenuk. ⁶ Duen ruma ne insawed din ne riyà nengeulug te kebetuwan. Midtuvù ini ugaid ne mehaan dà ne neebmas su edsahad dà ke wayig. ⁷ Duen dema insawed din ne riyà nengeulug te sepinitan. Ne midtuvù ini ugaid ne migkubmusan en dut te sepinit. ⁸ Duen ded dema insawed din ne riyà nengeulug te meupiya ne tanà ne midtuvù ini ne nekevahas te meupiya su mibpengupiya nevenar se bahas din.”

Ne migkahi pà maa si Hisus te, “Itaan niyu ve ke telinga niyu kayi te nerineg niyu.”

Midseysey ni Hisus ke Atag dut te Menge Sempità (Mateo 13:10-17; Marcos 4:10-12)

⁹ Ne mid-insà ke menge edumdumaan din te, “Engkey se meana rin ini se sempità ne imperineg nu kenami?” ¹⁰ Ne migkahi si Hisus kandan te, “Sikiyu en imbe se ebpesebuten te Eleteala rut te warà din pà impayag te piya engkey ne etew mekeatag dut te kedadù din te menge etew. Ugaid ke ruma ne menge etew ne ibpepevayà te sempità su apey, misan edtengteng dan, ne kenà dan ebpekekita; ne misan egkerineg dan, ne kenà dan egkesebutan ke meana rin.”

Mibpesebutan ni Hisus ke Meana dut te Sempità Mekeatag te Etew ne Midsawed te Benì (Mateo 13:18-23; Marcos 4:13-20)

¹¹ Ne migkahi pà maa si Hisus dut te edumdumaan din te, “Ini se meana rin arà se sempita ku: Ke benì ne insawed dut te etew ne arà ke

Lalag te Eleteala. ¹² Ke ralan ne neuluhan te benì ne arà ke menge etew ne nekerineg te Lalag te Eleteala, ugaid ne midegdehawen ni Setanas ke datù te pekaid te ed-ahew ke lalag su apey kenà dan mekeperetiyyaya ne kenà dan egkepeliyu. ¹³ Ne ke kebetuwan ne neuluhan te benì ne arà ke menge etew ne nekerineg te Lalag te Eleteala ne ingkehalew ran te ebpemineg ne mibperetiyyaya ran, ugaid ne meaan dà se kineperetiyyaya ran su warà mekedalid te hinawa ran. Ne wey ran penggerami ni Setanas dut te peretiyyaya ran ne midlekà dan en. ¹⁴ Ne ke sepitan ne neuluhan te benì ne arà ke menge etew ne nekerineg te Lalag te Eleteala, ugaid ne gewii ran te ebbetindalan ne merakel se egkubmus dut te lalag ne nerineg dan iring te kemutuwan dan te ked-upbà-upbà, ne kegkelilingey ran dut te menge kearen dan, wey ke pegungayà te kebpatà te nanam, ne warà dan en mekeuma te kebehas dan. ¹⁵ Ne ke meupiya ne tanà ne neuluhan te benì, ne arà ke menge etew ne nekerineg te Lalag te Eleteala ne midtelimà dan ne warà dan midsanggel se ebperetiyyaya. Ne mibpenemtemanan dan te edtuman taman te nekeuma ran te kebehas.”

*Ke Sempità ni Hisus Mekeatag te Sulù ne Mibpelengkevan
(Marcos 4:21-25)*

¹⁶ Ne migkahi en maa si Hisus te sempità kandan te, “Warà etew ne midtemtem te sulù ne ebpelengkevan din etawa ibperalung din. Ugaid ne riyà din ibpeluukluuk te saag su apey egkerayahan ke etew ne edlusud.

¹⁷ “Iring din ded dema,” ke si Hisus,
“langun te netelevan guntaani
ne ebpekepehawahawa red
dut te akir din ne hewii.
Ne langun ne impegelesà
ne egkepayahan ded.

¹⁸ Itaan niyu ve ke telinge niyu,” ke si Hisus. “Su ke etew ne idtahù din te hinawa ke ibpesabut kandin te Eleteala, ne ed-umanan pà te Eleteala ini se kebpekesabut din. Ugaid ke etew ne kenà din idtahù te hinawa ke ibpesabut kandin te Eleteala, ne egkeawà arà se reisek ne kunaan din ne nesebutan din en.”

*Ke Impetimbang ni Hisus te Iney Rin wey Menge Suled Din
(Mateo 12:46-50; Marcos 3:31-35)*

¹⁹ Nekeuma en ke iney ni Hisus wey ke menge ari rin ne meama, ugaid ne warà dan mekeuvey ki Hisus su neterektek te etew sikandin. ²⁰ Ne ruen migkahi ki Hisus te, “Ke iney nu wey ke menge ari nu ne riyà te lihewangan su ebpekibalak dan keykew.”

²¹ Ugaid ne migkahi si Hisus dut te menge etew ketà te, “Iyan ku iney wey menge ari ne ke menge etew ne ebpemineg te Lalag te Eleteala wey ebperumdumaan dan.”

*Impeengked ni Hisus ke Keramag Diyà te Ranew
(Mateo 8:23-27; Marcos 4:35-41)*

²² Senge hewii ketà ne migkehiyan ni Hisus ke edumdumaan din te, “Kuwa kiyu en su ed-apet kiyu riyà te ripag te ranew.” Arà dà ne mid-untud dan te avang ne mibpuridtas dan en. ²³ Guna su ed-avang-avang dan en ne midsaharan si Hisus te turug. Ne midtekewtekew en se mevandes ne keramag kayi te ranew ne nesimbuhan en te wayig

ke avang dan, ne reisek samà ne egkeherà dan en. ²⁴ Mid-uvvey ran si Hisus ne mibpukew ran en se egkahi te, "Meyterù, egkeherà ki en!"

Ne mid-enew si Hisus ne pineengked din en ke keramag wey ke dekelà ne baleg. Arà dà ne mid-eneng-eneng en ke keramag wey baleg ne seguguneey ne midlengen ke ranew. ²⁵ Ne migkehiyan din en ke menge edumdumaan din te, "Meambe ke nengeandek-andek kew? Maa kenà kew ves edsarig kediey?"

Ne neandek-andek dan ne neinuinu ran su mibpein-inseey ran te, "Engkey ini ne etew? Su misan ke keramag wey menge baleg ne ebperumaruma rut te lalag din!"

Neulian ni Hisus ke Meama ne Midsuukan te Menge Vusew

(Mateo 8:28-34; Marcos 5:1-20)

²⁶ Ne nekerunggù en ensi Hisus dut te telipag te pruvinsiya te Geliliya, diyà te sakup te inged te menge Gerisiyanu. ²⁷ Guna su migau en si Hisus ketà te avang ne midsinuhung en sikandin te senge etew ne midsuukan te vusew ne andang ne mehinged ketà te Gerisiyanu. Ugaid ne neuhet en ne warà mid-ulì sikandin te ubpaan din su kayi en mid-upbà te menge surung ne penlelevengan ne warà en seseberen din. ²⁸ Nekita rin dà si hisus ne midrawak en ne midlumpeng diyà te sineruhan ni Hisus ne mibensag en se egkahi te, "Sikuna ini si Hisus ke Anak te Eleteala ne warà repenge din. Engkey ma se kememeniyà nu kediey? Isapà nu te etuvangan te Eleteala te kenà a nu pemakeiril!" ²⁹ Ini se mibuyù din su migkehiyan ni Hisus arà se vusew te ibpeawà diyà te meama. Su kenà kepipira rà ewita arà se meama dut te vusew ne ebpemekaid kandin. Ne misan ebekuen ke paa rin wey ke velad din te kedina ne ebentayan te menge etew ne ebpengividetw rin ded ne edewiten en maa sikandin dut te vusew diyà te tanà ne kenà egkeubpaan te etew.

³⁰ Ne migkehiyan en ni Hisus sikandin te, "Engkey ma se ngaran nu?"

Ne midtavak te, "Iyan ku ngaran ne si Selassà." Tembù nekahí rin ini su medmerakel ne vusew se midsuuk kandin. ³¹ Ne mibpemuyù dan ki Hisus te kenà dan ibpeawà ni Hisus se ibpependiyà te egkembusan ne warà edtemanan te keralem din.

³² Ne ruen ketà te uvey medmerakel ne bavuy ne ebpemenumal diyà te kelendihan, ne mibpemuyù ke menge vusew ki Hisus te dutun dan ibpepeawuk te menge bavuy ne midtuhutan dema ni Hisus. ³³ Ketà dà ne mid-ewaan dan en ke meama ne mibpengasuk dan en dut te menge bavuy, ne mibpemelelahuy en ke menge bavuy se ed-umpak diyà te dempilas ne nengelened dan en diyà te ranew.

³⁴ Guna su nekita ini rut te menge etew ne edtuganur ketà te menge bavuy ne mibpemelelahuy ran en su impemenudtul dan ini diyà te inged dan wey ke nekeerivey ne pengengewiran. ³⁵ Nerineg ini rut te menge etew, ne mibayaan dan en su midsusi ran. Nekeuma ran ketà te ki Hisus ne nekita ran en ke meama ne midsuukan te merakel ne vusew pehaney ne riyà mibpinuu te rengdengaan ni Hisus, ne mibevelegkas en ne nekeulit en ke itungan din. Ketà ne nengeandek dan neverar. ³⁶ Ne ini se menge etew ne nekekita rut te mid-ulaula ni Hisus ne impenudtl dan en dut te rumà pà ne etew ke ned-ulaula rut te meama ne midsuukan te menge vusew. ³⁷ Ne langun ne mehinged ketà te Gerisiyanu ne mibpemuyù ki Hisus te menu med-awà sikandin

su neandek dan nevenar. Arà dà ne midlived en si Hisus diyà te avang din su ed-awà en.

³⁸ Ne mibuyù ini se meama ne neulian en diyà te ki Hisus te, “Egkiyug a ne ebpekiduma kenikew.”

Ugaid ne warà imperuma ni Hisus su impeulì din se egkahi te,
³⁹ “Ulì ke en diyà te keniyu ne ipenudtul nu ini se meupiya ne midulaula te Eleteala kenikew.” Arà dà ne mid-ulì en ini se meama ne mibpemenudtul en diyà te langun ne mehinged ini se meupiya ne midulaula ni Hisus kandin.

Neulian ni Hisus ke anak ni Jairo wey ke Meritan ne Mid-amì dà te Belegkas ni Hisus

(Mateo 9:18-26; Marcos 5:21-43)

⁴⁰ Nekeampil be maa si Hisus kayi te mibpuunan din ne migale-whalew kandin ke merakel ne menge etew ne nevurun ketà su daan dan en ne edtahad kandin. ⁴¹ Duen ketà meama ne ed-ingaranan ki Jairo, senge etew ne egkeunutan diyà te valey ne ebpengedian te menge Hudiyanan te penduan dan. Mid-uvvey sikandin ki Hisus ne midlumpeng diyà te etuvangan din se ebpemuyù ki Hisus te ebperuma riyà te valey rin. ⁴² Su ruen budtung ne anak din ne sepulù buwa wey deruwa se rahun din ne edtvilitivil te kepatey.

Miduma si Hisus kandin ne gewii ran te ed-ipanew ne egkeasek kayi te ki Hisus ke merakel ne etew. ⁴³ Ne ruen ketà meritan ne nerasey nevenar su nekedsepulù en wey deruwa ne rahun se kebpemundasa rin te lengesa ne kenà egkeengked. Misan mibpevewian din en te merakel ne terevawì ne warà dan megaga. ⁴⁴ Mibpenelektelek en sikandin diyà te urian ni Hisus ne mid-amì din dà ke belegkas ni Hisus ne netibpek en ke kebpemundasa rin.

⁴⁵ Ne migkahi si Hisus te, “Engkey ma se mid-amì kediey?”

Guna su mibparew ran langun ne migkahi si Pedro te, “Engkey se kegketueni nu, Meyterù, te merakel ne etew ne ebpekelipit kenikew?”

⁴⁶ Ne migkahi si Hisus te, “Duen iya mid-amì kediey su neheram ku ke gehem ku te kebpemawi ne midlihawang kediey.”

⁴⁷ Guna su nerineg kayi te meritan ne mid-amì ki Hisus te netuenan din, ne inlayanglayang ma sikandin te kerker. Ne mid-uvvey rin si Hisus ne midlumpeng en diyà te sineruhan din ne intarem din en ketà te merakel ne etew ke maan ke mid-amì sikandin ki Hisus wey arà dà ne neulian en ke daru rin. ⁴⁸ Ketà ne migkahi si Hisus kandin te, “Bayi, neulian ke en su sabap dut te kinesarig nu kediey. Ulì ke en be ne barasbaras ka dut te keresayan nu.”

⁴⁹ Ne gewii te ebpekidlag pà si Hisus dut te meritan ne ruen en nekeuma ne ibpetundug ki Jairo, ne migkahi te, “Ke anak nu ne nekerudtanà en. Kenà ta en ebpengenen si Hisus.”

⁵⁰ Guna su nerineg ini ni Hisus ne migkehiyan din si Jairo te, “Kenà ka kelagew kayi te anak nu, ugaid ne sarig ke rà kediey ne egkeuyag ded sikandin.”

⁵¹ Guna su nekeuma ran diyà te valey ni Jairo ne iyan din dà impelusud ne si Pedro, wey ke teleari si Santiago ki Juan, wey ke menge lukes dut te vatà. ⁵² Ne langun ne menge etew ketà te valey ne ebpeninehew wey ebpemenderawit dut te vatà. Ne migkahi si Hisus

kandan te, "Kenà kew pè ma edsinehew. Warà minatey ayan se vatà su nekelipereng dà."

⁵³ Nering den dà ke migkahi ni Hisus ne mid-engitan den dà sikandin su netuenan dan te minatey en ke vatà. ⁵⁴ Mid-uvye rin ke vatà ne migeweran din ke velad din ne migkahì te, "Payi, enew ke en." ⁵⁵ Arà dà ne nekesunggud ke hinawa rin ne mid-enew en. Ne migkehiyan ni Hisus ke menge lukes din te pekeena ran ke anak dan. ⁵⁶ Ne nengegeyip nevenar ke menge lukes dut te vatà, ugaid ne mibenduan dan ni Hisus te kenà ibpepenudtul ini se ned-ulaula te misan entei en.

9

*Impeipanew ni Hisus ke Sepulù wey Deruwa ne Edumdumaan Din
(Mateo 10:5-15; Marcos 6:7-13)*

¹ Miburun ni Hisus ke sepulù wey deruwa ne edumdumaan din ne mibeheyen din sikandan te gehem te ebpekeulì te menge daru wey ebpekesegseg dan te menge vusew ne ebpenuuk dut te menge etew. ² Ne impeipanew rin sikandan su ebpesabut te menge etew mekeatag te kedatù te Eleteala kandan wey apey ran mekevawì dema te misan engkey en ne daru. ³ Ne intelaan din kandan te, "Kayi te ked-ipanew niyu ne kenà kew ed-ewit te misan engkey en, kenà kew ewit te tuked, kemuyut, lutù, kureta etawa belegkas te idsambì niyu. ⁴ Ne endei se valey ne ruen edtelimà kenyu ne ketà kew rà rateng taman te ked-awà niyu ketà te inged. ⁵ Ugaid ne embiya ruen menge etew ne warà edtelimà kenyu, ne levundus kew ne pendegdaha niyu ke lipupuk diyà te paa niyu gewii te ed-awà kew ketà te inged dan. Su tuus ini te baag kandan ne kenè en be kilid kenyu ketà te hewii ne kedtimbang te Eleteala kandan," ke si Hisus. ⁶ Ne mid-ipanew en ke menge edumdumaan ne mid-eneb dan te menge inged se ebpesabut te Meupiya ne Tudtul mekeatag te Eleteala wey mibpemawì dan dema te menge etew diyà te langun ne menge inged.

*Ke Guhud Mekeatag te Kinepatey ni Juan ke Ebpmunyag
(Mateo 14:1-12; Marcos 6:14-29)*

⁷ Nekeeneb en ini se tudtul mekeatag te ed-ul-ulaan ni Hisus taman te nekeuma en diyà te ki Hirudis, ke egkeunutan dan diyà te Geliliya. Guna su nerineg ni Hirudis ne neliveg sikandin su ruen menge etew ne migkahi te nevanew red si Juan ke Ebpmunyag. ⁸ Ruen duma ne migkahi te si Elias ini ke mibpelambas te Lalag te Eleteala rengan ne neuyag ded. Duen ruma pà maa ne migkahi te sikandin ini ne senge etew rut te menge mibpelambas te Lalag te Eleteala rengan ne neuyag maa. ⁹ Ugaid ne iyan migkahi ni Hirudis te, "Embiya si Juan, ne impecungel ku en ke ulu rin. Ugaid ne engkey ve etawa ini se egkehiyen dan?" Ketà ne mibpemengà ni Hirudis se ralan te kegkekita rin ki Hisus.

*Pinekaan ni Hisus ke Lelima nengivu ne Etew
(Mateo 14:13-21; Marcos 6:30-44; Juan 6:1-14)*

¹⁰ Guna su mibpengulì ke sepulù wey deruwa ne edumdumaan ni Hisus ne mibpenudtul dan kandin ke langun ne mid-ulaula ran. Ne pineruma rin ke edumdumaan din te sikandan dà diyà te inged ne

ed-ingaranan te Betsaida. ¹¹ Nerineg kayi te merakel ne etew ne nevurun se mid-ipanew en si Hisus ne midtelukun dan. Nekeuma ran ne migalàhalà dan ni Hisus ne mibpesebutan din kandan mekeatag te kedatù te Eleteala kandan, wey mibpemawian din ke menge etew ketà ne ruen daru rin.

¹² Guna su meapun en neveran ne mid-uvay en ki Hisus ke sepulù wey deruwa ne edumdumaan din se egkahi te, “Meapun en ini ne warà dè be menge etew kayi te inged ini. Iyan tumù ne ibpeipanew nu en ini se merakel ne etew su apey ran ebpekependiyà te endei se ruen menge valey rin ne ebpekekuwa ran te egkekaan wey egkeirehaan dan.”

¹³ Ugaid ne migkahi si Hisus te, “Sikiyu se ebpekaan kandan.”

Ne migkahi ran te, “Ini se keytew ne lelima rà ne timan ne pan wey deruwa rà ne timan ne serà. Etawa ebpepemasaen key nu te ibpekaan kayi te denda ne etew?” ¹⁴(Su ketà ne ruen menge lelima nengivu ne meama liyu pà ke meritan batà.)

Ne migkahi si Hisus dut te sepulù wey deruwa ne edumdumaan din te, “Pemepinuwa niyu sikandan te idsenge puntuks te igkarang se menge lelima nepulù.”

¹⁵ Ne ketà ne impepinuu ran en ke langun ne menge etew. ¹⁶ Ne migkuwa ni Hisus ke lelima ne timan ne pan wey ke deruwa ne timan ne serà ne midlingakà sikandin diyà te langit ne impeselamat din te Eleteala. Ne mibpenevitevi din ne imbehey rin en dut te menge edumdumaan din su ibpetukid dut te merakel ne etew. ¹⁷ Migkaan dan langun ne nengevulung dan. Guna su nekeipus dan se egkaan ne mibpunpun dut te sepulù wey deruwa ne edumdumaan din ke nengesamà, ne iyan din nepunpunan ne sepulù wey deruwa ne binevey se nengepenù.

*Ke In-insà ni Hisus dut te Edumdumaan Din ke Engkey Sikandin
(Mateo 16:13-19; Marcos 8:27-29)*

¹⁸ Senge hewii maa ne mibpengeningi si Hisus te sebseveka rin ne riyà te uvay rin ke menge edumdumaan din. Ne mid-insaan din sikandan te, “Engkey a kun ma riyà te pegitungan te menge etew?”

¹⁹ Ne midtavak dan te, “Ruen egkahi te sikuna si Juan ke Ebpmunyag, ne ruen duma ne egkahi te sikuna si Elias ke mibpelambas te Lalag te Eleteala rengan, ne ruen pà ruma ne egkahi te sikuna ke seveka ne mibpelambas te Lalag te Eleteala rengan ne nevanew maa.”

²⁰ “Ne menu sikiyu?” ke si Hisus. “Engkey e ma diyà te pegitungan niyu?”

Ne midtavak si Pedro te, “Sikuna si Kristu ke midtendù te Eleteala ne ebperetuen dut te menge etew.”

²¹ Ne migkehiyan ni Hisus tegtehami sikandan te kenà dan ibpenudtul ini te misan entei ne etew.

*Migkahi en ni Hisus ke Kebpatey Rin
(Mateo 16:20-28; Marcos 8:30-9:1)*

²² Ne migkahi maa si Hisus dut te menge edumdumaan din te, “Ke Impeanak te Menusiyà ne edresayen neveran. Su ebpeheweran din dut te menge egkeunutan te Hudiyanan, ke menge mepurù te terebpelengesa wey ke menge meyterù te penduan. Ed-imetayan sikandin ugaid ne ketà te iketelu ne hewii ne egkevanew red.”

²³ Ne migkahi pà maa si Hisus kandan langun te, “Embiya ruen etew ne egkiyug ne eduma kediey ne iyan iya se pekelipati rin ke kandin ne kiyug, ne tianga rin ke kandin ne pinebelavag ne kayu ne ed-ingaranan te krus ne iyan din meana ne tumana rin ke menge suhù ku misan ibpatey rin pà se keduma rin kediey. ²⁴ Su ke etew ne egkenuhun te umur din ne ebpatey lavew, ugaid ke etew ne iyan din ibpatey se keduma rin kediey te kebpemesabut dut te Meupiya ne Tudtul, ne ruen umur ne ibehey kandin ne warà edtemanan din. ²⁵ Su misan duen etew ne ebpekeangkun te langun kayi te ampew te dunya, ne warà lalew rin embiya egkerasey ke himukud din diyà te apuy ne rakà. ²⁶ Embiya ruen etew ne igkeyeyai a rin wey ini se ibpenurù ku kayi te ini ne timpu ne merakel ne menge etew ne mekesesalà wey edsumpalit te Eleteala, ne igkeyeyai rema sikandin dut te Impeanak te Menusiyà ketà te kedlived din kayi te ampew te dunya. Su ketà ne hewii ne ruen raman din ne riyà ebpnuun te Amey rin ne Eleteala, ne edumaan din dema rut te menge berekat ne suluhuen diyà te langit. ²⁷ Tentenuri niyu ini, ruen ruma tew kayi ne kenà pà ebpatey taman ketà te hewii ne egkekita ran ke Kedetui te Eleteala rut te menge etew.”

*Midsalin Nevenar ni Hisus Ke Paras Din
(Mateo 17:1-8; Marcos 9:2-8)*

²⁸ Guna su nekedsenge pedian en igenat te kinekahini Hisus ketà, ne pineruma rin en ensi Pedro, si Juan, wey si Santiago te edtekereg diyà te buvungan su ebpengeningeni. ²⁹ Gewii ni Hisus te ebpengeningeni ne nesalin ke paras dut te buked din. Ne mibpeneringsing ke velegkas din te keputi su warà misan engkey ne kayi te dunya ne ebpekemeputiiring kayi. ³⁰ Netekew ran en dema nekita se deruwa ne etew ne ebpekidlag ki Hisus, si Moises wey si Elias, ke menge mibpelambas te Lalag te Eleteala rengan. ³¹ Ne mibpengandlag ke kesihey ran dema ne iyan dan edlelahen ki Hisus ne mehaan din en edtumana ke suhù kandin te Eleteala te ebpebpatay diyà te inged ne Hirusalim. ³² Ugaid ne si Pedro wey ke menge ruma rin ne nekelipereng dan, ne guna su nekehimerat dan en ne nekita ran ke kesihey ni Hisus wey ke deruwa ne etew ne uvey rin. ³³ Ne gewii te ed-awà ke deruwa ne etew riyà te ki Hisus ne migkahi si Pedro te, “Meyerù, meupiya su kayi ki! Edsesabung key te tetelu, seveka keykew, seveka ki Moises, wey seveka rema ki Elias.” (Ugaid ne matag be migkahi si Pedro te iring ketà ne warà din metueni ke engkey se egkehiyen din.)

³⁴ Ketà te edlalag pà si Pedro ne ruen sehulapun ne nekelikuvung kandan ne neandek dan te nesukub dan en te sehulapun. ³⁵ Ne ruen suwara ne ketà ebpnuun te sehulapun ne migkahi te, “Ini ke Anak ku ne mibpemili ku. Pemineha niyu ke edlelahen din.” ³⁶ Neipus ke suwara ne iyan den dà nekita ne si Hisus. Ketà te arà ne hewii te kebpekeruma pà ni Hisus kandan ne warà dan kegkehiya ini se nekita ran te misan senge etew rà.

*Neulian ni Hisus ke Vatà ne Midsuukan te Busew
(Mateo 17:14-18; Marcos 9:14-27)*

³⁷ Ne midtundug ketà ne hewii ne midtupang dan ketà te buvungan ne merakel se menge etew ne mid-alew ki Hisus. ³⁸ Duen senge etew ne meama ketà te menge etew ne nevurun ne midtawag ki Hisus se egkahi te, “Meyerù, menu ke intengi nu pà ini se anak ku ne

meama su budtung dà ini. ³⁹ Ne ruen busew ne edsuuk kandin ne embiya egkeumaan sikandin ne edtekew ne egkuleyì ne egkehurivid ke lawa rin taman te eburvuraen ke bèbà din. Merasirasi edsuuk ke vusew kandin ne egkekeiran en sikandin. ⁴⁰ Ne mibpemuyù ku rut te edumdumaan nu te ibpesegseg ini se vusew, ugaid ne warà dan ma megaga.”

⁴¹ Migkahi si Hisus te, “Sikiyu ne menge etew guntaan, warà kebperetiaya niyu te Eleteala wey menge suer kew!” ke sikandin. “Neuhet en se kebpekiduma ku keniyu, ne engkey pà taman se kebperetiaya niyu? Wey engkey pà taman se keuhet din se kedtigkeri ku keniyu?” Ne migkahi si Hisus dut te amey te vatà te, “Ipengkayi nu ke anak nu.”

⁴² Ne gewii te ed-ewiten dan ke batà kayi te ki Hisus ne midsuuk en maa ke vusew kandin ne nepiley sikandin ne nehurivid en ke lawa rin. Ugaid ne midsegseg ni Hisus ke vusew, ne neulian din ke vatà, ne in-ulì din diyà te amey rin. ⁴³ Ne negeyip ke langun ne menge etew ketà dut te mid-ulaula ni Hisus su nekita ran ke gehem te Eleteala.

*Migkahi pà maa ni Hisus ke Kebpatey Rin
(Mateo 17:22-23; Marcos 9:20-32)*

Kemuluwan pà ne egkegeyip ke langun ne menge etew rut te mid-ulaula ni Hisus ne migkahi si Hisus diyà te edumdumaan din te, ⁴⁴ “Itaan niyu ke telinga niyu kayi te ini se egkehiyen ku keniyu, ebpuliren ke Impeanak te Menusiyà dut te menge kunterà din.” ⁴⁵ Ugaid ne warà dan mesebuti ke meana rut te migkahi ni Hisus kandan, ne neandek dan te ed-insà.

Mibpein-inseey Ke Menge Edumdumaan ni Hisus ke Engkey Kandan Se Mepurù

(Mateo 18:1-5; Marcos 9:33-37)

⁴⁶ Ne mibpelewlewaney ke menge edumdumaan ni Hisus ke engkey kandan se mepurù. ⁴⁷ Ugaid ne netuenan ni Hisus ke menge pegitungan dan, ne ketà ne migkuwa rin se vatà ne impeitindeg din diyà te uvey rin. ⁴⁸ Ne migkahi en te, “Misan engkey ne etew se edtelimà te vatà iring kayi su atag te keduma rin kediey, ne midtelimà dema sikandin kediey. Ne misan engkey ne etew ne edtelimà kediey, ne kenà siak dà se midtelimà din su misan ke Amey ku ne Eleteala ne midsuhù kediey ne midtelimà din dema. Su misan engkey en keniyu se keveaan su sabap te egkesuhùsuhù te menge ruma rin, ne sikandin ke tidtu ne mepurù keniyu.”

*Ke Etew ne Kenà Egkunterà Kenitew ne Ruma Tew
(Marcos 9:38-40)*

⁴⁹ Ne migkahi si Juan ki Hisus te, “Meyterù, duen etew ne neuma rey ne ebpenegseg te vusew te ibpepevayà dut te gehem te ngaran nu, ne midawey rey sikandin su kenà tew ma ruma.”

⁵⁰ Ugaid ne migkahi si Hisus kandin te, “Kenà niyu sikandin edewaya su warà etew ne ebpekeval te mekegeyip te ibpepevayà te ngaran ku ne melemu ne edlalag te mereatey mekeatag kediey. Su ke etew ne kenà ebpekidunterà keytew ne ruma tew.”

Warà Telimaa si Hisus diyà te Seveka ne Inged Lusud te Semeriya

⁵¹ Guna su egkereniyen en ke hewii te kebpekeawà ni Hisus kayi te ampew te dunya su ed-ulì en diyà te langit ne mibpedtihel din ke hinawa rin te ebpendiyà te inged ne Hirusalim ne ketà ne migenat dan en. ⁵² Duen menge etew ne pineuna rin su ebpemengà te egkeretengan dan ne migenat dan en. Mibpendiyà dan te seveka ne inged lusud te Semeriya su ebpenehana te kebpekeuma en ni Hisus. ⁵³ Ugaid ne ke mehinged ketà ne warà midtelimà ki Hisus su netuenan dan se riyà edsinaru sikandin te inged ne Hirusalim. ⁵⁴ Guna su nekita ini rut te edumduamaan ne si Santiago wey si Juan se warà bes edtelimà kandan ne migkehiyan dan si Hisus te, “Menu, egkiyug ka, Meyterù, ne ebuyù key te apuy riyà te langit ne ibpetanà kandan su apey langun dan ne egkeherà?”

⁵⁵ Ugaid ne middilingey si Hisus kandan ne midawey rin, ⁵⁶ ne midlevundus dan en diyà te rumah ne inged.

*Ke Menge Etew Ne Deisek dà ne Ebpekerumaen ki Hisus
(Mateo 8:19-22)*

⁵⁷ Gewii ran te ed-ipanew ne ruen etew ne migkahi ki Hisus te, “Eduma a kenikew misan ebpependei ka.”

⁵⁸ Ne migkahi si Hisus kandin te, “Ke menge laku ne ruen takub ne ed-ul-ulian dan, ke menge pepenuk ne ruen kandan ne salag, ugaid ne ke Impeanak te Menusiyà ne misan endei ad memekeirehà su warà ubpaan din.”

⁵⁹ Ne migkahi maa si Hisus diyà te senge etew te, “Duma ka kediey.”

Ugaid ne migkahi ini se meama te, “Ed-ulì e pà ne embiya egkepupusan en te ebpeneytayen ke amey ku ne arà pà ne eduma a kenikew, su siaken ded se edleveng kandin.”

⁶⁰ Ne migkahi si Hisus te, “Iyan nu pelevenga rut te minatey ke menge rumah nu ne kenà ebperetiyyaya kediey, ugaid ne iyan ku ibpehelevuk kenikew ne ebpesabut dut te Meupiya ne Tudtul mekeatag te Kedatù te Eleteala te menge etew.”

⁶¹ Ne ruen pà maa senge etew ne migkahi te, “Mama, eduma a kenikew, ugaid ne ebpemehetew e pà diyà te bevelayan ku.”

⁶² Ne migkahi si Hisus te, “Embiya ruen etew ne edadu ne ebpulung edlilingey, ne kenà meupiya arà. Ne iring din ded dema,” ke si Hisus, “ke etew ne eduma kediey, embiya ebpulung edlilingey dut te netehak din ne kenà sikandin edait ne egelevek dut te menge etew ne edetuan te Eleteala.”

10

Mibpemilì si Hisus te Pitu Nepulù wey Deruwa ne Etew ne Impipanew Rin

¹ Guna su neipus arà ne ruen pitu nepulù ne rumah pà ne menge meama ne mibpemilì te Kerenan ne impeipanew rin ini te igeheruwa riyà te langun ne menge inged ne mehaan din ebayai. ² Ne migkehiyan din sikandan te, “Medmarkel se menge etew ne warà pà meketelimà dut te Meupiya ne Tudtul mekeatag te Eleteala. Iring sikandan te melutuen ne pareyanan. Meluag nevenar ini se pareyanan, ugaid ne warà utew rumah rut te ebpengehani. Pemuyù kew riyà te Eleteala ke kemuney rut te pareyanan te medsuhù pà sikandin te rumah ne edehani diyà te pareyanan din. ³ Na, genat kew en, ugaid uram kew su

edsuhuen ku sikiyu riyà te menge etew ne ebpekekaid, ne iring kew te nati te bilibili ne ebpekeseruk diyà te senge ingeren en ne mewalew ne asu.⁴ Kenà kew ewit te kureta, kempiru, etawa telumpà ne idsambì. Ne kenà kew edlanganlangan te ebpekibpengasak dut te langun ne menge etew ne egkeuma niyu riyà te ralan.

⁵ “Ne piya engkey ki baley se egkepemenayikan niyu ne penehetiat kew se egkahi te, ‘Menu ma ebpeneuven te Eleteala ke langun ne ed-ubpà kayi te valey ini!’⁶ Embiya ruen ketà te valey ebperetiyaya wey egalàhalà keniyu ne dekelà se penaub te Eleteala kandan. Ugaid ne embiya kenà kew ran egelhelaan ne kenà edlaus kandan ke kebpenaub te Eleteala.⁷ Ubpà kew ketà te valey ne ruen migalàhalà keniyu taman te egkeuma ke ked-awà niyu ketà te inged dan. Kenà kew ed-arat-arat te ked-ubpà niyu. Ne telimaa niyu misan engkey se idsaru ran wey ibpeinum dan keniyu su mehelalew ran en keniyu. Su ke etew ne egelevek ne dait ne edsukayan.

⁸ “Piya endei ne inged se egkeumaan niyu ne ruen egalàhalà keniyu, ne telimaa niyu misan engkey se idsaru ran keniyu.⁹ Pemawii niyu ke menge ebpenderaru ketà te inged. Ne kehiya niyu rut te menge etew ketà te inged te mehaan en ke hewii te Kedatù te Eleteala kandan.¹⁰ Ugaid ne embiya ebpekeuma kew riyà te inged ne warà egalàhalà keniyu, ne pendiyà kew te ralan ne kahi kew riyà te menge etew te,¹¹ ‘Mibpemunas dey en ini se lipupuk te inged niyu ne mideket te paa rey su tuus ini te kenà en kilid kenami ketà te hewii ne kedimbang te Eleteala keniyu. Ugaid ne iyan niyu tentenuri ne mehaan en ke gewii te Kedatù te Eleteala dut te menge etew.’¹² Ugaid ne idtarem ku keniyu,” ke si Hisus, “muna pà ke kedusai te Eleteala kandan ketà te hewii ne kedimbang din te menusiyà dut te kinerusa rin te menge mehinged riyà te Sudum.”

*Ke menge Etew ne Warà Mebperetiyaya ne Mekeandek-andek se Egketemanan Dan
(Mateo 11:20-24)*

¹³ Ne migkahi maa si Hisus te, “Sikiyu ne menge etew riyà te inged ne Kurasin, mekeandek-andek se egketemanan niyu! Ne sikiyu te inged ne Bitsaida, mekeandek-andek dema se egketemanan niyu! Su embiya ke menge etew rà diyà te menge inged ne Tiru wey Sudum se nekekita kayi te mekegeyip ne mid-ulaula ku riyà te keniyu ne neuhet dà ne mid-ewaan dan en ke meraat ne ulaula ran ne mibevelegkas dan en te sakù ne mid-evuwan dan ke ulu ran su tuus te nekedsendit dan.¹⁴ Ketà te hewii ne kedimbang te Eleteala te menusiyà ne iyan pà dekelà ke kedusa te Eleteala keniyu rut te mehinged te Tiru wey Sidun.¹⁵ Ne sikiyu rema ne menge etew diyà te inged ne Kapirnawum,” ke si Hisus, “egkesuat kew perem ne ebpekesugkur diyà te langit, ugaid ne ibpetimbag kew riyà te apuy ne rakà.”

¹⁶ Ne migkehiyan ni Hisus ke pitu nepulù ne ebpeipenawen din te, “Ke menge etew ne ebpemineg te ibpenurù niyu ne iring te iyan a ran ebpeminehen. Ne engkey se kenà edtelimà keniyu ne iring te iyan a rin warà telimaa. Ne engkey se kenà edtelimà kediey ne iyan din warà telimaa ke Eleteala ne midsuhù kediey.”

Ke Kineulì Dut te Pitu nepulù wey Deruwa

¹⁷ Guna su mid-ulì ke pitu nepulù wey deruwa ne midsuhù ni Hisus, ne nengesuatsuat dan nevenar! Migkahi ran diyà te ki Hisus te, “Kerenan, misan ke vusew ne mibperumaruma te lalag dey ke ibpeawà dey te ibpepevayà te ngaran nu.”

¹⁸ Ne migkahi si Hisus kandan te, “Nekita ku si Setanas ke datù te pekaid ne neulug diyà ebpuun te langit ne iring te kilat se kegkeulug din. ¹⁹ Tentenuri niyu te mibehayan ku en sikiyu te gehem su apey misan ebpekehiek kew te uled etawa awa ne kenà kew egkevisaan. Kenà kew egketalew rut te kevaher te datù te pekaid, ne warè en ebpekekaid keniyu. ²⁰ Ugaid ne kenà iyan niyu igkehalew se ebperumaruma ke vusew keniyu,” ke se Hisus, “ugaid ne iyan niyu ikehalew ne impesurat en te Eleteala ke menge ngaran niyu riyà te langit.”

*Pinehalew si Hisus dut te Kedesenan ne Ebpetuntul te Menusiyà
(Mateo 11:25-27; 13:16-17)*

²¹ Ketà ne hewii ne mibpehalew si Hisus dut te kedlumun te Kedesenan ne Ebpetuntul te menusiyà ne mideyù din ke Eleteala se egkahi te, “Ew Amà, sikuna ke Kerenan diyà te langit wey kayi rema te ampew te dunya. Dekelà se kebpeselamat ku kenikew su impayag nu ke ketau nu rut te menge etew ne warà egketütuenan dan, ne in-eles nu ini se ketau nu rut te menge etew ne dekelà se netuenan dan. Uya, dekelà se kedeyù ku keykew, Amà, te ini se mid-ulaula nu su ini ke kiyug nu.”

²² Ne migkahi maa si Hisus dut te menge etew te, “Ke Amey ku se mibpesarig kediey te langun taman. Warà netau kedi te Anak a te Eleteala liyu rà te Amey ku ne Eleteala. Ne warà netau te Amey ku ne Eleteala liyu rà te siaken ne Anak din wey ke menge etew ne egkiyuhan ku te ebpayag mekeatag dut te Amey ku.”

²³ Ne midsinaru si Hisus dut te menge edumdumaan din te sikandin dà se middlehan din te, “Dayirayi kew su nekita niyu ini se ibpehelevek te Eleteala kedi. ²⁴ Su benar ini se egkehiyen ku keniyu te kenà pira rà se ebpelambas te Lalag te Eleteala wey ke menge mepurù dengan ne egkesuat perem ne ed-inteng kayi te nengekita niyu te gunteani en, ugaid ne warà dan en mekita. Ne egkesuat dan perem ne ebpmineg kayi te nengerineg niyu te gunteani en, ugaid ne warà dan en mekerineg.”

Ke Sempità ni Hisus Mekeatag te Meupiya ne Etew ne Riyà Ebpuun te Inged ne Semeriya

²⁵ Ne senge hewii maa ne ruen senge etew ne meyterù te penduan se mibpengkayi te ki Hisus su edseligkat perem te menge insà din. Ke sikandin te, “Meyterù, engkey se ed-ul-ulaan ku su apey a mevehayi te umur ne warà edtemanan din?”

²⁶ Ne migkahi si Hisus te, “Engkey se impesurat ne penduan te Eleteala ne intelaan ni Moises? Engkey se egkesebutan nu rut te kebasa nu ketà?”

²⁷ Ne migkahi ke meama te, “Iamin nu ke hinawa nu te edlimù te Kerenan ne Eleteala nu, ne iamin nu ke baher nu wey itungan nu te ed-ulaula ke engkey se ebpekesuhat te hinawa rin’ wey ‘Ikelimù nu ke ruma nu iring te kegkelimù nu te hinawa nu.’”

²⁸ Ne migkahi si Hisus te, “Benar ini se migkahi nu. Ul-ulaa nu ve ini ne egkevehayan ka te umur ne warà edtemanan din.”

²⁹ Ugaid ne kenà egkiyug ini se meyterù te penduan ne egkepilayan te pengasak ne ketà ne mid-insà en maa te, “Engkey se ruma ku?”

³⁰ Ne midtavak si Hisus te impepevayà te sempità, ke sikandin te, “Duen senge etew ne Hudiyanan ne riyà ebpuun te Hirusalim ne ebpetupang kayi te inged ne Hiriku. Kayi te ralan ne ruen neuma rin ne menge tulisan ne midruug kandin ne pinegkedew ran sikandin ne wey ran ewai ne igelimbeka rè be se hinawa rin. ³¹ Guna su mid-ewaan en dut te menge tulisan ne ruen senge etew ne Hudiyanan ne terebpelengesa te Eleteala ne mibpevayà ketà te ralan. Ugaid ne nekita rin dà ini se etew ne nekeid-irehà dutun te ralan, ne mid-elihu rin ne midlevundus en se ed-ipanew. ³² Ne engketà ded maa se senge etew ne mibpevayà ketà te ralan ne Hudiyanan ded dema, ne kevuwaran ni Levi ne iyan din helevek ne ed-amung dut te menge terebpelengesa diyà te Nekebpuru ne Valey te Eleteala. Nekeuma ne nekita rin ded dema ini se etew ne nekeid-irehà dutun te ralan, ne mid-elihu rin ded dema ne midlevundus en se ed-ipanew. ³³ Warà dà meuhet ne ruen en maa senge etew ne nekeuma ne mibpevayà ketà te ralan ne kenà Hudiyanan su mehinged te Semeriya. Nekita rin dà ini se meama ne nekeid-irehà ketà te ralan ne midaat se nanam din. ³⁴ Mid-uvvey rin en ne mibawian din ke menge palì te lana wey vinu ne mibagkes din. Nepasad din te ebawì ne midsepuwat din diyà te kudà din ne mibpeneheewit din diyà te valey ne ed-eranan ne rutun din maa tugenura. ³⁵ Nepawà ne mibehey sikandin te kureta rut te kemuney te valey se egkahi te, ‘Tugenura nu pè be kedì ini se meama. Embyia ruen pà igkegastu nu kandin ne id-ulì ku rà kenikew ketà te kedlived ku.’”

³⁶ Ne migkahi si Hisus ketà te meyterù te penduan te, “Endei rapit kayi te tetelu ne meama se meupiya ne ruma ketà te meama ne midruug te tulisan?”

³⁷ Ne migkahi ke meyterù te, “Arà se neyru kandin se meupiya ne ruma rin.”

Ne migkahi si Hisus te, “Ini ve se iringi nu.”

Mibpenumbaley si Hisus diyà te engki Marta wey Maria

³⁸ Gewii te edlevundus en ensi Hisus te ked-ipanew ran ne nekeuma ran ketà te senge inged. Ne ruen ketà meritan ne ed-ingaranan ki Marta ne mibpememenayik kandan diyà te baley rin. ³⁹ Duen ari rin ne ed-ingaranan ki Maria. Ne mibpinpinuu si Maria ini riyà te uvey ni Hisus su ebpemineg te penurù din. ⁴⁰ Ne si Marta ne warà kebpinuu rin su sikandin dè be se ed-elugan te kegkaan dan. Ne ketà ne mid-uvvey rin si Hisus se egkahi te, “Menu warà nu metuusi, Mama, te ebpedterayen e rà kenian te ari ku se egelevek kayi te avu? Kehiyi nu pà si Maria te ebpeemungen kedi.”

⁴¹ Ugaid ne migkahi si Hisus te, “Sikuna, Marta, merakel utew se igkeuru nu ne kenà beripantag. ⁴² Ugaid ne seveka rà se beripantag. Ne iyan nepemilì ni Maria ini se meupiya ne kenà egkeawà kayi te kandin.”

11

*Mibpenurù si Hisus Mekeatag te Kebpengeningeni
(Mateo 6:9-13; 7:7-11)*

¹ Senge hewii ne mibpengeningeni si Hisus ketà te andang ne ebpengeningeniyen din. Nekeipus sikandin se ebpengeningeni ne migkahi ini se senge etew ne edumdumaan din te, “Mama, penurua key te eppengeningeni iring ki Juan te mibpenurù din ke menge edumdumaan din.”

² Ne migkahi si Hisus kandan te, “Kayi te kebpengeningeni niyu ne iringa niyu kayi,

‘Ah, Amà, berekat ne edati te menusiyà ke ngaran nu.

Ne berekat ne edatù ka rut te langun ne menusiyà.

³ Behayi key te sesangen ne egkekaan dey te uman andew.

⁴ Ne pesehara nu ke salà dey, su ebpesaharen dey rema ke langun ne nekedsalà kenami.

Ne ipekeriyù key nikuna dut te menge mevaher ne penggeram.’ ”

⁵ Ne migkahi maa si Hisus dut te edumdumaan din te, “Upama ke ruen senge etew kenyi se ebpendiyà te sepakat din te metaneb ne kerukileman se egkahi te, ‘E, Mama, pesembaya e pà nikuna te egkekaan, ⁶ su ruen meheliyug ku ne riyà ebpuun te meriyù ne midaran kayi te kenami ne warà idsaru ku kandin.’ ”

⁷ “Ne ketà ne edtavak sikandin diyà te lusud te valey te, ‘Ebpeke-lipereng ad mulà ini. Mibpintuan ku en ini se gumawan ku wey nekelipereng en ini se menge anak ku kayi te ulid ku. Kenà ad ebpekeenew te ebehey keykew.’ ⁸ Idtarem ku kenyi,” ke si Hisus, “te misan sepakat ka rin ne kenà ed-enew sikandin se ebehey keykew. Ugaid ne embiya kenà ka ed-engked se ebuyù, ne ebpekeenew red sikandin se ebehey keykew te ebuyuen nu.

⁹ “Tembù be,” ke si Hisus, “ibpesabut ku ini kenyi, pemuyù kew riyà te Eleteala ne ebehayan kew rin. Pemengà kew ne ruen arà egketuen niyu. Penehetiat kew ne ebpuwasan kew rin. ¹⁰ Su langun ne ebpembuyù diyà te Eleteala ne ebehayan, ne sika ebpmengà ne ebaketuen, ne sika ebpenehetiat ne ebpuwasan te Eleteala kandin.

¹¹ “Menu sikiyu ne menge lukes,” ke si Hisus, “embiya ebuyuan ka te anak nu te serà, maa uled se ibehey nu? ¹² Etawa ebuyuan ka rin te etelug, maa awa se ibehey nu? ¹³ Sikiyu ne menusiyà ne kenà metidtu ne metau kew ne ebehey te meupiya riyà te anak niyu, na iyan pè be ke Amey niyu ne Eleteala riyà te langit kenà mebehey keykew te kedlumun dut te Kedesenan ne Ebpetuntul te Menusiyà embiya ebpembuyù kew riyà te kandin.”

Iyan Kunaan te Menge Ethew ne Riyà Ebpuun te Unuten te Vusew ini se Gehem ni Hisus

(Mateo 12:22-30; Marcos 3:20-27)

¹⁴ Ruen hewii ne midsegseg ni Hisus ke vusew ne mibpemekaid te etew te kegkeemew rin. Guna su neawà en ke vusew ne arà dà ne nekelalag en ke meama, ne negeyip neverar ke menge etew ne nevurun ketà. ¹⁵ Ugaid ne ruen migkahi te, “Si Belsibul, ke unuten te

menge vusew se mibehey kandin te gehem te kebpenegseg te menge vusew.”¹⁶ Ne ruen pà rumu ne ebpenggeram ki Hisus ne mibuyuan dan si Hisus te mebpekitu kandan te mekegeyip su apey ran egketueni ke riyà ebpuun si Hisus te Eleteala.

¹⁷ Ugaid ne netuenan ni Hisus ke netahù te itungan dan ne migkahi en te, “Upama ke ruen datù te inged ne ed-uney ebpevuneeey ke menge sakup din, ne egketunggad arà se inged din. Ne iring din ded dema ke ruen telteleanan ne ed-uney egkewaha, ne warà ebpengkusan din ke kenà egkevurahey.¹⁸ Iring din ded be ketà ke midetuan ni Setanas ke unuten te menge vusew, embiya ed-uney ebpevunuey ke sakup din ne kenà meuhet se kedadù din su egketunggad arà se edetuan din. Migkahi niyu te iyan ku kebpenegseg te vusew ne mibehayan a ni Belsbul ke unuten te menge vusew te gehem din.¹⁹ Embiya benar ne iyan ku ibpenegseg te vusew ke gehem ni Belisbul, ne endei ve ebpuun ke gehem dut te edumaruma keniyu te ebpenegseg te vusew? Sikandan be ayan se ebpekekahi te warà mekesuhat ke egkehiyen niyu.²⁰ Ugaid ne iyan benar ne riyà ebpuun te Eleteala ini se gehem ku te ebpenegseg te vusew. Ne kayi ve ne egketuenan niyu te neuma en ke hewii te Kedadù te Eleteala keniyu.”

*Midsempità si Hisus su Ibpekita Rin te Dekelà Pà ke Gehem te Eleteala
Rut te ki Setanas ke Datù te Pekaid*

²¹ Migkahi si Hisus te, “Upama ke ruen mevaher ne etew ne ruen metarem din ne ebentayan en ke valey rin, ne warà etew ne ebpekelusud te valey rin su ebpenakew te kearen din.²² Ugaid ne embiya ruen mevaher pà ne etew ne edsulung ne ebpeketalew kandin wey egkeahew en ke metarem ne edserihan dut te etew ketà te valey, ne langun dut te netavan din ne egkepengumun-umun din en dut te menge rumu rin.”

²³ Ne migkahi maa si Hisus te, “Ke etew ne kenà ku rumu ne kunterà ku, ne ke etew ne kenà ed-amung kediey te eburun kayi te menge etew ne ebpemburahey.”

*Ke Kedlivet te Busew dut te Etew ne Midsuukan Din
(Mateo 12:43-45)*

²⁴ Ne migkahi pà maa si Hisus te, “Embiya ruen busew ne edsuk te etew ne ed-awà en, ne riyà ebpevayà te memara ne tanà su ebpmengà te ubpaan din. Ne embiya warà egketuen din ne iyan egketahù te hinawa rin se, ‘Edliveran ku red ke mid-ubpaan ku.’²⁵ Nekeuma ini se vusew, ne nekita rin te metilak en wey nekeulit en ke langun ketà te lusud.²⁶ Ne midlihawang pà sikandin ne med-ewit te pitu ne vusew ne tuwas pà kandin keraat, ne langun dan ne ketà dà mid-ubpà. Ne ini se egketemanan ketà te etew ne muna pà se kepasang din dut te neuna.”

Ke Lalag ni Hisus Mekeatag te Tidtu ne Kehelawan

²⁷ Nekeipus si Hisus se edlalag kayi, ne ruen meritan ketà te nevurun ne merahing se kinekahai rin te, “Dekelà se kehelawan dut te meritan ne mid-anak wey mibpesusu keykew.”

²⁸ Ugaid ne iyan migkahi ni Hisus se, “Iyan pè be dekelà se kehelawan dut te etew ne ebpmineg te Lalag te Eleteala wey ebperumduaan din.”

*Ke Menge Etew ne Layun Ebuyù te tuus Ke Riyà Ebpuun te Eleteala
Si Hisus
(Mateo 12:38-42)*

²⁹ Gewii te egkeasek en ke merakel ne etew riyà te ki Hisus ne migkehiyan din sikandan te, “Sikiyu ne menge etew te guntaani en, mereatey nevenar se menge ulaula niyu ne warà kebperetiyaya niyu te Eleteala! Iyan niyù ebpmengaan se mekegeyip ne tuus te gehem ku. Ugaid ne warà en ma tuus ne ibpekita kenyi liyu rà ketà te netemanan ni Jonas ne mibpelambas te Lalag te Eleteala rengan. ³⁰ Su iring te nekeuma si Jonas diyà te inged ne Ninivi rengan ne impekita rin dut te menge etew ketà ke tuus te kedusa te Eleteala, ne iring din ded dema te sikandin ne Impeanak te Menusiyà ke tuus kayi te kenyi ne menge etew te guntaani en. ³¹ Ketà te akir din ne hewii te keddimbang te Eleteala te menusiyà,” ke si Hisus, “duen Bai rengan ne riyà ebpuun te inged ne Siba ne ed-itindeg ne ed-isuhat te kewagib dut te sikiyu ne menge etew guntaan. Su mibpengkayi sikandin se riyà ebpuun te divaluy te pehiliran su apey mekerineg dà ki Salomon ke Ratù dengaan ne metmetau. Ne ruen en guntaan seveka ne mepurù pà ki Salomon ne ini en te kenyi, ugaid ne kenà niyu edtelimaan ke penurù din. ³² Uya, ketà te akir din ne hewii ne keddimbang te Eleteala te menusiyà,” ke si Hisus, “ne ed-itindeg ini se menge etew ne riyà ebpuun te Niniva rengan su ed-isuhat kenyi te kewagib. Su sikandan mulà ne nerineg dan dà ke Lalag te Eleteala ne impesabut ni Jonas kandan ne nekedsendit dan ne mid-ewaan dan en ke meraat ne mid-ulaula ran. Ne guntaan ne ruen mepurù pà ki Jonas ne kayi te kenyi, ugaid ne kenà niyu edtelimaan ke penurù din ne kenà kew ebpedsendit te meraat ne ulaula niyu.”

*Ke Sempità ni Hisus Mekeatag te Engkey se Ebpekerayag te Lawa ta
(Mateo 5:15; 6:22-23)*

³³ Ne migkahi maa si Hisus te sempità kandan te, “Warà etew ne edtemtem te sulù ne ebpelengkevan din etawa ibperalung din. Ugaid ne riyà din ibpeluuikluuk te saag su apey egkerayahan ke langun. ³⁴ Ke mata te etew ne iring te sulù dut te lawa rin su embiya merayag se keddingteng din ne iyan din meana ne metidtu se ulaula rin, ne iring te egkerayahan ke langun ne lawa rin. Ugaid ne embiya edsehulepunen se keddingteng din ne iyan din meana ne mereatey se ulaula rin, ne iring te egkerusireman ke langun ne lawa rin. ³⁵ Tembù be uram kew ke ini se egkehiyen nu ne kerayag te lawa nu ne kerusirem bes. ³⁶ Su embiya egkerayahan ke langun ne lawa nu ne warà misan deisek dà ne kerusireman, ne medmerayag nevenar ke lawa nu iring te egketeyawan ka te sulù.”

*Mid-insà Ke Menge Peresiyo ki Hisus ke Meambe ke Kenà Eduma
Ke Menge Edumduaan Din Dut te Betasan te Keep-epuan Dan ne
Hudiyenan Mekeatag te Kebpenlùlù*

(Mateo 23:1-36; Marcos 12:38-40)

³⁷ Nekeipus en si Hisus se eddalag ne ruen senge etew ne Peresiyo ne mid-inggat kandin te egkaan diyà te valey rin. Ne miduma en rema si Hisus ne mibpinuu en se egkaan. ³⁸ Nekita dut te menge Peresiyo te warà midlùlù si Hisus te warà pà sikandin mekekaan ne neinuinu ran nevenar.

³⁹ Ne migkahi si Hisus kandan te, “Sikiyu ne menge Peresiyu, iring kew te menge basu wey pelatu ne migkulisungan su apey melinis kew kayi te egkekita, ugaid ne kayi te diralem niyu ne meredsik su nepenù te kegkeeram-am wey kereatey! ⁴⁰ Menge warà eperu niyu!” ke si Hisus. “Maa, warà niyu metueni te kenà iyan dà midlimbag te Eleteala ke egkekita kayi te lihewangan su misan ini se kayi te lusud ne kenà egkekita ne midlimbag din ded dema. ⁴¹ Ugaid ne umuni niyu ke menge ayuayu dut te intahù niyu te menge basu wey pelatu niyu ne ebmelinis kew te kenà kayi rà te lihewangan su kayi rema te lusud te hinawa niyu.

⁴² “Iyan kew rà mekeyruwiru ne menge Peresiyu!” ke si Hisus. “Su ebehey kew te Eleteala te kandin ne umun ne ikesepulù dut te pinemula niyu ne peninù iring te tandlad wey bawing, ugaid ne warà te hinawa niyu ke egkiyuhan te Eleteala ne ketidu te ulaula niyu riyà te menge ruma niyu wey ke kedlimù niyu te Eleteala. Benar ne ebehey kew te Eleteala te kandin ne umun ugaid ne warà niyu ma iya tumana ke didis en dut te penurù te Penduan.

⁴³ “Iyan kew rà mekeyruwiru ne menge Peresiyu!” ke si Hisus. “Su riyà te baley ne ebpengedian te penduan te Hudiyanan ne ebpemili kew te ebpinuuwan te sineruwan, ne embiya riyà kew te pedian ne iyan niyu igkesuat ne ed-edatan kew.

⁴⁴ “Iyan kew rà mekeyruwiru! Su iyan niyu egkeupamaan ne leveng ne warà kudal din ne egiekan te etew te warà dan metuusi ne ebpekereraat kandan su ebpekehuru ran dut te meraat ne ulaula niyu.”

⁴⁵ Duen senge etew ketà ne meyterù te penduan ne migkahi ki Hisus te, “Meyterù, arà se lalag nu ne nesuhat key red dema.”

⁴⁶ Ne migkahi si Hisus kandin te, “Ne sikiyu rema ne menge meyterù te penduan, mekeyruwiru kew rema! Ebpekevehatan niyu ke menge etew te menge penduan ne kenà dan en egkegaga ne edtuman, ugaid ne sikiyu ne warà misan deisek dà ne idtavang niyu kandan te edtuman ketà.

⁴⁷ “Iyan kew rà mekeyruwiru! Su mideyreyanan niyu ke menge leveng dut te mibpelambas te Lalag te Eleteala rengan, ugaid ne keniyu ma ne keep-epuan ke mid-imatey kandan. ⁴⁸ Ini se mid-ulaula niyu ne tuus te seveka kew red dut te ulaula te keep-epuan niyu rengan. Su sikandin ke mid-imatey dut te menge mibpelambas te Lalag te Eleteala rengan ne sikiyu ke midayandayan dut te leveng dan. ⁴⁹ Ne geina te metmetau ke Eleteala ne ruen migkahi rin dengan mekeatag ini, ke sikandin te, ‘Edsuhù a te menge etew diyà te kandan te ebpelembasan ku te Lalag ku wey kedserihan ku te ebpemenudtul mekeatag kediey, ne ruen duma ne ed-imeteyan dan ne ruen duma ne ebpendreseyan dan.’ ⁵⁰ Tembù be sikiyu ne menge etew guntaan ne igkeragkes kew te Eleteala te kedusa rin dut te kineimatey ran dengan te menge etew ne mibpelambas te Lalag din, igenat te rudsuan te kelibutan. ⁵¹ Edusaan kew te Eleteala dut te kineimatey dengan te langun ne menge etew ne mibpelambas te lalag din igenat dut te kineimatey ki Abel taman en dut te kineimatey ki Zacarias ke mid-imetayan diyà te elet te edenaan te ibpelengesa te Eleteala wey ke mibpeheletan diyà te Nekebpuru ne Valey te Eleteala. Uya, benar ini se egkehiyen ku,” ke si Hisus, “sikiyu

se menge etew guntaan, igkeragkes kew te Eleteala te kedusa rin dut te kinepengimatey ran dengan.

⁵² “Iyan kew rà mekeyruwiru ne menge meyterù te penduan! Su ed-elangan niyu ke menge etew su apey ran kenà mekesabut te benar ne ralan dan diyà te Eleteala. Sikiyu ne kenà kew edlusud dut te benar ne ibayà diyà te Eleteala, ne ed-alang kew pà maa rut te etew ne egkesuat ne edlusud ketà.”

⁵³ Guna su mid-awà si Hisus ketà te valey te Peresiyu, ne midligpitan en sikandin dut te menge Peresiyu wey ke menge meyterù te penduan, ne merakel se in-insà dan ki Hisus, ⁵⁴ su ebpemengaan dan se kegkesaut dan ki Hisus su apey ruen idwagib dan kandin.

12

Ke Meraat ne Ulaula Dut te Menge Peresiyu ne Impeiring ni Hisus te Ibpelevag te Pan

(Mateo 10:26-27)

¹ Keta ne hewii ne denda ne menge etew se nevurun su ebpe-mekedtekutakey ran en. Ne rutun ne migkahi si Hisus, ugaid ne iyan din edlelehan ke menge edumdumaan din, ke sikandin te, “Ingati niyu te kenà kew egkepeneheewit rut te menge ulaula te menge Peresiyu su ibpekitakita ran dà ke ulaula ran diyà te etuvangan te menge etew su iring ini rut te ibpelevag te pan ne ed-eneb.

² Langun te netelevan guntaani,
ne ebpekepehawahawa red keuremà.
Ne langun ne impegelesà,
ne egkepayahan ded.

³ Langun ne impeleglelahay niyu te merusirem
ne igkepayag ded te meandew.

Ne misan engkey se impevutbutehey niyu te sikiyu rà
ne egkevukayat ded diyà te kerekelan te etew.”

Engkey se Dait ne Igkeendeki?

(Mateo 10:28-31)

⁴ “Menge suled ku,” ke si Hisus, “iyan ku igkahi keniyu ne kenà kew meandek dut te menge etew ne iyan dà egkepatey se lawa niyu, ugaid ne warà en ubpu te ed-ul-ulaan dan su kenà dan egkepatey ke himukud niyu. ⁵ Ugaid, ne idtarem ku keniyu ke engkey se ikeandek niyu. Iyan niyu ikeandek ne Eleteala su kenà lawa niyu rà se egkepatey rin su ruen gehem din te kebpekeantug te himukud niyu riyà te apuy ne rakà. Uya, iyan niyu iya ikeandek sikandin.”

⁶ Migkahi pa maa si Hisus te, “Ruen deisek ne pepenuk ne egkepemasa te lelima ne timan ne deruwa rà ne tumbaha. Ne misan iring ketà se kevavà te elehà din, ne warà seveka rà kandan ne egkelipatan te Eleteala. ⁷ Ne iyan kew pè be melipati te Eleteala su misan ke editiweruwan te bulvul niyu ne nevirang din en. Engketà be ne kenà kew meandek su iyan kew pà belielehà diyà te kandin dut te merakel ne pepenuk.”

Ke Imbaag ni Hisus Mekeatag Dut te Menge Etew ne Ebparew Kandin
(Mateo 10:32-33; 12:32; 10:19-20)

8 “Ne ruen idtarem ku keniyu,” ke si Hisus, “piya engkey en ne etew se ebpayag diyà te menge etew se ebpesakup kediey ne iyan ibpayag dut te Impeanak te Menusiyà diyà te suluhuen te Eleteala diyà te langit ne ed-engkunen sikandin ne kandin ne sakup. ⁹ Ugaid,” ke si Hisus, “piya engkey ne etew se ebpawer diyà te menge etew te sakup ku sikandin, ne kenà rema ed-engkunen ne sakup dut te Impeanak te Menusiyà diyà te menge suluhuen te Eleteala diyà te langit.

10 “Ne misan engkey en ne etew se edlalag te meraat mekeatag te Impeanak te Menusiyà, ne egkepesahad pà te Eleteala. Ugaid,” ke si Hisus, “piya engkey ne etew ne edlalag te meraat mekeatag te Kedesenan ne Ebpetuntul te menusiyà ne kenè en egkepesehad te Eleteala.

11 “Ne embiya ibpemenayik kew nikandan te kukuman diyà te menge valey ne ebpengedian te penduan dan etawa ibpelaus ke pà diyà te menge gubinedur wey egkeunutan dan ne kenà kew meuru ke ebmemenuwen niyu se kedlag niyu te kedindeg te hinawa niyu wey engkey se ralan te kegkahi niyu. ¹² Su iyan ebpenerù keniyu gewii niyu ketà ne ke Kedesenan ne Ebpetuntul te Menusiyà su ebpeketahù te hinawa niyu ke engkey se ibpekahi rin.”

Ke Sempità ni Hisus Mekeatag te Kewasa ne Etew ugaid ne Diyà te Etuvangan te Eleteala ne Kurang nevenar

13 Duen senge etew ne meama ketà te nevurun se migkahi diyà te ki Hisus te, “Meyterù, kehiyi nu ke kakey ku te ebpeumunan a dut te aren ne intavun te amey rey.”

14 Migkahi si Hisus te, “Ey, Mama, warà kewagib ku te egkukum keniyu, ne warà kewagib ku te ebaad ketà te aren ne intavun te amey nu.” ¹⁵ Ne midlalag en si Hisus ketà te merakel ne etew te, “Uram kew wey inteng kew te ulaula niyu te warà kegkeeram-am niyu. Su ke tidtu ne puunan te kegkeuyag te etew ne kenà diyà te kearen ne egeweran din.”

16 Ne intarem en ni Hisus ini se impepevayà te sempita: “Duen senge etew ne kewasa nevenar ne ruen tanà din ne egkepekeyan te keuyahan. ¹⁷ Ne kehingginawa kayi te etew te, ‘Engkey se ed-ululaan ku kayi te langun ne egkepakey ku? Su kenà egkeamin kayi te balungbalung ne warè en edtehan. ¹⁸ A, ini ves,’ ke sikandin, ‘edrundusen ku pà ini se menge balungbalung ne ebelayan ku te rekèlè pà su apey ruen egketehuan ku te langun ne egkeehani ku wey ruma pà ne kearen ku. ¹⁹ Ne arà pè be imbe ne egkehiyen ku te: Bebegian a ne meama! Su neketahù a te rekèlè ne keuyahan taman te pipira pà ne rahun. Ne ketà ne edsinendangan a se egkaan, ed-inum, wey ebpatà dà imbe te nanam.’”

20 “Ugaid ne migkehiyan sikandin te Eleteala te Merupangdupang ka nevenar! Ini rà ne kerukileman ne kayi rà taman se ked-upbàupbà nu kayi te ampew te dunya. Ne engkey ve vuwa se kemuney keniyen te kearen ne intahù nu?” ”

21 Ne migkahi pà maa si Hisus te, “Ini ve imbe ke egketemanaan dut te piya entei ne etew ne ed-umanan din te edtehan te kearen din, ugaid ne warà te hinawa rin ke egkiyuhan te Eleteala.”

*Ke Kebpenurù ni Hisus Mekeatag te Kedsarig te Eleteala
(Mateo 6:25-34)*

²² Ne migkahi en si Hisus diyà te menge edumdumaan din te, “Ini imbe ke igkahi ku kenyi, kenà kew meuru te egkekaan ne igkeuyag niyu etawa ke engkey se ibelegkas te lawa niyu. ²³ Su ke hinawa niyu ne imbehey kenyi te Eleteala ne belielehà pà te egkekaan, ne ke lawa niyu rema ne imbehey kenyi te Eleteala ne belielehà pà te velegkas. ²⁴ Kenyan niyu rè ma te menge uwak, warà kebpemula ran ne warà ked-ehani ran, ne warà edtehuan dan te egkekaan dan, ugaid ne Eleteala se ebpesavud kandan! Ne iyan kew pè be se belielehà kew pà dut te menge pepenuk! ²⁵ Misan engkey en se kegkenuhun te etew te umur din, ne kenà din egkesumpatan te misan deisek dà te ralan te kegkeuru rin. ²⁶ Embiya kenà niyu egkegaga ini se reisek dà, ne maa engkey ve se pantag din se kegkeuru niyu te ruma pà?

²⁷ “Kenyan niyu rè ma te kevukaran ke engkey se kedtuvù dan. Kenà dan egelevek ne kenà dan ed-avel. Ne misan iring ketà ne igkahi ku kenyi te misan ke kewasa ne datù dengan ne si Salomon ne ke keupiya te velegkas din ne warà dà mekesusuluwan dut te keupiya te seveka kenyan ne kevukaran. ²⁸ Embiya Eleteala se ebpebparas te kevukaran te sagbet iring ketà misan mehaan dà se kedtuvù dan su egkekita niyu guntaan ne keremà ne nehangu en ne egkevinsulan en, ne iyan kew pè be kenà mevehayi te igkevevelegkas niyu. Sikiyu ne deisek se kedsarig niyu! ²⁹ Ketà be ne kenà kew meuru, ne kenà iyan niyu rà idtahù te hinawa niyu ke engkey se egkekaan wey egkeinum niyu. ³⁰ Su ini imbe ke layun intahù te hinawa rut te menge etew ne warà mebperetiyaya rut te benar ne Eleteala. Ugaid ne sikiyu ne kenà kew meuru su netuenan dut te Amey niyu ne Eleteala te engkey se kurang niyu. ³¹ Ne iyan niyu ipeuna te hinawa niyu ke kiyug te Eleteala wey ke kedatù din kenyi, ne arà pà ne ebehayan kew te Eleteala te langun te kurang niyu.”

Ke Penurù ni Hisus Mekeatag te Edtehuan Tew te Kekewesai tew Riyà te Langit

(Mateo 6:19-21)

³² “Sikiyu ini se menge edumdumaan ku,” ke si Hisus, “kenà kew meandek, su misan deisek kew rà ne ke Amey niyu riyà te langit ne egkiyug ne egkeratù kew dut te menge etew ne Edetuan din. ³³ Pesaa niyu en ke langun ne kearen niyu ne ipemehey niyu ve ke elehà din diyà te menge ayuayu. Embiya ini se ed-ul-ulaan niyu ne egkevaluy ne ruen kekewesai niyu riyà te langit su iring te ruen intahù te keletidà niyu riyà te langit ne kenà egkereving, ne kenà egkeamin ke kekewesai niyu su warà ebpenakew ne warà rumpew ne egketket. ³⁴ Su piya endei niyu idtahù ke kekewesai niyu ne ketà dema ke hinawa niyu.”

Warà Metueni Ke Hewii Etawa Uras te Kedlived Kayi te Dunya ni Hisus

³⁵ Ne mibpenempità si Hisus se egkahi te, “Sesebitan kew neraan ne iyan din meana ne andam kew te misan engkey ne egketemanan, ne kenà niyu ed-evuki ke sulù niyu, ³⁶ su iring kew te menge edsugsuhuen ne edtahad te kebpekeuma te ebpengemuney kandan ne riyà ebpuun te egkewingan ne midtelavuk din. Su embiya layun kew ebpenehana neraan, ne ebpekeuma ke ebpengemuney kenyi ne ebpenehetiat, ne mehaan kew ebpekebukà te lekeb. ³⁷ Meupiya nevenar se hinawa rut

te menge edsugsuhuen ne neumaan dut te ebpengemuney kandan ne warà midlipereng su mid-andam neraan. Igkahi ku keniyu ini,” ke si Hisus, “se ini se ebpengemuney ne edsembian din ke belegkas din ne ebpepinuuwen din sikandan diyà te egkeenan ne ebpehendaran sikandan. ³⁸ Meupiya nevenar se hinawa rut te menge edsugsuhuen ne neumaan dut te ebpengemuney kandan ne mid-andam neraan misan ebpekeuma sikandin te edluuk se hewii te merukilem etawa egkepkepawà en. ³⁹ Ugaid ne ini se idtahù niyu te hinawa,” ke si Hisus, “embiya ebpekeingat ke kemuney te valey ke keenu ebpekeuma ke tekawen ne ebpenehana neraan sikandin su apey kenà ebpekelusud te valey rin ke ebpenakew. ⁴⁰ Ne engketà kew red dema, penehana kew neraan su ebpekeuma ke Impeanak te Menusiyà dut te kenà niyu ebpenerengen ne egketehuan te andew.”

*Ke Sempità ni Hisus Mekeatag te Edsugsuhuen ne Ebpekemalen ne Meperumaruma te Idsuhù kandin wey ke Kenà Meperumaruma
(Mateo 24:45-51)*

⁴¹ Guna su nerineg dan ini se midlalag ni Hisus ne migkahi si Pedro te, “Ini se impelevayà nu te sempità nu ne engkey, sikami se egkesuhat etawa abpeg ded ke rumah ne etew?”

⁴² Ne midtavak si Hisus ke Kerenan te sempita ded, ke sikandin te, “Ke edsugsuhuen ne egkedserihan wey metmetau su edtuman te idsuhù kandin, ne ebpekemalen en dut te rumah ne edsugsuhuen. Ne sikandin se ebehey te egkekaan dut te rumah ne edsugsuhuen ketà te kegkekaan dan. ⁴³ Meupiya nevenar se hinawa ketà te edsugsuhuen ne ebpekemalen ke ebpekeuma ke ebpengemuney kandin ne iyan din egkekita se midtuman din ke langun ne insarig kandin! ⁴⁴ Idtarem ku keniyu,” ke si Hisus, “ini se edsugsuhuen ne ebpekemalen ne midtuman te langun ne insarig kandin, ne sikandin en se ebpekekamal dut te langun ne kearen te ebpengemuney kandin. ⁴⁵ Ugaid ne embiya iyan netahù te hinawa kayi te edsugsuhuen ne ebpekemalen se, ‘A, kalu ke meuhet pà ebpekeuma ke ebpengemuney kenami,’ ke sikandin, ne ketà ne mißpemedasan din en ke rumah ne edsugsuhuen ne meama abpeg ke menge meritan ne migkaakan dè be sikandin wey ebpenginum taman te egketevereg en, ⁴⁶ ne ketà ne netekew mekeuma ini se ebpengemuney kandin te hewii ne warà din penerenga su warà din metueni ke endei egketahù ke andew te kedlived din. Ne ed-imetayan dut te ebpengemuney kandin ne ebpeheramen sikandin dut te egketemanan te menge etew ne kenà meperumaruma te Lalag te Eleteala.

⁴⁷ “Ke edsugsuhuen ne netuenan din ke insarig kandin ne helevek,” ke si Hisus, “ugaid ne warà mebpenehana wey warà medtuman dut te insarig kandin ne ebpeketimaran te ebadas. ⁴⁸ Ugaid ne ke edsugsuhuen ne warà din metueni neraan ke engkey se ibpehelevek te ebpengemuney kandin ne ruen mid-ulaula rin ne dait ne ibedasi kandin, ne ebendasan sikandin ugaid ne kenà dà utew ebpeketimaran. Su ke etew,” ke si Hisus, “ne rekèlà se insarig kandin ne rekèlà dema se egkepenareng kandin. Ne embiya dekdekelà pà se insarig kandin ne iyan pè be kenà dekelà pà se egkepenareng kandin.”

*Ke Kebperetiyaya ki Hisus ke Puunan te Kebpemekedsinggey te Hinawa dut te Telteleanak
(Mateo 10:34-36)*

⁴⁹ Migkahi maa si Hisus te, “Iyan ku kinepengkayi te ampew te dunya su ed-ewit a te apuy ne iyan din meana ne egkukumen ku ke menge etew. Ne kiyug ku perem ne mehaan en egkeretemi. ⁵⁰ Dekelà pà se kemeresan ne ibpevayà ku ne warà pà mekeuma kediey. Iring a te ebpekeutuk te langit taman kenà ku mepasad ini. ⁵¹ Maa, iyan niyu kunaan ke ini se kinepengkayi ku ne ed-ewit a te kebmelinew kayi te kelibutan? Kenà en iya! Su idtarem ku keniyu te kenà kebmelinew, su ini se kinepengkayi ku ne ruen kebpemekedsinggey te hinawa dut te menge etew. ⁵² Igenat gunteani ne embiya ruen lelima ne telteleanak, ne ebpemekedsinggey ke hinawa ran. Ne tetelu se egkunterà dut te deruwa, ne iring din ded dema ke deruwa ne egkunterà dut te tetelu mekeatag te keduma ran kediey. ⁵³ Ke amey ne egkunterà dut te anak din ne meama, ne ini se anak din ne egkunterà dut te amey rin. Ne ke iney ne egkunterà dut te anak din ne meritan, ne ini se anak ne egkunterà dut te iney rin. Ne ke enuhang ne meritan ne egkunterà dut te ambey rin, ne ini se ambey ne egkunterà dut te enuhang din ne meritan.”

*Ke Menge Etek ne Metau ne Ebpenipat te Hewii Ugaid ne Uvag Kun Warà Dan Mesebuti Ke Tuus Dut te Ned-ulaula Te Ara ne Hewii
(Mateo 16:2-3)*

⁵⁴ Ne migkahi si Hisus diyà te merakel ne menge etew te, “Embiya egkekita niyu te kivel diyà te edsenlepan ne arà dà ne egkahi kew te, ‘Mehaan en ed-uran.’ Ne ed-uran iya rema. ⁵⁵ Ne embiya egketuusan niyu te ebpependiyà ke keramag te diraya ne ke sikiyu te, ‘Meinit ini.’ Ne ed-andew iya rema. ⁵⁶ Sikiyu ne menge etew ne uvag kun warà sesabut niyu te egketemtemanan guntaani! Embiya edtengteng kew te tanà wey langit ne metau kew nevenar ne ebpenipat te hewii, ne meambe ke kenà niyu egkesebutan ke tuus kayi te egketemtemanan guntaan?”

*Pekidtuney kew rut te Edwagib Keniyu
(Mateo 5:25-26)*

⁵⁷ Ne migkahi maa si Hisus te, “Meambe ke kenà niyu ebpegpegitungen ke engkey se edait ne ed-ul-ulaaan? ⁵⁸ Upama ke ruen edwagib kenikew ne ed-ewiten ka riyà te kukuman, ne pekidtuney ka nevenar kandin gewii te keniyan ka pà te ralan su apey kenà ka ibpelaus diyà te uwis. Su embiya ebpekeetuvang ka riyà te uwis ne ibehey ka riyà te menge pulis, ne ke menge pulis se ebilanggù keykew. ⁵⁹ Idtarem ku keniyu,” ke si Hisus, “kenà ka ebpekeliawang ketà taman te kenà nu egkevayaran ke langun ne keselaan nu.”

13

¹ Ne ruen menge etew ne nekeuma ketà su mibpenudtul ki Hisus mekeatag te menge etew riyà te Geliliya ne mibpeimetayan ni Gubinedur Pilatu gewii te ebpelengesa ran diyà te Nekebpuru ne Valev te Eleteala. ² Ne migkahi si Hisus kandan te, “Geina te mibpeimetayan ini se menge etew te iring ketà, ne maa iyan niyu kunaan ke muna pà se keselaan dan dut te ruma ne menge etew te Geliliya? ³ Kenà arà!

Ugaid ne ini se igkahi ku kenyi te embiya kenà kew ebpemedsendit wey ed-engkeran niyu ke meraat ne ulaula ne ebpematey kew red dema iring kandan.⁴ Ne menu arà se sepulù wey walu ne menge etew riyà te Siluwi,” ke si Hisus, “ne mibpematey ne nepilayan te metmetikang ne valey, maa iyan niyu kunaan ke muna pà se keselaan dan dut te ruma ne menge etew te Hirusalim?⁵ Kenà arà! Ugaid ne igkahi ku kenyi te embiya kenà kew ebpemedsendit wey ed-engkeran niyu ke meraat ne ulaula ne ebpematey kew red dema iring kandan.”

Ke Kayu ne Ed-ingaranan te Igira ne Mibpenrewakan ni Hisus

⁶ Ne ruen maa ruma ne sempità ne imperineg ni Hisus kandan, ke sikandin te, “Duen senge etew ne meama ne ruen kayu rin ne ed-ingaranan te igira ne impemula riyà te pemulaan din. Senge hewii ne midlauy rin su ebpenareng en sikandin ke ruen bahas din, ugaid ne warà.⁷ Ketà dà ne migkehiyan din ke meama ne ed-ihawan ketà te, ‘Egkemenu ini se senge puun ne kenà pà lavew ebahas? Su nekedtetelu en ne rahun se kebpememati ku te ebehas ne warà pà lavew bahas din. Pilaya nu en! Su ebpekeenget dà kayi te ruma pà ne pinemula.’

⁸ “Ne migkahi ini se meama ne ed-ihawan te, ‘Kenà te pà, Anggam, ebpileyan. Ebpememetien te pà te senge rahun, su ed-ihewanen ku pà ke ebpekelingut wey ebukbukan ku pà te ibpelambù.⁹ Ne embiya ebahas ded kayi te edtundug ne rahun ne meupiya. Ugaid ne embiya kenà ne arà pà ne ibpepiley nu en.’”

Ruen Egkunterà ki Hisus ne Edawey perem kandin te Ebpemawi dut te Hewii ne Id-imeley

¹⁰ Senge Hewii ne Id-imeley ne riyà si Hisus te Baley ne Ebpengedian te Hudiyenan te penduan dan su ebpenurù.¹¹ Duen ketà meritan ne nevekut su mibpemekeiran te vusew. Nekedsepulù en wey walu ne rahun ini se kinekevekut din, ne kenà din en iya egkeketeng te misan deisek dà.¹² Guna su nekita ni Hisus ini se meritan ne migkahi sikandin te, “Bayi, egkeulian ke en te raru nu.”¹³ Ne midampen ni Hisus ke peka rin, ne arà dà ne netidtu en dut te meritan ke peka rin ne nekereyù nevenar sikandin te Eleteala!

¹⁴ Ne neepes ini se egkeunutan dut te valey ne ebpengedian te Hudiyenan te penduan dan su mibawi si Hisus te Hewii ne Id-imeley. Ke sikandin te, “Enem be ne hewii ke igelevek tew. Ne lusud be kayi ne pengkayi kew se ebpemevawi, kenà te ini se Hewii ne Id-imeley.”

¹⁵ Migkahi si Hisus kandan te, “Sikiyu ne engkungkun ne edtuman te suhù te Eleteala! Menu, kenà uman senge etew kenyi ne ed-ekar te sapì din etawa kudà din ne edtuyuken din diyà te wayig su ibpeinum din misan Hewii ne Id-imeley?¹⁶ Ne ini se meritan ne kevuwaran dut te keep-epuan tew rengan ne si Abraham ne nekedsepulù en wey walu ne rahun se kinevakù kandin ni Setanas ke ratù te pekaid. Kenà egkepakey ne kenà ed-ekaran sikandin dut te kinekevakù din misan Hewii ne Id-imeley.”

¹⁷ Langun dut te egkunterà ki Hisus ne nengeyeyaan dut te migkahi ni Hisus kandan, ugaid ne ke ruma ne menge etew ne nesuatsuat su nekita ran ke mekegeyip ne mid-ulaula ni Hisus.

Insempità ni Hisus ke Edetuan te Eleteala te Pinekemerimet ne Lahas ne ed-ingaranan te Mustasa

(*Mateo 13:31-32; Marcos 4:30-32*)

¹⁸ Ne migkahi maa si Hisus te, “Engkey ma se edait ne ebpeiringan ta te Kedatù te Eleteala dut te menge etew? Engkey ma se meupiya ne upama ta? ¹⁹ Ini se kedtuvù te Kedatù te Eleteala te menge etew ne ebpekeiring dut te merimet nevenar ne lahas ne ed-ingaranan te Mustasa ne impemula riyà te pengengewiran. Edtuvù ini ne ebaluy ne kayu, ne rutun ebpenesalag ke pepenuk te subpang din.”

Insempità ni Hisus ke Edetuan te Eleteala te Menge Etew dut te ibpepelevag te Pan

(*Mateo 13:33*)

²⁰ Ne migkahi maa si Hisus te, “Engkey se id-upama ta te Edetuan te Eleteala rut te menge etew? ²¹ Ini se Edetuan te Eleteala te menge etew ne id-upama ta te ibpepelevag te pan ne migkuwa te meritan ne idsawug dut te senge asad ne tapung su apey ebpeketuvin ke mibawug ne tapung.”

Ke Sempità ni Hisus Mekeatag te Menge Etew ne Egkiyug ne Edlusud Dut te Melihet ne Gumawan ne Ebpependiyà te Menge Etew ne Edetuan te Eleteala

(*Mateo 7:13-14; 21:23*)

²² Nekeipus si Hisus ketà ne migenat en se ebpendiyà te Hirusalim, ne ketà te ked-ipanew rin ne mibpengawet-awet sikandin te menge inged su ebpenurù. ²³ Duen senge etew ne mid-insà kandin te, “Mama, maa kenà be utew merakel ne etew se egkeperiyu te Eleteala?”

Midsempità si Hisus kandan se egkahi te, ²⁴ “Pegelep kew nevenar te kedlusud niyu ketà te melihet ne gumawan te kenà pà egkelekevan, su idtarem ku kenyi ini,” ke si Hisus, “te merakel se egkesuat ne edlusud ugaid ne kenà dan en ebpekelusud. ²⁵ Su ke kemuney te valey se ebpendiyà te gumawan su ebpintuan din ne riyà kew rà te liyu se edtawag te, ‘Mama, bukai key pà te lekeb.’

“Ugaid ne iyan din egkehiyen se, ‘Kenà ku egketuenan ke endei kew ebpuun.’

²⁶ “Ne iyan niyu maa egkekahi se, ‘Kenà nu egketenuran te rengan ne mibpeer-erungutey ki pà se egkaan ne mibpenurù key pà nikuna diyà te inged dey?”

²⁷ “Ugaid ne edtavak maa sikandin te, ‘Kenà ku iya egketuenan ke endei kew ebpuun. Awà kew kayi te kediey, sikiyu ne menge etew ne meraat se ulaula niyu!’ ke se kemuney te valey.

²⁸ “Ne ebpekependerawit kew se ebpekengingitel kew su egkekita niyu riyà te lusud dut te menge etew ne Edetuan te Eleteala arà se keep-epuan niyu rengan, ne en si Abraham wey ke anak din ne si Isaac wey ke apù din ne si Jacob abpeg dema ke langun ne menge etew ne mibpelambas te Lalag te Eleteala, ugaid ne sikiyu ne kayi kew rà te luwal su kenà kew ebpekelusud ketà. ²⁹ Ne merakel dema se menge etew ne egenat te epat ne pediyulu kayi te kelibutan ne ebpekeuma su ebpekepinuu te egkaan ketà te kevurunan dut te menge etew ne Edetuan te Eleteala. ³⁰ Ugaid ne ruen menge etew guntaan ne mepeembavà se hinawa ran wey ebpesuhùsuhù dan te rumah ran, ugaid ne egkeuma arà se hewii ne sikandan ke mepurù se ketengdanan

din. Ne ruen menge etew guntaan ne mepurù se ketengdanen din, ugaid ne egkeuma arà se hewii ne sikandan se pinekemevavà.”

Bayuk ni Hisus te kegkerurunù din dut te Menge Mehinged te Hirusalem

(Mateo 23:37-39)

³¹ Ketà te arà ne menge hewii ne ruen menge Peresiyu ne mid-ingguma ki Hisus ne migkahi ran te, “Levundus ke en diyà te rumane inged su ed-imetayan ka kun ni Hirudis.”

³² Ne migkahi si Hisus te, “Si Hirudis ayan se metau te edliyuk ne kehiya niyu kandin te, ‘Kenà a ed-awà kayi su guntaani wey keremà ne edlevundusan ku pà ini se helevek ku te ebpenegseg te vusew ne ebpermekaid te menge etew wey ebpmawì a te menge daru ran, ne ketà te iketelu ne hewii ne egkeipus ku ini.’ ³³ Ugaid ne ed-ip-ipanew ad ma guntaan wey keremà abpeg te ikeruwa pà ne hewii su warà ebpekekaid kedì kayi su langun ne ebpelambas te Lalag te Eleteala ne riyà ed-imetayi te lusud te inged ne Hirusalim.”

³⁴ Ne ketà ne netenuran ni Hisus ke menge ulaula rut te menge etew te Hirusalim ne migkahi sikandin te,

“Ey, igkerurunù ku sikiyu ne menge mehinged te Hirusalim!

Su sikiyu ke mibpengimatey

te menge etew ne mibpelambas te Lalag te Eleteala,

wey mibpenrumbag niyu te batu

ke menge etew ne midsuhù te Eleteala keniyan te keniyu!

Kenà kepipira ku rà perem eburuna sikiyu

su edtugenuren ku sikiyu

ebpekeiring te upa ne edlekup te anak din,

ugaid ne kenà kew ebpelekup kediey!

³⁵ Na guntaan ne ed-ewaan en te Eleteala ke inged niyu.

Ne ini se igkahi ku keniyu,

igenat guntaani ne kenà a niyu en egkekita

taman te egkeuma arà se hewii

ne ebpekekahi kew te, ‘Edeyuen tew ini se nekeuma,

ne midsuhù te Eleteala ke Kerenan tew.’”

14

Ebpenipaten si Hisus dut te Menge Peresiyu ke Ebpmawì Sikandin te Hewii ne Id-imeley

¹ Seveka maa ne Hewii ne Id-imeley ne ruen senge etew ne egkeunutan te menge Peresiyu ne mid-inggat ki Hisus te egkaan diyà te valey rin. Ne ketà ne ebpenipaten si Hisus dut te menge etew ke ebpmawì sikandin te Hewii ne Id-imeley. ² Ne ruen ketà meama ne ebpekedaru su midlevag ke velad din wey paa rin. ³ Mid-insà si Hisus dut te menge meyterù te penduan wey ke menge Peresiyu te, “Kayi te penduan tew, ne menu idtuhut be kenitew se ebpmawì te Hewii ne Id-imeley?” ⁴ Ugaid ne langun dan ne mibpeeneng-eneng. Ne migeweran ni Hisus ke meama ne ebpekedaru ne arà dà ne neulian en, ne impeuli din en.

⁵ Ne migkahi en si Hisus kandin te, “Embiya ruen senge etew keniyu ne ruen anak din etawa sapi din ne neulug diyà te meralem ne kalut

te Hewii ne Id-imeley, ne maa kenà niyu edegdehawan te ebpehaun su geina ne Hewii ne Id-imeley?"

⁶ Ne ketà ne warà dan meketavak.

Ke Penurù ni Hisus Keyta Embiya Edtelavuk ki te Kevurunan

⁷ Netuusan ni Hisus te ini se menge etew ne mid-inggat ketà te Peresiyu te egkaan diyà te valey rin ne mibpemili dan te menge ebpинuuwan te egkeedatan, ne mibpenempità sikandin, ke sikandin te, ⁸ "Embiya egkeinggat kew riyà te kevurunan te egkewing, kenà kew ed-una ebpинuu rut te ebpинuuwan te egkeedatan su kema ke ruen mepurù pà keykew ne ebpekeuma. ⁹ Ne ed-uvye keniyu ini se mibair te kevurunan se egkahi te, 'Sikandin se pepinuuwa nu keniyan.' Ne ketà ne egkeyeyaan ka su riyà kew ibpepinuu te iniyuhan. ¹⁰ Ini se meupiya ne ed-ul-ulaan niyu embiya egkeinggat kew riyà te kevurunan, diyà kew pinuu te iniyuhan. Su embiya ve ed-uvye ke mibair te kevurunan ne egkehiyan kew te, 'Kenà kew ma ruen dà pinuu su kayi kew pinuu te sineruwan ebpинuuwan.' Ne ketà ne egkeedatan kew rutun te merakel ne etew. ¹¹ Su ke etew ne ebpepurùpurù te hinawa rin ne ibavà te Eleteala, ugaid ke etew ne mepeembavà te hinawa rin ne ibpepurù sikandin te Eleteala."

¹² Ne migkahi si Hisus dut te etew ne mibair te kevurunan te, "Ne sikuna rema, Mama, embiya ebair ka te kevurunan ne kenà iyan nu rà inggata ke menge sepekat nu wey ke menge suled nu, etawa ke menge etew riyà te uvey nu ne egkewasa. Su embiya ini se ed-ul-ulaan nu, ne ed-inggaten ka red nikandan ne ketà ne nekebayarey kew en. ¹³ Ugaid ne embiya ebair ka te kevurunan ne iyan nu inggata ke menge ayuayu, ke menge etew ne sarir, ke menge pungkù wey ke menge pisek. ¹⁴ Ne embiya ini se ed-ul-ulaan nu ne dekelà se kegkehalew nu. Su kenà ke ma nikandan egkevayaran, ugaid ne Eleteala se ebales keykew ketà te akir din ne hewii te kegkevanew te menge etew ne metidtu se ulaula."

Ke Sempità ni Hisus Mekeatag te Kevurunan te Kewingan ne Ibpeiring Din Dut te Kevurunan te Eleteala te Menge Etew ne Edetuan Din

(Mateo 22:1-10)

¹⁵ Duen senge etew ketà te uvey ni Hisus ne nekerineg te migkahi ni Hisus ne migkahi te, "Meupiya neveran se hinawa rut te ebpeketelavuk ketà te kevurunan te Eleteala dut te menge etew ne Edetuan din."

¹⁶ Ne ketà ne ruen insempità ni Hisus kandin te, "Duen senge etew ne meama ne mibair te dekelà ne kevurunan ne merakel se mid-inggat din. ¹⁷ Guna su ini en ke bungkà te kevurunan din ne midsuhù din ke edsugsuhuen din diyà te menge etew ne mid-inggat din te ebpesabut kandan te, 'Kuwa kew en su ebpekaan en.'

¹⁸ "Ugaid ne langun te mig-inggat din ne mibaal te sumbuwan. Ke se neuna kayi te edsugsuhuen te, 'Kenà dà mebmeraat se hinawa nu su kenà a ebpekependiyà su ruen tanà ne mibpemasa ku ne ed-intengan ku pà.'

¹⁹ "Senge etew maa se migkahi te, 'Kenà dà mebmeraat se hinawa nu su kenà a ebpekependiyà su ruen sepulù ne sapi ne mibpemasa ku ne ini pà ne igeram ku te edadu.'

²⁰ "Ne senge etew pà lavew se migkahi te, 'Behu e pà ne nekeesawa ne kenà a ebpeketelavuk.'

21 "Mid-ulì ini se edsugsuhuen ne mibpenudtulan din ke ebpengemuney kandin dut te langun ne menge lalag te menge etew. Ne neepes ini se ebpengemuney kandin ne migkahi maa sikandin dut te edsugsuhuen din te, 'Pekehaan ka se ebpendiyà te inged ne tuntula nu ke kelesada wey ke menge ralan ne pendumaa nu ke menge ayuayu, ke menge sarir, ke menge pisek wey ke menge pungkù.'

22 "Huna su mid-ulì ini se edsugsuhuen ne migkahi sikandin dut te ebpengemuney kandin te, 'Netuman ku en ke insuhù nu kedì ne ini ran en, ugaid ne warà pà mepengkeg ini se valey.'

23 "Ne migkahi pà ke ebpengemuney kandin te, 'Tuntula nu ke merampal wey ke merimun ne menge ralan ne il-iluti nu te ebpepengkayi ke menge etew su apey egkepengkeg ini se valey ku. 24 Ne ini se igkahi ku keniyu, warà senge etew rà dut te neuna ne mid-inggat ku se ebpekeheram dut te elugan ku misan deisek dà.' "

*Ke Penurù ni Hisus Mekeatag Dut te Kerehenan te Keduma Kandin
(Mateo 10:37-38)*

25 Ne mid-ipanew maa si Hisus ne merakel nevenar ne etew ne miduma kandin. Ne midsinerawan ni Hisus sikandan se egkahi te, 26 "Embiya ruen etew ne egkiyug ne eduma kediey ugaid ne iyan pà dekelà se limù din dut te amey rin wey iney rin, esawa rin, menge anak din, menge suled din, etawa misan ke hinawa rin, ne kenà benar sikandin ne edumdumaan ku. 27 Su ke etew ne egkiyug ne eduma kediey ne iyan iya se lipati rin ke kandin ne kiyug ne tianga rin ke kandin ne pinebelavag ne kayu ne ed-ingaranan te Krus ne iyan din meana ne tumana rin ke menge suhù ku misan ibpatey rin pà se keduma rin kediey.

28 "Upama ke ruen senge etew keniyu," ke si Hisus, "ne egkesuat ne ebpeitindeg te metmetikang ne baley, ne ed-unaan din pà te ebpegpegitung ke pira se igkegastu rin su apey rin egketueni ke ebpekegaga sikandin etawa kenà. 29 Su embiya kenà din ebpegitungen ke pira se igkegastu rin, ne kalu ke iyan din dà egketemanan se matag igkevunsud ke menge pelaus. Ne egkekita rut te langun ne menge etew ini ne ed-un-undaan su warà din meimasad. 30 Ne ebpeleglelahey ran te, 'Iyan tumù ne warà mibulug sikandin ke kenà din bes egkepasad.'

31 Ne migkahi maa si Hisus te, "Iring ded dema te ratù ne ebpekibunù te senge etew ne ratù, su ed-unaan din pà te ebpegitung ke ebpekegaga sikandin ne ebpekibunù dut te senge etew ne ratù ne ruen deruwa nepulù nengivu se sakup din, ugaid ne sepulù dà nengivu se kandin ne sakup. 32 Embiya egkeantap din te kenà ebpekeatu ke menge sakup din, ne ruen edsuhuen din te ebpendiyà te senge etew ne ratù te meriyù pà ini se kunterà din su ebpekitdtuntye te warà pà mekebunù. 33 Ne iring din ded dema," ke si Hisus, "dut te menge etew ne eduma kediey, kenà kew benar ne edumdumaan ku embiya kenà niyu edtehaken ke langun ne igkenuhuni niyu te kedumaruma niyu kedì."

Ke Sempità ni Hisus te Ini se Keduma Kandin ne Ebpekeiring te Timus

34 Ne midsempità maa si Hisus te, "Meupiya ini se timus, su ebpekevehey te nanam dut te egkeenen tew ugaid ne embiya egkeawà en ke nanam te timus ne warà en dalan te kebmetimus din pà maa.

35 Warà en iya pantag din su kenà egkehamit te misan ebunu ne ibpelambù te tanà, ne idtimbag dà lavew. Na,” ke si Hisus, “ini se migkahi ku ne itaan niyu ke telinga niyu.”

15

*Ke Sempità ni Hisus Mekeatag te Bilibili ne Nelaag ne Netuen ded ne Impeiring Din Dut te Etew ne Mibpedsendit te Salà Din
(Mateo 18:12-14)*

¹ Senge hewii ne merakel se menge etew ne ebpevayad te buwis wey menge etew ne mekesesalà dema ne mid-uvey ki Hisus su ebpemineg te penurù din. ² Nekita ini rut te menge Peresiyu wey menge meyterù te penduan ne mibpemivig dan se egkahi te, “Si Hisus ini ne ebpemekiduma kayi te menge etew ne mekesesalà ne ebpekidtuhen pà dema kandan.”

³ Ne ketà be ne mibpenemptà si Hisus kandan te, ⁴ “Embiya ruen senge etew keniyu ne ruen mehatus ne bilibili rin ne seveka se nelaag, ne engkey se ed-ul-ulaan din? Ini imbe se ed-ul-ulaan din, ed-ewaan din imbe ke siyew nepulù wey siyew ne eppemenabtab su eppenuntulen din arà se seveka ne nelaag taman te egketuen din. ⁵ Ne embiya egketuen din ini ne egkehalewhalew nevenar sikandin, ne ketà ne edsepipiyan din, ⁶ ne ed-uli en. Embiya ebpekeuma riyà te valey rin ne eppenenawag sikandin dut te menge rumा rin se egkahi te, ‘Kehalew kew su netuen ku red ini se nelaag ne bilibili ku.’ ⁷ Ne igkahi ku keniyu,” ke si Hisus, “te iyan pà dekelà ne kehelawan diyà te langit embiya ruen senge etew ne mekesesalà ne ebpekedsendit ne ed-engked te meraat ne ulaula rin, tumin dè be kayi te siyew nepulù wey siyew ne menge etew ne kenè en mulà ebpemedsendit su metidtu kun.”

Ke Sempità ni Hisus Mekeatag te senge elad ne pirak ne netarin ne Ebpekeiring Dut te Etew ne Mibpedsendit te Salà Din

⁸ Ne midsempità maa si Hisus te, “Upama ruen senge etew ne meritan ne ruen sepulù din ne pirak ne elin-elin pelatà ne neterinan te senge elad. Engkey se ed-ul-ulaan din? Ini imbe se ed-ul-ulean din, edtemteman din ke sulù ne arà pà ne eppenepung sikandin te valey su ebpemengaan din taman te egketuen din ded. ⁹ Ne embiya egketuen din ded ne eppenenawag sikandin te menge rumा rin se egkahi te, ‘Kehalew kew su netuen ku red ini se kureta ku ne netarin.’ ¹⁰ Ne igkahi ku keniyu,” ke si Hisus, “ne engketà ded be imbe ke kehelawan dut te menge suluhuen te Eleteala riyà te langit ke ruen senge etew ne mekesesalà ne ebpekedsendit ne ed-engked te meraat ne ulaula rin.”

Ke Sempità ni Hisus Mekeatag te anak ne Nelaag ne Ebpekeiring Dut te Etew ne Mibpedsendit te Salà Din

¹¹ Ne midsempità pà maa si Hisus te, “Duen meama ne deruwa se anak din ne elin meama. ¹² Migkahi ini se ari riyà te amey rin te, ‘Amà, behayi ad nikew te kediey ne umun kayi te menge aren nu.’ Arà dà ne milaad en dut te amey ke aren din dut te deruwa ne anak din. ¹³ Warà dà meuhet ne mibpasa en dut te ari ke kandin ne umun ne migkuwa rin ke langun ne kureta rin ne mid-awà en. Diyà mibpesinaru sikandin te medmeriyù ne inged ne rutun din be emina ke kureta rin te warà pantag din. ¹⁴ Guna su neeminan en sikandin ne mitikut se bitil ketà

te inged, ne ini se kenakan ne warà egkepesineruwan din. ¹⁵ Ketà be ne mibuyù sikandin te helevek dut te etew ketà ne iyan imbehey kandin ne helevek ne edtuganur te bavuy riyà te taneb. ¹⁶ Tuus te kegkevitil din ne egkeiveg en sikandin dut te savud te bavuy, ugaid ne warà ma ebpekaan kandin.

¹⁷ “Guna su neuhet ne nekemuhudmuhud sikandin ne kehingginawa rin te, ‘Langun dut te menge etew ne egelevek ki Amà ne edsawad-sawad se egkekaan dan, ugaid ne siaken kayi ne ebpatey ad te bitil. ¹⁸ Iyan tumù se ed-ulì e red diyà te ki Amà ne ini se egkehiyen ku, ‘Amà, dekelà se salà ku diyà te Eleteala wey kayi te sikuna ne amey ku. ¹⁹ Kenà ad edait ne anak a nu pà, ugaid ne peheleveka a nu rà iring dut te edsugsuhuen nu.’” ²⁰ Arà dà ne mid-ulì en ini se kenakan diyà te amey rin.

“Ne riyà pà sikandin te meriyù ne nesandeng en dut te amey rin. Ne midaat nevenar se nanam dut te amey rin kandin ne mibpelelahuy en se edtalavuk kayi te anak din ne midrakep din ne ereki ini se anak din. ²¹ ‘Amà,’ ke se anak din, ‘dekelà en se salà ku riyà te Eleteala wey kayi te sikuna ne amey ku ne kenà ad edait ne anak a nu pà.’

²² “Ugaid ne midtawag dut te amey rin ke menge edsugsuhuen din se egkahi te, ‘Pekahaan kew ne ipengkayi niyu ke mèmeupiya ne velegkas ne iseluub niyu kandin’. Sisingi niyu sikandin wey telumpai niyu pà sikandin. ²³ Engaya niyu ve arà se nati te sapi ne pinelambù ne sumbelia niyu su ebair ki te kevurunan.

²⁴ ‘Su ini se anak ku
ne iring iya te minatey en,
ne guntaani ne neuyag maa.
Su iring te nelaag en,
ne guntaani ne mid-ulì ded.’

Arà dà ne midrudsuan dan en ke kegkevurun dan.

²⁵ “Ne ini se kakey ne anak dut te lukes ne riyà te pengengewiran. Guna su ed-ulì en ne ebpelpelingguma en sikandin kayi te valey ne nekerineg sikandin te edlebpad wey edsayew. ²⁶ Ne midtawag din se senge etew ne edsugsuhuen dut te amey rin ne mid-insaan din te, ‘Engkey ayan se ed-ul-ulaan niyu keniyan te valey?’ ²⁷ Midtavak ke sugsuhuen te, ‘Ke ari nu ne mid-ulì en, ne impesumbali dut te amey nu ke pinelambù ne nati su warà ded nekekaid dut te ari nu.’

²⁸ “Ugaid ne neepes ini se kakey ne kenà en ebpemenayik diyà te baley ran. Ketà ne mibpemenaug ke amey rin ne midneyneyuan din te ebpepemenayik. ²⁹ Ugaid ne iyan din migkahi kayi te amey rin te, ‘Tentenuri nu, Amà, te kenà pira rà ne rahun se kinehelhelevek ku keykew iring dut te edsugsuhuen nu, ne warà a keenu midsuer keykew. Ne misan iring ketà ne warà a nu behayi te misan kambing dà su apey a mekehalewhalew rut te menge sepekat ku. ³⁰ Ugaid ne guna su mid-ulì en ayan se anak nu ne mideraat te kearen nu su indumaruma rin te meritan ne midsumbalì nu mulà ke pinelambù ne nati.’

³¹ “‘Mama,’ ke se amey rin, ‘warà ka mekevelag kediey ne langun te kearen ku ne keykew. ³² Ugaid ne iyan din kemeyidan ne egalewhalew ki,
su ini se ari nu
ne iring iya te minatey en,

ne guntaani ne neuyag maa.
Su iring te nelaag en,
ne guntaani ne mid-ulì ded.’ ”

16

Ke Sempità ni Hisus Mekeatag te Kenà Metidtu ne Ebpeheweren te Kekewesai

¹ Ne ruen ruma pà ne sempità ne migkahi ni Hisus dut te edumdumaan din. “Duen senge etew ne kewasa,” ke sikandin, “ne ruen midserihan din dut te kearen din. Ne ruen mibpenudtul kandin te ini se midserihan din ne ederaat dà dut te kekewesai rin. ² Nerineg din arà ne midtawag din arà se kedserihan din ne migkahi te, ‘Engkey ini se nerineg ku mekeatag kenikew? Isurat nu en ke langun ne kegkuwinta nu kayi te ini se helevek ne insarig ku kenikew su kenà ke en egkepakey ne kedserihan ku.’

³ “Ne kehinggaawa rut te meama ne kedserihan te, ‘Ibpeawà e bes dut te mepurù ku. Engkey en be se ed-ul-ulaan ku? Su kenà a ebpekegaga ne egkekalut wey egkeyeyaan a ne ebpememuyù.

⁴ A, ini ves se ed-ul-ulaan ku,’ ke hinggaawa rin, ‘su apey ruen egkepesineruhan ku ke ibpeawà ad nikandin kayi te helevek ku.’

⁵ “Ketà ne midtawag din te idsenge etew ke langun ne ruen utang din ketà te mepurù din. Ke neuna ne mid-insaan din te, ‘Pira pà ke utang nu rut te mepurù ku?’

⁶ “Ne midtavak ini se meama te, ‘Mehatus ne latà te lana.’

“Ne migkahi ini se kedserihan te, ‘Ini red ke listaan te utang nu, ne pinuu ka ne degdehawi nu te edsambì te lelima nepulù dà.’

⁷ “Ne mid-insaan din maa ke senge etew te, ‘Pira pà ke utang nu?’

“Ne migkahi ini se meama te, ‘Sengivu ne sakù te parey.’

“Migkahi maa ini se kedserihan te, ‘Ini ke listaan te utang nu, ne iyan nu rà isurat se walu nehatus.’

⁸ “Guna su nerineg kayi te mepurù te kedserihan ne nekekahi sikandin te, ‘Hey, metautau sikandin ne ebpenehana te keuyahan din keuremà!’ ”

Ne migkahi en maa si Hisus te, “Ke menge etew ne kayi rà te ampew te dunya ne kenà sakup te Eleteala ne metau ne ebpekiduma rut te ruma ran su apey ruen egkekuwa ran. Ugaid,” ke si Hisus, “ke menge etew ne sakup te Eleteala ne kenà dan bes metau ne ebpenehana te akir din ne hewii riyà te langit. ⁹ Tembù be igkahi ku keniyu,” ke si Hisus, “te gemita niyu ini se kekewesai niyu kayi te ampew te dunya te edtavang dut te menge ayuayu su embiya ebpatay ke en ne kenà nu en egemiten ke kekewesai nu ne edtelimaan ka te Eleteala riyà te langit.

¹⁰ “Su ke etew ne egkeserihan te reisek ne kearen,” ke si Hisus, “ne egkeserihan dema te rekèlè ne kearen. Ne iring din ded dema ke etew ne edlimbung te misan deisek dà ne kearen ne wey pè be kenà medlimbung ke rekèlè en ne kearen. ¹¹ Su embiya kenà ka egkeserihan ne ebpeheweren te kearen kayi te ampew te dunya ne kenà ke en iya ebpeheweren te Eleteala rut te tidtu ne kearen diyà te langit. ¹² Ne embiya kenà ka egkeserihan ne ebpeheweren te kearen ne kenà keykew, ne kenà ka ebeheyen te Eleteala te tidtu ne kearen nu riyà te langit.

13 "Warà edsugsuhuen," ke si Hisus, "ne deruwa se edtehiuripen kandin. Su embiya deruwa se ebpengunguripen kandin, ne egkeepe-san din ke seveka ne ed-edatan din ke seveka. Etawa ebperumduaan din ke seveka, ne kenà din edsehipaen ke seveka. Ne iring din ded dema," ke si Hisus, "embiya iyan dekelà te hinawa nu ne kureta, ne kenà ka ebpeketuman te kiyug te Eleteala."

Menge Ruma Pà ne Penurù ni Hisus

(Mateo 11:12-13; Marcos 10:11-12)

14 Duen ketà menge Peresiyo ne iyan den dà dekelà te hinawa ne kureta ran. Nering dan dà ini se migkahi ni Hisus ne mid-undaunda ran dà. 15 Ne migkahi si Hisus kandan te, "Sikiyu ne engkungkun ne menge metidtu kew kayi te sineruwani te menge etew, ugaid ne netuenan te Eleteala ke netahù te hinawa niyu. Su ini se rekèlà te hinawa te menge etew ne warà pantag din diyà te etuvangan te Eleteala.

16 "Ké penduan ni Moises," ke si Hisus, "wey ke menge impesurat te Eleteala rut te menge etew ne mibpelambas te Lalag din, ini se impesabut dan taman dà te nekeuma en si Juan ke Ebpermabuyag. Igenat dè be ketà te nekeuma si Juan ne impesabut en ke Meupiya ne Tudtul mekeatag te Kedatù te Eleteala te menge etew, ne edtehel ke menge etew te kedlusud dan ketà. 17 Ugaid ne ke penduan ni Moises ne kenà egkeawà, su iyan pà melemu ne egkeawà ini se langit wey tanà tumin dè be ke meawà te senge tahà dà dut te penduan ni Moises.

18 "Arà se meama ne ebpekid-engked te esawa rin ne edsaup maa ed-esawa," ke si Hisus, "ne nekepemingniyug en sikandin diyà te etuvangan te Eleteala. Ne engketà ded maa ke meama ne mid-esawa kayi te meritan ne mibpekid-engked dut te esawa rin, ne nekepemingngiyug en dema sikandin diyà te etuvangan te Eleteala."

Ke Kewasa ne Meama wey si Lazaro

19 Ne migkahi pà maa si Hisus te, "Duen senge etew ne kewasa nevenar ne mibevelegkas te mepurù nevenar se elehà din, ne ini se ked-upbàubpà din ne warà egkemengà din. 20 Ne ruen dema senge etew ne ayuayu ne mid-ingaranan ki Lazaro ne nelumbus se lawa rin te padel. Ne uman gewii ne id-ated sikandin te menge ruma rin diyà te pesuran te eheran ketà te kewasa ne meama. 21 Su ebpekeinam ke ruen samà dut te kewasa ne meama. Ne gewii rin te ed-id-irehà ketà ne ruen menge asu ne edilà te padel din.

22 "Ne neuma se hewii ne minatey si Lazaro, ne mibpeneheewit sikandin dut te menge suluhuen te Eleteala diyà te uvey ni Abraham diyà te langit. Ne minatey en dema ini se meama ne kewasa ne inleveng dan en sikandin. 23 Ne nekependiyà sikandin te apuy ne rakà ne nerasey nevenar sikandin! Ne midlingakà sikandin ne nekita rin diyà te medmeriyà si Abraham. Ne nekita rin dema ketà si Lazaro diyà te uvey rin. 24 Ne midtawag din en si Abraham se egkahi te, 'Apù Abraham, ikeyru a nevenar nikuna! Ipepengkayi nu pà si Lazaro su apey rin egkepetihisi ini se bèbà ku te wayig su egkerasey ad nevenar kayi te apuy.'

25 "Ugaid ne migkahi si Abraham te, 'Menge anak, tentenuri nu te nekuwa nu en ke langun ne keupiyanan nu te gewii rut te biviyag ke

pà, ugaid ne si Lazaro mulà ne neamin-amin din se keresayan. Ugaid ne guntaani ne si Lazaro ne meupiya en se egketemanaan din kayi, ne sikuna en se egkerasay. ²⁶ Ne kenà ketà dà taman su ruen egkembusan te tanà keniyan te elet tew, ne misan duen kayi ne egkiyug ne ed-apet keniyan te keniyu ne kenà ebpekeapet. Engketà ded maa ke keniyan te keniyu, kenà dan ebpekeapet kayi.’

²⁷ “Ne ketà ne migkahi pà maa ke kewasa te, ‘Embiya iring ketà, Apù Abraham, ne ebuyuen ku keykew te ipependiyà nu pà si Lazaro riyà te baley ni Amà, ²⁸ su ruen lelima ne ari ku ne elin meama. Ibpevaag nu sikandan apey kenà dan ebpekepengkayi te ini se ubpaan ne keresayan.’

²⁹ “Migkahi si Abraham te, ‘Duen diyà te kandan impesurat ki Moises te Eleteala wey ke impesurat te Eleteala rut te menge etew ne mibpelambas te lalag din, ne arà dè be se upiani ran pemihena.’

³⁰ “Ne migkahi en maa ke kewasa te, ‘Kenà dan ebpemineg ketà, Apù Abraham, ugaid ne embiya ruen minatey ne egkevanew ne ed-ulì diyà te kandan ne arà pà ne ebpemedsendit dan.’

³¹ “Ne migkahi si Abraham te, ‘Embiya kenà dan ebpemineg dut te impesurat te Eleteala ki Moises wey ke impesurat dut te menge etew ne mibpelambas te Lalag te Eleteala, ne iyan dan pè be pemineha ke ruen egkevanew ne ed-ulì diyà te kandan.’”

17

Ke Penurù ni Hisus Mekeatag te Kebpesahad te Salà te Menge Ruma ta

(Mateo 18:6-7, 21-22; Marcos 9:42)

¹ Ne ruen migkahi ni Hisus diyà te edumdumaan din te, “Kenà egkepakey ne kenà egkeuma ini se kebpenggerami te menge etew, ugaid ne ke etew ne ebpgengeram te ruma rin su apey ebpekedsalà ne mekeyruwiru nevenar! ² Iyan pà tumù ne ebperiwetuwan ke lieg din te mevehat ne batu ne id-antug diyà te rahat su apey kenà sikandin se puunaan te kebpekedsalà dut te mevavà ne etew ne edsarig kediey.

³ Tembù be uram kew!

“Embiya ruen duma nu ne nekedsalà kenikew,” ke si Hisus, “ne kehiya nu kandin ne ibpetidtu nu sikandin, ne embiya ebpekedsendit ne ed-engkeran din ke salà din ne pesehara nu. ⁴ Embiya ebpekedsalà sikandin kenikew te kepipitu te lusud te senge keandew ne kepipitu rema sikandin ebuyù kenikew te, ‘Nekedsendit a te mid-ulaula ku, menu ke pesehara a nu,’ ne pesahara nu rema sikandin.”

Ke Penurù ni Hisus Mekeatag te Kebperetiyyaya

⁵ Ne migkahi ke menge edumdumaan diyà te ki Hisus ke Kerenan te, “Umani nu ke kebperetiyyaya rey.”

⁶ Ne migkahi si Hisus te, “Embiya ruen kebperetiyyaya niyu te Eleteala ne reisek misan iring dut te reisek ne lahas ne mustasa ne ebpekekahi ka kayi te ini se rekèlè ne kayu te, ‘Awà ka kayi ne arat ka riyà te rahat,’ ne arà dà ne ebpekeperumaruma keykew.”

Ke Penurù ni Hisus Mekeatag te Ketengdanan tew ne Menge Edsugsuhuen Din

⁷ Migkahi maa si Hisus te, “Upama ke ruen senge etew keniyu ne ruen edsugsuhuen din te edadu etawa edtuganur te menge bilibili nu ne mid-ulì sikandin te meapun ne engkey, ebpekekahi ka te, ‘Una ke en kaan su wey ad?’ ⁸ Kenè en iya! Su iyan nu mulà egkekahi se, ‘Sambi ka te belegkas nu ne elugan ke en su apey a mekekaan en. Ne wey ka kaan ke ebpekeipus ad.’ ⁹ Ne menu, edeyuen nu ke edsugsuhuen nu su midtuman dut te insuhù nu? Kenà en iya! ¹⁰ Ne engketà kew red dema,” ke si Hisus, “embiyà netuman niyu en ke langun ne ibpehelevek te Eleteala keniyu ne kahi kew rà te, ‘Menge edsugsuhuen kiyu rà te Eleteala, ne kenà edait ne edeyuen kiyu su midtuman tew rà ke insuhù din kenitew?’”

Neulian ni Hisus ke Sepulù ne menge Etew ne Kevuwaen ne muna pà te It-it

¹¹ Guna su ebpependiyan en si Hisus te Hirusalim ne riyà mebayà sikandin te eletan te pruvinsiya ne Semeriya wey Geliliya. ¹² Ketà te ebpelpelinggume en sikandin te senge inged ne ruen sepulù ne meama ne midtelavuk kandin ne ruen kevuwa ran muna te it-it. Ugaid ne geina te ruen kevuwa ran ne riyà dan mid-itindeg te malù dà meriyù ki Hisus ¹³ ne midtawag dan en se egkahi te, “Hisus, Meyterù, ikeyru key nikuna!”

¹⁴ Nekita rin sikandan ne migkahi en te, “Pendiyà kew te menge terebpelengesa te Eleteala ne peintengi niyu ke lawa niyu te nengeulian en.” Ne mid-ipanew ran ne gewii te riyà dan en te ralan ne nengeulian dan en.

¹⁵ Ne senge etew kandan se nekekita te neulian sikandin ne midlived kayi te ki Hisus se egkulkuleyi en se edeyù te Eleteala. ¹⁶ Ne mid-uvey sikandin ki Hisus ne midlumpeng en sikandin kayi te sineruhan ni Hisus se ebpeselamat kandin. Ne ini se etew ne kenà Hudiyansen su riyà eppuun te inged ne Semeriya.

¹⁷ Ne migkahi si Hisus te, “Maa kenà sepulù niyu beneng ke nengeulian? Endei en be ke siyw ne etew? ¹⁸ Meambe ke sikuna rà ini se tegeSemeriya se midlived su ebpeselamat te Eleteala?” ¹⁹ Ne migkahi en si Hisus te, “Itindeg ke en, Mama, ne levundus ke en su ke sarig nu te Eleteala se nekeulì keykew.”

*Ke Penurù ni Hisus Mekeatag te Kedatù te Eleteala te Menge Etew
(Mateo 24:23-28, 37-41)*

²⁰ Senge hewii maa ne ruen menge Peresiyu ne mid-insà ki Hisus te, “Keenu egkeuma arà se Kedatù te Eleteala te menge etew?”

Midtavak si Hisus kandan te, “Kenà niyu egkekita se kebpekeuma rut te Kedatù te Eleteala te menusiyà. ²¹ Warà ebpekekahi te, ‘Ini en ke Kedatù din,’ etawa ebpekekahi te, ‘Ediyan en.’ Su ini se Kedatù te Eleteala te menge etew ne kenà egkekita su kayi red te hinawa niyu.”

²² Ne migkahi en si Hisus kayi te edumdumaan din te, “Duen gewii ne egkeuma ne rekèla se kiyug niyu te metuman ke hewii te edlived ke Impeanak te Menusiyà, ugaid ne kenà pà egked-ulaula. ²³ Duen egkahi keniyu te, ‘Ediyan en ke Ebperetuen te Eleteala te menge etew,’ etawa egkahi ran te, ‘Ini en.’ Ugaid ne kenà kew eduma kandan. ²⁴ Su ketà te kedlived te Impeanak te Menusiyà kayi te ampew te dunya ne iring kehaan din te kilat ne ebpeketayew te langun ne linengkevan igenat

te pehiliran taman te binunsuran. ²⁵ Ugaid te kenà pà ini egked-ulaula ne iyan iya se egkerasey pà sikandin wey ed-engkenà kandin ini se menge etew guntaani.

²⁶ “Ketà te akir din ne hewii ke edlived sikandin kayi te ampew te dunya, ne ebpekeiring ke ed-ul-ulaan te menge etew rut te ed-ul-ulaan te menge etew rengan te gewii pà ni Noa. ²⁷ Su rengan te hewii pà ni Noa, ne warà sanggel dan se ebpengnevurun su egkaakaan dan ne ebpenginum wey ebpees-eseweey taman te arà en ke hewii ne midlusud en ensi Noa ketà te rekèlè ne avang ne ed-ingaranan te arka. Ne arà ne nekeuma en ke dalem ne neherà dan en langun.

²⁸ “Ebpekeiring ded dema rut te hewii ni Lut. Su warà sanggel dan se ebpengnevurun su egkaakaan dan ne ebpenginum, ebpememasa wey ebpemendahang, ebpememula wey ebpemevaley. ²⁹ Ugaid ne arà se hewii ne kinepeawà ki Lut ketà te inged din ne ed-ingaranan te Suduma ne imperadsang te Eleteala ini se regreg wey esupri ne riyà ebuun te langit ne neherà dan langun.

³⁰ “Iring ded be ketà se kehaan din ke edlived kayi ke Impeanak te Menusià su kenà ebpenerengen te menge etew.

³¹ “Ketà ke egkeuma arà ne hewii,” ke si Hisus, “ne embiya ruen etew riyà te ruwangen te baley rin ne kenà din en lilingaya ke kegleahan din. Ne engketà ded dema ke riyà sikandin te pengengewiran, kenè en med-ulì diyà te valey su egkuwa te piya engkey en. ³² Tentenuri niyu ke engkey se netemanan dut te esawa ni Lut te midlilingey sikandin. ³³ Su ke etew ne egkenuhun te umur din ne ebpatey lavew, ugaid ke etew ne iyan din ibpatey se keduma rin kediey te kebpemesabut dut te Meupiya ne Tuditul ne ruen umur ne ibehey kandin ne warà edtemanan din. ³⁴ Ne ini se tendai nu nevenar, embiya merukilem se kedlived din kayi ne ruen ebpeulirey ne deruwa ne etew, ne ebpekeruma ke senge etew kandin ne egketahak ke seveka. ³⁵ Engketà ded dema ke meandew se kedlived din kayi, embiya duen deruwa ne meritan ne ebpeemungey te egaling, ne ebpekeruma ke senge etew kandin ne egketahak ke seveka. [³⁶ Engketà ded dema ke ruen deruwa ne etew ne ebpeemungey riyà te pengengewiran, ebpekeruma ke senge etew kandin ne egketahak ke seveka.]”

³⁷ Ne ketà ne mid-insà ke menge edumdumaan ni Hisus kandin te, “Endei ve ini egketuman?” Ne midtavak din te tatap ne beseanan, ke sikandin te, “Piya endei se ruen minatey rin ne ketà eburun ke menge uwak.”

18

Ke Sempità ni Hisus Mekeatag te Balu ne Meritan wey Ke Egawed te Kukuman

¹ Duen maa insempità ni Hisus dut te edumdumaan din su apey ran egketenuri se layun dan ebpengeningi ne kenà dan egkevungas. ² Ke sikandin te, “Duen senge etew ne egawed te kukuman diyà te senge inged ne warà andek din te Eleteala etawa warà adat din te menge etew. ³ Ne ketà te inged ne ruen dema senge etew ne meritan ne valu ne layun ebpengkayi te kandin su ebuyù te tavang din. ‘Tevangi a nu,’ ke se meritan, ‘su apey kenà meahew te kunterà ku ini se kearen.’

⁴ “Ne neuhet nevenar ne warà sehipaa kayi te egawed te kukuman ini se meritan, ugaid ne neperaan te kedlivedlived te meritan ne kehinggaanawa rin te, ‘Misan warà andek ku te Eleteala etawa warà adat ku te menge etew,⁵ ne geina te edlingasa ini se meritan kediey ne idtindeg ku sikandin kayi te kunterà din su apey ed-engked en su embiya kenà ne egkepupusan ad te tigker.’”

⁶ Ne migkahi en maa si Hisus te, “Pegpegitunga niyu arà se midlalag dut te egawed te kukuman ne kenà metidtu ne midtindeg dut te meritan. ⁷ Ne menu kenà be edtindeg ke Eleteala dut te kandin ne menge etew embiya ebpengeningeni ran diyà te kandin te merukilem meandew? Maa edlanganlangan pè bë sikandin se edtavang kandan? ⁸ Iggahku ku kenyu,” ke si Hisus, “mehaan se kedindeg din kenyu. Kenà egkevungas ke Eleteala ne edtavang dut te etew rin, ugaid ne ketà te edlived kayi ke Impeanak te Menusiyà ne menu duen pè be egkeumaan din ne edsarig kandin?”

Ke Sempità ni Hisus Mekeatag te Senge Etew ne Peresiyu wey ke Ebpevayad te Buwis

⁹ Ne ruen impenempità ni Hisus ne ebpekesuhat dut te menge etew ne iyan dan kunaan ke menge metidtu ran ne edsudì dan ke langun ne menge ruma ne etew. ¹⁰ Ke si Hisus te, “Duen deruwa ne etew ne mibpendiyà te Nekebpuru ne Valev te Eleteala su ebpengeningeni. Senge etew ne Peresiyu ne ini se seveka ne ebpevayad te buwis. ¹¹ Guna su ketà dan en te lusud ne mid-itindeg ini se Peresiyu ne mibpengeningeni te hinawa rin, ke sikandin te, ‘Is Eleteala, eppenelamat a kenikew ne Eleteala su kenà a iring kenyian te ruma ne menge etew ne tenlimbungan, menge etew ne meraatey se ulaula ran, wey menge etew ne ebpengingniyug. Uya, eppenelamat a te kenà a iring kenyian te etew ne ebpevayad te buwis. ¹² Uman senge pedian ne ke reruwa a edlimpas se egkaan ne ebehey a kenikew te ikesepulù ne umun dut te langun ne egkevatunbatun ku.’

¹³ “Ugaid ne ini se etew ne ebpevayad te buwis ne mibpekeriyù sikandin ne midurungul ne mibpenempak din se kumeng din te kegkebmutu rin ne mibpengeningeni se egkahi te, ‘Is Eleteala, ikeyru a nevenar nikuna su mekesesalà a.’

¹⁴ “Iggahku ku kenyu,” ke si Hisus, “ketà te kineuli kayi te ebpevayad te buwis ne kenè en eppenunduhun te Eleteala ke salà din, ugaid ne kenà iring ketà te mepereyù ne Peresiyu. Su piya entei ne etew ne ebpepurupurù te hinawa rin ne ibpevavà te eleteala, ugaid ne piya entei ne etew ne mepeembavà te hinawa rin ne ibpepurù sikandin te Eleteala.”

*Mibpenubtuvaran ni Hisus ke Menge Vatà
(Mateo 19:13-15; Marcos 10:13-16)*

¹⁵ Na ruen menge etew ne mibpemava te anak dan diyà te ki Hisus su ibperampen dan kandin su eppenubtuvaran, ugaid ne midawey ran dut te menge edumdumaan din. ¹⁶ Guna su nekita ini ni Hisus ne midtawag din ke menge vatà ne migkehiyan din ke menge edumdumaan din te, “Kenà niyu dewaya sikandin! Ugaid ne ibpepengkayi niyu te kediey ke menge vatà su ke menge etew ne iring te menge vatà se kedsarig dan kediey ne iyan eppakeamung te Edetuan te Eleteala. ¹⁷ Sebenarvenar ini se egkehiyen ku, ke etew ne kenà

edtelimà te Kedetui kandin te Eleteala iring te kedtelimà kayi te reisek ne vatà ne kenà ebpekelusud sikandin dut te menge etew ne Edetuan te Eleteala.”

Ke Kewasa ne Meama ne Egkiyug ne Ebpekeangkun te Umur ne Warà Edtemanan Din

(Mateo 19:16-30; Marcos 10:17-31)

¹⁸ Duen hewii ne ruen mibpengkayi te ki Hisus ne senge etew ne egkeunutan te menge Hudiyenan ne mid-insà te, “Meyterù, langun ne ed-ul-ulaan nu ne meupiya! Engkey se ed-ul-ulaan ku su apey a mekekuwa te umur ne warà edtemanan din?”

¹⁹ Ne midtavak si Hisus te, “Meambe ke nekahì nu te meupiya ke langun ne ed-ul-ulaan ku? Su seveka rà sa meupiya se ed-ul-ulaan din ne Eleteala rà. ²⁰ Ugaid ne embiya arà se id-insà nu mekeatag te umur ne warà edtemanan, ne netuenan nu en ke penduan te Eleteala ne egkahi te: ‘Kenà ka ebpengningiyug, kenà ka ed-imatey, kenà ka ebpnakew, kenà ka edtarùtarù, ne edati nu ke amey nu wey ke iney nu.’”

²¹ Ne migkahi ke meama te, “Meyterù, igenat te batà e pà ne langun keniyan ne midumaan ku.”

²² Nerineg dà ni Hisus ini ne migkahi en sikandin te, “Duen pà lavew kurang nu. Iyan be se ulì ka ne pesaa nu ke langun ne kearen nu ne ipemehey nu ve ke elehà din diyà te menge ayuayu su apey ruen kekewesai nu riyà te langit ne muna pà dut te kearen nu kayi. Ne arà pà ne pengkayi ka te eduma kedi.”

²³ Nerineg din dà ke lalag ni Hisus ne neuru nevenar sikandin su kewasa nevenar.

²⁴ Nekita ni Hisus te neuru ke meama ne migkahi sikandin te, “Merehen nevenar te kewasa ne etew se kebpsakup din dut te menge etew ne Edetuan te Eleteala. ²⁵ Iyan pà melemu ne ebpevayà diyà te vudsi te rahum ini se rekelà ne binatang ne kemilu tumin dè be ke kebpsakup te etew ne kewasa dut te menge etew ne Edetuan te Eleteala.”

²⁶ Ke menge etew ne nekerineg kayi ne mid-insà te, “Embiya iring ketà se kerehen din te etew ne kewasa te kebpsakup din dut te menge etew ne Edetuan te Eleteala, ne engkey rè be buwa se ebpekeangkun te umur ne warà edtemanan din?”

²⁷ Ne migkahi si Hisus te, “Embiya etew rà ne kenà dan ebpekegaga te ed-angkun te umur ne warà edtemanan din ugaid ne Eleteala se ebpekegaga ne ebehey kandan su egkegaga te Eleteala ke langun.”

²⁸ Ne migkahi si Pedro te, “Netuenan nu te mid-ewaan dey ke langun taman dey su miduma key keykew.”

²⁹ Ne migkahi si Hisus kandan te, “Sebenarvenar ini se egkehiyen ku kenyu te misan entei ne etew se neawaan din ke ubpaan din, esawa rin, menge suled din, menge lukes din, wey menge anak din su atag te kebpsakup din dut te menge etew ne Edetuan te Eleteala, ³⁰ ne ebpetelimaan sikandin te Eleteala misan kayi pà sikandin te ampew te dunya te labi pà kerakel din dut te neewaan din, ne ketà te akir din ne hewii ne ebpeketelimà sikandin te umur ne warà edtemanan din.”

Impesabut ni Hisus te Iketelu en ke Kebpatey Rin

(Mateo 20:17-19; Marcos 10:32-34)

31 Ne ketà ne impesivey ni Hisus ke sepulù wey deruwa ne edumdumaan din ne migkahi te, "Netuenan niyu en ne ebpendiyà kiyu te Hirusalim ne ketà ne egketuman en langun ne impesurat te Eleteala dut te menge mibpelambas te Lalag din dengan mekeatag te sikandin ne Impeanak te Menusiyà. ³² Ne ibpalad sikandin diyà te menge etew ne kenà Hudiyanan ne ed-un-undaen sikandin, ebpegkeyaan sikandin, wey ebpengilevan sikandin. ³³ Ebpenlembiten dan sikandin wey ed-imetayan. Ugaid ne ketà te iketelu ne hewii ne ebenawen ded te Eleteala."

³⁴ Ugaid ne ini se edumdumaan din ne warà dan mekesabut te misan deisek dà kayi te migkahi ni Hisus. Su in-eles kandan ke meana rin, ne warà dan metueni ke engkey se edlehen din.

³⁵ Guna su ebbelundani en ensi Hisus diyà te inged ne ed-ingaranan te Hiriku, ne ketà te kilid te ebpevayaan dan ne ruen meama ne pisek ne ebpipinuu su ebpmuyù. ³⁶ Guna su nerineg din te merakel ne etew se edsahad ne mid-insà sikandin te, "Engkey ini?"

³⁷ Ne ruen midtarem kandin te, "Si Hisus ne riyà ebpuun te Nesarit se edsahad."

³⁸ Guna su nerineg din ini ne midtawag en te, "Hisus, ke inenakan ni David dengan, igkeyru a nu nevenar!"

³⁹ Ne neepes ke menge etew ne riyà te unaan ni Hisus ne midawey kandin ne migkahi te ebpeen-enengen sikandin, ugaid ne lemban en ne egkeilut se ebpmensag te, "Sikuna ne inenakan ni David dengan, igkeyru a nu nevenar!"

⁴⁰ Guna su nerineg ni Hisus ne mid-itindeg pà sikandin ne midsuhù te ibpepikit ke pisek kayi te kandin. Nekeuvey ki Hisus ke meama ne pisek ne mid-insaan din te, ⁴¹ "Engkey ma se ebpetevangan nu kediey?"

Ne migkahi ke pisek te, "Meyterù, kiyug ku ne mekekita a red perem!"

⁴² Ne migkahi si Hisus te, "Su kenà duwaruwa ke kedsarig nu kediey, ne ebpekeulit en ke kebpekekita nu." ⁴³ Arà dà iya ne nekekita en ini se meama, ne miduma en ki Hisus se edeyù te Eleteala. Ne ke menge etew ne nekekita kayi ne mideyù dan dema ke Eleteala.

19

Si Hisus wey ke Senge Etew ne Ebpevayad te Buwis ne Ed-ingaranan ki Sekiyu

¹ Nekeuma en ensi Hisus diyà te inged ne Hiriku ne ketà dan mibpevayà te luuk te inged te kedlaus dan en. ² Ne ruen ketà senge etew ne ed-ingaranan ki Sekiyu. Senge etew ini ne meama ne mepurù dut te menge etew ne ebpevayad te buwis ne kewasa nevenar. ³ Egkesuatan din te edtengteng si Hisus, ugaid ne kenà din egkekita su nelingutan si Hisus te merakel ne etew ne mevavà ne etew si Sekiyu. ⁴ Ketà be ne mibpelelahuy sikandin diyà te unaan te merakel ne etew ne mid-ambak diyà te kayu ne ed-ingaranan te sikumuru ne egkeseharan ni Hisus su apey rin mekita si Hisus.

⁵ Guna su nekeuma en si Hisus ketà te levut te kayu ne mid-embakan ni Sekiyu ne midlingakà ne migkahi te, "E Sekiyu, dahew ke en se edurus keniyan su ebpekeawet a diyà te baley nu guntaani." ⁶ Arà dà ne midahurahu midurus si Sekiyu ne migalàhalà din si Hisus.

⁷ Nerineg kayi te merakel ne etew ini se migkahi ni Hisus ki Sekiyu ne mibpemeviyig dan se egkahi te, "Meambe ke miduma si Hisus diyà te valey te etew ne mekesesalà?"

⁸ Nekeuma ran diyà te valey ni Sekiyu ne mid-itindeg sikandin ne migkahi diyà te ki Hisus te, "Na, ibehey ku ini se tengà te kekewesai ku diyà te menge etew ne ayuayu. Ne embiya ruen etew ne nelimbungan ku ne ed-ulian ku te keepat egketakep ke nekuwa ku kandin."

⁹ Ne migkahi si Hisus kandin te, "Sikiyu ne telteleanak kayi ne nekeliyu kew en te kedusa te Eleteala te salà niyu. Ne sikiyu ini ne tuney kew en ne keep-epuan ni Abraham su mibperetiyyaya kew en. ¹⁰ Su iyan din impengkayi ke Impeanak te Menusiyà te ampew te dunya su ebpmengà te langun ne menge etew ne nekesuwey ketà te tidtu ne ibayà te Eleteala su apey ran ebpekelyu rut te keberedusaan dan te Eleteala."

Ke Menge Edsugsuhuen ne Midserihan te Kureta su Ebpeisehen ne Insempità ni Hisus dut te Menge Etew ne Egkiyug ne Eduma te Bayàbayà te Eleteala

(Mateo 25:14-30)

¹¹ Ne mibpenempità si Hisus dut te menge etew ne ebpmineg kandin. Su merani ran en diyà te inged ne Hirusalim ne iyan kunaan dut te menge etew ke embiya ebpekeuma ran diyà ne edrudsuun Edatù ke Eleteala te menge etew. ¹² Tembù be midsempità si Hisus kandan se egkahi te, "Duen senge etew ne berebansa ne mibpendiyà te meriyù ne inged su edsempayatan te gelal te keggeratù, ne ketà be te ked-ulì din ne edatù en kayi te inged din. ¹³ Ne ketà te warà pà mekehenaat ne midtawag din te sepulù ne etew ne edsugsuhuen din ne uman senge etew kandan ne mibehayan din te kureta ne neked-iring ke kerakel din. Ne migkehiyan din sikandan te, 'Ini se kureta ne idsarig ku keniyu ne sikiyu en se ebpeiseg taman te kenà e pà ebpekeulì.'

¹⁴ "Ugaid ne ini se mehinged te inged din ne neepes kandin, ne guna su mid-ipanew sikandin ne ruen midsuhù dan te ebpesabut ketà te etew ne edsempayat te gelal kandin se egkahi te, 'Kenà key egkiyug ne sikandin se edatù kenami.'

¹⁵ "Ugaid ne misan iring ketà ne sikandin ded se midsempayatan te keggeratù ne mid-ulì en. Nekeuma rà ne midtawag din en ke sepulù ne edsugsuhuen din ne midserihan din te kureta su ed-intengan din ke pira se kinepeiseg dan dut te kureta rin.

¹⁶ "Nekeuma ke neuna ne edsugsuhuen ne migkahi te, 'Datù, sepulù se neisahan din ke kureta ne insarig nu kedi.'

¹⁷ "Migkahi ini se meama ne behu pà ne edatù te, 'Arà be! Meupiya ka su mibpegelep ke ves iya rema! Geina te egkeserihan ka te deisek ne kureta ne iyan ku idsarig kenikew ne ebpekemalen ku sikuna te sepulù ne inged.'

¹⁸ "Nekeuma ke ikeruwa ne edsugsuhuen din ne migkahi te, 'Lelima, Datù, se neisehan din dut te kureta ne insarig nu kedi.'

¹⁹ "Ne migkahi ke datù te, 'Arà be! Ne lelima ne inged se ebpekemalan ku keykew.'

²⁰ "Nekeuma ke iketelu ne edsugsuhuen ne migkahi te, 'Ini red ke kureta ne insarig nu kedi. Midtegtéhaman ku te edtenges ne intahù ku, ²¹ su neandek a su netuenan ku te mepasang ka ne etew. Ebpenareng

ka te kebpekeiseg ke ruen idsarig nu te edsugsuhuen nu; ne engketà ded dema ke ruen ibpepemula nu kandan su ebpenerengen nu.’

²² “Ke se datù te, ‘Mereatey ke ves ne edsugsuhuen! Ayan dà se nengelalag nu ne neisuhat ku en sikew te kewagib. Netuenan nu ves te taman te nekahì ku ne idtehel ku, ne ebpenereng a te iseg ke ruen idsarig ku te ruma ku, ne engketà ded ke ruen ibpepemula ku te ruma ku, ebpenerengen ku red. ²³ Meambe ke warà nu ipemeutang arà se kureta ku ne insarig ku keykew su apey ku metelimà ke kureta ku te ruen iseg din ke edlived a?’

²⁴ “Ne migkahi en ke datù ketà te menge etew ne ebpengit-itindeg te, ‘Kua niyu arà se kureta keniyan te kandin ne ivehey niyu ketà te edsugsuhuen ne mibpeiseg te sepulù.’

²⁵ “Ne migkahi ran te, ‘Ne ruen en ma kandin su sepulù ke iseg dut te kureta rin.’

²⁶ “Ne migkahi ke datù te, ‘Igkahi ku keniyu te ke etew ne egkeserihan dut te insarig kandin ne ed-umanan pà. Ugaid ke etew ne kenà egkeserihan ne ed-ewien pà misan ke reisek ne insarig kandin. ²⁷ Na ini se menge etew ne egkunterà kedì su kenà dan egkiyug ne edatù a kandan, ne ipepengkayi niyu ne imetayi niyu kayi te etuvangan ku.’”

Ke Kinelusud ni Hisus Diyà te Hirusalim ne Mid-untud te Nati ne Kudà su Tuus ini te Datù Sikandin Dut te Menge Hudiyanan

(Mateo 21:1-11; Marcos 11:1-11; Juan 12:12-19)

²⁸ Nekeipus si Hisus se edlalag kayi ne mid-ipanew ran en se eppendiyà te Hirusalim. ²⁹ Nekeuvvey ran diyà te deruwa ne inged ne Bitpahi wey inged ne Bitanya diyà te buvungan ne ed-ingaranan te Ulivuwen. Ne mibpeuna sikandin te deruwa rut te edumdumaan din se egkahi te, ³⁰ “Una kew en ketà te inged ne an te unaan ta, ne ketà te ebpekeuma kew ne egkekita niyu ke nati ne kudà ne in-iket ketà ne warà pà bulug meunturi. Ekari niyu be ne ewita niyu en kayi. ³¹ Ne embiya ruen ed-insà keniyu te, ‘Meambe ke ed-ekaran niyu ke nati ne kudà?’ ne iyan niyu kehiya te, ‘Ke Kerenan dey se ebpegingawà te egkeunturan din ne mehaan dà id-ulì.’”

³² Nekeuma ini se midsuhù din ne nekita ran ke nati te kudà ne iring iya rema ketà te migkahi ni Hisus. ³³ Gewii ran te ed-ekar dut te nati ne migkahi ke menge kemuney te, “Meambe ke ed-ekaran niyu ayan se nati?”

³⁴ Ke sikandan te, “Si Hisus ke edlingekaan dey se ebpeginawà kayi te egkeunturan din ne mehaan dà id-ulì.”

³⁵ Ne arà dà ne mid-ewit dan en ini se nati ne kudà kayi te ki Hisus, ne midebpasan dan en te kumbalà dan ke nati ne kudà ne arà pà ne pineera dan si Hisus. ³⁶ Gewii rin te egkukudà ne midtulid ke menge etew te kumbalà dan te ebpepevayaan ki Hisus su tuus ini te adat te menge Hudiyanan te mepurù dan.

³⁷ Guna su nekeuvvey en sikandin te Hirusalim ketà dapit te dalan ne idtupang ketà te buvungan ne Ulivuwen ne langun dut te menge etew ne midurumaruma kandin ne migkerag se egalewhalew te kedeyù dan te Eleteala su atag te langun ne nekita ran ne mekegeyip ne mid-ulaula ni Hisus. ³⁸ Ke sikandan te,

“Menu ma ke ebpeneuven te Eleteala
ini se datù ne nekeuma

su impepengkayi te Eleteala.

Ne melinew en ke kebpekiduma tew te Eleteala,
ne edeyuen tew ke Eleteala diyà te langit!”

³⁹ Ketà te menge etew ne miduma ki Hisus ne ruen menge Peresiyu
ne migkahi riyà te ki Hisus te, “Peengkera nu ayan se edumdumaan
nu se edeyù keykew su ebpekesahad en utew!”

⁴⁰ “Igkahi ku keniyu,” ke si Hisus te, “Embiya ebpeeneng-eneng dan
ne langun keniyan te menge batu ne iyan dan egkerag.”

*Midsandeng ni Hisus ke Inged ne Hirusalim ne Ingkeyru Rin su
Midsinehewan Din Ke Mehinged Ketà Su Netuenan Din Ke Egketemanaan
Dan Keuremà*

⁴¹ Guna su ebpekeuvvey en sikandin kayi te Hirusalim ne impelayap
din ke mata rin kayi te inged ne midsinehewan din su ingkeyru rin
nevenar ke menge mehinged ketà. ⁴² Ke sikandin te, “Embiya perem
netuenan niyu rà ke engkey se benar ne kebmetidtu su apey melinew
se inged niyu, ugaid ne guntaani ne kenà niyu egketuenan. ⁴³ Duen
gewii ne egkeumaan kew te menge kunterà ne edtengkalen kew
nikandan wey edtelikupan kew ne warà en iya egensik. ⁴⁴ Edereetan
dan ke menge valey niyu ne ebeluyan dan ne tapung ke inged niyu su
warà seveka rà ne batu ne egketahak dut te netehuan din. Ne langun
niyu ne egkeherà. Ini se egketemanaan niyu su warà kew medsehipà
te ini en ke hewii te kinepepengkayi te Eleteala kedì su apey kew
ebpekeliyu.”

*Mibpenegseg ni Hisus ke Menge Ebpmendahang Diyà te Nekebpuru
ne Valey te Eleteala*

(Mateo 21:12-17; Marcos 11:15-19; Juan 2:13-22)

⁴⁵ Nekeuma si Hisus diyà te Hirusalim ne midlusud sikandin diyà
te Nekebpuru ne Valey te Eleteala ne mibpenegseg din en ke menge
etew ne ebpmasa wey ke menge ebpmendahang ketà. ⁴⁶ Ne migkahi
sikandin te, “Duen en ura impesurat ne Lalag te Eleteala ne egkahi te,
‘Ini se baley ku ne ed-ingaranan te baley ne ebpgeningenian.’ Ugaid
ne sikiyu,” ke si Hisus, “ne mibaluy niyu en ini se baley ne ubpaan te
menge tenlimbungan.”

⁴⁷ Igenat dè be ketà ne uman andew ne ebpenurù sikandin ketà
te Nekebpuru ne Valey te Eleteala. Ugaid ne ini se menge mepurù
te terebpelengesa te Eleteala, ke menge meyterù te penduan wey ke
menge unuten dut te menge etew ne mibpemengà dan te ralan te
kegkeimetayi ran ki Hisus. ⁴⁸ Ugaid ne warà dan mekevaluy su langun
ne menge etew ne egkevenbenaran te penurù din.

20

*Mid-insaan si Hisus Mekeatag te Kewagib Din dut te Mibpenegseg Din
Ke Menge Ebpmendahang Diyà te Nekebpuru ne Valey te Eleteala*

(Mateo 21:23-27; Marcos 11:27-33)

¹ Senge hewii ne mibpenurù ni Hisus ke menge etew riyà te
Nekebpuru ne Valey te Eleteala su ibpesabut din ke Meupiya ne Tudtul.
Ne ketà ne mibeyaan sikandin dut te menge mepurù te terebpelengesa
te Eleteala, ke menge meyterù te penduan wey ke menge unuten te
Hudiyanan. ² Ne mid-insaan dan si Hisus te, “Ini se mid-ulaula nu kayi

te Nekebpuru ne Valey te Eleteala ne engkey se kewagib nu te ed-ulaula te iring kayi? Ne engkey se mibehey keykew te kewagib?"

³ Ne midtavak si Hisus te, "Duen dema id-insà ku keniyu ne tevaka a nu. ⁴ Entei ke mibehey ki Juan ke Ebpmemunyag te kewagib te ebunyag, diyà be te Eleteala etawa kayi rà dè duen te menusiyà?"

⁵ Ne mibpein-inseey ran en te ke sikandan te, "Engkey se idtavak tew? Su embiya egkehiyen tew se, 'Riyà ebpnuun te Eleteala,' ne ed-insà maa sikandin te, 'Meambe ke warà kew mibperetiyaya ki Juan?' ⁶ Ugaid ne embiya egkahi ki te, 'Kayi red ebpnuun te menusiyà,' ne ebpenrumbahen ki rut te menge etew te batu su langun dan ne mibperetiyaya te si Juan ne mibpelambas te Lalag te Eleteala." ⁷ Ketà be ne iyan dan intavak ki Hisus te, "Kenà dey egketuenan ke endei ebpnuun."

⁸ Ne migkahi si Hisus kandan te, "Embiya iring ketà ne kenà ku rema egkehiyen ke enta se mibehey kedì te kewagib ku te ed-ulaula kayi."

*Ke Sempità ni Hisus Mekeatag te Etew ne Pinekamal te Pemulaan
(Mateo 21:33-46; Marcos 12:1-12)*

⁹ Ne ruen sempità ne imperineg ni Hisus riyà te menge etew, ke sikandin te, "Duen senge etew ne ruen tanà din ne mibpemulaan din te wahed ne ed-ingaranan te paras. Ne ruen pinekamal din dut te impemula rin, ne arà pà ne mid-ipanew en se ebpndiyà te meriyù ne inged ne ketà pà ed-uppà te meuhet. ¹⁰ Guna su midsabpet en ke pinemula rin, ne ruen senge etew ne edsugsuhuen din ne midsuhù din su ibpekuwa ke kandin ne umun. Ugaid ne nekeuma ini se midsuhù din, ne mibedasan dut te pinekamal ne impeuli dan te warà en iya imbehey kandin. ¹¹ Ne misan iring ketà, ne midsuhù en maa se senge etew. Ugaid ne nekeuma ini ne mibedasan dan ded maa, ne pinegkeyà dan ne impeuli dan te warà ded dema imbehey ran. ¹² Nekita maa kayi te kemuney ini ne midsuhù pà lavew te iketelu ne edsugsuhuen din. Nekeuma maa ini ne midruug dut te pinekamal taman te nengepelian en, ne arà pà ne impeawà dan.

¹³ "Ne ketà ne migkahi ke kemuney te pemulaan te, 'Engkey se ed-ululaan ku? Iyan tumù ne iyan ku en edsuhuen ini se tuney en ne anak ku ne igkelimù ku nevenar. Su kenà egkepakey ne kenà dan ini ed-edatan.'

¹⁴ "Ugaid ne guna su nekeuma ini se anak din ne mibpeglelahey ke menge pinekamal din te, 'Ini en bes ke anak dut te kemuney kayi te tanà. Kuwa kew en su ed-imetayen tew su apey sikitew en se ebpekegkemuney kayi te tanà.' ¹⁵ Arà dà ne migeweran dan ne miguyud dan diyà te luwal dut te pemulaan ne mid-imetayan dan en.

"Na," ke si Hisus, "geina te iring kayi se mid-ulaula ketà te menge etew ne pinekamal te pemulaan, ne engkey se ibped-ulaula kandan dut te kemuney? ¹⁶ Idtarem ku keniyu te ebeyaan din arà se menge etew ne ebpengimetayan din, ne ebpekemalan din te rumà pà ne menge etew."

Nerineg dut te menge etew ini se migkahi ni Hisus ne ke sikandan te, "Ipekeriyù te Eleteala arà!"

¹⁷ Ne mibpeut-utengan ni Hisus te mata sikandan ne migkahi en te, "Na embiya iring ketà se pegitungan niyu ne engkey ve se ibpesabut kayi te impesurat te Eleteala rengan ne egkahi te,

'Ke pelaus ne mid-eng-engkeran
dut te menge etew ne ebpemevaley
su kunaan dan ke warà rantek din
ne iyan en iya ini
nepemillì ne segkad te valey.' "

¹⁸ Ne migkahi maa si Hisus te, "Ne geina te siaken ini se segkad ne egkerupet ke langun ne egkeulug ketà, ugaid ne egkepipinì ke langun ne egkepilayan din."

Edlitahen perem si Hisus te Menge Paresiyu kayi te ked-insà dan Mekeatag te Kebayad te Buwis

(*Mateo 22:15-22; Marcos 12:13-17*)

¹⁹ Edsigkemen perem si Hisus dut te menge meyerù te penduan wey ke menge unuten te terebpelengesa su netuenan dan te sikandan ke nesuhat te sempità din dut te menge etew ne pinekamal te pemulaan. Ugaid ne neandek dan dut te merakel ne menge etew.

²⁰ Igenat dà ketà ne mibpenipat dan sikandin su ebpemengà dan te kegkesigkem dan ki Hisus. Ne ruen menge etew ne mibpenukayan dan ne ibpesirib ki Hisus ne ebpeinsaen ne engkungkun ne tidtu se insà dan. Ne embiya ruen lalag ni Hisus ne ebpekesurang te penduan ne ibpesigkem dan ne ibehey ran diyà te bayàbayà te gubinedur su ibpekukum en. ²¹ Migkahi ini se menge etew ne edsirib ki Hisus te, "Meyerù, netuenan dey te langun ne egkehiyen nu wey langun ne penurù nu ne metidtu neveran. Ne warà ebpelebiyen nu ne etew, ugaid ne eppenurù ka te benar dut te kiyug te Eleteala ne ed-ul-ulaan tew. ²² Tembù be ruen id-insà dey keykew. Maa ebpekerimpas kiyu ve dut te penduan tew embiya ebayad ki te buwis diyà te ratù tew te inged ne Ruma etawa kenà?"

²³ Ugaid ne netuenan en ni Hisus ke lakew te ked-insà dan su edselingkepen dan dà sikandin ne migkahi en sikandin te, ²⁴ "Peintenga a niyu kun te pelatà." Ne mid-insà sikandin te, "Entei ki tuluran kayi? Ne enta ki ngaran kayi?"

²⁵ Ne midtavak dan te, "Tularan wey ngaran dut te ratù tew kayi te inged ne Ruma."

Ne migkehiyen ni Hisus sikandan te, "Embiya iring ketà ne ivehey niyu diyà te datù ayan se bayad te buwis ne kandin, ne ivehey niyu riyà te Eleteala ke endei rema ke kandin." ²⁶ Ne warè en iya neselingkep dan kandin ketà te lalag din diyà te etuvangan te merakel ne menge etew. Ketà ne mibpeeneng-eneng dan su negeyip dan dut te tavak din.

Mid-insà ke Menge Sedyusiyu Ki Hisus Mekeatag te Kegkevanew te Menge Minatey

(*Mateo 22:23-33; Marcos 12:18-27*)

²⁷ Duen menge etew ne ed-ingaranan te Sedyusiyu ne mibpendiyà te ki Hisus. (Ini se menge Sedyusiyu ke menge etew ne warà mebperetiyyaya te egkevanew pà te Eleteala ke menge minatey.) Iyan dan impengkayi te ki Hisus ne ed-insà dan. ²⁸ "Meyerù," ke sikandan, "ruen penduan ne insurat ni Moises dengan ne egkahi te, 'Embiya ruen meama ne ebpatey ne neketahak te esawa rin ugaid ne warà anak dan, ne ebpemeluwen dut te suled din ne meama su apey ruen ded anak dut te minatey ne ebpekesumpat.' ²⁹ Su ruen dengan," ke sikandan, "pitu ne meama ne telteleari ne mid-esawa en ke kakey, ugaid ne minatey

te warà dan med-anak. ³⁰ Ne mibpemalu en dut te nesikupu rin arà se ipag dan, ne minatey red dema te warà dan med-anak. ³¹ Ne iring din ded dema ke iketelu. Ne engketà ded ke nesamà, langun dan te pitu ne etew se nekepemalu ketà te ipag dan, ugaid ne warà dan med-anak. ³² Netaman ne minatey en ini se meritan. ³³ Ne ini ve se id-insà dey keykew,” ke se menge Sedyusiyu, “embiya benar ne egkevanew red te Eleteala ke menge minatey keuremà, ne entei ve rapit kandan se tehiesawa ketà te meritan? Su langun dan te pitu ne telteleari ne nekedtundug se nekeesawa kandin.”

³⁴ Ne migkahi si Hisus kandan te, “Ini se menge etew kayi te ampew te dunya ne ebpees-eseweey. ³⁵ Ugaid ne ke menge etew ne ebirangan te Eleteala ne dait ne ebenawen ne ebpeubpaen diyà te langit, ne kenà en ebpees-eseweey. ³⁶ Iyan dan kenà kebpees-eseweey ne iring dan en te suluhuen te Eleteala ne kenè en ebpatey. Menge anak dan en te Eleteala su nevanew ran en. ³⁷ Ne mekeatag ketà te egkevanew red te Eleteala ke menge minatey,” ke si Hisus, “mepayag en ini ketà te impesurat ni Moises dengan mekeatag te kinepekidlalag te Eleteala kandin diyà ebpuun te nereggreg ne sagbet. Su ketà ne nekahai ni Moises te ini se Eleteala ‘ne iyan ded Eleteala ne ebpengerapen ni Abraham, si Isaac wey si Jacob,’ misan ketà ne hewii ne neuhet dan en ne minatey. ³⁸ Su ini ne ebpesabut te misan minatey ran en ne biviyag dan pà diyà te etuvangan te Eleteala su iyan dà ebpekepengarap te Eleteala ne biviyag, kenà ke minatey.”

³⁹ Ne ruen ketà menge meyterù te penduan ne migkahi ki Hisus te, “Benar ayan se migkahi nu, Meyerù.” ⁴⁰ Ne warà dan en medtikà ne ed-insà pà maa ki Hisus.

Impesabut ni Hisus te Sikandin Ke Impasad te Eleteala ne Ebperetuen te Langun

(Mateo 22:41-46; Marcos 12:35-37)

⁴¹ Ne migkahi si Hisus kandan te, “Meambe ke nekahai ran te ke Mesiyas arà se Impasad te Eleteala rengan ne Ebperetuen te langun ne inenakan sikandin ni David? ⁴² Su riyà te riberù ne ed-ingaranan te Salmo ne si David en iya se edlalag ketà te,

‘Migkahi ke Eleteala ketà te Kerenan ku te:

Kayi ka pinuu te rapit te egkekewanau ku

⁴³ taman te ebpenggiekan ku

ke menge kunterà nu.’

⁴⁴ Na,” ke si Hisus, “embiya ini ke nekahai ni David te arà se Impasad te Eleteala ne Ebperetuen te langun ne Kerenan din, ne mepmepurù pà sikandin dut te inenakan dà ni David.”

Duen Imbaag ni Hisus Mekeatag te Ed-ul-ulaan Te Menge Meyterù te Penduan

(Mateo 23:1-36; Marcos 12:38-40)

⁴⁵ Ebpemineg pà ke merakel ne etew ki Hisus ne migkahi en sikandin kayi te edumdumaan din te, ⁴⁶ “Uram kew su apey kenà kew egkepeneheewit dut te menge meyterù te penduan ne ebpengipipanew se ebevelegkas te lembung ne sida ne melayat su ebpeadat te menge etew diyà te menge pedian. Ne embiya riyà dan en te valey ne ebpengedian te penduan te menge Hudiyanan ne ebzemilì dan te meupiya ne ebpinuuwan diyà te sineruwan, etawa ke edtelavuk dan te

kevurunan ne riyà dan ebpinuu te insivey ne meupiya ne ebpinuuwan te egkeedatan. ⁴⁷ Ne ebpeey-eyunan dan ke menge kearen dut te menge valu ne meritan, ne ebpeedleyedley ran te kebpengeningen i ran diyà te Eleteala su uvag kun se rekelà se sarig dan te Eleteala. Ugaid ne keuremà ne labi pà ne mekeandek-andek ke ibadas ne kerusaan kandan te Eleteala!"

21

Ke Imbehey Te Valu ne Meritan Diyà te Eleteala

(*Marcos 12:41-44*)

¹ Senge hewii ne riyà si Hisus te Nekebpuru ne Valey te Eleteala, ne nekita rin ke menge etew ne kewasa ne id-ulug dan ini se ibehey ran te Eleteala ketà te edtegthuan te kureta. ² Nekita rin dema ini se senge etew ne balu ne meritan ne ayuayu nevenar ne ed-ulug te deruwa ne tumbaha. ³ Nekita rin ini ne migkahi en sikandin kayi te menge ruma rin te, "Benar ini se egkehiyen ku kenyi, ini se valu ne meritan diyà te etuvangan te Eleteala ne iyan pà dekelà se imbehey rin dut te langun ne imbehey te menge kewasa. ⁴ Su ke ruma ne menge etew ne iyan dan imbehey ne sawad dà dut te kekewesai ran, ugaid ne ini se ayuayu ne valu ne imbehey rin en te Eleteala ke namànamà ne kureta rin ne edserihan te hinawa rin."

Migkahi ni Hisus ke Kegkerundus Dut te Nekebpuru ne Valey te Eleteala

(*Mateo 24:1-2; Marcos 13:1-2*)

⁵ Duen menge edumdumaan ni Hisus ne mibpengasak mekeatag te kineup-upiani te ebaal dut te menge kebperasan ne batu kayi te Nekebpuru ne Valey te Eleteala. Ne langun kayi ne mepurù nevenar ne imbehey te menge etew riyà te Eleteala. Nerineg ni Hisus ne migkahi sikandin te, ⁶ "Langun kayi te edtengtengan niyu guntaani ne egkereetan. Su ruen gewii ne egkeuma ne ini se edtengtengan niyu guntaani ne egkerundus ne warà misan seveka rà ne batu ne egkesamà kayi te netehuan din su egkevurahey langun."

Migkahi ni Hisus ke Keresayan wey Kebakesakit ne Ebpekeuma kayi te Menge Etew

(*Mateo 24:3-14; Marcos 13:3-13*)

⁷ Ne mid-insaan dan si Hisus te, "Meyterù, keenu ve ini egketuman se kegkerundus dut te Nekebpuru ne Valey te Eleteala? Ne engkey se idtuus dey su apey rey egketueni te mehaan en ini egketuman?"

⁸ Ne migkahi si Hisus te, "Uram kew su apey kenà kew meeekali dut te menge etew ne metau ne edliyuk. Su merakel se edlepew ne engkungkun ne siaken en ne egkahi ran te, 'Siaken en ini ke Impasad te Eleteala ne Ebperetuen te langun!' Ne egkahi ran te, 'Ini en ke ketepusan ne hewii,' ugaid ne kenà kew eduma kandan. ⁹ Ne embiya egkerineg niyu se ebpevunbunuey riyà te meriyù merani ne kenà kew meandek. Su ini pà iya ke egkeuna ne egked-ulaula, ugaid ne warà pà meuma ke hewii te kebpupusa kayi te dunya."

¹⁰ Ne migkahi en si Hisus kandan te, "Ebpemekebunuey pà ke idsenge inged, ne engketà ded dema ke idsenge retuan. ¹¹ Ne edlinug te mevaher, ne ruen mepmepasang ne bitil wey ruen sakit ne ed-eneb kayi te piya endei ne inged. Ne ruen egked-ulaula ne mekeandek

nevenar wey ruen dekelà ne tuus ne egkekita niyu Riyà te langit ne ebpekeinuunu wey ebpekeandek.

¹² "Ugaid ne kayi te kenà pà ini egketuman, ne edsigkemen kew ne edreseyen kew ran. Ne ibpepemenayik kew Riyà te baley ne ebpengedian te menge Hudiyanen te penduan dan su egkukumen kew ne ebilengguen kew en. Ne ebpeneheewiten kew Riyà te menge hari wey Riyà te egkeunutan te inged su atag dut te kedsarig niyu kediey. ¹³ Ugaid ne ini en imbe ke ralan te kebpekepesabut niyu kandan dut te Meupiya ne Tudtul mekeatag kediey. ¹⁴ Es-eseka niyu neraan ke hinawa niyu ne kenà kew egkeuru ke engkey se idtavak niyu kandan. ¹⁵ Su siaken dà se ebpekahki keniyu ne ebehayan ku sikiyu te ketampas te itungan su apey ke menge kunterà niyu ne kenà ebpeketavak ne kenà dan egkeliyu ke benar ne egkelalag niyu. ¹⁶ Ne misan ke lukes niyu, ke temperà niyu te bituka, ke menge suled niyu wey ke menge sepakat niyu ne ebpulid keniyu Riyà te egawed te kukuman, ne ruen en ebpeimetayan kayi te sikiyu. ¹⁷ Egkunteraan kew dut te langun su atag te edumdumaan ku sikiyu. ¹⁸ Ugaid ne warà egkeawà misan seveka ne bulvul nu ne iyan din meana ne misan ed-imatayan kew ne kenà kew ran en egkesikep diyà te palad te Eleteala. ¹⁹ Itindehi niyu ve te mevaher ke sarig niyu kediey su kayi kew ve ebpekeangkun te umur ne kenà edtaman."

Imbaag ni Hisus Ke Kegkereeti Rut Te Inged ne Hirusalim

(Mateo 24:15-21; Marcos 13:14-19)

²⁰ Ne migkahi en maa si Hisus te, "Embiya egkekita niyu en ini se inged ne Hirusalim ne edtelikupan en te kunterà niyu ne sundaru ne kenà kew en duwaruwa te mehaan en se kegkereeti rin. ²¹ Na ke menge etew kayi te pruvinsiya te Hudiya ne mebpelahuy en diyà te buvungan. Ne ke menge etew kayi te Hirusalim ne mebpelahuy dema. Ne ke menge etew ne kayi te nekeerivey ne inged ne kenà dan en iya mebpengkayi te Hirusalim. ²² Su arà en ke hewii ne edusaan te Eleteala ke menge etew ne egkunterà kandin, ne langun te nekahai rin kayi te impesurat ne Lalag te Eleteala rengan ne egketuman en. ²³ Egkeyruwan ke menge meritan ne mehingey te arà ne hewii wey ke menge meritan ne edseruru. Su ruen kemeresayan ne ebpekedabak kayi ne inged, ne ed-isuhaten en te Eleteala te kegkeepes din ke menge Hudiyanen ne egkunterà kandin. ²⁴ Duen kayi te sikandan ebpenundangen, ne ruen ebpembiyahen ne ed-ewiten diyà te langun ne menge inged kayi te ampew te dunya. Ne ini se inged ne Hirusalim ne edtekutaken te menge etew ne kenà Hudiyanen taman te idtuuhut pà kandan te Eleteala."

Tuus te Mehaan en ke Kedlived Dut te Impeanak te Menusiyà Kayi te Ampew te Dunya

(Mateo 24:29-31; Marcos 13:24-27)

²⁵ Ne migkahi en maa si Hisus te, "Duen egkekita niyu Riyà te andew, bulan, wey bituen ne menge tuus. Ne kayi te ampew te dunya ne egkekinyab se atey te menge etew rut te egkerineg dan ke ebpekesahad ne egkenegkeneg ne rahat wey ke ebpeteltelukuney ne baleg. ²⁶ Ebpengevidtawan ke menge etew te andek dan su egkeuru ran ke engkey se egketemanan dan. Su langun te netehuan te edtenuran

diyà te langit ne egkeparin. ²⁷ Ne ketà ne egkekita ran ke kedlived, te Impeanak te Menusiya, su eduma dut te sehulapun. Ne egkekita ran ke gehem din wey ke ed-andlag ne raman din. ²⁸ Embiya edrudsurudsù en ini se migkahi ku te kegketuman din ne kenà kew kelugkai ugaid ne kehalew kew su mehaan kew en ebpekeliyu.”

*Ke Sempità ni Hisus Mekeatag Te Kayu ne Igira ne In-upama Rin te Tuus te Mehaan en ke Kedatù te Eleteala te Menusiyà
(Mateo 24:32-35; Marcos 13:28-31)*

²⁹ Ne mibpenempità si Hisus kandan te, “Kenyan niyu rè ma te kayu ne igira wey ruma pà ne menge kayu. ³⁰ Embiya egkekita niyu ne nekepasad en te edrewrew wey ebpeneringsing en, ne tuus te ed-andew en. ³¹ Ne iring din ded dema embiya egkekita niyu en se netuman en ke langun ne tuus ne intarem ku keniyu, ne egketuenan niyu te mehaan en ke Kedatù te Eleteala te menusiyà.

³² “Tentenuri niyu ini se egkehiyen ku keniyu su ruen pà kayi te keniyu guntaani ebpekesaut pà ketà te kegketuman din ini. ³³ Su egkeawà ini se langit wey tanà, ugaid ne ini se migkahi ku ne kenà bulug ebperis.”

Ke Imbaag Ni Hisus Mekeatag Te Kebantey Rut te Hewii te Kegkukum te Eleteala te Menusiyà

³⁴ Ne migkahi en maa si Hisus te, “Uram kew ve su apey kenà kew kayi rà egketaman te kebpengeturunan, ebpenginum te ebpeketev-ereg, wey ke kegkeuru niyu te ked-ubpàubpà niyu. Su embiya kenà kew ed-uram ne egkesaut kew te hewii ne kegkukum te Eleteala te menusiyà ne iring kew te rumat ne egketelebpi. ³⁵ Su iring te telivekasen se kehaan din te kebpekeuma ketà kayi te langun ne menusiyà. ³⁶ Tembù be,” ke si Hisus, “pekevantey kew nevenar ne layun kew pengeningeni su apey kew ebehera te Eleteala te ked-etuvang niyu kayi te langun ne egketemanan. Pengeningeni kew su apey warà igkeyeyai niyu ketà te ked-itindeg niyu kayi te etuvangan ku, ke Impeanak te Menusiyà.”

³⁷ Uman gewii ne mibpenurù si Hisus diyà te Nekebpuru ne Valey te Eleteala, ne uman merukilem ne mibpendiyà sikandin te buvungan ne ed-ingaranan te Uliwuwen su riyà ed-ubpà. ³⁸ Ne mibpaneypaney ke menge etew ne ebpendiyà te Nekebpuru ne Valey te Eleteala su ebpemineg te penurù din.

22

Mibentaan ke Menge Mepurù te Terebpelengesa wey ke Menge Meyterù te Penduan te Kedsigkem ki Hisus

(Mateo 26:1-5; Marcos 14:1-2; Juan 11:45-53)

¹ Mehaan en egkeuma arà se hewii te kevurunan ne edtenuran dut te menge Hudiyanan ne ed-ingaranan te Pista te Kedsehari te Suluhuen. ² Ne ebpmengà ke menge mepurù te terebpelengesa wey ke menge meyterù te penduan te ralan te kedsigkem dan ki Hisus te kenà egketuenan te menge etew su egkeandek dan te menge etew.

*Mibpendiyà si Hudas Iskeriyuti te Menge Mepurù te Terebpelengesa
Su Ebpekidsabut ke Ebmemenuwen Din te Ed-ulug si Hisus
(Mateo 26:14-16; Marcos 14:10-11)*

³ Ne ketà ne mid-awuk en si Setanas ke datù te pekaid ki Hudas, ini se ed-ingaranan dema te Iskeriyuti ne senge etew sikandin dut te sepulù wey deruwa ne edumdumaan ni Hisus. ⁴ Ne midlihawang sikandin se ebpendiyà te menge mepurù te terebpelengesa wey ke menge kepitan dut te ebantey te Nekebpuu ne Valey te Eleteala su ebpekidsabut kandan ke memenu se kebpulid din ki Hisus. ⁵ Ne nengesuatsuat dan nevenar, ne impasad dan kandin te ebehayan te pirak. ⁶ Ne migkiyug en si Hudas ne in-awà dà ketà ne ebpmengaan din en ke ralan te kegkeulug din ki Hisus su apey mesikem dan en te kenà egketuenan dut te menge etew.

*Mibpenehana si Hisus Wey Ke Menge Edumdumaan Din Dut te Kedlavung te Pista te Kedsehari te Suluhuen
(Mateo 26:17-25; Marcos 14:12-21; Juan 13:21-30)*

⁷ Neuma en ke hewii rut te kevurunan dan te Pista te Kegkaan dan te Pan ne Warà Insawug ne Ibpelevag. Ne ini se neuna ne hewii ne idsumbalì te menge Hudianen te ibpelengesa ran ne nati ne bilibili ne egkeenen dan te kedtenuri ran dut te hewii rengan te kedsehari te menge apù dan dut te suluhuen te Eleteala. ⁸ Ne midsuhuen ni Hisus si Pedro wey si Juan ne migkehiyan din sikandan te, “Una kew en be ne pegatur kew en te Kedlavung tew te Pista te Kedsehari te Suluhuen.”

⁹ Ne mid-insà dan ki Hisus te, “Endei rey ve ini ebpegetura?”

¹⁰ Ne migkahi si Hisus te, “Embiya ebpekeuma kew en diyà te inged ne ruen meama ne ed-utuk te kelalew ne ruen wayig din ne edsinuhung keniyu. Tundug kew en be kandin, ne embiya ebpekeuma kew riyà te ed-ubpaan din, ¹¹ ne kehiyi niyu ve ke kemuney te valey te, ‘Ibpeinsà rut te meyterù tew te: Endei ne ruhu ke edlevungan ku wey ke menge edumdumaan ku dut te Pista te Kedsehari te Suluhuen?’ ¹² Ne ketà ne ibpekita rin keniyu ke meluag ne ruhu diyà te ikeruwa ne pangkat ne saag ne pegediran en, ne ketà kew be pegatur te idlavung tew.”

¹³ Mid-ipanew ran ne nekeuma ran ketà te inged ne langun dut te ingkahi kandan ni Hisus ne arà en iya rema se nekita ran. Ne ketà dan en mibpegatur te idlavung dan te Pista te Kedsehari te Suluhuen.

Ke Ketepusan dà ne Kinepekiduma ni Hisus te Egkaan Dut Te Menge Edumdumaan

(Mateo 26:26-30; Marcos 14:22-26; 1 Kurintu 11:23-25)

¹⁴ Guna su arà en ke kedlavung dan ne mibpinuu si Hisus wey ke menge edumdumaan din ne ed-ingaranan te apustulis su egkaan. ¹⁵ Ne migkahi si Hisus te, “Dekelà te hinawa ku se egkeseveka kiyu se egkaan te ini ne Pista te Kedsehari te Suluhuen te kenà e pà ebpatey. ¹⁶ Su ini se idtarem ku keniyu te egkepasad ini ne kenà ad maa egkaan te Pista te Kedsehari te Suluhuen taman te egketuman en ke tidtu ne pista ketà te menge etew ne Edetuan te Eleteala keuremà.”

¹⁷ Ne ketà ne migkuwa ni Hisus ke ed-inumen ne impeselamat din te Eleteala ne migkahi sikandin te, “Pesemsemeey kew ve se ed-inum

kayi. ¹⁸ Su idtarem ku kenyi te kenà ad maa ed-inum kayi te ed-inumen ini taman te kenà egkeuma ke hewii keuremà te Kedetui te Eleteala.”

¹⁹ Ne migkuwa rin ke egkeenen dan ne pan ne impeselamat din te Eleteala, ne mibpenevitevi din ne imbehey rin diyà te menge edumdumaan din se egkahi te, “Ini ke lawa ku ne ibeliwas kenyi. Ul-ulaa niyu ini su apey a niyu egkepegpegitung.”

²⁰ Guna su nekeipus dan se edlavung ne migkuwa maa ni Hisus ke ed-inumen se egkahi te, “Ini se lengesa ku ne ebpeketudà ne ibavas te langun ne menge etew, su tuus ini te egketuman en ke impasad te Eleteala rengan te ebpekepelihauan en ke langun ne menge etew te keberedusaan dan.

²¹ “Ugaid ne kegketueni niyu te sikandin ini se ed-ulug kediey ne kayi red te sikitew ini ne mibpinuu. ²² Su ed-imetayan ke Impeanak te Menusiyà su rengan ne intandà te Eleteala ini, ugaid ne mekeyruwiru arà se etew ne ed-ulug kandin.”

²³ Ne ketà ne mibpein-inseey ke menge edumdumaan din ke endei rapit buwa kandan se ed-ulaula kayi te migkahi rin.

Migpelewewaney Ke Menge Edumdumaan ni Hisus ke Engkey se Mepurù Kandan

²⁴ Ne mibpelewewaney ke menge edumdumaan ni Hisus ke engkey kandan se mepurù te langun. ²⁵ Migkahi si Hisus kandan te, “Kayi te ampew te dunya ini se menge pengulu te inged ne metehel ne edsuhù te menge sakup dan, ne ini se menge unuten ne egkiyug ne egelalan te sikandin ke Ebpesineruwan te Menge Etew. ²⁶ Ugaid ne kenà kew ediring ketà, su embiya ruen seveka kenyi ne egkiyug ne ebmepurù ne iyan din kemeyidan ne mebpeembavà te hinawa rin iring te inerian en. Ne embiya ruen egkiyug ne egkeunutan ne medlila te hinawa rin te edsugsuhuen te menge ruma rin. ²⁷ Maa entei se mepurù,” ke si Hisus, “ke etew ne edsendaran su egkaan etawa ke etew ne edsendaran kandin? Idtarem ku kenyi te arà se midsendaran. Ugaid ne misan siaken se edlingkaan niyu ne gewii ku te kayi te kenyi ne iring te siaken se edsugsuhuen niyu.”

²⁸ Ne migkahi si Hisus te, “Langun te kemerehenan ku ne mid-unung kew kedi. ²⁹ Mibehayan a te Amey ku ne Eleteala te kewagib te edatù, ne engketà ded ebehayan ku rema sikiyu te kewagib te kedadù. ³⁰ Keuremà te Kedatù ku ne ketà kew ebpinnuu te uvey ku su edseveka kiyu egkaan wey ed-inum. Ne ebpepinuuwan ku sikiyu se edatù dut te sepulù wey deruwa ne bansa ne inenakan ni Israyil.”

Impayag neraan ni Hisus ke Kebparew ni Pedro te Teleduma Ran (Mateo 26:31-35; Marcos 14:27-31; Juan 13:36-38)

³¹ Migkahi si Hisus kayi te ki Simon Pedro te, “E, Simon, duen idtarem ku keykew. Midtuhutan te Eleteala si Setanas ke datù te pekaid su ebpenggeraman kew ke embiya ebpekedsalà kew. Ini se kebpenggeram din ne iring te ed-ukapan din ke sarig nu. ³² Ugaid ne impengeningi ku en sikuna, Simon, su apey kenà egkeawà ke sarig nu kediey. Ibparew a nikuna, ugaid embiya ebpekeulit en ke sarig nu kediey ne behera nu ke sarig te menge ruma nu.”

³³ Ne migkahi si Pedro te, “Kenà a ebpitas kenikew, Kerenan, misan egkevilanggù ka ne ketà ad dema. Embiya ebpatey ka ne ebpekidunung a kenikew.”

³⁴ Ne migkahi si Hisus te, “Tentenuri nu ini, Pedro, te kenà pà edukarà ke manuk te ini en ne kerukileman, ne ketetelu a nu en ibparew te kenà a nu ruma.”

Migkehiyan en ni Hisus ke menge Edumdumaan Din te Ebpeewiten en te Kureta, Kempiru wey Sundang te Ked-ipanew Ran

³⁵ Ne migkahi maa si Hisus kandan te, “Ketà te kinesuhù ku keniyu rut te kengkeniyà ne indawey ku keniyu se ed-ewit te kureta, kempiru etawa telumpà, ne maa ruen be nepemengà niyu?”

Ne migkahi ran te, “Warà.”

³⁶ Ne migkahi si Hisus te, “Ugaid ne guntaani ne embiya ruen kureta etawa kempiru niyu ne ewita niyu en te ked-ipanew niyu. Ne ke etew ne warà sundang din ne pesaa rin en ke kumbalà din ne mebpemasa te seveka. ³⁷ Su igkahi ku keniyu ne arà se impesurat ne Lalag te Eleteala mekeatag kediey ne iyan iya se metuman en. Su ruen nekahì ketà mekeatag kediey te, ‘Inragkes sikandin te menge etew ne belisalà’ ne ke kegketuman din ini ne mehaan en egkeuma.”

³⁸ Ne migkahi ke menge edumdumaan din te, “Intengi nu ma, Meyerù, su duen en deruwa ne sundang dey.”

“Sesangen en ayan,” ke si Hisus.

Mibpengeningeni si Hisus Diyà te Buvungan ne Ed-ingaranan te Ed-ulivuwen

(Mateo 26:36-46; Marcos 14:32-42)

³⁹ Midlihawang en si Hisus ketà te valey ne midlevungan dan ne mibpendiyà maa sikandin te buvungan ne ed-ingaranan te Ulivuwen su arà ke andang ne ebpsineruhan din. Ne miduma kandin ke menge edumdumaan din. ⁴⁰ Nekeuma ran ketà ne migkehiyan din sikandan te, “Pengeningeni kew su apey kenà kew mepeneheewit dut te ebbenggeram keniyu.”

⁴¹ Mid-ewaan ni Hisus sikandan te egkeuma red te edtimbag, ne mibpenimbuel sikandin se ebbengeningeni te Eleteala. ⁴² Ke sikandin te, “Amà, netuenan ku te egkegaga nu ke langun! Ne embiya egkiyug ke rà ne iawà nu ini se keresayan ku, ugaid ne misan be engketà ke kiyug ku ne ipelevundus nu se keykew ne kiyug.” ⁴³ Gewii rin te ebbengeningeni ne ruen suluhuen te Eleteala ne riyà ebpnuun te langit ne mibpengkayi te kandin su ebaher te hinawa rin. ⁴⁴ Ne gaina te nepenù en si Hisus te kemutuwan ne mid-ilut pà se kebpengeningeni rin te Eleteala, ne ketà ne edtehaktak diyà te tanà ke rimuseng din ne iring en te lengesa.

⁴⁵ Mid-itindeg sikandin ketà te ebbengeningeniyan din ne midliveran din ke menge edumdumaan din, ne neumaan din ne nekelipereng dan su neewaan dan te baher dut te kemutuwan dan. ⁴⁶ Migkahi en si Hisus kandan te, “Meambe ke edlipereng kew? Enew kew ne pengeningeni kew te Eleteala su apey kew kenà mepeneheewit dut te ebbenggeram keniyu.”

Ke Kedsigkem Ki Hisus

(Mateo 26:47-56; Marcos 14:43-50; Juan 18:3-11)

⁴⁷ Gewii te edlalag pà si Hisus ne nekeuma en se merakel ne etew. Ne si Hudas ke senge etew rut te sepulù wey deruwa ne edumdumaan din ne iyan en iya ebpengunaan kandan. Mid-uvey rin si Hisus su ed-erekān din. ⁴⁸ Ugaid ne migkahi si Hisus kandin te, “Maa, Hudas, ini embe se ked-arek nu kayi te Impeanak te Menusiyà se ked-ulug nu en kandin kenian te menge ruma nu?”

⁴⁹ Nekita rà kayi te menge edumdumaan ni Hisus se iring bes kayi ne migkahi ran te, “Menu, Meyerù, editibas key en su sundang ded ini?”

⁵⁰ Ne senge etew kandan se mid-ulavut din se sundang din ne midtibas din en ke edsugsuhuen dut te pinekebmepurù te terebpelengesa ne nesamping en ke kewanen ne telinga rin.

⁵¹ Ne ketà ne migkahi si Hisus te, “Suhati nu en!” Ne in-ulit ni Hisus ke telinga rut te edsugsuhuen ne neulian en.

⁵² Ne migkehiyan ni Hisus ke menge etew ne edsigkem kandin, ini se menge mepurù te terebpelengesa, ke menge kepitan te ebanterey rut te Nekebpuru ne Valey te Eleteala, wey ke menge egkeunutan te menge Hudiyanan, ke sikandin te, “Maa, tulisan a ne ebmetereman niyu te sundang wey behuval te kedsigkem kediey? ⁵³ Su uman gewii ne diyan a te Nekebpuru ne Valey te Eleteala se ebpenurù, ne warà e ma nikiyu sigkema ketà. Ugaid ne keniyu en ini ne hewii te kedsigkem kediey, ne ebpepayag en ke kevaher ni Setanas ke datù te pekaid se ebayàbayà keniyu.”

Imparew ni Pedro te Teleduma Ran ki Hisus

(Mateo 26:57-58, 69-75; Marcos 14:53-54, 66-72; Juan 18:12-18, 25-27)

⁵⁴ Ne ketà ne midsigkem dan si Hisus ne mibpeneheewit dan en diyà te baley te pinekemepurù dut te menge terebpelengesa. Ne midtundugtundug en dema si Pedro. ⁵⁵ Nekeuma ran ne ketà te lama ne ruen midtetemeg te apuy ne mibpinuu ran se ed-inarang. Ne mibpekid-amur en si Pedro kandan. ⁵⁶ Ne ruen ketà senge etew ne raha ne edsugsuhuen ne nekekita ki Pedro te nesilaan te rayag dut te apuy. Midtengtengan din si Pedro ne migkahi en te, “Ini ne meama ne ruma red ketà te midsigkem dan.”

⁵⁷ Ugaid ne mibparew si Pedro se egkahi te, “E, Bayi, kenà ku egketuenan ke entei sikandin.”

⁵⁸ Neiseg-iseg ne ruen en maa senge etew ne nekekita ki Pedro ne migkahi te, “Benar iya ne ruma ke red ketà te nesigkem.”

Ne migkahi si Pedro te, “E Mama, kenà.”

⁵⁹ Ne neiseg-iseg maan ne ruen maa senge etew ne nekekita ki Pedro ne migkahi te, “Benar iya ne ruma red sikandin ketà te nesigkem su riya ebpuun sikandin te Geliliya.”

⁶⁰ Ne migkahi si Pedro te, “E, Mama, kenà ku egkesebutan ayan se egkehiyen nu.” Arà dà ne gewii te edlalag pà si Pedro ne mid-ukarà en ke manuk. ⁶¹ Ketà ne midlilingey ni Hisus si Pedro. Ne arà pà ne netenuran ni Pedro ke migkahi ni Hisus kandin te, “Kenà pà ed-ukarà ke manuk guntaani te ini en ne kerukileman ne ketetelu a nu en ibparew te kenà a nu ruma.” ⁶² Ne midlihawang si Pedro ne midrahukrahuk en te kedsinehew rin.

Mid-undaunda wey Mibedasan si Hisus

(Mateo 26:67-68; Marcos 14:65)

⁶³ Ne mid-undaunda en wey mibedasan si Hisus dut te menge etew ne mibantey kandin. ⁶⁴ Ne mibegkesan dan ke mata rin ne migkahi ran te, “Entuka nu ke enta se mibadas keykew.” ⁶⁵ Ne merakel pà se kinepegkeyà dan ki Hisus.

*Mid-ewit Dan si Hisus Diyà te Kukuman
(Mateo 26:59-66; Marcos 14:55-64; Juan 18:19-24)*

⁶⁶ Guna su mesmeselem pà ne langun dut te egkeunutan te menge Hudiyenan, ke menge mepurù te terebpelengesa, wey ke menge meyerù te penduan ne impeetuvang dan en si Hisus su sikandan ke egkukum. ⁶⁷ “Embiya sikuna ke Anak te Eleteala,” ke sikandan, “ne Impasad din ne Ebperetuen din ne kehiya nu kenami.”

Ne migkahi si Hisus te, “Misan egkehiyen ku kenyi ne kenà kew ebperetiyyaya kediey. ⁶⁸ Ne misan duen id-insà ku kenyi ne kenà kew rema edtavak. ⁶⁹ Ugaid ne igkahi ku kenyi te mehaan en egketuman ke hewii ne ebpekepinuu en ke Impeanak te Menusiyà diyà te rapit te egkekewanen te Eleteala ne warà repeng te gehem din.”

⁷⁰ Ne langun dan ne migkahi te, “Embiya ves arà se kahi nu, ne maa sikuna en iya ini ke Anak te Eleteala ne Impasad din ne Ebperetuen din?”

Ne midtavak si Hisus te, “Uya, siaken en iya.”

⁷¹ Ne migkahi ran te, “Kenà ki en ebpmengà te ruma pà ne titihus su nerineg tew en ayan se lalag din ne mibpnevayà te bèbà din.”

23

*Mid-ewit Dan Si Hisus Diyà te ki Pilatu ke Gubinedur ne Rumanu
(Mateo 27:1-2, 11-14; Marcos 15:1-5; Juan 18:28-38)*

¹ Ketà ne langun ne menge etew ne mibpengukum ki Hisus se mid-ewit kandin diyà te gubinedur ne si Pilatu su apey rin mepasad en ke kukuman. ² Nekeuma ran ne imperineg dan ki Pilatu ke id-isuhat dan kandin se egkahi te, “Nesepenan dey ini se meama ne ebpesuwey rut te menge etew kayi te inged tew su impeengked din ke menge etew ne ebayad te buwis diyà te mepurù tew ne si Cesar. Ne migkahi rin te sikandin kun ke midtendù te Eleteala ne ebperetuen.”

³ Ne mid-insaan ni Pilatu si Hisus te, “Menu sikuna en iya ke ratù te menge Hudiyenan?”

Ne midtavak si Hisus te, “Uya, ayan iya se migkahi nu.”

⁴ Ne migkahi si Pilatu riyà te menge mepurù te terebpelengesa wey ke merakel ne menge etew ne nevurun ketà, ke sikandin te, “Warà netuen ku ne salà ne id-isuhat ku kayi te etew ini.”

⁵ Ugaid ne nasi dan en ne mibpemensag se egkahi te, “Ini se menge penurù din se puunan te ebpeetuwen din ke menge etew ketà te mepurù tew. Midrudsù se kebpenurù din diyà te lusud te Geliliya ne neeneb din ke menge inged diyà te lusud te Hudiya taman te ini en te Hirusalim.”

Mid-ewit Dan si Hisus Diyà te ki Hirudis

⁶ Nerineg ni Pilatu ini ne mid-insà sikandin te, “Meambe, etew ves ini te Geliliya?” ⁷ “Uya,” ke sikandan, “etew ayan te Geliliya.” Guna su netuenan ni Pilatu te riyà bes ne etew si Hisus te Geliliya ne inged ne

egkemalan ni Hirudis, ne impependiyà din si Hisus te ki Hirudis. Su seretà din ketà ne kayi rema si Hirudis te Hirusalim.

⁸ Nekita ni Hirudis si Hisus ne nesuatsuat sikandin su neuhet en ne ed-ing-ingitaen din si Hisus. Su uman din dà egkerineg ke mekegeyip ne ed-ul-ulaan ni Hisus, ne ed-inteng dema perem sikandin. ⁹ Ketà be ne mibpenginsaan ni Hirudis si Hisus, ugaid ne warà midtavak si Hisus. ¹⁰ Nekeipus sikandin ne mid-uvey ke menge mepurù te terebpelengesa wey ke menge meyterù te penduan ne mid-uluhan dan nevenar si Hisus te kewagib. ¹¹ Ne mid-undaunda ni Hirudis wey ke menge sundaru rin si Hisus ne pinegkeyà dan. Ne pinelembung dan te velegkas te datù su uvag kun ne ratù ne impelived dan en maa riyà te ki Pilatu. ¹² Ne arà ne andew ne neked-upiyaney en si Pilatu wey si Hirudis su pehaney ne telegkunterà dan.

*Nepasad ke Kukuman Dan te Ed-imetayan si Hisus
(Mateo 27:15-26; Marcos 15:6-15; Juan 18:39-19:16)*

¹³ Guna su kayi en maa si Hisus te ki Pilatu ne miburun ni Pilatu ke menge mepurù te terebpelengesa, ke menge egkeunutan wey ke merakel ne etew. ¹⁴ Ne migkehiyan din sikandan te, “Mid-ewit niyu ini se etew kayi te kedì ne egkehiyen niyu ne ebpeatu sikandin kayi te menge etew rut te mepurù tew. Ugaid ne mid-insaan ku en sikandin kayi te etuvangan niyu ne warà netuen ku ne salà din iring dut te idwagib niyu. ¹⁵ Engketà ded dema si Hirudis, warà dema netuen din su tembù impelived din ded kayi te kenitew. Warà salà kayi te etew ini ne rait ne id-imetayi kandin. ¹⁶ Ugaid ne ibpelambit ku rà sikandin ne ibpelihawang ku en.” (¹⁷ Iyan kinekahи ni Pilatu kayi su ruen betasan din te embiya egkeuma ke kevurunan te Pista te Kedsehari te Suluhuen ne ruen ibpelihawang din ne senge etew ne bilanggù ne ebuyuen te menge etew.)

¹⁸ Nerineg dut te menge etew ini se migkahi ni Pilatu ne nasi dan ne mibpemensag se egkahi te, “Peimatayi nu ayan ne etew! Ne ibpelihawang nu kayi te kenami si Barabas!” ¹⁹ (Si Barabas ini ne nevilanggù su mid-amung sikandin te ebpekidkunterà te gubirnu ne ruen nepatey rin.)

²⁰ Duen kiyug ni Pilatu te iyan ibpelihawang ne si Hisus ne ketà ne mid-insà maa sikandin dut te menge etew. ²¹ Ugaid ne mibpemensag se egkahi te, “Ipelansang nu! Ipelansang nu riyà te ebpebelevahen ne kayu!”

²² Ne migkahi en maa si Pilatu te iketelu en te, “Meambe? Engkey se meraat ne mid-ulaula rin? Su warà netuen ku ne salà din ne dait ne id-imetayi kandin. Ibpelambit ku rà sikandin ne ibpelihawang ku en.”

²³ Ugaid ne mid-ilut dan pà se ebmemensag se egkahi te ebpeimetayan sikandin, ne warè en mekeehen si Pilatu. ²⁴ Geina te mibpulung dan mibpemensag ne imbehey en ni Pilatu ke kiyug dan.

²⁵ Impelihawang en ni Pilatu si Barabas, ini se etew ne nevilanggù su mid-amung te ebpekidkunterà te gubirnu wey ruen nepatey rin. Ugaid ne si Hisus ne impalad en ni Pilatu diyà te kandan te misan ebmenumenuwen dan.

*Inlansang si Hisus Diyà te Pinebelavag ne Kayu
(Mateo 27:32-44; Marcos 15:21-32; Juan 19:17-27)*

²⁶ Ne ketà ne mibpeneheewit dan en si Hisus diyà te ed-imetayan dan kandin. Ne gewii ran te ed-ipanew ne ruen etew ne nesinuhung dan ne iyan pà ebpekeuma ne riyà ebpuun te taneb, ne mibpehes dan te ebbetiang ke pinebelavag ne kayu ne edtiangen ni Hisus. Etew ini ne ed-ingaranan ki Simon riyà ebpuun te inged ne Sirin.

²⁷ Ne denda ne menge etew se miduma ki Hisus abpeg ke menge meritan ne eppeninehew su ebbenderawit dan en kandin. ²⁸ Ne midlilingey si Hisus kandan ne migkahi en te, “Sikiyu ne menge meritan kayi te Hirusalim, kenà a niyu sinehewi, ugaid ne iyan niyu sinehewi ke egketemanan niyu wey ke menge anak niyu. ²⁹ Su ruen hewii ne egkeuma,” ke si Hisus, “ne egkahi ke menge etew te, ‘Meupiya ke meritan ne kenà ed-anak, ke meritan ne warà med-anak, wey ke meritan ne wara edseruruwen din!’ ³⁰ Egkeuma arà se hewii ne egkehiyan te menge etew ayan se buvungan te, ‘Ketempahi key en ne buvungan!’

wey egkahi ran keniyan te menge tuhar te,
‘Kevunbuni key en ne tuhar.’

³¹ Su,” ke si Hisus, “embiya ini se ibped-ulaula ran kedì te iring te kayu ne meilew pà su warà salà ku, ne tuwas pà imbe ke ibped-ulaula ran keniyu te sikiyu ne iring te kayu ne nehangu.”

³² Ne ruen dema mid-ewit dan ne deruwa ne etew ne tulisan su ibperuma ki Hisus te ed-imetayan. ³³ Nekeuma ran ketà te rapit ne ed-ingaranan te “Tulan te ulu” ne inlansang dan en si Hisus diyà te pinebelavag ne kayu ne inlansang ded dema ini se deruwa ne tulisan, seveka kayi te egkekewanan ni Hisus ne seveka kayi te egkehivang din. ³⁴ Gewii ran te edlansang kandin ne mibpengeningi si Hisus te, “Amà, pesehara nu sikandan su warà dan metueni ini se ed-ululaan dan.” Ne ketà ne ini se menge sundaru ne midlansang kandin ne mibunutbunutan dan se velegkas ni Hisus ke entei se ebpekegkemuney kandan.

³⁵ Ke denda ne etew ne mid-itindeg ketà se edtengteng, ne ini se menge egkeunutan te Hudiyanan ne mid-undaunda ki Hisus, ke sikandan te, “Nekepelihau sikandin te menge ruma rin. Ne intengan tew ve ke igkepelihau din ke hinawa rin embiya benar ne sikandin en ke midtendù te Eleteala ne ebperetuen ne ed-ingaranan te Mesiyas.”

³⁶ Ne mid-amung ke menge sundaru mid-undaunda kandin. Mid-uvvey ran si Hisus ne pineinum dan te daan en ne tebà. ³⁷ Ne migkahi ran te, “Embiya sikuna en ke ratù dut te menge Hudiyanan ne ibpeliyu nu ke hinawa nu.”

³⁸ Ne ruen surat ne riyà dan intahù te divavew te ulu rin ne egkahi te, “Ini ke Ratù te menge Hudiyanan.”

³⁹ Ne senge etew rut te imbitin ne tulisan ketà se mid-undunda ki Hisus se egkahi te, “Menu, kenà sikuna ke Impasad te Eleteala ne Ebperetuen? Iipeliyu nu ke hinawa nu wey sikami rema.”

⁴⁰ Ugaid ne midawey sikandin dut te ruma rin se egkahi te, “Engkey ka ini? Maa, kenà ke ves egkeandek te Eleteala te langun tew ini te tetelu ne ebpedulung en te kepepatey? ⁴¹ Dait ta ini te deruwa se ed-imetayen su id-ulì dà keyta ke kereatey te ulaula ta. Ugaid ne ini se etew ne egkeimetayan te warè en iya meraat ne ulaula rin.”

⁴² Ne migkahi sikandin kayi te ki Hisus te, “E, Hisus, tentenuri a nu rà ketà te Edetuan nu keuremà.”

⁴³ Ne migkahi si Hisus kandin te, “Igkahi ku kenikew te ini en ne andew ne ebpekeruma ka kedì riyà te langit.”

Ke Kinepatey ni Hisus

(*Mateo 27:45-56; Marcos 15:33-41; Juan 19:28-30*)

⁴⁴ Neudtu en ini ke andew ne midtekew mibmerusirem ketà te langun ne inged taman te edluuk en ebpemenaug ke andew su middlekep. ⁴⁵ Ne riyà te Nekebpuru ne Valey te Eleteala ne newaswas kayi te luuk ini se mekepal ne saput ne impehelet dut te insivey ne ruhu te Eleteala. ⁴⁶ Ne ketà ne migkulayì si Hisus se egkahi te, “Amà, ebpeheweran ku kenikew ke gimukud ku.” Nelalag din dà ini ne nependusan en sikandin te hinawa.

⁴⁷ Nekita rut te kepitan te menge sundaru ne ini se ned-ulaula ne nekereyù sikandin te Eleteala se egkahi te, “Benar ves iya ne metidtu ini ne etew.”

⁴⁸ Ne langun kayi te menge etew ne nevurun ketà su edtengteng, ne nekekita kayi te ned-ulaula ne mid-ulì dan se ebpenempak te kumeng dan su dekelà se kemutuwan dan. ⁴⁹ Langun ne edkekilala ni Hisus abpeg ke menge meritan ne miduma kandin igenat te Geliliya ne mid-it-itindeg diyà te malù meriyù se edtengteng kayi te langun ne ned-ulaula.

Ke Kineleveng ki Hisus

(*Mateo 27:57-61; Marcos 15:42-47; Juan 19:38-42*)

⁵⁰⁻⁵¹ Duen senge etew ketà ne ed-ingaranan ki Jose ne riyà eppuun te inged ne Eremetiya lusud te Hudiya. Meupiya ne etew sikandin wey metidtu se ulaula rin. Senge etew sikandin dut te menge Hudiyanan ne edtahad dut te kebpekeuma te Edetuan te Eleteala kayi te ampw te dunya. Senge etew rema sikandin dut te menge egkeunutan te Hudiyanan te Perekukum, ugaid ne warà meeyuni sikandin dut te kineimasad en ki Hisus. ⁵² Mibpendiyà si Jose ini te ki Pilatu su ebuyuen din ke lawa ni Hisus ne inluhut dema ni Pilatu. ⁵³ Ne mibperus en ni Jose ke lawa ni Hisus ne mibukusan din en te meputì ne saput. Ne inleveng din en ketà te imbangbang ne leveng diyà te dempilas ne warà pà melevengi te minatey. ⁵⁴ Meapun en ini te Diyemaat ne edsanlep ke andew ne ini se rudsuan te Hewii ran te Id-imeley.

⁵⁵ Ke menge meritan ne miduma ki Hisus igenat diyà te Geliliya ne miduma ki Jose te edleveng, ne nekita ran ke midlevengan wey ke kinetahù en ki Hisus diyà te leveng din. ⁵⁶ Ne mid-ulì dan en ne mibpenehana ran ke meemut ne menge rawun wey periyemut su idsapu te lawa ni Hisus.

Ne ketà te midrudsù ke Hewii te Id-imeley ran ne mid-imeley ran en su edtuman dan dut te insuhù te penduan dan.

24

Ke Kinekevanew ni Hisus

(*Mateo 28:1-10; Marcos 16:1-8; Juan 20:1-10*)

¹ Mesmeselem pà te hewii ne Akad ne mibpendiyà ke menge meritan te leveng ni Hisus ne imbangbang diyà te dempilas ne mid-ewit dan ke menge meemut ne idsapu ne mibpenehana ran. ² Nekeuma ran ne nekita ran te nelilid en ke vatu ketà. ³ Mid-awuk dan

ne mibpenlangulangu ran, ugaid ne warà dan mekita ke lawa ni Hisus. ⁴ Gewii ran te ed-it-itindeg ketà se neliveg, ne neketekew en nekeitindeg se deruwa ne meama ne ebpeneringsing se velegkas dan. ⁵ Ne nekelumpeng ke menge meritan te kegkeandek dan. Ne migkahi ini se deruwa ne meama te, “Meambe ke ebpemengaan niyu kayi te edlevengan te minatey arà se etew ne biviyag? ⁶ Warà en sikandin kayi su nevanew en. Tentenuri niyu rè ma ke migkahi rin kenyu rut te riyà kew pà te Geliliya. ⁷ Su migkahi rin te ibpalad ke Impeanak te Menusiyà diyà te kebayàbayà te menge etew ne mekesesalà ne idlansang dan sikandin, ugaid ne ketà te iketelu ne hewii ne egkevanew en.” ⁸ Ne arà pà ne netenuran dan ke migkahi ni Hisus.

⁹ Mid-ulì dan ne mibpenudtulan dan ke sepulù wey seveka ne edumdumaan ni Hisus wey ke menge ruma pà ketà. ¹⁰ Ini ke menge meritan ne mibpenudtul te lalag te suluhuen: Si Maria ne riyà ebpuun te Magdala, si Juana, si Maria ne iney ni Santiago, wey ruen pà menge ruma ran. Sikandan be ini ke mibpenudtul dut te menge edumdumaan ni Hisus ne ed-ingaranan te Apustulis. ¹¹ Ugaid ne warà mibperetiyyaya ke menge edumdumaan ni Hisus dut te tudtul te menge meritan su iyan dan kunaan ke menge kesembaran dà. ¹² Ugaid ne mid-itindeg si Pedro ne mibpelelahuy en se ependiyà te leveng. Nekeuma ne midsiniling din en ne iyan din nekita ke meputì ne saput ne imbuskus dan ne netahak ketà. Ne mid-ulì sikandin ne neinuinu nevenar sikandin ke engkey se ned-ulala.

Mibpekitakita si Hisus Diyà te Ralan Dut te Deruwa ne Etew ne Ependiyà te Inged ne Emaus

(Marcos 16:12-13)

¹³ Arà ne hewii ne ruen deruwa ne etew rut te midumaruma ki Hisus ne ependiyà te inged ne ed-ingaranan te Emaus. Ini se inged ne Emaus ne iyan din keriyù te Hirusalim ne menge sepulù wey seveka ne kilometro. ¹⁴ Ketà te ked-ipanew ran ne iyan dan egkepengpengasak ne mekeatag te langun dut te ned-ulaula ni Hisus. ¹⁵ Gewii ran te ebpengasak ne midlambag si Hisus kandan ne mibpekiduma en. ¹⁶ Nekita ran sikandin ugaid ne warà mebpekilala sikandin kandan.

¹⁷ Migkahi si Hisus kayi te kandan te, “Engkey ini se egkepengasak niyu te ed-ip-ipanew?”

Mid-itindeg dan se paras te egkemutuwan. ¹⁸ Midtavak ini se senge etew ne ed-ingaranan ki Keliyupas te, “Maa iyan ka mid-upbà kayi te Hirusalim ne warà pà metau kayi te ned-ulaula ketà?”

¹⁹ “Maa,” ke si Hisus, “engkey se ned-ulaula ketà?”

Ne midtavak dan te, “Engkey ve iya? Iyan arà ne mekeatag ki Hisus ne riyà ebpuun te Nesarit. Su si Hisus ini ne benar ne mibpelambas te Lalag te Eleteala diyà te etuvangan din wey kayi rema te etuvangan te menge etew. Duen gehem din te kebpenuurù din wey kayi rema te langun te mid-ulaula rin ne mekegeyip. ²⁰ Ugaid ne ini se menge mepurù tew te terebpelengesa wey ke menge egkeunutan tew ne impemenayik dan diyà te gubinedur su impekukum ne midimasad dan te ebpeimetayan, ne inlansang dan en sikandin diyà te pinebelavag ne kayu. ²¹ Ne iyan netahù te hinawa rey ne sikandin en iyan ke midsuhù te Eleteala ne ebpeliyu te langun ne inenakan

ni Israyil. Ugaid ne ini en ke iketelu ne hewii te kineimetayi ran kandin. ²² Ne ruen dema ned-ulaula te menge meritan ne rumta ta ne igkeinuinu rey. Su geina ne mibpemanepaney ran diyà te leveng din, ²³ ugaid ne warà dan mekita ke lawa rin ketà. Ne midlived dan kayi te kenami ne mibpenudtul dan te ruen deruwa ne suluhuen te Eleteala ne mibpekita kun kandan ne migkahi kandan te neuyag en si Hisus. ²⁴ Ne ruen menge duma rey ne midsuvar mibpendiyà te leveng ne iring ded iya ketà se nekita ran te migkahi rut te menge meritan, ugaid ne warà dan mekita ke lawa ni Hisus.”

²⁵ Ne migkahi en si Hisus kandan te, “Warà bes itungan niyu! Meambe ke warà kew mebperetiyaya rut te langun ne impesurat te menge mibpelambas te Lalag te Eleteala rengan? ²⁶ Su migkahi ke menge mibpelambas te Lalag te Eleteala ne egkerasey pà ini se Impasad te Eleteala ne arà pà ne Ebperetuen din te langun ne imbehey kandin.” ²⁷ Ketà ne midseysey en ni Hisus kandan ke meana rut te langun ne impesurat te mibpelambas te Lalag te Eleteala rengan mekeatag kandin. Kayi rin imperudsù te impesurat ki Moises taman en dut te mewri ne mibpelambas te Lalag te Eleteala.

²⁸ Guna su ebpelundani ran en dut te inged ne edtemanan dan, ne iring te edlevundus pà si Hisus. ²⁹ Ugaid ne mibangen dan sikandin se egkahi te, “Kayi kiyu pà su meapun en, ne edsanlep en ayan se andew.” Ne arà dà ne mibpekiduma en si Hisus kandan.

³⁰ Neiseg-iseg ketà ne mibpinuu ran se egkaan, ne migkuwa ni hisus ke egkeenen dan ne pan ne impeselamat din te Eleteala ne mibpenevitevi din ne imbehey rin en kandan. ³¹ Ketà dan pè be mekilala si Hisus su arà pà ne iring te nevukaan ke mata ran. Ugaid ne miduma rà sikandin te peraan dan. ³² Ne mibpelelahey en ini se deruwa ne etew te, “Tembù bes neinesa ki te ebpemineg kandin te edseysey te menge impesurat te Eleteala te mibpelambas te lalag din gewii te kebpemengasak tew te ed-ipanew.”

³³ Arà dà ne mid-itindeg dan ne mid-ulì dan en diyà te Hirusalim. Ne iyan dan neumaan ketà ke sepulu wey seveka ne edumdumaan ni Hisus wey rumta pà ne nevurun. ³⁴ Iyan dan egkepenudtul se, “Benar iya ne nevanew si Hisus ne mibpekita en ki Simon.” ³⁵ Ne ketà ne mibpenudtul en kandan ini se deruwa ne etew ne riyà ebpun te Emaus ke engkey se ned-ulaula ran diyà te ralan te kinepekiduma ran ki Hisus. Ne mibpenudtul dan dema ke engkey se kinepekekilala ran en ki Hisus ketà te kebpenevitevi din en dut te egkeenen dan ne pan.

*Mibpekitakita si Hisus Dut te Menge Edumdumaan din
(Mateo 28:16-20; Marcos 16:14-18; Juan 20:19-23; Nenged-ulaula 1:6-8)*

³⁶ Gewii te ebpenuudtul dan kayi ne netetau ran te kayi en mekeitindig si Hisus te teliwarà dan. Ne migkahi en te, “Na, mebmelintad ke hinawa niyu!”

³⁷ Nekita ran dà si Hisus ne neandek dan nevenar su iyan dan kunaan ke gimukud din se nekita ran. ³⁸ Ugaid ne migkahi sikandin kandan te, “Meambe ke egkeandek kew maa kedi? Meambe ke duwaruwa se hinawa niyu kedi? ³⁹ Intengi niyu ma ini se palad ku wey paa ku su siaken ded iyan ini! Geweri a niyu ma su apey niyu egketueni

te kenà a gimukud. Su embiya gimukud,” ke si Hisus, “ne warà sapù din wey tulan din, ugaid ne egkekita niyu ma te ruen kediey.”

⁴⁰ Nekahi rin dà ini ne impekita rin en ke palad din wey paa rin.

⁴¹ Ne ruen pà lavew keduwaruwa te hinawa ran te si Hisus ini se nekita ran ugaid ne nengehalew ran wey nengeinuinu. Ne ketà ne mid-insà si Hisus kandan te, “Menu ruen ded egkekaan tew kayi?”

⁴² Ne mibehayan dan sikandin te in-anag ne serà. ⁴³ Ne migkuwa rin ke serà ne migkaan din kayi te sineruwan dan.

⁴⁴ Ne migkahi si Hisus kandan te, “Pehaney te kayi e pà te keniyu ne ini iya ke migkahi ku keniyu: Langun te impesurat mekeatag kediey ketà te penduan ni Moises wey ke impesurat te menge milpelambas te Lalag te Eleteala wey arà se insurat ketà te riberù ne ed-ingaranan te Salmu ne langun din ne metuman iya kayi te kedì. Na guntaani ne netuman en arà kayi te netemanan ku.”

⁴⁵ Ne arà pà ne mibukaan din ke itungan dan su apey ran ebpekesabut dut te impesurat ne Lalag te Eleteala. ⁴⁶ Ne migkahi en kandan te, “Ini se impesurat dut te mibpelambas te Lalag te Eleteala rengan ne: Ebpekepevayà pà te kegkerasey arà se Impasad te Eleteala ne Ebperetuen ne ed-ingaranan te Mesiyas, ugaid ne ketà te iketelu ne hewii ne ebenawen ded. ⁴⁷ Ne kayi te kebpatey rin wey kayi te kebanew te Eleteala kandin,” ke se impesurat ne Lalag te Eleteala, “ne kayi ve imbe ne ruen kebpesahad te Eleteala te keberedusaan dut te menge etew ne ebpedsendit ne ed-engkenà te meraat ne ulaula ran. Ini se ieneb niyu te ebpesabut diyà te langun ne menge inged kayi te ampew te dunya. Kayi niyu irudsù te Hirusalim. ⁴⁸ Su geina te nemetmetaan niyu en,” ke si Hisus, “te netuman en ini kayi te kedì, ne sikiyu en ke edititius. ⁴⁹ Duen ibpepengkayi ku te keniyu ke Kedesenan ne Ebbpetuntul te menusiyà ne impasad keniyu te Amey ku rengan. Engketà be ne kenà kew pà awà kayi te inged ne Hirusalim taman te edlumun en keniyu ke gehem din ne riyà ebpuun te langit.”

Nevatun si Hisus Diyà te Langit

(Marcos 16:19-20; Nenged-ulaula 1:9-11)

⁵⁰ Ne ketà ne mibpeneheewit din sikandan diyà te liyu te inged ne Hirusalim uvey te inged ne Biteniya. Nekeuma ran ne ingkayew rin ke belad din ne impenuvadtuvad kandan. ⁵¹ Gewii rin te ibpenuvadtuvad din sikandan ne mid-ewaan din en sikandan ne mibatun en diyà te langit. ⁵² Ne mibpengarap dan kandin, ne memehalew ran neveran te mid-uli dan diyà te Hirusalim. ⁵³ Ne merukilem meandew ne riyà dan te Nekebpuru ne Valey te Eleteala se edeyù te Eleteala.

Ke Meupiya ne Tuditul Mekeatag ki Hisu Kristu ne Miguhud ni Juan

Ini se Mid-ingaranan ne Lalag ne Mibpebaluy ne Menusiyà

¹ Rengan te warà pà limbaha ini se misan engkey en, ne raan en ketà ke mid-ingaranan te Lalag. Ne iyan kineingaraní kandin ne Lalag su igkepayag din ke langun ne netahù te itungan te Eleteala. Ne raan sikandin ne ruma te Eleteala su Eleteala red dema sikandin. ² Dut te warà pà melimbag ini se misan engkey en ne duma en sikandin te Eleteala.

³ Ne impelevayà kandin ne midlimbag te Eleteala ke langun taman, ne warà misan seveka rut te nelimbag ke kenà impelevayà kandin. ⁴ Sikandin ke ebpuunan te umur te menusiyà, ne ke umur din se ebpekerayag te itungan te langun ne menusiyà. ⁵ Ne nekeandlag ke kerayag din diyà te kerusireman, ne ke kerusireman ne warà mekeevuk dut te kerayag.

⁶ Duen senge etew ne mid-ingaranan ki Juan ne midsuhù te Eleteala. ⁷ Iyan din kinesuhua ki Juan ne ebpepemenduen din mekeatag dut te kerayag ne si Hisus su apey ke langun ne ebpekerineg dut te penduan ne ebpekeperetiyaya. ⁸ Si Juan ini ne kenà ke kerayag, ugaid ne sikandin ke edseysey mekeatag kayi te kerayag. ⁹ Su ini ke benar ne kerayag ne mibpebaluy ne etew, ne nekeuma en kayi te ampew te dunya su edrayag dut te itungan te langun ne menusiyà.

¹⁰ Nekeuma en sikandin kayi te ampew te dunya, ugaid ne warà mekekilala kandin ke menge etew misan impelevayà kandin ke kinelimbag dut te dunya. ¹¹ Nekeuma sikandin kayi te inged din, ne misan ke kereremigey rin ne Hudiyanen ne warà midtelimà kandin. ¹² Ugaid ne misan engkey ne etew se midtelimà wey mibperetiyaya en kandin ne mibehayan din te ketenged te egkevaluy ran ne tuney ne menge anak te Eleteala. ¹³ Ne iyan dalan te kinekevaluy ran ne menge anak te Eleteala ne kenà bineelan dà te menusiyà, etawa impanganak te menge etew rà ne amey, su iyan dan Amey ne Eleteala.

¹⁴ Ne ke mid-ingaranan te Lalag ne mibpebaluy en ne menusiyà ne mid-ubpà en kayi te keytew. Ne lili muen ne venar sikandin, wey ke langun ne egkehiyen din ne benar. Nekita rey ke geyip ne gehem din ne imbehey kandin te Eleteala su sikandin ke budtung ne Anak te Amey rin ne Eleteala.

¹⁵ Ne mibpenurù si Juan mekeatag kandin ne impenawag din se egkahi te, “Ini ve ke etew ne impenudul ku keniyu te, ‘Duen senge etew ne ebpeketundug kediey, ugaid ne misan ebpeketundug dà kediey ne sikandin se muna pà ne mepurù kediey, su ketà te warà e pà in-anak ne raan en ketà sikandin.’”

¹⁶ Geina te dekelà ke limù din ne sikitew langun ne mibehayan din te penaub, ne ini se penaub ne warà kegkepupus din. ¹⁷ Su si Moises ke nekepeneheewit te penduan te Eleteala kayi te langun tew ne menge menusiyà, ugaid ne si Hisu Kristu ke mibpepayag ne limù te Eleteala wey ke benar mekeatag te Eleteala. ¹⁸ Warà senge etew rà ne nekekita

te Eleteala, liyu rà dut te budtung ne Anak din ne si Hisu Kristu, su iyan dan layun teleduma. Ne sikandin ke mibpesabut keytew mekeatag dut te Eleteala ne Amey rin.

*Ke Impesabut ni Juan Ke Ebpembunyag
(Mateo 3:1-12; Marcos 1:1-8; Lucas 3:1-18)*

19 Duen menge etew ne mibpendiyà te ki Juan su riyà sikandin te ripag te wayig ne Hurdan se ebpembunyag te menge etew. Ini se nekeuma ne menge terebpelengesa wey menge inenakan ni Levi su midsuhù dan dut te egkeunutan te menge Hudiyanan te ebpeinsaan dan si Juan te, “Entei ka?”

20 Ne mepeyag ini se intavak ni Juan su warà din in-eles se egkahi te, “Kenà siaken si Hisu Kristu, ke Impasad te Eleteala ne Ebperetuen din.”

21 “Engkey ke ve, si Iliyas ka?” ke sikandan.

“Kenà,” ke si Juan.

“Ne engkey ke ve iya? Maa sikuna en iya ayan ke ebbelambas te Lalag te Eleteala ne impasad din?” ke sikandan.

“Kenà,” ke si Juan.

22 “Ne idtarem nu kenami,” ke sikandan, “ke engkey ka su apey rey egkepenudtul diyà te midsuhù kenami. Engkey se egkekahi nu mekeatag keykew?”

23 Midtavak si Juan ne ke migkahi rin ne iring dut te impesurat ne Lalag te Eleteala ki Isayas ke mibpelambas te Lalag te Eleteala rengan ne migkahi sikandin te,

“Siaken ke etew riyà te tanà ne kenà egkeubpaan te etew ne ebpenawag dut te menge etew ne ed-veye kedì, ne migkahi a te, ‘Mehaan ebpekeuma ke Kerenan, ne tidtuwa niyu ke ibayà din, ne iyan din meana ne tilaka niyu ke hinawa niyu su apey kew egkepenehana te kebpekeuma rin.’”

24 Ne ayan se ebpenginsà ki Juan ne menge suhù te menge Peresiyo, 25 mid-insà dan maa te, “Embiya kenà sikuna si Hisu Kristu, ne kenà sikuna rema si Iliyas etawa ke mibpelambas te Lalag te Eleteala, ne meambe ke ebpembunyag ka te menge etew?”

26 Midtavak si Juan te, “Siak ne iyan ku ibunyag se wayig, su apey ran egkeandam te kedadlimà ketà te senge etew ne riyà te keniyu ne kenà niyu egkekilala,” ke si Juan. 27 “Ebpekeuma sikandin se ebpeketundug kedì, ugaid ne misan ke telumpà din ne kenà a edait ne ed-ekar.”

28 Langun kayi ne riyà med-ulaula te inged ne Bitanya riyà te ripag te wayig ne Hurdan su riyà si Juan se ebpembunyag.

Si Hisus ke Ebpekeiring te Impelengesa ne Nati te Bilibili

29 Midtundug be maa ne hewii ne nekita ni Juan si Hisus se ebpelingguma ne migkahi en sikandin dut te menge etew ne uvey rin te, “Ayan de be ke etew ne iring te ibpelengesa ne nati te bilibili ne imbehey te Eleteala apey ke langun ne salà te menusiyà ne egkeawà.

30 Ini ve ke etew ne impenudtl ku keniyu te, ‘Duen senge etew ne ebpeketundug kediey, ugaid ne misan ebpeketundug dà kediey ne sikandin se mepurù pà kedì, su raan en ketà sikandin te warà e pà in-anak.’ 31 Pehaney en,” ke si Juan, “ne warà ku pà mekilala ke engkey

an sikandin, ugaid ne mibpengkayi a te ebpembunyag te menge etew te wayig su apey egketueni rut te menge kevuwaran ne Israyil se ebpekeuma en sikandin.”

³² Ne mibpenudtul pà maa si Juan mekeatag ki Hisus te, “Nekita ku ke Kedesenan ne Ebpetuntul te Menusiyà ne midragid te melepati ne riyà ebpuun te langit ne mibpehunrerènà diyà te kandin, ne warà din ewai.” ³³ “Ne wara ku pà lavew metueni te sikandin en bes iya ke midsuhù te Eleteala,” ke si Juan, “ugaid ne ke Eleteala ne midsuhù kedi te ebunyag te wayig ne ingkahi rin kedi te, ‘Embiya egkekita nu en arà se Kedesenan ne Ebpetuntul te Menusiyà ne ebpehunrerènà diyà te etew ne kenà din ed-ewaan, ne egketuenan nu be imbe te sikandin ke ebpembunyag ibpepevayà dut te kedlumun te Kedesenan ne Ebpetuntul te Menusiyà diyà te menge etew ne mibperetiyyaya.’ ³⁴ Ne nekita ku en iya ini,” ke si Juan, “ne egkehiyen ku en keniyu te sikandin en iya ke Anak te Eleteala.”

Ke Neuna ne Edumdumaan ni Hisus

³⁵ Ne ke neketundug ne hewii ne ketà en maa si Juan se ebpekidlag dut te deruwa ne edumdumaan din. ³⁶ Nekita rà ni Juan se edsahad si Hisus, ne migkahi en te, “Ayan de be ke etew ne iring te ibpelengesa ne nati te bilibili ke mid-andam te Eleteala ne ibehey rin!”

³⁷ Ne wey merineg dut te deruwa ne edumdumaan din ke lalag ni Juan ne midtundug dan en ki Hisus. ³⁸ Ne midteren si Hisus ne midlilingey ne nekita rin ke deruwa ne etew ne edtundug kandin ne mid-insà te, “Meambe ke edtundug kew kedi?”

Ne migkahi ran te “Rabi, (ne iyan din meana ne Meyerù) endei ka ed-ubpà?”

³⁹ Ne midtavak si Hisus te, “Duma kew en kedi su apey niyu egkekita.”

Ne mibpekiduma ran en kandin te ed-inteng dut te ed-ubpaan din. Ne meapun en dutun ne wey ran med-ulì ne merukilem en.

⁴⁰ Ne senge etew kayi te deruwa se nekerineg te nekahi ni Juan ne miduma ki Hisus ne mid-ingaranan ki Andres, su teleari ran ki Simon Pedro. ⁴¹ Arà dà ne mid-awà en sikandin se ebpemengà ki Simon ke suled din. Nekita rin dà ne migkahi te, “Netuen dey en ke ed-ingaranan te Mesiyas.” (Seveka ne ngaran ini ni Hisu Kristu, ke Impasad te Eleteala ne Ebperetuen din.)

⁴² Ne mibperuma din en si Simon diyà te ki Hisus. Nekeuma ran dà ne midtengtengan en ni Hisus si Simun ne migkahi en te, “Sikuna si Simon, ke anak ni Juan, ugaid ne edsembian ku ke ngaran nu ki Sipas.” (Ayan se ngaran ne Sipas ne neked-iring ded te Pedro su ke meana rin ne “Batu”.)

Mibpemilì ni Hisus si Pilipi wey si Natanael

⁴³ Ne ke neketundug ne hewii ne nepegitung ni Hisus ne ebpendiyyà te pruvinsiya ne Geliliya. Ketà ne nevalak din si Felipe ne migkehiyan din en te, “Duma ka kedi.”

⁴⁴ Si Felipe ne etew ne riyà ebpuun te inged ne Bitsaida, ke inged en ni Andres wey si Pedro. ⁴⁵ Ketà ne mibeyaan ni Felipe si Natanael ne migkehiyan din en te, “Nekita rey en ke etew ne ingkesurat ni Moises diyà te riberù te menge penduan te Eleteala, wey ingkesurat ded dema

dut te menge etew ne mibpelembas te Lalag te Eleteala rengan. Si Hisus ke ngaran din, ke anak ni Husi ne riyà ebpuun te Nesarit.”

⁴⁶ Ne rutun ne migkahi en si Natanael te, “Maa, ruen bes etew ne riyà ebpuun te Nesarit ne ruen egkegaga rin?”

Midtavak si Pilipi te, “Iyan tumù se pengkayi ka su intengi nu.”

⁴⁷ Guna su nekita ni Hisus si Natanael se ebpelingguma kayi te kandin ne migkahi te, “Ayan be ke tidtu ne inenakan ni Israyil su warà edtelevan din.”

⁴⁸ Mid-insà si Natanael te, “Meambe ke egkekilala a nikuna?”

Midtavak si Hisus te, “Nekita ku sikuna ketà te levut te kayu ne edingaran te igira te warà pà med-ipanew si Felipe te edtawag keykew.”

⁴⁹ “Meyterù,” ke si Natanael, “sikuna ves iya ke Anak te Eleteala! Sikuna en iya ke Edatù keytew ne menge kevuwaran ni Israyil!”

⁵⁰ Migkehiyan ni Hisus si Natanael te, “Maa iyan nu rè bes kebperetiyya kediey, Natanael, se nekahi ku te nekita ku sikuna se riyà te medmeriyù ne levut te kayu ne igira? Ugaid ne muna pà se kebpekeperetiyya nu ke egkekita nu en ke mekegeyip ne ed-ul-ulaan ku.” ⁵¹ Ne migkahi en si Hisus kandan te, “Benar ini se egkehiyen ku keniyu te egkekita niyu ke lesang te langit ne egkevukaan, ne ke suluhuen te Eleteala ne egkekita niyu se mekepemenaik ne mekepemenaug se ebpengkayi te ke Impeanak te Menusiyà.”

2

Ke Kewangan Diyà te Inged ne Kana

¹ Guna su nekederuwa ne hewii ketà ne ruen kewangan diyà te inged ne Kana ne lusud te inged ne Geliliya. Ne midtelavuk ke iney ni Hisus ketà te kewangan. ² Ne ketà dema si Hisus wey ke edumdumaan din su neinggaan dan te edtelavuk ketà te kewangan. ³ Guna su neamin en ke inumen dan ne binu su kurang pà kandan ne mibeyaan en te iney ni Hisus se egkahi te, “Warà en duma ne binu.”

⁴ “Tebiyà dà keykew, Inà,” ke si Hisus, “te kenà a nu uyawi te ed-ul-ulaan ku. Su warà pà meuma ke hewii te kebpekita ku te gehem ku riyà te menge etew.”

⁵ Ne migkahi en ke iney ni Hisus dut te menge sugsuhuen te, “Dumai niyu te misan engkey se idsuhù din.”

⁶ Ne ruen enim ne timan ne kelalew ne edtehuan te wayig su ruen edtenuran ne betasan te menge Hudiyanan mekeatag te kebpenlulu. Ne uman seveka ne kelalew ne egketehuan te epat etawa enim ne latà ne wayig.

⁷ Ne migkehiyan en ni Hisus ke menge sugsuhuen te, “Pengipenua niyu ini se kelalew te wayig,” ke sikandin. Ne mibpengipenù dan en iya rema ke menge kelalew. ⁸ Neipus dan te ebpenekeru ne migkahi en si Hisus te, “Sekilut kew be kenian te wayig ne ewita niyu en diyà te egkamal te egkeenen.”

Ne mid-ewit dan en diyà te kandin, ⁹ ne migeraman din ke wayig ne nevaluy en ne binu. Warà din metueni ke endei ebpuun ini se binu (ugaid ne ke menge sugsuhuen ne midsekilut ketà se netau). Dutun ne midtawag din en ke meama ne ebpengesawa ¹⁰ ne migkahi te, “Iyan tew nelayaman ne betasan te embiya ruen kevurunan tew ne iyan tew id-una te ebpeinum ke meupiya ne binu, ne embiya

ve su ebpengevulung dan en ne arà pà ne ibpeinum ke binu ne mekurangkurang se nanam din. Ugaid ne sikuna,” ke se meama “ne ke meupiya ne binu ne impememewri nu te ebpehendad su ini pà ne impelepew nu.”

¹¹ Ini se mid-ulaula ni Hisus diyà te inged ne Kana, lusud te inged ne Geliliya, se neuna ne mekegeyip ne mibeelan din. Impekita rin ke gehem din, ne ketà be ne nekeperetiyaya iya ke edumdumaan din kandin.

¹² Neipus arà se kewinan ne mibpendiyà si Hisus, ke iney rin, ke menge ari rin, wey ke edumdumaan din te inged ne Kapirnawum. Nekeuma ran ketà ne mid-ubpà dan te nekebpipira ne hewii.

*Mibpendiyà si Hisus te Nekebpuru ne Valey te Eleteala
(Mateo 21:12-13; Marcos 11:15-17; Lucas 19:45-46)*

¹³ Ne rutun ne mehaan en ne egkeuma ke hewii te kegkevurun te menge Hudiyenan diyà te Hirusalim te keddumana ran dut te Pista te Kedsehari te Suluhuen te Eleteala, ne arà be ne mibpendiyà si Hisus diyà te Hirusalim. ¹⁴ Guna su nekeuma ran ne midlusud en si Hisus diyà te Nekebpuru ne Valey te Eleteala, ne nekita rin ke ebpmendehang te menge sapì, menge bilibili, wey menge melepati, su ini se menge binatang ne impemendehang dan ne iyan din egkeetahan ne ibpelengesa. Ne ruen dema ketà menge etew ne ebpesemsembiey te pirak te idsenge vevansa ne inged kayi te pirak te menge Hudiyenan. ¹⁵ Nekita rà ni Hisus sikandan ne midsuvid en sikandin te idlambit din kandan, ne midsegseg din en langun te kebpuwal kandan, abpeg ke menge bilibili wey sapi. Misan ke lemisaa dut te menge etew ne ebpenambi te pirak ne mibpemunggad din, abpeg dut te pirak dan ne insivurak ni Hisus. ¹⁶ Ne migkehiyan din en ke menge etew ne ebpmendehang te melipati te, “Ipengawà niyu ayan! Kenà niyu beeli ne pedian ini se Baley te Amey ku ne Eleteala!”

¹⁷ Ne netenuran dut te edumdumaan din ke impesurat ni David ke mibpelambas te Lalag te Eleteala rengan se egkahi te, “Na Eleteala ku, iring te apuy ne edrugrugkayew kayi te diralem ku ini se kegkenuhun ku te ini se valey nu ne egkeedatan.”

¹⁸ Ne rutun ne mid-insaan si Hisus te egkeunutan te menge Hudiyenan te, “Engkey ve se mekegeyip ne ibpekita nu ne tuus te mibehayan ka te gehem te Eleteala te iring ketà ne mid-ulaula nu?”

¹⁹ Ne midtavak si Hisus te, “Rundusa niyu ini se Baley te Eleteala ne lusud te tetelu ne hewii ne ibpeitindeku en manen ini se valey.”

²⁰ “Epat ne pulù wey enim ne rahun se kineveeli kayi te valey! ke sikandan. Maa, ibpeitindeku maa te lusud te tetelu rà ne hewii?”

²¹ Ugaid ne warà dan mesebuti se ini se valey ne migkahi ni Hisus ne ke lawa rin. ²² Guna su neuma en ke hewii te nevanew en si Hisus, ne arà pà ne netenuran dut te edumdumaan din ini se nekahai rin. Ne mibperetiyaya ran ke impesurat ne Lalag te Eleteala mekeatag te kegkevanew ni Hisus abpeg dut te nekahai rin mekeatag te sikandin.

Netuenan ni Hisus ke Netahù te Itungan te Menge Etew

²³ Gewii pà ni Hisus diyà te Hirusalim te kedduman dan te Pista te Kedsehari te Suluhuen, ne merakel se mibperetiyaya kandin su nekita ran ke geyip ne mid-ulaula rin. ²⁴ Ugaid ne warà midsarig si Hisus dut te nelalag dan ne kebperetiyaya ran kandin su netuenan din ke

engkey se netahù te itungan te langun ne menge etew. ²⁵ Su misan warà midtarem kandin te engkey se metahù te itungan te menge etew, ne netuenan din en ke engkey ke netahù te itungan dan.

3

Mibpendiyà si Nikudimu te ki Hisus

¹ Duen senge etew ne egkeunutan te menge Hudiyanan ne midingaranan ki Nikudimu. Senge etew ini ne sakup te neumpungan ne ed-ingaranan te Peresiyu. ² Senge kerukileman ne mibpendiyà sikandin te ki Hisus ne migkahi te, “Meyterù, netuenan dey se midsuhù ka te Eleteala te ebpenurù kenami, su warà etew ne ebpekevaal te mekegeyip embiya kenà duen gehem te Eleteala riyà te kandin.”

³ Migkahi si Hisus te, “Sebenarvenar ini se igkahi ku keykew te warà senge etew rà ne ebpekelusud diyà te Edetuan te Eleteala embiya kenà sikandin edsaup pà ebpeanak.”

⁴ Migkahi si Nikudimu te, “Menu ve ke lukes en ne etew te ebpesaup ebpeanak? Engkey, edlived pà maa sikandin dut te hetek te iney rin su apey igkesaup igkeanak sikandin?”

⁵ “Sebenarvenar ini se igkahi ku keykew,” ke si Hisus, “te warà senge etew rà ne ebpekelusud diyà te Edetuan te Eleteala embiya kenà sikandin edsaup pà ebpeanak te ibpepevayà te wayig wey ke gehem dut te Kedesenan ne Ebpertuntul te Menusiyà. ⁶ Su ke idanak te menusiyà ne menusiyà dà iya, ugaid ne embiya igkesaup en sikandin te igkeanak ibpepevayà dut te gehem te Kedesenan ne Ebpertuntul te Menusiyà ne egkevaluy en sikandin ne anak te Eleteala. ⁷ Kenà nu ve igkeselekawi,” ke si Hisus, “te kinelalag ku te, ‘Mebpesaup kew pà langun mebpeanak.’ ⁸ Embiya idsempità ta ne edsamber ke keramag ne misan endei egkesuat ne ebpevayà. Embiya edsamber ne egkerineg nu, ugaid ne warà nu metueni ke endei ebpuun etawa endei ebpesinaru. Iring ded dema ketà ke langun ne mibpeanak te Kedesenan ne Ebpertuntul te Menusiyà, su egketuenan dan iya misan kenà dan egkesebutan.”

⁹ “Egkememenu ve ini?” ke si Nikudimu.

¹⁰ Midtavak si Hisus te, “Mevantug ka ura ne ebpermundù dut te menge kevuwaran ni Israyil, ne meambe ke kenà nu egkesebutan ini se migkahi ku? ¹¹ Benar iya ini se egkehiyen ku su netuenan dey te benar ini se impesabut dey keniyu, ne netitihusan dey ke nekita rey en, ugaid ne warà niyu peretiyyaya ke migkahi rey. ¹² Embiya kenà ka ebperetiyyaya te ini se ibpenurù ku kenikew mekeatag te ulaula kayi te ampew te dunya,” ke si Hisus, “ne iyan nu pè be peretiyyaya ke iyan ku en ibpenurù mekeatag te ulaula riyà te langit. ¹³ Su warà pà duma ne nekependiyà te langit liyu rà dut te sikandin arà ne riyà ebpuun te langit ne mibpepengkayi ne Impeanak te Menusiyà.

¹⁴ “Rengan te kemulu pà ensi Moises diyà te tanà ne kenà egkeub-paan te etew,” ke si Hisus, “ne ruen mibeelan din ne uled ne galang ne intampak din diyà te kayu ne intunggul rin. Na,” ke si Hisus, “diyà te keuhetan din ne hewii ne ibpeketinggul dema ini se Impeanak te Menusiyà. ¹⁵ Iyan din kebpekevitin diyà te kayu su apey langun ne ebperetiyyaya kandin ne ebpeketalimà te umur ne warà edtemanan din.

¹⁶ “Su kayi ebpuun te rekèlà ne limù te Eleteala rut te langun ne menge etew kayi te ampew te dunya ne warà din ingkenuhuni ke budtung ne anak din, ugaid ne midsuhù din te ebpatey riyà te pinebelavag ne kayu su apey langun te ebperetiyaya kandin ne kenà edusaan te Eleteala ugaid ne ebpeketelimà dan te umur ne warà edtemenan din. ¹⁷ Su iyan kinesuhù te Eleteala rut te Anak din kayi te ampew te dunya su apey kenà edusaan ke menge etew, ugaid ne apey ran igkepiyu.

¹⁸ “Ne misan engkey ne mibperetiyaya rut te Anak te Eleteala ne kenà en egkesuhat te kedusa te Eleteala, ugaid ne langun ne warà mebperetiyaya kandin ne insivey en te Eleteala ne edusaan su warà dan medtelimà ki Hisus ke budtung ne Anak te Eleteala. ¹⁹ Iyan kedusa te Eleteala te menge etew su nekeuma en kayi te ampew te dunya si Hisus ke ed-ingaranan te Kerayag su ebpekerayag dut te itungan te langun ne menusiyà, ugaid ne iyan dan midtumù ke kerusireman tumin dè be dut te rayag su meraat ke ulaula ran. ²⁰ Ne misan engkey en ne etew ne ed-ulaula te meraat ne kenà egkesuat te merayag wey kenà dan ed-uvey te merayag su apey kenà egkepayahan ke ulaula ran ne meraat. ²¹ Ugaid ke etew ne metidtu se ulaula rin ne ed-uvey dut te merayag su apey egkepayahi ke ulaula rin, su apey egkekita ke ulaula rin ne riyà ebpuun te gehem te Eleteala.”

Si Hisus wey si Juan ne Ebudemunyag

²² Netaman ketà ne mibpendiyà si Hisus wey ke edumdumaan din te inged ne Hudiya. Ne mid-ubpà dan ketà te nekebpipira ne hewii su ebpembunyag si Hisus te menge etew.

²³ Ne si Juan dema ne ebpembunyag te menge etew riyà te inged ne Inun uvey te inged ne Salim su merakel ne wayig diyà. Ne ruen menge etew ne ebpemekeuma su ebpebunyag dan kandin. ²⁴ (Su arà ne hewii ne warà pà bilenggu si Juan.)

²⁵ Ne ruen menge edumdumaan ni Juan ne ebpekidlewanà te senge etew ne Hudiyanan. Iyan dan ibpelewaney ne atag te edtenuran ne betasan te menge Hudiyanan te kedlùlù. ²⁶ Ketà ne mibpendiyen en ke edumdumaan ni Juan te kandin se egkahi te, “Meyterù, netenuran nu ves ke ruma nu riyà te ripag te wayig ne Hurdan ne arà se nekahì nu! Riyà guntaani sikandin se ebpembunyag ne iyan pà merakel ne menge etew ne ebpendiyà te kandin su ebpebunyag.”

²⁷ Migkahi si Juan te, “Warà etew ne ebpekekuwa te ketengdanen embiya kenà ebehayan te Eleteala. ²⁸ Ne sikiyu en iya ke menge titihus te migkahi ku te, ‘Kenà siaken si Hisu Kristu ke Impasad te Eleteala ne Edatù kayi te menge etew, ugaid ne pineuna e rà kandin su apey ku egkepenehana ke ibpevayà din.’ ²⁹ Embiya idsempità ta,” ke si Juan, “ke ruen egkewingan ne ke meama ne ed-esawa ne ini se ebpekehaked dut te meritan, kenà ke egkuyug dut te egkewingen; ugaid ne ketà dema sikandin te uvey. Ne embiya egkerineg din en ke meama ne neked-esawa en ne ebpekidlag en dut te esawa rin, ne dekdekelà se kegkehalew rin. Ini ve imbe ke sempità ku,” ke si Juan, “mekeatag ki Hisus wey siaken. Nehalew ad nevenar su nekekuyug a kandin te ebpenehana dut te netandang ku en ke ibayà din te ebpekeuma.

³⁰ Ketà be ne ebpekeiseg pà se bentuhan ni Hisus, ugaid ne siaken ne ebpekeembavà."

Sikandin ne Riyà Ebpuun te Langit

³¹ Riyà ebpuun te langit si Hisus ne sikandin ke mepurù pà dut te langun. Ugaid ke etew ne kayi rà ebpuun te dunya ne menusiyà dà sikandin, ne iyan din dà edlelahen ke ulaula kayi te dunya. Ugaid sikandin arà se riyà ebpuun te langit se mepurù pà dut te langun. ³² Iyan din edlelahen ne ke nekita rin wey ke nerineg din diyà, ugaid ne warà utew etew ne ebperemineg kandin. ³³ Ugaid ne ke etew ne mibperetiyaya te penurù din, ne ibpekepekita rin te iyan dà edlelahen te Eleteala ne benar. ³⁴ Si Hisus ke midsuhù te Eleteala ne iyan ibpepenudtul ne ke Lalag te Eleteala dut te ebpelumunan sikandin te Kedesenan ne Ebpeturuntul te Menusiyà ne imbehey kandin te Amey rin ne Eleteala. ³⁵ Su igkelimù nevenar te Eleteala ini se anak din ne midsuhù din, ne imbehey rin kandin ke gehem te ebayàbayà te langun taman. ³⁶ Ne langun ne ebperetiyaya dut te Anak te Eleteala ne egkevehayan te umur ne warà edtemanan din; ugaid ne langun ne kenà ebperetiyaya dut te Anak te Eleteala ne kenà egkevehayan te umur ne warà edtemanan din, nasì pà te iyan igkevehey kandan ke kedusai te Eleteala te warà edtemanan din.

4

Ke Meritan ne Riyà Ebpuun te Inged ne Semeriya

¹ Nerineg dut te menge Peresiyu ke tudtul te iyan pà merakel ne menge etew se ebpendiyà te ki Hisus su ebpebunyang wey ebpesakup kandin dut te menge etew ne ebpendiyà te ki Juan. ² (Ugaid ne iyan benar ne kenà si Hisus ke ebunyang te menge etew su ke edumdumaan din dà.) ³ Guna su nerineg ni Hisus te nepenudtulan, ne mid-awà en diyà te inged ne Hudiya ne mid-ulì en sikandin diyà te inged ne Geliliya.

⁴ Ugaid ne ini se ralan ne ibpevayà din te ed-ulì ne kayi ebayà te inged ne Semeriya. ⁵ Ne guna su ebpevayà en sikandin te inged ne Semeriya ne nekeuma en sikandin te senge inged ne lusud ded te Semeriya ne ed-ingaranan te Sikar, inged ini ne uvey te tanà ne imbehey ni Hakub dengan dut te anak din ne si Jose. ⁶ Ne kayi te tanà ini ne ruen ne ingkalut ni Hakub dengan. Nekeuma si Hisus ketà ne mibpinuu dut te uvey te kalut su neluhat sikandin te kinepanew rin, su ketà ne neudtu en ke andew.

⁷ Guna su ebbipinuu en sikandin ne ruen meritan ne nekeuma su edsekeru ne riyà ebpuun te inged ne Semeriya. Ne migkahi en si Hisus kandin te, "Bayi, peinuma a nu." ⁸ (Iyan din kinevuyù te wayig diyà te kandin su mibpendiyà ke edumdumaan din te senge inged su ebperemasa te egkekaan dan.)

⁹ "Ey," ke se meritan, "siaken ne etew a te Semeriya, ne meambe ke egnganey ka kedì te ked-inum nu su Hudiyanen ke ma?" (Iyan din kebpekelalag te iring kayi su kenà ebperemegayun ke menge Hudiyanen dut te menge etew te Semeriya.)

¹⁰ Midtavak si Hisus te, "Bayi, embiya perem egketuenan nu rà ke engkey ke ibehey te Eleteala, ne embiya perem egkekilala nu rà ke engkey a ini se ebuyù keykew te egkeinum, ne sikuna pà nasì se ebuyù

te egkeinum nu kayi te kedì,” ke si Hisus. “Ne igkevehey ku keykew ke wayig ne ebpekevehey te kegkeuyag.”

¹¹ “Mama,” ke se meritan, “memenuwen nu ve se kebpekekuwa nu keniyan te wayig ne ebehey te kegkeuyag? Su warà ma idsekilut nu ne meralem pà maa ini se wayig! ¹² Su maa,” ke se meritan, “muna ke pà ki Hakub ke keep-epuan dey? Su sikandin ke midtabun kenami kayi te kalut ini ne kayi mid-inum sikandin wey ke menge anak din, abpeg dut te menge ayam din ne pineinum kayi dema.”

¹³ Migkahi si Hisus manen te, “Ke menge etew ne ed-inum kayi te wayig te ini ne kalut ne edsaup pà lavew ebpekeinum. ¹⁴ Ugaid ke etew ne ed-inum te wayig ne ibehey ku kandin, ne kenà en edsaup ebpekeinum. Su ini se wayig ne ibehey ku kandin ne iring te sebseb ne edtevir diyà te lusud te hinawa rin su puunan te kegkeuyag din, ne ebehey te umur ne warà edtamanan din.”

¹⁵ “Mama,” ke se meritan, “peinuma e ves nikuna keniyan te wayig su apey kenà ad edsaup ebpekeinum, ne kenà ad ebpekepengkayi se edsekeru.”

¹⁶ “Na, ulì ke pà,” ke si Hisus, “ne engaya nu ve ke esawa nu su lived kew kayi.”

¹⁷ “Warà ma esawa ku,” ke se meritan.

“Benar an se lalag nu ne warà esawa nu,” ke si Hisus. ¹⁸ “Su kelelima ke en mekesawa, ugaid ne ayan se ebpenniwaley guntaani keykew ne kenà nu esawa. Ini se ingkahi nu en kedì ne benar.”

¹⁹ “Mama,” ke se meritan, “netuenan ku te ayan se lalag nu ne lalag te etew ne ebpelambaste Lalag te Eleteala. ²⁰ Ne ruen id-insà ku,” ke se meritan. “Mekeatag te keep-epuan dey te Semeriya ne kayi ran imbe ebpengarap te Eleteala te ini ne buvungan. Ugaid ne sikiyu ne menge Hudiyanan ne iyan niyu nekahì se riyà dà te inged ne Hirusalim se ed-ubpaan te ebpengarap te Eleteala.”

²¹ “Tenuri nu ini, Bayi,” ke si Hisus, “su ruen hewii ne egkeuma ne kenà en kayi rà ne buvungan etawa riyà dà te Hirusalim ebpengerapa te menge etew ke Amey tew ne Eleteala. ²² Su sikiyu ne menge etew te Semeriya ne matag kew en edsimba ne warà niyu metueni ke engkey se edsimbaan niyu. Ugaid ne sikami se menge Hudiyanan, ne netuenan dey mulà ke edsimbaan dey su kayi ebpoun te kenami ne menge Hudiyanan ne ruen ebpekehemew ne ebpeliyu te menusiyà. ²³ Na,” ke si Hisus te, “neuma en ke hewii te embiya benar ne edsimba ke menge etew te Eleteala ne Amey tew ne med-arap dan ibpepevayà te Kedesenan ne Ebpetuntul te Menusiyà dut te Eleteala wey kayi ebpoun te tidtu te hinawa ran, wey kayi te keduma ran te benar ne penurù ne impayag dut te Eleteala. Ini ve se egkiyuhan te Eleteala ne ulaula rut te menge etew ne edsimba kandin. ²⁴ Ke Eleteala ne warà lawa rin, tembù be kenà egkekita sikandin. Ke menge etew ne edsimba te Eleteala ne medsimba te ippehenat te tidtu ne hinawa wey sebenarvenar te keduma ran dut te penurù ne impayag te Eleteala.”

²⁵ Ke se meritan, “Netuenan ku te ruen ebpekeuma ne Impasad te Eleteala ne Ebperetuen din te langun ne ed-ingaranan ki Kristu ke Mesiyas. Ketà te kebpekeuma rin, ne ibpesabut din keytew ke langun.”

²⁶ Ke si Hisus te, “Siaken en iya ini se ebpekidlalag keykew arà se migkahi nu ne si Kristu.”

27 Kemulu pà ne ebpekidlag si Hisus dut te meritan ne nekeuma en ke edumduamaan din, ne nengeinuinu ran se ebpekidlag si Hisus ketà te meritan. Ugaid ne warà seveka rà kandan ne nekeinsà dut te meritan ke engkey se lakew rin ki Hisus, ne warà dan mekeinsà ki Hisus ke engkey arà se ebpengesaken dan.

28 Arà dà ne intelau en dut te meritan ke idsekeru rin ne mid-ulì en. Nekeuma rà sikandin ne impemenudtul din en dut te menge etew. 29 “Pengkayi kew su intengi niyu eyè se etew su intarem din kedì ke langun ne mid-ulaula ku. Engkey, eyè en buwa ke Impasad te Eleteala ne Edatù te langun ne ebpenerengen tew?” kahi rut te meritan. 30 Nerineg den dà ne migenat dan en se eppendiyà te ki Hisus.

31 Ketà te warà pà mekeuma ke menge etew ne migkahi en ke edumduamaan ni Hisus te, “Mama, iyan tumù ne kaan ke pà.”

32 “Kaan kew en,” ke si Hisus, “su ruen egkeenen ku ne warà niyu metueni.”

33 Ne rutun ne mibpein-inseey ran te egkahi te, “Maa, ruen bes buwa mibehey kandin te nekaan din?”

34 “Iring te egkeenen ku,” ke si Hisus, “ini se kedadumana ku te kiyug te Eleteala ne midsuhù kedi te ed-imasad dut te helevek ne imbehey rin kedi. 35 Kenà bes duen besaanan niyu ne egkahi te, ‘Epat pà ne vulan ne arà pà ne egkeuma ke ked-ehani.’ Ugaid,” ke si Hisus, “ne idtarem ku keniyu te sendenga niyu ma ayan se menge etew ne ebpingguma en, su embiya idsempità ta ne iring dan te melutù ne parey ne ed-eheniyen su kenà meuhet ne ebperetiyaya ran kedi. 36 Su ke etew ne ed-ehani ne ebeyaran, ne embiya id-upama ta ne ke etew ne ebpesabut mekeatag kedi ne ruen ded dema egkeehani rin, ugaid ne iyan din egkeehani ke merakel ne ebpeketelimà te umur ne warà edtamanan din. Ketà ne ke mibuvur te Lalag te Eleteala, wey ke mid-ehani te bahas dut te kebremenudtul te Lalag te Eleteala ne elin dan egkehalew. 37 Benar iya ke besaanan dut te keep-epuan ne egkahi te, ‘Ruen ebuvur, ne ke ruma se ed-ehani.’ 38 Sikiyu,” ke si Hisus, “ne midsuhù ku te ed-ehani rut te warà niyu geleveka te kebuvur. Su duma ne etew se migelevek te kebuvur ketà, ugaid ne sikiyu en maa ke ed-ehani rut te gelevek dan.”

39 Gewii te kayi pà te ralan ini se menge etew te Semeriya ne eppendiyà te ki Hisus, ne merakel dut te sikandan se nekeperetiyaya kandin su sabap dut te nekahie te meritan kandan te, “Intarem din kedi ke langun ne mid-ulaula ku.” 40 Guna su nekeuma en ini se menge etew te Semeriya ne mibuyù dan ki Hisus te kenà pà bevayà medlaus, ne ketà dema ne mid-ubpà si Hisus te nekederuwa ne hewii. 41 Ne merakel pà lavew ne menge etew se mibperetiyaya kandin su nerineg dan ke penurù din.

42 Migkehiyan dan ke meritan te, “Mibperetiyaya key en ne kenà ma ketà dà ebpuun dut te nekahie nu kenami, ugaid ne kayi te nerineg dey en dema ke penurù din ne netuenan dey se benar en iya ne sikandin ke netendù te Eleteala ne ebpeliyu te menusiyà.”

Neulian ni Hisus ke Anak ne Meama dut te Senge Etew ne Mepurù te Gubirnu

43 Guna su nepupus en se deruwa ne hewii, ne midlaus en ensi Hisus diyà te inged ne Geliliya. 44 Su ruen ketà pehaney ne nekahie

ni Hisus te, "Ke etew ne ebpelambas te Lalag te Eleteala ne kenà ed-edatan te menge etew diyà te muney ne inged din." ⁴⁵ Guna su nekeuma ran diyà te inged ne Geliliya ne nengehalew ke menge etew ketà su neketelavuk dan te kevurunan diyà te Hirusalim dut te Pista te Kedsehari te Suluhuen, ne nekita ran ke langun ne mid-ulaula ni Hisus diyà.

⁴⁶ Netaman ketà ne midlived si Hisus kayi te inged ne Kana lusud te Geliliya, ke inged ne ruen wayig ne pinebaluy rin ne binu. Ketà ne ruen etew ne mepurù se ketengdanan din diyà te gubirnu te inged ne Kapirnawum ne ruen anak din ne meama ne ebpekedaru. ⁴⁷ Nerineg dut te mepurù se nekeuma en si Hisus kayi te Geliliya te riyà ebpuun te inged ne Hudiya, ne mibayaan din en ne mibpemuyù kandin te ebperumaan din diyà te Kapirnawum su ebpevawian ke anak din ne egkerandung te kemetayen.

⁴⁸ Nerineg dà ni Hisus ne migkehiyan din en te, "Embiya kenà kew ebpekekita te tuus ne ebpekegeyip ne kenà kew ebperetiyaya."

⁴⁹ "Mama," ke se mepurù te ketengdanan din, "duma ke pà kedì te kenà pà ebpatey ke anak ku."

⁵⁰ Ke si Hisus te, "Na, ulì ke en su neulian en ke anak nu."

Ne mibperetiyaya ke meama rut te migkahi ni Hisus kandin, ne mid-ulli en. ⁵¹ Guna su nepawà te riyan dan pà te ralan ne nesinuhung dan en ke menge sugsuhuen din ne migkahi ran te, "Neulian en ke anak nu ne ederaru." ⁵² Ne mid-insaan din en sikandan te, "Keenu neulii ke anak ku?"

"Gevii te nepulid en ke andew ne mid-engked ke kedetenga rin," ke sikandan.

⁵³ Nerineg din arà ne netenuran din en te gevii te nepulid ke andew ke kinekahi ni Hisus kandin te, "Neulian en ke anak nu ne ederaru." Arà dà ne mibperetiyaya en ki Hisus, abpeg dut te langun ne sikandan kayi te lusud te valey rin.

⁵⁴ Ini ve ke ikeruwa ne mekegeyip ne mid-ulaula ni Hisus kayi te lusud te inged ne Geliliya gewii te kineulì din te riyà ebpuun te inged ne Hudiya.

5

Ke Etew ne Neuhet en se kedaru Rin ne Neulian ni Hisus

¹ Ne warà dà utew meuhet maa ketà ne mibpendiyà si Hisus te Hirusalim su ruen pista te menge Hudiyenan. ² Diyà te Hirusalim ne ruen bengawan ne ebpevayaan te menge etew ne ebpeneheewit te menge bilibili ne ibpelengesa, ne uvey ketà te bengawan ne ruen linew ne ed-ingaranan te kinehiyan ne Ìdúdiyanen te Bitsaida. Ruen lelima ne ed-elungan ne nekelingut kayi te kilid en te wayig. ³ Merakel ne menge etew ne ederaru ne ebpengirehà ketà te ed-elungan, ruen pisek, ruen pungkù, ne ruen en midtibas te ayew. (Su edtahad dan te kedsevu ketà te wayig. ⁴ Su ruen andew ne ebpehunrerènà ke suluhuen te Eleteala te kebpesevu rin ketà te wayig. Ne arà be ne ke egkeuna ne etew ne ederaru ne ebpeketiher te edsevu pà ke wayig ne egkeulian ke misan engkey en ne sakit din.) ⁵ Ne ruen ketà meama ne nekeditetelu en nepulù wey walu ne rahun se kederaru rin. ⁶ Nekita ni Hisus sikandin se ed-id-irehà ketà ne netuenan din se neuhet en

nevenar ini se daru rin. Ne mid-insaan ni Hisus te, “Maa, egkiyug ka ne egkeulian?”

⁷ “Mama,” ke se meama ne ederaru, “warà ruma ku ne ebpeke-sepuwat kedì te ebpetiher keniyan te wayig ke embiya edsevu. Su embiya seveka ku rà se ebpengkeniyan te wayig, ne ruen ebpekeuna kedì.”

⁸ Ne migkahi si Hisus te, “Enew ka, luluna nu ke ikam nu, ne ipanew ke en.” ⁹ Arà dà iya ne neulian en ini se etew, ne midlulun din en se ikam din ne mid-ipanew en.

Ini ne hewii ne Sepetu, ke Hewii te Ked-imeley ran. ¹⁰ Guna su nekita rut te menge egkeunutan te Hudiyanan ke mibawian ni Hisus ne migkahi ran te, “Meambe ke ebava ka te ikam nu gunteani? Maa kenà ka edtanud te ini ke Hewii ne Id-imeley ne ebpekerimpas ka dut te penduan tew ke ed-ewit ka te ikam nu?”

¹¹ Midtavak ini se meama te, “Su ke etew ne nekeulì kedì ne iyan migkahi te, ‘Luluna nu ke ikam nu ne ipanew ke en.’”

¹² “Engkey arà ne etew,” ke se menge Hudiyanan, “se migkahi keykew te ibpelulun ke ikam nu ne ibpeipanew ka?”

¹³ Ugaid ne warà metueni rut te meama ke enta se mibawì kandin su ruen merakel ne etew ketà te uvey te wayig ne mid-awà en si Hisus.

¹⁴ Warà dà meuhet ketà ne nekita en ni Hisus ini se meama riyà te lusud te Nekebpuru ne Valey te Eleteala. “Intengi nu ve,” ke si Hisus, “neulian ke en te daru nu! Na, kenà ke en be baal te salà su apey ka kenà egkerasey te tuwas pà dut te daru nu ne ebpekesuhat keykew.”

¹⁵ Arà pà ne midlihawang ke meama su ebpendià te menge egkeunutan te menge Hudiyanan su idtarem din kandan te si Hisus bes iya ke nekevawi kandin. ¹⁶ Ne ketà puunan ne neepes ke menge egkeunutan te Hudiyanan ki Hisus su mibawì sikandin ketà te Hewii ne Id-imeley.

¹⁷ Tembù be migkahi si Hisus kandan te, “Taman guntaani ne warà med-imeley ke Amey ku ne Eleteala te egelevek, ne iyan e pè be rema kenà megelevek.” ¹⁸ Nerineg den dà ke migkahi ni Hisus, ne neisab dan se ebpmengà te ralan te ked-imetayi ki Hisus su nekerimpas sikandin dut te penduan ne egkahi te kenà egkapakey ne egelevek dut te Andew ne Id-imeley, ne ikeruwa rin ne mibpekidrepeng sikandin te Eleteala su migkahi rin se Eleteala ke Amey rin.

Ke Umur ne Warà Edtemanan Din ne Riyà Ebpuun te Anak te Eleteala

¹⁹ Ketà ne migkahi si Hisus kandan te, “Sebenarvenar ini se egkehiyen ku te siak ke Anak te Eleteala ne warà egkeveelan ku te kediey rà ne kiyug. Iyan dà ebeelan ku ne arà se nekita ku riyà te ulaula te Amey ku, su ini se ebeelan din ne iyan dema se edumaan ku.

²⁰ Su ke Amey ku ne Eleteala ne rekela se limù din kedì ne Anak din, ne ibpekita rin kedi ke langun ne ed-ul-ulaan din. Ne ruen muna pà ne ibpekita rin kedi ne ed-ul-ulaan ku ne igkegeyip niyu. ²¹ Su ke Amey ku ne Eleteala se ebanew te menge etew ne minatey ne ed-uyahen din maan, ne iring ded dema ketà te siaken ne Anak din su ed-uyag a te piya engkey ne egkiyuhan ku,” ke si Hisus. ²² Kenà ke Amey ku ne Eleteala se egkukum te menge etew, ugaid ne imbehey rin kedi ke Anak din ke gehem te kegkukum te langun ne menge etew. ²³ Iyan din kinesarig kedi su apey siaken ne Anak din ne egkereyrey rut te langun

ne menge etew, iring te kedeyreya ran te Amey ku. Su misan engkey en ne etew ne kenà edeyrey kedi ne kenà dema edeyrey dut te Amey ku ne Eleteala ke midsuhù kedi.

²⁴ “Sebenarvenar ini se egkehiyen ku ne misan engkey ne etew ne ebpemineg te lalag ku wey ebperetiyaya rut te midsuhù kedi, ne ebpeketelimà dut te umur ne warà edtemanan din. Ne kenà en edusaan su nekeperiliu en sikandin te kepepatey ne warà edtemanan din, ne ebpekeubpà en diyà te Eleteala taman te taman. ²⁵ Sebenarvenar ini se egkehiyen ku, misan ke menge etew ne iring te minatey en su sabap dut te salà dan ne neuma en ke hewii ne egkerineg dan ke lalag ku, ke Anak te Eleteala, ne arà se ebpemineg ne egkevehayan te behu ne umur. ²⁶ Ke Amey ku se ebpuunan te umur su sikandin se ebpekevehey te umur, ne iring ded be ketà ke kedi ne Anak din su ke gehem din ne imbehey rin kediey ne ebpekevehey e red dema te umur. ²⁷ Ne kenà ketà dà taman, su imbehey rin lavew kedi ke gehem te kegkukum te menge etew su siaken iya ke Impeanak te Menusiyà.

²⁸ “Kenà kew ve meselekawi kayi su ruen hewii ne ebpekeuma ne langun ne riyà te menge leveng ne egkerineg dan ke suwara ku, ²⁹ ne ketà ne egemew ran dut te leveng dan. Ne langun te metidtu ne egkevanew ran su riyà ebpekeubpà te Eleteala su neketelimà dan te umur ne warà edtamanan din, ugaid ne langun be rut te nekevaal te meraat ne ulaula ne egkevanew red su edusaan.”

Ke Menge Titihus Mekeatag ki Hisus

³⁰ Ne migkahi manen si Hisus te, “Embiya kenà ke gehem te Eleteala ne imbehey rin kedi ne warà egkeveelan ku, su iyan ku rà kegkukum ne endei se igkahi rin kedi ne arà se edumaan ku te kegkukum. Tembù be ke kegkukum ku ne metidtu. Su kenà kedi ne kiyug se edtumanen ku, ugaid ne ke kiyug dut te midsuhù kedi se edtumanen ku.

³¹ “Upama ini, embiya siaken dà se ebpekehiyen te kedi ne hinawa, ne kenà egkepehimbenar te ruma ne etew. ³² Ugaid ne ke Amey ku ne ebpeninindeg kediey ne netuenan ku te egkererihan se kebpenitihu din kediey.

³³ “Duen midsuhù niyu riyà te ki Juan su ebpeinsaan niyu ke engkey se siak, ne benar ke migkahi rin mekeatag kediey. ³⁴ Kenà a ebpegunguyà te etew rà se edtitihuus kediey, ugaid ne ebpetenuran ku keniyu ke keditihuus ni Juan su apey kew ebpekeperetiyaya wey egkeperiliu dut te keberedusaan. ³⁵ Su si Juan ne iring te sulù ne midsilà, ne nehalew kew ne ebpemineg dut te mehaan dà ne penurù din.

³⁶ “Ugaid ne ruen mevaher pà dut te keditihuus ni Juan mekeatag kedi. Ini se helevèk ne imbehey kedi dut te Amey ku ne Eleteala, ne ini se ebpesabut keniyu te siak ke midsuhù din kayi. ³⁷ Ne ke Amey ku ne midsuhù kedi ne ebpeketitihuus dema mekeatag kediey. Warà niyu merineg ke suwara rin wey warà niyu mekita sikandin. ³⁸ Ne warà niyu telimaa ke lalag din su warà kew ma mibperetiyaya kediey ke midsuhù din. ³⁹ Mibpengedian niyu ke lalag te Eleteala ne impesurat dengan su iyan niyu kunaan ke ketà kew ebpekehaked te umur ne warà edtemanan din. Ne langun ne impesurat ketà ne edlag

mekeatag kedi. ⁴⁰ Ugaid ne kenà kew egkiyug ne ebpengkayi te kedi su apey kew perem ebpekehaked te umur ne warà edtamanan din.

⁴¹ “Kenà iyan ku ebpmengaan se kegkereyù kedi te menge etew. ⁴² Ugaid ne netuenan ku te warà te hinawa niyu se kedlimù te Eleteala. ⁴³ Iyan ku impengkayi ne ibpepevayà te gehem dut te Amey ku ne Eleteala, ne warà kew medtelimà kedi. Ugaid ne embiya ruen ebpekeuma ne ebpemandù kenyu te kandin dà ne gehem, ne edtelimaan niyu mulà sikandin. ⁴⁴ Memenu ma se kebperetiyyaya niyu embiya iyan niyu rà ebpmengaan se kegkereyù kenyu te menge ruma niyu, ugaid ne warà niyu pemengaa ke ralan te kegkereyù ne riyà ebpuun te budtung ne Eleteala?”

⁴⁵ “Iyan niyu kunaan ke siaken se ed-isuhat kenyu te kevenar diyà te etuvangan te Amey ku ne Eleteala, ugaid ne kenà en iya. Su ruen seveka ne ed-isuhat te kevenar kenyu ketà te hewii te kegkukum ne si Moises su dekelà ke sarig niyu te penduan ne intahak din. ⁴⁶ Embiya benar ne mibperetiyyaya kew rut te impesurat ki Moises dengan, ne ebperetiyyaya kew kedi dema su ke impesurat kandin ne mekeatag kedi. ⁴⁷ Ne ketà be embiya warà kew mibperetiyyaya te lalag ne impesurat din,” ke si Hisus, “ne memenu ve se kebperetiyyaya niyu kayi se egkehiyen ku?”

6

Pinekaan ni Hisus ke Lelima Ne Ngivu ne Etew

(Mateo 14:13-21; Marcos 6:30-44; Lucas 9:10-17)

¹ Guna su neipus ini, ne midlived en si Hisus diyà te ripag te Ranew te Geliliya (ne ed-ingaranan dema te Ranew te Tibiriya). ² Ne ruen denda ne menge etew ne mid-eguyut kandin su nekita ran ke mekegeyip ne mid-ulaula rin te kebpemawi din dut te menge etew ne ebpenderaru. ³ Ne midtekereg en si Hisus wey ke menge edumdumaan din diyà te buvungan ne mibpinuu ran en. ⁴ Su ketà ne hewii ne edanirani en ke hewii ne edtenuran te menge Hudiyanan ne ed-ingaranan te Pista te Kedsehari te Suluhuen.

⁵ Midsandeng si Hisus ne nekita rin ke denda ne menge etew ne ebpelingguma, ne migkehiyan din si Felipe te, “Endei kiyu ebpekekuwa te egkekaan ne ibpekaan tew keniyan te renda ne menge etew?” ⁶ (Migkahi rin ini su ebpenggeraman din si Felipe, ugaid ne netuenan din ma ke engkey se ed-ul-ulaan din.)

⁷ Midtavak en si Felipe te, “Misan pipira pà ne hatus ne pirak se ibpemasa ta te egkeenen te iring keniyan se kerakel dan ne kenà pà ebpeketukid kandan misan idsenge sungit dà.”

⁸ Ne senge etew ne edumdumaan ni Hisus ne ed-ingaranan ki Andres, ke ari ni Simon Pedro, ne migkahi te, ⁹ “Duen ini batà ne meama ne midlulutù te lelima ne timan ne pan wey deruwa ne timan se serà. Ugaid ne ebmemenuwen dè be ayan se engkayi ne kerakel te menge etew?”

¹⁰ Migkahi si Hisus te, “Ibpemepinuu niyu en ayan se menge etew.” (Ne ruen gumegebà ketà ne meluag.) Ne rutun dan en mebpinuu, ne menge lelima ne ngivu se meama liyu ke meritan batà. ¹¹ Arà dà ne migkuwa ni Hisus ke lutù te batà, ne mibpeselamatan din te Eleteala, ne mibpenevitevi din ne imbehey rin dut te edumdumaan

din te idtukid diyà te menge etew ne mibpinuu. Iring din ded dema ke serà, ne migkaan dan langun taman te nevulung dan.

¹² Guna su nevulung dan en ne migkahi en si Hisus dut te edumdumaan din te, “Punpuna niyu ke langun ne samà su apey kenà egkereeti.” ¹³ Arà dà ne mibpunpun dan en ke samà dut te pan, ne ruen sepulù wey deruwa ne binevey se netimuan te samà dut te lelima ne timan ne pan.

¹⁴ Guna su nekita rut te menge etew ke mekegeyip ne mid-ulaula ni Hisus ne migkahi ran te, “Ini en ke ebpelambas te Lalag te Eleteala ne ibpepengkayi rin te ampew te dunya.” ¹⁵ Netuenan ni Hisus se mid-uvey ran kandin su ebeelan dan sikandin ne ratù dan misan kenà egkiyug sikandin. Tembù be mid-ewaan dan ni Hisus ne midtekereg diyà te buvungan te sikandin dà.

Mid-ipanew si Hisus diyà te Divavew te Wayig

(Mateo 14:22-26; Marcos 6:45-52)

¹⁶ Guna su meapun en, riyà en midtupang ke menge edumdumaan din te beyvey te ranew. ¹⁷ Ne mid-untud dan en te avang su ed-apet dan te edlived diyà te inged ne Kapirnawum. Guna su mibmerusirem en ne warà pà lavew si Hisus, ne midlaus dan en te ed-apet. ¹⁸ Netekew ne mibmevaher ke keramag, ne midekelà ke baleg te wayig. ¹⁹ Guna su neketantal dan en te menge lelima ne kilù, ne arà pà ne nekita ran si Hisus se ebpelingguma ne ed-ipanew kayi te divavew te wayig. Ne nengeandek dan nevenar! ²⁰ “Kenà kew meandek!” ke si Hisus, “su siaken ini.” ²¹ Nerineg dan ke suwara rin ne nengehalew ran ne impeuntud dan en si Hisus kayi te avang. Guna su nekeuntud en sikandin te avang, ne seguguna ne nekerunggù dan en dut te inged ne ebayaan dan.

²² Nepawà ketà ne ke menge etew ne pinekaan ne riyà pà lavew te ripag te ranew ne netuenan dan te seveka rà ke avang ne diyà te beyvey te ranew. Netuenan dan dema te si Hisus ne warà pà mekeruma dut te edumdumaan din su ke edumdumaan din dà ke mibpenguntud te avang. ²³ Ne rutun te uvey te mibpekeenan kandan ne mibpeselamat si Hisus te Eleteala ne ruen midunggù ne menge avang ne riyà ebpun te Tibiriya. ²⁴ Guna su nekita rut te denda ne menge etew te warà en si Hisus wey misan ke edumdumaan din, ne mibpenguntud dan en te menge avang se ebpendià te inged ne Kapirnawum su ebpemengaan dan si Hisus.

Ke Egkeenen ne ebpekevehey te Umur ne Warà Edtemanen Din

²⁵ Guna su nekerunggù dan ne netuen dan en si Hisus. “Meyterù,” ke sikandan “keenu ka mekeuma kayi?”

²⁶ Midtavak si Hisus te, “Sebenarvenar ini se egkehiyen ku, ebpe-mengà kew kedì su nekekaan kew te pan ne nengevulung kew, ugaid ne warà kew mekesabut ke engkey se meana kayi te mekegeyip ne ed-ul-ulaan ku. ²⁷ Kenà niyu iyan pegelepi ke egkeenen kayi te ampew te dunya su edsahad dà. Ugaid,” ke si Hisus, “ne iyan benar ne pegelepi niyu ke egkeenen ne ebpekevehey te umur ne warà edtemanan din. Ini se egkeenen ne siaken ke Impeanak te Menusiyà ke ebehey keniyu, su ruen gehem ku ne imbehey kedì te Amey ku ne Eleteala.”

²⁸ Migkahi ke menge etew te, “Engkey se ed-ul-ulaan dey su apey key ebpeketuman te kiyug te Eleteala?”

²⁹ Ne midtavak si Hisus te, “Ini se ul-ulaa niyu su apey kew ebpeketuman te kiyug te Eleteala, peretiyaya kew kedì ke midsuhù te Eleteala.”

³⁰ Ne migkahi ran en te, “Engkey pà se ruma ne mekegeyip ne ed-ul-ulaan nu ne ibpekitu nu kenami su apey key ebpekeperetiyaya? ³¹ Su ke menge keep-epuan tew rengan ne iyan dan migkaan ne edingeranan te mana te riyà dan pà te tanà ne kenà egkeubpaan te menge etew, iring dut te impesurat ne Lalag te Eleteala ne egkahi te, ‘Ke egkeenen ne riyà ebpuun te langit se imbehey kandan ni Moises.’”

³² “Sebenarvenar ini se egkehiyen ku,” ke si Hisus, “ke egkeenen ne imbehey ni Moises te keep-epuan niyu ne kenà ke tidtu ne egkeenen ne riyà ebpuun te langit, su ke Amey ku ne Eleteala se ebehey te tidtu ne egkeenen ne riyà ebpuun te langit. ³³ Su ke egkeenen ne ibehey te Eleteala, ne sikandin arà se mibpengkayi te ampew te dunya su ebehey te menge etew te umur ne warà edtemanan din.”

³⁴ “Mama,” ke sikandan, “behayi key en keniyan te egkeenen ne nekahì nu ne kenà edsahad dà su warà edtemanan din.”

³⁵ Ne migkahi si Hisus te, “Siaken arà se egkeenen ne ebehey te umur ne warà edtemanan din. Ke etew ne eduma kedì su ebperetiyaya ne iring te etew ne kenà en egkevitil. Uya, ke etew ne edsarig kedì ne iring te etew ne kenà en ebpekeinum. ³⁶ Na iring te intarem ku en keniyu,” ke si Hisus, “ne misan nekita niyu en ke ed-ul-ulaan ku, ne kenà kew pà lavew iya ebperetiyaya kedì. ³⁷ Ke langun ne menge etew ne ibehey kedì te Eleteala ne sikandan ke eduma kedì, ne langun ne eduma kedì ne warà senge etew rà kandan ne kenà ku edtelimaan. ³⁸ Su midewaan ku ke langit ne mibpengkayi a te ampew te dunya su apey ku egketuman ke kiyug dut te midsuhù kedì, kenà kedì ne kiyug. ³⁹ Su ini ke kiyug te Eleteala ne midsuhù kedì te langun ne etew ne imbehey rin kedì ne eduma kedì, ne warà senge etew rà kandan ne kenà egkevehayan te umur ne warà edtemanan din, ne ebenawen ku pà sikandan langun ketà te ketepusan ne hewii te kegkukum,” ke si Hisus. ⁴⁰ “Su ini ve ke kiyug te Amey ku ne Eleteala te langun ne nekesabut te siaken ke Anak din ne ebperetiyaya ran kedì ne ebpeketelimà dan te umur ne warà edtemanan din, ne siaken se ebanhew kandan ketà te ketepusan ne hewii te kegkukum.”

⁴¹ Arà be ne neepes ke menge egkeunutan te Hudiyanen dut te nelalag ni Hisus te, “Siaken ke egkeenen ne riyà ebpuun te langit.”

⁴² Ne mibpemengasak dan te, “Maa, kenà si Hisus ded ini ke anak ni Jose? Su egkekilala tew ke amey rin wey ke iney rin dema. Na meambe ke nekahì rin se riyà sikandin ebpuun te langit?”

⁴³ Midtavak si Hisus te, “Engked kew en te ebpemivig. ⁴⁴ Su warà senge etew rà ne eduma kediey ke kenà ke Amey ku ne Eleteala ke midsuhù kedì se ebpenehana te hinawa rin te ebperetiyaya, ne ebenawen ku sikandin dutun te akir din ne hewii te kegkukum. ⁴⁵ Duen impesurat te menge etew ne mibpelembas te Lalag te Eleteala rengan ne egkahi te, ‘Langun ne menge etew ne ebpesebuten te Eleteala,’” ke si Hisus, “ne langun ne ebpemineg te ibpesabut kandin dut te Amey ku ne Eleteala ne eduma kedì. ⁴⁶ Kenà iyan ku kegkahi

ne ruen etew ne nekekita te Amey ku ne Eleteala su siaken dà ke riyà ebpuun te Eleteala se nekekita kandin su riyan a mibpuun te kandin. ⁴⁷ Sebenarvenar ini se egkehiyen ku ne ke etew ne mibperetiyya kediey ne egkevehayan te umur ne warà edtemanan din. ⁴⁸ Su siaken arà ke egkeenen ne ebpekevehey te umur ne warà edtemanan din,” ke si Hisus. ⁴⁹ “Benar ne nekekaan ke keep-epuan niyu te egkeenen ne ed-ingeraran te mana rut te riyà dan te tanà ne kenà egkeubpaan te etew, ugaid ne minatey ran ded lavew. ⁵⁰ Ugaid ne ini se tidtu ne egkeenen ne riyà ebpuun te langit, ne piya engkey ne etew ne egkaan ketà ne ebpeketelimà te umur ne warà edtemanan din. ⁵¹ Siaken ke tidtu ne egkeenen ne riyà ebpuun te langit ne ebpekevehey te umur. Ke etew ne egkaan kayi ne warà kemetayen te himukud din. Su ke egkeenen ne ibehey ku ne ini en iya se lawa ku su apey ebpeketelimà ke langun ne etew kayi te ampew te dunya te umur ne warà edtemanan din.”

⁵² Guna su nerineg dut te menge egkeunutan te Hudiyanan ke migkahi ni Hisus ne nekedlewanà dan te, “Ebmemenuwen din te ebehey ke lawa rin keytew te ebpekaan?”

⁵³ Ne midtavak si Hisus te, “Sebenarvenar iya ini se egkehiyen ku keniyu, embiya kenà kew egkaan te lawa ku wey embiya kenà kew ed-inum te lengesa ku ne kenà kew egkevehayan te umur ne warà edtemanan din. ⁵⁴ Su ke etew ne egkaan te lawa ku wey ed-inum te lengesa ku ne egkevehayan te umur ne warà edtemanan din, ne ebenawen ku sikandin ketà te hewii ne kebopupusa te dunya. ⁵⁵ Su ini se lawa ku ke tidtu ne egkeenen, ne ini se lengesa ku ke tidtu ne ed-inumen ne ebpekevehey te umur ne warà edtemanan din. ⁵⁶ Ne misan engkey ne etew se egkaan te lawa ku ne ed-inum te lengesa ku ne sikandin ne kayi ebpekeubpà te kedì, ne siaken dema ne diyan a ebpekeubpà te kandin. ⁵⁷ Ke Amey ku ne Eleteala ne midsuhù kedì ne ruen umur din ne warà edtemanan din ne ketà ebpuun ne ruen kedì ne umur. Ne iring dema ketà ke etew ne egkaan kediey, egkevehayan sikandin te umur su kayi ebpuun te kediey. ⁵⁸ Ini ve ke egkeenen ne riyà ebpuun te langit, ne kenà ini iring dut te egkeenen ne ed-ingeraran te mana ne nekaan dut te keep-epuan niyu su mibpematey ran. Su ke etew ne egkaan kayi te egkehiyen ku ne egkeenen ne egkeuyag sabap kedì.” ⁵⁹ Ini ke migkahi ni Hisus te kebpenurù din diyà te valey ne ebpengedian te menge Hudiyanan te penduan dan diyà te inged ne Kapirnawum.

Merakel ne Midsuwéy te Eduma ki Hisus su Melugkà se Hinawa Ran

⁶⁰ Merakel dut te menge etew ne eduma kandin se nekerineg kayi te impenurù din ne migkahi ran te, “Merehen ne egkerumaan ini se impenurù din. Engkey rà buwa iya se ebpemineg kayi?”

⁶¹ Netuenan ni Hisus te ebpemekedlewanà dan su atag dut te impenurù din ne migkahi en te, “Maa, ebmelugkà ini te hinawa niyu? ⁶² Upama ke embiya egkekita niyu ke Impeanak te Menusiyà ne ebpekelesed su ed-ulì diyà te ebpuunan din, ne engkey ve se pegitungan niyu, muna pà buwa se kegkelugkai te hinawa niyu? ⁶³ Iyan dà ebpekevehey te umur ne warà edtemanan din ne ke Kedesenan ne Ebpetuntul te Menusiyà, su warà egkegaga te etew rà dè duen. Ini se migkahi ku keniyu ne riyà ebpuun te Kedesenan ne

Ebpetuntul te Menusiyà ne ebpekevehehey te umur ne warà edtemanan din. ⁶⁴ Ugaid ne ruen ruma niyu ne warà mebperetiyyaya kediey.” (Migkahi ini ni Hisus su netuenan din en neraan ke engkey se warà mebperetiyyaya kandin wey ke ed-ulug kandin diyà te kunterà din.) ⁶⁵ Ne midsaup maa sikandin migkahi te, “Tembù be migkahi ku keniyu te warà senge etew rà ne ebpekeruma kediey embiya kenà egkepenehana ke hinawa rin dut te Amey ku ne Eleteala.”

⁶⁶ Arà dà iya ne merakel en dut te menge etew ne eduma kandin se mibpekidsuwey en, ne kenà dan en eduma kandin.

⁶⁷ Ketà ne nekehiyan ni Hisus ke sepulù wey deruwa ne edumdu-maan din te, “Menu sikiyu, ebpekidsuwey kew en rema kediey?”

⁶⁸ Migkahi si Simon ke mid-ingaranan ki Pedro te, “Sikuna ke Kerenan dey ne endei key pè be ebpesinaru? Su sikuna rè ma ke eppenurù te ralan te kebaketelimà te umur ne warà edtemanan din. ⁶⁹ Ne mibperetiyyaya key en keykew su netuenan dey se sikuna ke Berekat ne midsuhù te Eleteala ne ebpekemalen.”

⁷⁰ Migkahi en si Hisus dut te edumdumaan din te, “Maa, kenà ke sepulù niyu wey deruwa se mibpemilì ku? Ugaid ne seveka keniyu se sakup ni Setanas ke datù te pekaid.” ⁷¹ Iyan din ini egkehiyen ne si Hudas ke anak ni Simon Iskeriyuti. Su misan senge etew si Hudas dut te sepulù wey deruwa, ne sikandin se ed-ulug ki Hisus diyà te menge kunterà din.

7

Mibpendiyà si Hisus te Kevurunan

¹ Guna su nekeipus si Hisus te kebpenurù din ne midlauglaug en sikandin kayi te menge inged lusud te Geliliya. Kenà sikandin egkiyug ne eppendiyà te lusud te inged ne Hudiya su ruen ketà menge egkeunutan te Hudiyanan ne egkiyug ne ed-imatey kandin. ² Ne mehaan en dema ketà egketuman ke kevurunan te menge Hudiyanan ne ed-ingeranan te Pista te Menge Sabung. ³ Tembù be migkehiyan si Hisus dut te menge ari rin te, “Iyan tumù ne awà ka kayi ne telavuk ka te kevurunan diyà te inged ne Hudiya su apey mekekita ke menge etew ne eduma keykew te mekegeyip ne ed-ul-ulaan nu. ⁴ Su warà etew ne ed-eles te ed-ul-ulaan din embiya egkiyug sikandin ne egkevantug. Geina te ed-ul-ulaan nu ini se mekegeyip ne iyan tumù ne ibpekita nu riyà te langun ne menge etew.” ⁵ (Migkahi ini rut te menge ari ni Hisus su misan sikandan ne kenà dan ebperetiyyaya kandin.)

⁶ Midtavak si Hisus kandan te, “Warà pà mekeuma ke dait ne hewii te kebpayag ku rut te ed-ul-ulaan ku. Ugaid ne sikiyu, ne piya engkey ne hewii ne neked-iring dà diyà te keniyu. ⁷ Su kenà ma egkeepes keniyu ke menge etew ne egkunterà te Eleteala, ugaid ne egkeepes dan kedi su layun a edsawey kandan dut te meraat ne ulaula ran. ⁸ Una kew en pendiyà te kevurunan,” ke si Hisus “su warà pà mekeuma ke dait ne hewii te kebpayag ku rut te menge ulaula ku.” ⁹ Arà dà ke migkahi ni Hisus ne mibpelintetahak en sikandin kayi te Geliliya.

¹⁰ Guna su mid-ipanew en ke menge ari ni Hisus ne edtelavuk dut te kevurunan ne midtundug ded dema sikandin, ugaid ne ed-eles-eles dà sikandin. ¹¹ Ne ketà te pista, ne mibpemengà si Hisus dut te menge egkeunutan te Hudiyanan. “Endei en be sikandin?” ke sikandan.

¹² Duen merakel ne ebpevutbuthehey mekeatag kandin ketà te menge etew ne nevurun. Ruen egkahi te, "Si Hisus ne meupiya ne etew." Ne ruen ruma pà ne egkahi te, "Kenà, su ibpesuwey rin ke menge etew." ¹³ Ne geina te egkeandek dan dut te menge egkeunutan te Hudianen ne kenà dan utew ibperineg te menge ruma ran ke kedlalag dan.

¹⁴ Guna su edluukanan en ke kevurunan ne mibpendiyan en si Hisus te Nekebpuru ne Valey te Eleteala su ebpenurù dut te menge etew. ¹⁵ Ne ruen ketà menge egkeunutan te Hudianen ne midtelavuk ne nengeinuinu ran. "Endei ebpuun ini se ketau rin" ke sikandan "su warà ma sikandin mekepengadi?"

¹⁶ Nerineg ni Hisus ke migkahi ran ne migkahi en kandan te, "Ini se ibpenurù ku ne kenà kayi ebpuun te ketau ku su riyà ebpuun te Eleteala ne midsuhù kedi. ¹⁷ Ke etew ne egkiyug ne edtuman te kiyug te Eleteala ne egketuenan din ke penurù ku ke embiya egenat te Eleteala etawa kayi rà dèduen te hinawa ku. ¹⁸ Su ke etew ne ebpenurù te kandin dà dèduen ne hinawa, ne ebpmengà dà te kegkevantug din. Ugaid ne ke etew ne iyan din ebpmengaan se kegkevantug dut te midsuhù kandin, ne egkeserihan ke lalag din su kenà tarù ini se ibpenurù din. ¹⁹ Maa, kenà ke apù niyu rengan ne si Moises," ke si Hisus "ke mibehey keniyu te menge penduan? Ugaid ne netuenan ku te warà seveka rà keniyu ne midtuman dut te penduan din. Ne meambe ke egkiyug kew ne ed-imatey kediey?"

²⁰ "Ed-em-emungan ke ves buwa te vusew!" ke se menge etew. "Su enta ma se egkiyug ne ed-imatey keykew?"

²¹ Ne migkahi si Hisus te, "Duen seveka ne mid-ulaula ku ne mekegeyip ne langun niyu ne nengeselekawan su ketà te Hewii ne Id-imeley. ²² Ruen seveka ne penduan ne intahak ni Moises dengan ne insuhù din keniyu te ed-etus te behu pà ne in-anak embiya meama (asal kenà diyà dà ebpuun te ki Moises ini se betasan niyu ne ed-etus su raan en ini ne betasan te keep-epuan niyu), ne ed-etus kew misan ketà te Hewii ne Id-imeley. ²³ Ne embiya egkepakey ne ed-etusan se meama te Hewii ne Id-imeley su apey egketuman ke penduan ni Moises, ne meambe ke egkeepes kew kedi ketà te neulian ku te kinebawì ku arà se meama ne ederaru dut te Hewii ne Id-imeley? ²⁴ Kenà kew ed-isuhat te kukuman te kayi rà te egkekita niyu, ugaid ne ed-isuhat kew te kukuman te ibpeunsad dut te benar."

Mid-insà ke Menge Etew diyà te Kevurunan ke Embiya si Hisus ke Impasad te Eleteala ne Ebperetuen Din

²⁵ Duen menge etew ketà te inged ne Hirusalim ne nekerineg dut te migkahi ni Hisus ne migkahi te, "Engkey, kenà ini iya ke etew ne ebpmengaan dut te menge egkeunutan te Hudianen su ed-imetayan dan? ²⁶ Intengi niyu ma se ebpenurù ded sikandin kayi te merakel ne etew. Kema ke benar ded buwa ne netuenan dut te menge egkeunutan tew te sikandin iya ke nekahie Impasad te Eleteala ne Ebperetuen din, su warà peengkera sikandin se ebpenurù. ²⁷ Ugaid ne ini se kebpekeuma rut te Impasad te Eleteala ne Ebperetuen din, ne warà kun egketau ke endei ebpuun sikandin, ugaid ne ini ne netuenan tew red ke mibpuunan din."

²⁸ Gewii ni Hisus te ebpenurù diyà te Nekebpuru ne Valey te Eleteala ne nerineg din arà se lalag dan ne migkahi sikandin te impekerahing din te, "Kunaan niyu ke nekilala a niyu wey netuenan niyu ke endei a ebpuun, ugaid ne idtarem ku kenyi te warà a mibpengkayi te kediey rà ne kiyug su iyan midsuhù kedì ne ke Eleteala ne benar, ugaid ne warà niyu metueni ke entei sikandin. ²⁹ Ugaid ne netuenan ku mulà sikandin su riyan a ebpuun te kandin, ne iyan dema sikandin se midsuhù kedi."

³⁰ Ne edsigkemen dan en perem si Hisus ketà, ugaid ne warà neketikà ne egawed kandin su warà pà ma mekeuma ke intail ne hewii te Eleteala te kegkesigkem kandin. ³¹ Merakel se mibperetiyyaya te sikandin en ke nekahи ne Ebperetuen ne Impasad te Eleteala, ke sikandan te, "Ini en iya ke egkepenareng tew ne Edatù su warà en ebpekelawan dut te menge mekegeyip ne ed-ul-ulaan din."

³² Nerineg te menge Peresiyu ke menge etew ne ebpebutbutehey mekeatag ki Hisus ne tembù be sikandan wey ke menge mepurù te terebpelengesa se midsuhù te menge gurudyà dut te Nekebpuru ne Valey te Eleteala te ibpesigkem si Hisus.

³³ Migkahi si Hisus te, "Kenà utew meuhet ne ed-ewaan ku sikiyu su ed-uli ad diyà te midsuhù kedi. ³⁴ Ne ebpmengà kew kedi, ugaid ne kenà a niyu egketuen su kenà kew ma ebpekependiyà te ebpesineruhan ku."

³⁵ Ketà ne mibpein-inseey ke menge egkeunutan te Hudiyansen te, "Endei ve buwa ebpesinaru sikandin se kenà tew egketuen? Ebpendediyà buwa sikandin te inged te menge etew ne kenà Hudiyansen ke mid-ulian te menge rumu tew ne Hudiyansen, su ebpenurù sikandin te menge etew ne kenà Hudiyansen. ³⁶ Su meambe," ke se menge egkeunutan te Hudiyansen, "ke nekahи rin se, 'Ebpemengà kew kedi, ugaid ne kenà a niyu egketuen.' Ne nekahи rin pà se, 'Kenà kew ebpekependiyà te ebpesineruhan ku.' Engkey ve buwa se meana rut te nekahи rin?"

In-upama ni Hisus te Sikandin ke Puunan te Wayig ne Edtudà ne Ebpekevehey te Umur ne Warà Edtemanan Din

³⁷ Ketà te mewri ne hewii te pista, su arà ke pinekerelà ne hewii te menge Hudiyansen te kedadnud dan, ne mid-itindeg en si Hisus ne pinekerahing din se egkahi te, "Ke etew ne ebpekeinum ne mebpengkayi te kedì ne med-inum. ³⁸ Su embiya ed-inum en sikandin kayi te kedì," ke si Hisus, "ne iring dut te impesurat ne Lalag te Eleteala ne egkahi te, 'Ke etew ne mibperetiyyaya kediey,' embiya idsempità ta, 'ne riya ebpuun te hinawa rin ne ruen wayig ne edtudà ne ebpekevehey te umur ne warà edtemanan din.'" ³⁹ (Ini se impesabut ni Hisus mekeatag dut te Kedesenan ne Ebpetuntul te Menusiyà ne mehaan en ebpekeubpà diyà te menge etew ne ebperetiyyaya kandin. Ugaid ne ketà ne hewii ne warà pà ingkevehey ni Hisus ke Kedesenan ne Ebpetuntul te Menusiyà ne ibpeubpà din kandan su warà pà nevanew si Hisus dut te Amey rin ne Eleteala te kebpekeulì din diyà te langit te kedeyù kandin te Amey rin.)

⁴⁰ Guna su nerineg dut te merakel ne etew ne nevurun ketà ne ruen migkahi te, "Ini en iya ke ebpelambas te Lalag te Eleteala ke ebpenerengen tew."

⁴¹ Ne ruen duma ne migkahi te, “Sikandin en iya ke Impasad te Eleteala ne Ebperetuen din.”

Ugaid ne ruen ruma pà ne migkahi te, “Kenà, su kenà diyà ebpuun te lusud te inged ne Geliliya ke Ebperetuen te Eleteala. ⁴² Su impesabut te insurat ne Lalag te Eleteala te ini se Impasad din ne Ebperetuen ne kayi ebpuun dut te inenakan ni David ne riyà kun id-anak te inged ne Bitlihim ke inged dengan ni Dabid.” ⁴³ Ketà be ne warà meseveka ke itungan dut te menge etew mekeatag ki Hisus. ⁴⁴ Duen ketà egkiyug en ne edsigkem ki Hisus, ugaid ne warà ebpeketikà ne egawed kandin.

Warà Mibperetiyaya ki Hisus ke Menge Egkeunutan te Hudiyanen

⁴⁵ Guna su mid-ulì en ke menge gurudyà te Nekebpuru ne Valey te Eleteala ne mid-insaan dan en dut te menge mepurù te terebpelengesa wey ke menge Peresiyu te, “Meambe ke warà niyu meewit sikandin kayi?”

⁴⁶ Ne midtavak ke menge gurudyà te, “Iyan dey warà kedsigkema kandin ne warà key pà mekerineg te etew ne ebpasal iring ketà te kebpasal din.”

⁴⁷ Ne migkehiyan dan en maa dut te menge Peresiyu te, “Maa, sikiyu ves dema ne nelimbungan din en? ⁴⁸ Maa, ruen misan seveka kayi te sikami ne egkeunutan te Hudiyanen ne mibperetiyaya kandin, abpeg te menge Peresiyu? Warà en iya! ⁴⁹ Ini se merakel ne etew ne miduma en kandin ne warà dan mekesabut dut te penduan ni Moises ne intahak keytew, ne igkeantug dan diyà te apuy nerakà.”

⁵⁰ Ne dutun si Nikudimu ke senge etew ne Peresiyu ne mibpekidllalag ki Hisus se migkahi te, ⁵¹ “Kayi te penduan tew ne kenà egkepakey ne ebpedselaan ke etew ke kenà ibpepinuu pà te kukuman su ebpenginsaan pà sikandin.”

⁵²⁻⁵³ “Meambe,” ke se menge ruma rin, “ebpeninindek ka kandin su riyà ka rema ebpuun te inged ne Geliliya? Besaa nu ke impesurat ne Lalag te Eleteala ne ketà nu egketueni te warà ebpelambas te Lalag te Eleteala ne egemew riyà te lusud te inged ne Geliliya.”

8

Ke Meritan

[¹ Neipus ketà ne mibpengulien ke langun ne menge etew, ugaid ne si Hisus ne midtekereg sikandin diyà te buvungan ne ed-ingaranan te Ulivu. ² Guna su nepawè en ne mibpaneypaney si Hisus se edlived kayi te Nekebpuru ne Valey te Eleteala. Miburun maa ke langun ne menge etew kayi te kandin, ne mibpinuu en sikandin se ebpenurù kandan. ³ Ketà ne ruen menge meyterù te penduan wey menge Peresiyu se mibpengkayi te ki Hisus su mid-ewit dan ini se meritan ne nehumangan ne midlangkadlangkad te esawa rin, ne impeitindek dan ke meritan kayi te etuvangan te menge etew. ⁴ “Meyterù,” ke se menge etew ne mid-ewit te meritan, “nesempenan dey ini se meritan ne midlangkadlangkad te esawa rin. ⁵ Kayi te penduan ni Moises ne edumaan tew, embiya ruen etew ne iring kayi ne edrumbahan te vatu taman te ebpatey. Na, engkey en be se keykew ne kegkukum kayi te meritan ini?” ⁶ Iring ketà se migkahi ran ki Hisus su ebpmengaan dan se ralan te id-isuhat dan ne kewagib dut te idtavak din.

Ugaid ne midungkug si Hisus ne midsurat te terù din kayi te tanà.
⁷ Gewii ran te ed-insà ki Hisus ne midtenggak en sikandin se egkahite, “Embiya ruen kenyan te keniyu ne warà mekevaal te meraat ne ulaula ne iyan med-una medtimbag kandin te vatu.” ⁸ Nekahi rin dà arà ne midungkug en maa sikandin ne midsurat kayi te tanà.

⁹ Ne nerineg den dà arà se intavak ni Hisus ne mid-awà dan en te idseveka te egenat dut te lukes taman te iyan dà nesamà si Hisus wey ke meritan ne ed-it-itindeg kayi te etuvangan din. ¹⁰ Ne midtenggak en maa si Hisus se egkahi te, “Na, Bayi, endei embe sikandan? Maa, warà embe seveka kandan ne nesamà ne ed-isuhat keykew te kewagib?”

¹¹ “Warà en, Mama,” ke se meritan.

“Na,” ke si Hisus te, “siak dema ne warà id-isuhat ku keykew ne kewagib. Ulì ke en be ugaid ne kenà ke en maa baal te meraat ne ulaula.”]

Si Hisus ke Sulù ne Ebpekerayag te Itungan dut te Langun ne Menge Etew kayi te Ampew te Dunya

¹² Ne migkahi pà maa si Hisus diyà te menge etew te, “Siaken ke sulù ne ebpekerayag te itungan te langun ne menge etew kayi te ampew te dunya. Piya engkey ne eduma kedi ne kenà en ed-ipanew diyà te kerusireman su egkereyahan en ke itungan dan kayi te rayag te sulù ne ebehey te umur ne warà edtemanan din.”

¹³ Guna su nerineg te menge Peresiyu ne migkahi ran te, “Sikuna red se edititihu te keykew rà ne hinawa. Tembù be ini se migkahi nu ne kenà tidtu ne titihu ini.”

¹⁴ Ne migkahi si Hisus kandan te, “Piya edititihu ku ke kedi ne hinawa ne egkedserihan niyu ke lalag ku ne benar. Su netuenan ku ke endei a ebpuun ne endei a ebpesinaru, ugaid ne sikiyu mulà ne kenà niyu egketuenan ke endei a ebpuun etawa ke endei a ebpesinaru.

¹⁵ Embiya egkukum kew te ulaula te menge etew ne kenà egkedserihan se kegkukum niyu su kayi rà dèduen te kememenuisyai ne itungan, ugaid ne siaken ne kenà a egkukum te misan engkey en. ¹⁶ Ugaid ne embiya egkukum a,” ke si Hisus pè maa, “ne egkeperetiyyaya niyu ne benar su kenà siaken dà su deruwa rey rut te Amey ku ne Eleteala ne midsuhù kedi se egkukum. ¹⁷ Su ruen nekesurat te penduan niyu ne egkahi te, ‘Embiya egkeseveka se bitiyara rut te deruwa ne etew ne edititihu, ne benar se lalag dan.’ ¹⁸ Edititihu ku ke kedi ne hinawa, ne ke Amey ku ne Eleteala ne midsuhù kedi se edititihu dema mekeatag kedi.”

¹⁹ Nerineg dà dut te menge Peresiyu ne migkahi ran en te, “Endei ma ke Amey nu?”

“Warà a niyu metueni ke entei a etawa ke Amey ku,” ke si Hisus. “Su embiya netuenan a nikiyu ne egketuenan niyu rema ke Amey ku.”

²⁰ Ini ke migkahi ni Hisus dut te kebpenurù din diyà te Nekebpuru ne Valey te Eleteala uvey te edtehuan te ibehey te Eleteala. Ne warà midsigkem kandin su warà pà ma metuman ke hewii ne intail te Eleteala kandin.

²¹ Ne migkahi pà maa si Hisus diyà te menge egkeunutan te Hudiyenan te, “Ed-ewaan ku en sikiyu ne ebpemengà kew kediey su apey kew ebpekepeliyu, ugaid ne kenà e ma nikiyu egketuen ne

ebpematey kew red keniyan te salà niyu ne kenà egkepesahad. Su kenà kew ebpekependiyà te ebpesinerawan ku.”

²² Ne mibpein-inseey ke menge unutan te Hudiyenan te, “Migkahi sikandin te, ‘Kenà kew ebpekependiyà te ebpesinerawan ku.’ Engkey se ibpesabut din, ed-ehet buwa sikandin?”

²³ Ne midtavak si Hisus te, “Sikiyu ne ini kew rà te ampew te dunya, ugaid ne siaken ne riyau a ebpuun te divavew. Uya, sikiyu ne kayi kew ebpuun te kelibutan, ugaid ne siaken ne diyan a ebpuun te langit. ²⁴ Tembù be intarem ku en keniyu,” ke si Hisus, “te ebpematey kew red keniyan te salà niyu ne kenà egkepesahad. Uya embiya kenà kew ebperetiyyaya te siaken arà ke intarem ku keniyu ne riyà ebpuun te Eleteala ne ebpematey kew red keniyan te salà niyu ne kenà egkepesehad.”

²⁵ “Engkey ke ma iya?” ke se menge Peresiyo.

Ne midtavak si Hisus te, “Intarem ku en keniyu ke entei a igenat dut te aney en ne kebpenurù ku taman en gunteani. ²⁶ Merakel pà se igkekahi ku wey igkeisuhat ku mekeatag te menge ulaula niyu. Ugaid ne iyan ku rà ibpesabut te menusiyà ne endei rà ke nerineg ku rut te midsuhù kedi, ne egkedserihan nevenar sikandin.”

²⁷ Warà mekesabut ke menge Hudiyenan te migkahi rin mekeatag te Amey rin ne Eleteala. ²⁸ Ne geina te warà dan mesebuti ne migkahi en maa si Hisus te, “Ketà te hewii ne kedlensanga niyu ke Impeanak te Menusiyà diyà te pinebelevag ne kayu ne ketà niyu egkesebuti te siaken arà se intarem ku keniyu ne riyà ebpuun te Eleteala. Ne ketà ne egketuenan niyu rema te warà ebeelan ku te kedi dà ne hinawa, ugaid ne iyan ku rà igkahi ne endei rà ke ibpekahi kedi dut te Amey ku ne Eleteala. ²⁹ Ne ke Amey ku ne midsuhù kedi,” ke si Hisus, “ne eduma kedi. Kenà a rin ebpedtedayan su iyan ku rà edtumanen ke ebpekesuhat te hinawa rin.” ³⁰ Ne merakel dut te nekerineg te lalag ni Hisus se mibperetiyyaya kandin.

Ke Menge Etew ne Ebaal te Meraat ne Egkeuripen te Salà

³¹ Ne migkehiyan ni Hisus ke menge Hudiyenan ne mibperetiyyaya en kandin te, “Embiya ibperayun niyu ke keduma niyu rut te menge penurù ku keniyu ne benar kew en ne edumdumaan ku. ³² Ne egkesebutan niyu ke benar ne penurù mekeatag te Eleteala ne ketà puunan ne egkevelukasan kew.”

³³ Nerineg den dà ne migkahi ran en te, “Sikami ne menge inenakan ni Abraham ne warà key pà keenu meuripen te misan entei en. Ne meambe ke nekahi nu se egkevelukasan key?”

³⁴ “Sebenarvenar ini se egkehiyen ku keniyu,” ke si Hisus, “te misan entei ne ebaal te meraat ne egkeuripen te salà. ³⁵ Ini se uripen ne kenà ebpekeubpà ketà te baley te kerenan din taman te taman, ugaid ne ke tuney ne anak se ebpekeubpà ketà taman te taman. ³⁶ Geina te siak se Anak te Eleteala, ne embiya egkevelukasan ku en sikiyu ne kenà kew en egkepengunguripen. ³⁷ Netuenan ku,” ke si Hisus, “te inenakan kew ni Abraham, ugaid ne iyan niyu ebpemengaan se kebpatey ku su kenà kew ma ebpemineg te penurù ku keniyu. ³⁸ Iyan ku egkehiyen ne endei rà ke ibpekahi kedi dut te Amey ku, ugaid ne sikiyu ne iyan niyu ed-ul-ulaan ke netuenan niyu rut te amey niyu.”

³⁹ Ne migkahi ran te, "Iyan dey keep-epuan si Abraham."

Ne migkahi si Hisus te, "Embiya ma benar kew ne inenakan ni Abraham, ne iyan niyu ma ebeelan ke mibeelan din dengan. ⁴⁰ Ugaid ne kenà ma ayan ke ulaula niyu su ebpemengà kew te ked-imatey niyu kedì misan iyan ku rà migkahi keniyu ke benar ne ibpekahie kedi dut te Amey ku ne Eleteala. Ne kenà be iring ketà ke ulaula ni Abraham dengan. ⁴¹ Sikiyu, ne iyan niyu ebeelan ne endei rema ke mibeelan dut te amey niyu."

Migkahi ran te kegkeepes dan te, "Kenà key ini menge anak dà te ingkehingey! Netuenan dey ke engkey se amey rey, su ke sebseveka ne Eleteala!"

⁴² "Na," ke si Hisus "embiya ke Eleteala iya maa ke amey niyu, ne igkelimù a nikiyu su diyan a mibpuun te kandin. Ne kenà kedi ne kiyug se kinepengkayi ku su sikandin ke midsuhù kedi. ⁴³ Meambe ke kenà niyu egkesebutan ke egkehiyen ku? Iyan iya se kenà kew egkiyug ne eduma te ibpenurù ku. ⁴⁴ Su ke datù ma te pekaid se amey niyu ne iyan niyu edumaan ke kandin ne kiyug. Terebunù sikandin te aney en, ne edsungkanger dut te benar su iyan dè ma nekepenù te bëba din ne tarù. Embiya edlalag sikandin ne tarù su edumaan din ke kandin ne kiyug, su teruen ma sikandin ne apù sikandin te tarù. ⁴⁵ Ugaid ne sebenarvenar mulà ini se lalag ku," ke si Hisus, "ne kenà kew ebperetiyaya kedi. ⁴⁶ Na, engkey keniyu se ebpeketithus te ruen meraat ne ed-ul-ulaan ku? Warà! Ne embiya benar se lalag ku ne meambe ke kenà kew ebperetiyaya kedi? ⁴⁷ Arà se etew ne benar ne anak te Eleteala ne ebpemineg te menge lalag te Eleteala. Ugaid ne sikiyu ne kenà din menge anak, tembù kenà kew ebpemineg."

Si Hisus wey si Abraham

⁴⁸ Ne midtavak ke menge Hudiyenan ki Hisus te, "Benar iya vuwa ke nekahie rey geina ne riyà ka ebpun te inged ne Semeriya ne midsuukan ka te vusew."

⁴⁹ "Warà a ini suuki te vusew," ke si Hisus. "Su iyan ku ed-ul-ulaan ini ne pekinegan dut te Amey ku, ugaid ne ebpegkeyà kew kedi. ⁵⁰ Kenà ku iyan ebpeneamaran ke kebantug kedi te menge etew, ugaid ne Eleteala se metau ne edtuganur te kegkevantug ku, wey sikandin se edtampil kedi. ⁵¹ Sebenarvenar ne ini se idtarem ku keniyu te piya entei en se eduma te ibpenurù ku ne kenè en ebpatey."

⁵² "Na benar iya ne midsuukan ka te vusew," ke se menge Hudiyenan. "Su misan si Abraham wey ke langun ne mibpelembas te Lalag te Eleteala rengan ne mibpematey ran ded ma. Ne meambe ke migkahi nu te, 'Misan entei en ne eduma te penurù ku ne kenè en ebpatey?' ⁵³ Ke keep-epuan dey ne si Abraham ne minatey en, ne engkey, muna ke pà bes kandin? Wey ke mibpemelambas te Lalag te Eleteala ne mibpematey ran ded lavew. Engkey ke ma te keykew ne kebpegpegitung?"

⁵⁴ Ne midtavak si Hisus te, "Embiya ebantug a te hinawa ku ne warà pantag din ke bentuhan ku. Ugaid ne iyan ebantug kedi ke Amey ku ne Eleteala, ke iyan egkehiyen niyu ne Eleteala niyu.

⁵⁵ Warà niyu metueni ke entei sikandin, ugaid ne siaken mulà ne netuenan ku sikandin," ke si Hisus. "Embiya ve migkahi ku te warà ku metueni sikandin, ne teruen a iring keniyu. Ugaid ne netuenan

ku nevenar sikandin ne edtumanen ku ke menge lalag din kediey.
⁵⁶ Nehalew si Abraham ke keep-epuan niyu rengan su netuenan din te ibpepengkayi a su ebpebaluy ne menusiyà, tembù be nehalew sikandin su ebpenerengen a rin.”

⁵⁷ Ne migkahi ke menge Hudiyenan te, “Engkey en se kinepekekita nu ki Abraham te warà pà melelima nepulù se rahun nu?”

⁵⁸ “Sebenarvenar ne ini se egkehiyen ku keniyu,” ke si Hisus, “te warà pà in-anak si Abraham ne raan ad.” ⁵⁹ Arà dà ne mibpurut en ke menge Hudiyenan te vatu su idrumbag dan ki Hisus, ugaid ne mibpeniyuksiyuk si Hisus ne mid-awà ketà te Nekebpuru ne Valey ne te Eleteala.

9

Neulian ni Hisus ke Etew ne Neketakin Kandin se Pisek

¹ Ketà te ked-ip-ipanew ni Hisus ne nekita rin ini se etew ne neketakin kandin se nepisek en. ² “Mama,” ke se menge edumdumaan ni Hisus, “meambe ke midtakin ayan ne kegkepisek din? Engkey ki salà, kandin be etawa ke menge lukes din?”

³ Ne migkahi en si Hisus te, “Kenà kayi ebpuun te kandin ne salà etawa riyà te menge lukes din. Nepisek sikandin su apey egkekita kayi te kegkeulii rin ke gehem te Eleteala. ⁴ Taman te meandew pà,” ke si Hisus, “ne iyan iya se egelevek ki pà dut te gelevek te midsuhù kedì. Su egkeuma ke merukilem ne warà en ebpekehelevek. ⁵ Taman te kayi e pà te ampew te dunya ne siaken ke sulù ne ebpekerayag te itungan te menge etew.”

⁶ Neipus din te egkahi ini, ne mid-ileb en diyà te tanà ne intevuley rin en ke ileb din te tanà su apey ebudtà. Ne indekudas din en ke vudtà diyà te mata rut te nepisek. ⁷ Ne migkahi en sikandin te, “Pendiyà ke be te linew ne ed-ingaranan te Siluan ne pendapug ke ve ketà.” (Iyan meana te Siluan ne “Midsuhù”.) Arà dà ne mibpendiyà en ke pisek ne mibpendapug en ketà sikandin. Nekeipus ne midlived sikandin ne ebpekekita en.

⁸ Guna su nekita rut te menge etew riyà te sepiring din wey ke menge etew ne nekekita kandin te kebpememuyù din ne mibpein-inseey ran te, “Maa, kenà ini red ke meama ne ebpipinuu su ebpmemuyù?”

⁹ Ruen migkahi te, “Ayan ded iya sikandin!”

Ne ruen ruma ne migkahi te, “Kenà, su nekedrahid dà ke paras dan.”

Ne migkahi en ke meama ne nepisek pehaney te, “Siaken iya ini ke nepisek.”

¹⁰ “Ne meambe,” ke sikandan, “engkey ma se kegkeulii te mata nu?”

¹¹ Midtavak sikandin te, “Iyan nekeulì te mata ku arà se etew ne ed-ingaranan ki Hisus. Su mid-ilevan din ke tanà ne intevuley rin ke ileb din su apey mebudità, ne arà ke indekudas din te mata ku. Ne migkehiyan a rin te, ‘Pendiyà ka te linew ne ed-ingaranan te Siluan ne pendapug ke ve ketà.’ Ne mibpendiyana rema te linew ne guna su nekeipus a se ebpendapug ne ebpekekita ad.”

¹² “Na endei be sikandin?” ke sikandan.

Ne midtavak en sikandin te, “Idita en.”

Impenginsà Dut te Menge Peresiyu Mekeatag Dut te kegkeulii Rin

¹³ Ne miduma ran en ke neulian ne pisek diyà te menge Peresiyu.
¹⁴ Ne arà ne hewii se kinevaal ni Hisus te budtà ne nekeuli dut te pisek ne Hewii te Id-imeley. ¹⁵ Nekeuma ran diyà te menge Peresiyu ne midinsaan en maa sikandin ke engkey se imped-ulaula ni Hisus kandin te kegkeulii te mata rin.

Ke sikandin te, “Indekudas din ke budtà kayi te mata ku ne pinependapug a rin, ne ketà ne nekekita ad.”

¹⁶ Nerineg dà dut te menge Peresiyu ne ruen migkahi te, “Ini se etew ne mibawì keykew ne kenà ebpuun te Eleteala su kenà edtanud sikandin dut te Hewii ne Id-imeley.”

Ne ruen ruma pà ne migkahi te, “Engkey, duen belisalà ne etew ne ebpekeval te menge ulaula ne mekegeyip?” Ketà ne kenà dan en ebpmegayun.

¹⁷ Ne mid-insaan dan en manen ke etew ne neulian te, “Na sikew, nekah nu te sikandin se kineulii te mata nu, engkey ve se nepegitung nu mekeatag kandin?”

Ke sikandin te, “Ebpelambas sikandin te Lalag te Eleteala.”

¹⁸ Ugaid ne warà peretiyaya te menge egkeunutan te Hudiyanan te nepisek ini se etew neraan, tembù be impetawag dan ke menge lukes dut te pisek, ¹⁹ ne mid-insà dan dut te menge lukes te, “Engkey, ini iya ke anak nu? Maa, daan en iya ne pisek sikandin te kineanak kandin? Ne memenu ve se kinekeulii te mata rin?”

²⁰ Ne midtavak ke lukes din te, “Uya, anak dey iya sikandin ne intakin kandin ayan se kegkepisek din. ²¹ Ugaid ne warà dey metueni ke engkey se kinepekekita rin en, ne warà dey metueni ke engkey se nekeuli kandin. Iyan tumù ne sikandin en se insai niyu ne igketarem din ma su egketau en sikandin.” ²² Ini ke intavak dut te menge lukes din su neandek dan dut te menge egkeunutan te Hudiyanan. Su ruen neumpungan te menge egkeunutan te embiya ruen etew ne ebperetiyaya te si Hisus ke Impasad te Eleteala ne Ebperetuen, ne ibpeawà sikandin dut te baley ne ebpengedian te menge Hudiyanan te penduan dan. ²³ Tembù be migkahi ke menge lukes din te, “Iyan niyu en insai sikandin su egketau en ma sikandin.”

²⁴ Ne rutun ne mid-umew ran en maa te ebpelived ke neulian ne pisek ne migkahi ran te, “Na iyan nu rà kehiya ke benar su ini ka te etuvangan te Eleteala. Su netuenan dey te ini ne etew se nekeuli keykew ne belisalà ne etew.”

²⁵ “Kenà ku egketuenan embiya belisalà sikandin etawa kenà,” ke se neulian ne pisek, “ugaid ne iyan ku netuenan te pehaney ne nepisek a ne huntanai ne ebpekekita ad.”

²⁶ “Ne engkey ve se imped-ulaula rin keykew?” ke sikandan. “Ne mibmenumenu rin be se kegkeulii te mata nu?”

²⁷ “Migkahi ku en ura keniyu,” ke se neulian ne pisek, “ne warà kew ma mebpehimbenar. Ne meambe maa ke ibpesulit niyu pà kedì? Maa egkiyug kew rema ne eduma kandin?”

²⁸ Neepes dan ketà ne meraat se lalag dan kandin, ke sikandan te, “Ew, edumdumaan ke ves nikandin, ugaid ne sikami mulà ne edumdumaan key rut te ebpelambas te Lalag te Eleteala rengan ne si Moises. ²⁹ Netuenan dey nevenar te mibpekidlalag ke Eleteala ki

Moises, ugaid ne ini se etew ini ne warà dey metueni ke endei sikandin nekepuun."

³⁰ Migkahi ini se neulian te, "Asal mekegeyip! Warà niyu metueni ke endei sikandin ebpuun misan ruen gehem din ne nekeulì te kegkepisek ku. ³¹ Netuenan tew te kenà ebpmineg ke Eleteala rut te etew ne belisalà, ugaid ne iyan din ebpmirehen ke etew ne ed-adat kandin wey edtuman te kiyug din. ³² Su aney en te kinelimbaha te dunya ne warà pà nerineg tew ne etew ne ebpekeulì te etew ne nekeraan kandin se kegkepisek din. ³³ Embiya kenà suhù te Eleteala ini se etew," ke se neulian ne pisek, "ne warà igaga rin te ebpekevaal te iring kayi."

³⁴ Migkahi ke menge egkeunutan te, "In-anak ka te mekesesalà, ne meambe ke eppenunganunga ka ebpenurù kenami?" Arà dà ne impeawà dan en sikandin ne migkehiyan dan te kenà en ebpelusuren dut te baley ne ebpengedian te menge Hudiyanan te penduan dan.

Nepisek ded Dema ke Menge Etew ne Warà pà Mebperetiyaya ki Hisus

³⁵ Guna su nerineg ni Hisus ke imped-ulaula ran dut te etew ne neulian din, ne mibpemengà din. Guna su netuen din ne mid-insaan din te, "Maa, mibperetiyaya ke en be rut te Impeanak te Menusiyà?"

³⁶ Ne midtavak ke meama te, "Kehiya nu kedì ke entei sikandin, Mama, su apey a ebperetiyaya kandin."

³⁷ "Nekita nu en," ke si Hisus, "su sikandin en iya ini ke ebpekidlag keykew."

³⁸ "Embiya sikuna ves," ke se meama, "ebperetiyaya a keykew." Arà dà ne mibpengarap en ki Hisus.

³⁹ Migkahi si Hisus te, "Iyan ku impengkayi te ampow te dunya su edtimbangen ku ke menge etew su apey ke menge etew ne nerusireman te kegkepisek dan ne edtelimà kedi ne ebehayan ku te kerayahan. Ugaid ne ke kenà edtelimà kedi su engkungkun ne nekita ran ke kerayahan ne ebpelekapan ku ke mata ran."

⁴⁰ Ruen menge Peresiyo ne nekerineg dut te lalag ni Hisus ne migkahi ran en te, "Engkey se migkahi nu, menge pisek key rema?"

⁴¹ Ne midtavak si Hisus te, "Embiya nepisek kew iring dut te etew ne warà pà nevehayi te kerayahan, ne warà perem kegkeisuhat keniyu. Ugaid ne geina te migkahi kew te, 'Ebpekekita key en,' ne arà se kegkeisuhat keniyu te kewagib su kenà kew ma eduma."

10

Ke Sempità ni Hisus Mekeatag dut te Tumetuganur te Menge Bilibili

¹ Ne ruen insempità ni Hisus te, "Sebenarvenar ini se egkehiyen ku keniyu, embiya ruen etew ne edlusud te tudilan te menge bilibili ugaid ne kenà ebpevayà te humawan su ed-ambak, ne tekawen sikandin etawa tulisan. ² Ugaid ke etew ne edlusud te humawan, ne sikandin ke tumetuganur dut te bilibili. ³ Embiya edlusud sikandin ne ebpuwasan dut te ebantey ke humawan. Ne ebpekekilala ke bilibili te suwara rin ke ed-umawen din dut te ngaran dan su ibpelihawang dan. ⁴ Ne embiya ve nekelihawang dan en ne ed-una en ke tumetuganur, ne edtundug en ke menge bilibili su egkekilala ran ke kandin ne suwara. ⁵ Kenà dan edtundug te selakew ne etew, inemulà se ebpelahuy ran kandin su kenà den ma egkekilala ke kandin ne suwara." ⁶ Ini ke

insempità ni Hisus kandan, ugaid ne warà dan mesebuti ke meana rin.

In-upama si Hisus te sikandin ke Meupiya ne Tumetuganur te Menge Bilibili ne ke menge Bilibili se menge Etew ne Mibperetiyyaya Kandin

⁷ Ne migkahi maa si Hisus kandan te, “Sebenarvenar ini se egkehiyen ku kenyi: ne iyan a ke gumawan te tudilan ne ibpevayà dut te menge bilibili. ⁸ Langun ne mid-una kedì su eppenurù ne egkahi te midsuhù te Eleteala ne iring dan te menge tekawen wey tulisan. Ugaid ne ke menge bilibili ne timbang te menge etew ne warà dan mebpemineg kandan. ⁹ Siaken ke humawan, ne misan engkey se edlusud kayi te kedì ne igkepeliyu sikandin. Iring sikandin te bilibili ku ne medlusud wey medluwal se ebpmengà te kegkaan din su egkeventayan ku ma sikandin. ¹⁰ Ke tekawen ne iyan din kedlusud dut te tudilan su eppenakew, ed-imatey wey ederaat. Ugaid,” ke si Hisus, “ne iyan ku kinpengkayi su apey ku igkepeliyu ke menge etew ne ebpeketelimà dan te penaub te Eleteala igenat guntaani abpeg dut te umur ne warà edtamanan din.

¹¹ “Siak ke meupiya ne tumetuganur,” ke si Hisus, “su andam a ne ebpebpatay apey kenà mekeiri ini se menge bilibili ku. ¹² Ke etew ne edsukayan dà ne ebantey te bilibili ne kenà tidtu ne tumetuganur, ne warà kegkenuhun din kandan su kenà ma kandin ne bilibili. Ne ed-ewaan din su ebbelahuy ke ruen egkekita rin ne leew ne asu ne ebpekeuma. Ketà be ne warè en ebpekevantey kayi te bilibili, ne igketangag en te leew ne asu ini se bilibili ne ke rumu ne egurunsuwey en. ¹³ Iyan kebpelahuy rut te edsukayan dà ne ebantey su kenà tidtu ne tumetuganur, ne warà kegkenuhun din ketà te menge bilibili.

¹⁴⁻¹⁵ “Siaken,” ke si Hisus, “ke meupiya ne tumetuganur ne ke menge etew ne iring te menge bilibili ku. Netuenan ku ke Amey ku, ne netuenan a rin dema. Ne iring ded dema kayi te menge bilibili ku ne eduma kedì su egkekilala ku sikandin ne egkekilala a ran dema, ne andam a ne ebpebpatay te selidig kandan. ¹⁶ Ruen pà rumu ne menge bilibili ku,” ke si Hisus “ne warà pà kayi te lusud te tudilan. Ed-ewiten ku ve sikandin kayi te tudilan ini ne ebpmineg dan kedì, ne egkevaluy ran ne senge luyuran dà ne seveka rà dema se tumetuganur kandan su siaken dà.

¹⁷ “Igkelimù a te Amey ku ne Eleteala su andam a ne ebpebpatay kandan. Iyan ku kebpebpatay su apey ku metelimà ded ketà te kegkevanew ku. ¹⁸ Warà a tehela te misan entei en ne etew te ebpebpatay, ugaid ne kedì en ne kiyug. Su ruen gehem ku te edselidig te umur ku, ne ruen gehem ku te ed-awì maa ketà te kegkevanew ku. Su ini ke insuhù kedì te Amey ku ne Eleteala.”

¹⁹ Guna su nerineg dut te menge Hudiyanen ini se impenurù ni Hisus ne warà dan meseveka. ²⁰ Merakel kandan se migkahi te, “Midsuukan sikandin te vusew! Ebunehen! Meambe ke ebpmineg kew kandin?”

²¹ Ugaid ne ruen duma ne migkahi te, “Embiya ma midsuukan te vusew sikandin, ne kenà iring kayi se kebpenurù din! Ne ebmemenu ve se vusew te ebpekekità ke pisek?”

Warà Mebperetiyyaya ki Hisus ke Menge Hudiyanen

²² Ne neuma en ke hewii te kevurunan te menge Hudiyanen ne ed-ingararan te Edtepeneuy diyà te Nekebpu ne Valey te Eleteala diyà

te inged ne Hirusalim, ne arà ne hewii ne ed-uran-uran. ²³ Ne riyaw si Hisus ed-ip-ipanew te palàpalà te Nekebpuru ne Valey te Eleteala ne ed-ingeranan te Palàpalà ni Datù Salomon. ²⁴ Ne rutun ne miburun ke menge egkeunutan te Hudiyenan diyà te ki Hisus su mid-insaan dan te, “Keenu key pà nikuna edteremi ke entei ka? Embiya maa sikuna en ke Edetuen ne Impasad te Eleteala, ne ikahi nu en kenami.”

²⁵ Midtavak si Hisus te, “Nekahi ku en kenyu, ugaid ne warà kew ma mebperetiyyaya. Ini se mekegeyip ne ulaula ku ne insuhù kedi te Amey ku ne Eleteala ne iyan tuus te sikandin ke midsuhù kedi, ²⁶ ugaid ne warà kew ma mebperetiyyaya su warà kew ma mekelusud kayi te tudilan te bilibili ku. ²⁷ Su ke menge etew ku ne timbang te bilibili ku,” ke si Hisus “ne ebpemineg dan kedi su egkekilala ren ma ke suwara ku. Egkekilala ku sikandan ne eduma ran kedi. ²⁸ Ebehayan ku sikandan te umur ne warà edtamanan din wey kenà en ebpatay ke gimukud dan, ne warà senge etew rà ne ebpekeahew kandan dut te edtingkungan te palad ku,” ke si Hisus. ²⁹ “Su iyan mibehey kandan kedi ne ke Amey ku ne Eleteala ne warà repeng se gehem din, ne warà senge etew rà ne ebpekeahew kandan dut te edtingkungan te palad din. ³⁰ Su seveka key rà dut te Amey ku ne Eleteala.”

³¹ Guna su nerineg te menge Hudiyenan ke lalag ni Hisus ne mibpemurut dan en maa te menge batu su idrumbag dan kandin. ³² Ne migkahi si Hisus te, “Merakel se impekita ku kenyu ne meupiya ne ulaula ku ne insuhù kedi te Amey ku ne Eleteala. Ne endei ve rapit ne ulaula ku ke rait ne idrumbeha niyu kedi te batu?”

³³ “Kenà iyan dey idrumbag keykew te batu,” ke se menge Hudiyenan “ne ayan se meupiya ne ulaula nu, ugaid ne ayan se kedsumpalit nu te Eleteala. Su egkahi ka te Eleteala ka, ugaid ne etew ke rà ma!”

³⁴ Ne migkahi si Hisus kandan te, “Ruen impesurat diyà te kenyu ne penduan te migkahi ke Eleteala, ‘Ragid kew kedi ne Eleteala.’

³⁵ Netuenan tew,” ke si Hisus, “ke impesurat ne Lalag te Eleteala ne benar ne warà kegkesembii rin taman te taman su migkahi rin te imperagid dan te Eleteala ke menge keep-epuan tew ne mibehayan din dut te lalag din. ³⁶ Su siaken, ne mibpemili a te Amey ku ne Eleteala ne impecpengkayi a te ampew te dunya, ne meambe ke egkekahi niyu se edsumpeliten ku ke Eleteala embiya egkehiyen ku te Anak a te Eleteala? ³⁷ Iyan ku ebeelan ne arà se insuhù kedi te Amey ku ne Eleteala, ugaid ne embiya kenà ne kenà a niyu peretiyyaya. ³⁸ Ugaid ne embiya iyan ku ebeelan ne arà se insuhù din kedi, ne misan kenà kew ebperetiyyaya te menge lalag ku ne peretiyyaya kew kayi te menge baal ku ne mekegeyiip ne ebpuun te gehem din. Su kayi niyu egketueni te seveka key rà, siaken wey ke Amey ku, su kayi sikandin te kedi, ne riyan e rema te kandin.” ³⁹ Nerineg den dà ke lalag ni Hisus ne edsikmen dan en maa perem, ugaid ne nekelihawang ma sikandin.

⁴⁰ Ketà be ne mid-awà en si Hisus kayi te inged ne Hirusalim ne mid-apet te wayig ne Hurdan ne mibpendiyà te inged ne mipebunyaahan ni Juan dengan, ne ketà mid-uppà sikandin. ⁴¹ Merakel ne menge etew se mibpendiyà te kandin ne ebpleglelahey ran te, “Warà mekegeyip ne mid-ulaula rengan ni Juan, ugaid ne langun ne migkahi rin mekeatag te ini ne etew ne benar iya.” ⁴² Ne merakel ne etew se mibperetiyyaya kandin.

11

Ke Kinepatey ni Lasaru

¹ Duen meama ne edaru ne ed-ingaranan ki Lasaru ne riyà ed-ubpà te inged ne Bitanya. Duen deruwa ne etevey rin ne dutun ded dema ed-ubpà ne ed-ingaranan ki Maria wey si Marta. ²(Si Maria ini ke meritan ne mibùbù te periyemut diyà te paa ni Hisus ne mibpunas din te bulvul din. Ne meeman din arà se ederaru ne si Lasaru.) ³Mibpesuhuan kayi te deruwa ne etevey ni Lasaru si Hisus ne iyan dan intelaan se, “Mama, ebpekedaru ini se sepekat nu ne igkelimù nu neverar.”

⁴ Guna su nerineg ni Hisus ne migkahi te, “Ini se daru ni Lasaru ne kenà pà ini ke ibpatey rin, ugaid ne iyan din kebpekedaru su apey iyan egkereyù ne ke Eleteala wey siak dema ke Anak din ne egkereyù.”

⁵ Dekelà te hinawa ni Hisus ensi Marta ki Maria wey si Lasaru.

⁶ Ugaid ne misan iring ketà, ne nerineg din te edaru si Lasaru ne mid-ubpà pà lavew sikandin te nekederuwa ne hewii.

⁷ Nepupus pè be arà ne migkehiyan din ke edumdumaan din te, “Kuwa kew en su edlived kiyu maa diyà te lusud te inged ne Hudiya.”

⁸ “Meyterù,” ke se menge edumdumaan din, “warà pà utew meuhet se kedrumbaha ran perem keykew te batu. Ne meambe ke edlived ke en maa?”

⁹ Ne migkahi si Hisus te sempità din te, “Maa, kenà sepulù wey deruwa ne uras te senge keandew? Ne embiya ed-ipanew ki te meandew ne kenà ki ebpekesiud su ruen ma rayag ne ebpeketa yaw keyta. ¹⁰ Ugaid ne embiya ed-ipanew ki te merukilem ne ebpekesiud ki su merusirem en ma ne kenà ki en ebpekekita.”

¹¹ Iring ketà se nekahi ni Hisus te sempità din ne migkahi en maa te, “Nekelipereng en arà se sepekat tew ne si Lasaru, ugaid ne ependiyan a su apey ku mepukew sikandin.”

¹² Midtavak ke edumdumaan din te, “Embiya nekelipereng dà sikandin ne meupiya su egkeulian ded sikandin.” ¹³Iyan meana te migkahi ni Hisus ne minatey en si Lasaru, ugaid ne kunaan dan ke andang dà ne kedlipereng arà se egkehiyan din.

¹⁴ Arà dà ne impayag ni Hisus kandan te, “Minatey en si Lasaru, ¹⁵ugaid ne apey kew mekeperetiyaya ketà te ked-uyaha ku kandin, ne meupiya su warà a ketà te kinepatey rin. Kuwa kew embe su ependiyá kiyu te kandin.”

¹⁶ Dutun ne senge etew ne edumdumaan din ne ed-ingaranan ki Tomas (ne mid-ingaranan dan dema te Seping) se migkahi riyà te menge ruma rin te, “Eduma kiyu kandin su apey ki ebpekeunung kandin te ebpatay.”

Si Hisus ne Iyan Ebpmabanew Wey ke Ebpuunan te Umur ne Warà Edtemanan Din

¹⁷ Guna su nekeuma en si Hisus diyà te Bitanya ne nerineg din en te neked-epat en ne hewii se kineleveng ki Lasaru. ¹⁸ Ini se inged ne Bitanya ne uvey red te inged ne Hirusalim su menge tetelu buwa ne kilù se elet din. ¹⁹ Ne merakel ne Hudiyanen se riyà ebpuun te Hirusalim ne mibpendiyà te engki Marta wey ki Maria su edlenganen dan dut te kinepatey te meeman dan.

²⁰ Guna su nerineg ni Marta se ebpekeuma en si Hisus ne midsinuhung din en, ugaid ne si Maria ne riya ded te valey.

²¹ Ne migkahi si Marta diyà te ki Hisus te, “Mama, embiya kayi ke rà perem ne kenà ded ebpatey ke meeman ku.” ²² Ugaid ne netuenan ku te misan guntaani ke ruen ebuyuen nu te Eleteala ne ibehey rin keykew.”

²³ “Egkevanew red arà se meeman nu,” ke si Hisus.

²⁴ “Uya,” ke si Marta, “netuenan ku se egkevanew red sikandin keuremà dut te kebenawa te menge minatey ketà te mewri ne hewii.”

²⁵ Ne migkahi si Hisus te, “Iyan a imbe ke ebpembanhew ne iyan a imbe ebpuunan te umur ne warà edtamanan din. Ke etew ne ebperetiyaya kedì ne misan ebpatey sikandin ne biviyag ded ke gimukud din ne ed-ubpà diyà te Eleteala taman te taman.” ²⁶ Su ke etew ne ebperetiyaya kedi,” ke si Hisus, “ne ruen umur din ne warà edtemanan din wey kenà en ebpatey ke himukud din. Menu, Bayi, ebperetiyaya ke en be kayi?”

²⁷ Ne midtavak si Marta te, “Uya, mibperetiyaya a te sikuna ke Impasad te Eleteala ne Ebperetuen, ke Anak din ne impepengkayi rin te ampew te dunya.”

Midsinehew si Hisus Dut te kegkeyru Rin ki Maria wey ki Marta

²⁸ Guna su nekahi arà ni Marta ne mid-ulì en ne midnènaasan din si Maria te, “Kenyan en si Hisus ne in-insà ka rin.” ²⁹ Nerineg dà ni Maria ne mid-itindeg ne migangaan se edsinuhung ki Hisus. ³⁰ (Warà pà mekeuma si Hisus kayi te inged dan su diyà pà lavew sikandin te nesinehungan ni Marta.) ³¹ Guna su nekita dut te menge Hudiyansen ne edlangan ki Maria te kayi pà te valey te nekeitindeg su edlihawang ne midtundug dan su iyan dan kunaan ke ebpendiyà te leveng su riyà sikandin edsinehew.

³² Nekeuma rà si Maria riyà te ki Hisus ne mid-uvey rin en ne midlangkeb sikandin se edsinehew. Ke sikandin te, “Mama, embiya kayi ke rà perem ne kenà ded perem ebpatey ke meeman ku.”

³³ Guna su nekita ni Hisus se edsinehew si Maria, wey midsinehew dema ke menge Hudiyansen ne miduma kandin, ne mibmeraat ke nanam din te kegkeyru rin. Ne ed-eleg-ehen en sikandin se egkahite, ³⁴ “Endei niyu ileveng?”

Ne midtavak dan te, “Kayi ke en, Mama, su ebayaan tew.”

³⁵ Ketà ne nekesinehew en si Hisus. ³⁶ “Intengi niyu ma,” ke se menge Hudiyansen, “igkelimù nevenar ni Hisus si Lasaru.”

³⁷ Ugaid ne ruen migkahi te, “Maa, kenà ini ke etew ne nekeulì te pisek ne meama? Embiya nekeulì sikandin te pisek, ne meambe ke warà din bawii si Lasaru su apey warà mebpatey?”

Ke Kinevanew ni Hisus ki Lasaru

³⁸ Ne mibmeraat en maa ke nanam ni Hisus te kegkeyru rin ketà te nekeuvvey en sikandin dut te leveng. Ini se leveng ne riyà te surung, ne ruen dekelà ne batu ne in-alang dut te humawan. ³⁹ “Iawà niyu ayan se batu!” ke si Hisus.

Ne migkahi si Marta ke etevev dut te minatey te, “Mama, memawù en su neked-epat en ne andew ini se kineleveng kandin.”

⁴⁰ “Migkahi ku en keykew te embiya ebperetiyaya ka ne egkekita nu arà se ebpekereyù te Eleteala,” ke si Hisus.

41 Ketà ne midlilid dan en ke batu ne in-alang ne midlingakà en si Hisus diyà te langit se ebpengeningen te, “Dekelà se kegkereyù ku keykew, Amey ku, su ebpeminehen nu ini se ebuyuen ku. 42 Netuenan ku te lelayun ka ebpemineg kedì, ugaid ne iyan ku kebpengeningen guntaani su apey ebpekeperetiyaya ke menge etew ne ini te uvey ku te sikuna ke midsuhù kedì.”

43 Nekeipus sikandin se egkahi ne mid-umew rin te merahing ne suwara te, “E, Lasaru, lihawang ke en.” 44 Arà dà ne migemew en ke minatey su nevanew en. Ne nevukusan te saput ke lawa rin abpeg ke velad din wey ke paa rin, ne misan ke vuked din ne nevukusan dema te saput. “Ewai niyu sikandin te bukus,” ke si Hisus, “su apey ebpekewaleng.”

Mibentaan Ke Menge Mepurù te Terebpelengesa wey Ke Menge Meyerù te Penduan Te Kedsigkem ki Hisus

(Mateo 26:1-5; Marcos 14:1-2; Lucas 22:1-2)

45 Merakel dut te menge Hudiyanan ne miduma ki Maria se nekekita rut te mid-ulaula ni Hisus ne mibperetiyaya kandin. 46 Ugaid ne ruen duma kandan ne mibpendiyà te menge Peresiyu su ebpenudtl dut te mid-ulaula ni Hisus. 47 Arà dà ne mibpendiyà ke menge mepurù te terebpelengesa wey ke menge Peresiyu su eburun diyà te menge pekilukesen te Hudiyanan.

Guna su nevurun dan en ne migkahi ran te, “Engkey se ed-ul-ulaan tew? Su merakel se mekegeyip ne ed-ul-ulaan ni Hisus! 48 Embiya ebpedterayen tew sikandin ne langun ne menge etew ne ebperetiyaya en te sikandin ke Impasad te Eleteala ne Ebperetuen. Ne embiya iring en ketà, ne egkerineg dut te egkeunutan tew ne riyà te Ruma ne ebpeveyaan ki te menge sundaru ran ne edereetan dan ini se Nekebpuru ne Valey te Eleteala wey ini se pehinged tew te menge Hudiyanan.”

49 Ketà ne migkahi ini se senge etew ne mepurù te terebpelengesa ne ed-ingaranan ki Keyipas, su ketà ne hewii ne sikandin ke pineke-mepurù te langun ne menge terebpelengesa, ke sikandin te, “Warà menge itungan niyu! 50 Warà niyu ves mesebuti te iyan dà tumù ne senge etew rà se ebpatey tumin dè be ke langun ne menge Hudiyanan su apey kenà mereeti ini se pehinged tew te menge Hudiyanan.”

51 (Migkahi rin ini te kenà kandin dà ne itungan, ugaid ne geina te sikandin ke pinekemepurù dut te langun ne menge terebpelengesa te arà ne hewii ne nekekahi sikandin neraan te si Hisus se ebpatey ne idselidig te langun ne menge Hudiyanan. 52 Ne kenà ke menge Hudiyanan dà se egkeselidigan te kebpatey rin, ugaid ne apey langun ne nevaluy ne anak te Eleteala ne egkevurun te egkeseveka misan endei ne menge inged.) 53 Ne igenat dè be ketà ne andew ne mibpemengà en te menge egkeunutan te Hudiyanan te ralan te kedimatey ran ki Hisus.

54 Tembù be warà en mebpekitakita si Hisus dut te merakel ne etew ketà te inged ne Hudiya, ugaid ne mibpendiyà sikandin te inged ne ed-ingaranan te Ipraim uvey te tanà ne kenà egkeubpaan te etew. Ne ketà sikandin med-ubpà wey ke edumduamaan din.

55 Ne ebpelundani en ke kevurunan te menge Hudiyanan ne ed-ingaranan te Pista te Kedsehari te Suluhuen. Ne merakel en ne menge

etew ne ebpuun te ebalabala ne menge inged se ebpenekereg dan diyà te Hirusalim su edtumanen dan ke betasan te menge Hudiyanen mekeatag te kebpenlulu su apey ran ebpekeamung dut te kevurunan.⁵⁶ Mibpemengà dan si Hisus ne gewii ran te egkevurun diyà te Nekebpuru ne Valey te Eleteala ne mibpein-inseey ran te, “Engkey se antap niyu, ebpengkayi red buwa si Hisus etawa kenà?”⁵⁷ Ruen insuhù te menge mepurù te terebpelengesa wey ke menge Peresiyu te piya engkey se egketau ke endei si Hisus ne igkahi kandan su apey ran igkepesigkem.

12

Mibperiyemutan en Neraan ke Lawa ni Hisus te Kedleveng Kandin (Mateo 26:6-13; Marcos 14:3-9)

¹ Enem pà ne hewii ne egkeuma ke kevurunan ne ed-ingaranan te Pista te Kedsehari te Suluhsuen ne mibpendiyà si Hisus te inged ne Bitanya, ke inged ni Lasaru ke mibanew rin. ² Ketà te valey ni Lasaru ne mibair dan te kevurunan su igalewhalew ran ki Hisus. Si Marta se ebpenedad ne elin ketà si Lasaru wey si Hisus se ebpengaan. ³ Ne migkuwa ni Maria ini se dekelà ne pelenaan te periyemut ne mepurù nevenar su mibeelan dut te ed-ingaranan te Nardu. Ne mid-uvey rin si Hisus ne imbùbù din diyà te paa rin, ne mibpunasan din te bulvul din. Ne nekeeneb kayi te lusud te baley te keemut din.

⁴ Ne seveka rut te edumdumaan ni Hisus, si Hudas Iskeriyuti ke ed-ulug kandin, se midlag ki Hisus te, ⁵ “Babeba!” ke sikandin. “Nerèdeetan ini su pira buwa nehatus se elehà din? Iyan tumù ne indehang ini se periyemut ne ke elehà din ne igkepemehey riyà te menge etew ne ayuayu.” ⁶ Kenà iyan din kinekahi te iring ketà ne ke kegkeyru rin dut te menge ayuayu, ugaid ne tekawen sikandin. Su sikandin ke ebpetugenuren dut te edtehuan te kureta en ni Hisus, ugaid ne ebpengpenguian din mulà.

⁷ Ugaid ne migkahi si Hisus te, “Pedteraya niyu sikandin! Ne ibpetahù ded kandin ke samà ne periyemut su apey ruen idsapu rin te lawa ku ketà te idleveng ad. ⁸ Su ke menge ayuayu ne lelayun kew red ebpemekeduma ne egketevangan niyu sikandan, ugaid ne siak ne kenà ad meuhet kayi te keniyu.”

⁹ Nerineg dut te merakel ne menge Hudiyanen te riyà si Hisus te inged ne Bitanya ne mibpemendià dan. Ne kenà iyan dan dà kinependiyà ne mekeatag ki Hisus, ugaid ne iyan dan dema ed-intengan ne si Lasaru ke mibanew rin. ¹⁰ Ne iyan netahù te itungan te menge unuten te terebpelengesa ne ebpeimetayan dema si Lasaru. ¹¹ Su atag te kinekevanew kandin ne merakel ne Hudiyanen se midsuwey en dut te ibpenurù dan su kayi ran en mibperetiyya ki Hisus.

Ke Kinelusud ni Hisus Diyà te Hirusalim ne Mid-untud te Nati te Kudà su tuus ini te Datù Sikandin Dut te Menge Hudiyanen

(Mateo 21:1-19; Marcos 11:1-11; Lucas 19:28-40)

¹² Guna su nepawè en ne nerineg dut te merakel ne menge etew ne edtelavuk te kevurunan te Hirusalim se ebpekeuma kun si Hisus.

¹³ Ne mibpenguwa ran te dawun te menge niyug ne midsinuhung dan si Hisus se egkerag te,

“Edeyuen tew ke Eleteala!

Ne menu ma ke ebpeneuven te Eleteala ini se ebpekeuma,
su midsuhù din te ralan te ketengdanan din.

Menu ebpeneuven te Eleteala

ini se nepemili ne Ebperetuen

te menge kevuwaran ni Israyil!”

¹⁴ Ne migkuwa ni Hisus se nati ne kudà ne mid-untud sikandin iring
dut te impesurat ne Lalag te Eleteala ne egkahi te,

¹⁵ “Sikiyu ne mehinged te Hirusalim,

kenà kew meandek!

Su ebpekeuma en ini ke ratù niyu

ne ed-untud te nati te kudà.”

¹⁶ Ketà ne hewii ne warà mesebuti ini rut te edumdumaan din. Ugaid
ne guna su nevanew en si Hisus wey nevantun en diyà te langit, ne
netenuran dan arà se kedlusud ni Hisus diyà te Hirusalim ne netuman
ke impesurat ne Lalag te Eleteala rengan.

¹⁷ Ini se menge etew ne nekekita ki Hisus te ked-umawa rin
wey kebenawa rin ki Lasaru ne mibpemenudtul. ¹⁸ Tembù be
mibpenelavuk ke merakel ne etew ki Hisus su nerineg dan ini se ulaula
rin ne mekegeyip. ¹⁹ Guna su nekita rut te menge Peresiyu ke denda
ne etew ne edtelavuk ki Hisus ne mibpeglelahey ran te, “Tengteng
kew be, warà en bes egkegaga tew! Su ke denda ne etew ne eduma en
kandin!”

Ke Migkahi ni Hisus Mekeatag te Kemetayen Din

²⁰ Ne ruen menge Gerisihanun ne mibpekiduma te menge Hudiyan
nen te ebpendiyà te Hirusalim su edtelavuk dan dema te pista ne
ebpengarap dan te Eleteala. ²¹ Mibpendiyà dan te ki Felipe, senge etew
ne ruma ni Hisus ne riyà ebpuun te inged ne Bitsaida lusud te inged ne
Geliliya, ke sikandan te, “Egkesuat key ne ebpekibalak ki Hisus.” ²² Ne
intarem ini ni Felipe riyà te ki Andres. Ne rutun ne mibperumeey ran
en se eppendiyà te ki Hisus ne mibpenudtl dan kandin.

²³ Migkahi si Hisus te, “Neuma en ke hewii te ebpekeuli ke Impeanak
te Menusià diyà te Amey rin su ebeheyan rut te kandin ne bentuhan.

²⁴ Sebenarvenar ini se egkehiyen ku kenyi: embiya kenà ibpemula ini
se senge lahas ne venì diyà te tanà ne kenà egkeumanan su senge lahas
dè ma. Ugaid ne embiya ibpemula en, ne edtuvù ne ebehas te merakel.
Iring ded dema ketà te siak,” ke si Hisus, “su embiya igkeleveng ad ne
merakel se egkevehayan te umur ne warà edtemanan din. ²⁵ Embiya
ruen etew ne iyan din ebpekinuhunan se umur din ne kayi te ampew
te dunya, ne nasì ne egkewarà kandin. Ugaid ne ke etew ne edtuman
te kiyug ku su warà kebpekinuhun din te umur din kayi te ampew te
dunya, ne ebpeketelimà te umur ne warà edtemanan din. ²⁶ Su ke etew
ne egkiyug ne eduma te penurù ku,” ke si Hisus, “ne iyan din ibpeuna
te hinawa rin te ked-iniyug din te kandin ne kiyug su apey mekeruma
kedì, ne piya endei a ne ketà dema ke edsugsuhuen ku. Ne ke etew ne
edtuman te penurù ku, ne egkereyù te Amey ku ne Eleteala.”

²⁷ Ne migkahi pà maa si Hisus dut te edumdumaan din te, “Egkeve-
hatan neveran se hinawa ku guntaani. Engkey vuwa se egkehiyen ku
te kebpengeningi ku ki Amà? Maa, iyan ku ebuyuen kandin te kenà
a meked-ulaula te ini se merasey ne ebpekeuma? Kenà! Su iyan ku

impengkayi te ampew te dunya ne ed-etuvangen ku iya ini se merasey.”
 28 Ne ketà ne migkahi en sikandin dut te amey rin te, “Amà, ipekita nu ke bentuhan nu kayi te menge etew!”

Ne ruen en suwara ne riyà ebpuun te langit ne migkahi te, “Impekita ku en ke kegkevantug ku ketà te mid-ulaula nu, ne ibpekita ku pà maa ini se kegkevantug ku kayi te ed-ul-ulaaan nu.”

29 Ne ketà ne merakel se menge etew ne nekerineg te suwara ne ruen migkahi te, “Miduruhung!” Ne ruen ruma ne migkahi te, “Suluhuen te Eleteala ne mibpekidlalag ki Hisus.”

30 Ne migkahi si Hisus te, “Kenà iyan kinekahi te Eleteala ne ruen ibpayag din kedì, ugaid ne apey niyu egketueni te ebpeaminehen a rin.
 31 Ini en ke hewii te kegkukum te Eleteala te langun ne menusiyà kayi te ampew te dunya ne kunterà din. Egketalew en si Setanas ke datù te pekaid ne midatù kayi te ampew te dunya. 32 Ne siak, embiya idtunggul ad diyà te pinebelavag ne kayu ne ebpuyuken ku ke langun ne menge etew te ebpengkayi te kedì.” 33 (Ini se migkahi ni Hisus ne impayag din ke ralan te ked-imetayi kandin.)

34 Migkahi ke merakel ne etew te, “Iyan tew nesebutan kayi te impesurat ne Lalag te Eleteala ne kenà ebpatey ke Impasad te Eleteala ne Ebperetuen din. Ne meambe maa ke migkahi ka te sikuna ke Impeanak te Menusiyà ne idtunggul ka riyà te pinebelavag ne kayu? Embyia iring ketà, ne engkey ma ini se Impeanak te Menusiyà?”

35 Ne midtavak ni Hisus te sempità ne, “Ke sulù ne ebpekerayag te itungan niyu ne kayi en te keniyu, ugaid ne kenà en meuhet ne ed-awà. Ne taman te kayi pà te keniyu ke sulù ne rumai niyu su apey kew kenà meuma te merusirem, su ke etew ne ed-ipanew diyà te merusirem ne kenà ebpeketuntul te ibayà din. 36 Taman te kayi pà te keniyu ke sulù, ne serihi niyu su apey kew ebpekehémew te kerayah.”

Ke Menge Etew ne Kenà Ebperetiyaya

Neipus ni Hisus se kinelalag din ketà ne mid-awà en ne mid-eles kandan. 37 Misan merakel en ne mekegeyip ne mid-ulaula rin ne nekita ran ne warà dan mebperetiyaya kandin,
 38 su apey egketuman en ke migkahi ni Isayas ke ebpelambas te lalag te Eleteala rengan ne egkahi te,

“Eleteala, warà utew mibperetiyaya
 te impesabut dey!

Warà utew midsabut rut te gehem
 ne impekita nu kandan!”

39 Ne ruen dema ingkahi ni Isayas mekeatag te kenà dan kebpekeperetiyaya, ke sikandin te,

40 “Mibpelekapan dan te Eleteala
 su apey kenà dan ebpekekita.

Ne mibpekereson ke itungan dan
 su apey ran kenà ebpekesabut.

Ne iyan pè be se ked-uvye ran kedì te ebperetiyaya
 su apey ku igkepeliyu sikandan!”

41 Migkahi ini ni Isayas su netuanan din dengan ke rekela ne gehem ni Hisus ke Ibpeanak te Menusiyà ne ini se edlalag din mekeatag kandin.

42 Misan iring ketà se lalag ni Isayas ne ruen ded lavew merakel ne menge egkeunutan te Hudiyanan ne mibperetiyaya ki Hisus. Ugaid

ne warà dan mebpepayag su neandek dan dut te menge Peresiyu ke ibpeawà dan na kenà dan ebpekelusud dut te baley ne ebpengedian te menge Hudiyenan te penduan dan.⁴³ Su iyan dan pinedlabi ke kedeyù kandan te menge etew, tumin dè be ke kedeyù te Eleteala kandan.

⁴⁴ Ne impekerahing ni Hisus se kegkahi rin te, “Entei se mibperetiyyaya kedi, ne kenà siaken dà se ebperetiyyayaen din su elin ded dema ke midsuhù kedi.⁴⁵ Ne entei se nekekita kediey ne nekekita red dema sikandin dut te Amey ku ne Eleteala ne midsuhù kedi.⁴⁶ Mibpengkayi a ne kerayag kayi te ampew te dunya su apey ku egkereyahi ke itungan dut te menge etew su apey ke langun ne ebperetiyyaya kedi ne kenè en egkerusireman ke itungan dan.

⁴⁷ “Piya entei ne nekerineg te menge lalag ku ugaid ne kenà din edtumanen,” ke si Hisus, “ne kenà siaken se ed-isuhat kandin te kerusaan. Su kenà iyan ku impengkayi ne ed-isuhat te kerusaan kandan, ugaid ne apey ran ebpekepeliyu dut te kerusaan dan.⁴⁸ Ugaid ne ruen ed-isuhat te kerusaan dut te menge etew ne mid-engkenà kedi wey warà medtelimà te menge lalag ku. Su ini se menge lalag ku ne warà dan telimaa ne ini red se ed-isuhat te kerusaan kandin ketà te mewri ne hewii.⁴⁹ Uya, su ini se menge lalag ku ne kenà kayi ebpuun te kediey rà,” ke si Hisus, “ugaid ne insuhù kedi te ibpelalag dut te Amey ku ne Eleteala ne iyan midsuhù kedi.⁵⁰ Su netuenan ku te ini se insuhù din kedi te ibpelalag ne ini en iya ke ebpekevehehey te umur ne warà edtemanan din. Ketà ne iyan ku rà egkehiyen ne engkey se ibpelalag din kedi.”

13

Midlìluan ni Hisus Ke Menge Paa dut te Menge Edumdumaan Din

¹ Senge hewii pà ne egketuman ke kevurunan te menge Hudiyenan ne ed-ingaranan te Pista te Kedsehari te Suluhuen. Netuenan ni Hisus se neuma en ke hewii ne ked-awà din kayi te ampew te dunya su ed-ulì en diyà te Amey rin ne Eleteala. Dekdekelà ke limù din dut te langun ne menge etew kayi te ampew te dunya ne midtelimà kandin, ugaid ne guntaani ne impekita rin kandan ke rimahas te limù din kandan.

² Guna su meapun en ne edlavung pà ensi Hisus wey ke edumdumaan din, ne neketahù en si Setanas ke datù te pekaid diyà te itungan ni Hudas ke anak ni Simon Iskeriyuti te ed-ulug ki Hisus.

³ Ugaid ne netuenan ni Hisus te imbehey en kandin dut te Amey rin ke kebayàbaya te langun taman. Netuenan din dema se riya ebpuun sikandin te Eleteala, ne riya ded lavew ed-ulì.⁴ Ne mid-itindeg si Hisus ketà te egkeenan dan ne midluung din ke kumbalà din ne impipinding din ke tuwalya.⁵ Neipus din arà ne migkuwa rin se pelenggana ne mibusbusan din te wayig, ne mibpenlìluan din ke menge paa te edumdumaan din ne mibpemunasan din dut te tuwalya rin.

⁶ Mid-uvvey sikandin ki Simon ne mid-ingaranan ki Pedro, ne migkahi en si Pedro te, “Sikuna se Kerenan dey, na engkey sikuna ves maa se edlìlu te paa ku?”

⁷ Ne midtavak si Hisus te, “Ini se ed-ul-ulaan ku guntaani ne kenà nu pà iya egkesebutan, ugaid ne iseg-iseg ne egkesebutan nu red.”

⁸ Ke si Pedro te, “Kenà egkepakey ne iyan ka ebpenlìlu te paa ku!”

Ne migkahi si Hisus te, "Embiya kenà ku edlùluan ke paa nu, ne kenà ke en ruma dut te edumdumaan ku."

⁹ Ne nekekahi si Pedro te, "Embiya ves iring ketà, ne kenà iyan nu rà lùlui ini se paa ku su misan ini se velad ku wey ulu ku rema."

¹⁰ Migkahi si Hisus te, "Ke etew ne nekepemihù en ne metilak en, ne iyan dà edlùluan ke menge paa rin su ruen lipupuk din. Iring ded dema te sikiyu su langun niyu ne netilak en ke itungan niyu liyu ketà te senge etew keniyu." ¹¹ (Su netuenan din en ke engkey arà se ed-ulug kandin tembù be migkahi sikandin te, "Langun niyu ne metilak en liyu ketà te senge etew.")

¹² Guna su nekeipus si Hisus te edlùlù te paa ran ne inseluub din en maa ke kumbalà din ne midlived sikandin ketà te ebpinuuwan din te egkaan. Ne mid-insaan din ke edumdumaan din te, "Maa, nesebutan niyu ve ini se mid-ulaula ku keniyu?" ¹³ Iyan niyu id-umew kedì ne ke Meyerù niyu wey ke Kerenan niyu, ne benar ma iya arà. ¹⁴ Su embiya siaken ke Kerenan niyu wey ke Meyerù niyu se mibpenlùlù te paa niyu ne dait ne pelùlùluey kew rema te menge paa niyu. ¹⁵ Su ini se impekita ku keniyu," ke si Hisus, "ne ledawan keniyu su apey niyu egkeiringi riyà dut te menge ruma niyu.

¹⁶ "Sebenarvenar ini se egkehiyen ku, warà uripen ne iyan en mepurù dut te eppengunguripen kandin. Iring ded dema dut te edsugsuhuen, kenà iyan mepurù sikandin dut te edsuhùsuhù kandin. ¹⁷ Embiya egkesebutan niyu en ini se penurù ku keniyu, ne igkehalew niyu nevenar ke egkerumaan niyu!"

¹⁸ "Kenà langun niyu se egkesuhat kayi te edlelehan ku," ke si Hisus, "su netuenan ku ke engkey se netahù te hinawa te uman seveka keniyu ne mibpemili ku, ne netuenan ku ke engkey se ebpolid kedì te menge kunterà ku. Ugaid ne ruen impesurat ne Lalag te Eleteala rengan ne egketuman en ne egkahi te, Ke etew ne mibpekidtuhen kedì ne iyan ded nevaluy ne kunterà ku.

¹⁹ "Tembù be ebpeketuenan ku ini keniyu te warà pà med-ulaula su apey ketà te hewii te kegkeuma rin ne ebpekeperetiyyaya kew te siaken iya ke intarem ku keniyu ne impasad te Eleteala. ²⁰ Sebenarvenar ini se egkehiyen ku," ke si Hisus, "misan entei ne etew se edtelimà dut te edsuhuen ku, ne siaken se midtelimà din dema. Ne ke etew ne edtelimà kediey ne midtelimà din dema ke Amey ku ne midsuhù kediey."

*Migkahi ki Hisus Neraan te Ruen Ed-ulug Kandin te Ked-imetayi
(Mateo 26:20-25; Marcos 14:17-21; Lucas 22:21-23)*

²¹ Nekeipus si Hisus se eddalag ne mibmerungkug nevenar sikandin ne impayag din dut te menge edumdumaan din te, "Sebenarvenar ini se egkehiyen ku keniyu te ruen senge etew kayi te keniyu ne ed-ulug kediey su apey a meimetayi."

²² Nerineg dut te menge edumdumaan din ne nekedsirà dan su warà dan metueni ke engkey ini se ibpesabut din. ²³ Ne ruen durug ni Hisus te ebpinuu ne seveka rut te edumdumaan din ne igkelimù din nevenar. ²⁴ Arà be ke mid-uyewan ni Simun Pedro te, "Insai nu si Hisus ke entei ini se egkehiyen din."

²⁵ Ne midsandig sikandin ki Hisus ne mid-insaan din en te, "Entei ma se ed-ulug keykew, Kerenan?"

²⁶ Midtavak si Hisus te, “Ideluwit ku ini se pan kayi te savew ne endei ve ketà se ebehayen ku ne arà imbe sikandin.” Arà dà ne indeluwit din en ke pan dut te savew ne imbehey rin en ki Hudas ke anak ni Simon Iskeriyuti. ²⁷ Guna su migkuwa ni Hudas ke pan, ne mid-awuk en kandin si Setanas ke datù te pekaid.

Ne migkehiyan en ni Hisus sikandin te, “Ini se ed-ul-ulaan nu ne gègeeni nu en!” ²⁸ Langun dut te edumdumaan ni Hisus ne warà dan mesebuti ke migkahi rin. ²⁹ Ne geina te si Hudas ke ebpetugenuren rut te edtehuan te kureta ran ne ruen edumdumaan din ne nekepegitung te midsuhù ni Hisus sikandin te ebpepemasa te igastu ran te pista etawa ebpevehayen ni Hisus diyà te menge ayuayu. ³⁰ Migkaan ni Hudas ke pan ne midlihawang en, ne merukilem en ketà.

Ke Behu ne Suhù ni Hisus te Kebpelimlimuey

³¹ Guna su migenat en si Hudas ne migkahi en si Hisus dut te edumdumaan din te, “Mehaan en egkekita ke memenu kerekelà ke gehem dut te Impeanak te Menusiyà. Ne kayi ebpuun te kedtuman din te kiyug te Amey rin ne egkekita red dema ke kerekelà te gehem te Amey rin ne Eleteala. ³² Ne embiya egkekita ke kerekelà ne gehem te Eleteala kayi te kedtuman te Anak din te kiyug din, ne ibpekita rema te Amey rin ke kerekelà te gehem ku, ne ini ne mehaan en egked-ulaula.

³³ “Sikiyu se edumdumaan ku,” ke si Hisus, “ne iring te menge anak ku, ne kenè en meuhet ne warà ad kayi te keniyu. Keta ne ebpmengà kew kedi, ne ini se egkehiyen ku keniyu guntaani ne iring dut te intarem ku rut te menge Hudiyanan te, ‘Kenà kew ebpekependiyà te ebpesineruhan ku.’”

³⁴ “Na, ruen behu ne suhù ne ibpetuman ku keniyu te iyan iya se pelimlimuey kew. Iring dut te kegkelimù ku keniyu ne arà se iringi niyu te kebpelimlimuey niyu. ³⁵ Embiya ebpelimlimuey kew,” ke si Hisus, “ne egkekita te langun ne menge etew te sikiyu ne menge edumdumaan ku.”

Migkahi si Hisus Neraan te Ebparew si Pedro te Teleduma Ran (Mateo 26:31-35; Marcos 14:27-31; Lucas 22:31-34)

³⁶ Mid-insà si Simon Pedro ki Hisus te, “Ebpendei ke ma?”

Midtavak si Hisus te, “Kenà ke pà ebpekeruma diyà te ebpesineruhan ku, ugaid ne egketaman ne ebpeketelukun ke red.”

³⁷ “Kerenan,” ke si Simon Pedro, “meambe ke kenà a ebpekeruma keykew guntaani? Kenà ku sikel ed-ewaan su ebpekid-unung a kenikew te ebpatey.”

³⁸ Migkahi si Hisus te, “Maa, ebpekid-unung ka kedì te ebpatey? Sebenarvenar ini se egkehiyen ku keykew te kenà pà ed-ukarà ke manuk, ne ketetelu nu en ibparew te kenà a nu egkekilala.”

14

Si Hisus se Ralan te Ebpendiyà te Amey Rin

¹ Ne migkahi pà maa si Hisus dut te edumdumaan din te, “Kenà kew egkeuru. Sarig kew te Eleteala wey sarig kew red dema kediey.

² Merakel se egkeubpaan diyà te baley te Amey ku, ne ebpendiyan a su ebpenehana a te egkeubpaan niyu. Su kenà ku egkehiyen ini keniyu embiya kenà benar. ³ Ne embiya ebpekependiyan ad,” ke si Hisus,

“ne egkepenehenaan ku en sikiyu te ubpaan niyu, ne edlived a kayi su ebpeneneheewiten ku sikiyu su apey misan endei a ne ketà kew red dema.⁴ Netuenan niyu en ke ibayà diyà te ebpesineruwani ku.”

⁵ Migkahi si Tomas te, “Kerenan, warà dey metueni ke endei ka ebpesinaru! Ne memenu ve se kegketueni rey te ralan ketà?”

⁶ Midtavak si Hisus te, “Siaken ke ralan te Eleteala, siaken ke ebpuunan te benar, ne siaken ded ke ebpuunan te umur ne warà edtemenan din. Warà etew ne ebpekependiyà te Amey ku embiya kenà kayi ebpevayà te kediey.⁷ Geina te netuenan a niyu en,” ke si Hisus “ne egketuenan niyu en rema ke Amey ku. Ne egenat guntaani ne egketuenan niyu en sikandin su nekita niyu en.”

⁸ Migkahi si Felipe te, “Kerenan, ipekita nu kenami ke Amey nu ne Eleteala, ne nesesangan en kenami.”

⁹ Ne migkahi si Hisus te, “Neuhet en se kebpekiduma ku keniyu ne maa Felipe, warà nu pè bes metueni ke entei a? Su piya entei ne nekekita kediey ne nekita rin en dema ke Amey ku. Ne meambe ke migkahi nu te, ‘Ipekita nu kenami ke Amey nu?’¹⁰ Meambe Felipe, warà ke pè bes mebperetiyyaya te ini te kedì ke Amey ku, ne siaken ne riyan a te kandin? Ini se menge lalag ku keniyu ne kenà kayi rà ebpuun te kedì ne itungan su ke Amey ku ne ini med-ubpà te kedì ne kandin ne vaal ini.¹¹ Peretiyyaya niyu nevenar ini se egkehiyen ku te riyan a te Amey ku, ne ini sikandin te kediey. Ne embiya merehen kew ne ebperetiyyaya te egkehiyen ku, ne iyan niyu peretiyyaya ke menge tuus ne impekita ku keniyu.¹² Sebenarvenar ini se egkehiyen ku,” ke si Hisus, “misan entei en ne edsarig kediey ne ebpekevaal iring dut te mibeealan ku. Uya, muna pà se egkeveelan din su geina te ed-ulì ad diyà te Amey ku.¹³ Ne misan engkey se ebuyuen niyu diyà te Eleteala kayi sabap dut te kedsarig niyu kediey ne ibehey ku keniyu su apey egkekita ke gehem te Amey ku ebpapevayà dut te ulaula ku ne Anak din.¹⁴ Su misan engkey se ebuyuen niyu sabap dut te kedsarig niyu kediey, ne ibehey ku keniyu.”

Impasad ni Hisus te Ibpepengkayi Rin Ke Kedesenan ne Ebpetuntul te Menusiyà

¹⁵ “Embiya egkelimù kew kediey,” ke si Hisus, “ne edtumanen niyu ini se menge suhù ku keniyu.¹⁶ Ne ebuyù a riyawà te Amey ku su apey rin igkevehey keniyu ke Edtavang keniyu ne ebpekesambì kedi, ne kenà edsuwey keniyu taman te taman.¹⁷ Sikandin ini ke Kedesenan ne Ebpetuntul te Menusiyà ke ebpesabut keniyu te benar mekeatag te Eleteala,” ke si Hisus. “Kenà ini egketelimà te menge etew kayi te ampew te dunya ne warà medtelimà kedi su kenà dan egkekilala sikandin ne kenà dan ebpekesabut ke entei sikandin. Ügaid ne nesebutan niyu en ke entei sikandin su ebpekiduma sikandin keniyu wey diyà mid-ubpà sikandin te keniyu.

¹⁸ “Ne kenà ku sikiyu ed-ewaan,” ke si Hisus, “iring te menge ilu su edliveran ku red sikiyu.¹⁹ Kenà en utew meuhet ne kenà ad egkekita rut te menge etew kayi te ampew te dunya ne warà medtelimà kedi, ugaid ne egkekita e red nikiyu su siaken ne egkeuyag a, ne egkeuyag kew red dema.²⁰ Ketà te hewii te egkevanew a ne ketà niyu egketueni te siak wey ke Amey ku ne egkeseveka key rà, ne egkesebutan niyu rema te ini kew te kedi ne riyan a dema te keniyu.²¹ Misan entei ne

etew se edtelimà te menge suhù ku ne edtumanen din,” ke si Hisus, “ne sikandin ke egkelimù kediey. Ne igkelimù dema dut te Amey ku arà se etew ne egkelimù kediey. Ne igkelimù ku rema sikandin, ne ibpayag ku kandin te siaken ke ruma rin.”

²² Migkahi en si Hudas (kenà si Hudas ne anak ni Simon Iskeriyuti) te, “Kerenan, ne meambe ke kayi ke rà ebpepayag te kenami ne kenà ka diyà ebpepayag dut te menge etew ne warà medtelimà keykew?”

²³ Midtavak si Hisus te, “Uya, su kenà dan egkelimù kediey su ke etew ne egkelimù kediey ne iyan din edtumanen ke menge suhù ku. Ne igkelimù sikandin dut te Amey ku, ne sikami ki Amà ne riyà key te kandin su ed-ubpà. ²⁴ Ugaid ne ke etew ne kenà egkelimù kediey, ne kenà din dema edtumanen ke menge suhù ku. Ini se lalag ku ne imperineg ku keniyu ne kenà kayi rà ebpuun te itungan ku, ugaid ne riyà ebpuun te Amey ku ke midsuhù kediey.

²⁵ “Nekahi ku en ini keniyu te ini e pà te keniyu,” ke si Hisus.

²⁶ “Ugaid ne misan ed-ewaan ku en sikiyu ne ruen en edsuhuen te Amey ku ne ebpekesambi kediey ne edtavang keniyu. Ini se edtavang keniyu ne ke Kedesenan ne Ebpetuntul te Menusiyà su sikandin se ebpenurù keniyu te langun taman, ne ebpetenuran din dema keniyu ke langun ne migkahi ku. ²⁷ Uya, misan ed-ewaan ku en sikiyu, ne edtahakan ku sikiyu te kebmelintad te hinawa niyu. Ini se kebmelintad te hinawa niyu ne ibehey ku keniyu ne kayi ebpuun te kediey. Ke menge etew kayi te ampew te dunya ne kenà ebpekevehey te kelintad ne iring kayi, ketà be ne kenà kew meuru, ne kenà kew meandek.”

²⁸ “Nerineg niyu en ke migkahi ku te, ‘Ed-ewaan ku sikiyu, ugaid ne edliveran ku red sikiyu,’ ” ke si Hisus. “Embiya benar ne igkelimù a nikiyu ne igkehalew niyu su ed-ulì a riyà te Amey ku su sikandin ke mepurù pà kediey. ²⁹ Idtarem ku en ini keniyu guntaan te warà pà med-ulaula su embiya egked-ulaula en ini ne ebpekeperetiyyaya kew red misan warà ad. ³⁰ Kenà en utew meuhet se kebitiyara ku keniyu su ebpekeuma en si Setanas ke datù te pekaid ne egkamal kayi te ampew te dunya,” ke si Hisus. “Ne warà ma bayàbayà din kediey, ³¹ ugaid su apey metueni te menge etew kayi te ampew te dunya te igkelimù ku ke Amey ku ne tembù be edtumanen ku ke langun ne insuhù kediey te Amey ku. Na, kuwa kiyu en su ed-awà ki en kayi.”

15

Impeiring ni Hisus te Sikandin ke Benar ne Lawa te Pinemula wey ke Subpang din ne ke Menge Etew ne Mibperetiyyaya Kandin

¹ Ne mibpenempità si Hisus dut te edumdumaan din te, “Siaken ke benar ne lawa te pinemula ne iyan be edtuganur dut te pinemula ne ke Amey ku ne Eleteala. ² Embiya ruen subpang ku ne kenà ebahas, ne id-awà din. Ne langun ne menge subpang ku ne ebpmehas ne ebpenemperan din su apey merapung ke bahas din. ³ Ne iring kew en dut te menge subpang ne mibpenemperan su sabap dut te Lalag te Eleteala ne impemula ku riyà te itungan niyu rut te impenurù ku. ⁴ Ketà be ne kenà kew ebpitás kediey,” ke si Hisus, “ne kenà a rema ebpitás keniyu. Su ke subpang ne egkepitás dut te lawa te pinemula ne kenà ebpekevahas, ne iring kew rema te subpang su kenà kew ebpekevahas embiya ebpitás kew rut te kebperetiyyaya niyu kedi.”

⁵ Ne migkahi maa si Hisus te, "Siaken ke lawa te pinemula ne sikiyu ve ke menge subpang. Ke subpang ne kenà ebpitas kediey ne diyan a rema te kandin ne ebpemehas te merapung. Ugaid ne embiya ebpitas kew kediey, ne warè egkeveelan niyu.⁶ Su ke etew ne ebpitas kediey," ke si Hisus, "ne igketimbag sikandin iring dut te subpang ne idtimbag su egenguwen. Embiya nehangu en, ne eburunen ne idtimbag diyà te apuy su ebinsulan.⁷ Ugaid ne embiya kenà kew ebpitas kediey su intahù niyu te hinawa ke penurù ku," ke si Hisus, "ne misan engkey se ebuyuen niyu kediey ne ibehey ku kenyi. ⁸ Su embiya ebpemehas kew te merapung ne egkereyù ke Amey ku ne Eleteala, ne iring ketà se kegketueni te sikiyu ne benar ne edumdumaan ku.

⁹ "Ini se kegkelimù ku kenyi," ke si Hisus, "ne iring te kegkelimù dut te Amey ku kediey, ne kenà kew pitas dut te limù ku kenyi. ¹⁰ Embiya edtumanen niyu ini se menge suhù ku kenyi ne kenà kew egkepitas kayi te limù ku kenyi, iring ded dema kedi te midtuman ku ke menge suhù te Amey ku kediey ne kenà a rema egkepitas diyà te limù din kediey. ¹¹ Mibpeketuenan ku ini kenyi su apey niyu igkehalew te kebpeneheewita niyu te menge suhù ku iring dut te kegkehalew ku te kebpeneheewit ku te suhù kedì te Amey ku," ke si Hisus. "Ne ketà ne egkehalew kew neverar! ¹² Ne ini ve ke suhù ku kenyi te pelimlimuey kew iring dut te limù ku kenyi. ¹³ Embiya ruen etew ne ebpebpatay su limù din dut te rumä rin, ne arà en imbe ke punggus te limù. ¹⁴ Ne sikiyu ke menge sepakat ku embiya edtumanen niyu ini se menge suhù ku kenyi. ¹⁵ Kenà en be edsugsuhuen ke id-umew ku kenyi su kenà egketuenan dut te edsugsuhuen ke ebeelan dut te edsuhùsuhù kandin. Ugaid ne iyan ku en mulà id-umew kenyi ne menge sepekat ku su langun te nerineg ku riyà te Amey ku ne Eleteala ne impayag ku kenyi. ¹⁶ Kenà sikiyu se mibpemili kediey ugaid ne siaken se mibpemili kenyi, ne midtendù ku sikiyu te ebpemenudtul dut te Meupiya ne Tudtul su apey kew mekepemehas te ulaula ne ebpekesuhat te hinawa te Eleteala su ebpekeperayun ke keupiya rin. Embiya iring ketà ne misan engkey ne ebuyuen niyu riyà te Amey ku ne Eleteala sabap dut te kebperetiyyaya niyu kediey, ne ibehey rin kenyi. ¹⁷ Ini ve ke suhù ku kenyi," ke si Hisus, "te pelimlimuey kew."

Ke Menge Etew ne Egkunterà ki Hisus

¹⁸ "Embiya edèdeetan kew te menge etew kayi te ampew te dunya ne egkunterà te Eleteala," ke si Hisus, "ne kenà kew meinuinu su tentenuri niyu te siak ke neuna ne ingkeepes dan. ¹⁹ Embiya rumä kew ran te egkunterà te Eleteala kayi te ampew te dunya, ne kenà kew ran edèdeetan. Ugaid ne geina te mibpemili ku sikiyu ne kenà kew en duma nikandan, tembù be egkeepes dan kenyi. ²⁰ Tentenuri niyu iya ke migkahi ku te, 'Warà uripen ne iyan en mepurù dut te ebpengunguripen kandin,' ke si Hisus. "Ne embiya midrasey a ran, ne iyan kew pè be kenà resaya ran. Embiya midtuman dan ke penurù ku, ne edtuman dan dema dut te penurù niyu. ²¹ Iyan dan kedresaya kenyi ne sabap dut te kebperetiyyaya niyu kediey su warà dan metueni ke Eleteala ne midsuhù kedì. ²² Embiya warà a mebpengkayi te ampew te dunya," ke si Hisus, "te ebpayag dut te lalag ku kandan, ne warà igkeisuhat kandan te salà. Ugaid ne geina te impayag ku en ini kandan

ne warà en liwahì dan. ²³ Ketà be ne misan entei se egkeepes kediey, ne igkeepes din rema ke Amey ku ne Eleteala. ²⁴ Duen mid-ulaula ku ne nekita ran ne mekegeyip ne warà meveeli te misan entei ne menusiyà, ne embiya ve perem warà dan ini mekita ne ruen igkeliwahi dan te salà dan,” ke si Hisus. “Ugaid ne nekita ran en ini, ne ingkeepes key ran ki Amà. ²⁵ Ugaid ne iyan ebpun te kegkeepes dan kedi ne egketuman ke impesurat diyà te penduan dan ne egkahi te, ‘Neepees dan kedi misan warà puunan din.’”

²⁶ Ne migkahi pà maa si Hisus te, “Ibpepengkayi ku te keniyu arà se ed-ingeranan te Edtavang ne riyà ebpun te Amey ku su sikandin ke Kedesenan ne Ebpetuntul te Menusiyà ne ebbesabut keniyu te benar mekeatag te Eleteala. Ne embiya ebpekeuma en sikandin kayi ne ebbesabut sikandin mekeatag kediey. ²⁷ Ne ebbesabut kew rema mekeatag kediey su igenat te rudsuan te kinepenurù ku kayi te ampew te dunya ne telteleduma kiyu en.”

16

¹ “Langun kayi ne migkahi ku keniyu,” ke si Hisus, “su apey kew kenà edsuwey kedi ketà te hewii ne egked-ulaula ini. ² Su ke menge etew ne mid-engkenà kedi ne ebpeawà keniyu rut te baley ne ebpengedian te menge Hudiyanan te penduan dan. Uya, su egkeuma ke hewii ne ke etew ne ed-imatey keniyu ne iyan din kunaan ke netuman din ke kiyug te Eleteala. ³ Iring ketà se ed-ul-ulaan dan keniyu su warà dan metueni ke Amey ku ne Eleteala wey warà a ran dema metueni. ⁴ Ugaid ne egkehiyen ku ve ini keniyu neraan,” ke si Hisus, “su embiya egked-ulaula en ini ne egketenuran niyu te ingkekahi ku en keniyu. Ini ne warà ku kehiya keniyu te aney en,” ke si Hisus, “su geina te ebpemekeduma kiyu pà.”

Ke Helevèk Dut te Kedesenan ne Ebpetuntul te Menusiyà

⁵ “Ugaid ne guntaan te ed-uli ad diyà te Amey ku ke midsuhù kedi, ne warà senge etew rà keniyu ne mid-insà kediey te, ‘Endei ka ebbesinaru?’ ⁶ Guntaan te migkehiyan ku sikiyu, ne egkemutuwani kew en. ⁷ Sebenarbenar ini se egkehiyen ku keniyu,” ke si Hisus, “iyan pà meupiya ne egkeewaan ku sikiyu, su embiya kenà ne kenà ebpengkayi se Edtavang keniyu. Ugaid ne embiya egenat ad ne ibpepengkayi ku sikandin kayi te keniyu. ⁸ Ne ketà te kebpekeuma rin ne ibpesabut din dut te menge etew kayi te ampew te dunya ke ulaula ne meraat, ne ibpesabut din dema ke ulaula ne metidtu wey ibpesabut din dema mekeatag te kedusa te Eleteala te menge etew ne warà mebperetiyyaya kandin. ⁹ Ibpesabut din kandan te meraat ke ulaula ran su warà dan mebperetiyyaya kediey,” ke si Hisus. ¹⁰ “Ibpesabut din kandan ke ulaula ne metidtu su ketà te ked-uli ku diyà te Amey ku ne egketuenan dan se netuman ku en ke langun ne insuhù din kediey, ne id-anew ad nikiyu te mata. ¹¹ Ne ibpesabut din dema ke kedusai kandan te Eleteala su neisuhat en te kukuman si Setanas ke datù te pekaid ke unuten dan te egkunterà te Eleteala.”

¹² “Merakel pà perem,” ke si Hisus, “se egkehiyen ku keniyu, ugaid ne kenà niyu pà egketegkad. ¹³ Ugaid ne ketà te kebpekeuma dut te Kedesenan ne Ebpetuntul te Menusiyà kayi te keniyu, ne sikandin en ke ebpetuntul keniyu te langun ne benar. Ne ini se ibpesabut din ne

kenà kayi rà te kandin ne itungan, ugaid ne iyan din ibpesabut ne endei rà ke nerineg din diyà te Amey ku ne Eleteala. Ne ibpesabut din ded lavew keniyu ke egked-ulaula ne ebpingguma,” ke si Hisus.¹⁴ “Ne ebentuhen a rin su ibpesabut din ke menge lalag ku keniyu wey ke ulaula ku. ¹⁵ Langun ne riyà te Amey ku ne kediey red dema, tembù be migkahi ku keniyu ne ibpesabut din keniyu ini se menge lalag ku su ke lalag te Amey ku ne kedi ded dema ne lalag.”

Ke Egkemutu ne Iyan Din Egkeveluyan ne Kehelawan

¹⁶ “Kenè en utew meuhet ne id-anew a niyu te mata, ugaid ne iseg-iseg ne egkekita a niyu red,” ke si Hisus.

¹⁷ Duen edumdumaan din ne mibpein-inseey te, “Engkey se meana kayi te migkahi rin te, ‘Kenè en utew meuhet ne id-anew a niyu te mata, ne iseg-iseg ne egkekita a niyu red.’ Ne migkahi pà maa sikandin te, ‘Su ed-ulì ad diyà te Amey ku.’ ” ¹⁸ Ne mibpein-inseey ran maan te, “Engkey ve vuwa ini se kinekahи rin te ‘kenà utew meuhet?’ Kenà tew egkesebutan ayan.”

¹⁹ Netuenan ni Hisus te ruen id-insà dan kandin ne migkahi en sikandin te, “Geina ne migkahi a te, ‘Kenè en utew meuhet ne id-anew a niyu te mata, ne iseg-iseg ne egkekita a niyu red.’ Maa, ini ve arà se ibpein-inseey niyu? ²⁰ Sebenarvenar ini se egkehiyen ku, ebpekesinehew kew kayi te egketemanan ku, ugaid ne ke menge etew ne ed-engkenà kediey ne egkehalew ran. Ne misan egkemutu kew, ne iyan din egkeveluyan ne egkehalew kew. ²¹ Iring ded dema te meritan ne ebpelelesut en te ked-anak din su neuma en ke kegkerasey rin. Ugaid ne embiya nekehemeñ en ke vatà, ne egkelipatan din en ke mesakit su nehalew sikandin dut te behu pà ne in-anak din. ²² Ne iring kew re be rema ketà su guntaani ne egkemutu kew, ugaid ne ebpekidbalak e red maa keniyu ne egkehalew kew nevenar, ne warà misan entei ne ebpekeawà kayi te kehelawan niyu.

²³ “Embiya egkeuma en arà se hewii,” ke si Hisus, “ne warà en kemeyidan te ebuyù kew kediey. Sebenarvenar ini se egkehiyen ku te misan engkey se ebuyuen niyu riyà te Amey ku, embiya sabap dut te kebperetiyaya niyu kediey ne ibehey rin keniyu. ²⁴ Taman guntaani ne warà kew pà mibuyù diyà te kandin sabap dut te kebperetiyaya niyu kediey. Buyù kew en kandin sabap dut te kebperetiyaya niyu kediey, na egketelimà niyu se rekелà ne kehelawan niyu.”

Netalew ni Hisus Ke Datù te Pekaid ne Egkamal Kayi te Ampew te Dunya

²⁵ “Ini se impesabut ku keniyu ne ralan te sempità,” ke si Hisus. “Ugaid ne ruen hewii ne egkeuma ne kenà ad ebpenempità su iyan ku kebpekidlag keniyu mékeatag te Amey ku ne metidtu rà ne lalag.

²⁶ Embiya egkeuma en arà se hewii ne iyan kew en buyù riyà te Amey ku su sabap te kebperetiyaya niyu kediey, su kenà en siaken se ebuyù keniyu diyà te Amey ku. ²⁷ Su igkelimù kew nevenar te Amey ku ne Eleteala geina te igkelimù a niyu sabap geina te mibperetiyaya kew te riyan a ebpuun te kandin. ²⁸ Uya,” ke si Hisus, “diyan a mebpuun te Amey ku su mibpengkayi a te ampew te dunya, ne guntaani ne ed-ewaan ku en ini se dunya su ed-ulì ad diyà te Amey ku.”

²⁹ Ketà ne migkahi ke edumdumaan ni Hisus te, “Kenà en sempità se lalag nu kenami guntaani su metidtu rà ke lalag nu guntaani. ³⁰ Netuenan dey en te netuenan nu ke langun, su misan ke menge insà ne warà pà ingkeinsà keykew ne netuenan nu. Tembù be mibperetiyaya key en te riyà ka ebpuun te Eleteala.”

³¹ Ne migkahi si Hisus kandan te, “Maa, mibperetiyaya kew en be guntaani? ³² Mehaan en egkeuma ke hewii ne egurunsuwey kew su ed-ulì kew riyà te ed-ubpaan niyu, ne egkeewaan a niyu en. Ugaid ne misan egkeewaan a niyu en ne kenà ma sebseveka ku rà, su iyan ku ruma ne ke Amey ku ne Eleteala.

³³ “Langun kayi ne migkahi ku keniyu,” ke si Hisus, “su apey ebmelintad ke hinawa niyu te kebpekideveka niyu kediey. Su kayi te ampew te dunya ne edresayen kew te menge etew ne ed-engkenà kediey. Ugaid ne misan iring ketà ne kenà niyu ebpilaya ke hinawa niyu, su netalew ku en ke datù te pekaid ne migkamal kayi te ampew te dunya!”

17

Mibpengeningeni si Hisus Mekeatag Dut te Menge Edumdumaan Din

¹ Guna su nepasad ni Hisus te egkahi diyà te edumdumaan din, ne midlingakà diyà te langit se ebpengeningeni te,

“Amà, ini en ke hewii te kedadumana nu ke kiyug nu. Ipekita nu te menge etew ke raman ne kenà egkeseupama dut te Anak nu apey ku ibpekepekita ke raman nu ne kenà egkeseupama. ² Su imbehey nu kediey se kebayàbayà dut te langun ne menusiyà apey ke menge etew ne imbehey nu kediey ne egkevehayan te umur ne warà edtemanan din. ³ Su ke ralan te kebpeketalimà te umur ne warà edtemanan din ne arà se kegkesebuti te menge etew te sikew rà iya ke benar ne Eleteala, wey egkesebutan dan dema te siaken si Hisu Kristu ke Anak nu ne midsuhù nu. ⁴ Su kayi te dunya ne impekita ku en ke kerekelà te gehem nu kayi te ulaula ku, ne ke insuhù nu kediey ne nepasad ku en. ⁵ Na guntaani, Amà, te ed-ulì ad diyà te etuvangan nu ne iuliì nu en kediey ke raman ku ne kenà egkeseupama iring dut te aney en ne raman ku te rian e pà te keykew te warà pà limbaha ini se dunya.

⁶ “Ini se menge etew kayi te dunya ne imbehey nu kediey, Amà,” ke si Hisus, “ne impesabut ku en kandan mekeatag te sikew ne Eleteala. Su andang dan ne keykew te warà nu pà imbehey kediey, ne midtuman dan en ke insuhù nu kandan. ⁷ Ne netuenan dan en uman te ini se langun ne egkeveelan ku ne riyà dà ebpuun te keykew. ⁸ Su impenundtul ku en kandan ke impesabut nu kediey ne mibperetiyaya ran en ini. Su netuenan dan te riyà a iya ebpuun te keykew, ne mibperetiyaya ran te sikuna ke midsuhù kedì.

⁹ “Ketà be, Amà, ne ibpengeningeni ku sikandan,” ke si Hisus. “Kenà ku iyan ebuyuen diyà te keykew se tevangi nu ke menge etew ne warà medtelimà kedì, ugaid ne iyan ku ebuyuen ne tevangi nu ke menge etew ne imbehey nu kediey su keykew red ma sikandan. ¹⁰ Su langun kayi ne menge etew ne kediey ne keykew red, ne ke langun ne menge etew ne keykew ne kediey red dema. Ne kayi te kandan se puunan te egkereyù a. ¹¹ Ne guntaani ne ed-ulì ad diyà te keykew ne

kenà ad ed-ubpà kayi te dunya, ugaid ne ini se menge etew ta ne kayi ran ded te ampew te dunya. Is, Amà ne berekat,” ke si Hisus, “ipata nu sikandan te ralan te kerekelà te gehem te ngaran nu ne imbehey nu kediey su apey meseveka sikandan iring dut te kegkeseveka ta. ¹² Su gewii te ini e pà te kandan ne mid-ipat ku sikandan te ralan te kerekelà te gehem te ngaran nu ne imbehey nu kediey. Uya, mid-ipat ku sikandan su warà seveka rà kandan ne neawà liyu rà ketà te senge etew ne iyan dà nekahì neraan ne ed-ulug kediey. Neawà sikandin su apey egketuman ke impesurat ne Lalag nu.

¹³ “Ne guntaani,” ke si Hisus, “ne ed-ulì ad diyà te keykew, Amà, ugaid ne geina te kayi e pà te ampew te dunya ne ebuyuen ku te menu ma ke egkehalew ran iring dut te dekelà ne kegkehalew ku. ¹⁴ Su langun ne menge lalag nu ne impesabut ku en kandan, ugaid ne ingkeepesi ran dut te menge etew kayi te ampew te dunya ne migkunterà keykew su geina te mibpekidsuwey ran dut te menge kunterà nu, iring te siaken ne warà a mebpkid-amur te menge kunterà nu. ¹⁵ Kenà ku iyan ebuyuen keykew ne iawà nu ini se menge etew ta kayi te dunya, ugaid ne iyan ku ebuyuen keykew te ipata nu sikandan su apey ran kenà meahew ni Setanas ke datù te pekaid. ¹⁶ Su sikandan ne kenà duma rut te menge etew kayi te ampew te dunya ne egkunterà kenikew,” ke si Hisus, “iring kedì te kenà a rumu dut te menge etew ne egkunterà kenikew. ¹⁷ Su geina te ke lalag nu ke ebpuunan te langun ne benar, ne kayi puunan ne beluya nu sikandan ne tuney ne sugsuhuen nu su apey idtopeney ran ke hinawa ran diyà te keykew. ¹⁸ Su iring te kinesuhù nu kediey kayi te ampew te dunya, ne edsuhuen ku rema sikandan su apey ran ikepesabut ke lalag nu dut te langun ne menusiyà. ¹⁹ Su atag dut te limù ku kandan ne idrumakan ku keykew ini se hinawa ku su apey ran dema idrumakan neveran ke hinawa ran keykew.

²⁰ “Kenà ku iyan dà ebuyuen keykew,” ke si Hisus, “ne ini se menge etew ta guntaani, ugaid ne ke langun ne ebperetiyaya kediey keuremà sabap dut te kebpemesabut dan. ²¹ Su apey langun te sikandan ne meseveka, Amà, iring te ini ka te kedì wey riyan a rema te keykew. Uya, meseveka ran perem kayi te keyta su apey ebpekeperetiyaya ke menge etew kayi te ampew te dunya te midsuhù a nu. ²² Ne ini se kegkevantug ku ne imbehey nu kedì ne imbehey ku rema diyà te kandan, su apey egkeseveka ke itungan dan iring te kegkeseveka ta. ²³ Su riyan a te kandan iring dut te ini ka rema te kediey, apey egkeseveka rà ke itungan dan. Ne ketà ne egketuenan te langun ne menusiyà te midsuhù a nikuna, ne egketuenan dan dema te igkelimù nu sikandan iring dut te limù nu kediey.

²⁴ “Is, Amà, ini se menge etew ne imbehey nu kediey,” ke si Hisus, “ne iyan ku kiyug ne riyà dan te kediey ne ed-ubpaan su apey ran egkekita ke mekegeyip ne raman ku. Su ini se raman ku ne imbehey nu kediey su ingkelimù a nikuna rengan te warà pà limbahā ini se dunya.

²⁵ “Is, Amey ku ne metidtu,” ke si Hisus, “ini se menge etew kayi te ampew te dunya ne egkunterà kenikew, ne warà dan metueni ke entei ka. Ugaid ne netuenan ku sikew wey ini se menge etew ne imbehey nu kedì ne netuenan dan te sikuna ke midsuhù kediey.

²⁶ Impesabut ku en kandan ke entei ka, Amà, ne ini ne ibperayun ku pà te ebpesabut kandan apey ebmeilut ke kebpelimlimuey ran iring dut te limù nu kediey su apey riyan a rema te kandan.”

18

Ke Kedsigkem Ki Hisus

(*Mateo 26:47-56; Marcos 14:43-50; Lucas 22:47-53*)

¹ Guna su nekeipus si Hisus te ebpengeningen i ne mid-awà en sikandin abpeg dut te edumdumaan din, ne mid-apet dan te beuhan ne ed-ingaranan te Kidrun. Su ruen pemulaan dutun ne mibpemulaan te menge kayu ne ketà dan be midseruk.

² Ne si Hudas, ke ed-ulug ki Hisus te ked-imatey, ne neketuntul ketà su tatap ne egkevurunan eni Hisus dut te edumdumaan din. ³ Ketà ne nekeuma en kayi te pemulaan si Hudas se midumaan te menge sundaru wey ke menge gurudyà rut te Nekebpuru ne Valey te Eleteala se midsuhù dut te menge mepurù te terebpelengesa wey ke menge Peresiyu. Nekeuma ran en se ebpenusulù ne sangkap dan nevenar te metarem.

⁴ Ugaid ne netuenan ni Hisus ke langun ne egketemanan din ne midsinuhung din en sikandan se egkahi te, “Engkey ma ini se ebpmengaan niyu?”

⁵ Midtavak dan te, “Si Hisus ne ebpuun te Nesarit.”

“Siak ini ke ebpmengaan niyu,” ke si Hisus.

Ne elin en dema dut te menge sundaru si Hudas, ke ed-ulug ki Hisus.

⁶ Guna su nekah i ni Hisus te, “Siaken en iya ini,” ne nekesunud dan ne nengepiley ran.

⁷ Ne mid-insà maa si Hisus te, “Entei iya ini se ebpmengaan niyu?”

Ne midtavak dan maa te, “Si Hisus ne ebpuun te Nesarit.”

⁸ Migkahi en maa si Hisus te, “Migkahi ku en ura keniyu te siaken en ini iya. Embiya ve siaken ke ebpmengaan niyu, ne kenà niyu rà iamung te edsikem ini se menge ruma ku.” ⁹ (Iring ketà se kinekahai rin te kenà ibpeamung te edsikem ke menge ruma rin su apey ini se nekahai rin dut te kinepengeningen i rin geina ne egketuman te, “Warà seveka rà, Amà, ne egkeawà dut te langun ne menge etew ne imbehey nu kediey.”)

¹⁰ Nekita rà ni Simon Pedro se iring ketà ne mid-ulavut din ke sundang din ne midtibas din en ke sugsuhuen dut te pinekebmepurù te terebpelengesa, ne nesamping en ke kewananae ne telinga rin. Ini se edsugsuhuen ne ed-ingaranan ki Malco.

¹¹ Ne midawey ni Hisus si Pedro se egkahi te, “Ilipi nu ayan se sundang nu! Su engkey, iyan nu kunaan ke kenà ku egkegaga te editiger ke kemeresayan ne imbehey kedi te Amey ku?”

Mibpeneheewit si Hisus Diyà te ki Anas

¹² Ketà ne midsikem dan en si Hisus ne mibakù dan en dut te menge sundaru wey ke unuten dan abpeg dut te menge gurudyà ne Hudiyanan. ¹³ Ne riyyà dan unai te ed-ewit si Hisus te ki Anas, ke enuhang ni Kayipas ke pinekemepurù dut te langun ne terebpelengesa te arà ne rahun. ¹⁴ Si Kayipas ke nekekahi rut te menge Hudiyanan te iyan dà tumù se senge etew rà se ebpatay ne ebpekeselidig dut te langun ne menge etew.

*Imparew ni Pedro te Teleduma Ran ki Hisus
(Mateo 26:69-70; Marcos 14:66-68; Lucas 22:55-57)*

¹⁵ Guna su neewit dan en si Hisus, ne midteltelukun en si Simon Pedro wey senge etew pà ne edumdumaan ni Hisus. Ini se senge etew ne edumdumaan ni Hisus ne andang ne nekilala dut te keunutan te terebpelengesa, ne ketà be ne nekeruma sikandin ki Hisus te edlusud diyà te lamalama rut te valey te keunutan te terebpelengesa. ¹⁶ Ugaid ne si Pedro ne riyà dà te luwal te humawan. Ne ketà ne mibpelilived diyà te gumawan ini se seveka ne edumdumaan ni Hisus ne nekilala rut te egkeunutan te terebpelengesa ne midleohan din en ke meritan ne ebanter rutun te gumawan te ebpelusuren si Pedro, ne arà dà ne impelusud din en.

¹⁷ Ne ketà ne mid-insà ke meritan ne ebanter te humawan ki Pedro te, “Maa, kenà ka senge etew ne edumdumaan keniyan te etew ne midsigkem?”

Midtavak si Pedro te, “Kenà, kenà siak!”

¹⁸ Ne rutun te lamalama ne mid-uyag dan te apuy te uring ke menge sugsuhuen kayi te valey elin dema ke menge bantey rut te nekebpuru ne valey te Eleteala su ebpenginarang dan su meadsil. Ne arà dà dema ne mid-uvay en si Pedro su ed-inarang dema sikandin.

Mibpenginsaan si Hisus Dut te Pinekemepurù te Menge Terebpelengesa

(Mateo 26:59-66; Marcos 14:55-64; Lucas 22:66-71)

¹⁹ Ne mibpenginsaan ni Anas ke Pinekemepurù te menge Terebpelengesa si Hisus mekeatag dut te edumdumaan din wey ke penurù din.

²⁰ Ne midtavak si Hisus te, “Ini se penurù ku ne warà mekeelles su riyà te merakel ne etew. Su riyan a layun mibpenurù te menge valey ne ebpengedian te Hudiyanan te penduan dan wey riyà dema te Nekebpuru ne Valey te Eleteala su arà ke egkevurunan te langun ne menge Hudiyanan. Warà impenurù ku ne nekeeles. ²¹ Ne meambe ke iyan a nu ed-insaan? Iyan nu insai,” ke si Hisus, “ke nekerineg kediey su netuenan dan ke migkahi ku kandan.”

²² Guna su nekahi ini ni Hisus ne midtabpì en sikandin te seveka ne gurudyà. Ke se gurudyà te, “Sikuna pè be iya se ebpeketikàtikà ne ebpenumpan te iring keniyan kayi te Pinekemepurù te menge Terebpelengesa!”

²³ Migkahi si Hisus kandin te, “Embiya meraatey ini se migkahi ku, ne kehiya nu ke engkey se meraat kayi te etuvangan te merakel. Ugaid ne embiya warà meraat din, ne meambe ke midtabpì a nu?”

²⁴ Neipus ni Anas te ed-insà si Hisus ne impelaus din en diyà te ki Kayipas ke enuhang din ne iyan Pinekemepurù te langun ne menge terebpelengesa. Si Hisus ini ne nevakù pà lavew.

Imparew maa ni Pedro te Teleduma Ran ki Hisus

(Mateo 26:71-75; Marcos 14:69-72; Lucas 22:58-62)

²⁵ Ne ketà te lamalama te Pinekemepurù te menge Terebpelengesa ne ed-inarang pà lavew si Pedro. Mid-insaan te menge etew sikandin te, “Kenà ka senge etew ne edumdumaan keniyan te etew an?”

Ugaid ne mibparew si Pedro, “Kenà, kenà siaken!”

²⁶ Ne ruen ketà seveka ne edsugsuhuen te Pinekemepurù te menge Terebpelengesa ne megeget din ara se nesempingan ni Pedro te telinga

rin. Ne migkehiyan din en si Pedro te, "Iring te nekita ku sikuna geina riyà te kedsigkema rey ki Hisus, ne engkey, duma ka nikandin?"

²⁷ Ne mibparew en maa ni Pedro te, "Kenà!" Ne arà dà iya ne midukarà en ke manuk.

*Mid-ewit Dan si Hisus Diyà te ki Pilatu ke Gubinedur ne Rumanu
(Mateo 27:1-2, 11-14; Marcos 15:1-5; Lucas 23:1-5)*

²⁸ Ed-awà ketà te valey ni Kayipas ne mid-ewit dan si Hisus se ebpendediyà te turuhan ni Pilatu ke gubinedur ne Rumanu, ne mesmeselem pà. Ugaid ne ke menge egkeunutan te Hudiyanan ne kenà edlusud ketà te turuhan su apey ran kenà mekesurang dut te edtenuran ne betasan mekeatag te ebpelnlùlù. Su embiya edlusud dan te valey te menge etew ne kenà eduma te edtenuran dan ne betasan dan te kedlùlù, ne kenà dan ebpekeamung dut te kevurunan dan te Pista te Kedsehari te Suluhuen. ²⁹ Geina te arà ke betasan dan ne midlihawang si Pilatu su edsinuhung kandan ne ke sikandin te, "Engkey ma se id-isuhat niyu ne kukuman kayi te etew ini?"

³⁰ Midtavak ke menge egkeunutan te, "Embiya warà salà din ini ne kenà dey ebpeneheewiten kayi te keykew."

³¹ Ne migkahi si Pilatu kandan te, "Kua niyu sikandin ne iyan kew en kukum kandin su ruen ma penduan niyu ne egkerumaan."

Ne migkahi ke menge egkeunutan te, "Geina te sìkami ne Hudiyanan ne egkekemalan dut te sikiyu ne menge Rumanu ne warà ketau rey te kebpeimatey kandin." ³² (Ned-ulaula ini su apey metuman ke nekahи ni Hisus se idlansang sikandin diyà te pinebelavag ne kayu te kebpeimetayi kandin.)

³³ Ne midsurì medlusud si Pilatu diyà te turuhan ne mid-umew rin si Hisus ne mid-insaan te, "Maa, datù ke ves ini te menge Hudiyanan?"

³⁴ Midtavak si Hisus te, "Maa, keykew rà ayan ne itungan se in-insà nu kedì te ratù a etawa riyà nu merineg ini te ruma ne etew?"

³⁵ Migkahi si Pilatu te, "Meambé, Hudiyanan a? Su keykew red ne menge ruma ne Hudiyanan wey ke menge mepurù te terebpelengesa ke mibpeneheewit keykew kayi te kedì. Ne engkey se mid-ulaula nu?"

³⁶ Midtavak si Hisus te, "Ini se kedì ne edetuan ne kenà kayi te ampew te dunya, su embiya ma kayi ne mibpekibunù en ke menge sakup ku apey kenà a mesikem te menge Hudiyanan. Ugaid ne ini se edetuan ku ne kenà kayi te ampew te dunya."

³⁷ Ketà ne migkahi si Pilatu te, "Engkey, ratù ke ves?"

Midtavak si Hisus te, "Benar ayan se nekahи nu ne ratù a! Su iyan ku kinepengkayi te ampew te dunya ne impeanak te menusiyà su ebpesabut a rut te benar. Ne misan entei en ne etew se edtampil dut te benar, ne ebpmineg kediey." ³⁸ Arà dà ne mid-insà si Pilatu te, "Engkey se meana te benar?"

Nekahi rin dà arà ne midlihawang en maa si Pilatu riyà te menge Hudiyanan ne migkahi te, "Warà egketuen ku ne id-isuhat ku kandin. ³⁹ Ugaid ne kayi te keniyu ne ruen betasan niyu te embiya egkeuma en ke Pista te Kedsehari te Suluhuen ne ibpelihawang ku se senge etew ne bilanggù ne ebuyuen niyu. Maa, egkesuatan niyu ve ne ibpelihawang ku ini se ratù niyu te menge Hudiyanan?"

⁴⁰ Nerineg den dà arà ne mibpemensag dan te, "Kenà, kenà sikandin! Iyan tumù ne si Barabas!" (Si Barabas ini ne tulisan.)

19

Migkukum Dan te Ed-imetayan si Hisus

¹ Nerineg dà arà ni Pilatu ne midlusud en maa sikandin te turuhan din ne migkuwa rin en si Hisus ne imperuug din en. ² Guna su neipus dan te edruug sikandin ne ruen impetengkulu kandin ne mibeelan te menge sundaru ne ruhiyen ne wahed, ne pinelembung dan te merihà su uvag kun datù. ³ Ne mid-uvey ran sikandin te kedsumpelita ran te, “Mebereumur ka, ne ratù te menge Hudiyanan!” Ne arà pà ne midtabpì dan sikandin.

⁴ Ne midlihawang en manen si Pilatu riyà te menge etew ne migkahi te, “Ibpelihawang ku en maa sikandin kayi te kenyi su apey niyu metueni te warà iya netuen ku ne kewagib ne idselaa kandin.” ⁵ Ne ketà ne midlihawang en si Hisus se impetengkulu te ruhiyen wey middlembung te merihà. Ke si Pilatu te, “Tengtengi niyu en be sikandin su ini en!”

⁶ Guna su nekita rut te menge mepurù te terebpelengesa wey ke menge gurudyà si Hisus ne mibpemensag dan en te, “Idlansang sikandin diyà te ebpebelevahan ne kayu!”

Ne migkahi si Pilatu te, “Iyan kew en lansang kandin diyà te pinebelavag ne kayu, su warà egketuen ku ne arus ne ibpatey rin.”

⁷ Ne migkahi ke menge Hudiyanan te, “Kayi te penduan dey ne iyan iya se ebpeimetayan ini se etew su edsumpalit sikandin su egkahi te Anak te Eleteala.”

⁸ Guna su nerineg ni Pilatu ini ne mid-iseg se kegkeandek din. ⁹ Midlusud maa si Pilatu riyà te turuhan din ne med-insà maa si Hisus te, “Endei ke ma ebpuun?” Ugaid ne warà medtavak si Hisus. ¹⁰ Ne migkahi en maa si Pilatu te, “Meambe ke kenà ka edtavak? Warà nu ves metueni se siaken se ebayàbayà te kebpeliyu keykew etawa kebpelansang ku keykew riyà te kayu!”

¹¹ Ne midtavak si Hisus te, “Warà bayàbayà nu kediey embiya kenà Eleteala se mibehey keykew. Tembù ke etew ne mibpeewit kediey kayi te keykew ne muna pà ke salà din dut te keykew.”

¹² Guna maa su nerineg ni Pilatu arà ne neilut nevenar ke hinawa rin te kebpemengà din te ralan te kebpeliyu din ki Hisus. Ugaid ne mibpemensag maa ke menge Hudiyanan te, “Embiya iyan nu ibpeliyu ini se etew, ne egkunterà ka dut te ratù tew riyà te Ruma ne si Cesar. Su iring kayi ne etew se edatùdatù ne egkunterà ki Cesar.”

¹³ Nerineg dà ini ni Pilatu ne mibpeneheewit din en si Hisus te edlihawang ne mibpinuu sikandin te ebpinuuwan din te egkukum diyà te mid-ingeranan te Saag ne Simintu. (Ne kayi te kinehiyan te Hibruhanen ne “Gebata.”) ¹⁴ Ne ketà ne ed-ikeremaen dà ke Pista te Kedsehari te Suluhuen ne malù en egkeudtu ke andew.

Ne migkahi si Pilatu dut te menge Hudiyanan te, “Ini en ke datù niyu!”

¹⁵ Ne mibpemensag ke menge Hudiyanan te, “Id-awà su ed-imetayan! Ibpelansang nu sikandin diyà te kayu!”

Migkahi si Pilatu te, “Maa, ibpelansang ku ve ini se ratù niyu riyà te pinebelavag ne kayu?”

Ne mibpemensag ke menge mepurù te terebpelengesa te, “Seveka rà se ratù dey ne si Cesar dà.”

¹⁶ Arà dà ne imbehey en kandan ni Pilatu si Hisus diyà te kandan te ibpelansang sikandin diyà te kayu.

*Inlansang si Hisus Diyà te Pinebelavag ne Kayu
(Mateo 27:32-44; Marcos 15:21-32; Lucas 23:26-43)*

Ketà ne mid-ewit dan en si Hisus. ¹⁷ Ne midlihawang en si Hisus se editiang dut te pinebelavag ne kayu su ebpendiyà dan en te dapit ne ed-ingaranan te menge “Tulan te Ulu.” (Ne riyà te kinehiyan te Hibruhanen ne ed-ingaranan te “Gulguta.”) ¹⁸ Ne rutun dan inlansang si Hisus diyà te pinebelavag ne kayu, ne ruen deruwa ne etew ne inlansang dan dema diyà te kayu te idsenge riveluyà ni Hisus.

¹⁹ Ne ruen insurat ni Pilatu ke gubinedur ne impetahù diyà te divavew rut te pinebelavag ne kayu. Ne ini se insurat din ne egkahi te, “Si Hisus ne riyà ebuun te Nesarit, ke Ratù te menge Hudiyanan.” ²⁰ Merakel ne menge Hudiyanan se nekevasa ketà su ini se midlensangan dan ki Hisus ne uvey red ma te inged ne Hirusalim. Ne ini se insurat ne kinehiyan te Hibruhanen, Latin ke kinehiyan te menge etew te Ruma, wey ke kinehiyan te menge Gerisiyanen. ²¹ Migkahi ke menge mepurù te terebpelengesa riyà te ki Pilatu te, “Warà nu perem insurat ‘Ke Datù te menge Hudiyanan,’ ugaid ne iyan nu rà perem insurat ne ‘Migkahi rin te Siaken ke Datù te menge Hudiyanan.’”

²² Ne migkahi si Pilatu te, “Ke insurat ku en ne arà dà iyal!”

²³ Guna su neipus te menge sundaru te kedlansang dan ki Hisus diyà te pinebelavag ne kayu ne migkuwa ran ke menge belegkas din ne mibaadbaad dut te epat ne sundaru. Migkuwa ran dema ke inleembung din ne mid-avel ne warà penai rin. ²⁴ Migkahi ke menge sundaru te, “Kenà tew ini ebpenebtevasen, ugaid ne ebunutbunut ki su apey tew egkekita ke engkey se ebpekegkemuney.”

Ini ke mid-ulaula ran su apey egketuman ke impesurat ne Lalag te Eleteala rengan ne egkahi te,
“Mibaadbaad dan ke velegkas ku,
ne mibunutbunutan dan ke inleembung ku.”
Ne ini iya ke mid-ulaula te menge sundaru.

²⁵ Ne uvey ketà te pinebelavag ne kayu ne mid-it-itindeg ke iney ni Hisus, elin ke ayà dìn ne suled te iney rin, ne si Maria ke esawa ni Kelupas wey si Maria ne ebuun te Magdala. ²⁶ Guna su nekita ni Hisus ke iney rin wey ke edumdumaan din ne ibpengelimù din nevenar, ne migkehiyan din ke iney rin te, “Inà, ini ke anak nu.” ²⁷ Ne migkehiyan din dema ke edumdumaan din te, “Ini en ke iney nu.” Ne in-awà dè be ketà ne andew ne diyan en med-upbà ke iney ni Hisus te edumdumaan din.

*Ke Kinepatey ni Hisus
(Mateo 27:45-56; Marcos 15:33-41; Lucas 23:44-49)*

²⁸ Ketà ne netuenan ni Hisus te langun ne insuhù kandin ne nepasad din en ne migkahi en sikandin te, “Ebpekeinum a.” Migkahi rin ini su apey egketuman ke impesurat ne Lalag te Eleteala rengan. ²⁹ Ruen ketà kelalew ne netehuan te tebà. Ne ruen migkuwa ran ne in-ered kayi te tebà, ne intahù dan diyà te reisek ne subpang ne ed-ingaranan te “isupu” ne arà be ke insugkar dan diyà te bèbà ni Hisus. ³⁰ Mid-esep

ni Hisus ini se tebà ne migkahi en sikandin te, "Nepasad en ke langun ne insuhù kediey." Ne midungul dà sikandin ne minatey en.

Mibpilak Dan ke Tengkiliran ni Hisus

³¹ Ne mibpendiyà ke menge Hudianen te ki Pilatu su ebuyuen dan te ebpenlepuan dan ke paa rut te menge etew ne impenlansang diyà te kayu su apey ran ebpatay te mehaan ne egkeawà en ke bangkey ran. Ini ke ed-ul-ulaan dan su arà en ke keepunan te Diyemaat ne ebpekesurang dut te penduan dan embiya ruen bangkey riyà te pinebelavag ne kayu dut te hewii te Sepetu ke Hewii te Id-imeley ran. Ne ini ne Sepetu ne edtenuran dan nevenar su egketuman ke Pista ran te Kedsehari te Suluhuen. ³² Migkiyug en si Pilatu ne mibpendiyà ke menge sundaru ne mibpenlepuan dan ke menge paa rut te deruwa ne etew ne inlansang diyà te idsengeriveluyà ni Hisus. ³³ Ugaid ne guna su kayi ran en te ki Hisus ne nekita ran se minatey en ne warà dan en penlepui sikandin. ³⁴ Ugaid ne ruen seveka ketà ne sundaru ne mibpilak din ke tengkiliran ni Hisus, ne arà dà ne ruen midtudà ne lengesa ne nekedsawug te wayig. ³⁵ Su siaken ini ke midsurat kayi ne editithusan ku te benar ini su nekita ku en iya. Uya, netuenan ku te benar ini, tembù be insurat ku su apey kew ebpekeperetiyaya. ³⁶ Nedulaula ini su apey egketuman ke impesurat ne Lalag te Eleteala rengan ne egkahi te, "Warà misan seveka ne tulan din ne egkelepù." ³⁷ Ne ruen pà ruma ne Lalag ne impesurat te Eleteala ne egkahi te, "Edtengtengan dan ini se etew ne mibpilak dan."

Ke Kineleveng ki Hisus

(Mateo 27:57-61; Marcos 15:42-47; Lucas 23:50-56)

³⁸ Nepasad ini ne ruen senge etew ne ed-ingaranan ki Husi riyà ebpuun te Eremetiya se mibpendiyà te ki Pilatu su ebuyuen din ke bangkey ni Hisus. (Si Husi ini ne eduma rema ki Hisus, ugaid ne in-eles din dà su egkeandek sikandin dut te menge egkeunutan te menge Hudianen.) Ne migkiyug si Pilatu te egkuan ni Husi ke bangkey ni Hisus, ne arà dà ne mibayaan en ni Husi ke bangkey ni Hisus ne mid-ewit din en. ³⁹ Si Nikudimu, ke etew ne mibpekibalak ki Hisus te senge kerukileman, se miduma kandin. Ne mid-ewit sikandin te menge lelima nepulù ne kilù ne periyemut pined-amut ke deruwa ne susun, mira wey alus. ⁴⁰ Ne migkuwa ran en ke bangkey ni Hisus ne mibukusan dan te meputi ne saput, ne inragkes dan en ketà ke periyemut su arà ke betasan te menge Hudianen te kedleveng. ⁴¹ Ne diyà te uvey te middensangan ki Hisus ne ruen pemulaan te menge kayu. Ne ketà ne ruen leveng ne edlevengan, ugaid ne warà pà melevengi. ⁴² Ne geina te Diyemaat en arà ne mehaan en egkeuma ke Hewii te Ked-imeley ran wey merani rema ini se edlevengan, ne ketà dan en inleveng si Hisus.

20

Ke Kinevanew ni Hisus

(Mateo 28:1-8; Marcos 16:1-8; Lucas 24:1-12)

¹ Guna su mesmeselem te Akad ne mibpendiyà si Maria Megdelina te midlevengan ki Hisus te merusirem pà. Nekeuma ketà sikandin ne nekita rin te neawè en ke vatu ne inlekeb dut te gumawan te leveng.

² Nekita rin dà ne mibpelelahuy en se ebpendiyà te ki Simon Pedro wey arà se edumdumaan ni Hisus ne igkelimù din utew. Ne migkahi en si Maria kandan te, “In-awà dan en dut te midlevengan ki Hisus ke Kerenan tew, ne warà dey metueni ke endei ran ewita.”

³ Nerineg dà ni Pedro wey arà se ruma rin ne edumdumaan ni Hisus ne mibpendiyà dan en te leveng. ⁴ Mibpelelahuy ran se deruwa ne etew, ugaid ne neunaan dut te ruma rin si Pedro te kebpekeuma riyà te leveng. ⁵ Midsiniling din en ne iyan din nekita ke meputì ne saput ne imbukus, ugaid ne warà medlusud sikandin. ⁶ Ne si Simon Pedro ke neketundug kandin, ne midlusud en mulà, ne nekita rin ke saput ne meputì ⁷ wey ke saput ne imbukus dut te ulu ni Hisus. Nengelempì en ini, ugaid ne nekedsivey se kinekesavuk din. ⁸ Ne arà pà ne midlusud ke neuna ne nekeuma ne edumdumaan ni Hisus. Nekita rin dà arà ne mibperetiyyaya sikandin te nevanhew si Hisus. ⁹ (Misan warà dan pà lavew mekesabut dut te impesurat ne Lalag te Eleteala ne egkahi te egkevanew si Hisus.) ¹⁰ Ketà dà ne mid-ulì en ke deruwa ne edumdumaan ni Hisus.

Mibpekitakita si Hisus ki Maria Magdalena

(Mateo 28:9-10; Marcos 16:9-11)

¹¹ Ugaid ne si Maria ne diyà te lihewangan te leveng ed-it-itendeg se edsinehew. Gewii rin te edsinehew ne midsiniling din ke leveng, ¹² ne rutun te leveng ne nekita rin se deruwa ne suluhuen te Eleteala ne utew mèmeputì se velegkas dan. Diyà dan mibpinuu te nesevukan te bangkey ni Hisus, seveka riyà te egkeulunan din, ne seveka kayi te egkeiwaran din.

¹³ Mid-insà dan ki Maria te, “Bayi, engkey ma ini se idsinehew nu?”

Ke si Maria te, “Migkuwa ran ke bangkey rut te Kerenan tew ne warà ku metueni ke endei ran ewita!” ¹⁴ Nekeipus dà te edlalag ne midlilingey ne iyan din nekita si Hisus se ed-it-itindeg, ugaid ne warà din mekilala sikandin.

¹⁵ “Bayi,” ke si Hisus, “engkey ma ini se idsinehew nu? Engkey se ebpemengaan nu?”

Iyan kunaan ni Maria ke arà se etew ne edtuganur ketà te pemulaan, tembù be migkahi sikandin te, “Mama, embiya iyan ka migkuwa rut te bangkey rin ne kehiya nu kedì ke endei nu ewita sikandin su apey ku egkekuwa.”

¹⁶ “Maria,” ke si Hisus.

Nerineg din dà arà ne midsinaru en si Maria ne migkehiyan din en te kinehiyan te Hibruhanen te, “Ew, Rebuni!” (Su riyà te kinehiyan te Hibruhanen ne iyan din meana ne “Meyerù.”)

¹⁷ Ne migkahi en si Hisus kandin te, “Kenà a nu pà geweri su warà e pà mekeulì diyà te Amey ku. Ugaid ne beyai nu ke menge suled ku ne penudtuli nu ve sikandan te, ‘Ed-ulì a riyà te Amey ku ne ke Amey nu red dema, ke Eleteala ku ne ke Eleteala nu red rema.’”

¹⁸ Arà dà ne mibayaan en ni Maria Megdelina ne mibpenudtulan din en ke edumdumaan ni Hisus te nekita rin si Hisus ne mibpenudtul din dema kandan ke langun ne lalag ni Hisus.

Mibpekitakita si Hisus dut te Menge Edumdumaan Din

(Mateo 28:16-20; Marcos 16:14-18; Lucas 24:36-49)

¹⁹ Ne ketà te hewii te Akad te merukilem en ne nevurun en ke menge edumdumaan ni Hisus diyà te senge baley, ne mibpemintù dan su egkeandek dan dut te menge egkeunutan te Hudiyanan. Ne netetau ran te kayi en mekeitindeg si Hisus te teliwarà dan. Ke sikandin te, “Na, mebmelilintad ke hinawa niyu!” ²⁰ Nekeipus te edlalag ne impekita rin kandan ke menge velad din ne nepelian dut te lansang, ne impekita rin ded dema ke tengkiliran din ne mibpilak. Ne arà iya ne nengehalewhalew nevernar ke edumdumaan din te kebpekekita ran dut te Kerenan dan.

²¹ Ne migkahi en maa si Hisus te, “Na, mebmelilintad ke hinawa niyu! Ne iring dut te midsuhù a te Amey ku ne Eleteala,” ke si Hisus, “ne edsuhuen ku rema sikiyu.” ²² Neipus din te egkahi ini ne mibperiyupan din sikandan se egkahi te, “Na, ebpelumunan kew en dut te Kedesenan ne Ebpetuntul te Menusiyà!” ²³ “Embiya ebpesehareniyu ke menge salà te etew ne egkepesehad ini, ugaid ne embiya kenà niyu ebpesehareniyu ke menge salà din ne kenà dema ini egkepesehad.”

Si Hisus Wey si Tomas

²⁴ Ketà te kinepekitakita ni Hisus dut te menge edumdumaan din ne warà ketà si Tomas (ne mid-ingaranan te Seping). ²⁵ Guna su neuma rut te edumdumaan ni Hisus si Tomas ne mibpenudtulan dan te, “Nekitarey ke Kerenan tew.”

Ne migkahi si Tomas te, “Kenà a ebperetiyyaya keniyan te nevanew sikandin taman te egkekita ku ke mibpnevayaan te lansang diyà te menge velad din wey taman pà te edityuken ku wey edsepuwen ku ke nepelian te bangkew riyà te tengkiliran din.”

²⁶ Nekedsenge pedian maa ketà ne nevurun ke menge edumdumaan ni Hisus diyà te senge valey ne rutun en dema si Tomas. Ne mibpemintù dan, ugaid ne misan iring ketà ne neketekew en maa si Hisus nekeitindeg diyà te teliwarà dan. Ke sikandin te, “Na, mebmelilintad ke hinawa niyu.” ²⁷ Arà dà ne migkahi en sikandin diyà te ki Tomas te, “Tengtengi nu ini se velad ku, ne tiyuka nu ini se palad ku abpeg dut te pali te tengkiliran ku ne sepuwa nu rema! Engked ka te keduwaruwa nu, ne peretiyyaya ka!”

²⁸ Migkahi si Tomas te, “Sikuna ke Kerenan ku, ne Eleteala ku!”

²⁹ Migkahi si Hisus kandin te, “Maa, arà pè be ne mibperetiyyaya ka su nekita ad nikuna! Ugaid ne idtarem ku ini, egkehalew nevernar ke menge etew ne ebperetiyyaya kedi misan warà dan mekekita kediey!”

³⁰ Merakel pà se mid-ulaula ni Hisus ne mekegeyip ne nekita rut te edumdumaan din ne warà ikesurat en kayi te riberù ini. ³¹ Ugaid ne ini se mekegeyip ne ulaula ne ingkesurat kayi su apey kew ebpekeperetiyyaya te Anak te Eleteala si Hisus, ne ebpekeperetiyyaya kew rema te sikandin ke Impasad te Eleteala ne Ebperetuen, su embiya ebperetiyyaya kew kandin ne ebpeketelimà kew te umur ne warà edtemanan din.

21

Mibpekitakita si Hisus Dut te Pitu ne Edumdumaan Din

¹ Guna su nekesahad en se pipira ne hewii ne mibpekitakita maa si Hisus dut te edumdumaan din diyà te beyvey te ranew ne edingaranan te Tibiriyas. Ne iring kayi se ned-ulaula te kinepekitakita

rin. ² Nengevurun ketà ensi Simon Pedro, si Tomas (ne ed-ingaranan te Seping), si Natanael (ne ebpuun te inged ne Kana lusud te Geliliya), ne elin dema ke deruwa ne anak ni Sibidiyu, wey ruen pà ketà deruwa ne edumdumaan ni Hisus. ³ Ne migkahi en si Simon Pedro te, "Ebpenginsedà e pad."

Migkahi en ke menge rumा rin te, "Eduma key keykew." Arà dà ne mibpendiyan dan en te wayig ne mid-untud dan en te avang se ebpenginsedà, ugaid ne nepewpewaan dan se ebpenginsedà ne warà dan mekeutel.

⁴ Guna su nepawà en ne riyan en si Hisus mid-it-itindeg te beyvey te wayig, ugaid ne waràmekilala dut te edumdumaan din.

⁵ Ne migkahi si Hisus kandan te, "Na engkey, menge suled, nekeutel kew red?"

Midtavak dan te, "Warà en iya!"

⁶ Migkahi si Hisus te, "Iantug niyu ayan se biyala niyu keniyan te egkekewanen te avang niyu su apey kew ebpekeutel." Arà dà ne in-antug dan en ke biyala ran ne wey ran gelengkena ne kenà dan en egkegaga su merakel ke neutel.

⁷ Nekita ran ini ne migkehiyan en dut te edumdumaan ni Hisus ne igkelimù din si Pedro te, "Sikandin ayan ke Kerenan tew!" Guna su nerineg ni Pedro te si Hisus bes arà ne ingkeseluub din maa ke kumbalà din (su mibpenluung ma sikandin) ne midlumbuk en sikandin diyà te wayig se ebpeebpet diyà te ki Hisus. ⁸ Ne mid-untud te avang ke menge rumा rin se ebpeketundug kandin ne eguyud dut te biyala ran ne nekeutel te merakel ne serà. Ne kenà dan utew meriyù dut te tebtevasan te wayig su warà dà buwa mebmehatus ne meyterù.

⁹ Guna su nekerunggù dan en ne iyan dan nekita se mid-ug-uhanga ne baha ne ruen ketà serà ne intuug ne ruen dema pan ne in-init.

¹⁰ Ne migkahi si Hisus kandan te, "Ewita niyu kayi ke duma ne serà ne neutel niyu."

¹¹ Ne midlived si Simon Pedro riyà te avang ne miguyud din en ke biyala ne midsipek te derekelà ne serà, su iyan din kerakel ke neutel ne mehatus wey lelima nepulu wey tetelu. Ne misan iring ketà se kerakel din, ne warà mevindas ke biyala. ¹² Migkahi en si Hisus te, "Kuwa kew en ne ramag kew en!" Ne warà senge etew rà kandan ne neketikà ne ed-insà te, "Entei ka?" su netuenan dan en ma te si Hisus iyan ini ke Kerenan dan. ¹³ Ne migkuwa ni Hisus ke pan diyà te apuy ne mid-umun-umun din kandan, ne iring ded dema ketà ke serà.

¹⁴ Iketelu en ini te kebpekitakita ni Hisus dut te edumdumaan din te nevanew en sikandin.

¹⁵ Nekeipus dan se egkaan ne migkahi en si Hisus diyà te ki Simon Pedro te, "Simon, sikuna ini ke anak ni Juan, maa igkelimù a nu ve te muna pà dut te kegkelimù te rumा?"

"Uya, Kerenan," ke si Simon, "netuenan nu en se igkelimù ku sikuna."

Ne migkahi si Hisus te, "Tugenura nu ini se menge etew ku ne iring te nati te bilibili."

¹⁶ Ne migkahi pà maa si Hisus te, "Simon, sikuna ini ke anak ni Juan, maa igkelimù a nu?"

"Uya, Kerenan," ke si Simon, "netuenan nu en se igkelimù ku sikuna."

Ne migkahi en maa si Hisus te, "Tugenura nu ini se menge etew ku ne iring te bilibili."

¹⁷ Ne migkahi pà maa si Hisus te, “Simon, sikuna ini ke anak ni Juan, maa igkelimù a nu?”

Nerineg dà ni Pedro ne nemutu se hinawa rin su iketelu en ini te kedsulit ni Hisus te ed-insà kandin ke ruen limù din. Arà be ne migkahi en sikandin te, “Netuenan nu ke langun, Kerenan, ne netuenan nu en se igkelimù ku sikuna!”

Migkahi en si Hisus te, “Tugenura nu ini se menge etew ku ne iring te menge bilibili ku. ¹⁸ Sebenarvenar ini se idsempità ku keykew ne embiya ke menguwed pà ne iyan ka edsesebitan, ne misan endei ka egkiyug ne riyà ka ebpesinaru. Ugaid ne embiya egkelukes ke en ne ebpekererepa ka ne ruen ruma ne ebpesebitan keykew ne edtuyuken ka riyà te kenà nu egkiyuhan.” ¹⁹ (Iring ketà se kinekahì ni Hisus su idtarem din ke ralan te kemetayen ni Pedro ne ebpekereyù te Eleteala.) Ne migkahi en si Hisus kandin te, “Duma ka kediey!”

²⁰ Guna su nerineg ni Pedro se lalag ni Hisus ne midlilingey sikandin ne iyan din nekita ne edtundug kandan ke edumdumaan ni Hisus ne igkelimù din iya. Sikandin ini ke midsandig ki Hisus dut te kinelavung dan te warà pà mebpatey si Hisus, ne sikandin ini ke mid-insà ki Hisus te, “Entei ma se ed-ulug keykew, Kerenan?” ²¹ Guna su nekita ni Pedro sikandin ne migkahi en diyà te ki Hisus te, “Kerenan, engkey ve rema se egketemanan kayi te ruma ta ini?”

²² Ne midtavak si Hisus te, “Embiya iyan ku egkesuatan se biviyag pà sikandin taman ketà te kedlived ku kayi te ampew te dunya, ne maa engkey ve se keykew ketà? Kenà merakel se pegitunga nu, ugaid ne ruma kew kedì.”

²³ Ketà ne nekeeneb ke tudtul dut te langun ne eduma ki Hisus te kenà en ebpatet yani se senge etew rut te edumdumaan din. Ugaid ne kenà ma arà ke migkahi ni Hisus se kenè en ebpatet su iyan din migkahi te, “Embiya iyan ku egkesuatan se biviyag pà sikandin taman ketà te kedlived ku kayi te ampew te dunya, ne maa engkey ve se keykew ketà?”

²⁴ Ne ini se senge etew ne edumdumaan din ne migkahi ni Hisus ne warà duma ke kenà siaken iya ke midsurat kayi. Ne langun kayi te nekesurat ini ne nemetmetaan ku, ne edititihusan ku te langun kayi ne benar.

²⁵ Ruen pà lavew merakel ne mid-ulaula ni Hisus ne warè en ikesurat. Su embiya id-amin te edsurat ne antap ku ne misan ini se lusud te linengkevan ne kurang pà ne edtehuan.

Ke Nenged-ulaula dut te Menge Kedserihan ni Hisus

¹ Diyà te ki Teofilo:

Ketà te neuna ne surat ku kenikew ne miguhud ku mekeatag te langun ne mid-ulaula ni Hisus wey ke langun ne kebpenurù din igenat te kinerudsù din te helevek din ² taman en te kebetuna kandin te Eleteala diyà te langit. Ugaid ne ketà te warà pà betuna sikandin ne midteleenan din ke menge etew ne mibpemilì din ne kedserihan din, ne ini se intelaan din ne egenat te Kedesenan ne Ebpetuntul te Menusiyà. ³ Guna su mid-imetayan sikandin ne nevanew en maa ne mibpekitakita sikandin dut te menge kedserihan din. Ne merakel ne tuus ne impekilala rin kandan su titibus te biviyag en sikandin. Su lusud te epat nepulù ne hewii ne kemerakel sikandin mibpekitakita kandan wey mibpengasak sikandin mekeatag dut te Kedatù te Eleteala. ⁴ Keseveka te nevurun dan ne intelaan din kandan se egkahi te, “Kenà kew ed-awà kayi te inged ne Hirusalim, ugaid ne tehari niyu taman te ibehey en keniyu ini se Impasad te Amey ku ne nekahí ku en keniyu neraan. ⁵ Su si Juan, ne wayig se imbunyang din te menge etew. Ugaid ne menge pipira pà ne hewii ne ebunyahan kew te edlumunan dut te Kedesenan ne Ebpetuntul te Menusiyà.”

Ke Kinevatun ki Hisus diyà te Langit

⁶ Senge hewii ne nevurun ensi Hisus wey ke menge kedserihan din ne mid-insaan dan sikandin se egkahi te, “Kerenan, menu ini en be ke hewii ne ibpeulit nu ke sikami ne menge kevuwaran ni Israyil ke andang ne kedatù te sikami?”

⁷ Ne midtavak si Hisus te, “Ke Amey ku rà se ebayàbayà dut te egketemanan kayi te ampew te dunya wey keenu egked-ulaula, ne kenà ini idtuhut ne egketuenan niyu. ⁸ Ugaid ne embiya ebpekeuma en kayi te keniyu ke kedlumun dut te Kedesenan ne Ebpetuntul te Menusiyà,” ke si Hisus, “ne ebpeketelimà kew en te gehem ne sikiyu en ke ebbesabut mekeatag kediey kayi te inged ne Hirusalim, ne ieneb niyu en ini kayi te lusud te pruvinsiya te Hudiya, wey riyà dema te pruvinsiya te Šemeriya, wey taman en diyà te epat ne pediyulu kayi te kelibutan.”

⁹ Neipus din ini te edlag ne mibatun en sikandin se ebpendediyà te langit. Ne kemulu ran pà ne edlingakà su edtengtengan dan sikandin, ne neelangan si Hisus te seholapun ne in-anew ran en te mata.

¹⁰ Edlingakà dan pà diyà te langit se edtengteng te kebetuneen kandin, ne netekew en se deruwa ne meama ne mivelelegkas te meputi ne nekeitindeg diy te uvey ran ¹¹ ne migkahi ran te, “Sikiyu ne menge riyà ebpuun te Geliliya, maan ke ed-itindeg kew kayi se edlingakà diyà te langit? Si Hisus ini ne nekita niyu ne mibatun diyà te langit ne edlived ded kayi, ne ini se kedlived din ne iring ded dut te nekita niyu sikandin ne mibatun diyà te langit.”

Si Matias ke Nepemilì dan ne Nekesambi ki Hudas

¹² Ketà ne mid-awà en ke menge kedserihan dutun te buvungan ne ed-ingaranan te Ulivuwen, ne mid-ulì dan en diyà te Hirusalim ne iyan din keriyù ne menge senge kilù. ¹³ Nekeuma ran diyà te Hirusalim ne mid-ulì dan diyà te sungkù dan diyà te divavew ne mid-ubpaan dan. Mesì dan ini ne si Pedro, si Juan, si Santiago, si Andres, si Felipe, si Tomas, si Bartolome, si Mateo, si Santiago ke anak ni Alfeo, si Simon ke Patriat (ne iyan din meana ne diralem se lengesa rin dut te inged din), wey si Hudas ke anak ni Santiago. ¹⁴ Langun dan ne lelayun eburun su ebpengeningeni diyà te Eleteala, ne mid-amung dema ke menge meritan, elin dutun si Maria ke iney ni Hisus wey ke menge meama ne ari ni Hisus.

¹⁵ Senge hewii ketà ne ruen kevurunan te menge mibperetiyyaya ne menge mehatus dan wey deruwa nepulù se miburun, ne mid-itindeg si Pedro se edlalag. ¹⁶ “Menge suled,” ke sikandin, “kenà egkepakey ne kenà edtumanen ke Lalag te Eleteala ne impesurat te Kedesenan ne Ebpetuntul te Menusiyà ki David dengan. Su impekahi rin neraan te si Hudas se ebpaldad ki Hisus diyà te menge etew ne edsikem kandin. ¹⁷ Si Hudas ne senge etew ne rumat tew su netail ma sikandin ne ed-amung te helevek tew.”

¹⁸ (Ne impemasa ni Hudas te tanà ke kureta ne impevayad din dut te meraat ne ulaula rin te ebpaldad ki Hisus. Ne ketà sikandin neulug ne nekelangkeb ne minatey en, ne mibetu ke hetek din ne nevukayat ke bituka rin. ¹⁹ Nerineg ini dut te langun ne menge etew te Hirusalim, ne mid-ingaranan dan ini se tanà te Ekildama te kinehiyan dan ne iyan din meana ne “Tanà ne Mibayaran te Lengesa.”)

²⁰ “Su ruen impesurat,” ke si Pedro, “diyà te riberù ne ed-ingaranan te Salmu ne egkahi te,

‘Berekat ne meewai ke ed-ubpaan din,
ne warà be med-ubpà dutun,’
ne ruen dema impesurat ne egkahi te,
‘Ini se impehelevok kandin
ne ibpehelevok en te rumat.’

²¹⁻²² “Ketà be,” ke si Pedro, “ne iyan iya se duen senge etew ne egkepemili ne ebpekeamung kenitew te keditithus tew te nevanew en si Hisus ke Kerenan tew. Ebpmilien tew ini dut te menge rumat tew te hewii te kebpekiduma tew ki Hisus ke Kerenan tew igenat te kebpesabut ni Juan mekeatag te kebpembunyag taman te kinekevaturun en ni Hisus diyà te langit.”

²³ Ne mid-ingaran dan te deruwa ne etew ne ebpedsemilien dan ke endei rapit, si Jose ne ed-ingaranan ded ki Barsabas (ne ed-ingaranan ded maa ki Justo), ne senge etew ne si Matias. ²⁴ Ketà ne mibpengeningeni ran se egkahi te, “Kerenan, netuenan nu ke engkey se netahù te hinawa te langun ne menge etew. Ne guntaani ne ipekita nu kenami ke endei se nepemili nu kayi te deruwa ini ²⁵ se egelevek dut te helevek ne intail nu rut te kedserihan nu. Su si Hudas ne mid-ewaan din ini se impehelevok kandin, ne mibpendiyà te egkeubpaan ne edait kandin.” ²⁶ Nekeipus dan te ebpengeningeni ne mibunutbunut dan ne ke ngaran ni Matias se migemew, ne ketà ne ingkeuman sikandin dut te sepulù wey seveka ne kedserihan.

2*Impepengkayi te Eleteala ke Kedesenan ne Ebpetuntul te Menusiyà*

¹ Guna su neuma en ke hewii te pista ne ed-ingaranan te Pintikusti, ne langun ne mibperetiyyaya ki Hisus ne nevurun diyà te seveka ne valey. ² Ne takin ne ruen utew merahing ne nerineg dan ne riyaw ebpuun te langit ne iring te mevandes ne keramag ne egkenegkeneg. Ne arà se dahing ne nekeeneb ketà te lusud te valey ne nevurunan dan. ³ Ne ketà ne nekita ran se iring te regreg te apuy ne nekelayap ne mibpenrenà dut te uman senge etew kandan. ⁴ Ne mid-lumun kandan ke Kedesenan ne Ebpetuntul te Menusiyà ne nekelalag dan te menge kinehiyan ne kenà dan egketuenan ibpepevayà dut te gehem te Kedesenan ne Ebpetuntul te Menusiyà ne mibpelalag kandan.

⁵ Ketà ne hewii ne ruen menge Hudiyanan ne mid-ubpà diyà te Hirusalim ne riyaw ebpuun te idsengelulumpuk ne inged kayi te ampew te dunya ne laus ne edtuman te suhù te Eleteala. ⁶ Guna su nerineg dan arà se merahing, ne denda ran se nevurun ketà. Ne neinuinu ran nevenar su uman seveka kandan ne nerineg din ke kinehiyan din ketà te lalag te menge mibperitiyyaya ki Hisus. ⁷ Neinuinu ran ne negeyip dan se egkahi te, “Engkey ve vuwa ini? Su menge etew ini ne riyaw ebpuun te Geliliya ne edlalag! ⁸ Ne meambe ke iyan ta egkerineg ne ebpekelalag dan te kinehiyan te uman seveka kenita? ⁹ Su sikami ini ne riyaw ebpuun te idsenge inged su ruen ebpuun te inged ne Party, ruen ebpuun te Midya, wey ebpuun te Ilam. Ne ruen ebpuun te Misuputamyà, ebpuun te Hudiya, ebpuun te Kepedusya, ne ebpuun te Puntu wey Asya. ¹⁰ Duen ruma tew ne riyaw ebpuun te Prigiya, ebpuun te Pempilya, ebpuun te Ihiptu wey ebpuun te menge inged ne lusud te Libya ne uvey te inged ne Sirini. Duen dema ebpuun te inged ne Ruma ¹¹ ne menge Hudiyanan wey kenà menge Hudiyanan ne edruyud te menge penduan te Hudiyanan. Duen dema riyaw ebpuun te inged ne Krita wey riyaw ebpuun te inged ne Erabiya. Ne misan warà memeked-iring ke kinehiyan ta, ne nesebutan tew langun su nerineg tew ne nekelalag dan dut te langun ne kinehiyan tew mekeatag te mekegeyip ne mid-ulaula te Eleteala.” ¹² Ne neinuinu ran su warà dan mesebuti ini se ned-ulaula ne mibpein-inseey ran te, “Engkey ve vuwa ini?”

¹³ Ugaid ne ruen duma diyà te kandan ne edsumpeliten dan ini se menge mibperetiyyaya se egkahi te, “Netevereg ini se menge etew!”

Ke Kebpemesabut ni Pedro

¹⁴ Ketà ne mid-itindeg si Pedro elin ke menge ruma rin ne sepulù wey seveka ne kedserihan ne mibpekerahing te lalag din se egkahi te, “Sikiyu ne menge ruma ku ne Hudiyanan wey langun niyu ne menge etew kayi te Hirusalim, pemineha niyu ini se egkehiyen ku su ruen egkepenudtul ku keniyu. ¹⁵ Iyan niyu kunaan ne netevereg en ini se menge ruma ku, ugaid ne kenà egkepakey su edluuk pà ebpemenayik ke andew. ¹⁶ Ini se nekita niyu guntaani,” ke si Pedro, “ne impekahen dengan te Eleteala ki Joel, senge etew ne ebpelambas te Lalag te Eleteala, su migkahi rin te,

¹⁷ ‘Ne ibpelumun ku te langun ne menusiyà ke Kedesenan ne Ebpetuntul te Menusiyà

ketà te mehaan en egkeuma ke mewri ne hewii.

Ne ke inenakan niyu ne menge meama wey meritan
ne ibpesabut te menge etew ini se lalag ku.

Ke menguwed ne menge meama ne ruen ibpekita ku kandan,
ne ke lukes ne menge meama ne ruen ibpetehinep ku kandan.

¹⁸ Uya,’ ke se Eleteala, ‘iring din ded dema ke menge sugsuhuen ku,
ne menge meama wey meritan,
ne ibpelumun ku kandan

ke Kedesenan ne Ebpetuntul te Menusiyà

ketà keuremà,

ne ibpesabut dan te menge etew ini se lalag ku.

¹⁹ Ne ruen ulaula ne mekegeyip

ne ibpekita ku diyà te langit

wey mekeinuinu ne ed-ul-ulaaan ku kayi te tanà,

su ruen egkekita ne lengesa, apuy, wey mekepal ne evel.

²⁰ Duen hewii,’ ke se Eleteala, ‘ne ebmerusirem ke andew,
ne ebmerihà ke vulan iring te lengesa,

embiya mehaan en ebpekeuma ini se mevantug ne hewii

ne kedtimbang te Kerenan dut te langun ne menusiyà.

²¹ Ne ketà ne hewii ne piya engkey ne etew

ne ebpeiruiru se egkahi te, “Ipelihaun a te menge salà ku, Kerenan,”
ne egkepelihau du te kebereduasaan din.’

²² “Sikiyu ne menge rumu ku ne Hudiyanan,” ke si Pedro, “pemineha
niyu ini se egkehiyen ku. Si Hisus ne riyà ebpuun te Nesarit,
ne mepayag ne impepengkayi sikandin te Eleteala, ne ruen gehem
te Eleteala ne riyan en te kandin su nekita ini dut te langun ne
mibpeveelan kandin te Eleteala ne mekegeyip wey ke mid-ulaula rin
ne mekeinuinu. Netuenan niyu ini su kayi mid-ulaula ini te keniyu.

²³ Daan en ne netuenan te Eleteala te ibpalad si Hisus keniyu su ini ke
intahù te itungan din. Ne mibpeimetayan niyu sikandin rut te menge
etew ne mekesesalà ne inlansang dan sikandin diyà te pinebelavag
ne kayu. ²⁴ Ugaid ne impeliyu te Eleteala si Hisus dut te inged ne
Iveyaan su mibanew rin, su kenà egkepakey ne egkeveyveyaan si Hisus
te kemetayen. ²⁵ Su ruen impesurat ni David rengan mekeatag ki Hisus
ne egkahi te,

‘Layun edumà kedi ke Kerenan tew;

uya, ini en te uvey ku sikandin, tembù kenà a egkeandek.

²⁶ Engketà arà ne mehalew nevenar ini se hinawa ku,
ne misan kayi te lalag ku ne egketusan nevenar.

Ne misan ebpatey a ne idsarig ku kandin ini se lawa ku,

²⁷ su netuenan ku te kenà din idtahak ini se gimukud ku
diyà te inged ne Iveyaan;

siaken ne laus ne edtuman te suhù din,

ne kenà din idtahak ini se lawa ku te egkeredak dà.

²⁸ Impekita rin kediey ke ibayà te ebpendiyà

te umur ne warà edtemanan din;

wey mehalew a nevenar

su ini en te kedì sikandin.’

²⁹ “Na, menge suled ku,” ke si Pedro, “kenà ku idsanggel te egkehiyen
ku keniyu mekeatag dut te tipewna ne datù tew rengan ne si David, ne
neuhet en ne minatey ne inleveng ne kemulu red lavew ini se leveng

din taman guntaani. ³⁰ Senge etew si David ne ebpelambas te Lalag te Eleteala rengan, ne netuenan din ke impasad te Eleteala kandin. Su iyan impasad kandin te Eleteala ne mevaher ne ruen senge etew ne kevuwaran ni David ne egkevaluy ne ratù keuremà iring kandin. ³¹ Netuenan neraan ni David ini se ed-ul-ulaan te Eleteala ketà te akir din ne hewii, tembù be nelalag din mekeatag dut te kegkevanew ni Hisus, ke Impasad te Eleteala rengan ne Ebperetuen te langun, su migkahi si David te,

‘Warà sikandin intahak
diyà te inged ne Iveyaan;

ne warà neredak ke lawa rin diyà te leveng.’

³² Ne ini se nekahi ni David ne iyan iya si Hisus,” ke si Pedro, “ne mibanew te Eleteala, ne langun dey ne neketithus ne benar ini su nekita kayi te mata rey. ³³ Mibatun te Eleteala si Hisus ne riyà impepinuu te rapit te egkekewanen te Amey rin ne Eleteala, ne imbehey kandin dut te Amey rin ke Kedesenan ne Ebpetuntul te Menusiyà ne impasad kandin. Ne imbehey red kandin lavew ke ketengdanan te ibpepengkayi rin ke Kedesenan ne Ebpetuntul te Menusiya dut te sikami. Ne ini se nekita niyu wey nerineg niyu ne ini se mekegeyip ne mid-ulaula dut te Kedesenan ne Ebpetuntul te Menusiyà ne imbehey rin kenami. ³⁴ Na, kenà si David ini se mibatun diyà te langit ugaid ne ruen migkahi rin te,

‘Migkahi ke Eleteala ketà te Kerenan ku te:

Kayi ka pinuu te rapit te egkekewanen ku

³⁵ taman te ebpenggiekan ku

ke menge kunterà nu.’

³⁶ “Tembù be,” ke si Pedro, “langun te sikita ne menge kevuwaran ni Israyil ne iyan iya se edsebuten tew te si Hisus ini ne inlansang niyu diyà te pinebelavag ne kayu ne sikandin ke netendù te Eleteala ne Kerenan tew wey ke Impasad ne Ebperetuen te langun.”

³⁷ Nerineg ini rut te menge etew ne iring te migkeres ke atey ran ne migkehiyan dan si Pedro wey ke ruma ne menge kedserihan te, “Menge suled, engkey en buwa se ed-ul-ulaan dey?”

³⁸ Ne migkahi si Pedro te, “Engkeri niyu ke meraat ne ed-ul-ulaan niyu ne pebunyag kew, uman seveka kenyi, su tuus te mibpesakup kew en ki Hisu Kristu. Ne ebpeseharen te Eleteala ini se meraat ne ulaula niyu ne ke Kedesenan ne Ebpetuntul te Menusiyà ne ibpeubpà din kayi te kenyi. ³⁹ Su ini ke impasad te Eleteala kenyi wey ke menge kevuwaran niyu abpeg te langun ne menge etew ne ed-ubpà diyà te meriyù, langun ne ibpeuvey dut te Kerenan tew ne Eleteala ne eduma kandin.”

⁴⁰ Ne merakel pà se lalag ni Pedro te edneyùneyù kandan ne meilut se kebuyù din se egkahie te, “Pekeriyù kew dut te menge etew te guntaani ne ed-ulaula te meraat su edusaan dan te Eleteala!” ⁴¹ Ne merakel se mibperetiyyaya dut te lalag ne impesabut ni Pedro ne mibpebunyag dan tuus te ebperetiyyaya ran en ki Hisus. Ne arà ne hewii ne menge tetelu ne ngivu se menge mibperetiyyaya ne nekeuman dut te menge etew ne mibperetiyyaya ki Hisus. ⁴² Uman gewii ne ebpemineg dan dut te ibpenurù te menge kedserihan, ne neseveka ke hinawa dut te langun ne menge mibperetiyyaya ki Hisus. Langun

dan ne mid-amung te egkaan te pan su kedtenuri ran dut te kinepatey ni Hisus, ne mid-amung dan lavew te kebpengeningen te Eleteala.

Ke Nenged-ulaula dut te Menge Mibperetiyyaya ki Hisus

⁴³ Ne merakel se mibeelan ne mekegeyip wey mekeinuinu ne ulaula dut te menge kedserihan ni Hisus, ne ketà ne neandek ke langun ne menge etew. ⁴⁴ Ne langun ne menge mibperetiyyaya en ki Hisus ne meilut se kegkeseveka ran, ne piya engkey se kearen dan ne ibpevegbehayi ran dut te menge ruma ran. ⁴⁵ Ne mibpasa ran ke menge kearen dan wey tanà dan ne ke elehà din ne mid-umun-umun dan diyà dut te langun ne menge ruma ran su atag dut te kurang kandan. ⁴⁶ Uman gewii ne langun dan ne eburun diyà te Nekebpuru ne valey te Eleteala. Ne egkeseveka ran lavew ne egkaan diyà te menge valey ran, ne mehalew neveran se hinawa ran, ne mibehey ran te ruma ran te lila ne hinawa ran. ⁴⁷ Ne mideyù dan te Eleteala, ne egkeedatan dan dut te langun ne menge etew. Ne uman gewii ne ruen menge etew ne mibperetiyyaya ki Hisus ke Kerenan tew ne ini ne menge etew ne ingkeuman te Kerenan dut te langun ne mibperetiyyaya.

3

Ke Pungkù ne Neulian

¹ Senge hewii ne mibpendiyà si Pedro ki Juan te Nekebpuru ne Valey te Eleteala ketà ne edluuk en ebpemenaug ke andew su ini se netahù ne hewii te kebpengeningen. ² Ne diyà te Nekebpuru ne Valey te Eleteala, ketà te bengawan ne ed-ingaranan te Mekempet ne Bengawan, ne ruen meama ne ebpememuyù ne nepungkù igenat dà te ked-enaka kandin. Uman gewii ne id-ated sikandin ketà te bengawan su ebpememuyù te kureta dut te menge etew ne edlusud dut te Nekebpuru ne Valey te Eleteala. ³ Guna su nekita rin ne edlusud en si Pedro ki Juan, mibuyuen sikandin te kureta. ⁴ Midtengtengan sikandin ni Pedro ki Juan ne migkahi si Pedro te, “Tengtengi key nikuna!” ⁵ Midlingakà din sikandin su kunaan din ke ruen kureta ne ibehey kandin.

⁶ Ugaid ne migkahi si Pedro te, “Warà en kureta ku, ugaid ne ini se ruen kayi te kedì ne ivehey ku keykew. Ipepevayà dut te gehem te ngaran ni Hisu Kristu ne riyà ebpnuun te Nesarit, ne ipanew ka!” ⁷ Ketà ne migeweran ni Pedro ke belad din ne kewanau su ibpeitindeg din. Arà dà ne mibmeveher en ke menge paa dut te meama. ⁸ Ne mid-umbetut se ed-itindeg ne mid-ipanew. Ketà ne miduma kandan te edlusud dut te Nekebpuru ne Valey te Eleteala ne midlinglingketew se ed-ipanew ne edeyù te Eleteala te keupiya rin. ⁹ Nekita rut te menge etew ketà ne ed-ipanew ne edeyù te Eleteala. ¹⁰ Guna su nekilala ran te sikandin ke pungkù ne ebpimpinuu riyà te bengawan ne ed-ingaranan te Mekempet, ne neinuinu ran neveran wey negeyip dan dut te ned-ulaula rin.

Ke Kebpesabut ni Pedro Diyà te Nekebpuru ne Valey te Eleteala

¹¹ Ketà te egawed pà ke meama ki Pedro wey ki Juan diyà te palàpalà ne ed-ingaranan te Palà-palà ni Salomon, ne mibpelelahuy ke menge etew se eburun ketà su negeyip dan neveran. ¹² Guna su nekita ni Pedro ne nevirun en ke menge etew ne migkehiyan din sikandan te, “Menge ruma ku ne kevuwaran ni Israyil, meambe ke negeyip

kew kayi te ini ne ned-ulaula? Ne meambe ke edtengtengan key nikiyu? Maa, kunaan niyu ke kenami rà ne gaga se nekeipanew ini se meama etawa mekeatag te ketidtu rey ne nekeipanew en ini? Kenà! ¹³ Ugaid ne ke Eleteala ne iyan ed-erapen dut te menge keep-epuan tew ne si Abraham, si Isaac wey si Jacob,” ke si Pedro, “ne impepurù din ke sugsuhuen din ne si Hisus su mibatun din. Ugaid te kayi pà sikandin te ampew te dunya, ne impalad niyu sikandin diyà te menge egkeunuten niyu diyà te gubirnu niyu su ebpeimetayan. Ini se mid-ulaula niyu misan ibpeliyu perem sikandin ni Pilatu ke gubinedur, ugaid ne warà kew medtuhut su mid-engkenà kew kandin diyà te etuvangan ni Pilatu. ¹⁴ Metilak nevenar se atey ni Hisus wey metidtu sikandin, ugaid ne warà niyu tuhuti ne ibpeliyu sikandin ni Pilatu su nasì niyu pà buyua te iyan din ibpeliyu rut te bilengguan ke senge etew ne terevunù. ¹⁵ Ne mibpeimetayan niyu sikandin, ke ebpuunan te umur ne warà edtemenan din; ugaid ne mibanew te Eleteala sikandin. Ne ebpeketitihukey ketà te nevanew en sikandin su nekita rey. ¹⁶ Na mekeatag te ini se pungkù ne behu pà ne nekeipanew,” ke si Pedro, “ne mibmevaher en ke menge paa rin su egenat dut te gehem ne ibpepevayà te ngaran ni Hisus. Su ini se etew ne egkekilala niyu wey ini se ned-ulaula rin ne nekita niyu ne mid-ulaula ini ni Hisus atag dut te kebperetiyyaya rey kandin. Uya, ke kebperetiyyaya rey ki Hisus se ingkeulii rin iring kayi te nekita niyu en langun.

¹⁷ “Na, menge suled,” ke si Pedro, “netuenan ku te sikiyu wey ke menge unuten niyu ne ini se mid-ulaula niyu ki Hisus ne mibeelan niyu ini su warà niyu mesebuti ke meana rut te mid-ulaula niyu kandin. ¹⁸ Ugaid ne ini se mid-ulaula niyu ne ini ke ralan te kegketuman din ke Lalag te Eleteala ne impesurat din dengan dut te langun ne menge etew ne ebpelambas te lalag din, su ruen nekahri rin neraan mekeatag dut te Impasad din ne Ebperetuen te langun, ne adresayen sikandin. ¹⁹ Na,” ke si Pedro, “pemedsendit kew wey engkeri niyu ini se meraat ne ed-ul-ulaan niyu, ne ibehey niyu ke hinawa niyu te Eleteala su apey egkepesahad din ke menge meraat ne ed-ul-ulaan niyu. Embiya ini se ed-ul-ulaan niyu, ²⁰ ne egkeuma ke hewii ne ebeg-eten ke hinawa niyu te Eleteala ne ibpepengkayi rin te ampew te dunya si Hisus, ini ke midtendù din neraan ne Impasad din ne Ebperetuen kenyi. ²¹ Ugaid ne riyà pà ed-ubpà si Hisus te langit taman te kenà pà egkeuma ke hewii ne ebehuwen dut te Eleteala ke langun taman. Ne an pà ne edlived sikandin kayi te ampew te dunya iring dut te impesabut te Eleteala rengan dut te menge etew ne ebpmelambas te Lalag din. ²² Su iyan migkahni Moises dengan dut te keep-epuan tew ne menge Hudiyanan ne, ‘Ruen edsuhuen dut te Eleteala ne Kerenan tew ne ibpepengkayi rin te kenyi ne ebpelambas te Lalag din iring dut te siaken, ne senge etew sikandin dut te ruma niyu ne Hudiyanan. Iyan iya se tumana niyu ke langun ne egkehiyen din kenyi. ²³ Ne piya engkey ne etew ne kenà edtuman te lalag din ne edereeitan sikandin su kenà ragkes dut te menge etew te Eleteala,’ ke se impesurat ni Moises dengan.

²⁴ “Na,” ke si Pedro, “ke menge etew ne ebpelambas te Lalag te Eleteala rengan igenat ki Samuel wey ke ebpeketundug kandin, langun dan ne pinekahai te Eleteala mekeatag te ini ne mibpayag neraan

mekeatag ke engkey se egked-ulaula guntaan. ²⁵ Ne ini ke impasad te Eleteala rengan ne impepevayà din dut te menge etew ne ebpelambas te lalag din ne ini ne pasad din keniyu, su sikiyu ne nekeuman dut te impasad te Eleteala rut te menge keep-epuan niyu. Su ruen impasad te Eleteala dut te keep-epuan tew ne si Abraham se egkahi te, ‘Kayi ibpepevayà te kevuwaran niyu ne ebpeneuven ku ke langun ne menusiyà kayi te ampew te dunya.’ ²⁶ Tembù be,” ke si Pedro, “mibpemili te Eleteala si Hisus ne sugsuhuen din ne impeuna rin impepengkayi te kenitew ne menge Hudiyanan su apey ki ebpeneuva te Eleteala su ibpeengked ki rin dut te meraat ne ed-ul-ulaan tew.”

4

Ke Kegkukuma ki Pedro wey ki Juan

¹ Ne ketà te kemulu pà edlalag si Pedro wey si Juan te menge etew, ne mid-veyen en kandan ke menge terebpelengesa, ke mepurù dut te menge ebattey kayi te Nekebpuru ne Valey te Eleteala, wey ke menge Sadyusiyu. ² Nengeepes dan dut te impenurù eni Pedro te kegkevanew ni Hisus se tuus te egkevanew red keuremà ke menge etew ne minatey ne mibperetiyaya ki Hisus. ³ Ketà ne midsigkem dan si Pedro ki Juan ne geina te meapun en arà ne mibilanggù dan taman te nepawà. ⁴ Ugaid ne merakel se mibperetiyaya ki Hisus dut te menge etew ne nekerineg te lalag ni Pedro, ne arà ne mid-iseg ke kerakel dut te meama rà ne menge lelima ne ngivu.

⁵ Ketà te neketundug ne hewii, ne nevurun dut te inged ne Hirusalim ke menge egkeunutan te Hudiyanan, ke menge pekilukesen, wey ke menge meyterù te penduan. ⁶ Elin dema rutun ne si Anas ke Pinekemepurù dut te menge Terebpelengesa, si Keyipas, si Juan wey si Alejandro, wey ruen duma ne menge suled dut te Pinekemepurù ne Terebpelengesa. ⁷ Ne impeetuvang dan si Pedro wey si Juan ne mibpenginsaan dan te, “Engkey ki gehem kayi te ingkeulii rin ini se etew? Ne endei kew megkuwa te ini ne gehem?”

⁸ Ne midlumun ki Pedro ke Kedesenan ne Ebbetuntul te Menusiyà ne midtavak se egkahi te, “Sikiyu ne menge egkeunutan dey wey menge pekilukesen dey, ⁹ embiya iyan niyu id-insà kenami mekeatag kayi se meupiya ne ned-ulaula te ini ne etew ne daan ne pungkù wey embiya iyan niyu id-insà ke engkey ki gehem se ingkeulii rin, ¹⁰ ne sikiyu wey langun ne menge etew te Israyil ne sebuta niyu te iyan kebpekeitindeg kayi te meama ne ini se etuvangan niyu ne neulian en su atag dut te gehem ne ibpepevayà dut te ngaran ni Hisu Kristu ne riyà ebpuun te Nesarit. Si Hisus ini ke impelansang niyu riyà te pinebelavag ne kayu, ugaid ne mibanew en te Eleteala. ¹¹ Si Hisus ini se nekahi dut te Lalag te Eleteala ne impesurat din dengan se egkahi te,

‘Ke pelaus ne mid-engkeran
dut te sikiyu ne ebpemevaly
su kunaan niyu ke warà rantek din,
ne iyan en iya ini
nepemili ne segkad te valey.’

¹² Ne sikandin dà se ebpekepeliyu keytew rut te keberedusaan tew,” ke si Pedro, “su warà duma ne kayi te ampew te dunya ne imbehey te Eleteala ne ebpekegaga ne ebpekepeliyu keytew su sikandin dà.”

13 Ne guna su nekita rut te menge Perekukum te kenà egkeandek si Pedro wey si Juan ne edlagal ne negeyip dan su netuenan dan te mevavà se nepengedian kayi te deruwa su menge etew rà dè duen. Ne ketà ne netenuran dan te midumdumaan dan ni Hisus. ¹⁴ Ne warà dan mekekahikahi su nekita ran ini se meama ne daan ne pungkù ne neulian ne ed-itindeg ketà te uvey ni Pedro ki Juan. ¹⁵ Tembù be impeluwal dan en ketà te egkukuman te mibpein-inseey ini se menge Perekukum te, ¹⁶ “Engkey se ed-ul-ulaan tew kayi te menge etew ini?” ke sikandan. “Su netuenan te langun ne menge etew kayi te Hirusalim te mibaal dan te ulaula ne mekegeyip nevenar, ne kenà tew igkeparew. ¹⁷ Ugaid,” ke sikandan, “ne ibaag tew kandan te kenà dan en maa ebpekelalag te misan engkey ne etew mekeatag dut te ngaran ni Hisus su apey kenà pà ebpekeeneb ini rut te menge etew.”

18 Ketà ne mid-umew ran si Pedro ki Juan ne imbaag dan kandan ne migkahi te, “Kenà niyu en be igkepenurù etawa ibpekelalag ini mekeatag ki Hisus.”

19 Ugaid ne migkahi si Pedro wey si Juan te, “Pegpegitunga niyu ke endei rapit te metidtu riyà te etuvangan te Eleteala te ebperumaruma key kenyi etawa ebperumaruma key te Eleteala. ²⁰ Su kenà egkeapey ne ebpekeengked key se ebpemenudtul dut te nekita te mata rey wey nerineg dey.”

21 Meilut nevenar se kinebaag kandan dut te menge Perekukum, ne ketà ne impeliyu ran en. Warà dan metikà te ebpekesakit si Pedro ki Juan su neandek dan dut te langun ne menge etew ne edeyù te keupiya te Eleteala su atag dut te ini ne ned-ulaula. ²² Ne ini se nepungkù ne etew ne neulian dut te mekegeyip ne ulaula ne labi en epat nepulù se rahun din.

Mibpengeningeni ke Menge Mibperetiyyaya te Ebeheren te Eleteala ke Hinawa Ran te Ibpmenudtul Dan ke Lalag Din

23 Guna su impeliyu ran en si Pedro ki Juan ne mid-ulì dan en diyà te menge ruma ran ne mibperetiyyaya, ne mibpenudtul dan en ke langun ne migkahi dut te menge terebpelengesa wey menge pekilukesen.

24 Nerineg dà dut te menge mibperetiyyaya ne nevurun dan te neseveka se hinawa ran te ebpengeningeni te Eleteala. “Is, ke Eleteala ne ebayàbayà te langun, sikuna ke midlimbag te langit wey tanà wey ke rahat wey langun ne tahù ketà. ²⁵ Su impekahai nu rut te keep-epuan dey ne si David ne sugsuhuen nu ibpepevayà dut te Kedlumun te Kedesenan ne Ebpetuntul te Menusiyà ne migkahi te,

‘Meambe ke neepes ke menge etew ne kenà Hudiyanan?

Ne meambe ke netahù te itungan dut te menge etew

se ed-ulaula ran te ed-atu ki Hisus

su ini ne ulaula ne kenà dan egketuman.

26 Su mibpenehana en ke menge datù kayi te ampew te dunya,

ne nevurun en ke menge egkeunutan

su ed-atu dut te Eleteala ne Kerenan;

uya, egkunterà dut te Impasad din ne Ebperetuen te langun.’

27 Is, Eleteala,” ke sikandan, “ini se impekahai nu ki David dengan ne netuman en su nevurun en ke menge Hudiyanan wey ke kenà menge Hudiyanan diyà te engki Hirudis wey si Gubinedur Punsiyu Pilatu kayi te inged ne Hirusalim su neseveka ran en ne egkunterà ki Hisus, ini

se sugsuhuen nu ne meputì nevenar se atey rin, ini se Impasad nu ne Ebperetuen te langun.²⁸ Iyan dan mid-ulaula ne ini se raan en ne netahù te itungan nu ne egked-ulaula. Netuenan nu ini su ruen gehem nu wey ini se kiyug nu ne egked-ulaula.²⁹ Na guntaani, Kerenan, netuenan nu ini se mevaher ne menge imbaag dan kenami. Behera nu ke hinawa rey ke sikami ne menge sugsuhuen nu, su apey key kenà egkeandek te kebpenudtul dut te lalag nu.³⁰ Iipayag nu ke gehem nu su apey egkeulii ke menge ederaru wey ipekita nu ke ebeelan nu ne mekeinuinu wey ulaula nu ne mekegeyip ibpepevayà dut te ngaran ni Hisus ke sugsuhuen nu ne meputì nevenar se atey rin.”

³¹ Guna su nekeipus dan se ebpengeningen ne neheram dan ne migkugel te Eleteala ini se baley ne nevurunan dan. Ne langun dan ne midlumunan dut te Kedesenan ne Ebpetuntul te Menusiyà, ne ketà ne mibmevaher en ke hinawa ran te ebpemenudtul dut te Lalag te Eleteala te warà kegkeandek dan te piya engkey ne etew.

Mibpevegbehayà te Langun ne Menge Kearen Dan ke Menge Mibperetiyyaya ki Hisus

³² Langun dan ne mibperetiyyaya ki Hisus ne egkeseveka ke itungan dan wey hinawa ran. Warà seveka kandan ne nekepegitung dut te kandin ne menge aren ne kandin dà, ugaid ne mibpevegbehayà dan te langun ne kearen dan.³³ Ne ini se menge kedserihan, ne dekelà se gehem dan te ebpesabut te nevanew en si Hisus ke Kerenan tew. Ne rekèlà se penaub te Eleteala dut te langun dan.³⁴ Tembù be warà seveka kandan ne ruen kurang din dut te keuyehan, su embiya ruen seveka ne ruen kurang din ne ke menge ruma rin ne ebpasa te tanà etawa baley ran ne ke elehà din³⁵ ne ibehey ran dut te menge kedserihan su apey ed-um-umunen dut te langun atag dut te kurang kandan.

³⁶ Ketà ne hewii ne ruen senge etew ne ed-ingaranan ki Jose ne diyà in-anak te Sipru. Hudiyanan sikandin ne kevuwaran ni Levi, ne iyan in-ingaran kandin dut te menge kedserihan ne si Bernabe (ne iyan din meana ne “Ke Ebag-et te Hinawa te Ruma Rin”).³⁷ Ne ruen tanà ni Bernabe ne mibpasa rin ne ke elehà ketà ne imbehey rin dut te menge kedserihan.

5

Si Ananias ki Sapira

¹ Ne ruen meama ketà ne ed-ingaranan ki Ananias ne ke esawa rin ne ed-ingaranan ki Sapira. Duen tanà dan ne mibpasa ran,² ugaid ne ruen duma dut te elehà ne intahak din ki Sapira ne warà din ipayag su kiyug ded dema dut te esawa rin. Ne ini se nesamà imbehey rin dut te menge kedserihan se egkahi te ini en imbe ke langun ne elehà din.

³ Ne migkehiyan sikandin ni Pedro te, “Ananias, meambe ke midtuhut ka ne ke datù te pekaid se ebayàbayà te hinawa nu su midtarùtarù ka rut te Kedesenan ne Ebpetuntul te Menusiyà? Su ruen intahak nu ne elehà dut te mibpasa nu ne tanà.⁴ Gewii te warà nu pà mebpasa ke tanà nu, ne keykew ayan. Ne guna su mibpasa nu en, ne sikuna red lavew se ebayàbayà dut te elehà din. Na, meambe ke nepegitung nu se ini ne ulaula ne meraat te iring kayi? Su kenà

etew rà se edterùteruan nu, ugaid ne ke Kedesenan ne Ebpetuntul te Menusiyà.”

⁵ Nerineg dà ini ni Ananias, ne nepiley en sikandin su minatey en ne langun dut te nekerineg te ini ne ned-ulaula dan ne nengeandek nevenar. ⁶ Ketà ne mid-uvey ke menge menguwed ne meama ne mibukusan dan ke bangkey rin ne mid-ewit dan su idleveng.

⁷ Nekesahad te menge tetelu ne uras ne nekeuma en ke esawa ni Ananias, ugaid ne warà din metueni ini se netemanan ni Ananias. ⁸ Ne migkehiyan sikandin ni Pedro te, “Menu, ini rè be iya ke langun ne elehà dut te mibpasa niyu ne tanà? Idtarem nu kedi!”

“Uya,” ke se meritan, “ayan dà iya langun.”

⁹ Ne migkahi en maa si Pedro te, “Meambe ke sikew wey ke esawa nu ne neupakat te ebpenggeraman niyu ke Kedesenan ne Ebpetuntul te Menusiyà? Su ayan en maa ke menge meama ne midleveng dut te esawa nu, ne ed-ewiten ke red dema nikandan su idleveng ka!”

¹⁰ Arà dà ne nepileyen sikandin ketà te sineruhan ni Pedro su minatey en. Guna su midlusud en ini se menge menguwed ne meama ne nekita ran ne minatey en sikandin, ne mibinting dan en diyà te liyu ne inleveng dan en maa diyà te uvey te leveng te esawa rin. ¹¹ Ketà ne neandek nevenar ke langun ne menge mibperetiyyaya ki Hisus abpeg dut te langun ne nekerineg dut te ini ne ned-ulaula.

Mibeelan dut te menge Kedserihan ni Hisus ke Ulaula ne Mekegeyip wey Mekeinuinu ne Ned-ulaula

¹² Ne merakel se ulaula ne mekegeyip wey mekeinuinu ne ned-ulaula ne mibeelan dut te menge kedserihan ni Hisus diyà dut te menge etew. Ne langun dut te menge mibperetiyyaya ki Hisus ne lelayun egkevurun diyà te ed-ingaranan te “Palàpalà ni Salomon”. ¹³ Ne ke menge etew ne warà pà mibperetiyyaya ki Hisus, ne warà dan meketikà ne ed-amur ketà te kandan, misan dekelà se ked-adat kandan dut te langun ne menge etew. ¹⁴ Ugaid ne nasi ne mid-iseg ke kerakel te menge meama wey menge meritan ne mibperetiyyaya ki Hisus ne nekeuman dut te langun ne mibperetiyyaya. ¹⁵ Ne geina te ruen neveelan ne mekegeyip dut te menge kedserihan, ne mid-ewit dan ke menge etew ne ederaru diyà te kilid te ralan ne ibpeirehà diyà te kama wey diyà te ikam su apey egketerapes dan dut te alung ni Pedro embiya ebpevayà sikandin. ¹⁶ Ne denda ne menge etew se nekeuma ne riyà ebpuun te nekeerivey te Hirusalim ne menge inged su ebpengewit dan te ebpenderaru wey ke menge midsuukan te vusew, ne langun dutun ne neulian.

Impevilanggù ke Menge Kedserihan dut te Menge Perekukum

¹⁷ Ketà ne ini se Pinekemepurù te menge Terebpelengesa wey ke menge ruma rin ne menge Sadyusiyu, ne dekelà nevenar se kegkesihì ran dut te menge kedserihan, tembù be midsuhù dan ¹⁸ te impesigkem ini se menge kedserihan ne mibilanggù dan. ¹⁹ Ugaid ne arà ne kerukileman ne ruen suluhuen te Kerenan ne mibpendiyà te bilengguan ne mibpuwasan din ke gumawan ne impelihawang din ke menge kedserihan se egkahi te, ²⁰ “Pendiyà kew te Nekebpuru ne Valey te Eleteala ne pesebuti niyu dut te langun ne menge etew mekeatag dut te ini se umur ne behu ne riyà ebpuun te ki Hisus.” ²¹ Ketà ne midtuman ke menge kedserihan dut te ingkahi kandan dut

te suluhuen te Kerenan kandan su egkepkepawà ne mibpendiyà dan en te Nekebpuru ne Valey te Eleteala ne mibpenurù dan te menge etew.

Guna su nekeuma en dutun ini se Pinekemepurù te menge Terebpelengesa wey ke menge ruma rin, ne impetawag din en ke langun ne menge pekilukesen te menge Hudiyanan su ruen kevurunan te menge perekukum. Ketà ne midsuhù dan diyà te bilengguan su ibpeangey ke menge kedserihan.²² Nekeuma ini se midsuhù diyà te bilengguan, ne wara en ketà ke menge kedserihan. Ketà ne mid-ulì dan en diyà te menge perekukum ne mibpenudtl dan.²³ “Guna su nekeuma key diyà te bilengguan,” ke sikandin, “ne nekita rey se mibpintuan ini se menge gumawan ne langun dut te ebanter te dutun te uvey te menge gumawan. Ugaid ne wey rey puwasi ini se gumawan ne warà nekita rey diyà te lusud.”²⁴ Guna su nerineg ini dut te kepitan te menge ebanter te Nekebpuru ne Valey te Eleteala wey ke menge mepurù te menge terebpelengesa, ne neinuinu ran nevenar ne ebpein-inseey ran ke engkey se ned-ulaula rut te menge kedserihan.

²⁵ Na ruen etew ne midlusud ne migkahi kandan. “Arà se menge etew ne impevilanggù niyu,” ke sikandin, “ne ini en te lusud kayi te Nekebpuru ne Valey te Eleteala se ebpenurù te menge etew!”²⁶ Arà dà ne mibeyaan en dut te kepitan te menge ebanter wey ke menge ruma rin ne mid-ewit dan ini se menge kedserihan. Ugaid ne warà dan pekesekiti sikandan su neandek dan dut te menge etew su kalu ke ebpenrumbehan dan te batu.

²⁷ Mid-ewit dan ini se menge kedserihan ne impeitindeg dan kayi te etuvangan te menge Perekukum. Ne migkehiyan dan dut te Pinekemepurù te menge Terebpelengesa te,²⁸ “Imbaag dey en keniyu neraan,” ke sikandin, “te kenà niyu en ipenurù ke mekeatag te ngaran kayi te etew ini ne edumaan niyu. Ugaid ne intey niyu ve ini se mid-ulaula niyu! Su ini se impenurù niyu ne nekeeneb en kayi te lusud te Hirusalim. Ne kenà ini rà se mid-ulaula niyu su iyan key egkesenditan te kineimetayi kayi te etew ne edumaan niyu.”

²⁹ Ketà ne migkahi si Pedro wey ke menge ruma ne menge kedserihan te, “Iyan dey iya edumaan ne ke suhù te Eleteala, kenà ke suhù ne mibeelan dà te etew.³⁰ Su si Hisus ini,” ke sikandin, “ne mibpeimetayan niyu su impelansang niyu diyà te pinebelavag ne kayu, ugaid ne mibanew sikandin te Eleteala, ke Eleteala ne ebpengerapen dut te menge keep-epuan tew rengan.³¹ Uya, mibanew sikandin te Eleteala ne mibatun din diyà te langit ne riyaw impepinuu sikandin te egkekewanen te Eleteala su guntaani ne sikandin ke Kerenan tew wey sikandin se ebpeliyu keytew rut te keberedusaan tew te Eleteala su apey sikitew ke menge kevuwaran ni Israyil ne embiya ebpmedsendit kiyu wey ed-engked dut te meraat ne ed-ul-ulaan tew ne ebpeseharen din.³² Ne sikami,” ke si Pedro, “ne ebpeketitihuus key te langun kayi ne benar, abpeg dut te Kedesenan ne Ebpetuntul te Menusiyà ne edtitihuus dema su ebpelumunan kandin te Eleteala ke langun ne edtuman te menge suhù din.”

³³ Nerineg dà dut te menge Perekukum ne neepes dan nevenar ne egkiyuhan dan en te ebpeimatey ini se menge kedserihan.³⁴ Ugaid ne senge etew kandan se mid-itindeg. Peresiuk sikandin ne ed-ingaranan ki Gemalil ne meyterù te penduan wey egkeedatan dut te langun ne

menge etew. Ne mibuyù sikandin te ibpeliyu pà ke menge kedserihan,³⁵ ne migkahi rin dutun dut te menge ruma rin ne Perekukum te, "Sikiyu ne menge ruma ku ne menge kevuwaran ni Israyil, ebanterey kiyu kayi te kineped-ulaula tew te ini ne menge etew.³⁶ Embiya egketenuran niyu te warà pà utew meuhet ne ruen senge etew ne midlepew ne ed-ingaranan ki Tewdas ne uvag te sikandin en ke egkeedatan ne etew. Ne ruen menge epat nehatus ne menge meama ne miduma kandin, ugaid ne kegkepatey kandin ne nenekedsuwey en ini se menge miduma kandin. Ne ke menge ulaula ran ne neengked.³⁷ Neiseg-iseg ketà ne ruen maa senge etew ne midlepew ne ed-ingaranan ki Hudas ne riyà ebpuun te Geliliya su arà ne hewii ne ibpesurat dut te langun ne menge etew ke menge ngaran dan diyà te inged ne mid-enakan kandan. Ne ruen dema miduma kandin, ugaid ne kegkepatey dema kandin ne nenekedsuwey en ke langun ne miduma kandin.³⁸ Tembù be," ke si Gemalil, "ini ne ulaula ne iyan ku egkekahi ne kenà tew en ed-ul-ulaan se ebpekesekitan tew ini se menge etew. Ebeleharen tew en, su embiya kayi rà ebpuun te etew ini se netahù te itungan dan wey ebeelan dan ne kenà ebpekeiseg,³⁹ ugaid ne embiya riyà ebpuun te Eleteala ini, ne kenà niyu egkegaga te ebpeengked sikandan. Ne kenà ketà dà taman su egkevaluy kew ne egkunterà te Eleteala."

Ketà ne mibperumaruma ke menge Perekukum dut te lalag ni Gemalil.⁴⁰ Impelusud dan en maa ke menge kedserihan ne impelambit dan sikandan. Ketà ne imbaag dan en maa kandan te kenà dan en ebpekelalag mekeatag dut te ngaran ni Hisus, ne impeliyu ran en.⁴¹ Ketà ne kineawà dut te menge kedserihan kayi te menge Perekukum ne mehalew ran su iring te iyan pegitungan te Eleteala ne edait dan ne egkerasey atag dut te kebperetiyyaya ran ki Hisus.⁴² Ne uman gewii ne riyà dan te Nekebpuru ne Valey te Eleteala wey riyà te baley te menge etew ne nasi dan pà ne mid-iseg se kebpenurù dan wey ibpesabut dan ke Meupiya ne Tudtul mekeatag ki Hisus, ke Impasad te Eleteala ne Ebperetuen te langun.

6

Ke Pitu ne Etew ne Nepemilì dut te Menge Kedserihan ne Nevehayan te Helevek

¹ Ketà te arà ne hewii te ed-iseg-iseg en ke kerakel dut te menge mibperetiyyaya ki Hisus, ne ruen nevaluy ne kewehaan dan dut te teleinged ne menge Hudiyenan ne Hibruwanen se kinehiyan din wey ke menge Hudiyenan ne Gerisiyanen se kinehiyan din. Iyan migkahi dut te menge Hudiyenan ne Gerisiyanen se kinehiyan din ne kenà egkevehayan ke menge balu ne meritan te kureta ne ed-um-umunen dan te uman gewii. ² Dutun ne impetawag dut te sepulù wey deruwa ne menge kedserihan ke langun ne mibperetiyyaya ki Hisus ne migkahi ran te, "Kenà meupiya te sikami ne menge kedserihan se ed-engked ne ebpmesabut dut te Lalag te Eleteala apey rey egketuganur ke kurang dut te balu ne menge meritan.³ Tembù be menge suled," ke sikandan, "pemilì kew te pitu ne etew kayi te keniyu, ke etew ne midlumunan dut te Kedesenan ne Ebpetuntul te Menusiyà wey ruen ketau rin. Ne ini ne helevek ne idsarig dey riyà te kandan.⁴ Ketà," ke sikandan,

“ne sikami ke menge kedserihan ne kenà en egkeseletan ke hewii te kebpengeningeni rey wey kebpemesabut dey dut te Lalag te Eleteala.”

⁵ Nerineg dan ini se menge lalag dut te menge kedserihan ne nesuatsuat ke langun ne nevurun ketà. Ne mibpemili dan en si Esteban su ini ne etaw ne dekelà se kebperetiyyaya rin wey midlumunan dut te Kedesenan ne Ebpetuntul te Menusiyà. Ne ke ruma ne mepemili dan dema ne si Felipe, si Procuru, si Nicanor, si Timun, si Parmenas, wey si Nicolas ne riyà ebpuun te Antiyuka. Si Nicolas ini ne kenà Hudiyanan, ugaid ne nekeruyud sikandin dut te tuluuwen dut te menge Hudiyanan. ⁶ Ne ini se nepemili dan ne impeitindeg dan ne impekilala rut te menge kedserihan. Ne gewii ran te ebpengeningeni ne indampen dan ke menge belad dan dut te nepemili dan su ebuyù dan te ebpeneuven dan te Eleteala.

⁷ Ketà ne ed-iseg-iseg se kebpekeeneb dut te ibpesabut dan ne Lalag te Eleteala. Ne ed-iseg-iseg dema se kerakel dut te mibperetiyyaya ki Hisus kayi te Hirusalim, ne merakel dema se menge terebpelengesa ne mibperetiyyaya ki Hisus.

Ke Kinesigkema ki Esteban

⁸ Ne si Esteban ini, ne mibpenaub te Eleteala ne ruen gehem te Eleteala ne imbehey kandin su riyà te etuvangan te menge etew ne ruen neveelan din ne mekegeyip neveran wey ulaula ne mekeinuinu. ⁹ Ugaid ne ruen menge Hudiyanan riyà te senge valey ne ebpengedian te penduan dan ne ed-ingaranan te “Menge Uripen ne Nevelukasan” ne migkunterà ki Esteban. Ini se menge Hudiyanan ne riyà ebpuun te inged ne Sirini wey Elihendriya wey riyà ebpuun te lusud te inged ne Silisyia wey Asiya ne mibaal te kebpekidlewanà ki Esteban. ¹⁰ Ugaid ne mibehayan si Esteban te ketau dut te Kedesenan ne Ebpetuntul te Menusiyà, tembù be warà mekeatu ke ebpekidlawan kandin.

¹¹ Ketà ne ini se menge etew ne ebpekidlawan, ne ruen midselipsip kandan te kureta te egkahi te, “Nerineg dey ke meraat ne menge lalag ni Esteban mekeatag ki Moises wey ke Eleteala!”

¹² Sabap dut te tarù dan ne nehuvut ke menge etew, ke menge pekilukesen, wey ke menge meyerù dut te penduan. Ne arà dà iyan ne migsigkem dan en si Esteban ne mid-ewit dan sikandin su ibpeetuvang diyà dut te menge Perekukum. ¹³ Ne ruen dema impelusud dan ne edlalag te tarù mekeatag ki Esteban. “Ini se etew,” ke sikandan, “ne layun edlalag te meraat ne ebpekesuhat dut te egkeedatan ne Nekebpuru ne Valey te Eleteala wey mekeatag dut te menge penduan ni Moises. ¹⁴ Su nerineg dey te egkahi sikandin,” ke sikandan te, “si Hisus ini ne ebpuun te Nesarit ne edrundusen din kun ini se Nekebpuru ne Valey te Eleteala wey edsembian din ke langun ne betasan ne intahak keyta ni Moises rengan!”

¹⁵ Ne langun dut te menge Perekukum ne nevurun ketà ne midtengteng ki Esteban, ne nekita ran ke paras din ne iring dut te paras te suluhuen te Eleteala.

¹ Ketà ne mid-insaan si Esteban dut te Pinekemepurù te menge Terebpelengesa te, “Menu, benar iya ini se menge lalag dan ne ebpekesuhat keykew?”

² Ne migkahi si Esteban te, “Menge suled ku wey menge lukes, pemineha niyu ini se egkehiyen ku kenyu. Dengan te diyà pà ed-ubpà te inged ne Misuputamya ini se ke-ep-epuan tew ne si Abraham su warà pà sikandin med-arat diyà te inged ne Haran ne mibpekitakita kandin ke Eleteala ne ebpengandlag te raman din. ³ Ne migkehiyan si Abraham dut te Eleteala te, ‘Ewai nu ini se menge suled nu wey ke menge lukes nu wey ini se inged nu ne pendiyà ka te inged ne ibpekita ku keykew.’

⁴ “Dutun ne mid-awà en sikandin dut te inged din ne mid-arat med-ubpà diyà te inged ne Haran. Ne kinepatey dut te amey rin ne impearat en maa sikandin te Eleteala kayi te inged ne ubpaan tew en guntaan. ⁵ Ugaid ne ketà ne hewii ne warà pà imbehey te Eleteala ki Abraham ne tanà misan senge palad dà. Ugaid ne mibpasad ke Eleteala kandin te ibehey rin ini se inged su sikandin se egkemuney elin ke menge kevuwaran din. Gewii te impasad kandin te Eleteala ini ne warà pà anak ni Abraham. ⁶ Ne migkahi kandin dut te Eleteala te, ‘Ke menge kevuwaran nu, ne diyà dan ebpekeubpà keuremà te inged te rumà pà ne bansa. Ne ketà ne egkevaluy ran ne uripen wey ed-ey-eyuwen dut te arà ne bansa taman te epat nehatus ne rahun. ⁷ Ugaid ne edusaan ku ini se menge etew ne ebpengenguripen kandan. Ne ketà ne ibpeliyu ku sikandin dut te arà ne inged ne edlived dan kayi ne ubpaan ne ebpengarap dan kediey,’ ke se Eleteala. ⁸ Ne insuhù te Eleteala ki Abraham,” ke si Esteban, “te langun ne menge meama ne ed-etusan su iyan tuus te kedduman dut te insuhù din kandan. Tembù be mid-etusan en ni Abraham ini se anak din ne si Isaac te nekedwalu pà ne andew se kineenaka kandin. Ne si Isaac dema, ne mid-etusan din ke sepulù wey deruwa ne menge anak din ne menge meama ne nevaluy ne menge keep-epuan dut te sikitew ne menge Hudiyanen.

⁹ “Na,” ke si Esteban, “kayi te ini ne sepulù wey deruwa ne anak ni Jacob ne duen senge etew ne ed-ingaranan ki Jose ne ingkesih rut te menge suled din. Si Jose ini, ne mibpasa rut te menge suled din ne egkevaluy ne uripen diyà te inged ne Ihuptu. Ugaid ne ke Eleteala se miduma kandin, ¹⁰ ne mibpeliyu kandin dut te langun ne merehen ne ned-ulaula rin. Ne guna su mid-etuvang si Jose dut te datù te inged ne Ihuptu ne mibpenaub dut te Eleteala sikandin wey mibehayan te ketau wey meupiya ne ulaula, ne nekita ini rut te datù ne nesuatsuat sikandin. Tembù be midtendù din si Jose ne gubinedur diyà te inged ne Ihuptu wey ebpekekamal dut te menge sugsuhuen wey menge kearen diyà te turuhan din.

¹¹ “Ne neumaan te bitil ke langun ne inged riyà te Ihuptu wey kayi te inged ne Kenaan ne ubpaan ni Jacob ke amey ni Jose, ne nerehanen ke menge etew. Ne ini se keep-epuan tew,” ke si Esteban, “ne warà ebpesineruwan dan te ebpmengà te egkekaan dan. ¹² Guna su nerineg ni Jacob te ruen egkekaan diyà te inged ne Ihuptu ne midsuhù din ke menge anak din, ini se menge keep-epuan tew,” ke si Esteban, “su ebpmasa te egkekaan ne ini se neuna ne kebpekepeneleinged dan diyà. ¹³ Ne ketà te ikeruwa ne kebpekependiyà dan te inged ne Ihuptu

ne impayag ni Jose te sikandin ke suled dan wey merineg ini dema dut te datù, tembù be netuenan din en ke endei ini se menge suled ni Jose.¹⁴ Dutun ne intelaan ni Jose ke amey rin su ebpeketuenan kandin wey langun dut te menge suled din ne ebbendiyà te inged ne Ihiptu, ne pitu ran nepulù wey lelima.¹⁵ Tembù be mibpendiyà ensi Jacob te inged ne Ihiptu ne diyan en minatey sikandin wey ke menge anak din ke menge keep-epuan tew,” ke si Esteban.¹⁶ “Ne ke menge bangkey ran ne ed-ewiten ded ketà te inged ne Sikim lusud te Kenaan, ne kayi ran inleveng dut te penleevangan ne mibpemasa rut te apù dan ne si Abraham, su mibpemasa rin ini dut te menge anak ni Hamur.

¹⁷ “Guna su egkeuma en ke hewii ne ebpekeliyu ran en dut te inged ne Ihiptu su edtumanen en te Eleteala ke impasad din ki Abraham dengan, ne mibmerakel dan en diyà te inged ne Ihiptu ke menge keep-epuan tew,” ke si Esteban.¹⁸ “Ketà ne ruen behu ne midatù diyà te inged ne Ihiptu ne warà mekekilala ki Jose.¹⁹ Ne mibpeselipsipan din te itungan ne mevaher wey meraat se mid-ulaula rin dut te menge keep-epuan tew,” ke si Esteban, “su mibpehes din te ebpeengkeran kandan ke menge anak dan ne riyà te liyu su apey ebpmatey.

²⁰ “Ne ketà ne hewii ne ruen in-anak ne ed-ingaranan ki Moises, ne merayirayi ne vatà. Ne taman te tetelu ne vulan se kineritan dut te iney rin kandin diyà te valey ran.²¹ Guna su nekedtetelu en ne vulan ne intahù dan en sikandin diyà te meriyù. Ugaid ne netuen sikandin te meritan ne anak dut te datù ne mid-anak-anak din si Moises, ne nevaluy ne iring te tuney ne anak din.²² Ne impenurù dan ki Moises ke langun ne menge ulaula ne netuenan dan dut te menge etew te Ihiptu, ne nevantug sikandin su atag dut te ketau rin te kebpesabut wey ke menge vaal din.

²³ “Guna su epat en nepulù se rahun ni Moises,” ke si Esteban, “ne netahù te itungan din se ebpenumbelayan din ke menge rumu rin ne menge Hudiyanan ne kevuwaran ni Israyil.²⁴ Ne nekita rin te senge etew kandan ne edtulengen dut te etew te Ihiptu. Ne midtevangan din ketà ne midsulian din ke etew te Ihiptu su mid-imetayan din. (²⁵ Kunaan din ke mepayag diyà te itungan dut te menge rumu rin ne menge Hudiyanan te sikandin se netendù te Eleteala ne ebpekepiyu kandan dut te inged ne Ihiptu, ugaid ne warà dan mesebuti.)²⁶ Ikeruwa ne hewii ne midlived maa sikandin ne nekita rin te ruen deruwa ne rumu rin ne Hudiyanan ne ebpeehetey, ne ebpelangen din perem ini se deruwa ne etew. ‘Menge suled,’ ke sikandin, ‘kenà kew! Su teledsuled kew su elin kew Hudiyanan! Ne meambe ke ebpeehetey kew?’

²⁷ “Ugaid ne ini se etew ne mibadas te rumu rin ne insinumag din dà si Moises se egkahi te, ‘Engkey se mibehey kenikew te ketengdanan te kegkukum kenami? ²⁸ Meambe, ed-imatey ka perem kediey iring gevii dut te kineimatey nu te senge etew ne etew te Ihiptu?’²⁹ Nerineg dà ini ni Moises ne mibpelahuy en sikandin ne riyà med-uprà sikandin te inged ne Madyan. Ne dutun ne mid-esawa sikandin ne mid-anak dan te deruwa se anak dan ne meama.

³⁰ “Guna su neked-epat en nepulù ne rahun ne riyà si Moises te inged ne Madyan, ne ruen suluhuen te Eleteala ne mibpekitakita ki Moises diyà te sagbet ne egkeregreg. Ini se nekita rin ne riyà te tanà

ne kenà egkeubpaan te etew uvey dut te buvungan ne ed-ingaranan te Sinai.³¹ Negeyip si Moises ketà te nekita rin, ne mid-uvey rin ke sagbet su ed-intengan din. Ne dutun te egkeregreg ne sagbet ne nerineg din ke suwara te Kerenan se egkahi te,³² ‘Siaken ke Eleteala ne mibpengerapen dut te menge keep-epuan niyu ne si Abraham, si Isaac wey si Jacob.’ Ne migkerker si Moises te kegkeandek din ne warà din metikà te edtengteng.

³³ “Ne migkehiyan sidandin te Kerenan te, ‘Luunga nu ke telumpà nu su egkeedatan an se tanà ne mid-itindeha nu.’³⁴ Su nekita ku ke kegkerasey dut te langun ne menge etew ku riyà te inged ne Ihuptu, ne nerineg ku ke kegngegngeg dan. Tembù be ini ad guntaani te tanà su ibpeliyu ku en sikandan. Na ipanew ke en,’ ke se Kerenan, ‘su edsuhuen ku sikew diyà te inged ne Ihuptu.’

³⁵ “Na,” ke si Esteban, “si Moises ini se warà sehipaa dut te menge kevuwaran ni Israyil su migkehiyan dan sikandin te, ‘Engkey se mibehey kenikew te ketengdanan te kegkukum kenami?’ Ugaid ne sikandin,” ke si Esteban, “ke midsuhù te Eleteala ne egkeunutan ne ebpeliyu dut te menge keep-epuan tew. Ne midtevangan sikandin dut te suluhuen te Eleteala ne nekita rin diyà te sagbet ne egkeregreg.³⁶ Su sikandin se mid-ewit te menge keep-epuan tew te ed-awà ketà te inged ne Ihuptu ne mibpengunguripen kandan. Ne mibaal sikandin te mekegeyip wey ulaula ne mekeinuinu diyà te inged ne Ihuptu, wey riyà te rahat ne ed-ingaranan te Merihà, wey riyà dema te ebpevayaan dan ne tanà ne kenà egkeubpaan te etew ne impekita rin kandan ne menge ulaula arà taman te neked-epat nepulù ne rahun.³⁷ Si Moises ini,” ke si Esteban, “se migkahi dut te keep-epuan tew ne menge kevuwaran ni Israyil te, ‘Ruen ibpepengkayi te Eleteala te keniyu keuremà ne ebpelambas te lalag din iring dut te siaken ne impepengkayi a nikandin. Ne senge etew sikandin dut te menge rumu niyu ne menge Hudiyanan,’ ke si Moises.³⁸ Si Moises ini,” ke si Esteban, “ne dutun en dema te nevurun ne menge keep-epuan tew diyà te tanà ne kenà egkeubpaan te etew. Ne sikandin se ebpekidlalag dut te suluhuen te Eleteala riyà te buvungan ne ed-ingaranan te Sinai. Ne sikandin ini se neketelimà te lalag egenat te Eleteala ne warà kegkepupus din su apey rin ibehey kenitew.

³⁹ “Ugaid,” ke si Esteban, “ne kenà egkiyug ke menge keep-epuan tew ne eduma kandin. Mid-engkenà dan kandin su iyan dan kiyug ne edlived dan diyà te inged ne Ihuptu.⁴⁰ Ne gewii te diyà pà si Moises te buvungan ne migkehiyan dan si Arun ke kakey rin te, ‘Beeli key nikuna te menge ledawan ne egkevaluy ne menge diwata ta ne ed-ewit kenitew te edlived. Su si Moises ini se mid-ewit kenitew te riyà ebpuun te inged ne Ihuptu, ne warà dey metueni ke endei en sikandin.’⁴¹ Ne rutun,” ke si Esteban, “ne mibaal dan te ledawan ne iring te paras te nati te sapi. Ne mibpelengesaan dan ne mibehey ran kandin, ne midsesemayà te dekelà ne kegkehalew dut te mibeelan dà te belad dan.⁴² Ketà,” ke si Esteban, “me mid-iniyuhan en ke menge keep-epuan tew rut te Eleteala ne mibelehad din en se kebpengarap dan te menge bituen diyà te langit. Su ruen impesurat din diyà te riberù dut te menge ebpelambas te Lalag din dengan ne egkahi te, ‘Ey, sikiyu ne menge kevuwaran ni Israyil,

ne gewii te riyà kew pà te tanà ne kenà egkeubpaan te etew
ne impelengesa niyu ke menge binatang ne ibehey niyu,
ugaid ne kenà siaken ini se nevehayan niyu.

⁴³ Su iyan niyu mid-ewit

ne ke ebpeubpaan niyu dut te ledawan
ne ed-erapen niyu ne si Muluk;
wey ke ledawan ne iring te paras te bituen
ne ed-erapen niyu ne si Ripan.

Menge ledawan ini ne mibeelan niyu ne ed-erapen niyu.

Tembù be ibpebiyang ku sikiyu

diyà te unaan pà te inged ne Bebilunya.'

⁴⁴ "Na ini se keep-epuan tew," ke si Esteban, "ne dengan te riyà den pà te tanà ne kenà egkeubpaan te etew, ne ruen baley ne iyan din pengawid se menge lundis te binatang su ketà med-ubpà ke Eleteala ke ebpekidlalag ke menge etew kandin. Mibeelan ini se baley su insuhù dut te Eleteala ki Moises su ebpeiringan ke impekita rin kandin.

⁴⁵ Ne intavun dan ini se baley ne ed-ubpaan te Eleteala rut te menge inenakan dan taman te pipira ne lapis ne kevuwaran. Ne ini ne mid-ewit dan te eduma ki Josue te edlusud kayi ne inged su impeawà en te Eleteala ke menge bansa ne mid-ubpà kayi su apey iyan en ebpengemuney ne ke menge keep-epuan tew. Ne kayi red ini se baley ne ubpaan te Eleteala taman te hewii ne warà pà medatù si David.

⁴⁶ Ne ke ulaula ni David," ke si Esteban, "ne nekesuhat te hinawa te Eleteala, ne mibuyù din te Eleteala te embiya idtuhut kandin ne ibpeitindeg din ke baley ne ubpaan te Eleteala ne iyan ebpengerapan dut te keep-epuan tew ne si Jacob. ⁴⁷ Ugaid ne warà idtuhut ki David su ke anak dün ne ed-ingaranan ki Salomon se ebpekepitindeg te baley ne ed-ubpaan te Eleteala.

⁴⁸ "Ugaid," ke si Esteban, "ne ke Eleteala ne kenà ed-ubpà te baley ne mibeelan dà te menusiyà. Su ruen impesurat din dut te senge etew ne ebpelambas te Lalag din se egkahi te,

⁴⁹ 'Ke langit se ebpinuuwan ku te kedatù ku

ne ke dunya se edsendayan te paa ku.

Tembù be kenà egkepakey

ne ebpeitindeg kew te baley ne ed-ubpaan ku, ke se Eleteala.

Ne kenà egkepakey ne ebpeitindeg kew te ed-imelayan ku.

⁵⁰ Su siaken se midlimbag kayi te dunya

wey langun ne tahù din.'

⁵¹ "Ne sikiyu," ke si Esteban, "ne menge ruma ku ne menge Hudiyanan, meresen nevenar se ulu niyu! Ne ke hinawa niyu ne kenà eduma te Lalag te Eleteala, ne iring te bengel kew su kenà kew ebpemineg. Iring kew red iya te menge keep-epuan niyu, ne kenà kew rema ebpemineg dut te Kedesenan ne Ebpetuntul te Menusiyà.

⁵² Ne menu, duen be misan seveka te menge ebpelambas te Lalag te Eleteala rengan ne warà resaya dut te menge keep-epuan niyu? Warà! Su mid-imetayan dan arà se midsuhù te Eleteala rengan ne ebpesabut mekeatag te kebpekeuma dut te Sugshuen din ne metidtu ne si Hisus. Guna su nekeuma en sikandin, ne mid-ulug niyu diyà te menge etew ne egkeepes kandin ne mibpeimetayan niyu. ⁵³ Ne sikiyu se mibehayan te

penduan te Eleteala rengan,” ke si Esteban, “ne intetehak impepevayà dut te menge suluhuen din, ugaid ne warà niyu tumana.”

Ke Kinerumba te Batu ki Esteban

⁵⁴ Guna su nerineg dut te menge Perekukum ini se lalag ni Esteban, ne nengeepes dan neveran ne nekepinggingitel dan te kegkeepes dan kandin. ⁵⁵ Ugaid ne si Esteban ini, ne midlumun en kandin ke Kedesenan ne Ebpetuntul te Menusiyà ne midlingakà sikandin diyà te langit ne nekita rin ke daman dut te Eleteala ne ketà ne nekita rin dema si Hisus ne mid-itindeg diyà te egkekewanen te Eleteala. ⁵⁶ “Intengi niyu ma,” ke si Esteban, “su egkekita ku ne nevukaan en ke langit ne sikandin ke Impeanak te Menusiyà se ed-itindeg diyà te egkekewanen te Eleteala!”

⁵⁷ Nerineg dà ini rut te menge Perekukum ne midsabpeng dan te telinga ran se egkuleyi. Ne ketà ne midlingketawan dan sikandin, ⁵⁸ ne migeweran dan ne miguyud dan diyà te liyu te inged dan ne Hirusalim, ne mibpenrumbag dan en te batu. Ne ini se menge etew ne mid-isuhat kandin te lalag, su ini ke ed-ingaranan te titibus, ne insavuk dan ke menge kumbalà dan ne mibentayan dut te senge etew ne ed-ingaranan ki Saulo. ⁵⁹ Ne rutun te kedrumba te Esteban te batu ne mibpengeningeni sikandin se egkahi te, “Ey Kerenan ku ne si Hisus, telimaa nu ini se gimukud ku!” ⁶⁰ Ketà ne mibpenimbuel en sikandin ne mibmerahing se suwara rin se egkahi te, “Ey Kerenan, kenà nu penunduha ke menge salà dan!” Neipus din dà te egkahi ini, ne nepandus en ke hinawa rin.

8

1-2 Ketà dema si Saulo te kinerumba te batu ki Esteban, ne kiyug din iya se kineimetayi ran kandin.

Mibpekesekitan ni Saulo ke menge Mibperetiyyaya ki Hisus

Inleveng si Esteban dut te menge etew ne mepegeleteala ne mibpeninehew ran wey mibpenderawit kandin. Igenat dut te hewii ne kineimetayi ran kandin ne midrudsù ke kegkerasey dut te langun ne mibperetiyyaya ki Hisus diyà te Hirusalim. Tembù be nevurahey ke langun ne mibperetiyyaya diyà te menge inged ne lusud te Hudiya wey Semeriya, ne ini rà te sepulù wey deruwa ne menge kedserihan se warà med-awà kayi te Hirusalim.

³ Ne si Saulo ini, ne mibpekesekitan din ke menge etew ne mibperetiyyaya ki Hisus su apey ran egkereeti perem. Su midsihid sikandin diyà te menge valey ne midlusud ne miguyud din ke menge meama wey meritan ne mibperetiyyaya ne mibilanggù din.

Mibpesebutan dut te Menge Mibperetiyyaya Ini se Meupiya ne Tuditul Mekeatag ki Hisus Diyà te Lusud te Semeriya

⁴ Ne ini se mibperetiyyaya ki Hisus ne nevurahey en, ne mid-enebeneb dan en diyà te langun ne menge inged se ebpesabut dut te Lalag te Eleteala. ⁵ Ne senge etew kandan ne ed-ingaranan ki Felipe ne mibpendiyà te senge inged ne lusud te Semeriya se mibpesabut din ke menge etew mekeatag dut te Impasad te Eleteala ne Ebperetuen te menge etew. ⁶ Ne guna su nerineg dut te denda ne menge etew arà te lalag ni Felipe ne nekita ran ke menge ulaula ne mekegeyip ne

mibeelan din, ne egkeseveka ran ne ebpemineg kandin. ⁷ Merakel se menge etew ne mibpenegseg din ke menge busew ne midsuuk kandan, ne nekepenguleyi ini se busew te kinepeawà kandan. Ne merakel dema se midtibas te ayew wey menge pungkù ne nengeulian din. ⁸ Tembù be nehalew nevenar ke menge etew dut te ini ne inged.

⁹ Duen senge etew ne ed-ingaranan ki Simon ne mid-upà ketà ne inged ne nekebpipira en ne rahun ne negeyip nevenar ke menge etew te Semeriya rut te mibeelan din ne Malik mata. Mibpeperetiyyaya sikandin te menge etew te ruen kun uvag gehem din. ¹⁰ Ne langun ne menge etew ketà ne igenat te mepurù taman te keveaan ne intahù dan te hinawa ke langun ne lalag din. Ke sikandan te, “Ini se gehem ne impekita rin ne gehem te Eleteala ne ed-ingaranan te ‘Ke Dekelà ne Gehem’.” ¹¹ Tembù be mibperumaruma ran kandin su neuhet en ne negeyip dan dut te Malik mata ne mibeelan din. ¹² Ugaid ne guna su impesabut ni Felipe ke Meupiya ne Tuttul mekeatag te Edetuan te Eleteala ke menge etew wey mekeatag ki Hisu Kristu ne mibpebunyag ke menge bayi meama tuus te mibperetiyyaya ran. ¹³ Misan si Simon ini ne mibaal te Malik mata ne mibperetiyyaya en dema. Guna su mibpebunyag en sikandin ne midumaruma en sikandin ki Felipe ne negeyip sikandin dut te nekita rin ne mibeelan ni Felipe ne mekegeyip wey ke dekelà ne ned-ulaula rin ne mekeinuinu.

¹⁴ Ne nerineg dut te menge kedserihan diyà te Hirusalim te mibperetiyyaya en ke menge etew te inged ne Semeriya, ne ketà ne impependiyà dan si Pedro ki Juan. ¹⁵ Nekeuma ran ne impengeningeni ran te Eleteala ke langun ne mibperetiyyaya ki Hisus su apey ebpekelumun kandan ke Kedesenan ne Ebpetuntul te Menusiyà. ¹⁶ Su warà pà mekeuma ke kedlumun dut te Kedesenan ne Ebpetuntul te Menusiyà dut te ini ne menge etew. Su nebunyanan dan dà se tuus te mibpesakup dan ki Hisu Kristu. ¹⁷ Rutun ne indampen dan ke velad ni Pedro ki Juan dut te menge etew, ne ketà ne midlumun en kandan ke Kedesenan ne Ebpetuntul te Menusiyà.

¹⁸ Nekita ni Simon te kinchedampen dut te menge kedserihan dut te mibperetiyyaya ki Hisus ne midlumun en ke Kedesenan ne Ebpetuntul te Menusiyà, ne ebehayen din perem te kureta si Pedro ki Juan. ¹⁹ Ke sikandin te, “Behayi a rema kayi te gehem ini su apey ruen edempenan ku ne edlumunan sikandin dut te Kedesenan ne Ebpetuntul te Menusiyà.”

²⁰ Ugaid ne migkehiyan sikandin ni Pedro te, “Embiya perem edusaan ka te Eleteala abpeg dut te kureta nu su kunaan nu ke egkepakey ne egkepemasa ini se gehem ne imbehey te Eleteala! ²¹ Warà kebpekeamung nu etawa kebpekeruma nu te ini ne helevok dey,” ke si Pedro, “su kenà metidtu ke hinawa nu riyà te etuvangan te Eleteala. ²² Tembù be pedsendit ka ne engkeri nu ke meraat ne netahù te itungan nu, ne ebpekevuyù ka te Eleteala te ebpesehare din ke nepegitung nu ne meraat. ²³ Su netuenan ku,” ke si Pedro, “te laus ka ne egkesihì ne uripen ka dut te meraat ne ed-ul-ulaan nu.”

²⁴ Migkehiyan ni Simon si Pedro ki Juan te, “Ibpengeningen a niyu te Kerenan su apey ke rawak niyu kedi ne kenà egked-ulaula.”

²⁵ Ne taman te nekebpipira ne hewii ne mibpesabut si Pedro ki Juan dut te Lalag te Kerenan wey mibpenudtl dan mekeatag ki Hisus ke

Kerenan, ne mid-uli dan en maa diyà te Hirusalim. Ne gewii ran te riyà te ralan ne impesabut dan ke Meupiya ne tudtul diyà te merakel ne menge inged ne imbayà dan lusud te Semeriya.

Si Felipe wey ke Egkeunutan ne Riyà Ebpuun te Itiyupiya

²⁶ Ne ruen suluhuen te Kerenan ne migkahi ki Felipe, ke sikandin te, “Ipanew ka guntaani ne pendiyà ka te belengkayan diyà te ralan ne egenat te Hirusalim ne ebpependiyà te inged ne Gasa.” (Ini ne ralan ne warà en ebpevayà guntaani.) ²⁷⁻²⁸ Ketà ne migenat en si Felipe. Ne rutun te ralan ne ruen etew ne yanuku riyà ebpuun te inged te Itiyupiya ne ed-uli diyà te kandan su mibpendiyà ini se etew te Hirusalim su ebpengarap te Eleteala. Mepurù ne egkamal sikandin dut te menge kearen te Bai ketà te inged ne Itiyupiya. Gewii te ed-uli en sikandin te ed-untud te kerumata ne ebasa sikandin te riberù ne impesurat ki Isayas, senge etew ini ne ebpelambas te Lalag te Eleteala rengan. ²⁹ Ne migkehiyan rutun si Felipe dut te Kedesenan ne Ebpetuntul te Menusiyà te, “Uvey ka ketà te kerumata rin.” ³⁰ Nekeuvev rà si Felipe rutun ne nerineg din en ke meama ne ebasa dut te impesurat ki Isayas, ke ebpelambas te Lalag te Eleteala rengan. Ke si Felipe te, “Menu, egkesebutan nu ini se ebesaan nu?”

³¹ Ne migkahi ke meama te, “Memenu ve se kegkesebuti ku ke embiya warà ebpenurù kediey?” Ketà ne impeuntud din en si Felipe dut te kerumata rin. ³² Ini se mibasa rin ne Lalag te Eleteala ne ke impesurat ki Isayas rengan ne egkahi te,

“Iring sikandin te bilibili ne eduma

ne edtuyuken su edsumbelien;

uya iring sikandin te nati te bilibili ne kenà ed-erang

ke edtevungawan,

su warà kekehiyen din.

³³ Pinegkayà sikandin

wey bigkug se kukuman dan kandin.

Wara ebpekeguhud dut te inenakan din,

su nepupus en ke umur din

kayi te ampwel te dunya.”

³⁴ Nekeipus ini se meama ne ebasa ne mid-insà ki Felipe te, “Engkey etawa ini se edlelehen kayi te ebpelambas te lalag te Eleteala rengan ne si Isayas? Edlalag be sikandin mekeatag te kandin ne hinawa etawa ruma ne etew?” ³⁵ Ketà ne middlag si Felipe, ne igenat te arà ne nekesurat ne Lalag te Eleteala ne nevasa dut te meama ne impesabut en ni Felipe kandin ke Meupiya ne Tudtul mekeatag ki Hisus. ³⁶ Neiseg-iseg te ked-ipanew ran ne ruen neumaan dan te wayig. Migkahi ke meama te, “Ruen wayig ini. Menu, egkepakey en ne ebunyahan a nu?” [³⁷ Ne migkehiyan ni Felipe sikandin te, “Egkepakey ne ebunyahan ka embiya imbehey nu en ke hinawa nu ki Hisus su mibperetiyyaya ka kandin.”

“Mibperetiyyaya ad,” ke se meama, “su mibperetiyyaya a te si Hisu Kristu ke Anak te Eleteala.”]

³⁸ Ketà ne impeengked dut te meama ke kerumata ne mibpemenaug dan en ki Felipe ne midlumbuk dan diyà te wayig ne mibunyahan en ni Felipe ke meama. ³⁹ Guna su migauan dan en ne netekew te neawà si Felipe dut te Kedesenan ne Ebpetuntul te Menusiyà. Warà en mekita

dut te meama, ugaid ne midlaus en ini se meama ne mehalew nevenar.
⁴⁰ Si Felipe ini, ne diyan en mekita te inged ne Asutu. Ne impesabut din ke Meupiya ne Tudtul mekeatag ki Hisus diyà te langun ne menge inged ne midseharan din taman te nekeuma sikandin diyà te inged ne Sisariya.

9

Ke Kebpekeperetiyyaya ni Saulo ki Hisus

¹ Ketà ne hewii ne warà pà lavew med-engked si Saulo te meilut ne kebpemeliandek din dut te menge mibperetiyyaya ki Hisus ke Kerenan. Mibpendiyà sikandin te Pinekemepurù ne Terebpelengesa ² ne mibuyù te ebpesuratan din ke egkamal dut te menge baley ne ebpengedian te penduan te menge Hudiyanan ne riyà te inged ne Demasku. Ne ed-ewiten din be ini su apey egkekilala sikandin ne idtuhut kandin se edsikem te menge etew ne eduma te penurù ni Hisus wey ed-ewiten din sikandan te edlived diyà te Hirusalim su ebilengguen.

³ Guna su ebpelundani en si Saulo diyà te inged ne Demasku, ne netekew en te ruen mermerayag ne ebuun te langit ne neketayew kandin. ⁴ Nepiley sikandin ne ruen suwara ne nerineg din ne egkahi te, “Ey Saulo, Saulo, meambe ke ebpekesekitan a nu?”

⁵ Migkahi si Saulo te, “Engkey ka etawa, Kerenan?”

“Si Hisus a,” ke se suwara, “ne mibpekesekitan nu. ⁶ Na, enew ka en ne laus ka riyà te inged su ketà ne ibpenurù keykew ke engkey se ed-ul-ulaan nu.”

⁷ Ne ini se menge etew ne miduma ki Saulo ne nekeitindeg ketà te warà dan mekekahi su nengegeyip dan. Nerineg dan ke suwara, ugaid ne warà ma nekita ran. ⁸ Mid-enew si Saulo ne nehimerat ke mata rin, ugaid ne kenà en ebpekekita sikandin. Ne ketà ne mid-ahak dan sikandin se eppendiyà te Demasku. ⁹ Ne lusud te tetelu ne hewii ne kenà ebpekekita sikandin ne edtuyun en sikandin.

¹⁰ Ketà te inged ne Demasku ne ruen senge etew ne ed-ingaranan ki Ananias ne mibperetiyyaya ki Hisus ne Kerenan. Ne mibpekitakita kandin ke Kerenan se egkahi te, “Ey, Ananias!”

“Ini a red, Kerenan!” ke se meama.

¹¹ Ke se Kerenan te, “Ipanew ka ne pendiyà ka te ralan ne ed-ingaranan te Metidtu ne Ralan ne riyà te baley ni Hudas ne insà ka ke ruen etew ketà ne ed-ingaranan ki Saulo ne riyà ebuun te inged ne Tarsu. Su ketà sikandin ebpengeningi, ¹² ne ruen impekita ku en kandin mekeatag keykew, Ananias. Su ketà te impekita ku kandin ne ruen etew ne ed-ingaranan ki Ananias ne nekeuma ne edlusud te valey rin su edampen kandin su apey ebpekekita en maa sikandin.”

¹³ Ugaid ne migkahi si Ananias te, “Kerenan, nerineg ku riyà te merakel ne etew mekeatag kayi ne etew su meraat te mid-ulaula rin dut te menge mibperetiyyaya keykew ne riyà te Hirusalim. ¹⁴ Guntaani,” ke si Ananias, “ne ini en sikandin te inged ne Demasku su intuhut kandin dut te menge mepurù te terebpelengesa te ibpesikem kandin ke langun ne menge etew ne ebpengeningi keykew.”

¹⁵ “Ipanew ka,” ke se Kerenan, “su mibpemili ku en sikandin ne egelevek kediey. Su sikandin se ebpemenudtul mekeatag kediey riyà te menge etew ne kenà Hudiyanan wey ke menge datù dan abpeg dut

ne menge Hudiyanen.¹⁶ Ne ibpekita ku kandin langun ne kekerasey rin su atag dut te keduma rin kediey.”

¹⁷ Ketà ne mid-ipanew en si Ananias. Nekeuma rà ne mibpemenayik en diyà te baley ne midampen din en si Saulo te migkahi, “Saulo, sikew se suled ku. Impepengkayi a rut te Kerenan tew ne si Hisus ke mibpekitakita keykew diyà te ralan te kebpengkayi nu te ini ne inged. Impepengkayi a su apey ka ebpekekita en maa, wey egkelumunan ka rut te Kedesenan ne Ebbetuntul te Menusiyà.”¹⁸ Arà dà ne ruen neulug ne riyà ebpuun te menge mata ni Saulo ne iring te enir te serà, ne ebpekekita en sikandin. Ketà ne mid-enew sikandin ne mibpebunyag en su tuus te mibpesakup en sikandin ki Hisus.¹⁹ Ne migkaan en ne nekeulit en ke baher din.

Ke Kebpesabut ni Saulo Diyà te Inged ne Demasku

Ne mid-ubpà pà si Saulo duma dut te menge edurumaruma ki Hisus kayi te inged ne Demasku taman te nékebepipira ne hewii.²⁰ Dutun ne mibpendiyà sikandin te menge baley ne ebpengedian te menge Hudiyanen te penduan dan su ebpesabut te si Hisus ke Anak te Eleteala.²¹ Ne langun te nekerineg kandin ne nengegeyip nevenar se egkahi te, “Kenà be sikandin ayan ke riyà te Hirusalim ne ebpmekesakit dut te menge etew ne ebpengarap ki Hisus? Kenà be iyan din kebpengkayi ne ebpenigkemen din ke edurumaruma ki Hisus su ed-ewiten din diyà te mepurù ne terebpelengesa diyà te Hirusalim?”

²² Ne ini se kebpesabut ni Saulo mekeatag ki Hisus ne mid-iseg se kevaher din te kebpekepehimbenar dut te menge etew. Ne mepayag nevenar ke tuus ketà te impesabut din te si Hisus ke Impasad te Eleteala ne Ebperetuen te langun. Tembù be ini se menge Hudiyanen ne kayi te Demasku ne warà mekekahikahi.

²³ Warà meuhet ne miburun ke menge Hudiyanen ne netahù te itungan dan te ed-imetayan dan si Saulo,²⁴ ugaid ne ruen imbaag kandin mekeatag dut te netahù te itungan dan. Ne merukilem meandew ne mibentayan dut te menge Hudiyanen ke menge bengawan ne idlusud wey idlihawang ketà te inged dan su apey egkeimetayi sikandin embiya egkekita ran.²⁵ Ugaid ne senge kerukileman, ne ruen menge edurumaruma kandin ne migkuwa kandin su intahù dan diyà te bukag su midtuntun dan sikandin diyà te sulawan dut te pehalad ne nekelingut ketà te inged.

Ke Kependiyà ni Saulo te Hirusalim

²⁶ Ne mibpendiyà si Saulo te Hirusalim. Nekeuma sikandin ne ebpekidseveka perem dut te menge kedserihan ni Hisus. Ugaid ne nengeandek dan su warà dan mebpehimbenar te si Saulo ne tidtu en ne edurumaruma ki Hisus.²⁷ Ugaid ne midtevangan si Saulo ni Bernabe su miduma rin te ebpendiyà te menge kedserihan, ne impenudtul din kandan te mibpekitakita si Hisus ke Kerenan ki Saulo te riyà dan te ralan gewii te ebpendiyà sikandin te inged ne Demasku ne mibpekidlalag ke Kerenan kandin. Ne impenudtul din elin te mevag-et ke kebpesabut ni Saulo dut te menge etew riyà te Demasku mekeatag te Meupiya ne Tudtul ibpepevayà dut te ngaran ni Hisus.²⁸ Ne si Saulo ini, ne mid-amur en dut te menge kedserihan ne midsihid din ke lusud te Hirusalim te warà kegkeandek din ne

ebpesabut mekeatag ki Hisus ke Kerenan ibpepevayà dut te ngaran din.²⁹ Ne mibpekidlalag wey mibpekidlawan sikandin dut te menge Hudiyenan ne Gerisiyanen se kinehiyan din, ugaid ne ed-imetayan dan perem sikandin.³⁰ Guna su nerineg ini dut te menge ruma rin ne edurumaruma ki Hisus, ne mid-ewit dan si Saulo diyà te inged ne Sisariya ne impelaus dan sikandin diyà te inged ne Tarsu.

³¹ Ne ketà ne merinew se ked-ubpà dut te langun ne menge mibperetiyyaya ki Hisus diyà te lusud te Hudiya, Geliliya wey Semeriya. Ne midtevangan dan dut te Kedesenan ne Ebpetuntul te Menusiyà, tembù be mevag-et se kebperetiyyaya ran ki Hisus wey mid-iseg te kebmerakel dan. Su ke langun ne ked-ulaula ran ne iyan dan ibpeuna ne ke ebpekesuhat te hinawa ni Hisus ne Kerenan dan.

Mibpendiyà si Pedro te inged ne Lida wey Hupa

³² Mibeyaan ni Pedro ke merakel ne menge inged, ne senge hewii ketà ne mibpendiyà sikandin te inged ne Lida su ebpenumbelayan din ke menge edurumaruma ki Hisus ne ed-ubpà ketà.³³ Ketà ne ruen neuma rin ne senge etew ne ed-ingaranan ki Eneas. Midtibas te ayew ini se etew ne nekedwalu en ne rahun ne warè en mekeenew-enew sikandin.³⁴ “Eneas,” ke si Pedro, “egkeulian ka guntaani ni Hisu Kristu! Enew ka ne peninesa nu ke ikam nu.” Arà dà ne mid-enew en si Eneas.³⁵ Nekita sikandin dut te langun ne menge etew te inged ne Lida wey Sarun te neulian sikandin, ne ketà ne mibperetiyyaya ran ki Hisus ke Kerenan.

³⁶ Na riyà te inged ne Hupa ne ruen meritan ne ed-ingaranan ki Tabita ne mibperetiyyaya ki Hisus. (Ne ini se ngaran din dut te kinehiyan te Gerisiyanen ne si Dorcas su iyan din meana ne “selareng”.) Ne layun din ed-ul-ulaa ke meupiya, ne edtavang dut te menge ayuayu.³⁷ Arà ne hewii ne neumaan te daru sikandin ne minatey en. Ne midihuen ini se lawa rin wey imperey-as diyà te sungkù ne riyà te divavew.³⁸ Ne ini se inged ne Hupa ne kenà meriyù dut te inged ne Lida. Guna su nerineg dut te menge mibperetiyyaya ketà te inged ne Hupa te riyan en si Pedro te inged ne Lida, ne ruen deruwa ne meama ne midsuhù dan ne ebpendiyà se ebpenudtul kandin te, “Gaangaan ka pengkayi.”

³⁹ Nerineg dà ni Pedro ne miduma en kandan. Guna su nekeuma ran ne impepenayik dan sikandin diyà te sungkù ne mibperey-asan dut te minatey. Ke langun ne menge valu ne meritan ne midlingut kandin se ebpeninehew, ne impekita ran kandin ke menge kumbalà wey ruma ne menge belegkas ne mibpemenai ni Dorcas te biviyag pà sikandin.

⁴⁰ Ne impeluwal ni Pedro langun dan dut te sungkù, ne mibpenimbuel sikandin se ebpengeningen te Eleteala. Rutun ne midsineruhan din ke minatey ne migkehiyan din te, “He Tebita, enew ka!” Nehimerat ke mata rin ne nekita rin si Pedro ne ketà ne mibpinuu.⁴¹ Migeweran ni Pedro ke velad din su apey ibpeitindeg. Ketà ne midtawag din ke langun ne menge mibperetiyyaya abpeg ke menge balu ne meritan, ne impekita rin kandan te neviviyyag si Dorcas.⁴² Nekeeneb en ke tudtul mekeatag kayi te langun ne inged te Hupa, ne merakel ne menge etew se mibperetiyyaya ki Hisus ne Kerenan.⁴³ Ne mid-ubpà-ubpà pà si Pedro ketà te inged ne Hupa taman te pipira ne hewii su riyà sikandin

te baley te senge etew ne ed-ingaranan ki Simon ne ebpembaal te biasbias te menge lundis te binatang.

10

Impeangey ni Cornelio si Pedro

¹ Ne riyaw te inged ne Sisariya ne ruen senge etew ne ed-ingaranan ki Cornelio. Kepitan sikandin dut te menge sundaru ne ed-ingaranan te “Kumpeniyà te Italiya.” ² Si Cornelio ini ne mepegeleteala ne langun dan te telteleanak ne mibpengarap te Eleteala. Ne dekelà se tavang din dut te menge Hudiyanen ne ayuayu wey layun ebpengeningeni sikandin te Eleteala. ³ Senge hewii te edluuk pà eppemenaug te andew, ne ruen impekita kandin. Ketà te impekita kandin ne ruen suluhuen te Eleteala ne nekita rin ne mepayag ne nekeuma ne egkahi te, “Ey, Cornelio!”

⁴ Ne netengtengan din ini se suluhuen te Eleteala su neandek ne migkahi te, “Engkey ma, Mama?”

Migkahi ke suluhuen te Eleteala te, “Nerineg te Eleteala ke pengeningeni nu wey nekita rin ke tavang nu te menge ayuayu ne kenà din egkelipatan su nekesuhat ini te hinawa rin. ⁵ Na, suhù ka ve te menge etew ne ibpependiyà te inged ne Hupa su ibpeangey nu se senge etew ne ed-ingaranan ki Simon ne ed-ingaranan ded maa ki Pedro,” ke se suluhuen te Eleteala. ⁶ “Su riyaw ed-ubpà sikandin te baley te etew ne ed-ingaranan dema ki Simon ne ebpembaal te biasbias ne menge lundis te binatang, ne ke valey rin ne riyaw te beyvey te rahat.”

⁷ Ne guna su mid-awà en ke suluhuen te Eleteala, ne midtawag en ni Cornelio ke deruwa ne sugsuhuen din kayi te valey rin wey senge etew ne sundaru rin. Ebpengarap dema te Eleteala ini se sundaru ne senge etew sikandin ne kedserihan ni Cornelio. ⁸ Mibpenudtul din kandan ke langun mekeatag dut te impekita kandin te suluhuen te Eleteala, na impependiyà din en sikandan te inged ne Hupa.

Ke Impekita te Eleteala ki Pedro

⁹ Ketà te neketundug ne hewii te riyaw dan pà te ralan te ebpelpeling-guma ran en te inged ne Hupa. Ugaid ne diyan en te lusud te inged ne Hupa ne mibpemenayik si Pedro diyà te mepatag ne atep te baley rin te neudtu su ebpengeningeni. ¹⁰ Neiseg-iseg ketà ne nevitil sikandin ne egkesuat en ne egkaan. Gewii te ed-ilutù te egkeenen, ne ruen impekita kandin. ¹¹ Ne nekita rin ketà te nepuwasan ke langit ne ruen iring te saput ne mid-iketan ketà te epat ne pediyulu ne intuntun. ¹² Ne ruen intahù ketà ne biasbias ne binatang su ruen ed-ipanew, ruen edulug, wey ruen edlayang. ¹³ Ne ruen suwara ne migkahi kandin te, “He Pedro, enew ka ne sumbalì ka su apey ka mekekaan.”

¹⁴ Ugaid ne migkahi si Pedro te, “Kenà a, Kerenan! Su taman guntaani ne warà a pà mekekaan te misan engkey ne meredsik ne iring keniyan su indawey dut te penduan ta.”

¹⁵ Ne migkahi en maa ke suwara te, “Arà se migkahi te Eleteala ne meupiya, kenà nu egkehiya te meredsik.”

¹⁶ Ketetelu rin ini mekita wey nerineg, ne ketà ne in-uli diyà te langit arà se intuntun.

¹⁷ Gewii te ebpegpegitungen pà ni Pedro ke engkey se meana dut te impekita kandin, ne netuntulan en dut te menge meama ne

midsuhù ni Cornelio en ini ran en te bengawan dut te baley rin.
¹⁸ Mibpetukewtukew ran se ed-insà te, "Menu, duen etew kayi ne ed-ubpà ne ed-ingaranan ki Simon Pedro?"

¹⁹ Kemulu pà ne ebpegitungen ni Pedro ke engkey se meana dut te impekita kandin. Ne migkehiyan sikandin dut te Kedesenan ne Ebpetuntul te Menusiyà te, "Duen tetelu ne etew ne ebpemengà keykew. ²⁰ Kayi ke en ne pemenaug ke en ne kenà ka meandek ne eduma kandan su siaken se midsuhù kandan."

²¹ Ketà ne mibpemenaug si Pedro ne migkehiyan din ke menge meama te, "Siaken ke ebpemengaan niyu. Meambe ke ini kew?"

²² Midtavak dan te, "Impepengkayi key rut te Kepitan ne si Cornelio. Metidtu ne etew sikandin ne ebpengarap te Eleteala wey ed-edatan sikandin dut te langun ne menge Hudiyanan. Ne ruen suluhuen te Eleteala ne migkahi kandin te ibpeangey ka, Simon Pedro, su apey mekerineg sikandin dut te ibpesabut nu." ²³ Ne impelusud ni Pedro ke menge meama ne impeirehà din sikandin te senge kerukileman.

Guna su nepawà en ne miduma si Pedro kandan. Ne ruen menge mibperetiyyaya riyà te Hupa ne miduma kandin dema. ²⁴ Neketundug ne andew ne nekeuma ran en diyà te inged ne Sisariya. Riyà te baley ni Cornelio ne edtahad elin ke menge suled din wey menge sepekat din ne mid-inggat din. ²⁵ Guna su edlusud en si Pedro perem dutun te valey, ne midsinuhung en ni Cornelio se mibpenimbuel su ebpengarap kandin. ²⁶ Ugaid ne pinetindeg sikandin ni Pedro. "Itindeg ka," ke sikandin, "su siaken ne etew a red dema iring keykew."

²⁷ Ne ebpelelahey ran gewii te edlusud dan dut te baley ne nekita ni Pedro ke merakel ne etew ne nevurun ketà. ²⁸ Migkahi si Pedro kandan te, "Netuenan niyu te ke penduan dey te menge Hudiyanan ne kenà idtuhut ne ebpekiduma key te menge etew ne iring keniyu te kenà Hudiyanan, etawa misan ebpenumbaley rà diyà te keniyu. Ugaid ne impesabut kedì te Eleteala te kenà din egkiyuhan ne ebpegitungen ku te meredsik wey indawey se misan engkey ne etew. ²⁹ Tembù be arà se impeangey a niyu, ne warà a med-alang-alang te ebpengkayi. Na, ed-insà a ve keniyu ke meambe ke impeangey a niyu?"

³⁰ Midtavak si Cornelio te, "Neked-epat en ne hewii arà ne mibpengeningen a kayi te lusud te baley ku te iring kayi ne uras te edluuk ebpemenaug ke andew. Netekew te ruen mid-itindeg kayi te uvey ku ne mesihey se belegkas din. ³¹ Ne migkahi te, 'Ey, Cornelio, nerineg dut te Eleteala ke kebpengeningen nu wey kenà din egkelipatan ke tavang nu rut te menge ayuayu. ³² Na, suhù ka te ebpependiyà te Hupa su ibpeangey nu te senge etew ne ed-ingaranan ki Simon ne ed-ingaranan ded maa ki Pedro. Su riyà ed-ubpà sikandin te baley te etew ne ed-ingaranan dema ni Simon ne ebpembaal te biasbias ne menge lundis te binatang, ne ke baley rin ne riyà te beyvey te rahat?' ³³ Arà dà iya ne impeangey ku en sikuna ne meupiya su migkiyug ke red ne ebpengkayi. Na guntaani," ke si Cornelio, "ne langun dey ini ne nevurun kayi te etuvangan te Eleteala su ebpemineg key te langun ne ibpekahie te Kerenan keykew se ebpesabut kenami."

³⁴ Migkahi si Pedro te, "Netuenan ku en ne benar te warà misan engkey ne etew ne ibpeuna te Eleteala ³⁵ su ke etew te misan endei ne inged ke embiya ed-edatan din ke Eleteala wey metidtu se ulaula

rin ne edtelimaan dut te Eleteala. ³⁶ Ne netuenan niyu te impesabut te Eleteala kenami ne menge kevuwaran ni Israyil te ini se Meupiya ne Tudtul ne ebpekerinew te hinawa tew ne riyà ebpuun te ki Hisu Kristu ne Kerenan dut te langun. ³⁷ Ne netuenan niyu lavew,” ke si Pedro, “ke ned-ulaula riyà te langun ne inged te kevuwaran ni Israyil egenat te inged ne Geliliya ne gewii te nekeipus si Juan se ebpesabut mekeatag te kebunyag ne tuus te kebpedsendit. ³⁸ Netuenan niyu rema te mekeatag ki Hisus ne riyà ebpuun te inged ne Nesarit. Su impelumun te Eleteala kandin ke Kedesenan ne Ebpetuntul te Menusiyà ne midlumun kandin ne mibehey kandin te gehem. Ne mid-eneb din ini se menge inged se ebaal te meupiya wey nengeulian din ke langun ne eddelungen dut te datù te pekaid su diyà ma te kandin ke Eleteala.

³⁹ “Ne sikami,” ke si Pedro, “ne ebpeketithus key su nekita rey ke langun ne mibeelan din diyà te langun ne inged te menge Hudiyanan wey riyà dema te inged ne Hirusalim. Ketà ne mibpeimetayan sikandin dut te menge etew te kedlensanga kandin diyà te pinebelavag ne kayu. ⁴⁰ Ugaid ne ketà te iketelu ne hewii ne mibanew sikandin te Eleteala ne impekita sikandin kenami. ⁴¹ Warà impekita sikandin diyà te langun ne menge etew, ugaid ne kayi rà te kenami ke raan ne nepemilì te Eleteala ne egkevaluy ne editithus, uya, kayi rà te kenami se rumा rin pà te egkaan wey ed-inum dut te nevanew en sikandin.

⁴² “Ne insuhù din kenami,” ke si Pedro, “te ebpemesabut dut te Meupiya ne tudtul diyà te menge etew. Ne insuhù din ded kenami te ebpemenudtul te sikandin se mibehayan te Eleteala te kebayàbàyà te egkukum dut te langun ne menusiyà ke biviyag wey menge minatey. ⁴³ Su ke langun dut te ebpelambas te Lalag te Eleteala rengan,” ke si Pedro, “ne midlalag mekeatag kandin su nekahí ran te piya engkey ne etew se ebperetiyaya kandin ne egkepesehad ke menge salà din su arà te atag te kinepatey ni Hisu Kristu mekeatag dut te menge salà tew.”

Ke Menge Etew ne Kenà Hudiyanan ne Neketelimà te Kedlumun dut te Kedesenan ne Ebpetuntul te Menusiyà

⁴⁴ Ne gewii te edlalag pà si Pedro ne midlumun en ke Kedesenan ne Ebpetuntul te Menusiyà dut te langun ne menge etew ne ebpemineg te lalag din. ⁴⁵ Ne ke menge Hudiyanan ne mibperetiyaya ki Hisus ne egenat te Hupa ne nekeruma ki Pedro ne nengegeyip su netelimà dan ke Kedesenan ne Ebpetuntul te Menusiyà ne midlumun dut te menge etew ne kenà Hudiyanan. ⁴⁶ Su nerineg dan ini se kenà menge Hudiyanan ne nekelalag te kenà kandan ne kinehiyan te mideyù te Eleteala atag dut te gehem din.

Ketà ne migkahi si Pedro te, ⁴⁷ “Ini se menge etew ne kenà Hudiyanan, ne neketelimà dan dema te kedlumun dut te Kedesenan ne Ebpetuntul te Menusiyà iring dut te sikami ne menge Hudiyanan,” ke si Pedro. “Geina te iring kayi, ne warè ebpekevangen te kebunyahai kandan.” ⁴⁸ Dutun ne migkahi sikandin te ebunyahan dan en ini se tuus te mibpesakup dan en ki Hisu Kristu. Ketà ne mibuyù dan kandin te med-ubpà pà sikandin diyà te kandan te pipira ne hewii.

11

Tudtul ni Pedro diyà te Menge Mibperetiyaya ne Hudiyanen Diyà te Hirusalim ne Mekeatag Dut te Menge Mibperetiyaya ne Kenà Hudiyanen Diyà te Antiyuka

¹ Ke menge kedserihan wey ke menge rumा ran ne mibperetiyaya ki Hisus diyà te lusud te Hudiya ne nerineg dan te mibperetiyaya en dema ke menge etew ne kenà Hudiyanen te Lalag te Eleteala. ² Guna su mid-uli si Pedro diyà te Hirusalim ne ruen menge Hudiyanen ne mibperetiyaya ki Hisus ne midawey kandin se egkahi te, ³ “Meambe ke mibpemenayik ka diyà te baley te menge etew ne kenà Hudiyanen ne warà mengeetusi wey mibpekituhen ka rema kandan?”

⁴ Ketà ne miguhud ni Pedro ke ned-ulaula igenat te rudsuan. ⁵ Ke sikandin te, “Diyan a te inged ne Hupa se ebpengeningen i diyà te Eleteala, ne ruen impekita kedi. Ketà te impekita kediey, ne ruen iring te meluag ne saput ne mid-iketan dut te epat ne pediyulu ne intuntun kayi te uvey ku. ⁶ Midtengtengan ku ne ruen nekita ku ne intahù ketà ne menge binatang ne ayam wey mehintulan, ruen edulug wey ruen edlayang. ⁷ Ne ketà ne ruen suwara ne nerineg ku ne migkahi te, ‘He Pedro, enew ka ne sumbalì ka su apey ka mekekaan.’

⁸ “Ugaid ne migkahi a te, ‘Kenà a, Kerenan! Su warà e pà mekekaan te misan engkey ne meredsik ne iring keniyan su indawey dut te penduan ta.’

⁹ “Ne nerineg ku en maa ke suwara ne riyà ebpuun te langit se egkahi te, ‘Ini se migkahi te Eleteala ne meupiya, ne kenà nu kehiya te meredsik.’ ¹⁰ Ini ne ketetelu ku mekita wey merineg, na in-uli diyà te langit arà se intuntun.

¹¹ “Arà dà iya ne nekeuma en ketà te baley ne ubpaan ku,” ke si Pedro, “ini se tetelu ne etew ne riyà ebpuun te Sisariya ne midsuhù su ibpeangey a. ¹² Ne migkehiyan a rut te Kedesenan ne Ebpetuntul te Menusiyà te ibperuma a ne kenà a meuru te kenà dan Hudiyanen. Ne ruen miduma kedi ne nem ne etew ne mibperetiyaya ki Hisus ne menge rumा ku diyà te inged ne Hupa.

“Guna su nekeuma key riyà te Sisariya,” ke si Pedro, “ne midlusud key en diyà te baley rut te Kepitan ne si Cornelio. ¹³ Ne mibpenudtulan key ni Cornelio te ruen suluhuen te Eleteala ne mibpekitakita kandin diyà te baley rin. Ne migkahi ini se suluhuen te, ‘Suhù ka te ebpendiya te inged ne Hupa su ipeangey nu ini se senge etew ne ed-ingaranan ki Simon Pedro. ¹⁴ Su sikandin ne ruen ibpesabut din keniyu ne ebpekebeliyu keykew wey langun niyu ne telteleanan dut te kedusa te Eleteala te salà niyu.’

¹⁵ “Ne gewii ku te edlalag kandan,” ke si Pedro, “ne midlumun en kandan ke Kedesenan ne Ebpetuntul te Menusiyà iring dut te kinelumun din keyta pehaney. ¹⁶ Dutun ne netenuran ku ke migkahi te Kerenan tew ne si Hisus, ke sikandin te, ‘Si Juan, ne wayig se imbunyang din te menge etew, ugaid ne ebunyahahan kew ibpepevayà dut te Kedesenan ne Ebpetuntul te Menusiyà.’ ¹⁷ Na, mepayag nevenar,” ke si Pedro, “te ini se menge etew ne kenà Hudiyanen ne mibpelumunan te Eleteala dema dut te Kedesenan ne Ebpetuntul te Menusiyà iring dut te kinelumun din kenami dut te kineperetiyaya rey ki Hisu Kristu

ke Kerenan. Tembù be kenà a ebpekevangan te helevek te Eleteala dut te menge etew ne kenà Hudiyanan."

¹⁸ Nerineg dà ini rut te menge mibperetiyyaya ne Hudiyanan, ne mid-engked dan en te edsahey kandin. Nasi pà te mideyù dan te Eleteala te migkahi, "Embiya iring ketà ne mibpedsendit dan en bes dema diyà te Eleteala arà se menge etew ne kenà Hudiyanan ne ed-engkeran dan ke meraat ne ulaula ran su apey ran egketelimà ke umur ne warà edtemenan din."

Diyà te inged ne Antiyuka lusud te inged ne Siriya ne ke Mibperetiyyaya ki Hisus ne arà ke Neuna ne Ed-ingaranan te Kristianu

¹⁹ Ketà te hewii ne kineimetayi ki Esteban, ne nevurahey ke menge mibperetiyyaya su mekeatag dut te kedresaya kandan. Ne ruen duma ne nekeuma diyà te inged ne Pinisi, riyà te punul te Sipri, wey inged te Antiyuka lusud te inged ne Siriya se ebpesabut dut te Meupiya ne Tadtul mekeatag ki Hisus ugaid ne riyà dà te menge Hudiyanan. ²⁰ Duen pà duma ne menge mibperetiyyaya ne riyà ebpuun te inged ne Sipri wey Sirini ne mibpendiyà te Antiyuka ne mibpenudtulan dan ke menge etew ne kenà Hudiyanan dut te Meupiya ne Tadtul mekeatag ki Hisus ke Kerenan. ²¹ Ke gehem te Eleteala ne neketavang kandan su medmerakel ne menge etew ne riyà te Antiyuka ne mibperetiyyaya ki Hisus ke Kerenan ne mibpesakup kandin.

²² Ne nerineg ini se tudtul dut te menge mibperetiyyaya diyà te Hirusalim, ne midsuhù dan si Bernabe diyà te Antiyuka. ²³ Guna su nekeuma sikandin ne nekita rin arà se rekelà ne penaub te Eleteala ketà te menge etew. Ketà ne nehalew nevenar sikandin wey mibag-et din sikandan te egkahi te geweri ran te nevaher arà se kebperetiyyaya ran ki Hisu Kristu ke Kerenan. ²⁴ Ne si Bernabe ini ne meupiya se ulaula rin wey layun edlumun kandin ke Kedesenan ne Ebpetuntul te Menusiyà wey meilut se kebperetiyyaya rin te Eleteala. Ne merakel se menge etew riyà te inged ne Antiyuka se mibperetiyyaya ki Hisus ke Kerenan su atag dut te impesabut din.

²⁵ Ne mibpendiyà si Bernabe te inged ne Tarsu su ebpmengaan din si Saulo. ²⁶ Guna su netuen din, ne mid-ewit din te ed-ulì diyà te inged ne Antiyuka. Ne lusud te senge rahun ne mid-uprà dan duma dut te menge mibperetiyyaya kayi te inged ne Antiyuka wey merakel se mibpenurù dan. Ne kayi te inged ne Antiyuka ne ke menge mibperetiyyaya ki Hisus ne arà ke neuna ne mid-ingaranan te Kristianu.

²⁷ Ketà ne hewii, ne ruen ebpuun te Hirusalim ne menge ebpelambas te Lalag te Eleteala ne mibpendiyà te Antiyuka. ²⁸ Ruen senge etew kandan ne ed-ingaranan ki Agabu ne mid-itindeg su igkahi rin neraan ini se impesabut kandin dut te Kedesenan ne Ebpetuntul te Menusiyà. Iyan din migkahi te ruen mepasang ne bitil ne ebpekeuma kayi te langun ne inged te ampew te dunya. (Nekeuma ini se mepasang ne bitil te gewii te si Claudio se egkamal te inged ne Ruma.) ²⁹ Ne netahù te itungan dut te menge edumdumaan ni Hisus te ebehey ran te tavang diyà te menge suled dan te ebperetiyyaya ki Hisus diyà te inged ne Hudiya te endei rà taman se egkegaga te uman seveka. ³⁰ Na ini se mid-ulaula ran, ne mibpeewit dan te kureta ki Bernabe wey si Saulo diyà te menge pekilukesen dut te menge mibperetiyyaya diyà te Hirusalim.

12

Mid-iseg pà ini se kebpekesekiti Rut te Menge Etew ne Mibperetiayaya ki Hisus

¹ Ketà ne hewii te si Hirudis se egkamal ketà ne inged ne midrudsù sikandin te ebpekesakit dut te rumा ne mibperetiayaya ki Hisus. ² Ne mibpeimetayan din si Santiago, ke suled ni Juan, su impetibas din te sundang. ³ Guna su netuenan din te ingkesuat dut te menge Hudiyenan arà se ulaula rin, ne mid-iseg ke meraat ne ulaula rin su impesikem din si Pedro. (Ned-ulaula ini se gewii te Pista ne Egkaan te Pan ne warà Insawug ne Ibpelevag.) ⁴ Guna su nesikem en si Pedro, ne impevilanggù din en. Ne ruen epat ne puntuk ne menge sundaru ne ebanter kandin, ne ruen epat ne sundaru te uman senge puntuk. Su ruen netahù te itungan ni Hirudis te embiya egkeipus en ke Pista te Kedtenuri dut te Menge Hudiyenan te Kedsehari te Suluhuen te Menge Apù dan ne edsumeriyaan din si Pedro diyà te etuvangan te menge etew. ⁵ Ketà ne diyà si Pedro te bilengguan, ugaid ne ke menge mibperetiayaya ki Hisus ne meilut ne ebpengeningen i diyà te Eleteala mekeatag kandin.

Impeliyu si Pedro dut te Suluhuen te Eleteala Diyà te Bilengguan

⁶ Ne arà ne kerukileman ke embiya egkepawà en ne ibpeetuvang en ni Hirudis si Pedro diyà te menge etew, ne nekelipereng si Pedro diyà te elet te deruwa ne ebanter kandin. Nevakù sikandin te deruwa ne sengkali wey ruen ebanter diyà te bengawan te bilengguan. ⁷ Netekew te duen suluhuen te Kerenan ne nekeitindeg diyà te uvey rin, ne ruen merayag kayi te lusud te bilengguan. Ne migunggel dut te suluhuen si Pedro ne migkehiyan din te, “Gaan ke en med-enew!” Arà dà ne nengeulug en ini te sengkali ne imbakù te belad din. ⁸ Ne migkahi ke suluhuen te Kerenan te, “Pipinding ka wey medtetelumpà.” Ne midumaan ini ni Pedro. Ne migkahi maa ke suluhuen te, “Kukumbalà ka ne medtundug kedi.”

⁹ Ne midtundug si Pedro kandin te edlihawang dut te bilengguan, ugaid ne warà din metueni ke benar be ini se ed-ul-ulaan dut te suluhuen su iyan din kunaan ke ebpenehinep dà sikandin. ¹⁰ Midsahad ini se deruwa kayi te penempang ne menge bantey, ne dutun te ikeruwa ne menge bantey taman te nekeuma ran diyà te menge putew ne bengawan ne ebpependiyà te siyudad. Nekeuma ran ketà ne netekew te neveukaan ini se bengawan ne midlihawang dan en. Ne midtuntul dan te ralan ne gewii ran te ed-ipanew ne netekew te warà en ke suluhuen te Kerenan.

¹¹ Ketà ne neimemanan ni Pedro te kenà tehinepen dà ini se nedulaula rin ne migkahi sikandin te, “Ini se suluhuen ne impecpengkayi te Eleteala su ebpeliyawang kedi rut te palad ni Hirudis wey rut te meraat ne egketemanan ku ne ebpenerengen dut te menge Hudiyenan ne ibped-ulaula kedi.”

¹² Guna ne netuenan ni Pedro ini, ne mibpendiyà sikandin te baley ni Maria ke iney ni Juan ne ed-ingaranan dema ki Marcos. Ne merakel se menge etew ne nevurun ketà su ebpengeningen te Eleteala. ¹³ Ne mibpemehuktuk si Pedro diyà te bengawan te lama su ebpetukewtukew ne ruen meritan ne ed-ingaranan ki Roda ne sugsuhuen ketà ne baley ne nekeuma su iyan ebukà.

¹⁴ Nekilala rin ke suwara ni Pedro, ugaid ne egenat dut te kegkehalew rin ne warà din en mevukai su midlived pà diyà dut te menge etew ne ketà te lusud te baley su ebpesabut kandan. Ke sikandin te, “Si Pedro ne diyan te liyu rut te bengawan.”

¹⁵ “Egkevuneg ka!” ke sikandan. Ugaid ne meilut nevenar se kedlalag din ne egkahi te benar iya ini ne migkahi ran te, “Suluhuen arà te Eleteala ne ebantey kandin!”

¹⁶ Ugaid ne diyà te bengawan ne warà med-engked si Pedro se ebpetukewtukew. Netaman ne mibukaan dan ke bengawan ne nekita ran te benar iya ne si Pedro ini ne negeyip dan nevenar. ¹⁷ Ne miguringan kandan te kenà dan pà medlalag, ne mibpenudtul din kandan ke memenu se kinepelihawang kandin te Eleteala diyà te bilengguan. “Penudtula niyu ini,” ke si Pedro, “diyà te ki Santiago wey ke ruma ne menge suled tew te ebperetiyaya.” Ne mid-awà sikandin ketà su mibpendiyà te senge inged.

¹⁸ Guna su nepawà en ne newawet ke menge bantey diyà te bilengguan se egkahi te, “Nemenu ve buwa si Pedro?”

¹⁹ Impepemengà ni Hirudis, ugaid ne warà danmekita. Ne impesumeriyà din ke menge bantey, ne mibpeimetayan din.

Ketà ne mid-awà si Hirudis diyà te lusud te Hudiya ne mibpendiyà te inged ne Sisariya ne riyà pà med-ubpàubpà sikandin.

Ke Kinepatey ni Hirudis

²⁰ Ne ingkeepesi nevenar ni Hirudis ke menge etew diyà te inged ne Tiru wey Sidun. Tembù be arà se menge etew ketà te deruwa ne inged ne mipendiyà te kandin. Ugaid ne mid-una ran pà mebpекidlag ki Belastu, senge etew ne egkamal dut te turuhan ni Hirudis, su apey ebpeketa vang sikandin kandan. Ne ketà ne midlaus dan diyà te ki Hirudis te ebuyù se edtuntey kandin dut te kegkeepes din. Mid-ulaula ran ini su riyà ebpuun te inged ni Hirudis se kebpekekuwa ran te keuyahan dan.

²¹ Ne rutun te hewii ne neupakatan en ni Hirudis te ebpekidlalag dut te menge etew, ne imbevelegkas din ke belegkas ne edait dut te kedatù wey mibpinuu sikandin diyà te kurusi. Ne ketà ne mibehey te lalag diyà dut te menge etew. ²² Ne mibpememensag ke menge etew te, “Kenà ini etew se edlalag,” ke sikandan, “su diwata.”

²³ Arà dà ne pinnedaru en sikandin dut te suluhuen te Kerenan su iyan din kiyug ne sikandin se edeyuen te menge etew, ugaid ne iyan edait perem ne edeyuen ne Eleteala. Ne midtegkayan ini se lawa rin, na minatey en.

²⁴ Ugaid ne mid-iseg ke kebpesabut dut te Lalag te Eleteala, ne mibmerakel ke menge etew ne mibperetiyaya ketà. ²⁵ Ne geina te nekeipus en si Bernabe wey si Saulo te mibpeveelan kandan diyà te Hirusalim, ne mid-ulì dan en diyà te Antiyuka. Ne pineruma ran si Juan ne ed-ingaranan dema ki Marcos.

13

*Intail dut te Menge Mibperetiyaya te Inged ne Antiyuka si Bernabe
wey si Saulo te Ebpesabut te Lalag te Eleteala*

¹ Diyà te menge mibperetiyyaya ne riyà te Antiyuka ne ruen menge ebpelambas te Lalag te Eleteala wey ebpenuurù te Lalag din. Ketà ne si Bernabe, si Simeon (ke ed-imukuen te Meitem), si Lucio (ne riyà ebpuun te Sirini), ne si Menain (ne riyan en medekelà te ki Hirudis ne gubinedur) wey si Saulo. ² Gewii ran te ebpengarap te Kerenan wey edlimpas te egkaan su ebpengeningeni ran, ne ruen impesabut kandan dut te Kedesenan ne Ebpetuntul te Menusiyà. Ke sikandin te, “Idtail niyu kediey si Bernabe wey si Saulo su apey ran egelevek dut te ebpeveelan ku.” ³ Ketà ne midlimpas dan maa te egkaan su mibpengeningeni ran, ne indampen dan ke velad dan ki Bernabe wey si Saulo ne arà pà ne impeipanew ran.

Nekeuma si Bernabe wey si Saulo Riyà te Punul ne Sipri

⁴ Geina te impeipanew si Bernabe wey si Saulo rut te Kedesenan ne Ebpetuntul te Menusiyà, ne mibpendiyà dan te inged ne Selusiya diyà te beyvey te rahat te mid-untud te kapal te ebpependiyà te punul ne Sipri. ⁵ Guna ne nekerunggù dan en diyà te inged ne Selamis ketà te punul te Sipri, ne impesabut dan ke Lalag te Eleteala diyà te menge valey ne ebpengedian te menge Hudiyanan te penduan dan. Iyan miduma kandan si Juan ne ed-ingaranan dema ki Marcos ne edtavang kandan.

⁶ Neeneb dan ini se punul ne Sipri egenat te inged ne Selamis taman te inged ne Papus. Ketà ne neuma ran ini se etew ne ed-ingeranan ki Barhisus ne metau ne ebaal te malik mata. Hudiyanan ini ne uvag kun ne ebpelambas te Lalag te Eleteala. ⁷ Ne sepekat sikandin ni Sergio Peulu ne gubinedur te ini ne punul. Metampas ne ebpegitung si Sergio, ne impepengkayi te turuhan din si Bernabe wey si Saulo su egkesuat sikandin ne ebpemineg te Lalag te Eleteala. ⁸ Ugaid ne mibelavag kandan ini se metau ne ebaal te malik mata ne ed-ingeranan ki Barhisus ne ed-ingeranan ded maa ki Elimas (su ini se ngaran din dut te kinehiyan ne Gerisiyanen) su kiyug din ne kenà ebpekeperetiyyaya ke gubinedur ki Hisus. ⁹ Ne si Saulo, ne ed-ingaranan dema ki Pablo, ne midlumunan dut te Kedesenan ne Ebpetuntul te Menusiyà ne midtengtengan din arà se metau te malik mata ¹⁰ ne migkehiyan din te, “Anak ka rut te datù te pekaid! Ne kunterà ka rut te langun ne meupiya! Nepenù ke itungan nu te ulaula ne menge limbung! Ne ebpehintarù ka te benar ne Lalag te Kerenan! ¹¹ Na guntaani,” ke si Pablo, “edtebpien ka te Kerenan. Egkepisek ka ne meuhet ne kenà ka ebpekekita te rayag te andew.”

Arà dà ne mibmerusirem en se keddertengteng ni Elimas ne kenà en ebpekekita. Nekeyangapyangap sikandin se ebuyù te ebpikit kandin. ¹² Guna su nekita rut te gubinedur arà se ned-ulaula ni Elimas ne mibperetiyyaya en sikandin. Su negeyip nevenar dut te impesabut ni Pablo kandin mekeatag dut te Lalag te Kerenan.

Nekeuma si Pablo wey si Bernabe Riyà te Inged ne Antiyuka Lusud te Inged ne Pisidya

¹³ Mid-awà ensi Pablo ketà te inged ne Papus ne mid-untud dan te kapal te ebpependiyà te inged ne Pirga lusud te inged ne Pempilya. Nekeuma ran ne si Juan ne ed-ingaranan dema ki Marcos ne midsuwey kandan su midlivid sikandin diyà te Hirusalim. ¹⁴ Ne mid-awà en si

Pablo ki Bernabe riyà te inged ne Pirga ne midlaus dan diyà te inged ne ed-ingaranan maa te Antiyuka diyà te lusud te Pisidya. Dut te Hewii ne Id-imeley ne midlusud dan diyà te baley ne ebpengedian te menge Hudiyanan te penduan dan ne mibpinuu ran dutun.¹⁵ Duen mibasa rut te insurat ne penduan ni Moises wey ingkesurat dut te menge ebpelambas te Lalag te Eleteala dengan. Neipus ketà ne ruen midsuhù dut te pekilukesen diyà te baley ne ebpengedian dan te migkahi te, "Menge suled, embiya ruen egkehiyen niyu kayi te menge etew ini ne nevurun ne ebpekepevag-et te hinawa ran ne leleha niyu en."

¹⁶ Ketà ne mid-itindeg si Pablo ne mid-uyew te belad din ne migkahi te,

"Menge ruma ku ne menge kevuwaran ni Israyil abpeg dut te menge etew ne kenà Hudiyanan ne nevurun kayi su ebpengarap te Eleteala, pemineha niyu ini se egkehiyen ku keniyu.¹⁷ Ini se menge keep-epuan dut te sikami ne menge Hudiyanan," ke si Pablo, "ne nepemili te Eleteala, ke Eleteala ne ebpengerapen dut te sikami ne bansa te Israyil. Ne mibmerakel ke kevuwaran dan te gewii ne riyà dan med-upbà te inged ne Ihiptu, inged ini te ruma pà ne bansa. Ne midtevangan dan dut te gehem te Eleteala su nekeliyu ran ketà ne inged.¹⁸ Lusud te neked-epat nepulù ne rahun diyà te tanà ne kenà egkeubpaan te etew se kinetigker dut te Eleteala kandan, misan warà dan medtuman te menge lalag din.¹⁹ Ne pitu ne bansa se midereetan din diyà te lusud te inged ne Kenaan," ke si Pablo, "ne impeangkun din ini se tanà dut te menge etew rin ne kevuwaran ni Israyil.²⁰ Ne inggenat dut te hewii ne mibpendiyà dan te inged ne Ihiptu taman dut te hewii ne ked-upbà dan diyà te inged te Kenaan ne neked-epat ne hatus wey lelima nepulù ne rahun.

"Neipus arà," ke si Pablo, "ne ruen en menge perekukum ne netendù te Eleteala ne ed-ewit kandan taman dut te hewii ne si Samuel en se ebpelambas te Lalag te Eleteala.²¹ Ketà ne mibuyù dan te Eleteala te ruen datù ne ed-ewit kandan. Ne midtendù din si Saulo, ke anak ni Kis, ne kevuwaran ni Benjamin, ne midatù kandan taman te epat nepulù ne rahun.²² Guna su in-awà sikandin te Eleteala ne si David en maa se imperatù te Eleteala kandan. Ne ini se migkahi te Eleteala mekeatag ki David, ke sikandin te, 'Si David ini, ke anak ni Isai, se ebpekesuhat te hinawa ku. Su edtumanen din ke langun ne idsuhù kandin.'²³ Na," ke si Pablo, "si Hisus ini ne kevuwaran ni David ne nepemili te Eleteala ne impasad din ne ebpekepelihau keytew ne menge kevuwaran ni Israyil.²⁴ Ne rutun te warà pà medrudsù te ebpenurù si Hisus, ne nekeuma si Juan se ebbesabut dut te langun ne menge kevuwaran ni Israyil te mebpedsendit dan wey ebpebunyag su tuus te ed-engked dan en dut te meraat ne ulaula ran.²⁵ Guna su mehaan en ebpekeipus si Juan dut te helevek ne imbehey kandin te Eleteala, ne ruen migkahi rin dut te menge etew. Ke sikandin te, 'Engkey a diyà te itungan niyu? Kunaan niyu vuwa ke siaken en ke ebpenerengen niyu, ugaid ne kenà siak. Ugaid ne arà se ebpenerengen niyu ne ebpeketedundug kedì, ne kenà a edait te misan edluung dà te telumpà din.'

²⁶ "Na menge ruma ku ne menge kevuwaran ni Israyil," ke si Pablo, "wey ke menge etew ne kenà Hudiyanan ne nevurun kayi su ebpengarap te Eleteala, sikita ke mibpeewitan te Eleteala dut te menge lalag din su apey kiyu ebpekeliyu rut te keberedusaan mekeatag

dut te salà tew. ²⁷ Su ke menge etew riyà te Hirusalim wey misan ke egkeunutan dan ne warà dan metueni te iyan bes ebpekepeliyu kenitew ne si Hisus. Ne warà dan mesebuti ke menge lalag ne ingkesurat dut te menge ebpelambas te Lalag te Eleteala rengan, misan uman Hewii te Id-imeley ne egkerineg dan te kebesaa diyà te menge baley ne ebpengedian dan te penduan dan. Ugaid ne misan iring ketà te warà dan mesebuti ini, ne netuman dan arà se ingkesurat dut te menge ebpelambas te Lalag te Eleteala rengan ketà te in-isuhat dan ne kewagib te ebpeimetayan dan si Hisus. ²⁸ Ne misan warà netuen dan ne ibenar ne salà ne dait ne ebpeimetayan si Hisus, ne mibuyù dan ki Pilatu ke gubinedur te ebpeimetayan kandin. ²⁹ Guna su neipus arà se nenged-ulaula te kegketuman dut te ingkesurat neraan te menge ebpelambas te Lalag te Eleteala rengan ne ibped-ulaula ki Hisus, ne in-awà dut te menge mibperetiyaya ke bangkey ni Hisus ketà te pinebelavag ne kayu ne inleveng dan. ³⁰ Ugaid ne mibanew sikandin te Eleteala, ³¹ ne guna su nevanew en sikandin ne taman te pipira ne hewii ne mibpekitakita sikandin dut te menge nekeruma kandin ne egenat te lusud te Geliliya taman te Hirusalim. Ne guntaani ne sikandan se titihus ne ebpenudtul mekeatag ki Hisus diyà te langun ne menge kevuwaran ni Israyil.

³² “Na sikami,” ke si Pablo, “ne mibpengkayi su ibpesabut dey keniyu ke Meupiya ne Tuditul. Ini se Meupiya ne Tuditul ne mekeatag dut te impasad te Eleteala te menge keep-epuan tew rengan. ³³ Na ini se impasad din kandan dengan ne netuman en kayi te kenitew ke menge kevuwaran dan ketà te kinebanew ki Hisus. Su ruen impesurat te Eleteala riyà te riberù ne ed-ingaranan te Salmu ketà te ikeruwa ne bayuk ne egkahi te,

‘Sikuna ke Anak ku

ne guntaani ne ibpekita ku te Amey a nikuna.’

³⁴ Ne ruen dema impesurat te Eleteala mekeatag te kebanew kandin ne kenà egkeredak ke lawa rin su migkahi te,

‘Ini se penaub ne impasad ku ki David dengan

ne edtumanen ku kayi te keykew.’

³⁵ Ne ruen pà lavew impesurat te Eleteala ki David ne migkahi ni Hisus te,

‘Siaken se metulanged ne sugsuhuen nu

ne kenà nu idtuhut ne ini se lawa ku

ne egkeredak diyà te leveng.’

³⁶ “Na netuenan ta, menge suled,” ke si Pablo, “ne midtuman ni David arà se mibpeveelan kandin te Eleteala, ne guna su neipus din na minatey en. Ne inleveng sikandin diyà te ulid te midlevengan te menge apù din, ne nererekad ke lawa rin. ³⁷ Ugaid ne si Hisus, arà se mibanew te Eleteala, ne warà mulà meredak ke lawa rin.

³⁸⁻³⁹ “Tembù be menge suled, langun niyu ne menge rumu ku ne kevuwaran ni Israyil, ketueni niyu ne kayi ebpnuun te ki Hisus ini se lalag ne ibpesabut ku keniyu ne kebekeliyu ta te kedusa te Eleteala keyta mekeatag dut te menge salà ta. Su piya engkey ne etew se ebperetiyaya kandin ne ebpekeliyu dut te kedusa te Eleteala kandin, ugaid ke kedaduan ta rut te menge penduan ni Moises ne kenà

ebpekegaga ne ebpeliyu keyta. ⁴⁰ Na uram kew su apey kenà egked-
ulaula kayi te keniyu ini se impesurat te menge ebpelambas te Lalag
te Eleteala rengan ne egkahi te,

⁴¹ ‘Sikiyu ne menge edsumpalit su kenà kew ebperetiyaya,
ne uram kew!

Su egkegeyip kew te ebeelan ku,
ne ebpematey kew, ke se Eleteala.

Su ruen ebeelan ku te biviyag kew pà
ugaid ne kenà niyu ebperetiyayaan,
misan duen ebpemenudtul keniyu.’”

⁴² Nekeipus si Pablo te edlalag ne gewii te edlihawang dan en ki
Bernabe dut te baley ne ebpengedian te menge Hudiyanan te penduan
dan, ne migkehiyan dan dut te menge etew te medlived dan te
edtundug ne Hewii ne Id-imeley su apey ran mekeuman mekesabut
mekeatag te ini. ⁴³ Ne guna su midlihawang en ke menge etew ne
nevurun ketà, ne ruen midtundug ki Pablo wey si Bernabe. Ini se
midtundug kandan ne menge Hudiyanan wey kenà Hudiyanan ne
midruyud te peretiyaya te menge Hudiyanan. Ne migkehiyan dan
ni Pablo wey si Bernabe te mibag-et dan ke hinawa ran te kenà dan
medlekà dut te kebperetiyaya ran te Eleteala ne midlimù kandan.

⁴⁴ Guna su neuma en ke edtundug ne Hewii te Id-imeley ne
malùmalù langun ne menge etew te inged ne Antiyuka ne nevurun
su ebpemineg te Lalag te Kerenan. ⁴⁵ Guna su nekita dut te menge
Hudiyanan te denda ne menge etew ne nevurun, ne nesihi ran
midsumpalit dan ke impenurù ni Pablo ne midtempelà dan dema
sikandin.

⁴⁶ Ugaid ne nasi en ne mid-iseg si Pablo wey si Bernabe te edlalag
ne egkahi te, “Iyan iya se ed-unaan dey sikiyu ne menge Hudiyanan
te ebpesabut dut te Lalag te Eleteala. Ne geina te warà niyu telimaa
ini wey ne warà niyu mepegitung te sikiyu se dait ne ebpeketalima te
umur ne warà edtemanan din, ne ed-ewaan dey sikiyu su ebpendiyà
key te menge etew ne kenà Hudiyanan. ⁴⁷ Su ini rema ke insuhù te
Kerenan ne ebpeveelan kenami ne ingkesurat ne Lalag din ne egkahi
te,

‘Iring kew te menge sulù ne intahù ku
ne ebpekevehey te rayag
dut te menge etew ne kenà Hudiyanan,
su apey ebpekeuma ini se Meupiya ne Tuditul
diyà te epat ne pediyulu te dunya
te siaken se ebpekebeliyu te menge etew
rut te kedusa te Eleteala kandan!’”

⁴⁸ Guna su nerineg ini dut te menge etew ne kenà Hudiyanan ne
nengehalew ran wey mideyù dan ke Eleteala mekeatag dut te lalag
din. Ne langun ne menge etew ne nepemili te Eleteala ne ebehayan te
umur ne warà edtemanan din ne mibperetiyaya en ki Hisus.

⁴⁹ Nekeeneb ini se impesabut ne Lalag te Kerenan diyà te langun ne
menge inged ketà. ⁵⁰ Ugaid ne migkehiyan dut te menge Hudiyanan
ke menge unuten wey ke menge egkeedatan ne menge meritan ne
kenà Hudiyanan ne ebpengarap te Eleteala se ebaal te igkeepesi su
apey ran ebpekesekiti si Pablo ki Bernabe. Ketà ne impeawà dan
arà se deruwa rut te inged dan. ⁵¹ Ne ketà te ked-awà ni Pablo ki

Bernabe ne midagdag dan ke lipupuk dut te menge paa ran su tuus ini te kenà en kilid kandan kegkeuma arà se hewii ne kedtimbang te Eleteala te menge etew. Ne midlaus dan en diyà te inged ne Ikunya.⁵² Ne ke menge mibperetiyaya ki Hisus ne netetahak diyà te Antiyuka ne midlumun kandan ke Kedesenan ne Ebpetuntul te Menusiyà ne nehalew ran neveran.

14

Nekeuma si Pablo ki Bernabe diyà te Inged ne Ikunya

¹ Diyà te inged ne Ikunya ne iring ded maa dut te mid-ulaula ni Pablo ki Bernabe te riyà dan pà te Antiyuka su midlusud dan diyà te baley ne ebpengedian te menge Hudiyanan te penduan dan su ibpesabut dan ke Lalag te Eleteala. Ne meilut te kebpesebuti ran ketà dut te merakel ne menge Hudiyanan wey kenà Hudiyanan se mibperetiyaya ki Hisus. ² Ugaid ne ruen migkehiyan dut te menge Hudiyanan ne warà mebperetiyaya kayi te menge etew ne kenà Hudiyanan ne ebaal te kegkeepesi ran dut te menge mibperetiyaya ki Hisus. ³ Ne malù meuhet se ked-ubpaubpà ni Pablo ki Bernabe ketà te inged ne Ikunya. Ne warà kegkeandek dan te ebpesabut mekeatag ki Hisus ne Kerenan. Ne mibpekita ke Kerenan dut te menge etew te benar arà se Lalag ne impesabut ni Pablo mekeatag te kegkeyru te Kerenan kandan su imbehey rin kandan ke gehem din te ebaal te ulaula ne mekegeyip wey mekeinuinu ne ed-ul-ulaan. ⁴ Ne nevaad ke menge etew kayi te inged ne Ikunya su ruen midtampil te menge Hudiyanan wey ruen dema midtampil enki Pablo.

⁵ Ne ketà ne ruen menge Hudiyanan wey kenà Hudiyanan abpeg dut te egkeunutan dan ne mid-upakat dan se ebpekesekitan dan si Pablo ki Bernabe su ibperumbag dan te batu. ⁶ Ugaid ne guna su nerineg ini eni Pablo ne mibpelahuy ran se ebpendiyà te menge inged ne Listra wey Dirbi lusud te inged ne Likunya wey ke nekeerivey ne menge inged ⁷ ne ketà ne impesabut dan ke Meupiya ne Tudtul.

Nekeuma en ensi Pablo diyà te Menge Inged ne Listra wey Dirbi

⁸ Ne riyà te inged ne Listra ne ruen meama ne pungkù igenat te kineanaka kandin ne warà en mekeipanew. ⁹ Mibpemineg din ini se lalag ni Pablo. Ne netuenan ni Pablo se mibperetiyaya arà se etew ne egkeulian sikandin, tembù be midtengtengan ni Pablo sikandin ¹⁰ ne mibmerahing ke suwara rin se egkahi te, “Itindeg ka!” Ne arà dà iyan ne mid-umbetut en te mid-itindeg sikandin ne mid-ip-ipanew.

¹¹ Guna su nekita rut te denda ne etew arà se mibeelan ni Pablo ne mibpememensag dan en te kinehiyan ne Linikunyan se egkahi te, “Mid-iring te paras te etew ke menge diwata ne mibpehunrerènà kayi te keyta!” ¹² Ne iyan dan in-ingaran ki Bernabe ne si Siyus, ne iyan dan in-ingaran ki Pablo ne si Hirmis su sikandin ke metau ne edlag. ¹³ Ne riyà te uvey te inged ne ruen baley ketà ne ebpenggerapan dan te diwata ran ne si Siyus. Ne ruen terebpelengesa ketà ne nekeuma diyà te bengawan dut te ubpaan eni Pablo ne mid-ewit te menge sapi wey midurung ne menge kevukaran su sikandin abpeg ke menge etew ne edrenà te separat dut te deruwa ne kedserihan.

¹⁴ Guna su netuenan ni Bernabe ki Pablo ini se ed-ul-ulaan dut te menge etew ne mibpemindas dan ke belegkas dan ne tuus te kenà

dan ebpekesuhat kayi te ini ne ulaula. Ne mibpelelahuy ran diyà te luuk dut te menge etew se ebpemengsag te,¹⁵ “Meambe ke ed-ul-ulaan niyu ini? Sikami ne etew red dema iring kenyi! Ne iyan dey impengkayi te inged niyu su ibpesabut dey ke Meupiya ne Tudtul apey niyu egkeengkeri ke kebpengarap niyu te menge diwata ne warà rantek din su apey kew ebpekepengarap te Eleteala ne warà kemetayen din. Iyan sikandin midlimbag te langit wey tanà wey dahat wey ke langun ne neketahù ketà.¹⁶ Dengan ne intuhut te Eleteala dut te langun ne menge etew ne ed-ulaula te piya engkey ne egkiyuhun dan.¹⁷ Ugaid ne misan iring ketà te intuhut din, ne ruen menge tuus ne ibpekilala rin te sikitew ne menge etew ne duen igkeupiya tew. Su ebehayan kiyu rin te uran ne ebpekepevahas te pinemula tew te hewii te kebehas. Ibehey rin keytew ke keuyahan tew ne ibmehalew te hinawa tew.”¹⁸ Ne misan iring ketà se lalag eni Pablo, ne merehen dan ne egkerawey arà se menge etew ne edrenà te idsiparat kandan.

¹⁹ Ketà ne ruen nekeuma te inged ne Listra ne menge Hudiyanan ne riyà ebpuun te Antiyuka lusud te Pisidya wey riyà ebpuun dema te inged ne Ikunya. Ne nekumbabid dan ke menge etew kayi te edtampil kandan su ebaal te igkeepesi ran engki Pablo. Ketà ne mibpenrumbag dan te batu si Pablo wey miguyud dan diyà te liyu te inged su kunaan dan ke minatey en sikandin.²⁰ Ugaid ne guna su nevurun ke menge mibperetiyyaya ne midlingut kandin, ne mid-enew sikandin ne midlived ketà te inged. Ne ketà te hewii ne edtundug ne mid-awà si Pablo ki Bernabe su mibpendiyà dan te inged ne Dirbi.

Mid-ulì en ensi Pablo Diyà te Inged ne Antiyuka lusud te Siriya

²¹ Guna su nekeuma en si Pablo ki Bernabe diyà te inged ne Dirbi ne impesabut dan ke Meupiya ne Tudtul ne merakel ketà se miduma ki Hisus. Dutun ne mid-uli dan diyà te menge inged ne Listra wey Ikunya, ne ketà ne midlaus dan diyà te inged ne Antiyuka lusud te Pisidya.²² Ketà ne menge inged ne impenurù dan se ibpeiseg ke keduma dut te langun ne menge mibperetiyyaya ki Hisus ne mibag-et dan ke hinawa dut te menge etew te kenà medlekà dut te peretiyyaya ran. Su impesabut dan te, “Ebpevayà ki pà iyan te menge kemerehenan te kenà ki pà ebpekelusud dut te Edetuan te Eleteala,” ke sikandan.²³ Ne ketà te langun ne inged ne impesabut ni Pablo ke Lalag te Eleteala ne ruen menge mibperetiyyaya ne midtendù eni Pablo ne menge pekilukesen. Ketà ne midlimpas dan te egkaan wey mibpengeningi ran te Eleteala wey inrumakan dan diyà te Kerenan ne iyan edtuganur kandan arà se midserihan dan.

²⁴ Guna su mid-apet en si Pablo riyà te inged ne Pisidya, ne nekeuma ran en diyà te inged ne Pampilya.²⁵ Ne ketà ne impesabut dan ke Lalag te Eleteala diyà te menge etew te inged ne Pirga, na mibpetiulug dan diyà te inged ne Etalya diyà te beyvey te rahat.

²⁶ Ne ketà ne mid-untud dan te kapal te ed-ulì diyà te inged ne Antiyuka. Su arà se inged ne Antiyuka ne netai si Pablo ki Bernabe dut te menge mibperetiyyaya su intepeney ran se hinawa ran diyà te Eleteala ne iyan edtuganur kandan te ed-ip-ipanew se ebpesabut te Meupiya ne Tudtul. Ne guntaani ne neipus dan en ini se mibpeveelan kandan.

²⁷ Guna su nekeuma ran en diyà te inged ne Antiyuka, ne miburun dan ke menge mibperetiyya ki Hisus ne mibpenudtl dan arà se langun ne impehelevek kandan impepevayà te tavang te Eleteala kandan. Ne miguhud dan lavew ke petiralan te Eleteala te ibpesabut ke Meupiya ne Tuditl diyà te menge etew ne kenà Hudiyanan ne ketà ne merakel se mibperetiyya ki Hisus. ²⁸ Ne neuhet se ked-ubpaubpà dan diyà dut te menge mibperetiyya te inged ne Antiyuka.

15

Ke Kinevurun eni Pablo Dut te Menge Pekilukesen Diyà te Inged ne Hirusalim

¹ Duen menge etew ne riyà ebpuun te Hudiya ne mibpendiyà te inged ne Antiyuka ne mibpenurù dan ke menge mibperetiyya ketà. “Embiyà kenà kew ebpeetus iring dut te impenurù ni Moises rengan,” ke sikandan, “ne kenà kew ebpekeliyu rut te kedusa te Eleteala keniyu.” ² Ne mibpekid-apul te mevaher en si Pablo ki Bernabe kandan, ne mibpekidlewanà dan mekeatag dut te impenurù ketà te menge etew. Tembù be ke menge mibperetiyya ketà se midsuhù ki Pablo wey si Bernabe wey duma ne mibperetiyya te ebpendiyyà te inged ne Hirusalim su ebpekibalak dut te menge kedserihan wey ke menge pekilukesen mekeatag te ini ne penurù.

³ Ketà te ked-ipanew ran ne midtevangan dan dut te menge mibperetiyya kayi te inged ne Antiyuka. Ne gewii te kebpevayà dan kayi te Pinisiya wey Semariya ne miguhud dan mekeatag dut te menge etew ne kenà Hudiyanan ne nekeperetiyya en ki Hisus. Nerineg ini rut te menge mibperetiyya ketà ne nengehalew ran nevenar. ⁴ Guna su nekeuma ran diyà te inged ne Hirusalim ne migalewhalew ran dut te menge mibperetiyya, ke menge kedserihan, wey ke menge pekilukesen ketà. Ne impenudtl ni Pablo ki Bernabe ke langun ne mibpeveelan te Eleteala kandan ibpepevayà te tavang din. ⁵ Ugaid ne ruen menge mibperetiyya ketà ne sakup te menge Paresiyu ne mid-itindeg se egkahi te, “Iyan iya se mebpeetus dan arà se menge etew ne kenà Hudiyanan wey medtuman dan dema te penduan ni Moises.”

⁶ Miburunburun ini se menge kedserihan wey ke menge pekilukesen su ebpengesaken dan mekeatag ketà. ⁷ Guna su neuhet en se kebpengasak dan ne mid-itindeg si Pedro ne migkahi te, “Menge suled, netuenan niyu en te kayi te keniu ne siaken se nepemillì te Eleteala ne ebpesabut dut te Meupiya ne Tuditl diyà te menge etew ne kenà Hudiyanan su apey ran ebpekerineg ne ebpekeperetiyya ran ki Hisus. ⁸ Ne ke Eleteala ne netuenan din ke hinawa te menge etew, ne mibpemasmasan din te kedadlimà din dut te menge etew ne kenà Hudiyanan su imbehey rin ke kedlumun dut te Kedesenan ne Ebpetuntul te Menusiyà kandan iring dut te kinevehey rin te kinelumun dut te Kedesenan ne Ebpetuntul te Menusiyà keyta. ⁹ Warà pebiraa te Eleteala,” ke si Pedro, “ke sikami ne menge Hudiyanan wey ke menge etew ne kenà Hudiyanan su ibpeliyu rin dema sikandan dut te kedusa rin te salà dan sabap dut te kineperetiyya ran ki Hisus. ¹⁰ Na,” ke si Pedro, “meambe ke kiyug niyu ne ebperengitan niyu ke Eleteala ketà te ini se ibpetuman niyu dut te menge ruma tew ne mibperetiyya ki Hisus! Su arà se ibpetuman niyu kandan ne penduan

ni Moises, ne misan ke keep-epuan tew wey sikitew rema ne warà meketuman. ¹¹ Ugaid ne tentenuri niyu menge suled,” ke si Pedro, “ne ini se kebperetiyya tew se ebpekepeliyu keytew te menge Hudiyanan dut te kedusa te Eleteala su atag dut te kegkeyru rin. Ne engketà ded dema ke menge etew ne kenà Hudiyanan.”

¹² Nerineg dà ini rut te menge etew ne nevurun ketà ne mibpeeneng-eneng dan. Ne mibpemineg dan ki Bernabe wey si Pablo te ebpenudtul mekeatag dut te ed-ul-ulaan dan ne mekegeyip wey ned-ulaula ne mekeinuinu dut ke migelevok dan diyà te menge etew ne kenà Hudiyanan impepevayà dut te gehem te Eleteala ne imbehey rin kandan.

¹³ Guna su nekeipus dan se edlag ne migkahi en si Santiago te, “Pemineha niyu, menge suled, ini se egkehiyen ku. ¹⁴ Miguhud en ni Simon kenyu mekeatag dut te neuna ne impekita te Eleteala ne limù din dut te menge etew ne kenà Hudiyanan su apey ruen diyà te kandan ne eppesakup kandin. ¹⁵ Ini se kebpsakup dut te menge etew ne kenà Hudiyanan te Eleteala ne iring dut te nekahi te menge etew ne ebpelambas te Lalag te Eleteala rengan su ruen ingkesurat ne lalag te Eleteala ne egkahi te,

¹⁶ ‘Embiya egkeipus ini
ne edlived a, ke se Kerenan,
ne ebengunen ku maa
ke netunggad ne baley ni Dabid.
Uya, ibpeitindeg ku ini se baley rin
su ibpeulit ku maa.

¹⁷ Ketà ne langun ne menge etew ne kenà Hudiyanan
ne ebpengkayi dema su ibehey ran ke hinawa ran kediey,
su mibpemili ku rema sikandan.

¹⁸ Ini se migkahi te Kerenan
ne impesabut en ini egenat dà dengan.’

¹⁹ “Ini,” ke si Santiago, “ne iya kayi te kedì ne itungan ne ini se menge etew ne kenà Hudiyanan ne imbehey ran ma ke hinawa ran te Eleteala ne kenà tew en igkereheni. ²⁰ Iyan meupiya ne edsuratan ta sikandan ne egkehiyen tew te kenà dan megkaan te egkeenen ne indawey su inrenà ne siparat diyà te ledawan ne kenà tidtu ne Eleteala, ne kenà dan megkaan te binatang ne ebpekelen dà wey kenà dan megkaan te lengesa. Ne kenà dan dema mebpengningiyug. ²¹ Su ini ke penduan ni Moises ne netetahak din ne ibpetuman tew kandan ne neuhet en ne ebesaan ini diyà te menge baley ne ebpengedian te menge Hudiyanan te penduan dan te uman Gewii ne Id-imeley wey impesabut en ini diyà te langun ne inged.”

Ke Surat ne Impeewit diyà te kenà menge Hudiyanan ne Mibperetiyyaya ki Hisus

²² Ne ketà ne ini se menge kedserihan wey menge pekilukesen abpeg ke langun ne menge mibperetiyyaya ne neumpung se ruen ebpemilien dan dut te menge rumा ran ne ibperuma ki Pablo wey ki Bernabe riyyà te inged ne Antiyuka. Ne iyan dan nepemili ne deruwa ne etew ne egkeedatan dut te langun ne mibperetiyyaya ne si Hudas ne edingerenan ded maa ki Bersabas wey si Silas. ²³ Ne impeewit dan kandan ke surat ne ini se migkahi rin,

“Ini se surat ne kayi ebpuun te menge suled niyu ne mibperetiyaya ki Hisus kayi te Hirusalim, ke menge kedserihan wey ke menge pekilukesen. Meupiya key kayi, ugaard ne memenu kew keniyan langun ne kenà Hudiyanan ne menge suled dey te mibperetiyaya ki Hisus keniyan te inged ne Antiyuka wey riyà te menge pruvinsiya te Siriya wey Silisiya.²⁴ Nerineg dey ne ruen menge ruma rey ne Hudiyanan kayi ne mibpendiyà te keniyu ne nekesamuk keniyu su nelineg dà ke itungan niyu su atag dut te ibpenurù dan, ugaard ne warà dey suhua sikandan.²⁵ Tembù be miburun key ne mid-umpung key se ebpmillì te ebpependiyà su ebpesabut keniyu, ne eduma ran ki Bernabe wey ki Pablo ne ruma ta ne igkelimù dey nevenar.²⁶ Su ini ne menge etew, ne inselakan dan ke umur dan te kebpenurù dan mekeatag te Kerenan tew ne si Hisu Kristu.²⁷ Ne ini se ibpependiyà dey si Hudas wey si Silas, ne neked-iring se ibpenudtul dan keniyu dut te intahù te surat dey keniyu.²⁸ Ne impesabut kenami dut te Kedesenan ne Ebpentuntul te Menusiyà te sikami ne neupakat dema te kenà dey ibpehes keniyu te ebpetuman en kew te langun ne penduan, ugaard ne ini iya se tumana niyu:²⁹ kenà kew kaan te egkeenen ne inrenà ne siparat diyà te ledawan dà ne kenà tidtu ne Eleteala, kenà kew kaan te binatang ne ebpekelen dà, kenà kew kaan te lengesa wey kenà kew mebpengingniyug. Ne meupiya en embiya ini se edtumanen niyu se nekahi ku. Arà dà taman.”

³⁰ Ketà ne migenat en arà se midsuhù ne ebpendiyà te Antiyuka. Nekeuma ran ne miburun dan ke langun ne mibperetiyaya ne imbehey ran kandan ke surat.³¹ Ne ini se menge mibperetiyaya, nevasa ran ne nengehalew ran nevenar su nevag-et ke hinawa ran mekeatag dut te lalag ne nevasa ran.³² Ne si Hudas ini ki Silas ne menge etew rema ne ebpelambas te Lalag te Eleteala ne meuhet se kinepekidlag dan dut te menge mibperetiyaya su mibpenurù dan su apey ke kebperetiyaya ran ne mevag-et wey meilut.³³ Guna su malù neuhet se ked-ubpà ni Hudas ki Silas ketà, ne mid-uli dan diyà te midsuhù kandan. Ne mibpemehetawan dan dut te menge mibperetiyaya ketà te Antiyuka se egkahi te, “Kerenan se metau te ked-ipanew niyu.” (³⁴ Ugaard ne si Silas ne warà meduma su mibpelintetahak dà.)³⁵ Si Pablo wey si Bernabe ne mid-ubpaubpà den på dema diyà te inged ne Antiyuka su sikandan wey arà se merakel ne menge ruma ran se ebpenurù wey ebpesabut te Lalag te Eleteala.

Mibpesuwayey si Pablo wey si Bernabe

³⁶ Nekebipira ne hewii ne migkehiyan ni Pablo si Bernabe te, “Edlived ki su ebpmenerimaan ta ke menge mibperetiyaya diyà te menge inged ne impesabut ta ke Lalag te Eleteala.”³⁷ Ne kiyug ni Bernabe ne edumaan dan si Juan ne ed-ingaranan ded maa ki Marcos,³⁸ ugaard ne warà megkiyug si Pablo te ebpekeruma si Juan su sikandin ne mid-ewaan dan diyà te inged ne Pempiliya su warà din medtigkeri ke kemerehenan taman te neipus ke helevek dan.³⁹ Ne nekedlewanà dan ne ketà ne mibpesuwayey ran. Ne si Bernabe, miduma rin si Juan ne ed-ingaranan ded maa ki Marcos ne mid-untud dan te kapal se ebpendiyà te inged ne Sipri.⁴⁰ Ne si Pablo, ne miduma rin si Silas ne mibpengeningi ke menge mibperetiyaya se ebuyù te iru te Eleteala

te edtuganur kandan dut te ked-ip-ipanew ran. ⁴¹ Ne mid-apet dan diyà te menge pruvinsiya ne Siriya wey Silisiya se ebpenurù su apey ebmeilut se kebperetiyaya dut te menge mibperetiyaya ketà.

16

Miduma si Timoteo ki Pablo wey ki Silas

¹ Ne nekeuma ensi Pablo diyà te inged ne Dirbi wey riyà te inged ne Listra. Ketà ne ruen ed-upbà ne senge etew ne ed-ingaranan ki Timoteo ne mibperetiyaya ki Hisus. Ini se iney rin ne Hudianen ne mibperetiyaya ki Hisus, ugaid ne ke amey rin se Gerisiyanen. ² Ne langun ne menge mibperetiyaya diyà te inged ne Dirbi wey Ikunya ne meupiya se lalag dan mekeatag ki Timoteo. ³ Kiyug ni Pablo ne ebpekeruma kandin si Timoteo, tembù be mid-etusan din sikandin. Iyan din ked-etusi kandin su apey edtelimaa sikandin dut te menge Hudianen ketà te menge inged ne ebpevayaan dan su netuenan dut te langun ne menge Hudianen te Gerisiyanen ke amey ni Timoteo. ⁴ Gewii te ked-ip-ipanew ran dut te menge inged ne impesabut dan dut te menge mibperetiyaya arà se suhù dut te menge kedserihan wey pekilukesen diyà te Hirusalim ne ingkahi kandan te edtumanen ⁵ Ne nevag-et se kebperetiyaya dut te menge mibperetiyaya wey mid-iseg ke kerakel dan te uman gewii.

Mibpekitakita ke Eleteala ki Pablo diyà te Inged ne Teruwas

⁶ Ne riyà dan mibpevayà te menge inged ne Perigya wey Gelasiya su warà ituhut kandan dut te Kedesenan ne Ebpetuntul te Menusiyà te ibpesabut ke Lalag te Eleteala diyà te pruvinsiya ne Asiya. ⁷ Guna su nekeuma ran diyà te eletan te inged te Misiya ne edlaus dan perem diyà te pruvinsiya te Bitaniya, ugaid ne warà dan tuhuti dut te Kedesenan ne Ebpetuntul te Menusiyà ne ebpuun diyà te ki Hisus. ⁸ Ne ketà ne mid-apet dan diyà te Misiya ne mibpetiulug dan diyà te inged ne Teruwas. ⁹ Ketà te merukilem en ne ruen impekita te Eleteala ki Pablo ne etew ne riyà ebpuun te inged ne Mesidunya ne ebuyù kandin se egkahi te, “Laus kew kayi te Mesidunya su apey key niyu tevang!” ¹⁰ Nekita rà ini ni Pablo ne midteganes key en se edlaus diyà te inged ne Mesidunya su nesebutan dey te edsuhuen key te Eleteala te ibpesabut ke Meupiya ne Tudtul diyà te menge etew ketà.

Ke Kebperetiyaya ni Lydia diyà te inged ne Pilipus

¹¹ Ne mid-untud key te kapal ne egenat te Teruwas ne ebpendiyà te punul te Semustrasiya, ne ke nekedtundug ne hewii ne midlaus key diyà te inged ne Niyepulis. ¹² Nekeuma key ne mid-ipanew key en se ebpendiyà te dekelà ne inged ne Pilipus ne ed-una ne inged te lusud te Mesidunya, ne rutun te inged ne Pilipus ne merakel se menge etew ne Rumanu ne sumeseuyan. Ne ketà key med-upbà taman te pipira ne hewii.

¹³ Guna su Hewii te Id-imeley ne midlihawang key ketà te inged ne mibpendiyà key te beyvey te wayig su nepegitung dey te ruen egkevurunan te menge Hudianen te ebpengeningi. Ketà ne mibpinuu key se ebpekidlalag te menge meritan ne nevirun dutun. ¹⁴ Ne seveka rutun te menge meritan ne ebpemineg te lalag dey ne ed-ingaranan ki Lydia ne riyà ebpuun te inged ne Tiyetira ne

ebpemendehang te saput ne mehuridtem. Mibpengarap te Eleteala ini se meritan, tembù be imbehey rin te Kerenan ke hinawa rin te kedadlimà te ibpesabut ni Pablo.¹⁵ Ketà ne mibunyahan sikandin abpeg ke menge emurà din dutun te valey rin. Ne migkehiyan key rin te, "Embiya birang te itungan niyu ne benar se peretiyyaya ku ki Hisus ne Kerenan ne diyà kew ubpà te baley ku." Ne warà key rin ewai ne ketà ne mibpendiyà key en.

Mibilanggù si Pablo ki Silas diyà te Inged ne Pilipus

¹⁶ Senge hewii ketà te kebpendiyà dey te ebpengeningeniyan te menge Hudiyanan ne midsinuhung kenami arà se meritan ne uripen ne mibbehayen te gaga te busew ne midsuuk kandin te kadtendek te egked-ulaula keuremà. Ne rekela se kureta ne nepentiyari dut te tehiuripen kandin kayi te kebpenguris din.¹⁷ Ne midtundug kenami ki Pablo arà se meritan se ebpemensag te, "Ini ne menge etew ne sugsuhuen dut te Eleteala ne kenà egkerepengan! Ne ibpesabut dan kenyi ke ralan te ebpekeliyu kew rut te kedusa rin."

¹⁸ Arà se mid-ulaula rin lusud te merakel ne hewii ne netaman ketà ne neperè en si Pablo ne midlilingey rin ne migkehiyan din ke busew te, "Egenat te gehem te ngaran ni Hisu Kristu ne idsuhù ku keykew te awà ka kenyiyan te meritan." Arà dà ne mid-ewaan en dut te busew ke meritan.

¹⁹ Guna su nesehipà dut te menge tehiuripen kandin se kenà dan en ebpekepentiyari te kureta ketà te helevèk dut te meritan, ne midsigkem dan si Pablo ki Silas ne miguyud dan te ebpendiyà te menge perekukum te inged dan.²⁰ Ketà ne mibpeetuvang din te menge perekukum ne Rumanu ne migkahi te, "Ini ne menge etew ne menge Hudiyanan ne edsamuksamuk kayi te inged ta.²¹ Su ebpenurù dan te menge betasan ne ebpekesurang dut te menge penduan ta. Ne sikitew ne menge Rumanu ne kenà egkepakey ne edumaan tew arà se betasan ne ibpenurù dan."

²² Ne ke merakel ne menge etew ne nevurun ketà ne mid-amung te ebpekesakit kandan. Ne ketà ne mibpemindas dut te perekukum ke belegkas ni Pablo ki Silas ne mibpebedasan dan.²³ Guna su neipus dan te ebpemadas te mevaher, ne mibilanggù dan en. Ne ini se ebanter te bilengguan ne migkehiyan dan te ebpepintuan te mevaher.²⁴ Nerineg ini dut te ebanter, ne diyà din in-awuk sikandan te sungkù ne nekepeluuk te bilengguan ne mibpatung din ke menge paa ran te mevaher ne kayu.

²⁵ Guna su mehaan en edluuk se kerukileman ne mibpengeningeni en si Pablo ki Silas wey migkanta ran se edeyù te Eleteala, ne mibpemineg kandan ke menge rumah ran ne bilanggù.²⁶ Ne ketà midtekew midlinug te mevaher ne piya ke mibpeunsaran dut te bilengguan ne newaleng. Ne seguguneey ne nevukaan langun ne menge humawan, ne nengeluung ke menge sengkali dut te menge bilanggù.²⁷ Nekehimerat te ebanter te bilengguan ne nekita rin ne nevukaan en ke menge gumawan dut te bilengguan, ne mid-ulavut din ke sundang din su ed-imatey perem te lawa rin su kunaan din ke mibpemelahu en ke menge bilanggù.²⁸ Ugaid ne mibensag si Pablo te, "Kenà ka ed-usuk te lawa nu! Su langun dey ne ini red!"

²⁹ Ini se ebantey, ne mibpengumew te ebpeewit te sulù. Ne ketà ne migaaangaan midlusud kayi te menge bilanggù ne mibpenimbuel diyà te sineruhan ni Pablo ki Silas se migkerker te andek din. ³⁰ Ne impelihawang din sikandan se egkahi te, “Mama, engkey se ed-ul-ulaan ku su apey a ebpekeliyu rut te kedusa te Eleteala?”

³¹ Ne migkahi ensi Pablo te, “Peretiyaya ka te Kerenan tew ne si Hisus ne ebpekeliyu ka te kedusa te Eleteala abpeg ke menge emurà nu diyà te baley nu.” ³² Ketà ne sikandin wey ke emurà din diyà te baley rin ne impesabut kandan eni Pablo ke Lalag te Eleteala. ³³ Ne rutun te metaneb pà ne kerukileman ne migkuwa rut te ebantey si Pablo ki Silas ne mid-enuan din ke menge palì dan. Ne ketà ne mibunyahan en ini se ebantey abpeg ke sikandan ne telteleanan. ³⁴ Ne rutun ne miduma rin en si Pablo ki Silas diyà te baley rin wey pinekaan din. Ne sikandan se telteleanan ne nehalew neveran su mibperetiyaya ran en te Eleteala.

³⁵ Guna su meselem en ne duen midsuhù te menge egkeunuten ne Rumanu ke menge mepurù te pulis se egkahi te, “Ibpelihawang nu en ayan se menge etew.” ³⁶ Ne ketà ne mibpenudtul ini dut te ebantey diyà te ki Pablo se egkahi te, “Insuhù te menge egkeunuten ne Rumanu ne ibpelihawang kew en ki Silas. Ebpekeawà kew en ne up-upiya kew rà!”

³⁷ Ugaid ne migkehiyan ni Pablo ke menge mepurù te pulis dut te egkeunutan te, “Mibpebedasan key ran diyà te etuvangan te merakel ne menge etew misan warà netuen dan ne idwagib kenami ne sikami ne sakup ded dema te inged ne Ruma. Ini ne mibilanggù key. Na guntaani ne id-eles te kebpeawà kenami. Kenà egkepakey!” ke si Pablo. “Su iyan iya se mebpengkayi ke egkeunutan ne Rumanu ne iyan ebpelihawang kenami.”

³⁸ Ne mibpenudtul ini dut te menge mepurù te pulis diyà te egkeunuten ne Rumanu. Ne guna su netuenan dan te si Pablo ki Silas ne sakup ded dema te inged ne Ruma ne neandek dan. ³⁹ Tembù be mibpendiyà dan ne mibuyù dan te ebpeseharen eni Pablo. Ketà ne miduma ran su ibpelihawang dan te bilengguan wey mibuyù dan te med-awà dan ketà te inged. ⁴⁰ Ne midlihawang si Pablo ki Silas ne mibpendiyà dan te baley ni Lydia, ne mibag-et dan ke kebperetiyaya rut te menge mibperetiyaya ki Hisus ne neuma ran ketà, arà pà ne migenat dan en.

17

Si Pablo ki Silas diyà te Inged te Tiselunika

¹ Na mid-ipanew en si Pablo ki Silas ne ebpevayà te menge inged ne Empipulis wey Epulunya ne nekeuma ran diyà te inged ne Tiselunika. Ne ruen ketà baley ne epengedian te menge Hudiyenan te penduan dan. ² Ne rutun te Hewii te Id-imeley ne mibpendiyà si Pablo te baley ne ebpengedian te menge Hudiyenan te penduan dan su nelayaman din. Ne uman Hewii te Id-imeley lusud te tetelu ne pedian ne mibpekidlag sikandin dut te menge etew ne ibpeudsad te ingkesurat ne Lalag te Eleteala. ³ Ne midseysey rin kandan ke Lalag te Eleteala wey mibpetuusan din te edresayen wey ed-imetayan arà se Impasad te Eleteala ne Ebperetuen te langun wey ebenawen sikandin. “Si

Hisus ini ne impenudtul ku keniyu,” ke si Pablo, “ne sikandin ke Impasad te Eleteala ne Ebperetuen te langun.” ⁴ Ne ruen duma ne menge Hudiyenan ketà ne mibperetiyyaya rut te lalag ni Pablo ne mibpekiduma kandan ki Silas. Ne merakel dema se mibperetiyyaya ne menge Gerisiyanen ne mibpengarap te Eleteala, elin ne nekeperetiyyaya ne menge meritan ne egkeedatan dutun ne inged.

⁵ Ugaid ne ke menge Hudiyenan ne warà mibperetiyyaya ne nesihi, ne miburun dan ke menge merupangdupang wey mepauk ne menge etew ne mid-eneb dan ini se lusud te inged te ebaal te lingasa. Ne mibpendiyà dan te baley ni Jason su ebpemengaan dan si Pablo ki Silas su apey ran meewit diyà te menge etew. ⁶ Ugaid ne guna su warà dan metuen, ne si Jason en wey ruma ne menge mibperetiyyaya se miguyud dan diyà te menge egkeunutan ketà te inged dan se egkahi te, “Duen menge etew ne ebaal te lingasa te piya endei te ebpesineruhan dan. Ne guntaani ne ini ran en te inged ta, ⁷ ne si Jason,” ke sikandan, “se mibpeubpà kandan diyà te baley rin. Ne langun dan ne nekesurang dut te menge penduan te datù tew ne si Cesar su egkehiyan dan ne ruen pà mepurù ne datù ne ed-ingaranan ki Hisus.” ⁸ Nerineg dà ini dut te menge egkamal wey ke menge etew ne nevurun, ne nehuvut dan. ⁹ Ne si Jason wey ini se ruma ne mibperetiyyaya, ne impevayad dan dut te impiyansa kandan ne arà pà ne impeawà dan.

Si Pablo ki Silas wey si Timoteo diyà te Inged ne Beriya

¹⁰ Guna su merukilem en ne impeipanew en dut te menge mibperetiyyaya si Pablo ki Silas se ebpependiyà te inged ne Beriya. Nekeuma ran, ne mibpendiyà dan te baley ne ebpengedian te menge Hudiyenan te penduan dan. ¹¹ Ne ke menge Hudiyenan ketà ne laus ne ebpemineg dan engki Pablo su sikandan ne kenà iring dut te menge Hudiyenan diyà te Tiselunika. Su egkeseveka ran ne mibpemineg dut te impesabut ni Pablo. Ne uman gewii ne ebesaan dan ke ingkesurat ne Lalag te Eleteala su apey ran egketueni ke benar iya ke impenurù dan. ¹² Merakel dan se mibperetiyyaya abpeg ke egkeedatan ne menge meritan ne Gerisiyanen wey menge meama ne Gerisiyanen dema.

¹³ Ugaid ne guna su nerineg dut te menge Hudiyenan diyà te inged ne Tiselunika te ebpesabut si Pablo te Lalag te Eleteala diyà te inged ne Beriya, ne mibpendiyà dan ne mibaal dan te kegkeepesi dut te menge etew ki Pablo. ¹⁴ Arà dà ne ruen duma ne mibperetiyyaya ne miduma ki Pablo diyà te beyvey te rahat, ugaid ne intahak din dà si Silas ki Timoteo diyà te inged ne Beriya. ¹⁵ Ke menge etew ne mid-ated ki Pablo ne miduma ran kandin taman te inged ne Etenas. Ne ketà ne mid-ulì dan diyà te inged ne Beriya se ed-ewit te telaan ni Pablo te ibpehaangaan ibpetundug si Silas ki Timoteo.

Si Pablo ne Riyà te Inged ne Etenas

¹⁶ Ne tehaad te kedtehari ni Pablo ki Silas wey si Timoteo riyà te inged ne Etenas, ne neliveg se itungan din te nekita rin ne medmerakel ne ledawan ne ebpengerapen dut te menge etew ketà. ¹⁷ Tembù be mibpendiyà te baley ne ebpengedian te menge Hudiyenan te penduan dan ne mibpekidlalag si Pablo dut te menge Hudiyenan wey ke kenà menge Hudiyenan ne mibpengarap te Eleteala ketà. Ne uman gewii ne mibpendiyà te pedian dema se ebpekidlalag dut te piya engkey ne etew

ne edsahad ketà. ¹⁸ Ne ketà ne ruen menge meyterù ne ed-ingaranan te Epikuranu wey ruma ne ed-ingaranan te Estuwiku ne mibpekidlalag kandin. Duen duma ne mid-insà te, "Engkey vuwa se egkehiyen kayi te ini se ed-iring uvag te ruen nesebutan din?" Ne duen duma ne migkahi te, "Iyan din beneng edlelahen ne mekeatag te menge diwata diyà te meriyù ne inged." Tembù migkahi ran ini su impesabut ni Pablo ke Meupiya ne Tudtul mekeatag ki Hisus wey ke kegkevanew rin. ¹⁹ Ketà ne mid-ewit dan si Pablo diyà te etuvangan te menge kunsiyal ne nevurun diyà te tuhar ne ed-ingaranan te Eriyupahu ne migkahi te, "Egkiyug key ne eguru kayi se behu ne penurù ne nelalag nu. ²⁰ Su ruen nekahи nu ne iyan dey pà nerineg, tembù be egkiyug key ne eguru kayi su apey rey egkesebuti ke meana rin." (²¹ Tembù be nekahи ran arà su langun ne menge etew te Etenas wey ke menge sumeseuyan ketà ne egkeepunan dan dà se ebpenudtul wey ebpemineg dut te penurù ne iyan dan pà merineg.)

²² Rutun ne mid-itindeg si Pablo riyà te etuvangan te menge kunsiyal ne nevurun ketà ne migkahi te, "Sikiyu ne menge etew te Etenas, netuusan ku ne ebpengarap kew iya te merakel ne menge diwata. ²³ Su gewii ku te kedlauglaug kayi te inged niyu ne nengekita ku ini se ederapen niyu. Ne ruen seveka dema ne ebpengaperen niyu ne nekita ku ne duen insurat ketà ne lalag ne egkahi te, 'Ini se ebpengaperan ne Eleteala ne warà pà metueni.'

"Na," ke si Pablo, "ini se Eleteala ne ebpengaperen niyu ne misan warà niyu pà metueni, ne ini iya ke ibpesabut ku keniyu. ²⁴ Su ini iya ke Eleteala ne midlimbag te dunya wey ke langun ne neketahù kayi. Sikandin ke Kerenan ne ebayàbayà te langit wey tanà ne warà med-ubpà kayi te menge baley ne ebpengeningeniyen ne mibeelan dà te etew, ²⁵ ne geina te warà kurang din ne warà misan engkey ne neveelan te etew ne ruen atag din diyà te kandin," ke si Pablo, "su sikandin se ebehey te hinawa wey umur wey langun taman dut te langun ne menge etew. ²⁶ Su sikandin ke midlimbag te meama ne arà ke neuna ne etew ne ebpuunan dut te langun ne menge etew ne impeubpà din kayi te te ampew te dunya. Ne pinedsinggey rin neraan ke hewii te ked-ubpà te menge etew kayi wey ke edtemanan te ed-ubpaan tew. ²⁷ Mibeelan din ini su apey ebpemengà dan kandin ne kalu ke egketuen dan ded sikandin gewii te ebpemengà dan. Ini se Eleteala," ke si Pablo, "ne kenà meriyù dut te langun tew. ²⁸ Su

'Ini se umur tew wey kebpekewalengwaleng
wey kebpekepegitung tew

ne impepevayà te kandin ne gehem.'

Iring te nekahи rut te senge etew keniyu ne metau ne ebpemayuk ne migkahi te,

'Sikitew rema ne menge anak din.'

²⁹ "Ne geina te menge anak kiyu te Eleteala ne iring kiyu kandin. Ne embiya iring ketà, ne kenà tew ebpegitungen te Eleteala ne iring te paras te seveka ne ledawan ne mibeelan ne bulawan etawa pirak etawa batu ne mideyreyanan te etew ne metau. ³⁰ Rengan te warà pà sikandin metueni te menge menusiyà, ne warà din itahù te hinawa arà se meraat ne ed-ul-ulaan. Ugaid ne guntaani ne ruen en suhù din te ebpeengkeran dut te langun ne etew te piya engkey ne meraat ne

ed-ul-ulaan din.³¹ Su ruen en intail te Eleteala ne hewii keuremà te edtimbangen din ke langun ne menusiyà. Ne metidtu se kedtimbang kayi ne etew ne nepemili din ne edtimbang. Ne impekilala rin dut te langun ne etew te ini se nepemili din su mibanew rin.”

³² Guna su nerineg dan ini se nekahi ni Pablo mekeatag te kegkevanew dut te minatey, ne ruen duma ne midsumpalit. Ugaid ne ruen dema migkahi te, “Igkesuat dey pà maa te ebpemineg te kedseyseya nu mekeatag kayi.”³³ Ketà ne mid-awà si Pablo dut te nevurun. ³⁴ Duen menge etew ketà ne mibperetiyaya ki Hisus ne miduma ki Pablo. Iyan si Dionisio ne senge etew rut te kunsiyal, elin dema ini se meritan ne ed-ingaranan ki Demaris, wey ruen pà duma ne mibperetiyaya ketà.

18

Si Pablo Riyà te Inged ne Kurintu

¹ Guna su nekeipus si Pablo se ebpenuurù ne mid-awà sikandin kayi te inged ne Etenas ne mibpendiyà te inged ne Kurintu. ² Rutun ne neuma rin arà se tiwaley ne Hudiyanan ne si Ekila ki Priscila ke esawa rin, ne riyà ebpuun te inged ne Puntus. Behu ran pà ne nekeuma egenat te inged ne Italiya su ruen ureding dut te mepurù ne egkamal ketà, ne si Claudio, te ibpeawà diyà te inged ne Ruma lusud te Italiya ke langun ne menge Hudiyanan. Ne mibpendiyà si Pablo te kandan su ebpenumbaley,³ ne mid-ubpà ketà ne mid-amur te helevok dan se nerineg din se megidsan se helevok dan dut te kandin dema ne helevok su ebpembaal dan te ibevaley ne manteylukù.⁴ Ne uman Hewii te Id-imeley ne mibpendiyà si Pablo te baley ne ebpengedian te menge Hudiyanan ke penduan dan su ebpekidlalag te menge etew ketà su apey ebpekeperetiyaya ki Hisus ke menge Hudiyanan wey ke menge Gerisiyanen dutun.

⁵ Ne ketà te nekeuma ensi Silas ki Timoteo te riyà ebpuun te Mesidunya, ne iyan ibpeuna ni Pablo ne helevok din se ed-epunà sikandin se ebpesabut te Meupiya ne Tuditul su mid-ey-eyaran din te eguhud diyà te menge Hudiyanan te si Hisus ke Impasad te Eleteala ne Ebperetuen te langun.⁶ Ugaid ne guna su warà dan mebperetiyaya su edsumpalit dà kandin, ne mibpendagdag din ke lipupuk kayi te belegkas din ne tuus te ibpesabut din kandan te kenè en kilid kandin ketà te hewii ne kedtimbang te Eleteala kandan ne migkahi te, “Embiya kenà kew egkiyug ne ebpekeliyu rut te kedusa te Eleteala atag te salà niyu, ne sikiyu rà! Su kenè en kilid kediey! Su guntaani ne ebpendiyà ad te menge kenà Hudiyanan.”

⁷ Mid-awà ketà si Pablo dut te baley ne ebpengedian te menge Hudiyanan te penduan dan ne diyà mid-ubpà te baley te senge etew ne kenà Hudiyanan ne si Tito Justo ne ebpengarap dema te Eleteala. Ini se baley rin ne sepiring dut te baley ne ebpengedian te menge Hudiyanan.

⁸ Ne si Crispo, ke egkeunutan dut te baley ne ebpengedian te menge Hudiyanan, abpeg ke menge emurà diyà te baley rin ne mibperetiyaya te Kerenan. Ne ruen merakel ketà te inged ne Kurintu ne nekerineg te Meupiya ne Tuditul ne mibperetiyaya wey mibunyahanaan dan.

⁹ Senge kerukileman ketà ne mibpekitakita ke Kerenan ki Pablo se egkahi te, “Kenà ka egkeandek! Kenà ka ed-engked se ebpesabut te

Lalag ku, ugaid ne iseg ka.¹⁰ Su eduma a kenikew,” ke sikandin. “Warà misan engkey ne ebpekekaid kenikew, ne ruen merakel pà ne menge etew kayi te inged ini ne ebpekeperetiyyaya kediey.”¹¹ Ne ketà ne riyà mid-ubpà si Pablo te inged ne Kurintu taman te senge rahun wey enim ne vulan se ebpenurù te Lalag te Eleteala dut te menge etew.

¹² Guna su iyan en gubinedur ne si Galio diyà te inged ne Gerisiya, ne midseveka ke menge Hudiyenan ne midsigkem dan si Pablo ne impeetuvang dan te kukuman.¹³ “Ini ne etew,” ke sikandan, “ne ibpепengarap din te Eleteala ini se menge etew te ralan ne ebpekesurang dut te penduan ta.”

¹⁴ Guna su edlalag en perem si Pablo ne migkahi si Galyu diyà te menge Hudiyenan te, “Embiya ini se id-isuhat niyu kandin ne mekeatag te rekelà ne linasa rin etawa salà din, ne edait ne ebpemineg a keniyu.”¹⁵ Ugaid ne geina te ebpekid-apul kew rà mekeatag te menge lalag wey menge ngaran wey mekeatag te penduan te sikiyu ne menge Hudiyenan, ne iyan kew rà kukum. Su kenà a iyan egkukum te iring dutun.”¹⁶ Ne ketà ne impelihawang dan en diyà te kukuman.¹⁷ Ne arà se kenà Hudiyenan dutun, ne migeweran dan si Sustinas, ke egkeunutan dut te baley ne ebpengedian te menge Hudiyenan, ne midruug dan sikandin diyà te etuvangan te kukuman. Ugaid ne ini ne warà sehipaa ni Galyu.

Midlived si Pablo diyà te Inged ne Antiyuka

¹⁸ Ne merakel pà ne hewii se kineubpà ni Pablo diyà te menge mibperetiyyaya ne riyà te inged ne Kurintu. Ketà ne mibpemehetew sikandin dut te menge mibperetiyyaya dutun ne arà pà ne migenat abpeg ki Priscila wey Ekila se eppendiyà te inged ne Siriya. Ne te warà den pà med-untud te kapal diyà te inged ne Singkiriya, ne mibpetevungew si Pablo ne tuus te ruen impasad din diyà te Eleteala ne netuman din en.¹⁹ Nekeuma ran diyà te inged ne Ipusu ne ketà pà med-ubpà si Priscila ki Akila. Ugaid ne mid-awet dà si Pablo kayi, ne mibpendiyà te baley ne ebpengedian te menge Hudiyenan te penduan dan ne mibpekidlagut te menge Hudiyenan ketà.²⁰ Ne mibpemuyù ke menge mibperetiyyaya ketà te ed-ubpà pà sikandin dutun, ugaid ne warà mibpemineg si Pablo.²¹ Ne dutun te kegenat din ne migkahi rin te, “Embiya idtuhut te Eleteala ne edlived a kayi te keniyu.” Ne ketà ne mid-untud en te kapal ne mid-awà kayi te inged ne Ipusu.

²² Guna su nekeuma si Pablo diyà te inged ne Sisariya, ne midlaus diyà te inged ne Hirusalim su ebpenumbaley riyà te menge mibperetiyyaya ki Hisus dutun. Ne ketà ne mid-uli diyà te inged ne Antiyuka.²³ Warà meuhet ketà ne migenat sikandin ne kayi ebpevayà te menge pruviensya te Gelasiya wey Perigiya. Ne mibag-et din ke kebperetiyyaya rut te langun ne menge mibperetiyyaya ketà ne menge inged.

Mibpendiyà si Epulus te menge Inged ne Ipusu wey Kurintu

²⁴ Ne riyà te inged ne Ipusu ne ruen nekeuma riyà ebpuun te inged ne Elihandriya ne senge etew ne Hudiyenan ne ed-ingaranan ki Apulus. Metau ne edlalag ne metau rema ne edseysey te insurat ne Lalag te Eleteala.²⁵ Neey-eyaran sikandin te ebpenurù mekeatag te penurù ni Hisus ke Kerenan. Ne mevag-et sikandin ne midlag, ne nekesuhat se

kebpenurù din mekeatag ki Hisus, ugaid ne iyan din dà netuenan ne arà se kebunyag ni Juan. ²⁶ Ne ketà te kebpenurù din diyà te baley ne ebpengedian te menge Hudiyanan ne kenà edsanggel se edlalag. Nerineg ni Priscila wey Akila ini se kebpenurù din, ne nesebutan dan te ruen pà warà din metueni. Ne miduma ran sikandin diyà te baley ran ne mibpenurù dan sikandin mekeatag dut te penurù ni Hisus ne warà din pà metueni.

²⁷ Ne ketà ne netahù te itungan din se ebpendiyà te inged ne Gerisiya. Ne midtevangan sikandin dut te menge mibperetiyyaya diyà te inged ne Ipusu su midsuratan dan arà se menge mibperetiyyaya ne riyà te Gerisiya se ebuyù te egelhelawen dan sikandin. Guna su nekeuma sikandin diyà te Gerisiya, ne ruen mibperetiyyaya ki Hisus su atag te kegkeyru te Eleteala kandan, ne dekelà se neketavang din kandan dut te kebpenurù din. ²⁸ Ne iyan din kebpeketavang ne midtevanan arà se menge Hudiyanan ne ebpekid-apul kandin. Su mevaher se kebpesabut din te ke insurat ne Lalag te Eleteala ne tuus te si Hisus ke Impasad te Eleteala ne Ebperetuen te langun.

19

Mibpendiyà si Pablo te Inged ne Ipusu

¹ Ne gewii te riyà si Apulus te inged ne Kurintu, ne mibpnevayà si Pablo diyà te taneb se ebpendiyà te inged ne Ipusu. Ne riyà te Ipusu ne neuma rin arà te menge mibperetiyyaya ki Hisus ² ne mid-insaan din sikandan te, “Maa neketelimà kew en te kedlumun te Kedesenan ne Ebpetuntul te Menusiyà dut te hewii ne kineperetiyyaya niyu ki Hisus?”

Ne migkahi ran te, “Warà. Su warà dey pà merineg se ruen Kedesenan ne Ebpetuntul te Menusiyà.”

³ Ne ke si Pablo te, “Engkey se impenurù keniyu ketà te kinebunyahì keniyu?”

“Ke meana rin ne ke kebunyag ne nekahi ni Juan ke ebpembunyag,” ke sikandan.

⁴ Ne ke si Pablo te, “Iyan impenurù ni Juan mekeatag te kebunyag ne tuus te mibpedsendit wey mid-engked dan te meraat ne ed-ul-ulaan. Ne impenurù dema ni Juan te menge kevuwaran ni Israyil se mebperetiyyaya ran dut te ebpeketaundug kandin ne si Hisus.”

⁵ Guna su nerineg dan arà, ne mibunyahì dan se tuus te mibpesakup dan te Kerenan ne si Hisus. ⁶ Ne ketà te indampen ni Pablo ke belad din kandan ne midlumun kandan ke Kedesenan ne Ebpetuntul te Menusiyà ne nekelalag dan te menge kinehiyan ne kenà kandan wey impayag dan arà se impesabut kandan te Eleteala.

⁷ Menge sepulù dan wey deruwa ne etew.

⁸ Ne lusud te tetelu ne vulan ne mibpendiyà si Pablo te baley ne ebpengedian te menge Hudiyanan te penduan dan ne kenà edsanggel ke kebpekidlalag din kandan. Ne merakel se ibpetuus din mekeatag te Edetuan te Eleteala te menge etew su apey ruen ebperetiyyaya ne ebpekelusud ketà. ⁹ Ugaid ne ruen duma ne meresen se ulu rin ne kenà ebperetiyyaya, ne midlalag te meraat mekeatag te penurù te Kerenan tew diyà te etuvangan te menge etew ne nevirun ketà. Dutun ne midawà si Pablo kandan ne miduma rin ke menge mibperetiyyaya ki Hisus ne uman gewii ne ebpenurù sikandin dut te menge etew riyà te sungù

te baley ne ebpenuruan ni Tiranu.¹⁰ Ne lusud te deruwa ne rahun ne arà se mid-ulaula rin, ne in-eneb din se ebpesabut ke Lalag te Eleteala diyà te langun ne menge Hudiyenan wey kenà Hudiyenan ne ed-upbà ketà te lusud te pruvinsiya ne Asiya.

Ebpenegseg Perem te Vusew ini se Menge Anak ni Iskiba

¹¹ Gewii te ed-upbà ketà si Pablo, ne mibaal ke Eleteala te merakel ne ed-ul-ulaan ne mekegeyip ibpepevayà ki Pablo.¹² Su misan tubew wey tuwalya ne in-usar ni Pablo ne ed-ewiten dan diyà te menge ederaru wey midsuukan te vusew, ne nengeulian.¹³ Ne ruen duma ne menge Hudiyenan ne ebpenipanew su ebawì te menge etew ne midsuukan te busew. Ne netahù te itungan dan te egeraman dan te ebawì arà se midsuukan te vusew te edreviten dan ke ngaran ni Hisus ke Kerenan. Ketà ne migkahi ran diyà te menge vusew te, “Egkehiyan ku sikiyu ne ibpepevaya dut te gehem te ngaran ni Hisus ke Kerenan ne impesabut ni Pablo, awai niyu an se midsuukan niyu.”¹⁴ Ini se mid-ulaula kayi ne ke pitu ne etew ne menge anak dut te seveka ne mepurù dut te menge terebpelengesa te menge Hudiyenan ne ed-ingaranan ki Iskiba.¹⁵ Ketà ne migkahi arà se busew ne midsuuk dut te etew te, “Netuenan ku si Hisus ne netuenan ku rema ini se etew ne Pablo, ugaid ne sikiyu ne engkey se midsuhù kenyi?”¹⁶ Ne ketà ne mid-urambak en kandan arà se etew ne midsuukan te vusew wey mibpekesekitan din sikandan ne nengevindas en ke menge belegkas dan. Ne mibpelelahuy ran egenat dutun te valey se nengeluungan wey nengepelian.

¹⁷ Guna su nerineg ini dut te menge Hudiyenan wey ke kenà Hudiyenan diyà te inged ne Ipusu, ne migkerker dan langun te kegkeandek dan ne mid-iseg se ked-adat dan dut te ngaran te Kerenan tew ne si Hisus.¹⁸ Ne merakel dut te menge mibperetiyya ketà ne nevurun ne ebpenudtul te nekedsendit dan en dut te meraat ne mid-ulaula ran wey mid-engkeran dan en.¹⁹ Ne iring ketà dema ne ruen etew ne metau ne edlambus ne mid-ewit te menge riberù dan te kebaal te kedlambus ne mibinsulan dan dutun te etuvangan te menge etew. Ne mibirang dan ke elehà dut te menge riberù ne lelima nepulù ne ngivu ne pirak se elehà din.²⁰ Ne ketà te arà ne ned-ulaula, ne mid-iseg ke kebpsabut dut te lalag te Kerenan wey neumanan pà ke menge mibperetiyya.

Ke Kegkehuvut Diyà te Inged ne Ipusu

²¹ Ne rutun ne netahù te itungan ni Pablo te ebpendiyà te menge pruvinsiya te Mesidunya wey Gerisiya ne edlaus diyà te inged ne Hirusalim. “Embiya ebpekeipus ad diyà,” ke sikandin, “ne ebpendiyà a maa te inged ne Ruma.”²² Ketà ne impeuna rin diyà te Mesidunya arà se deruwa ne ruma rin, si Timoteo ki Erastu, ne dutun ne diyà pà sikandin te pruvinsiya te Asiya.

²³ Ne gewii te riyan en sikandin te inged ne Ipusu lusud te Asiya, ne ruen dekelà ne huvut dutun su atag dut te penurù ni Hisus ke Kerenan.²⁴ Su ruen ketà senge etew ne pandey ne mid-ingaranan ki Dimitriyu ne ebpembaal te rereisek ne menge baley ne pirak iring dut te paras te baley ne ebpengerapan te diwata ran ne si Diana. Ne dekelà se pentiyari rin ne engketà ded dema ke menge etew ne migelevrek diyà te kandin te kependahang kayi.²⁵ Ne miburun din arà se egelevrek

diyà te kandin abpeg dut te menge etew ne idsan dut te helevek din. Ne migkahi te, "Sikiyu ne menge ruma ku, netuenan niyu se mid-iseg ini se pentiyari tew kayi te helevek tew ini." ²⁶ Ne nekita niyu wey nerineg niyu ini se mibeelan kayi te etew ini ne ed-ingaranan ki Pablo su impenurù din te ini se menge ledawan ne mibeelan te menge etew rà ne kenà ke tidtu ne Eleteala. Ne merakel en se mibperetiyya te ini se penurù din, ne kenà kayi rà te inged ne Ipisu su riyà te langun ne lusud te Asiya. ²⁷ Ketà ne kalu ke edsudian en te menge etew ini se helevek tew ne egkeenged en ini se pentiyari tew," ke sikandin. "Ne kenà ketà dà taman su kalu ke ini se baley ne ebpengerapan dut te diwata tew ne si Diana ne warè en ed-adat ne menge etew. Guntaani ne hewii ne si Diana se ebpengerapen dut te langun ne menge etew kayi te lusud te Asiya wey langun ne lusud te dunya, ugaid ne kalu ke egkeawà ke pekinegan din."

²⁸ Nerineg dà dut te menge etew ne nevurun ketà ini se lagal ni Dimitriyu, ne ingkeepes dan neveran ensi Pablo. Ne mibpememensag dan te, "Ed-edatan neveran si Diana kayi te inged ne Ipisul!" ²⁹ Ne nekeeneb en ini se lagal ni Dimitriyu diyà te lusud te Ipisu, ne dutun ne nengeepes ke menge etew ne nehuvut en. Ne midsigkem dan si Gayu wey si Eristarku, ini se deruwa ne riyà ebpuun te Mesidunya ne miduma ki Pablo, ne mid-ewit dan diyà te meluag ne egkevurunan te menge etew dut te inged. ³⁰ Ne si Pablo ne ebbendiyà perem te egkevurunan, ugaid ne warà tuhuti dut te menge ruma rin ne mibperetiyya. ³¹ Ne duen duma ne egkeunutan kayi te pruvinsiya ne nekekilala kandin ne ruen midsuhù dan te ebuyù te kenà sikandin ibpependiyà te egkevurunan.

³² Ne ketà te egkevurunan ne warà kebekerinegrineg dan. Su ruen egkuleyì diyà, ne ruen ebpemensag kayi, misan ke kerekelan ne etew ketà ne warà dan metueni arà se egkevurunan dan. ³³ Ruen duma ne menge etew ne iyan dan kunaan ne si Alejandro se ebpuunan dut te kinekevurun dan su sikandin ke impeetuvang te menge Hudiyanan. Ne migkayew si Alejandro te belad din te edlalag su ruen idseysey rin ne ibpetuus din te kenà diyà te kandin se puunan kayi te ini se kevurunan. ³⁴ Ugaid ne netuenan dan ne Hudiyanan sikandin ne mid-ilut dan se ebpemensag te, "Ed-edatan neveran si Diana kayi te inged ne Ipisu!" Ne lusud te deruwa ne uras arà se kebpermemensag dan.

³⁵ Netaman ketà ne ke beredsurat dut te inged ne nepeengked din ded ke menge etew ne nevurun ketà. "Menge ruma ku kayi te Ipisu," ke sikandin, "netuenan te langun ne menge etew te sikami kayi te inged ne Ipisu se ebantey dut te baley ne ebpengerapan te mepurù ne diwata tew ne si Diana wey ini se berekat ne ledawan ne batu ne neulug ebpuun te langit. ³⁶ Warà etew ne ebpekekahi te kenà benar ini. Tembù be peeneng-eneng kew ne pegininga niyu neraan ke engkey se ed-ul-ulaan niyu. ³⁷ Su meambe ke mid-ewit niyu ini se menge etew ne warà dan mibpenakew diyà te menge baley ne ebpengerapan te diwata tew, ne warà dan dema sumpelita ke diwata tew ne si Diana. ³⁸ Embiya ruen id-isuhat eni Dimitriyu ne ruen hewii ne intail te egkukum ne ruen perekukum ne dait ne riyà dan idsumbung. ³⁹ Ugaid ne embiya ruen ruma pà ne egkukumen, ne egkukumen arà diyà te netail ne kegkevurun te menge etew dut te inged. ⁴⁰ Su kalu ke iyan ki egkesuhat

te nehuvut ini ne ned-ulaula guntaan. Ne warà kewagib ta te ini ne ned-ulaula.”⁴¹ Nekahi rin arà ne impeuli din ke menge etew.

20

Ke Kebpendiyà ni Pablo te Menge Inged ne Mesidunya wey Gerisiya

¹ Guna su neengked en ke nehuvut, ne miburun ni Pablo ke menge mibperetiyaya ki Hisus ne mibpesabut din su apey mevag-et ke kebperetiyaya ran. Ne ketà ne mibpemehetew sikandin ne migenat en se ebpendediyà te inged ne Mesidunya.² Ne mibpevayà sikandin dut te menge inged ketà ne mibpesabut din ke menge mibperetiyaya su ibpevag-et din ke kebperetiyaya ran. Ne midlaus en diyà te inged ne Gerisyà³ ne dutun mid-ubpà te tetelu ne vulan. Ne guna su egenat en perem sikandin se ed-untud te kapal se ebpendediyà te inged ne Siriya ne ruen impayag kandin ne netahù te itungan dut te menge Hudiyansen se ebpeimetayan sikandin. Ketà ne nepegitung din se edlived te imbayà din te ebpendediyà te Mesidunya.⁴ Ne ruen miduma kandin si Supatir ke anak ni Piru ne riyà ebpuun te inged ne Beriya, elin dema si Eristarku wey si Segundo ne riyà ebpuun te inged ne Tiselunika, si Gayu ne riyà ebpuun te inged ne Dirbi, si Tikiku wey si Trupimu ne riyà ebpuun te pruvinsiya ne Asiya, wey si Timoteo.⁵ Ne mid-una ran diyà te inged ne Teruwas ne midteharan key ran diyà.⁶ Ne ketà te kegkeipus dut te Pista te Egkaan te pan ne warà Insawug ne Ibpelevag, ne mid-untud key te kapal diyà te inged ne Pilipus. Ne nekedlelima ne hewii ne nekeuma key diyà te inged ne Teruwas ne nesaut dey sikandan dutun, ne riyà key med-ubpà te senge pedian.

Ke Uriyan ne Kebpendiyà ni Pablo te Inged ne Teruwas

⁷ Ne guna su midsanlep en ke andew te hewii ne Sepetu ne miburun key ke menge mibperetiyaya ki Hisus su egkaan te pan ne mibpenevitevi en su ini ke kedadentenuri rey te kinepatey ni Hisus. Ne mibpesabut ni Pablo ke menge etew ne nevurun ketà taman te edluuk se kerukileman su ed-ipanew en sikandin dut te hewii ne edtundug.⁸ Ne ruen merakel ne sulù diyà te sungkù te iketelu ne pangkat dut te baley ne nevurunan dey.⁹ Ne ruen kenakan ne ed-ingaranan ki Yutiku ne riyà mebpinuu te sulawan. Ne geina te meuhet se kedlalag ni Pablo, ne edtureturen en si Yutiku ne netaman ne nekelipereng en ne neulug en diyà te tanà. Ne mibpemenaug ne mibitbit dan, ne minatey en.¹⁰ Ne mibpemenaug si Pablo ne midlengkevan din ne migkepkepan din ini se kenakan. “Kenà kew egkeuru,” ke si Pablo, “su neuyag en.”¹¹ Ne ketà ne mibpemenayik si Pablo ne migkaan te mibpenevitevi ne pan. Ne meuhet pà se kebpekidlalag din kandan su taman te nepawà, arà pà ne migenat en.¹² Ne arà se kenakan ne neuyag en, ne mid-ewit dan sikandin diyà te baley rin ne nehalew nevenar se hinawa ran.

Ke Kebpendiyà ni Pablo te Inged ne Melitus

¹³ Ne mid-una key ki Pablo ne mid-untud te kapal se ebpendediyà te inged ne Asun su ruen neupakatan dey ne riyà dey ed-eweta sikandin ne langun dey ne ed-untud te kapal te edlaus. Su migkahi rin te ed-ipanew rà sikandin taman diyà te inged ne Asun.¹⁴ Guna su nenekeuma key diyà te inged ne Asun ne impeuntud dey sikandin, ne dutun ne midlaus key riyà te inged ne Mitilini.¹⁵ Ne dut te neketundug ne

hewii ne mid-awet key rà te inged ne Kiyus ne ketà maa te neketundug ne hewii ne nekeuma key diyà te inged ne Melitus.¹⁶ Ne nepegitung ni Pablo te kenà key en ed-awet diyà te inged ne Ipusu lusud te Asiya su apey key kenà mevangen diyà te pruvinsiya ne Asiya. Egkerehusu si Pablo su iyan din igkesuat ne embiya egkepakey ne ebpekeuma sikandin diyà te inged ne Hirusalim te kenà pà egkeuma ke hewii te pista ne ed-ingaranan te Pintikusti.

Kinepemehetew ni Pablo diyà te menge Pekilukesen dut te Menge Mibperetiyyaya diyà te inged ne Ipusu

¹⁷ Ugaid ne guna su nekeuma key diyà te inged ne Melitus ne impetawag ni Pablo ke menge pekilukesen dut te menge mibperetiyyaya diyà te inged ne Ipusu.¹⁸ Nekeuma ran ne migkehiyan din sikandan te, "Netuenan niyu ke engkey se mid-ulaula ku te langun ne hewii ku te kayi e pà te keniyu igenat te hewii ne nekeuma a kayi te pruvinsiya te Asiya.¹⁹ Su gelevrek ku ke helevek ne insuhù te Kerenan kedì ne warà ku impereyüdeyù. Ne midtihis se luwà ku dut te meraat ne ed-ul-ulaan ne nekita ku te ruma ne etew," ke sikandin. "Ne migelevrek a lavew misan nerasey a su atag dut te mid-ulaula te menge Hudiyanan kediey.²⁰ Netuenan niyu se in-amin ku keniyu ipesabut ke langun ne ebpeketa vang keniyu. Ne impenurù ku keniyu diyà te kevurunan wey misan dema diyà te menge baley niyu.²¹ Hudiyanan se kenà Hudiyanan ne impesabut ku te langun se engkeri ran ke meraat ne ed-ul-ulaan dan wey ibehey ran ke hinawa ran te Eleteala wey ebperetiyyaya dut te Kerenan tew ne si Hisus.

²² "Ne guntaani ne ebpendiyan a te inged ne Hirusalim su ini ke insuhù kediey te Kedesenan ne Ebpetuntul te Menusiyà. Ne kenà ku egketuenan ke engkey se egketemanaan ku riyà.²³ Iyan ku rà netuenan ne impesabut kediey dut te Kedesenan ne Ebpetuntul te Menusiyà te uman senge inged ne kebpekeuma ku ne egkevilanggù a wey merakel se kemerehenan ne edseharan ku.²⁴ Ugaid ne kenà ku en egkenehunan ini se umur ku su apey ku egkepasad ini se helevek ne impehelevek kedì te Kerenan tew ne si Hisus ne ini se kebpesabut dut te Meupiya ne Tudtul mekeatag te kegkeyru keytew te Eleteala.

²⁵ "Midsihid a dut te langun niyu te kebpesabut mekeatag te edetuan dut te Eleteala ne menge etew. Ne guntaani ne netuenan ku te ini rà taman se kebpemekedkiti tew.²⁶ Tembù be egkehiyen ku keniyu ke embiya ruen misan senge etew keniyu ne kenà ebpekeliyu dut te kedusa te Eleteala kandin, ne kenè en kilid kediey.²⁷ Su in-amin ku keniyu ipesabut ke langun ne intahù te itungan te Eleteala ne ed-ul-ulaan.²⁸ Bentayi niyu," ke si Pablo, "ini se ed-ul-ulaan niyu wey tugenura niyu ke langun ne menge etew ne mibperetiyyaya ki Hisus ne insarig keniyu dut te Kedesenan ne Ebpetuntul te Menusiyà. Ed-iring kew te tumetuganur te menge bilbili ne edtugenuren niyu ke menge etew ne mibperetiyyaya te Eleteala su sakup dan te Eleteala egenat te kebpebpatay te Anak din su sabap dut te menge salà dan.²⁹ Netuenan ku te embiya ed-ewaan ku en sikiyu ne ruen edlepew kayi te keniyu ne menge etew ne ederaat dan perem te kebperetiyyaya niyu su iring dan te mewalew ne asu ne ebpmesuwey dut te menge bilbili.³⁰ Egkeuma se hewii ne misan menge ruma niyu red ne edlalag te tarù su apey ruen

menge mibperetiyaya ne mekeruma kandan. ³¹ Tembù be uram kew ne kenà niyu lipati te lusud te tetelu ne rahun ne merukilem meandew ne mibpenuru a keniyu wey midtihis se luwà ku mekeatag keniyu.

³² “Na,” ke si Pablo, “idsarig ku sikiyu riyaw te Eleteala su sikandin se edtuganur keniyu. Ne ke lalag din mekeatag te limù din wey iru rin te menge etew se ebpeiseg te kebperetiyaya niyu kandin. Ne embiya edumaan niyu ini se lalag din, ne ebepeneuven kew te Eleteala su ini se ibehay rin te langun ne etew ne in-amin din ke hinawa rin te eduma kandin. ³³ Ne egkehiyen ku rema keniyu te warà a meima te kureta wey tamuk te piya engkey ne etew. ³⁴ Su netuenan niyu langun te migelevek a te mevaher su apey ruen kureta ne igkepemasa te kurang dey te menge rumu ku. ³⁵ Arà se mevaher ne migelevek ku,” ke si Pablo, “ne impekita ku keniyu se mebpgelep kew rema su apey ruen ibpeketavang tew te menge ayuayu su edtentenuran tew ke menge lalag te Kerenan tew ne si Hisus ne migkahi te, ‘Ke etew ne ebehey te tavang, ne dekelà pà se kegkehalew rin dut te etew ne edtelimà te tavang.’”

³⁶ Guna su nekeipus si Pablo se edlalag ne mibpenimbuel sikandin abpeg ke rumu ne menge mibperetiyaya ne mibpengeningen i sikandin te Eleteala. ³⁷ Ne ketà te kebpemehetew rin ne nenekehinehew ran ne migkepkepan dan si Pablo wey mid-erek dan. ³⁸ Iyan dan ibmerungkug ne arà se lalag din ne kenà dan en ebpemekegkita. Ketà ne midumaan dan sikandin taman diyà te kapal.

21

Mibpendiyà si Pablo te Inged ne Hirusalim

¹ Mid-ewaan dey ketà ke menge etew, ne mid-untud key en te kapal ne migenat. Ne midtilandeng dey se kebayà dey ne nekeuma key riyaw te inged ne Kus. Ne ke neketundug ne hewii ne nekeuma key riyaw te inged ne Rudas ne egenat ketà ne midlaus key diyà te inged ne Petara. ² Ketà ne ruen kapal ne ebpendiyà te inged ne Pinisiya lusud te Siriya ne mid-untud key ketà. ³ Ne midsehid dey ke punul ne Sipriyu, ugaid ne mibpnevayà key kayi te egkehivang ne midlaus key riyaw te inged ne Tiru lusud te Siriya. Nekerunggù key ketà su ibpenrenà dan ke ruran te kapal ne mibpemenaug key. ⁴ Ne rutun ne ruen menge mibperetiyaya ne nevalak dey ne mid-ubpà key riyaw te kandan lusud te senge pedian. Ne ruen impayag kandan dut te Kedesenan ne Ebpetuntul te Menusiyà ne egketemanan ni Pablo, ne migkahi ran kandin te kenà sikandin ibpelaus diyà te inged ne Hirusalim. ⁵ Ugaid ne guna su neuma en ke hewii te ked-ipanew rey rutun, ne migenat key en. Ne langun ne menge mibperetiyaya meama se meritan, abpeg te menge anak dan, se miduma kenami taman diyà te beyvey te rahat ne mibpenimbuel key se ebpengeningen i Eleteala. ⁶ Ketà ne mibpepemehetawey key ne mid-untud key en te kapal, ugaid sikandan ne mid-ulì dan en.

⁷ Ne mid-ewaan dey ini se inged ne Tiru ne midlaus key en ne nekerunggù key diyà te inged ne Tulemeyda. Ne mibpenumbelayan dey ke menge mibperetiyaya te ketà ne inged ne diyà key med-ubpà te senge hewii. ⁸ Ne dut ke neketundug ne hewii ne mid-awà key se edlayag ne nekerunggù key diyà te inged ne Sisariya. Ne riyaw key mid-ubpà te baley ni Felipe, senge etew ne mibpesabut te Meupiya ne

Tudtul mekeatag ki Hisus, ne seveka sikandin dut te pitu ne etew ne meama ne nepemilì dan diyà te Hirusalim ne ed-amung te helevek diyà.⁹ Ne ruen epat ne menge anak din ne raha ne mibehayan te Eleteala te helevek te eipayag dut te Lalag te Eleteala diyà te menge etew.

¹⁰ Guna su nekebpipira en ne hewii se ked-ubpà dey riyà ne ruen nekeuma ne senge etew ne ebpelambas te Lalag te Eleteala ne ed-ingaranan ki Egebu ne riyà ebpuun te inged ne Hudiya.¹¹ Nekeuma rà kayi te kenami ne migkuwa rin en ke sebitan ni Pablo ne impevakù din en te paa rin wey belad din. Ne migkahi te, "Impesabut kenitew rut te Kedesenan ne Ebpetuntul te Menusiyà te ini se kemuney kayi te sebitan ne iring kayi te kebekua kandin dut te menge Hudiyanan diyà te Hirusalim su ibpalad dan sikandin diyà te menge kenà Hudiyanan te ed-ul-ulaan dan kandin ke kiyug dan."

¹² Ne guna su nerineg dey arà, ne sikami wey ke menge mibperetiyyaya dutun ne mibuyù dey ki Pablo te kenà sikandin ebpeleusen diyà te Hirusalim.¹³ Ugaid ne migkahi rin te, "Meambe ke eppeninehew kew se ebpekevehey kedì te kegkeuru? Su embiya idtuhut en ini te Kerenan tew ne si Hisus ne egketemanan ku kayi te kegelevek ku kandin ne idselakan ku en te kenà kebekua rà kediey su piya ed-imetayan e pà diyà."¹⁴ Ne guna su kenà dey egkevangan si Pablo ne migkahi key te, "Berekat ne iyan egketuman se kiyug te Kerenan."

¹⁵ Guna su nekebpipira en ne hewii se ked-ubpà dey ketà ne mibpenines key en ne migenat key se eppendiyà te Hirusalim.¹⁶ Ne ruen menge mibperetiyyaya ketà te inged ne Sisariya se miduma kenami te eppendiyà te Hirusalim su in-ated key ran diyà te baley ni Menasun ne egkeubpaan dey. Senge etew sikandin ne riyà ebpuun te inged ne Sipriyu ne seveka sikandin dut te nengeuna ne mibperetiyyaya ki Hisus.

Mibpekibalak si Pablo ki Santiago riyà te Hirusalim

¹⁷ Ketà te kebpekeuma rey diyà te Hirusalim ne nengehalewhalew ke menge mibperetiyyaya dut te kebpekeuma rey.¹⁸ Ne dut te neketundug ne hewii ne miduma kenami si Pablo se eppendiyà te baley ni Santiago su ebpekibalak kandin ne ketà dema ke menge pekilukesen dut te menge mibperetiyyaya.¹⁹ Mibpenginginsà si Pablo kandan te, "Engkey red se egketemanan niyu?" Ne dutun ne mibpenudtul din ke langun ne mibpeveelan te Eleteala kandin diyà te menge etew ne kenà Hudiyanan.²⁰ Nerineg dan ini se tudtul ni Pablo ne mideyù dan te Eleteala. Ne migkehiyan dan si Pablo te, "Netuenan nu, suled, te medmerakel en se menge ruma tew ne Hudiyanan ne mibperetiyyaya ki Hisus, ne langun dan ne meilut se kadtuman dan te penduan ne intetahak ni Moises.²¹ Ne nerineg dan arà se tudtul ne ruen kun penurù nu te menge Hudiyanan ne ed-ubpà riyà te kenà Hudiyanan se engkeri ran te edtuman ke penduan ne intetahak ni Moises. Su impenurù nu kun te kenà dan en ebpeetusan ke menge anak dan.²² Na engkey embe imbe ini? Su egkerineg dan iya te nekeuma ke en.²³ Iyan meupiya ne edumaan nu ini se egkehiyen ku. Su ruen epat ne menge meama kayi ne ruen impasad dan te Eleteala iring dut te betasan tew.²⁴ Duma ka kandan diyà te Nekebpuru ne Valey te Eleteala ne

amung ka te kedmumana dut te edtenuran ne betasan tew te menge Hudiyenan mekeatag te kedlùlù. Iyan ka bayad dut te ibpelengesa ran ne ibehey te Eleteala su apey ran ebpekepetevungew. Embiya ed-ul-ulaan nu ini, ne egketuenan te langun ne menge etew te kenà benar arà se tudtul ne nerineg dan mekeatag kenikew ne egketuenan dan te meilut dema se kedmumana nu te penduan ni Moises.²⁵ Ugaid ne ini se menge kenà Hudiyenan ne mibperetiaya ki Hisus, ne ruen surat ne impeewit dey diyà te kandan se ebpesabut kandan te kenà dan megkaan te egkeen ne indawey su inrenà ne siparat diyà te ledawan. Ne kenà dan megkaan te binatang ne ebpekelen dà, ne kenà dan megkaan te lengesa, wey kenà dan dema mebpengingniyug."

²⁶ Ne ketà te neketundug ne hewii ne miduma ni Pablo arà se menge meama ne mid-amung sikandin dut te kedmumana te edtenuran ne betasan te menge Hudiyenan mekeatag te kedlùlù te kenà den pà edlusud te Nekebpuru ne Baley te Eleteala. Ne dutun ne midlusud si Pablo su ebpenudtul dut te menge terebpelengesa te pira ne hewii se kegkeipus dut te edtenuran dan ne betasan mekeatag te kedlùlù su embiya egkeipus en ne uman senge etew kandan ne ruen ibpelengesa rin ne ibehey te Eleteala.

Ke kedsigkem ki Pablo diyà te Nekebpuru ne Valey te Eleteala diyà te Hirusalim

²⁷ Ne guna su mehaan en egkeipus ke pitu ne hewii dut te edtenuran dan ne betasan mekeatag te kedlùlù ne ruen menge Hudiyenan ne riyà ebpuun te Asiya ne nekekita ki Pablo diyà te Nekebpuru ne Valey te Eleteala. Ne mibaal dan te kegkeepes dut te merakel ne etew ne nevurun ketà ne midsigkem dan si Pablo.²⁸ Ne mibpememensag dan te, "Sikiyu ne menge ruma rey ne Hudiyenan, tevangi key su ini ne etew ne in-eneb din ke penurù din te menge etew te misan endei ne inged. Ne ebpekesurang ini se impenurù din te langun ne menge Hudiyenan wey ke penduan ni Moises wey misan ini se Nekebpuru ne Valey te Eleteala. Ne guntaani ne impelusud din en kayi te Nekebpuru ne Valey ini se kenà menge Hudiyenan ne egkeredsikan en." (²⁹ Tembù migkahi ran ini su nekita ran sì Trupimu ne riyà ebpuun te Ipusu ne kenà Hudiyenan se ruma ni Pablo dutun te inged. Kunaan dan ke miduma ni Pablo te edlusud kayi te Nekebpuru ne Valey te Eleteala.)

³⁰ Ini ne ingkeepes dut te langun ne menge etew dutun te inged ne Hirusalim ne nengevurun dan ne midsigkem dan si Pablo ne miguyud dan diyà te liyu ne middlekevan dan ke gumawan dut te Nekebpuru ne Valey te Eleteala.³¹ Ne ed-imetayan dan perem sikandin, ugaid ne ruen nekepenudtul diyà te mepurù te menge sundaru ne Rumanu te egkehuvut ke langun ne menge etew diyà te inged ne Hirusalim.³² Arà dà ne midtawag dut te mepurù ini se menge kepitan wey menge sundaru rin ne migangaan dan se ebpendiyà dut te menge etew ne nevurun. Guna su nekita rut te menge etew ini se mepurù wey ke menge sundaru rin, ne mid-engked dan se ebadas ki Pablo.³³ Ne mid-uvey ini se mepurù ki Pablo ne midsigkem din ne impevakù din te deruwa ne sengkali. Ketà ne mid-insaan din ke menge etew te, "Engkey ini etawa ne engkey se salà din?"³⁴ Ne mibpememensag te edtavak arà se menge etew, ugaid ne kenà ebpemegayun ke lalag dan. Meilut se kebmehurub dan, tembù be kenà egketuenan dut te mepurù te menge

sundaru ke engkey se ned-ulaula ini. Ne ketà ne insuhù te menge sundaru rin te ibpeewit si Pablo kandan diyà te baher dan.³⁵ Nekeuma ran diyà te eheran te baher dan, ne mibitbit dan en si Pablo su kenà dan egkeeren ke menge etew.³⁶ Su ed-hawen dan perem si Pablo se ebpmemensag te, “Ed-imetayan tew!”

Mid-itindehan ni Pablo ke Kewagib din diyà te Etuvangan te Menge Etew

³⁷ Dutun ne idlusud en perem dut te menge sundaru si Pablo diyà te baher dan ne migkehiyan din ke mepurù te sundaru te, “Engkey, egkepakey red be ke ruen idlagku kenikew?”

Migkahi ini se mepurù te menge sundaru te, “Menu, metau ke ves te edlag te kinehiyan te Gerisiyanen?³⁸ Embyia iring ketà,” ke sikandin, “ne kenà bes sikuna ke etew ne riya ebpuun te inged ne Ihiptu ne mid-atu te gubirnu ne mid-ewit te epat nengivu ne nebmetereman ne tulisan diyà te tanà ne kenà egkeubpaan te etew.”

³⁹ “Kenà a,” ke si Pablo, “su Hudiyanan a ne riyan a in-anak te dekelà ne inged ne Tarsu lusud te Selisiya. Ne embiya egkepakey ne ebuyuen ku kenikew te ebpekidlag a kayi te menge etew.”

⁴⁰ Ne midtuhut kandin ini se mepurù te menge sundaru. Mid-itindeh ketà si Pablo kayi te eheran te baher ne mid-uyew te belad din te mebpeeneng-eneng ke menge etew. Ne guna su neengked dan se mehurub, ne midlag si Pablo kandan te kinehiyan te Hibruhanen.

22

¹ “Menge suled wey menge lukes,” ke si Pablo, “pemineha niyu ini se ibpesabut ku keniyu ne kewagib ne idtindeg ku.”

² Guna su nerineg dan se lalag din ne Hibruhanen ne kinehiyan, ne warà ed-edtiken dan su ebpmineg.

Ne ke si Pablo te,³ “Hudiyanan a ne riyan a in-anak te inged ne Tarsu lusud te Selisiya, ugaid ne kayi a medekela te inged ne Hirusalim ne mibpenurù a ni Gemelil. Ne meited se impenurù din kediey mekeatag dut te penduan ne edtumanen dut te menge keep-epuan tew. Ne meilut se kedmumana ku kayi su in-amin ku ke hinawa ku te egelevek te Eleteala iring te sikiyu ne kayi en guntaani.⁴ Tembù be,” ke si Pablo, “mibpekesekitan ku ke menge mibperetiyyaya te penurù ni Hisus taman te ruen mibpematey ketà. Ne ruen en kandan meama meritan ne midsigkem ku ne mibilanggù.⁵ Ini se mepurù te terebpelengesa wey langun ne menge Perekukum se ebpekettihus te benar ini se egkehiyen ku keniyu su mibehayan e ran te menge surat ne impeewit dan kediey diyà te menge ruma ran ne Hudiyanan diyà te inged ne Demasku su apey a egkekilala nikandan. Ketà ne mibpendiyà a su apey ku mesigkem ke menge mibperetiyyaya te penurù ni Hisus ne ed-ewiten ku sikandan kayi te inged ne Hirusalim su edresayen dut te menge Perekukum kayi.

⁶ “Ne guna su ebelpelingguma ad diyà te inged ne Demasku,” ke si Pablo, “te mehaan en egkeudtu ne netekew te ruen mermerayag ne ebpuun te langit ne neketayew kediey.⁷ Nepiley a ne ruen suwara ne nerineg ku se egkahi te, ‘Ey, Saulo, Saulo, meambe ke ebpekesekitan a nu?’

⁸ “Ne migkahi a te, ‘Engkey ka, Kerenan?’

“Si Hisus a ne riyà ebpuun te inged ne Nesarit,’ ke se suwara, ‘ne mibpekesekitan nu.’⁹ Ne ke menge ruma ku, nekita ran ke merayag ugaid ne warà dan mesebuti ke suwara ne migkahi kediey.

¹⁰ “Ne nekeinsà a te, ‘Kerenan, engkey se ed-ul-ulaan ku?’

“Ne midtavak ke Kerenan te, ‘Na, enew ka ne laus ka riyà te inged ne Demasku ne dutun ne langun ne ebpeveelan keykew te Eleteala ne ibpenurù keykew.’¹¹ Ne nepisek a dut te mermerayag ne neketayew kediey, ne ketà ne mibpikit a dut te menge ruma ku te ebpendediyà te inged ne Demasku.

¹² “Ne rutun te inged ne Demasku ne ruen etew ne ed-ingaranan ki Ananias. Ne meperumaruma sikandin te menge penduan tew wey ed-edatan te langun ne menge Hudiyanan ketà.¹³ Neuma a rin dà ne mid-itindeg en kayi te uvey ku ne migkahi te, ‘Saulo, sikew se suled ku, guntaani ne ebpekekita ke en.’ Arà dà ne nekeulit en se kebpekekita ku su egkekita ku en sikandin.

¹⁴ “Ketà ne migkahi si Ananias kediey te, ‘Ke Eleteala ne mibpengerap dut te menge keep-epuan tew se mibpemili kenikew su apey nu egketueni ke engkey se kiyug te Eleteala ne ibpehelevek din keykew. Tembù be nekita nu ini se metidtu ne sugsuhuen din ne si Hisus wey nerineg nu ke migkahi rin.’¹⁵ Ne guntaani ne ibpepenudtul din kenikew diyà te menge etew mekeatag dut te nekita nu wey nerineg nu.¹⁶ Na kenà ka edlanganlangan ne pengeningeni ka te Kerenan tew ne si Hisus su apey ebpeseharan din ke menge salà nu. Ne kuwa ke en ne pebunyag ke en ne tuus te mibpesakup ke en ki Hisus.’

¹⁷ “Ne mid-uli ad diyà te inged ne Hirusalim ne gewii te kebpenningeni ku diyà te Nekebpuru ne Valey te Eleteala ne ruen impekita kediey.¹⁸ Ne ke Kerenan tew ne si Hisus se mibpekitakita kedi ne migkahi te, ‘Gaangaan ka awà kayi te inged ne Hirusalim su ke menge etew kayi ne kenà dan edtelimaan ke ibpesabut nu mekeatag kediey.’¹⁹ Ugaid ne migkahi a te, ‘Kerenan, netuenan dan en te mibayaan ku arà se menge etew ne mibperetiyyaya keykew diyà te menge baley ne ebpengedian te menge Hudiyanan ne mibpenigkem ku wey mibpembedasan.²⁰ Ne ketà te kineimetayi ki Esteban, arà se etew ne mid-itindeg dut te penurù nu, ne dutun a su migkiyug a rema te ed-ul-ulaan dan arà su siaken se mibantey te kumbalà dut te midimatey kandin.’²¹ Ugaid ne migkahi ke Kerenan tew te, ‘Genat ke en su ibpendediyà ku sikew te meriyù ne menge inged su ibpesabut nu mekeatag kediey diyà te menge etew ne kenà Hudiyanan.’”

²² Ne gewii te edlalag si Pablo ne mibpeeneng-eneng ke menge etew su ebpemineg kandin, ugaid ne guna su migkahi rin te sikandin se ibpendediyà te Eleteala te menge etew ne kenà Hudiyanan ne mibpememensag dan en te, “Ed-imetayan tew! Su dait ne edimetayan!”²³ Ne mibpememensag dan pà ne impenerawes dan ke menge kumbalà dan wey mibpenivurak te lipupuk.

²⁴ Ne arà se mepurù te menge sundaru ne Rumanu ne midsuhù din ke menge sundaru rin te ibpeewit kandan si Pablo diyà te lusud te baher ne ebpebedasan su apey rin igkepayag ke engkey se igkeepes kandin dut te menge Hudiyanan ne ebpememensag.²⁵ Ne ketà te ebekuen dan si Pablo su ebedasan ne migkehiyan en ni Pablo arà se

kepitān te, "Engkey, idtuhut be te ureding te ebedasan a niyu te siaken ne sakup te inged ne Ruma ne warà a pà mesumeriyà?"

²⁶ Nerineg ini dut te kepitān ne mibpendiyà te mepurù din ne migkahi te, "Meambe ke ebpebedasan nu kenami arà se etew ne sakup bes te inged ne Ruma?" ²⁷ Ne mibpendiyà arà se mepurù te ki Pablo ne migkahi te, "Maa, sakup ke ves te inged ne Ruma?"

"Uya," ke si Pablo.

²⁸ Ne ke se mepurù te menge sundaru te, "Siaken, ne dekelà nevenar se ingkevayad ku diyà te gubirnu su apey egkevaluy a ne sakup te inged ne Ruma."

"Ne siaken mulà," ke si Pablo, "ne benar ne sakup a te inged ne Ruma su ke menge lukes ku ne menge Rumanu." ²⁹ Nerineg dà arà dut te menge sundaru ne ebadas perem ki Pablo, ne migangaan dan med-awà. Ne neandek arà se mepurù dan su impevakù din si Pablo te sengkali, ugaid ne geina te sakup si Pablo te inged ne Ruma ne ebpekesurang te ureding ini se ed-ul-ulaan te menge sundaru su warà pà sumeriyà.

³⁰ Ne ketà te neketundug ne hewii ne midtawag dut te mepurù te menge sundaru ini se menge mepurù te terebpelengesa wey langun ne menge Perekukum su edsumeriyaan dan si Pablo apey rin metueni ke engkey se id-isuhata kandin dut te menge Hudiyanan. Dutun ne mid-ewit din si Pablo ne impeetuvang kandan.

23

Mibpeetuvang si Pablo diyà te menge Perekukum

¹ Ne midtengtengan ni Pablo ke menge Perekukum ne migkahi te, "Menge suled ku ne menge Hudiyanan, netuenan te Eleteala te metilak te itungan ku te miduma a te Eleteala taman guntaani." ² Ne si Ananias, arà se mepurù te terebpelengesa, guna su nerineg din ke lalag ni Pablo ne migkehiyan din ke menge etew ne ed-itindeg te uvey ni Pablo te tebpia ran ke bèbà din. ³ Ne migkehiyan sikandin ni Pablo te, "Edusaan ka te Eleteala su uvag en kun ne meputi ka nedtengtengan, ugaid ne ke hinawa nu ne meitem nevenar! Su sikuna se egkukum kediey te pengitavan te penduan ni Moises, ugaid ne sikuna se nekesurang te penduan ni Moises ketà te suhù nu te kedtebpia kediey!"

⁴ Ne migkahi arà se menge etew ne uvey ni Pablo te, "Edsumpeliten din ke mepurù ne terebpelengesa te Eleteala!"

⁵ "Menge suled ku ne menge Hudiyanan," ke si Pablo, "warà ku metueni te sikandin bes ke mepurù te terebpelengesa. Su embiya netuenan ku ne warà ku kehiya arà diyà te kandin su netuenan ku te ruen nekahi te surat ne Lalag te Eleteala ne egkahi te, 'Kenà ka edlag te meraat mekeatag te etew ne egkamal keniyu.' "

⁶ Ne guna su nekita ni Pablo se ruen menge Sedusiyu wey menge Paresiyu ne nevurun ketà te Perekukum ne mibmerahing se suwara rin ne egkahi te, "Menge suled ku ne Hudiyanan, Paresiyu a wey ke menge lukes ku. Ugaid ne impeetuvang a niyu su atag dut te peretiyyaya ku ne ebenawan te Eleteala ke menge minatey keuremà!" ⁷ Nekahi rin dà arà ne nekedlewanean ke menge Sedyusiyu wey menge Paresiyu ne warè en kegkeatur dut te kukuman. (⁸ Iyan dan kebpekedlewanaà su egkahi ke menge Sadusiyu te kenè en ebenawan ke menge minatey,

ne warè suluhuen ne riyà ebpuun te langit, ne egkahi ran te warè gimukud. Ugaid ne ke menge Paresiyu ne egkahi ran te ebenawen ke menge minatey, ne ruen suluhuen ne riyà ebpuun te langit, ne egkahi ran te ruen gimukud.)

⁹ Ketà ne mid-ilut pà ke kebpebenbensahey ran su ruen menge Paresiyu ne mibpenurù te penduan ni Moises ne mid-itindeg ne migkahi te, "Embiya kayi te ki Pablo ne warà meraat ne netuenan dey ne mibeelan din. Su kalu ke ruen gimukud etawa suluhuen ne riyà ebpuun te langit ne mibpekidlalag kandin." ¹⁰ Ketà ne mid-iseg nevenar ke kebpekedlewaney ran taman te meinit en ne neandek arà se mepurù te menge sundaru su kalu ke edwèweasen dan si Pablo. Tembù be insuhù din dut te menge sundaru rin se ibpeahew kandan si Pablo ne ibpeulì diyà te kutà.

¹¹ Rutun ne kerukileman en ne mibpekitakita ki Pablo ke Kerenan tew ne si Hisus ne migkahi te, "Kenà ka meandek! Su iring te impeitindeg nu ke kebperetiyaya nu kediey kayi te lusud te inged ne Hirusalim, ne engketà ded se ed-ul-ulaan nu rema diyà te inged ne Ruma."

Ke Netahù te itungan dut te menge Hudiyansen te ked-imetayi ran ki Pablo

¹² Guna su meselem en ne ruen menge Hudiyansen ne nevurun su ebpengesaken dan ke engkey se egkepakey ne ralan te ked-imetayi ran ki Pablo. Ne insapà dan te kenà dan egkaan wey ed-inum taman te kenà dan mepatey si Pablo. ¹³ Ne labi ran epat nepulù ne mid-upakat kayi. ¹⁴ Ketà ne mibpendiyà dan te menge mepurù te terebpelengesa wey menge pekilukesen ne migkahi te, "Midsapà key te kenà key egkaan wey ed-inum taman te kenà dey mepatey si Pablo. ¹⁵ Ne sikiyu wey langun ne menge Perekukum, pesurati niyu arà se mepurù te menge sundaru te Ruma su ewita rin si Pablo kayi su ruen kun uvag duma ne penginsà nu kandin. Ne sikami ve ne ed-ayan key diyà te ralan su ed-imetayan dey te kenà pà ebpekeuma kayi."

¹⁶ Ugaid ne ruen anak ne meama dut te etevey ni Pablo ne nekerineg dut te netahù te itungan dan ne ed-ul-ulaan dan ki Pablo ne mibpendiyà sikandin te kutà ne impenudtul din ini ki Pablo. ¹⁷ Ne dutun ne mid-umew si Pablo te senge etew ne kepitan ne migkahi te, "Ewita nu ini se kenakan diyà te mepurù nu su ruen igkahi rin kandin." ¹⁸ Ne mid-ewit din ini se kenakan diyà te mepurù din ne migkahi te, "Ke bilanggù ne si Pablo se mid-umew kediey ne ibpeewit din kediey ini se kenakan kayi te keykew su ruen igkahi rin kenikew." ¹⁹ Ne mid-ahak dut te mepurù ini se kenakan diyà te ubpu te sikandan dà ne mid-insà te, "Engkey se igkahi nu kedi?" ²⁰ Ne migkahi ini se kenakan te, "Mid-upakat ke menge Hudiyansen ne ebuyù kenikew te ibpependiyà nu ini se anggam ku ne si Pablo diyà te Perekukum su ruen kun uvag duma ne penginsà dan kandin. ²¹ Ugaid ne kenà nu idtuhut su ruen labi epat nepulù ne etew ne ed-eles su ed-ayan kandin. Ne ruen sapà dan ne kenà dan egkaan wey ed-inum taman te kenà dan mepatey sikandin. Neimes dan en ne iyan dan dà edteharan se suhù nu." ²² Ne migkahi ini se mepurù te, "Kenà nu penudtula te misan engkey ne etew te impenudtul nu kediey ini." Ne ketà ne impeulì din ini se kenakan.

Impeewit Dan si Pablo diyà te ki Gubinedur Felix

²³ Ne mid-umew dut te mepurù te menge sundaru ke deruwa ne kepitan din ne migkahi te, “Imesa niyu te deruwa nehatus ne sundaru su ibpependiyà te inged ne Sisariya, ne ibperuma ran te pitu nepulù ne sundaru ne egkukudà wey deruwa nehatus ne sundaru ne ebevangkew. Ne iyan be imbe se ed-imes dan en su egenat dan te siyew ne uras te ini ne kerukileman. ²⁴ Ne kuwa kew te menge kudà ne ebpeunturan ki Pablo, ne ey-eyari niyu te ebantey sikandin taman te ebpekeuma kew riyà te ki Gubinedur Felix.” ²⁵ Ne ketà ne midsurat ke mepurù te menge sundaru te ibpeewit din diyà te gubinedur ne ini se migkahi rin:

²⁶ “Surat ini ni Claudio Lisyas diyà te ki Gubinedur Felix.

“Memenu kew en keniyan? ²⁷ Ini se etew ne ibpeewit ku keniyan ne nesigkem dut te menge Hudiyanan ne ed-imetayan dan perem. Ne guna su netuenan ku ne sakup sikandin te inged ne Ruma, ne mibeyaan dey te menge sundaru ku su apey kenà dan egkeimetayi. ²⁸ Ketà ne mid-ewit ku sikandin diyà te menge Perekukum su edsumeriyaan dan su edsusiyen ku ke engkey se id-isuhat dan kandin. ²⁹ Ne rutun ne netuenan ku te warà bes meraat ne ed-ul-ulaan din te kebpeimetayi kandin etawa kebilanggù su iyan dà id-isuhat kandin ne mekeatag te kedsurang din dut te pengitavan te menge penduan dan. ³⁰ Ne guna su netuenan ku te ed-ayanan sikandin su ed-imetayan dut te menge Hudiyanan, tembù be nepegitung ku se ibpeewit ku sikandin kayi te keniyu. Ne migkehiyan ku ini se menge mid-isuhat kandin te riyà dan te keykew ibpeetuvang. Arà dà taman se lalag ku.”

³¹ Arà ne kerukileman ne midtuman dut te menge sundaru ini se suhù te mepurù dan ne migkuwa ran si Pablo ne migenat en ne diyà dan metaman te inged ne Entipatris. ³² Ne rut te neketfundug ne hewii ne mid-uli en diyà te kutà arà se menge ed-ip-ipanew rà ne menge sundaru ne iyan mid-ewit ki Pablo arà se menge sundaru ne egkukudà. ³³ Ne ketà te nekeuma ran diyà te inged ne Sisariya ne imbehey ran ke surat diyà te ki Gubinedur Felix wey impalad dan kandin si Pablo. ³⁴ Ne mibasa rut te gubinedur arà se surat ne mid-insaan din si Pablo ke endei se kandin ne pruvinsiya. Guna su netuenan din te riyà ebpun te pruvinsiya ne Selisiya si Pablo, ³⁵ ne migkehiyan din te, “Wey ku en egkukuma sikew ke ebpekeuma arà se mid-isuhat.” Ne mibpeventayan din te menge sundaru si Pablo diyà te turuhan ni Hirudis.

24

¹ Guna su nekedlelima ne hewii ne mibpendiyà te inged ne Sisariya si Analias arà se Mepurù ne Terebpelengesa, ne edumaan din ke menge pekilukesen wey senge etew ne ebugadu ne ed-ingaranan ki Tertulu. Ne mid-etuvang dan ki Gubinedur Felix su ruen id-isuhat dan mekeatag ki Pablo. ² Ne guna su impetawag en si Pablo, ne mid-itindeg arà se ebugadu ne si Tertulu ne impesabut din dut te gubinedur ke menge id-isuhat dan mekeatag ki Pablo. “Egkeedatan ne Gubinedur Felix,” ke se ebugadu, “su atag dut te ketau nu te kegkamal nu kenami ne neuhet en ne merinew se ked-ubpà dey wey merakel ne menge keupianan ne neveelan kayi te kenami. ³ Tembù be lelayun

key ebpeselamat te piya endei su atag dut te ed-ul-ulaan nu. ⁴ Ne kenà ku igkesuat te egkevangen ka kayi te egkehiyen ku, ugaid ne ebuyuen ku keykew te pemineha nu pà ini se ibpesabut ku kenikew. ⁵ Iyan dey kebpengkayi ne ebpesebutan dey kenikew te ini se etew ne si Pablo ne mesamuk sikandin su ini se menge baal din se puunan te kegkehuvut dut te menge Hudiyanan te piya endei ebpesinaru sikandin. Su sikandin ke unutan dut te menge etew ne ed-ingaranan te Neserinu su si Hisus ke mibperetiyaya ran ne riyà ebuun te inged ne Nesarit. ⁶ Ne kenà dutun dà taman su edredsikan din perem ini se Nekebpuru ne Valey te Eleteala rey, tembù be midsigkem dey sikandin. Ne egkukumen dey perem sikandin kayi te pengitavan te penduan dey. ⁷ Ugaid ne nekeuma ke mepurù te menge sundaru ne si Lisyas ne midahew rin kenami su apey kenà dey egkekukum. ⁸ Ne impeewit din kayi te keykew ne migkehiyan key rin te sikami se mid-isuhat ki Pablo ne kayi key ibpeetuvang te kenikew. Su embiya edsumeriyaan nu ini se etew, ne egketuenan nu ke benar ini se in-isuhat dey kandin.” ⁹ Ne ketà ne mid-ayun arà se menge rumu rin ne menge Hudiyanan se egkahi te benar arà se langun ne migkahi rin.

Midtindeg si Pablo te Hinawa Rin diyà te Etuvangan ni Gubinedur Felix

¹⁰ Ne mid-uyawan dut te gubinedur si Pablo su apey egkahi sikandin. Ne migkahi si Pablo te, “Netuenan ku ne meupiya se kegkamal nu su neuhet en se kegkamal nu kayi te inged ini, tembù be kenà a egkesanggel ne edtavak dut te in-isuhat dan kediey. ¹¹ Ne embiya egkiyug ka ne ed-insà kedi mekeatag kayi se id-isuhat dan kediey ne egkepakey. Su ruen merakel ne ebpekepenudtl te nekedsepulù en wey deruwa ne hewii ne mibpendiyan a te Hirusalim su ebpengarap a te Eleteala. ¹² Ne warà ma mekita te menge Hudiyanan ne ebpekidlewana a te misan engkey en ne etew diya te Nekebpuru ne Valey te Eleteala. Ne warà dema mekita ne ebaal a te egkehuvut diyà te menge valey ne ebpengedian te menge Hudiyanan te penduan dan etawa piya endei ketà te lusud te inged ne Hirusalim. ¹³ Tembù be ini se in-isuhat dan kediey ne kenà benar su warà tuus ne igkepekita ran. ¹⁴ Ugaid ne kenà ku igkesanggel te egkahi keniyu ne ed-erapen ku te Eleteala ne mibpengerap dut te menge keep-epuan dey. Ne iyan dalan te kebpengarap ku ne edtuntul a te pengitavan te penurù ni Hisus, ugaid ne egkehiyen dan te kenà benar ne kebpengarap. Ne edtuntul a rema dut te langun ne penduan ni Moises wey ke impesurat dut te menge ebpelambas te Lalag te Eleteala rengan. ¹⁵ Su langun dey abpeg kayi se mid-isuhat kediey, ne iyan dey ebpenerengen ke migkahi te Eleteala ne kebanew rin te langun ne menge minatey meupiya se meraat se ulaula ran. ¹⁶ Tembù be ebpegelep a te ed-ulaula te meupiya su wey warà igkesewayi kediey te Eleteala wey misan engkey en ne etew.

¹⁷ “Guna su ebirangan en te rahun se kineawà ku diyà te Hirusalim ne mibpendiyan a su id-ated ku se kureta ne idtavang te menge rumu ku ne Hudiyanan ne ayuayu. Ne mibpendiyan a su apey ruen ibpelengesa ku ne ibehey te Eleteala. ¹⁸ Ne gewii te ed-ul-ulaan ku ini ne nekita a ran diyà te Nekebpuru ne Valey te Eleteala te nepasad ku en ini se kedadumana te edtenuran ne betasan dey te menge Hudiyanan

mekeatag te kedlùlù. Ne kenà merakel ne menge etew se ruma ku ne warà dema equivut.¹⁹ Ugaid ne ruen menge Hudiyanen ketà ne riyà ebpuun te Asiya ne midsigkem kedi. Iyan dait ne sikandan se ed-etuvang keykew embiya ruen id-isuhat dan mekeatag kediey.²⁰ Embiya warà, ne pelelaha nu ini se menge etew kayi ne mid-isuhat kedi te kehiya ran keykew ke engkey se salà ku te impeetuvang a ran kayi te menge Perekukum.²¹ Su warà netuenan dan liyu te migkahi ku gewii te mibpenginsaan a dut te menge Perekukum su ke siaken te, ‘Impeetuvang a niyu su atag dut te peretiyyaya ku ne ebenawen te Eleteala ke menge minatey keuremà.’”

²² Nekahi rà ni Pablo arà ne ketà dà taman se kebpenginsà dut te gubinedur su netuenan din neraan mekeatag dut te menge etew ne eduma te penurù ni Hisus. “Ne wey ku en ed-imesara ke kukuman nu,” ke sikandin, “ke embiya ebpekeuma en ke mepurù te menge sundaru ne si Lisiyas.”²³ Ne migkehiyan din arà se senge etew ne sereyintu te ebpeventayan si Pablo, ugaid ne ruen idtuhut kandin. Ne egkepakey rema ne ke menge egkekilala rin ne ebpenumbaley su ebehey te kurang din.

²⁴ Guna su nekebpipira en ne hewii ne nekeuma si Felix ki Drusila ke esawa rin ne Hudiyanen. Ne impetawag din si Pablo ne mibpemineg dan dut te kebpesabut ni Pablo mekeatag te kebperetiyyaya rin ki Hisu Kristu.²⁵ Ne ketà te kebpesabut ni Pablo mekeatag te metidtu ne ulaula, wey keditgker te hinawa rin, wey ke hewii ne ebpekeuma ne keditimbanga te Eleteala dut te menge etew, ne neandek si Felix ne migkahi te, “Kayi pà taman su ibpetawag ku rà sikew ke embiya ruen en lakey ku.”²⁶ Ugaid ne edtahad si Felix ke ebehayan ni Pablo te idselipsip din ne kureta, tembù layun din ibpetawag su apey ran ebpekebitiyara.

²⁷ Ne nekederuwa ne rahun ne si Pursyu Pistu se nekesambi ki Felix ne gubinedur. Si Felix, ne warà din pelihewanga si Pablo su apey igkesuat sikandin dut te menge Hudiyanen.

25

Ke Kebpekeetuvang ni Pablo ki Gubinedur Pistu

¹ Guna su nekedtetelu en ne hewii se kegkamal ni Pistu ne gubinedur ketà te pruvinsiya te Hudiya, ne mid-awà sikandin te inged ne Sisariya se ebpendiyà te inged ne Hirusalim.² Rutun ini se menge mepurù te terebpelengesa wey ke menge egkeunutan te menge Hudiyanen ne mid-uvey kandin se ebpenudtl mekeatag te in-isuhat dan ki Pablo. Ne ebuyuen dan ki Pistu³ te edtevangan din sikandan te ibpeewit kandin si Pablo diyà te inged ne Hirusalim, ugaid ne iyan dan kebuyua su ruen netahù te itungan dan te ed-ayanan dan si Pablo diyà te ralan su ed-imetayan dan.⁴ Ugaid ne migkahi si Pistu te, “Uya, si Pablo ne bilanggù sikandin diyà te inged ne Sisariya ne kenà meuhet ne ed-ulì a riyà.⁵ Tembù be ibperuma niyu kedi arà se menge egkeunutan niyu su wey ran mekevaal te id-isuhat embiya ruen mid-ulaula rin ne meraat.”

⁶ Riyà pà si Pistu te inged ne Hirusalim taman te labi senge pedian, arà pà ne mid-ulì diyà te inged ne Sisariya. Ne ke neketundug ne hewii te kebpekeuma rin ne mibpinuu sikandin diyà te egkukuman ne insuhù din te ibpeetuvang kandin si Pablo.⁷ Nekeuma si Pablo

ne midlingutan sikandin dut te menge Hudiyanan ne riyà ebpuun te Hirusalim ne mevehat se in-isuhat dan kandin, ugaid ne warà tuus ne impetuus dan atag te id-isuhat dan kandin.⁸ Dutun ne midlalag si Pablo te tindeg din te hinawa rin se egkahi te, "Warà a mekesurang te penduan dey te menge Hudiyanan, ne engketà ded kayi te Nekebpuru ne Valey te Eleteala rey, ne warà a mekesurang dut te datù ne egkamal keytew riyà te inged ne Ruma."

⁹ Ugaid ne si Pistu ne kiyug din ne ebmeupiya ke hinawa dut te menge Hudiyanan kandin ne mid-insaan din si Pablo te, "Engkey, egkesuat ke ve ne ebpendiyà te inged ne Hirusalim su riyà ku sikuna egkukuma?"

¹⁰ Ne migkahi si Pablo te, "Ini ad guntaani su egkukumen a te kukuman te datù tew riyà te Ruma ne iyan ini edait ne egkukum kediey. Ne netuenan nu te warà meraat ne mid-ulaula ku te menge Hudiyanan. ¹¹ Embiya midsurang a te penduan dey wey ruen mid-ulaula ku ne edait ne id-imetayi kedì ne belehad en ke ed-imetayan a. Ugaid ne embiya ini se in-isuhat dan mekeatag kediey ne kenà benar, ne warà etew ne ruen kewagib din te ebpalad kediey te ebpeimetayan a. Iyan ku igkesuati ne iyan egkukum kediey ne ke ratù tew ne egkamal keytew diyà te inged ne Ruma."

¹² Ketà ne mibpekibityara si Pistu dut te rumा ne menge egkeunutan ne edserihan din te inged ne migkahi te, "Ini te iyan nu igkesuati ne egkukum keykew ke Ratù tew riyà te Ruma, ne riyà ka ibpeewit te kandin."

Impeetuvang si Pablo diyà te ki Datù Egeripa wey ke Esawa rin ne si Bernisi

¹³ Nekebpipira ne hewii ketà ne nekeuma si Datù Egeripa wey ke esawa rin ne si Bernisi kayi te inged ne Sisariya su edtelavuk ki Gubinedur Pistu. ¹⁴ Guna su nekebpipira ne hewii ketà ne impesabut ni Pistu ki Egeripa ke kukuman mekeatag ki Pablo ne egkahi te, "Ruen senge etew kayi ne bilanggù te iyan pà gubinedur ne si Felix. ¹⁵ Ne ketà te mibpendiyà a te inged ne Hirusalim ne ruen id-isuhat mekeatag kandin dut te menge Hudiyanan ne menge mepurù te terebpelengesa wey menge pekilukesen ne mibuyù dan te egkukumen ku sikandin te ed-imetayan. ¹⁶ Ne migkahi ku kandan te sikami ne menge Rumanu ne kenà egkepakey ne ibpalad dey arà se etew ne mid-isuhat ke embiya warà pà mekeetuvang sikandin dut te mid-isuhat kandin ne idtindeg te kewagib din kandan. ¹⁷ Tembù be kinepengkayi ran langun te inged ne Sisariya ne ketà te neketundug ne hewii ne mibpinuu a diyà te egkukuman ne insuhù ku te ibpeetuvang ke bilanggù kayi te kediey. ¹⁸ Ketà ne mid-itindeg arà se menge mid-isuhat kandin. Ne kunaan ku ke iyan id-isuhat kandin ne meraat ne mid-ulaula rin, ugaid ne kenà. ¹⁹ Su iyan dà id-isuhat ne mekeatag te tuluuwen din wey mekeatag te senge etew ne minatey ne ed-ingaranan ki Hisus, ugaid ne migkahi ni Pablo te nevanew en. ²⁰ Ne guna su warà ku metueni ke engkey se kukuman ku ketà, ne mid-insaan ku si Pablo embiya egkesuat ne ebpendiyà te inged ne Hirusalim su riyà sikandin egkukuma. ²¹ Ugaid ne iyan din igkesuat ne ebilengguan pà sikandin kayi taman te iyan edsumeriyà kandin ke Datù tew diyà te inged ne Ruma ne ke Datu se ed-imasad te kukuman din. Tembù be mibpeventayan ku pà sikandin

taman te kenà ku igkepeewit sikandin diyà te Datù.” ²² Ne migkahi si Egeripa ki Pistu te, “Kiyug ku ne egkerineg ku rema ke engkey se idtindeg din ne kewagib.”

“Keremà,” ke si Pistu, “ne ibpetawag ta sikandin.”

²³ Ne dut te neketundug ne hewii ne nekeuma si Datù Egeripa wey ke esawa rin ne si Bernisi se mibevelegkas te belegkas te menge ratù su apey egkekita se mepurù dan. Ne midlusud dan dutun te egkukuman se edumaan te menge kepitan wey ke menge egkeunutan te inged dan. Ne impetawag ni Pistu te ibpelusud si Pablo. ²⁴ Ne ketà te midlusud en si Pablo ne migkahi si Pistu te, “Datù Egeripa wey ke langun niyu ne nevurun kayi, egkekita niyu ini se etew ne mid-isuhat dut te menge Hudiyanan kayi te inged ne Sisariya wey diyà te inged ne Hirusalim. Ne mibpememensag dan te ebuyù te ebpeimetayan ku ini se etew. ²⁵ Ugaid ne mibpenginsaan ku ne warà netuen ku ne dait ne ibpeimetayi kandin. Ne geina te kiyug din ne iyan ebpenginsà kandin ke Datù tew diyà te inged ne Ruman, ne midtuhut a ne ibpeewit ku sikandin diyà. ²⁶ Ugaid ne ketà te warà netuen ku ne salà din ne igkesurat ku diyà te Datù tew, tembù be impeetuvang ku kayi su apey niyu egkerineg lavi en te sikuna Datù Egeripa su apey ruen igkesurat ku ke embiya ebpenginsaan nu en sikandin. ²⁷ Su kayi te kedi,” ke si Pistu, “ne kenà dait ne ebpeewit te bilanggù diyà te datù embiya kenà egketuenan ke engkey se salà din.”

26

Mid-itindeg si Pablo te Kewagib din diyà te Etuvangan ni Datù Egeripa

¹ Ne migkahi si Egeripa riyà te ki Pablo te, “Egkepakey en ne ibpesabut nu kenami ke engkey se idtindeg nu ne kewagib te in-isuhat dan keykew.” Ne migkayew si Pablo te belad din su edlalag en ne midrudsuan din te ed-lalag ne ed-itindeg te kewagib din se egkahi te,

² “Datù Egeripa, ingkehalew ku nevenar te ini kew en su apey nu egkerineg ke ked-itindeg ku te kewagib dut te langun ne in-isuhat te menge Hudiyanan kediey. ³ Su sikuna ne ruen nesebutan nu mekeatag te betasan dey te menge Hudiyanan wey ebiraan dut te tuluuwen dey. Tembù be kelimua ne tigker ka te ebpemineg kayi te egkehiyen ku.

⁴ “Langun ne menge Hudiyanan ne netuenan dan ke engkey se midulaula ku igenat te batà e pà taman guntaani su riyan a midekelà abpeg kandan diyà te inged ku wey riyà dema te inged ne Hirusalim. ⁵ Neuhet en ne netuenan dan ke ed-ul-ulaan ku, ne embiya perem ebenaren dan dà ne ini se ed-ul-ulaan ku ke ed-ul-ulaan te menge Paresiyu. Ne embiya Paresiyu ne meilut nevenar se kedadumana ran te ralan te kebpengarap dey te Eleteala. ⁶ Ne guntaani,” ke si Pablo, “ne ini ad te etuvangan niyu su mid-isuhat a niyu sabap dut te ebperetiyyaya a te egketuman keuremà arà se impasad te Eleteala dengan te menge keep-epuan dey. ⁷ Ne ini se impasad kandan ne iyan ebpenerengen dut te sepulù wey deruwa ne bansa te sikami ne menge Hudiyanan, tembù merukilem meandew ne ebpengarap dan te Eleteala. Ugaid ne sabap dut te ini se ebpenerengen ku, ke keupiya nu ne Ratù Egeripa, ne mibaluy te menge ruma ku ne Hudiyanan ne in-isuhat dan kediey. ⁸ Ne sikiyu ne menge ruma ku ne Hudiyanan, meambe ke kenà kew ebpekeperetiyyaya te ebenawen te Eleteala ke menge minatey?

9 “Ne siaken dengan,” ke si Pablo, “ne kunaan ku ke iyan ibpehelevek kediey te Eleteala ne kebpegelep te ebpekesakit dut te menge etew ne mibperetiyaya ki Hisus ne riyà ebuun te inged ne Nesarit. ¹⁰ Su ini se mid-ulaula ku riyà te inged ne Hirusalim ketà te mibuyù a te surat diyà te menge mepurù te terebpelengesa su apey a mekesigkem wey ebpekebilanggù te menge etew ne mibperetiyaya ki Hisus. Ne ketà te kukuman dan te ed-imetayan ne mid-ayun a. ¹¹ Warà teditab te mid-ulaula ku te pekesekitan ku sikandan diyà te menge baley ne ebpengedian te menge Hudiyanan te penduan dan su apey ran meengkeri te kebperetiyaya ran ki Hisus. Ne neepes a nevenar kandan su midtelukunan ku pà diyà te meriyù ne menge inged su embiya ruen egkeumaan ku ne mibperetiyaya ki Hisus ne ebpekesekitan ku.

¹² “Tembù be,” ke si Pablo, “mibpendiyan a te egkuwa te surat dut te menge mepurù te menge terebpelengesa diyà te inged ne Hirusalim su apey ebpengidian a te inged ne Demasku ne ebpekesigkem a te menge mibperetiyaya ki Hisus diyà. ¹³ Na gewii te riyau e pà te ralan te meudtu, ke keupiya nu ne Datù Egeripa,” ke si Pablo, “ne netekew te ruen mermerayag ne riyà ebuun te langit ne neketayew kedi wey ke menge ruma ku. ¹⁴ Ne ketà ne nepiley key langun ne ruen suwara ne nerineg ku ne edlalag te kinehiyan ne Hibruhanen ne egkahi te, ‘Ey, Saulo, Saulo, meambe ke ebpekesekitan a niyu? Su ini se mid-ulaula nu ne ed-atu kediey, ne sikuna red se egkesekitan.’

¹⁵ “Engkey ka etawa, Kerenan?” ke siaken.

“Si Hisus a,’ ke se suwara, ‘ne ebpekesekitan nu. ¹⁶ Na, enew ka su iyan ku kinepekita kenikew su ebpeheleveken ku sikew kediey ne apey nu ebpekepesabut ke menge etew mekeatag dut te impekita ku keykew guntaani wey ruma pà ne ibpekita ku keykew keuremà. ¹⁷ Ne ibpependiyà ku sikew te menge Hudiyanan wey kenà menge Hudiyanan, ugaid ne ebentayan ku sikew dut te kebpekesakit dan keykew. ¹⁸ Su sikandan ne arà se ed-ul-ulaan dan ne kenà meupiya ne iring te riyà dan te kerusireman. Ugaid ne pendiyà ka su ibpesabut nu kandan mekeatag kedi su apey ran mekehimerat ne ebpekeengked dan dut te meraat ne ed-ul-ulaan dan ne ebpekearat dan diyà te kerayahan, uya su ebpekeawà dan dut te kegkeuripen kandan te datù te pekaid ne ebpesakup dan en te Eleteala. Su apey egkepesehad ke menge salà dan sabap dut te kebperetiyaya ran kedi,’ ke si Hisus, ‘ne ebpekeamung dan dut te menge etew ne mibpemili te Eleteala.’

¹⁹ “Tembù be igkahi ku keykew, ke keupiya nu ne Ratù Egeripa,” ke si Pablo, “ne ini se impenudtul ku keykew ke migkahi kedi dut te Kerenan tew ne si Hisus, arà se midumaan ku. ²⁰ Ke neuna ne pinesabut ku ne ke menge etew diyà te inged ne Demasku, ne arà pà ke diyà te inged ne Hirusalim, dutun ne mibpesabut a riyà te langun ne menge inged ne lusud te Hudiyana wey abpeg ke menge etew ne kenà Hudiyanan. Mibpesabut ku sikandan te iyan iya se engkeri ran ke meraat ne ed-ul-ulaan dan wey ibehey ran ke hinawa ran diyà te Eleteala. Ne impesabut ku kandan te kayi te ini se ed-ul-ulaan dan ne egkekita embiya benar etawa kenà arà se kebperetiyaya ran. ²¹ Tembù be nesigkem a rut te menge Hudiyanan diyà te Nekebpuru ne Valey te Eleteala ne riyà te Hirusalim ne ed-imetayan e ran perem. ²² Ugaid ne egenat dut te hewii te kebpsabut ku mekeatag ki Hisus

taman guntaani ne ke Eleteala se midtavang kedi. Ne sikandin ded se ibpesabut ku kenyi te menge mepuru mevavà ne menge etew ne nevurun kayi. Ne ini se ibpesabut ku ne iyan ded impekahi ki Moises wey ke ruma ne menge etew ne ebpelambas te Lalag te Eleteala rengan ne egked-ulaula.²³ Su migkahi ran te ini se Impasad te Eleteala ne Ebperetuen te langun ne edredsayen wey ed-imetayan, ugaid ne egkevanew red sikandin su apey sikandin se egkeuna te egkevanew rut te menge minatey. Ne ibpesabut din diyà te menge Hudiyanan wey kenà menge Hudiyanan te sikandin ke ralan te kebpekeliyu ran dut te kedusa te Eleteala kandan.”

²⁴ Guna su nekahie en ni Pablo ini, ne midserambag si Pistu se egkahi te, “Egkevuneg ka, Pablo! Su langun dut te mibpengedian nu se igkebung nu!”

²⁵ “Kenà a egkevuneg, ke keupiya nu ne Gubinedur Pistu,” ke si Pablo, “su ini se migkahi ku ne benar. ²⁶ Iyan ku kenà kegkeandek te ebpenudtl keykew ini, Datù Egeripa, su netuenan ku te netuenan nu en ini. Netuenan nu su ini ne nenged-ulaula ne warà mekeelles iya. ²⁷ Ne sikew, Datù Egeripa, engkey ebperetiyaya ka te penurù dut te impesurat te menge ebpelambas te Lalag te Eleteala rengan? Netuenan ku te mibperetiyaya ka.”

²⁸ “Kalu ke iyan nu egkepegitung,” ke si Datù Egeripa, “ne mehaan a ebpekeruma te kebperetiyaya ki Hisus.”

²⁹ “Meuhet mehaan,” ke si Pablo, “ne iyan ku ibpengeningeni te Eleteala te kenà sikuna rà, Datù Egeripa, ugaid ne langun niyu ne ebpmineg kediey guntaani ne egkevaluy ne ebperetiyaya ki Hisus iring kediey, ugaid ne kenà kew mulà ebilengguan.”

³⁰ Nekeipus si Pablo se edlalag ne si Bernisi wey ke menge ruma ran, ³¹ ne midlihawang dan se ebpelelahey te, “Ini ne etew ne warà mid-ulaula rin ne dait ne ed-imetayan etaawa ebilengguan.”

³² Ne migkehiyan ni Egeripa si Pistu te, “Embiya warà din buyua te iyan egkukum kandin ke Datù tew diyà te inged ne Ruma ne egkepakey ne ebpekeliyu en sikandin dut te bilengguan.”

27

Mid-untud si Pablo te Kapal se Ebpendiyà te Inged ne Ruma

¹ Guna su neupakat dan te ibpeuntud key en te kapal te ebpependiyà te inged ne Ruma lusud te Italiya, ne impalad dan en si Pablo wey ke ruma rin ne bilanggù diyà te ki Julio ne senge etew ne kepitan dut te menge sundaru ne ed-ingaranan te “Kumpeniyà te Datù te Ruma.” ² Ne mid-untud key te kapal egenat te inged ne Edremitiyu se ebpevayà te menge inged ne kilid te rahat te pruvinsiya ne Asiya ne ketà ne migenat key en. Ne ruen ruma rey ne ed-ingaranan ki Eristarku ne riyà ebpuun te inged ne Tisulenika lusud te Mesidunya.

³ Ne ke neketundug ne hewii ketà ne nekerunggù key diyà te inged ne Sidun, ne si Julio ini ne midtulengeran din si Pablo su intuhut din te ebpekepemenaug ne ebpekepenumbaley sikandin diyà te menge etew ne nekilala rin su apey ran mevehayi te piya engkey se kurang din.

⁴ Ketà ne midlevundus key en ne geina te ebpekesurang key dut te mevandes ne keramag ne kayi key mibpevayà te divaluy dut te punul ne Sipri su egkeelangan ke keramag. ⁵ Ne nekerapas key dut te rahat ne

uvey te menge pruvinsiya ne Selisiya wey Pampiliya, ne nekerunggù key diyà te inged ne Mira lusud te Lisiya.⁶ Dutun ne ruen kapal ne riyà ebpuu te inged ne Elihendriya ne nekita rut te kepitan ne mehaan en ependiyà te inged ne Italiya ne impeuntud key rin ketà.

⁷ Migenat key en ugaid ne geina te ebpekesurang key te keramag ne menaney utew ke kapal te nekebpipira en ne hewii rutun, ne merehen se kebekerunggù dey diyà uvey te inged ne Nidu. Ne geina te kenà ebpekelaus ke kapal su egkesurang dut te mevandes ne keramag, ne riyà key mebayà te divaluy te punul ne Krita ne egkeelangan te keramag ne midsehad key te migarang ne tuhar te punul ne ed-ingaranan te Salmun.⁸ Ne mibpehungkilid key en dut te beyvey te rahat ne nerehenan key te kebpevaya dey, ugaid netaman ne nekerunggù key diyà dapit ne ed-ingaranan te Mepmeupiya ne Edungguan uvey te inged ne Lasiya.

⁹ Geina te neuhet key dut te ibpevaya dey ne midsahad en ke hewii te menge Hudiyanan te edlimpas te egkaan ne mekeandek en ne idlaus su netuenan en te arà ne hewii ne ebpekeuma se keramag. Tembù mibaag ni Pablo sikandan se egkahi te,¹⁰ “Menge rumu ku, ruen egkedulaula tew ne mekeandek ke edlaus kiyu su egkereetan ini se kapal, ne egkelened ini se induran, ne sikitew ne ruen egkelened.”¹¹ Ugaid ne ini se kepitan te menge sundaru ne warà din pemineha ke imbaag ni Pablo su midsarig sikandin te lalag dut te kepitan te kapal wey ke lalag dut te tehikemuney.¹² Ne ke dungguan dutun ne kenà meupiya ne edtehuan te kapal embiya ke hewii te bagyu, tembù be ke kerekelan ne egkiyug ne edlaus su apey key mekeuma riyà te inged ne Pinisi diyà te punul ne Krita embiya egkepakey. Su meupiya ne edungguan arà taman te edsahad ke hewii te bagyu su egkeelangan ke keramag.

Nesuhat te bagyu ini se Kapal ne Mid-unturan eni Pablo

¹³ Ketà ne midrudsuen medsamber ke menayù ne keramag egenat te ebelevahan ne kunaan dan ke iyan edtuman ke netahù te itungan dan te edlaus dan en. Tembù be mibigkat dan ke mid-ulug dan ne perivatu dut te kapal, ne migenat key en, ne mibpevaya key diyà te beyvey te punul ne Krita.¹⁴ Warà meuhet ketà ne midsamber te mevandes ne keramag ne riyà dapit te punul.¹⁵ Ne nesuhat ke kapal ne kenà dey en igkepeiseg ke kapal su neveriyung en, ne mibelehad dey en ke endei ed-ewita ini se kapal dut te keramag.¹⁶ Ne mibpevaya key diyà te divaluy te reisek ne punul ne Kewda ne neelangan ke keramag. Ne misan ingkereheni rey ne netehel dey te editnes ini se avang ne eguyuren dut te kapal ne mid-unturan dey.¹⁷ Guna su netines en ke avang, ne mibagkes dan te rekèla ne tali dutun te kapal su apey kenà mewahay dut te keramag. Ne neandek dan embiya egkeewit ini se kapal te keramag ne ebpekehandrad diyà te kevevawen te wayig uvey te beyvey te inged ne Libya, tembù be in-awà dan ke puleyehan dut te kapal su misan menaney se ibpevaya din ne kenà egkeewit ini se kapal te keramag ne ebpekehandrad.¹⁸ Ne bagyu pà lavew dut te neketundug ne hewii, ketà ne midrudsù dan te ebpenimbag dut te induran te kapal su apey meegkapi ne kenà melened.¹⁹ Ne ketà te neketundug ne hewii ne ruen mevehat ne menge adir dut te kapal ne impenimbag dan en dema.²⁰ Ne nekebpipira ne hewii ne warà dey

mekita ke andew wey menge bituen su warà pà lavew med-engked ke bagyu, netaman ne warà en kayi te itungan dey se egkeuyag key pà.

²¹ Su nekebpipira en ne hewii ne warà mekekaan ke menge etew ne migkahi si Pablo kandan te, “Menge ruma ku, embiya perem mibpemineg kew dut te imbaag ku keniyu te kenà kiyu ed-awà diyà te punul ne Krita, ne kenà tew imbe egkeseharan ini se ned-ulaula tew wey warà tew impenimbag arà se induran. ²² Ugaid ne ebuyuen ku keniyu guntaani ne kena melagew te hinawa niyu su warà misan seveka kenitew ne egkepatey su ini rà se kapal se egkereetan. ²³ Su geina te merukilem ne ini se Eleteala ne kemuney kediey ne iyan ku ebpengerapen, ne mibpekitakita kedi ke suluhuen din ²⁴ ne migkahi te, ‘Ey Pablo, kenà ka meandek su ebpekeuma ka diyà te Datù te inged ne Ruma. Ne misan ke menge ruma nu kayi te kapal ne warà seveka kandan ne egkepatey su atag dut te limù te Eleteala kenitew.’ ²⁵ Ini se migkahi rut te suluhuen,” ke si Pablo, “ne dutun ne kenà kew meuru su ebperetiyaya a te Eleteala te edtumanen din arà se migkahi rin kediey. ²⁶ Iyan dà egked-ulaula ne ebpekehandrad kiyu diyà te punul.”

²⁷ Ne ketà ne ikesepulù en wey epat ne kerukileman te kedewita kenami te bagyu ne diyà key pà te rahat ne ed-ingaranan te Miditeranyu. Guna su metaneb en se kerukileman, ne nepegitung dut te menge etew ne migelevek kayi te kapal te kalu ke nekeuvey ran en te kelupaan. ²⁸ Ketà ne in-ulug dan te tali ne ruen perivatu ne iniket su edtegkaran dan ke keralem dut te wayig ne netuenan dan se deruwa rà nepulù ne repa se keralem din. Ne nekeiseg dan dutun ne midtegkad dan maa ne netuenan dan se sepulù dà wey lelima ne repa se keralem din. ²⁹ Ne neandek dan su kalu ke ebpekehandrad ini se kapal te menge batu, tembù be in-iket dan ke epat ne menge perivatu diyà te ulinan te kapal su apey kenà ebpekeiseg, ne mibpengeningeni ran te egkepawà en perem. ³⁰ Ne nepegitung dut te menge etew ne migelevek kayi te kapal se ed-awà dan perem su ebpmelahuy ran. Ketà ne impenaug dan arà se avang su apey kun uvag egkeperiwetuwi ke dulung te kapal. ³¹ Ugaid ne migkahi si Pablo diyà dut te kepitan wey menge sundaru rin te, “Embiya ed-awà kayi te kapal ini se menge etew ne egelevek ne kenà kew ebpekehaun.” ³² Ne ketà ne mibidtew dut te sundaru arà se tali ne in-iket dut te avang ne neulug diyà te rahat.

³³ Guna su egkepkepawà en ne mibuyù si Pablo te langun dan ne egkaan. “Nekedsepulù en wey epat ne hewii,” ke si Pablo, “ne midtigker kew te kegkeandek niyu ne warà kew mekekaan te misan engkey rà. ³⁴ Tembù be ebuyuen ku keniyu te kaan kew su apey kew ebmeveherbeher. Su kenà kew egkekeiran.” ³⁵ Ne ketà te nekahni ni Pablo arà ne migkuwa te pan ne mibpeselementan din te Eleteala ne mibpenevitèvi din ne migkaan din. ³⁶ Ne dutun ne mibmeupiya se hinawa ran, ne langun dan ne migkaan. ³⁷ Ne sikami ne deruwa nehatus wey pitu nepulù wey enim dutun te kapal. ³⁸ Guna su nengevulung key en, ne impenimbag dan ke induran ne trigu su apey meegkapi arà se kapal.

Nereetan en ke Kapal ne Mid-unturan eni Pablo

³⁹ Guna su nepawà en ne warà mekilala dut te menge etew ne egelevek kayi te kapal ke engkey ne punul arà se uvey rey, ugaid ne

nekita ran arà se nekesuluk ne rahat ne ruen ketà beyvey ne pantad. Ne nepegitung dan te ibperunggù ketà ke kapal embiya egkepakey.⁴⁰ Ketà ne mibidtew ran ke tali ne in-iket dut te menge perivatu su apey metehak, ne mibpengkar dan ke tali dut te menge pura ne ebpetidtu dut te kapal. Ne ibpeitindeg dan maa ke puleyahan diyà te rulung su apey egkeewit dut te keramag ini se kapal diyà te beyvey.⁴¹ Nekeuma ini se kapal diyà te mevavew ne wayig ne nekehandidrad en dutun. Su ke rulung dut te kapal se nekehandidrad ne kenà en egkewaleng, ugaid ne ke ulinan din ne egkerumpak dut te derekelà ne menge baleg ne egkehuvar en.

⁴² Netahù te itungan dut te menge sundaru te ebpeimetayan dan ke menge bilanggù su apey ran kenà ebpekepemaras diyà te beyvey se ebpelahuy.⁴³ Ugaid ne ke kepitan te menge sundaru, ne warà din ituhut te ed-imetayan si Pablo, ne midawey rin sikandan. Ne ketà ne insuhù din dut te langun ne metau ne ebpmemaras te edlumbuk en diyà te wayig ne ebpmemaras diyà te beyvey.⁴⁴ Ne sikandan ke kenà metau ne ebpmemaras ne migkahi rin kandan te egkuwa ran te papan etawa nenetamped ne pengawid dut te kapal ne egentungan dan te edunggù. Ini se mid-ulaula rey ne langun dey ne nekerunggù, ne warà nekeiran.

28

Si Pablo ne Riyà te Punul ne Melita

¹ Guna su nekehaun key en diyà te beyvey ne nerineg dey te ini se punul ne ed-ingaranan te Melita. ² Ne ke menge etew ketà ne midtelimà dan kenami te meupiya ne midtetavun dan su ed-uran ne meadsil. ³ Mibpengayu si Pablo te menge rasang ne guna su intavun din diyà te apuy ne ruen mevisa ne uled ne neinitan dut te apuy ne migemew ne mibedbed kayi te belad ni Pablo ne migkahat. ⁴ Guna su nekita rut te menge etew ne ed-ubpà ketà arà se uled ne mibitinbitin diyà te belad ni Pablo ne mibpelelahey ran se egkahi te, “Terevunù bes buwa ini, su misan nekehaun sikandin dut te rahat ne kayi red se Bagì din se ebpatey.” ⁵ Ugaid ne impirik ni Pablo ke uled diyà te apuy ne warà mekeiri sikandin. ⁶ Ne kunaan dan ke edlevag ini se belad ni Pablo wey egkepiley su ebpatey en. Ugaid ne neiseg-iseg ne warà ned-ulaula rin, ne nesalin ke itungan dan se egkahi te, “Diwata bes ini.”

⁷ Diyà te uvey ne ruen menge pengengewiran ni Publiyu ne iyan egkeunutan dutun te punul. Ne impepenayik key rin diyà te baley rin su midtuganur key rin te meupiya, ne rutun key med-ubpà lusud te tetelu ne hewii. ⁸ Ne gewii te dutun key ne ed-id-irehà ini se amey ni Publiyu su edetengen wey ebpengindes. Midlusud si Pablo diyà te sungkù dut te ederaru ne guna su mibpengeningeni ne midampen din te belad din ne neulian en. ⁹ Guna su nerineg ini dut te menge etew ne ed-ubpà ketà, ne mid-ewit dan ke langun ne ederaru ne nengeulian. ¹⁰ Ne merakel se menge penggalew ran kenami, ne ketà te hewii ne ked-awà dey diyà te kandan ne ruen induran dan diyà te kapal ke misan engkey ne kurang dey te kedlayag.

Ke Ipanewan ni Pablo Egenat te Punul ne Melita Taman te Inged ne Ruma.

¹¹ Ugaid ne tetelu en ne vulan taman te kebpekelayag dey ne miduntud key te kapal ne riyà ebpun te inged ne Elihandriya ne edingaranan te “Ke Seping ne Diwata,” ne migenat key en. Ini se kapal, ne midunggù ketà te punul ne Melita taman te neipus ke hewii te bagyu. ¹² Mid-awet key diyà te inged ne Sirekusa ne nekedtetelu key ne hewii rutun. ¹³ Ne midlaus key en maa ne nekeuma key riyà te inged ne Rihiyu. Dut te neketundug ne hewii ne ruen keramag ne ebpun te ebelevahen ne nekeewit dut te kapal dey ne nekederuwa ne hewii ne nekerunggù key diyà te inged ne Putiyuli. ¹⁴ Dutun ne ruen neumaan dey ne menge etew ne mibperetiyyaya ki Hisus ne mibpeubpà kenami diyà te kandan te lusud te senge pedian. Ketà ne mid-ipanew rey se ebpendiyà te inged ne Ruma. ¹⁵ Guna su nerineg dut te menge mibperetiyyaya ki Hisus diyà te Ruma te ebpekeuma key en, ne mid-ipanew ran taman te inged ne ed-ingeranan te Pedian ne Apiyu wey inged ne ed-ingeranan te Tetelu ne Valev ne Edlevungan su edtelavuk kenami. Guna su nekita ran ni Pablo, ne mibpeselamat sikandin te Eleteala su mibmeupiya se hinawa rin te eduma kandan diyà te inged ne Ruma.

Diyan en si Pablo te Inged ne Ruma

¹⁶ Guna su nekeuma key diyà te inged ne Ruma ne warà ipelusud si Pablo diyà te bilengguan su midtuhutan sikandin te ruen kandin ne ed-ubpaan, ugaid ne ruen senge etew ne sundaru ne ebanter kandin.

¹⁷ Guna su nekedtetelu en ne hewii ne midtawag ni Pablo ke menge egkeunutan te menge Hudiyaren. Guna su nevurun dan en ne migkahi si Pablo te, “Menge suled ku ne Hudiyaren, warà meraat ne mid-ulaula ku diyà te menge suled tew ne Hudiyaren, ne warà a mekesurang dut te menge betasan tew ne intahak dut te menge keep-epuan tew. Ugaid ne misan iring ketà te warà meraat ne mid-ulaula ku diyà te kandan, ne nesikem a rut te menge Hudiyaren te Hirusalim ne impevilanggù a ne impalad a ran diyà te menge egkeunutan te Rumanu. ¹⁸ Ne mibpeinsaan a te menge egkeunutan ne Rumanu ne ibpeliyu e ran perem su netuenan dan te warà mid-ulaula ku ne dait neid-imetayi kediey. ¹⁹ Ugaid ne arà se menge ruma tew ne Hudiyaren ne kenà dan egkiyug te ibpeliyu a. Ne geina te warè en ebpeketa vang kedì, ne mibuyù a te iyan egkukum kediey ne ke Datù kayi te Ruma misan warà igkesumbung ku kandan te menge ruma ku ne menge Hudiyaren.” ²⁰ Tembù be midtawag a keniyu su ebpekibitiyyara a keniyu. Ne ini se ingkevakù ku te sengkali ne mekeatag dut te kebperetiyyaya ku te sikandin se ebpenerengen dut te sikami ne menge Hudiyaren.

²¹ Ne midtavak dan si Pablo te, “Warà surat mekeatag keykew ne netelimà dey ne ebpun te pruvinsiya ne Hudiyu. Ne warà dema nekeuma ne ruma rey ne Hudiyaren ne nekeewit te tudtul kayi mekeatag keykew etawa mibpenudtul te ruen mid-ulaula nu ne meraat. ²² Ugaid ne egkesuatan dey te ebpemineg ke penurù te kebperetiyyaya nu, su netuenan dey te ini se penurù ne mibpesekupan nu ne egkunteraan te menge etew te piya endei en.”

²³ Ketà ne mibpasad dan te hewii te eburun dan diyà te ki Pablo. Guna su neumaen ke hewii, ne merakel se nevurun dutun te ed-ubpaan ni Pablo. Ne igenat te meselem taman te merukilem ne impenurù ni Pablo wey impesabut din kandan mekeatag dut te Edetuan te Eleteala

te menge etew. Su kiyug din perem ne ebpekeperetiyaya ran te si Hisus ke edtuman dut te impesurat ni Moises mekeatag te Penduan wey arà se impesurat dut te menge ebpelambas te Lalag te Eleteala rengan.

²⁴Ruen duma ne mibperetiyaya dut te impesabut din, ne ruen duma ne warà mibperetiyaya. ²⁵Ketà ne mibpesusuweyey ran su warà mekedayun ke itungan dan. Ugaid ne te warà den pà med-awà ne migkahi maa si Pablo te, “Benar iya ke migkahi rut te Kedesenan ne Ebpetuntul te Menusiyà ne impesurat dut te senge etew ne ebpelambas te Lalag te Eleteala rengan ne si Isayas. ²⁶Su impekahi sikandin te,

‘Beyai nu arà se menge etew

ne kehiyi nu sikandan te,

Lelayun kew ebpemineg,

Ugaid ne iring te warà niyu merineg

su kenà niyu egkesebutan.

Ne lelayun kew edtengteng,

ugaid ne kenà kew ebpekekita.

²⁷Su ini ne menge etew

ne meresen se ulu ran,

ne timbang te midsabpeng dan ke telinga ran,

ne midlipereng dan ke mata ran.

Su embiya kenà, ne ebpekekita ran,

ne ebpekerineg dan,

ne ebpekesabut dan,

ne ke hinawa ran ne edlived kayi te kediey

ne ibpekepeliyu ku sikandan dut te salà dan.’ ”

²⁸ Ne migkahi rema si Pablo te, “Geina te ini se ed-ul-ulaan niyu, ne ibpesabut ku en keniyu te ini se Lalag te Eleteala ne mekeatag te kebpeliyu te Eleteala rut te menusiyà ne insuhù din te ibpesabut en diyà te menge etew ne kenà Hudiyanan, ne ebpemineg dan mulà.” [

²⁹Guna su nekahи ni Pablo ini, ne mid-awà ke menge Hudiyanan se tidtu ne kebpekedlewanà dan.]

³⁰ Ne nekederuwa ne rahun dutun ne mid-uprà si Pablo diyà te baley ne midsukayan din ne impepenayik din ke langun ne ebpenumbaley riya te kandin. ³¹ Ne impesabut din kandan mekeatag dut te Edetuan te Eleteala ne menge etew wey mekeatag dut te Kerenan tew ne si Hisu Kristu. Ne kenà din idsanggel te ebpenurù dut te menge etew wey warà midawey kandin te ebpenurù.

Ke Surat ni Pablo Riyà te Menge Etew te Inged ne Ruma

¹ Siaken ini se edsurat keniyu ne si Pablo, ne sugsuhuen ni Hisu Kristu. Ne nepemilì a te Eleteala ne kedserihan din ne insuhù din kediey te ibpesabut ku ke Meupiya ne Tudtul ne riyà ebpuun te kandin. ² Ne ini se Meupiya ne Tudtul ke impasad te Eleteala rengan. Ne impesabut din dut te menge etew ne ebpelembas te lalag din te ibpesurat din dut te Berekat ne Riberù ne mibpesuratan kandan. ³ Ini se impesurat din ne mekeatag dut te Anak din ne si Hisu Kristu ke Kerenan tew. Ne si Hisus ini ne nevaluy ne etew ne in-anak sikandin dut te kevuwaran ni Dabid. ⁴ Ne netuenan ta te si Hisu Kristu ne lunsey ne Eleteala, su impekita en te Anak sikandin ketà te mibanew te Eleteala sikandin. ⁵ Ibpepevayà ki Hisu Kristu ne midtevangan a te Eleteala te nevaluy a ne kedserihan ni Hisus te ebpesabut mekeatag kandin diyà te langun ne menge etew. Su egkiyuhan din te langun ne menge etew ne ebpekeperetiyyaya ki Hisus ne eduma kandin. Ne kayi te keduma ran kandin ne sikandin se edeyuen diyà te kandan. ⁶ Ne sikiyu rema diyà te inged ne Ruma ne in-amung kew red dut te mibpemilì te Eleteala ne egkevaluy ne menge sakup ni Hisu Kristu. ⁷ Tembù be edsuratan ku sikiyu langun diyà te inged ne Ruma ne ingkelimù te Eleteala ne mibpemilì din ne kandin ne menge etew.

Kiyug ku ne egkepenaub kew te Eleteala ke Amey tew wey si Hisu Kristu ke Kerenan tew, ne ebmelineuw se hinawa niyu.

Ke Kebpeselamat wey Kebpengeningeni ni Pablo

⁸ Iyan ku id-una te egkahi keniyu ne ebpeselematan ku te Eleteala su atag dut te langun niyu ne mibperetiyyaya. Su misan diyà te meriyù ne menge inged ne nerineg dan mekeatag te kebperetiyyaya niyu kandin. Ne ini se kebpselamat ku ne ibpepevayà ki Hisu Kristu ne Anak din. ⁹ Su netuenan te Eleteala ne benar ini se egkehiyen ku te uman a ebpengeningeni ne idragkes ku sikiyu. Ne ini ke Eleteala ne id-amin ku ke hinawa ku te egelevek kandin te kebpemesabut ku rut te Meupiya ne Tudtul mekeatag te Anak din. ¹⁰ Layun ku rà ibpengeningei te Eleteala te embiya idtuhut din ne menu ke mekepenumbaley a riyà te keniyu. ¹¹ Su rekelà te hinawa ku se kebpenumbaley ku riyà te keniyu su apey ruen dalan te kebpekepenurù ku keniyu rut te impenurù kediey te Kedesenan ne Ebpetuntul te Menusiyà su apey ed-ilut pà se kebperetiyyaya niyu te Eleteala. ¹² Ne iyan ku egkiyuhan ne ke kebperetiyyaya tew ki Hisus ne ebpetebtevangey kiyu. Su embiya egkekita niyu ke sarig ku, ne ke kedsarig niyu rema ne ebmeilut. Ne engketà e red dema ebmeilut ke sarig ku ke egkekita ku ke sarig niyu.

¹³ Menge suled, ebpeketuenan ku keniyu te kenà kepipira ku rà pegitunga te kebpenumbaley ku riyà te keniyu, ugaid ne ruen ma ebpekevangen kediey. Su egkesuatan ku ne ebpmemesabut a riyà te keniyu su apey ruen etew ne ebpekeperetiyyaya ki Hisus iring dut te kinepesabut ku riyà te ruma ne menge inged ne kenà Hudiyanan. ¹⁴ Su iyan ku ebpeiringan ne ruen utang ku rut te langun ne menge etew, ne

ian ku bayad kayi te utang ku ne arà se kebpsabut ku rut te Meupiya ne Tudtul diyà te langun ne edsusunan te menge etew ne sumabut etawa kenà, misan ke ruen netuenan din etawa warà.¹⁵ Tembù be rekelà se kiyug ku te ebpemesabut keniyu rema keniyan te inged ne Ruma rut te Meupiya ne Tudtul mekeatag ki Hisus.

¹⁶ Ne kenà ku en iya igkeyeyai te ebpemenudul arà, su netuenan ku te misan engkey en ne etew ne ebperetiyyaya, egenat te Hudiyanan abpeg ke kenà Hudiyanan, ne ruen gehem te Eleteala te ebpekepeliyu sikandin te kedusa te salà din.¹⁷ Su egenat dut te Meupiya ne Tudtul ne impayag keytew te Eleteala se ralan te kebmetidu tew riyà te etuvangan din embiya ebperetiyyayaan tew si Hisu Kristu. Su warà en duma ne ralan liyu rà kayi te kedsarig tew kandin. Su ruen impesurat ne Lalag te Eleteala ne egkahi te, “Ke etew ne midsarig en te Eleteala ne iyan metidtu riyà te etuvangan din, ne egkevehayan sikandin te umur ne warà edtemanan din.”

Midekelà se salà dut te Langun ne Menge Etew

¹⁸ Su impayag te Eleteala ke kegkeepes din dut te langun ne menge etew ne mid-ulaula te meraat wey mid-engkenà kandin. Su kayi te meraat ne ulaula ran ne nepekelangan dan ke ruma ran te kebpekesabut dut te penurù ne benar.¹⁹ Sikandan ne edusaan te Eleteala su embiya egkiyuhan dan te egkesebutan dan mekeatag te Eleteala ne melemu ran ne egketuenan, su ini ne impayag te Eleteala kandan.²⁰ Su igenat te kinelimbaha te Eleteala kayi te dunya, ne misan kenà egkekita ke Eleteala, ne melemu ne egkekita ke keupiya rin wey ke rekelà ne gehem din ne warà ebpekerepeng kayi te egkekita tew ke langun ne nelimbag din. Tembù be warà etew ne ebpekeparew te kenà dan egketuenan te ruen Eleteala.

²¹ Su misan netuenan dan te ruen Eleteala, ugaid ne warà ma adat wey kebpselamat dan te limù din kandan te misan midtevangan dan ded te Eleteala. Nasi pà ne kenà ebpekevehey te ibmeupiya te itungan dan, ne iring te nerusireman ke itungan dan ne kenà dan egkesebutan ke benar ne penurù te Eleteala.²² Iyan dan kunaan ke metampas en se itungan dan, ugaid ne kenà bes su kerupangan dà se neketahù te itungan dan.²³ Su kenà iyan dan ebpengerapan ke tidtu ne Eleteala ne warà kemetayen din, su iyan dan ebpengerapan ne menge ledawan ne mibeelan dà iring te paras te etew ne ruen kemetayen din, wey iring te paras te menge pepenuk, binatang wey uled.

²⁴ Tembù be mibelehad dan en te Eleteala te ed-ulaula ran te kiyug te lawa ran ne meredsik, ne ini se mibeelan dan te kandan ne lawa ne mekeyeyà.²⁵ Mibpehantarù dan dut te benar mekeatag te Eleteala, su iyan dan mibperetiyyaya ne ke tarù. Su iyan dan ebpengerapan wey ed-edatan ne ke bineelan dà te Eleteala; ugaid ne kenà iyan dan mibpengarap ke Midlimbag, su sikandin dà iya se dait ne edeyuen taman te taman. Ne egketuman ini.

²⁶ Su mid-iniyuhan dan ke Eleteala, ne mibelehad en dema rut te Eleteala te ed-ul-ulaan dan ne kandan dà ne kiyug ne meredsik. Su misan ke menge meritan ne kenà en ke esawa ran ke ed-uliren dan, ugaid ne meritan ded se igkeerihi ran.²⁷ Ne engketà ded dema ke menge meama, kenà en ke esawa ran ke ed-uliren dan su meama red se igkeerihi ran. Ne utew en ne mekeyeyà arà se baal dut te lawa ran,

tembù be ke meraat ne egketemanan dut te lawa ran ne dait en dut te ulaula ran.

²⁸ Su warà te hinawa ran ke benar mekeatag te Eleteala, ne ketà mibelehad en te Eleteala sikandan te iyan ebayabayà te itungan dan ne utew meraatey. Tembù be iyan dan ed-ul-ulaan ne meraat. ²⁹ Ne ke itungan dan ne nepenù dut te langun ne meraat, ne lelegawen dan, ne meraat se ulaula ran dut te menge ruma ran. Imaan dan, ne terevunù dan, ne ebpekid-ehet dan, ne tenlimbungen dan, ne iyan dan pegitungan mekeatag te ruma ne etew ne meraat, ne edserupet dan te menge ruma ran, ³⁰ wey metehel dan ne edlivak te ruma ran. Menge kunterà dan te Eleteala, ne kenà dan ed-adat dut te menge ruma ran, ne mepereyù dan wey ebpendatal. Ne layun dan idtahù te itungan ke meraat ne ed-ul-ulaan dan, ne kenà dan ebperumaruma dut te menge lukes dan. ³¹ Warà dan sebuta te misan engkey ne meupiya ne ulaula. Kenà dan edtuman te pasad dan, ne warè en iya kegkelimù dan wey kegkeyru ran dut te ruma ran. ³² Misan netuenan dan ke migkahi te penduan te Eleteala ne ke etew ne ed-ulaula te meraat iring kayi ne dait ne edusaan din taman te taman, ugaid ne ibpeiseg dan ded iya ke ulaula ran. Ne kenà ketà dà taman su igkesuati ran ke menge ruma ran ne ed-iring kandan.

2

Ke Kegkukum te Eleteala

¹ Na sikiyu ne ed-isuhat dut te ruma ne menge etew ne ed-ulaula te meraat iring ketà ne med-uram kew. Warà kevenar niyu te ed-isuhat kandan su kenà egkepakey ne egkahi kew te warà salà niyu. Su embiya ed-isuhat kew kandan, ugaid ne mid-ulaula kew te meraat iring dut te mid-ulaula ran, ne timbang te sikiyu red se nesuhat elin kandan. ² Netuenan ta te kegkukum dut te Eleteala te iring kayi ne menge ulaula ne metidtu. ³ Ugaid ne sikiyu, menge suled, ne ed-ulaula kew red dema te mereatey iring dut te id-isuhat niyu te ruma ne menge etew, tembù be kunaan niyu ke ebpekeliyu kew rut te kedusa te Eleteala keniyu. ⁴ Kalu ke iyan niyu kunaan te geina te metulanged wey mepesehareng ke Eleteala ne warà en kedusai rin keniyu. Su iyan din kebpeketaulanged ne apey kew mekepedsendit.

⁵ Ugaid ne sikiyu, ne warà kew mebpedsendit su meresen se ulu niyu. Tembù be ed-iseg pà se kevahat din te idusa keykew te Eleteala ketà te hewii ne ibpayag din ke kegkeepes din, ne arà ded ne hewii ne egketuenan te kegkukum din ne metidtu. ⁶ Su ruen ibehey te Eleteala dut te langun ne menge etew te endei se edait dut te mid-ulaula ran. ⁷ Ruen menge etew ne iyan dan ebpeisehen ne ke meupiya ne ed-ul-ulaan, su iyan netahù te itungan dan ne egkeuma ke hewii ne ebpeketusud dan en diyà te ed-ubpaan te Eleteala ne kenà igkeupama se keupiya rin. Ne ketà dan egkekita se nekesuhat dan te hinawa te Eleteala, ne riyà dan en ebpekeubpà taman te taman. Su ketà dan en egketelimà ke umur dan ne warà edtemanan din. ⁸ Ugaid ne ruen duma pà ne menge etew ne iyan dà netahù te menge itungan dan ne iyan dan ibpeiseg ne kandan ded ne kiyug, ne warà dan mebperetiyyaya rut te benar mekeatag te Eleteala su iyan dan midtuman te ebperetiyyaya ne ke tarù. Ne ini se menge etew ne kenà

deisek dà se kegkeepes te Eleteala kandan su ke kedusa ne ibehey kandan ne mevehat.⁹ Uya, edusaan wey edresayen ke langun ne menge etew ne ed-ulaula te meraat, ke menge Hudiyanan wey kenà Hudiyanan.¹⁰ Ugaid ne langun te menge etew ne ed-ulaula te meupiya ne ebpekelusud diyà te ed-ubpaan te Eleteala ne kenà igkeupama se keupiya rin. Ne ketà dan egkekita te nekesuhat dan te hinawa te Eleteala ne riyà dan egketelimà ke kebmelintad te hinawa ran, ne elin ke menge Hudiyanan wey kenà Hudiyanan.¹¹ Su ke Eleteala ne warà pinedlabi rin dut te kegkukum din te menge etew.

¹² Ke menge etew ne kenà Hudiyanan ne warà dan mesebuti ke engkey se ibpemandù kayi te penduan ni Moises, ugaid ne embiya nekevaal dan te salà ne egkukumen dan ded lavew te Eleteala te kemetaryen keuremà. Ugaid ke menge Hudiyanan, ne nesebutan dan ini se penduan ni Moises ne embiya ebaal dan te salà ne iyan igkukum te Eleteala kandan ne kayi red te penduan su nesebutan dan mulà ke penduan ne midsurang dan.¹³ Su kenà iyan kegkesebuti te menge etew mekeatag dut te penduan ni Moises ke kebmetidtu ran diyà te etuvangan te Eleteala; ugaid ne kayi te keduma ran dut te nekahи te penduan se kebmetidtu ran.¹⁴ Ke menge etew ne kenà Hudiyanan ne warà dan mesebuti ke penduan ni Moises, ugaid ne ruen hewii ne egkerumaan dan ini se nekahи rut te penduan. Ne ibpetuus ini te misan warà dan mesebuti ke penduan ni Moises ne ruen en ingketitik diyà te atey ran ke ed-ul-ulaan ne meupiya.¹⁵ Su kayi te meupiya ne menge ulaula ran ne egketuusan ta te nekahи te penduan ne neketitik ded diyà te atey ran se ebpenurù kandan. Su netuenan dan te ebpedsusun ke meupiya wey rut te meraat ne ed-ul-ulaan.¹⁶ Ne ruma pà ne kayi egketueni te ini se Meupiya ne Tudtul ne ibpesabut ku, ne ruen hewii keuremà ne iyan ibpekukum te Eleteala dut te langun ne menge etew ne si Hisu Kristu. Su ibpayag din ke langun ne mid-ulaula ran, misan ke impegelesà dan.

*Kenà ke Kegkehudiyanan ta se Ebpekesuhat te Hinawa te Eleteala,
Ugaid ne Keduma Ta te Insuhì Din*

¹⁷ Ne sikiyu rema se menge ruma ku ne Hudiyanan, ne impereyùdeyù niyu te Hudiyanan kew, ne egkahi kew te meupiya se itungan te Eleteala mekeatag kenyi su ruen penduan din kayi te kenyi. Ne idantal niyu te sikiyu rà se netau te Eleteala.¹⁸ Netuenan niyu ke kiyug te Eleteala kenyi, ne nesebutan niyu en ke engkey se meupiya ne ed-ul-ulaan su riyà te penduan se kinesebuta niyu kayi.¹⁹ Iyan niyu pegitungan ne sikiyu se ebpekepenurù dut te menge etew ne warà pà mekesabut te Eleteala, ne sikiyu se ebpekevehey te rayag dut te ralan te menge etew ne iring te nepisek su nerusireman pà ke itungan dan.²⁰ Iyan niyu pegitungan te sikiyu se ebpekepenurù dut te menge etew ne warà utew egketütuenan dan mekeatag te Eleteala, wey ke menge etew ne iring pà te menge vatà. Su iyan niyu pegitungan ne ke penduan te Eleteala ne intahak kenyi ne dutun intahù ke langun ne ketau wey ke benar.²¹ Embiya ebpekepenurù kew te menge ruma niyu, ne meambe ke kenà niyu ebpenuruen ke kenyi ne hinawa? Su iyan niyu ibpesabut te kenà meupiya se kebpemenakew, ugaid ne iyan kew ma tekawen.²² Ibpesabut niyu te, “Kenà kew edlangkadlangkad

te esawa niyu," ugaid ne iyan kew ma edlangkadlangkad te esawa niyu. Ne utew niyu igkeepes ke ledawan ne ebpengerapan te kenà Hudiyenan, ugaid ne edlusud kew ma ketà te valey te ebpengerapan dan te ledawan su wey niyu mepenakew arà.²³ Ne impereyùdeyù niyu se kinekevehayi keniyu rut te penduan te Eleteala, ugaid ne sikiyu red ma ke kenà eduma. Tembù be ebpegkeyaan niyu ke Eleteala.²⁴ Iring dut te impesurat ne Lalag te Eleteala ne egkahi te, "Kayi red ebpuun te sikiyu ne menge Hudiyenan se kegkesumpalit te Eleteala rut te menge etew ne kenà Hudiyenan."

²⁵ Sikiyu menge suled ku ne menge Hudiyenan, iyan niyu pegitungan ne rekèlè te pantag din ke kinepeetus niyu, ne ruen iya rema pantag din embiya eduma kew red dut te penduan te Eleteala. Ugaid ne embiya kenà kew eduma te penduan din, ne ke kinepemeetus niyu ne warà pantag din.²⁶ Su misan ke etew ne kenà Hudiyenan, embiya edumaan din ke penduan te Eleteala ne riyà te etuvangan te Eleteala ne iyan din keddengteng ne arà se etew ne neetusan.²⁷ Su ke menge etew ne warà etusi su kenà Hudiyenan, ugaid ne mibperumaruma te penduan te Eleteala, ne sikandan se puunan te ked-isuhata te Eleteala keniyu te kewagib dut te warà niyu merumai ke penduan. Su sikiyu ma perem ke midtahakan dut te penduan ne mibpemeetusan.²⁸ Su riyà te etuvangan te Eleteala ne kenà ke etew ne in-anak te Hudiyenan etawa ke etew ne eduma te betasan te Hudiyenan te ebpeetus te lawa rin ne igketuusi te tidtu ne Hudiyenan sikandin.²⁹ Ugaid ne iyan tidtu ne Hudiyenan diyà te etuvangan te Eleteala ne ke etew ne eduma te insuhù din ne ebpuun te lunsey te hinawa rin. Su riyà te etuvangan te Eleteala ne ke benar ne egkeetusan ne kenà ketà dà te ebpelian ke lawa te etew iring te insurat te penduan, ugaid ne ke kebmetilak te hinawa te menge etew ne riyà ebpuun dut te Kedesenan ne Ebpetuntul te Menusiyà. Ke etew ne iring kayi, ne kenà iyan edeyù ne etew, ugaid ne iyan edeyù kandin ne ke Eleteala.

3

¹ Embiya ve iring ketà se igkeamung key red se menge Hudiyenan dut te menge etew ne kenà Hudiyenan te edusaan, ne engkey en be se atag din te kegkehudiyenan dey wey kebpemeetus dey? ² Ugaid ne rekèlè iya se atag din kayi te sikami ne Hudiyenan. Seveka en, ne sikami se midtahakan dut te penduan te Eleteala.³ Ne benar ne ruen menge rumu rey ne Hudiyenan ne warà mebperumaruma te penduan te Eleteala. Ugaid ne kenà egketuen te wagib te kenà egkeserihan ke Eleteala te edtuman dut te impasad din dengan.⁴ Su misan teruen ke langun ne menusiyà, ugaid ne ke Eleteala mulà ne warà tarù ne egkehiyen din. Su iring dut te impesurat ne Lalag te Eleteala mekeatag kandin se egkahi te,

"Kayi te langun ne lalag nu
ne impekita nu ke keykew ne ketidtu.
Misan ruen id-isuhat keykew
ne warà ebpekepengukum keykew,
su nasi pà te keykew ne egkehiyen
ne iyan ebpekevenar."

Ini ke insurat ne Lalag te Eleteala mekeatag kandin.

5 Kalu ke ruen menge etew ne iyan dan ebpegitungen ne egkepakey ne ed-ulaula ki te mereat su kayi ebpuun ne egkekita te menge etew te metidtu ke Eleteala su kenà iring keytew, ketà ne kenà dait ne edusaan te Eleteala ke menge etew ne ed-ulaula te meraat. (Ini ne mibeealan dà ne lempawi dut te etew kayi te ampew te dunya.) 6 Ugaid ne tarù ke lempawi ne iring ketà. Su embiya kenà metidtu ke Eleteala ne kenà egkepakey ne egkukumen din ke langun ne menge etew kayi te ampew te dunya.

7 Kalu ke ruen ruma pà ne menge etew ne iyan dan peginungan ne kenà dait ne edusaan ki te Eleteala atag dut te kedtarùtarù tew, su embiya kenà kiyu egkeserihan ne maa, kenà be mepayag te munà pà ne egkeserihan ke Eleteala su warà mulà tarù din? Ne ketà kun puunan ne egkereyù dan ke Eleteala. 8 Ugaid ne embiya benar arà se egkehiyen dut te menge etew ne kerupangan se ebpegitungen dan ne iyan tew ibpeiseg ke langun ne kereetayan ne ed-ul-ulaan tew su apey egkekita ke ketidtu nevenar te Eleteala. Ugaid ne kenà benar arà misan duen menge etew ne midlivak kediey se egkahi te ini se ibpenurù ku. Edusaan te Eleteala atag dut te tarù dan, ne dait dan iya arà.

Warà Etew ne Ed-ulaula te Metidtu

9 Ne sikami se Hudiyanan, ne iyan niyu ve kunaan ke meupiya key pà dut te menge etew ne kenà Hudiyanan. Ugaid ne kenà benar. Su daan en ne impesabut ku keniyu te langun ne menge etew, Hudiyanan etawa kenà, ne elin ded ebeyvayaan te salà.

10 Su ini ke impesurat ne Lalag te Eleteala ne egkahi te,
“Warà senge etew rà ne metidtu
riyà te etuvangan te Eleteala.

11 Warà senge etew rà ne nekesabut mekeatag te Eleteala;
ne warà senge etew rà ne benar ne ebpmengà
te ralan te kebpekesabut mekeatag kandin.

12 Su langun ne menge etew ne midsuwey
rut te tidtu ne ralan te Eleteala;
langun dan ne iyan dà neketahù se meraat ne ulaula;
warà seveka rà diyà te kandan ne metidtu se ulaula rin,
misan senge etew rà.

13 Iyan dà neketahù te bèbà dan ne meredsik
iring dut te memawù ne edsengew diyà te leveng.
Ne miduma en be imbe ketà ke tarù
su warà tulan dut te dilà dan.
Iring te bisa te uled ini se egemew te bèbà dan
ne ebpekekaid.

14 Warà duma ne egkehiyen dan
ke kenà kebpendarawak te menge ruma ran.

15 Iyan netahù te hinawa ran ne melemu se kebpengimatey.

16 Misan endei ran ebpekesinaru ne ebpekereraat dan,
wey ebpekerasey ran dut te menge ruma ran.

17 Su warà dan metuen ke ralan
te kenà kegkeseleti te hinawa ran te meraat,

18 ne warà te hinawa ran se andek dan te Eleteala.”

19 Na, nesebutan tew langun te iyan kinepesurat te Eleteala te penduan din su apey ke menge etew ne egkevehayan ketà ne ebperumaruma ran. Tembù be warà ralan te misan senge etew rà

ne ebpekeparew ketà te kegkukum te Eleteala keytew su misan duen penduan te Eleteala kayi te keytew ne warà tew rumai.²⁰ Su warà senge etew rà ne ebmetidtu riyà te etuvangan te Eleteala su atag dut te keduma rin te penduan su kenà din edtumanen te langun. Tembù be imbehey te Eleteala ke penduan su apey tew metueni se duen salà tew.

Ke Mid-ulaula te Eleteala su Apey ki Ebmetidtu Diyà Te Etuvangan Din

²¹ Ugaid ne guntaani ne impayag en te Eleteala te kegkesebuti tew te ralan te kebmetidtu tew riyà te etuvangan din. Ne ini ne kenà kayi ebpuun dut te kedumai tew te penduan ni Moises, misan duen nekahia te Eleteala mekeatag te ini riyà te penduan wey riyà te impesurat din dut te menge etew ne ebpelembas te Lalag din.²² Ne ini ke impayag din ne ralan te embiya ebperetiyyaan tew si Hisu Kristu ne iyan keddengteng te Eleteala keytew ne metidtu ki riyà te etuvangan din. Su piya engkey ne etew ne ebperetiyyaya ki Hisu Kristu ne iyan keddengteng kandin te Eleteala ne metidtu diyà te etuvangan din, su warà ebpedlebien din dut te menge etew.²³ Su langun ne menge etew ne mekesesalà. Ne warè misan seveka rà ne ebpeketcuntul te ibayà te Eleteala, su langun en ne nekesuwéy.²⁴ Ugaid ne egenat te raat te nanam te Eleteala keytew ne iyan din keddengteng keytew ne metidtu. Ne warà midaat se nanam din su sabap te misan engkey en ne ulaula tew ne meupiya, ugaid ne riyà ebpuun te ki Hisu Kristu ke mibpeliyu keytew.²⁵ Su si Hisu Kristu ke imbehey te Eleteala ne mibpebpatey mekeatag te menge salà te langun ne menge etew. Ne impetudà din ke lengesa rin su apey ke langun ne ebperetiyyaya kandin ne ebpeseharen din ke menge salà dan. Mid-ulaula ini te Eleteala su apey tew mesebuti te metidtu se kegkukum din kayi te midtuman din ke kedusa dut te salà tew. Su rengan ne iring te mibelahad din ke menge etew ne mibaal te salà su warà din sembuti te edusa sikandan ugaid ne midtigkeran din taman te midsuhù din si Hisu Kristu.²⁶ Ugaid ne guntaani ne warà ebpekedsalà ne kenà din edusaan su insuhù din ki Hisus te ibpeangkun kandin ke menge salà te langun ne menge etew su apey tew egketueni guntaani te ke Eleteala ne metidtu se kegkukum din. Ne misan engkey en ne etew ne mibperetiyyaya te si Hisus ke mibpebpatey atag dut te salà din, ne ebpeseharen te Eleteala su riyà te etuvangan din ne iyan din keddengteng kandan ne metidtu.

²⁷ Tembù be warà igkependantal tew te misan engkey ne ulaula tew ne meupiya. Kenà egkepakey ne egkahi ki te iyan tew kebmetidtu su midumaan tew ke penduan. Su kenà ke keduma tew rut te penduan ugaid ne sabap te kinesarig tew ki Hisu Kristu ne iyan keddengteng te Eleteala keytew ne metidtu riyà te etuvangan din.²⁸ Ketà be ne netuenan tew se iyan tew rà kebmetidtu riyà te etuvangan te Eleteala ne kenà kayi ebpuun te edumaan tew ke penduan, ugaid ne sabap te kedsarig tew ki Hisu Kristu.²⁹ Kalu ke egkahi kew te ke Eleteala ne Eleteala rà dut te menge Hudiyanan ne kenà dut te kenà Hudiyanan. Kenà benar! Su sikandin dà ke Eleteala rut te langun ne menge etew, Hudiyanan sikandin etawa kenà.³⁰ Su sebseveka rà ke Eleteala, ne sikandin ke Eleteala dut te langun ne menge etew. Ne seveka rà se ralan te ebmetidtu ke langun ne menge etew su kayi rà ini ebpuun dut

te kedsarig dan ki Hisu Kristu, Hudiyanan sikandin etawa kenà.³¹ Ne embiya kayi rà ebpuun te kedsarig tew ki Hisu Kristu ne egkepesahad te Eleteala ke salà tew, ne maa warà bes pantag din ke penduan? Kenà benar arà! Su sabap dut te kineperetiyya tew ki Hisu Kristu ne midumaan tew te mevaher ke penduan.

4

Si Abraham se Petugiringan te Sarig ne Iyan Ibmetidtu te Etew Riyà te Etuvangan te Eleteala

¹ Na iyan meupiya ne ruen peginungan tew mekeatag ki Abraham ke keep-epuan rengan dut te langun tew ne menge Hudiyanan su apey ki mekesabut te kenà ke keduma tew rut te penduan ne ebmetidtu ki.² Su embiya iyan kadtengteng te Eleteala ki Abraham ne metidtu su sabap dut te meupiya ne ulaula rin, ne ruen kevenar din se ebpendantal. Ugaid ne kenà egkepakey te kebpendantal din su kenà kayi ebpuun te meupiya ne mid-ulaula rin se iyan kadtengteng te Eleteala kandin ne metidtu.³ Ne netuenan tew ini su ruen impesurat ne Lalag te Eleteala ne egkahi te, “Mibperetiyya si Abraham dut te impasad te Eleteala kandin, tembù be iyan kadtengteng te Eleteala kandin ne metidtu.”⁴ Embiya idsempitâ ta, ne ke etew ne egelevek te edsukayan ne ebayaran, ne ke sukey rin ne kenà ibehey rà dè duen su bayad dut te helevek din.⁵ Ugaid ne ke Eleteala, ne kenà ke meupiya ne ulaula tew se iyan din kadtengteng ne warà salà tew. Su warà ed-ululaan tew ne igkevehey su apey tew idsambì te kebmetidtu tew diyà te etuvangan din, su ini ne sabap te daat te nanam din keytew ne ibehey rà dè duen. Ugaid ne sabap dut te kedsarig tew kandin ne iyan din kadtengteng keytew ne metidtu, su sabap dut te kebperetiyyaya tew ne egkepesehad ke salà tew.⁶ Ini ve ke impesabut dengan ni Dabid te nekahri rin ke kegkehalew rut te etew ne kenà iyan din dà edserihan ne sabap dut te keupiya te ulaula rin se ebpekemetidtu kandin diyà te etuvangan te Eleteala, ugaid ne ke sarig din te Eleteala.

⁷ Su migkahi si Dabid te,

“Mehalew nevenar ke etew
ne nepesehad en ke salà din,
ne mibpelilipatan en te Eleteala.

⁸ Mehalew nevenar ke etew

ne warè en tentenuri te Eleteala ke salà din.”

⁹ Na ini se kehelawan te etew ne nepesehad en ke salà din ne nekahri ni Dabid te engkey, kayi rà be ini te menge etew ne nengeetusun ne menge Hudiyanan? Kenà iya! Su misan ke menge etew ne kenà Hudiyanan ne ingkeamung ded dema kayi misan warà dan meetusi. Su sabap dut te Lalag te Eleteala ne netuenan tew te riyà dà nekepuun te kinesarig ni Abraham ne mibmetidtu sikandin diyà te etuvangan te Eleteala.¹⁰ Ne pegpegitunga niyu ini. Keenu telimaa te Eleteala si Abraham ne metidtu? Maa neetusun en be sikandin ketà etawa warà pà? Netuenan tew te warà pà meetusi si Abraham ne midtelimà en te Eleteala ne metidtu.¹¹ Iyan neuna ne midsarig si Abraham te Eleteala ne arà pà ne mibpeetus sikandin su apey ruen tuus te lawa rin te kinetelimaa kandin te Eleteala te mibmetidtu sabap dut te kinesarig din te Eleteala. Ketà be ne iring sikandin te amey te langun ne menge etew ne mibperetiyyaya te Eleteala, ne ke sarig dan se iyan

kedtengteng dut te Eleteala kandan ne metidtu ran diyà te etuvangan din misan warà dan mebpeetus. ¹² Ne si Abraham dema ke amey rut te menge Hudiyanan ne eduma te betasan te kebpeetus. Ugaid ne kenà ke kinepeetus dan se puunan te iring sikandin ne amey ran, su ke sarig dan te Eleteala se puunan iring dut te kinesarig ni Abraham te warà pà sikandin meetusi.

¹³ Ruen impasad te Eleteala ki Abraham abpeg dut te menge kevuwaran din te ruen hewii ne ebpekeuma ne sikandan se egkemuney kayi te dunya. Iyan din kinepasad kayi su iyan din kedtengteng ki Abraham ne metidtu sabap dut te kinesarig din ne kenà sabap te midumaan din ke penduan. ¹⁴ Su embiya iyan dà ebpeketelimà dut te impasad te Eleteala arà se menge etew ne eduma te penduan ne warà en pantag din se kedsarig dan te Eleteala, ne warà lavew pantag din ke pasad te Eleteala kandan su warà misan senge etew rà ne ebpeketuman dut te penduan. ¹⁵ Su ke penduan ne ed-ewit te kegkeepes te Eleteala te langun ne menge etew su kenà dan ebpeketuman. Ugaid ne embiya warà penduan ne warà ma ralan te kegketueni ran te nekesurang dan.

¹⁶ Ketà ne ke impasad te Eleteala ne egketelimà dut te menge etew sabap dà dut te kedsarig ta te Eleteala. Ne iyan din kineulaula ketà ne apey arà ne riyà ebpuun te raat te nanam din ne kenà sabap te nehelevekan ta. Ne kenà ke menge Hudiyanan dà ne eduma te penduan ne ebehayan ini te Eleteala, ugaid ne ibehey rin dema diyà te langun ne menge etew ne mibperetiyaya kandin iring dut te kineperetiyaya ni Abraham su sikandin ke nevaluy ne amey rut te langun tew ne mibperetiyaya. ¹⁷ Su iring dut te impesurat ne Lalag te Eleteala ki Abraham rengan ne egkahi te, "Mibaluy ku sikew ne amey rut te merakel ne edsusunan te menge etew." Ne ini se migkahi te Eleteala ne midtuman en su nevaluy rin si Abraham ne amey rut te langun tew ne mibperetiyaya iring te kineperetiyaya ni Abraham kandin. Ne ke Eleteala ne mibperetiyaya ni Abraham ne iyan ded sikandin arà ke Eleteala ne ebanew te menge minatey, su ke senge tahà dà ne lalag din ne egked-ulaula ke engkey se egkiyuhan din.

¹⁸ Mibperetiyaya si Abraham te misan enduen te kenè en egketuman ke impasad kandin te Eleteala su mibpeneneharan din ded lavew te kedsarig din te kebpekearen din te anak. Tembù be nevaluy sikandin ne amey dut te merakel ne edsusunan te menge etew iring te migkahi kandin te Eleteala te, "Ebmerakel ke kevuwaran niyu, ne iyan din egkeiringan ne bituen diyà te langit se kerakel dan." ¹⁹ Su arà ne hewii ne mehatus en ke rahun ni Abraham ne netuenan din se mehurang en nevenar sikandin ne warè en kearus din ne ebpekeanak pà sikandin. Ne netuenan din dema se kenà en ebpekeanak ke esawa rin si Sara, ugaid ne misan pà te iring dutun ne warà medtakas sikandin se edsarig te Eleteala. ²⁰ Warà meewà ke sarig din su kenà duwaruwa te hinawa rin ne edtumanen te Eleteala ke impasad din kandin. Ugaid ne gewii rin te ebpenenahad ne ed-ilut dema ke sarig din wey mideyù din ke Eleteala. ²¹ Su mevaher ke hinawa rin te ruen gehem te Eleteala te edtuman dut te pasad din. ²² Ne sabap dut te kedsarig ni Abraham te Eleteala ne iyan kedtengteng te Eleteala kandin ne metidtu. ²³ Ugaid ne arà ne impesurat ne Lalag te Eleteala rengan ne ebpesabut te iyan kedtengteng kandin te Eleteala ne metidtu ne kenà ini se insurat ne

mekeatag dà ki Abraham. ²⁴ Su ingkeragkes kiyu red dema su apey iyan din kadtengteng keytew ne metidtu sabap dut te kebperetiyyaya tew te sikandin ke mibanew ki Hisus ne Kerenan tew. ²⁵ Su si Hisus ke imbehey te Eleteala ne ebpebpatey mekeatag dut te menge salà tew, ne mibanew sikandin te Eleteala su apey iyan din kadtengteng keytew ne metidtu riyaw te etuvangan din.

5

Ini ne Mekeatag te Mibpebpatey si Hisu Kristu keytew su apey iyan Kadtengteng te Eleteala ne Metidtu ke Menge Etew ne Mibperetiyyaya kandin

¹ Na keta ne netuenan tew te riyaw te etuvangan te Eleteala ne iyan din kadtengteng keytew ne metidtu kiyu sabap dut te kebperetiyyaya tew ki Hisu Kristu. Ne kayi te kebpebpatey ni Hisus ne melintad en se hinawa tew su neawà ke epes te Eleteala mekeatag dut te salà tew. ² Su sabap dut te kebperetiyyaya tew ki Hisus ne netelimà tew en ke tavang te Eleteala te in-ulug din ke raat te nanam din keytew. Ketà be ne egkehalew ki su ruen ebpenerengen tew ne hewii ne ebpekeamung ki red te Eleteala riyaw te ed-ubpaan din ne kenà igkeupama se keupiya rin. ³ Ne kenà ketà dà taman ke kehelawan tew. Su ke kinekereheni tew te keduma ki Hisu Kristu ne kehelawan tew rema su netuenan tew te ini se egkevaluy ne tavang keytew te egkehuruwan tew te kadtigker. ⁴ Ne embiya nehuruwan tew te kadtigker dut te kemerehenan ne ebpekesuhat ki te hinawa te Eleteala. Ketà be ne netuenan tew te egketuman ini se ebpenerengen tew diyà te Eleteala. ⁵ Ne kenà ki ebpekegkeyà kayi te kebpenareng tew su benar ini ne edtumanen te Eleteala sabap dut te pengelimuan din keytew. Ne ini se limù din ne riyaw din ipepevayà dut te Kedesenan ne Ebpetuntul te Menusiyà ne imbehey rin keytew.

⁶ Na pegitunga niyu ma ke pengelimuan keytew te Eleteala, su rengan te warà kiyu pà mebperetiyyaya ne warà dalan te kegkegaga te meupiya ne ulaula tew su iring te uripen kiyu te salà tew, ugaid ne neuma en ke hewii ne andang ne midtendù te Eleteala ne mibpebpatey si Hisu Kristu su selidig te langun tew ne mekesesalà. ⁷ Kayi te keyta ne netuenan tew te merelag dà se etew ne idselidig din te umur din dut te etew ne metidtu. Ugaid ne egkepakey vuwa ne ruen etew ne edselidig te umur din dut te meupiya ne etew ke edait ne edtevangan. ⁸ Ugaid ne impayag te Eleteala ke pengelimuan din keytew su midsuhù din si Hisu Kristu te ebpebpatey mekeatag keytew te mekesesalà ki pà. ⁹ Ne geina te mibmetidtu ki en diyà te etuvangan te Eleteala sabap dut te lengesa ni Hisus ne impetudà din keytew, ne iyan pè be kenà muna pà se kebpeliyu rin keytew dut te kedusai te Eleteala te salà tew keuremà. ¹⁰ Su rengan ne kunterà ki pà te Eleteala, ugaid ne sabap dut te kinepatey te Anak din si Hisu Kristu ne guntaan ne imped-ulit ki en diyà te etuvangan din. Ne embiya ve iring ketà te imped-ulit ki en, ne wey ki pè be maa kenà nikandin ipeliyu rut te kedusai keytew su neviviyyag en ke Anak din si Hisu Kristu. ¹¹ Ne kenà ketà dà taman, su rekèlè se kegkehalew tew mekeatag dut te pengelimuan te Eleteala ne impekita rin keytew te kinepatey ni Hisu Kristu ke Kerenan tew, su sikandin ke ralan te imped-ulit ki diyà te etuvangan te Eleteala.

Ke Egketemanan dut te Mid-ulaula ni Adan wey ke Egketemanan dut te Mid-ulaula ni Hisu Kristu

¹² Geina te mibaal te salà si Adan rengan, ne arà se puunan te etew ne ebaal te salà kayi te ampew te dunya. Ne geina te nekevaal sikandin te salà ne mibehayan te Eleteala sikandin te kemetayen. Tembù be langun ne menge etew ne ebpatey su langun ne mibelidsalà. ¹³ Rengan te warà pà insuhù te Eleteala ke penduan ne imbehey rin ki Moises, ne mibelidsalà en ke langun ne menge etew. Ugaid ne warà din pà itahù te hinawa ke salà dan su warà din pà ikevehey ke penduan ne ebperumaan kandan. ¹⁴ Ne inggenat dut te hewii te nekedsalà si Adan taman dut te hewii ne imbehey en ke penduan diyà te ki Moises, langun ne menge etew ne mibpatey sabap dut te menge salà dan, misan ke salà dan ne kenà iring dut te salà ni Adan te midsurang din ke insuhù kandin te Eleteala.

Ne ruen ketà te mid-ulaula ni Adan ne ebpekeiring dut te ebpekeitung kandin ne si Hisu Kristu. ¹⁵ Ugaid ne kenà ke mid-ulaula ran se neked-iring su si Hisu Kristu ne kenà din iyan mibpeneheewit kayi te ampew te dunya ne salà iring ki Adan, ugaid ne iyan din mibpeneheewit ne raat te nanam te Eleteala ne ibehey rin dè duen su apey ebpesehad te menge salà tew. Su atag dut te salà te senge etew rà ne si Adan, ne langun ne menge etew kayi te ampew te dunya ne ebpatey. Ugaid ne atag dut te raat te nanam te Eleteala, ne imbehey rin ki Hisu Kristu su apey ruen ralan te ebpekeliyu kiyu rut te salà tew. Tembù be iyan pà rekèlè ke raat te nanam te Eleteala keytew dut te kedusa te salà ni Adan. ¹⁶ Ne ruen ebiraan te egketemanan dut te mid-ulaula ran su iyan egketemanan dut te salà ni Adan ne egkukumen te kedusaa te langun ne menge etew. Ugaid ne iyan egketemanan dut te mid-ulaula ni Hisus ne misan ruen merakel ne salà te menge etew, ne egkepesehad dan te Eleteala su sabap dut te imbehey rin dè duen ne raat te nanam din su apey iyan din keddengteng kandan ne metidtu diyà te etuvangan din. ¹⁷ Uya, sabap dut te salà te senge etew ne si Adan ke langun ne menge etew ne ebpatey. Ugaid ne sabap dut te mid-ulaula te senge etew ne si Hisu Kristu ne muna pà se gehem ne egkekita. Su impekita te Eleteala ke rekèlè ne daat te nanam din kandan ippepevaya te kinepatey ni Hisu Kristu, ne piya engkey ne etew ne edsarig dut te mid-ulaula rin ne iyan keddengteng kandan te Eleteala ne metidtu. Ne ebehayan dan te umur ne warà edtemanan din wey egkeseveka ran dut te Eleteala te kebayàbayà din.

¹⁸ Ketà be ne netuenan tew te sabap dut te salà te senge etew ne si Adan ne nesuhat te kukuman te kedusaa te langun ne menge etew. Iring din ded dema arà te metidtu ne mid-ulaula te senge etew ne si Hisu Kristu te mibpeimatey, ne ibpeliku rin ke langun ne menge etew te kedusa kandan te Eleteala su apey ran meketelimà te umur ne warà edtemanan din. ¹⁹ Su sabap dut te senge etew ne warà miduma rut te insuhù kandin te Eleteala, ne nevaluy ke langun ne menge etew ne mekesesalà. Ne engketà ded dema ne riya ebpuun te senge etew ne si Hisu Kristu ne miduma rut te insuhù te Eleteala kandin, ne ke langun ne menge etew ne mibperetiyya kandin ne iyan din keddengteng kandan ne metidtu diyà te etuvangan din.

²⁰ Iyan kinevehey te Eleteala te penduan su apey tew metueni te ed-iseg ke salà tew kandin. Ugaid ne kayi te ked-iseg pà te salà tew ne iyan muna pà se kerekelà dut te raat te nanam te Eleteala ne edtavang keytew. ²¹ Ketà ne nesebutan tew te neuripen ki te salà rengan ne ebpekepeneheewit keytew riyà te kepepatey. Ugaid guntaani ne sabap dut te raat te nanam te Eleteala te mibpebpatey ke Anak din si Hisu Kristu ke Kerenan tew, ne iyan kedteengteng te Eleteala keytew ne metidtu ne ibehey rin keytew ke umur ne warà edtemenan din riyà te etuvangan te Eleteala.

6

Ini ne Mekeatag Dut te Ked-unung ta ki Hisu Kristu wey ke Kegkevanew ta Red Dema su Apey Tew Ed-engkeri Ke Meraat ne Ulaula Tew

¹ Na kalu ke ruen menge etew ne iyan dan kunaan ke ibpeiseg tew pà lavew ke meraat ne ed-ul-ulaan tew su apey egkeumanan pà ke ibpekita keytew te Eleteala ne raat te nanam din. ² Kenà en iya! Su ketà te kinepesakup ta ki Hisus ne iring ki te minatey ne menge etew su neewaan tew en ke raan ne meraat ne ulaula tew, engketà be ne kenà egkepakey ne ed-iseg ki pà lavew ne ed-ulaula te meraat. ³ Su netuenan tew en te ketà te kebunyahì keytew ne tuus arà te kebpekidseveka tew ki Hisu Kristu, ne tuus dema te ketà te kinepatey rin ne iring te nekeunung ki red kandin. ⁴ Uya, ketà te kebunyahì keytew ne tuus te nekeunung ki te kemetayen din wey ke kineleveng kandin su apey ki mekeamung dut te behu ne kegkeuyag iring ki Hisu Kristu te mibanew impepevaya dut te gehem te Amey tew ne Eleteala.

⁵ Su embiya benar ne mibpekidseveka ki ki Hisus ketà te kinepatey rin su inselidig sikandin keytew te Eleteala, ne benar ne elin ki red dema egkevanew keuremà iring dut te kinevanew kandin. ⁶ Su netuenan tew te andang ki en ne etew ne mekesesalà, ugaid ne ke daan ne ke eetawi tew ne meraat ne nekeunung en ketà te kinelensanga ki Hisus diyà te pinebelavag ne kayu su apey ke kiyug tew te ed-ulaula te meraat ne egkeengked en su apey kenà ki en egkeuripen dut te betasan tew ne meraat. ⁷ Su ke etew ne minatey en ne nekeliyu en te kebayàbayà te salà. ⁸ Na geina te netuenan tew en te ketà te kinepatey ni Hisus ne iring te nekeunung ki en kandin, ne netuenan tew te egkevanew ki red dema su ruen en egkevehu ne umur tew iring kandin. ⁹ Su netuenan tew se nevanew en si Hisu Kristu, ne kenà en maa egkepakey ne ebpatey pà sikandin su warè en ke kemetayen diyà te kandin. ¹⁰ Kesevekà rà sikandin minatey, ne warè en kegkeseupi rin. Ne sabap dut te kinepatey rin ne midereetan din en ke gehem te salà ne ebayàbayà keytew, su nevanew en sikandin ne iyan din ed-ul-ulaan ke igkereyù te Eleteala. ¹¹ Ne engketà ded dema keniyu, su tentenuri niyu te iring kew te minatey su nekeunung kew rut te kinepatey ni Hisu Kristu ne neawà en kayi te keniyu ke gehem te salà. Ne geina te kebpekidseveka niyu ki Hisu Kristu ne iyan niyu rà ul-ulaa ne endei se igkereyù te Eleteala.

¹² Tembù be kenà niyu en iluhut se iyan pà ebpekevayàbayà dut te lawa niyu ne ke ulaula ne meraat. Su embiya ini se ed-ul-ulaan niyu, ne ebpekeruma kew red dut te egkiyuhan niyu ne meraat. ¹³ Kenà niyu

iluhut te misan endei rapit te lawa niyu te ed-ulaula te meraat, ugaid ne iyan niyu luhuti ne Eleteala se ebayàbayà kenyu te piya engkey ne metidtu ne ulaula ne kiyug din. Su iyan ini edait kenyu geina te nekeliyu kew en te kemetayen ne mibehayan kew en te behu ne kegkeuyag. ¹⁴ Su rengan te iyan niyu pà edumaan ke penduan, ne iring te iyan pà mibayàbayà kenyu ke salà su warà kew meketuman rut te penduan. Ugaid ne geina te impayag en te Eleteala ke daat te nanam din kenyu ne kenà en salà se ebayàbayà kenyu.

¹⁵ Kalu ke ruen menge etew ne iyan dan kunaan ke geina te kenà tew en edumaan ke penduan ni Moises ne misan ibpeiseg tew ke meraat ne ed-ul-ulaan tew enderayi ma su ruen en daat te nanam te Eleteala keytew. Ugaid ne kenà arà egkepakey! ¹⁶ Su netuenan niyu te piya endei kew ebpesakup ne arà se ebayàbayà kenyu su embiya idsempità ta ne iring kew te uripen din. Ne engketà ded dema ke etew ne iyan ed-uripen kandin ke meraat ne ed-ul-ulaan din, ne edusaan sikandin te kepepatey ne warà edtemanan din. Ugaid ne ke etew ne idrumakan din ke hinawa rin te eduma te Eleteala, ne iyan kadtengteng kandin te Eleteala ne metidtu riyà te etuvangan din. ¹⁷ Rengan ne iring te iyan mid-uripen kenyu ne salà, ugaid ne guntaani ne mibpeselemaatan ku ke Eleteala su intahù niyu iya te hinawa ke keduma niyu rut te tidtu ne penurù te Eleteala ne impenurù kenyu. ¹⁸ Na guntaani ne iyan ebayàbayà kenyu ne ke metidtu en ne ulaula, su nevelukasan kew en te Eleteala rut te salà ne mid-uripen kenyu. ¹⁹ Iyan ku insempità ke egked-ulaula te uripen su apey niyu melemu mesebuti ke impenurù ku kenyu, su ini se kebperetiyaya niyu ne warà pà mekedalid. Su rengan ne iring te mibpeuripen kew te meraat su inrumakan niyu ke lawa niyu te ed-ulaula te meredsik wey ke meraat ne ed-isab pà. Ugaid ne guntaani ne iyan iya se ivehey niyu ke lawa niyu riyà te Eleteala te edtuman te ulaula ne metidtu su apey kew metilak diyà te etuvangan din.

²⁰ Su rengan te iyan pà ebpengunguripen kenyu ke meraat ne ulaula niyu, ne warà te hinawa niyu te eduma rut te metidtu ne ulaula ne ebpekesuhat te hinawa te Eleteala. ²¹ Maa, engkey se keupianan ne netelimà niyu ketà te meraat ne ulaula niyu rengan ne igkeyeyai niyu guntaani? Warà! Su embiya ibpeiseg niyu pà ne menge ulaula arà, ne warà duma ne edungguan din ke kenà kemetayen ne warà edtemanan din. ²² Ugaid ne guntaan ne mibelukasan kew en te Eleteala rut te salà ne mid-uripen kenyu, ne nevaluy kew en ne uripen te Eleteala. Ne rekèlè se keupianan niyu su ebmetilak ke hinawa niyu, ne egketelimà niyu ke umur ne warà edtemanan din. ²³ Su iyan bayad te kebpekedsalà ne kemetayen ne warà edtemanan din, ugaid ne iyan ibehey te Eleteala rut te menge etew ne mibperetiyaya ki Hisus Kristu ke Kerenan tew ne umur ne warà edtemanan su sabap dut te pengelimuan din ne imbehey rin dà dè duen.

¹ Menge suled, nesebutan tew en ke engkey se ureding te gubirnu tew, ne netuenan tew red dema te sakup ki rut te nekahи te ureding taman te biviyag ki pà. Ugaid ne embiya ebpatey ki en ne kenà kiyu en ebpekeperumaruma ketà te nekahи te ureding. ² Upama ke meritan ne nekeesawa en, kahi rut te ureding ne iyan ebayàbaya kandin ne ke esawa rin taman te biviyag pà sikandin. Ugaid ne embiya minatey en ke esawa rin, ne egkepakey en maa ne edsaup ed-esawa arà se meritan. ³ Ugaid ne embiya warà pà mebpatey ke esawa rin ne ebpekiduma sikandin wey ebpekid-ulid te senge etew ne meama, ne nesurang din en ke ureding su geina te midlangkad din ke esawa rin. Ugaid embiya ebpatey en ke esawa rin, ne egkepakey en ne edsaup ed-esawa sikandin su kenè en egkesuhat sikandin dut te ureding su nekeliyu en sikandin dut te ureding mekeatag te kebpeeseweey.

⁴ Ne engketà ded imbe ke langun tew, menge suled, su rengan te kinepatey ni Hisus ne iring te nekeunung ki en ketà. Tembù be kenà ki en be ebeyveyaan dut te penduan ni Moises su nekeliyu ki en te keduma ketà. Guntaani ne nevaluy ki en ne sakup ni Hisu Kristu ne nevanew en su apey iyan tew metuman ke kiyug te Eleteala. ⁵ Su rengan te warà ki pà mebperetiyyaya ne iyan mibayàbaya keytew ke meraat ne ulaula tew, ne nekeiseg ke meraat ne ed-ul-ulaan tew ketà te netuenan tew ke imbandù te penduan. Ne geina te iring ketà se mid-ulaula kiyu te meraat, ne iyan tew rà ebpenerengen ne kepepatey ne warà edtemanan din. ⁶ Ugaid ne geina te midsarig ki en ki Hisus ne iring te nekeunung ki en dut te kinepatey rin, ne nekeliyu ki en dut te keduma te penduan ni Moises ne mibayàbaya keytew. Su rengan te iyan tew pà edumaan ke penduan ni Moises, ne warà kiyu meketuman dut te kiyug te Eleteala. Ugaid ne guntaani ne ebpekegaga kiyu en ne edtuman dut te kiyug te Eleteala ibpelevayà dut te tavang te Kedesenan ne Ebpetuntul te Menusiyà.

Ke Atag dut te Penduan te Eleteala ne Imbehey ki Moises

⁷ Kalu ke ruen menge etew ne iyan dan egkepegitung ne meraat ke penduan ni Moises su nekeiseg ke meraat ne ed-ul-ulaan tew te netuenan tew ke imbandù te penduan. Kenà arà! Su embiya warà penduan ne mibpayag ke engkey se salà ku, ne kenà ku egketuenan. Su upama kenà ke penduan se migkahi te, “Kenà ka egkeima te kearen te ruma nu,” ne warà ku mesebuti se salà bes ini se kegkeima ku.

⁸ Su andang ad ne mekesesalà, ugaid ne guna su impesabut kediey te penduan te salà ini se kegkeima ne lemban en ne mid-iseg se kegkeima ku wey ke salà ku. Su embiya warà penduan ne ebandù keytew te ulaula ne meraat, ne warà dema kegketueni tew te salà bes arà ne ned-ulaula. ⁹ Su pehaney te warà ku pà metueni ke engkey se insuhù te penduan, ne iyan ku kunaan ke warà salà ku su warà penduan ne mibpesekupan ku. Ugaid ne guna su netuenan ku en ke penduan, ne neimemanan ku rema se mekesesalà e ves, ne edusaan a te kepepatey ne warà edtemanan din. ¹⁰ Ketà be ne ini se penduan ne imbehey te Eleteala te kebpeketelimà tew te umur ne warà edtemanan din embiya kenà tew edsurangen, ne iyan ded ebpekepeneheewit kedi te kepepatey ne kenà edtaman su warà a ma meketuman te penduan.

¹¹ Iring te mid-ekalan a rut te salà ku su in-iseg ku pà ke meraat ne ulaula ku ne imbandu dut te penduan te kenà ku kebpeketuman.

Ne arà se igkukuma kediey te kepepatey ne warà edtemanan din su nekesurang a te insuhù te Eleteala dut te penduan.

¹² Ketà be ne warà meraat ne nekeselet dut te penduan, ugaid ne etew rà. Su langun ne insuhù te Eleteala ne keupianan dà wey ketidu.

¹³ Kalu ke ruen egkahi te embiya meupiya rà ke penduan ne meambe ke ini se puunan te kegkepeneheewit kedi te kepepatey ne warà edtemanan din? Ugaid ne kenà ded arà! Su kayi iya ebpuun te salà ku te nekesurang a rut te meupiya ne insuhù te penduan ne arà ke kodusai kedi te kepepatey su apey igkepesabut kedi te meraat nevenar se kebpekedsalà.

Ke Deruwa ne Kiyug te Menge Etew ne Ebpekedlewanà

¹⁴ Netuenan tew te meupiya ke penduan te Eleteala su riyà ebpuun te kandin. Ugaid ne siaken ne geina te etew a rà ne ruen ded meraat ne netahù te hinawa ku, ne iring a te uripen su iyan ebayàbayà kedi ne ke salà ku. ¹⁵ Ne kenà ku egkesebutan ke ed-ul-ulaan ku. Su ke meupiya ne igkesuati ku te ed-ulaula ne kenà ku iyan egked-ulaula, ugaid ne ke meraat ne igkeepesi ku te ed-ulaula ne nasi manen ne iyan ku ed-ululaan. ¹⁶ Ne embiya egked-ulaula ku pà ke kenà ku egkesuatan te ed-ulaula, ne tuus ini te ebpehimbenar a te metidtu ke penduan. ¹⁷ Ketà be ne ini se meraat ne mid-ulaula ku ne kenà kayi ebpuun te keputian te atey ku, ugaid ne kayi en ini ebpuun dut te salà ne ebayàbayà kedi. ¹⁸ Netuenan ku te warà deisek dà ne meupiya ne kayi ebpuun te daan ne kegkeitew ku. Su misan egkiyug a ne ed-ulaula te meupiya, ne kenà ku egketuman. ¹⁹ Su ke meupiya ne egkiyuhan ku te ed-ulaula ne kenà ku egketuman; nasi pà te ke mereatey ne igkeepesi ku te ed-ulaula ne iyan ku maa egketuman. ²⁰ Embiya egked-ulaula ku ini se kenà ku perem ed-ululaan, ne kenè en egenat te keputian te atey ku se ed-ulaula ketà, ugaid ne iyan en ed-ulaula ne ke mereatey ne ebayàbayà te lawa ku.

²¹ Ne layun iya iring kayi se egketemanan ku ne edsuhù kedi. Su misan egkiyuhan ku te ed-ulaula te meupiya, ne iyan ed-ahew ke meraat ne ebayàbayà te lawa ku. ²² Su kayi te ginawa ku ne dekelà se kiyug ku te edtuman dut te insuhù te Eleteala. ²³ Ugaid ne ini se meraat ne ebayàbayà te lawa ku ne edsuhù kedi te ed-ulaula te mereatey ne ebpekesurang dut te meupiya ne egkiyuhan ku kayi te hinawa ku ne eduma te insuhù te Eleteala. Tembù be iring te ebpepilayey ran taman te kayi a ebpekeruma te meraat, su iring a te uripen dut te mereatey ne ebayàbayà te lawa ku. ²⁴ Merasey nevenar ini se egketemanan ku! Ne engkey rà buwa se ebpekevelukas kediey dut te mereatey ne ebayàbayà te lawa ku ne ebpeneheewit kediey te kemetayen ne warà edtemanan din? ²⁵ Ne rekelà se kinepeselamat ku te Eleteala su imbehey rin si Hisu Kristu ke Kerenan tew ne ebpekevelukas kedi su apey kenà en iyan ebayàbayà kediey ne ke meraat.

Su ruen ini se deruwa ne egketemanan ne edsuhù kedi su ruen kayi te hinawa ku ne eduma te insuhù te Eleteala, ugaid ne ruen dema ke meraat ne ebayàbayà kediey ne edsuhù te ibpetuman kedi ke meraat.

8

Ini ne Mekeatag te Kedesenan ne Ebpetuntul te Menusiyà ne Ebehey te Behu ne Kegkeuyag Tew

¹ Sikitew ne mibpekidseveka en ki Hisu Kristu, ne warè en kedusai keytew te Eleteala te kemetayen ne warà edtemanan din. ² Su sabap dut te sarig tew te neseveka ki ki Hisu Kristu, ne ruen behu ne kegkeuyag ne imbehey keytew te Kedesenan ne Ebpetuntul te Menusiyà. Tembù be impeliyu ki en nikandin dut te salà ne mibayàbayà te lawa tew su apey kenà kiyu en edusaa te kemetayen ne warà edtemanan din. ³ Su ke keduma tew te penduan ne kenà arà se kebpekeliyu tew te salà ne ebayàbayà te lawa tew su geina te warà tew megaga te edtuman ke penduan. Ugaid ne Eleteala red se mibpelihau keytew dut te kinekeuripen tew te salà, su midsuhù din ke Anak din si Hisu Kristu kayi te ampew te dunya ne pinebaluy rin ne etew iring keytew, ugaid ne warà salà din. Ne kayi te kinepebpatey rin mekeatag te salà tew, ne pinelyu ki te Eleteala rut te kebayàbayà te salà te lawa tew. ⁴ Ini ke mid-ulaula te Eleteala su apey langun tew te mibperetiyaya kandin ne ebpekeliyu rut te salà ne ebayàbayà te lawa tew, su apey tew egketuman ke metidtu ne nekahí rut te penduan. Ne egketuman tew ini su kedumai keytew rut te Kedesenan ne Ebpetuntul te Menusiyà ne edtavang keytew.

⁵ Su ke menge etew ne edtuman te kandan dà ne kiyug, ne iyan dà netahù te itungan dan ne ke kiyug dan dà ne meraat. Ugaid ke menge etew ne edtuman dut te kiyug te Kedesenan ne Ebpetuntul te Menusiyà, ne iyan dekelà ne netahù te itungan dan ne ke keduma ran te kiyug te Kedesenan ne Ebpetuntul te Menusiyà. ⁶ Su embiya iyan netahù te itungan te etew se kandin dà ne kiyug ne meraat, ne iyan din egketemanan ne edusaan te kemetayen ne warà edtemanan din. Ugaid ne embiya iyan netahù te itungan din ne ke kiyug dut te Kedesenan ne Ebpetuntul te Menusiyà ne iyan din egketemanan ne ruen kegkeuyag din wey kelinew te hinawa rin. ⁷ Su ke etew ne iyan netahù te itungan din ke kandin dà ne kiyug ne meraat, ne kunterà sikandin te Eleteala. Su kenà din edumaan ke nekahí rut te penduan te Eleteala, ne iyan benar ne kenà din egkegaga te edtuman. ⁸ Ne ke menge etew ne eduma rut te kandan dà ne kiyug, ne warà ulaula ran ne ebpekesuhat te hinawa te Eleteala.

⁹ Ugaid ne sikiyu ve mulà, ne kenà en ke keniyu rà ne kiyug se edtumanen niyu su iyan niyu en edtumanen ne ke kiyug dut te Kedesenan ne Ebpetuntul te Menusiyà ne ed-ubpà riyà te hinawa niyu guntaan. Ugaid ke etew ne warà pà mekeubpà diyà te hinawa rin ini se Kedesenan ne Ebpetuntul te Menusiyà ne midsuhù ni Hisu Kristu, ne kenà pà sakup sikandin ni Hisu Kristu. ¹⁰ Ugaid ne embiya si Hisu Kristu se ed-ubpà diyà te hinawa niyu ne misan ebpatey ini se lawa niyu su geina te ruen salà niyu, ne ke gimukud niyu ne ed-ubpà diyà te Eleteala taman te taman su iyan din keddengteng keniyu ne metidtu riyà te etuvangan din. ¹¹ Ke Eleteala ne mibanew ki Hisu Kristu. Ne iring ketà se egketemanan niyu su embiya diyà ed-ubpà te hinawa niyu ke Kedesenan ne Ebpetuntul te Menusiyà ne midsuhù din, ne ebenawen kew red dema nikandin su atag dut te Kedesenan ne Ebpetuntul te Menusiyà ne ed-ubpà te hinawa niyu.

¹² Ketà be, menge suled, geina te sikitew ke ed-ubpaan dut te Kedesenan ne Ebpetuntul te Menusiyà ne iyan iya se ebperumdumaan tew ke kiyug din, ne kenà tew en edumaan ke meraat ne neketahù te itungan tew. ¹³ Su embiya iyan tew edumaan ke meraat ne kiyug ne neketahù te itungan tew, ne edusaan ki te kemetaryen ne warà edtemenan din. Ugaid ne embiya kayi ebpuun dut te tavang te Kedesenan ne Ebpetuntul te Menusiyà ne ed-engkeran tew en te eduma ke meraat ne kiyug ne neketahù te itungan tew, ne egkevehayan ki en te behu ne kegkeuyag tew. ¹⁴ Su ke menge etew ne ebpmineg wey eduma dut te nekahì te Kedesenan ne Ebpetuntul te Menusiyà, ne sikandan ne menge anak te Eleteala. ¹⁵ Su geina te imbehey en te Eleteala keytew ke Kedesenan ne Ebpetuntul te Menusiyà ne kenà ki en egkevaluy ne uripen ne egkeandek te Eleteala iring dut te rengan, su nevaluy ki en ne menge anak din. Ne sabap dut te gehem dut te Kedesenan ne Ebpetuntul te Menusiyà ne imbehey rin keytew ne egkepakey en ne ed-amey ki te Eleteala. ¹⁶ Su ke Kedesenan ne Ebpetuntul te Menusiyà se ebpesabut dut te hinawa tew te sikitew ne menge anak ki en te Eleteala. ¹⁷ Ne geina te nevaluy ki en ne tuney ne anak din, ne ruen hewii ne ebpekeuma ne egketelimà tew ke langun ne keupianan ne impasad din keytew, ne kenà arà dà su langun te keupianan ne imbehey rin ki Hisus ne ebpeketelimà ki red dema. Su embiya edrumerasey ki guntaan sabap dut te keduma tew ki Hisu Kristu, ne ebpekeamung ki dut te kebpepurù kandin keuremà.

Ini ne Mekeatag te Ebehuwen dut te Eleteala ke Langun ne Midlimbag din ketà te Hewii ne Ebehuwen din ke Langun ne Menge Anak din

¹⁸ Embiya ebpegpegitungen ku te ini se keresayan tew guntaani kayi te ampew te dunya, ne warà dà mekeiring te sulu te kingking dut te dekelà ne keupiya te Eleteala ne ibehey rin keytew keuremà. ¹⁹ Ne meilut neveran se kebpenareng dut te langun ne midlimbag te Eleteala te ebpekeuma ke hewii ne kebpayag te Eleteala te kandin ne menge anak. ²⁰ Su ke langun ne nelimbag din ne neredsikan dut te salà te neuna ne etew rengan; ugaid ne arà se kinekeredsiki ran ne warè ded kebpekeiseg din su egeleveken ded te Eleteala ke engkey se egkiyuhan din kandan. Ugaid ne misan pà te iring ketà ne ruen pà kebpenareng dan, ²¹ te ruen gewii ne ebpekeuma ne warè en kegkeredak dut te langun ne nelimbag din, ne egkevehu ke langun iring te kegkevehu te langun ne menge anak te Eleteala. ²² Ne netuenan tew se langun ne nelimbag din igenat dà dut te neuna taman dut te guntaani en ne egkerasey en iring te meritan ne ebeliliten. ²³ Ne kenà arà dà se nelimbag din se egkerasey su misan sikitew ne neketelimà en dut te Kedesenan ne Ebpetuntul te Menusiyà su ini se neuna ne ibehey rin dut te menge mibperetiyyaya ne egkerasey ki red dema. Su ebpenereng tew ke ebpekeuma dut te arà ne hewii ne ed-imasaren te Eleteala ke ked-anak-anak din kenitew ne ruen behu ne lawa tew ne warè en kebpekepavayà din te sakit wey kepepatey. ²⁴ Ne impeliyu kiyu en te Eleteala rut te kerusaan tew te kepepatey, ugaid ne ruen pà egkepenareng tew. Ne embiya ruen pà egkepenareng tew ne iyan tew egkesebutan te warà pà med-ulaula ini se egkepenareng tew, su warà etew ne ebpenareng pà te ned-ulaula en. ²⁵ Ugaid ne geina te warà

pà med-ulaula arà se egkepenareng tew, ne kenà ki egkeperà gewii te edtehad ki pà.

²⁶ Ne kenà arà dà se egkepenareng tew ne ebpeketavang kayi te kebmeluvey tew su ke Kedesenan ne Ebpetuntul te Menusiyà se ebpeketavang keytew rema. Upama ke ebpengeningen i te Eleteala ugaid ne kenà tew egketuenan ke engkey se kebuyù tew, ne ke Kedesenan ne Ebpetuntul te Menusiyà se ebpemuyù keytew diyà te etuvangan te Eleteala su sikandin se ebpsabut ke engkey se netahù te hinawa tew ne kenà tew en egketuenan te edlalag. ²⁷ Ne ke amey tew ne Eleteala se netau ke engkey se kayi te hinawa tew, ne netuenan din ded dema ke engkey se riyà te itungan te Kedesenan ne Ebpetuntul te Menusiyà. Su arà se ebpemuyuen te Kedesenan ne Ebpetuntul te Menusiyà mekeatag keyta, ne arà iya dema ke kiyug te Eleteala ne ibehey rin keytew te menge anak din.

²⁸ Ne sikitew ke mibpemili te Eleteala te iyan nerumaan ke netahù te itungan din, netuenan tew te langun ne egketemanan tew ne ebeluyen din ne keupianan tew kayi te keytew ne egkelimù kandin. ²⁹ Su daan en ne netuenan te Eleteala ke engkey se ebperetiyyaya kandin, ne sikandan se nepemili din neraan su apey sikandan ne ebpekeiring ki Hisus ke Anak din. Iyan din ked-iringa ketà su apey sikitew ne mibperetiyyaya ne ebpekeiring ki te ari rà ne anak din ne iyan tew kakey ne si Hisus. ³⁰ Ketà be ne mibpemili te Eleteala ke langun ne menge etew ne netuenan din neraan ne ebperetiyyaya kandin. Ne langun tew ne mibpemili din ne iyan din kadtengteng keytew ne metidtu riyà te etuvangan din. Ne langun tew ne iyan din kadtengteng ne metidtu ne ebpekeamung kiyu dut te kebpepurù din te Anak din.

Engkey se Egkepeiringan Tew Mekeatag te Limù te Eleteala Keytew?

³¹ Na geina te netuenan tew ke langun ne mid-ulaula te Eleteala te kebpekita rin dut te limù din keytew, ne netuenan tew se benar iya ne kayi medtampil ke Eleteala te keytew, ne warà ebpekekaid keytew. ³² Su misan ke Anak din si Hisus ne warà din pekinuhuni, ugaid ne midsuhù din kayi te ampew te dunya su apey ebpekepeimatey ne idselidig kenitew atag dut te salà tew. Ne embiya iring ketà ke pengeliman din keytew, ne kenà egkepakey ne kenà din ibehey keytew ke langun ne kurang tew. ³³ Warà etew ne ebpekesumbung dut te sikitew ne mibpemili te Eleteala, su riyà te etuvangan din ne iyan din kadtengteng keytew ne metidtu. ³⁴ Ne warè en ebpekekahi te dait ne edusaan ki, su mibpebpatay si Hisu Kristu ne inselidig te menge salà tew. Ne kenà ketà dà taman su nevanew en dema sikandin ne guntaani ne riyà sikandin te egkekewanen te Eleteala se ebpeninindeg keytew. ³⁵ Ne embiya iring ketà, ne warà misan engkey en ne ebpekepebelag keytew rut te limù ni Hisu Kristu. Su misan egkerasey ki, egkemutuwan ki, ebpekesekitan ki te ruma tew, egkerasey ki te vitil etawa te kewewereey, ebpemekeiran ki etawa ed-imetayan ki, ne netuenan tew te kenà egkeawà ke kerekelà te limù ni Hisus keytew. ³⁶ Su iyan din egkeiringan ke impesurat ne Lalag te Eleteala ne egkahie,

“Sabap dut te keduma rey keykew, Eleteala,
ne layun key egkemengeyawi te kepatey.
Su iring key te menge bilibili

ne mehaan en ne ed-imetayi.”

³⁷ Ugaid ne misan egkerasey ki iring ketà ne kenà ki ebbetalew, su iyan ki red ebpeketawan su atag dut te gehem ni Hisu Kristu ke nelimù keytew. ³⁸ Su netuenan ku ne warà misan engkey en ne ebpekepebelag kenitew dut te rekèlè ne limù te Eleteala kenitew, misan keuyag etawa kepepatey, misan menge suluhuen te Eleteala etawa ke ruma pà ne egkamal diyà te langit etawa piya engkey en ne ruen ketehel din ne ebpekeandek, misan ini se egketemanan tew te guntaani en etawa ke ebpekeuma keuremà, ne warè ebpekepebelag kenitew dut te limù din keytew. ³⁹ Warà misan engkey en ne ruen ketehel din diyà te divavew, etawa kayi te insekednar, etawa misan engkey ne nelimbag te Eleteala ne ebpekepebelag kenitew dut te limù din kenitew ne impekita rin ne kayi egenat te ki Hisu Kristu ke Kerenan tew.

9

Ini ne Mekeatag te Kebpemilì te Eleteala Dut te Menge Etew Rin

¹ Na, benar ini se egkehiyen ku keniyu, su siaken ne kedserihan ni Hisu Kristu ne kenà a edtarùtarù. Ne misan kayi te hinawa ku ne netuenan ku se kenà a edtarùtarù, ne ini se netuenan dema dut te Kedesenan ne Ebbetuntul te Menusiyà su sikandin ke ebayàbayà te hinawa ku. ² Su ruen dekelà ne ibpekebmutu ku ne kenà egkeawà se ibmerungkug te hinawa ku ³ mekeatag te menge suled ku ne kerurumey ku red ne Hudiyanan ne kenà ebperetiyyaya ki Hisu Kristu. Embiya egkepakey rà perem ne siaken se edusaan ne ebpekeselidig kandan, ne siaken se ebpekevelag ki Hisu Kristu su apey ranmekeliy rut te kedusai kandan. ⁴ Su rekèlè se tavang te Eleteala ne impekita rin kandan su rengan ne mibpemilì te Eleteala ke menge kevuwaran ni Israyil ne egkevaluy ne menge anak din, ne sikandan ke mid-anak-anak te Eleteala ne diyà te kandan ne impekita te Eleteala ke kenà egkeseupama ne raman din. Mibaal sikandin te neupakatan te kedadavang kandan, ne imbehey rin kandan ke penduan din, ne sikandan ne mibpenurù din te ralan te kebpenenangur dan kandin, ne merakel se impasad din kandan. ⁵ Ne ke kepuun dan ne mibpemilì te Eleteala ne mevantug ne etew rengan. Ne kayi ebpuun te kevuwaran dan ne in-anak si Hisu Kristu ke Eleteala ne ebayàbayà te langun, ne edait ne edeyuen taman te taman.

⁶ Impasad te Eleteala rengan ke inenakan ni Israyil ne ebeluyen din ne menge etew rin. Ne kenà ku egkekahi te warà metuman te Eleteala ini se impasad din su netuman en ini, ugaid ne kenà langun dut te inenakan ni Israyil ne ebpekeangkun ketà te impasad te Eleteala kandan. ⁷ Iring ded dema ki Abraham dengan, ne kenà langun dut te inenakan din ne ebpekeangkun dut te impasad kandin te Eleteala. Su ruen ma impesurat ne Lalag te Eleteala ne egkahi te, “Ke menge inenakan dut te anak nu ne si Isaac ne sikandan dà ke tuney ne inenakan niyu.” ⁸ Iyan ibpesabut keytew kayi ne ke tidtu ne menge etew te Eleteala ne kenà kayi te andang ne ked-anak te kememenuisyai, ugaid ne riyà ini egketuntun dut te anak ni Abraham ne impasad te Eleteala kandin. ⁹ Su ruen impasad te Eleteala ki Abraham te warà pà in-anak si Isaac, ke sikandin te, “Senge rahun pà guntaan ne edlivet a kayi ne ed-anak en ini se esawa nu si Sara te meama.”

¹⁰ Ne kenà ketà dà taman su guna su lukes en ini se anak dan ne si Isaac ne senge etew ne keep-epuan tew rema ne mid-anak dan ki Rebecca te sepingleelin meama, si Jacob wey si Isew. ¹¹⁻¹² Ne guna su mehaan en ne ed-anak si Rebecca ne migkehiyan sikandin te Eleteala te, "Iyan edsugsuhuen ke kakey dut te ari rin." Migkahi rin ini te warà pà ianak ini se sepingle, ne warà pà kenaweng dan te ed-ulaula te meraat wey meupiya. Tembù be ned-ulaula ini su ibpesabut te Eleteala te ke kebpemilì din te menge etew ne kenà kayi ebpuun te menge meupiya ne ulaula ran, ugaid ne ke kandin dà ne kiyug. ¹³ Su iyan din egkeiringan ke impesurat ne Lalag te Eleteala se egkahi te, "Iyan dekelà te hinawa ku ne si Jacob, kenà si Isew."

¹⁴ Embiya iring ketà ne kalu ke ruen egkahi te kenà metidtu ke Eleteala te ralan te kebpemilì din su ruen ebpelebiyen din. Kenà arà!

¹⁵ Su migkahi ke Eleteala rengan diyà te ki Moises te,

"Siaken se ebayàbayà

ke engkey ne etew se egkeyruwan ku,

wey engkey ne etew se igkelimù ku."

¹⁶ Ketà ne nesebutan tew te ke penaub te Eleteala dut te langun ne etew ne kenà kayi ebpuun te kiyug te menusiyà etawa ke meupiya ne ulaula ran, ugaid ne sabap dut te iru te Eleteala. ¹⁷ Iring dut te impesurat ne Lalag te Eleteala ne migkahi rin ki Parao ne senge etew ne ratù diyà te inged ne Ihiptu rengan ne warà din ingkeyru. Ke sikandin te, "Tembù mibaluy ku sikew ne ratù su apey egkekita ke gehem ku ketà ke egketalew ku sikuna wey apey a egkevantug kayi te langun ne kelibutan." ¹⁸ Ketà be ne nesebutan tew te igkeyru te Eleteala ke etew ne egkiyuhan din, ne ebpedterayen din en ke meresen te ulu rin su apey rin igkeperayun ke keresen te ulu rin.

¹⁹ Ne geina te iring ketà ne kalu ke ruen ebpekekahi te, "Embiya ini se ulaula te Eleteala, ne meambe ke ebpmuunen din ke menge etew te salà dan? Su embiya ruen egkiyuhan te Eleteala ne warà ebpekeengked te kiyug din." ²⁰ Ugaid ini se egkehiyen ku keniyu ne maa, egkepakey ve te sikitew ne midlimbag dà te Eleteala ne ebpenavak kandin? Embiya idsempità ta te midiyun ne kuren, ne engkey, egkepakey ne egkahi ke kuren te, "Meambe ke iring kayi se kineryiuna nu kedi?" ²¹ Su iring te etew ne ebpendiyun ne sikandin se ebayàbayà ke ebmemenuwen din te ebpebparas ke menge ediyunen din. Su embiya ediyun sikandin te seveka ne ebpebperasan din te meupiya su edeyreyanan, ne ke seveka ne iyan din dà kediyun ne kuren dà dè duen, ne kandin dà ne bayàbayà.

²² Ne engketà ded be rema ke Eleteala su ibayàbayà din ke engkey se kebped-ulaula rin dut te menge etew. Su misan egkesuatan din en te ebpekita ke epes din wey ke gehem din te edusa dut te menge etew ne warà mebperumaruma kandin, ne warà din pà ul-ulaa. Su midtigkeran din pà lavew ini se menge etew ne andang ne edereetan din. ²³ Iyan din kinetikker kandan su apey langun tew ne ebpekesabut te urar sikandin te keupianan dut te menge etew ne egkeyruwan din, su ke menge etew ne egkeyruwan din ne ebpenehanaan din te kedubràpà diyà te kandin ne keupianan keuremà. ²⁴ Su sikitew ke menge etew ne mibpemilì din ne ebpenehanaan din, ne kenà kayi rà ebpuun te menge Hudiyanan, su misan ke kenà Hudiyanan dema. ²⁵ Su ini ke

nekahi rin dut te impesurat te senge etew ne ebpelambas te lalag din dengan ne si Oseas se egkahi te,

“Ke menge etew ne kenà ku sakup dengan ne ebeluyen ku sikandan ne menge sakup ku.

Ne ke menge etew ne kenà ku igkelimù dengan ne dekelà ku en sikandan te hinawa guntaani.

²⁶ Ne misan diyà te inged ne migkahi ku kandan te kenà sikandan ke sakup ku,

ne ketà ne egkehiyan ku sikandan te sikandan ke tidtu ne menge anak te Eleteala,

ke Eleteala ne warà kemetayen din.”

²⁷ Ne ruen dema impesurat te Eleteala ki Isayas dengan mekeatag te menge etew ne kevuwaran ni Israyil, ke sikandin te,

“Ne misan ke kevuwaran ni Israyil

ne mibmerakel en su kenà en egkevirang

su iring en te pantad diyà te beyvey te rahat,

ugaid ne deisek nevenar se ebpekeliyu

dut te kedusa te Eleteala.

²⁸ Su kenà duwaruwa ne egkeuma arà se hewii

ne seguguneey ne edtumanan te Eleteala ke lalag din

ne edusaan din ke langun ne menge etew

kayi te ampew te dunya.”

²⁹ Su iring ini rut te neuna ne nekahni Isayas te,

“Embiya warà ki meyruwi te Eleteala

ne warà repeng te gehem din,

ne warà nesamà dut te sikitew ne Hudiyanan

su ebpekeiring ki rut te menge etew

te inged ne Suduma ne neherà,

uya, ebpekeiring ki rut te menge etew

te inged ne Gumura ne nevinasa.”

Ini ne Mekeatag te Menge Hudiyanan ne Midsarig dà te kandan ne Gaga te Kedtuman te Penduan ne Warà dan Mebperetiyyaya dut te Mid-ulaula ni Hisus Kandan

³⁰ Iyan ku ibpesabut kayi ne ke menge etew ne kenà Hudiyanan ne misan warà neketahù te itungan dan se kebpemengà te ebmetidtu ran diyà te etuvangan te Eleteala, ne ruen ded mibmetidtu kandan su sabap dut te kedsarig dan te Eleteala. ³¹ Ugaid ne ke menge Hudiyanan ne iyan dan kunaan ke kayi ran ebmetidtu rut te kedumai ran te penduan, ne nasi en be ne warà nepekayan dan su warà dan ma megaga te edtuman. ³² Ne meambe ke warà nepekayan dan? Su iyan dan midserihan ke kandan ne egkegaga te kedtuman te penduan, kenà ke mid-ulaula ni Hisus kandan. Ne sabap dut te warà dan kebperetiyyaya kandin, ne iring dan te menge etew ne neketempilag diyà te batu. ³³ Ini se batu ne netempilahan dan ne ruen nekahni te Eleteala dut te impesurat din se egkahi te,

“Intey niyu ma se intahù ku ne etew

riyà te inged te menge Hudiyanan ne ed-ingaranan te Siyun, ne iring sikandin te batu ne egketempilehan te menge etew,

uya iring sikandin te batu ne egkeurembakan dan.

Ugaid ke etew ne ebperetiyyaya kandin

ne kenà ebpekedsendit dut te kebperetiyaya rin kandin.”

10

¹ Na menge suled ku, iyan ku perem egkesuatan ne egkepelihau ke menge ruma ku ne Hudiyenan dut te kedusai kandan te Eleteala! Ini ve imbe ke lelayun ku ibpengeningeni te Eleteala! ² Netuenan ku se meilut neverar se kedadumana ran te penduan te Eleteala, ugaid ne ini se meilut ne kedadumana ran te penduan ne warà mekeudsad dut te benar ne penurù mekeatag kandin. ³ Su warà dan metueni te ruen ralan ne mibeelan te Eleteala te kebmetidtu ran diyà te etuvangan din, ugaid ne mibaalvaal dan te kandan dà ne ralan ne warà dan telimaa ke ralan te Eleteala ne kebmetidtu ran. ⁴ Su geina te nekeuma en si Hisu Kristu ne ke keduma ran te penduan ne warè en egkeetahan din, su kayi rà ebpuun te kebperetiyaya tew ki Hisu Kristu se ralan te kebmetidtu te etew riyà te etuvangan te Eleteala.

Piya engkey ne Etew ne Ebperetiyaya ki Hisu Kristu ne Ebpekeliyu rut te Kedusa te Salà Dan

⁵ Ruen impesurat ne lalag ni Moises dengan mekeatag te etew ne iyan din kunaan ke kedadumana rin te penduan se iyan kedadungteng kandin te Eleteala ne metidtu. Ke si Moises te, “Ke etew ne iyan din edserihan se kedadumana rin te penduan, ne egkevehayan sikandin te umur ne warà edtamanan din embiya negaga rin te edtuman ke langun ne nekahi rut te penduan.” ⁶ Ugaid ne ruen impesurat ne Lalag te Eleteala mekeatag te kedsarig tew ki Hisus se iyan kedadungteng keytew te Eleteala ne metidtu. Ne ini se ibpesabut keytew te kenà en dait ne ebpegitungen tew te engkey se egkepakey ne ibpendiyà te langit su apey ed-anjey ki Hisu Kristu kayi te ampew te dunya. ⁷ Ne kenà dait dema ne ebpegitungen tew ke engkey se egkepakey ne ibpendiyà te Ivayaan su apey mevanew si Hisus su nevanew en. ⁸ Su ruen ruma ne impesurat ne Lalag te Eleteala ne ibpesabut keytew te ini en te kenyi ke Meupiya ne Tudtul ne ebpuun te Eleteala su apey kew ebpekepegitung wey egkekahi niyu. Ne ini ke Tudtul ke ibpemenudtul dey te ke kedsarig te menge etew ki Hisus se iyan kedadungteng te Eleteala kandan ne metidtu. ⁹ Su embiya ibpayag niyu te mibpesakup kew ki Hisu Kristu ke Kerenan tew wey ebperetiyaya kew neverar te mibanew sikandin te Eleteala ne ebpekeliyu kew rut te kedusa te Eleteala te salà niyu. ¹⁰ Su sabap dut te kedsarig tew ki Hisu Kristu ne iyan kedadungteng te Eleteala keytew ne metidtu riyà te etuvangan din. Ne kayi te ibpayag tew ini diyà te menge ruma tew, ne ebpekeliyu ki rut te kedusa te Eleteala keytew. ¹¹ Su ruen impesurat ne Lalag te Eleteala ne egkahi te, “Misan engkey ne etew ne ebperetiyaya ki Hisu Kristu, ne kenà sikandin ebpekedsendit dut te kebperetiyaya rin.” ¹² Tembù be misan engkey ne etew ne egkepakey ne medsarig en ki Hisu Kristu, Hudiyenan ma sikandin etawa kenà su warà biraan din. Su seveka rà ke Kerenan dut te langun ne menge etew, ne melimù neverar sikandin dut te langun ne ebuyù te tavang kandin. ¹³ Su iring dut te impesurat ne Lalag te Eleteala ne egkahi te, “Misan engkey ne etew ne ebuyù te tavang riyà te ki Hisu Kristu ne ebpekeliyu sikandin dut te kedusa te salà din.”

¹⁴ Ugaid ne engkey se kebpetavang te menge etew dut te Kerenan embiya warà dan pà mebperetiyyaya kandin? Ne engkey ma se ralan te kebpekeperetiyyaya ran embiya warà dan pà mekerineg te Meupiya ne Tudtul mekeatag kandin? Ne engkey se ralan te kebpekerineg dan mekeatag kandin embiya warà etew ne ebpmenumdutl dut te Meupiya na Tudtul mekeatag kandin? ¹⁵ Ne engkey se ralan te ebpmenumdutl dut te Meupiya ne Tudtul embiya warà etew ne edsuhuen te ebpepenudtulen? Ugaid ne ruen menge etew ne midsuhù te Eleteala su iring dut te impesurat ne Lalag te Eleteala ne egkahi te, "Nengehalewhalew ran nevenar te kebpekeuma rut te menge etew ne ebpmenumdutl te Meupiya ne Tudtul." ¹⁶ Ugaid ne guna su impemenumdutl en ke Meupiya ne Tudtul ne deisek dà kandan se mibperetiyyaya. Su iring dut te lalag te senge etew ne mibpelambas te lalag te Eleteala rengan ne si Isayas ne migkahi te, "Is kerenan, iring te warà utew ebperetiyyaya dut te impemenumdutl dey." ¹⁷ Ketà ne nesebutan tew te iyan dalan te kebpekeperetiyyaya te etew ki Hisu Kristu ne sabap te egkerineg din ke Meupiya ne Tudtul mekeatag kandin. Ne iyan dalan te kebpekerineg din dut te Meupiya ne Tudtul ke ruen ebpmenumdutl kandin.

¹⁸ Ne kalu ke ruen etew ne ebpekekahi te, "Arà se menge Hudiyanen ne warà mebperetiyyaya, maa warà den pà merineg ini?" Asal, su nerineg dan ded ini rengan. Su ruen impesurat ne Lalag te Eleteala ne egkahi te,

"Ini se lalag ne nekeeneb en
dut te langun ne inged kayi te ampew te dunya.

Uya, warà tedtab din ini se tudtul
ne impemenumdutl kayi te ampew te dunya."

¹⁹ Ne kalu ke ruen duma ne etew ne egkahi te, "Maa, nesebutan be imbe te menge Hudiyanen ini se impemenumdutl kandan?" Nesebutan dan nevenar su iyan en iya neuna ne mibaag kandan ne si Moises su ruen impesurat ne Lalag te Eleteala ne egkahi te,

"Ne ebpeim-imaan ku sikiyu ne menge Hudiyanen
rut te kedtevangi ku te menge etew ne kenà Hudiyanen.

Uya, ebpelengeten ku sikiyu su atag te ingkeyruwi ku
ke menge etew ne midsudian niyu."

²⁰ Ne mepmepayag nevenar se Lalag te Eleteala ne impenudtul rengan ni Isayas se migkahi te,

"Ke menge etew ne warà mebpemengà kediey
ne netuen a nikandan.

Uya, ke menge etew ne warà a impenginginsà nikandan
ne mibpepayag a riyaw te kandan."

²¹ Ugaid ne ruen lalag te Eleteala ne impenudtul rengan ni Isayas mekeatag te menge Hudiyanen ne egkahi te,

"Utew meresen se ulu ran wey utew ran menge suer,
su misan egkelayun en se kedadawag ku kandan
te ebpetelimà te limù ku ne kenà dan ebpmineg."

11

Ini ne Mekeatag te Duen ded Kegkeyru te Eleteala dut te Menge Hudiyanen

¹ Misan pà benar ne meresen ke ulu te menge Hudiyanan diyà te Eleteala, ne maa mid-engkeran be te Eleteala ini se kandin ne menge etew? Kenà en iya arà! Su siaken dema ne Hudiyanan e red iring kandan su inenakan a ni Benjamin ne seveka ne inenakan ni Abraham. ² Warà ded indumilì te Eleteala ke mibpemilì din ne kandin ne menge etew dengan te aney en dut te kinelimbag din. Su netenuran niyu red ma vuwa ke impesurat ne Lalag te Eleteala rengan te kinevuyù ni Elias diyà te Eleteala mekeatag dut te meraat ne mid-ulaula te menge ruma rin ne Hudiyanan. ³ Ke si Elias te, “Kerenan, mibpengimetayan dan ke menge etew ne ebpelambas te lalag nu ne midsuhù nu, ne midereetan dan en ke ebpelengesaan te ibehey rey diyà te keykew. Ne siaken dà be se nesamà ne ebpengarap keykew, ne egkiyuhan a rema nikandan te ed-imatey.” ⁴ Ugaid ne iyan intavak te Eleteala kandin te, “Kenà sikuna rà su ruen pà pitu ne ngivu ne menge etew ne kevuwaran ni Israyil ne warà mebpengarap ki Baal, ke kenà tidtu ne eleteala.”

⁵ Ne iring din ded dema te guntaani en ne hewii su ruen ded menge Hudiyanan ne mibperetiyyaya ki Hisu Kristu ne nepemilì te Eleteala sabap dut te daat te nanam din kandan. ⁶ Ini se kinepemilì din kandan ne kenà dut te meupiya ne mid-ulaula ran, ugaid ne sabap dut te kinedaat dà te nanam din kandan. Su embiya iyan kinepemilì te Eleteala se atag dut te meupiya ne mid-ulaula ran ne tembù pà engketà su kenà tidtu ne daat te nanam din.

⁷ Ketà be ne nesebutan tew te kerekelan dut te kevuwaran ni Israyil ne warà dan metuen ke ralan te kebmetidtu ran diyà te etuvangan te Eleteala misan midsebenar dan perem te ebpemengà. Ugaid ne misan iring ketà, ne ruen ded nearam te Eleteala ne neketuen te ralan te kebmetidtu. Ne ke ruma kandan ne warà mibpeniniga dut te lalag te Eleteala su apey kenà dan merineg ke benar ne tudtul. ⁸ Su iyan din iring ke impesurat ne Lalag te Eleteala ne egkahi te,

“Iring te midseluuvan te Eleteala te kuren ke itungan dan;
su taman guntaani

ne misan duen mata ran ne kenà dan ebpekekita,
uya, misan duen telinga ran ne kenà dan ebpekerineg.”

⁹ Ne ruen dema impesurat ne Lalag te Eleteala ne nekahi ni Dabid, ke sikandin te,

“Menu ma perem ke kayi ebpun
te kedsarig dan te kebpengevurunan dan,
ne iyan ded ebpekelitag kandan wey ebpekehebpà dan,
ne ke kedusa te Eleteala ne ebpekeuma diyà te kandan.

¹⁰ Menu ma perem ke egkepisek dan
su apey kenà dan en ebpekekita;
ne runturumuntu se egketemanan dan taman te taman.”

¹¹ Ne geina te warà mebperetiyyaya ke menge Hudiyanan, ne maa, mid-engkeran dan en be te Eleteala? Warà iya! Su kayi te kenà dan kebpemineg te Lalag te Eleteala ne ruen en ralan te kebpekepeliyu te menge etew ne kenà Hudiyanan su apey egkeima ke menge Hudiyanan dut te menge etew ne kenà Hudiyanan, ne arà pè be ne ebpekeperetiyyaya ran iring kandan. ¹² Ne sabap dut te kenà kebperetiyyaya te menge Hudiyanan, ne nevehayan te Eleteala te rekèlà ne penaub din ke langun ne menge etew kayi te ampew te dunya. Ne

egenat dema te neawà diyà te menge Hudiyanan ke penaub te Eleteala ne ibehey rin perem kandan, ne nekevehey rin ke rekèlà ne penaub din diyà te menge etew ne kenà Hudiyanan. Ugaid ne wey pè be kenà muna pà se kerekelà te penaub dut te Eleteala ketà te hewii ne id-ulì dut te langun ne menge Hudiyanan ke hinawa ran te kebperetiyaya ki Hisus.

Ini ne Mekeatag te Menge Etew ne Kenà Hudiyanan ne Midtelimà te Eleteala Dut te Kebpeliyu Ran

¹³ Ne sikiyu ini se menge etew ne kenà menge Hudiyanan ne ruen egkehiyen ku keniyu. Netuenan niyu ne midsuhù a te Eleteala ne kedserihan din te ebpmenumudtul ke Meupiya ne Tuditul keniyan te keniyu, ne edtumanen ku ve ini te mevaher se insuhù din kediey. ¹⁴ Su kiyug ku perem ne meima ke menge ruma ku ne Hudiyanan te kayi te kedtevangi ku keniyu te menge kenà Hudiyanan, ne ini se petihayun ku te ruen diyà te kandan ne ebpekeperetiyaya ne ebpekepeliyu te kedusa te Eleteala kandan. ¹⁵ Su ketà te mid-engkenà te Eleteala ke menge Hudiyanan, ne ini se menge etew ne kenà Hudiyanan se mibpekid-ulit kandin. Ne wey pè be kenà muna pà se kerekelà te penaub dut te Eleteala ketà te ebpekid-ulit en maa ke menge Hudiyanan te kebperetiyaya. Su iring te menge etew ne minatey ne nevanew en maa.

¹⁶ Su ruen sempità ku mekeatag te menge Hudiyanan te sikandan ded ke menge etew te Eleteala su ke menge apù dan ne kandin. Su sikami ne menge Hudiyanan ne iyan dey egkeiringan ne pan su kayi te betasan dey ne ruen edtevieng dey rut te pan ne ebeelan dey su ibehey rey te Eleteala ne timbang te langun ne ibehey red dema diyà te Eleteala. Ne ruma pà ne upama ku ne iring te kayu su embiya ke ralid din ne iyan kemuney ke Eleteala, ne misan ke menge subpang din ne edtuvù ketà ne kandin ded dema. ¹⁷ Ne ke menge Hudiyanan ne iring te menge subpang ketà te kayu ne impemula te Eleteala ne warà mebpemehas ne midtamped te Eleteala, ne arà pà ne migkuwa sikandin te menge subpang te kayu diyà te ketelunan ne idsumpat din ketà te midtamped din ne subpang su apey edtuvù ketà te kayu. Ne sikiyu se kenà menge Hudiyanan ne sikiyu arà ke mehintelunan ne subpang te kayu, ugaid ne ke kayu ne nesumpatan niyu ne ke menge Hudiyanan ne nepemillì te Eleteala ne kandin ne menge etew rut te aney en se aney. ¹⁸ Tembù be sikiyu ne nekesambì ne ingkesumpat dut te midtamped, ne kenà niyu peleviya ke itungan niyu se egkahi te iyan kew pà lavi ne meupiya ketà te nengetamped! Su sikiyu ne subpang kew rà ne insumpat te Eleteala apey ebpeketuvù ketà. Ne kenà niyu lipati te kenà sikiyu se subpang se egenatan te kegkeuyag dut te dalid, ugaid ne ke dalid se egenatan te kegkeuyag dut te subpang ne iring te sikiyu.

¹⁹ Ne kalu ke egkahi kew te, “Sikami ini se kenà menge Hudiyanan ne iyan key pà tumù su midtamped sikandan te Eleteala su apey sikami se idsambì kandan.” ²⁰ Ne benar ne nekesambì kew kandan. Ugaid ne iyan puunan te kinetempera te Eleteala kandan su warà dan mebperetiyaya ki Hisus, ne ke puunan te kinetuvù niyu guntaani ne ke kineperetiyaya niyu. Ugaid ne kenà niyu ve ibpendekarak, inemulà se ingati niyu nevenar ke ulaula niyu. ²¹ Su embiya iring

ketà se midtamped te Eleteala ke tunganey ne subpang ne ke menge Hudiyenan, ne iyan kew pè be kenà tempera se mehintelunan dà ne subpang embiya ed-iring kew red kandan.²² Ketà be ne nesebutan tew te rekèlè se daat te nanam te Eleteala rut te menge etew ne ebperetiyyaya kandin, ugaid ne warà ma senge etew rà ne kenà din edusaan embiya kenà dan ebpmineg kandin. Ne ed-iseg pà ke daat te nanam din keniyu embiya kenà kew edsuwey dut te kebperetiyyaya niyu. Ugaid ne embiya edsuwey kew, ne ed-iringen kew red dut te subpang ne midtamped din.²³ Ne ini se menge subpang ne midtamped din, ne ke menge Hudiyenan, embiya ibped-ulit dan en te itungan dan te kebperetiyyaya ran te Eleteala ne id-ulit ded sikandan idsumpat dut te subpang te kayu ne mibpuunan dan su egkegaga ma te Eleteala se kebped-ulit din.²⁴ Ne sikiyu ne kenà menge Hudiyenan ne kenà kew tunganey ne menge subpang ketà te kayu ne impemula su riyà kew ebpuun te ketelunan ne kayu, ugaid ne insumpat kew rà ne subpang ketà te kayu ne impemula rin. Ne embiya negaga te Eleteala ini keniyu te kenà diyà ebpuun te kayu ne impemula rin, ne iyan din pè be kenà megaga te ebped-ulit ke tunganey ne subpang ne ketà en iya ebpuun.

Ini ne Mekeatag te Ruen Daat te Nanam te Eleteala Dut te Langun ne Menge Etew ne Ebperetiyyaya Kandin

²⁵ Na menge suled ku ne kenà Hudiyenan, ruen ibpayag ku keniyu ne in-eles rengan. Ne iyan ku kebpayag keniyu su apey kenà niyu igkependekarak ke mid-ulaula te Eleteala keniyu iring te sikiyu se muna pà dut te menge Hudiyenan. Ini ve arà se in-eles, ne ayan se kenà kebperetiyyaya te menge Hudiyenan ne edsahad dà. Su embiya ve ke langun niyu ne kenà Hudiyenan ne nepemili te Eleteala se mibperetiyyaya en kandin, ne ketà pà ne egkeawà ke keresen te ulu ran ne ebpekeulit ke itungan dan te kebperetiyyaya, ne egkepeliyu ran en te kedusa kandan te Eleteala. Su iyan din iring ke impesurat ne Lalag te Eleteala ne egkahi te,

“Riyà te inged te menge Hudiyenan ne ed-ingaranan te Siyun
ne edlepew ke etew ne ebpereliyu
te langun ne menge kevuwaran ni Jacob,
su id-awà din en ke meraat ne ulaula ran.

²⁷ Uya, ketà te igkeawà ku en
“ke menge salà dan,” ke se Eleteala,
“ne ke raan ne impasad ku kandan
ne edtumanen ku en.”

²⁸ Su geina te mid-engkenà ke menge Hudiyenan dut te Meupiya ne Tudtul te Eleteala, ne nevaluy ran ne kunterà din. Ugaid ne arà se kineengkenà dan, ne ketà se puunan te kegkevehayi keniyu ne kenà Hudiyenan te penaub dut te Eleteala. Ugaid ne andang en sikandan ne mibpemili te Eleteala ne menge etew rin ne dekelà ded lavew sikandan te hinawa rin su atag dut te pasad din te keep-epuan dan.²⁹ Su nepemili dan te Eleteala ne mibpenaub din sikandan, ne kenà din ed-ewien ke penaub din kandan su ke itungan te Eleteala ne kenà edsambisambi.³⁰ Ne sikiyu ne kenà menge Hudiyenan, dengan ne warà kew mebperetiyyaya te Eleteala, ugaid ne guntaani ne neyruwan kew rin wey mibpereliyu kew en nikandin. Ne ini se kegkeyru rin

keniyu ne egenat dut te kineengkenà te menge Hudiyanen kandin.
³¹ Ne iring din ded be ketà ke menge Hudiyanen te misan pà te kenà dan ebperetiyaya te Eleteala guntaani, ne ruen ded gewii ne edaat se nanam din kandan iring dut te kinekeyruwi rin kenyu. ³² Su ke Eleteala ne egkiyuhan din ne egkesebutan dut te langun ne menge etew te sikandan ne mekesesalà ne dait ne edusaan, su apey ebpesebutan keytew te ruen daat te nanam din te kebpesehad din te salà te langun ne menge etew.

Ini ne Mekeatag te Kebpeselamat tew te Eleteala dut te Keupiya Rin kayi te Keytew

³³ Iring te wayig ne edtudà
 se kerekelà te daat te nanam te Eleteala
 dut te langun ne menge etew!
 Ne ke ketampas wey ketau rin
 ne kenà egketegkad!

Warà etew ne ebpekesagkew te kukuman din!

Ne warà etew ne ebpekesabut te kandin ne kebpepevayà!

³⁴ Su iyan din iring ke impesurat ne Lalag te Eleteala ne egkahi te,
 “Engkey rà se nekesabut te itungan te Eleteala?
 Uya, engkey rà la se ebpekepemandù kandin?

³⁵ Ne iring din ded dema ne warà etew
 ne ebpekevehey kandin te misan engkey en
 su apey ebpeulian din kandin!”

³⁶ Su langun ne nelimbag
 ne riyawà ebuun te kandin ded ne bineelan.

Ne sikandin ded ke ebayàbayà kayi te langun,
 ne iyan din kedlimbag kandan su apey edeyuen sikandin.
 Ketà be ne edeyuen tew ke Eleteala taman te taman!

12

Ini ne Mekeatag te Ibehey tew ke Hinawa tew te Egelevek te Eleteala

¹ Engketà be menge suled ku, ne geina te rekèlè se keupianan ne imbehey te Eleteala keytew, ne ebuyuen ku kenyu te irumakan niyu kandin ke lawa niyu te ed-ulaula te kiyug din dà su apey kew ebpekesuhat te hinawa rin. Ini se ed-ul-ulaan niyu su ini ke dait ne ralan te kebpengarap niyu kandin. ² Ne kenà niyu peun-unuti ke menge ulaula kayi te ampew te dunya ne egkunterà te Eleteala, ugaid ne ivehey niyu te Eleteala ke itungan niyu su apey ke daan ne perangey niyu ne egkevehuwan din. Ketà be ne egkesebutan niyu ke kiyug te Eleteala kayi te kenyu, ne egkesebutan niyu ke ulaula ne ebpekesuhat te hinawa rin su apey warà igkesewayi kenyu.

³ Ne geina te ruen ketau ne imbehey kediey te Eleteala te kebpemesabut te lalag din, ne ebuyuen ku te langun niyu ne kenà niyu pegitunga te sikiyu rà se ruen gaga rin. Ugaid ne peketidtuwa niyu ke itungan niyu dut te negaga niyu, ne iyan niyu serihi ne endei rà taman te ketau ne imbehey keykew te Eleteala ketà te kedsarig niyu kandin. ⁴ Su sikitew ne mibperetiyaya ne ke ketau tew ne warà meked-iring. Su iring te lawa tew ne seveka rà ke lawa, ugaid ne merakel se edsusunan din ne uman senge susun ketà ne senge bias ke kandin ne egkeetahan. ⁵ Ne iring din ded dema te sikitew ne

menge mibperetiyaya, su misan medmerakel tew ne neseveka ki rà ne lawa sabap dut te kebperetiyaya tew ki Hisu Kristu. Ne iring ded be rema ketà ke kebchemekebpiket tew te menge ruma tew, su iring ki rut te merakel ne edsusunan te lawa tew.⁶ Ne geina te warà memeked-iring ke imbehey te Eleteala ne ketau rut te sikitew, ne iyan tew rà egeleveken ke imbehey rin keytew. Upama ini, embiya iyan ingkevehey te senge etew rut te sikitew se ebpemenudtl ke engkey se impesabut kandin te Eleteala, ne arà en imbe se geleveka rin te endei taman se sarig din.⁷ Embiya iyan imbehey keytew ne ketau te edtavang te ruma tew, ne arà imbe se ed-ul-ulaan tew se edtevangan tew ke menge ruma tew. Etawa ve kebpenurù, ne ebpenurù ki imbe.⁸ Ne embiya iyan imbehey keytew ne ketau te ebag-et te hinawa te ruma tew, ne arà imbe ke ed-ul-ulaan tew. Ne embiya manen iyan imbehey keytew ne kedadvang tew, ne iyan iya se edtevangan tew ke menge ruma tew ne ebpegungayà te tavang. Ne embiya maa iyan imbehey keytew se ebpeneheewit te menge mibperetiyaya, ne arà imbe ke edsemikaran tew. Ne embiya maa iyan imbehey keytew ne ke ketau te edtuganur te ebpengipesangan, ne iyan iya mehalew se kedtevangi tew kandan.

⁹ Ne ke limù ne ibpekita tew te menge ruma tew ne kenà kayi rà te ampew ugaid ne ibpetuneb tew te hinawa tew. Ne ebpekeriyuan tew ke meraat ne ulaula, ne egeweran tew te mevaher ke meupiya.¹⁰ Ne sikitew se mibperetiyaya en ki Hisu Kristu, ne iyan iya se ebpelimlimuey ki iring te edtutunayà ne ebpenusuled. Ne ebpeededatey ki nevenar te menge ruma tew.¹¹ Kenà ki ebpepepehul te kebpenenangur tew ki Hisu Kristu ke Kerenan tew, ugaid ne id-amin tew ke hinawa tew se kedadumana tew rut te kiyug din.¹² Ne egalewhalew ki ve kayi rut te ebpenerengen tew keuremà, ne kenà ki ebpemivig ke embiya ruen kemeresayan tew, ne layun ki ebpengeningeni te Eleteala.¹³ Ne ebehayan tew te tavang ke menge suled tew te kebperetiyaya ne ruen kurang din, ne egelhelaan tew ke menge etew ne sumeseharey.

¹⁴ Ke menge etew ne ibpakesakit keytew, ne ibpengeningeni tew te Eleteala ne ebpeneuveun din sikandan. Uya, ibpengeningeni tew te Eleteala ne ebpeneuveun sikandan, ne kenà din edusaan.¹⁵ Embiya ruen duma tew ne egkehalew, ne eduma ki rema rut te igkehalew ran. Ne embiya ruen ruma tew ne egkemutuwan, ne eduma ki te kemutu ran.¹⁶ Ne langun tew ne mibperetiyaya ki Hisu Kristu, ne iyan iya se egkeseveka ki su apey kiyu kenà ebpmekedlewanà. Ne kenà ki ebpebperayù, ne kenà tew igkeyeyai se kebpekiduma tew rut te malù mevavà keytew. Ne kenà tew ebpegitungen te iyan ki pà bereitungan kandan.

¹⁷ Embiya ruen ibped-ulaula keytew ne meraatey, ne kenà tew edsulian sikandan. Inemulà se iyan tew ed-ul-ulaan ne endei ke ulaula ne meupiya riyà te etuvangan te langun ne menge etew.¹⁸ Ne ed-ul-ulaan tew ke taman ne egkegaga tew te kebaal te meupiya su apey warà kewehaan ne egkeveelan.¹⁹ Menge suled ku, kenà ki edsulì dut te menge etew ne mid-ulaula keytew te meraat, ugaid ne ibehey tew en ne bayàbayà te Eleteala ke engkey se ed-ul-ulaan din kandan. Su ruen impesurat ne Lalag te Eleteala ne egkahi te,

“Siaken se ebayàbayà te kegkesulii kandan,
uya, siaken se edsuli, ke se Kerenan tew.”

²⁰ Ketà be ne iyan tew edumaan ne ke impesurat ne Lalag te Eleteala
ne egkahi te,

“Embiya egkevitil ke kunterà nu, ne pekeena nu.

Ne embiya ebpekeinum, ne peinuma nu.

Su embiya ve iring ketà se mid-ulaula nu kandin,

ne igkeyeyai rin nevenar ke meraat ne mid-ulaula rin keykew.”

²¹ Embiya ruen duma tew ne ed-ulaula te meraat keytew, ne kenà
tew edsureren, su embiya edsurer ki ne egkeewit ki riyà te meraatey.
Ugaid ne iyan timbang ne idsurer tew kandin ne ibpekita tew kandin
ke meupiya ne ulaula tew, su apey rin egkemuhudmuhud ne ketà ne
ebpekeruma sikandin te meupiya.

13

Iyan iya se Ebperumaruma ki Rut te Ebayàbayà te Inged Tew

¹ Langun tew, menge suled, ne iyan iya se ebperumaruma kiyu rut
te menge kumekamal te gubirnu te inged tew, su warà senge etew
ne nevaluy ne egkamal ke kenà ke Eleteala se midtendù kandin ne
egkamal. ² Ketà be ne misan engkey se kenà eduma rut te menge
egkamal te inged, ne iring te iyan din kenà edumaan ne ke Eleteala su
ke Eleteala ma se mibpebaluy kandan ne egkamal. Tembù be ke etew
ne iring ketà ne edusaan te Eleteala. ³ Su ke menge etew ne iyan dan
ed-ul-ulaan ne metidtu, ne kenà dan egkeandek dut te egkamal. Ugaid
ke menge etew ne ed-ulaula te meraat, ne dait ne egkeandek dan. Ne
embiya kenà ki egkiyug ne egkeandek dut te menge egkamal, ne iyan
tew ed-ul-ulaan ke metidtu ne ketà ne egkereyù ki nikandan. ⁴ Su ke
menge etew ne egkamal, ne iring sikandan te sugsuhuen te Eleteala
apey ebpekeiseg ke keupiya dut te ked-uppà tew. Ne embiya mereatey
se ulaula tew, ne dait iya ne egkeandek ki su mevaher se ketehel dan te
kedusa ran keytew. Su intahù sikandan ketà te Eleteala apey sikandan
se ed-ewit te kedusa te Eleteala dut te menge etew ne meraat se ulaula
ran. ⁵ Tembù be ebperumaruma kiyu rut te menge kumekamal keytew
ne kenà kayi rà dut te kegkeandek tew te kedusa te Eleteala, ugaid ne
ebperumaruma kiyu su netuenan tew ne ini se meupiya ne ed-ul-ulaan
tew.

⁶ Tembù be ebayad ki rema te buwis dut te kumekamal keytew su
sikandan se sugsuhuen te Eleteala embiya meupiya ke kebpeneheewita
ran dut te insuhù kandan te gubirnu. ⁷ Arà be ne ebayaran tew ke
langun ne edsusunsusun ne ebuwisan tew. Ne ed-edatan tew nevenar
ke menge kumekamal dut te inged tew su ini ke dait ne ed-ul-ulaan
tew.

Ke Ibpeuna ne Suhù dut te Langun ne Idsuhù Keytew ne Ebpelim-limuey Kiyu

⁸ Kenà kiyu ed-utang. Iyan dà meupiya ne utang tew ne ke idlimù tew
dut te menge ruma tew. Su embiya igkelimù tew nevenar ke menge
ruma tew, ne netuman tew en ke penduan te Eleteala. ⁹ Su ke menge
suhù ne egkahi te, “Kenà ka edlangkadlangkad te esawa nu, kenà ka
ebpengimatey, kenà ka ebpenakew, ne kenà ka egkeima te kearen te
ruma nu,” ne langun kayi ne suhù wey ruma pà ne nesetiman dà kayi

te seveka ne suhù te Eleteala ne egkahi te, "Igkelimù nu ke ruma nu iring te kegkelimù nu te keykew ne hinawa." ¹⁰ Su embiya igkelimù tew ke menge ruma tew, ne kenà egkepakey ne edèdeetan tew sikandin. Tembù be embiya igkelimù tew ke ruma tew, ne netuman tew ke langun ne insuhù te Eleteala dut te penduan.

¹¹ Ne ini ve iya se ed-ul-ulaan tew, su mehaan en ke hewii te edlived ni Hisus te ked-engaya rin keytew. Tembù be kenà kiyu ebpenliplipereng, ugaid ne ebpenehana kiyu te kebpekeuma rin. Su kenà iring te aney en ne kineperetiyyaya tew ne iring te meuhet pà ke kebpekelyed din, ugaid ne guntaani ne mehaan en. ¹² Su mehaan en edsahad ke kerukilemen ne ebpekeuma en ke rayag te keseleman su mehaan en edlived si Hisu Kristu kayi. Tembù be sikitew ke nerayahan en se itungan din ne ed-engkeran tew en ke menge meraat ne ulaula, ne iyan tew ve ed-ul-ulaan ke dait ne ed-ul-ulaan te kerayahan su arà ke timbang Limbutung tew ne ed-alang keytew dut te datù te pekaid. ¹³ Uya, ed-upianan ke menge ulaula tew su ini ke dait ne ed-ul-ulaan dut te menge etew ne ed-ubpà te kerayahan. Ne kenà ki en ebpmekiduma dut te kevurunan te menge etew ne ebpengasak te temperasà wey ebpenginum te ebpeketevereg, ne kenà ki ebpingningiyug etawa ed-ulaula te misan engkey en ne mekeyeyà ne kenà ki ebaal te kewahaan etawa egkeima. ¹⁴ Ne kenà kiyu en eduma rut te meraat ne kiyug te lawa tew, ugaid ne iyan tew ed-iringan ne si Hisu Kristu wey ke ulaula rin, su timbang te sikandin ke limbutung tew ne ed-alang keytew.

14

Iyan iya se Kenà Kiyu Medsawey dut te Menge Ruma Tew

¹ Na embiya ruen duma niyu ne mibperetiyyaya en ki Hisu Kristu ugaid ne meluvey pà se peretiyyaya rin, ne telimaa niyu sikandin te meupiya ne kenà kew pekidlawanà kandin embiya ke peretiyyaya rin ne warà pà mekeiring dut te keniyu. ² Su uman senge etew ne nekebira se itungan din. Su ruen senge etew ne iyan din pegitungan ne egkepakey ne egkeenen din ke piya engkey en, ugaid ke etew ne meluvey pà se kebperetiyyaya rin ne iyan din pegitungan ne kenà idluhut kandin se kegkaan te usa, ne tuved dà se egkeenen din. ³ Ne ini se etew ne misan engkey en ne egkeenen din, ne kenà mebpeditung sikandin se muna pà dut te etew ne tuved dà se egkeenen din. Ne engketà ded dema ke etew ne iyan din dà egkeenen se tuved, kenà mebpeditung te sikandin se muna pà dut te etew ne egkaan te misan engkey en su elin dan midtelimà te Eleteala. ⁴ Tembù be kenà kiyu edsawey te menge ruma tew. Su warà kevenar tew te edsawey te sugsuhuen te ruma ne etew. Su iyan dà edsawey kandin ne ke egelevekan din ke midtuman din be ke mibpeveelan kandin etawa warà. Ne netuenan tew ne ebpekegaga si Hisu Kristu ne edtavang dut te menge sugsuhuen din su apey ran med-ulaula ke meupiya.

⁵ Duen duma ne mibperetiyyaya ne egkahi te, "Ruen kun andew ne egkeedatan pà dut te ruma ne menge andew." Ugaid ne ruen pà ruma ne egkahi te, "Langun ne menge andew ne neked-iring, tembù be kenà ki ebaal te seveka ne iyan dà egkeedatan dut te ruma rin." Ugaid ne iyan ku egkehiyen ne kenà kew duwaruwa ke engkey se metidtu ne

ulaula diyà te etuvangan te Eleteala. ⁶ Su ke etew ne ebpegitung te ruen senge keandew ne egkeedatan nevenar, ne ini se ed-ul-ulaan din te ked-edati rin dut te Kerenan tew. Ne iring din ded dema ke etew ne egkaan te piya engkey en, su ed-ul-ulaan din ini te ked-edati rin te Kerenan tew su Eleteala ke mibpeselematan din ketà te egkekaan din. Ne ke etew ne tuved dà se egkeenen din su kenà kun idluhut se usa se egkeenen, ne ini se ed-ul-ulaan din dema te ked-edati rin te Kerenan tew, ne mibpeselematan din ded dema te Eleteala. ⁷ Su taman te biviyag ki pà ne kenà sikitew se kemuney kayi te hinawa tew, ne misan ketà te ebpatey ki en ne ruen kemuney keytew. ⁸ Su taman te biviyag ki pà ne iyan iya se ibpeuna tew ke kiyug te Kerenan tew, ne ketà te kebpatey tew ne sikandin ded se kemuney keytew. Su iyan din meana ne kepatey keuyag ne iyan egkemuney keytew ne ke Eleteala.

⁹ Su tembù mibpebpatay si Hisu Kristu ne nevanew red manen su apey sikandin ke Kerenan dut te langun ne mibperetiyya kandin, megidsan se biviyag dan etawa ke minatey ran en. ¹⁰ Ne geina te benar ini, ne kenà dait ne iyan ki edsawey rut te menge ruma tew ne mibperetiyya mekeatag te egkekaan dan, etawa igkesuhey tew sikandan. Su keuremà ne langun tew ne ebpengetuvang diyà te Eleteala ne sikandin ke egkukum keytew. ¹¹ Su iyan din egkeiringan ke impesurat ne Lalag te Eleteala ne egkahi te,
“Na geina te benar iya ne biviyag a,” ke se Eleteala,
“ne benar dema ne ruen hewii ne ebpekeuma,
ne langun ne menge etew ne ebpennimbuel
kayi te etuvangan ku.
Uya, langun ne ebpekepehimbenar
te iyan a ke benar ne Eleteala.”

¹² Ketà ne riyà ki ebpengetuvang te Eleteala ne igketarem tew kandin ke langun ne mid-ulaula tew kayi te ampew te dunya.

Kenà Kiyu Ebaal te Kebpekevangan te Menge Ruma Tew te Keduma ki Hisu Kristu

¹³ Tembù be kenà kiyu edsawey rut te ulaula te menge ruma tew ne mibperetiyyaya. Inemulà se iyan tew ed-ul-ulaan ne endei se kenà tew egkepeneheewit ke menge ruma tew ne mibperetiyyaya te kebpekevaal dan te salà. ¹⁴ Su kayi sabap te keduma ku ki Hisu Kristu ke Kerenan ku, ne nesebutan ku te warà misan engkey ne egkeenen ne idawey te Eleteala. Ugaid ne embiya ruen etew ne ebpegitung te ruen egkeenen ne idawey te Eleteala, ne kenà meupiya ne egkaan sikandin. ¹⁵ Ne embiya egkereeetan ke itungan te suled niyu sabap dut te iyan niyu migkaan ini se idawey rin, ne iring te warà limù niyu kandin. Kenà niyu beluya ini se egkeenen niyu ne ebpekederaat dut te sarig te ruma niyu te ebperetiyyaya, su seveka red dema sikandin dut te midselidigan ni Hisu Kristu te kinepatey rin. ¹⁶ Ne misan netuenan tew te ini se ed-ul-ulaan tew ne warà meraat din, ugaid ne ruen duma tew ne ebpegitung te idawey ini te Eleteala, ne iyan iya se kenà tew ed-ul-ulaan ini su apey warà ebpekekahi te misan engkey en ne meraat mekeatag te ini se ulaula tew. ¹⁷ Su kenà iyan Edetuan te Eleteala keytew ne mekeatag dà te egkeenen wey ed-inumen, ugaid ne mekeatag te kebmetidtu te ulaula tew, mekeatag te kebmelintad

te hinawa tew, wey ke kegkehalew te hinawa tew ne riyaw ebpuun te Kedesenan ne Ebpetuntul te Menusiyà. ¹⁸ Su embiya iring ketà se kegkerumai tew ki Hisu Kristu ne ebpekesuhat ki te hinawa te Eleteala, ne egkesuatan dema rut te menge ruma tew ke menge ulaula tew.

¹⁹ Ketà be ne iyan tew ed-ul-ulaan ke endei se kegkeseveka rut te langun tew ne mibperetiyaya, ne ebpekepeiseg te kebperetiyaya tew te keduma tew ki Hisus. ²⁰ Ne egkehiyen ku maa keniyu ne kenà kiyu ederaat te sarig te menge ruma tew sabap dut te egkeenen tew. Su benar ne warà egkeenen ne idawey te Eleteala, ugaid ne iyan din dà kereetayan embiya ruen duma tew ne egkepeneheewit tew te kebpekevaal dan te salà kayi rut te migkaan tew. ²¹ Tembù be kenà ki ed-ulaula te piya engkey en ne ulaula ne ebpekepeneheewit te menge suled tew ne mibperetiyaya te kebpekevaal te salà. Su embiya kayi te egkeenen tew ne usa, etawa ke ebpenginumen tew ne ebpeketeveryer se puunan te egkepeneheewit kandan te kebpekevaal te salà, ne kenà tew en arà ed-ul-ulaan.

²² Ne kayi te migkahi ku keniyu ini, ne iyan niyu rà dumai ke endei se egkeperetiyaya niyu ne ebpekesuhat te hinawa te Eleteala, ugaid ne kenà niyu en ibpekidlewanà mekeatag ketà su iyan dà dait ne netau kayi ne ke Eleteala. Ne mehalew nevenar ke etew ne kenà eduwaruwa se hinawa rin dut te ed-ul-ulaan din. ²³ Su embiya ruen etew ne egkeruwaruwa se hinawa rin ketà te egkeenen din, ugaid ne egkeenen din ma iya, ne ed-isuhaten te Eleteala sikandin te salà su nesurang din ke benar ne mibperetiyaya rin. Ne misan engkey en se ed-ul-ulaan tew, embiya kenà kayi ebpuun dut te benar ne peretiyaya tew ne egkevaluy ne salà tew.

15

Iyan Iya se Ibpeuna te Hinawa Tew Ke Kebpeiseg te Kebperetiyaya dut te Menge Ruma Tew

¹ Na sikitew se mevaher en se peretiyaya tew, ne iyan iya se edtulengeran tew ke menge ruma tew ne meluvey pà se peretiyaya rin. Ne kenà iyan tew rà ebpegitungen ne ke hinawa tew. ² Ugaid ne iyan tew ibpeuna te hinawa tew ne endei se ebpekevehey rut te ruma tew te keupianan su apey ebpekeiseg ke sarig dan. ³ Su misan si Hisu Kristu ne warà din ipeuna ke kiyug te hinawa rin. Su ruen nekahai rin diyà te Eleteala ne impesurat ne egkahi te, "Ke langun ne ibpegkeyà te etew keykew, Eleteala, ne kayi edadsang te kediey." ⁴ Ne netuenan tew te langun ne impesurat ne Lalag te Eleteala rengan ne keytew ne keupianan su apey ki egkepenurù. Su ini se impesurat ne lalag din ne ini se ebpeketavang keytew te kebmetigker tew ketà te kemeresayan tew, wey idtihel te hinawa tew gewii te kedadhad tew rut te ebpenerengen tew keuremà. ⁵ Ne Eleteala rà se ebpuunan kayi te ini se kebmetigker tew te kemeresayan wey ke kebmetihel te hinawa tew. Ne egkiyuhan ku ve perem ne menu ma ke egketevangan kew te Eleteala su apey egkeseveka ke hinawa niyu iring dut te nehuruwan niyu ne ulaula ni Hisu Kristu. ⁶ Ketà ne egkeseveka kew langun te kedeyù niyu rut te Eleteala tew ne Amey ni Hisu Kristu ke Kerenan tew.

*Impesabut ni Hisu Kristu Ke Daat te Nanam te Eleteala diyà te Menge
Etew ne Kenà Hudiyanan*

⁷ Peteltelimeey kew iring te kinetelima ni Hisu Kristu keniyu, ne embiya ve ini se ed-ul-ulaan niyu ne igkereyù ini te Eleteala. ⁸ Benar ini se egkehiyen ku te si Hisu Kristu ne nevaluy ne sugsuhuen te menge Hudiyanan su apey rin ibpekita kandan te kenà ebperis ke pasad te Eleteala. Su ke kinesuhua te Eleteala ki Hisus, ne sikandin ini ke intuman dut te pasad te Eleteala te keep-epuan dan dengan. ⁹ Ne ruma pà ne insuhù te Eleteala ki Hisu Kristu su apey ebpekereyù te Eleteala ke kenà menge Hudiyanan sabap dut te impekita rin ne daat te nanam din kandan. Su iring dut te impesurat rengan ne nekahì ni Hisu Kristu ne egkahi te,

“Ibpemenudtul ku riyà te kenà menge Hudiyanan
ke daat te nanam nu kandan.

Uya, ebpemeyukbeyuken ku mekeatag keykew, Eleteala,
kayi te kedeyù ku keykew.”

¹⁰ Ne ruen pà nekahì dut te impesurat ne Lalag te Eleteala ne egkahi te,

“Sikiyu ne kenà menge Hudiyanan,
ne amung kew en dut te kehelawan
te menge etew ne nepemilì te Eleteala.”

¹¹ Ne ruma pà maa ne nekahì ketà te,

“Sikiyu ne kenà menge Hudiyanan,
ne deyua niyu en ke Kerenan tew.
Uya, langun niyu ne menge etew,
ne deyua niyu en sikandin.”

¹² Ne ruen pà lavew rengan migkahi ni Isayas, senge etew ne mibpelambas te Lalag te Eleteala, ke sikandin te,

“Ne egenat te kevuwaran ni Isai
ne ebpekelepew ke etew ne ebayàbayà
dut te menge etew ne kenà Hudiyanan.
Ne sikandin ke ebpenerengen dan.”

¹³ Ne ke Eleteala se ebpungan te langun ne keupianan ne ebpenerengen tew, ne kiyug ku ne menu ma ke mevehayi kew nikandin te rekèlè ne kehelawan wey ke kebmelintad te hinawa niyu. Su embiya iring ketà se egked-ulaula, ne ke kedsarig niyu kandin mekeatag te ebpenerengen niyu ne ebmevag-et riyà sabap dut te gehem te Kedesenan ne Ebpetuntul te Menusiyà.

*Ke Kiyug ni Pablo te Ebpemenudtul dut te Meupiya ne Tuditul diyà te
Meriyù ne Menge Inged*

¹⁴ Menge suled ku, kayi te itungan ku ne netuenan ku te layun niyu ed-ul-ulaa ke meupiya. Ne netuenan ku rema se netamat niyu en ke impenurù keniyu, ne ebpekegaga kew en te ebpenurù te menge ruma niyu. ¹⁵ Ugaid ne kayi te surat ku ini keniyu ne iring te meharang se kegkahi ku su ruen arà egkesuatan ku ne ebpetentenuran ku keniyu. Ne iyan ku warà kegkealang-alang te egkahi kayi su geina te ruen kewayà ne imbehey kediey te Eleteala, ¹⁶ su mibeelan a nikandin ne sugsuhuen ni Hisu Kristu te egelevek kenian te keniyu te menge etew ne kenà Hudiyanan su ebpesabut te Meupiya ne Tuditul ne egenat te Eleteala. Ne kayi te keglevek ku ne iring a te terebpelengesa ne edrenà

te ibehey diyà te Eleteala. Su embiya ruen ebperetiyaya ne sikandan se egketelimà te Eleteala ne iring sikandan dut te idrenà ku ne ibehey diyà te Eleteala su midtilak en ke hinawa ran dut te Kedesenan ne Ebpetuntul te Menusiyà.¹⁷ Ne sabap dut te tavang ni Hisu Kristu kediey ne kenà ku igkeyeyai te ibpemenudtul ku ke langun ne neveelan ku riyà te kandin.¹⁸ Ugaid ne iyan ku rà ma egkehiyen ne endei rà ke neveelan ku ibpepevayà te tavang ni Hisu Kristu su apey ku ebpesebuti dut te menge etew ne kenà Hudiyanan su apey ran ebpekeruma te Eleteala. Su nekeperetiyaya ran en sabap dut te lalag ku ne nerineg dan wey ke ed-ul-ulaan ku ne nekita ran.¹⁹ Uya, nekeperetiyaya ran sabap dut te nekita ran ne mibpeveelan kediey te Eleteala ne mekegeyip wey sabap dut te gehem dut te Kedesenan ne Ebpetuntul te Menusiyà. Ketà be ne riyà te langun ne neipenawan ku ne impemenudtul ku en ke Meupiya ne Tuttul mekeatag ki Hisu Kristu igenat dà te Hirusalim taman te inged ne Eliriku.²⁰ Su iyan ku pegungayà ne riyan a ebpmemenudtul te Meupiya ne Tuttul te menge etew ne warà pà bulug mekerineg su apey kenà a ebpekelapis dut te nepenudtulan en te ruma ne etew.²¹ Su iring dut te impesurat ne Lalag te Eleteala ne egkahi te,
 “Ke menge etew ne warà pà mepenudtuli
 mekeatag ki Hisu Kristu,
 ne ruen ded kegkepuwasi te itungan dan.
 Uya, ke menge etew ne warà pà vulug mekerineg
 ne ruen ded dema kebpekesabut dan.”

Ke Kiyug ni Pablo ne Ebpekibalak dut te Menge Mibperetiyaya Diyà te Inged ne Ruma

²² Geina te ini se helevek ku te kebpenurù dut te Meupiya ne Tuttul ne kenà kecipira e rà mevangen te ebpengkeniyan te keniyu.²³ Ne guntaan te neipus ku en ini se menge helevek ku kayi te ebelàbelà ne inged, ne neuhet dà ne ebpegitungen ku en se kebpekepengkeniyan ku te keniyu,²⁴ ne guntaani ne netahù te itungan ku se ebpengkeniyan ad te keniyu su ebpelin-awet a riyà te keniyu te kebpendiyà ku te inged ne Isepanya su ebpekibalak a keniyu neraan. Ne igkehalew ku te ebpmemekebalak kiyu, ne embiya egkeipus ke ebpingesaken tew ne egkeawà ke limengew ku ne kalu ke edtevangsan a nikiyu te kedlaus ku.²⁵ Ugaid ne guntaani ne ed-ipanew ad se ebpendiyà te Hirusalim su ruen id-ated ku ne kureta ne idtavang dut te menge etew ne mibperetiyaya riyà.²⁶ Su nepegitung dut te menge suled tew ne mibperetiyaya kayi te lusud te Mesidunya wey Gerisya te iyan meupiya ne ebehey ran te tavang diyà te menge ruma tew ne mibperetiyaya riyà te Hirusalim ne ebpengevuluhan te egketemanan din.²⁷ Ne lila nevenar ini se netahù te itungan dan ne kedtavang dan, ne edait iya rema ketà su nekeutang dan dut te limù te menge Hudiyanan ne mibperetiyaya riyà te Hirusalim. Iyan ku egkehiyen ini su embiya kenà ke menge Hudiyanan ne mibperetiyaya diyà te Hirusalim, ne warà metueni dut te menge etew ne kenà Hudiyanan ke benar ne penurù mekeatag te Eleteala. Tembù be edait iya ne edtavang ke kenà menge Hudiyanan dut te menge Hudiyanan riyà te Hirusalim ne ebpengevuluhan te egketemanan din.²⁸ Ne embiya egkeipus ku en ini se vaal ku te ked-ated ku kayi te langun ne nevurun ne tavang, ne arà

pà ne egenat a te ed-ipenawan ku riyà te Isepanya ugaid ne ebpelinawet a keniyan te keniyu.²⁹ Ne netuenan ku te embiya ebpekeuma ad keniyan te keniyu, ne dekelà se keddavang kenitew ni Hisu Kristu su apey ebmevag-et ke kedsarig tew.

³⁰ Na ebuyuen ku keniyu ne menge suled ku, te ipengeningeni a nikiyu te mevaher te Eleteala. Ne netuenan ku ne ed-ul-ulaan niyu ini su atag dut te kebpekidseveka tew ki Hisu Kristu ke Kerenan tew wey atag dut te kebpelimlimuey tew ne imbehey rut te Kedesenan ne Ebpetuntul te Menusiyà.³¹ Ipengeningeni niyu te elangi a te Eleteala rut te intahù te itungan te menge etew ne warà mibperetiyyaya riyà te lusud te Hudiya te ebpemekaid kediey. Ne ipengeningeni niyu red dema se mehalew se kettelima rut te menge etew ne mibperetiyyaya riyà te Hirusalim kayi te ebpeneheewiten ku ini.³² Su embiya egkeipus ku en ini ne embiya idluhut te Eleteala, ne ebpekepengkeniyan ad te keniyu. Ne egkehalew a ketà te kebpekeuma ku, ne egkesuatsuat se hinawa ku ke ebpemekebalak kiyu.³³ Iyan ku kiyug ne menu ma perem ne ke Eleteala ne ebpunan dut te kebmelintad te hinawa tew ne ebpekiduma keniyu. Ne egketuman ini.

16

Ke Ketepusan dut te Surat ni Pablo

¹ Na ruen ibpekilala ku keniyu ne meritan ne mibperetiyyaya ki Hisus ne edtavang diyà te egkevurunan dut te menge mibperetiyyaya riyà te inged ne Sinsiriya. Ne iyan din ngaran ne si Febe.² Embiya ebpekeuma sikandin ne gelhelaa niyu su ruma tew sikandin te ebperetiyyaya ki Hisu Kristu ke Kerenan tew, su ini ke edait ne ulaula tew te menge etew ne mibperetiyyaya en. Ne tevangi niyu sikandin embiya ruen kurang din su merakel dema ini se netevangan din abpeg kediey.

³ Ne ibpesabpet niyu rà ini se penginginsà ku riyà te ki Priscila wey ki Ekila, su menge ruma ku sikandin te egelevek ki Hisu Kristu.⁴ Ne sabap dut te kedtevangi ran kediey ne warà dan isepayan ke ebpatey ran. Ne rekèlè be se kebpselamat ku kandan, ne kenà siaken dà su misan ke langun ne kenà menge Hudiyanan ne mibperetiyyaya en ne ebpengarap kayi ne rekèlè ded dema se kebpselamat dan.⁵ Ne idlakit niyu rema ini se penginginsà ku rut te menge etew ne mibperetiyyaya ne riyà egkevurun te valey ran su ebpengarap dan te Eleteala.

Ne idlakit niyu red dema ini se penginginsà ku riyà te igkelimù ku ne sepekat ku ne si Ipinitu, su sikandin ke neuna ne etew ne mibperetiyyaya ki Hisu Kristu keniyan te lusud te Asiya.⁶ Idlakit niyu rà ki Maria ini se penginginsà ku kandin, arà se migelevek te mevaher te kedtevangi keniyu.⁷ Idlakit niyu rà dema ini se penginginsà ku ki Andruniku wey si Huniyas, menge ruma ku ne Hudiyanan te nevilanggù. Ne egkeedatan nevenar sikandan dut te menge kedserihan ni Hisus, ne sikandan pà se neuna ne mibperetiyyaya kenà siaken.

⁸ Ne idlakit niyu rà be ini se penginginsà ku ki Empliyatu, ke sepekat ku ne rekèlè ku te hinawa sabap dut te kineperetiyyaya tew ki Hisu Kristu ke Kerenan tew.⁹ Ibpesampey niyu rà ini se penginginsà ku ki Urbano ke ruma ku te egelevek ki Hisu Kristu, wey si Istakis rema ke megeget ne sepekat ku.¹⁰ Ibpesampey niyu rà ini se penginginsà ku

ki Epilis, arà se impekita rin ke sarig din ki Hisu Kristu diyà te langun. Ne igkahi niyu rà ini rema riyà te telteleanak ne ensi Eristubulu.¹¹ Ibpesampey niyu rà rema ini ki Hirudyun ne ruma ku ne Hudiyansen, wey riyà pà maa te telteleanak ne ensi Narciso ne mibperetiyaya en.

¹² Ne ibpesampey e rà nikiyu riyà te ki Tripina wey ki Tripusa, ke menge mehiedgied ne sugsuhuen ni Hisu Kristu ke Kerenan tew. Ne ibpesampey e red nikiyu riyà te ki Persida, ke megeget ne sepekat ku ne rekelà se neveelan din te kedadumana rin dut te mibpeveelan kandin ni Hisu Kristu ke Kerenan tew.¹³ Ne ibpesampey e rà dema nikiyu riyà te ki Rufo ke nekilala te langun ne meupiya se helevrek din te Eleteala, wey riyà te iney rin dema ne midtuganur kediey iring te tuney ad ne anak din.¹⁴ Ibpesampey e rà nikiyu ki Asinkritu, ki Pligunti, ki Hirmis, ki Petrubas, ki Hirmas, wey ke langun pà ne mibperetiyaya riyà te kandan.¹⁵ Idlakit e rà be nikiyu ki Pilulugu ki Julia, ki Neroo wey ke etevey rin, abpeg din ki Ulimpas wey ke langun ne menge ruma ran ne mibperetiyaya riyà te kandan.

¹⁶ Ne langun niyu ne pesegsehiipey kew su tuus te ruen kebperelim-limuey niyu. Langun ne menge mibperetiyaya kayi te ebelàbelà ne inged ne ebpenginginsà dan dut te langun ne sikiyu keniyan.

Ke Mewri en ne Penduan Te Surat Ni Pablo

¹⁷ Ebuyuen ku ve keniyu, menge suled ku, te ingat kew rut te menge etew ne ebaal te kegkereeti rut te kegkeseveka niyu te kebperetiyaya, ne elihu kew kandan su sikandan ke puunan dut te kegkeliyaliya te sarig niyu su ebpekesurang dan dut te benar ne penurù ne ingkepenurù keniyu.¹⁸ Su ke menge etew ne iring kayi ne kenà iyan dan edumaan si Hisu Kristu ke Kerenan tew, ugaid ne iyan den dà edumaan ne ke kiyug diyà te hinawa ran. Metau ran ne edlalag wey metau ran ne edlana dut te hinawa te menge etew su apey ran egkekali ke menge etew ne kenà pà metau dut te benar ne penurù.¹⁹ Nevantug en ke tudtul te kebperumaruma niyu rut te menge suhù te Eleteala, ne nehalew a nevenar ketà. Ugaid ne iyan ku rà egkiyuhan ne egkeumanan pà ke netuenan niyu te ed-ul-ulaan ne meupiya, ne kenà kew ebpekehuru te misan engkey ne ulaula ne meraat.²⁰ Ne ke Eleteala ne ebpuunan te kebmelintad te hinawa tew ne kenà dà meuhet ne edtekutaken din si Setanas ke datù te pekaid.

Iyan ku kiyug ne menu ma perem ke ibpekita rut te Kerenan tew ne si Hisu Kristu ke daat te nanam din keniyu.

²¹ Ini se ruma ku te ebpemenudtul te Meupiya ne Tudtul ne si Timoteo, ne ebpenginginsà keniyu wey en si Lucio, si Jason, wey si Susipatu ke menge ruma ku ne Hudiyansen.²² Ne si Tiriku rema ke pinesurat ku kayi te surat ku ne ebpenginginsà dema keniyu su ruma tew rema sikandin te ebperetiyaya.

²³ Si Gayu ne ebpenginginsà rema keniyu. Sikandin ke ebpeketuganur kediey su riyan a ed-ubpà te baley rin ne egkevurunan dut te ruma tew ne mibperetiyaya. Ne si Irastu ke edtuganur te kureta kayi te inged ini, wey ke suled tew te ebperetiyaya si Kuwartu ne ebpenginginsà rema keniyu. [²⁴ Ne langun niyu riyà, ne iyan ku kiyug ne menu ma perem ke ibpekita rut te Kerenan tew ne si Hisu Kristu ke daat te nanam din keniyu. Ne egketuman ini.]

²⁵ Edeyù kiyu te Eleteala! Su sikandin dà ke ebpekevehey te kebmetihel te kebperetiyyaya niyu sabap dut te Meupiya ne Tudtul mekeatag ki Hisu Kristu ne impemenudtul ku wey sabap dut te benar ne ne in-eles te neuhet dà dengan ugaid ne impayag en guntaani. ²⁶ Ne arà se benar ne impayag en guntaani te Eleteala keytew sabap dut te impesurat dut te menge etew ne ebpelembas te lalag din dengan. Ne guntaani ne insuhù en dut te Eleteala ne warà kemetayen din te ibpepenudtul ini kayi te langun ne menge etew kayi te ampew te dunya su apey langun ne ebpekeperetiyyaya wey ebpekeperumaruma te menge suhù din.

²⁷ Ne ke sebseveka rà ne Eleteala ne iyan dà netau te langun. Uya, edeyuen tew te ibpepevayà tew ki Hisu Kristu taman te taman.

Arà dà taman.
Pablo

Ke Neuna ne Surat Ni Pablo Riyà te Menge Etew ne Mibperetiyaya te Inged Ne Kurintu

¹⁻² Siaken ini si Pablo se edsurat kayi diyà te menge etew te Eleteala te inged ne Kurintu egenat te kebperetiyaya ran ki Hisu Kristu. Ne si Sutinis ke suled tew te ebperetiyaya se ed-amung kediey te edsurat kayi.

Senge etew a ne kedserihan ni Hisu Kristu ne nepemilì din su arà ke kiyug te Eleteala. Ini se surat ku keniyan te keniyu ne nepemilì te Eleteala ne egkevaluy ne menge etew rin egenat te mibpekidseveka ke hinawa niyu ki Hisu Kristu. Uya, nepemilì kew nikandin ne mibmetilaken ke hinawa niyu su apey sikiyu ne menge etew rin ne edtuman te kiyug din. Ne kenà sikiyu rà se nepemilì din su langun ne etew ne mibperetiyaya ki Hisu Kristu ke Kerenan tew, misan endei ran kayi te ampew te dunya, su si Hisus ke Kerenan tew te langun ne ebpengarap kandin.

³ Kiyug ku ne egkepenaub kew te Eleteala ke Amey tew wey si Hisu Kristu ke Kerenan tew, ne egenat kandan ne kenà meseleti te meraat ke hinawa niyu.

Ke Menge Keupiyanan ne Ibehey te Eleteala

⁴ Layun a ebpeselamat te Eleteala atag dut te keupiyanan ne ibehey rin keniyu atag dut te kebpekidseveka te hinawa niyu ki Hisu Kristu egenat te kebperetiyaya niyu kandin. ⁵ Warà tedtab din se penaub te Eleteala keniyu igenat te mibpekidseveka ke hinawa niyu ki Hisus. Seveka ne penaub din ne nesebutan niyu en ke benar ne penduan ni Hisus, ne nevehayan kew rema te ketau te ebpesabut kayi te menge ruma niyu. ⁶ Su ke penduan ni Hisu Kristu ne iring te pinemula ne nekedalid en kayi te itungan niyu. ⁷ Engketà be ne warà kurang dut te merakel ne edsusan te ketau ne ibehey te Eleteala su apey kew egketevangan te eduma rut te kiyug din gewii te edtahad kew rut te kedlived ni Hisu Kristu ke Kerenan tew. ⁸ Ne sikandin ke mibaher te kebperetiyaya niyu su apey warà idsawey rin keniyu ketà te hewii ne kedlived ni Hisu Kristu. ⁹ Su ke Eleteala ne mibpemilì keniyu te ebpekidseveka rut te Anak din si Hisu Kristu ke Kerenan tew ne egkedserihan din nevenar.

Ke Kebpelewewanà dut te Menge Mibperetiyaya Diyà te Kurintu

¹⁰ Menge suled ku te ebperetiyaya, ruen ebuyuen ku keniyu ne ebperumduaan niyu su suhù a ni Hisu Kristu ke Kerenan tew. Iyan ku ebuyuen ne egkeseveka kew su apey warà kebpemekedlewanà diyà te keniyu. Uya, egkeseveka ke itungan niyu wey ke hinawa niyu. ¹¹ Iyan ku kegkahi kayi, menge suled, su ruen menge suled ni Keluwì ne mibpenudtul kediey te ebpmekedlewanà kew riyà. ¹² Ne ini se edul-ulaan niyu ne kenà meupiya se ebpmekedsurang ke hinawa niyu su ruen egkahi te, "Sakup a ni Pablo," ne egkahi manen ke seveka te, "Sakup a ni Epulu." Ne egkahi maa ke ruma te, "Kayi a eduma ki Pedro," ne ruen pà lavew egkahi te, "Ne siaken ne kayi eduma te ki

Hisu Kristu.”¹³ Ey, embiya arà se ed-ul-ulaan niyu ne iring te midumun-umun niyu si Hisu Kristu! Menu, siaken be se mibpelensang diyà te pinebelavag ne kayu su apey kew egkepelihau? Engkey, iyan niyu impebunyang su mibpesakup kew kediey?¹⁴ Pinegkepiya ku pà te kenà siaken se mibunyang keniyu su warà duma ne mibunyahau ku liyu te si Krispu wey si Gayu.¹⁵ Su kenà be egkepakey ne ruen senge etew keniyu ne egkahi te iyan din kebunyahai kedi su apey egkevaluy ne sakup ku.¹⁶ (Uya, duen pè bes nebunyahau ku ne si Istipanis ragkes ke esawa rin, anak din. Liyu pè be kandan ne warè en egketenuran ku.)¹⁷ Su kenà ke kebpembunyang te menge etew se insuhù ni Hisu Kristu kediey. Ugaid ne iyan din insuhù kedi ne ibpemesabut ku ke Meupiya ne Tuditl dut te menge etew. Ne wey ku ibperayag en arà se Meupiya ne Tuditl ne kenà kayi te meralem ne lalag su apey egkekita ke ketau ku. Su embiya arà se mid-ulaula ku ne siaken se edeyuen, ne ke tuditl mekeatag dut te kinepebpatay ni Hisu Kristu diyà te pinebelavag ne kayu ne ebpekeeles.

Si Hisu Kristu ke Mibpayag dut te Ketampas te Eleteala

¹⁸ Ne ke menge etew ne egkerandung diyà te kenerekaan, embiya ebpekerineg dan dut te Meupiya ne Tuditl mekeatag te kinepatey ni Hisu Kristu riyà te pinebelavag ne kayu atag dut te salà dan, ne iyan dan kebpegitung ne warà rantek din. Ugaid ne sikami ke mibperetiyyaya ki Hisus, ne netuenan dey te ini ne ibpekita te Eleteala te gehem din te kebpeliyu rin keyta dut te kedusa te salà tew.¹⁹ Su ruen impesurat ne Lalag te Eleteala ne egkahi te,
“Ke itungan dut te etew ne ruen sinebutan din
dut te itungan te menge etew,
ne edereetan ku.

Ne ke etew ne metau ne ebpegitung te meralem,
ne ibpayag ku te arà se ketau rin
ne warà pantag din kediey.”

²⁰ Embiya iring ketà se ed-ul-ulaan te Eleteala, ne egkemenumenu ke etew ne meralem se kebpegitung din, wey ke etew ne midtau dut te penduan ni Moises, wey ke etew ne lelayun edtavan dut te kebpelewlewanà? Su impayag en te Eleteala se ayan be ne itungan ne warà en iya rantek din diyà te kandin su kayi rà ayan ne ketau te ampew te dunya.

²¹ Su ayan ne menge ketau te itungan ne kenà ayan ke ralan ne kegkesebuti tew te Eleteala. Ugaid ne ke puunan te ralan te kegkeriweswasi tew te Eleteala ne riyà ded ebpuun te kandin ne eturan. Ini se eturan din ne ebpekepeliyu keytew atag dut te kebperetiyyaya tew rut te Meupiya ne Tuditl ne impemesabut dey, misan ini se impemesabut dey ne warà kun rantek din.²² Su ke menge Hudiyanan ne kenà dan ebperetiyyaya dut te Meupiya ne Tuditl ke embiya kenà dan egkekita ke mekegeyip ne tuus te gehem te Eleteala. Ne ke menge Gerisiyanen ne iyan dan ebperetiyyayaan arà se etew ne metampas se itungan din.²³ Ugaid ne sikami ne iyan dey ibpemesabut ke Meupiya ne Tuditl mekeatag te kinepatey ni Hisu Kristu riyà te pinebelavag ne kayu, misan iring te ebevayuen te andu ke hinawa rut te menge Hudiyanan ketà te egkerineg dan ini, ne riyà te itungan te menge Gerisiyanen ne warà rantek din.²⁴ Ugaid ne ke menge etew ne

miduma rut te kedtawag te Eleteala, misan Hudiyanan etawa kenà, ne nemesmasan dan dut te kinepatey ni Hisu Kristu riyà te pinebelavag ne kayu ne ketà impayag te Eleteala ke gehem din wey ketau rin.²⁵ Su misan pà duen etew ne egkahi te ke mid-ulaula te Eleteala te kebpereliyu rin keytew te kedusa te salà tew ne iring te warà rantek din, ugaid ne warà itungan te etew kayi te ampew te dunya ne ebpekerepeng te itungan te Eleteala. Ne misan egkahi ran te meluvey ke Eleteala su minatey red ke Anak din, ugaid ne ketà din iya impayag te iyan pà mevaher ke gehem din dut te langun ne gehem te menge etew.

²⁶ Na menge suled, tentenuri niyu ke ulaula niyu rengan te warà kew pà mibperetiyyaya te Eleteala. Su merelag keniyu se metikang se nesebutan din, merelag keniyu se nevehayan te ketehel, ne merelag keniyu se menge anak te berebansa ne etew, ugaid ne nepemilì kew red te Eleteala te ebperetiyyaya kandin. ²⁷ Su ke etew ne nepemilì te Eleteala ne ke etew ne ebpendereiseken te rumा rin ne warà mibperetiyyaya su iring te kenà din egkegaga se lenged din. Iyan kinepemili te Eleteala te etew ne iring ketà su apey egkeyeyai ke etew ne iyan din pegitungan se egkegaga rin ke langun. Ne engketà ded dema se mibpemili ded dut te Eleteala ke etew ne warà behayi te ketehel din su apey egkeyeyai ke etew ne ruen ketehel din. ²⁸ Ne mibpemili dema te Eleteala ke etew ne mevavà ne edtetekudien su warà atag diyà te itungan te rumा rin, su apey ibpekitia rin te warà pantag din ke ebelielehà dut te itungan te menge etew kayi te ampew te dunya. ²⁹ Tembù be mid-ulaula rin ini su apey kenà egkepakey ne ruen etew ne edekarak te hinawa rin diyà te etuvangan te Eleteala. ³⁰ Su ke kinepekidseveka tew ki Hisu Kristu ne riyà ebpuun te kiyug te Eleteala. Ne Eleteala rema se ebehey keyta te ketau ibpepevayà ki Hisu Kristu. Ne si Hisus ke iyan kadtengteng te Eleteala keytew ne metidu diyà te etuvangan din su sikandin se mibpereliyu keytew rut te kedusa te salà tew su apey ki mevaluy ne menge etew te Eleteala. ³¹ Tembù be iring dut te impesurat ne Lalag te Eleteala ne egkahi te, “Embiya ruen etew ne edekarak, ne kenà iyan din idekarak ke hinawa rin ugaid ne si Hisu Kristu ke Kerenan tew.”

2

Ke Impesabut ni Pablo ne Riyà Ebpuun te Eleteala

¹ Menge suled ku, rut te aney en ne kebpendiyà ku te keniyu su ebpesabut ke engkey se ibpepesabut te Eleteala kediey mekeatag ki Hisu Kristu, ne warà ku pekerelema ke lalag ku te ibpekitia te metikang se nesebutan ku. ² Su seveka rà se neketahù te itungan ku ne ibpesabut ku keniyu ne ini se tudtul mekeatag ki Hisu Kristu, labi en ke kinepatey rin diyà te pinebelavag ne kayu ke midlensangan kandin. ³ Su ketà te nekeubpà a riyà te keniyu ne mibmeluvey se lawa ku ne iring te migkerker a su igkeandek ku kema ke kenà ku egkegaga te edtuman ke insarig kedì te Eleteala. ⁴ Ne wey ku impemesabut en ke Lalag te Eleteala keniyu ne kenà iring dut te etew ne egkepuyuk ke menge etew dut te lambeylambez te lalag din. Ugaid ne mibpehimbenar kew su nekita niyu ke tuus dut te gehem te Kedesenan ne Ebbetuntul te Menusiyà se midtavang kedì. ⁵ Tembù be ke kebperetiyyaya niyu ki Hisus ne kenà kayi rà ebpuun te ketau te menusiyà, ugaid ne riyà ebpuun te gehem te Eleteala.

Ke Tidtu ne Ketau ne Riyà Ebpuun te Eleteala

⁶ Embiya riyà te menge etew ne mevaher en se kebperetiyyaya ran te Eleteala ne ke kebpemesabut ku kandan ne meralem. Ugaid ne kenà iring dut te ketau té itungan dut te menge etew kayi te ampew te dunya etawa ke ketau rut te menge etew ne nevehayan te ketulengeran dan, su ruen edtedtavan din. ⁷ Ugaid ne riyà ebpuun te ketau te Eleteala ini se ibpayag ku guntaani ne warà pa metueni te etew. Su ketà te warà din pà limbaha ini se dunya ne netahù en te itungan din se ruen dalan te kebpeliyu keytew dut te salà tew su apey ki ebpekeamung kandin dut te kebpurù din. ⁸ Ne ayan se menge etew ne nevehayan te ketulengeran kayi te dunya ne warà dan mesebuti ke netahù te itungan te Eleteala, su embiya nesebutan dan ne warà dan peimetayi si Hisu Kristu ke mekegehem ne Kerenan tew. ⁹ Su ruen impesurat ne Lalag te Eleteala ne egkahi te,

“Duen impenehana te Eleteala
rut te menge etew ne egkelimù kandin.
Ini se impenehana rin,
ne warà senge etew rà ne nekekita kayi,
ne warà nekerineg,
ne warà nekepegitung ketà.”

¹⁰ Ugaid ne guntaani ne ayan se in-eles din dengan ne mibpesebutan din en kenami te kayi rin impepevayà dut te Kedesenan ne Ebpetuntul te Menusiyà. Su egketuenan te Kedesenan ne Ebpetuntul te Menusiyà ke langun ne itungan te Eleteala, misan pà ke menenem ne itungan din. ¹¹ Ne iring dema te etew, ne warà etew ne netau ke engkey se riyà te itungan dut te rumu rin ke kenà sikandin dà. Ne engketa ded dema, warà egketa ke engkey se netahù te itungan te Eleteala ke kenà te Kedesenan ne Ebpetuntul te Menusiyà dà.

¹² Ne sikami ne mibperetiyyaya, ne kenà iyan imbehey kenami te Eleteala ke itungan ne iring dut te menge etew kayi te ampew te dunya ne kenà ebperetiyyaya. Ugaid ne iyan imbehey kenami ne ke Kedesenan ne Ebpetuntul te Menusiyà te ebpetuntul kenami su apey rey metueni ke langun ne ibehey te Eleteala kenami. ¹³ Engketà be ne iyan dey ibpemesabut ne kenà kayi rà ebpuun te ketau te etew, su iyan dey ibpemesabut ke impenurù kenami rut te Kedesenan ne Ebpetuntul te Menusiyà. Uya, edseysayen dey ke tidtu ne penurù mekeatag te Eleteala rut te menge etew ne netehuan en te Kedesenan ne Ebpetuntul te Menusiyà. ¹⁴ Ugaid ne ke menge etew ne kenà ebperetiyyaya ne warà pà metehui te Kedesenan ne Ebpetuntul te Menusiyà, ne kenà dan ebpeketelimà dut te ibehey te Kedesenan ne Ebpetuntul te Menusiyà. Ne kenà dan ma egkesebutan su iyan dan pegitungan ne warà pantag din. Uya, kenà dan ebpekesabut ketà su warà pà meketahù diyà te hinawa ran ke Kedesenan ne Ebpetuntul te Menusiyà ne edtavang kandan su apey ran egkesebuti. ¹⁵ Ugaid ne ke etew ne mibperetiyyaya ne netehuan en te Kedesenan ne Ebpetuntul te Menusiyà, ne egkesebutan din ke pantag dut te langun ne ibpenurù te Kedesenan ne Ebpetuntul te Menusiyà. Ugaid ne ke etew ne kenà ebperetiyyaya ne warà diyà te kandin ke Kedesenan ne Ebpetuntul te Menusiyà, ne kenà egpekesabut te itungan dut te menge etew ne

netehuan en te Kedesenan ne Ebpetuntul te Menusiyà. ¹⁶ Su iring dut te impesurat ne Lalag te Eleteala ne egkahi te,

“Engkey, ruen be etew ne ebpekegaga
te ebpekesabut dut te itungan te Eleteala
su apey rin egkepemandù ke Eleteala?”

Ugaid ne sikitew ke mibperetiyyaya, ne ruen kebpekesabut dey mekeatag kandin su impesabut ni Hisu Kristu ke itungan din kayi te keytew.

3

¹ Na menge suled ku, gewii te riyan a te keniyu ne warà a mekepemandù keniyu iring dut te kebpemandù ku te menge etew ne mid-ulinan te Kedesenan ne Ebpetuntul te Menusiyà. Ugaid ne mibpenurù a keniyu iring te batà pà su ruen ded ed-ul-ulaan niyu iring te kememenuisiyai. ² Embiya idsempità ku ke penurù ku keniyu ne iring te rudsun ne impeinum ku keniyu su kenà kew pà egkepakey ne ebpekekaan te mekahal ne egkeenen. Ne kegkehiyen dè be iya ne ke penurù ku keniyu ne kenà meralem su warà niyu pà mesebuti. Ne taman gunteani ne kenà kew pà ebpekesabut te meralem ne kebpemandù. ³ Su ed-ul-ulaan niyu red ke ulaula rut te menge etew ne warà pà mebperetiyyaya. Egkehiyen ku ini su ruen pà keniyu se egkesihi, ne ruen pà egkewaha, ne tuus be arà te iyan pà egaked keniyu ne ke kiyug dut te kememenuisiyai. ⁴ Su ruen kun keniyu se egkahi te, “Sakup a ni Pablo,” ne egkahi maa ke senge etew te, “Sakup a ni Epulus.” Tuus be te ke ulaula niyu ne iring pà dut te menge etew ne warà mebperetiyyaya.

⁵ Na maa engkey key? Su sikami ki Epulus ne etew red ne midsuhù te Eleteala su apey kew ebpekeperetiyyaya kandin. Su sikami ne edtuman key rà dut te ibpehelevk te Eleteala kenami. ⁶ Embiya idsempità ku ne iring te benì ne ibpemula ku riyà te keniyu. Ne ke helevek ni Epulus ne ebungbung te wayig su sikandin se ebag-et dut te kebperetiyyaya niyu. Ugaid ne iyan ebpetuvù dut te benì ne Eleteala. ⁷ Su ke etew ne ebpmula wey ke ebungbung te wayig ne kenà sikandan se egkereyù. Ugaid ne iyan egkereyù ke Eleteala su sikandin dà se ebpetuvù dut te benì. ⁸ Engketà be ne warà ebiraan dut te etew ne ebpmula wey ke etew ne ebungbung te wayig su neked-iring ke lakew ran. Su ketà te hewii ne kebehey te Eleteala te idlalew rin ne iyan din kebehey ne ebpekepayew rut te helevek dan. ⁹ Su sikami ki Epulus ne teleduma te egelevek te Eleteala, ne sikiyu ke iring te pengengewiran te Eleteala ne ebpehelevekan din kenami.

Iring kew rema te ebelayan te Eleteala ne warà pà meipus. ¹⁰ Ne egenat dut te tavang te Eleteala ne ibehey rin kediey, ne iring a rut te etew ne ebpeitindeg te mevaher ne segkad. Ne ke helevek ku ketà ne meimpit su siak ke neuna ne mibpenurù keniyu atag ki Hisus. Ugaid ne ruen ruma ne etew ne ed-imasad ketà te nerudsuan ku ne helevek, ne uman seveka ne ed-amung te ebevaley ne med-uram dut te kandin ne helevek. ¹¹ Su warà ruma ne ebpeunsaran te etew dut te segkad ketà te baley ke kenà ke mibpeunsaran te Eleteala ne si Hisu Kristu. ¹² Ne ketà te segkad ne egkepakey ne ruen pengawid te ebevaley ne meupiya etawa meraat, su ruen ebevaley te kenà melemu ne egkeeretan iring

dut te bulawan, pirak, wey menge belielehà ne batu. Ruen duma ne iyan dan egkuan ne pengawid ne melemu ne egketutung iring te kayu, karan, wey telitip. ¹³ Ugaid ne ketà te hewii ne kedlived si Hisus ne ibpayag din ke langun ne helevek te menge etew ke meupiya ve etawa meraat. Su arà se pengawid ne egeraman din ibpepevayà te apuy su apey egkekita rin embiya mevaher etawa kenà. ¹⁴ Ne embiya ke pengawid ne imbaley te etew ketà te segkad ne kenà egketutung, ne dekelà se lalew rin. ¹⁵ Ugaid ne embiya egketutung arà, ne warà lalew ne ibehey rin. Egkeperiliy sikandan iring te etew ne ebpelahuy te egketutung ne valey.

¹⁶ Ne sikiyu ne menge mibperetiyyaya, maa kenà niyu ves egkesebutan te sikiyu ke ed-ubpaan te Eleteala ne ke Kedesenan ne Ebpetuntul te Menusiyà se ed-ubpà riyà te keniyu? ¹⁷ Engketà be ne embiya ruen etew ne ederaat te ed-ubpaan te Eleteala ketà te ibpenurù din, ne arà se etew ne edereetan te Eleteala. Su insivey kew te Eleteala ne kandin ne menge etew, ne ketà ne sikiyu ke ed-ubpaan din.

Ke Etew ne Mepereyù ne Warà Rantek din diyà Te Eleteala

¹⁸ Kenà kew ed-akal te hinawa niyu. Embiya ruen diyà te keniyu ne ebpegitung te egkegaga rin te meralem ne kebpegitung dut te menge etew kayi te ampew te dunya, ne iyan iya se ed-engkeran din arà se itungan din su apey rin egketelimà ke benar ne ketau ne riyà ebpuun te Eleteala. ¹⁹ Su riyà te etuvangan te Eleteala ne arà se ketau te menge etew kayi te ampew te dunya ne warà rantek din. Su iring te impesurat ne Lalag te Eleteala ne egkahi te, “Ke ketau te etew ne arà en iya ke kebpekelitag te Eleteala dut te menge etew ne ebpegitung te ruen ketau rin.” ²⁰ Ne ruen ruma pà ne impesurat ne Lalag te Eleteala ne egkahi te, “Netuenan te Eleteala ne warà rantek din ke pegitungan dut te menge etew ne egkahi te ruen ketau ran.” ²¹ Engketà be ne warà mebpendekarak kenian te keniyu mekeatag te ketau te etew ne ebpesekupan niyu. Su langun dan ne midsuhù te Eleteala diyà te keniyu su apey kew egkeupiya. ²² Su sikami ki Epulus wey si Pedro ne midsuhù key te Eleteala te edtavang keniyu, ne engketà be ne warè en pantag din se ebpmelien key nikiyu. Su langun taman ne mibeelan te Eleteala ne imbehey rin en keniyu, misan ke umur niyu, ke kepepatey niyu, ne misan ke egketemanaan niyu en guntaani wey ke keuremà. Uya, langun kayi ne imbehey en te Eleteala keniyu ²³ su si Hisu Kristu se kemuney keniyu, ne ke Eleteala se kemuney ki Hisu Kristu.

4

¹ Ne sikami ne ebpmesabut te Lalag te Eleteala ne iyan niyu kebpegitunga kenami ne sugsuhuen key te Eleteala. Insarig kenami te Eleteala te ini se ibpmesabut dey mekeatag ki Hisu Kristu ne warà metueni te menge etew rengan. ² Tembù be egelevek ki te meupiya su ke etew ne ruen insarig kandin te egelevek, ne iyan iya se edtumanen din te meupiya ke insarig kandin dut te mepurù din. ³ Kayi te kedì ne kenà ku igkeuru ayan se egkehiyen niyu etawa misan ke kukuman te etew rà mekeatag dut te keddumana ku rut te helevek ne insarig te Eleteala kedì. Su kenà sikiyu se egkukum kedì. Misan siaken ne kenà a egkahi te meimpit nevenar ke helevek ku. ⁴ Su misan warà salà ne netuenan ku ne idsawey kedì te Eleteala, ne kenà ku

egketuenan embiya benar arà. Su ke Kerenan tew rà ke egkukum kedi.
⁵ Engketà be ne kenà kew edsauey te ruma niyu su warà pà mekeuma ke hewii te kegkukum. Ne ketà te hewii ne edlived si Hisu Kristu ne sikandin se ebpayag te langun ne ulaula te menge etew ne in-eles dan te merusirem. Ne ibpekita rin dema ke nekeeles ne itungan te menge etew ne warà pà metueni, ne ketà be ne egketuenan te uman senge etew ke embiya egkereyù be sikandin te Eleteala etawa kenà.

⁶ Menge suled, ini se ebpenerengen te Eleteala dut te edsugsuhuen din ne insempità ku kayi te helevek dey ki Epulus su keupianan niyu. Su kiyug ku ne eduma kew ketà te inledawan dey su apey kew kenà edlangkad dut te Lalag te Eleteala ne impesurat din ne kenà duen dà se egkeedatan dut te ruma ran. Su kayi te menge sugsuhuen te Eleteala embiya ruen ed-edatan niyu dut te ruma rin, ne warà kew en meduma te Lalag te Eleteala. ⁷ Embiya ruen diyà te keniyu nekesabut te muna pà dut te ruma rin, ne endei ebpun ini se nesebutan dan? Engkey, ruen sinebutan dan ne kenà diyà ebpun te Eleteala? Warà! Ne embiya iring ketà, ne meambe ke idekarak dan iring te sikandin ke ebpunanan ketà te nesebutan dan? Su langun te sinebutan niyu ne Eleteala rà se ebpunanan, kenà kayi te keniyu.

⁸ Menu, iyan niyu egkepegitung se kenà kew en ebuyù te ketau te Eleteala su keniyu en ke langun? Iyan niyu kunaan ke mibehayan kew te langun ne ketau ne ibehey te Eleteala, ne iring kew te menge datù. Ugaid ne sikami ne kedserihan din ne warà pà. Meupiya iya maa perem ke embiya edatù kew en su wey sikami ne edatù en dema elin keniyu. ⁹ Iyan ku kegkahi kayi su kayi te pegitungan ku ne kiyug te Eleteala ne langun ne kedserihan din ne ebpeembavà dut te langun. Iring key te menge bilanggù ne ed-imetayan diyà te etuvangan te langun ne etew abpeg ke menge suluhuen te Eleteala. ¹⁰ Ne kayi te keduma rey ki Hisus, ne egkahi ke menge etew te kenà key metau ne ebpegitung. Ugaid ne sikiyu, ne egkahi kew te metampas kew rut te netuenan niyu te Eleteala. Ne sikami kun ne warà gaga rin, ugaid ne iyan niyu pegitungan ne ruen gaga niyu. Ne sikami ne edsusudian, ugaid ne sikiyu ne ed-edatan. ¹¹ Ne sikami ne taman gunteani ne kurang se kegkaan dey wey ked-inum, wey ke belegkas dey ne ebpendriteyritey en. Ne uman key rà egkebedasi, ne warà egketail ne ed-ubpaan dey. ¹² Edrumerasay key te helevek dey. Ne embiya ruen edsudi kenami ne kenà dey edtevaken; inemulà se ibpengeningeni rey sikandan te ebpeneuven te Eleteala. Ne embiya ebpekesekitan key ne edtigkeran dey. ¹³ Embiya meraatey se egkehiyen dan kenami, ne meupiya se idtavak dey. Su taman gunteani ne iring key te ripet diyà te etuvangan te etew kayi te ampew te dunya, uya iring key te etew ne ibpesusek te ruma ran.

¹⁴ Menge suled, kenà iyan ku kegkahi kayi ne ebpegkeyaan ku sikiyu. Kenà. Iyan ku kegkahi kayi su apey kew egkepenurù te engkey se meupiya, su iring kew te tuney en ne anak ku ne rekelà te hinawa ku. ¹⁵ Su misan pà merakel se ebpenuurù keniyu te kebperetiyyaya niyu ki Hisus, ne sebseveka ku ne iring te amey niyu kayi te kineperetiyyaya niyu ki Hisus. Su nekeperetiyyaya kew ki Hisu Kristu dut te kinepesabut ku keniyu te Meupiya ne Tuditul. ¹⁶ Ne geina te iring te siaken ke amey niyu, ne ebuyuen ku te iyan a iringi nikiyu. ¹⁷ Tembù be midsuhù

ku si Timoteo keniyan te keniyu. Iring sikandin te tidtu ne anak ku kayi ebpuun te kebperetiyyaya rey ki Hisu Kristu. Egkeserihan din kayi te keduma rin te Kerenan tew, tembù be midsuhù ku sikandin su ebpetentenuran din keniyu ke engkey se ed-ul-ulaan te keduma ku ki Hisus, ne ini ke ibpenurù ku te menge mibperetiyyaya te misan endei a ebpsinaru ne inged.

¹⁸ Na ruen keniyan te keniyu menge mepereyù su iyan dan kunaan ke kenà ad ebpengkeniyan te edsusi keniyu. ¹⁹ Ugaid ne embiya idluhut te Eleteala, ne mehaan a ebpekepengkeniyan te keniyu. Ne ketà ne egketuenan ku ke endei taman ke gehem dut te arà se mepereyù, ke ruen be kevenar etawa kayi rà te bèbà dan. ²⁰ Su ke menge etew ne nekelusud te Edetuan te Eleteala, ne ke keupiya ran ne kenà kayi rà te lalag dan su kayi ran ibpekita te ulaula ran ne meupiya. ²¹ Ketà be, ne endei rapit se tumù niyu ketà te kebpekeuma ku keniyan? Embiya kenà niyu edsembian ke meraat ne ulaula niyu, ne ebpengkeniyan a su apey kew ebpeketidtu te meupiya ne batasan. Ugaid ne embiya ebpeketidtu kew te ulaula niyu, ne ebmetulanged ad keniyu ne ibpekita ku ke limù ku keniyu.

5

Ini ne Mekeatag te Senge Susun ne Salà te Menge Etew diyà te Kurintu

¹ Na menge suled, ruen nerineg ku keniyan te sikiyu ne ruen ulaula rin ne meredsik. Duen kun senge etew keniyan ne midsumbang su ebpekid-ulid te ayà din ke esawa te amey rin. Ne misan ke menge etew ne warà pà mebperetiyyaya, ne kenà dan ed-ulaula te iring keniyan ne meraat. ² Ne misan meredsik ke ed-ul-ulaan dan iring ketà, ne meambe ke ebpereyùdeyù kew pà lavew? Iyan tumù ne egkemu kew ne ibpeawà niyu sikandin dut te kevurunan niyu su atag dut te meredsik ne ulaula rin. ³ Su misan meriyù a keniyu ne iring a te keniyan ded su layun ku egkepegitung sikiyu. Ne geina te iring te keniyan e red ne nepasad en kayi te itungan ku mekeatag keniyan te etew ne midulaula te meredsik. ⁴ Ne ini se egkiyuhan ku ne egkerumaan niyu, ne vurunburun kew su iring te keniyan ad te keniyu, ne ke gehem ni Hisu Kristu ne keniyan ded te keniyu. ⁵ Ne egenat te gehem ni Hisu Kristu ne keniyan en te keniyu, ne ibpeawà niyu en ayan ne etew su apey edresayen ni Setanas ke datù te pekaid su apey ebpekedsendit dut te salà din ne ebpekeliyu ke mekatù din ketà te hewii ne kedlived ni Hisu Kristu te egkukum.

⁶ Warà iya kewagib niyu te ebpendekarak! Iyan meupiya ne idawà niyu arà se meraat su apey kenà ebpekeeneb dut te langun niyu iring dut te beseanan ne egkahi te, “Misan ibukbuk niyu ke reisek ne pelevag dut te tapung ne ebeelan ne pan ne langun ketà ne edlevag.”

⁷ Engketà be ne iawà niyu ke meraat ne ulaula niyu iring te midulaula niyu rengan su apey kew ebmetilak sabap dut te kebperetiyyaya niyu. Su embiya ini se ed-ul-ulaan niyu ne iring kew ketà te pan ne warà mesewhi te ibpelevag ne mibeelan dut te menge Hudiyenan ne egkeenen dan ketà te Pista ne edsumbelien dan ke nati te bilibili su apey ran egketenuri ke kedsahad te suluhuen te Eleteala dut te menge apù dan dengan. Uya, iring kew en te pan ne warà insawug ne ibpelevag, ne si Hisu Kristu ke iring te nati te bilibili su mibpebpatay

sikandin su apey kiyu ebpekelyu dut te kedusa te salà tew. ⁸ Tembù be iyan meupiya ne ebpeselamat kiyu te Eleteala atag dut te kinepatey ni Hisus ne mibaal te ralan te kebmetilak tew rut te raan ne ulaula tew rengan ne meraat, su iring ara te ibukbuk ne ibpelevag te pan ne ebpekepeneheewit keniyu te meraat. Ne iyan tew ibpeuna te hinawa tew ke keduma rut te tidtu ne penurù su insempità arà te pan ne warà insawug ne ibpelevag.

⁹ Iyan migkahi ku rut te rengan ne surat ku keniyu te kenà kew pekiduma rut te etew ne meredsik se ulaula rin. ¹⁰ Ne ini se nekahи ku ne kenà diyà ebpekesuhat dut te menge etew ne warà pà mebperetiyaya ne ruen ulaula ran ne meredsik, etawa kegkelagew, etawa kebpemenakew, etawa ebpengeningeni te kenà tidtu ne Eleteala. Su kenà egkepakey ne ed-elihu ki kandan taman te kayi ki pà te ampew te dunya. ¹¹ Ugaid ne iyan ku ebpesebutan keniyu ne kenà kew ebpediduma rut te menge etew ne egkahi te sikandan ne mibperetiyaya en ugaid ne ke ulaula ran ne meredsik, etawa lelegawen dan, etawa ebpengeningeni ran te kenà tidtu ne Eleteala, etawa metekang se kedlalag dan, etawa ebpelehubug etawa ebpmemenakew. Kenà kew pekiduma kandan misan kebpekidtuhen te egkaan.

¹²⁻¹³ Ugaid ne ke menge etew ne warà pà mebperetiyaya, ne warà kewagib ku te ed-usisa kandan su Eleteala rà se egkukum kandan. Ugaid ne ini se rumu tew te ebperetiyaya, ne ruen kewagib tew te ked-usisa kandan. Su ruen impesurat ne Lalag te Eleteala ne egkahi te, “Ipeawà niyu rut te kevurunan niyu ayan se rumu niyu te ebperetiyaya ne meredsik se ulaula rin.”

6

Ini ke Dait ne Ed-ul-ulaan ke Embiya ruen menge Mibperetiyaya ne Ebpesumsumbungay

¹ Na embiya ruen seveka ne mibperetiyaya riyà te keniyu ne egkeveelan te kukuman te rumu rin ded, ne meambe ke riyà kew ebpesinaru te unutne warà pà mebperetiyaya su egkekukum kew? Iyan tumù ne riyà kew egkukum te unutne niyu te ebperetiyaya. ² Maa warà niyu metueni te sikitew ne mibperetiyaya en se ed-amung ki Hisus te egkukum keuremà kayi te langun ne ampew te dunya? Ne embiya egkepakey se sikiyu se egkukum te langun kayi te dunya, ne meambe ke kenà niyu egkekukum arà se reisek dà ne kukuman? ³ Maa warà niyu metueni te sikitew ne mibperetiyaya se ed-amung ki Hisus te egkukum dut te suluhuen te Eleteala ne riyà ebpuun te langit? Embiya arà se ed-ul-ulaan tew, ne labi pà ne egkepakey ne egkukum ki dut te meraat ne ulaula kayi rà te ampew te dunya! ⁴ Engketà be ne embiya ruen seveka keniyu ne egkeveelan te kukuman te rumu rin ne ebperetiyaya, ne meambe ke riyà niyu ed-ewita dut te unutne ne nekebira nevenar ke itungan din dut te menge mibperetiyaya? ⁵ Dait imbe arà ne igkeyeyai niyu! Engkey, warà en iya kenian te keniyu ne mibperetiyaya ki Hisus ne metau ne egkukum? ⁶ Su misan sikiyu ne menge mibperetiyaya ne ruen egkeveelan ne kukuman te rumu niyu, ugaid ne muna pà ne meraat ke riyà niyu ebpeneneheewita te unutne ne warà mebperetiyaya ki Hisu Kristu su apey egkekukum.

⁷ Meambe, warà niyu ves metueni te ini se kebpesumsumbungey niyu ne ini ke tuus te kurang kew pà te kebperetiyaya niyu ki Hisus? Iyan meupiya ne ebeleharen niyu ke ruen ebped-ulaula keniyu te meraatey etawa edlilimbung keniyu? ⁸ Inemulà pà te sikiyu red se ebaal kayi te meraatey ne ulaula wey ebpengahew te menge ruma niyu ne ebperetiyaya ki Hisus.

⁹ Iring be te warà niyu metueni te ke etew ne ebpegula-ula te meraatey ne kenà ebpekeamung dut te Edetuan te Eleteala. Kenà kew mebpepeneheewit te akal dut te hinawa niyu, su ke etew ne ed-ulaula te meredsik, ke etew ne ebpengarap te kenà tidtu ne Eleteala, ke etew ne edlangkadlangkad te esawa rin, ke meama ne egkiyug te meama red dema etawa ke meritan ne egkiyug te meritan ded dema, ne kenà dan ebpekeamung dut te Edetuan te Eleteala. ¹⁰ Iring ded dema ketà ke etew ne tekawen, ke etew ne lelegawen, ke etew ne pelehubug, ke etew ne metakang se lalag din wey ke etew ne tulisan, ne kenà dan ebpekeamung dut te Edetuan te Eleteala. ¹¹ Ruen dut te sikiyu ne ed-ulaula te iring kayi rengan, ugaid ne gunteani ne midtilak kew en te Eleteala su impesahad din en ke salà niyu, ne nevaluy kew en ne etew te Eleteala. Ne riyawà te etuvangan din ne iyan din kedtengteng keniyu ne metidtu en su atag dut te mid-ulaula ni Hisu Kristu ke Kerenan tew wey ke Kedesenan ne Ebpetuntul te Menusiyà.

Kenà ki Ed-ulaula te Meraat su ke Lawa tew te Menge Mibperetiyaya ne Iring te Ubpaan te Eleteala

¹² Kalu ke ruen etew ne egkahi te, “Sikami ne menge mibperetiyaya ne egkepakey ne ed-ul-ulaan dey te misan engkey se egkiyuhan dey embiya kenà meraat.” Ne benar arà, ugaid ne ruen ed-ul-ulaan tew ne kenà ibpekeiseg dut te kebperetiyaya tew. Ne misan egkepakey se ed-ul-ulaan ku te piya engkey en se kiyug ku, ne kenà ku idluhut se ed-uripenen a te misan engkey en ne ed-ul-ulaan. ¹³ Ne kalu ke ruen ruma ne egkahi te, “Iyan egkeetahan te egkeen ne ebpeketa hù kayi te hetek ta, ne iyan kineveeli te hetek ta su edtehuan te egkeen.” Ne benar arà. Ugaid ne kenà meupiya ne egkeeram-am te egkeen su ruen hewii ne ebpetedtavan te Eleteala ke hetek ta abpeg ke egkeen. Ne iring ketà ke lawa ta, su kenà dait ne ebpeetahan te lawa ta te keduma te kiyug dà te lawa ta. Ugaid ne iyan dait ne egkeetahan ked-usar te lawa ta ne egelevok te Kerenan tew si Hisu Kristu, ne si Hisu Kristu dema se edtuganur te lawa ta. ¹⁴ Su si Hisu Kristu ke Kerenan tew ne mibanew te Eleteala, ne iring ketà ne ebenawen ki rema nikandin keuremà rut te kebpatey ta ibpepevayà dut te kerekelà te gehem din.

¹⁵ Netuenan niyu ne ke lawa te etew ne mibperetiyaya ne ripàripà te lawa ni Hisus. Ne embiya iring ketà ne maa, egkepakey ne iyan ta ebpeetahan te lawa ta te ebpekid-ulid te meritan ne meredsik se ulaula rin? Kenà iya! ¹⁶ Su ke etew ne ebpekid-ulid te meritan ne meredsik se ulaula rin, ne ke lawa ran ne egkevaluy ne egkeseveka. Su ruen impesurat ne Lalag te Eleteala ne egkahi te, “Ke meama wey meritan ne ebpeulirey ne egkeseveka.” ¹⁷ Ne iring ded dema ke etew ne ebpekidseveka ki Hisu Kristu ke Kerenan tew, su egkeseveka ke hinawa rin ki Hisu Kristu.

18 Tembù be kenà kew ebpengningiyug. Duen duma ne ulaula ne meraat ne kenà ebpekekaid te lawa te etew, ugaid ne ini se kebpengningiyug ne an en iya ke ebpeketutung kandin. ¹⁹ Idtahù niyu ini te hinawa se ayan se lawa niyu ne timbang te baley ne mibpeubpaan te Eleteala rut te Kedesenan ne Ebpetuntul te Menusiyà ne imbehey rin keniyu. Ne ketà be ne kenè en sikiyu se kemuney rut te lawa niyu su Eleteala en. ²⁰ Ne mepmepurù se kinevayad din keytew su apey ki egkevaluy ne menge etew rin. Engketà be ne iyan niyu rà ul-ulaa te lawa niyu ke ebpekereyù te Eleteala.

7

Ini ke menge Suhù mekeatag te Ked-esawa

¹ Na guntaan, menge suled, ini se egkehiyen ku en mekeatag te kedinsà niyu te ked-esawa dut te surat niyu kedì. Embiya ruen etew ne kenà ed-esawa, ne meupiya rema arà. ² Ugaid geina te ruen merakel ne menge etew ne ebpengningiyug, ne iyan tumù ne ke meama ne ruen kandin ne esawa, wey ke meritan ne ruen esawa rin dema. ³ Ne ke teled-esawa, ne iyan iya se edtumanen dan ke kediwelayà dan. ⁴ Su ke meritan ne ed-esawa, ne kenà sikandin dà se kemuney te lawa rin su elin ke esawa rin. Ne iring ded dema ketà ke meama, kenà sikandin dà se kemuney te lawa rin su elin ke esawa rin. ⁵ Tembù be sikiyu ne neked-esawa en, ne kenà nu id-engkenà ke lawa nu rut te esawa nu, liyu ke ruen hewii ne egkeupekatan niyu te kebpengeningeni su apey warà sanggel din te kebpengeningeni niyu. Ne embiya egkeipus arà se hewii, ne lived kew manen dut te kediwelayà niyu te esawa nu su apey kenà kew egkegaga dut te penggeram ni Setanas ke datù te pekaid te edlangkadlangkad ka su kenà ka ebpeketingker dut te kiyug te lawa nu.

⁶ Ini se migkahi ku keniyu, ne kenà ku suhù ini se ked-esawa niyu ugaid ne mehepemandù ku rà. ⁷ Embiya egkepakey, ne iyan ku egkiyuhan ne ebpekeiring kew kedì te kenà ebpengesawa. Ugaid ne netuenan ku te warà pemed-iringa te Eleteala ke langun tew, su mibehayan din ke senge etew te ketigker te kenà ked-esawa, ne keseveka ne senge bias dema se imbehey rin.

⁸ Na sikiyu se menge kenakan wey menge raha wey menge valu, iyan pà meupiya ke kayi kew ed-iring te kedì te warà med-esawa. ⁹ Ugaid embiya kenà niyu egketigkeran ke kiyug te lawa niyu, ne iyan pà tumù se ed-esawa kew. Su iyan pà meupiya se ruen esawa niyu tumin dè be ke kenà kew ebpeketingker dut te kiyug te lawa niyu.

¹⁰ Na sikiyu ke menge nekeesawa en, ne ruen egkehiyen ku keniyu. Ini ne kenà kayi ebpuun te kedì, ugaid ne riyà ebpuun te ki Hisu Kristu ke Kerenan tew su sikandin se migkahi te: ke meritan ne kenà ebpekibelag te esawa rin. ¹¹ Ugaid ne embiya ebpekibelag sikandin, ne kenà en egkepakey ne edsaup pà sikandin te ed-esawa. Su egkepakey rà ne ebpekid-uli sikandin dut te esawa rin ded. Ne ke meama ne kenà ded dema ebpekibelag dut te esawa rin.

¹² Ne sikiyu ke menge ruma, ne ruen egkehiyen ku keniyu (siaken se migkahi ini, kenà si Hisu Kristu ke Kerenan tew). Ini se egkehiyen ku keniyu, embiya ruen meama ne mibperetiyyaya ki Hisus ugaid ne ke esawa rin ne warà mebperetiyyaya, embiya ebpekesuhat se hinawa

kayi te meritan ne kenà din belahi, ne kenà egkepakey ne ebpekibelag ke meama dut te esawa rin. ¹³ Ne engketà ded dema ke meritan ne mibperetiyyaya ki Hisus ugaid ke esawa rin ne warà mebperetiyyaya, embiya ebpekesuhat se hinawa kayi te meama ne kenà din belahi, ne kenà egkepakey ne ebpekibelag ke meritan dut te esawa rin. ¹⁴ Sikiyu ne mibperetiyyaya ki Hisu Kristu ne ruen esawa niyu ne warà pà mebperetiyyaya ki Hisus, ne riyà te etuvangan te Eleteala ne metilak se kebpekeesawa niyu su sabap te kebperetiyyaya nu ki Hisus. Engketà ded dema ke menge anak niyu riyà te etuvangan te Eleteala, su embiya ve kenà metilak se kebpekeesawa niyu riyà te etuvangan te Eleteala ne ke menge anak niyu ne kenà metilak diyà te etuvangan din su iyan dan egkeiringan ne anak dut te warà pà mebperetiyyaya te Eleteala.

¹⁵ Ugaid ne embiya ruen esawa ne warà mebperetiyyaya ne egkiyug ne ebpekibelag dut te esawa rin ne mibperetiyyaya, ne ruma ke en dut te kiyug din. Ne kenà egkevaluy ne salà nu se keduma nu ketà su riyà ebpuun te kandin. Su iyan kiyug te Eleteala ne ke telteled-esawa ne melintad se ked-uppà dan. ¹⁶ Su iyan ta keduma rut te kiyug te esawa ta ne warà mebperetiyyaya ne ebpekibelag, su misan kenà ki edtuhut ne kenà ta egketuenan ke egkepeneheewita sikandin dut te kebperetiyyaya ta ki Hisu Kristu etawa kenà.

¹⁷ Ne misan engkey se ketau ne imbehey te Eleteala te uman senge etew keytew te warà kiyu pà mebperetiyyaya, ne iyan meupiya ne idlaus ta arà dut te kebperetiyyaya ta. Ini se ibpenurù ku dut te langun ne egkevurun ne mibperetiyyaya te misan endei ne inged ne ebpesineruhan ku. ¹⁸ Iring dut te etew ne mibpeetus te warà pà sikandin mebperetiyyaya, ne kenà meupiya ne iyan din pegitungan ne id-awà din ke tuus te kinepeetus din. Ne iring ded dema rut te etew ne warà pà mebpeetus, embiya mibperetiyyaya en sikandin ki Hisus ne iyan iya se kenà en sikandin ebpeetus. ¹⁹ Su riyà te etuvangan te Eleteala ne misan neetusan ka, etawa warà, ne warà ded pulus din. Ugaid ne iyan dekela diyà te hinawa te Eleteala ne ke kedmahan niyu te kiyug din. ²⁰ Ne egkehiyen ku manen ke migkahi ku geina te kenà kiyu en ebpmemigitung en te kedsambì tew te misan engkey ne mibpetehuan te Eleteala keytew te warà kiyu pà mebperetiyyaya ki Hisus. ²¹ Embiya uripen ka te kineperetiyyaya nu, kenà ka egkeuru. Ugaid ne embiya ruen hewii ne egkepakey ne egkevelukasan ka, ne pevelukas ka. ²² Su misan uripen ka ketà te kineperetiyyaya nu ki Hisu Kristu ke Kerenan tew, ne iyan din kedmahan keykew ne kenà uripen. Engketà ded dema misan kenà ki uripen dut te kineperetiyyaya tew, ne iring kiyu te uripen su embiya sikitew se mibperetiyyaya ki Hisus ke Kerenan tew ne uripen kiyu nikandin. ²³ Ne mepmepurù se kinevayad te Eleteala keytew te kebpekepeliyu keytew rut te keberedusaan tew. Engketà be ne kenà kew en peuripen dut te etew, ugaid ne diyà kew peuripen dut te mibpemasa keniyu te mepmepurù. ²⁴ Menge suled, edsaup ad maa egkahi te kenà kew en pemigitung te kedsambì niyu te misan endei en se midtehuan te Eleteala keniyu dut te kineperetiyyaya niyu ki Hisus, ne kenà niyu ipekeriyù se hinawa niyu te Eleteala.

*Ini ne Mekeatag dut te Menge Etew ne warà pà med-esawa wey ke
Menge Balu ne Meritan*

25 Na menge suled, edlived ad maa te egkahi rut te in-insà niyu atag dut te menge etew ne warà pà meked-esawa. Warà suhù ni Hisu Kristu ke Kerenan tew mekeatag te ini ne ibpelambas ku, ugaid ne ini se ibpepevayà te daat te nanam din kediey ne egkeserihan a ne mehepemandù ku keniyu. ²⁶ Embiya iyan ta ed-intengan ke egketemanan dut te sikitew ne mibperetiyya ne merakel se kemerehenan ne ibpevayà ta, ne iyan pà tumù ne kenà ed-esawa. ²⁷ Ne embiya nekeesawa ke en, ne kenà nu ed-engkeri. Ne embiya warà pà esawa nu, ne kenè ke en ed-esawa. ²⁸ Ugaid ne embiya maa ed-esawa ka, ne kenà egkevaluy ne salà nu. Iyan ku rà kebpekekahi te iyan tumù se kenà ed-esawa, su embiya mid-esawa kad ne merakel se kemeresan niyu kayi te ampew te dunya ne arà be ne egkesuatan ku perem ne kenà kew meked-ulaula te iring ketà.

²⁹ Ne iyan ku kebpekekahi kayi, menge suled ku, su kenè en meuhet se hewii te egelevek ki te Eleteala. Ne geina te iring kayi, ne ke nenekeesawa en ne iyan din tumana ke kiyug te Eleteala kandin, iring te warà esawa rin. ³⁰ Ne iring ded dema ke etew ne ruen kemutuwain din, kenà din ketà dà edtemana ke pegitungan din ketà te kemutuwain din. Ne iring ded ke etew ne ruen igkehalew rin, kenà iyan din dà tutuva te ebpegitung ne ke kehelawan din. Ne arà dema se ruen mibpemasa rin, ne kenà iyan din pegitunga se igkenuhuni rin arà se nepemasa rin, ugaid ne iyan din petimbangi se warà te hinawa rin. ³¹ Ne kenà iyan tew dekelà te ebpegitungan ne ke langun taman kayi te ampew te dunya. Su ini se kelibutan wey langun te nekeriken kayi te ampew te dunya ne id-anew.

³² Ne iyan ku igkesuati keniyu ne warà utew merakel ne kemutuwain ne ebpekesuhat keniyu kayi te ampew te dunya. Su ke meama ne warà med-esawa, ne warà duma ne ebpekeungen kandin te edtuman te helevek ne imbehey te Eleteala kandin su iyan din ibpeuna te pegitungan ne ke kebpekesuhat te hinawa te Eleteala. ³³ Ugaid ne ke meama ne ruen esawa rin, ne iyan din dà lelayun egkepegitung ke engkey se ebpekegkeupiya kandan su apey mesuat ke esawa rin. ³⁴ Engketà be ne reruwa en ke hinawa rin, su ibpengingsuhat din en te Eleteala ne ibpengingsuhat din dema dut te esawa rin. Ugaid ke meritan ne warà esawa rin, ne seveka rà se netahù te itungan din ne ke kiyug te Eleteala kandin. Su ke helevek din wey ke baher din ne inamin din te edtuman dut te helevek ne impehelevek kandin te Eleteala su apey ebpekesuhat sikandin te hinawa rin. Ugaid ne ke meritan ne ruen en esawa rin, ne iyan din dà egkepegitung ne atag dut te kandan ne egketemanan su apey egkesuat ke esawa rin.

³⁵ Kenà iyan ku kegkahi kayi ne ebelevahan ku sikiyu te ed-esawa. Ugaid ne iyan ku kegkahi kayi ne edtevangan ku sikiyu su apey warà ebpekeungen keniyu rut te keduma niyu te Eleteala wey ke edtumanen niyu ke ibpehelevek din ne imbehey rin keniyu. ³⁶ Embiya ruen tehebarey ugaid ne malù en mehurang ke raha ne ke kenakan ne kenà dait se ulaula rin dut te raha su kenà ebpeketingker te kiyug din te kedesawa, ne iyan tumù ne med-esawa en su kenà dema salà. ³⁷ Ugaid ne embiya ruen kenakan ne intahù te hinawa rin te kenà ed-esawa su egketigkeran din ke kiyug din ne kenà ebpehesen sikandin, ne iyan tumù ne kenà en sikandin med-esawa. ³⁸ Tembù be ke etew ne

ed-esawa ne nekevaal te meupiya, ugaid ne muna pà se keupiya rin embiya kenà ed-esawa.

³⁹ Na embiya ruen meritan ne ruen en esawa rin, ne kenà egkepakey ne ed-engkeran din ke esawa rin ne edsaup ed-esawa. Ugaid embiya ebpatey ke esawa rin, ne egkepakey ne edsaup sikandin ed-esawa asal su iyan din ed-esawaan ne mibperetiyaya ki Hisu Kristu ke Kerenan tew. ⁴⁰ Ugaid ne iyan pà meupiya ne kenà en ed-esawa. Ini ne kediey rà ne pegitungan su iyan ku egkeperetiyaya ne ke impayag kedì te Kedesenan ne Ebpetuntul te Menusiyà.

8

Ini ne Mekeatag dut te Egkeenen ne Indrenà ne Siparat diyà te kenà tidtu ne Ebpengerapan su kenà Tidtu ne Eleteala

¹ Na menge suled ku, ini se egkehiyen ku keniyu ne mekeatag te in-insà niyu kedi ke embiya egkepakey ne egkekaan dut te sikitew ne mibperetiyaya ki Hisu Kristu ke egkeenen ne indrenà ne siparat diyà te kenà tidtu ne ebpengerapan. Ne benar iya ne iyan niyu migkahi te netuenan tew langun te iini se kenà tidtu ne ebpengerapan ne warà gehem din keytew. Ugaid ne misan netuenan tew en se warà gehem din keytew, ne ed-uram kiyu su apey kenà ki ebmepereyù diyà te ruma tew su kenà ini se netuenan tew se kebpeketavang tew kandan. Su ke ralan ne kebpeketavang tew rut te ruma tew ne kenà ke netuenan tew, ugaid ne ke limù tew kandan. ² Su ke etew ne kunaan din ke dekelà en se netuenan din, ne tuus arà te warà mekesuhat ke pegitungan din. ³ Ugaid ne ke etew ne rekелà se limù din te Eleteala, ne ibpekita te Eleteala te sikandin en ke anak din.

⁴ Na gunteani maa ne edlived ad te egkahi te in-insà niyu mekeatag te indrenà ne siparat diyà te kenà tidtu ne ebpengerapan. Ne netuenan ta te arà se midrenaan dan te siparat ne kenà tidtu ne ebpengerapan su ruen sebseveka rà ne Eleteala. ⁵ Ne misan duen merakel ne kenà tidtu ne ebpengerapan te menge etew ne ed-ingaranan dan te Eleteala ne riyà kun ed-upbà te langit wey kayi te ampew te dunya su egkehiyen dan ne arà en ke kerenan dan, ⁶ ugaid ne sikitew ne mibperetiyaya ki Hisus, ne netuenan tew te ruen sebseveka rà ne Eleteala ke Amey tew ne midlimbag te langun taman. Ne sikandin se edumaan tew su apey ki edtuman dut te kiyug din. Ne seveka rà ke Kerenan tew ne si Hisu Kristu su ibpepevayà kandin ne midlimbag te Eleteala ke langun taman, ne sikandin se mibehey keytew te behu ne umur.

⁷ Ugaid ne kenà langun ne ruma tew ne mibperetiyaya ki Hisus ne netau te warà gehem din diyà te kandan arà se kenà tidtu ne ebpengerapan embiya egkaan dan te egkeenen ne indrenà ne siparat su nelayaman dan rengan te egkaan te egkeenen ne indrenà ne siparat diyà te kenà tidtu ne ebpengerapan. Ne taman guntaan embiya egkekaan dan arà se egkeenen ne indrenà ne siparat diyà te kenà tidtu ne ebpengerapan, ne iyan dan kunaan ke nekeamung dan dema te ebpengarap ketà te kenà tidtu ne ebpengerapan. Ne ketà puunan ne ebmeraat ke hinawa ran su kunaan dan ke nekesalà dan su warà dan mesebuti ke benar.

⁸ Ugaid ne egkehiyen ku keniyu te kenà ini se egkeenen se iyan keddengteng te Eleteala keyta ne meupiya. Su riyà te etuvangan din ne neked-iring dà se egkaan ki etawa kenà. ⁹ Ugaid ne misan iring ketà, ne

uram kew kayi te menge ruma niyu ne meluvey pà se peretiyaya ran su apey ran kenà ebpekedsalà te puunan keniyu.¹⁰ Su misan netuenan nu ke benar ugaid ne egkaan ka te egkeenen ne indrenà ne siparat diyà te baley ne ed-erapan te kenà tidtu ne ebpengerapan ne nekita ka rut te ruma ne warà mekesabut te benar, ne kalu ke egkepeneheewit nu sikandin te ed-amung dema.¹¹ Engketà be ne kayi te mid-ulaula nu ne misan nesebutan nu te arà ne kenà salà, ne nereetan nu ke sarig te ruma nu ne meluvey se kebperetiyaya rin, ne etew red dema sikandin ne impeliyu ni Hisus dut te kinepatey rin.¹² Tembù be embiya iring ketà se ed-ul-ulaan nu, ne nekesalà ka ki Hisu Kristu su nekesalà ka rut te ruma nu ne meluvey pà se kebperetiyaya rin ki Hisus su midereetan nu ke sarig din.¹³ Engketà be ne embiya iyan dà kebpekedsalà te ruma ku se egkeenen ku, ne kenà ku en egkeenen arà se egkeenen ne indrenà ne siparat diyà te kenà tidtu ne ebpengerapan su apey ku kenà egkepeneheewit te ebpekedsalà arà se ruma ku ne mibperetiyaya ki Hisus.

9

Ke Kewagib dut te Menge Kedserihan

¹ Su siaken ne egkepakey ne ebpemilì a ke engkey se egeleveken ku su kedserihan a ni Hisu Kristu ne nekita ku ke Kerenan tew si Hisu Kristu, ne ke kebperetiyaya niyu kandin ne arà imbe ke helevek ku su sabap dut te kebpenurù ku mekeatag kandin.² Ne misan ruen ruma ne etew ne kenà ebpehimbenar te siaken ne kedserihan ni Hisu Kristu, ugaid ne sikiyu kenian te Kurintu ne netuenan niyu en te ke nekepekidseveka kew en ki Hisus sabap dut te kebperetiyaya niyu te kebpenurù ku ne arà se tuus te siaken ne kedserihan din.

³ Ne ke menge etew ne kenà ebpehimbenar te midsuhù a ni Hisus, ne iyan ku idtavak kandan se ini.⁴ Engkey, kenà be wagib te edtugenuren a te kegkaan ku wey ed-inumen ku rut te ebpemenduen ku?⁵ Engkey, kenà be kewagib te ed-iring a dut te ruma ne menge kedserihan ni Hisus, abpeg dut te menge ari rin wey si Pedro, su langun dan ne ruen esawa ran ne mibperetiyaya ki Hisus ne edumaan dan te ked-ipanew ran?⁶ Menu, sikami rà ki Bernabe se kenà edtugenuren te kegkeuyag dey rut te menge etew ne pemenduen dey?

⁷ Upama ke, ruen sundaru ne kenà egkevehayan te egestuwen din? Menu, ruen be etew ne ebpemula ne embiya edsabpet en ne kenà egkepakey ne ebpekekaan dut te bahas te pinemula rin? Ne engketà ded dema ke etew ne ebanter te menge binatang, menu kenà be egkepakey ne ebpekeinum sikandin te gatas dut te edtugenuren din ne binatang?⁸ Ne kenà kayi rà ebpuun te insempità ini ne ulaula dut te menge etew ne egketuenan niyu te iyan meupiya se ruen umun dut te etew ne egelevek, su nerineg niyu en dema dut te penduan ne imbehey ki Moises dengan.⁹ Su ruen penduan ni Moises ne impesurat din dengan ne egkahi te, "Kenà niyu pungesa ke sapi ne ebpehiiken te parey." Ini se Lalag te Eleteala ki Moises dengan ne kenà niyu pegitunga se riya dà ebpekesuhut te binatang.¹⁰ Su sikitew ne menge etew ne nekeamung ded ketà. Su tembù egkerasey ki se edadu wey ed-ehani su apey ruen egkesabpet tew.¹¹ Ne engketà ded dema ke Meupiya ne Tudtul ne egenat te Eleteala ne impemesabut dey keniyu

ne iring te benì ne impemula rey kenyan te kenyu. Tembù be iya rin dait ne ibehey niyu kenami ke lalew te helevek dey ne kegkeuyag dey. ¹² Embiya edait ne egkevehayan niyu ke ruma ne ebpenurù kenyu, iyan key pè be kenà duen egkeperateng.

Ugaid ne misan duen kewagib dey te ebperateng, ne warà key mebuyù. Misan mepasang en se egketemanan dey ne warà key mebuyù apey kenà meungen ke kebpemesabut dey rut te Meupiya ne Tudtul mekeatag ki Hisus. ¹³ Netuenan niyu en ne ke menge etew ne egelevek diyà te Nekebpuru ne Baley te Eleteala riyà te Hirusalim ne ketà dan imbe egkuwa te umun dan dut te egkeenen ne midewit ketà. Ne ke menge terebpelengesa ne edtutung te binatang diyà te ebbpelengesaan su ibehey te Eleteala, ne ruen umun dan dut te kebpelengesa ran. ¹⁴ Ne engketà ded dema ke menge etew ne ebpmesabut dut te Meupiya ne Tudtul, su arà ke insuhù ni Hisu Kristu ke Kerenan tew ne ke menge etew ne ebpmesabut te Lalag din ne ketà se ebpuun te kebpekekuwa ran te igkeuyag dan.

¹⁵ Ugaid ne siaken ne warà a megkuwa te igkeuyag ku riyà te menge etew ne mibpenurù ku, misan duen kewagib ku ketà. Ne kenà iyan ku kedsurat se ebuyua kenyu. Iyan pà tumù se ebpatey a te bitil tumin dà ke mekevuyù a kenyu! Su iyan ku igkesuat ne kenà egkewarà ke kewagib ku te edantal te warà a mesanggel te ebpmesabut dut te Meupiya ne Tudtul mekeatag ki Hisus. ¹⁶ Su kenà egkepakey ne idantal ku ke kebpemesabut ku dut te Meupiya ne Tudtul, su iyan midsuhù kedì ne si Hisu Kristu ke Kerenan tew. Ne kenà egkepakey ne kenà ku edtumanen, su mevehat se kedusa rin kedì embiya kenà ku ibpmesabut ke Meupiya ne Tudtul ne egenat diyà te kandin. ¹⁷ Embiya kediey rà ne kiyug se kebpemesabut ku te Meupiya ne Tudtul mekeatag ki Hisus ne kenà ibpehelevet kediey te Eleteala, ne dait ne ebpenareng a te sukey ku. Ugaid ne geina te insarig kediey te Eleteala ini ne helevek, ne edtumanen ku su insarig din kediey. ¹⁸ Ne embiya iring ketà, ne engkey ve se egkekuwa ku kayi ne lalew ku? Iyan ku lalew ne ke kegkehalew ku te ebpmesabut rut te Meupiya ne Tudtul te warà sukey misan duen kewagib ku te ebuyù te igkeuyag ku.

¹⁹ Na geina te warà etew ne edsuhù kediey, warà dema etew ne dait ne edsuhù kediey. Ugaid ne egkiyug ad ne egkevaluy ne edsugsuhuen dut te langun ne etew su apey ku egkepeneheewit ke merakel ne etew te kebperetiyyaya ki Hisu Kristu. ²⁰ Su upama ke riyan a ebpenurù te menge Hudiyanan, ne edumaan ku ke betasan dut te Hudiyanan su apey ku sikandan mepeneheewit te kebperetiyyaya ki Hisus. Su misan warà ad diyà te diralem te penduan ne imbehey ki Moises, ne eduma e red lavew asal dà su egkepeneheewit ku sikandan te kebperetiyyaya ki Hisus. ²¹ Ne engketà ded maa ke riyan a ebpenurù te kenà menge Hudiyanan ne kenà eduma te penduan ni Moises. Embiya sikandan ke ruma ku ne kenà ku rema edumaan ke betasan ku te Hudiyanan, su iyan ku maa edtumanen ke menge betasan te kenà Hudiyanan su apey ku egkepeneheewit sikandan te kebperetiyyaya ki Hisu Kristu. Ugaid ne kayi te ed-ul-ulaañ ku ini, ne kenà a ebpekesurang dut te insuhù te Eleteala su edtumanen ku ke insuhù ni Hisu Kristu. ²² Ne embiya riyan a te menge etew ne meluvey pà se kebperetiyyaya ran ki Hisus,

ne kenà ku ed-ul-ulaan te iyan dan peginungan ne salà. Iyan ku kedul-ulaa te iring ketà su apey ku egketevangi sikandan te ebpeiseg dut te kebperetiyaya ran. Tembù be kayi te kebpemesabut ku te Meupiya ne Tuditul dut te langun ne menge etew, ne ebpermengaan ku ke ralan te kebpeneheewit ku kandan te kebperetiyaya ki Hisus.²³ Ne iyan ku kinevaal te langun kayi su apey ebpekeeneb ke Meupiya ne Tuditul mekeatag ki Hisus, ne egkeumunan a rema rut te keupianan ne ibehey te Eleteala diyà te menge etew ne miduma kandin.

Insempità ni Pablo ke keduma tew te Eleteala iring dut te Etew ne Ed-amung te Egkuya te Ebpelelahuy

²⁴ Netuenan niyu se embiya ruen egkuya te ebpelelahuy, ne merakel dan se ed-amung ketà ugaid ne seveka rà se ebpeketaavan ne egkevehayan te lalew rut te kegkuya. Ne sikiyu se mibperetiyaya ki Hisus ne pemikar kew te mevaher te eduma te Eleteala iring dut te etew ne egkuya te ebpelelahuy su apey kew egkevehayi te lalew te Eleteala keuremà.²⁵ Ne ke menge etew ne ed-amung dut te egkuya te ebpelelahuy ne megelevek te mevaher te kegkelumbad te lawa ran. Iyan dan ked-ulaula kayi su wey ran mevehayi te lalew ne mibeelan dà te menge rawun su ibpeseluluy ketà te etew ne ebpeketaavan misan melemu ne egkeleyìlù. Ugaid ne sikitew ne mibperetiyaya ki Hisus, ne edsemikar ki te eduma te Eleteala su apey tew egkekuwa arà se idlalew rin ne kenà egkeawà taman te taman.²⁶ Tembù be ed-iring a dut te etew ne mid-amung te egkuya ne ebpelelahuy ne edtilandeng a ketà te ebbpetemanan te kegkuya. Ne iring a rema te etew ne pesusuntuk ne uman edsuntuk ne ebpekesuhat.²⁷ Ne iring te pesusuntuk ne edlumbaren ku ke lawa ku su apey ku kenà egkerumaan ke kiyug te lawa ku. Su merakel se impemandù ku keniyu, ne kenà ku egkiyuhan te siaken ke mibpemandù keniyu ne siaken en arà se kenà egkevehayan te Eleteala te lalew rin su warà a mebperumaruma.

10

Ini ne Mekeatag te Imbaag te Kenà ki Ebpengarap dut te Kenà Tidtu ne Ebpengerapan

¹ Menge suled, iyan niyu peginunga ke netemanan rengan dut te menge apù dey ne menge Hudiyenan ne miduma ki Moises. Su neelungan dan te sehulapun ne tuus te miduma ke Eleteala kandan. Ne mibpevaya dan te ralan ne mibeelan te Eleteala diyà te rahat ne ed-ingaranan te Merihà ne warà nelened.² Su ke kineruma ran dut te sehulapun wey ke kineapet dan te rahat ne iring te nebunyahana dan su wey ran mesakup ni Moises.³ Ne langun dan ne nekekaan te egkeenen ne imbehey kandan te Eleteala.⁴ Ne nekeinum dan te ed-inumen ne imbehey red kandan te Eleteala su langun dan ne nekeinum ketà te wayig ne ebpuun te batu ne impekita kandan te Eleteala. Su arà ne batu ne insempità ki Hisu Kristu ke miduma kandan ne mibehey kandan te langun ne kurang dan.⁵ Ne misan ketà te rekèla se tavang kandan te Eleteala ne kerekelan kandan ne warà mekesuhat te hinawa te Eleteala, ne ketà puunan ne merakel se minatey kandan diyà te tanà ne kenà egkeubpaan te etew ne impevaya dan.

⁶ Ne ini se netemanan dan ne impesurat te Eleteala su apey ki egkevaag ne kenà ebpeketahù te hinawa ta se ed-ulaula te iring ketà te

meraat ne ned-ulaula ran. ⁷ Ketà be ne kenà tew en iya ebpengerapen ke kenà tidtu ne ebpengerapan su iring ketà ke mid-ulaula rut te ruma ne menge etew rengan. Su ruen impesurat ne Lalag te Eleteala ne egkahi te, "Miburunburun dan se egkaan wey ed-inum dut te indrenà dan ne siparat. Nekeipus dan ne midsesayewsayew ran, ne ketà ne nekevaal dan te meraat ne ulaula." ⁸ Ne ruma pà ne kenà tew ed-iringan arà se mid-ulaula dut te ruma ran dengan ne mid-ulaula ran te kegkiyugà. Su tembù be midusa ran te Eleteala ne deruwa nepulù wey tetelu nengivu se minatey kandan te senge keandew rà. ⁹ Ne ruma pà maa, ne kenà tew ebpenggeraman ke Eleteala dut te meraat ne ed-ul-ulaan tew. Su ini ke mid-ulaula rut te ruma ne menge apù tew rengan ne iyan indusa kandan ne mibuntal dan te menge uled ne mibpematey ran. ¹⁰ Ne duen pà lavew ruma, ne kenà ki ebpmivig mekeatag te ed-ul-ulaan te Eleteala. Su arà ke mid-ulaula rut te ruma ne menge apù tew rengan ne mibpeveyaan dan te Eleteala te suluhuen din te ed-imatey kandan.

¹¹ Ne langun arà ne nengetemanan dut te menge apù tew dengan ne ibaag keytew su apey kenà ki ebpeked-ulaula ketà te nenged-ulaula ran. Ne ini ke impesurat ne Lalag te Eleteala su apey ki ebpekeuram ne kenà ki edusaan iring kandan, su ke kegkebangkit kayi te dunya ne mehaan en.

¹² Ne engketà be ne embiya ruen etew ne iyan din egkepegitung te kenà din ed-ul-ulaan ke meraat su mevaher en se sarig din, ne iluta rin pà lavew su kalu ke ebpekevaal ded sikandin te salà. ¹³ Ne ke penggeraman ne ebpekeuma keykew ne warà bira rin dut te penggeram ne ebpekeuma dut te langun ne menge etew. Ugaid ne ke Eleteala se egkeserihan nevenar ne edtavang keykew, su kenà din idluhut ne ebpekeuma keykew arà se penggeram ne kenà nu egkegaga. Ugaid ne arà penggeram ne ebpekeuma keykew, ne ibehey rin keykew ke gaga te ed-engkenà su apey ka ebpekeliyu ne kenà nu ed-ul-ulaan ke meraat.

Kenà Egkepakey ne Sikitew ke Mibperetiyyaya Ki Hisus se Egkaan te Pan te Edtenuran Tew Ke Kinepatey Rin

Mekeatag Keytew ne Egkaan Ki Rema dut te Egkeenen ne Indrenà ne Siparat diyà te Menge Busew

¹⁴ Engketà be, menge suled ne igkelimu ku, ne kenà kew ed-amung dut te menge etew ne ebpengarap te kenà tidtu ne ebpengerapan. ¹⁵ Su sikiyu ne metau kew en ne ebpegitung, tembù be ruen ini se egkehiyen ku ne pegpegitunga niyu ini. ¹⁶ Ketà te edtumanen tew ke edtenuran te kinepatey ni Hisus mekeatag keytew, ne ruen ed-inumen ta te kebpeselamat tew te Eleteala. Ne kayi te ed-inumen tew ini ne tuus te mibpekidseveka ki ki Hisu Kristu su atag dut te lengesa rin ne impetudà din kayi te keyta. Ne ketà te kegkaan ta rut te pan ne ebpenebtevien ne tuus ini te mibpekidseveka ki ki Hisu Kristu su atag dut te lawa rin ne minatey diyà te pinebelavag ne kayu. ¹⁷ Na geina te seveka rà ke pan ne arà si Hisu Kristu, ne netuenan tew te misan merakel kiyu ne mibperetiyyaya ne iring te seveka kiyu rà su seveka rà ke pan ne mibpenevitevì keytew.

¹⁸ Pegpegitunga niyu rema ke ed-ul-ulaan te menge Hudiyansen. Su embiya ebpekeamung dan te egkaan dut te ibpelengesa ran ne ibehey

diyà te Eleteala, ne tuus arà te nekeamung dan en te ebpengarap te Eleteala.¹⁹ Ne engketà ded ke menge etew ne edrenà te siparat diyà te kenà tidtu ne ebpengerapan, ne nekeamung dan dema te ebpengarap dut te kenà tidtu ne Eleteala. Ugaid ne ebpesebutan ku keniyu te warà iya lalew ran ketà. Ne ini se kenà tidtu ne ebpengerapan ne warà iya igketavang dan dut te menge etew ne edrenà te siparat diyà te kandan.²⁰ Ugaid ne iyan ku egkehiyen ne arà se idrenà ne siparat te menge etew ne warà mebperetiyyaya diyà te kenà tidtu ne ebpengerapan ne iyan dan ebehayan ketà ne ke kenà egkekita ne ed-ingaran te busew ne sugsuhuen ni Setanas ne kenà ke tidtu ne Eleteala. Ne kenà ku egkiyuhan ne sikiyu ne ebpekeamung te ebpengarap te menge vusew.²¹ Su kenà egkepakey ne ebpekeamung kew te ed-inum dut te ed-inumen ne tuus te mibperetiyyaya kew ki Hisu Kristu, ne arà pà ne ed-inum kew rema dut te ed-inumen ne indrenà ne siparat diyà te menge busew. Ne kenà egkepakey rema ne egkaan kew te pan ne tuus te mibperetiyyaya kew ki Hisu Kristu, ne arà pà ne egkaan kew rema dut te egkeenen ne indrenà ne siparat diyà te menge busew.²² Su embiya iring ketà se ed-ul-ulaan niyu ne egkevehayan niyu ke Eleteala te kegkeepesi rin keniyu. Ne kenà kew ebpekeliyu rut te kedusa rin keniyu.

²³ Ruen egkahi te, “Egkepakey ne ed-ul-ulaan tew te misan engkey en ne ulaula asal kenà salà.” Ugaid ne iyan ku egkehiyen ne kenà langun ketà ne ebpeketavang dut te menge ruma tew. Su misan egkepakey ne ed-ul-ulaan tew te misan engkey en, ne kenà langun ketà ne ebpekepeiseg te sarig dut te menge ruma tew.²⁴ Warà perem dut te sikiyu ne ebpegelep te kandin dà ne keupianan, ke kenà keupianan ded dut te ruma ne menge etew.

²⁵ Tembù be egkehiyen ku te egkepakey ne egkaan kew te usa ne idehang diyà te pedian asal kenà eduwaruwa se hinawa niyu wey kenà kew ebpenginginsà ke embiya indrenà arà ne siparat diyà te kenà tidtu ne ebpengerapan.²⁶ Su warà egkeenen ne imbehey te Eleteala ne kenà egkepakey ne egkekaaan. Su ruen impesurat ne Lalag te Eleteala ne egkahi te, “Ke langun ne dunya wey ke langun ne nekeriken ketà ne pekearen te Eleteala.”

²⁷ Ketà ne embiya ruen duma nu ne kenà ebperetiyyaya ki Hisus ne ed-inggat keykew te egkaan diyà te valey rin ne egkiyug ka, ne keena nu misan engkey se ibpekaan din keykew. Ne kena ke en penginginsà ke endei ebpnuun su apey warà ibmesakit te hinawa nu.²⁸⁻²⁹ Ugaid ne embiya ruen etew ketà ne mibperetiyyaya ki Hisus ne egkahi te ayan se egkeenen ne indrenà ne siparat diyà te kenà tidtu ne ebpengerapan, ne kenà nu keena su arà se ibpetuus kandin te salà embiya egkaan ka. Tembù be kenà nu keena su apey kenà ebmesakit se hinawa rin.

Ne kalu ke ruen egkahi te, “Meambe ke kenà ku egkekaaan arà te netuenan ku ne kenà salà? Su meambe ke iyan ku edumaan ke itungan dut te ruma ne etew?³⁰ Su embiya mibpeselemtan ku te Eleteala arà se egkeenen ku, ne meambe ke egkehiyen te ruma ne etew te meraat ne egkekaaan ku misan mimpeselamat a ketà?”

³¹ Ugaid ne egkehiyen ku keniyu te iyan kenà tew kegkaan ketà. Iyan tew kenà kegkaan su ke langun ne ulaula tew te kegkaan wey ked-inum ne iyan tew ked-ul-ulaa se egkereyù te Eleteala.³² Ne sekitew, ne kenà

ki iya ed-ulaula te misan engkey en ne egkepeneheewit ke ruma tew te ebpekedsalà misan Hudiyenan sikandin, etawa kenà Hudiyenan, etawa ve ke ruma tew red te mibperetiyyaya ki Hisus.³³ Iringi niyu ke ed-ul-ulaan ku su layun ku ebpemengaa ke ralan te kegketevangi ku te langun ne menge etew. Su kenà ku iyan ebpegitungen se kedì dà ne keupianan, ugaid ne ke keupianan dut te langun ne menge etew. Su iyan ku ked-ulaula kayi su apey ku egkepeneheewit sikandan te kebperetiyyaya ki Hisus ne ebpekeliyu ran dut te keberedusaan dan.

11

Ini ne Mekeatag dut Te Dait ne Ed-ul-ulaan Tew diyà te Baley ne Ebpengeningeniyan

¹ Engketà be, ne iringi niyu ke ulaula ku iring dut te kineiringi ku te mid-ulaula ni Hisus. ² Na ruen ed-ul-ulaan niyu ne meupiya su warà niyu lipati ke impenurù ku keniyu, ne edtumanen niyu rema ke insuhù ku keniyu. ³ Ugaid ne ruen pà ini ne ebpeketaunen ku keniyu. Iyan ebayàbayà te meritan ne ke esawa rin, ne iyan ebayàbayà ke meama ne si Hisu Kristu, ne iyan ebayàbayà ki Hisu Kristu ne ke Eleteala. ⁴ Engketà be ne embiya egkevurun kew riyà te baley ne ebpengeningeniyan ne ruen meama ne ebpengeningeni etawa ebpenudtul te impesabut kandin te Eleteala, ne iyan iya se kenà edtutubew. Su embiya ruen tubew rin, ne nepegkeyà din su warà adat din ki Hisu Kristu ne ebayàbayà kandin. ⁵ Ugaid ne embiya ruen meritan ne ebpengeningeni etawa ebpenudtul te impesabut kandin te Eleteala, ne med tutungatub sikandin. Su embiya kenà ne nepegkeyà din su warà adat din te esawa rin ne ebayàbayà kandin. Su mekeyeyà ke meritan ne kenà edtutungatub su iring dut te meritan ne mibpetevungew. ⁶ Ketà be ne embiya kenà sikandin egkiyug ne ruen tungatub din, ne iyan tumù ne ebpetevungew sikandin su negidsan ded. Ugaid ne embiya egkeyeyaan sikandin te ebpetevungew, etawa ebpetamped, ne med tutungatub sikandin embiya riyà te baley ne ebpengeningeniyan. ⁷ Su iyan kenà kedin tutubew rut te meama ne ebpengeningeni su sikandin ne nelimbag te iring dut te kebpeparas te Eleteala, ne riyà te kandin ne egkekita ke bayàbayà te Eleteala. Ugaid ne ke meritan se egkekitaan dut te kebayàbayà te meama. ⁸ Su ke neuna ne meama ne warà nelimbag dut te lawa te meritan, ugaid ne ke neuna ne meritan se nelimbag dut te lawa te meama. ⁹ Ne kenà iyan kinelimbaha te Eleteala te meama su apey ruen ruma te meritan, ugaid ne midlimbag din se meritan su apey ruen ruma te meama. ¹⁰ Engketà be ne iyan meupiya te meritan ne edtutungatub sikandin ke riyà te baley ne ebpengeningeniyan su apey egkekita misan diyà te menge suluhuen te Eleteala ne riyà te langit te iyan ebayàbayà kandin ne ke esawa rin.

¹¹ Ugaid ne misan iring ketà, ne kayi te mibpekidseveka ki en ki Hisu Kristu ne mebpetevangey ran en, su ke meama ne ruen wayàwayà din dut te esawa rin, ne engketà ded dema ke meritan ne ruen wayàwayà din dut te esawa rin. ¹² Su misan midlimbag te Eleteala ke neuna ne meritan ne riyà ebpuun te lawa te meama, ne langun ne inenakan dan ne meama ne in-anak te meritan. Su ke langun ketà ne riyà dà ebpuun te Eleteala.

¹³ Na pegpegitunga niyu ma ini ke edait be ke embiya ruen meritan ne ebpengeningeni riyà te baley ne ebpengeningeniyan ne warà idtutungatub din. ¹⁴ Su igenat te rudsuan ne netuenan tew en te igkeyeyai te meama ke melayat ne vulvul din iring te meritan. ¹⁵ Ugaid ne atag te meritan ne meupiya ne ed-intengan ke melayat se bulvul din. Su iyan kinevehey te Eleteala te ebpekeleyaten ke bulvul din su apey metelevi ke ulu rin. ¹⁶ Ne embiya ruen kenà edtelimà kayi te migkahi ku en mekeatag te edtutungatub ke meritan ne ebpengeningeni ne ini se egkehiyen ku te warà duma ne betasan ne ibpenurù dut te sikami ne kedserihan ni Hisus ke kenà ini rà. Ne ini ke edumaan dut te langun ne mibperetiyaya te Eleteala diyà te baley ne ebpengeningeniyan dan piya diyà te rumा ne inged.

Ini se Mekeatag dut te Dait ne Ed-ul-ulaan Tew Te Kegkevurun tew te egkaan te Kedtenuri Tew te Kinepatey ni Hisus

¹⁷ Na ruen pà egkehiyen ku keniyu ugaid ne ini se egkehiyen ku ne kenà ku ideyù keniyu, su ketà te kevurunan niyu te ebpengarap te Eleteala ne iring te warà atag din su arà se kegkevurun niyu ne tuwas pà ne meraat se ebeelan niyu dut te meupiya. ¹⁸ Su nerineg ku ne matag kew egkevurunburun, ugaid ne ke hinawa niyu ne ebpemekedsurang. Ne ruen ebperetiyaya ku ketà. (¹⁹ Ketà te kebpesinsinumehayi niyu ne iyan din dà keupianan ne egkekita ketà te ke menge etew ne benar se kebperetiyaya rin ki Hisu Kristu su kenà dan eduma rut te ed-ul-ulaan niyu.) ²⁰ Su misan egkevurunburun kew te egkaan dut te kedtenuri niyu te kinepatey ni Hisus, ne ke ulaula niyu ne kenà si Hisus se edtentenuran niyu. ²¹ Su embiyà egkeuma en ke kegkaan, ne ruen se egkelagew su ed-una ran en te egkaan wey ed-inum taman te egketevereg en, ugaid ne ke rumा ne egkevitil ded. ²² Meambe ke kenà kew riyà dà egkaan te baley niyu? Ne meambe ke warà adat niyu dut te menge rumा niyu ne mibperetiyaya te Eleteala abpeg ke kebpegkeyà niyu dut te menge ayuayu? Menu, edeyuen ku sikiyu ketà te ulaula niyu? Kenà en iya!

²³ Ne egkehiyen ku maa ke engkey se dait ne ulaula ne impesabut kedì ni Hisu Kristu. Su ketà te kerukileman te kineulug ni Hudas ki Hisus ke Kerenan tew, ne guna su edlavung dan en ne migeweran ni Hisus ke pan, ²⁴ ne impeselamat din en diyà te Eleteala ne mibpenevitevi din en ke pan ne migkahi te, “Ini ke lawa ku ne ibehey ku ne ed-imetayan mekeatag te salà niyu. Layun niyu keena te iring kayi su ke kedtanudtanud niyu kedi.” ²⁵ Nekeipus dan se egkaan ne migeweran din maa ed-inumen ne migkahi te, “Ini se ed-inumen ne tuus te ruen behu ne pasad te Eleteala ne impasad din te menge etew rin, ne ke lengesa ku ne ibpetudà atag keniyu se tuus te edtumanen din ini. Ne uman kew ed-inum kayi ne egketenuran a nikiyu.”

²⁶ Ketà be ne taman te kenà pà edlived ke Kerenan tew ne uman niyu egkeena ini se pan wey ed-inuma ini se inumen ne ebpesebutan niyu ke kebpebpatey ni Hisus ke Kerenan tew mekeatag te salà niyu. ²⁷ Ne embiya ruen etew ne ed-amung te egkaan kayi te pan wey ed-inum kayi te inumen ugaid ne warà meketahù te itungan din ke meana kayi, ne nekesalà sikandin su warà din edati ke lawa ni Hisus wey ke lengesa rin ne neketudà atag kandin. ²⁸ Tembù be ke etew ne ed-amung

te egkaan wey ed-inum dut te kedtanudtanud te kinepatey ni Hisus, ne iyan iya se usisaa rin pà ke hinawa rin, ne arà pà ne egkepakey ne ed-amung sikandin te egkaan wey ed-inum ketà.²⁹ Su embiya ruen ed-amung te egkaan wey ed-inum ketà ugaid ne warà din mepegitung te ini ne tuus te kinepatey ni Hisus ke Kerenan tew, ne riyà ded ke puunan te kandin te kedusai te Eleteala kandin.³⁰ Su ini ke puunan te merakel keniyu se ebpenderaru, ne merakel keniyu se meluvey se lawa, ne merakel se mibpematey en su atag dut te kedusa te Eleteala.³¹ Embiya ed-unaan ta te ed-usisa ke hinawa ta su apey ta kenà ed-ul-ulaan ke meraat, ne warà idusa te Eleteala keyta.³² Ugaid ne embiya sikitew ne mibperetiyaya ki Hisus se edusaan te Eleteala, ne iyan din ed-ul-ulaan ini su apey ki kenà ebpekelaus te ed-ul-ulaan ta ne meraat ne kenà ki ebpekeamung dut te menge etew ne kenà ebperetiyaya ne edusaan din te apuy ne rakà.

³³ Engketà be menge suled, ne embiya egkevurun kew su edtumanen niyu ke edtenuran te kinepatey ni Hisus, ne warà ed-unauna keniyu su tehad kew te menge ruma niyu.³⁴ Ne embiya ruen egkevitil keniyu, ne riyà med-ib-ivulung te baley rin su apey warà id-isuhat kandin ne ke kedusa te Eleteala.

Na mekeatag te ruma pà ne insà niyu kediey, ne ruen pà ruma ne suhù ku keniyu ke embiya ebpekeuma ad kenian te keniyu.

12

Ini ne Mekeatag dut te Menge Ketau ne Ibehey Rut te Kedesenan ne Ebpetuntul te Menusiyà

¹ Na menge suled, ruen ini egkehiyen ku mekeatag te ruma ne insà niyu kediey, su kiyug ku ne egketuenan niyu mekeatag te menge ketau ne ibehey rut te Kedesenan ne Ebpetuntul te Menusiyà.² Netuenan niyu te warà kew pà mebperetiyaya ki Hisus, ne nepeneheewit kew te kebpengarap te kenà tidtu ne ebpengerapen ne warà hinawa rin. Ne ketà te mibpengarap niyu arà, ne nekesuwey kew en dut te tidtu ne Eleteala.³ Ugaid ne ketà te ebperetiyaya kew en te Eleteala ne egketuenan niyu embiya ke egkehiyen dut te etew ne ebpun te Kedesenan ne Ebpetuntul te Menusiyà etawa kenà. Su ke etew ne mid-ulinan dut te Kedesenan ne Ebpetuntul te Menusiyà ne kenà egkepakey ne edlalag te meraat mekeatag ki Hisus. Ne engketà ded dema warà etew ne egkepakey ne egkahi te si Hisu Kristu ke Kerenan din embiya kenà ebpesebuten sikandin dut te Kedesenan ne Ebpetuntul te Menusiyà.

⁴ Ugaid ne mekeatag te menge ketau ne imbehey te Kedesenan ne Ebpetuntul te Menusiyà te menge etew te Eleteala, ne ruen merakel te edsusunan din ugaid ne seveka rà se mibehey kandan su ke Kedesenan dà ne Ebpetuntul te Menusiyà.⁵ Ne ruen dema merakel ne susun ne ed-ul-ulaan tew su apey ki ebpemekedtevangey dut te menge ruma tew, ugaid ne seveka rà se edumaan tew ne si Hisu Kristu ke Kerenan tew.⁶ Sikitew ne mibperetiyaya ki Hisus ne merakel se edsusunan te ibpehelevk tew kandin, ugaid ne sebseveka rà se Eleteala ne ebehey keytew te ketau su apey ki ebpeketuman ketà te ibpehelevk din keytew.⁷ Ne ke ketau ne imbehey dut te langun ne mibperetiyaya kandin, ne arà ke tuus te iyan ebpetuntul keytew ne ke

Kedesenan ne Ebpetuntul te Menusiyà. Iyan kinevehey keytew su apey ki meketavang dut te rumा tew ne mibperetiyaya.⁸ Duen rumा ne iyan imbehey kandin te Kedesenan ne Ebpetuntul te Menusiyà ne ke ketau te eppesabut te rumा rin dut te benar ne penduan te Eleteala. Ne ke senge etew maa ne iyan imbehey kandin te Kedesenan ne Ebpetuntul te Menusiyà ne ketau te kedseysey rut te meralem ne penduan te Eleteala.⁹ Ne senge etew pà lavew ne iyan imbehey kandin ne ke mevaher ne kedsarig, ne ruen pà lavew ne iyan imbehey kandin ne ke gehem te kebpmawì su apey rin mevewii ke menge ebpenderaru.¹⁰ Ne ruen pà lavew rumा ne iyan din imbehey ne ke gehem te ebaal te mekegeyip. Ne ruen pà maa iya rumा ne iyan din imbehey ne ketau te kedseysey te impesabut kandin ne Lalag te Eleteala. Ne ruen pà rumা ne iyan imbehey kandin ne ketau te egkekilala rin ke ketau te rumা rin embiya riyà ebpuun te ke Kedesenan ne Ebpetuntul te Menusiyà te Eleteala ne insuhù te Eleteala etawa kenà. Ne ke rumা pà ne etew ne mibehayan te Eleteala te ketau te kedlalag te kinehiyan ne kenà dan egkesebutan, ne ruen ded maa ne mibehayan din te ketau te kedluwas kayi te lalag.¹¹ Ne langun kayi ne ketau ne riyà da ebpuun te ke Kedesenan ne Ebpetuntul te Menusiyà, su sikandin se ebayàbayà ke endei rin ibehey arà se ketau.

Ke Sempità mekeatag te langun ne Mibperetiyaya ki Hisus ne iring te pepatà dut te Lawa rin su Egenat

Te Mibpekidseveka ki kandin

¹² Embiya ebpegitungen ta mekeatag te lawa te etew, ne misan merakel se pepatà dut te lawa ugaid ne seveka rà ke lawa su langun ne pepata ne amung dut te seveka ne lawa. Ne engketà ded dema ke langun ne mibperetiyaya ki Hisus su iring ki te pepatà te lawa rin, ne misan merakel kiyu ne nevaluy ki ne seveka rà ki Hisus.¹³ Su langun tew ne misan Hudiyanan etawa kenà uripen etawa kenà ne langun tew ne mibunyahan ibpepevayà dut te seveka rà ne Kedesenan ne Ebpetuntul te Menusiyà su apey ki egkevaluy ne egkeseveka ne lawa egenat dut te kebpekidseveka tew ki Hisus. Langun tew ne mibehayan te seveka rà ne Kedesenan ne Ebpetuntul te Menusiyà ne ed-uprà kayi te hinawa tew.

¹⁴ Su iring te nekahí ku mekeatag te lawa te etew ne seveka rà, ugaid ne ruen merakel ne pepatà rin.¹⁵ Upama ini, embiya egkahi ke paa rin te, “Kenà e ma pepatà te lawa rin su kenà a belad,” ne misan iring ketà se egkekahi rin ne kenà egkepakey ne kenà ubpu te lawa rin arà se paa.

¹⁶ Ne embiya egkahi ke telinga rin te, “Siak ne kenà a pepatà te lawa rin su kenà a mata,” ne misan pà iring ketà se egkekahi rin ne ubpu red iya lavew te lawa.¹⁷ Su upama ke langun ne lawa te etew ne mata rà, ne kenà ebpekerineg sikandin. Ne upama ke langun ne lawa te etew ne telinga rà, ne kenà ebpekearek sikandin.¹⁸ Ugaid ne kenà iring ketà se kinelimbag te Eleteala te etew, su ke lawa te etew ne kenà senge susun ne pepatà dà ugaid ne merakel su uman seveka ne ruen egkeetahan din su arà ma ke kiyug te Eleteala.¹⁹ Su kenà en lawa embiya elin-elin dà mata, etawa elin-elin dà telinga.²⁰ Ugaid ne kenà iring ketà

se kinelimbag te Eleteala te lawa ta, su merakel se edsusunan din ne pepatà misan seveka rà ne lawa.

²¹ Tembù be kenà egkepakey ne egkahi ke mata riyà te belad te, "Sikew ini se belad, ne warà atag nu kayi te kediey!" Ne iring ded dema ke ulu, kenà egkepakey ne egkahi riyà te paa te, "Sikew ini se paa, ne warà atag nu kayi te kediey!" ²² Su iyan benar ne ke pepatà te lawa ta ne iyan ta itungan ne warà atag din, ugaid ne dekelà ma se atag din su warà meimames ini se lawa ta embiya warà arà. ²³ Ne ke menge pepatà te lawa ta ne iring te warà atag din ne iyan ta maa edupianan nevernar. Ne ke menge pepatà te lawa ta ne ebpekeyeyà keyta ne edtelevan ta te meupiya su apey kenà egkekita. ²⁴ Ugaid ne ruen menge pepatà te lawa ta ne meupiya ne edtengtengen misan kenà ta en edtelevan te meupiya. Iyan kineveeli te Eleteala dut te lawa ta te iring kayi su apey ta metuganur te meupiya arà se menge pepatà te lawa ta ne iring te reisek se egkeetahan din dut te ruma ne pepatà te lawa ta. ²⁵ Midlimbag te Eleteala ke menge pepatà te lawa ta su apey warà seveka rà ketà ne rekèlà pà se pantag din dut te ruma rin su langun ne pepatà te lawa ta ne ebpemedevangà. ²⁶ Embiya egkesekitan ke seveka ne pepatà te lawa ta, ne langun te lawa ta ne egeram te mesakit. Ne engketà ded dema ke embiya ruen seveka ne pepatà te lawa ta ne egkereyù, ne langun dan ne egkehalew.

²⁷ Engketà be arà ne sikitew ke mibperetiyyaya ki Hisu Kristu ne iring kiyu te lawa rin su uman seveka keytew ne pepatà en te lawa rin. ²⁸ Ne uman seveka rut te sikitew ne ubpu en te lawa rin, ne mibehayan en te Eleteala te kandin ne helevek. Ne ke neuna ne mid-ulaula te Eleteala ne mibpemili te menge kedserihan din ne ebpemesabut dut te Meupiya ne Tudtul. Ne ikeruwa, ne imbehey rin ke helevek dut te menge etew ne ebpelambas te lalag din. Iketelu, ne imbehey rin ke helevek dut te menge etew te kebpenurù te lalag din. Ne edtundug ketà ke menge etew ne ebaal te mekegeyip wey ke menge etew ne ebpemawì te ebpendesaru wey ke edtavang te menge ruma ran wey ke ebpeneheewit te ruma ran ne mibperetiyyaya ki Hisus wey ke edlalag te kinehiyan ne kenà dan egkesebutan. ²⁹ Su netuenan niyu te kenà langun tew ne mibperetiyyaya ki Hisus ne kedserihan din, ne kenà langun ne ebpelambas te lalag din. Ne kenà langun ne ibpehelevrek te ebpenurù mekeatag kandin. Ne kenà langun ne ebpekevaal te mekegeyip. ³⁰ Ne kenà langun ne ebpemawì te ebpendesaru. Kenà langun ne ebpekelalag dut te kinehiyan ne kenà egkesebutan, ne kenà langun ne ebpekeluwas dut te kinehiyan ne kenà egkesebutan. ³¹ Ne ini se menge ketau ne ibehey te Kedesenan ne Ebpetuntul te Menusiyà, ne iyan niyu itahù te hinawa ke enkey se beripantag ne buyua niyu te kegketevangi niyu te menge ruma niyu.

Meupiya ini, ugaid ne ruen pà muntus kayi ne ibpekita ku en keniyu.

13

Ini ne Mekeatag te Kebpelimlimuey Tew ne ke Muntus ne Pegitungan

¹ Su misan metau a te ebpekelalag dut te merakel ne kinehiyan kayi te ampew te dunya wey misan ke kinehiyan te suluhuen te Eleteala ne riyà te langit, ugaid ne embiya warà limù ku te menge ruma ku ne warà pantag din ke kebpekelalag ku rut te merakel ne kinehiyan. Su iring a

rà te ebpekeuringer ne ebedtingen ne ahung etawa luyung te kayu ne ebalesen. ² Ne misan metau a ne ebpelambas te Lalag te Eleteala, ne misan ruen impayag te Eleteala kediey ne in-eles din dut te ruma ne etew, ne misan nesebutan ku ke langun ne benar ne penurù, ne misan engkey pà se kerekelà te sarig ku te Eleteala su apey ku egkekehiyan ke buvungan te ibpearat, ugaid ne embiya warà limù ku rut te menge ruma ku ne warà egkepentehan ku riyà te etuvangan te Eleteala. ³ Ne misan ibehey ku ke langun ne pekearen ku riyà te menge ayuayu, ne misan idluhut ku ne egketutung ke lawa ku ugaid ne kenà egenat dut te limù ku rut te menge etew, ne warà egketelimà ku ne behey te Eleteala ne idlalew rin.

⁴ Su embiya benar se limù ta te menge ruma ta, ne iyan ta egked-ulaula ne ebpekepeniniger ki, ne ebpeketylanged ki, ne warà kegkeima ne idtahù ta te hinawa ta, ne kenà iyan ta ebpemengaan se kegkereyui ta, wey kenà ki ebpendantal. ⁵ Embiya senep se limù ta ne kenà ki tewasak, kenà ki ebpenehel te keyta ne kiyug, kenà ki melemu ne egkeepes, ne kenà deisek kerù dà ne idtahù te en te hinawa ta. ⁶ Embiya benar se limù ta te ruma ta ne kenà ta igkehalew ke meraat ne ulaula ran, ugaid ne iyan ta igkehalew ne ke metidtu ne ulaula ran. ⁷ Embiya benar ke limù ta ne ruen ketigker ta te misan engkey ne kemerehenan, ne kenà ki ebpemivig wey kenà egkeawà ke sarig ta dut te menge ruma ta. Ne kenà ki edsuli te ibped-ulaula te ruma ta ne meraatey, ugaid ne edtigkeran ta en.

⁸ Su ke langun ne ketau ne imbehey te Eleteala dut te menge etew, ne ruen hewii ne egkeawà. Ugaid ne ke limù, ne kenà egkeawà taman te taman. Su ruen hewii ne ebpekeuma ne ke ketau te kebpesabut dut te impesabut kandan te Eleteala ne egkeawà. Ne ke kebpekelalag te kinehiyan ne kenà egkesebutan ne egkeawà dema. Ne engketà ded dema ke menge etew ne ebpekesabut te meralem ne penurù ne egkeawà ded. ⁹ Su ke nesebutan tew guntaani ne kenà pà impit wey ke ketau tew te ebpemesabut te Lalag te Eleteala ne kurang pà dema su warà pà meuma ke ked-imesara te Eleteala. ¹⁰ Ugaid ne ketà te keuhetan din ne hewii te ked-imasag en dut te Eleteala, ne ke langun ne warà pà mepasad ne egkeawà.

¹¹ Rengan te batà e pà ne ke kedlalag ku ne iring te batà, ne ke kebpergitung ku wey ke kegingginawa ku ne ulaula pà te kevetaan. Ugaid ne gunteani te lukes ad ne in-awà ku ke ulaula ne kevetaan. ¹² Ne taman te kayi ki pà te ampew te dunya ne iyan te rà nesebutan ne iring te edtengteng ki riyà te pehelungan ne egkempuran en su kenà utew mepayag se kadtengteng ta. Ugaid ne keuremà ne kenà alung dà se egkekita ta su iyan ta egkekita ne si Hisu Kristu. Ne misan ini se nesebutan ku guntaani ne kenà pà meimpit, ne ruen hewii ne ebpekeuma ne ed-imesaren te Eleteala ke nesebutan ku iring dut te nesebutan din mekeatag kediey.

¹³ Na, ruen ini se tetelu ne kenà egkeawà kayi te keyta: ini se kebperetiyyaya ta te Eleteala, ini se kebpenareng ta te kegketuman dut te impasad te Eleteala kenita wey ini se limù ta te menge ruma ta. Ugaid ne iyan ebpekeuna kayi ne ke limù ta te menge ruma ta.

14

Ke Ketau te Ebpenurù te Impesabut te Eleteala ne Muna pà dut te Kebpekelalag te Etew te Kinehiyan ne Kenà din Egkesebutan

¹ Engketà be arà, ne iyan niyu ipeuna te hinawa ne arà se kegkelimù te menge ruma niyu. Ugaid ne meupiya rema ke ebuyù kew te menge ketau te Kedesenan ne Ebpetuntul te Menusiyà, ne muna pà ke ketau te kebpenurù niyu rut te impesabut keniyu te Eleteala ne kenà ke kebpekelalag te kinehiyan ne kenà egkesebutan. ² Su embiya ruen etew ne ebpekelalag te kinehiyan ne kenà din egkesebutan, ne iyan din ebpekidlelahan ke Eleteala, kenà ke menge ruma rin su kenà dan egketuenan ke engkey arà se egkehiyen din. Su ke etew ne edlalag te iring ketà ne ibpekahì rut te Kedesenan ne Ebpetuntul te Menusiyà te tudtul ne riyà ebpuun te Eleteala ne in-eles dut te ruma su warà ebpekesabut. ³ Ugaid ne ke etew ne ebpenurù dut te impesabut kandin te Eleteala ne iyan din edlelahen ke menge ruma rin ne egketevangan dan kayi te edlelahen din wey kebpekeiseg te kebperetiyyaya ran ki Hisus wey ebmevaher ke hinawa ran te kedtigker dut te langun ne kemerehenan dan. ⁴ Ne arà se etew ne edlalag te kinehiyan ne kenà egkesebutan, ne ke hinawa rin dà se egketevangan din. Ugaid ne ke etew ne ebpenurù dut te impesabut kandin te Eleteala, ne egketevangan din mulà ke menge ruma rin ne mibperetiyyaya ki Hisus. ⁵ Ne egkiyuhan ku ne langun niyu ne egkevehayan te ketau te kedlag te kinehiyan ne kenà din egkesebutan, ugaid ne muna pà ne egkiyuhan ku ne igkevehey keniyu arà se ketau te ebpenurù dut te impesabut te Eleteala su apey ebpeketavang dut te menge ruma niyu. Su iyan pà dekelà se atag din ke ebpenurù dut te impesabut te Lalag te Eleteala tumin dè be rut te ebpekelalag te kinehiyan ne kenà egkesebutan embiya warà metau ne edluwas te kinehiyan din ne kenà egkesebutan.

⁶ Menge suled, embiya ebpekeuma a keniyan ne iyan ku rà idlalag keniyu ne arà se kinehiyan ne kenà egkesebutan, ne engkey se igketavang din keniyu? Warà! Ugaid ne embiya ebpekeuma a keniyan ne idseysey ku keniyu ke impesabut kedi te Eleteala, etawa idseysey ku keniyu ke benar ne penurù te Eleteala, ne embiya kenà arà ne ruen ibpenurù ku keniyu ne ini se nesebutan ku mekeatag kandin, etawa ruen penduan ne impenurù kedi ne ibpesabut ku keniyu, ne arà pà ne ruen dalan te kegketevangi ku keniyu.

⁷ Embiya idsempità ta ke etew ne ebpekelalag te kinehiyan ne kenà egkesebutan, ne ebpekeiring te etew ne ebpemulendag etawa etew ne ebpengutiyapì. Embiya kenà egketau ne ed-epad, ne ke menge ruma rin ne kenà dan egketuenan ke engkey arà se ed-eparen din. ⁸ Ne iring ded dema te etew ne ebasal te ahung su ebpesabut te menge ruma rin te ebpekibunù dan en. Embiya iyan din kebasal se ruen idsawug din ne iring te deregkuwalà dà, ne kenà ebpeminehen dut te merakel ne etew. ⁹ Ne sikiyu rema, menge suled, embiya edlalag kew te kinehiyan ne kenà egkesebutan, ne engkey ve se kebpekesabut dut te menge ruma niyu? Su embiya kenà egkesebutan te ruma niyu ke edlelehan niyu ne iring te keramag ne edsahad dà.

¹⁰ Ne merakel se kinehiyan kayi te ampew te dunya, ne warà seveka rà ne kinehiyan ne wawet su ruen ded ebpekesabut ketà. ¹¹ Ugaid ne

embiya ruen ebpekidlalag kedì ne kenà ku egkesebutan ke engkey se egkehiyen din, ne iring sikandin te riyà ebpuun te meriyù ne inged su kenà key ebpekedsebutà. ¹² Na geina te egkiyug kew ne egkevehayan kew te menge ketau te Kedesenan ne Ebpetuntul te Menusiyà, ne iyan niyu buyua ne menge ketau ne ke kebpekeiseg te kebperetiyyaya te menge rumा niyu te eduma ki Hisus.

¹³ Tembù be arà se etew ne edlalag te kinehiyan ne kenà egkesebutan, ne iyan iya se ibpengeningeni rin te ebehayan sikandin te ketau te kedluwas ketà te edlelahen din te rumा rin. ¹⁴ Su embiya iyan ku kebpengeningeni te kinehiyan ne kenà egkesebutan, ne kayi te hinawa ku ne ebpengeningeni ugaid ne ke itungan ku ne kenà eduma ketà. ¹⁵ Na embiya iring ketà ne engkey se ed-ul-ulaan ku? Iring kayi. Ebpengeningeni a te Eleteala dut te lalag ne ibpekahi kedì dut te Kedesenan ne Ebpetuntul te Menusiyà, ugaid ne ebpengeningeni a rema te lalag ne egkesebutan ku. Ne egkanta a su edeyù te Eleteala te lalag ne ibpekahi kedì dut te Kedesenan ne Ebpetuntul te Menusiyà, ugaid ne egkanta a rema te lalag ne egkesebutan ku. ¹⁶ Su embiya edeyù ki te Eleteala te kinehiyan ne kenà egkesebutan ne ruen menge rumা tew te egkevurun ne kenà ebpekesabut dut te egkehiyen ta te edeyù te Eleteala, ne kenà dan ebpekeamung keytew te edeyù te Eleteala su kenà dan ma egkesebutan ke kinehiyan tew. ¹⁷ Misan ke kedeyù tew te Eleteala ne meupiya neveran, ugaid ne ke menge rumা tew ne warà mekesabut ne kenà dan egketevangan.

¹⁸ Ebpeselamat a te Eleteala su imbehey rin kedì ke ketau te kebpekelalag te kinehiyan ne kenà egkesebutan, ne muna pà dut te sikiyu. ¹⁹ Ugaid ne embiya riyan a te egkevurunan te menge mibperetiyyaya ki Hisus ne iyan dà tumù ne egkekahi ku keniyu se lelima ne tahà ne ebpeketavang keniyu su nesebutan niyu tumin dut te ngivungiwuan ne lalag ne warà seveka ketà ne egkepurut niyu ne ebpeketavang keniyu.

²⁰ Menge suled, kenà niyu ebetaa se kebpegitunga niyu kayi. Iyan niyu rà iringi te kebpegitung te batà ne ke itungan dan ne kenà pà ebpekepesinaru riyà te meraatey ne ulaula. Ugaid ne ke pegitungan niyu mekeatag dut te menge ketau ne riyà ebpuun te Kedesenan ne Ebpetuntul te Menusiyà, ne iyan niyu kebpegitung ne iring te lukes. ²¹ Su ruen impesurat ne Lalag te Eleteala rengan ne egkahi te,

“Ruen edsuhuen ku ne menge etew
ne senge bias se kinehiyan dan
su apey ku ibpepenudtl
dut te menge etew ne mibpemili ku
ke engkey se ebpesebutan ku kandan.
Ugaid ne misan engketà se ed-ul-ulaan ku,
ne kenà dan ebpemineg.”

²² Engketà be arà ne ke ketau te etew te edlalag te kinehiyan ne kenà din egkesebutan ne ibpetuus ini dut te menge etew ne kenà ebperetiyyaya ki Hisus te ini ne menge etew ne benar ne mibperetiyyaya en. Kenà tuus ini dut te menge mibperetiyyaya en. Ugaid ne ke menge ebpelambas te Lalag te Eleteala ne ebpesabut dut te impesabut kandan te Eleteala, ne ibpetuus ini dut te menge etew ne mibperetiyyaya en ki

Hisus te benar ne mibperetiyaya ran en. Kenà tuus ini dut te menge etew ne kenà ebperetiyaya.

²³ Tembù be embiya egkevurunburun kew ke langun ne mibperetiyaya ki Hisus ne iyan niyu edlelahen ke kinehiyan ne kenà egkesebutan ne ruen duma ketà ne kenà ebperetiyaya, ne iyan dan pegitungan ne ebpengenvuneg kew su warà dan mesebuti. ²⁴ Ugaid ne embiya iyan niyu ed-ul-ulaan se ebpesabut dut te impesabut keniyu te Eleteala ne ruen midlusud ketà te kegkevurun niyu ne kenà pà ebperetiyaya ne egkerineg dan ke Lalag te Eleteala ne ibpesabut niyu, ne ketà puunan ne egketuenan dan te ruen mid-ulaula ran ne meraat, ne egketuenan dan dema te edusaan dan te Eleteala dut te salà dan. ²⁵ Su igkepayag dan ke meraat ne netahù te hinawa ran ne nekeelles dut te menge etew. Ne ketà ne ebpekedsendit dan ne ed-arap dan te Eleteala se egkahi te, “Benar ves iya ne iyan ebpetuntul keniyu ne ke gehem te Eleteala!”

Iyan tew Ed-ul-ulaan se kegkeatur te Ulaula diyà te Baley ne Ebpengeningeniyan

²⁶ Engketa be menge suled, ne ini se egkehiyen ku keniyu. Embiya egkevurun kew te ebpengarap te Eleteala, ne iyan meupiya ne ruen egkanta se edeyù te Eleteala. Ne ruen ruma ne ebpenuurù. Ne ruen duma ne ebpesabut te impesabut kandin dut te Eleteala. Ne ruen duma pà ne ebpekelalag te kinehiyan ne kenà egkesebutan, ne ruen ded dema metau ne edluwas ketà. Ugaid ne langun te ed-ul-ulaan niyu ne iyan niyu iya ul-ulaa ne ke kebpekeiseg dut te kebperetiyaya niyu te keduma ki Hisu Kristu. ²⁷ Embiya ruen ebpekelalag te kinehiyan ne kenà egkesebutan, ne iyan dà egkepakey ne egkereruwa etawa egketetelu ne kenà dan ebperedredseey. Ne iyan iya se ruen ded metau ne edluwas. ²⁸ Ugaid ne embiya warà metau ne edluwas, ne kenà egkepakey ne ruen edlalag ketà te kinehiyan ne kenà egkesebutan diyà te kevurunan. Su embiya warà metau ne edluwas ne egkepakey red ne ebpekidlalag te Eleteala asal ed-ekinen din dà te warà duma rin.

²⁹ Ne embiya ruen ebpesabut dut te impesabut kandan te Eleteala, ne iyan meupiya se deruwa etawa tetelu se edlalag. Ne langun dan ne mebpemineg su pegpegitunga ran arà se edlelahen. ³⁰ Ugaid ne embiya ruen ketà te kevurunan ne ruen impesabut kandin te Eleteala te edlalag pà ke ruma rin, ne iyan meupiya ne ed-engked pà arà se edlalag. ³¹ Su langun niyu ne egkepakey ne edlalag, ugaid ne mebpesemsembayey su apey ke langun ne ebpemineg ne ebpekehuru wey egkevag-et ke hinawa rin. ³² Su ke etew ne ebpesabut dut te impesabut kandin te Eleteala, ne ed-erenen din ke kedlalag din. ³³ Su kenà egkiyuhan te Eleteala ne ebpekeuringer kiyu, ugaid ne iyan din egkiyuhan se egkevensà ke langun ne ulaula tew.

Na iring dut te betasan te menge sakup dut te Eleteala ne ebpengarap diyà te ebelàbelà ne menge inged, ³⁴ ne ke menge meritan ne kenà iyan ebpenuurù ke egkevurun kew riyà te baley te Eleteala te ebpengeningeni. Kenà dan ebpekepenurù su ruen impesurat diyà te penduan te menge Hudianen ne kenà egkepakey ne ke meama ne iyan egkamal ke meritan. ³⁵ Embiya ruen kenà egkesebutan dut te meritan ne kenà din i-insà diyà te baley ne egkevurunan ugaid ne riyà din id-insà te esawa rin embiya ed-ulì dan en. Su mekeyaya ke

ulaula te meritan ne eddalag diyà te kegkevurun te menge etew ne mibperetiyyaya.

³⁶ Menu, kenà kew ebperumaruma rut te migkahi ku? Iyan niyu ves nepegitung ne riyà ebpuun te keniyu ke Meupiya ne Tudtul etawa neketelimà kew rà kayi. ³⁷ Embiya ruen etew ne iyan din nepegitung ne ruen impesabut kandin te Eleteala, etawa egkahi te ruen ketau rin ne imbehey kandin dut te Kedesenan ne Ebpetuntul te Menusiyà, ne iyan iya se mesebuti rin ini se insurat ku keniyu ne suhù ini ne riyà ebpuun te Eleteala. ³⁸ Ugaid ne embiya kenà din ebpeminehen ini se egkehiyen ku, ne kenà niyu en iya pemineha se egkekahi rin.

³⁹ Na menge suled, iyan niyu ipeuna te hinawa niyu ne ke kebpemesabut niyu te Lalag te Eleteala. Ugaid ne kenà niyu en dewaya ke ebpekkelalag te kinehiyan ne kenà egkesebutan. ⁴⁰ Ne langun te edul-ulaan niyu te kegkevurun niyu ne ul-ulaa niyu ke engkey se edait wey kegkeatur din.

15

Ini ne Mekeatag Dut te Kegkevanew ni Hisus

¹ Na menge suled ku, ebpetenturan ku keniyu ke migkahi ku en keniyu mekeatag ki Hisu Kristu. Su arà se Meupiya ne Tudtul ne impesabut ku keniyu, ne mibperetiyyaya niyu wey mid-itindehan niyu te mevaher. ² Ne egenat dut te ini se Meupiya ne Tudtul ne impenurù ku keniyu ne ebpekeliyu kew rut te kedusa te Eleteala keniyu embiya ibpeiseg niyu ke kegawed niyu te mevaher wey kenà meluvey se kebperetiyyaya niyu ki Hisus.

³ Ne ini ke impesabut kediey ne impenurù ku rema keniyu su iyan ibpeuna ne penurù ini dut te langun. Mibpeimatey si Hisu Kristu su apey ki igkepeliyu nikandin dut te salà tew iring dut te impesurat te Eleteala ne Lalag din dengan. ⁴ Ne impesabut ku rema keniyu te inleveng si Hisus ne ketà te iketelu ne hewii ne mibanew te Eleteala sikandin, su ini ne impesabut ded ne Lalag te Eleteala ne impesurat din dengan. ⁵ Impesabut ku keniyu te guna su nevanew en sikandin ne mibpekita ki Pedro, ne arà pà ne mibpekita diyà te langun ne kedserihan din. ⁶ Neipus arà ne mibpekita sikandin diyà te nevurun ne menge sakup din ne labi lelima nehatus. Ruen en minatey kandan, ugaid ne taman guntaani ne merakel pà kandan se biviyag. ⁷ Neipus arà ne diyan en maa mibpekita sikandin te ki Santiago, ne arà pà ne riyà te langun ne kedserihan din.

⁸ Siaken ke mewri ne pinekita rin. Su embiya idsempità ku, ini se kineperetiyyaya ku ki Hisus ne iring a te vatà ne netehel se ked-enaka kandin su misan kenà e pà perem ebperetiyyaya ne nekeperetiyyaya ad ketà. ⁹ Su ke langun ne kedserihan din ne siaken en iya se pinekemevavà. Kenà dait ne ed-ingaranan a te kedserihan din su rengan te warà e pà mebperetiyyaya ki Hisus ne mibpekesekitan ku ke menge etew ne mibperetiyyaya kandin. ¹⁰ Ugaid ne ke raat te nanam te Eleteala kedi se puunan te kenà dinèg dà te ebpengumew se kineparin te ulaula ku. Ne ruen nepentahan din ke kineraat te nanam din kedi su mibaluy a rin ne kedserihan din, ne ketà puunan ne iyan pà dekelà se nehelevek ku rut te langun ne kedserihan ni Hisus. Ugaid ne misan iring ketà se helevek ku, ne kenà ku arà egkegaga su arà ne tavang

ded te Eleteala kedì. ¹¹ Arà se Meupiya ne Tudtul ne impesabut ku keniyu, misan siaken etawa ke rumà pà ne kedserihan, ne neked-iring se ibpesabut dey, ne arà ke mibperetiyaya niyu.

Ini ne Mekeatag Dut Te Kebanew te Eleteala te Menge Minatey

¹² Iyan dey impesabut keniyu ne si Hisus ne nevanew en te kinepatey rin. Na meambe ke ruen keniyan te keniyu se egkahi te ke minatey ne kenà en egkevanew te Eleteala keuremà? ¹³ Su embiya benar ini se egkehiyen niyu te kenà egkevanew te Eleteala ke menge minatey keuremà, ne iyan din meana ne warà mevanew en te Eleteala si Hisus. ¹⁴ Ne embiya warà mevanew si Hisus te kinepatey rin, ne warà pantag din te kebpmesabut dey keniyu wey warà ded lavew pantag din ke kebperetiyaya niyu. ¹⁵ Ne kenà ketà dà taman su embiya benar te warà mevanew si Hisus, ne nekedtarù key su nekahi rey keniyu te mibanew si Hisus te Eleteala. Ugaid ne embiya kenà egkevanew te Eleteala ke menge minatey keuremà, ne warà din dema mevanew si Hisus. ¹⁶ Su embiya kenà egkevanew te Eleteala ke menge minatey, ne iyan din pè be mevanew si Hisus. ¹⁷ Ne embiya warà mevanew si Hisus, ne warà pantag din ke kebperetiyaya niyu kandin wey warà kew mekepeliyu dut te kedusa te salà niyu. ¹⁸ Ne rumà pà, ne ke langun ne mibperetiyaya ki Hisus ne minatey en ne warà dan mekepeliyu rut te kedusa te salà dan. ¹⁹ Su embiya kayi rà te biviyag ki pà se duen egkepenareng tew ki Hisus ne keupianan atag dut te kebperetiyaya tew, ne iyan ki en mekeyruwiru dut te langun ne menge etew.

²⁰ Ugaid ne iyan benar se nevanew en iya si Hisus. Sikandin ke neuna ne nevanew ne ibpepehimbenar arà te egkevanew iya ke langun te menge minatey keuremà. ²¹ Su ebpuun te salà te senge etew ne si Adan ne langun ne menge etew ne ebpmatey red. Ne engketà ded dema arà se mid-ulaula te senge etew, si Hisu Kristu, ne langun ne menge minatey ne egkevanew keuremà. ²² Na geina te inenakan kiyu ni Adan ne langun tew ne ebpmatey, ne engketà ded dema ke langun ne mibpekidseveka ki Hisu Kristu ne egkevanew keuremà. ²³ Si Hisu Kristu ke neuna ne nevanew su arà se edait. Ugaid ne ketà te hewii te kedlived din kayi te ampew te dunya ne langun tew ne ke sakup din ne ibpetundug kandin te egkevanew. ²⁴ Embiya egkeuma en arà se hewii ne mibpetedtavan din kayi te dunya, ne id-awà ded ni Hisu Kristu ke langun ne kunterà din ne edatù ne ruen gehem dan te kedwayàwayà. Egkeipus ketà ne id-uli din ke kedadù dut te langun ne edetuan din diyà te Amey rin ne Eleteala, ²⁵ su edatù pà si Hisus taman te kenà din edtelawen ke langun ne kunterà din. ²⁶ Ne ketà te edtelawen en ni Hisu Kristu ke langun ne menge kunterà din, ne ke mewri ne id-awà din ne ke kemetayen. ²⁷ Netuenan ta ini su ruen impesurat ne Lalag te Eleteala rengan ne egkahi te, “Si Hisu Kristu se mibehayan te Eleteala te kegkamal te langun taman.” Ne kayi ebpuun te ini ne mepayag nevenar te warà mekeragkes ke Eleteala dut te egkemalan ni Hisus su Eleteala red ma se mibehey ki Hisus te kebpekekamal din. ²⁸ Ne embiya si Hisus ke Anak te Eleteala se ebpeketalew dut te langun ne kunterà din, ne ketà ne id-uli din arà diyà te Eleteala ne mibehey kandin te langun. Ne idragkes din ke hinawa rin su apey ke Eleteala se edatù dut te langun taman.

²⁹ Na, kayi ta maa egkehiya te kegkevanew rut te menge minatey su embiya kenà egkevanew ke menge minatey, ne engkey be se meana rin ke betasan dut te menge etew ne mibunyahan kun su timbang te sikandan ded arà ke ruma ran ne minatey en? Su embiya kenè egkevanew te Eleteala ke menge minatey, ne meambe ke arà se betasan ne edumaan dan? ³⁰ Ne ruma pà ne meambe ke idluhut dey te layun kebpekesekiti kenami kayi te kebpemesabut dey mekeatag ki Hisus embiya kenà egkevanew ke minatey? ³¹ Su uman gewii, menge suled, ne netuenan te Eleteala te iyan ku egkeperateng ne ke kemetayan ku! Ne netuenan dema te Eleteala te sikiyu se igkehalew ku atag dut te kebperetiyyaya niyu ki Hisu Kristu. ³² Kayi te inged ne Ipisu ne ke menge kunterà ku ne iring te menge mehintelunan ne binatang ne egkesuatan e ran te edaas. Ne meambe ke edtigkeran ku pà se iring kayi embiya ebpatay a ne kenà a egkevanew? Su embiya warà egkeperateng ku keuremà, ne iyan pà tumù se ebpmengà a te kehelawan ku iring dut te beseanan ne egkahi te,

“Na ed-inum wey egkaan kiyu en
su kalu ke mehaan kiyu en ebpatay
ne id-anew kiyu en langun.”

³³ Ugaid ne kenà kew egkeekali ketà. Su tentenuri niyu ke beseanan ne egkahi te, “Embiya ebpekeruma kew rut te menge etew ne meraat se ulaula rin, ne egkepeneheewit kew ran dema te ebaal te meraat.” ³⁴ Gimerata niyu en ke mata niyu su apey kew ebpekeimaman, ne engkeri niyu en ke ulaula niyu ne meraatey. Migkehiyan ku sikiyu kayi su apey kew egkeyeyai su ruen keniyan te keniyu ne reisek pà se netuenan din mekeatag te Eleteala!

Ini ne Mekeatag te Behu ne Lawa ne Ibehey Keytew te Eleteala Ketà te Kegkevanew Tew

³⁵ Ne kalu ke ruen etew ne ed-insà te, “Memenu se kegkevanew te menge minatey? Ne engkey se paras te lawa ran?” ³⁶ Ne iyan ku tavak te warà buwa itungan ketà ne etew. Su upama ke ibpemula tew ke benì diyà te tanà, ne kenà ini edtuvù ke embiya kenà egkesalin ke lawa te benì. Su egkereetan pà ke benì ne arà pà ne edtuvù. ³⁷ Ne arà se benì ne ibpemula tew ne lahas dà iya, kenà arà ke lawa dut te kedtuvù din, misan parey etawa ruma ne ibpemula tew. ³⁸ Ne intahù en te Eleteala te itungan din ke engkey se paras te lawa ne egkepakey te uman eberangan te lahas ne impemula. Uman senge lahas ne benì ne ruen en kandin ne kebpeparas te lawa rin embiya edtuvù en.

³⁹ Ne iring ded dema ketà ke langun ne ruen hinawa rin kayi te ampew te dunya, su ke paras dan ne warà memeked-iring-iring. Su ke paras te menusiyà ne senge bias dut te paras te menge binatang. Ne engketà ded dema ke paras te menge pepenuk ne senge bias dut te paras te menge serà.

⁴⁰ Merakel se midlimbag te Eleteala kayi te ampew te dunya wey riyà te langit, ne langun ketà te midlimbag din ne meupiya ne edtengtengan ugaid ne kenà ebpmeked-iring se kedtengtengi te keupiya rin. Su senge bias se keupiya te kedtengtengi rut te midlimbag din riyà te langit wey ke midlimbag din kayi te ampew te dunya. ⁴¹ Misan ke riyà te langit ne ke keupiya te rayag te andew ne sengebias dut te rayag te bulan. Ne ke keupiya te rayag dut te menge bituen ne idsengebias

dema. Misan ke merakel ne bituen ne warà memeked-iring ke kesihey te rayag dan.

⁴² Ne engketà be rema te kebanew rut te Eleteala te menge minatey ne egkesembian ini se lawa ta. Su ke lawa ta kayi te ampew te dunya ne ebpatey ne idleveng. Ugaid ne ke lawa ne ebenawen te Eleteala ne kenà en ebpatey. ⁴³ Ne ini se lawa ta dutun te kinekeleveng en ne kenà meupiya ne edtengtengen ne warà en pantag din, ugaid ne ketà te kegkevanew en ne merayirayi ran en. Misan meluvey ke lawa ta guntaani, ne embiya behu en ke lawa ta ne ruen en gehem din. ⁴⁴ Ini se lawa ta ne idleveng ne lawa rà te kememenusiyai, ugaid ne embiya egkevanew en te Eleteala ne behu en maa ne lawa su edait en ne ed-ubpà diyà te langit. Su netuenan ta te ruen lawa ta ne edait dà ne ed-ubpà kayi te ampew te dunya, ne ruen ded dema lawa ta ne edait ne ed-ubpà diyà te langit. ⁴⁵ Netuenan tew ini su ruen impesurat ne Lalag te Eleteala ne egkahi te, "Si Adan ke neuna ne etew ne midlimbag te Eleteala ne mibehayan sikandin te lawa wey ginawa ne dait dà ne ed-ubpà kayi te dunya." Ugaid ne si Hisu Kristu ne nevaluy ne etew ne mid-ingaranan te mewri ne Adan, ne iyan sikandin ebehey te umur ne warà edtemanan din su apey kiyu mekeubpà diyà te langit. ⁴⁶ Su ke behu ne lawa ne ibehey keyta rut te kegkevanew ta ne kenà ke neuna ne lawa su ke neuna ne lawa ne ke lawa ta ne ebpatey, ne arà pà ne ruen behu ne lawa ta riyà te langit. ⁴⁷ Si Adan ke neuna ne etew ne nelimbag ne iyan din limbahan se tanà. Ugaid ne si Hisu Kristu ne mid-ingaranan te ikeruwa ne Adan ne diyà ebpuun te langit. ⁴⁸ Ne geina te ne inenakan kiyu ni Adan ne tanà ded dema ke limbahan ta, su tanà ke limbahan te lawa rin. Ugaid ke langun tew ne mibpekidseveka ki Hisus, ne ruen umur din ne kenà edtaman iring dut te umur ni Hisus. ⁴⁹ Gewii te kayi ki pà te ampew te dunya ne ke lawa ta ne iring dut te lawa te neuna ne etew ne iyan din limbahan se tanà. Ugaid ne egkeuma arà se hewii ne ke lawa ta ne ebpekeiring te lawa ni Hisus, ke riyà ebpuun te langit.

⁵⁰ Iyan meana kayi, menge suled, te migkahi ku ne ini se lawa ta kayi te ampew te dunya ne kenà ebpekeamung ketà te edetuan te Eleteala keuremà. Su kenà egkepakey ne ini se lawa ta ne ebpatey ne ebpekeamung dut te kenà ebpatey taman te taman.

⁵¹ Ne pemineha niyu ve ini se in-eles dengan ugaid ne impesabut en te Eleteala. Ini se egketemanan dut te langun ne milperetiyyaya ki Hisus. Kenà langun ne ebpatey, ugaid ne sikitew langun ne seguguneey se kegkesalin te lawa tew. ⁵² Su arà se kegkesalin te lawa tew keuremà ne megmehaan dà su seperek mata rà ke ebperehingen en ke budyung te Eleteala su tuus te ebpetedaven en ke dunya. Su ebpedehingen arà se budyung ne egkevanew en ke menge minatey ne milperetiyyaya ne egkesembian en ke menge lawa ran te kenè en ebpatey. Ne sikitew se biviyag pà ne egkesalin en dema ke lawa tew. ⁵³ Su ini se lawa ta ne ebpatey ne edsembian te lawa ne kenà en ebpatey. Uya, ini se lawa ta ne egkeredak ne edsembian te lawa ne kenà en egkeredak. ⁵⁴ Ne embiya ini se lawa ta ne ebpatey wey egkeredak ne egkesembian en te Eleteala te lawa ta ne kenà en ebpatey, ne ketà ne egketuman en ke impesurat ne lalag te Eleteala ne egkahi te,

"In-awà en te Eleteala ke kepepatey

ne ebpekeuma kayi te langun ne menge etew!"

⁵⁵ "Ne endei en ke ketehel te kepepatey?

In-awà en te Eleteala!

Ke ketehel din ne ebpekeandek te etew ne nepupus en!"

⁵⁶ Iyan kegkeandek te menge etew te kepatey su netuenan dan te embiya ebpatey ran en ne edusaan dan dut te salà dan. Ne ke kevaher dut te salà ne idusa te menge etew su sabap dut te midlangkad dan ke penduan te Eleteala. ⁵⁷ Ugaid ne edeyù kiyu te Eleteala su in-awà din en ke ketehel te kepepatey ne kenà ki en egkeandek te kebpatey su impeliyu ki en ni Hisu Kristu ke Kerenan tew. ⁵⁸ Engketà be arà menge suled ne rekèlè te hinawa ku, ne itindehi niyu te mevaher ke kebperetiyyaya niyu dut te Kerenan tew ne si Hisu Kristu ne kenà niyu perina ke itungan niyu misan duen penggeram ne ebpekeuma kayi te keniyu. Ne pegelepi niyu te edtuman ke kiyug din su netuenan tew te ruen keupiya rin ke langun ne ed-ul-ulaan tew diyà te kandin.

16

Ini ne Mekeatag te Ibehey ne Tavang Diyà te Ruma dut te Menge Mibperetiyyaya ne riyà te Inged ne Hirusalim

¹ Na ruen pà ini ibpesabut ku keniyu ne ini ne mekeatag te kebehey niyu te tavang dut te menge mibperetiyyaya ki Hisus ne egkepesangan diyà te inged ne Hirusalim. Iyan niyu dumai ke impesabut ku en dut te menge mibperetiyyaya ne riyà te lusud te inged ne Gelasija. ² Uman Akad ne penehana kew te ibehey niyu riyà te Eleteala, ne diyà egkelevat dut te nepentiyari niyu ne isivey niyu en neraan ke langun ne kandin dema. Buruna niyu ini neraan su embiya ebpekeuma a ne apey melemu rà se kedtimua ku. ³ Su embiya ebpekeuma a ne edsuhuen ku ke menge etew ne nepemili niyu ne ebpekeewit dut te imbehey niyu riyà te inged ne Hirusalim. Ne ibpeewit ku rema ini se surat ku kandan su apey ke menge etew ne ebpeketalimà ketà ne egketuenan dan ke engkey se elin ne lakew rut te menge etew ne mid-ewit. ⁴ Ne embiya iyan ku egkepegitung ne iyan meupiya ne ebpendiyan a te inged ne Hirusalim, ne ebpekeruma ran en kediey.

⁵ Ebpengkeniyan a te keniyu ugaid ne ed-una a ebpevayà diyà te lusud te inged ne Mesidunya, su diyan a iya ebpevayà. ⁶ Ne embiya ebpekeuma a kenian te keniyu ne malù pà meuhet se ked-upbàupbà ku kenian, su kalu ke kenà e pà edlaus taman te ebpekesahad arà se ked-uran-uran. Ne meupiya ke embiya egketevangan a niyu ketà te ked-awà ku en riyà te keniyu. ⁷ Su kenà ku egkesuatan ne mehaan dà se kebpemekebalak tew, ugaid ne iyan netahù te itungan ku ne malù meuhet ke embiya idluhut te Eleteala.

⁸ Ugaid ne kayi a ed-upbà te inged ne Ipusu taman te kenà egkeuma ke hewii ne ed-ingaranan te Pintikust. ⁹ Su ruen pà merakel ne etew kayi ne egkiyug ne ebpmineg te kebpenurù ku, ne ibpemesabut ku kandan misan merakel se egkunterà te Eleteala kayi.

¹⁰ Ne embiya ebpekeuma si Timoteo kenian te keniyu ne gelhelaa niyu sikandin su egelevek ded dema sikandin te Kerenan iring kediey.

¹¹ Su iyan iya se ibpekita niyu ke ked-adat niyu kandin. Ne tevangi niyu sikandin te ked-awà din en su apey egkehalew se hinawa rin

te kedlived din kayi te kediey. Su ebpenerengen dey sikandin rut te menge suled tew te kebperetiyaya ki Hisu Kristu.

¹² Ne si Epulus ne suled tew rema te kebperetiyaya ki Hisus, ne kepipira ku en buyua kandin te meduma sikandin dut te menge suled tew ne ebpengkeniyan te keniyu. Ne kenà pà egkiyug guntaani, ugaid ne ebpengkeniyan ded sikandin embiya warà en ebpekevangan kandin.

Ke Mewri ne Penduan ni Pablo

¹³ Na guntaani ve, menge suled ku, ne uram kew te keduma niyu ki Hisus. Ne itindehi niyu te mevaher ke kebperetiyaya niyu ki Hisu Kristu. Kenà niyu igkeyeyai ne ibpekita niyu ke keduma niyu te kiyug te Eleteala, ne kenà niyu igkeandek te keduma kandin misan egkerehenan kew. ¹⁴ Kayi te langun ne ed-ul-ulaan niyu ne ibpekita niyu ke limù niyu te ruma ne etew.

¹⁵ Na menge suled ku, netuenan niyu te iyan neuna ne mibperetiyaya riya te lusud te inged ne Gerisyu ne telteleanak ne ensi Istipanya. Ne egenat dà ketà ne kenà dan eduwaruwa se edtavang dut te menge ruma ran ne mibperetiyaya. ¹⁶ Tembù be, menge suled, ebuyuen ku keniyu ne dumai niyu ke lalag dut te etew ne iring ketà wey misan engkey ne ruma ran ne edtavang te ibpehelevek kandan.

¹⁷ Ne ingkehalew ku te nekeuma en si Istipanya, si Fortunatu wey si Ekeykus, su iring te migkurang ke kegkelimengawi ku keniyu. ¹⁸ Ne inmeupiya sikandan te hinawa ku wey iring te inmeupiya te ginawa niyu. Dait ne ed-edatan niyu se iring kayi ne menge etew.

¹⁹ Ne ebpenginginsà keniyu ke langun ne mibperetiyaya kayi te langun ne inged te lusud te inged ne Asiya. Ne ebpenginginsà rema keniyu si Ekila ki Prisila abpeg din ke langun ne mibperetiyaya ki Hisus ne egkevurun diyà te valey ran kayi te Ipusu, su uman kew ran dà egkepegitung su sabap dut te kebpekidseveka niyu ki Hisus.

²⁰ Langun ne ruma ku ne mibperetiyaya kayi ne ebpenginginsà dan dema keniyu.

Ne sikiyu rema kenian ne mebpeed-edatey wey mebpelimlimuey kew.

²¹ Ini ve se egkehiyen ku kayi te ketepusan te surat ku, ne siaken si Pablo se edsurat kayi, ne ebpenginginsà a keniyu langun. ²² Ne ke menge etew ne engkungkun ne mibperetiyaya ugaid ne warà limù te hinawa ran ki Hisu Kristu, ne edusaan dan te Eleteala taman te taman.

“Marana tha,” ne iyan din meana ne, “Hisu Kristu ke Kerenan tew, lived ke en te mehaan!” ²³ Ne iyan ku kiyug ne ebpeneuven kew perem ni Hisu Kristu ke Kerenan tew. ²⁴ Ne ke limù ku ne kenà meawà diyà te keniyu sabap dut te mibpekidseveka kiyu ki Hisu Kristu.

Arà dà taman. *Pablo*

Ke Ikeruwa ne Surat ni Pablo Riyà te Menge Etew ne Mibperetiyaya Te Inged Ne Kurintu

¹ Siaken si Pablo ki Timoteo ke suled tew te kebperetiyaya se edsurat ini. Edsuratan ku sikiyu ke langun ne mibperetiyaya keniyan te inged ne Kurintu wey riyà te langun niyu ne mibperetiyaya diyà te rumà ne inged ketà te lusud te Gerisya. Su egenat te kiyug te Eleteala ne nepemili a ne kedserihan ni Hisu Kristu.

² Kiyug ku ne egkepenaub kew te Eleteala ke Amey tew wey si Hisu Kristu ke Kerenan, ne egenat kandan ne kenà meseleti te meraat ke hinawa niyu.

Ke Eleteala se Edtavang dut te Langun ne Menge Etew ne Egkemere-henan

³ Edeyuen tew ke Eleteala, ke Amey ni Hisu Kristu ne Kerenan tew. Su sikandin ne iiruwen ne Amey tew wey sikandin dema ke edtavang keytew kayi te langun ne kemerehenan tew. ⁴ Su misan engkey se egkerumpak tew ne kemerehenan ne edtevangan kiyu rin su apey kiyu ebpekehuru riyà te kandin ne iring be rema ketà se kedtevangi tew ke menge rumà tew ne egkerehenan. ⁵ Su embiya dekelà se kemerehenan tew iring dut te kemerehenan ni Hisu Kristu, ne rekèla dema se kedavang te Eleteala keytew su ke kinepekidseveka tew ki Hisu Kristu. ⁶ Su embiya egkerasey key dut te kebpemesabut dey te Meupiya ne Tudtul, ne iyan din kedreseyea kenami su apey kew metevangi wey mebméilut ke kebperetiyaya niyu ki Hisus. Ne iring din ded dema embiya edtevangan key te Eleteala, su ke tavang din kenami ne iring ded dut te tavang din keniyu su apey niyu metigkeri en ke merasey ne iring dut te imbayà dey. ⁷ Engketà be arà ne kenè en egkeuru se hinawa rey mekeatag keniyu, su netuenan dey se embiya ebpevayà kew te kemerehenan iring dut te impevayà dey, ne edtevangan kew red dema te Eleteala iring dut te kinetevangi rin kenami.

⁸ Na menge suled, ebpeketuinan dey keniyu se midrasey key dut te menge etew ne riyà te inged ne Asiya. Kenà dey egketuinan te ebpegusaring ke taman ne impepekaid dan kenami, su iyan dey pegitungan ne kenà dey en egkegaga te edtigker ke imped-ulaula ran kenami su kunaan dey ke ibpatey rey en. ⁹ Uya, su kunaan dey ke arà en ke tedtab te umur dey. Ne iyan dan kineped-ulaula kayi kenami su apey key kenà mekesarig te kenami rà ne ketehel, ugaid ne riyà key edsarig te Eleteala ke ebanew te menge minatey. ¹⁰ Ne iring key te riyà mekeitendeg te tibtivilan te kalut te kedaahad te kemetayan dey te kinetevangi kenami te Eleteala, ne netuenan dey te kenà ed-engked ne edtavang su makin ne ed-iseg. Su rekèla se kedsarig dey kandin su kenà key rin ed-engkeran te edtavang. ¹¹ Ne egketevangan key niyu te ibpepevayà te kebpengeningen iyu kenami. Su embiya merakel niyu se ebpengeningen iyu ne ibehey te Eleteala keniyu ke ebuyuen niyu, ketà ne merakel se ebpekereyù te Eleteala mekeatag te tavang din kenami.

Mibpenudtul ni Pablo ke Meambe ke Nesalin ke Itungan din Mekeatag te Kebpendiyà Din te Inged ne Kurintu

12 Nehalew key te netuenan dey ne warà meraat ne mid-ulaula rey diyà te menge etew, labi en kayi te keniyu. Ini se ed-ul-ulaan dey ne metidtu su iyan dey edtumanen ke kiyug te Eleteala. Ne kenà kememenusiyai rà ne ketau se edumaan dey, su iyan dey edserihan ne ke tavang te Eleteala kenami su apey iyan dey ed-ul-ulaan ne ke ebpekesuhat. 13-14 Langun te idsurat dey kenyan te keniyu ne egkevasa niyu wey egkesebutan niyu su warà duma ne udsud ketà te surat ne nekeeles. Gunteani ne ruen en egkesebutan niyu mekeatag te betasan dey, ugaid ne egkiyuhun dey ne egkeumanan pà lavew taman te kenà egkeuma ke hewii te kedlived ni Hisu Kristu ke Kerenan tew su apey igkehalew key niyu iring dut te kegkehalew rey keniyu.

15-16 Geina te netuenan ku nevenar se nehalew kew mekeatag kenami ne iyan ku itungan ne ed-awet key kenyan te keniyu ketà te ebpendiyà key te inged ne Mesidunya, ne ed-awet key red maa ketà te keduli dey. Su kiyug ku ne ebpekibalak a keniyu te egkeruwaan a su apey egkereruwa se kedtavang ku keniyu. Ne embiya ed-awà ad diyà te keniyu te kebpendiyà te inged ne Hudiya, ne meupiya embiya egketevangan a niyu. 17 Ne geina te warà a meketuman te ebpengkeniyan te keniyu, ne kalu ke egkahi kew te edsalinsalin ke itungan ku. Kunaan niyu vuwa ke iring dà ke itungan ku rut te itungan te menge etew ne iyan dà ebayàbayà kandan ke itungan ne kememenusiyai, su kunaan niyu ke arà te kegkahi ku te, "Uya, ebpengkeniyan a te keniyu," ne kayi rà te bèbà ku. 18 Ugaid ne kenà a iring ketà. Su iyan dey egkehiyen ne benar ne iring dut te egkehiyen te Eleteala ne benar. 19 Su ke Anak te Eleteala ne si Hisu Kristu ke impesabut dey keniyu ki Silas wey si Timoteo ne egkesserihan sikandin su kenà egkepakey ne kenà din edtumanen ke nekahri rin. 20 Su sikandin ke midtuman te langun ne impasad te Eleteala mekeatag te kebpekeperiyaya te menge etew. Ketà be ne kayi egenat te si Hisu Kristu ne egkepakey ne egkahi ki te langun ne pasad te Eleteala ne benar iya, su ketà ne egkereyù tew ke Eleteala. 21 Su ke Eleteala ne iyan mibag-et te kebperetiyyaya tew ki Hisu Kristu, ne sikandin se mibpemili keytew ne menge etew rin ne egelevek kandin. 22 Ne mibpesebutan din keytew te sikitew ne nevaluy ne menge anak din ibpepevayà dut te Kedesenan ne Ebpetuntul te Menusiyà ne impeubpà din kayi te hinawa tew su tuus te edtumanen din ke langun ne impasad din keytew.

23 Ugaid ne egkehiyen ku keniyu ke meambe ke warà a medlaus se ebpengkeniyan te keniyu. Warà a mebpengkeniyan su apey ruen hewii ne ebpedsendit kew ne warà en kebpegingawà te edtidtuwen ku pà ke menge ulaula niyu. Ne netuenan te Eleteala ne benar ini. 24 Ne kenà dey iyan itungan ne ebayvayaan dey sikiyu ke engkey se kebperetiyyaya niyu mekeatag ki Hisu Kristu, su netuenan dey te nekesuhat ke kebperetiyyaya niyu. Ugaid ne iyan dey kiyug ne edtavang key keniyu su apey ebpekeiseg ke kegkehalew niyu te keduma ki Hisu Kristu.

2

¹ Engketà be arà, ne iyan en netahù te itungan ku ne kenà ad ebpengkeniyan su apey kenà ku en ebehayon te kemutuwan ke hinawa

niyu iring dut te neuna ne kinepengkenian ku te kebpetidtuwa ku keniyu. ² Su embiya ebehayan ku pà sikiyu te kemutuwan niyu, ne warà en ebpekevehey te kehalew ku liyu te sikiyu. Su kenà kew ebpekehalew kediì embiya ruen kemutuwan niyu. ³ Tembù be, ini se mid-ulaula ku se mibpepeewitan ku sikiyu te surat su apey niyu meawà ke meraat ne perangey niyu. Su kenà ku egkiyuhane ebpekepengkenian e pad embiya ebpekevehey rà te mutu te hinawa ku atag dut te menge perangey niyu. Su sikiyu perem ke ebpekevehey te kegkehalew ku! Su netuenan ku se embiya egkehalew a rut te perangey niyu, ne egkehalew rema. ⁴ Tembù arà te kinepeewiti ku keniyu te surat ne nemutuwan a nevenar su iring ma te ebpekesinsinehew en se direlemen ku ne warà ku en metigkeri ke menge luwà ku ne eguriper. Ne kenà iyan meana rut te surat ku se ebehayan ku sikiyu te kemutuwan, ugaid ne ibpekita ku te rekelà ku sikiyu te hinawa.

Ini ne Mekeatag te Ebpesahad Ki te salà te Menge Ruma ta

⁵ Ne arà se etew ne nekevaal te salà keniyan, ne kenà siak se nesekitan din su sikiyu red ke menge etew ne mibperetiyaya keniyan te Kurintu. Ne embiya kenà langun ne sikiyu ne ruen iyan keniyan te keniyu. Ugaid ne kenà ku en ed-umanan ini se lalag ku ne ibenar kandin. ⁶ Su netuenan ku te merakel en keniyan te keniyu se mibehayan te kerusaan din, ne kenà ku en ed-umanan. ⁷ Na gunteani ve ne pesaharan niyu en sikandin wey up-upiani niyu sikandin te ebpehayuk su apey ke sarig din te Eleteala ne kenà egkeawà. ⁸ Ne ebuyuen ku keniyu ne ipekita niyu kandin te rekelà niyu te hinawa. ⁹ Su midsuratan ku rà sikiyu su apey ku egkekita kayi ke benar ne eduma kew rut te langun ne penduan ni Hisu Kristu ne impenurù ku keniyu. ¹⁰ Ne embiya ebpesehareni niyu sikandin, ne ebpesehareni ku red dema. Su embiya mibpesahad niyu en, ne ebpeseharan ku rema su apey kew egketevangi, ne netuenan ni Hisu Kristu te benar ini se egkehiyen ku. ¹¹ Ne ini se ed-ul-ulaan ta su apey ki kenà mepeneheewit ni Setanas ke datù te pekaid, su netuenan ta ne metau te liyuk te kegkeekali ta.

Neuru si Pablo diyà te Inged ne Teruwas su atag te Warà Din Metuen si Tito ke Suled Din te Kebperetiyaya

¹² Na guna su nekeuma a te kinependiyà ku te inged ne Teruwas te kebpemesabut ku rut te Meupiya ne Tudtul mekeatag ki Hisus, ne nekita ku se ruen en ralan ne neveelan te Eleteala ketà te kebpevengew ku rut te impehelevek din kedi. ¹³ Ugaid ne iyan ingkepeguru te hinawa ku ne warà ku metuen ke suled tew ne si Tito. Geina te warà ku metuen sikandin, ne mibpemehetew ad dut te langun ne mibperetiyaya ketà su midlaus ad diyà te inged ne Mesidunya.

Ini ne Sempità Mekeatag te Sikitew ne Ebpmesabut Dut te Meupiya ne Tudtul Mekeatag ki Hisus ne Imperahid te Periyemut

¹⁴ Ne misan pà nekebmutu ke hinawa ku ketà, ne dekelà se kinereyù ku te Eleteala. Su netuenan ku ne neseveka kiyu riyà te ki Hisu Kristu ne iring be ketà ne kenà iyan ku edumaan ke kiyug te kememenusiyai su ke kiyug te Eleteala ke edtumanen ku. Su ke Eleteala se ebpetuntul keytew su apey piya endei ki ebpesinaru su ebpesabut te Meupiya ne

Tudtul, ne iyan mibperehiran te Eleteala keytew te ebpeeneb dut te Meupiya ne Tudtul ne iring te periyemut ne egkearek dut te menge etew.¹⁵ Su ini se ibpemesabut ta ne ke Meupiya ne Tudtul mekeatag ki Hisus ne ini ke puunan te kebmeemut ta, ne riyà te etuvangan te Eleteala ne meemut se ked-ureka rin. Ne egkearek dut te menge etew ne ebpekepeliyu, ne egkearek ded dema dut te menge etew ne ebpekependiyà te apuy ne rakà.¹⁶ Ne ke ked-ureka rut te menge etew ne ebpekependiyà te apuy ne rakà su kenà dan ebperetiyaya, ne warà en egkeregidan din su iring te egkeevul ne minatey. Arà be ne nekesuwey en te Eleteala taman te taman. Ugaid ne ke ked-ureka rut te menge etew ne ibpekeliyu ni Hisus ne meupiya se ked-ureka ran su nekevehey kandan te umur ne warà edtemanan din. Tembù be iring kayi ne helevek te kebpemesabut dut te Meupiya ne Tudtul ne merehen iya, ne engkey rà se etew ne edtakur ne egelevek kayi?¹⁷ Ayan se menge etew ne ebpemenurù te Lalag te Eleteala ne iring te ibpementiyari ran, ne kenà dan edtakur te iring kayi ne helevek. Ugaid ne sikami ne kenà iring ketà su midsuhù key te Eleteala, arà be se kebpemenudtul dey ne metidtu su mibpekidseveka key ki Hisu Kristu. Tembù be layun dey edtentenuri te ke Eleteala se edtengteng kenami rut te langun ne helevek dey.

3

¹ Maa, engkey se pegitungan niyu mekeatag kediey kayi egenat te ini se migkahi ku en? Kunaan niyu vuwa ke idantal ku rà ini. Maa, iyan din kemeyidan ne ruen pà ibpekita rey keniyu ne surat ne riyà ebpuun te ruma ne etew se tuus te meupiya ini se ulaula rey? Etawa maa, duen pà surat ne keniyan egenat te keniyu ne ed-ewiten dey riyà te ruma ne inged te kebpenurù dey?² Sikami mulà ne kenà en arà kemeyidan su iring kew te surat ne ebpenehewiten dey mekeatag dut te meupiya ne helevek dey, su sikiyu en iya ke titihus atag dut te kinesalin te ulaula niyu su sabap dut te kineperetiyaya niyu en ki Hisus. Uya, arà iya ke benar ne titihus su egkekita te ruma ne etew.³ Ne egkekita kayi te ed-ul-ulaan niyu te nesembian en ni Hisu Kristu ke hinawa niyu sabap dut te impesabut dey keniyu mekeatag kandin. Ne sikiyu ne timbang te tidtu ne surat ne kenà belad dà se midsurat, ugaid ne ibpepevayà dut te helevek te Kedesenan ne Ebpetuntul te Menusiyà. Ne kenà diyà dà insurat te melumpipi ne batu iring dut te penduan ne intahak ki Moises dengan, ugaid ne surat ini ne riyà din en mulà insurat te hinawa niyu.

⁴ Ini se nekahai ku su rekèlè se sarig dey te Eleteala sabap dut te kebpekidseveka rey ki Hisu Kristu.⁵ Ne mekeatag dut te langun ne nehelevek dey, ne kenà dey egkekahi se kenami rà ne ketehel se kebpekegaga rey ketà su arà ne ketehel ne riyà ded ebpuun te Eleteala.⁶ Ne sikandin ded be ke mibehey kenami te ketau te kebpemesabut dey dut te behu ne pasad din. Ne ini se behu ne pasad ne kenà iring dut te neuna ne penduan ne imbehey te Eleteala ki Moises, ugaid ne imbehey ini impepevayà dut te Kedesenan ne Ebpetuntul te Menusiyà. Su arà te neuna ne penduan ne insurat ne netuenan tew se nekesalà ki ne riyà ki egkepeneheewit te kepepatey ne warà edtemanan din. Ugaid ne ke Kedesenan ne Ebpetuntul te Menusiyà se ebehey keytew te umur ne warà edtemanan din.

Ini ne Mekeatag dut te Behu ne Pasad te Eleteala ne Iyan pà Mevaher se Gehem din dut te Neuna ne Penduan

Ne Imbehey rin ki Moises

⁷ Rengan te kineuhing te Eleteala te penduan din ki Moises diyà te melumpipì ne batu, ne nelikuvungan te merayag ne raman te Eleteala ke paras ni Moises. Ne ke menge etew ne kenà dan egkevutatek te edtengteng si Moises su egkesirang dan dut te raman din ne misan iring ketà ne midsahad dà. Arà te neuna ne penduan te Eleteala ne imbehey rin ki Moises ne riyà ki egkepeneheewit te kepepatey ne warà edtemanan din su mevaher se gehem din, ⁸ ne iyan pè be kenà muna pà se kevaher te gehem din ini se behu ne pasad ne imbehey te impepevayà dut te Kedesenan ne Ebpetuntul te Menusiyà. ⁹ Uya, arà te neuna ne penduan ne imbehey te Eleteala ki Moises ne ruen gehem din su egkepeyahan tew ke salà tew ne iyan ebpeneheewit keytew riyà te nerakà, ugaid ne ke behu ne pasad ne muna en se kevaher te gehem din su ebpetidtu keytew diyà te etuvangan te Eleteala su apey kiyu ebpekeubpà diyà te kandin taman te taman. ¹⁰ Su misan mevaher se gehem din ke neuna ne penduan, ne mibpelilipatan en ke gehem din su ke behu ne pasad ne muna pà se kevaher te gehem din. ¹¹ Su misan duen gehem din ke neuna ne penduan ne ruen tedtab din, ne iyan pè be kenà muna pà se kevaher te gehem din ini se behu ne pasad ne warà tedtab din.

¹² Geina te rekèlè te hinawa rey se kedsarig dey dut te behu ne pasad ne warà kegkeawà din, ne kenà dey igkeandek se kebpemesabut dey rut te Meupiya ne Tuditul mekeatag ki Hisus. ¹³ Ne kenà key iring ki Moises te guna su ed-elum en ke merayag dut te paras din ne mid-elangan din en ke paras din su apey kenàmekita te menge rumà rin ne Hudiyanan, ke menge kevuwaran ni Israyil, te ed-elum en ke merayag. ¹⁴ Ugaid ne warà mesebuti dut te menge Hudiyanan su meresen se ulu ran. Ne misan guntaani ne embiya ebasa ran dut te penduan ni Moises ne iring te nepintuan pà ke itungan dan su kenà dan egkesebutan. Ne kenà egkevukaan arà se itungan dan taman te kenà dan ebperetiyaya ki Hisus. ¹⁵ Uya, benar ini su misan gunteani ne embiya ebasa ran te penduan ni Moises ne kemuluwan pà lavew ne nepintuan ke itungan dan su kenà dan egkesebutan ke tidtu ne meana rin. ¹⁶ Ugaid ne embiya ebperetiyaya ran dut te Kerenan, ne egkevukaan arà se nepintuan ne itungan dan ne ebpekesabut en ke Lalag te Eleteala. ¹⁷ Su arà se Kerenan ne ke Kedesenan ne Ebpetuntul te Menusiyà ne ed-ubpà diyà dut te menge etew ne mibperetiyaya. Ne sikandin ke ebpereliyu te menge etew su apey ran kenà en egkepengunguripen dut te salà wey ke keduma ran dut te insuhù te penduan ni Moises. ¹⁸ Tembù be warà nekealang te itungan dut te langun tew ne mibperetiyaya ki Hisu Kristu su neawà en. Ne iring dut te paras ni Moises ne neenlahan dut te raman te Eleteala, ne sikitew ke ebpeandlag dut te raman te Kerenan tew. Ne ke Kerenan ke Kedesenan ne Ebpetuntul te Menusiyà, ne iyan din egeleveken ne edsembian din ke ulaula tew taman te egkeawà ke ulaula te kememenuisyai ne iyan dè be egkekita ne iring dut te ulaula ni Hisus kayi te keytew.

4

In-upama ni Pablo ke Helevek Dan te Ebpmesabut te Meupiya ne Tuditul ne Iring dan te Kuren se Kevavà din su apey Mepayahi

Ke Gehem dut te Meupiya ne Tuditul ne Kenà Kandan dà su riyà te Eleteala

¹ Geina te Eleteala se mibehey kenami kayi ne helevek, ne kenà egkeawà ke kegkevag-et dey te egelevek te mevaher. ² Ayan se ibpegelesà ne ulaula ne ebpekeyeyà ne mid-engkeran dey. Kenà dey ed-ul-ulaan se kebpegekalà. Kenà dey edsembian ke Lalag te Eleteala, ugaid ne iyan dey egkehiyen ne ke benar. Iyan dey rà ed-ul-ulaan ne ibpekita te menge etew te warà meraat ne itungan dey, ne netuenan ini te Eleteala su sikandin se ed-usisa te langun ne ulaula rey. ³ Su ini se Meupiya ne Tuditul ne ibpmesabut dey, ne embiya nekeeles ini ne riyà dà mekeeles dut te menge etew ne warà medtelimà te kebpekeliyu ran dut te kepepatey ne warà edtemenan din. ⁴ Ne iyan dan kenà kebpekeperetiyyaya su mibpintuan ke itungan dan ni Setanas ke datù te pekaid ne ebpengerapen dut te menge etew ne kenà ebperetiyyaya kayi te ampew te dunya. Tembù be kenà dan egkekita ke raman ne ed-anlag dut te Meupiya ne Tuditul, su egenat dut te raman te Meupiya ne Tuditul ne egkekita ke kebpepurù ni Hisu Kristu, ne kayi te ulaula ni Hisus ne egkekita ke ulaula te Eleteala su sikandin ke paras te Eleteala. ⁵ Kenà dey iyan ibpesabut ne mekeatag kenami, ugaid ne mekeatag ki Hisu Kristu su sikandin ke mibpemili te Eleteala ne egkamal te langun. Ne sikami ne iring te sugsuhuen te kedadavang dey keniyu kayi te kedaduman dey te idsuhù din kenami. ⁶ Su rengan te kinelimbaha te Eleteala kayi te dunya ne migkahi sikandin dut te merusirem ke sikandin te, “Mebmerayag su apey meawà ini se merusirem!” Ne engketà ded dema ke mid-ulaula rin kenami su ke itungan dey ne mibmerusirem, ne mibpekerayag din su apey rey egkekita ke kepurù te Eleteala ne kayi rin impayag te ki Hisu Kristu.

⁷ Su sikami ne iyan din iring ne kuren ne midtehuan te belielehà ne tamuk ne insarig kenami te Eleteala ne ini se Meupiya ne Tuditul ne ibpmesabut dey. Insarig din ini kenami te kevevaan ne etew su iring te kuren, su apey mepayahi ke rekèlà ne gehem ne ibpekita rut te Meupiya ne Tuditul ne kenà kayi rà ebpuun te kenami su riyà ebpuun te Eleteala. ⁸ Su merakel se ibpevayà dey ne kemerehenan, ugaid ne kenà ebpekekurang dut te kedsarig dey. Ne ruen pà arà se egked-ulaula rey ne iring key te edtuntul te ralan ne merakel se belvelekanan din ne kenà dey egketuenan ke endei key dapit edtuntul, ugaid ne kenà key ma egkesanggel. ⁹ Su kenà kepepira key rà pemekiri te menge etew, ugaid ne ke Eleteala ne kenà edsuwey kenami. Ne kenà kepepira key rà ebpenruuha nikandan su samà dà ne ebpmatey key, ne ke Eleteala se mibpekalang kenami. ¹⁰ Lelayun dey idselakan ini se lawa rey te kepepatey iring dut te netemanan ni Hisus. Iyan kegked-ulaula te langun kayi ne apey mepayahi te langun ne etew te biviyag en si Hisus su sikandin se edtavang kenami. ¹¹ Su uman gewii ne kenà egkeawà kayi te kenami ke kedadivilil te umur dey su mekeatag te kebpemesabut dey kayi te Meupiya ne Tuditul mekeatag ki Hisus. Nedulaula ini su apey ke gehem ni Hisu Kristu ne egkekita te kedselelangi

rin te umur dey te misan etew rà ne warà gehem din. ¹² Uya, benar ne edtviltilv se umur dey te kebpemesabut dey te Meupiya ne Tudtul su apey ruen keupianan niyu, ne ebpekekuwa kew te umur ne warà edtemanan din.

¹³ Duen nekesurat dutun te Lalag te Eleteala ne egkahi te, "Mibperetiyyaya a rut te lalag te Eleteala ne engketà be arà ne ibpesabut ku."

Ne engketà ded arà se kebperetiyyaya ku, su misan egkemerehenan a ne ibpesabut ku red lavew ini se kineperetiyyaya ku. ¹⁴ Su netuenan dey te mibanew te Eleteala si Hisu Kristu ke Kerenan tew, ne engketà ded be ne ebenawen key rin dema keuremà su sabap dut te kinepekidseveka rey ki Hisus. Ne eburunen din ke langun ne mibperetiyyaya kandin diyà te etuvangan din. ¹⁵ Tembù be edtigkeran dey en ke langun ne kemerehenan su wey rey metevangi sikiyu. Su embiya merakel en se ebpekeuman dut te ebperetiyyaya ki Hisus, ne ed-iseg pà ke kerakel te ebehey te peselamat diyà te Eleteala su apey sikandin se egkereyù.

Duen egkepenareng ni Pablo diyà te Akir Din ne Hewii ne Muna pà dut te Kemerehenan ne Egkeheram din kayi te Ampew te Dunya

¹⁶ Tembù be kenà ebmeluvey te hinawa rey te kebpemesabut dey. Su misan ini se lawa rey ne egkelukes wey ebmeluvey, ugaid ne meilut se kebperetiyyaya rey te uman gewii. ¹⁷ Ne ini se kemerehenan ne igkerasey rey guntaani ne edsahad dà, ugaid ne ke kedinckter dey te keresayan ne ruen egkeperateng dey ketà te akir din ne hewii ne ibehey rin keytew ne muna pà dut te igkerasey rey. ¹⁸ Su kenà iyan egketutub te hinawa rey ne ini se egkekita ne langun taman kayi te ampew te dunya, ugaid ne iyan benar ne neketahù te hinawa rey ne arà se kenà egkekita. Su ini se egkekita tew ne mehaan ne id-anew te mata tew, ugaid ne arà se kenà tew egkekita ne ibehey te Eleteala keytew ne kenà id-anew te mata taman te taman.

5

¹ Netuenan ta te embiya egkereetan en ini se lawa ta kayi te ampew te dunya su iring ini te sabung ta, ne ruen behu ne lawa ne ibehey keyta te Eleteala ne riyà te langit ne kenà en ebpatey taman te taman. ² Taman te kayi kiyu pà te ampew te dunya ne ruen kemerehenan tew, ne rekèlè perem te hinawa tew te ibehey te Eleteala arà se behu ne lawa ne riyà ebpuun te lesang te langit. ³ Su embiya egkeseluuvan kiyu en ketà te behu ne lawa ne ruen en egkeubpaan te himukud ta. ⁴ Su taman te kayi kiyu pà te ampew te dunya, ne merakel se egkeheram ta ne merasey. Ne kenà ku iyan egkehiyen ne egkiyug ad ne mehaan ebpatey su apey ku egkeawai ini se lawa ku ne ruen kegkerundus din, ugaid ne iyan ku igkesuat ne igkevehey rin en ke behu ne lawa ku ne riyà ebpuun te langit. Su embiya igkevehey rin en ke behu ne lawa ta ne kenà ebpatey, ne nepupus en ke ketehel dut te kemetayen. ⁵ Ke Eleteala se ebpenehana keytew te ebpekekuwa ki te behu ne lawa ta keuremà, ne impeubpà din kayi te keyta ke Kedesenan ne Ebpetuntul te Menusiyà su tuus te edtumanen din.

⁶ Tembù be lelayun mevag-et se hinawa ta. Netuenan ta te taman ne kayi kiyu pà ed-upbà te ampew te dunya, ne nekepekeriyù kiyu pà te

ked-ubpà ta ki Hisu Kristu ke Kerenan tew. ⁷ Su taman te ed-ubpà kiyu pà kayi te ampew te dunya, ne eduma kiyu ki Hisu Kristu ibpepevayà te sarig ta kandin misan kenà ta egkekita sikandin. ⁸ Uya, lelayun mevag-et se hinawa ta, su iyan ta egkiyuhan ne egkeawaan ta ini se lawa ta ne kayi rà te ampew te dunya su apey kiyu riyà mekeubpà te ki Hisu Kristu ke Kerenan tew. ⁹ Ugaid ne misan endei kiyu meketahù kayi te ampew te dunya etawa riyà te langit, ne iyan ta edumaan ne ke kiyug te Eleteala. ¹⁰ Su langun tew ne ebpenegetuvang ki Hisu Kristu keuremà su edtimbangen din ke ulaula te uman te seveka. Ketà be ne egketelimà dut te uman seveka ke lalew rin ne edait dut te ulaula rin te kayi pà sikandin mekeubpà te ampew te dunya. Su meupiya etawa mereatey ke ulaula rin, ne arà imbe ke egketelimà din.

Duen dalan te Kebpekidseveka te Menge Etew diyà te Eleteala su atag te Kinepatey ni Hisu Kristu Mekeatag dut te Salà dan

¹¹ Geina te netuenan dey se kedimbanga ni Hisu Kristu ke Kerenan tew ne mekeandek, ketà be ne egkiyuhan dey ne egkepuyuk ke langun te kebperetiyyaya kandin. Ne netuenan te Eleteala se metidtu ini se ed-ul-ulaan dey, ne egkiyuhan dey ne egketuenan niyu rema. ¹² Ini se menge lalag dey ne kenà dey egkiyuhan ne sikami ne egkereyù niyu. Ugaid ne iyan dey egkesuatan ne egketuenan niyu ini se benar su apey kenà key egkeyeyaan ne idtindèg niyu diyà te menge etew ne ed-isuhat kenami su iyan den dà edtengtengan ne paras te etew ne kenà ke ulaula rin ke meupiya ve etawa ke kenà. ¹³ Upama ke ruen menge etew ne iyan dan itungan mekeatag kenami ne nevuneg key, ugaid ne embiya nevuneg key ne sabap te edtumanen dey ke impehelevek te Eleteala kenami su apey rey egkereyù sikandin. Ne embiya iyan dan kebpegitung ne meupiya se itungan dey, ne meupiya arà. Su ini se helevek dey ne keupianan niyu. ¹⁴ Iyan dey kegeleveka te mevaher su netuenan dey te ke limù ni Hisu Kristu ne iyan ebpekevigkat kenami. Su netuenan dey te mibpebpatey si Hisus te selidig dut te langun ne menge etew, ketà be ne iring te langun ne menge etew ne nekeunung kandin te kinepatey rin. ¹⁵ Iyan din impatey ne kedselidig din dut te langun ne menge etew su apey kenà dan en med-ulaula te kandan dà ne kiyug. Ugaid ne iyan dan edtumanen ke kiyug ni Hisus ke minatey ne nevanew su apey ran mekepereliyu rut te kedusa te salà dan.

¹⁶ Ketà te warà a pà mebperetiyyaya ki Hisu Kristu ne ke menge etew ne edsudian ku te kebperapas dan wey ke kebevelegkasan dan, ne engketà ded dema ke nepegitung ku ki Hisu Kristu. Ugaid ne gunteani ne nesalin en ke itungan ku. ¹⁷ Su ke etew ne mibpekidseveka en ki Hisu Kristu ne midsambì en dut te daan ne ulaula te behu ne ulaula rin. Su iring maa te arà pà ne midlimbag sikandin te Eleteala su mibehayan en te behu ne itungan. ¹⁸ Ne ini se behu ne itungan ne riyà ebpnuun te Eleteala. Su sabap dut te mid-ulaula ni Hisu Kristu, ne in-awà dut te Eleteala ke ked-engkenà tew kandin. Ne insarig din keytew ne menge mibperetiyyaya te ebpesebutan dut te menge etew mekeatag te mid-ulaula rin su apey rin egketelimà sikandan. ¹⁹ Iyan dey ibpemesabut ne midsuhù te Eleteala si Hisu Kristu su apey ruen dalan te kebpesesahad din te menge salà tew su apey ebpekidseveka kiyu kandin. Ini se Meupiya ne Tudtul ne insarig din kenami te kebpemesabut diyà te menge etew.

20 Arà be ne midsuhù key ni Hisu Kristu se ebpemesabut mekeatag kandin. Ne ebuyuen dey keniyu te iring te si Hisus se ebuyù keniyu te ivehey niyu ke hinawa niyu diyà te Eleteala su apey kew ebpekidseveka kandin. Su ke Eleteala se ebuyù keniyu kayi te ibpemesabut dey ini,²¹ su midsuhù din si Hisu Kristu ne warà salà din te ibpевava kandin ke langun ne salà tew. Iyan kneeengketaa te Eleteala ne apey ketà ebpun te kebpekidseveka tew ki Hisus ne ruen en kebmetidtu tew riyà te etuvangan te Eleteala.

6

¹ Engketà arà ne mid-amung key dut te Eleteala te egelevek dut te helevèk din kayi te ampew te dunya. Ne ebuyuen dey keniyu ne ibpekita niyu te mid-upianan niyu ke daat te nanam din keniyu su apey kew ebpekeliyu. ² Su ke hewii ne kedadavang te Eleteala dut te menge etew ne ruen tedtab din. Iring dut te impesurat ne Lalag te Eleteala ne egkahi te,

“Neumaen ke hewii

ne ibpekita ku ke kegkeyru ku keniyu,

ne nerineg ku ke kebpengeningen niyu.

Uya, impekita ku ke daat te nanam ku keniyu,

ne midtevangan ku sikiyu te kebpeliyu keniyu.”

Na itaan niyu ve ke telinga niyu kayi te ini se egkehiyen ku. Su ini en ke hewii ne intail din te kedadavang keniyu. Uya, ini en ke hewii te kebpeliyu rin dut te menge etew ne mibperetiyaya kandin.

³ Ne kayi te helevèk dey te Eleteala ne ed-up-upianan dey ini su apey warà igkesawey kenami te misan engkey ne etew. Ed-uram key nevenar su apey warà liwahì te etew te kenà din keduma dut te penuruuan dey mekeatag te Eleteala. ⁴ Su langun ne ed-ul-ulaan dey ne ibpekita rey te benar ne sugsuhuen key te Eleteala. Su misan engkey en se kesemukan, kemerehenan wey kemeresayan, ne editigkeran dey en. ⁵ Midtigkeran dey misan mibpemedasan key, ne uman key rà egkevilanggu, ne edsemuken key rut te menge etew ne egkiyug ne ed-imatey kenami. Ruen hewii ne neruhan key te kegelevek dey, ne nepurang key wey nevitil key. ⁶ Ne impekita rey te benar ne sugsuhuen key te Eleteala kayi te ketilak te ulaula rey wey ke kedsebuta rey rut te Meupiya ne Tudtul ne ibpemesabut dey wey ke kedadigker dey wey ke kedadulanged dey. Ne egkekita red dema te ke Kedesenan ne Ebpetuntul te Menusiyà se ebpetuntul kenami, ne ke limù dey te rumal rey ne kenà kayi rà te bëbà dey su benar. ⁷ Iyan pà duma ne egkekita kayi te helevèk dey ne ke ibpemesabut dey ne benar iya su ke gehem te Eleteala se eddavang kenami. Ne iyan iring ne metarem ta ne ke ketidtu te ulaula ta. Ne arà se id-atu ta te kebunuey ne ebpekealang keyta dut te kunterà ta. ⁸ Edlaus key te egelevek te Eleteala misan ed-edatan key etawa ebpegkeyaan key, misan edeyuen key etawa edsudian key. Ne misan ruen egkahi te teruen key, ne iyan benar ini se ibpemesabut dey. ⁹ Ruen duma ne egkahi te warà atag dey, ugaid ne ruen duma ne netuenan dan ke benar mekeatag kenami. Duen hewii ne eddiviltil se umur dey ugaid ne uuyag key red ma. Duen arà se edresayen key te Eleteala su kebpetidtuwa rin kenami rut te ulaula rey, ugaid ne warà key red imetayi. ¹⁰ Ne misan duen merakel ne igkemereheni rey, ugaid ne kenà egkeawà ke kegkehalew rey. Iring key en te egkeayauayu, ugaid

ne kayi ebpuun te ibpenurù dey ke Meupiya ne Tuditul ne igkewasa te rumu ne etew. Iring te warà kearen dey kayi te ampew te dunya, ugaid ne nehaked dey ma ke langun taman ne intail te Eleteala kenami diyà te langit.

¹¹ Ne sikiyu ke menge suled dey ne an te inged ne Kurintu, warà in-eles dey keniyu ne neketahù te itungan dey su rekèlè dey nevenar sikiyu te hinawa. ¹² Su kenà kew gimbis dà te hinawa rey, ugaid ne sikiyu se kurang se hinawa rin kenami. ¹³ Ini ve se egkehiyen ku keniyu ne iring kew en te tuney ne menge anak ku. Ne iyan be dema meupiya ne ibpekita niyu ke kegkelimù niyu kenami.

Ke Menge Etew ne Mibperetiyyaya ne Iyan iya se Kenà Ed-ing dut te Menge Etew ne Kenà Ebperetiyyaya

¹⁴ Ruma ne egkehiyen ku, ne kenà kew med-esawa te menge etew ne kenà ebperetiyyaya ki Hisus. Su kenà egkepakey ne ebpekidsawug ke etew ne metidtu se ulaula rin dut te etew ne kenà metidtu se ulaula rin. Su kenà egkepakey ne ebpeked-amur ke merayag dut te merusirem.

¹⁵ Kenà egkeseveka te pegingawà si Hisu Kristu wey si Setanas ke datù te pekaid. Engketà ded dema ke menge etew ne mibperetiyyaya ki Hisus wey ke kenà ebperetiyyaya su kenà egkeseveka ke pegingawà ran. ¹⁶ Ne kenà egkepakey ne ruen tarù ne ebpengerapan ne id-amung dut te baley ne ebpengeningeniyana te Eleteala. Engketà ded dema ke sikitew ne mibperetiyyaya, su iring kiyu te baley ne ed-ubpaan te Eleteala. Su migkahi ke Eleteala te,

“Ebeluyen ku ne ed-ubpaan ku ke menge etew ku,
ne ebpekiduma a kandan.

Su siak ke Eleteala ran ne ed-erapen dan,
ne sakup ku en sikandan.”

¹⁷ Tembù be migkahi ke Eleteala te,
“Ewai niyu ke menge etew ne meraat.

Kenà kew pekiduma kandan.

Kenà kew ebpekiduma rut te meredsik ne betasan dan,
ne ketà ne edtelimaan ku sikiyu.

¹⁸ Ne siak ne egkevaluy ne Amey niyu,
ne sikiyu ke menge anak ku.”

Arà ke migkahi te Eleteala ne ebayàbayà te langun.

7

¹ Na menge suled, geina te iring ketà ke impasad te Eleteala keytew, ne id-awà ta ke langun ne meraat ne ulaula ta wey langun ne meraat ne neketahù te itungan ta. Ne egenat kayi te ked-adat ta te Eleteala ne idtepeney ta ke hinawa ta te keduma rut te kiyug din.

Ke Limù ni Pablo Dut te Menge Etew diyà te Inged ne Kurintu

² Na ini maa se egkehiyen mekeatag te sikami ne itahù key nikiyu te hinawa su warà meraat ne mid-ulaula rey te misan endei keniyu. Warà senge etew rà ne nerupang dey, ne warà etew ne midlimbungan dey keniyu. ³ Kenà ku iyan kebpekekahi kayi ne ruen idsawey ku keniyu. Su benar arà se nekahì ku en ne rekèlè ku sikiyu te hinawa su keuyag kepatey rey ne kenà kew egkeawà kayi te hinawa rey. ⁴ Rekèlè se kedsarig ku keniyu, ne lelayun ku rema egkereyù sikiyu. Misan

merakel se kemerehenan ku, ne warà lavew mepiley ke itungan ku su rekelà nevenar se kinekehalew ku kenyi.

⁵ Ne misan nekeuma key en te inged ne Mesidunya ne merasey se hinawa rey su nerehenan key te merakel ne samuk. Ne nerehenan key dut te kunterà dey su ed-usig kenami, ne neuru a mekeatag dut te menge etew ne mibpenurù ku ke embiya edlekà dan dut te kebperetiyya ran. ⁶ Ugaid ne ke Eleteala se ebehey te melintad ne hinawa te menge etew ne egkerehenan, ne neveelan din se kegkehalew te hinawa rey ketà te kebpekeuma ni Tito. ⁷ Ne kenà iyan dey rà kegkehalew se kebpekeuma rin, ugaid ne ke tudtul din kenami te kinekehalew rin mekeatag kenyi. Su intarem din kenami se kiyug niyu te ebpekepengkeniyan a te kenyi su ebuyù kew te ebpeseharen ku sikiyu. Ne elin dema ne tudtul din ne rekelà te hinawa niyu se keduma niyu rut te egkehiyen ku, ketà be ne rekelà se kinekehalew ku.

⁸ Su misan pà iring ketà te surat ku ne nekebmutu kew, ugaid ne warà a mekedsendit te kinesurat ku ketà. Ke pehaney ne nekedsendit a te kinesurat ku su nevaluy ne impekebmutu niyu te misan mehaan dà. ⁹ Na gunteani ne nehalew a te kenà sabap ketà te kinepekebmutu niyu, ugaid ne ke kinepeketidtu te ulaula niyu sabap dut te kinepekebmutu niyu. Ne arà se kinepekebmutu niyu ne riyà ebpuun te Eleteala, tembù be keupianan niyu arà se surat ku. ¹⁰ Su ke kemutuwani ne ibehey te Eleteala ne egkegaga rin te kebpedsendit te menge etew te kegkesembii te hinawa ran te kebpekeliyu ran te kedusa te salà dan. Ne kenà dait ne ibpedsendit tew ke kemutuwani ne riyà ebpuun te Eleteala. Ugaid ne ke kemutuwani te menge etew ne kenà eduma te Eleteala su kenà dan ebpedsendit, ne riyà dan ded egkepeneheewit te kepepatey ne warà edtemanan din. ¹¹ Ugaid ne sikiyu ne surimana niyu ke meupiya ne neveelan te Eleteala sabap dut te kemutuwani niyu, su ketà puunan ne mid-iseg ke kebmetidtu te ulaula niyu. Ne rekelà te hinawa niyu se kegketueni te menge etew te warà kew meduma rut te ulaula te etew ne nekesalà. Su ingkeepes niyu arà se mid-ulaula rin ne meraat, ne ingkeandek niyu su kema ke ebpekeragkes kew te kedusai kandin te Eleteala. Ne utew en ne egkelimengawan kew kedì su mid-iseg se kedtumana niyu rut te impenurù ku kenyi. Ne seguguneey se kinerusai niyu kandin, arà se etew ne mid-ulaula te meraat. Ne pudtaanan kayi te langun ne impekita niyu se warà kew med-amung ketà te mid-ulaula rin ne meraatey.

¹² Ne misan midsurat a kenyi ne kenà ku iyan kedsurati kenyi ne mekeatag keniyan te etew ne nekevaal te salà wey ke etew ne neselaan din. Ugaid ne netuenan te Eleteala te iyan kinesurati ku kenyi ne apey niyu metueni ke endei taman ke limù niyu kenami. ¹³ Ketà puunan ne rekelà se kegkehalew ku.

Ne mid-iseg se kegkehalew ku te nekita ku ke kinekehalew ni Tito, ne iyan din kegkehalew su nekita rin ke meupiya ne menge ulaula niyu kandin ne nevag-et se hinawa rin. ¹⁴ Ingkepedantal ku sikiyu ki Tito te warà pà sikandin mebpengkeniyan te kenyi, ne warà e red mekegkeyà su nekita rin te ini ne benar. Ne langun ne impenudtl ku kenyi ne benar, ne engketà ded dema ke migkahi ku ki Tito mekeatag kenyi ne benar. ¹⁵ Arà be se in-iseg te kerekelà te limù din kenyi

su embiya egketenuran din se keduma niyu rut te lalag din wey ke kinekehalew niyu kandin, misan engketà te utew en ne ingkekiyab te hinawa niyu se kebpekeuma rin su ke kegkeandek niyu ke ruen warà niyu metuman.¹⁶ Ne kayi ebpuun te ini ne nehalew a nevenar ne kenà en duwaruwa se kebpekedsarig ku kenyu.

8

Ini ne Mekeatag te Kedtavang dut te menge Mibperetiyaya Diyà te menge Ayuayu

¹ Menge suled, egkiyuhan dey ne egketuenan niyu ke meupiya ne neveelan dut te menge mibperetiyaya riyà te inged ne Mesidunya egenat dut te tavang te Eleteala kandan. ² Su misan nekepevayà dan te utew mepait ne egketemanan, ugaid ne ingkehalew ran nevenar su rekelà se ingkevehey ran ne tavang diyà te menge rumा ran ne mibperetiyaya misan egkeayuayu ran. ³ Su iyan ku egkekahi ke taman ne nekita ku ne mibeelan dan ke taman ne egkegaga ran te ebehey, ne netuenan ku te ruen pa kiyug dan te ebehey liyu rut te imbehey ran. Ne ini se kebehey ran ne warà ku impemandu kandan su ibehey ran dè duen, ⁴ su mibuyù dan kenami te kebpekeamung dan te ebehey te tavang dut te menge etew ne mibperetiyaya diyà te inged ne Hudiya. ⁵ Ne mibehey ran te labi pà dut te nepegitung dey ne ibehey ran. Ugaid te warà den pà mebehey te tavang ne in-una ran imbehey ke lawa ran wey ke niyawa ran diyà te Eleteala te kedmuman dan dut te kiyug din abpeg te midsarig dan kenami.

⁶ Na geina te si Tito ke midrudsù te helevek kenyu te kenyu te kedmumia rin dut te idtavang niyu rut te menge etew ne mibperetiyaya diyà te inged ne Hudiya, ne migkehiyan dey en sikandin te ipelaus din en. Su iyan meupiya ne egketevangan kew rin ded dema dut te kegkepasad te tavang niyu rut te menge etew ne mibperetiyaya ne riyà te Hudiya. ⁷ Netuenan ku te mevantug kew en atag dut te mevaher ne kebperetiyaya niyu ki Hisus, ne metau kew en te kedseyseya te Lalag te Eleteala, ne nesebutan niyu en ke benar ne penurù ne metinevangan kew te rumा niyu, wey rekelà ke pengelimuman niyu kenami. Engketà be arà ne kiyug dey ne egkevantug kew rema kayi te kebpekita niyu te tavang dut te menge mibperetiyaya riyà te Hudiya.

⁸ Kenà ku suhù ini kenyu, ugaid ne ebpeketuenan ku rà kenyu te rekelà dema se kiyug dut te rumা ne mibperetiyaya te kebpeketavang dan te rumা ran su apey ku egkekita embiya benar se sarig niyu te Eleteala. ⁹ Netuenan niyu te rekelà ke tavang ni Hisu Kristu te Kerenan tew su ketà te ked-ubpà din diyà te langit ne sikandin ke kemuney te langun taman, ugaid ne mid-awà sikandin ketà su mibpengkayi te ampew te dunya ne mibpevaluy sikandin ne etew su atag dut te limù din keytew. Ned-ulaula arà su apey ruen dalan te ebpekeamung ki kandin te egkemuney dut te keupianan diyà te langit.

¹⁰ Iyan kayi te kedì ne itungan ne imesara niyu ke kebehey niyu rut te menge ayuayu ne mibperetiyaya riyà te inged ne Hirusalim ke midrudsuan niyu rut te neuna ne rahun. Su sikiyu ke neuna ne migelevek kayi, ne sikiyu red ke egelevek te mevaher te kegkepasad din. ¹¹ Engketà be arà ne heleveka niyu se kegkepasad din ne endei taman se egkegaga niyu. Rekelà se kegkehalew niyu te kinerudsui

niyu ketà, ne iyan meupiya ne engketà ded se kegkehalew niyu te kedimasad niyu en. ¹² Embiya dekelà se hinawa niyu te kebehey niyu te tavang ne endei rà se taman ne egkegaga ne arà dà ke ibehey niyu ne igkehalew te Eleteala. Su kenà din ebuyuen keniyu ke kenà niyu igkevehey, ugaid ne iyan din ebuyuen ne endei rà se egkegaga niyu te ebehey.

¹³⁻¹⁴ Ne kenà ku iyan kiyug ne egkerasey kew su apey kew ebpeketavang dut te ruma niyu ne egkepesangan, ugaid ne iyan ku egkiyuhan se geina te rekèlà se kearen niyu ne tavang kew rut te menge ruma niyu ne mibperetiyaya ne egkepesangan guntaani. Su kema ke keuremà ne iyan kew egkepesangan ne egketevangan kew ran dema. Su embiya ebpemekedtevangà kew, ne warà kegkerasey niyu. ¹⁵ Su iring te impesurat ne Lalag te Eleteala rengan se egkahi te, “Ke etew ne rekèlà se nekuwa rin, ne warà ded lavew sawad din. Ugaid ne ke etew ne reisek se migkuwa rin, ne warà ded dema megkurang kandin.”

Impependiyà ensi Tito diyà te Inged ne Kurintu

¹⁶ Wey ebpeselamat key te Eleteala su imbehey rin ki Tito ke kerekelà te hinawa rin te kedtevangi rin keniyu iring dut te kenami ne kedadavang keniyu. ¹⁷ Nehalew nevenar sikandin ketà te kinekerineg din ne netahù be te itungan ku se kedsuhua ku kandin keniyen te keniyu, su sabap dut te kinekesuat te hinawa rin ne iyan din nepegitung se edlived keniyen te keniyu. ¹⁸ Ne ibperuma rey kandin ini se senge etew te suled tew ne menge mibperetiyaya ne ed-edatan nevenar dut te langun ne mibperetiyaya su sabap dut te kebpemesabut din dut te Meupiya ne Tudtul. ¹⁹ Ne kenà ketà dà taman su nepemili sikandin dut te langun ne menge mibperetiyaya diyà te ebelàbelà ne inged te eduma kenami te kebpeneheewita rey rut te tavang niyu diyà te menge mibperetiyaya te Hirusalim. Iyan dey ebpeneheewita su apey mereyù ke Eleteala, ne apey ran metueni ke kegkesuat dey te kedadavang.

²⁰ Ne ed-uram key ketà te rekèlà ne ibehey niyu ne egkpeneheewit dey su apey warà ebpekepengantap kenami te ruen in-eles dey. ²¹ Su kiyug dey ne ini se ebeelan dey ne metidtu riyà te etuvangan te Eleteala, ne kenà sikandin dà su egkekita rema te menge etew se metidtu ke langun ne ebeelan dey.

²² Ne ruen pà suled tew ne mibperetiyaya ne ibperuma rey engki Tito. Ne uman ku rà edsipata sikandin ne rekèlà te hinawa rin se kebpeketavang din dut te menge etew ne mibperetiyaya. Ne muna pà kerekelà te kiyug din guntaani te edtavang keniyu geina te rekèlà se kedsarig din keniyu. ²³ Si Tito, ne sikandin ke ruma ku te egelevek te kedadavang dey keniyu. Ne ini se deruwa ne menge suled tew ne eduma kandin te ebpengkeniyan ne suhù dema dut te ruma tew ne mibperetiyaya te ebelàbalà ne inged. Su egenat te meupiya ne ulaula te ini se deruwa ne etew ne si Hisu kristu se layun egkereyù. ²⁴ Ipekita niyu ve kandan ke limù niyu su apey metueni rut te langun ne mibperetiyaya te misan endei ne inged se benar iya ke limù niyu rut te menge ruma niyu. Engketà be arà ne egketuenan dan dema se benar iya ke kinereyù dey ne metidtevangey kew.

9

Idseysey pà maa ni Pablo ke Mekeatag te Kedtimù te Idtavang

¹ Kenà en duhaya ne edsuratan ku pà sikiyu ke engkey se meupiya ne ed-ul-ulaan niyu te kedadavang dut te menge ruma tew ne mibperetiyyaya riyà te inged ne Hudiya. ² Su netuenan ku ne rekelà se kiyug niyu te kedadavang. Tembù impereyùdeyù ku sikiyu riyà te menge mibperetiyyaya te Mesidunya se egkahi te, “Ke menge suled tew riyà te inged ne Gerisyà ne egenat dà dut te neuna ne rahun ne netegeges en ke hinawa ran te ebehey.” Guna su nerineg dan ke nepenudtul kandan atag keniyu ne mid-iseg ke kiyug dan te kedadavang dema. ³ Na guntaan ne edsuhsuen ku kenian ini se menge suled tew te mibperetiyyaya ne migkahi ku su ed-inteng dan ke netimù en ke ibehey niyu su apey ke migkahi ku mekeatag te meupiya ne ulaula niyu ne egkekita, wey su embiya ebpengkeniyan a ne nepenehana en iring dut te migkahi ku. ⁴ Su embiya ebpengkeniyan a ne ruen etew kayi te Mesidunya ne eduma kedi ne egkekita ran se warà kew pà meandam dut te ibehey niyu, ne ebpekegkeyà a ne ebpekegkeyà kew rema su sabap dut te ingkahi ku kandan ne andam kew en. ⁵ Engketà be arà ne iyan ku nepegitung se ebuyuen ku kayi te tetelu ne suled tew ne ebpekeuna ran en kedi te ebpengkeniyan su apey kew metevangi te edtimù dut te ibehey niyu. Su embiya egketeges en te kebpekeuma ku, ne egkekita te langun te iyan niyu kebehey ne kenà kew egkepehesan, su ibehey niyu te lila ne hinawa niyu.

⁶ Tentenuri niyu ini te embiya reisek se igkepemula ta, ne reisek dema se egkesebpeta. Ugaid ne embiya rekelà ke ibpemula ta, ne dekelà ded dema ke egkesebpeta. ⁷ Engketà ded dema ke etew ne ebehey, iyan meupiya ne ed-unaan din te ebpegitung te endei rà taman se egkegaga rin te ebehey. Ne ketà ne ibehey rin te lila ne hinawa rin ne kenà te ebpehesen sikandin su igkehalew te Eleteala ke etew ne ebehey te mehalew ne hinawa rin. ⁸ Su ebpekegaga ke Eleteala ne ebehey keyta te muna pà dut te pegingawà ta su apey warà kurang ta te ebehey riyà te menge ruma ta ne ruen kurang dan. ⁹ Iring dut te impesurat ne Lalag te Eleteala mekeatag te etew ne kenà leheren, ke sikandin te,

“Pinedlabi rin te ebehey te tavang
diya te menge ayuayu.

Tembù ke meupiya ne ebeelan din
ne warà edtemanan din.”

¹⁰ Su iyan ebehey keyta te benì ne ibpemula ne Eleteala su apey ruen egkekaan ta. Sikandin ded ke ebehey keyta te sawad ne benì ne ibpetuvù din te meupiya su apey rekelà se egkesabpet ta sabap dut te ketidtu te ulaula ta te kedadavang ta te ruma ne menge etew. ¹¹ Uya, sikandin se ebpeiseg te kegkeuyag ta su apey ruen dekela ne ibpekavang ta ketà te menge etew ne ruen kurang din. Ne ketà te egkeewit dey ke idtavang niyu diyà te menge etew ne ruen kurang dan, ne rekelà se kebpeselamat dan te Eleteala su atag dut te tavang niyu.

¹² Su ini se tavang ne ibehey niyu ne kenà iyan din dà neetahan se kedtevangi niyu rut te menge mibperetiyyaya ki Hisus, ugaid ne egenat kayi ne ebmerakel ne etew se ebpeselamat te Eleteala. ¹³ Su ketà te egketuenan te menge etew te metulanged kew, ne ebpeselamat dan te

Eleteala su atag dut te keduma niyu te menge suhù din wey ke mevaher ne sarig niyu rut te Meupiya ne Tudtul mekeatag ki Hisus. Iyan elin ne ibpeselamat dan te Eleteala ne ke kedtevangi niyu kandan wey ke kedtevangi niyu rema te ruma ne etew.¹⁴ Ne ibpengeningeni kew ran dut te kerekelà te hinawa ran keniyu su nekita ran te arà se ibehey niyu ne Eleteala se midtavang keniyu.¹⁵ Engketà be arà ne edeyù kiyu nevenar te Eleteala su imbehey rin keytew ke Anak din ne warà repeng te kepurù din.

10

Midtindahan ni Pablo ke Idsawey Kandin Mekeatag te Helevek Din

¹ Na siaken ini si Pablo ne ruen suhù ku keniyu. Su siaken kun ne telawen ke embiya riyan a te keniyu, ugaid ne meharang kun ke menge lalag ku keniyu embiya riyan a te meriyù ne iyan ku kebpekidlalag keniyu ne kayi te surat. Ne ini se suhù ku guntaani ne iyan ku ed-iringan se kebpekidlalag ni Hisu Kristu ne kenà meharang su menanew,² su ebuyuen ku keniyu ne peketidtuwa niyu ke ulaula niyu su apey kenà ebmeharang se kebpekidlalag ku keniyu embiya kenian ad. Su ruen gaga ku te ebpekita te kevurut dut te menge etew ne egkahi te kayi te helevek ku ne iyan ku edumaan ke kiyug te menusiyà.³ Kenà benar arà su misan etew a rà ne ed-ubpà kayi te ampew te dunya, ugaid ne ini se ralan te ked-atu rey dut te langun ne meraat ne egkunterà te Eleteala ne kenà ke itungan dey rà te kememenusiyai.⁴ Su ini se iring metarem dey ne id-atu rey te meraat, ne kenà kebpekidlawan ne kayi rà ebpuun te itungan te etew ugaid ne riyà egenat te gehem te Eleteala ne warà repeng din. Su ini se metarem dey ne kenà egkeetuwan te misan engkey ne kebpekidlawan te kunterà te Eleteala, misan engkey se kevaher din.⁵ Su ini se ebmetremen dey ne ibpeketalew rey ketà te tarù ne kebpekidlawan te menge mepereyù ne etew ne kenà eduma te benar ne penduan te Eleteala. Ne edtelawen dey ke langun ne ibbeitindeg dan ne itungan ne ebelavag dut te kegkesebuti ran mekeatag te Eleteala. Ketà be ne edtelawen dey ke kebpekidlawan dan su apey ran egkepeneheewit te kebperetiyyaya ki Hisu Kristu.⁶ Ne embiya ibpekita niyu te benar ke keduma niyu te penduan ni Hisu Kristu, ne ketà ne ebpedselaan ku ke menge mibperetiyyaya ne kenà eduma ki Hisu Kristu embiya te ebpekeuma ad kenian.

⁷ Sikiyu ne warà mokesuhat se itungan niyu su iyan niyu edtengtengan ne ke kebpeparas te etew, ugaid ne iyan niyu kenà egkekita ke riyà te lusud te hinawa rin. Su ruen kenian te keniyu ne iyan dan itungan ne sikandan dà ke benar ne sugsuhuen ni Hisu Kristu, ugaid ne iyan meupiya ne egkesebutan dan te sikami ne benar dema ne sugsuhuen din.⁸ Ne misan ke merakel ku egkehuya te ruen kebayàbayà dey keniyu ne kenà ku igkeyeyai su si Hisu Kristu ke mibehey kedì ketà. Ne kenà din iyan kinevehayi kedì te kebayàbayà se kedereeti rut te kebperetiyyaya niyu, ugaid ne ebaher wey ked-iseg te kebperetiyyaya niyu.⁹ Kenà ku egkiyuhan ne iyan niyu pegitungan se ebpmeliendeken ku sikiyu kayi te menge surat ku.¹⁰ Su ruen kenian te keniyu egkahi te, "Embiya edsurat kenami si Pablo ne mepassang wey meilut se lalag din, ugaid ne embiya kayi sikandin te kenami ne

ke lalag din ne meluvey ne kenà ibpememantag sikandin.”¹¹ Ugaid ke etew ne edlag te iring ketà ne dait ne egkesebutan din te ini se egkehiyen ku kayi te surat ne iring din ded ke embiya keniyan ad te keniyu.

¹² Arà se menge etew ne ebpereyùdeyù te ruma ne menge etew, ne egkeyeyaan a ne ed-iring kandan. Utew kurupew se itungan dan! Su ebpeirangan dan ke ulaula ran dut te menge etew ne neked-iring se itungan dan. Su warà te itungan dan ke engkey se egkehiyen te Eleteala ne meupiya.¹³ Ugaid sikami ne kenà dey egkehiyen ne migelevrek dey ke warà dey mehelevrek. Su arà se imbehey kenami te Eleteala ne ed-ul-ulaan dey, ne arà se egkehiyen dey ne migelevrek dey, abpeg din ke helevek dey riyà te keniyu.¹⁴ Ne warà ku pesehari ke suhù te Eleteala ketà te kebpesabut ku keniyu su insuhù din kedì te ebpesabut dut te Meupiya ne Tudtul mekeatag ki Hisu Kristu, tembù be siaken ke neuna ne ebpengkeniyan te keniyu.¹⁵ Kenà ku ibpendantal ke helevek ne neveelan dut te menge etew ne riyà te ruma ne inged te warà a ketà suhua te Eleteala te egelevek, ugaid ne sikiyu ne neamung en dut te helevek ne imbehey kedì te Eleteala. Ne iyan ku ve egkiyuan ne ebpekeiseg pà te kebmehaer din ke kebperetiyyaya niyu te Eleteala su apey a niyu egkeemungi rut te helevek ku riyà te inged niyu.¹⁶ Engketà be arà ne egkepakey en ne ibpemesabut ku ke Meupiya ne Tudtul diyà te menge inged ne meriyù pà dut te keniyu. Su kenà ku egkiyuan te ed-ahew wey edantal ke helevek ne neveelan te etew riyà te ruma ne inged ne kenà ku helevek.¹⁷ Su ruen impesurat ne Lalag te Eleteala ne egkahi te, “Kenà dait ne ruen etew ne edantal te kandin dà ne hinawa, ugaid ne iyan din idantal ke neveelan te Eleteala.”¹⁸ Su ke etew ne edeyù te hinawa rin ne kenà tuus arà te benar ke egkehiyen din, ugaid ne ke kedeyù te Eleteala kandin ne arà se tuus te meupiya ne etew sikandin.

11

Si Pablo ne Kenà Iring Dut te Menge Etew ne Engkungkun ne Kedserihan ni Hisu Kristu

¹ Iyan ku egkiyuan ne tigkeri a niyu misan iring a te egkevengùbengù su igkahi ku keniyu ke kayi te hinawa ku.² Ini se egkehiyen ku keniyu ne ebpekepengelikud a keniyu iring te kebpekepengelikud te Eleteala keniyu embiya eduma kew te ed-arap te tarù ne ebpengerapan. Embiya idsempitâ ta ne iring kew te senge etew ne raha ne mibpenelenggunian ku en ketà te senge etew ne kenakan ne si Hisu Kristu. Kiyug ku ne lunsey en se hinawa niyu diyà te kandin.³ Ne egkeipeng a keniyu su kema ke edsuwey ke hinawa niyu te keduma ki Hisu Kristu, ne kenà egkeseveka ke hinawa niyu kandin. Iring te ned-ulaula rengan ki Eba ne mid-ekalan dut te uled ne metau ne edliyuk ne si Setanas.⁴ Iyan ku igkeipeng keniyu ke igkehalew niyu te ebpemineg ke ruen ebpengkeniyan te keniyu ne ebpesabut mekeatag te ruma pà ne Hisus ne kenà ke Hisu Kristu ne impemesabut dey. Etawa ebpenurù dan te ruen nekebira ne Kedesenan ne Ebpetuntul te Menusiyà dut te impemesabut dey en ne igkeuru ku ke egkiyug kew ne ebpemineg ketà.

⁵ Ne ini se uvag kun ne menge kedserihan ni Hisu Kristu ne mibpengkeniyan ne kunaan niyu ke utew ran en ne nekelavew, ugaid ne netuenan ku se kenà dan ebpekelavew kedì. ⁶ Su misan iring te egkesisimeng a te edlalag diyà te etuvangan te menge etew, ne kenà kurang mulà ini se netuenan ku mekeatag te Eleteala su ke langun ne ibpemenurù ku ne nekita niyu te benar wey metidtu.

⁷ Ruen id-insà ku keniyu. Menu iyan niyu ve nepegitung ne nekesalà a su geina te warà a mebuyù te sukey ku ketà te impemesabut ku ke Meupiya ne Tudtul mekeatag te Eleteala? Iyan ku kebpeembavà te iring ketà su apey kew egketevangi kayi te ibpenurù ku ne kenà kew egkepesangan te edsukekey kedì. ⁸ Uya, warà migkuwa ku riyawà te keniyu, inemulà te iyan mibehey kedì ne ke riyawà te ruma ne inged ne mibperetiyaya gewii te kebpesabut ku keniyu. Iring a te mibpemenakew te igkeuyag ku riyawà te kandan asal dà ne metevangi ku sikiyu. ⁹ Su ke keniyan e pà te keniyu ne warà a mebuyù te misan engkey ne peginawà ku su iyan mibehey kedì te misan engkey ne kurang ku ne ke menge etew ne mibperetiyaya riyawà te inged ne Mesidunya. Warà a mebuyù keniyu wey kenà a iya ebpekeuringer keniyu te misan keenu ne hewii. ¹⁰ Ne ini se egkehiyen ku keniyu ne egkeserihan iring dut te lalag ni Hisus ne egkeserihan. Su misan endei a ebpesinaru, riyawà te keniyu etawa ruma pà ne inged lusud te Gerisiya, ne egketuman ini se pasad ku te kenà a ebuyù te misan engkey. ¹¹ Menu, iyan niyu buwa egkepegitung ne geina te nekahì ku ini ne warà limù ku keniyu? Ugaid ne netuenan te Eleteala ke kerekelà te limù ku keniyu!

¹² Ne kenà ku iya ed-engkeran ke nekahì ku te kenà a ebuyù keniyan te keniyu su apey kenà edantal ayan se menge etew ne uvag kun ne kedserihan ni Hisu Kristu ne egkahi te mibpesukey a iring dut te ulaula ran. ¹³ Ayan se menge etew ne egkahi te kedserihan dan ni Hisu Kristu ne kenà benar. Egkehiyen dan ne si Hisu Kristu se midsuhù kandan, ugaid ne ed-akal dan keniyu su uvag kun te kedserihan dan ni Hisu Kristu. ¹⁴ Kenà ku ini igkeselekawi su iring dan ki Setanas ke datù te pekaid ne egkegaga rin te edsalin ke paras din te ebpekeiring dut te suluhuen te Eleteala. ¹⁵ Engketà be arà ne kenà ki egkeinuinu embiya ke sugsuhuen dut te datù te pekaid ne uvag kun en ne sugsuhuen te Eleteala ne midsuhù din te ebpenurù te metidtu. Ugaid ne keuremà ne edusaan dan te endei se dait dut te meraat ne mid-ulaula ran.

Ke Kemerehenan ni Pablo rut te Helevek din ne Kedserihan ni Hisu Kristu

¹⁶ Ne edseupan ku te egkahi te kenà niyu iyan kebpegitung kedì ne egkevengùbengù a su sabap dut te kegkehiya ku atag te kedì ne hinawa. Ugaid ne misan arà se egkepegitung niyu, ne tigker kew se ebpmineg te kedì ne keeetawi. ¹⁷ Na ini se egkehiyen ku keniyu ne kenà diyà ebpuun te ki Hisu Kristu, su ke kedleleha ku te kedì ne hinawa ne ebpekeiring dut te lalag ne egkevengùbengù. ¹⁸ Su geina te ruen merakel ne edantal te helevek dan kayi te ampew te dunya, ne egkepakey red dema ke ruen deisek ne egkekahi ku te kedì ne keeetawi. ¹⁹ Metampas kew ve iya maa nevenar su metau kew ne edtigker te menge lalag dut te ebpengevengùbengù diyà te keniyu! ²⁰ Uya, su ebperumaruma kew rut te edsuhùsuhù keniyu, misan ed-ehawen dan

ke menge kearen niyu. Etawa misan edlimbungan kew ran, ne edsudì dan keniyu wey edtebpien kew, ne iring dà te warà te hinawa niyu.
²¹ Ne arà se ed-ul-ulaan dan, ne igkeyeyai ku te ed-iring! Su kenà iring ketà se kevurut ku!

Geina te warà kegkeandek dan te kedantal, ne kenà a rema egkeandek ne edantal misan iring a te egkevengübengù.

²² Ne embiya edantal ayan se menge etew te Hudiyanan dan ne edingaranan te Hibruwanen, ne siaken dema ne Hibruwanen. Ne embiya edantal dan te inenakan dan ni Israyil, ne siaken dema ne inenakan ni Israyil. Ne embiya edantal dan te inenakan dan ni Ebrahim, ne siaken dema ne inenakan a ni Ebrahim. ²³ Ne egkehiyen dan ne menge sugsuhuen dan ni Hisu Kristu, ugaid ne siaken ne muna e pà ne meperumaruma ne sugsuhuen ni Hisu Kristu. Su misan iring a te egkevengübengù kayi te kedlagal ku mekeatag te hinawa ku, ne benar su iyan pà mevaher se nehelevek ku kandan. Su kayi te kebpemesabut ku te Lalag te Eleteala ne kenà kepipira e rà mevilanggù te muna pà te kegkevilanggù dan! Ne uman e rà edruuha te muna pà kandan! Ne merakel se hewii ne editiveltivel se umur ku te muna pà kandan!
²⁴ Kelelima ad pendruuha rut te menge Hudiyanan ne ketetelu nepulù wey siyew a lambita. ²⁵ Ketetelu a nikandan bedasi te tuked, ne ruen pà hewii ne mibpendrumbag a te batu. Ketetelu en nekahem se avang ne mid-unturan ku. Ne keseveka ne iyan ku rà neheweran se tevi te papan ne gentungan ku te senge keandew wey senge kerukileman diyà te kalud te rahat. ²⁶ Ne kayi te ked-ipenewà ku ne nepevayaan ku en se merakel ne kemerehenan. Keseveka ne ruen kedalem te wayig, ne rumu ne ruen menge tulisan. Duen pà idrasey kedì te menge rumu ku red ne menge Hudiyanan wey ke kenà Hudiyanan. Duen kegkerasey ku riyà te rekèlè ne inged, ne ruen diyà te kengkenawan, ne ruen diyà te kalud te rahat wey riyà te engkungkun ne menge mibperetiyyaya. ²⁷ Ne ruen se midrumerasey a te egellevek, ne ruen arà se egkepurang a, ne ruen se egkevitil a wey ebpekeinum a. Ruen arà se warà egkekaan ku, ne ruen arà se utew ad ne egkeadsil su kurang se kebevelegkasan ku. ²⁸ Ne kenà arà dà taman su ruen pà lavew ebpekeuman te kegkerasey ku su ke kebpeneheewita ku rut te langun ne mibperetiyyaya diyà te ebelàbelà ne inged. ²⁹ Su embiya ruen mibperetiyyaya ne ebmeluvey se sarig din, ne iring te egeramen ku rema ketà te kegkeuru ku. Ne embiya ruen egkeewit te kebkedsalà, ne iring te ebsipiruwen ke pusung ku kandin.

³⁰ Kenà ku egkiyuhan se idantal ku ke hinawa ku, ugaid ne embiya ebperentalen a ne iyan ku ibpendantal ne ke langun ne kemerehenan ne impebpevayà ku su apey niyu egketueni te siaken ne meluvey. ³¹ Ne ini se egkehiyen ku ne kenà tarù su netuenan dut te Eleteala ne Amey tew ne ke Amey ni Hisu Kristu ne Kerenan tew. Ne edeyuen tew sikandin taman te taman!

³² Ne rumu pà ne netemanan ne impebpevayà ku ketà te riyan a te inged ne Demasku ne insuhù dut te gubinedur te ebpeventayan te menge sundaru ke langun ne bengawan su embiya edlihawang a ne apey a mesikem. Ne iyan migkeketau ketà te gubinedur ne ke pengulu te langun ne gubinedur ne si Eritas. ³³ Ugaid ne ruen menge etew ne midtavang kediey su in-awuk a ran diyà te rekèlè ne bukag ne

midtuntun a ran diyà te budsi te metikang ne pehalad ne nekelingut dut te inged dan, ne arà dà se kebpekeliyu ku ketà.

12

Ke Impekita ki Pablo rut te Kerenan

¹ Netuenan ku se warà pantag se kegkehiya ku te keeetawi ku, ugaid ne iring te ebpekehiyen a mekeatag keniyan te menge etew ne edantal atag te helevek dan diyà te keniyu. Ketà be ne egkehiyen ku keniyu ini se impayag kedi ne impekita ni Hisu Kristu ke Kerenan tew. ² Nekedsepulù wey epat ne rahun en egenat ketà ne nevatun a riyà te langit ne ke ed-ubpaan te Eleteala. Ne warà ku metueni ke himukud ku rà se nevatun etawa nekeruma ke lawa ku. Eleteala rà se netau ketà. ³ Uya, nevatun a diyà te ed-ubpaan te Eleteala ne ed-ingararan te Paraisu, ugaid ne Eleteala rà se netau ke nekeruma ke lawa ku ketà etawa warà. ⁴ Ne riyà te langit ne ruen nerineg ku ne kenà ku en egketuenan te egkahi, ne kenà idluhut rema te Eleteala te ibpemenudtul ku arà. ⁵ Ne ini se netemanan ku ne misan duen ketengdanan ku te edeyù mekeatag ketà, ne kenà a egkiyug su iyan ku igkahi ne ke keluvey ku. ⁶ Ugaid ne misan egkiyug a ne edantal ne kenà egkepakey ne egkehiyen niyu se iring a te egkevengùbengù, su ini se idantal ku ne benar. Ugaid ne kenà a edantal su apey warà etew ne iyan a ebpeleviyen dan. Ugaid ne iyan ku egkiyuhan ne ke gelevek ku wey ke menge penurù ku ne ketà ebpekepuun ke pegitungan dan mekeatag kedi.

⁷ Su kenà egkiyug ke Eleteala ne ibpereyùdeyù ku ke utew meupiya ne impekita rin kedi diyà te langit. Ne inluhut din te sugsuhuen ni Setanas te edresayen a te sakit su apey kenà ad ebpekepereyùdeyù. ⁸ Ne ketetelu ku en impengeningen iyi te Eleteala te ebuyuen ku ne id-awà din. ⁹ Ugaid ne warà din iawà su iyan din migkahi se, "Piya engkey ne keresayan ne ibpevayà nu, ne ebpekegaga nevenar ini se tavang ku keykew. Su embiya ebmeluvey ka ne ketà nu egkeheram ke keilut dut te gehem te tavang ku." Arà se migkahi rin kedi. Tembù be ingkehalew ku nevenar te iyan ku egkehiyen ini se keluvey ku su apey egkekita te ruma ne etew te ruen gehem ni Hisu Kristu ne edtavang kedi. ¹⁰ Ketà be ne ingkehalew ku su piya engkey se ebpekerumpak kedi iring te meluvey se lawa ku, kebpegkeyaa kedi, kemerehenan ku, kebpesipela kedi, etawa kemeresayen ku su atag te kedsarig ku ki Hisu Kristu, langun kayi ne egketigkeran ku su embiya ebmeluvey a ne ebeheren a rin dut te gehem din.

Ke Kegkemutu ni Pablo mekeatag dut te Menge Mibperetiyyaya diyà te Inged ne Kurintu

¹¹ Ne iring a te egkevengùbengù su ingkahi ku keniyu ke kedi ne keeetawi, ugaid ne sikiyu se puunan te kinepekekahi ku kayi. Su iyan dait ne sikiyu perem se edeyù kediey diyà te etuvangan ketà te menge etew ne edlalag te meraatey mekeatag kedi. Su misan ruen keluvey ku, ne ayan se menge etew ne uvag kun te kedserihan ni Hisu Kristu ne kenà dan ded ebpekelavew kedi. ¹² Arà te riyan e pà te keniyu ne nekita niyu te benar ne kedserihan a ni Hisu Kristu kayi te langun ne mibeelan ku. Su misan engkey se kemerehenan ne midtigkeran ku, ne nekita niyu ke menge mekegeyip wey ke menge mekeinuinu ne

mibbeelan ku su tuus te benar ne kedserihan a ni Hisu Kristu. ¹³ Ne ini se keddavang ku keniyu ne iring ded dut te keddavang ku rut te menge mibperetiyyaya te ruma ne inged. Ugaid ne iyan din dà ebiraan se warà a mebuyù keniyan te keniyu te misan engkey ne kurang ku. Na menu, salà ku ve arà keniyu?

¹⁴ Ne andam ad te kebpengkeniyan ku, ne iketelu en ini se kebpengkeniyan ku te keniyu. Ne iring ded dut te neuna ne kenà a ebuyù keniyu te tavang su apey kew kenà egkepesangi, su kenà ke tavang niyu se egkiyuhan ku ugaid ne ke limù niyu kediey. Su iring kew en te tuney ne menge anak ku ne kenà iyan ed-uyag dut te lukes ke menge anak din, ugaid ne ke lukes se ed-uyag dut te menge anak din. ¹⁵ Ne igkehalew ku te ibehey ke menge kearen ku wey ed-eminen ku ke resen ku te edtavang keniyu. Ugaid ne misan mid-iseg te kerekelà ke limù ku keniyu, ne sikiyu ne lemban ne edtustus se limù niyu kediey.

¹⁶ Ne misan netuenan niyu te warà a mebuyù keniyu ne ruen keniyan egkahi kun te ruen impegelesà ne ralan te kedlimbung ku keniyu. ¹⁷ Ne embiya iring ketà, ne peketueni niyu kediey ke engkey se ralan. Maa, midlimbungan kew ran te kedsuhua ku te menge ruma rey keniyan te keniyu? Warà! ¹⁸ Mibuyù ku ki Tito te ebpengkeniyan te keniyu ne imperuma ku kandin ini se senge etew ne suled tew te ebperetiyyaya. Engkey, midlimbungan kew ran? Warà! Su si Tito wey siaken ne megidsan ded se petiralan dey wey ke ed-ul-ulaan dey ne langun ne metidtu.

¹⁹ Kunaan niyu vuwa ke kayi te merakel ne migkahi ku keniyu ne idtindeg ku ke hinawa ku, ugaid ne kenà arà benar. Su riyà te etuvangan te Eleteala ne langun te migkahi ku keniyu ne edait dut te etew ne sugsuhuen ni Hisu Kristu. Ne langun kayi ne insurat ku, menge suled, su apey metevangi kew te keduma niyu ki Hisu Kristu.

²⁰ Ne ibpekebmutu te hinawa ku su kalu ke ebpekeuma a keniyan ne ruen egkekita ku ne ulaula niyu ne kenà ku igkesuat. Ne kalu ke ruen ed-ul-ulaan ku ne kenà niyu igkesuat su ke kedsawey ku rut te meraat ne ulaula niyu. Iyan ibpekebmutu te hinawa ku ne kalu ke ebpekeuma a ne ruen egkewaha keniyu, ruen ebpengelikud, ruen melemu ne egkeepes, ruen lelegawen, etawa ruen metehel ne ebpegkayà te ruma rin, ruen serupeten, ruen mepereyù wey ruen kenà egkepegumpung. ²¹ Uya, ibpekebmutu te hinawa ku su kalu ke kebpekeuma ku keniyan ne egkeyayaan a riyà te etuvangan te Eleteala su sabap dut te ed-ul-ulaan niyu ne kenà ebpekesuhat kandin. Ne ketà ne ebpekesinsinehew se direlemen ku te kegkemutu ku embiya ruen keniyan te keniyu ne menge mibperetiyyaya ne warà mebpedsendit dut te meredsik ne mid-ulaula ran dengan, ke kebpengningiyug wey ke kegkiyuga dan.

13

Ebpedselaan ni Pablo ke Menge Etew Diyà te Inged ne Kurintu Embiya Kenà Dan Ebpedsendit dut te Meraat ne Mid-ulaula Ran

¹ Iketelu ku en ini te kebpengkeniyan te keniyu. Na upama ke ruen etew ne ebpekukum kedi, ne iyan impesurat ne Lalag te Eleteala se egkahi te, “Embiya ruen nekevaal te kukuman dut te ruma rin ne iyan ebpegingawà se ruen deruwa etawa merakel pà ne ebpenithus te benar arà.” ² Ketà te ikeruwa ku te mibpengkeniyan ne migkehiyen ku

ke menge etew ne mereatey se mid-ulaula ran wey ke ruma ne menge etew te ketà te kedlived ku ne embiya warà den pà mebpedsendit ne ebpedselaan ku sikandan. Ne edseupan ku en maa te egkahi keniyu kayi te surat ku te warà e pà mebpengkeniyan ne embiya ebpekeuma a kenian ne piya engkey se ruen ulaula rin ne meraatey ne kenà ebpekeelihu te kebpedselaa ku kandin.³ Geina te iyan niyu kiyug ne ruen tuus te si Hisu Kristu ke midsuhù kedi, ne ibpekita ku keniyu ke kewayà ku embiya ruen en ebpedselaan ku. Su si Hisu Kristu ne eduma kedi ne warà keluvey rin te edusa te etew ne nekedsalà su dekelà se gehem din.⁴ Su misan duen etew ne egkahi te warà gehem ni Hisu Kristu rut te kineimetayi kandin diyà te pinebelavag ne kayu, ugaid ne ke kegkevanew rin wey ke kegkevehayi rin te behu ne umur ne tuus te ke gehem te Eleteala ne riyan en te kandin. Engketà ded dema ke sikami ne mibpekidseveka kandin, su iring te warà gaga rey. Ugaid ne embiya ruen ebpedselaan ku riyà te keniyu, ne egkekita te ruen gaga ku iring dut te gehem ni Hisu Kristu ne egenat te Eleteala.

⁵ Na susiya niyu ke hinawa niyu embiya benar ke kebperetiyaya niyu ki Hisu Kristu etawa kenà. Menu, warà niyu ves metueni se kenian med-ubpà si Hisu Kristu te hinawa niyu? Ne embiya warà sikandin diyà te hinawa niyu, ne kenà benar ke kebperetiyaya niyu.⁶ Ugaid ne iyan ku kiyug ne egkesebutan niyu te siaken ne tidtu ne kedserihan ni Hisu Kristu su sikandin se midsuhù kedi.

⁷ Ne ibpengeningi ku riyà te Eleteala te warà meraat ne ed-ululaan niyu. Kenà be iyan ku kebpengeningi ini keniyu su apey metueni te menge etew te edtumanen niyu ke impenurù ku keniyu. Su kemenu ve ke kenà niyu idtahù te hinawa te siaken iya ne kedserihan ni Hisu Kristu, asal su iyan niyu ed-ul-ulaan ke endei se metidtu.⁸ Su embiya metidtu ke ed-ul-ulaan niyu ne siaken ne kedserihan ni Hisu Kristu ne warà kemeyidan din te ibpekita ku ke kewayà ku keniyu su wey ku rà ibpekita ke kewayà ku ke embiya ebpekesurang kew te tidtu ne penurù ne egenat te Eleteala.⁹ Ketà be ne igkehalew ku embiya warà kebpegingawà te kebpekita ku rut te kewayà ku te ebpedsalà su warà nekesurang dut te sikiyu. Su beleharen ke embiya ruen egkahi te warà kewayà ku asal ebmevaher kew te ed-ulaula te meupiya. Ibpengeningi ku te Eleteala te ibpeiseg din ke meupiya ne ulaula niyu.¹⁰ Tembù be edsuratana ku sikiyu te warà e pà mebpengkeniyan su apey ketà te kebpekeuma ku ne warà en kebpegingawà te ibpekita ku keniyu ke kewayà ku te ebpedsalà keniyu. Su kenà iyan kinevehey te Eleteala kedi te kewayà ku te kedereeti rut te sarig niyu, ugaid ne ibag-et ku rut te sarig niyu.

¹¹ Na menge suled ku, ini se egkehiyen ku kayi te ketepusan te surat ku. Ibpeiseg niyu pà ke meupiya ne ulaula niyu, ne pemineha niyu ke insuhù ku kayi. Ne medseveka kew te hinawa niyu su apey kew mebmelintad. Su embiya ini se ed-ul-ulaan niyu ne ke Eleteala ne egkelimù keniyu wey ebehey te kebmelintad te hinawa niyu se ebpekiduma keniyu.

¹² Ne pelimlimuey kew su tuus te megeget te kebperetiyaya niyu.
¹³ Langun ne mibperetiyaya ki Hisu Kristu kayi ne ebpenginginsà keniyu.
¹⁴ Ne kiyug ku perem ne egkeheram niyu ke tavang ni Hisu Kristu ke Kerenan tew, wey ke limù te Eleteala keniyu, wey ke

kebpekidseveka niyu rut te Kedesenan ne Ebpetuntul te Menusiyà ne
ed-ubpà diyà te keniyu.

Arà dà taman. *Pablo*

Ke Surat ni Pablo Riyà te Menge Etew te Inged ne Gelasiya

1-2 Siaken ini se edsurat ne si Pablo. Ne ibpeewit ku ini riyà te menge etew ne mibperetiyyaya en ki Hisus ne egkevurun diyà te menge valey te Eleteala diyà te inged ne Gelasiya. Langun dey kayi ne mibperetiyyaya en ki Hisus ne ebpenginginsà te sikiyu.

Senge etew a ne kedserihan ni Hisu Kristu, ugaid ne ini se kinesuhù kedì ne kenà kiyug dà te etew etawa insuhù dan kedi su suhù a ni Hisu Kristu wey ke Amey ne mibanew ki Hisus dut te kinepatey rin.

³ Iyan ku kiyug ne egkeheram niyu ke tavang wey kebmelinew te itungan niyu ne riyà ebpuun te Eleteala ne Amey tew wey si Hisu Kristu ke Kerenan tew. ⁴ Su si Hisus ne midtuman din ke kiyug te Eleteala ke Amey tew rut te kinepatey rin su apey sikandin ke ralan te kebpekeliyu tew rut te nekeiket keytew te langun ne salà tew kayi te ampew te dunya. ⁵ Ketà be ne Eleteala se edait ne egkereyù taman te taman. Ne egketuman ini.

Ruen Seveka Rà ne Benar ne Meupiya ne Tudtul

⁶ Menge suled ku, ingkeinuinu ku nevenar sikiyu keniyan su warà dà meuhet ne mid-iniyug kew en kun te Eleteala ne midtawag keniyu te ebpeperetiyyaya su atag dut te tavang ni Hisu Kristu. Ne gunteani ne senge bias en maa se penduan ne edumaan niyu ne egkehiyen kun ne Meupiya ne Tudtul. ⁷ Ugaid ne warà en duma pà ne Meupiya ne Tudtul ke kenà ini rà se penduan mekeatag ki Hisus ne impenurù ku keniyu. Ugaid ne ruen menge etew ne ebpeketarin te itungan niyu, su edsembian dan te tarù ini se Meupiya ne Tudtul mekeatag ki Hisus. ⁸ Ugaid ne egkehiyen ku keniyu te embiya ruen ebpenurù te ebpekevira dut te Meupiya ne Tudtul ne impenurù ku keniyu, ne edusaan sikandin te Eleteala diyà te apuy nerakà. Misan siaken etawa suluhuen ne riyà ebpuun te langit ne ebpeked-apuy nerakà ded. ⁹ Migkahí ku en ini rengan ne huntan manen ne edseupan ku en maa te egkahi, “Embiya ruen ebpermàndù te tudtul ne nekevira rut te Meupiya ne Tudtul ne impemàndù ku keniyu ne mibperetiyyaya kew, ne edusaan sikandin te Eleteala diyà te apuy nerakà.”

¹⁰ Kenà niyu pegitunga te ruen kiyug ku te edeyuen a te menge etew, su iyan ku kiyug ne ebpekesuhat a te hinawa te Eleteala. Uya, warà te hinawa ku se ebpelimbentuhen a te menge etew, su embiya arà se pegingawà ku ne kenà si Hisu Kristu se perumdumaan ku.

Mibpenudtul ni Pablo ke Endei Ebpuun ke Kewagib Din te Nevaluy ne Kedserihan Sikandin

¹¹ Menge suled ku, ruen ini ibpesabut ku keniyu: ini se Meupiya ne Tudtul mekeatag ki Hisu Kristu ne impenurù ku keniyu ne kenà ebpuun te itungan te etew. ¹² Su warà ku ini mehuruwi diyà te etew rà dè duen wey warà etew me mibpenurù kedi, ugaid si Hisu Kristu rà se migkeketau kedi.

¹³ Nerineg niyu red ke pehaney ne ulaula ku gewii te meilut se keduma ku ketà te penduan te Hudiyenan. Su langun ne menge etew te Eleteala ne mibperetiyaya en ki Hisus ne mibpekesekitan ku te warà kegkeyru ku kandan, su kiyug ku ne ebpekeengked dan te keduma ran ki Hisus. ¹⁴ Diyà te menge ruma ku ne Hudiyenan ne iring ku te kenguwed, ne warà repeng ku se kedtanud din te penduan ne intahak ni Moises keytew. Su pinelavi ku te menge ruma ku se kedtuman te betasan dut te keep-epuan dey.

¹⁵ Ugaid ne misan iring ketà se meraat ke ulaula ku, ne sabap dut te dekelà ne limù te Eleteala ne mibpemilì ad nikandin ne egkevaluy ne edsugsuhuen din te warà e på in-anak. ¹⁶ Ne guna su neuma en ke hewii te kebpayag kedi dut te Eleteala te si Hisu Kristu ke tuney ne Anak din su apey ku ibpesabut diyà te kenà menge Hudiyenan ke Meupiya ne Tuditul mekeatag ki Hisus, ne warà a mebpendiyà te senge etew rà te ebpemandù kedi. ¹⁷ Ne warà a remà mebpendiyà te inged ne Hirusalim se ebpepemandù dut te neuna ne kedserihan ni Hisu Kristu. Ugaid ne diyan a mibpesinaru te inged ne Arabiya, ne ampà ne midlived a riyà te inged ne Demasku. ¹⁸ Guna su nekeditetelu en ne rahun se kineulì ku riyà te Demasku, ne arà på ne mibpendiyan a te inged ne Hirusalim su ebpekibalak a ki Pedro. Ne deruwa ne pedian se kineubpà ku riyà. ¹⁹ Ne warà på ruma ni Pedro te kedserihan ni Hisus ne nekita ku liyu te si Santiago ke ari ni Hisu Kristu ke Kerenan tew.

²⁰ Ini se idtarem ku keniyu ne benar en iya, su ke Eleteala se netau ne warà tarù kayi.

²¹ Guna su mid-awà a riyà te Hirusalim, ne mibpendiyan a te ruma ne menge inged lusud te Sîriya wey Silisiya. ²² Ugaid ne arà ne hewii ne warà e på mekilala dut te menge mibperetiyaya riyà te inged ne Hudiyâ, su warà e på nikandan nekita. ²³ Ne diyan e rà netueni nikandan te nerineg dan dut te ruma ran se egkahi te, “Arà se etew ne si Pablo ke laus ne ebpekesakit keytew rengan te mibperetiyaya en ki Hisus. Ugaid ne gunteani ne sikandin en maa se ebpesabut dut te penduan ne ebpeengkeran din keytew rengan.” ²⁴ Ugaid ne guna su netuenan dan te mibehu en ke hinawa ku, ne mideyù dan nevenar ke Eleteala!

2

*Ke Keburun ni Pablo rut te Menge Unuten te Menge Mibperetiyaya
Diyà te Inged ne Hirusalim*

¹ Guna su nekedsepulù en wey epat na rahun ne midlived a riyà te Hirusalim. Mibperumeey key ki Bernabe ne miduma ku red dema si Tito. ² Iyan ku kinelived diyà su impayag te Eleteala kedi se ebpendiyan a su edseyssayen ku kandan te menge mibperetiyaya riyà ke penurù ku rut te meupiya ne Tuditul diyà te kenà menge Hudiyenan. Nekeuma key riyà ne ke menge unuten te menge mibperetiyaya ne miburun ku, su mid-una ku te edseysey kandan ini se Meupiya ne Tuditul ne impenurù ku su apey ku egketueni ke nesebutan dan ini etawa warà. Su embiya warà dan mesebuti, ne iring te ini se migelevek ku wey ke kebpenurù ku riyà te menge etew ne kenà Hudiyenan ne warà atag din. ³ Ne ketà ne migkiyug ke menge unuten ne metidtu ini.

Su misan ke kebpenurù ku ne ini se etew ne kenà Hudiyenan ne mibperetiyaya ki Hisus ne kenà ebpehesen te eduma rut te penduan te menge Hudiyenan, ne migkiyug dan ne benar. Misan kenà Hudiyenan ini se ruma ku si Tito, ne warà dan pehesa te ed-etus iring dut te nekahи te penduan ne intahak kandan ni Moises.⁴ Ugaid ne ruen ruma ne menge Hudiyenan ne midtelavuk ne uvag kun se mibperetiyaya ran en ki Hisus ne migkahи te iyan iya se ed-etusan sikandin. Iyan kinetelavuk dan su apey ran ebpenitipi embiya sikami se mibperetiyaya ki Hisus se eduma red te penduan ni Moises. Su iyan dan igkesuat ne ebpekeruma key pà kayi te penduan ni Moises misan impeliyu key ni Hisu Kristu ne kenà en arà se penduan ne edumaan ta.⁵ Ugaid ne warà key mediuma te misan deisek dà dut te kiyug dan, su iyan dey kiyug ne warà tarù ne ibpenurù ne ebpekelel dut te benar ne Meupiya ne Tudtul ne impenurù ku keniyu.

⁶ Wey merineg dut te menge unuten te mibperetiyaya en ki Hisus arà se penurù ku, ne warà insawey ran. Ugaid ne misan sikandan se ibpeitindeg ne egkeunuten diyà te menge ruma ran, ne netuenan ku ne riyà te etuvangan te Eleteala ne warà ebiraan din su warà ibpelabi te Eleteala te ruma. ⁷ Benar, ne warà insawey ran te impenurù ku. Su riyà te itungan dan ne insarig kedi te Eleteala te ebpermendù dut te Meupiya ne Tudtul mekeatag ki Hisus riyà te menge etew ne kenà Hudiyenan, iring dut te kinesarig din ki Pedro pehaney te ebpenurù mekeatag ki Hisus riyà te menge Hudiyenan. ⁸ Su sabap dut te gehem te Eleteala ne midsuhù din si Pedro te ebpesabut dut te Meupiya ne Tudtul riyà te menge etew ne Hudiyenan. Ne iring ded dema ketà se kinesuhù din kedi te ebpesabut dut te Meupiya ne Tudtul riyà te menge etew ne kenà Hudiyenan. ⁹ Si Santiago, si Pedro wey si Juan, arà se menge unuten riyà te Hirusalim, ne netuenan dan ne ini se helevek ku ne insarig te Eleteala kedi. Ne neumpung key langun te siaken ki Bernabe ne riyà ibpepesabut ke Meupiya ne Tudtul te menge etew ne kenà Hudiyenan, ne sikandan se ebpepesabut dut te Meupiya ne Tudtul diyà te menge Hudiyenan. Ketà be ne mibpekemkemustaey key ne tuus te telteladuma key te edtuman te kiyug te Eleteala.¹⁰ Ne iyan den dà mibuyù kenami se edtevangan dey ke menge mibperetiyaya en ne ayuayu. Ne arà en iya rema ke netahù te hinawa ku.

Midsewayan ni Pablo si Pedro diyà te Antiyuka

¹¹ Ne guna su nekeuma si Pedro riyà te inged ne Antiyuka, ne ruen mid-ulaula rin ne kenà meupiya. Tembù be midsewayan ku sikandin diyà te etuvangan te menge etew.¹² Su aney ne nekeuma sikandin ne meupiya se mid-ulaula rin su mibpekidtuhen te egkaan rut te menge mibperetiyaya ne kenà Hudiyenan. Ugaid ne wey mekeuma ke menge mibperetiyaya ne Hudiyenan ne midsuhù ni Santiago, ne mid-engked si Pedro se egkaan ne ebpekidtuhen dut te kenà Hudiyenan su neandek ke ruen idsawey kandin dut te menge ruma rin ne Hudiyenan. Su ke betasan dan ne kenà dan ebpekid-amur dut te menge etew ne kenà Hudiyenan ne warà etusi.¹³ Tembù be ruen ruma ne Hudiyenan ne mibperetiyaya en riyà te Antiyuka ne miduma te ulaula ni Pedro su neandek dan. Misan si Bernabe ne elin neandek ne mid-engked se ebpekidtuhen te egkaan dut te menge mibperetiyaya en ne kenà Hudiyenan.¹⁴ Ne wey ku metueni se kenà dan edumaan ke benar

ne penurù te Meupiya ne Tudtul ne migkehiyan ku si Pedro diyà te etuvangan te langun ne menge etew te, "Misan tidtu ka ne Hudiyanen ne iring ka te kenà, su mid-engked ka te betasan te Hudiyanen te kenà ebpekidtuhen te egkaan te menge etew ne kenà Hudiyanen. Ne embiya Hudiyanen ka se kenà eduma te penduan tew te menge Hudiyanen, ne meambe ke ebpehesen nu ke kenà menge Hudiyanen te eduma ketà?"

Ke menge Hudiyanen wey ke Kenà menge Hudiyanen ne Ebpekeliyu te Kedusa te Salà dan Ibpepevayà te Kebperetyaya Ran ki Hisus

¹⁵ Ne midlaus a te egkahi te, "Sikami ne Hudiyanen, nesebutan dey te penduan te Eleteala. Kenà key iring dut te kenà menge Hudiyanen.

¹⁶ Ugaid ne netuenan dey ne kenà ini se keduma rey te penduan se ralan te kebmetidtu rey riyà te etuvangan te Eleteala. Ugaid ne sabap dut te kedsarig dey ki Hisu Kristu se kebmetidtu rey riyà te etuvangan te Eleteala. Tembù be misan Hudiyanen key ne kenà ke penduan ne intahak ki Moises se edserihan dey, ugaid ne sabap dut te kedsarig dey ki Hisu Kristu ne mibmetidtu key riyà te etuvangan te Eleteala. Su netuenan dey se warà etew iya ne ebmetidtu te eduma rut te penduan ne intahak ni Moises.

¹⁷ "Na, geina te ini se kebperetyaya rey ki Hisu Kristu se edserihan dey ne ebmetidtu key riyà te etuvangan te Eleteala, ne ruen menge etew ne egkahi te nekedsalà key kun iring dut te kenà menge Hudiyanen. Tembù be ed-isuhat dan ki Hisu Kristu su sabap dut te ini se sarig dey kandin. Ugaid ne kenà iya salà ini! ¹⁸ Su iyan tidtu ne salà embiya edlived e red dut te impenurù ku rengan ne iyan iya se edumaan ta te penduan ne intahak ki Moises su apey kiyu ebmetidtu riyà te etuvangan te Eleteala. ¹⁹ Su netuenan ku ne kenà a ebmetidtu diyà te etuvangan din sabap dut te keduma ku te penduan ni Moises. Tembù be mid-engkeran ku ke keduma ku rut te penduan su apey ke kiyug dà te Eleteala se edumaan ku. ²⁰ Ne sabap dut te kinesarig kud ki Hisus ne iring te nekeamung ad te kinepatey rin diyà te pinebelavag ne kayu. Su ingenat ketà ne kenà ke kiyug ku se edwayawayà kedì, ugaid ne ke kiyug ni Hisu Kristu su sikandin se ed-ubpà kayi te hinawa ku. Ne taman te kayi e pad ed-ubpà te ampew te dunya ne idtopeney ku ke umur ku te edtuman dut te kiyug ni Hisus ke Anak te Eleteala ne egkelimù kedì ne midselidig kedì te kebpatey. ²¹ Su embiya edlived e red te keduma rut te penduan ne intahak ki Moises, ne ed-iniyug a te tavang te Eleteala ne midtelimà ku pehaney. Su embiya iyan kebmetidtu te etew ne eduma dut te penduan ni Moises, ne warà en pantag din ke kinepatey ni Hisus."

3

Ke Kedsarig te menge Etew ki Hisus ne Iyan Ebpeliyu Kandan te Kedusa dut te Salà dan

¹ Ala! Sikiyu ne menge etew riyà te Gelasiya, iring te warà itungan niyu! Meambe ke mibpemineg kew ketà te kebpenurù te menge etew ne ibpekesuwey niyu rut te benar ne impenurù ku keniyu? Su mibpetuntayan kud te kebpenurù keniyu mekeatag te kinepebpatay ni Hisus. ² Duen id-insà ku keniyu. Menu, iyan niyu kinetelimà dut te Kedesenan ne Ebpetuntul te Menusiyà su ke miduma kew rut te penduan ne intahak ni Moises? Kenà en iya! Ugaid ne iyan

kinevehey rut te Eleteala ketà te Kedesenan ne Ebpetuntul te Menusiyà ne atag dut te nerineg niyu ke Meupiya ne Tudtul ki Hisu Kristu ne mibperetiyyaya niyu en.³ Sikiyu iya maa se menge etew ne warà rantek din! Su ke aney en ne mibperetiyyaya kew ki Hisus, ne midsarig kew rut te Kedesenan ne Ebpetuntul te Menusiyà te edtavang keniyu. Ugaid ne gunteani ne kunaan niyu ke ketà kew en ebmetidtu te eduma rut te penduan ne intahak ni Moises.⁴ Menu, warà atag din ke langun ne penaub te Eleteala ne imbehey keniyu gewii te midsarig kew kandin? Duen iya!⁵ Meambe ke imbehey keniyu te Eleteala Ke Kedesenan ne Ebpetuntul te Menusiyà? Ne endei mibpuun ke menge geyip ne midulaula rin keniyu? Kenà en iya arà sabap dut te kineruma niyu te penduan ni Moises, ugaid ne sabap dut te nerineg niyu ke Meupiya ne Tudtul mekeatag ki Hisus ne mibperetiyyaya niyu en.

⁶ Id-upama ku ini ne iring dut te nekahie te insurat te Lalag te Eleteala mekeatag ki Abraham ke keep-epuan tew rengan. “Mibperetiyyaya iya si Abraham dut te ingkahi kandin te Eleteala ne egenat ketà se kebperetiyyaya rin ne midtelimà din ne mibmetidtu sikandin riyà te etuvangan te Eleteala.”⁷ Tembù be netuenan tew te langun ne menge etew ne mibperetiyyaya en te Lalag te Eleteala iring ki Abraham, ne sikandan se ebeluyen te Eleteala ne iring te in-enakan ni Abraham su apey ran egkevehayi dut te impasad te Eleteala ki Abraham.⁸ Su ruen Lalag te Eleteala rengan ne impesurat din te misan ke menge etew ne kenà Hudiyanan ne ebeluyen din ne ebmetidtu embiya edsarig dan kandin. Mibpeketuenan din ki Abraham ini se Meupiya ne Tudtul se egkahi te, “Ibpepevayà keykew ne edtevangan ku ke langun ne etew kayi te ampew te dunya,” ke se Eleteala.⁹ Ne benar iya ne midtevangan te Eleteala si Abraham su mibperetiyyaya sikandin dut te langun ne ingkahi te Eleteala kandin. Ne engketà ded dema embiya ebperetiyyaya ki iring kandin, ne edtevangan ki te Eleteala.

¹⁰ Ugaid ke langun ne menge etew ne iyan dan edserihan te kebmetidtu ran te edtuman dut te penduan ni Moises, ne nekukum dan en te kedusa te Eleteala. Su ruen impesurat ne Lalag te Eleteala ne egkahi te, “Langun ne menge etew ne kenà edtuman dut te langun ne penduan ni Moises, ne edusaan te Eleteala.”¹¹ Ketà be ne netuenan ta te warà senge etew rà ne metidtu diyà te etuvangan te Eleteala igenat te kinetuman din dut te penduan ni Moises. Su ruen impesurat ne Lalag te Eleteala ne egkahi te, “Ke etew ne egkevaluy ne metidtu riyà te etuvangan te Eleteala ne ke etew ne ebperetiyyaya rut te Lalag te Eleteala, ne sikandin ne egkevehayan te umur ne warà edtemanan din.”¹² Su kenà ke kedsarig tew rut te penduan ni Moises se ibmetidtu tew riyà te etuvangan te Eleteala, ugaid ne ke kedtuman ta rut te penduan. Su ruen impesurat ne Lalag te Eleteala ne egkahi te, “Ke etew ne edsarig dut te penduan ni Moises ne iyan iya se edtumanen din ke langun ketà su apey egkevehayan te umur ne warà edtemanan din.”

¹³ Ugaid ne impeliyu ki en ni Hisu Kristu su apey ki kenà edusaan su sabap te kenà ki ebpekegaga ne edtuman dut te langun kayi ne penduan. Impeliyu ki en ni Hisus su sikandin ke nerasey dut te kedusa keyta su migaked din ke kerusaan ta ketà te inlansang sikandin diyà te pinebelavag ne kayu. Su ruen impesurat ne Lalag te Eleteala ne

egkah te, "Misan engkey en ne etew ne mid-imetayan ne ibitin dut te pinebelavag ne kayu, ne tuus arà te merasey ne kedusa te Eleteala."¹⁴ Ibpepevayà te kegaked ni Hisu Kristu te kerusaan ta ne arà se tavang ne impasad te Eleteala ki Abraham dengan ne nekeuma en diyà te langun ne menge etew misan kenà dan Hudiyanan su apey ki ebpeketelimà dut te Kedesenan ne Ebpetuntul te Menusiyà ne impasad te Eleteala dut te langun ne menge etew ne ebperetiaya.

Ke Tavang ne Impasad te Eleteala ne Muna pà dut te Penduan Din

¹⁵ Menge suled ku, ruen idsempità ku keniyu. Embiya ruen deruwa ne etew ne ebaal te pasad dan, ne kenà en egkepakey ne edsembian embiya nekesurat en ke ngaran dan. Warà etew ne ebpekesambì ketà, ne warà etew ne edwaraan din. ¹⁶ Ini se sempità ku ne iring dut te Eleteala su ruen impasad din ki Abraham wey riyà te senge etew ne inenakan din. Kena diyà te langun ne inenakan ni Abraham arà te impasad te Eleteala, ugaid ne riyà te senge etew te inenakan din ne si Hisu Kristu. ¹⁷ Ini se ibpesabut ku keniyu kayi te sempita ku. Duen impasad te Eleteala ki Abraham dengan ne edtevangan din ke langun ne menge etew egenat te senge etew ne inenakan ni Abraham. Guna su neked-epat nehatus wey tetelu nepulù en ne rahun ne arà pà ne impesurat te Eleteala ke penduan ne intahak ki Moises rut te langun ne menge Hudiyanan. Ugaid ne misan duen en ke penduan din ne intahak ki Moises, ne ini se impasad din ki Abraham ne kenà egkewarà su midtelimà dan ke pasad. Su kenà egkepakey ne ini se impasad din ne kenà din edtumanen. ¹⁸ Ugaid ne upama ini, embiya arà se impasad te Eleteala ne ibehey rin ki Abraham su egenat te keduma ni Abraham te penduan ne intahak ki Moises, ne arà se tavang ne impasad din ne warà atag din. Ugaid ne kenà iring ketà su arà se impasad te Eleteala ne ibehey rin ki Abraham, ne imbehey rin dà dè duen su impasad din.

Imbehey te Eleteala ke penduan din Impepevayà dut te Menge Suluhuen Din ne riyà ebpuun Te Langit su Tuus te Kenà utew Beripantag dut te Impasad din

¹⁹ Embiya ve iring en ketà, ne engkey se atag te imbehey rin ke penduan? Idtarem ku keniyu. Guna su ingkevehey en te Eleteala ke pasad din ki Abraham ne mid-umanan din pà ke penduan din ki Moises su apey egketueni rut te langun ne etew se edusaan din sikandan dut te salà dan. Ugaid ne ke keuhet te keduma ran dut te penduan ni Moises ne taman te ebpekeuma si Hisu Kristu ke senge etew ne inenakan ni Abraham ke impasad te Eleteala. Guna su imbehey te Eleteala ke penduan, ne impepevayà din dut te menge suluhuen din ne riyà ebpuun te langit ne ebehey riyà te ki Moises. Ne si Moises ne nevaluy ne tehutau su sikandin se mibpesabut dut te menge Hudiyanan. ²⁰ Ugaid ne ketà te hewii ne imbehey en te Eleteala ke impasad din ki Abraham, ne warà en tehutau su sikandin en iya ke midtarem.

Ruen Atag dut te Penduan ni Moises te Ebantey te menge Etew su apey ran kenà Ed-ulaula te Meraat

²¹ Kenà niyu pegitunga ne kayi te penduan te Eleteala ne midwarà din en ke impasad din. Kenà iring ketà! Su embiya ma ruen penduan ne ebpekevehey keyta te umur ne warà edtemanan din, ne arà en ke

dalan te kebmetidtu tew riyà te etuvangan te Eleteala. ²² Ugaid ne kenà egkepakey su ruen impesurat te Lalag te Eleteala ne egkahi te, "Warà etew kayi te ampew te dunya ne warà salà din su langun ne neiketan dut te salà din." Ne benar arà. Ugaid ne egenat dut te sarig dan ki Hisu Kristu, ne egkevehayan dan te tavang ne impasad te Eleteala ne ini se umur ne warà edtemanan din.

²³ Dut te warà pà mekeuma ke hewii ne edsarig ke menge etew ki Hisu Kristu su apey ran egkevehayan te umur ne warà edtemanan din, ne iring ki te nevilanggù su neruhen ki rut te penduan ni Moises su apey ki kenà ed-ulaula te meraat. Ne neruhen ki ketà te penduan taman te nekeuma ke hewii ne impekita te Eleteala te si Hisu Kristu ke edserihan tew. ²⁴ Tembù be ke penduan ni Moises se mibantey rut te menge etew su apey ran egkesebuti ke engkey se salà taman te nekeuma si Hisu Kristu kayi te ampew te dunya. Nekeuma sikandin ne ruen en ralan te ebmetidtu ke menge etew riyà te etuvangan din su sabap dut te kedsarig dan ki Hisus. ²⁵ Na gunteani te ini en si Hisus ne midsarig ki en kandin, ne warà en atag dut te penduan ne ebantey keyta.

Langun ne Menge Etew ne tidtu ne Mibperetiyyaya en ki Hisu Kristu ne Nevaluy ne menge Anak te Eleteala

²⁶ Ketà be ne egenat te sarig niyu ki Hisus ne nevaluy kew rema ne anak te Eleteala. ²⁷ Su mibperetiyyaya kew en ki Hisus ne mibpebunyang kew en tuus te miduma kew kandin. Tembù be ke ralan te ked-uppà niyu guntaan ne ruen en ulaula niyu ne iring kandin. ²⁸ Su ke menge etew ne mibperetiyyaya en, ne warà biraan din diyà te etuvangan te Eleteala ke menge etew ne Hudiyenan wey ke kenà Hudiyenan. Warà biraan din ke etew ne uripen wey ke etew ne kenà. Warà biraan din ke meama wey ke meritan. Su riyà te etuvangan te Eleteala ne midsepeng langun su sabap dut te kedsarig dan ki Hisus. ²⁹ Su embiya tidtu kew ne mibpekidseveka ki Hisus, ne nevaluy kew ne iring te inenaken ni Abraham ne ebpekeamung kew rema te edtelimà dut te impasad te Eleteala kandin.

4

Sempità ne Id-upama te ruen Helevek dut te Penduan ni Moises Taman te nekeuma en si Hisus Kayi te ampew te Dunya

¹ Id-upama ku ini se penduan ni Moises. Iring te anak dut te kewasa ne etew ne minatey en, ne sikandin se egkemuney rut te langun ne tamuk te amey rin. Ugaid ne embiya deisek pà sikandin ne iring te uripen dà misan sikandin ke kemuney, su warà pà kewaris din. ² Iring te uripen dà sikandin su ruen midtepenayan te amey rin ne egaat kandin wey ebantey te tamuk din taman te egkeuma arà se mibpetedtavan din. ³ Ne ebpekeiring kiyu be ketà. Taman te nekeuma en si Hisus ne nesebutan dey ke benar, ne iring kiyu te batà pà. Su uripen ki rut te betasan te keep-epuan tew te ebpekesuhat te hinawa rut te tumitimà kayi te ampew te dunya. ⁴ Ugaid ne wey mekeuma ke hewii ne mibpetedtavan te Eleteala rengan, ne midsuhù din ke Anak din kayi te ampew te dunya ne pinebaluy ne etew. Su ibpeanak din si Hisus te senge etew ne meritan ne Hudiyenan ne miduma sikandin dut te penduan te menge Hudiyenan ne intahak ki Moises ⁵ su apey

sikandin se ebpeliyu keyta rut te penduan ni Moises ne nekeruhen keyta, ne ketà ne egkepakey ne egkevaluy kiyu en ne menge anak te Eleteala.

⁶ Ne ketà te nevaluy kew en guntaani ne anak te Eleteala, ne midsuhù din en ke Kedesenan ne Ebpetuntul te Menusiyà su ebpeubpaan din diyà te hinawa niyu. Ne egkepakey en ne ed-Amey kew te Eleteala ketà te kebpengeningen iyu. ⁷ Su kenà kew en iring te uripen, ugaid ne anak kew te Eleteala. Na geina ve ne ne anak kew en nikandin, ne ebpeketelimà kew rema rut te langun ne ibehey rin dut te anak din.

Neuru si Pablo su atag dut te Ulaula te Menge etew diyà te Inged ne Gelasiya

⁸ Rengan te warà niyu pà metueni ke tidtu ne Eleteala, ne mibpengunguripen kew rut te ebperetiyayaan niyu ne tumitimà ne kenà tidtu ne Eleteala. ⁹ Ugaid ne gunteani te netuen niyu en ke tidtu ne Eleteala, ne netuen kew rin en dema, ne meambe ke egkiyug kew ne edlived ne eduma ketà te kiyug dut te tumitimà ne warà gehem din te ebpeliyu keykew? Meambe ke egkiyug kew te edlived ne uripen din? ¹⁰ Iring te midteligkuran niyu ke Eleteala ne iyan niyu en edumaan ke kedtanud rut te menge Hudiyanan iring te kedtanud dan te menge hewii, ke behu ne sevang, wey ke irerahun. ¹¹ Embiya ini se ed-ul-ulaan niyu ne egkeuru a nevenar, su iring te warà atag din ke langun ne impenurù ku keniyu.

¹² Menge suled ku, iyan ku ebpmuyuen ne ed-iring kew te ulaula ku. Su misan Hudiyanan a, ne egenat te kedsarig ku ki Hisus ne warà ad meduma rut te keytew ne penduan ne intahak ki Moises, su nevaluy a ne iring keniyu te kenà menge Hudiyanan ne kenà eduma rut te penduan te menge Hudiyanan. Kenà ku egkelipatan ke meupiya ne mid-ulaula niyu kedì dut te riyan a te keniyu. ¹³ Ne egketenuran niyu ke aney en ne kinependiyà ku ne ruen sakit ku ketà, tembù be impenuru ku ke Meupiya ne Tuditul keniyu. ¹⁴ Ne misan merehen en keniyu su atag dut te mepasang ne sakit ku, ne warà a nikiyu sudii, ne warà a nikiyu pinedtarey, ugaid ne midtulengeran a nikiyu. Su midtelimà a nikiyu iring te suluhuen te Eleteala riyà te langit. Uya, midtelimà a nikiyu iring dut te kinetelimà niyu ki Hisu Kristu. ¹⁵ Kenà ku igkesempità ke kinekehalew niyu te keniyan a. Netuenan ku ne embiya egkepakey rà ne edlesikan ke mata niyu su idsambi kayi te mata ku ne arà se ed-ul-ulaan niyu. Ugaid ne gunteani ne meambe ke iring te nesembian ke hinawa niyu? ¹⁶ Menu iyan niyu egkepegitung ne kunterà a nikiyu su atag dut te migkehiyan ku sikiyu te benar?

¹⁷ Ne arà se menge etew ne mibpenurù keniyu te ebperumaan kew rut te penduan ni Moises, ne melana ke lalag dan su apey kew meunggi, ugaid ne kenà meupiya se pegungayà dan diyà te keniyu. Su iyan den dà egkiyuhane te ederaat ini se kegkeseveka te hinawa tew su apey kew riyà mekeruma te kandan. ¹⁸ Ne meupiya ke ruen ebpekita te inesa ran keniyu embiya meupiya rema ke pegungayà dan, misan ketà te lius ku en. ¹⁹ Menge anak ku egenat dut te kebperetiyaya ta, ne mibmesakit ke hinawa ku su atag dut te ed-ul-ulaan niyu. Embiya idsempità ta ini se kebmesakit, ne iring dut te meritan ne egeram en te belilit. Su iring ketà se kedreheni ku gewii te edtehad a te keduma niyu en nevenar rut te ulaula ni Hisu Kristu. ²⁰ Iyan ku perem kiyug ne ebpeketuney a

keniyan te keniyu ebpekibituyara. Su iring beneng te merehen kayi te kedsurat ku ke engkey se dait ne egkehiyen ku su kegkeuru ku keniyu.

Sempità ne Id-upama te Deruwa ne Pasad te Eleteala

²¹ Na sikiyu ne menge etew ne egkiyug ne eduma rut te penduan ni Moises, ne maa egkesebutan niyu ke nekahai rut te penduan? Pemineha niyu su igkahi ku keniyu. ²² Su riya te impesurat ne Lalag te Eleteala ne ruen guhud mekeatag te deruwa ne anak ne meama ni Abraham. Ini se seveka ne anak din ne in-anak dut te uripen din ne meritan ne mid-esawa rin, si Hagar. Ne ke seveka ne in-anak ni Sara, ke esawa rin ne kenà uripen. ²³ Ini se seveka ne anak din ne in-anak dut te esawa rin ne uripen, ne warà ebiraan din dut te andang ne ralan te ked-anak. Ugaid ne ke seveka ne in-anak te esawa rin ne kenà uripen, ne warà in-anak embiya kenà impasad te Eleteala su lukes en.

²⁴ Ini se miguhud ku ne iring te sempità su ke deruwa ne meritan ne iring dut te deruwa ne pasad te Eleteala kayi te menge etew. Ke seveka ne pasad te Eleteala ne iyan din in-upama ne si Hagar su uripen sikandin. Ne ini se pasad din ne imbehey te Eleteala riya te buvungan ne ed-ingaranan te Sinay su arà imbe ke inged dut te kinevehey te Eleteala rut te penduan ne intahak ki Moises. Ne langun ne etew ne eduma ketà ne iring te uripen. ²⁵ Ini se buvungan ne Sinay ne riya te lusud te inged ne Erabiya ne arà imbe rema ke ed-ingaranan dan te Hagar dut te menge etew ketà. Ne ke menge etew ne in-upama se uripen ne ke menge Hudiyanan su uripen si Hagar abpeg dut te langun ne inenaken din, ne langun ne menge etew ne eduma rut te penduan ne intahak ki Moises ne nengeuripen en.

²⁶ Ugaid ne ke esawa ni Abraham, si Sarah, ne kenà uripen, ne sikandin imbe ke mid-upemaan dut te pasad te Eleteala ne imbehey rin ne egkahi te edtevangan din ke menge etew ne ebperetiyaya. Ne langun tew ne mibperetiyaya en ki Hisus ne iring te menge inenakan dut te ini se meritan ne kenà uripen su kenà kiyu uripen dut te penduan ni Moises. ²⁷ Su ruen impesurat ne Lalag te Eleteala ne egkahi te,

“Kehalew ka ne meritan ne warà mekepevayà te ked-anak!
Misan kenà ka ed-anak, ne dereg-ey ka!
Su misan mid-ewaan ka rut te esawa nu,
ne iyan pà merakel se anak nu
dut te meritan ne warà ewai te esawa rin.”

²⁸ Ne arà be menge suled ku, sikitew ne mibperetiyaya en dut te impasad te Eleteala ne menge anak din en. Ne iring kiyu ki Isaac, ne in-anak ni Sara, su sikandin ke anak ne impasad te Eleteala ki Abraham.

²⁹ Ugaid ne ketà te hewii rengan, ne ini se anak ni Abraham ne in-anak te tavang dut te Kedesenan ne Ebpetuntul te Menusiyà ne midrasye dut te kakey rin, ke in-anak te kiyug te menusiyà. Ne iring ded guntean, edresayen kiyu rut te menge etew ne mibpeuripen dut te kedtanud te penduan ni Moises. ³⁰ Ugaid ne engkey se nekahai rut te impesurat ne Lalag te Eleteala? Iyan migkahi te Eleteala ki Abraham ne, “Ipeawà nu ke uripen wey ke anak din, su kenà egkepakey ne ke anak te uripen se ebpekehaked dut te tamuk te amey rin. Su iyan dà ebpekehaked ne ke anak dut te kenà uripen.” ³¹ Ketà be menge suled ku, netuenan ta

te kenà ki iring ketà te anak dut te uripen, su iyan tew egkeiringan ke anak dut te kenà uripen.

5

Sikitew ne Mibperetiyaya en ne kenà en egkepengunguripen dut te Penduan ni Moises su nekelyu ki en

¹ Kenà kiyu en uripen dut te penduan ne intahak ni Moises, su nekelyu kiyu en. Kenà niyu lipati ini ne itindehi niyu su apey kew kenà mekelived te kegkeuripen dut te penduan.

² Pekeluaha niyu ke telinga niyu kayi se egkehiyen ku. Embiya ini se ked-etusi keniyu ne nekahи rut te penduan te iyan niyu edserihan su apey kew ebmetidtu diyà te etuvangan te Eleteala, ne warà atag din ke kebperetiyaya niyu ki Hisu Kristu. ³ Ne edseupan ku pà maa te egkahi te embiya ruen etew ne edsarig te kinepeetus din su iyan ibmetidtu rin diyà te etuvangan te Eleteala, ne rumai rin ke langun ne nekesurat dut te penduan. ⁴ Ne misan engkey keniyu se kunaan din ke ebmetidtu sikandin diyà te etuvangan te Eleteala dut te keduma rin te penduan ni Moises, ne mid-iniyug en sikandin ki Hisu Kristu, ne kenà sikandin igkeamung dut te tavang te Eleteala te kebpekelyu te menge etew. ⁵ Ugaid sikami mulà, ne iyan dey egkepenareng ne kebmetidtu rey riyà te etuvangan te Eleteala sabap dut te kedsarig dey ki Hisu Kristu, ne ke Kedesenan ne Ebpetuntul te Menusiyà se edtavang kenami gewii te edteharan dey te edtuman en. ⁶ Su embiya egkeseveka ki ki Hisu Kristu, ne kenà ke kebpeetus ta etawa ke kenà ta kebpeetus se dalan ne ebmetidtu key riyà te etuvangan te Eleteala. Ugaid ne iyan kiyug te Eleteala ne ibpekita ta te benar se kedsarig tew ibpepevayà te kebpelimlimuey.

⁷ Pehaney ne ke keduma niyu ki Hisu Kristu ne meupiya. Ugaid ne gunteani ne engkey se mibaal te nesalin ke hinawa niyu su apey kew kenà en eduma rut te benar ne penurù? ⁸ Ini se kinesuwey niyu rut te benar ne penurù ne kenà ebpun te Eleteala ne mibpemilì keniyu te eduma kandin. ⁹ Uram kew su misan deisek ke tarù ne penduan ne ebpekeeneb dut te langun ne itungan niyu. Su iring te beseanan ne egkahi te, “Misan ibukbuk niyu ke reisek dà ne pelevag dut te tapung ne ebeelan ne pan, ne langun ketà ne edlevag.” ¹⁰ Ugaid ne dekelà se sarig ku te egenat te mibpekideveka ki ki Hisus ke Kerenan tew ne edlived kew red te eduma rut te benar ne penurù din. Ne arà iya se menge etew ne edliveg te itungan niyu egenat te penurù ne kenà benar, ne edusaan te Eleteala.

¹¹ Menge suled, duen dema menge etew ne migkahi te warà ku meengkeri te ebpenurù te iyan iya se ebpeetusan ki su apey kiyu ebmetidtu riyà te etuvangan te Eleteala. Ugaid ne kenà benar arà, su embiya benar ne kenà e red edresayen dut te menge ruma ku ne Hudiyanen atag dut te penurù ku mekeatag te kinepatey ni Hisu Kristu riyà te pinebelavag ne kayu. Ne geina te kenà a ebpenurù te sikitew ne ebpeetusan, ne ingkeepes a nikandan. ¹² Ayan se menge etew ne edliveg te itungan niyu rut te kebpenurù dan te kebperumaa keniyu dut te penduan ni Moises, ne kiyug ku perem ne egkepitas dan en diyà te keniyu!

¹³ Menge suled ku, mibpemilì kew te Eleteala su apey kew ebpekeliyu rut te keduma niyu te penduan ni Moises. Ne misan nekeliyu kew en ketà, ne kenà niyu iyan idtahù te hinawa te egkepakey ne eduma kew rut te misan engkey ne egkiyuhan niyu. Iyan pà mentag se iyan niyu ipeiseg ke kebpetebevangey niyu su sabap dut te kebpelimlimuey niyu. ¹⁴ Su ke langun ne menge penduan ne intahak ni Moises ne nevagkes kayi te seveka ne penduan ne egkahi te, “Ikelimù nu ke ruma ne etew iring dut te kegkelimù nu te hinawa nu.” ¹⁵ Ugaid ne embiya iring kew te asu ne ebpekegkehatey su sabap dut te ebpemekedlewanà kew, ne urami niyu ke ebpekereraat kew rut te kedseveka te hinawa niyu te keduma ki Hisus.

Ke Kiyug dut te Kedesenan ne Ebpetuntul te Menusiyà te Ed-ul-ulaan te Menge Etew ne Nekebira dut te Egkiyuhan ne Ed-ul-ulaan te Menge Etew

¹⁶ Iyan ku egkehiyen ne iyan niyu pekemala te hinawa niyu ke Kedesenan ne Ebpetuntul te Menusiyà su apey kew kenà egkepeneheewit dut te kiyug te kemenusiyai. ¹⁷ Su ke kiyug te kemenusiyai wey ke kiyug rut te Kedesenan ne Ebpetuntul te Menusiyà ne kenà ebpekedsebutà. Su egkunterà dan, tembù be egkeliyaliya se hinawa tew ne kenà tew egkeveelan ke egkiyuhan tew ne meupiya. ¹⁸ Ugaid ne embiya egkepeneheewit ki rut te Kedesenan ne Ebpetuntul te Menusiyà, ne kenà ki egkesakup rut te penduan ne intahak ki Moises.

¹⁹ Melemu ta ne egkekilala ke ulaula ne egenat te kiyug te kemenusiyai su edlangkadlangkad te esawa ran, egkiyugà dan, meredsik ke perangey ran, ²⁰ ebpengarap dan te kenà tidtu ne Eleteala, edlambus te ruma ran, ebpekunkuntereey ran, ebpelewlaney ran, ebpengpenglikurey ran, ebperengrengitey ran, iyan den dà egkepegitung ke kandan ne hinawa, ebpetintindehey ran ne kenà dan edtevangan ke ruma ran, ²¹ imaan dan, pelehbug dan, ne ed-ulaula te piya engkey ne egkiyuhan dan, wey ruma pà ne meraat ne ulaula ne iring ketà. Ingkahí ku en ini pehaney ne gunteani maa ne ibaag kud keniyu te ke etew ne ebpegula-ula te iring kayi ne kenà dan ebpekeamung dut te Edetuan te Eleteala.

²² Melemu tew rema ne egkekilala ke ulaula te etew ne egkepeneheewit dut te Kedesenan ne Ebpetuntul te Menusiyà. Su ke etew ne egkepeneheewit te Kedesenan ne Ebpetuntul te Menusiyà ne melimù te ruma rin, mehalew sikandin, melintad se hinawa rin, metigker te ruma rin, metiyakapen te ruma rin, metulanged te ruma rin, egkeserihan te ruma ne etew, ²³ mepeembavà ke hinawa rin te ruma rin, ne ruen keditgker din te hinawa rin. Embiya ini se ed-ul-ulaan din, ne warà penduan te Eleteala ne egkesurang din. ²⁴ Su ke etew ne tidtu se kebpesakup din ki Hisu Kristu, ne mid-awaan din ke langun ne meraat ne mid-ulaula rin dengan, su apey kenà en eduma rut te kiyug te lawa rin. ²⁵ Ne geina te mibehayan ki te behu ne umur dut te Kedesenan ne Ebpetuntul te Menusiyà, ne iyan iya se ibehey ta ke hinawa ta kandin te iyan ebayàbayà. ²⁶ Iyan iya se kenà kiyu ebperenyùdeyù, ne kenà kiyu melemu ne egkeepes, ne kenà kiyu ebpepengpenglikurey.

¹ Menge suled, embiya ruen duma niyu ne mibperetiyyaya en ne egkekita niyu se ed-ulaula te meraat, ne sikiyu se nepeneheewit dut te kegkamal te Kedesenan ne Ebpetuntul te Menusiyà ne tevangi niyu sikandin te ebbetuney su apey mekeulì ded sikandin te ul-ulaan ne meupiya. Ugaid ne mananew se kebpetuney niyu kandin, ne uram kew su kema ke sikiyu se ebpeked-ulaula te iring ketà. ² Ne sikiyu ne menge mibperetiyyaya ne petebtevangey kew te ebpeneheewit dut te keduma niyu ki Hisus. Su embiya ini se ed-ul-ulaan niyu ne edumaan niyu ke suhù ni Hisu Kristu ne egkahi te pelimlimuey kew. ³ Embiya ruen etew ne ebpegitung te sikandin mulà ne kenà beledtila, ne midlimbungan din se hinawa rin. ⁴ Uman senge etew ne pegpegitunga rin se kandin ne mid-ulaula. Su embiya id-amin din ke hinawa rin te eduma rut te metidtu, ne ebmelintad sikandin. Su kenà meupiya ne idrepeng din ke ulaula rin te ruma rin su apey rin egkereyù ke hinawa rin. ⁵ Su uman senge etew ne ruen keluvey te ebpekedsalà, tembù be dait ne ed-uram sikandin.

⁶ Ne ruen pà idtarem ku keniyu. Ke etew ne nepemandù dut te Meupiya ne Tudtulan, ne kenà egketuen te wagib te kenà din ebehayen te meupiya ke etew ne mibpemandù kandin.

⁷ Ne ruen pà maa egkehiyen ku. Kenà niyu limbungi ke hinawa niyu. Su misan engkey ne ibpemula te etew, ne arà ded imbe se egkesebpet din. ⁸ Iring ded be imbe ketà te ulaula te etew. Su ke etew ne iyan din edtumanen ke kandin ne kiyug, ne iyan din egketelimà ke kepatey ne warà edtemanan din. Ugaid ne ke etew ne edtuman dut te kiyug te Kedesenan ne Ebpetuntul te Menusiyà, ne arà ne etew ne ebehayen din te umur ne warà edtemanan din. ⁹ Tembù be kenà kiyu egkeuvir ne ed-ulaula te meupiya, su embiya kenà ki egkeuvir ne ruen hewii ne ebpekeuma ne ruen lalew ta. ¹⁰ Ini be te kayi ki pà te ampew te dunya, ne edsemikar kiyu te ed-ulaula te meupiya dut te langun ne menge etew, muna en ke menge ruma ta ne mibperetiyyaya en ki Hisus.

Ke Mewri ne Lalag ni Pablo kayi te Surat Din

¹¹ Kayi te kebpupusa ku te surat ku keniyu ne siaken en ini si Pablo se edsurat, su egkekita niyu ini se derekelà ne surat ku. ¹² Ne ayan se menge etew ne egkiyuhan dan se ebpeetus kew, ne iyan dan kiyug ne egkereyù dan dut te menge ruma ran ne Hudiyanan su sabap te edtumanen dan ke betasan dan. Su embiya iyan dan ibpenurù ne ke kinepatey ni Hisus riyà te pinebelavag ne kayu ne ebpekegaga te ebpeliyu keyta rut te salà ta, ne ketà ne ebpekesekitan dan dut te menge ruma ran ne Hudiyanan. Tembù be ebpenurù dan te ke penduan ni Moises ne ebperumaan dema. ¹³ Ugaid ne misan mid-etusan dan, ne kenà dan edumaan ke langun ne penduan ni Moises. Kiyug dan ne ed-etusan kew su apey egkerineg dut te menge ruma ran ne Hudiyanan ne egkereyù dan su duma kew en ma nikandan. ¹⁴ Ugaid ne siak mulà, ne iyan ku rà igkesuati ne edeyuen ku ne ke Kerenan tew si Hisu Kristu. Su sabap dut te kinepatey rin diyà te pinebelavag ne kayu su atag te salà tew, ne neekaran ad dut te nekeiket kedì ne kiyug te kememenuisyai kayi te ampew te dunya, su warà en atag din kayi te kedì. ¹⁵ Su kenà ke kebpeetus ta etawa kenà ta kebpeetus se beripantag, ugaid ne iyan beripantag ne egkehaked tew ke behu ne umur ne warà edtemanan din. ¹⁶ Kiyug ku perem ne ke langun ne

menge etew ne eduma kayi te penurù ku ne insurat kayi ne egkeheram dan ke iru wey kerinew te hinawa ran ne riyà ebpuun te Eleteala. Su menge etew ran te Eleteala misan Hudiyanan dan etawa kenà.

¹⁷ Ne igenat dè be gunteani ne kenà ku egkiyuhan ne ruen senge etew rà ne kenà ebpehimbenar te siaken ne sugsuhuen a ni Hisu Kristu. Su ruen kayi te lawa ku menge tulak sabap te kebpekesekiti kedi dut te menge egkunterà ki Hisus, ne tuus ini te nerasey a sabap dut te keduma ku kandin.

¹⁸ Menge suled, iyan ku ebpengeningeniyen ne ebpeneuven kew ni Hisu Kristu ke Kerenan tew.

Ini rà taman.

Pablo

Ke Surat ni Pablo Riyà te Menge Etew te Inged ne Ipusu

¹ Siaken ini se edsurat ne si Pablo. Ne ibpeewit ku ini riyà te langun niyu ne an te inged ne Ipusu ne mibpesakup te Eleteala ne edlaus te kebperetiyyaya rin. Senge etew a ne kedserihan ni Hisu Kristu, ne warà duma ne puunan te kedserihi rin kedì ke kenà ke kiyug te Eleteala.

² Iyan ku kiyug ne egkeheram niyu ke tavang wey kebmelinew te itungan niyu ne riyà ebpun te Eleteala ne Amey tew wey si Hisu Kristu ke Kerenan tew.

Ke Tavang te Eleteala Keytew ne Egenat dut te Kebpekidseveka Tew ki Hisu Kristu

³ Edeyen tew ve ke Eleteala ne Amey ni Hisu Kristu ke Kerenan tew. Su egenat dut te mibpekidseveka kiyu ki Hisu Kristu, ne rekèlè se tavang te Eleteala keytew su mibehayan kiyu rin te langun ne keupianan ne riyà dà egenat te kandin ne riyà te langit. ⁴ Su misan ketà te warà pà melimbag te Eleteala ini se dunya, ne raan kiyu en ne mibpemili nikandin ne kandin ne tuney ne anak. Mibpemili kiyu rin su apey egkevaluy ke hinawa tew ne metilak atag dut te kebpekidseveka tew ki Hisu Kristu su apey warà salà ne idsawey rin kenitew.

Su sabap dut te dekelà ne limù din kenitew, ⁵ ne kiyug din ne egkevaluy kiyu ne kandin ne tuney ne anak ibpepevayà dut te kebpebpatey ni Hisus su arà ke kandin ne kiyug. ⁶ Ketà be ne edeyù kiyu te Eleteala dut te mepmeupiya ne tavang din ne imbehey rin dè duen kenitew, su impepengkayi rin te kenitew ke Anak din ne ingkelimù din nevenar ne si Hisu Kristu.

⁷ Ne ketà te kebpebpatey ni Hisu Kristu diyà te pinebelavag ne kayu, ne ini se ebpekepeliyu keyta rut te kedusa te salà tew su ebpeseharan en te Eleteala ke salà tew. Su sabap dut te limù din ne warà tedtab din, ⁸ ne rekdekelà se tavang din kenitew ne warà repeng din. Ne ke Eleteala se netau te langun su metampas sikandin, ⁹ ne kayi ve ne ebpekesabut kiyu en te Eleteala te netahù te itungan din ne in-eles din pehaney ke engkey se netahù te itungan din ne edtumanen din dut te kedsuhù din ki Hisu Kristu. ¹⁰ Ne ini se netahù te itungan din. Embiya egkeuma arà se hewii ne netelaan din, ne edsevekaan din ke langun ne mibelan din diyà te langit wey ke langun ne kayi te ampew te dunya, ne iyan din en ibpevayàbayà te langun ne si Hisu Kristu.

¹¹ Langun taman ne egked-ulaula ne netahù en te Eleteala te itungan din ne egked-ulaula ini. Tembù be mibpemili ki en nikandin rengan te warà pà melimbag ini se dunya su apey ki egkevaluy ne sakup din sabap dut te kebperetiyyaya tew ki Hisus. ¹² Geina te sikami ini se Hudiyanan ne neuna ne midsarig ki Hisus su rengan pà ne dekelà se kebpenareng dey dut te kebpekeuma rut te impasad te Eleteala, ne sikami ke ralan te kegkeedati kandin su apey ke kandin ne keupiya ne egkereyù nevenar.

¹³ Ne sikiyu rema kenian ne kenà Hudiyanan ne nekeamung ded ketà te itungan din su nerineg niyu rà ke benar ne penurù, ini

se Meupiya ne Tuditul mekeatag te kebpeliliyu rut te salà tew, ne mibperetiyyaya kew en ki Hisu Kristu. Ketà be ne imbehey keniyu dut te Eleteala ke Kedesenan ne Ebpetuntul te Menusiyà iring te impasad din, su tuus ini te sikiyu rema ne sakup din.¹⁴ Ne ini se ked-ubpà dut te Kedesenan ne Ebpetuntul te Menusiyà kayi te kenitew, ne ini se tuus te edtumanen ded te Eleteala ke langun ne impasad din kenitew te menge anak din, tembù be netuenan tew ne ed-imasaren din ke kebpeliliyu rin keyta. Ne arà be ne kenà ki ed-engked se edeyù te Eleteala dut te keupiya rin!

Ke Kebpengeningeni ni Pablo Mekeatag dut te Menge Mibperetiyyaya diyà te Inged ne Ipusu

¹⁵ Ne arà be menge suled ku te aney ku rà merineg se midsarig kew en ki Hisu Kristu wey ruen dema dekelà ne limu niyu dut te langun ne menge rumu niyu ne mibperetiyyaya,¹⁶ ne warà en ked-engked-engked ku te kebpselamat te Eleteala atag keniyu. Uman ku rà idragkes sikiyu ke ebpengeningeni a.¹⁷ Ne elin dema ne ebpengeningeniyan ku te Eleteala ne ke egkereyù ne Amey tew ke midsuhù ki Hisu Kristu, ne menu ke iyan mebehey keniyu ke Kedesenan ne Ebpetuntul te Menusiyà su apey sikandin se ebehey keniyu te ketau, ne sikandin se kebpekesabut niyu mekeatag te Eleteala su apey egketuenan niyu nevenar sikandin.¹⁸ Ne ebpengeningeniyan ku rema te sikandin se ebpayag te itungan niyu apey niyu metueni ke langun ne keupianan ne egkepenareng niyu su nevaluy kew ne sakup te Eleteala sabap dut te nepemilì kew rin. Egkiyuhan ku rema ne egkesebutan niyu ke penaub din ne warà repeng din ne impasad din dut te menge sakup din.¹⁹ Ne rumu ne ebuyuen ku ne menu ke egkeheram niyu ke engkey se kerekelà te gehem te Eleteala te kegawed din te langun ne sikitew ne sakup din. Su impekita te Eleteala ke kerekelà te gehem din ne warà repeng din²⁰ dut te kebanew rin ki Hisu Kristu ne impepinuu rin en sikandin dut te rapit te egkekewanen din diyà te langit.²¹ Ne ketà be ne riyà si Hisu Kristu te langit ne ebayàbayà dut te langun ne ruen gehem din te ebayàbayà. Su warà mepurù pà dut te sikandin diyà te langun ne mekegehem ne edatù kayi te ampew te dunya wey riyà te langit, misan ke egkekita te etew wey ke kenà ta rumu, misan te guntaani en wey ketà te kegkesembii kayi te dunya.²² Su impepurù te Eleteala si Hisu Kristu ne ebayàbayà dut te langun taman, ne sikandin iya ke midtendù te Eleteala ne Kerenan dut te langun ne sikitew ne mibperetiyyaya en.²³ Su langun te sikitew ne mibperetiyyaya en, ne sikitew ke iring te lawa rin ne sikandin ke pengulu tew. Ne sabap dut te mibpesakup kiyu kandin ne warà kurang din, su piya endei dut te langun ne midlimbag din diyà te langit wey kayi te tanà ne ed-imasaren din ded.

2

Ke Eleteala rà se Ebehu te Umur ta sabap dut te Kebpekidseveka Tew en ki Hisu Kristu

¹ Pehaney te warà kew pà mibperetiyyaya ki Hisu Kristu, ne iring kew te minatey su atag dut te warà kew mediuma te penurù din wey meraat ke ulaula niyu.² Su rengan ne iyan niyu midumaan ke meraat ne betasan dut te menge etew ne iyan dan edumaan ke kiyug den dà

kayi te ampew te dunya. Ne ketà ne iyan niyu nerumaan ne ke datù te pekaid, ini se unuten dut te langun ne busew, su sikandin imbe ke egawed te hinawa rut te menge etew ne kenà eduma te Eleteala.³ Ne langun tew ne neked-iring ded pehaney, su iyan tew rà edumaan te kiyug tew. Iyan ebayàbayà kenitew ke kebpâtà te nanam tew wey piya engkey ne meraat ne ebpekepemula te itungan tew ne arà se edtumanen tew. Ne ketà ne warà ded mibiraan tew dut te rumu, su warà duma ne ebpesineruhan tew ke kenà edusaan kiyu te Eleteala iring dut te langun ne menge etew ne kenà eduma kandin.

⁴ Ugaid ne misan iring ketà ne iyan pà dekelà ne kegkeyru te Eleteala keyta ne warà tedtab din wey ke limù din ne kenà edtaman. ⁵ Su misan iring ki te minatey sabap dut te meraat ne mid-ulaula ta, ne inragkes kiyu red te Eleteala rut te kineuyag din ki Hisu Kristu su mibehayan ki red dema nikandin te behu ne umur sabap dut te mibpekidseveka kiyu ki Hisus. Ne nekeliyu kiyu rut te salà tew egenat dut te tavang te Eleteala kenitew. ⁶ Ne kenà be ketà dà taman te inkeragkes kiyu rin ki Hisu Kristu te mid-uyag dut te Eleteala te minatey, su sabap dut te kebpekidseveka tew ki Hisus ne inragkes kiyu rema te ed-amung kiyu kandin te edatù diyà te langit. ⁷ Ini se mid-ulaula te Eleteala su apey taman te taman ne ke kerekelà te tavang din ne egkekita kayi te limù ne impekita rin keyta ibpepevayà dut te kebpatey ni Hisus. ⁸ Ne warà duma ne puunan te kebpekeliyu tew te salà tew ketà te kedsarig tew en ki Hisu Kristu ke kenà ke tavang dà dut te Eleteala. Warà ed-ululaan tew ne ebpekegaga te kebpekeliyu tew su imbehey rà dè duen te Eleteala. ⁹ Tembù be kenà egkepakey ne ruen etew ne ebpendantal te ini se ulaula rin ne iyan ebpekepeliyu kandin. ¹⁰ Su ke Eleteala rà se mibehu te umur tew ketà te mibpekidseveka ki en ki Hisu Kristu su apey iyan tew egkerumaan ke meupiya ne netahù te itungan din dengan ne ed-ul-ulaan tew.

Midseveka ni Hisu Kristu ke Hinawa dut te Langun ne Ebperetiyaya kandin misan Hudiyanan etawa kenà

¹¹ Sikiyu ne menge etew ne kenà Hudiyanan ne ed-ingaranan te Hintil, ne tentenuri niyu ke pehaney te warà kew pà mebperetiyaya ki Hisu Kristu. Ne edsusudian kew te menge Hudiyanan su egkehiyen dan ne kenà kew sakup te Eleteala su warà kew meduma rut te betasan dan te ebpeetus. Ne sikandan kun ke benar ne sakup te Eleteala su mibpeetus dan, ugaid ne ke lawa ran dà se ruen tuus din su ke itungan dan ne warà mesembii. ¹² Pehaney iya rema ne mebmeriyù kew ki Hisu Kristu ne warà kebpenareng niyu te kebpekeuma rin, su kenà kew Hudiyanan ke inenakan ni Israyil ne mibpemili te Eleteala ne menge etew rin. Tembù be kenà kew ebpeketelimà dut te keupianan ne impasad te Eleteala kandan te edsuhù sikandin te ebpekepeliyu kandan ne ed-ingaranan ki Hisu Kristu. Ne pehaney te miduma kew pà te meraat ne ulaula rut te menge etew kayi te ampew te dunya, ne warà egkepenareng niyu ne tavang te Eleteala su warà niyu ma metueni ke engkey se benar ne Eleteala kayi te ampew te dunya. ¹³ Ugaid ne gunaani ve ne nesembian en ke egketemanan niyu sabap dut te kinesarig niyu ki Hisu Kristu. Ne sikiyu ayan se pehaney ne mebmeriyù te Eleteala, ne gunaani ne nekeuvvey kew en su sabap dut te kinepatey ni Hisus ne mibpetudà te lengesa rin mekeatag keniyu.

¹⁴ Ketà be ne si Hisu Kristu ke kegkeseveka te sikami ne Hudiyanan wey sikiyu ne kenà Hudiyanan ne nevaluy ki en ne telteleduma. Uya, egkepakey en be ne sikitew ne ebpenusuled en su ketà te kinepatey ni Hisus ne in-awà din ke kebpemekedrerendingey tew. ¹⁵ Su ketà te kinepatey ni Hisus ne impeliyu kiyu en nikandin te eduma rut te penduan ne intahak ki Moises wey langun ne betasan ne mibperumaan din dut te sikami ne Hudiyanan rengan su apey Eleteala rà se edumaan dut te sikami ne Hudiyanan wey sikiyu ne kenà Hudiyanan. Ne ketà be ne in-awà din en ke kenà tew kebpemekedsuhatey, ne sikitew ke deruwa ne susun ne bansa ne mibaluy rin en ne seveka rà. ¹⁶ Su ketà te kinepatey rin diyà te pinebelavag ne kayu, ne in-awà din ke kebperekunkunttereey tew. Su midseveka rin ke hinawa tew ne menge mibperetiyyaya misan Hudiyanan etawa kenà, su apey kiyu ebpekeuvay te Eleteala. ¹⁷ Ketà be ne mibpengkayi si Hisu Kristu te ampew te dunya su ebpesabut ke engkey se kebmelintad te hinawa tew riyà te Eleteala. Ne ini se midseysey rin diyà te sikiyu ne kenà Hudiyanan ne ke itungan niyu ne mebmeriyù te Eleteala wey sikami ne Hudiyanan ini se lelayun kun ebpmegitung te Eleteala. ¹⁸ Ne sabap dut te mibpekidseveka kiyu ki Hisu Kristu, ne egkepakey en ne ed-uevy kiyu te Eleteala ke Amey tew ibpepevayà dut te tavang te Kedesenan ne Ebpetuntul te Menusiyà, negidsan te Hudiyanan etawa kenà Hudiyanan.

¹⁹ Na sikiyu ve ne kenà Hudiyanan ne misan ke pehaney ne warà kew mekeamung te sakup te Eleteala, ne guntaani ne duma kew en dut te sakup din ne mibpemili din. Kenà kew en birang ne liyu ne etew te Eleteala, su tuney kew en ne anak din. ²⁰⁻²¹ Ne sikitew ini se mibperetiyyaya en ne iring te nekeuman kiyu te pengawid te baley ne ibpeitindeg te Eleteala. Si Hisu Kristu ne iring sikandin dut te menge pelaus su sikandin se edtihel te kegawed din dut te baley, ne ke menge etew ne kedserihan te Eleteala wey ke menge ebpelambas te lalag din ne iring dan dut te impenangen ne pengawid dut te baley su sikandan ke neuna ne mibpesabut mekeatag ki Hisus. Ne langun ne mibperetiyyaya en ne mibpekidseveka ki Hisus, ne iring dan dut te pengawid ne ebiravira ugaid ne ruen atag din dut te valey ne insivey ne ubpaan te Eleteala. ²² Ne sikiyu ne kenà Hudiyanan, ne nekeamung kew red dema ne pengawid dut te baley ne ibevaley te Eleteala ne ubpaan din ibpepevayà dut te Kedesenan ne Ebpetuntul te Menusiyà.

3

Impependiyà si Pablo te menge etew ne kenà Hudiyanan su ibpepesabut din mekeatag te Eleteala

¹ Ne sabap dut te langun ne impenudtul ku keniyu, ne siaken ini si Pablo se ebpengeningeni mekeatag te sikiyu. Su impevilanggù a sabap dut te kegelevek ku ki Hisu Kristu wey ke kebpesabut ku mekeatag kandin diyà te keniyu ne kenà Hudiyanan. ² Nerineg niyu en ma buwa ke helevek te Eleteala ne insarig din kediey te ebpesabut keniyu ne kenà Hudiyanan mekeatag te tavang din ne ibehey keniyu. ³ Su impayag te Eleteala kediey ke warà metueni rengan, ne ini en ke nekahì ku kayi te surat ku. ⁴ Ne embiya ebesaan niyu ini, ne egketuenan niyu ini se nesebutan ku mekeatag te netahù te itungan

te Eleteala ne edtumanen ni Hisu Kristu ne warà pà metueni pehaney.⁵ Warà pà impayag te Eleteala ini diyà te menge apù tew, ugaid ne guntaani ne impesabut din en dut te menge kedserihan din wey ke menge ebpelambas te lalag din ibpepevayà dut te Kedesenan ne Ebpetuntul te Menusiyà.⁶ Ini ve imbe ke impesabut din en. Kenà sikami rà ne Hudiyanen se ebpeketelimà te keupianan ne impasad te Eleteala dut te menge etew rin, su sikiyu rema ne kenà Hudiyanen ne mibperetiyaya rut te Meupiya ne Tudtul mekeatag ki Hisu Kristu ne ebpekeamung ded dema. Su egenat te kebperetiyaya niyu ki Hisus ne nevaluy kew en ne menge sakup te Eleteala, ne nekeamung kew rut te ebeyveyaan ni Hisus elin dut te menge Hudiyanen, ne ebpeketelimà kew red dema rut te langun ne impasad te Eleteala.

⁷ Midsuhù a te Eleteala su ebpesabut dut te Meupiya ne Tudtul, ne imbehey rin kediey ke ketau te ebpesabut ibpepevayà te gehem ne imbehey rin kediey.⁸ Su misan siaken se pinekemevavà dut te langun ne etew rin, ne siaken ded se mibpurut din te ebpesabut diyà te sikiyu ne kenà Hudiyanen kayi te Meupiya ne Tudtul ne kenà egketembu se taman ne keupiya rin.⁹ Su ke Eleteala ne midlimbag te langun taman, ne insuhù din kedi te ebpesabut dut te langun ne etew ke engkey se ed-ul-ulaan din te edtuman dut te netahù te itungan din ne warà mibpeyahan din dengan¹⁰ su apey egkekita dut te menge mepurù te suluhuen wey rumा ne mekegehem diyà te langit ke merakel ne edsusunan te ketampas din ne dekelà kayi te mepmeupiya ne ed-ul-ulaan din dut te langun tew ne mibperetiyaya.¹¹ Mid-ulaula te Eleteala ini su ini se netahù te itungan din ne raan en te warà pà melimbag ini se dunya. Ne guntaani ne midtuman din en su impepengkayi rin en ke Kerenan tew ne si Hisu Kristu.¹² Ne tehaad te mibpekidseveka kiyu en ki Hisu Kristu sabap dut te kedsarig tew kandin, ne kenà ki egkealang-alang ne ebpengarap kandin su netuenan tew ne egkerineg din ke kebpengeningeni tew.¹³ Ne ini ve ne ebpmuyuen ku kenyu te ini se keresayan ku mekeatag kenyu ne kenà medlugkà se hinawa niyu, su ini se igkerasey ku ne kenyu ne keupianan.

Ini ne Mekeatag te Kerekelà te Limù ni Hisu Kristu keytew ne kenà Egketegkad

¹⁴ Ne embiya egketenuran ku ke langun ne tavang dut te Amey tew ne Eleteala kayi te keytew, ne ebpenimbuel a se ebpengeningeni mekeatag kenyu.¹⁵ Su sikandin ke ed-ingeranan te Amey su sikandin ke ebpuunan dut te langun ne kayi te ampew te dunya wey ke riyà te langit.¹⁶ Ne ebuyuen ku kandin se egenat dut te gehem din ne warà repeng din, ne menu ma ke ebeheren din ke hinawa niyu ibpepevayà dut te Kedesenan ne Ebpetuntul te Menusiyà¹⁷ su apey egkeheram niyu nevenar te si Hisu Kristu ne rryan en ed-ubpà te hinawa niyu sabap dut te sarig niyu kandin. Ne ibpengeningeni ku rema ne ke limù niyu ki Hisus abpeg dut te kebpelilimuey niyu ne midtamel en.¹⁸ Su embiya midtamel en, ne ke hinawa niyu ne midtua en su apey sikiyu abpeg dut te langun ne menge etew te Eleteala ne egkesebutan niyu ke engkey se taman ne kerekelà te limù ni Hisu Kristu kenyu ne kenà egketegkad.¹⁹ Uya, kiyug ku ne egkesebutan niyu nevenar arà se kerekelà te limù ni Hisus kenyu, misan kenà langun din ne egkesagkew te itungan niyu. Su ketà te kegkeheram niyu te limù din

ne kenà egketegkad, ne ini se ibehey te Eleteala kenyu su apey kew eduma rut te kiyug din ne ed-umanan pà su apey arà se kegkevaluy niyu ne iring te Eleteala ne ed-imesarán din.

²⁰ Edeyù kiyu te Eleteala ne mekegehem ne ke edtavang keytew, su misan engkey se ebuyuen tew kandin ne ebpekegaga sikandin te ebpelebiyen din pà ke ebuyuen tew ne muna pà dut te egkesagkew te itungan tew. ²¹ Langun tew ne mibperetiyaya, ne edeyù kiyu kandin su atag dut te midseveka kiyu rin wey atag dema dut te ki Hisu Kristu. Tembù be edeyù kiyu te Eleteala taman te taman! Ne egketuman ini.

4

Ini ne Mekeatag te Kebpekidseveka rut te Langun ne Mibperetiyaya ki Hisu Kristu

¹ Ne siaken ne ini te bilengguan su mekeatag te kebpesabut ku ki Hisus ne Kerenan tew, ne iyan ku ebuyuen kenyu ne edtumanen niyu ke langun ne dait ne ulaula dut te mibperetiyaya en su arà se kiyug te Eleteala dut te kebpemilì din kenyu. ² Ke ulaula niyu ve imbe ne iring kayi: peembavà kew te hinawa niyu, medtultulanged kew wey ebpesahad te igkeepes kenyu te ruma niyu. Ipekita niyu ke kedlimù niyu dut te langun te kenà niyu idtahù ke sakit te hinawa niyu dut te menge ruma niyu. ³ Su Ke kedesenan ne Ebpetuntul te Menusiyà, ne sikandin se kegkeseveka tew, ne arà be ne iluta niyu se keduma kandin su apey niyu kenà egkereezi arà se kegkeseveka niyu. ⁴ Su sikitew ke langun ne mibperetiyaya en ki Hisu Kristu ne iring kiyu en te seveka rà ne lawa, ne seveka rà dema se Kedesenan ne Ebpetuntul te Menusiyà ne ed-ubpà kayi te keytew. Ne seveka rà dema arà se keupiyanan ne ebpenerengen tew su sabap dut te ke Eleteala se mibpemilì keytew. ⁵ Seveka rà ke Kerenan tew, ne ruen arà seveka rà ne dalan te kebperetiyaya ne ebpekeamung kiyu riyà te Eleteala, ne iyan tuus te mibperetiyaya kiyu en ne seveka rà dema arà se kinebunyahì keytew. ⁶ Ne ruen dema seveka rà ne Eleteala ne ke Amey rut te langun tew, ne sikandin ke mepurù ne ebayàbayà te langun ne sikitew. Sikandin dà ke ebayàbayà dut te langun tew su piya endei kiyu ed-ubpà ne ketà ed-ubpà sikandin, ne kayi red te kinawa te langun tew.

⁷ Ne misan seveka rà ke ralan te kebperetiyaya tew, ne ke ketau ne imbehey keytew ni Hisu Kristu ne warà memeked-iring su uman senge etew keytew ne mibehayan din te dait ded dut te sikitew. ⁸ Su ini ve ne nesevian en mekeatag ki Hisu Kristu dut te impesurat te Eleteala ne egkahi te,

“Ketà te kebetuna kandin diyà te langit
su mid-etuwan din ke menge kunterà din,
ne merakel se neviyag ne ed-ewiten din.
Ne ruen dema ketau ne imbehey rin
te menge etew rin.”

⁹ Engkey ve se egkesebutan ta kayi te nekahì se kinevetuna kandin diyà te langit? Iyan din meana ne pehaney ne mid-ewaan din ke ubpaan din diyà te lesang te langit su mibpengkayi sikandin te ampew te dunya.

¹⁰ Su warà duma ne mibpengkayi te ampew te dunya ke kenà si Hisu Kristu rà, arà se nevatun maa diyà te lesang te langit, su apey sikandin

se mepurù ne ebayàbayà te langun taman. ¹¹ Su sikandin se mibehey te ketau te langun ne menge etew rin su apey iyan dan ed-ul-ulaan ne ke kiyug din. Ruen mibehayan din te helevek ne egkevaluy ne menge kedserihan din, ruma ne mibaluy rin ne ebpelambas te Lalag te Eleteala. Ruen ruma ne mibehayan din te ketau te ebpesabut dut te Meupiya ne Tuditul mekeatag ki Hisu Kristu. Ne ruen duma rema ne mibehayan din te ketau te ebpeneheewit te menge mibperetiyyaya en wey ebpemenurù kandan. ¹² Iyan din kinevehey kayi te menge ketau ne apey langun tew te mibperetiyyaya en ne ruen sangkap din te edtuman te piya engkey ne kiyug te Eleteala ne ed-ul-ulaan tew, su apey ke kebperetiyyaya rut te langun ne sakup din ne iring te lawa rin ne ebpekeiseg. ¹³ Su ibpepevayà ketà ne arà se nesebutan tew mekeatag dut te Anak te Eleteala ne si Hisu Kristu ne egkeum-umanan taman te ini se kebperetiyyaya tew ne egkeseveka rut te netuenan tew. Ketà be ne ke sarig tew ki Hisu Kristu ne metua en, ne metua rema ke ulaula tew su ed-iseg ebpekeiring te ulaula ni Hisu Kristu.

¹⁴ Su embiya iring kayi se egketemanan tew, ne kenà kiyu en ebpekeiring te vatà ne melemu ne ebperetiyyaya te piya engkey ne penurù ne iring dut te utan te ralan ne eduma te edsungu wey ed-ulì. Su kenà kiyu ebpelimbung dut te menge etew ne metau ne edliyuk te tarù ne penurù dan. ¹⁵ Ne sikitew ve mulà ne iyan tew ibpekidalag te menge ruma tew ne ke benar ne penurù su atag dut te kebpelimlimuey tew su apey tew egkeiringi ke ulaula ni Hisu Kristu ne edlingekaan tew, ¹⁶ ne sikitew ke mibperetiyyaya en ne iring te lawa rin. Su langun dut te pepatà te lawa ne nekebpikit, tembù be piya endei dapit kayi te lawa ne ruen gelevek din ne embiya egkeseveka ran se eduma rut te kiyug te ulu ne ebpekeiseg se kebmevaher dut te lawa. Ne iring din ded dema kayi te kenitew su embiya uman senge etew ne edtuman dut te kandin ne helevek ne ed-iseg ke kebmevaher dut te langun kayi te lawa su atag dut te kebpelimlimuey tew.

Ini ne Mekeatag te Ebehuwen te Eleteala ke Umur ta su apey ki Ed-ulaula te Metidtu ne Ulaula ne Ebpekesuhat te Hinawa rin.

¹⁷ Geina ne iring kayi te langun tew ne iring te lawa ni Hisu Kristu, ne ruen be ini ebperumaan ku kenyu su riyaw ebpuun ki Hisus ke Kerenan tew. Kenà niyu ul-ulaa ke perangey dut te menge etew ne kenà ebperetiyyaya te Eleteala, su iyan den dà edtumanen ke itungan dan dà ne warà rantek din. ¹⁸ Su sikandan ne warà en iya pepaleng dan ke engkey se benar ne ralan. Ne warà en iya kandan ketà te umur ne warà edtemanan din ne riyaw ebpuun te Eleteala su warà ma deisek dà ne kiyug dan te ebpemineg te kiyug te Eleteala su meresen ke ulu ran. ¹⁹ Ne engketà be ne kenà dan en egkeyeyaan ne ed-ulaula te piya engkey ne meraat, ne kenà dan en ed-erenen ke kiyug te kememenusiyai, su iyan dà nekepenù te itungan dan se ed-ulaula te meredsik.

²⁰ Ugaid ne sikiyu mulà ne iyan niyu nehuruwan mekeatag ki Hisu Kristu ne kenà iring ketà. ²¹ Su nerineg niyu en ma ke benar ne impenurù dey mekeatag kandin, ne nesebutan niyu en su sikandin se edumaan niyu. ²² Tembù be ewai niyu en ke neuna ne perangey niyu ne iyan puunan te ulaula niyu ne meraat. Su ini ne edlimbung kenyu te keduma rut te kiyug dà te hinawa niyu ne ederaat kenyu.

²³ Iyan niyu ul-ulaa ne ebpevehuwan niyu te Eleteala ke hinawa wey itungan niyu. ²⁴ Buyua niyu te Eleteala ne ebehuwen din ke umur niyu su apey ke ulaula niyu ne ebpekeiring kandin. Su embiya arà se ed-ul-ulaa niyu ne egkekita te mibehu en ke umur niyu su kayi te ed-ul-ulaa niyu ne metidtu ne ebpekesuhat te hinawa te Eleteala.

²⁵ Tembù be kenà kew edtarütarù. Ne iyan niyu rà kehiya te ruma niyu ne ke benar su langun tew te mibperetiyyaya en ne nekeamung dut te lawa ni Hisus. ²⁶ Embiya egkeepes kew rut te menge ruma niyu, ne uram kew su apey kew kenà ebpekedsalà kayi te ulaula niyu ne meraat. Ne kenà kew ebpetegtehuey te sakit te hinawa niyu su kenà niyu en pesendlepi te andew ke kegkeepes niyu. ²⁷ Kenà kew edluhut te ralan ki Setanas ke datù te pekaid te ebbesuwéy keniyu te ebped-ulaula te meraat. ²⁸ Ne embiya ruen keniyan te keniyu tekawen pehaney te warà pà mibperetiyyaya, ne med-engked en imbe sikandin. Ne megelevek sikandin su apey ruen igkeuyag din wey ruen dema igkevehey rin dut te ruma ne egkerehenan. ²⁹ Wey kenà kew rema edlalag te meraat su iyan niyu rà leleha se ebpeketavang dut te ebpemineg su apey egkevaher wey ebpekettuntul ke itungan dan dut te lalag niyu. ³⁰ Ne kenà niyu ul-ulaa arà se kenà ebpekesuhat te itungan te Kedesenan ne Ebpetuntul te Menusiyà, su ke ked-ubpà din diyà te hinawa niyu ke tuus te sikiyu ne angkun en te Eleteala. Ne tuus dema te sikandin se ebpayag ketà te hewii ne edlived si Hisus kayi ne ebpekeuman kew rut te menge etew ne mibpereliyu en. ³¹ Ketà be ne engkeri niyu se ebpetegtehuey te sakit te hinawa, ne engkeri niyu se ebpemeked-epesey wey ebpekunkuntereey. Engkeri niyu se ebpetugtugkiyangey wey ebpegkeyà te ruma niyu, wey ke ebpelelahey te ebpekererangit. ³² Ugaid ne iyan niyu iya ul-ulaa ne meupiya, ne pelimlimuey kew wey ipekita niyu ke kegkeyru niyu te ruma niyu. Ne pesehara niyu ke igkeepes niyu dut te menge ruma niyu iring te kinepesehad dut te Eleteala te salà niyu atag dut te kinepatey ni Hisu Kristu.

5

Ke Ulaula te Eleteala se Ed-iringan dut te Sikitew ne Nerayah en se Itungan Din

¹ Ne geina ve te sikiyu ne menge anak kew en te Eleteala ne igkelimù din, ne iringi niyu ke ulaula te Eleteala su apey ke ulaula niyu ne iring kandin. ² Ne pelimlimuey kew iring dut te limù ni Hisus kenitew. Su ke limù din kenitew ne impekita rin ketà te imbeliwas din ke umur din su apey ke Eleteala se ebpeliyu kenitew te kedusa rin te menge salà tew. Ne ini se kinebeliwas din te umur din ne iring te indrenà ne ibehey te Eleteala ne nekesuhat te hinawa te Eleteala.

³ Sikiyu ini se sakup en te Eleteala ne kenà kew iya ebpengingniyug, kenà kew ed-ulaula te temperasà, ne kenà kew egkeeram-am, su langun kayi ne kenà dait ne ulaula te etew ne mibperetiyyaya en ki Hisus. Kenà egkepakey ne ruen iring kayi ne egkekahi mekeatag te sikiyu. ⁴ Kenà dema edait te sikiyu ne meredsik se kebpemèbà din, etawa edlalag te warà rantek din, etawa edwaliwalì te temperasà. Ugaid ne iyan niyu rà leleha ke lalag ne ebpekereyù te Eleteala. ⁵ Su tentenuri niyu ve ini su benar, ke etew ne ebpengingniyug, ke etew ne ed-ulaula te temperasà wey ke etew ne egkeeram-am ne kenà

ebpekeamung sikandin dut te menge etew ne edetuan ni Hisu Kristu wey ke Eleteala. (Su ke etew ne egkeeram-am, ne arà se kegkeeram-am din se ebpenggerapan din ne kenà ke Eleteala.)

⁶ Kenà kew ve imbe egkeekali kenian ke ruen egkahi te ayan ne menge ulaula ne warà dà diyà te itungan te Eleteala su ebpeseharen din dà. Su ketà ebpuun ne menge ulaula ne ayan se menge etew ne warà meduma te Eleteala ne ed-isuhaten din su mid-ulaula ran ke igkeepes te Eleteala. ⁷ Ketà be ne kenà kew ve ebpekiduma te menge etew ne iring ketà. ⁸ Su rengan ne iring te ke itungan niyu ne merusirem, su warà niyu pà metueni ke ralan te Eleteala. Ugaid ne guntaani ve ne ke itungan niyu ne nereyahan en su midsarig kew en ki Hisu Kristu ke Kerenan tew. Tembù be iyan niyu ul-ulaa ne dait ne ulaula rut te etew ne kayi en te kerayahan. ⁹ Su embiya nereyahan en ke itungan niyu, ne egkekita kayi te ulaula niyu ke langun ne meupiya wey ketidtu wey arà se benar. ¹⁰ Langun ne perangey niyu ne surimana niyu ke ebpekesuhat be te hinawa te Eleteala etawa kenà, ne iyan niyu rà ul-ulaa arà se kiyug din. ¹¹ Kenà kew ed-amung-amung dut te ulaula ne warà keupianan din, su arà ke perangey dut te menge etew ne merusirem pà ke itungan din. Ugaid ne iyan niyu ul-ulaa ke metidtu su apey ran egkekita ke keraat dut te ulaula ran. (¹² Su misan ke kegkepengasak dà dut te ibpegelesà ne ulaula ran ne mekeyeyà neveran.) ¹³ Su embiya ke ed-ul-ulaan diyà te merusirem ne egkerayahan, ne egkekita ke benar dut te ed-ul-ulaan dan embiya meupiya etawa meraat. ¹⁴ Ne ketà te egkekita ran ke meraat, ne egkepayahan dan te itungan dan ne edtidtuwen dan. Tembù be ruen beseanan ne egkahi te,

“Sikew ke iring te edlipereng, imaman kad;
Uya, su iring ke en te minatey, ne mevanew kad;
Ne edtawayan ni Hisu Kristu ke itungan nu.”

¹⁵ Tembù be urami niyu neveran ke ed-ul-ulaan niyu. Kenà kew ed-ulaula iring dut te menge etew ne warà nesebsebutan din, ugaid ne iyan niyu ul-ulaa ne iring dut te metampas ne menge etew. ¹⁶ Su gunteani ne hewii ne ke menge etew ne metehel ne ed-ulaula te meraat, ugaid ne sikiyu ve mulà ne kenà kew alang-alang te edtuman te meupiya ne ed-ul-ulaan. ¹⁷ Kenà kew ed-ulaula te warà atag din, ugaid ne pemengaa niyu ke engkey se ed-ul-ulaan niyu ne ebpekesuhat te kiyug te Kerenan tew ne si Hisus.

¹⁸ Kenà kew ve ed-inum te ebpeketevereg su ayan ne ebpekegkeraat keniyu. Ugaid ne iyan niyu peveybeyaa te hinawa niyu ke Kedesenan ne Ebpetuntul te Menusiyà. ¹⁹ Embiya egkevurun kew ne beyuka niyu ke Lalag te Eleteala kayi te iringà niyu su apey ebpekereyù ki Hisu Kristu ke Kerenan tew. Ne arà se kedeyù niyu ki Hisus ne egenat imbe te mehalew ne hinawa niyu. ²⁰ Ne peselemati niyu ke Eleteala ne Amey tew misan engkey se egketemanaan niyu su atag dut te mid-ulaula ni Hisu Kristu ke Kerenan tew.

Ini ne Mekeatag te Ulaula ne Edait dut te Tiwaley

²¹ Layun kew pekita te kebpeed-edatey niyu su geina te iyan niyu ibpeuna te hinawa niyu ne si Hisu Kristu.

²² Sikiyu ne menge meritan, ne perumaruma kew dut te esawa niyu iring te kebperumaruma niyu ki Hisu Kristu. ²³ Su ke meama ne iyan

ebayàbayà dut te esawa rin iring ki Hisu Kristu ne iyan ebayàbayà te langun tew ne mibperetiyyaya en. Su ke langun tew ne mibperetiyyaya en ne iring te lawa rin ne sikandin en ke mibpeliyu keytew.²⁴ Ketà be ne ke menge meritan ne ebperumaruma dut te esawa ran iring dut te langun tew ne mibperetiyyaya ki Hisu Kristu ne ebperumaruma kandin.

²⁵ Sikiyu ne menge meama, ne iyan iya se limui niyu ke esawa niyu iring dut te kegkelimù ni Hisu Kristu te menge etew rin. Su imbeliwas din ke umur din te kebpeliyu rin keytew.²⁶ Mid-ulaula rin ini su apey kiyu ebmetilak dut te langun ne salà tew. Su iring te midlùluan din ke menge salà tew, ne ke tuus te midtilak kiyu en ne arà se kinebunyahì kenitew wey ke Lalag te Eleteala ne edumaan tew.²⁷ Uya, midtilak kiyu rin dut te menge salà tew te kebpenehana rin kenitew su apey meupiya se keddengteng din kenitew ketà te hewii ne kedlived din kayi su edangey keyta, ne warà idsawey rin kenitew misan deisek dà.²⁸ Ketà be ne sikiyu ne menge meama, na iyan iya se limui niyu ke esawa niyu iring te kegkelimù niyu te lawa niyu, su ke esawa nu ne iring ded te lawa nu.²⁹ Su warà etew ne kenà din ebpedtumuen ke lawa rin su edtugenuren din. Engketà be imbe ke keddengteng din kenitew ketà te hewii ne kedlived din kayi su edangey keyta, ne warà idsawey rin kenitew misan deisek dà.³⁰ Su sikitew ini ne nevaluy ne iring te pepatà te lawa rin.³¹ Su iring dut te impesurat ne Lalag te Eleteala ne egkahi te, “Embiya ed-esawa ke meama, ne edewaan din ke amey rin wey ke iney rin ne ebpekidtampung sikandin dut te esawa rin su ebpekidseveka sikandin.”³² Ne ke meana ne impesabut dut te Eleteala kayi te ingkesurat ne lalag din ne mekegeyip. Ne iyan ku ebpeiringan ne si Hisu Kristu wey langun ne mibperetiyyaya en kandin.³³ Ne kenà arà dà se meana rin su eppenurù dema te sikiyu ne tiwaley. Tembù be sikiyu ne menge meama ne iamin niyu ke hinawa niyu te edlimù te esawa niyu iring te kedlimù nu te hinawa nu. Ne engketà dema ke meritan, edati niyu rema ke esawa niyu.

6

*Ini ne Mekeatag te Dait ne Ulaula te menge vatà diyà te Lukes Dan
wey ke Dait ne Ulaula te Lukes te Kebpetidtu ran dut te menge anak dan*

¹ Sikiyu ne menge anak, perumaruma kew dut te menge lukes niyu su ini ke dait ne ed-ul-ulaan dut te mibperetiyyaya en ki Hisu Kristu.² Su ruen penduan te Eleteala mekeatag ketà ne egkahi te, “Edati niyu ke amey niyu wey ke iney niyu.” Ne ini ve ke neuna ne penduan din ne ruen impasad din ke edtumanan niyu.³ Su egkahi ketà te, “Embiya edtumanan niyu ini, ne meupiya se egketemanan niyu wey ebereumur kew kayi te ampew te dunya.”

⁴ Sikiyu ne menge lukes, kenà niyu layun igkeepesi ke menge anak niyu; ugaid ne ipetidtu niyu sikandan te edait ne ulaula rut te menge etew ne mibperetiyyaya en ki Hisu Kristu ke Kerenan, ne penurua niyu sikandan dut te kiyug din kandan.

*Ini ne Mekeatag te Ulaula ne Edait dut te Menge Sugsuhuen wey ke
Edsuhùsuhù kandan*

⁵ Sikiyu ne menge edsugsuhuen, perumaruma kew dut te edsuhùsuhù keniyu kayi te ampew te dunya. Edati niyu sikandan ne ipehenat niyu te hinawa niyu ke kettumanan niyu dut te helevek niyu

iring te si Hisu Kristu ke edsuhù keniyu. ⁶ Kenà wey kew rà ed-upiya te helevrek niyu ke ebentayan kew pà apey kew egkereyù nikandin. Ugaid ne ul-ulaa niyu ve ke kiyug te Eleteala te egenat imbe te hinawa niyu su iyan niyu itahù te itungan ne edsugsuhuen kew ni Hisu Kristu. ⁷ Iyan niyu kegelevek dut te edsuhù keniyu ne lila te hinawa niyu, su iyan benar ne egelevekan niyu ne si Hisu Kristu ne kenà etew rà. ⁸ Su netuenan niyu ne ruen lalew ne ibehey te Kerenan tew dut te langun ne ed-ulaula te meupiya, misan edsugsuhuen etawa kenà.

⁹ Ne sikiyu rema ne ruen edsugsuhuen din, ne iring ded dema ketà se ul-ulaa niyu dut te edsugsuhuen niyu. Kenà kew ebpeliandek kandan su netuenan niyu te seveka rà ke Eleteala riyà te langit ne Kerenan niyu abpeg ded dut te edsugsuhuen niyu. Ne sikandin ne warà ibpeuna rin.

Ini ne Mekeatag te Iring te Adir ne Ibehey te Eleteala Kenitew su ibpekibunù tew rut te Datù te Pekaid wey ke menge Sugsuhuen din

¹⁰ Ne ini se mewri ne egkehiyen ku. Na geina te mibpekidseveka kew ki Hisu Kristu, ne nganey kew kandin te ebmevaher ke sarig niyu su sikandin ke ruen dekelà ne gehem din te edtavang. ¹¹ Su iring te ebpekibunù kiyu dut te kunterà tew ne si Setanas ke datù te pekaid ne metehel ne edlimbung keytew. Tembù be idseluub tew ke langun ne adir te kebunuey ne in-adir te Eleteala kenitew su apey kenà kiyu egketalew dut te ked-akal din. ¹² Su ke kunterà tew ne kenà etew, ugaid ne ke datù te pekaid wey ke sugsuhuen din ne menge busew wey ke ruma ne kenà egkekita abpeg ke ruen gehem din diyà te kewkewangan ne ed-ulaula te meraat. Su ruen kebayàbayà dan dut te menge etew kayi te ampew te dunya ne diyà pà ke itungan dan te kerusireman. ¹³ Tembù be seluub kew te langun ne adir te ebpekibunù ne in-adir te Eleteala kenitew su apey kew ebpekepenehana ke keenu ran egemew. Ne ketà ne misan ebmemenuwen kew dut te datù te pekaid, ne kenà kew egkeirud dut te mid-itindehan niyu.

¹⁴ Ketà be ne layun kew ebpenehana. Iring te sundaru ne insebitan din ke adir te ebpekibunù, ne iyan niyu sebitan ne layun niyu edumai ke benar. Ne ke ed-ul-ulaa niyu ne metidtu ne iyan iring te limbutung ne id-alang te kumeng niyu. ¹⁵ Ne iyan iring te telumpà niyu ne ke layun niyu kebpenehana te kebpemenudtul niyu te ruma niyu te Meupiya ne Tudtul mekeatag ki Hisus ne iyan kebmelintad te hinawa ran. ¹⁶ Ne iyan ruma pà ne adir niyu ne ke kedsarig niyu ki Hisu Kristu ne iring te kelung ne layun niyu ibpetirung su apey kew egkeelangi dut te mekeandek ne ibped-ulaula ni Setanas ke datù te pekaid su iring ini te panà ne regreg ne ibpanà din keniyu. ¹⁷ Ne ke sarig niyu te si Hisu Kristu ke mibpeliyu keniyu rut te kedusa te salà niyu ne iyan iring te putew ne sepiyu ne id-alang te ulu niyu. Ne ke Lalag te Eleteala ne imbehey keniyu dut te Kedesenan ne Ebpetuntul te Menusiyà ne iyan iring te sundang niyu. ¹⁸ Ne ketà te inseluub niyu ke langun ne adir, ne layun kew pengeningen iyi te Eleteala te ebuyù te tavang din te piya engkey ne egketemanan niyu. Warà be edsemaan niyu ugaid ne langun taman ne ipengeningen iyi riyà te Eleteala, ne iyan niyu ipengeningen iyi ke ibpepegitung keniyu dut te Kedesenan ne Ebpetuntul te Menusiyà. Kenà kew kebungas te kebpengeningen iyi, wey kenà niyu lipati te edragkes te pengeningen iyi ke langun ne mibperetiyyaya.

¹⁹ Ne iragkes a nikiyu te kebpengeningeni niyu su apey a egketevangi te Eleteala te ebpenurù kedi rut te dait ne egkehiyen ku kayi te ibpesabut ku ke lalag din. Ne seveka rema ne apey a kenà egkeandek te ebpesabut kandan dut te Meupiya ne Tudtul mekeatag ki Hisu Kristu, ini se pehaney ne warà pà metueni. ²⁰ Su midsuhù a te Eleteala te ebpesabut kayi te Meupiya ne Tudtul ne ini en iya ke puunan te ini a te bilengguan guntaan. Tembù be ebperagkes a keniyu te pengeningeni su apey kenà a egkeandek te ebpesabut dut te insuhù te Eleteala kedi.

Ke Mewri ne Lalag ni Pablo Kayi te Surat Din

²¹ Ne si Tikikus se ebpeewiten ku keniyu su apey sikandin en be se ebpenudtul keniyu te langun ne egketemanaan ku kayi. Suled tew sikandin te ebperetiyaya ki Hisu Kristu ne igkelimù ku nevenar, ne egkeserihan ku sikandin te edtavang kedì kayi te helevek ku. ²² Su tembù ma iya edsuhuen ku sikandin su apey rin igkepenudtul ke langun ne egketemanaan dey kayi ne ebeheren din dema ke itungan niyu.

²³ Menge suled ku, iyan ku ebpengeningeniyan diyà te Eleteala ne Amey tew wey ki Hisu Kristu ne Kerenan tew ne menu ma ke ebeheran dan ke kedsarig niyu kandan su apey niyu egkeheram ke melintad ne itungan wey ke kebpelimlimuey niyu ne riyà ebpuun te kandan. ²⁴ Ne ebuyuen ku rema te Eleteala te menu ke peneuva kew nikandin, langun ne sikiyu ne kenà egkeawà ke limù din ki Hisu Kristu ke Kerenan tew.

*Arà dà taman.
Pablo*

Ke Surat ni Pablo Riyà te Menge Etew te Inged ne Pilipus

¹ Sikami ne si Pablo ki Timoteo ne menge sugsuhuen ni Hisu Kristu se edsurat ini riyà te keniyu te menge ebpeneheewit dut te menge mibperetiyaya keniyan te inged te Pilipus abpeg ke ed-amung kandan wey ke langun niyu ne mibpesakup en te Eleteala sabap te mibperetiyaya kew ki Hisu Kristu.

² Iyan dey kiyug ne egkeheram niyu ke tavang wey kebmelinew te itungan niyu ne riyà ebpun te Eleteala ne Amey tew wey si Hisu Kristu ke Kerenan tew.

*Ke Kebpengeningen ni Pablo Mekeatag te Menge Etew Riyà te Inged
ne Pilipus*

³ Uman ku egkepegitung sikiyu ne ebpeselamat a te Eleteala,
⁴ ne uman ku ibpengeningen sikiyu ne egkehalew a nevenar ⁵ su egketenuran ku ke kinetavang niyu kedì te helevek ku te ed-eneb dut te Meupiya ne Tudtul. Su igenat dut te aney kew rà mibperetiyaya ne midtavang kew en kedì ne warà en mepitas taman guntaan. ⁶ Ne netuenan ku se ayan se behu ne itungan niyu ne imbehey te Eleteala te kinerudsù niyu te mibperetiyaya su apey kew ed-ulaula te meupiya, ne ed-um-umanan din en su apey warà kurang niyu ketà te hewii ne edlived si Hisu Kristu kayi. ⁷ Dekelà kew te hinawa ku! Ne dait ini se egkepegegitung ku mekeatag keniyu. Su aney en taman guntaani ne mid-unungan a nikiyu te edtindeg kayi te Meupiya ne Tudtul mekeatag ki Hisu Kristu piya engkey ne kerehenan, ne misan ini ad te bilengguan ne edtavang kew red lavew. Tuus be te nekeamung kew te kebaher te tavang te Eleteala kediey. ⁸ Su netuenan te Eleteala ne egkelimengawan a nevenar keniyu su warà meamin te lawa ku se limù ku keniyu iring dut te kegkelimù ni Hisu Kristu keniyu.

⁹ Iyan ku ibpengeningen keniyu ne ebuyuen ku te Eleteala ne ibpeiseg din ke limù niyu kandin abpeg ke kebpelimlimuey niyu su apey arà se nesebutan niyu mekeatag te kiyug te Eleteala ne med-iseg pà dema wey ke keditimbangtimbang te itungan niyu su apey niyu egketueni ke benar. ¹⁰ Ne ketà be ne egketuenan niyu en ke iyan pà meupiya ne ulaula niyu ne ebpekesuhat te hinawa rin. Su apey ketà te kedlived ni Hisus ne warà en ibenar keniyu su warà meraat ne nekesawug te ulaula niyu. ¹¹ Su ketà ne langun te ed-ul-ulaan niyu ne metidtu sabap dut te keditavang ni Hisu Kristu keniyu, su sikandin dà se ebpekegaga te ked-ulaula niyu ketà. Ed-ul-ulaan din ini su apey egkereyù ke Eleteala wey egkeedatan sikandin.

*Ke Kegkevilanggù ni Pablo se Neketavang te Kebpesabut din dut te
Meupiya ne Tudtul*

¹² Menge suled, ebpeketuenan ku keniyu te kenà egkevangen ne ed-iseg ke Meupiya ne Tudtul ne ibpesabut ku misan iiri a te bilengguan, su nasi ne mid-iseg pà. ¹³ Su langun dut te sundaru ne ebananey te turuhan te datù kayi wey langun ne menge etew kayi, ne nekerineg te

warà duma ne ibpuun kedi te mibelanggù ke kenà ke kebperetiyaya ku ki Hisu Kristu.¹⁴ Guna te netuenan dut te kerekelan te menge suled tew ne mibperetiyaya te ini a te bilengguan, ne mid-iseg ke kedsarig dan ki Hisu Kristu ke Kerenan tew. Nasi pà se neawà ke andek dan ne kenà dan en egkealang-alang ne ebpesabut dut te lalag te Eleteala.

¹⁵ Benar ne ruen duma ne menge etew ne ebpesabut te Lalag te Eleteala su egkesihì ran kedi, ne arà ke dalan te kebpekid-ampew ran. Ugaid ne ruen ruma ne etew ne kenà, su iyan dan kebpesabut te Lalag te Eleteala ne egenat te hinawa ran en iya.¹⁶ Uya, su igkelimù a nikandan su netuenan dan te midserihan a ni Hisu Kristu te helevek te edtindeg dut te Meupiya ne Tuditul.¹⁷ Su ayan ne menge etew se egkesihì kedi, ne ebpenurù dan mekeatag ki Hisu Kristu su apey sikandan ke ebpekekamal dut te menge etew. Iyan dan kunean ke ayan se ed-ul-ulaan dan ne ebpekeruntu te keresayan ku kayi te bilengguan.

¹⁸ Ugaid ne misan iring ketà, ne ebeleharen. Su meupiya meraat pà se ed-epasen dan asal ne ibpesabut dan ke Meupiya ne Tuditul mekeatag ki Hisu Kristu, ne ketà ne egkehalew a. Uya, ne warà mulà sanggel din se kegkehalew ku,¹⁹ su netuenan ku te misan egkerehenan a ne ebpekeliyu a ibpepevayà te kebpengeningeni niyu kedi wey ke tavang dut te Kedesenan ne Ebpetuntul te Menusiyà ne ke tavang ded ni Hisu Kristu.²⁰ Su dekelà se egkepenareng ku wey ke sarig ku te ebpeketuman a rut te langun ne insarig te Eleteala kedi su apey warà kegkeyeyai ku. Nasi pà se iyan ku kiyug ne ed-iseg pà ke kewalew ku te ebpesabut te Meupiya ne Tuditul su apey guntaani wey ketà te hewii ne ebpekeuma ne siaken se puunan te kegkereyù ki Hisu Kristu taman te biviyag e pà etawa misan ebpatay a.²¹ Su gewii te kayi e pà te ampew te dunya, ne si Hisu Kristu rà se dekelà te hinawa ku. Ugaid ne embiya ebpatay a ne meupiya pà su ebpekelintad a diyà te kandin.²² Ne embiya kiyug te Eleteala se ked-ubpà ku pà lavew kayi te ampew te dunya, ne tembù pà engketà su ruen pà ibpehelevek din kedi. Embiya ebpepemilien a te ebpeubpaan pà kayi te dunya etawa ebpatay, ne kenà ku egketuenan ke endei rapit kayi se meupiya.²³ Su iring te nevaad se hinawa ku, su ruen arà se egkesuat ad ne ed-awà kayi te ampew te dunya ne ebpekiduma en ki Hisu Kristu su arà en iya ke meupiya te langun.²⁴ Ne ruen ded maan arà se hinawa ku te ed-ubpà pà lavew kayi te ampew te dunya su apey ku egketevangi pà sikiyu.²⁵ Ne geina te ruen pà lavew egkeetehan ku keniyu, ne netuenan ku te kiyug te Eleteala se kebpekeubpà ku pà kayi te ampew te dunya su apey a ebpeketavang pà te kebmeilut te sarig niyu wey apey ebpekeiseg dema ke kehelawan niyu ki Hisu Kristu.²⁶ Ini se kiyug ku su apey ketà te ebpmemekebalak kiyu en ne ebpekereyù kew ki Hisu Kristu su mekeatag te ini.

²⁷ Na memekebalak kiyu ve se kenà, ne itahù niyu te itungan se iyan niyu rà ul-ulaa ke edait ne ulaula rut te menge mibperetiyaya te Meupiya ne Tuditul mekeatag ki Hisu Kristu. Ketà ne misan ebpendiyan a te keniyu etawa kenà, ne ke tudtul mekeatag keniyu ne ebpekeuma kayi te kedi ne warè en dut te sarig niyu ki Hisu Kristu, ne ebpetebtevangey kew en te edtindeg dut te Meupiya ne Tuditul ne mibperetiyaya niyu.²⁸ Ne kenà niyu igkeandek ke kunterà niyu. Su embiya kenà kew

egkeandek kandan ne arà ke tuus ne ibpekita te Eleteala kandan te edtevanan dan ne edusaan dan te Eleteala, ugaid ne sikiyu ne ebpeketalew su Eleteala se edtavang kenyu.²⁹ Su mibehayan kew en te Eleteala te ralan te kebperetiyyaya ki Hisu Kristu su apey sikandin se egkereyù. Ugaid ne kenà arà dà se ralan te kebperetiyyaya se imbehey rin, su mibehayan kew rema nikandin te ralan te kebpekid-unung te kerasayan din su apey sikandin se egkereyù.³⁰ Na ketà be ne nekeamung kew kedì te ebpekibunù ki Setanas iring te nekita niyu ma ke kebpekibunù ku dut te riyan e pà te kenyu wey ini se egkerineg niyu guntaani mekeatag te kerasayan ne ebpevaayan ku.

2

Ke Kebpeembavà ni Hisu Kristu se Ed-iringan Tew

¹ Netuenan ku te mibmevaher se hinawa niyu egenat te kegkeseveka niyu ki Hisu Kristu wey nehalew kew su ingkelimù kew nikandin. Ne egkeheram niyu ke tavang ne riyà eppuun te Kedesenan ne Ebpetuntul te Menusiyà su ke ked-ubpà din kayi te lawa niyu, ne ebpekita kew en te kegkeyru niyu wey kebpelimalimuey.² Na ed-upianan niyu nevenar ke hinawa ku kayi te ibpeiseg niyu pà ke kegkeseveka te itungan niyu, ke kebpelimalimuey niyu wey ke kegkeuyun te hinawa niyu te ebpesabut dut te Meupiya ne Tudtul.³ Kenà be egkepakey ne iyan niyu ed-ul-ulaan ne ed-umamin te langun taman etawa ebpendantal. Ugaid ne ipeembavà niyu ke hinawa niyu, ne edati niyu ke menge ruma niyu.⁴ Kenà iyan niyu rà pegitunga ke keupianan niyu su pegitunga niyu red dema ke keupianan te ruma niyu.⁵ Iringi niyu si Hisu Kristu su mibpeembavà ke hinawa rin.

⁶ Misan igenat dà te pehaney ne Eleteala si Hisus, ne warà din pegitunga te intindeg din te sikandin ne Kerenan.

⁷ Ugaid ne mid-ewaan din ini
riyà te langit,
ne mibpeembavà sikandin
su mibpebaluy ne etew,
etew ne iring te kevevaan ne sugsuhuen.

⁸ Ne ketà te kebpebaluy rin ne etew
ne mibpeembavà sikandin
kayi te kebperumaruma te Amey rin ne Eleteala
taman te kinepatey rin
te kinelansang kandin
diyà te pinebelavag ne kayu.

⁹ Tembù be impecpurù sikandin te Eleteala
diyà te pinekemepurù te langun,
¹⁰ su apey ke langun ne edeyù kandin
misan ke ed-ubpà diyà te langit
etawa kayi te ampew te dunya
etawa ayan se keniyan te insekednar,
langun ne ebpenimbuel diyà te sineruwan ni Hisus
se edeyù kandin.

¹¹ Ke langun ne edsamasama egkahi te
si Hisu Kristu ke Kerenan dut te langun

ne ketà ne egkereyù dan ke Eleteala ne Amey tew.

Ini ne Mekeatag te Sikitew ne Menge Mibperetiyaya ne Iring te sulù ne Egkerayahan ke Merusirem kayi te Ampew te dunya

¹² Engketà be menge suled ne igkelimù ku, iring dut te kebperumaruma ni Hisu Kristu te Amey rin ne Eleteala ne ebperumaruma kiyu rema. Gewii te keniyan e pà te keniyu ne mibperumaruma kew rut te penurù ku keniyu, ne wey kew pè be maa kenà mebperumaruma dut te penurù ku ke warà ad. Ibpereyun niyu te ed-ulaula ke kadtuman niyu te kiyug te Eleteala keniyu, ne arà se kegkepasad te kebperetiyaya niyu. Ne ul-ulaa niyu ini egenat te dekelà ne adat niyu te Eleteala wey ke kegkeandek niyu te edsurang te lalag din. ¹³ Su ke Eleteala ne ed-ubpà diyà te hinawa niyu ne edtavang keniyu, su sikandin se ebehey keniyu te kiyug te ebperumaruma kandin wey ke baher te kadtuman ketà.

¹⁴ Ne kayi te langun ne ed-ululaan niyu, ne ul-ulaa niyu te warà pemivihan ne kenà kew pekidlawan, ¹⁵ su apey warà ed-isuhat keniyu, nasi pà te ebpuun dut te meupiya ne perangey niyu ne egkekita ran te sikiyu ne anak te Eleteala. Misan ed-ubpà kew rut te menge etew ne bigkug se itungan wey meraat se perangey ran kayi te ampew te dunya, ne iyan iya dait ne egkekita ran ne metilak se hinawa niyu wey metidtu se ulaula niyu su sikiyu ne iring te bituen ne edsilaksilak te merukilem. ¹⁶ Su ketà ne ebpesebutan niyu kandan ke Meupiya ne Tudtul ne ebehey te umur ne warà edtemanan din. Embiya ini se ed-ululaan niyu ne ruen kewagib ku te edantal mekeatag keniyu ketà te hewii ne kedlived ni Hisus su sikiyu ke tuus te miberepantag ded ke kinerumerasey ku.

¹⁷ Kalu ke ed-imetayan a mekeatag kayi te helevek ku te Eleteala, ugaid ne embiya ini se ibped-ulaula kedì ne ini se lengesa ku ne edtdà ketà te ked-imetayi ran kedì ne iring ini dut te inumen ne idtahù tew rut te idrenà ne ibehey te Eleteala su apey egkepasad. Ne ke sarig niyu ne iring te arà se idrenà ne ibehey niyu te Eletela, tembù be kenà a egkemutu nasi pà te egkehalew a elin keniyu su ke kebpatey ku ne arà se ed-imasad te idrenà ne ibehey niyu te Eleteala. ¹⁸ Engketà be arà ne misan ebpatey a ne kenà kew kemutu ugaid ne kehalew kew elin kedì.

Ini ne Mekeatag ki Timoteo wey si Ipapruditu ne Ibpependiyà ni Pablo te menge etew te Inged ne Pilipus

¹⁹ Duen kiyug ku te kenà meuhet ne ibpepengkeniyan ku si Timoteo te keniyu embiya idluhut te Kerenan tew ne si Hisu Kristu, su apey ketà te kedlived din kayi ne egkerineg ke tudtul mekeatag te sikiyu ne arà se igkehalew ku. ²⁰ Sikandin dà dut te menge ruma ku kayi se ebpekepegitung te keupianan niyu. ²¹ Su ke menge ruma ne iyan dan ibpeuna te itungan ne ke kandan ne keupianan ne kenà arà ke ibpeulaula kandan ni Hisu Kristu. ²² Ugaid ne si Timoteo ini ne netuenan niyu en te ke ulaula rin ne meupiya, su iring sikandin te tuney ne anak ku te edtavang kedì te ebpesabut dut te Meupiya ne Tudtul. ²³ Tembù be embiya egketuenan ku ke engkey se egkepesaran te kukuman kedì, ne arà dà ne sikandin se ibpepengkeniyan ku te

keniyu. ²⁴ Ne menu ma ke idluhut ni Hisu Kristu ke Kerenan tew ne kenà meuhet ne ebpekepengkenian a rema te kenyu.

²⁵ Ugaid ne ini se suled tew ne si Ipapruditu ne ibpeuli ku en te mehaan. Sikandin ini ne iring en iya te tidtu ne ari ku su midtavang sikandin kedì te kebpekibunù ki Setanas dut te kebpsabut dey rut te Meupiya ne Tudtul, ne sugsuhuen niyu sikandin ne impepengkayi niyu te edtavang kediey. ²⁶ Ne ibpeuli ku sikandin su egkelimengawan en kenyu, ne neuru sikandin su nerineg niyu te nekedaru sikandin kayi. ²⁷ Ne benar rema ne midaru si Ipapruditu su deisek samà ne ebpatey, ugaid ne ingkeyru sikandin te Eleteala ne neulian ded. Ne kenà sikandin dà se ingkeyru te Eleteala su siaken dema, su embiya nememenu sikandin ne dekelà pà maa ne kemutuwani ku. ²⁸ Tembù be iyan ku kiyug ne ibpeuli ku en sikandin su apey kew egkehalew keta te ebpmemekebalak kew. Ne embiya egkehalew kew ne egkeawà en ke kegkeuru ku. ²⁹ Ne ketà te kebpekeuma rin ne gelhelawa niyu sikandin su tidtu ne suled tew sikandin egenat te kebperetiyyaya rin te Kerenan tew. Ipekita niyu te ked-adat niyu te menge etew ne iring ki Ipapruditu. ³⁰ Su deisek dà ne ebpatey en sikandin te kedmuman din dut te helevèk din ki Hisu Kristu. Ne inselakan din ke umur din te edtavang kedì su apey sikandin ke timbang sikiyu ne edtavang kedì.

3

Edtidtuwen kiyu te Eleteala Egenat te Kedsarig tew ki Hisu Kristu

¹ Na menge suled, ruen pà ebpetentenuran ku kenyu, layun kew kehalew te mibpekidseveka kew en ki Hisu Kristu ke Kerenan tew. Kenà ku igkebungas te misan egkesulit ku en ke neuna ne lalag ku kenyu su embiya edumaan niyu ini ne baag kenyu ne kenà kew egkeekalan. ² Uram kew dut te menge etew ne ed-ingaranan ku te menge asu su meraat se ed-ul-ulaan dan su ibpehes dan dut te penurù dan te embiya kenà kew ebpeetus ne kenà kew kun egkevaluy ne sakup te Eleteala. ³ Ne up-upiya kew ve su kenà arà ke tuus te tidtu ne sakup te Eleteala, su ke tidtu ne sakup din ne sikitew se ebpengarap kandin ibpepevayà te tavang te Kedesenan ne Ebpetuntul te Menusiyà wey ruen kegkehalew te hinawa tew egenat ki Hisu Kristu. Su sikandin dà se edserihan tew su apey kiyu mekeliyu te kedusa te salà tew, ne kenà ke kedmuman te penduan iring te kebpeetus te lawa tew.

⁴ Su embiya ke ed-ul-ulaan tew rà se edserihan tew te ebpekeliyu, ne ebpekeliyu ad iya. Ne embiya ruen etew ne iyan din pegitung ne ebpekeperiliyu sikandin sabap dut te ed-ul-ulaan din, ne neliyuwan ku pà sikandin. ⁵ Iyan ku kegkahai ketà su tidtu ne Hudiyanan a su ke lukes ku ne Hudiyanan, tembù be dut te ikewalu pà ne hewii dut te kineenaka kedì ne mibpeetusan ad. Ini se menge lukes ku ne inenakan ni Binhamin ne anak dut te kepuun dey ne si Israyil. Uya tidtu a ne Hudiyanan ne midtuman ku ke penduan ne intahak ki Moises su senge etew a ne Paresiyu. ⁶ Mid-amin ku se kedmuman ku taman te mibpmemekeiran ku ke menge etew ne mibperetiyyaya en ki Hisus su kenà dan edtuman dut te penduan. Warà senge etew rà ne ebpekeisuhat kedì mekeatag te penduan su netuman ku langun. ⁷ Ugaid ne langun arà se midserihan ku pehaney te ruen atag din, ne guntaani ne birang warà en atag din. Na midsembian ku en be arà

te dekelà se lalew rin ne helevek ku ki Hisu Kristu. ⁸ Ne kenà arà dà su langun en ne birang warà en atag din su geina te neimemanan ku en te warà repeng din arà se kedsarig ku ki Hisu Kristu ke Kerenan tew. Su ketà te midsarig ad ki Hisus ne mid-engkeran ku en ke langun ne midumaan ku su timbang ripet ne intimbag en su apey a eduma ki Hisus ⁹ wey apey a ebpekidseveka kandin. Su kenà ke keduma ku rut te penduan ne iyan kedmengteng te Eleteala kediey ne metidtu, ugaid ne ke kedsarig ku rà ki Hisu Kristu. Su ibpetidtu a te Eleteala su sabap dut te kedsarig ku ki Hisu Kristu. ¹⁰ Su iyan ku rà kiyug ne egkeheram ku ke tavang ni Hisu Kristu kayi te kediey wey ke gehem din guna su nevanew en sikandin dut te minatey. Egkiyuhan ku rema te editigker ke rasey iring ki Hisus misan ibpatey ku iring kandin, ¹¹ su egkepenareng ku te embiya ebpatey a ne ebenawen e red te Eleteala su apey a ebpekeubpà diyà te kandin.

Insempità ni Pablo te langun tew ne mibperetiyyaya ne iring kiyu te Etew ne Mid-amung te Egkuya ne Ebpelelahuy taman te Edtemanan

¹² Kenà be iyan ku kegkahi ne neketuman ad te langun wey kenà ku egkekahi te warè en kurang ku te keduma ku ki Hisus. Ugaid ne ebpeketehel e pà se edtuman te kiyug ni Hisu Kristu su apey a ebpeketelimà dut te intail din kedi su mibaluy a nikandin ne sakup din. ¹³ Menge suled ku, kenà ku ebpegitungen te netuman ku en ke langun, ugaid ne ini rà se netahù te hinawa ku ne ebeleharan ku en ke mid-ulaula ku su edtemtemanen ku pà se hinawa ku te edtuman te kiyug ni Hisu Kristu kedi. ¹⁴ Su iring dut te etew ne ed-amung te egkuya ne editilandeng e pà su apey ku egkekuwa arà se ibehey te Eleteala kedi ne arà se behu ne umur tew su apey ki ebpekeubpà kandin diyà te langit sabap dut te mid-ulaula ni Hisu Kristu.

¹⁵ Arà ne itungan ne iyan din dait te langun ne sikitew ne midtamal en se peretiyyaya rin. Ugaid ne embiya ruen keniyan te keniyu ne kenà egkeuyun, ne ke Eleteala se ebpesabut kandin dut te benar. ¹⁶ Ugaid ne iyan iya se ebperumduaan tew ke langun ne nesebutan tew ne egkiyuhan din.

¹⁷ Menge suled ku, iyan niyu iringi ne ulaula ku. Impekita rey keniyu ke nekesuhat ne ulaula, tembù be sipata niyu ke menge etew ne eduma en kayi. ¹⁸ Ruen nekahì ku en keniyu pehaney te ruen merakel ne etew ne ed-ulaula te meraat ne egkunterà dan ki Hisu Kristu su edsudian dan ke kinepatey rin riyà te pinebelavag ne kayu. Kenà kepipira ku rà ini intarem keniyu ne misan guntaani ne igkahi ku keniyu te egurebpad se luwà ku. ¹⁹ Ayan ne menge etew ne iyan dan egketemanan se apuy nerakà, su iyan ebayàbayà kandan ne ke kedmengteng te kiyug te kememenuisyai. Ibpereyùdeyù dan ke ebpekeyeyà kandan, ne iyan dan dà igkeinesa ke egkiyuhan dut te menge etew kayi te ampew te dunya.

²⁰ Ugaid ne langun tew te tidtu ne mibperetiyyaya ki Hisus ne kenà iring ketà, su misan ed-ubpà kiyu kayi te ampew te dunya ne ebpendiyà ki te surugà ne ke tidtu ne ubpaan tew. Ne riyà ebpuun dema ini se ebpenerengen tew ne Kerenan tew ne si Hisu Kristu ne mibpeliyu kenitew. ²¹ Ne ketà te kedlived din, ne ebelyuen din ke lawa tew ne ebpatey iring dut te lawa rin ne kenà ebpatey. Egkegaga

rin te ed-ulaula ini ibpepevayà dut te gehem din te ebayàbayà dut te langun taman.

4

Migkehiyan ni Pablo ke menge Etew Riyà Te Inged ne Pilipus te Mebmeilut se Kegawed Dan ki Hisu Kristu

¹ Engketà be menge suled, ne embiya iyan tew rekèlà ne ebpenerengen si Hisu Kristu, ne ibmeilut se kegawed tew kandin ne editnidtuwanan tew se keduma kandin. Dekelà ku sikiyu te hinawa ne kiyug ku ne ebpmekalak kiyu en su sikiyu se igkehalew ku wey sikiyu red ke timbang tendan te helevek ku.

² Ebuyuen ku te sikiyu Udiya ki Sintiki ne mebpeturuney kew en su edsuled kew sabap dut te kedsarig niyu ki Hisu Kristu. ³ Ne sikuna ne megeget ne ruma ku, ne tavang ka te ebpeturuney kandan. Su in-amin dan ke hinawa ran te edtavang kedì te ebpesabut dut te Meupiya ne Tudtul. Uya, sikandan engki Klimen wey ruma pà ne layun edtavang kedì. Nekesurat en te Eleteala ke ngaran dan ketà te riberù ne edsuratan din te menge ngaran te etew ne nevehayan en te umur ne warà edtemanan din.

⁴ Ne layun kew mebmehalew su atag dut te mibpekidseveka kew ki Hisu Kristu ke Kerenan tew. Ne egkesulit ku pà maa te egkahi te layun kew mebmehalew. ⁵ Peketulanged kew dut te langun ne etew. Mehaan en edlived si Hisu Kristu ke Kerenan tew. ⁶ Kenà kew egkeuru te misan engkey en, ugaid ne ipengeningeni niyu riyà te Eleteala mekeatag te langun ne egketemanan niyu. Buyua niyu diyà te kandin te langun ne kurang niyu, ne peselemati niyu sikandin dut te ibehey rin. ⁷ Embiya arà se ed-ul-ulaan niyu ne ebehayan kew te Eleteala te merinew ne itungan, ne arà se kerinew ne ibehey rin ne kenà egkesagkew te itungan dà te etew. Ini se ed-ul-ulaan te Eleteala su ebentayan kew nikandin apey warà meraat ne ebpeketuvin diyà te itungan niyu sabap dut te mibpekidseveka kew ki Hisu Kristu.

⁸ Na ini rè be, menge suled, se mewri ne igkahi ku kenyu. Iyan niyu pegpegitunga ke menge ulaula ne meupiya ne dait ne egkereyù, ke menge ulaula ne benar, ke menge ulaula ne ruen atag din, ke menge ulaula ne metidtu, ke menge ulaula ne metilak su warà amut din ne meredsik, ke menge ulaula ne igkeeyami wey menge ulaula ne egkeedatan su metinevangen. ⁹ Ne langun dut te nehuruwan niyu kayi te penurù ku abpeg ke nerineg niyu kayi te kedì wey ke nekita niyu ne ulaula ku, ne arà be se dumai niyu. Su embiya ini se ed-ul-ulaan niyu, ne ebpekerinewen te Eleteala ke hinawa niyu su sikandin ne kenyian te kenyu.

Mibpeselematan ni Pablo ke menge etew diyà te Inged ne Pilipus dut te Tavang ne Impeewit dan kandin

¹⁰ Nehalew a nevenar ne dekelà se kinereyù ku ki Hisu Kristu ke Kerenan tew su misan neuhet en ne ruen en maa nekeuma ne ibpekita niyu te ruen ded hinawa niyu te edtavang kedì. Netuenan ku se kenà a niyu egkelipatan, ugaid ne guntaani pà ne nekeuma su warà dalan te kebpeewit niyu. ¹¹ Ne kenà ve iyan ku kegkahi kayi ne ebpeketaen ku se ruen kurang ku, su nelayaman ku te edtigker se piya engkey se egketemanan ku. ¹² Neseharan ku en se meninit, ne neseharan ku en

se warà egkepemengà. Ne nehuruwan ku te Eleteala te edtigker te piya engkey en se egketemanan ku, egkevulung e pà se egkevitil etawa ed-uraren wey meirù. ¹³ Misan engkey en se ebpekerumpak kedi ne egketigkeran ku su ke gehem ni Hisu Kristu ne iyan edtavang kedi.

¹⁴ Ugaid ne misan iring ketà ne meupiya neveran ini se impeewit niyu su edtavang kew te kerasayan ku. ¹⁵ Su sikiyu ne menge etew ne an te Pilipus ne netuenan niyu te igenat pà dut te kinerudsù ku te ebpenudtul te Meupiya ne Tudtul keniyan te keniyu ne misan ketà te kineawà ku en riyà te inged ne Mesidunya ne warà ruma pà ne midtavang kedi ke kenà sikiyu rà. Sikiyu rà ne mibperetiyyaya se midtavang kedi te kurang ku. ¹⁶ Ne misan ketà te riyan ad te Tiselunika, ne kenà kew keseveka rà mibpeewit te tavang kedi. ¹⁷ Kenà iyan ku kineravit dut te tavang niyu kedi ne egnganey e pà lavew keniyu, ugaid ne iyan ku igkehalew dut te tavang niyu ne arà se idtendan te Eleteala ne ibehey keniyu riyà te surugà. ¹⁸ Na guntaani ne warà en egkepemengà ku ketà te impeewit niyu ki Ipapruditu su midsawadsawad en. Ne ini se imbehey niyu kedi ne iring te ruen imbehey niyu te Eleteala ne meemut se kegkearek din ne midtelimà din su nekesuhat te hinawa rin. ¹⁹ Ne ke Eleteala ne edserihan ku ne ke kemuney rut te langun taman ne sikandin se ebehey keniyu te langun ne kurang niyu sabap te mibpekidseveka kew ki Hisu Kristu. ²⁰ Tembù be ke Eleteala ne Amey tew se edeyuen taman te taman.

Ke Mewri ne Lalag ni Pablo Kayi te Surat Din

²¹ Ebpeketuenan te langun ne menge sakup te Eleteala ne ebperetiyyaya ki Hisu Kristu keniyan te keniyu ne ebpenginginsà a kandan. Ne ini se menge suled tew te ebperetiyyaya ne ini te kedi ne ebpenginginsà dema keniyu. ²² Langun ne menge sakup te Eleteala kayi te inged ne Ruma labi en ke menge suled tew ne egelevék kayi te turuhan ni Caesar ke datù kayi ne langun dan se ebpenginginsà keniyu rema.

²³ Iyan ku ebpengeningeniyen keniyu ne ebpeneuvén kew langun ni Hisu Kristu ke Kerenan tew.

Taman dà ketà ke egkehiyen ku.

Pablo

Ke Surat ni Pablo Riyà te Menge Etew te Inged ne Kulasi

¹ Siaken ini se edsurat ne si Pablo. Senge etew a ne midsuhù ni Hisu Kristu ne kedserihan din, ne ini se kinesuhù din kedì ne kiyug te Eleteala. Edsurat key ki Timoteo ini se suled tew te ebperetiyaya ki Hisus ²kenian te kenyu ne menge metinumanen ne sakup te Eleteala diyà te inged ne Kulasi ne mibpekidseveka ki Hisu Kristu.

Iyan ku kiyug ne egkeheram niyu ke tavang wey merinew ne itungan ne riyà ebuun te Eleteala ne Amey tew.

Ke Kebpengeningeni ni Pablo wey ke Kebpeselamat din te Eleteala Mekeatag dut te menge Etew diyà te Inged ne Kulasi

³ Uman key ebpengeningeni kenyu ne layun key ebpeselamat te Eleteala ne Amey ni Hisu Kristu ke Kerenan tew. ⁴ Iyan dey kebpeselemati kandin ne nepenudtulan key rut te tidtu ne kedsarig niyu ki Hisu Kristu wey ke limù niyu rut te langun ne sakup te Eleteala. ⁵ Ini se ed-ul-ulaan niyu su nevag-et ke hinawa niyu te ruen en intail te Eleteala kenyu riyà te langit. Ne ini se mibpenareng niyu igenat dà dut te pehaney en ne nerineg niyu ke benar mekeatag ki Hisu Kristu ne ini se Meupiya ne Tudit. ⁶ Ini imbe se Meupiya ne Tudit se ibpemenudtul en id-eneb kayi te ampew te dunya, ne langun ne etew ne ebperetiyaya ne egkevelvelewanan ke ulaula ran iring ded dema kenyu. Su nevelvelewanan ke ulaula niyu te nerineg niyu wey neheram niyu ke tavang te Eleteala kenyu. ⁷ Ne si Ipapras iya ini ke mibpenurù te Meupiya ne Tudit diyà te kenyu, ne senge etew rema sikandin ne egkeserihan ne sugsuhuen ni Hisu Kristu ne igkelimù dey nevenar. Ne sikandin ini ke midserihan dey ne edsuhuen su ebpenurù kenyu. ⁸ Ne sikandin ke midtarem kenami mekeatag dut te limù niyu riyà te menge rumu niyu, arà ne limù ne riyà ebuun te Kedesenan ne Ebpeturuntul te Menusiyà.

⁹ Tembù be igenat dà te nerineg dey arà ne layun dey en ibpengeningeni sikiyu. Ini se ebuyuen dey te Eleteala kenyu ne menu ke mepayahi niyu ke engkey se kiyug te Eleteala wey menu ke mepemulai ke hinawa niyu te metidtu ne itungan su apey niyu egkekilala ke ketau ne ibpayag kenyu rut te Kedesenan ne Ebpeturuntul te Menusiyà. ¹⁰ Ini se ibpengeningeni rey su apey kew ebpeketuman rut te kiyug te Eleteala wey langun ne ed-ul-ulaan niyu ne ebpekesuhat te hinawa rin. Ketà ne ini se meupiya ne ed-ul-ulaan niyu ne ed-iseg wey ke nesebutan niyu mekeatag te Eleteala ne egkeumanan. ¹¹ Ebpengeningeniyen dey rema ne ke gehem te Eleteala ne warà repeng din ne ebeheren kew rin su embiya ebpekeanuyanuy kew te kemerehenan ne igalewhalew niyu rà se keditgker niyu. ¹² Ne seveka pà ne kiyug ku ne deyreya niyu ke Eleteala ne Amey tew su nekeamung kew rin ne menge sakup din su apey kew egkevehayan ketà te intail din dut te menge etew ne eduma kandin ne nerayahan en ke itungan dan. ¹³ Su impeliyu kiyu en nikandin te kerusireman ne ebeyvayaan ni Setanas ke datù te pekaid, ne in-arat kiyu nikandin ketà te kerayahan ne iyan ebayàbayà

ke Anak din ne si Hisu Kristu ne igkelimù din neveran. ¹⁴ Su sabap dut te kinepatey ni Hisu Kristu ne arà imbe te nekeperiyu keyta te kedusa rut te salà tew, ne ketà ne kenà en ebpenundug ke Eleteala te salà tew.

Langun ne Nelimbag te Eleteala ne Impepevayà din ki Hisu Kristu, ne impepevayà kandin te Kinepatey rin Mekeatag dut te Salà tew ne arà se Ralan te Kebpeked-ulit tew te Eleteala

¹⁵ Nevaluy ne etew si Hisu Kristu apey sikandin se ibpekita keytew te paras dut te Eleteala ne kenà egkekita. Ne raan en si Hisus dut te langun ne nelimbag te Eleteala ne sikandin se mepurù dut te langun ketà, ¹⁶ su ibpepevayà kandin ne midlimbag dut te Eleteala ke langun ne neketahù diyà te langit wey langun ne nekeriken kayi te ampew te dunya, langun ne egkekita wey langun ne kenà egkekita, abpeg ke menge suluhsuen wey ke ruma ne ruen gehem din te ebayàbayà. Langun ne nelimbag te Eleteala ibpepevayà ki Hisu Kristu su apey sikandin se egkereyù.

¹⁷ Daan en si Hisu Kristu te warà pà melimbag te misan engkey en, ne langun ne nelimbag din ne kemulu pà guntaani su sikandin se mevaher ne egawed. ¹⁸ Sikandin ke ulu rut te langun tew ne mibperetiyyaya, ne sikitew ne iring dut te lawa rin. Su sikandin ke Anak te Eleteala ne ebpuunan dut te behu ne umur ta su nevanew rin ded maa te minatey, ketà ne langun ne mibperetiyyaya kandin ne egkevehayan te umur ne warà edtemanan din. Na kayi ve imbe ne netuenan tew te sikandin ke mepurù te langun taman. ¹⁹ Su kiyug te Eleteala ne langun ne riyà te kandin ne riyà ded dema te Anak din si Hisu Kristu, ne ketà ne ke kegkeeleteala ran ne neked-iring. ²⁰ Ne kiyug te Eleteala rema ne langun ne riyà te langit wey kayi te ampew te dunya ne ebpekidseveka maa kandin su midsuwey ran en kandin. Ne ke kebehey rin dut te Anak din si Hisu Kristu te ebpatetey riyà te pinebelavag ne kayu ke ralan ne mibeelan din te ebpeked-ulit ke menge etew riyà te kandin.

²¹ Ne sikiyu rema, pehaney ne nekepekeriyù ke itungan niyu te Eleteala su kunterà kew rin dut te ulaula niyu wey itungan niyu ne meraat. ²² Ugaid ne gunteani ne imped-ulit kew en te Eleteala su sabap dut te kinepatey rut te Anak din diyà te pinebelavag ne kayu. Ne egenat ketà ne ebpekeuvvey kew en te Eleteala su nelùluan en ke salà niyu, ne midtilak din en ke hinawa niyu, ne warè en igkesawey keniyu. ²³ Ugaid ne iyan iya se pegelepi niyu te ebpekeiseg ini se sarig niyu ki Hisus su apey kenà egkekisù ke kebperetiyyaya niyu. Kenà niyu edsuweyi ini se Meupiya ne Tudtul ne neendihan en te hinawa niyu te aney en te nerineg niyu, su warà duma ne egkepenareng tew te ebpesabut keytew te si Hisu Kristu ke ebperiyu kenitew ke kenà ini se Meupiya ne Tudtul. Ne ini iya se Meupiya ne Tudtul ne nekeeneb en mekepenudtul kayi te dunya ne senge etew a ne si Pablo ne ebpeneheewit kayi.

Ke Tavang ni Pablo dut te Menge Mibperetiyyaya

²⁴ Ne misan mibilanggù a su atag te kebpenurù ku keniyu te kenà menge Hudiyanen, ne kenà a egkeuru su nasi pà te egkehalew a. Su egenat kayi ne keresayan ku ne egkeheraman ku ke keresayan ne kiyug ni Hisu Kristu ne egkepevayaan ku su apey egketevangan ke menge ruma tew ne mibperetiyyaya ne iring te lawa rin. ²⁵ Ne arà be se

kinevehey te Eleteala kayi te gelevek ku su ebpeketavang dut te langun ne menge mibperetiyyaya, labi en ke sikiyu ne kenà Hudianen. Su ruen kiyug din ne ebpesabut a keniyu te langun ne nekahи rin diyà te Lalag din.²⁶ Su igenat dà rengan ne warà etew ne netau te pegitungan te Eleteala, ugaid ne gunteani ne impayag en keytew ne menge sakup din.²⁷ Ne sikiyu rema ne kenà menge Hudianen ne nekeamung ketà te mibpeyahan din. Ne warà pasar din ne keupianan ini se netahù te itungan din te ibpeubpà din si Hisu Kristu kayi te hinawa tew, ne ini se tuus te sikita ne id-amung din dut te kepurù te Eleteala diyà te langit.²⁸ Ini ve se kadtantu rey te ebpesabut te langun ne etew mekeatag ki Hisu Kristu. Ibpemenudtul dey wey edseysayen dey ini diyà te kandan su apey ran ebpehimbenar, su iyan dey kiyug ne uman senge etew ne edtamel se kedsarig din ki Hisu Kristu.²⁹ Ini iya se ebpegelepan ku te egelevek ne embiya kediey rà ne kenà ku ini egkegaga, ugaid ne ke bahan ni Hisu Kristu se ibpekegaga ku.

2

¹ Sikiyu langun ne mibperetiyyaya ne riyà te inged ne Kulasi wey kenian te Liyudisiya abpeg ke langun ne warà pà mekekilala kedì, kiyug ku ne egketuenan niyu ke engkey se kebpegelep ku te ebpengeningeni mekeatag te sikiyu.² Su kiyug ku ne ebmeilut ke hinawa niyu te kedsarig ki Hisu Kristu wey egkeseveka ke itungan niyu atag te kebpelimumuey. Su embiya ini se ed-ul-ulaan niyu ne egkesebutan niyu nevenar ne kenà duwaruwa se hinawa niyu rut te benar ne nesebutan niyu mekeatag ki Hisu Kristu, ini se behu en ne impayag te Eleteala.³ Su ruen diyà te ki Hisu Kristu ke itungan wey langun ne ketampas te Eleteala, tembù be sikandin dà se ebpekepesabut te ini diyà te menge etew.

⁴ Egkehiyen ku ini keniyu su apey kew kenà egkeekalan dut te metau ne ebpenurù te kenà metidu.⁵ Su misan warà a kenian te keniyu, ne kenian ded ke hinawa ku. Ne nehalew a ketà te nerineg ku ne egkeseveka se itungan niyu wey ebmeilut se kedsarig niyu ki Hisu Kristu.

Insempità ni Pablo ke Etew ne Mevaher se Kebperetiyyaya Rin ki Hisu Kristu ne Ebpekeiring te Kayu ne Ebpekedalid ne Meupiya se Kegueyhuey Rin

⁶ Benar iya ne midserihan niyu si Hisu Kristu ne Kerenan niyu, ketà be ne ul-ulaa niyu ke dait te etew ne mibpekidseveka kandin.⁷ Embyia tidtu se sarig niyu kandin ne iyan pegingawà se ebpekeiring ka te kayu ne ebpekedalid en ne meupiya se kegueyhuey rin. Tentenuri niyu ke impesabut keniyu mekeatag kandin su apey ebpekedalid ke kedsarig niyu ne ed-iseg te meupiya. Ne layun kew peselamat te Eleteala dut te langun ne ibehey rin keniyu.

⁸ Pemiyapiya kew ve rut te menge etew ne ebpekehuyud te inesa niyu te ebpemineg dut te lalag dan ne engkungkun ne meralem su apey kew egkeekali wey apey kew ebperumaruma kandan. Ugaid ne warà pantag dut te menge lalag dan su iyan dan dà ebpenurù ke betasan te menge keep-epuan dan ne riyà dà ebpuun te itungan dut te menge etew rà dè duen, su ini se ibpenurù dan ne kenà riyà ebpuun te ki Hisu Kristu.⁹ Ketà te mibpebaluy ne etew si Hisu Kristu ne kayi red

te kandin ke langun ne riyà te Eleteala. ¹⁰ Tembù be ke gehem ni Hisu Kristu se muna pà dut te langun ne mekegegehem ne ebayàbayà, ne sikandin se mepurù dut te langun ne mekegegehem. Ne sikiyu ne mibperetiyaya kandin, ne warà kurang niyu su ruen keykew dut te langun ne riyà te kandin sabap dut te mibpekidseveka kew kandin.

¹¹ Ruen betasan te menge Hudiyanan ne ebpemeetus dan su tuus te sikandan ne menge etew te Eleteala. Ugaid ne ke tuus ne midulaula ni Hisu Kristu kayi te keytew te mibperetiyaya kiyu kandin ne impeliyu kiyu nikandin dut te ebpengunguripen keytew ne meraat ne pegitungan tew. ¹² Su ketà te kinepebunyag tew ne iring te nekeruma kiyu ki Hisus te minatey wey inleveng. Ne ketà maa se kinehemew tew en kayi te wayig ne iring maan arà te nekeruma kiyu ki Hisus te neuyag te behu ne umur su sabap dut te kedsarig tew te gehem te Eleteala ne iyan mibanew ki Hisu Kristu dut te minatey.

¹³ Su pehaney ne iring kew te minatey riyà te etuvangan te Eleteala su warà kew pàmekelyu dut te salà niyu wey warà netuenan niyu mekeatag te impasad te Eleteala su kenà kew ma Hudiyanan. Ugaid ne gunteani ne nevehayan kew en te Eleteala te behu ne umur iring ki Hisu Kristu, su sabap dut te kedsarig tew kandin ne pinesahad kiyu en dut te langun ne salà tew. ¹⁴ Pehaney ne ruen penduan te Eleteala ne ebperumaan din keytew, ugaid ne geina te nekerimpas kiyu ketà te insuhù din ne arà be imbe se ked-isuhata te Eleteala keytew te kewagib. Ugaid ne gunteani ne in-awà en te Eleteala ke ked-isuhat din keytew te menge mibperetiyaya su sabap dut te kinepatey ni Hisus ketà te pinebelavag ne kayu. ¹⁵ Ne sabap dut te kinepatey rin ne midtalew rin si Setanas wey ke menge edsugsuhuen din, ketà ne impekita ni Hisus te in-awà din ke ketehel dan su midtalew rin sikandan diyà te etuvangan te langun.

¹⁶ Na tembù be arà, kenà kew pemineg te idsawey ran keniyu te kenà kew eduma te edtanud te merakel ne liiyen mekeatag te egkeenen wey inumen wey ke ebperumaan kew nikandan te edtanud te menge hewii ne edtenuran dan mekeatag te behu ne sevang wey menge hewii ne edtenuran dan te ebpengervuran wey hewii ne edtenuran dan te idimeley ran. ¹⁷ Su langun kayi ne upama ke impenurù dengan mekeatag te engkey se ebpekeuma. Ne si Hisu Kristu ne ke ketumanan dan ne nekeuma en, tembù be eduma kiyu kandin. ¹⁸ Kenà kew egkeekali dut te menge etew ne egkahi te warà pantag niyu ne kenà niyu dait se edtuney ebpengeningi riyà te Eleteala ne kayi kew rà tawag te menge suluhuen su apey sikandan kun se ed-ewit dut te ebuyuen niyu diyà te Eleteala. Egkehiyen dan ne impeseilew te Eleteala kandan ini se penurù dan, ugaid ne kenà kew ebpehibenar su ini ne menge etew ne menge mepereyù su iyan dan ibpenurù ne kayi rà dè duen te itungan dan ne kenà egenat te Eleteala. ¹⁹ Su ke etew ne iring ketà ne kenà en eduma ki Hisu Kristu ne iyan tew ulu te langun tew ne mibperetiyaya kandin ne sikitew ne iring te lawa rin. Ne si Hisus ke ulu ne ebehey te lawa te langun ne kebpekepeiseg din ibpepevayà te uhat wey keseg din apey ebmetua iring te kiyug te Eleteala ne ebpetemanan kenitew.

*Ne Sikitew ne Tidtu ne Mibperetiyaya ki Hisus ne Iring te Nekeunung
ki Kandin te Kinepatey rin wey Neuyag ki rema te Kinekeuyag din*

²⁰ Na sikiyu ne mibperetiyyaya ki Hisus ne iring te nekeunung kew te kinepatey rin. Ne arà be se impeliyu kew rut te betasan te menge etew ne edtanud te suhù te menge ruma ta ne kenà egkekita. Ne meambe ke ebpemineg kew lavew te liiyen dan ne egkahi te, ²¹ “Pemelii ne egewaran ini, ne pemelii ne egkeenen arà.”? ²² Ayan ne pemelii ne mibèbeelan dà te etew. Su iyan benar, ne upama ke egkeenen wey inumen ne warà atag te liiyen. Su imbehey te Eleteala ne ibpekaan wey ibpeinum din kenitew ne embiya egkeamin en ne warè en. ²³ Kayi te itungan te menge etew ne edtanud te liiyen ne ruen keupianan dan. Su egkahi ran te dait ne igkerupet te lawa ran se edtumana ran te liiyen wey ibpeembavà dan te hinawa ran ne tuus te ebpengarap dan te suluhuen te Eleteala. Ugaid ne ini se kedtanud dan te liiyen ne kenà ini se ebpeketavang kandan te ed-eren te kiyug dan te kememenuisyai.

3

¹ Na ketà te neuyag ded si Hisu Kristu, ne sikitew se mibperetiyyaya kandin ne nekeamung en dema su duen en behu ne umur tew. Tembù be iyan tew ibpeuna te itungan tew ke impenehana rin kenitew riyà te langit, su riyà si Hisu Kristu te rapit te egkekewanen te Eleteala se ed-amung te ebayàbayà kandin. ² Ne arà be imbe se riyà tew rà te langit ke igkenuhuni tew, ne kenà kayi te ampew te dunya. ³ Su sikitew ini se mibperetiyyaya ne ebpekeiring te nekeunung ki te kinepatey ni Hisus, ugaid ne neuyag ded ma. Su ruen behu ne umur tew ne warà pà mebpayag ne ebentayan en te Eleteala su atag ki Hisu Kristu. ⁴ Ne si Hisu Kristu se ebehey keytew te behu ne umur, ne ketà te kedlived din kayi ne egkeheram tew rema te raman te keupiya rin su ebpekeruma kiyu kandin.

Ini ne Mekeatag te Daan en ne Mid-ulaula tew te warà ki pà Mebperetiyyaya wey ke Behu ne Ed-ul-ulaan tew guntaan te Mibperetiyyaya ki en

⁵ Tembù be engked kew se ed-ulaula te meraat ne ke daan en ne ulaula te menge etew kayi te ampew te dunya iring dut te kebpengingniyug wey langun ne meredsik ne ulaula ne igkesuat te menuisyà. Ne engkeri niyu ne betasan ayan se kegkeima, su embiya kenà niyu ed-engkeran ne ke kearen ne igkesuati niyu ne arà se egkevaluy ne kerenan niyu. ⁶ Ini ve imbe ne menge ulaula se kedisuhat te kedusa te Eleteala rut te menge etew ne ed-ulaula ketà. ⁷ Ne sikiyu te warà kew pà mebperetiyyaya ne neked-ulaula kew red dema te ini ne menge ulaula.

⁸ Na ini te mibperetiyyaya kew en, ne engkeri niyu en ayan ne menge ulaula. Kenà kew egkeepes, kenà kew egkererengiti, wey iawà niyu te itungan niyu se kebpemekaid te ruma niyu. Engked kew se edlivak te ruma niyu, ne kenà kew egkahikahi te misan engkey en ne temperasà. ⁹ Kenà kew ebpetetarù su ke daan ne ulaula niyu ne mid-ewaan niyu en, ¹⁰ ne neketelimà kew en te behu ne itungan ne imbehey te Eleteala keykew. Ne arà be imbe se ked-um-umani te Eleteala su apey ki ebpekesabut mekeatag kandin wey apey ki egkevaluy ne iring kandin. ¹¹ Ke langun tew ne mibperetiyyaya ne warà biraan din diyà te etuvangan te Eleteala, Hudiyanan sikandin etawa kenà Hudiyanan, neetusan sikandin etawa warà, nekepengadì sikandin etawa warà

nekepengadi, uripen sikandin etawa kenà uripen. Su langun tew ne mibperetiyaya ki Hisu Kristu ne mibpekidseveka kiyu kandin, ne sikandin se ed-upbà kayi te keytew.

¹² Sikiyu ke menge mibpemili te Eleteala ne nevaluy ne menge sakup din ne igkelimù din nevenar, tembù be iyan niyu ul-ulaa ke ebpekesuhat kandin. Pekita kew te kegkeyru niyu diyà te menge ruma niyu, ne peketulanged kew kandan. Ne kenà niyu ibpeuna ke hinawa niyu, ugaid ne ipeembavà niyu ke hinawa niyu rut te menge ruma niyu apey ran egkekita se keamuk niyu wey keditigker niyu. ¹³ Kenà kew melemu rà ne egkeepes te ruma niyu misan ruen ibpuun niyu kandan, ugaid ne pesehara niyu. Iring ki Hisus te kenà din en ebbenunduhen ke salà tew, ne iring kew red dema ketà. ¹⁴ Wey ke kerekdekelan din ne ed-ul-ulaaan niyu ne ke kebpelimlimuey niyu, su ini se kebpelimlimuey niyu se ebpekevagkes kenyi te kegkeseveka te hinawa niyu. ¹⁵ Ne iyan niyu ebpeveyveyaan te hinawa niyu ne ke kerinew ne itungan ne riyà ebpuun te ki Hisu Kristu su apey kew egkevagkesbagkes. Su arà ke kiyug te Eleteala ne mibpekidseveka kenitew ne menge mibperetiyaya ki Hisu Kristu su iring kiyu te lawa rin. Wey kenà kiyu edlipat ne ebpeselamat kandin. ¹⁶ Itahù niyu nevenar te hinawa ke langun ne nerineg niyu ne impenurù ni Hisus apey niyu egkeherami ke engkey se keupiya rin, ne ini se nehuruwan niyu ketà ne ipenurù niyu wey ibpesabut niyu rut te menge ruma niyu. Pemeyveyuka niyu ke keupiya te Eleteala kayi te iringà niyu apey kew ebpeketavang te ruma ne etew, ne peselamat kew ve te Eleteala kayi te iringà niyu egenat dut te dekelà ne hinawa niyu. ¹⁷ Ne ke langun ne ed-ul-ulaaan niyu, kayi te lalag niyu etawa gelevek niyu, ne tentenuri niyu te sakup kew ni Hisu Kristu ke Kerenan tew. Ne deyrey kew te Eleteala ke Amey tew ibpepevayà ki Hisu Kristu.

¹⁸ Sikiyu ne menge meritan, edati niyu ke esawa niyu su ini ke dait ne ulaula te sikiyu ne mibperetiyaya. ¹⁹ Sikiyu rema ne menge meama, igkelimù niyu ke esawa niyu, ne kenà niyu ed-ey-eyuwa sikandan.

²⁰ Sikiyu ne menge anak, perumaruma kew te langun ne suhù te menge lukes niyu su ini se ebpekesuhat te hinawa te Eleteala. ²¹ Sikiyu rema ne menge lukes, kenà niyu ebpengunuti se ked-ehet niyu te menge anak niyu, su kema ke edereha ke hinawa ran.

²² Ne sikiyu ne menge sugsuhuen, perumaruma kew rut te langun ne lalag dut te edsuhùsuhù kenyi. Kenà wey kew rà ed-upiya te helevék niyu ke ebentayan kew pà su apey kew egkereyù nikandan, ugaid ne ipehenat niyu kayi te hinawa niyu su ini se dait ne ulaula dut te etew ne eduma te Eleteala. ²³ Ketà be ne misan engkey se egeleveken niyu, ne upiani niyu iring te ke Eleteala se edsuhùsuhù kenyi ne kenà etew rà. ²⁴ Tentenuri niyu te ruen idlalew te Kerenan tew kenyi ketà te mid-ulaula niyu, su si Hisu Kristu ke tidtu ne edsuhùsuhù kenyi ne sikandin se ebehey kenyi dut te impenehana rin. ²⁵ Ne piya engkey ne ed-ulaula te meraat, ne egkesabpet din ded su riyà te Eleteala ne warà ibpeuna rin dut te kegkukum din te menge etew.

4

¹ Na sikiyu ne menge etew ne ruen sugsuhuen, ne up-upiani niyu wey peketidtu kew te kebpeneheewit niyu kandan. Su tentenuri niyu

te ruen ded dema mepurù niyu riyà te langit.

Ruma pà ne Pemandù ni Pablo ne Ebperumaan Din

² Na layun niyu ibpelevundus ke kebpengeningeni niyu ne kenà kayi rà te bëbà niyu su egenat imbe te hinawa niyu, ne kenà kew lipat se ebpeselamat te Eleteala. ³ Kenà kew rema lipat se ebpengeningeni kenami su apey key ebehayi te Eleteala te ralan te kebpsesabut dut te tudtul ne warà pà mepayahi dengan mekeatag ki Hisu Kristu. Su tembù be imbe ini a te bilengguan su atag te kebpemesabut ku dut te tudtul. ⁴ Ne pemuyù kew rema te Eleteala se egketevangan a su apey ini se kebpenurù ku ne melemu ne egkesebutan.

⁵ Na up-upiya kew te ulaula niyu keniyan te menge etew ne warà pà mibperetiyyaya ki Hisus, kenà kew alang-alang se ebpmenumdutl kandan dut te Meupiya ne Tudtul. ⁶ Pegpegitunga niyu kayi te lalag niyu su apey ed-iseg ke inesa ran te ebpmineg. Ne pegpegitunga niyu rema ke engkey se idtavak niyu ke ruen id-insà dan mekeatag te keniyo ne peretiyyaya.

Ke Ketepusan te Surat ini ni Pablo

⁷ Si Tikikus ini se edsuhuen ku keniyan te keniyo ne idtarem din keniyo ke tudtul mekeatag kedì. Suled tew sikandin ne igkelimù ku, ne ruma rey kayi te kebpsesabut te lalag te Eleteala, ne benunuyen sikandin te helevek din. ⁸ Iyan ku kedsuhua kandin ne apey niyu egketueni ke egketemtemanan dey kayi ne ebmeluag ke hinawa niyu. ⁹ Si Unisimus ke senge etew ne ruma niyu keniyan te inged niyu se eduma kandin. Suled tew sikandin te ebperetiyyaya ne igkelimù dey, ne benunuyen sikandin dema. Sikandan ini deruwa ne edtarem keniyo ke engkey se egked-ulaula rey kayi.

¹⁰ Si Aristarkus ini se ruma ku kayi te bilengguan ne ebpenginginsà ke memenu red se egketemanaan niyu keniyan. Wey elin dema si Marcos ini, ke suled ni Bernabe. (Embiya ebpekeuma sikandin keniyan te keniyo ne gelhelawa niyu sikandin su arà ke ingkahi ku keniyo.) ¹¹ Si Josue ini se ed-ingaranan dema ki Jestsis ne ebpenginginsà dema keniyo. Kayi te langun ne Hudiyanen ne mibperetiyyaya kayi ne ini rà se tetelu, si Aristarkus, si Marcos, wey si Josue se midtavang kedì te ebpesabut mekeatag te Edetuan te Eleteala. Ne nehalew se hinawa ku kayi te dekelà ne tavang dan.

¹² Si Ipapras ini ne senge etew ne ruma niyu red keniyan te inged niyu ne ebpenginginsà dema mekeatag te sikiyu. Sugsuhuen dema sikandin ni Hisu Kristu ne layun ebpengeningeni te mevaher mekeatag keniyo. Ebpemuyuen din te Eleteala se ebmeilut ke sarig niyu kandin ne igkehat niyu te tivang se keditindeg niyu embiya ruen ebpesuwey keniyo su apey warà duma ne ed-ul-ulaan niyu su ke kiyug dà te Eleteala. ¹³ Nekita ku se mibpegelep nevenar si Ipapras se edtavang keniyo wey ke menge etew riya te Liyudisiya wey Hirapulis. ¹⁴ Si Lucas, ini se dukturne igkelimù dey langun, wey si Demas se ebpenginginsà mekeatag keniyo.

¹⁵ Peketueni niyu rà dut te menge suled tew te ebperetiyyaya riyà te Liyudusiya te ebpenginginsà a rema kandan. Wey riyà dema te ki Nimpa abpeg ke menge mibperetiyyaya ne egkevurun ketà te valey rin.

¹⁶ Embiya egkepasad niyu en te ebasa ini se surat ku ne ipelaus niyu rà diyà te inged ne Liyudisiyu su apey ran egkevasa dut te ebpengervuranan te menge mibperetiyaya riyà. Ne engketà ded dema arà se surat ku riyà te kandan ne ibpeewit dan keniyu, ne besaa niyu rema keniyan te inged niyu. ¹⁷ Ne kehiyi niyu pè be si Arkipus te mebpegelep sikandin se ed-ipus dut te helevek ne impehelevek te Eleteala kandin.

¹⁸ Ne siaken imbe ini si Pablo se edsurat dut te ngaran ku kayi te ketepusan, ne ebpenginginsà a dut te langun ne sikiyu. Na kenà niyu lipati se ini a te bilengguan.

Iyan ku kiyug ne egkeheram niyu ke tavang ne riyà ebpuun te Eleteala.

Arà dà taman.
Pablo

Ke Neuna ne Surat ni Pablo Riyà te Menge Etew te Inged ne Tiselunika

¹ Siaken ne edsurat ini ne si Pablo duma ni Silvanu wey si Timoteo. Ne idsurat dey ini diyà te keniyu te inged ne Tiselunika ne mibperetiyyaya te Eleteala ke Amey tew wey ki Hisu Kristu ke Kerenan tew.

Iyan dey kiyug ne egkeheram niyu ke tavang wey kebmelinew te itungan niyu ne riyà ebpuun te Eleteala.

² Su sikami, ne layun dey ebpeselemati diyà te Eleteala mekeatag te langun niyu wey layun dey idragkes sikiyu te kebpengeningeni rey. ³ Su uman key ebpengeningeni mekeatag keniyu diyà te Amey tew ne egketenuran dey ke meupiya ne ed-ul-ulaan niyu su tuus te mibperetiyyaya kew iya ki Hisu Kristu. Ne egketenuran dey rema ke dekelà ne limù niyu kandin ne egkekita te meilut se gelevek niyu kandin. Ne kenà dey egkelipatan ke keditgker niyu te keresayan su dekelà ne ebpenerengen niyu ne edlived si Hisu Kristu ke Kerenan tew kayi te ampew te dunya.

⁴ Netuenan dey, menge suled, ne ingkelimù kew te Eleteala su sikandin se mibpemili keniyu ne egkevaluy ne menge etew rin.

⁵ Netuenan dey ini su ke kebpemesabut dey dut te Meupiya ne Tudtul riyà te keniyu ne kenà kayi te lalag dey rà, ugaid ne midumaan dut te gehem te Kedesenan ne Ebpetuntul te Menusiyà. Ne neheram niyu ini, tembù be mibperetiyyaya kew rut te kebpemesabut dey. Ne nekita niyu rema ke meupiya ne betasan dey te riyà key med-ubpà te keniyu su langun ne mid-ulaula rey ne ke keupianan niyu. ⁶ Ñe sikami se mid-iringan niyu wey ke Kerenan tew ne si Hisu Kristu. Ne miduma kew rut te insuhù ne Lalag te Eleteala misan mibpekesekitan kew, su nengehalew kew egenat dut te Kedesenan ne Ebpetuntul te Menusiyà.

⁷ Tembù be sikiyu se nevaluy ne egkeiringan dut te mibperetiyyaya diyà te inged ne Mesidunya wey Gerisiya. ⁸ Su ibpepevayà te kebperetiyyaya niyu ne nekeeneb en ke Lalag te Eleteala diyà te menge etew te inged ne Mesidunya wey Gerisiya. Ne kenà riyà dà te kandan su medmerakel pà ne menge inged se nekerineg dut te kebperetiyyaya niyu te Eleteala.

Tembù be misan kenà dey en ibpenudtul, ne netuenan dan en. ⁹ Su sikandan en se ebpemenudtul mekeatag te kegalàhalà niyu kenami ketà te kebpekeuma rey kenyan te keniyu. Ne ebpemenudtul dan mekeatag dut te kebpekeengked niyu te ebpengarap te ledawan dà ne kenà tidtu ne Eleteala su apey kew ebpengarap dut te tidtu ne Eleteala ne warà kemetayen din. ¹⁰ Ne ebpemenudtul dan dema mekeatag dut te kebpenareng niyu te kedlived te Anak din ne si Hisu Kristu ne egenat diyà te langit. Su si Hisus ini ke mibanew rin, ne sikandin ke ebpeliyu keyta su apey kenà kiyu edusaan te Eleteala ketà te hewii ne egkukumen din en ke kelibutan.

2

Ini ne Mekeatag te Helevek ni Pablo Riyà te Inged ne Tiselunika

¹ Menge suled, netuenan niyu te kinepengkeniyan dey te keniyu ne neketavang keniyu su nevaluy ne keupianan niyu. ² Ne netuenan niyu rema ke egketemanan dey diyà te inged ne Pilipus te warà key pà mekepengkeniyan te keniyu, su mibpekesekitan key nikandan wey mibpegkeyà key. Ugaid ne misan iring ketà ne ke Eleteala se midtavang kenami, su mibag-et din ke hinawa rey te ebpengkeniyan ne ebpesabut keniyu dut te Meupiya ne Tudtul ne riyà ebpuun te kandin. ³ Su ini se impesabut dey keniyu ne kenà egenat te tarù etawa iyan dey lakew se meraat, ne kenà dema ralan te ked-akal dey keniyu su impesabut dey ke benar ne penurù. ⁴ Su ini se impesabut dey keniyu ne iyan insuhù kenami te Eleteala, su sikandin se mibpemili kenami ne insarig din kenami te ebpmesabut dut te Meupiya ne Tudtul mekeatag ki Hisus. Tembù be ini se impemesabut dey su apey ebpekesuhat te hinawa te Eleteala ne kenà ke menge etew rà. Ne netuenan te Eleteala ne benar ini su netuenan din ke engkey se kayi te hinawa tew. ⁵ Netuenan niyu ne metidtu se kedlag dey keniyu ne kenà dey midigdig dà sikiyu su apey niyu edumai ke ebuyuen dey, ne kenà ki engkungkun ne meupiya su apey ruen egkekuwa rey. Netuenan te Eleteala te benar ini. ⁶ Kenà ke kedeyua niyu kenami etawa ke kedeyù te ruma ne etew se mibpemengà dey, ⁷ misan sikami ke kedserihan ni Hisu Kristu ne dait ne edeyuen niyu. Warà dey ul-ulaa se iring ketà, ugaid ne midtuganur dey sikiyu iring te metulanged ne iney ne edtuganur te menge anak din. ⁸ Ne geina te dekelà se limù dey keniyu ne kenà ke Meupiya ne Tudtul rà ne egenat te Eleteala se impesabut dey, su nepenehana rey te ebpatey su apey niyu egketueni mekeatag te Eleteala. Su dekelà dey sikiyu te hinawa rey. ⁹ Ne egketenuran niyu red buwa, menge suled, ke ralan te kebpementiyari rey su merukilem meandew ne migelevek key su apey warà keniyu ebpekevayad te kegkeuyag dey te kebpemesabut dey te Meupiya ne Tudtul ne riyà egenat te Eleteala.

¹⁰ Su ketà te riyà key pà te keniyu ne netuenan niyu wey ke Eleteala rema ne netuenan din te meupiya se ed-ul-ulaaan dey keniyu ne menge mibperetiyaya. Warà igkesawey te ed-ul-ulaaan dey su mid-ulaula rey ke ebpekesuhat te hinawa te Eleteala. ¹¹ Ne netuenan niyu te uman seveka keniyu ne midtevangan dey iring dut te amey ne edtavang te menge anak din. ¹² Su mibag-et dey ke itungan niyu, ne midlangan dey ke hinawa niyu wey mibpenurù key te ed-ul-ulaaan niyu ke engkey se ebpekesuhat te hinawa te Eleteala. Su nepemili kew nikandin su apey kew mekeamung dut te Edetuan din wey ke kedeyua kandin.

¹³ Ne egkehiyen ku maa te layun dey ebpelemedi te Eleteala te midtelimà kew te Lalag din. Su ketà te kebpesabut ku kayi riyà te keniyu ne warà niyu kehiya te lalag ini ne mibèbeelan dà te etew, ugaid ne mibpemineg kew ne midtelimà kew te ini ne Lalag iya te Eleteala. Su ini se Lalag din, ne ruen gehem din te edtavang te menge mibperetiyaya su apey ran ed-ul-ulaa ke engkey se metidtu. ¹⁴ Ne ini se netemanan niyu, menge suled, ne nekeiring dut te netemanan te menge etew te Eleteala ne mibperetiyaya ki Hisu Kristu diyà te menge inged te Hudiya. Su mibpekesekitan kew rut te menge ruma niyu te inged iring dut te kebpekesekiti kandan dut te menge ruma ran ne Hudiyanen ketà te inged ¹⁵ ne iyan mid-imatey ki Hisus ke Kerenan tew wey ke menge mibpelambas te Lalag te Eleteala rengan,

wey mibpekesakit keyta. Tembù be neumanan ke keepes te Eleteala kandan! Egkunteraan dan te langun ne menge etew! ¹⁶ Su ibpeengked dan perem ke kebpemesabut dey te Meupiya ne Tudtul mekeatag ki Hisus dut te menge etew ne kenà Hudiyanan su apey egkepeneheewit dan te kebpekeliyu ran. Tembù be mid-umanan ke salà dan taman te neuma ke edtemenan din. Ne nekeuma en ke epes te Eleteala kandan!

Ini ne Mekeatag te Kegkelimengawi ni Pablo dut te Menge Mibperetiyyaya diyà te Inged ne Tiselunika

¹⁷ Menge suled, misan warà pà meuhet ke kineawà dey keniyan te keniyu ne egkelimengawan key nevenar keniyu. Ugaid ne misan warà key en keniyan, ne kayi kew red lavew te itungan dey. Ne egkiyuhan dey nevenar te ebpemekebalak kiyu maa. ¹⁸ Su egkiyug key ne ebpengkeniyan te keniyu, ne siaken embe iya si Pablo se egkiyug nevenar. Merakel en ne hewii ne ebpengkeniyan a perem, ugaid nevangen key dut te datù te pekaid. ¹⁹ Benar ini, su ke kebperetiyyaya niyu rut te Lalag te Eleteala ne impesabut dey se inlalew kenami wey ibmehalew rey. Ne sikiyu iyan se kenà dey igkeyeyai, ugaid ne idantal dey mekeatag te kebperetiyyaya niyu diyà te etuvangan te Kerenan tew ne si Hisus ketà te hewii ne kedlived din kayi. ²⁰ Uya, sikiyu se puunan te idantal dey mekeatag keniyu wey sikiyu se igkehalew rey.

3

¹ Ketà te kenà dey en egketigkeran ke kegkelimengawi rey keniyu, ne netahù te itungan dey te ebpelintetahak key diyà te inged ne Etenas ² ne ibpepengkeniyan dey te keniyu si Timoteo ne suled tew ne sugsuhuen te Eleteala ne edtavang kenami te kebpemesabut dut te Meupiya ne Tudtul mekeatag ki Hisu Kristu. Su midsuhù dey sikandin te ebag-et te hinawa niyu wey ebpeiseg dut te kebperetiyyaya niyu, ³ su apey warà keniyu ne ed-engked dut te kebperetiyyaya sabap dut te kebpekesekiti keniyu ketà te inged. Su netuenan niyu en te ruen kebpekesekiti keyta ne idtuhut te Eleteala ne ebpekeuma kayi te keyta. ⁴ Su gewii te keniyan key pà te keniyu ne impemenudtul dey neraan te ruen kebpekesekiti keyta, ne netuenan niyu te benar su ned-ulaula en ini. ⁵ Tembù be ketà te nerineg ku mekeatag te kebpekesekiti keniyu ne warà a meketigker, ne impepengkeniyan ku si Timoteo su apey ku metueni mekeatag dut te kebperetiyyaya niyu. Su neuru ad su kalu ke negaga kew en rut te penggeram ni Setanas ke datù te pekaid, ne ketà ne ke helevek dey te ebpemesabut te Lalag te Eleteala ne warà atag din.

⁶ Na guntaani ne mid-ulì en si Timoteo se ed-ewit te meupiya ne tudtul mekeatag keniyu. Su impenudtul din te mid-iseg pà ke kebperetiyyaya niyu wey engketà ded dema ke kedlimù niyu dut te menge ruma niyu. Ne impenudtul din ded te layun niyu red egketenuri te sikami ne egkiyuhan niyu te ebpekibalak, iring te sikami rema ne egkiyuhan dey ne ebpemekegkita kiyu. ⁷ Tembù be, menge suled, beleharen te nerasey key wey mibpekesekitan key, su nevag-et se hinawa rey ketà te nerineg dey te mid-iseg se kebperetiyyaya niyu. ⁸ Su guntaani ne iring key te midluungan te melihet ne kumbalà su netuenan dey te meilut pà ke kebperetiyyaya niyu ki Hisu Kristu ke Kerenan tew. ⁹ Kenà dey egketuenan ke edlelahen dey te dekelà ne

kebpeselemati rey te Eleteala mekeatag keniyu, su ke igkehalew rey ne ebpuun kandin ne rekdekelà su atag dut te meilut ne kebperetiyyaya niyu.¹⁰ Ne merukilem meandew ne layun key ebpengeningeni te ebpmemekebalak kiyu, su apey rey ed-umani embiya ruen kurang dut te kebperetiyyaya niyu.

¹¹ Ne guntaani ne ibpengeningeni rey te Eleteala ne Amey tew wey ki Hisu Kristu ne Kerenan tew te ebpenehana te ralan te kebpengkeniyan dey te keniyu.¹² Ne ibpengeningeni rey lavew te Eleteala ne ed-umanan din pà ke kebpelimlimuey niyu wey ke limù niyu te piya engkey ne etew iring dut te kerekelà te limù dey keniyu.¹³ Su embiya iring ketà se limù niyu, ne ebeheren din ke hinawa niyu su apey niyu ed-ul-ulaa ke engkey se ebpekesuhat te hinawa dut te Amey tew ne Eleteala. Ne ketà ne ebmetilak kew riyawà te etuvangan din su apey warà idsawey rin keniyu dut te hewii ne edlived si Hisu Kristu ne Kerenan tew ne edumaan dut te langun ne menge etew rin.

4

Ini ne Mekeatag dut te Menge Ulaula ne Ebpekesuhat te Hinawa te Eleteala

¹ Na menge suled, ketà te kenian key pà te keniyu ne impenurù dey en keniyu ke engkey se ulaula te ked-uppà ne ebpekesuhat te hinawa te Eleteala, ne ini ne midumaan niyu en. Ne guntaani ne ebuyuen dey te umani niyu pà ke meupiye ne ulaula niyu su ini se migkahi keyta rut te Kerenan tew ne si Hisu Kristu.² Su netuenan niyu te iyan dey impenurù ne arà se impenurù dut te Kerenan tew ne si Hisus.

³ Ne ini se kiyug te Eleteala ne engked kew rut te piya engkey ne ulaula ne meraat wey pekeriyù kew rut te kebpengningnyug.⁴ Sikiyu ne menge meama, ne iyan nu ul-ulaa diyà te esawa nu ke edait diyà te etuvangan te Eleteala wey edait diyà te etuvangan te menge etew.⁵ Su apey ke ulaula niyu ne kenà iring dut te menge etew ne kenà ebperetiyyaya te Eleteala ne iyan ebayàbayà kandan ne ke kiyug te lawa ran.⁶ Tembù be uram kew su apey kew kenà ebpekedsalà diyà te menge rumu niyu su iring kayi ne egkepenggiekan niyu ke kevenar dut te rumu niyu. Su egketenuran niyu red te imbaag dey keniyu te piya engkey ne ed-ulaula te iring ketà ne edusaan dut te Eleteala ne Kerenan tew.⁷ Su ke Eleteala ne kenà din iyan kebpemili keyta ne egkevaluy ki ne menge anak din ne ed-ulaula te meraat, ugaid ne apey ta iyan ed-ul-ulaa ne ke metilak diyà te etuvangan din.⁸ Tembù be ke etew ne kenà eduma te ini ne ibpenurù ku ne kenà penurù te etew se id-engkenà din su iyan din id-engkenà ke penurù te Eleteala ne mibehey keniyu te Kedesenan ne Ebpetuntul te Menusiyà.

⁹ Na mekeatag be dut te kebpelimlimuey niyu te menge rumu niyu ne mibperetiyyaya, ne kenà en dait ne edsurat a pà keniyu su ke Eleteala se mibpenurù keniyu mekeatag te kedlimù niyu.¹⁰ Ne benar ini su kenà ke menge rumu niyu rà kenian te inged niyu, ugaid ne langun ne menge etew te rumu pà ne inged te Mesidunya. Ugaid ne iyan dey ebuyuen, menge suled, ne ed-ilutan niyu pà ke kebpelimlimuey.

¹¹ Ne ruen rumu pà ne ebuyuen ku te iyan niyu itahù te hinawa ne kemeline new ne betasan. Ne kenà kew ed-amung-amung te ulaula te menge rumu niyu, ugaid ne peketehel kew se egelevek su apey ruen

keuyahan niyu iring dut te impenurù dey keniyu. ¹² Su embiya ini se ed-ul-ulaan niyu ne kenà kew ebpekevuyù te igkeuyag niyu diyà te menge ruma niyu, ne egkereyù kew rut te menge etew ne warà pà mibperetiyaya.

Ke Kebpenurù Mekeatag dut te Kedlived ni Hisus

¹³ Menge suled, duen pà egkehiyen dey su apey niyu egketueni ke egked-ulaula dut te menge mibperetiyaya ne minatey en. Ibpenudtul dey ini su apey kew kenà egkeuru iring dut te menge etew ne warà ebpenerengen dan ne umur ne warà edtemanan din. ¹⁴ Su sikita ne mibperetiyaya ki te minatey si Hisus, tembù be ebperetiyaya ki te ke menge mibperetiyaya kandin ne minatey en ne ebenawen te Eleteala su apey ran ebpekeruma ki Hisus ketà te kedlived din kayi.

¹⁵ Ini se impenurù dut te Kerenan tew ne si Hisus ne ibpenudtul dey keniyu: embiya kenà ki pà ebpatey dut te hewii te kedlived din kayi, ne kenà sikita se egkeuna te ebalak kandin dut te menge ruma ta ne mibperetiyaya ne minatey en su ebpekeredsà ki. ¹⁶ Su iyan egked-ulaula te arà ne hewii ne ed-umewan dut te Kerenan tew ke menge mibperetiyaya diyà te kandin. Ne egkerineg ta rema ke ked-umew rut te pinekemepurù ne suluhuen te Eleteala wey ke dahing dut te budyung te Eleteala. Ketà ne ebpmemaug si Hisu Kristu ke Kerenan tew ne ebpuun te langit. Dutun ne egkeuna egkevanew ke langun ne mibperetiyaya ne minatey en. ¹⁷ Egkeipus arà ne edtaweheni ni Hisus ke langun ne mibperetiyaya ne warà pà minatey, ne ebpekeruma ran dut te behu pà ne nevanew en diyà te sehulapun su apey ran ebpeketelavuk dut te Kerenan tew diyà te kewkewangan. Ne diyà ki te kandin taman te taman. ¹⁸ Tembù be, ini ne impesabut ku keniyu ne ibpenurù niyu te menge ruma niyu ne mibperetiyaya su apey ran kenà egkeuru.

5

Ini ne Mekeatag te Kebpenehana tew rut te Kedlived ni Hisus Kayi te Ampew te Durya

¹ Menge suled, embiya mekeatag te hewii ne kebpekeuma ni Hisu Kristu su egkukum dut te menge etew, ne kenà en dait ne idsurat ku pà. ² Su netuenan niyu en te egketekew se Hewii te kebpekeuma rut te Kerenan tew iring dut te kebpekeuma te tekawen te merukilem ne kenà egketuenan. ³ Su ketà te hewii te kedlived ni Hisus ne iyan itungan te menge etew ne ebmelinew se ked-ubpà dan ne warà igkeuru ran. Ugaid ne egketekew ne ebpekeuma ke kegkereeti kandan ne warà ralan te kebpekeliyu ran. Su kë kebpekeuma dut te kegkereeti kandan ne iring te egketekew ne ebpekeuma ke belilit te meritan ne ed-anak.

⁴ Ugaid ne sikiyu, menge suled, ne warà kew en med-ubpà diyà te kerusireman iring dut te menge etew ne kenà ebperetiyaya ki Hisus. Tembù be ketà te ebpekeuma arà ne hewii ne kenà niyu en igketekawi iring dut te etew ne warà mebpenehana te kebpekeuma dut te tekawen. ⁵ Su langun te sikita ne mibmerayag en ke itungan ta ne kenà iring dut te merusirem ne itungan te menge etew ne kenà ebperetiyaya ki Hisus. ⁶ Tembù be iyan iya se kenà ki ed-iring dut te menge etew ne edlipereng, ugaid ne ibpelevundus ta ke meupiya

ne ulaula ta wey ebpenehana ki rut te kebpekeuma rin. ⁷ Su iyan dà dait ne idlipereng te menge etew ne merukilem. Ne ketà dema ne nelayaman te menge etew te egkehubug. ⁸ Ugaid ne nekevira en ke sikita ne mibperetiyyaya ki Hisus su mibmerayag en ke itungan ta. Tembù be ed-uram ki su apey ke kedsarig ta ki Hisus wey ke kebpelimlimuey ta ne arà ke iring limbutung ta ne ebpekealang keyta dut te kebpenggeram keyta te datù te pekaid. Ne ke penerengen ta te kebpekelyu ta rut te kedusa te Eleteala ne arà ke iring sepiyu ta ne putew ne ebmelinew ke itungan ta wey ebpekeiseg ke kebperetiyyaya ta. ⁹ Su ke Eleteala ne kenà iyan intahù te itungan din te kebpemili din keyta ne egkevaluy ne menge anak din apey ki edusaan ketà te kegkukum din en te kelibutan. Ugaid ne iyan din intahù te itungan ne ebpekepelyu keyta ibpepevayà te Anak din ne si Hisu Kristu ke Kerenan tew. ¹⁰ Su sikandin se mibpeimatey mekeatag keyta su misan minatey ki en etawa biviyag ki pà te arà ne hewii te kedlived din kayi, ne ed-upbà ki riyà te kandin taman te taman. ¹¹ Na geina te ini se edtaharan ta, ne beg-eta niyu ke hinawa dut te menge ruma niyu wey petebtevangey kew.

Ke Mewri en ne Pemandù ni Pablo Kandan

¹² Ne ini pà se ebuyuen ku keniyu, menge suled, edati niyu ke menge etew ne egelevek keniyan te keniyu ne pekilukesen. Su sikandan se nepemili te Eleteala ne ebpenehewit wey ebpenurù keniyu mekeatag te keduma niyu ki Hisus. ¹³ Ipekita niyu ke limù niyu kandan wey edati niyu su atag dut te helevek dan. Ne ruma pà ne ebuyuen ku ne petultulengerey kew.

¹⁴ Ne ebuyuen ku lavew, menge suled, te suhua niyu ke pehulen ne egelevek. Beg-eta niyu ke hinawa dut te menge etew ne egkeandek, ne tevangi niyu ke menge etew ne melemu ne egkegaga te penggeram dut te datù te pekaid. Ne iyan iya se mananew se kedlalag niyu dut te kedtevangi niyu te menge etew. ¹⁵ Embiya ruen ed-ulaula keniyu te meraat ne kenà kew edsuli kandan, ugaid ne iyan niyu ul-ulaa ke engkey se meupiya diyà te langun ne menge etew.

¹⁶⁻¹⁸ Na geina te mibpekidseveka kew ki Hisu Kristu ne iyan kiyug te Eleteala keniyu ne merukilem meandew ne ruen kegkehalew niyu, ne layun kew ebpengeningeni, ne piya engkey se egketemanan niyu ne peselamat kew te Eleteala.

¹⁹ Ne kenà niyu selelangi ke idsuhù dut te Kedesenan ne Ebpetuntul te Menusiyà, ²⁰ kenà niyu sudii ke egkehiyen dut te menge ebpelambas te Lalag te Eleteala, ²¹ ugaid ne surimana niyu embiya benar ne ebuun ini diyà te Lalag te Eleteala, ne dumai niyu ke langun ne meupiya, ²² ne pekeriyui niyu ke langun ne meraat.

²³ Ne iyan ku kiyug ne ke Eleteala ne ebehey te kebmelintad te hinawa tew, ne menu ma perem ke edtilaken din ke ulaula niyu, ke hinawa niyu wey ke langun ne itungan niyu su apey ketà te kebpekeuma ni Hisu Kristu kayi ne warà igkesawey keniyu su ebmetilak kew riyà te etuvangan din. ²⁴ Ne egkeserihan ke Eleteala ke egketumanan ini su sikandin se mibpemili keyta ne egkevaluy ne menge anak din, ne edtumanen din ini se lalag din.

²⁵ Menge suled, pengeningeni kew rema te Eleteala mekeatag kenami.

²⁶ Ikahi niyu rà diyà te langun ne menge ruma ta ne mibperetiyaya mekeatag dut te limù dey kandan.

²⁷ Ruen suhù ku kenyu, su kedserihan a ni Hisu Kristu, te besaa niyu ini se surat diyà te langun ne menge suled tew keniyan.

²⁸ Iyan dey egkiyuhan ne ebpeneuven kew dut te Kerenan tew ne si Hisu Kristu.

Arà dà taman.
Pablo

Ke Ikeruwa ne Surat ni Pablo Riyà te Menge Etew te Inged ne Tiselunika

¹ Siaken ne edsurat ini ne si Pablo duma ni Silvanu wey si Timoteo. Ne idsurat dey ini keniyan te keniyu te inged ne Tiselunika ne mibperetiyaya te Eleteala ke Amey tew wey si Hisu Kristu ke Kerenan tew.

² Iyan dey kiyug ne egkeheram niyu ke tavang wey kebmelinew te itungan niyu ne riyà ebpuun te Eleteala ne Amey tew wey si Hisu Kristu ke Kerenan tew.

Ini ne Mekeatag te Kegkukum te Eleteala ne Metidtu

³ Menge suled, kenà egkepakey ne kenà key layun ebpeselamat diyà te Eleteala mekeatag keniyu. Ne dait ini se ed-ul-ulaan dey su layun ebpekeiseg ke keilut dut te kebperetiyaya niyu ki Hisus wey ke kebpelimlimuey niyu ne ebpekeiseg lavew. ⁴ Tembù be diyà te langun ne menge kevurunan te menge ruma tew ne mibperetiyaya te Eleteala ne indantal dey ke kegkehalew rey mekeatag keniyu. Uya, indantal dey mekeatag te kebperetiyaya niyu ne mibmeilut misan egkerasey kew dut te kebpekesekiti keniyu.

⁵⁻⁶ Ne ke kadtigker niyu te keresayan ne iring ketà ne arà se egkevaluy kew ne edait te ebpekeamung kew dut te Edetuan te Eleteala, ne edusaan din ini se ebpekesakit keniyu. Ketà be ne egkekita ke metidtu ne kegkukum te Eleteala. ⁷ Su ebpekeuma ke hewii ne ibpeengked te Eleteala ke keresayan ne egkeheram ta guntaani, su ebpeimelayen ki ketà te kedlived ni Hisus kayi ne edumaan dut te mekegehem ne suluhuen din. ⁸ Ketà te kebpekeuma rin ne iring te egkeregreg ne apuy ini se lawa rin. Ne edusaan din ke menge etew ne mid-engkenà te Eleteala, ini se kenà ebperumaruma rut te Meupiya ne Tudtul mekeatag ki Hisu Kristu ke Kerenan tew. ⁹ Ne ke kedusa kandan ne ibpeawa dan dut te etuvangan te Eleteala ne edresayan dan nikandin taman te taman su kenà dan egkekita ke kepuru din ne warà ebpekerekrepeng. ¹⁰ Ini ne egked-ulaula ketà te kedlived ni Hisu Kristu kayi te ampew te dunya, su arà ne hewii ne langun ne menge mibperetiyaya ki Hisus ne edeyù wey ed-adat kandin. Ne ebpekeamung kew su midumaan niyu ke impenurù dey.

¹¹ Tembù be layun dey ibpengeningeni sikiyu diyà te Eleteala su apey ke ulaula niyu te keduma ki Hisu Kristu ne edait dut te menge etew ne mibpemili te Eleteala. Ne ebpengeningeni key rema te ibpepevayà rut te gehem te Eleteala ne edtevangan kew su apey ebpekegaga kew te edtuman te misan engkey en ne meupiya ne ulaula ne egkiyuhan niyu wey langun ne ed-ul-ulaan ne nerudsuan niyu mekeatag dut te kebperetiyaya niyu ki Hisus. ¹² Iyan dey kebpengeningeni te iring ketà su apey si Hisu Kristu ke Kerenan tew se edeyuen su ke meupiya ne ed-ul-ulaan niyu, abpeg te sikiyu ne igkeamung kandin te ed-edatan sabap te sikiyu ne sakup din. Egked-ulaula ini su atag dut te penaub keyta ne kenà egkerekrepeng ne impekita keyta dut te Eleteala tew wey ke Kerenan tew ne si Hisu Kristu.

2

Ini ne Mekeatag te Engkey se Egked-ulaula te Kenà pà Edlived si Hisus

¹ Na menge suled, duen ebpesebutan dey kenyi mekeatag te kedlived dut te Kerenan tew ne si Hisu Kristu wey mekeatag dut te keburun din keyta te menge mibperetiyyaya su apey ed-ubpà ki riyà te kandin taman te taman. ² Iyan dey ebuyuen ne kenà kew metekawi dut te tudtul ne egkerineg niyu te nekeuma en kun ke Hewii te Kedlived dut te Kerenan tew. Kenà metarin se itungan niyu ketà te tarù misan ibpekahi kun kandin dut te Kedesenan ne Ebpetuntul te Menusiyà, etawa ruen ebpenurù kenyi te ini, etawa ruen egkahi te ruen surat kun ne kayi ebpuun te kenami ne egkahi ketà. ³ Uram kew su apey kew kenà egkelimbungi su kenà pà ebpekeuma arà ne hewii te warà pà med-ulaula ini se mevaher ne kegkunterà te menge etew dut te Eleteala, ne arà ded ne hewii ne edlepew ke etew ne nepenù te meraat. Ketà te kedlepew rin ne egkunteraan din ke langun ne meupiya ne egkiyuhan te Eleteala. Ne sikandin se edereetan te Eleteala riyà te apuy ne rakà. ⁴ Ini se etew ne ketà te kedlepew rin ne igkeepes din ke Eleteala wey langun ne sakup te Eleteala wey misan engkey ne ed-erapen dut te menge etew te Eleteala. Su egkahi te sikandin ne iyan pà mepurù dut te langun ne ed-erapen. Ne misan diyà te Nekebpuu ne Valey te Eleteala riyà te Hirusalim ne eppinuu ketà ne egkahi te sikandin kun ke tidtu ne Eleteala.

⁵ Warà niyu pà buwa melipati te migkahi ku ini langun te keniyan e pà te kenyi. ⁶ Ne netuenan niyu te meambe ke warà pà med-ulaula ini, su ruen ed-eren te arà ne etew ne nepenù te meraat. Tembù be kenà pà edlepew sikandin te warà pà mekeuma ke hewii ne intendù te kedlepew rin. ⁷ Ugaid ne misan warà pà medlepew arà se igkeepes te Eleteala, ne ebpenitip en ke gehem din kayi te kelibutan su edlimbungan din ke menge etew. Ugaid ne kenà edlepew sikandin taman te kenà ed-awà ini se ed-eren kandin. ⁸ Na ketà te ed-awà en ke ed-eren kandin, ne edlepew en arà se etew ne nepenù te meraat. Ugaid ne embiya ebpekeuma en ke Kerenan tew ne si Hisus, ne edereetan din arà se etew dut te kebpekita rin te kepuru din, su ke hinawa rin se ibpeimatey rin. ⁹⁻¹⁰ Ne ketà te kebpekeuma te arà se etew ne nepenù te meraat ne ruen gehem din ne egenat dut te datù te pekaid ne si Setanas, tembù be metau sikandin ne edlimbung su ebpekeaval te menge ulaula ne mekegeyip su apey egkelimbungi ke menge etew. Ne ini se melemu ne egkelimbungan ne sikandan ke kenà eduma dut te benar ne penurù mekeatag te Eleteala. Su embiya mibperetiyyaya ran ne ebpekeliyu ran ugaid ne kenà dan ebperetiyyaya, tembù be edusaan sikandan. ¹¹ Ne geina te ed-engkenà dan dut te benar, ne idtuhut te Eleteala kandan te egkelimbungan su apey ran mebperetiyyaya dut te kenà benar. ¹² Tembù be egkukumen te edusaan dan su kenà dan ebperetiyyaya te benar, su iyan dan egkiyuhan ne ebayàbayà kandan ne ke meraat.

Ini ne Mekeatag te Kegawed ta te Meilut dut te Benar ne Penurù

¹³ Ugaid ne sikiyu, menge suled ne igkelimù te Eleteala, ne kenà egkepakey ne kenà dey layun ebpeselemati te Eleteala mekeatag kenyi. Ebpesalamat key su igenat te rudsuun ne mibpemili kew en te Eleteala ne ebpekeliyu. Ini ne benar, su ketà te mibperetiyyaya kew

en rut te benar ne nevaluy kew ne menge etew rin ibpepevayà dut te gehem te Kedesenan ne Ebpetuntul te Menusiyà.¹⁴ Su ketà te kebpesabut dey keniyu dut te Meupiya ne Tudtul, ne ke Eleteala se migkeketau te itungan niyu su apey kew medtelimà dut te kebpeliyu rin keniyu. Uya, mibpemilì kew nikandin su apey kew ebpekeamung dut te kebmepurù te Kerenan tew ne si Hisu Kristu.¹⁵ Tembù be, menge suled, beg-eta niyu ke kebperetiyyaya niyu, ne geweri niyu te meilut ke benar ne impenurù dey te kenian key pà te keniyu wey ke penurù ne insurat dey keniyu.

¹⁶⁻¹⁷ Iyan dey egkiyuhan ne ke Kerenan tew ne si Hisu Kristu wey ke Eleteala ne Amey tew se ebag-et dut te hinawa niyu wey ebaher keniyu su apey langun ne ed-ul-ulaan niyu wey langun ne egkehiyen niyu ne ebmeupiya su dekelà se limù te Eleteala keytew. Ne egenat dut te limù din wey ke kebpenuaub din ne ibehey rin ke kevag-et dut te itungan tew wey ke keupiya ne ebpenerengen tew ne egketuman.

3

Iyan Ebuyuen ni Pablo ne Ibpengeningen Sikandin dut te Menge Mibperetiyyaya

¹ Na, menge suled, duen pà ebuyuen ku keniyu. Iyan ku ebuyuen ne ipengeningen niyu te Eleteala mekeatag te sikami su apey ebpekeeneb en te mehaan ini se Lalag te Eleteala ne ibpmesabut dey, su apey ke menge etew ne ebekerineg kayi ne mehalew se kedtelimà dan iring keniyu. ² Pengeningeni kew rema te Eleteala te ed-elangan key nikandin dut te meraat ne menge etew ne edsurang kenami, su kenà langun ne menge etew ne ebperetiyyaya te Eleteala.

³ Ugaid ne si Hisu Kristu ke Kerenan tew ne egkeserihan, ne sikandin ke ebaher keniyu wey ed-alang keniyu dut te meraat ne ulaula te Datù te Pekaid. ⁴ Ne geina te mibpesakup kew ki Hisu Kristu ke Kerenan tew, ne kenà duwaruwa se hinawa rey te sikandin se edtavang keniyu su apey edumaan niyu ke insuhù dey keniyu.

⁵ Iyan dey ebuyuen te Kerenan tew ne edtavang keniyu su apey ke nesebutan niyu mekeatag dut te kerekelà te limù te Eleteala keniyu wey ke keditiger niyu rut te keresayan ne ebpekeiseg.

Iyan iya se Egelevèk ki

⁶ Menge suled, duen pà duma ne idsuhù dey keniyu su ini se insuhù dut te Kerenan tew ne si Hisu Kristu te kenà kew ebpekiduma rut te menge ruma niyu ne pehulen ne kenà eduma dut te impenurù dey keniyu. ⁷ Su netuenan niyu te kenà dey igkepehuli te kegelevek te kenian key pà te keniyu, ne arà imbe se iringi niyu. ⁸ Warà key mebuyù te igkeuyag dey, su langun ne mibayaran dey. Merukilem meandew ne mibpegelep key se egelevèk su apey sikami en se edtuganur dut te menge kurang dey ne kenà key niyu igkereheni. ⁹ Ne kenà te warà kevenar dey te ebuyù keniyu. Su iyan warà dey kebuyù te igkeuyag dey riyà te keniyu su apey kenà arà se ed-iringan niyu, ugaid ne arà se helevek dey se ed-iringan niyu. ¹⁰ Su ketà te kenian key pà te keniyu ne ruen migkahi rey keniyu te, “Embiya ruen etew ne pehulen ne egelevek, ne kenà niyu pekeena.”

¹¹ Egkehiyen dey ini su nerineg dey te ruen keniyan te keniyu ne pehulen ne egelevek, ne warà duma ne ebeelan din su ebangen dà dut te menge ruma rin ne egelevek. ¹² Tembù be iyan kiyug rut te Kerenan tew ne si Hisu Kristu ne idsuhù dey ketà ne menge etew te kenà dan medlauglaug ne ebangen dut te menge ruma ran, ugaid ne iyan se mebpegelep dan se egelevek dut te kegkeuyag dan.

¹³ Na sikiyu, menge suled, kenà niyu igkebungas te ed-ulaula te meupiya. ¹⁴ Ne embiya ruen kenà eduma kayi te suhù ne insurat dey keniyu ne turiki niyu sikandin. Ne belehara niyu sikandin su apey egkeyeyai. ¹⁵ Ugaid ne kenà niyu igkeepes sikandin, su pemendua niyu te meupiya iring te kebpemandù niyu te suled niyu.

Ke Mewri ne Lalag ni Pablo Kayi te Surat Din

¹⁶ Iyan dey egkiyuhan ne ke Kerenan tew ne si Hisu Kristu se ebehey te kebmelinew te hinawa niyu piya engkey se egketemanaan niyu su sikandin se ebpungan te itungan ne melinew. Ne dumai kew rema nikandin.

¹⁷ Ne ini se egkehiyen ku kayi te ketepusan te surat ku ne siaken imbe ini si Pablo se edsurat kayi, ne ebpenginginsà a keniyu langun. Ini se ed-ul-ulaan ku kayi te langun ne surat ku su apey niyu egketueni te benar ne kayi ebpuan te kediey.

¹⁸ Iyan dey egkiyuhan ne menu ma perem ke ebpeneuven kew dut te Kerenan tew ne si Hisu Kristu.

Arà dà taman.

Pablo

Ke Neuna ne Surat Ni Pablo Riyà te Ki Timoteo

¹ Siaken ini se edsurat ne si Pablo. Senge etew a ne kedserihan ni Hisu Kristu igenat dut te suhù te Eleteala ne ebpeliyu keytew wey si Hisu Kristu ke ebpenerengen tew.

² Ne edsuratan ku sikew, Timoteo, ne iring en te tuney ne anak ku egenat dut te kebperetiyaya nu ki Hisu Kristu.

Iyan ku kiyug ne egkeheram nu ke tavang wey kegkeyru te Eleteala ne Amey tew wey si Hisu Kristu ke Kerenan tew, ne egenat kandan ne ebmerinew ke itungan nu.

Ke Menge Etew Ne Ebpenurù Te Kenà Benar Ne Med-engked

³ Kenà nu lipati, Timoteo, ke migkahi ku keykew te ked-awà ku en te ebpependiyà te Mesidunya. Migkahi a te med-ubpà ka pà diyà te inged ne Ipusu su ruen menge etew ne ebpemenurù te kenà benar, ne peengkera nu sikandan. ⁴ Ikahi nu kandan se med-engked dan se ebpenurù dut te menge guhud ne mibèbeelan dà te menge apù dan wey ke layab ne guhud te kepuunpuun te apù dan. Su ini se kebpenareng dan dut te warà tapek din ne ebpekeval dà te kebpelewewaney, ne kenà dan egketuen ke tidtu ne ibayà ne kayi ran dà egketuen te kedsarig dan te Eleteala. ⁵ Iyan ku idsuhù ini su apey ran ebpelimlimuey. Ini se kebpelimlimuey ne egenat te hinawa ran ne midtilak te Eleteala su apey warà ebpekesawug ne meraat te itungan dan wey kenà alang-alang se kedsarig dan ki Hisu Kristu. ⁶ Ugaid ne arà se ebpememandù te kenà benar ne nekesuwey en ketà te tidtu ne ibayà, ne iyan dan en ebpulungan ne ebpelewewaney te warà rantek din. ⁷ Egkesuat dan ne ebpememandù te penduan ne impesurat ki Moises dengan, ugaid ne warà dan ma mesebuti ke engkey se meana rin ini se penduan ne idtehel dan ibpenurù te menge etew.

⁸ Netuenan ta ne meupiya ini se penduan ke embiya iyan ta kedumai ne ke enget dà ne atag din. ⁹ Ne netuenan ta rema se kenà iyan din egkesuhat te penduan ne ke menge etew ne metidtu, ugaid ne iyan din egkesuhat ke menge etew ne edsumbaker te penduan wey ke menge etew ne ed-engkenà te lalag te Eleteala, ke menge etew ne warà te itungan dan se Eleteala wey ke mekesesalà, ke menge etew ne meraat se itungan dan wey ke menge etew ne edsumpalit te Eleteala, ke menge etew ne ebuñù te amey ran wey iney ran wey rumah ne menge etew ne teremunù. ¹⁰⁻¹¹ Benar ne iyan din imbe egkesuhat ini se penduan ne menge etew ne mesalàsalà, menge meama ne ebpeunturey ke elin meama wey ke ebpeunturey ke elin meritan, menge etew ne ebpenggebpà su ebpesaan, menge etew ne teruen wey ke menge etew ne ebpetithus te tarù, wey misan engkey en ne meraat ne ulaula ne ebpekesuwey rut te tidtu ne penduan te Eleteala. Iring be imbe kayi ne menge etew se egkesuhat kayi te penduan su kenà dan eduma kayi te tidtu ne penurù. Ini se tidtu ne penurù ne kayi te Meupiya ne Tudtul ne ebpesabut keyta mekeatag te Eleteala ne dait ne edeyuen, ne insarig din kedi te ibpemenudtul ini riyà te menge etew.

Ke Kebpeselamat Ni Pablo Rut Te Eleteala

¹² Ebpeselemetan ku si Hisu Kristu ke Kerenan tew ne layun ebehey kedi te keeg kayi te gelevek ku. Uya, ebpeselemetan ku kandin su edserihan a rin, ne midtendù a rin ne egelevek kandin. ¹³ Misan engketà te rengan ne meraat se lalag ku mekeatag kandin, ne mibpemekeiran ku ke menge etew ne mibperetiyya kandin, ne midtekudi ku sikandin, ugaid ne neyruwan a te Eleteala su warà e pà mekesabut te meraat ke ulaula ku su warà e pà mebperetiyya ki Hisu Kristu. ¹⁴ Melimù nevenar si Hisu Kristu ke Kerenan tew su mid-uluhan a rin te raat te nanam, ne pinesarig a rin kandin, ne midtehuan a rin te kegkelimù ku kayi te menge ruma ku egenat dut te kinepekidseveka ku kandin.

¹⁵ Benar iya ini ne egkehiyen mekeatag te iyan impengkayi ni Hisu Kristu te ampew te dunya, ne dait ini ne ebperetiyyaan te langun. Su iyan din impengkayi apey ibpeliyu rin ke menge etew dut te kedusa te salà dan. Ne siaken en iyan se nekeunauna ne belisalà. ¹⁶ Misan engketà te siaken en iya se nekeunauna ne belisalà, ne ingkeyru a te Eleteala su apey siaken se igkepekita ni Hisu Kristu te metmetigker sikandin dut te menge etew ne belisalà. Apey ruen ebpekeledawan dut te merakel ne etew te warà etew ne belisalà ne kenà egkepesahad ni Hisu Kristu, ne ketà ne sikandan ke upama ebperetiyyaya ran ne ebpekehaked te umur ne warà edtemanan din. ¹⁷ Ne edeyrey kiyu ve te Eleteala taman te taman su sikandin dà se Eleteala. Ne sikandin se ebayàbayà te langun taman te warà ketepusan din. Kenà sikandin egkekita su rengan ne daan en sikandin su warà rudsuan din ne warà kemetayen din.

¹⁸ Na sikew, Timoteo ne iring te anak ku, ini se igkahi ku kenikew. Tentenuri nu ke ingkahi rut te ebpelambas te lalag te Eleteala rengan mekeatag dut te helevek nu. Tentenuri nu ve apey ebmetihel ke hinawa nu te edtuman dut te insuhù keykew su apey ka ebpenehana te ed-atu rut te meraat. ¹⁹ Kemali nu te mevaher ke sarig nu ki Hisus, ne kenà ka ulaula te meraat su apey kenà ka egkeyeyaan diyà te etuvangan te Eleteala wey diyà te etuvangan te menge etew. Su ruen menge etew ne misan netuenan dan ded se meraat ke ulaula ran ne ed-iseg den pà lavew, ne ini ve se sarig dan ne warà en misan daan en ne mibperetiyyaya ran. ²⁰ Iyan iring kayi ne en si Himinyu wey si Alejandro. Midlekaan ku sikandan su apey egkeveyveyai en ni Setanas ke datù te pekaid apey ran metueni te kenà iya egkepakey ne edsumpeliten se Eleteala.

2

Ke Menge Suhù Mekeatag Te Ebpengervuranan Te Ebpengarap

¹ Iyan ku id-una igkahi keykew ne layun kiyu ebpengeningeni te Eleteala ke langun ne etew piya engkey en sikandan. Ebpmuyuen tew te Eleteala te behayi sikandan te langun ne kurang dan, ne kenà ki edlipat te ebpeselamat te Eleteala dut te tavang din. ² Ibpengeningeni tew te Eleteala ke menge mepurù ne ebayàbayà kenitew wey langun ne menge ruma ran ne ruen gaga ran te ed-ewit kenitew. Ibpengeningeni tew te Eleteala sikandan apey meupiya se ked-ewit dan keytew su apey ebmelinandang se ketemanan tew wey apey ruen kesig tew te eduma

te Eleteala wey ed-ulaula te metidtu. ³ Iring imbe kayi ne pengeningeni se meupiya ne igkesuat dut te Eleteala ne ebpeliyu keytew rut te salà tew. ⁴ Su iyan din igkesuat ne langun te menge etew ne ebpeketuen te tidtu ne ralan diyà te Eleteala wey ebpekeliyu ran dut te kedusa te salà dan. ⁵ Su Eleteala ne sebseveka rà, ne sebseveka rà dema se edteyekupan tew te menge etew riyà te etuvangan te Eleteala ne warà liyu rin ke kenà si Hisu Kristu ne nevaluy ne etew. ⁶ Iyan din mid-ulaula te kinepengkayi rin te ampew te dunya ne imbeliwas din ke umur din te kebpeliyu rin te langun tew rut te kedusa te salà tew. Mid-ulaula rin ini dut te enget en ne hewii ne midtendù te Eleteala rengan su tuus be ini te kiyug te Eleteala ne langun ne menge etew ne ebpekeliyu. ⁷ Tembù be mibpemili a ni Hisu Kristu ne kedserihan din ne ibpemenudtul ini se tidtu ne lalag mekeatag kandin diyà te menge etew ne kenà Hudiyanan apey ran ebpekeperetiyyaya. Ini ve iya se egkehiyen ku ne kenè en be iya ini egkedtarù su benar!

⁸ Ne duen pà ebuyuen ku kenyi. Iyan ku kiyug ne piya endei en egkevurun ke menge etew ne mibperetiyyaya ki Hisus, ne ke menge meama se ebpeneheewit kenyi te ebpengeningeni. Ugaid ne id-awà den pà neraan ke epes dan te rumu ran wey ke kebpelewewaney ran apey iyan dan ibpeuna te hinawa ran ne ke Eleteala.

⁹ Ne engketà ded dema ke menge meritan, duen erangan te kebpemedait dan te kebevelegkas dan. Kenà kayi rà te mepurù ne velegkas dan etawa kayi te kebpuputus dan etawa menge rayandayan ne bulawan egketueni se keupiya ran te menge meritan. ¹⁰ Ugaid ne kayi egketueni te meupiya ne ulaula ran. Su arà se dait dut te menge meritan ne egkekahi ne mibperetiyyaya te Eleteala.

¹¹⁻¹² Ne kenà ku idluhut ne iyan eppenurù se meritan dut te menge meama diyà te kevurunan niyu etawa ebpeneheewit kandan. Iyan meupiya ne mebpeeng-eneng ke meritan se ebpemineg dut te eppenurù kandan su apey ran ebpekehuru. Iyan dà kandan ne mebpeeneng-eneng. ¹³ Su iyan neuna ne midlimbag te Eleteala ne si Adan ne arà pà ne si Eva. ¹⁴ Ne kenà si Adan se nelimbungan ni Setanas ke datù te pekaid su ke esawa rin ne si Eva, ne ketà puunan ne nekedsalà sikandin. ¹⁵ Tembù be egkerasey ke meritan ke ed-anak, ugaid ne egketevangan dan te Eleteala su apey ran ebpekeliyu embiya egkamal dan te mevaher te peretiyyaya ran kandin wey ebpelimlimuey ran wey ebpeketidtu ran te ulaula ran ne ebpekesuhat te Eleteala.

3

Ini Ne Mekeatag Te Betasan Dut Te Menge Unuten Te Menge Mibperetiyyaya

¹ Benar iya ini se beseanan ne egkahi te, “Embiya ruen etew ne egkiyug ne ebpeneheewit te menge etew ne mibperetiyyaya ki Hisus, ne meupiya nevenar arà se helevuk ne egkiyuhan din.” ² Ugaid ne ke etew ne ebpeneheewit te menge mibperetiyyaya ki Hisus ne iyan din kemeyidan ne warà ulaula rin ne meraat ne igkesawey kandin, ne seveka rà se esawa rin. Iyan din kemeyidan ne kenà mekalas se kebpenunuen din te keuyahan, ugaid ne erangan se edul-ulaan din su apey langun ne ulaula rin ne meupiya. Iyan din kemeyidan ne mesakew te piya engkey en ne etew, ne metau sikandin

ne ebpenurù. ³ Kenà sikandin metehel ne ed-inum te ebpeketevereg. Ne kenà sikandin edretem te meraat dut te menge ruma rin wey kenà lelengeten, ugaid ne metigker wey metulanged, ne kenà lelegawen te pirak. ⁴ Iyan din kemeyidan ne egkeveyveyaan din ke sikandan ne telteleanak, wey ke menge anak din ne meperumaruma su meadat kandin. ⁵ Su embiya kenà din egkegaga te ebpeneheewit ke kandin ne menge anak, ne iyan din pè be megaga te ebpeneheewit se merakel ne etew ne mibperetiyaya ki Hisus. ⁶ Kenà dema egkepakey ke behu pà sikandin ne mibperetiyaya ki Hisus su kema ke ibpereyudeyù din ke ketengdanen din, ne ketà ne edusaan sikandin te Eleteala iring te kinedusai te Eleteala ki Setanas. ⁷ Ne iyan din kemeyidan ne ini se etew ne ebpeneheewit te menge etew ne mibperetiyaya ki Hisus ne egkeedatan dut te menge etew ne warà pà mebperetiyaya ki Hisus. Su embiya ruen meraat ne ulaula rin, ne edsewayan sikandin su arà ke idselaid ni Setanas kandin.

Ini Ne Mekeatag Te Betasan Dut Te Edsukendul Te Menge Unuten

⁸ Iring ded be kayi rema ke menge etew ne edsukendul dut te menge unuten, iyan din kemeyidan ne ebpengeserihan se lalag dan. Kenà dan metehel ne ed-inum te ebpeketevereg, ne kenà dan lelegawen te kearen. ⁹ Eyeyari ran te egawed ke kebperetiyaya ran dut te penurù ne impayag te Eleteala mekeatag ki Hisus, ne kenà eduwaruwa se hinawa ran dut te kebperetiyaya ran su netuenan dan ne warà idselipsip dan ne meraat kayi te kebperetiyaya ran. ¹⁰ Embiya ruen etew ne egkiyug ne edsukendul dut te menge unuten, ne egkeintengan pà se ulaula rin. Ne embiyà warà meraat ne ulaula rin, ne arà pà ne ebpekesukendul sikandin dut te helevrek.

¹¹ Engketà ded ke menge esawa ran, iyan din kemeyidan ne ed-ulaula ran te meupiya su apey ran egkeedati, ne kenà dan serupeten. Ne kenà dema mekalas se kebpenunuen din te keuyahan. Ne ebpengeserihan te piya engkey en ne ed-ul-ulaan dan.

¹² Ini se menge etew ne edsukendul ne seveka rà se esawa rin, ne egkevayvayaan din ke sikandan ne telteleanak wey langun ne ed-ubpà te valey. ¹³ Su embiya meupiya se helevrek kayi te menge etew ini ne edsekundul, ne kenà egketuen te wagib se kenà ed-edatan dut te menge etew ne ketà dema ne kenà egkealang-alang sikandan ne ebpesabut te ruma mekeatag te kebperetiyaya ran ki Hisu Kristu.

Ke Rekelà Ne Penurù Te Eleteala Mekeatag Ki Hisus Ne Warà Din Impayag Dengan Ugaid Ne Guntaani Ne Impayag Din En

¹⁴ Kiyug ku ne kenà meuhet ne ebpekelambas a keniyan te keniyu, Timoteo. Ugaid ne iyan ku kedsurat kenikew ¹⁵ ne kema ke mevangan a, ne ini ve se surat ku ne ebpekepenurù keykew ke engkey se meupiya ne ed-ul-ulaan tew te sikitew ne mibperetiyaya te Eleteala ne warà kemetayan din, su anak kiyu en nikandin. Su langun tew ne mibperetiyaya te Eleteala ne iring ki te baley te Eleteala ne ed-ubpaan din. Ne iring ki red te pelaus dut te baley rin su sikitew se edtindeg dut te benar ne penurù din. ¹⁶ Netuenan tew langun ne ke kerekelà te penurù te Eleteala ne impayag din keyta ne mibperetiyaya rey en. Egkahi te,

Nevaluy si Hisu Kristu ne etew
 ne mid-ubpà kayi te ampew te dunya,
 ne ke Kedesenan ne Ebpetuntul te Menusiyà,
 se iyan midtitihus te tuney sikandin ne Anak te Eleteala,
 ne nekita sikandin te suluhuen te Eleteala.
 Ne impemenudtul sikandin
 diyà te langun ne menge etew kayi te ampew te dunya,
 ne merakel se nekeperetiyyaya kandin
 ini te lusud te dunya,
 ne mibpeliendud si Hisus diyà te Amey rin diyà te langit.

4

Mibaag Si Pablo Ki Timoteo Mekeatag Te Menge Etew Ne Ebpenurù Te Tarù Ne Ebpekelimbung Te Menge Etew

¹ Na Timoteo, mepayag nevenar ke migkahi dut te Kedesenan ne Ebpetuntul te Menusiyà te ruen menge etew ketà te ketepusan ne hewii ne edsuwey rut te kebperetiyyaya ran ki Hisu Kristu. Su iyan dan en maa edumaan ke busew ne metau ne edlimbung, ne ebperetiyyaya ran te tarù ne ibpепenurù te menge vusew. ² Ne ruen engkungkun ne metidtu ne menge etew ne ebpenurù dut te tarù ne lalag te menge busew. Ne ini se ebpemandù te meraat, ne warà en te itungan dan se meraat ini su nelayaman dan en wey iyan en ma ebayàbayà te itungan dan ne si Setanas ke datù te pekaid. ³ Ini se ebpemandù te tarù, ne edawey ran te ebpees-eseweey wey ruen egkekaan ne ibpemandù dan te kenà ibpekaan. Ugaid ne ini se egkekaan ne mibpengaren te Eleteala ne egkeenen tew, labi pà ke sikitew ne mibperetiyyaya kandin wey nekesabut dut te tidtu ne penurù asal iduna tew pà te ebpengeningeni ne ibpeselamat te Eleteala se egkeenen. ⁴ Su langun taman ne mibpengaren te Eleteala ne meupiya. Warà kenà egkekaan embiya id-una tew pà ibpengeningeni te kebpenelamat, ⁵ su ke egkeenen tew ne pekegkeupiya egenat dut te Lalag te Eleteala wey ke kebpengeningeni tew kandin.

Ke Dait Ne Ed-ul-ulaan Dut Te Menge Etew Ne Egelevek Ki Hisu Kristu

⁶ Embiya ibpenurù nu ini se migkahi ku kayi, Timoteo, diyà te menge mibperetiyyaya keniyan te kenyi, ne tuus arà te egkeserihan ka ne suhù ni Hisu Kristu ne ebpesabut te lalag din. Ne tuus dema te mid-iseg ke sarig nu su intahù nu te hinawa ke tidtu ne penduan wey midumaan nu te arà arè en. ⁷ Kenà ka sehipà te layab ne guhud te kepuun su warà pantag din ne kenà diyà ebpuun te Eleteala. Ugaid ne pegitunga nu te mevaher ke engkey se ulaula ne ebpekesuhat te Eleteala. ⁸ Meupiya se kedlumbad ta te lawa ta su apey ki ebmevaher, ugaid ne iyan pà muna ne ibaher tew te itungan tew se keduma tew te Eleteala. Su embiya ini se ed-ul-ulaan tew, ne ruen keupianan te kegkeuyag tew kayi te ampew te dunya wey ruen ded dema ketà te keuhet din ne hewii diyà te langit. ⁹ Benar imbe iya ini se migkahi ku ne iyan meupiya ne ebperetiyyaya te langun. ¹⁰ Tembù be ebpegelep te egelevek te Eleteala su edsarig ki te Eleteala ne warà kemetaryan din ne iyan ebpekepeliyu te langun ne menge etew, labi en ke menge etew ne mibperetiyyaya kandin. ¹¹ Ini se migkahi ku, Timoteo, ne ini ve se ipenurù nu dut te menge etew ne mibperetiyyaya ki Hisus, ne itarem nu kandan se ini se dumai ran.

¹² Na Timoteo, kenà nu idluhut se kedsudian ka misan engkeniyan te menguwed ke pà, ugaid ne iledawan nu rut te langun ne menge ruma niyu ne mibperetiyaya. Ipekita nu ke keupiya ne egkeiringan dan kayi te lalag nu wey ke ed-ul-ulaan nu. Pekita ka te limù dut te menge ruma nu wey ke tidtu ne sarig nu te Eleteala, ne ipekita nu kandan te warà meraat ne netahù te itungan nu su apey sikuna se egkeiringan. ¹³ Taman te kenà e pà ebpekeuma keniyan te keniyu, ne iyan nu ibpeuna te itungan nu ne ke kebasa te Lalag te Eleteala diyà te egkevurun ne menge mibperetiyaya ki Hisus. Seysaya nu uppiani wey ipesabut nu kandan apey ran egkerumai. ¹⁴ Ne kenà nu lipati ke ketau nu te ebpeneheewit te menge mibperetiyaya ne imbehey te Eleteala keykew ketà te midampen ka rut te menge pekilukesen te menge mibperetiyaya ne impengeningen ika rin. Su iyan dan migkahi ke impesabut kandan dut te Ebpelambas te Lalag te Eleteala.

¹⁵ Sevekaa nu se itungan nu kayi te migkahi ku keykew, ne dumai nu ini su apey egkekita te langun se ked-iseg din ke keduma nu te kiyug te Eleteala. ¹⁶ Urami nu ke ed-ul-ulaan nu wey ke kebpenurù nu. Su embiya edumaan nu ini se migkahi ku, ne kenà sikuna rà se ebpekeliyu rut te kedusa te salà nu su misan imbe rema ke ebpemineg keykew ne ebpekeamung.

5

Ini Ne Mekeatag Te Dait Ne Ed-ul-ulaan Dut Te Menge Ebpeneheewit Te Menge Mibperetiyaya

¹ Duen ruma pà ini ne kiyug ku ne rumai nu. Kenà nu rengrengiti ke menge lukes ne meama, ugaid ne neyneyui nu sikandan iring te tuney ne amey nu. Ne ke menge kenakan, ne penurua nu sikandan iring te menge suled nu. ² Ne ke menge meritan ne lukes pà keykew, ne penurua nu sikandin iring te tuney ne iney nu. Ne ke menge raha, ne penurua nu sikandan iring te etevey nu. Ne iyan nu pegitunga kandan se warà misan deisek dà ne meraat ne kayi te itungan nu.

Ke Kebpenurù Mekeatag Te Menge Valu Ne Meritan

³ Na Timoteo, tevangi niyu ke menge valu ne meritan ne warà egkepesineruhan dan te kegkeuyag dan. ⁴ Ugaid ne embiya ruen anak din etawa apù din ini se valu, ne iyan dan en ebpeturgenuren kayi te lukes dan ne tuus te keduma ran te Eleteala wey apey ran ebpekevaras te lukes dan wey apù dan. Su ini se ulaula ne ebpekesuhat te Eleteala.

⁵ Ne ini se valu ne meritan ne sebseveka rin su warè en edtuganur kandin, ne Eleteala rà se egkedserihan din ne merukilem meandew ne layun ebpengeningen ika din te Eleteala su ebpemuyù te tavang. ⁶ Ugaid ne ke balu ne iyan din dà igkesuat ne ke kiyug te kememenuisyai, ne misan biviyag pà sikandin ne iring te minatey en su warà kayi te kandin ke umur ne ibehey te Eleteala ne warà edtemanan din. ⁷ Ipenurù nu ve ini se suhù ku mekeatag te menge valu ne meritan diyà te menge etew ne mibperetiyaya te Eleteala su apey warà meraat ne lalag ne ebpekesuhat kandan. ⁸ Su ke etew ne kenà edtuganur te menge suled din, labi en ke sikandan ne telteleanak, ne midlekaan din ke kebperetiyaya rin ki Hisu Kristu. Ne tuwas pà lavew sikandin dut te etew ne warà mebperetiyaya.

⁹ Ne embiyà idsurat nu ke menge valu ne meritan ne ebpeketavang dut te menge mibperetiyyaya, ne iyan nu rà isurat ke menge valu ne labi enim nepulù se rahun din ne keseveka rà mekesawa. ¹⁰ Iyan dà egkepakey ne valu ne ke ed-edatan su meupiya ke helevek din iring be te kinpeneheewit din te meupiya te menge anak din, kinetirapan din te ebpekaan dut te menge etew ne sumeseharey, kinetavang din te menge etew ne mibperetiyyaya te Eleteala, labi en ke menge etew ne ebpekeanuyanuy te kerehenan wey misan engkey en ne ketulengeran din ne impektita rin diyà te menge rumा rin.

¹¹ Ke menge valu ne meritan ne sesangen pà, ne kenà niyu iamung te edsurat. Su embiya egkeumaan dan te kiyug te kedsaup den pà maa ked-esawa, ne ed-ewaan dan ke helevek dan ki Hisu Kristu. ¹² Ne ketà ne edsewayan sikandan, su warà dan medtuman te pasad dan ne kenà dan ed-esawa edsaup su apey ran egelevek ki Hisu Kristu. ¹³ Ketà be ne kenà meupiya embiya ini se egketevangan su kalu ke ebpehulen ne ebpemedlakit diyà te idsehumbelayà. Ne kenà arà dà su egkevaluy ran ne serupeten wey ebpemedlakit, ne ebpenlalag te kenà dait ne egkelalag dan. ¹⁴ Embiya ke kediey rà kayi te menge valu ne sesangen pà, ne medsaup den pà mebpeesawa ne tugenura ran ke sikandan ne telteleanak apey warà meraat ne egkekahi rut te menge etew ne warà mibperetiyyaya ne ebpekesuhat kandan. ¹⁵ Iyan ku kegkahì su ruen menge valu te misan gunteani en ne midsuwey en se ebperetiyyaya ki Hisu Kristu ne si Setanas en ke datù te pekaid se edumaan dan.

¹⁶ Tembù be ke ruen mibperetiyyaya te Eleteala ne ruen suled din ne valu, ne tugenura rin. Kenà din pegitunga se iyan edtuganur ke langun ne mibperetiyyaya, su iyan dan edtuguren ke menge valu ne warà edtehikur kandan.

Ke Kebpenurù Mekeatag Te Menge Mibpeneheewit Dut Te Menge Mibperetiyyaya

¹⁷ Duen pà egkehiyen ku, Timoteo, mekeatag te menge etew ne ebpeneneheewit te menge mibperetiyyaya ki Hisus. Embiya meupiya se kebpeneheewit dan, ne edati niyu sikandan wey edsukayan sikandan te meupiya. Labi en be ke etew ne mibpenamantaman sikandin te kebpenurù din wey kebpesabut din te Lalag te Eleteala. ¹⁸ Su ruen impesurat ne Lalag te Eleteala rengan ne egkahi te,

“Kenà nu pungesa ke sapi ne egiek te parey
su apey ebpekeakan.”

Ne ruen pà maa Lalag te Eleteala ne egkahi te,
“Ke etew ne egelevek,
ne dait ne edsukayan.”

¹⁹ Embiya duen ebpekesuhat te etew ne ebpeneneheewit te menge mibperetiyyaya te Eleteala ne meraat ne ulaula, ne kenà niyu pehimbenara ke kenà duen deruwa etawa tetelu ne ebpeketitihu te arà ne ulaula rin. ²⁰ Ne embiya benar ne mid-ulaula ini se etew te meraat, ne riyà niyu pengeheti te etuvangan dut te langun ne mibperetiyyaya su apey ke rumा ne egkeandek ne ed-iring.

²¹ Na Timoteo, pemineha nu up-upiani ini se penduan ku keykew ne tentenuri nu te ke Eleteala, si Hisu Kristu wey ke suluhuen te Eleteala se titihu te kedsuhù ku keykew. Embiya ebpedtuney ka te deruwa ne etew, ne warà remihi nu kandan ugaid ne tidtuwa nu ke kegkukum

nu. ²² Ne embiya ruen edtenduen nu ne ebpepeneheewiten nu rut te menge mibperetiyaya, ne kenà ka ed-una edampen kandin taman te kenà nu egkepeniyap se ulaula rin. Su embiya ruen ulaula rin ne meraat ne nerampen nu sikandin, ne ebpekeunung ka te salà din. Tembù be uram ka ke ebpekeamung ka rut te salà.

²³⁻²⁵ Su ruen menge etew ne ed-ulaula te meraat ne egkepayahan en, tembù be egketuenan nu ke betasan dan te warà nu pà mekita sikandan. Ne ruen duma ne ed-ulaula te meraat ne kenà egkepayahan taman te meuhet. Iring ded dema te menge etew ne meupiya se ulaula rin ne melemu ne egkepayahan. Ugaid ne misan kenà egkepayahan ke meupiya ne ulaula rin, ne egketuenan ded te meuhet ne hewii. Na rumा pà, Timoteo ne kenà iyan nu rà inuma se wayig su inum ke red te reisek ne binu su ibawì te mesakit ne getek nu wey ke rumा pà ne sakit nu ne layun nu egkeheram.

6

Ke Kebpenurù Diyà Te Menge Mibperetiyaya Ne Nengeuripen

¹ Ini ve ne penduan ku dut te menge etew ne nebpasa ne neuripen. Misan sugsuhuen sikandin, embiya mibperetiyaya ki Hisu Kristu ne med-adat sikandin dut te edsuhùsuhù kandin apey warà etew ne ebpekekahi te meraat mekeatag te Eleteala wey ke ibpenurù tew ne riya ebpuun te kandin. ² Ne embiya ke sugsuhuen wey ke edsuhùsuhù ne elin mibperetiyaya ki Hisu Kristu, ne kenà dait ne ebpegitungen dut te edsugsuhuen ne geina te edsuled dan te kebperetiyaya ran ne egkepakey ne egkurangan din ke adat din kandin. Nasì pà se upupiani rin ke gelevek din dut te edsuhùsuhù kandin wey edati rin su mibperetiyaya en dema te Eleteala ne elin dan igkelimù te Eleteala.

Ke Etew Ne Egelevek Ki Hisu Kristu Ne Kenà Meperateng Te Ke Kewesai Rin

Ini ve imbe, Timoteo, se ibpesabut nu te meupiya kandan su apey ran egkerumai. ³ Embiya ve ruen ebpenurù te senge bias su kenà iring kayi te tidtu ne penduan ne impenurù ni Hisu Kristu ke Kerenan tew, ⁴ ne meperayù sikandin ne warà nesebutan din mekeatag te tidtu ne penurù. Iyan din dà igkesuat ne ebpekidlewaney te lalag, ugaid ne warà rantek din ini su iyan din dà egketemanan ne ebpein-indihà, kewahaan, ebpetemptempeleey, peen-entapà ⁵ wey ebpeep-epuley ran su ini ke ulaula rut te menge etew ne nereetan en ke itungan dan ne warè en iya meketahù te itungan dan ke tidtu ne penurù ni Hisu Kristu. Su iyan dan kunaan ke kebpsakup dan te Eleteala ne ebpekegkewasa kandan.

⁶ Ne benar ne sikitew ne mibperetiyaya en te Eleteala ne ruen ke kewesai tew, ugaid ne kenà kearen ini. Su iyan dekelà te hinawa tew ini se kebpsakup tew te Eleteala wey kebmeupiya te hinawa tew ke misan deisek dà ne kearen tew. ⁷ Su pehaney en te kinehemew tew kayi te ampew te dunya, ne warà en iya nerimbitrimbit tew misan deisek dà. Ne engketà ded maa ke ebpateyi kiyu en, warà en iya deisek dà ne egketapik tew. ⁸ Ketà be ne embiya maa duen ded egkekaan tew wey duen belegkas tew, ne edupianen tew en te hinawa tew.

⁹ Ugaid ne ke menge etew ne egkesuat ne egkewasa ne merakel se ibpenggeram kandan. Su ini se kegkesuat dan ne warà rantek

din ne ebpekekaid kandan ne iring te telebpì kandan ne kenà dan ebpekeliyu. Ne kayi te ini ne egkevinasa ran dut te kedusa ne kenà edtaman.¹⁰ Su ini se kegkenuhun te kureta dut te menge etew, ne ini se puunan te merakel ne meraat ne ulaula ran. Su duen menge etew ne midsuwey se kebperetiyyaya ran te Eleteala su ini imbe iya se kiyug dan te kegkewasa. Ne iyan dan egketemanan se nekevaal te dekdekèla ne kemutuwani dan.

Ke Suhù Ni Pablo Diyà Te Ki Timoteo

¹¹ Ugaid ne geina te sikuna ini, Timoteo, ne etew ne eduma te Eleteala, ne uram ka apey kenà ka ebpekeiring kayi te menge etew ini. Penamantaman ka te kebmetidtu te ulaula nu wey itungan ne ebpekesuhat te Eleteala. Ilaus nu ke kedsarig nu te Eleteala. Ikelimù nu ke menge ruma nu, ne misan engkey en kerehen din ne tigkeri nu, ne ipekita nu ke ketulengeran nu kandan.¹² Misan ebpekeanuyanuy ka te kemerehenan, ne ikehate nu te tivang se keduma nu te Eleteala su apey nu egkehaked arà se umur ne warà edtemanan din. Su arà imbe ke impasad te Eleteala kenikew ketà te kinetawag din keykew ne migkahi ka riyà te etuvangan te merakel se mibperetiyyaya ke en.

¹³ Na duen pè be maa ini igkahi ku keykew ne ke Eleteala ne mibehey te niyawa te langun ne eginginawa se ebpekevantey keyta wey si Hisu Kristu ke mid-itindeg dut te benar diyà te etuvangan ni Poncio Pilato se ebantey rema. Tembù be igkahi ku keykew¹⁴ ne perumdumai nu ke langun ne insuhù keykew su apey warà meraat ne ebpekesawug te ed-ul-ulaan nu ne egkesewayan ka. Dumai nu ve ini langun taman ketà te kedlived ni Hisu Kristu kayi.¹⁵ Ini ve se kebpelived te Eleteala ki Hisus kayi ne kedmumana rin dut te enget ne hewii ne mibpemili din. Su sikandin dà se keupianan te ebayàbayà te langun. Sikandin ke mepurù ne ebayàbayà dut te langun ne menge datù wey sikandin ke mepurù ne ebayàbayà dut te langun ne menge pengulu.¹⁶ Sikandin dà se warà kemetayan din, ne riyà med-ubpà sikandin te ebpeneringsing ne rayag ne kenà egkeuvey te menge etew. Warà etew ne ebpekekita kandin su sikandin ne kenà egkekita. Edeyù kiyu ve kandin su sikandin ke ebayàbayà taman te taman! Egketuman ini.

¹⁷ Na Timoteo, kehiyi nu ke menge etew ne kewasa te kenà dan ibpereyùdeyù, ne kenà dan serihi ke kekewesai ran su ini ne edsahad dà. Ugaid ne iyan dan serihi ne Eleteala su ebehayan kiyu nikandin te pengelimuan din ne sesangan apey ki egkehalew.¹⁸ Kehiyi nu ke menge kewasa ne med-ulaula ran te meupiya wey medtavang dan dut te menge ruma ran, su igkesuat te Eleteala ne ebpekeumun ded sikandan dut te imbehey rin kandan.¹⁹ Su embiya ini se ed-ul-ulaan dan, ne iring dut te edtahù dan te kekewesai ran diyà te langit ketà te akir din ne hewii su apey ran ebpeketelimà te umur ne warà edtemanan din.

²⁰ Na Timoteo, tugenumura nu ke kebpenurù nu ne insarig te Eleteala kenikew. Kenà nu ed-emungi ke menge etew ne ebpengasak te lalag ne kenà ebpekesuhat te Eleteala wey ebpelewlewaney te warà rantek din. Su iyan dan kunaan ne metau ran, ugaid ne ke lalag dan mekeatag te Eleteala ne kenà benar.²¹ Uram ke ve kayi te penurù dan su ruen menge etew ne mibperetiyyaya kayi ne iyan dan netemanan ne midsuwey se peretiyyaya ran ki Hisu Kristu.

Iyan ku kiyug ne egkeheram nu ke tavang te Eleteala.
Arà dà taman.

Pablo

Ke Ikeruwa ne Surat Ni Pablo Riyà te Ki Timoteo

¹ Siaken ini se edsurat ne si Pablo. Senge etew a ne kedserihan ni Hisu Kristu egenat dut te kiyug te Eleteala. Su midsuhù a rin te ebpesabut mekeatag te umur ne warà edtemanan din ne impasad din dut te langun ne menge etew ne ebpekidseveka ki Hisu Kristu.

² Edsuratan ku maa sikel, Timoteo, ne igkelimù ku iring te tuney ne anak ku.

Iyan ku kiyug ne egkeheram nu ke tavang wey kegkeyru te Eleteala ne Amey tew wey si Hisu Kristu ke Kerenan tew, ne egenat kandan ne ebmerinew ke itungan niyu.

Ke Limengew ni Pablo ki Timoteo

³ Ebpeselamat a te Eleteala atag keykew, Timoteo, te kebpengengeni ku kandin, ne edumaan ku sikandin wey ebpekesuhat kandin iring dut te mid-ulaula te menge apù ku rengan. Uya, merukilem meandew ne idragkes ku sikel te pengeningeni ku. ⁴ Netenuran ku ke mibpengampet ne luwà nu te kinepekedsuwey ta en, Timoteo, ne dekelà se kiyug ku te kebpekebalak ta su apey a egkehalew nevenar.

⁵ Ne warà ku melipati ke tidtu ne sarig nu ki Hisu Kristu iring ded iya dut te kedsarig te apù nu ne si Loida wey ke iney nu ne si Eunice. Ne netuanan ku te ruen dema sarig nu iring dut te kandan ne sarig. ⁶ Tembù be egkehiyen ku keykew te pegelepi nu te egamit arà se ketau te ebpeneheewit te menge mibperetiyyaya ne imbehey te Eleteala kenikew ketà te kinerampen ku keykew. ⁷ Su mibehayan kiyu en te Eleteala te Kedesenan ne Ebpetuntul te Menusiyà apey ki kenà egkeandek, nasi pà te mibehayan ki rin te gehem te edtuman te kiyug din wey ke limù ta rut te menge ruma ta wey ke ketau te ed-erangan te langun ne ed-ul-ulaan ta.

⁸ Ketà be ne kenà nu ve ikeyeyai te ebpemenudtul mekeatag ki Hisus ke Kerenan tew, ne kenà nu rema ikeyeyai su ini a te bilengguan su iyan ku kinekevilanggù ne keduma ku ki Hisus. Ugaid ne telimaan nu se piya engkey ne rasey ne ebpekeuma keyta atag dut te kebpesabut ta kayi te Meupiya ne Tudtul su iyan ebaher keyta ne Eleteala. ⁹ Su iyan mid-ulaula te Eleteala keytew ne impeliyu ki rin dut te kedusa te salà tew, ne midsuhù ki nikandin te ed-ulaula te ebpekesuhat kandin. Ugaid ne kayi te kinepeliyu rin wey ke kinetawag din kenitew ne kenà egenat te meupiya ne ulaula tew su belidsalà ki. Ugaid ne impeliyu ki rin su dekelà se kiyug din te edtavang kenitew. Su rengdengani te warà din pà melimbag se piya engkey en, ne intahù din en te itungan din se ibehey rin si Hisu Kristu su tavang din kenitew. ¹⁰ Ne guntaani ne netuman en ke tavang din kenitew su impepengkayi rin en si Hisu Kristu ke ebpeliyu keytew. Ne ketà te nevanew sikandin dut te kinepatey rin ne kayi rin be iawà ke andek tew te kepatey wey impesabut din kayi te Meupiya ne Tudtul te ruen umur ne warà edtemanan din.

¹¹ Ne midtendù a te Eleteala ne kedserihan ni Hisu Kristu te ebpemenudtul kayi te Meupiya ne Tudtul mekeatag kandin wey

ibpemesabut ini. ¹² Tembù be egkerasey ad ini te bilengguan. Ugaid ne kenà ku igkeyeyai su netuenan ku se Eleteala ma se edserihan ku. Ne netuenan ku rema se ebpekegaga sikandin ne edtuganur kedì te langun ne helevek ne insarig din kedì taman ketà te hewii ne kedlived din te egkukum kenitew.

¹³ Na Timoteo, ini se impenurù ku keykew ne elin-elin benar, ne ini imbe se rumai nu su iring te pelupandù nu. Ne itahù nu te hinawa ke kedsarig nu te Eleteala wey ke kedlimù nu te menge ruma nu su arà ke dait ne ulaula rut te sikitew ne mibpekidseveka ki Hisus. ¹⁴ Uram ka te kenà egkesembian ke benar ne penurù mekeatag ki Hisus ne insarig keykew dut te Kedesenan ne Ebpetuntul te Menusiyà ne ed-ubpà kayi te keyta ne edtavang keyta.

¹⁵ Nerineg nu ke merakel ne mibperetiyaya kayi te Asya ne midiniyuhan a ran en abpeg en si Pihilyu wey si Hirmuhinyu. ¹⁶⁻¹⁸ Ugaid ne si Unisipiru ne kenà mulà maa iring ketà, su kenà egkeyeyaan sikandin ne ebayà kedi misan kayi te bilengguan. Su ketà te kinepekeuma rin kayi te inged ne Ruma ne mibpemengà a rin taman te netuen a nikandin. Ne layun a rin ebayai kayi te bilengguan, ne ketà ne ebpekehinawa a te meluag. Ne netuenan nu rema ke dekelà ne tavang din kedì te riyà a pà te inged ne Ipusi. Iyan ku kiyug ne ibpekita te Eleteala ke tavang din kandin te telteleanan wey egkeyruwan din sikandin ketà te hewii ne kegkukuman te menge etew.

2

Insempità ni Pablo ke dait ne Ulaula dut te Menge Etew ne Eduma ki Hisus

¹ Sikew, Timoteo, ne iring te tuney ne anak ku, iluta nu ke kedsarig nu su iyan edtavang keykew ne si Hisu Kristu genat te mibpekidseveka ka kandin. ² Ne ke nerineg nu ne impenurù ku keykew diyà te sineruwan te merakel ne etew, ne arà be se ipenurù nu diyà te menge etew ne egkeserihan apey ran dema ikepenurù diyà te ruma pà ne etew.

³ Ne kenà ka egkeandek ne edtelimà te kemerehenan ne ebpekeuma kayi te kenita atag te keduma ta ki Hisu Kristu, ugaid ne ikehàt nu te tivang, ne ipandler nu iring dut te egkeserihan ne sundaru ni Hisu Kristu. ⁴ Su ke sundaru ne ebpenunuhat te mepurù din ne kenà edamung te duma ne helevek su iyan din dà edurungulan ke suhù te mepurù din kandin. ⁵ Ne idsempità ta rema te etew ne egkuya te ebpelelahuy. Su misan sikandin pà se meabet ne ebpelelahuy, ne kenà sikandin egkevehayan dut te idlalew kandin ke warà din dumai ke pepatà kandin dut te mepurù din te kinerudsù dan. ⁶ Iring kiyu red dema te etew ne ebpegelep te kebpengengawid din, warà duma ne egkeuna ne egkeuntungan dut te egkeehani rin ke kenà sikandin ded. ⁷ Pegpegitunga nu ini se migkahi ku kayi te menge sempità ku ne ke Kerenan tew ne si Hisus se ebpesabut keykew.

⁸ Na Timoteo, itahù nu ini te itungan nu mekeatag ki Hisu Kristu. Tentenuri nu te mibpebaluy sikandin ne etew egenat te kevuwaran ni David ke apù tew rengan. Ne neuyag din maa sikandin dut te kinepatey rin. Ini ve ke Meupiya ne Tudtul ne ibpemenudtul ku diyà te menge etew. ⁹ Tembù be egkerasey a guntaan su nevilanggù a iring te medmeraat ne etew. Ugaid ne misan mibakù a te sengkali kayi, ne

kenà dan egkevangel ke kebpemenudtl te Lalag te Eleteala. ¹⁰ Ketà be ne edtigkeran ku en ma lavew piya engkey ne egketemanan ku apey ke menge etew ne mibpemili te Eleteala ne ebpekerineg te lalag din ne egketau te si Hisus ne ebpeliyu kandan, su kiyug ku ne ebpekeliyu ran dema egenat te kebperetiyaya ran ki Hisu Kristu ne ebpeketelimà dan te umur ne warà edtemanan din wey warà pasar din se keupiya rin neraan en ne impenehana te Eleteala kandan.

¹¹ Ini se beseanan ne benar nevenar:
 Embiya neseveka ki en ki Hisus
 ne tuus te nekeunung ki en kandin te minatey,
 ne rumu ki en nikandin te ed-ubpà taman te taman.
¹² Embiya edtigkeran tew ke kerasey
 atag te peretiyaya tew kandin,
 ne ebpekeamung ki kandin te ebayàbayà.
 Ugaid ne embiya ibparew tew te rumu kiyu nikandin,
 ne ibparew ki rema nikandin ne kenà ki edsehipaan.
¹³ Ne misan ke itungan tew ne layun egkesembii,
 ne sikandin mulà ne egkeserihan nevenar
 su kenà edsalin sikandin dut te nekahi rin.

Ed-up-upiya kiyu te Edtuman te Kiyug te Eleteala su apey kiyu Ebpekesuhat te Hinawa Rin

¹⁴ Na ipetahù nu te itungan dut te menge etew ini se penurù ku, ne tegtehami nu sikandan te ebaag te id-etuvang te Eleteala te medengked dan se ebpelewlewaney te lalag ne warà tapek din. Su ayan imbe ne warà en iya keupianan din, nasi pà te ebpekereraat dut te peretiyaya te etew ne ebpemekerineg. ¹⁵ Up-upiani nu ve se kedtuman nu te kiyug te Eleteala su apey ka ebpekesuhat te hinawa rin. Su embiya ini se ed-ul-ulaan nu, ne warà igkeyeyai nu mekeatag te helevuk nu diyà te etuvangan din su ke kebpenurù nu rut te benar ne Lalag te Eletala ne titay batang dà. ¹⁶ Kenà ka ebpemekid-ubpu rut te menge etew ne ebpemengasak te warà tapek din te Eleteala. Su ke menge etew ne iring ketà ne ed-ebpet te kebpekepeleriyù te hinawa te rumu ran diyà te Eleteala. ¹⁷ Ini ve se penurù dan ne ebpekeiring te it-it su edradnas taman te edteredak en ke lawa te etew. Iring embe iya ketà ke penurù ni Himeneo wey si Fileto. ¹⁸ Su midsuwayan dan ke tidtu ne penurù su egkehiyen dan te neipus en ke hewii te kebanew te Eleteala te menge etew ne minatey. Tembù be ini ve se ebpemenudulen dan ne ebpekelye te itungan dut te rumu ne mibperetiyaya. ¹⁹ Ugaid ke tidtu ne penurù te Eleteala ne insevetad din ne kiter ne kenà en iya ebparin. Su ruen imbe kayi ne lalag din ne egkahi te netuenan din ke langun ne mibpekidseveka kandin. Ne ruen pà maa lalag din ne egkahi te embiya egkahi ka te mibpekidseveka ka kandin, ne kenà nu en imbe surii ke meraat ne betasan nu.

Insempita ni Pablo ke atag kayi te Sikita ne Mibperetiyaya ki Hisus Ebpekeriring te Pekeediran te Baley

²⁰ Ke baley ne rekèlè ne merakel se edsusanun te pekeediran ketà te lusud. Ruen ketà pekeediran ne mibeelan te bulawan wey pirak, ruen pà lavew mibeelan te kayu wey rumu ne midiyun ne tanà. Ruen pekeediran ne belielehà ne wey ren dà ibpehemew ke ruen kevurunan, ugaid ne ke pekeediran ne mibeelan den dà te kayu wey

ke midiyun dan ne ini ke uman gewii ne egemiten dan. ²¹ Sikitew ne menge mibperetiyyaya ne iring imbe ketà te menge pekeediran. Embiya egkiyug kiyu ne eberepantag te Eleteala ke edtehikemuney keytew, ne ed-elihuwan tew en ke meraat ne mid-ulaula tew pehaney su apey kiyu ebpekeiring te belielehà ne pekeediran ne igkenuhuni te kemuney. Su embiya arà se ed-ul-ulaan ta ne warè en idtila keytew diyà te etuvangan te Eleteala, ne duen atag tew te Eleteala su andam kiyu en misan ebmemenuwen kiyu nikandin.

²² Na Timoteo, kenà nu ve ebpengunuti se kenguwed te hinawa nu. Ugaid ne itahù nu te itungan nu ke ulaula ne metidtu, ne ke kebpeiseg te sarig nu, ke kedlimù nu te menge ruma nu wey ke melintad ne hinawa nu riyà te kandin. Langun imbe kayi se ed-ul-ulaan nu elin te menge etew ne ebpengeningeni te Kerenan tew egenat te hinawa ne midtilak. ²³ Ne idsulit ku pà igkahì keykew ini te kenà ka ed-amung-amung dut te menge etew ne ebpeep-epuley te layab te warà tapek din. Su netuenan nu te iyan din dà egketemanan ne kerimburan. ²⁴ Su ke etew ne edsugsuhuen te Kerenan ne kenà egkepakey ne epulen. Nasì pà se edtumpis te menge ruma rin, ne ebpekenenawen ke lalag din te ebpenurù, ne kenà din edsulian ke edaatdaat kandin. ²⁵ Embiya ruen ed-apul dut te ibpenurù din, ne ebpetuntayan din te mananew su kema ke edsembian te Eleteala ke itungan dan ne ebpedsendit dan ne ebpeketuntul dan en dut te benar. ²⁶ Ne ebpekeimaman dan en ne ebpekeliyu ran en ketà te selaid ni Setanas ke midlimbung kandan su apey ran ebpekeruma te kiyug din.

3

Ke Imbaag ni Pablo Mekeatag te Menge Etew ne Engkungkun ne Eduma te Eleteala

¹ Tendai nu ini se lalag ku su ketà te egkepupus en ini se dunya ne merakel se keresayan ne ebpekeuma kayi te menge etew. ² Ruen menge etew ne ginawa ren dà se ebpegitungen dan, ed-umamin dan te kearen dan, dekarak dan wey mepereyù, meharang se kebpengahikahi ran ne kenà dan en iya ed-adat te menge lukes dan. Embiya ebehayan etawa edtevangan dan ne warà te hinawa ran, ne warè en iya te itungan dan se kebpegeleteala. ³ Warà limù dan te ruma ran, ne embiya ruen igkeepes dan ne kenà dan egkepesehad ne edtevù dan te ruma ran, ebpegudar dan te mepait meraras ne lalag su warà angkà te ulaula ran, ne misan engkey en ne keupianan ne kenà dan egkiyuhun. ⁴ Kenà dan egkeserihan, ne warà metapid ne ed-ul-ulaan dan, ne sahad se kepereyù dan, ne iyan dan edtumuen se kebpataò dan te nanam ne ke Eleteala ne keluran en iya te itungan dan. ⁵ Engkungkun ne mibperetiyyaya ran te Eleteala ugaid ne kayi rà te ampew su kenà dan ebperetiyyaya te ruen gehem te Eleteala. Na pekeriyù ka te menge etew ne iring ketà.

⁶ Duen kayi te menge etew ini ne ebpemenayik diyà te ruma ne valey se ebpenurù te kenà metidtu apey ran egkelimbungi te menge meritan ne melemu ne ed-ay-ayunen. Ne ini se meritan ne nehuket en ke hinawa rin su ini se salà dan ne ke kedaduman dan te piya engkey ne kiyug dan. ⁷ Tembù be melemu ran ne eduma rut te piya engkey ne ebpenurù kandan, ugaid ne kenà dan en iya ebpekesabut ke engkey

se benar ne penurù. ⁸ Ne ini se ebpemenurù te kenà metidtu ne iyan den dà kebpenuñurù ne edlantung dan dut te benar ne penurù iring ki Iyanis wey Iyanbiris dengan te midlantung ki Moises. Su langun dan ne nelayam en te itungan ne meraat, ne ke sarig dan ne warà ebuwatan din. ⁹ Ugaid ne ini ne menge etew ne kenà ebpekeiseg te meuhet su egkepayehan te langun ne etew ke kereatey te ulaula ran iring dut te egketemanan ni Iyanis wey si Iyanbiris dengan.

Edlevundus kiyu se Ebperetiyyaya Misan Egkerehenan ki

¹⁰ Ugaid ne sikuna, Timoteo, netuenan nu en te kenà a iring ketà su netuenan nu en ke engkey ke impenurù ku wey ke ed-ul-ulaan ku wey engkey se mibpegelepan ku te egelevek. Netuenan nu en ke kedsarig ku te Eleteala, ne netuenan nu rema ke kebpenginum ku te meadsil wey ke kinepekita ku te limù dut te ruma ne menge etew wey ke keditigker ku te merasey. ¹¹ Ne netuenan nu rema ke nerasey a te kinepekesekiti kedi diyà te menge inged ne Antiyuka, Ikuniyum wey Listra. Ugaid ne ke Kerenan tew se mibpeliyu kedi dut te langun. ¹² Ne sikuna ne warà nu kepensevi te misan engkey ne etew se ebpenunuhat ki Hisu Kristu egenat te kinepekidseveka rin kandin ne ebpekesekitan. ¹³ Ne ayan se menge meraat ne etew wey ayan se ebpemenurù te kenà benar, ne ke keraat te perangey ran ne ed-isab pà. Edlimbung dan te ruma ne etew, ne egkelimbungan dan ma rema.

¹⁴ Ugaid ne sikew, Timoteo, kemali nu te mevaher ke langun ne impenurù keykew ne neperetiyyaya nu en, su netuenan nu ke menge etew ne mibpenurù keykew ne egkeserihan. ¹⁵ Ne netuenan nu te reisek ke pà taman te rekèlè ke en ne nepenurù ke en dut te impesurat te Eleteala ne lalag din. Ini ve imbe se impesurat te Eleteala se nekevehey keykew te itungan su apey ka ebpekehaked ketà te umur ne wara edtemanan din embiya si Hisu Kristu se mibperetiyyaya nu. ¹⁶ Su langun ne lalag te Eleteala ne impesurat din ne rian en iya ebpui te kandin. Ne dekelà se atag din kenita su iyan ebpayag kenita te tidtu ne penurù mekeatag kandin wey ke kiyug din, wey edawey keyta te meraat su apey ki ebpekeengked. Ne ebpemandù dema kenita te ulaula ne ebpekesuhat kandin apey ki ebpekeruma te metidtu. ¹⁷ Ini se atag dut te impemandù ne lalag ne impesurat te Eleteala su apey ke menge etew ne ebpekeperetiyyaya te Eleteala, nasi pà se ebpekepenehana te ed-ulaula te langun ne meupiaya.

4

Ruma pà ne Suhù ni Pablo ki Timoteo

¹ Na Timoteo, tehaad te si Hisu Kristu se edlived kayi su ebayàbayà te langun wey egkukum dut te menge etew ne biviyag wey ke minatey en, ne ruen idsuhù ku kenikew diyà te etuvangan te Eleteala wey si Hisu Kristu. ² Iyan ku idsuhù keykew ne kenà ka engked se ebpesabut kayi te lalag te Eleteala. Misan endei ka egketahù wey misan engkey ne hewii, ne iluta nu se kebpemenudtl nu rut te menge etew. Penurua nu ke menge etew ne ebpekesuwey. Iluta nu ve ke kebpsabut nu taman te egkerumaan dan ke lalag te Eleteala. Ne beg-eta nu ke hinawa rut te menge etew ne mibperetiyyaya gewii te ebpenurù ka kandan te mananew. ³ Iyan ku kedsuhù keykew kayi su mehaan en egkeuma arà

se hewii ne ke menge etew ne kenà edtelimà dut te benar ne penurù egenat te Eleteala. Su iyan dan egkiyuhan te ebpemineg ne ke penurù ne ebpekeayun rut te kiyug dan, su ebpememengà dan te piya engkey ne etew se ebpenehàtahà te ebpekegkeupiya te telinga ran ne arà se ebpeminehen dan. ⁴ Kenà dan edtelimaan ke benar ne penurù su iyan dan edtumuen ke mibèbeelan dà ne guhud misan kenà benar.

⁵ Ugaid ne sikew, Timoteo, ipetireng nu se keduma nu kayi te tidtu ne penurù. Ne penehana ka neraan te keditigker te kemerehenan. Es-eseka nu neraan se hinawa nu te kebpesabut nu rut te tudtul mekeatag ki Hisus te meriyù merani, ne pengimasara nu ke helevek ne imbehey keykew te Eleteala. ⁶ Su siaken, ne mehaan en egkepupus ke ebpeneytayen ku. Ugaid ne misan ebpatey a ne meupiya su imbehey ku te Eleteala ke niyawu ku su sikandin se kemuney kedi. ⁷ Ne iring te etew ne egkuya te ebpelelahuy, ne mibpegelepan ku te ed-ipus ke helevek ne imbehey kedi te Eleteala. Ne misan merehen en ne mid-upianan ku arà taman te dungguan, ne warà a mekesuwey dut te benar ne penurù misan deisek da. ⁸ Engketà be ne ruen arà impenehana te Kerenan tew ne idlalew rin kedi su metidtu se keduma ku kandin. Ini se ibehey rin ketà te akir din ne hewii te kegkukum din te menge etew, ne sikandin dà se egkukum te metidtu nevenar. Ne kenà siaken dà se edlelawan su langun te etew ne egkelimù kandin wey ebpenereng te kedlived din ne ruen dema kandan.

Ke Menge telaan ni Pablo ki Timoteo

⁹ Ay-ayuna nu pè be se kebpengkayi nu te mehaan. ¹⁰ Su mid-awà en si Demas kayi te kedi ne mibpendiyà te Tiselunika. Su iyan din pinedlabi ke keupianan din kayi te ampew te dunya. Si Kirisin se mibpendiyà te Galasiya wey si Tito se mibpendiyà te Dalmasiya. ¹¹ Si Lukas dè be ini se rumu ku. Dumaa nu pè be si Marcos ke ebpengkayi ka su ebpeketavang sikandin kedi. ¹² Si Tikikus ne impependiyà ku te Ipusi. ¹³ Embiya ebpengkayi ka ne ewita nu rà ke kumbalà ku ne mekepal ne netehak ku riya te en ki Karpus riya te Teruwasa. Ewita nu ve rema ke menge riberù ku, lavi en arà se menge surat ku.

¹⁴ Utew meraat se imped-ulaula kedi ni Alejandro ke ebpandey te galang. Ugaid ne Eleteala se edsuli kandin dut te ulaula rin ne meraat. ¹⁵ Na ingat ka kayi te etew ini su dekelà nevenar se kedlantung din kayi te penurù tew mekeatag ki Hisus.

¹⁶ Pehaney ne kineetuvang ku riya te kukuman ne warà en iya senge etew rà ne edtavang kedi. Mid-ewaan a rut te langun ne rumu ku. Ugaid ne ebuyuen ku te Eleteala ne kenà din arà penunduha se mid-ulaula ran. ¹⁷ Ugaid ne misan mid-ewaan a nikandan ne si Hisu Kristu ke Kerenan tew ne warà med-awà kedi. Kayi sikandin te uvey ku ne sikandin se mibaher te hinawa ku su apey ku igkeeneb igkepesabut ke tudtul mekeatag kandin diya te langun ne menge etew ne kenà Hudiyanen. Ne sikandin be se mibpeliyu kedi ketà te ebpekekaid kedi su iring te mibigkat a rin kayi te bèbà te buaya. ¹⁸ Ne netuanan ku te misan engkey se egketemanan ku ne meraat ne egketevangan a rin, ne ed-ewiten a rin diya te edetuan din diya te langit. Iyan be meupiya ne kenà kiyu ed-engked se edeyrey kandin taman te taman! Ne metuman be ini!

¹⁹ Menu ensi Priscila wey si Akila wey en si Unisipiru langun dan te telteleanak? ²⁰ Si Irastu ve maa ne riyà ded te Kurintu, ne si Terupimu ne netehak ku riyà te Militu su nekedaru sikandin. ²¹ Na ay-ayuna nu pè be te kebpengkayi nu te kenà pà egkeuma se kebmeadsil kayi.

Ensi Yubulu, si Pudanti, si Linus, wey si Claudia wey ke langun ne menge mibperetiyyaya kayi se ebpenginginsà ke engkey en se egketemanan nu.

²² Iyan ku kiyug ne layun ka rumai ni Hisu Kristu ke Kerenan tew, ne langun niyu ne ebpekeheram te tavang ne riyà ebpuun te Eleteala.

Arà dà se edleohan ku.

Pablo

Ke Surat ni Pablo Riyà te Ki Tito

¹ Siaken ini se edsurat ne si Pablo. Sugsuhuen a te Eleteala wey senge etew ne kedserihan ni Hisu Kristu.

Nepemili a ne impeewit ne edtavang te menge etew ne mibpemili te Eleteala apey egkevaget ke sarig dan wey apey ebpekeiseg ke nesebutan dan mekeatag te tidtu ne penduan dut te peretiyyaya tew.

² Elin dema ne insuhua kedì ne apey ran ebpekesabut te ruen ebpenerengen tew ne umur ne warà edtemanan din. Ini se umur ne warà edtemanan din ne impasad te Eleteala rengan ne kenà egketuen te wagib se edtarutarù sikandin. Su impenehana ini neraan te Eleteala te warà pà melimbag ini se kelibutan, ³ ne ketà te midtendù din ne hewii ne impayag din en ini kayi te lalag din. Na ini ve imbe se tudtul se ibpesabut ku mekeatag dut te impasad din, su midsuhù a te Eleteala ke ebpeliyu kenitew te salà tew.

⁴ Edsuratan ku sikuna, Tito, su iring ka en iya te tuney ne anak ku su seveka kiyu riyà te peretiyyaya tew ki Hisu Kristu.

Iyan ku kiyug ne egkeheram nu te tavang wey kelinew te itungan ne riyà ebpnuun te Eleteala ne Amey tew wey si Hisu Kristu ne ebpeliyu kenitew dut te salà tew.

Ini ne Mekeatag te Helevèk ni Tito ne Ebpenendù te Menge Pekilukessen te ebpeneheewit te Menge Mibperetiyyaya diyà te Punul ne Krita

⁵ Iyan ku kinetahak keykew diyà te inged ne Krita ne apey nu egkeatur ke engkey se warà pà mepasad wey apey ka ebpekepenendù te menge pekilukesen ne ebpeneheewit dut te menge mibperetiyyaya te uman senge inged iring dut te ke impemandù ku keykew mekeatag kayi. ⁶ Iyan nu tendua ne etew ne warà meraat ne ulaula rin ne igkeisuhat kandin, ne seveka rà se esawa rin, ne ke menge anak din dema ne mibperetiyyaya ki Hisus ne kenà dan egkelalaglag te menge etew su kenà dan ed-ulaula te kiyug dan dà wey kenà dan mengetunger. ⁷ Su ke etew ne egketendù ne ebpeneheewit dut te menge mibperetiyyaya ne iyan din egeweran ne helevèk te Eleteala, tembù be warà med-ulaula sikandin te meraat ne igkeisuhat kandin. Kenà kandin dà se ebpogengetkengen din, ne kenà sikandin melemu ne egkelengetan, kenà sikandin metehel ne ed-inum te ebpeketevereg, ne kenà sikandin edretem te meraat, ne kenà lelegawen te pirak ini se etew ne egketendù ne ebpeneheewit. ⁸ Ugaid ne iyan pà mulà se mesakew sikandin te piya engkey en ne etew, ne igkesuat din ke piya engkey en ne meupiya ne ed-ul-ulaan. Ne ed-erangan se ed-ul-ulaan din, metidtu sikandin, ke ulaula rin se ebpekesuhat te Eleteala, ne ed-eren te kiyug te lawa rin. ⁹ Ne ke ulaula rin ne kenà ebpekesuwey rut te tidtu ne penurù ne ingkepenuruuen kandin ne egkeserihan. Su apey arà se kebpenurù din te metidtu ne ebpekepehimbenar te menge etew, wey embiya ruen ebsparew rut te tidtu ne ibpenurù din ne igkepekita rin kandan ke kenà dan kebpeketuntul.

¹⁰ Su merakel ne etew keniyan te Krita ne kenà ebpemineg dut te tidtu ne penurù, labi en ayan se nekeruma te penurù te Hudiyansen ne

ebpeetusan ke menge mibperetiyaya, ne neekalan te ruma ran kayi te penurù dan ne warà rantek din. ¹¹ Ne peengkera nu sikandan su merakel se tiwelayà ne nehuvar dut te kebpenurù dan ne kenà tidtu su mekeyeyà se dalan dan te kebpementiyarì te pirak. ¹² Duen mevantug ne etew te sikandan ded iya ne menge etew te Krita se midlalag mekeatag kandan se egkahi te, "Ini se menge etew te Krita ne menge teruen, iring sikandan te mevurut ne binatang, menge mepauk ne iyan den dà ketehelan se egkaan." ¹³ Ne benar iya arà se migkahi ketà te senge etew, ne arà be imbe ne pekebaher ka se edawey kandan su apey ebpeketidtu sikandan te peretiyaya ran. ¹⁴ Ne med-engked dan se eduma rut te layab ne guhud ne mibèbeelan dà dut te menge Hudiyenan wey med-engked dan se eduma rut te suhù te menge etew ne mid-awà en ketà te tidtu ne penurù te Eleteala. ¹⁵ Su embiya mibmelinis en te Eleteala ke hinawa te etew, ne langun ne melinis diyà te kandin. Ugaid ne ke etew ne warà pà mibmelinis se hinawa rin te Eleteala su warà pà mibperetiyaya, ne warà dema melinis diyà te kandin su ruen meraat ne netahù te hinawa wey itungan din ne kenà din egketuenan ke engkey se meupiya wey meraat. ¹⁶ Menge etew ne iring ketà ne engkungkun ne eduma te Eleteala, ugaid ne ke ulaula ran ne kenà ebpekedruyud dut te lalag ne egemew kayi te bèbà dan. Liyuliyu se kerupangan dan, ne kenà dan eduma dut te idsuhù kandan, ne ketà ne warà en iya meupiya ne egked-ulaula ran.

2

Ke Impemandù ni Pablo Ki Tito

¹ Ugaid ne sikuna, Tito, ne iyan nu rà ipenurù ne ke titay batang dà dut te benar ne penurù te Eleteala. ² Igkahi nu rut te menge lukes ne meama ne ed-erangan dà te ed-ul-ulaan dan, ne ed-ulaula te endei se egkeedatan dan wey med-eren dan te kiyug te lawa ran. Ne mebmetidtu se kebperetiyaya ran te Eleteala, medlimù dan te menge etew, ne mebpekeantus dan se edtigker te kemerehenan.

³ Engketà ded maa ke kebpenurù nu rut te lukes ne memeritan te iyan dan ul-ulaa ne ebpekesuhat te hinawa te Eleteala. Kenà dan medseserupet, kenà dan med-inum te ebpeketeveryeg. Iyan pà mulà se mebpenurù dan te meupiya ne ulaula ⁴ su apey imbe ini se egehuruwan dut te menge menguwed pà ne memeritan te kedlimù te esawa ran wey menge anak dan. ⁵ Ebpmenduan dan dema ke menge menguwed pà ne memeritan te med-eren dan te kiyug dan dut te itungan wey lawa ran. Ne iyan dan dà edurungulan ne kadtuganur te baley ran wey meadat te esawa ran wey ke lalag te esawa ran ne ebpminehen dan. Su embiya ini se ed-ul-ulaan dan ne kenà egkesumpalit ke lalag te Eleteala.

⁶ Engketà ded dema ke kebpenurù nu te menge kenakan te med-eren dan te kiyug te itungan wey lawa ran. ⁷ Ne sikuna imbe, Tito, ne ipekita nu se meupiya ne ulaula nu ne egketularan su sikuna se egkeiringan dan. Ne embiya ebpenurù ka, ne tidtu te hinawa nu te kebpenurù su apey ran egkekita se tidtu se keykew ne peretiyaya. ⁸ Ne uram ka te kebpengahikahi nu ne egenat dut te tidtu ne peretiyaya ta su apey kenà egkesewayan. Su embiya ini se ed-ul-ulaan nu, ne egkeyeyaan ke kunterà nu ne ebpekeawà su warà ma idsawey ran dut te penurù ta.

⁹ Ne ke menge sugsugsuhuen ne mibperetiyaya en, ne igkahi nu kandan te mebperumruma ran dut te langun ne suhùsuhù kandan su apey ini se ebpengemuney kandan ne egkesuat. Kenà dan mebpenumpan, ¹⁰ kenà dan mebpemenakew, ugaid ne layun dan mebekita te langun ne ulaula ran ne egkeserihan. Su embiya iring ketà ne langun ne ed-ul-ulaan dan ne meupiya, ne ed-iseg se kegkeinesa rut te menge etew kayi te tidtu ne penurù te Eleteala ne ebpeliyu kenitew.

¹¹ Su impekita en kenitew te Eleteala ke tavang din su apey langun te menge etew ne ebpekeliyu dut te kedusa te salà dan. ¹² Ne ini se tavang ne impekita te Eleteala kenitew se mibpenurù en kenitew te ed-engkeran ke ulaula ne kenà ebpekesuhat te hinawa rin, abpeg ke langun ne kiyug te lawa tew kayi te ampew te dunya. Ne ed-erenen tew ke kiyug te itungan wey lawa tew su apey langun ne ulaula tew taman te kayi ki pà te ampew te dunya ne metidtu wey ebpekesuhat te hinawa te Eleteala. ¹³ Ini rà be se ed-ul-ulaan tew te kedadahad tew ketà te meupiya ne Hewii ne ebpenerengen tew ne egkekita ta ke ed-andlag ne raman din dut te kedlived te Eleteala ne mekegehem ne si Hisu Kristu ke ebpeliyu kenitew. ¹⁴ Ne imbeliwas din ke lawa rin ketà te kinepatey rin su apeymekeliyu kiyu te kinekeuripen te salà tew wey apey ebmetilak ke hinawa tew. Ne insivey ki nikandin ne kandin ne sakup ne mibehayan ki nikandin te kiyug te ed-ulaula te meupiya.

¹⁵ Ne ini imbe iya te migkahi ku, Tito, se ibpenurù nu te menge etew keniyan. Begeta nu sikandan ne kenà ka alang-alang ne ebangan te ulaula ran ne meraat, su ruen ketengdanan ne imbehey kenikew te Eleteala. Kenà meupiya ne egkesudian ka te menge etew.

3

Penduan ne Ibped-ulaula te Menge Mibperetiyaya

¹ Igkahi nu, Tito, rut te menge mibperetiyaya keniyan te med-adat dan dut te menge mepurù te inged dan wey ke menge ruma ne ruen ketengdanan din. Medtuman dan dut te menge suhuan kandan, ne layun dan mebpenehana te ulaula ne meupiya. ² Igkahi nu kandan te kenà dan med-ituk te ruma ran, ne kenà dan medretem te meraat. Ugaid ne iyan dan ul-ulaa ne ebpeed-edatey wey mebpesegsehiyey ne ibpekita ke ketulengeran dan te langun ne menge etew.

³ Su sikitew ne menge mibperetiyaya ne rengan ne menge merupangdupang ki, kenà ki meperumaruma, ne warà ki meketuntul te tidtu ne penurù. Nengeuripen ki rut te langun ne kiyug tew rà, ne iyan dà neketahù kayi te hinawa ta ne meraat ne ebpekesakit te hinawa te ruma ta wey ebpesigsihiyey. Neepesan ki te menge etew, ne neepes ki red dema kandan. ⁴ Ugaid ne ketà te neumaan ki en dut te kegkeyru wey limù te Eleteala ke ebpeliyu kenitew, ⁵ ne ketà kiyu nikandin impelyu dut te salà tew. Ne kenà egenat dut te meupiya ne mid-ulaula tew se kebpeliyu rin kenitew, ugaid ne egenat en te kandin ne kegkeyru. Impelyu ki nikandin dut te salà tew impelevayà te midlùluan ki nikandin ne impesaup ki pà maa impeanak sabap dut te gehem te Kedesenan ne Ebpetuntul te Menusiyà ne mibehey kenitew te behu ne umur. ⁶ Su mibehayan ki en te Eleteala te dekelà ne tavang din su pinepengkayi rin en ke Kedesenan ne Ebpetuntul te

Menusiyà impepevayà ki Hisu Kristu ke ebpeliyu kenitew. ⁷ Ne ketà be te tavang din kenitew impepevayà te kinepatey ni Hisus se kinemetidtu tew riyà te etuvangan din, ne nevaluy ki nikandin ne menge anak din. Tembù be ebpekehaked ki te umur ne warà edtemanan din ne ke ebpenerengen tew. ⁸ Ini ve iya, Tito, se langun ne menge lalag ku ne benar.

Kiyug ku ne idtahamtaham nu ini ibpenurù su apey ke menge etew ne mibperetiyyaya te Eleteala ne egkeinesa ne ebpegelep te ulaula ne meupiya, su keupianan ini wey berekantag dema te langun dan. ⁹ Ugaid ne kenà ka ed-amung-amung dut te ibpelewlewaney ne warà rantek din wey layab ne menge guhud te kepuunpuun. Ne kenà ka ebpemekid-ubpu dut te kenà ebpemekedsuhatey ne lalag wey ke ibpelewlewaney te menge etew mekeatag te penduan ne intahak ki Moises rengan. Ini ne kenà ebpeketavang su warà en iya rantek din! ¹⁰ Ne embiya ruen etew ne eguvan te ed-upekatan te menge mibperetiyyaya, ne dewaya nu. Ne embiya kenà ebpemineg, ne seupi nu dewaya. Ne embiya kenà pà ebpemineg, ne belehara nu en. ¹¹ Su ketà ne egketuenan nu ne nereetan en se itungan din ne eberedusaen sikandin, ne ke salà din se tuus te nekesuwéy sikandin.

Ke Mewri ne Penduan ni Pablo

¹² Embiya ebpekeuma si Artimas etawa si Tikikus se edsuhuen ku keniyan te keniyan, ne penamantaman ka te kebpekibalak nu kedi diyà te inged ne Nikapulis su nekepegitung a te ed-ubpà e pà riyà taman te ebpekesahad ke hewii ne meadsil. ¹³ Penamantaman ka rema te endei se kegaga nu te edtavang ki Sinas ke ebugadu wey si Apulu te ked-ipanew ran, ne tugenura nu ke ruen kurang dan. ¹⁴ Ne penurua nu ke menge suled tew keniyan te meguru ran te ebpegelep te ulaula ne meupiya su apey ran ebpeketavang te menge etew ne egkepesangan su apey ke keupiya te peretiyyaya ran ne egkekita.

¹⁵ Langun te menge ruma ku kayi ne elin ebpenginginsà mekeatag te sikuna keniyan. Ne ebpenginginsà a rema rut te menge ruma tew keniyan ne mibperetiyyaya ke engkey en se egketemtemanan dan?

Iyan ku kiyug ne langun niyu ne ebpekeheram te tavang te Eleteala.

Arà dà taman.

Pablo

Ke Surat ni Pablo Riyà te Ki Filemon

¹ Siaken ini se edsurat ne si Pablo elin si Timoteo ke suled tew te ebperetiyaya. Ini ad te bilengguan su atag dut te kebpsabut ku mekeatag ki Hisu Kristu.

Edsuratan dey sikuna, Filemon, ne sepekat ne igkelimù dey ne rumar ey dema te ebpesabut mekeatag ki Hisus, ² wey riyà dema te ki Epiya ne senge etew ne meritan ne suled tew te ebperetiyaya, wey ki Arkipus dema ne rumar tew te ebpekibunù ki Setanas ke datù te pekaid, wey taman dut te langun ne mibperetiyaya ne egkevurun keniyan te baley nu.

³ Iyan ku kiyug ne egkeheram niyu te tavang wey kelinew ne itungan ne riyà ebpun te Eleteala ne Amey tew wey si Hisu Kristu ke Kerenan tew.

Ini ne Mekeatag te Kedsarig ni Filemon ki Hisus wey ke limù din dut te langun ne Mibperetiyaya

⁴ Filemon, uman a ebpengeningen te Eleteala ne idragkes ku sikuna, ne ibpeselamat ku rema kandin mekeatag kenikew. ⁵ Su tatap ne egkerineg ku ke limù nu rut te langun ne mibperetiyaya keniyan wey ke kedsarig nu ki Hisu Kristu ke Kerenan tew. ⁶ Iyan ku kebpengeningen te kenikew ne ke kegkevagkes te hinawa niyu te menge mibperetiyaya se ebpeiseg apey egkeumani ke nesebutan niyu dut te langun ne keupianan tew ne kayi ebpun te kebpekidseveka tew ki Hisu Kristu. ⁷ Su ketà te nerineg ku mekeatag te limù nu, Filemon, dut te menge rumar nu, ne nehalew a nevenar wey ke hinawa ku ne neegaran su midtihel nu kun ke hinawa rut te langun ne mibperetiyaya.

Ke Pemuyù ni Pablo diyà te ki Filemon Mekeatag ki Unisimus

⁸ Na Filemon, duen ini ignganey ku kenikew. Ne kenà a egkealang-alang te edsuhù kenikew te ed-ulaula ke engkey se dait ne ulaula su atag dut te ketehel ku te kedserihan a ni Hisu Kristu, ⁹ ugaid ne ignganey ku rà su sabap te rekela ne limù ku kenikew. Ne lukes ad dema ne guntaani ne ini a te bilengguan atag dut te kebpenurù ku mekeatag ki Hisu Kristu. ¹⁰ Tembù be ini se ignganey ku kenikew ne mekeatag ki Unisimus ne iring te anak ku. Uya, iring en sikandin te tuney ne anak ku su ke peretiyaya rin ne sabap te penurù ku gewii ku ini te bilengguan. ¹¹ Rengan ne si Unisimus ini ne iring te warà pantag din kenikew, ugaid ne gunteani ve ne duen en pantag din uman kenikew wey kediey.

¹² Na ibpeuli ku pè be sikandin diyà te kenikew misan merasey en te hinawa ku se kebpeksuwey rey. ¹³ Egkesuat a perem ne kayi ebpekeubpà sikandin te kedi su apey a rin egketevangi timbang sikuna taman te ini e pà te bilengguan su mekeatag te kebpsabut ku rut te Meupiya ne Tuditul. ¹⁴ Ugaid ne kenà ku ve ini ed-ul-ulaan ke kenà keniyan ded ebpekepuun te kenikew su kenà ku ebpengunaan ke hinawa nu. Su iyan meupiya ne egenat en te keputian te atey nu se kedaavang nu kedi.

¹⁵ Kalu ke iyan kinepekeawà ni Unisimus kenian te kenikew te mehaan dà ne ketau red te Eleteala su apey edlived sikandin kenian te kenikew ne egkekemuney nu red su edtireneb en. ¹⁶ Na guntaani ve ne kenà uripen nu rà dè duen sikandin su suled nu en sabap dut te peretiyaya nu ne igkelimù nu. Ne dekelà ku en sikandin te hinawa! Ugaid ne iyan ka pè be edlewanan se kenà uripen nu rà su suled nu en dema te ebperetiyaya te Kerenan tew ne si Hisus!

¹⁷ Na engketà be arà embiya benar pà ne edsuled ki, ne telimaa nu sikandin iring te siaken ded. ¹⁸ Ne embiya ruen meraat ne mid-ulaula rin kenikew, etawa ruen utang din kenikew, ne ed-ekuwen ku en. ¹⁹ Na intengi nu ini se surat ku ne egkahi te: Siak imbe si Pablo se ebayad kenikew. Kalu ke warà atag din te kebpetanud ku kenikew te ruen utang nu kediey su embiya kenà kayi ebpuun te kediey ne penurù ne warà nu merineg ke kebpeliyu te Eleteala te menge etew. ²⁰ Tembù be, suled ku, kelimùlimù be ne ul-ulaa nu ini kedì su neseveka ki ki Hisu Kristu ke Kerenan tew. Helawa nu ke hinawa ku su edsusuled kiyu te kebperetiyaya tew kandin.

²¹ Ne kenà eduwaruwa se hinawa ku kayi te kedsurati ku kenikew ne edumaan nu ini se mibuyù ku kenikew, ne netuenan ku rema se kenà arà dà se ignganey ku kenikew se ed-ul-ulaaan nu ugaid ne lavi pà maa. ²² Seveka maa ne kelimùlimù ne penehana ke en te edetengan ku su dekelà se penerengan ku te egketavak te Eleteala ke pengeningeni niyu mekeatag kedì ne ebpekeliyu a kayi apey a ebpekelived kenian te keniyu.

²³ Si Ipapras ini se duma ku kayi te bilengguan se ebpenginginsà mekeatag te sikiyu kenian, su nevilanggù sikandin dema sabap dut te kedsarig din ki Hisu Kristu. ²⁴ Elin si Marcos, si Aristarkus, si Demas, wey si Lucas ne menge ruma ku te ebpesabut te lalag te Eleteala ne ebpenginginsà dan dema te sikiyu kenian.

²⁵ Iyan ku kiyug ne langun niyu ne ebpekeheram te tavang ne riyà ebpuun te Kerenan tew ne si Hisu Kristu.

Arà dà taman.
Pablo

Ke Surat Diyà te Menge Hibruhanen

*Ke Eleteala se Impesabutdin ke Anak din te Kiyug din ne Ibpesabut
diyà te menge Etew*

¹ Rengan ne ruen impesabut te Eleteala riyà te menge keep-epuan tew. Merakel se impesabut din kandan ne merakel dema se impetiralan din kandan, ugaid ne kayi te menge etew ne mibpelambas te lalag te Eleteala ne impesabut din ini su apey sikandan se ebpemenudtul diyà te menge etew. ² Ugaid ne guntaani manen, ne iyan en maa ibpesabut dut te Eleteala kenitew ne ibpepevayà din dut te Anak din si Hisus. Su sikandin se impelimbag din kayi te dunya, ne sikandin dema ke nepemili te Eleteala ne ebpegkemunayen dut te langun taman. ³ Ne ke anlag dut te raman te Eleteala ne egkekita en kayi te Anak din, ne langun ne riyà te Eleteala ne kayi en dema te Anak din. Warà mibiraan dan iya. Ne sikandin se egawed dut te langun ne nelimbag kayi te dunya su kayi ebpun te gehem dut te lalag din. Ne sikandin dema se mibaal te ebpekepeliyu te menge etew dut te salà din. Ne guna su nepasad din en, ne mid-ulì en diyà te langit ne riyà miibpinuu te egkekewanen te Eleteala ne warà repeng te kedadù din.

Ke Anak te Eleteala se Mepurù pà Dut te Menge Suluhuen

⁴ Ketà be ne ke Anak te Eleteala ne iyan pà mepurù dut te langun ne suluhuen. Ne misan ke ngaran ne imbehey te Eleteala kandin ne mepurù pà ini dut te ngaran ne imbehey rin dut te menge suluhuen din. ⁵ Su warà megkahi ke Eleteala diyà te menge suluhuen din iring te migkahi rin te Anak din, ke sikandin te,

“Sikew ke Anak ku,
guntaani ne ebpeketaunen ku se siak se Amey nu.”

Ne warà din mekahi diyà te suluhuen te,

“Siaken ke Amey nu,
ne sikuna ke Anak ku.”

⁶ Ugaid ne ketà te kedsuhua en dut te Eleteala dut te mekegehem ne Anak din kayi te ampew te dunya ne iyan din migkahi se,

“Sikiyu ne menge suluhuen ku,
ne erapa niyu sikandin.”

⁷ Ne iyan nekahai te Eleteala mekeatag dut te suluhuen din se,

“Sikandan se edsuhuen ku
iring te keramag etawa regreg te apuy
se edtuman te kiyug ku.”

⁸ Ugaid ne iyan migkahi te Eleteala dut te Anak din mulà se,

“Ke kedadù nu, Eleteala,
ne warà edtemanan din.

Ne ke kedadù nu dut te menge etew nu
ne metidtu rà nevenar.

⁹ Su iyan nu kiyug ke metidtu ne ulaula,
ne igkeepesi nu ke ulaula ne meraat.

Tembù be siaken ke Eleteala nu se mibpemili kenikew,
ne imbehey ku keykew ke kehelawan

su mid-edatan ku sikew
muna pà dut te menge rumu nu.”

¹⁰ Ne ruen pà duma ne migkahi te Eleteala diyà te Anak din te,
“Pehaney ne sikuna, Kerenan,
se midlimbag kayi te dunya,
ne sikuna red se mibaal te langit.

¹¹ Langun ketà ne egkerundus,
ugaid ne sikuna mulà ne warà kegkeparin nu.
Su iring te velegkas ne daan en se kegkerundus dut te langit wey tanà.

¹² Su iring te kedluklukuna nu te belegkas
se kedluklukuna nu te langit wey tanà
su edsembian nu te vehu.

Ugaid ne sikuna mulà, ne warà kegkeparin nu,
ne ke umur nu ne warà mulà edtemanan din.”

¹³ Ne warà suluhuen te Eleteala ne migkehiyan din iring te migkahi
rin dut te Anak din, ke sikandin te,
“Kayi ka pinuu te egkekewanu ku

taman te kenà ku pà ebpenggiekan ke kunterà nu
ne egkevaluy ku sìkandan ne ebpemunasen te paa nu.”

¹⁴ Su ini se menge suluhuen te Eleteala, ne edsugsuhuen din dà iya
sikandan su ebpetevangen dut te menge etew ne midtelimà dut te
umur ne warà edtemanan din.

2

Ebpemineg Kiyu iya rut te Migkahi ni Hisus Mekeatag te Kebpeliyu Keytew

¹ Ne engketà be te iyan impesabut dut te impayag te Eleteala kenitew
ne ke Anak din, ne egawed kiyu te benar dut te impayag kenitew
su apey ki kenà egkepeneheewit te kebpekesuwey tew. ² Ke menge
suhù te Eleteala ne nebpeneheewit dut te menge suluhuen din diyà te
keep-epuan tew ne egkeserihan nevenar, tembù be ke etew ne warà
meduma ketà, ne edusaan sikandin te endei se taman ne kevahat te
salà ne neveelan din. ³ Ne embiya iring ketà, ne iyan pè be kenà
muna pà se kedusa te Eleteala keytew embiya kenà ki eduma rut
te tudtul mekeatag te mepmeupiya ne ralan te kebpeliyu te Eleteala
rut te menge etew. Su si Hisus en iya ke Kerenan tew se neuna ne
nekepenudtul te kebpeliyu kenitew, ne ke menge etew ne nekerineg
kandin se nekepenitihu dan te ini ne benar iya. ⁴ Ne impekita rema
te Eleteala se benar ini se mibpemenudtul dan kayi te mekegehem ne
tuus, menge mekegeyip wey mekeinuinu ne ulaula ne mibpeveelan din
kandan. Ne rumu pè ne impekita rin se benar ini su ruen menge ketau
dut te Kedesenan ne Ebpetuntul te Menusiyà ne imbehey rin diyà te
menge mibperetiaya su migkiyuan din.

*Mibpeembavà si Hisus ne Mibpebaluy ne Etew ne Mibpebpatay su
imbeliwas din te Langun tew*

⁵ Na kenà ke suluhuen te Eleteala se mibpemili din te kedadù diyà te
behu ne dunya keuremà su ini se edleahan ku kayi. ⁶ Ugaid ne iyan
din mibpemili ke menge etew rin ne edatù. Su iring dut te impesurat
diyà te Lalag te Eleteala ne ruen migkahi te,

“Na Eleteala, meambe ke edtentenuran nu ke menge etew?

Ne meambe ke igkelilingey nu nevenar se etew rà dè duen?

7 Su pehaney ne mibeelan nu sikandan
ne mevavà pà dut te menge suluhuen.
Ugaid ne mehaan dà ini;
su ibpepurù nu en sikandan
te egkereyù wey egkeedatan

8 su sikandan se ebperetuen nu rut te langun taman.”

Kayi te migkahi te Eleteala ne ebperetuen din ke menge etew dut te langun taman, ne nesebutan tew te warà misan engkey en ne kenà dan ebpekevayàbayà keuremà. Ugaid ne warà pà meuma arà, su taman en guntaani ne warà tew pà mekita ke menge etew ne ebayàbayà te langun taman. 9 Ugaid ne iyan tew netuenan ne ke kinedatù en ni Hisus, misan mehaan dà ne hewii se kinepeembavà kandin rut te menge suluhuen te Eleteala. Su egenat dut te dekelà ne tavang te Eleteala dut te sikitew ne menge etew, ne mibpebaluy si Hisus ne etew ne mibpebpatey su imbeliwas din te langun tew ne menge etew. Na guntaani ne sikandin en se egkereyù wey egkeedatan su ke kinekerasey rin te kebpatey rin atag dut te langun ne menge etew.

10 Netahù te itungan din ke Eleteala ne arà se ed-ul-ulaan din su ke Eleteala se midlimbag te langun taman, ne mibeelan din ini su edeyù kandin. Ne metidu nevenar ke mid-ulaula rin su apey ke merakel ne anak din se ebpekeubpà diyà te kandin ne ebpekeamung dut te kebpurù kandin. Mid-ulaula rin ini dut te kinesuhua rin ki Hisus kayi te ampew te dunya se edresayen su apey rin ibpekita te warà deisek dà ne kurang ni Hisus te kebpekeliyu tew wey apey sikandin se egkeevaluy ne egkeunutan tew ne ebpekeewit kenitew te ed-upbà diyà te Amey rin. 11 Eleteala se Amey ni Hisus ne edtilak te hinawa te menge etew rut te salà dan, ne Eleteala rema se Amey dut te langun tew ne midtilak en ni Hisus ke salà tew. Tembù be kenà din igkeyeyai sikandin te egkahi te sikitew ne menge suled din. 12 Su ruen ingkesurat ne migkahi rin dut te Eleteala te,

“Na Eleteala, ebaketuenan ku rut te menge suled ku
mekeatag keykew;
ne ebpemayukbayuk a te kedeyua ku keykew
diyà te kevurunan dan.”

13 Ne ruen pà ruma ne migkahi rin te,
“Egkeserihan ku te Eleteala.”
Ne ruen pà ne migkahi rin te,
“Ini a ebpekiduma te menge anak te Eleteala
ne insarig din kediey.”

14 Ayan se mid-ingaranan ni Hisus te menge anak te Eleteala ne sikitew red ne etew rà dè duen, tembù be mibpebaluy si Hisus ne etew iring kenitew. Mid-ulaula rin ini su apey rin egketalew ke datù te pekaid ne ed-ingeranan dema ki Setanas. Ne netalew rin sikandin ketà te kinepebpatey rin atag kenitew, su kayi te kinepatey rin ne inawà din ke gehem dut te datù te pekaid te ed-ewit te menge etew riyà te kepepatey ne warà edtemanan din. 15 Ne kayi te mid-ulaula rin ini ne mibaal sikandin te ralan su apey meawà ke andek te menge etew te kepepatey, su igenat te kegketautau ran ne nengeuripen dan en te andek dan te kepepatey. 16 Engkètà be ne mepayag nevenar ne

kenà iyan din midtevangan ne menge suluhuen, ugaid ne iyan din midtevangan ne sikitew ke menge inenakan ni Abraham.¹⁷ Tembù be mibpebaluy sikandin ne etew iring dut te sikitew ne menge suled din. Mid-ulaula ini su apey rin egkeherami ke langun ne igkerasey tew apey ebmetau sikandin ne egkeyru kenitew wey apey sikandin se egkevaluy ne mepurù dut te terebpelengesa ne egkedserihan ne ebpeninindek kenitew diyà te etuvangan te Eleteala su apey egkepesahad te Eleteala ke salà tew.¹⁸ Engketà be ne netuenan din en se kadtavang din nevenar dut te menge etew ne ebpenggeraman, su sikandin dema se mibpenggeraman wey midrasey.

3

Iyan pà Mepurù si Hisus ki Moises

¹ Na menge suled ku ne mibperetiyyaya en ki Hisus, ne nepemili en dema te Eleteala te egkevaluy ne menge etew rin, ne iyan niyu pegpegitunga ne si Hisus. Su sikandin ke midsuhù te Eleteala kayi te ampew te dunya te ebpesabut mekeatag te kebpekeperetiyyaya tew wey apey sikandin ke mepurù te terebpelengesa ne ebpeninindek kenitew diyà te Eleteala.² Ne ini te mid-ulaula rin dut te impehelevk kandin te Eleteala, ne mid-up-upianan din se kinetumana rin dut te langun iring ki Moises dengan te mid-up-upianan din se kinetumana rin dut te impehelevk kandin te Eleteala te kinepeneheewita rin dut te menge etew te Eleteala ne ebpekeiring dut te sakup te lusud te valey te Eleteala.³ Ugaid ne iyan pà mepurù si Hisus ki Moises, su iring dut te etew ne ebevaley ne iyan pà sikandin egkevantug, kenà ke imbevaley rin.⁴ Su langun te baley ne ruen mibaal ketà, ugaid ne ke Eleteala ne iyan mibaal te langun taman.

⁵ Na misan sugsuhuen dà te Eleteala si Moises, ne mid-up-upianan din se kineruma rin te Eleteala te kinepeneheewita rin dut te menge etew ne ebpekeiring te sakup dut te lusud te valey te Eleteala. Su sikandin se ebpenudtul mekeatag te ibpesabut te Eleteala keuremà.⁶ Ugaid ne si Hisu Kristu, ne sikandin ke Anak te Eleteala ne ebpengmuney dut te valey, ne mid-up-upianan din dema se kinetumana rin dut te langun ne mibpeveelan kandin te Amey rin. Ne sikitew ve ke duma ki Hisus, ne ebpekeiring kiyu te sakup te lusud te valey te Eleteala embiya mevaher se kineperetiyyaya tew kandin wey kenà kiyu eduwaruwa atag te ebpenerengen tew ne impasad te Eleteala.

Ke Inged ne Ed-imelayan te Kemerehenan ne Impenehana te Eleteala rut te Ebperetiyyaya Kandin

⁷ Engketà be ne ed-ulaula kiyu te iring te nekahai rut te Kedesenan ne Ebpetuntul te Menusiyà ne egkahi te,
 “Na, embiya egkerineg niyu ke Lalag te Eleteala,
⁸ dumai niyu ne kenà kew pekeresen te ulu niyu
 iring dut te keep-epuan niyu rengan
 ne mid-atu te Eleteala.
 Su gewii te riyà dan te tanà ne kenà egkeubpaan te etew,
 ne migeraman dan ke Eleteala
 ke edusaan din sikandan dut te salà dan.”
⁹ Ne iyan nekahai te Eleteala mekeatag kandan se,
 “Misan pà te nekita ran en

ke mekegeyip ne ulaula ku
lusud te neked-epat nepulù ne rahun,
ne impeiseg den pà lavew
ke kebpenggeram dan kedi.

¹⁰ Tembù be neepes a kandan ne migkahi a te,
'Ini se menge etew ne layun edsuwey ke hinawa ran kedi
ne kenà dan edumaan ke impemandù ku.'
¹¹ Uya, neepes ad iya ne mibpenendan ad te,
'Kenà dan iya nevenar ebpekelusud
ketà te inged ne ebpekeimeley ran dut te kemerehan
ne ibehey ku perem kandan.'

¹² Engketà be menge suled ku, uram-uram kew nevenar su apey
warà seveka keniyu ne eduma te meraatey ne itungan ne ed-awà
se peretiyyaya rin te Eleteala, su arà se kebpekeperiyù tew rut te
Eleteala ne warà kemetayen din. ¹³ Ugaid ne taman te ruen pà gewii
tew te keduma te Lalag te Eleteala ne tevengaani niyu te ebpeiseg
te peretiyyaya niyu su apey kenà ebmeresen te ulu niyu ne kenà kew
eduma te Eleteala su mid-ekalan niyu sikandin dut te salà niyu. ¹⁴ Su
embiya egewaner tew te mevaher ini se sarig tew te behu ki pà
mebperetiyyaya ki Hisus taman te ketepusan, ne ebpekeruma ki kandin
dut te langun ne imbehey kandin te Amey rin. ¹⁵ Su ini se impesurat
ne Lalag te Eleteala ne egkahi te,
'Na, embiya egkerineg niyu ke lalag te Eleteala,
dumai niyu ne kenà kew pekeresen te ulu niyu
iring dut te keep-epuan niyu rengan
ne mid-atu te Eleteala.'

¹⁶ Ne engkey ve ayan se menge etew ne nekerineg te lalag te Eleteala,
ugaid ne mid-atu kandin? Ew, sikandan ke menge Hudiyanan ne
mibpeneheewit ni Moises te kineawà dan diyà te inged ne Ihiptu rut
te kinepengunguripena kandan. ¹⁷ Ne engkey pè be maa arà se menge
etew ne nepeukan te Eleteala lusud te neked-epat nepulù ne rahun?
Ew, sikandan ke mid-ulaula te meraatey, tembù be midusaan dan te
Eleteala te kinepematey ran diyà te tanà ne kenà egkeubpaan te etew.
¹⁸ Ne engkey ve arà se menge etew ne midtendanan te Eleteala te kenà
dan iya nevenar ebpekelusud ketà te inged ne ebpekeimeley ran ne
ibehey rin perem kandan? Sikandan ded iya ayan se menge etew ne
mid-atu kandin. ¹⁹ Engketà be ne netuenan tew se ayan ne menge
etew rengan ne warà en iya mekelusud ketà te inged ne impenehana
te Eleteala kandan su warà dan mebperetiyyaya kandin.

4

¹ Na in-amung ki en rema te Eleteala dut te impasad din te
ebpekelusud dut te inged ne impenehana rin ne ebpeimelayan din
te menge etew rin. Tembù be ed-uram kiyu su apey warà seveka rà
ne egketahak te kedlusud ketà te inged ne ed-imelayan ne impasad
din. ² Su sikitew rema, ne nerineg tew en ke Meupiya ne Tudtul iring
dut te keep-epuan tew rengan. Ugaid ne misan nerineg dan arà, ne
warà keupianan ne netelimà dan su matag dan pemineha ne warà dan
peretiyyaya. ³ Na sikitew ve mulà se mibperetiyyaya en, ne ebpekelusud
kiyu en ketà te inged ne egkeimelayan ta ne impasad din. Su ruen

migkahi te Eleteala mekeatag te keep-epuan tew rengan, ke sikandin te,

“Neepes ad iya ne mibpenendan ad te,

‘Kenà dan iya nevenar ebpekelusud

ketà te inged ne ebpekeimeley ran dut te kemerehenan
ne ibehey ku perem kandan!’ ”

Migkahi ini te Eleteala te misan neipus din en te ebpenehana ini se inged ne ebpeimelayan din egenat dut te kinekeipus din te edlimbag kayi te dunya. ⁴ Netuenan tew se impenehana rin en ini su ruen impesurat ne lalag din ne egkahi te, “Ketà te ikepitu rin ne hewii ne mid-imeley ke Eleteala su langun ne helevok din ne neipus en.”

⁵ Ne misan neandam en ini se inged ne ed-imelayan ne kenà ebpekelusud ke menge etew ne kenà ebperetiyyaya su ruen pà maa kayi te Berekat ne Surat ne impesurat din mekeatag te ini se inged ne ed-imelayan ne egkahi te, “Kenà dan nevenar ebpekelusud ketà te inged ne ebpekeimeley ran ne ibehey ku perem kandan.” ⁶ Su rengan ne ke neuna ne menge etew ne nekerineg dut te Meupiya ne Tudtul mekeatag ketà te inged ne ebpeimelayan, ne warà dan mekelusud su warà den ma mebperetiyyaya. Ugaid ne ruen ded lavew ketà se ebpekelusud te inged ne ebpeimelayan ne impenehana rin. ⁷ Su mibehayan pà maa lavew te Eleteala ke menge etew te hewii te kedtelimaa ran dut te impasad din te ke hewii ne ini en. Netuenan ta arà su guna su nekebpira en nehatus ne rahun se midsahad ketà te hewii ne warà mekelusud ayan se menge etew ne meresen se ulu rin ne ruen impekahi te Eleteala ki David ne egkahi te,

“Na embiya egkerineg niyu ke lalag te Eleteala,

dumai niyu ne kenà kew pekeresen te ulu niyu.”

⁸ Ne kayi te lalag ni David ne netuenan tew te kenà ke meupiya ne inged ne Kanaan ne mibpeneheewitan ni Josue rut te menge Hudiyanan se inged ne ebpeimelayan ne impasad te Eleteala. Su embiya arà en ke ebpeimelayan din ne inged ne nekah te Eleteala, ne warà din en maa kehiya se duen pà duma ne andew. ⁹ Ketà be ne netuenan tew te ruen pà hewii dut te menge etew te Eleteala te kebpekelusud ketà te inged ne ebpeimelayan iring dut te kineimeley te Eleteala ketà te ikepitu rin ne hewii te nekeipus sikandin te kinelimbaha rin te langun taman kayi te dunya. ¹⁰ Su langun ne edlusud ketà te inged ne ebpeimelayan ne impasad te Eleteala, ne ed-imeley rema sikandan dut te helevok dan iring dut te kineimeley te Eleteala rut te kinehelevok din te kinelimbaha rin te dunya. ¹¹ Engketà be ne ebpenemaran tew su apey kiyu ebpekelusud ketà te inged ne ebpeimelayan ne impasad te Eleteala. Ne ed-uram kiyu su apey kenà kiyu mekeiring dut te menge etew rengan ne warà dan mekelusud su warà dan peretiyyaya ke migkahi te Eleteala kandan.

¹² Ke Lalag te Eleteala ne ebpekeiring te biviyag su mekegehem. Ne lavi pà se keharang te Lalag te Eleteala dut te memeharang ne sundang ne idtibas te etew ne medmeralem se id-uteng din. Ebpekeiring ketà su idtempayar din ke itungan wey ke kiyug dut te menge etew ne ed-eles te hinawa rin. ¹³ Su warà misan engkey en ne nelimbag te Eleteala ne ebpekeeles kandin, su langun ne mepmepayag diyà te etuvangan din.

Ne ketà te kegkukum din kenitew ne egkepenudtl iya diyà te kandin ke langun ne ned-ulaula tew kayi te ampew te dunya.

Si Hisus se Ebpeninindeg Kenitew diyà te Etuvangan te Eleteala

¹⁴ Engketà be ne egewaran tew te mevaher ke kebperetiyyaya tew ki Hisus ke Anak te Eleteala. Su mibpendiyan en ke Mepurù te Terebpelengesa tew te langit ne riyan en te etuvangan te Eleteala se ebpeninindeg kenitew. ¹⁵ Ne ini se ebpeninindeg kenitew ne nesebutan din se kebmeluvey tew su piya engkey en ne eberangan te kebpenggeram ni Setanas kenitew ne neheraman din en dut te hewii rin pà kayi te ampew te dunya, ugaid ne warà en iya megaga sikandin. ¹⁶ Geina ve te sikandin se Mepurù ne Terebpelengesa tew, ne kenà kiyu eduwaruwa te hinawa tew te kebpengeningeni te ked-veye tew riyà te etuvangan te Eleteala su egkiyuan din te ebpekita ke limù din kenitew. Su iiruwen sikandin kenitew ne ebpeketaang sikandin dut te kemerehenan tew.

5

¹ Ke etew ne nepemili ne Mepurù te Terebpelengesa te menge Hudiyanan, ne nepemili sikandin dut te menge ruma rin ne intendù sikandin ne ebpeninindeg te keupianan dut te menge ruma rin diyà te etuvangan te Eleteala. Su sikandin se ebpesetaren dut te ibehey te menge etew riyà te Eleteala wey sikandin se ebpelengesa dut te menge binatang su apey Eleteala se ebpesehad dut te salà dan. ² Tehaad te ini se Mepurù te Terebpelengesa ne etew red dema ne melemu ne ebpekedsalà, ne netuenan din se keditgker te kebpeneheewita rin dut te menge etew ne nekedsalà su warà dan metueni ke tidtu ne ed-ululaan dan. ³ Ne tehaad te etew red dema sikandin ne ebpekedsalà ded dema, ne ebpelengesa te binatang te kandin ne salà iring te kebpelengesa rin mekeatag te salà te menge etew.

⁴ Warà etew ne ebpekepemili te kandin ne hinawa te kegkevehayi te ketengdanen ne Mepurù te Terebpelengesa, su Eleteala rà ke ebpekepemili ketà te etew iring dut te kindepemilia rin ki Arun ke neuna ne Mepurù te Terebpelengesa rengan. ⁵ Ne iring din ded be rema ketà si Hisu Kristu su kenà sikandin ke mibpemili te hinawa rin te kegkevehayi te ketengdanen ne Mepurù te Terebpelengesa. Ugaid ne Eleteala se mibpemili kandin se egkahi te,

“Sikew ke anak ku,
guntaani ne ebpeketaang ku se siak se Amey nu,”
ke sikandin.

⁶ Ne migkahi rin dema diyà te ruma pà ne menge surat te,
“Ibpehelevuk ku keykew
se kediterebpelengesa nu taman te taman
iring dut te kineterebpelengesa
ni Milkisidik rengan.”

⁷ Gewii pà ni Hisus kayi te ampew te dunya ne miguriper se luwà din te kegkulayì din dut te pengeningeni rin diyà te Eleteala, su Eleteala rà se ebpekegaga te kebpeliyu kandin dut te kemetayen din. Ne nerineg ke pengeningeni rin te Eleteala su ke kinepeembavà din te hinawa rin wey ke kebperumaruma rin dut te kiyug te Eleteala. ⁸ Su misan Anak en sikandin te Eleteala ne nekepevaya pà sikandin te keresayan ne kayi

rin mehuruwi te kebperumaruma rin te Eleteala. ⁹ Ne geina te warà misan deisek dà ne igkesawey kandin dut te langun ne mid-ulaula rin, ne sikandin se dait ne ebpebpatey dut te salà te langun ne menge etew su apey langun ne eduma rut te lalag din ne egkevehayan te umur ne warà edtemanan din. ¹⁰ Engketà be ne midtendù en sikandin te Eleteala ne iyan Mepurù te Terebpelengesa ne ebpeninindek kenitew, iring dut te kedterebpelengesa ni Milkisidik rengan te kebpeninindek din.

Ed-uram kiyu su apey kiyu kenà Ebpekesuwey dut te Kebperetyaya tew

¹¹ Ne ruen pà maa dekelà ne ibpesabut ku perem keniyu mekeatag te kinedtereblengesa ni Milkisidik wey si Hisus, ugaid ne iyan din kerehenan te kedseysey ku su merehen kew ne ebpekesabut. ¹² Iyan perem dait ne sikiyu se ebpemandù dut te menge ruma niyu su neuhet kew en ne mibpemandù, ugaid ne warà kepekayan din. Inemulà se iyan din pà dait ne edseupan kew pà maa te ebpenurù su misan ke neuna ne penurù mekeatag te Eleteala ne kenà niyu pà egkesebutan. Iring kew te menge vatà ne kemulu pà ne edsusu su kenà pà egkepakey ne egkaan te mekehal. ¹³ Ne ke etew ne ebpekeiring te vatà ne edsusu pà ne kenà pà ebpekekaan te mekehal, ne kenà din pà egketuenan te kebpedsusun dut te meraat wey meupiya ne ulaula. ¹⁴ Ugaid ke etew ne nekekaan en te mekehal ne ke etew ne midsukud en ne midtua en se itungan din, su netuenan din en te kebpedsusuna rin dut te meraat wey meupiya ne ed-ul-ulaan din.

6

¹ Engketà be arà ne kenà kiyu ed-ulit-ulit dut te melemu rà ne penurù mekeatag ki Hisu Kristu ne nehuruwan ta en pehaney su apey ki ebpekeiseg te eguru rut te metua ne penurù ne edait dut te metua en ne etew. Su warà keupianan ne egketelimà tew embiya iyan tew rà ed-ul-ulitan ke neuna ne penurù mekeatag dut te kebpedsendit wey ke kebperetyaya te Eleteala ² wey ke penurù mekeatag te kebpebunyag wey ke kedampen te purù te etew te ibpengeningi ran sikandin, su ini ne penurù ne netuenan ta en. Ne netuenan ta en dema ke penurù mekeatag te kebanew te Eleteala keyta wey ke penurù mekeatag te kegkukum din kenitew ne ke ebpetemanan din kenitew ne kenà egkesembian taman te taman. ³ Ketà be ne iyan tumù se ed-iseg ki se eguru rut te ruma ne penurù mekeatag ki Hisus apey ebpekeiseg pà ke peretyaya tew. Ne ed-ul-ulaan tew ini embiya idluhut te Eleteala.

⁴ Su ke menge etew ne nesebutan dan en nevenar ke Meupiya ne Tudtul ne nerayahan en ke itungan dan te Eleteala, ne neheraman dan en ke meupiya ne tavang ne imbehey kandan te Eleteala wey ke gehem dut te Kedesenan ne Ebpetuntul te Menusiyà ugaid ne midengked dan en te kebperetyaya ran, ne kenà en egkepakey ne edsaup dan en maa ebpedsendit. ⁵ Su embiya neheraman dan en nevenar ke keupiya dut te lalag te Eleteala, ne neheraman dan en dema ke gehem te Eleteala iring dut te ibpayag din ketà te ketepusan ne hewii ⁶ ugaid ne ed-iniyuhan dan en maa ke Eleteala wey ke langun ne neheraman dan, ne kenà en egkepakey ne edsaup dan en maa ebpedsendit. Su embiya mid-iniyuhan dan en ke kebperetyaya ran ki Hisus, ne iring te impelansang dan en maa ke Anak te Eleteala diyà te pinebelavag

ne kayu ne mibpegkayà dan sikandin diyà te etuvangan te merakel ne etew.

⁷ Ne langun tew ne menge etew ne ebpekeiring te tanà. Igkeupiani te Eleteala ke tanà ne edsenepan te uran ne ebmeames-ames ne meselinuvù te pinemula rin. Meupiya ke tanà ne iring ketà su ebpekegkeupiya rut te kemuney ketà. ⁸ Ugaid ne embiya iyan dà edtuvù se ilemunen wey ruhiyen ne sagbet, ne warà pantag din arà se tanà. Arà be ne edereetan te Eleteala su ebinsulan din iring dut te ibped-ulaula rin te etew ne mid-iniyug se peretiyaya rin te Eleteala.

⁹ Na menge suled ku ne igkelimù ku, ne misan pà te iring kayi se menge lalag ku keniyu ne netuenan ku te kenà iring ketà se ibped-ulaula keniyu. Su netuenan ku ne ebpeketuntul kew red dut te ralan te kebpekeperetiyaya te Eleteala, tembù be iyan ibehey keniyu ne meupiya. ¹⁰ Su ke ulaula te Eleteala ne metidtu, tembù be kenà din egkelipatan ke meupiya ne ulaula niyu wey ke limù niyu kandin ne impekita niyu rut te kedtevang niyu rut te menge rumu niyu ne mibperetiyaya taman guntaan. ¹¹ Ne iyan ku kiyug ne langun niyu ne ebpenamar te ed-ulaula kayi se taman te kedlived ni Hisus su apey niyu egketelimà ke ebpenerengen niyu riyà te Eleteala. ¹² Tembù be kenà kew ebpepehul te keduma niyu te Eleteala, ugaid ne iringi niyu ke ulaula te menge etew ne mevaher se sarig dan te kedtehad dan dut te impasad te Eleteala kandan.

Ke Impasad te Eleteala ne Edtumanen Din Nevenar

¹³ Na iyan niyu tentenuri ne si Abraham. Su rengan ne ruen impasad te Eleteala kandin, ne kiyug din ne egketuenan ni Abraham se egketuman ini se impasad din. Tembù be ruen impenendan din te mevaher. Ne geina te warè en mepurù kandin, ne ini se kinepenendan din ne impepevayà din dut te kandin ne ngaran. ¹⁴ Migkahi rin ki Abraham te,

“Idtarem ku kenikew
te ebpeneuven ku nevenar sikew
ne ebpekerekelen ku
ke menge inenakan nu.”

¹⁵ Ne warà medtakas si Abraham te kedadahad din dut te impasad te Eleteala kandin, tembù be netelimà din ke langun ne impasad te Eleteala kandin.

¹⁶ Na, embiya ruen etew ne egkiyug ne egketuenan din te egketuman iya arà se impenendan din, ne ini se impenendan din ne ibpepevayà din dut te ngaran te etew ne mepurù pà kandin. Ne embiya iring ketà se ulaula te etew ne ebpenendan, ne egkeperetiyaya te rumu ne etew ne metidtu ini se pasad din ne ketà be ne warè en ebpeep-epuley. ¹⁷ Iring ketà se mid-ulaula te Eleteala. Su kiyug din ne egketuenan te langun ne menge etew te kenà din edsembian ke itungan din mekeatag dut te impasad din kandan, tembù be impenendan din ini impepevayà te kandin ne ngaran. ¹⁸ Engketà be arà ne ruen deruwa ne ulaula te Eleteala ne kenà egkesembian te misan engkey en. Seveka ne ke impasad te Eleteala kenitew, ne ke ikeruwa ne impenendan din se kedtumana rin ketà impepevayà te ngaran din. Ne kayi te ini se deruwa ne mid-ulaula rin, ne netuenan tew te kenà din edsembian ke migkahi rin su ke Eleteala ne kenà teruen.

Tembù be sikitew ne nekeaput en kandin, ne kenà meduwaruwa se itungan tew te kedadlimà tew rut te ebpenerengen tew kandin.¹⁹ Ini se ebpenerengen tew ne impasad te Eleteala kenitew se mevaher ne ebpeunsaran su apey ki kenà ebpekesuwey su edtuman ini nevenar. Uya, edtumanen iya te Eleteala ini su diyan en si Hisus te etuvangan din ne ebpeninindeg keytew.²⁰ Mid-una sikandin kenitew riyà su edtavang kenitew. Nevaluy sikandin ke Mepurù ne Terebpelengesa ne ebpeninindeg kenitew taman te taman diyà te etuvangan te Eleteala iring dut te kineterebpelengesa ni Milkisidik dengan.

7

Ini ne Mekeatag ki Milkisidik Rengan

¹ Si Milkisidik ini ne ratù sikandin dengan diyà te inged ne Salim, ne terebpelengesa rema sikandin ne ebpeninindeg te menge etew rut te Eleteala ne warà repeng te kinemepurù din. Ne ketà ne hewii te kineuli ni Abraham te ebpekibunù dut te menge kunterà din ne epat ne retuan ne nenegepatey rin, ne midsinuhung sikandin ni Milkisidik ne impengeningen i rin sikandin te ebpeneuven te Eleteala. ² Ne si Abraham ne imbehey rin ki Milkisidik ke ikesepulù ne umun dut te langun ne netavan din te kinebunuey rin. Ne iyan din meana kayi te ngaran ni Milkisidik ne “Datù te Metidtu se Ulaula Rin.” Ne geina te ratù dema sikandin te inged ne Salim, ne neingaranan ded sikandin te “Datù te Kerinew” su iyan meana te Salim ne kerinew. ³ Ne diyà te Lalag te Eleteala ne impesurat din ne warà lalag mekeatag te amey ni Milkisidik etawa ke iney rin etawa ke menge keep-epuan din. Ne warà mekesurat dema mekeatag te kineanaka kandin etawa ke kinepatey rin. Tembù be iring te warà rudsuwan din wey warà ketepusan din. Ne ebpekeiring sikandin te Anak te Eleteala ne warà ketepusan se kedadlimà tew te kedadlimà tew rut te ebpenerengen tew kandin.

⁴ Ne ketà be ne netuenan ta se kepurù ni Milkisidik su misan si Abraham ini se mevantug ne keep-epuan te sikami ne Hudiyenan ne mibehey ki Milkisidik te ikesepulù ne umun dut te langun ne netavan din te kinebunuey rin. ⁵ Ne ini se terebpelengesa te Hudiyenan ne menge inenakan ni Levi wey menge inenakan dema ni Abraham. Ne insuhù kandan dut te penduan ni Moises ne egkevehayan dan te ikesepulù ne umun dut te nesabpet te menge ruma ran ne Hudiyenan misan sikandan ke menge inenakan ded ni Abraham. ⁶ Ne si Milkisidik ne kenà inenakan mulà ni Levi, ugaid ne misan iring ketà ne mibehayan ni Abraham sikandin te ikesepulù ne umun dut te netavan din. Ne ruen ruma pà ne ibpekita te kepurù ni Milkisidik su misan ruen en impasad ki Abraham te Eleteala, ne impengeningen i rin te kedadlimà tew te kedadlimà tew rut te ebpenerengen tew kandin. ⁷ Ne netuenan ta ne ke etew ne ebpengeningen i te egkepenaub ne ruma rin ne iyan pà mepurù dut te etew ne ibpengeningen i rin te egkepenaub. ⁸ Ne ruma pà, ne mepurù pà si Milkisidik dut te menge terebpelengesa ne inenakan ni Levi ne midtelimà dut te ikesepulù ne umun, su minatey red sikandan su etew rè ma rema sikandan. Ugaid ne si Milkisidik ke midtelimà dut te ikesepulù ne umun ne imbehey ni Abraham, ne iring te viviyag ded lavew sikandin su warà ingkesurat dut te Lalag te Eleteala mekeatag te kemetayen din. ⁹⁻¹⁰ Ne misan si Levi ne mepurù ne etew su sikandin se

puunan dut te langun ne menge terebpelengesa te menge Hudianen ne iyan nevehayan dut te ikesepulù ne umun te menge ruma rin, ne mepurù pà si Milkisidik kandin. Su ketà te kinesinuhunga ki Abraham ni Milkisidik ne imbehey en ni Abraham kandin ke ikesepulù ne umun dut te netavan din, ne iring te nekeamung si Levi ki Abraham te ebehey misan warà pà ianak sikandin su diyà pà sikandin te lawa ni Abraham ke apù din.

Kenà Ebpekegaga ke Kinedterebpelengesa dut te Inenakan ni Levi te Ebpeliyu te Menge Etew dut te Salà dan, tembù be Midsuhù te Eleteala ke Anak din si Hisus ne Terebpelengesa tew ne Ebpeninindeg Kenitew diyà te Etuvangan Din

¹¹ Ne netuenan ta te rutun te kinevehey te Eleteala te penduan din diyà te menge Hudianen, ne ke menge inenakan ni Levi se midtendù din ne menge terebpelengesa se ebpetumanen dut te penduan, ne si Arun se neuna ne terebpelengesa. Ne embiya nekegaga dut te kinedterebpelengesa ran te ebpeliyu ke menge etew rut te salà dan su apey ki ebpekeuvev te Eleteala, ne warà en atag din te ruen pà maa ebpelepawen ne senge bias ne terebpelengesa ne kenà iring te kinedterebpelengesa ni Arun. Ugaid ne tehaad te kurang en se kinedterebpelengesa ni Arun, tembù be midsuhù te Eleteala ke terebpelengesa tew ne senge bias su iring en te kinedterebpelengesa ni Milkisidik, ne kenà si Arun. ¹² Ne geina te nesembian te Eleteala ini se kinedterebpelengesa ne ebpeninindeg dut te menge Hudianen, ne ke penduan ne ibpetuman din kandan ne egkesembian ded dema. ¹³⁻¹⁴ Ne netuenan ta te nesembian ini se edtereblengesa su si Hisu Kristu ke Kerenan tew ini se edlelehan ku kayi ne kenà riyà ebpuun te inenakan ni Levi su senge bias en. Su riyà ebpuun sikandin te inenakan ni Huda, ne warà inenakan ni Huda ne nevaluy ne terebpelengesa ke kenà si Hisus dà. Ne warà iya kehiya ni Moises ketà te lalag din mekeatag te kedtereblengesa te ruen riyà ebpuun.

¹⁵ Ne mepayag en nevenar te tehaad te nesembian te Eleteala ke menge terebpelengesa ne inenakan ni Levi, ne nesembian din dema ke penduan su nepemili din se senge bias ne terebpelengesa ne iring dut te kedtereblengesa ni Milkisidik. ¹⁶ Ne ketà te nepemili te Eleteala si Hisus ne terebpelengesa ne ebpeninindeg kenitew, ne warà din dumai ke penduan te menge Hudianen ne kayi rà ebpekepuun te inenakan ni Levi ke terebpelengesa. Ugaid ne mibpemili din sikandin su atag dut te gehem te umur din ne warà edtemenan din. ¹⁷ Su ruen impesurat ne Lalag te Eleteala mekeatag kandin ne egkahi te,

“Sikew ke terebpelengesa ne ebpeninindeg te menge etew
kayi te kedì taman te taman,
iring dut te kinedterebpelengesa ni Milkisidik dengan.”

¹⁸ Ne egenat ketà ne netuenan ta te midsembian en te Eleteala ke raan ne penduan ne intahak ki Moises su meluvey, ne warà gehem din te edtavang. ¹⁹ Su ke keduma dut te menge etew te penduan ne kenà ebpekegaga te ebmetidtu ke menge etew su apey ran ebpekeuvev te Eleteala. Ugaid ne guntaani te si Hisu Kristu en se insambi dut te raan ne penduan, ne ruen mepmeupiya pà ne ebpenerengen tew su ruen en ralan te kebpekeuvev tew te Eleteala.

20-21 Ne kenà ketà dà taman se keupiya te kinepekesambì ni Hisus ne terebpelengesa, su ketà te kinepemilì te Eleteala ki Hisus ne terebpelengesa ne ruen impenendant din ki Hisus se egkahi te, “Siak ke Eleteala ne ibpenendant ku sikew te sikuna ke terebpelengesa ne ebpeninindeg te menge etew kayi te kedi taman te taman.

Ne ini se itungan ku
ne kenà en iya egkesembian.”

Ugaid ne pehaney te iyan midtendù te Eleteala ne ke inenakan ni Levi se menge terebpelengesa, ne warà impenendant din mekeatag kandan. 22 Ne kayi te kinepenendant te Eleteala mekeatag te kedterebpelengesa ni Hisus, ne netuenan ta te ini se behu ne ralan te kebpekeuvvey ta te Eleteala ne impasad din ne meupiya pà dut te raan ne penduan ne intahak din ki Moises, su si Hisus ke tuus te ini se behu ne pasad ne egketuman en.

23 Ne kenà dutun dà taman se kinebira rin dut te kinedterebpelengesa te menge inenakan ni Levi wey ke kedterebpelengesa ni Hisus su imi se menge terebpelengesa ne inenakan ni Levi ne merakel dan su embiya ruen ebpatey kandan ne egkesembian dut te ruma, su ke kinedterebpelengesa ran ne ruen tedtab din. 24 Ugaid ne ke kedterebpelengesa ni Hisus ne warà mulà ketepusan din. Warà kegkesembii rin su ke umur din ne warà ketepusan din. 25 Tembù be ebpekegaga nevenar si Hisus te ebperiyu te langun ne ed-uvvey te Eleteala su ebuyù te tavang su atag dut te sarig dan kandin, su warà ma ketepusan din se kebuyù din te tavang kenitew riyà te Eleteala.

26 Engketà be ne si Hisus ke Mepurù ne Terebpelengesa tew riyà te etuvangan te Eleteala ne sikandin se ebpekevehey kenitew te langun ne kurang tew. Metidtu nevenar sikandin, ne warà salà din misan deisek dà ne meraat ne ulaula. Nekebira nevenar sikandin dut te langun tew su belisalà ki. Ne impepurù sikandin te Eleteala dut te langun taman misan diyà te langit. 27 Ne kenà iring sikandin dut te neuna ne menge terebpelengesa su ruen menge binatang ne ibpelengesa ran te uman gewii, ne ed-unaan dan pà te ebpelengesa ke ibehey ran te Eleteala su apey ke salà dan ne egkepesehad, ne arà pà ne ruen ibpelengesa ran mekeatag te salà te ruma ran. Ugaid ne si Hisus ne warà salà din, tembù be seveka rà se impelengesa rin te iyan din imbehey ke kandin en ne hinawa te ebpebpatey su apey ke langun ne salà te menge etew ne egkepesehad.

28 Ketà te miduma red ke menge etew rut te penduan ne intahak ki Moises dengan, ne ke menge ruma ran ne mekesesalà iring ded kenitew se nevaluy ne terebpelengesa ne ebpeninindeg kandan diyà te Eleteala. Neuhet pà dutun ne nesembian te Eleteala ke penduan, ne impenendant din se ebpermilien din ke Anak din te sikandin ke terebpelengesa tew ne ebpeninindeg kenitew. Su ke Anak din, ne ke ketidu rin ne warà kurang din taman te taman su midtuman din en langun.

¹ Iyan meana kayi rut te langun ne migkahi ku ne ruen en Mepurù ne Terebpelengesa tew ne ebpeninindeg kenitew diyà te Eleteala. Ne diyan en sikandin ebpipinuu te dapit te egkekewanen te Eleteala diyà te langit. ² Edtumanen din ini se kebmepurù din te kedterebpelengesa rin diyà te etuvangan te Eleteala diyà te Punggus ne Berekat ne Ruhu diyà te baley ne mibeelan ne ebpengeningeniyan te Eleteala. Ne kenà etew se mibaal kayi ugaid ne Eleteala ke Kerenan tew.

³ Ne langun ne menge Mepurù te Terebpelengesa ne ebpeninindeg dut te menge etew diyà te Eleteala ne netendù sikandan te ebehey dut te ibpelengesa ne menge binatang wey ke ruma pà ne ibehey te menge etew riyà te Eleteala. Ne iring din ded dema si Hisus ke Mepurù ne Terebpelengesa tew, su ruen ded dema ibpekevehey rin diyà te Eleteala. ⁴ Ne sikandin ke Mepurù ne Terebpelengesa tew riyà te langit, ugaid ne embiya kayi pà sikandin te ampew te dunya ne kenà egkedterebpelengesa sikandin su kenà sikandin inenakan ni Levi ne igenat dà te ruen terebpelengesa ne sikandan se ebehey te Eleteala te edumaan dan ke suhù te penduan ne intahak ki Moises rengan. ⁵ Ugaid ne ke helevrek dan te terebpelengesa kayi te ampew te dunya ne iyan din iring ne alung dà wey limbahan dà dut te tidtu ne edul-ulaan diyà te langit. Duen dema baley ne ebpengeningeniyan dan te terebpelengesa ne alung dà dema dut te benar ne diyà te langit. Su ruen migkahi te Eleteala ki Moises te kebpeitindeg din en ketà, ke sikandin te, "Dumai nu nevenar ke langun ne impekita ku keykew te riyà ki te buvungan."

⁶ Ugaid ne ini se helevrek ni Hisus te kedterebpelengesa ne mepurù pà dut te nengehelevek te menge terebpelengesa rengan. Ne iring din ded dema ke keupiya ini se behu ne pasad te Eleteala te si Hisus se terebpelengesa tew ne ebpeninindeg kenitew su muna pà se keupiya rin ketà te neuna ne pasad te Eleteala. Iyan din ked-una te keupiya ini se behu ne pasad su ruen impenendant din mekeatag ketà ne mepmeupiya pà nevenar.

⁷ Su embiya ke neuna ne pasad te Eleteala ne ebpekegaga, ne kenà din en edsembian te behu. ⁸ Ugaid ne nekita te Eleteala te midsurang ke menge etew dut te suhù te penduan ne intahak ki Moises. Tembù be midsewayan din sikandan te egkahi te,

"Ruen hewii ne ebpekeuma ne ebeelan ku ke behu ne pasad
dut te menge etew ne inenakan ni Israyil
wey ke menge etew ne inenakan ni Huda.

⁹ Ne kenà iring ini dut te neuna ne pasad ku
riyà te menge keep-epuan dan dengan
te kinetevangi ku kandan
te ed-awà dut te inged ne Ihiptu,
su warà dan tumana

ke neuna ne impasad ku kandan,
tembù be mid-ewaan ku sikandan.
¹⁰ Ugaid ne ini se behu ne pasad ku

ne ebeelan ku keuremà dut te menge inenakan ni Israyil,
ne ibpetahù ku ini se suhù ku te itungan dan
ne ibpesurat ku ini te hinawa ran
su apey ran egkerumai egenat te hinawa ran.

Ne ketà be ne siak ke Eleteala ne edtewehan dan,
ne sikandan ke menge etew ku.

¹¹ Su ketà be ne hewii ne kenà en ebpegingewaan
te eppenuruuen den pà ke menge ruma ran mekeatag kediey.
Su langun dan egenat te kevevaan taman te kepuruan
ne egketau en kediey.

¹² Ne ebpeseharen ku sikandan,
ne kenà ku en eppenunduhun ke meraat ne ulaula ran.”

¹³ Ne ketà te impesabut en te Eleteala te ruen en behu ne pasad din,
ne nesebutan tew en te nesembian din en arà se raan ne penduan su
neipus en. Ne embiya ke raan ne nesembian en, ne egkeawà en su
warà en pantag din.

9

Iyan Dan Mid-ulaula te Eduma Rut te Neuna ne Pasad Te Eleteala diyà te Baley ne Ebpengерапан te menge Hudiyansen

¹ Ketà te neuna ne pasad ne mibeelan te Eleteala dut te menge
etew ne ruen menge suhù mekeatag te dait ne ed-ul-ulaan dut te
menge Hudiyansen te kebpengarap kandin. Ne ruen dema baley ne
mibpeveelan te Eleteala te menge etew ne ebpengерапан dan kandin.
² Impeitindeg dan ke valey ne ebpengерапан ne lundis te binatang,
ne deruwa se ruhu rin. Ne ke neuna ne ruhu ne edlusud dan ketà
ne ed-ingeranan te Berekat ne Ruhu. Ne ketà ne ruen intahù ne sulù
wey lemisaan ne edtehuan dan te pan ne ibehey riyà te Eleteala. ³ Ne
ruen mekepal ne saput ne impehelet dut te ikeruwa ne ruhu. Ne ini se
ikeruwa ne ruhu ne ed-ingaranan te Punggus ne Berekat ne Ruhu. ⁴ Ne
iyan intahù ketà ne lemisaan ne vulawan ne edtutungan dan te rukut.
Ne ruen dema ketà ne iring te kavan ne midsepuwan te bulawan ne
midtehuan dut te deruwa ne melumpayà ne vatu ne midsuratan te
penduan ne imbehey ki Moises te Eleteala. Ne ruen ketà dema ke
bulawan ne kelalew ne netehuan te egkeenen ne ed-ingaranan te mana
ne imbehey kandan te Eleteala rengan. Ne rutun dema neketahù ke
tuked ni Arun ne mibpeneringsing te dawun. ⁵ Diyà te divavew te
kavan ne ruen deruwa ne ledawan ne iring dut te paras te suluhuen
ne neverat se pakpak dan ne tuus te ketà ke Eleteala. Neverat en ke
pakpak dan su ed-elungan dan ke divavew te kavan su riyà ibpirik
ke lengesa dut te impelengesa su apey egkepesehad ke salà dut te
menge etew. Ugaid ne kayi ku rà edtemana ini su kenà pà ini timpu
te edseysey.

⁶ Ne arà be ke kinapedtandang dut te langun diyà te baley ne ed-
erapan. Ne edlusud ke menge terebpelengesa dut te neuna ne ruhu
te uman gewii su edtumanan dan ke impehelevek kandan te Eleteala.
⁷ Ugaid ne ke ikeruwa ne ruhu ne iyan dà ebpekelusud ketà ne ke
Mepurù ne Terebpelengesa, ne keseveka rin dà ed-ul-ulaa ini te uman
rahn. Ne kenà egkepakey ne ebpekelusud sikandin ketà embiya kenà
ed-ewit te lengesa rut te impelengesa ne ibehey riyà te Eleteala su
atag dut te salà din wey ke salà dut te menge etew ke embiya ruen
mid-ulaula ran ne warà dan metueni ne salà. ⁸ Ne igenat ketà ne ruen
ibpesabut kenitew dut te Kedesenan ne Ebpetuntul te Menusiyà te ketà
ebpuun te mekepal ne saput ne impehelet dut te Punggus ne Berekat ne

Ruhu. Iyan din ibpesabut kenitew ne gewii te ruen pà suhù mekeatag dut te neuna ne ruhu ne edtumanan dan pà, ne warà pà mekeuma ke hewii ne egkepakey ne edlusud ke menge etew ketà te ruhu ne rutun en ke Eleteala.⁹ Ne idledawan arà se ibpenurù kenita te misan ruen pipira ne ibpelengesa ne binatang wey ruma pà ne ibehey ran te Eleteala, ne kenà ini ke ebpekeawà dut te salà te menge etew ne ebpengeningi ketà.¹⁰ Su ini, ne miduma ran dà te menge penduan mekatag te betasan te kegkaan, ked-inum wey ke mid-ulaula ran te ebmelinis ke lawa ran te warà dan pà mekeuvey te Eleteala. Su langun kayi ne suhù ne idlinis dà dut te lawa ran, ugaid ne kenà egkegaga te edtilak ke hinawa ran. Ne langun kayi ne ruen egkeetahan din se taman dà ketà te hewii ne edsembian te Eleteala ke behu ne ralan.

¹¹ Na guntaan te ruen en ini se behu ne ralan su nekeuma en si Hisu Kristu ne sikandin en ke Mepurù ne Terebpelengesa tew, ne ibpepevayà kandin ne muna pà se keupianan ne nekeuma kayi te kenitew. Su ke ebpengerapan ne midlusuran din te egelevek te ebpeninindek kenitew, ne muna pà se keupiya rin su kenà baley ne mibeelan te etew su kenà kayi rà te ampew te dunya.¹² Ne ketà te midlusud si Hisus diyà te Punggus ne Berekat ne Ruhi ne dutun en ke Eleteala, ne keseveka rà mulà medlusud sikandin. Ne kenà iyan din mid-ewit ke lengesa te kambing etawa sapi. Ugaid ne iyan din mid-ewit ne ke kandin ne muney ne lengesa su ke kinepatey rin se nekeperiyu kenitew dut te kedusa te salà tew taman te taman.¹³ Su ke lengesa dut te kambing wey sapi wey ke ibmuk dut te midtutung ne nati ne sapi ne nekebira se atag din. Su nekahai te penduan se embiya ruen etew ne midsinggur dut te etew ne minatey, ne ke terebpelengesa se ebspirik kandin dut te lengesa etawa edsawed kandin te ibmuk dut te midtutung ne nati ne sapi su apey egkeawà ke keredsik din apey sikandin ebpekeuvey te Eleteala.¹⁴ Engketà be ne embiya ebpekegaga ne ed-awà te meredsik te etew arà se lengesa rà te menge binatang, ne iyan pè be kenà muna pà se kebpekegaga rin ini se lengesa en ni Hisu Kristu te kebperiyu rin kenitew rut te salà tew. Su egenat te tavang te Kedesenan ne Ebpetuntul te Menusiyà, ne imbehey ni Hisus ke hinawa rin ne ebpebpatay misan warà deisek dà ne salà din su ini ke ibehey rin te Eleteala. Ne ini se lengesa rin se edlinis kenitew apey ki edsangur te Eleteala ne warà kemetayan din. Tembù be kenà en ebpegingewaan te edumaan ta ke iring dut te menge Hudiyanan ne kenà ebpekegaga te ebpeuvey kenitew te Eleteala.

¹⁵ Ne tehaad te ruen gaga te lengesa ni Hisus iring ketà, ne sikandin ke ebpeninindek kenitew riyà te Eleteala su edtuman dut te behu ne pasad su apey ke langun ne menge etew ne midtawag te Eleteala ne ebpeketelimà dut te penaub ne impasad din ne warà edtemanan din. Ne egketelimà ini sabap dut te kinepatey ni Hisu Kristu ne nekeperiyu kandan dut te salà ne neveelan dan gewii te kineruma ran te neuna ne pasad.

¹⁶ Upama ke ruen etew ne ruen kearen din ne idalem te epidavit ke engkey se egkevehayan te kearen din embiya ebpatey en sikandin. Ugaid ne taman te biviyag pà sikandin ne kenà egkepenelipun ini rut te menge etew ne ebehayan dut te kearen din, su kenà egkepakey ne ebspenelipunen dan ini se taman ne ruen tuus te minatey en ini se

kemuney. ¹⁷ Su ini se epidavit, ne warà igkevehey rin taman ne biviyag pà ke kemuney te kearen. Iyan din kebpekevehey ke minatey en ke kemuney te kearen. ¹⁸ Ne iring din ded dema ke neuna ne pasad te Eleteala, su iyan din ingawà ne ruen lengesa rut te mibpeimetayen su apey ebpekeipanew en ke pasad te Eleteala. ¹⁹ Ne arà se mid-ulaula ni Moises rengan. Pehaney ne mibpesabut din te menge etew ke langun ne penduan ne imbehey kandan te Eleteala. Arà pà ne migkuwa rin ke lengesa te menge nati ne sapi wey menge kambing ne impelengesa ne mid-emutan din ini te wayig. Na migkuwa rin ke tangkey te pinemula ne ed-ingaranan te hisup ne ruen bulvul te bilibili ne midtinà te merihà ne mibegkesan ketà, ne in-ered din ini ketà te lengesa ne impirik din dut te riberù ne midsuratan te penduan ne impirik din dema dut te menge etew. ²⁰ Ne gewii rin te ebpemirik ne egkahi sikandin te, "Tuus ini se lengesa te behu ne pasad ne mibeelan te Eleteala keytew apey kiyu rin egketelimà, ne insuhù din ne edumaan tew kayi te nekahie rin." ²¹ Ne iring din ded dema ne mibpemirikan ni Moises ke baley ne ebpengerapan wey ke langun ne kesengkapan ketà te kebpengarap. ²² Su nekahie te penduan ne timalù te langun ketà ne iyan pegingawà ne egketilak dut te lengesa. Ne iring din ded dema ne kenà egkepesehad ke salà te menge etew embiya kenà duen ibpelengesa.

²³ Ini se ebpengerapan te menge Hudiyanen ne mibeelan te etew kayi te dunya wey ke langun ne neketahù ketà ne ebpekeiring dà ini dut te tidtu ne ebpengerapan diyà te langit, ne iyan pegingawà ne ini ne egketilak dut te lengesa te binatang. Ugaid ne ke tidtu ne ebpengerapan diyà te langit ne iyan pegingawà ne mepmepiya pà ne ibpelengesa ketà. ²⁴ Su si Hisu Kristu ne kenà ke valey ne ebpengerapan ne mibeelan dà te etew kayi te ampew te dunya se midlusuran din su ini ne ebpekeiring dà dut te ke tidtu riyà te langit. Ugaid ne sikandin ne midlusud diyà te langit ke tidtu ne ed-ubpaan te Eleteala, ne diyan en guntaan sikandin te etuvangan te Eleteala se ebpeninindek kenitew. ²⁵ Ne ke Mepurù te Terebpelengesa te Hudiyanen ne uman rahun ne edlusud sikandin te Punggus ne Berekat ne Ruhu ketà te baley ne ebpengerapan kayi te ampew te dunya su ibehey rin ke lengesa rut te binatang ne impelengesa. Ugaid ne si Hisu Kristu mulà ne warà din isaupsaup te ebehey ke lengesa rin te Eleteala su keseveka rà iya. ²⁶ Su embiya uman en rahun ne ebehey sikandin te lengesa rin, ne utew merakel se keresayan din te kebpebpatey rin te igenat dà dut te kinelimbaha kayi te dunya taman guntaan. Ugaid ne kenà iring ketà se mid-ulaula rin, su keseveka rà se kinepengkayi rin ne ini en ke telanged ne hewii ne midtendù te Eleteala. Nevaluy sikandin ne etew ne imbehey rin ke hinawa rin te ebpebpatey su apey egkeawà ke salà dut te langun ne menge etew. ²⁷ Ne langun tew ne menge etew ne keseveka rà ebpatey, ne an pà ne egkukumen kiyu te Eleteala. ²⁸ Ne iring ketà ne keseveka rà imbehey ni Hisus ke hinawa rin te ebpebpatey su apey ke salà dut te langun ne menge etew ne egkeawà. Ne edlived pà maa kayi te ampew te dunya, ugaid ne kenà maa edsaup ebpebpatey te salà tew. Inemulà te ed-engayen din ke sikitew ne edtahad kandin.

Ke Rekelà ne Mid-ulaula ni Hisu Kristu su apey ki Ebpekeuvev te Eleteala

¹ Iyan dan midumaan dut te penduan ne imbehey te Eleteala ki Moises dengan ne alung-alung dà su in-upama rà dut te tidtu ne keupianan ne ebpekeuma. Ne ke tidtu ne keupianan ne nekeuma en kayi te kenitew impepevayà ki Hisus. Su nekahai te penduan ne uman rahun ne iyan pegingawà ne ruen menge binatang ne ibpelengesa ne ibehey riyà te Eleteala su apey egkeawà ke salà dut te menge etew. Ugaid ne misan iring ketà se ed-ul-ulaan dan taman te taman, ne warà mekegaga arà te kebmetidtu te menge etew su apey ran ebpekeuvev te Eleteala. ² Su embiya benar ne ebpeketilak dut te salà dan arà te lengesa te binatang ne ibehey ran te Eleteala, ne warà en atag din te edsaupsaup dan te uman rahun su ebmelilintad en perem ke hinawa ran dut te salà dan ne nepesehad en. ³ Inemulà te arà se lengesa ne ibehey ran te Eleteala te uman rahun ne ke kebpetenuri rà kandan te salà ne neveelan dan. ⁴ Su ke lengesa te menge sapì wey kambing ne warà nevenar kebkegaga rin ne ed-awà dut te salà dan.

⁵ Tembù be guna su mehaan en ebpengkayi si Hisu Kristu te ampew te dunya ne migkehiyan din ke Amey rin ne Eleteala te,

“Kenà nu iyan egkiyuhan
ke menge binatang ne impelengesa
wey ke ruma pà ne ibehey ran keykew;
ugaid ne iyan nu kiyug
ne egkevaluy a ne etew,
tembù be impenehana nu en ke lawa ku.

⁶ Uya, kenà nu igkesuati
ke menge binatang ne edtutungen,
wey ke lengesa ne ibehey ran keykew
te id-awà dut te salà dan.

⁷ Engketà be arà ne egkehiyen ku te,
‘Ini ad, Eleteala, te edtuman dut te kiyug nu
iring dut te nekahai
ne impesurat nu mekeatag kediey.’ ”

⁸ Mid-unaan ni Hisus te egkahi te kenà ke menge binatang ne ibpelengesa ran wey ke ruma pà ne ibehey ran te Eleteala ne ebpekesuhat te hinawa rin. Ne kenà din ded dema igkesuat ke menge binatang ne edtutungen wey ke lengesa ne ibehey ran kandin te igkeawà dut te menge salà dan. Ne migkahi rin ini misan netuenan din en te langun ne ibehey ran su atag dut te edumaan dan ke nekahai te penduan ni Moises. ⁹ Ne midtunduhan din en maa te edlalag te, “Ini ad, Eleteala, te edtuman dut te kiyug nu.” Ne arà te lalag ni Hisus ne netuenan tew en te in-awà en te Eleteala ke neuna ne pasad din mekeatag te kebehey kandin te menge binatang ne ibpelengesa su midsembian din en te behu su ke kinepelengesa ni Hisu Kristu rut te lawa rin se insambi dut te menge binatang ne ibpelengesa. ¹⁰ Su si Hisu Kristu, ne midtuman din ke kiyug te Eleteala su midumaan din ke langun ne insuhù kandin. Ne ke kinevehey rin te lawa rin te keseveka rà mekeatag te salà te langun tew ne nekegaga arà te kinekeawà te salà tew.

¹¹ Ketà te baley ne ebpengerapan te menge Hudiyanen, ne uman gewii ne egelevek ke menge terebpelengesa te ebehey te Eleteala te

binatang ne ibpelengesa ran ne edseupseupan dan te ed-ulaula ini. Ugaid ne kenà ded lavew ini ebpekegaga ne ed-awà dut te salà te menge etew. ¹² Ugaid ne kenà iring ketà se kinevehey ni Hisu Kristu te lawa rin diyà te Eleteala te ebpebpatey, su keseveka rà mulà se kinevehey rin te lawa rin dut te salà te menge etew ne ebpekegaga arà taman te taman. Neipus arà ne mibpinuu sikandin diyà te egkekewanan te Eleteala diyà te langit. ¹³ Ne riyà guntaan edtahad si Hisus taman te edtevanan te Eleteala ke kunterà din ne ebpegiekan te Eleteala kandan. ¹⁴ Su ke kinevehey ni Hisu Kristu te lawa rin ne ebpebpatey te keseveka rà, ne midtidtu rin ke menge etew wey midtilak din dut te lengesa rin su apey riyà te etuvangan te Eleteala ne ebmetilak dan taman te taman.

¹⁵ Ne benar ini su ruen dema impesabut dut te Kedesenan ne Ebpetuntul te Menusiyà ketà te impesurat din ne egkahi te,

¹⁶ “Ne ini se behu ne pasad ku

ne ebeelan ku rut te menge etew ku keuremà.
Ne ibpetahù ku ini se suhù ku diyà te itungan dan
ne ibpesurat ku diyà te hinawa ran
su apey ran egkerumai egenat te hinawa ran.”

¹⁷ Ne migkahi pà maa te,

“Ne kenà ku en eppenunduhun ke meraat ne ulaula ran.”

¹⁸ Na geina te kenà eppenunduhun te Eleteala ke salà te menge etew, ne kenà en ebpegingawà te ruen pà ibpelengesa ne ibhehey te Eleteala te ked-awà dut te salà dan.

Egkepakey en ne Ebpekeuvvey ki te Eleteala su atag dut te Kinepebpatey ni Hisu Kristu Kenitew

¹⁹ Engketà be, menge suled ku, ne atag dut te kinepebpatey ni Hisus kenitew, ne ruen en dalan te ebpeketusud ki riyà te Punggus ne Berekat ne Ruhu ne dutun en ke Eleteala. ²⁰ Su ketà te kinevehey ni Hisus ke hinawa rin te ebpebpatey, ne mibeelan din ke behu ne ralan te ebpekeuvvey ki te Eleteala. Ne ebpeketusud ki riyà te Punggus ne Berekat ne Ruhu ibpepevayà ki Hisus ne mibpebpatey ugaid ne biviyyag ded iya. Su in-awà din arà se impehelet kenitew te ed-uvvey te Eleteala ne in-upama ketà te mekepal ne saput ne impekalang dut te ed-ubpaan te Eleteala diyà te baley ne mibeelan te menge Hudiyanen te ebpengarap te Eleteala. ²¹ Ne guntaani ne sikandin ke mepmeyupiya pà ne eppeninindek kenitew diyà te Eleteala, ne sikandin se ebpekemalen dut te langun tew ne menge etew te Eleteala. ²² Tembù be ed-uvvey kiyu en te Eleteala se egenat te keputian te atey tew ne kenà eduwaruwa se kebperetiyyaya tew kandin. Ed-uvvey kiyu kandin su ke lengesa ni Hisus ke midtilak te hinawa tew rut te meraat ne ulaula ne igkevenari te hinawa tew, ne iring te midluluuan din ke lawa tew rut te metingew ne wayig. ²³ Ne ebpetihel kiyu se egawed dut te kebpenareng tew te impasad te Eleteala, ini se kebpenareng ne nekahi tew en te ebperetiyyayaan tew. Su egkeserihan sikandin ne edtuman ke impasad din kenitew. ²⁴ Ebpevegbeg-etey kiyu te ebpekiti te limù te menge ruma tew, ne ebpetebtevangey kiyu te ed-ulaula te meupiya. ²⁵ Ne kenà tew edlipatan ke kegkevurun tew te ebpengarap te Eleteala apey ki kenà ebpekeiring dut te ulaula te ruma pà ne menge etew. Ugaid ne iyan tew ed-ululaan mulà ne ebpekevaher ki te kebperetiyyaya rut

te ruma tew su netuenan tew se mehaan en se kedlived ni Hisu Kristu kayi te ampew te dunya.

²⁶ Su embiya nesebutan tew en ke benar ne penurù mekeatag ki Hisu Kristu ugaid ne edtivevaan tew pà manen te ed-ulaula te meraat, ne warà en be egkepenareng tew te kebpekelyu tew pà te salà tew. ²⁷ Inemulà te iyan tew rà egkepenareng ne kegkeandek dut te hewii te kegkukuma te Eleteala kenitew. Su ketà ne ke langun ne mid-engkenà kandin ne edtutungen diyà te edsindrew ne apuy. ²⁸ Su rengan ne misan engkey ne etew ne warà meduma rut te penduan ne intahak ki Moises, ne ruen deruwa etawa tetelu ne etew se nekekita ini ne ebpeketithus te kinepekesurang din te penduan, ne ebpeimetayan te warà kegkeyruwi. ²⁹ Ne embiya iring ketà se egketemanan dut te etew ne midsurang dut te penduan ni Moises, ne labi pà se kedusai rut te etew ne ed-engkenà ki Hisus ke Anak te Eleteala! Su ketà ne impekita rin se warà din peberekpenta ke lengesa ni Hisus ne imbehey te kinepatey ni Hisus su apey egketuman ke behu ne pasad te Eleteala ne ebpeketilak dut te salà din. Uya, labi pà se kedusai kandin su iring te pinegkeyà din ke Kedesenan ne Ebpetuntul te Menusiyà ke ebpayag dut te tavang te Eleteala kenitew. ³⁰ Su netuenan tew ne ke Eleteala se migkahi te,

“Siaken se ebpenulisuli.

Siaken se edusa te menge etew ne ed-ulaula te meraat.”

Ne migkahi pà maa te,

“Siaken ke egkukum te menge etew ku.”

³¹ Ne mekeandekandek nevenar embiya ebpekepevaya ki te gehem te kukuman te Eleteala ne warà kemetayen din.

³² Tentenuri niyu ke hewii te behu kew pà ne mibperetiyya ki Hisus ne nerayahan en ke itungan niyu. Su ruen merakel ne keresayan niyu, ugaid ne warà meawà ke kerinew te hinawa niyu. ³³ Su ruen hewii ne mibpegkeyà kew wey meraat se imped-ulaula ran keniyu riyà te etuvangan te merakel ne etew. Ne ruen pà hewii ne impeninindeg niyu ke ruma niyu rut te meraat ne imped-ulaula kandan. ³⁴ Ne impekita niyu ke kegkeyru niyu rut te nengevilanggù su midtevangan niyu sikandan. Ne misan pà te mid-ahew ke menge kearen niyu ne warà nemutu ke hinawa niyu. Uya, su netuenan niyu se ruen pà beripantag ne kearen niyu ne edtahad diyà te langit ne kenà egkeahew keniyu taman te taman. ³⁵ Engketà be ne tigkeri niyu ke keresayan ne kenà niyu engkeri ke sarig niyu te Eleteala, su rekèla se keupianan ne egketelimà niyu ne impasad te Eleteala keniyu. ³⁶ Iyan ungayà se editigker kew te kemerehenan apey niyu egketuman ke kiyug te Eleteala ne ebpeketelimà kew rut te keupiya ne impasad te Eleteala. ³⁷ Su ruen impesurat ne Lalag te Eleteala ne egkahi te,

“Warè en keuhetan din

ne iyan ebpengkayi ne ke ebpekeuma.

Ne ke kebpekeuma rin

ne kenà din edsenggelen.

³⁸ Ne ke menge etew ne metidtu kayi te etuvangan ku ne editigkeran dan te piya engkey se kemeresan su atag dut te kebperetiyya ran kediey.

Ugaid ne embiya ruen etew ne ed-engked se eduma kediey,

ne warà iya kegkehalew ku kandin.”

³⁹ Ugaid ne sikitew ne kenà iring ketà se ulaula tew, su kenà kiyu en ed-iring dut te menge etew ne mid-engked ke kebperetiyyaya ran ne edusaan te Eleteala. Su mevaher se kegawed tew te kebperetiyyaya tew ne ketà be ne ebpekeliyu kiyu.

11

Ini ne Mekeatag te Tidtu ne Sarig

¹ Na, embiya duen tidtu ne sarig tew te Eleteala, ne netuenan tew iya se egketelimà tew ke meupiya ne ebpenerengen tew. Su egenat te sarig tew ne netuenan tew en rema se benar ini se keupiya rin misan kenà ta egkekita. ² Ne ke menge etew rengan ne nekesuhat te hinawa te Eleteala su egenat dut te sarig dan kandin.

³ Ne sikitew rema, ne egenat dut te kedsarig tew ne netuenan tew te ini se kelibutan wey ke langun ne nekeriken kayi ne nelimbag te Eleteala egenat te lalag din dà. Engketà be ne ke langun ne egkekita tew kayi te dunya ne riyà ebpunut te kenà egkekita.

⁴ Si Abel rengan, ne egenat te kedsarig din te Eleteala ne iyan nevirangan te Eleteala ke imbehey rin kandin ne meupiya pà dut te imbehey te kakey rin ne si Kain. Ne sabap dut te kedsarig din ne midtelimà sikandin ne metidtu riyà te etuvangan te Eleteala, tembù be midtelimà te Eleteala ke imbehey rin. Ne misan engketà te rengan dà ne minatey si Abel, ne ruen pà lavew egkepenurù kenitew kayi te kedsarig din.

⁵ Ne iring din ded dema ke kedsarig ni Enoc te Eleteala rengan. Su sabat dut te kedsarig din ne warà mekepevayà te kepepatey sikandin su mid-ewit sikandin te Eleteala riyà te langit. Ne misan mibpemengà te menge etew sikandin, ne warà dan enmekita su riyan en ma te Eleteala. Ne ruen impesurat ne Lalag te Eleteala te kayi pà si Enoc te dunya ne nekesuhat sikandin te hinawa te Eleteala. ⁶ Ne warà iya etew ne ebpekesuhat te hinawa te Eleteala embiya warà sarig din kandin. Su ke etew ne egkiyug ne ebpekeuvvey te Eleteala, ne iyan ebpegingewaan ne ebperetiyyayaan din nevenar te ruen Eleteala wey ebperetiyyayaan din dema se edtavang te Eleteala rut te etew ne ebpekeuvvey kandin.

⁷ Engketà ded be rema ke kedsarig ni Noe te Eleteala rengan. Su sabat dut te kedsarig din ne mibperetiyyaya sikandin dut te imbaag te Eleteala ne ruen rimas ne ebpekeuma, misan warà din pà mekita te iring ketà. Ne midumaan din ke lalag te Eleteala su mibeelan din en ke rekèla ne avang ne ed-ingaranan te arka ne mid-untud dan en ketà se telteleleanak. Ne ketà te kinelampey kayi te dunya, ne warà dan meherà. Su sabap dut te kedsarig din te Eleteala, ne nevirangan sikandin te Eleteala ne metidtu. Ugaid ne ke ruma pà ne menge etew ne midusaan te Eleteala te kepepatey su warà dan mebperetiyyaya.

⁸ Ne si Abraham dema rengan, ne sabap dut te kedsarig din te Eleteala ne midumaan din ke insuhù te Eleteala kandin te ebpeewaan dut te inged din su ebpependiyanen te inged ne impasad kandin te Eleteala, misan warà din metueni ke inged ne ebpevayaan kandin. ⁹ Su ke kinesarig din te Eleteala ne mid-ubpà dan ketà te inged ne impasad kandin te Eleteala iring dut te ked-ubpà te nekererepuan dà ne menge etew. Ne ke menge baley ne midelesan dan ne mibeelan dut te lundis

te binatang. Ne iring din ded dema te mid-ubpà ketà ke anak din ne si Isaac wey ke apù din ne si Jacob su ingkeragkes dan ded dema dut te impasad kandan te Eleteala.¹⁰ Ne midtigkeran ni Abraham te iring ketà ne ked-ubpà, su ruen ebpenerengen din ne inged ne kenà bulug egkereetan ne mibeelan te Eleteala diyà te langit.

¹¹ Ne si Sara ke esawa ni Abraham ne midsarig rema te Eleteala. Su misan lukes en sikandin ne warà en kearus din te ed-anak, ne sabap dut te sarig din te Eleteala te edtumanen din ke impasad din kandin ne nekeanak ded sikandin. ¹² Ne si Abraham dema ne lukes en nevenar ne warà en kearus din te ebpekeanak den pà ki Sara. Ugaid ne misan iring ketà, ne si Abraham se nevaluy ne apù dut te medmerakel ne inenakan ne kenà egkevirang su ke kinekevwad din ne iyan mibpeiringan se menge bituen diyà te langit wey ke kerakel te pantad diyà te beyvey te rahat.

¹³ Langun kayi ne menge etew te migkahi ku geina ne warà migkurang ke sarig dan te Eleteala taman te minatey ran, misan warà den pà medtelimà arà se impasad kandan te Eleteala te biviyag den pà. Su netuenan dan se ebpekeuma ke hewii te edtumanen te Eleteala ke impasad din kandan, ne taman be te biviyag den pà ne impesabut dan te sikandan ne nekererepuan den dà kayi te ampew te dunya. ¹⁴ Ne ke menge etew ne egkahi te nekererepuan den dà kayi te dunya ne ibpekita te ruen pà ebpenerengen dan ne tidtu ne inged dan diyà te langit ne ed-ubpaan dan taman te taman. ¹⁵ Ne warà dan en pegpegitunga eni Abraham ke inged ne mid-ewaan dan en, su embiya ed-ul-ulaan den pà arà ne egkepakey ne edlived dan ketà. ¹⁶ Inemulà se iyan dan egkiyuhan ne arà se inged ne muna pà se keupiya rin dut te mid-ewaan dan, su ini ne inged ne riyà te langit. Ne geina te arà se egkiyuhan dan ne kenà igkeyeyai rut te Eleteala ne edtewahan sikandin te Eleteala ran su ruen en inged ne impenehana rin kandan te ed-ubpà.

¹⁷⁻¹⁸ Ne sabap dut te sarig ni Abraham te Eleteala ne mibperumaruma sikandin te kinesuhua kandin te Eleteala te ibehey ini se anak din si Isaac ne ibpelengesa te Eleteala. Insuhù kandin ini te Eleteala dut te hewii te kinebetelua kandin te Eleteala ke engkey se taman ne kevaher te kedsarig din te Eleteala. Ne misan sikandin se mibpesaran te Eleteala te sabap dut te ini se anak din si Isaac ne egkevwad ke menge inenakan din, ne misan iring ketà ne malùmalù din ed-imetayi ini se budtung ne anak din si Isaac su ibehey rin ne ibpelengesa te Eleteala. ¹⁹ Su nepegitung ni Abraham se misan ed-imetayan din ke anak din si Isaac su ibehey rin te Eleteala, ne ruen gehem te Eleteala te ebenawen din ded sikandin. Ne benar ne ebpekeiring te nevanew sikandin, su embiya warà ungena te Eleteala si Abraham ne nepatey rin en ke anak din.

²⁰ Ne guna su lukes en si Isaac ne impengeningen i rin ke menge anak din si Jacob wey si Esau ne intarem din kandan se ruen ibpenaub te Eleteala ne egketelimà dan keuremà. Intarem din ini su midserihan din se edtumanen te Eleteala ke impasad din dengan.

²¹ Ne si Jacob dema ne midsarig te Eleteala, su guna te lukes en sikandin ne mehaan en ebpatey ne impengeningen i rin te ebpeneuvan te Eleteala ke deruwa ne apù din ne menge anak ni Jose. Ne ketà ne midurungul te tuked din se ebpengarap te Eleteala.

22 Ne iring din ded dema ke kedsarig ni Jose te Eleteala, su ketà te mehaan en te kebpatey rin ne mibperetiyya rin ded nevenar se edtumanen iya te Eleteala ke langun ne impasad din. Tembù be migkahi rin te ruen hewii ne ebpekeuma ne id-awà te Eleteala ke langun ne menge inenakan ni Israyil diyà te inged ne Ihiptu. Ne migkahi rin dema te ketà te hewii ne kebpekeawà dan en ne ibpeewit kandan ke menge tulan din su riyà ded ibpeleveng te inged ne eppesineruwan dan.

23 Ne ke menge lukes ni Moises dema, ne ruen tidtu ne sarig dan te Eleteala. Su rut te hewii te kineenaka ki Moises ne ruen suhù te ratù te Ihiptu ne ebpeimetayan ke langun ne menge vatà ne meama te menge Hudiyanan. Ugaid ne warà meandek ini se lukes ni Moises te kenà eduma rut te suhù te datù su in-eles dan sikandin taman te nekedtetelu ne vulan su nekita ran se merayirayi ini se anak dan.

24 Ne netuntun te si Moises ne ruen sarig din ded dema te Eleteala. Su guna su midekelà en ne impekita rin ini te mid-ewaan din ke meupiya ne egketemanan din diyà te baley te bai ne anak te ratù te Ihiptu, su kenà din igkesuati ne birang sikandin ne anak dut te bai ke mid-anakanak dà kandin. ²⁵ Su iyan din midtumù ne egkerasey sikandin su riyà ded mebpediduma rut te menge ruma rin ne Hudiyanan, ke menge etew te Eleteala, tumin dè be ke egkeamung-amung sikandin dut te meraat ne ulaula te menge etew te Ihiptu. Su netuenan din ne arà se menge ulaula ne pekerediyaa dà su edsahad dà. ²⁶ Su nepegitung din te iyan pà meupiya se edtigkeran din ke meraat ne ibped-ulaula kandin su atag dut te kebperetiyya rin ki Hisu Kristu ke ebperetuen te Eleteala keuremà, tumin dè be ke ebpekekuwa sikandin te langun ne kekewesai te inged te Ihiptu. Su ruen lalew ne ebpenerengen din ne ibehey kandin te Eleteala keuremà.

27 Ne sabap dut te sarig din te Eleteala ne mid-ewaan din ke inged ne Ihiptu ne warà meandek dut te epes te datù kandin. Ne misan pà merasey en se ibpevayà din ne warè en sikandin medlived su iring ma te egkekita rin en ne eduma ke Eleteala kandin, ne ke kenà ma egkekita. ²⁸ Ne sabap te sarig din dema te Eleteala ne iyan din midumaan ke insuhù te Eleteala kandin. Tembù be ebbetenuran din te menge Hudiyanan ke ed-ingaranan te “Kedsahad te Suluhuen te Eleteala.” Su edsumbalì dan te bilibili ne ibpirik ke lengesa rin diyà te gumawan te menge baley ran su apey edsehari rà te suluhuen te Eleteala ne kenà ed-imetayan ke pengenayan ne anak dan ne meama.

29 Ne sabap dut te kedsarig dan dema te Eleteala, ne nekerapas dan te rahat ne ed-ingaranan te Merihà ne Rahat ne iring ded dut te memara ne tanà se ked-ipanew ran. Ugaid ne guna su migeraman dut te tegeihiptu te edtundug sikandan te edrapas ketà, ne nengelened dan en.

30 Ne sabap dut te kedsarig dan dema te Eleteala ne ke kutà ne nekelingut dut te inged ni Hiriku, ne menge kunterà dan, ne nehuvar arà su midtuman dan ke nekahi te Eleteala te ebpinguten dan ketà se inged taman te pitu ne hewii. ³¹ Ne sabap dut te sarig te senge etew ne meritan ne ed-ingaranan ki Rahab ne mid-ubpà ketà te inged ne Hiriku, ne misan meritan sikandin ne warà keeleran din te warà pà mebperetiyya sikandin, ne warà mekeragkes sikandin dut te mibpmatey ne menge ruma rin te arà ne inged. Su ketà

te kinepekeuma rut te deruwa ne etew ne midsuhù ni Josue te ebpepenitipen ke inged ne Hiriku ne midtevangan din sikandan su atag dut te sarig din te Eleteala. Ketà ne warà imetayi sikandin.

³² Ne kayi ku rà be edtemana ini se guhud ku mekeatag te etew ne midsarig en te Eleteala su edtendey e pà te meuhet ne hewii te keguhura ki Gideon, si Barak, si Samson, si Jepte, si David, si Samuel wey ke menge mibpelambas te lalag te Eleteala rengan. ³³ Su sabap dut te kedsarig dan te Eleteala ne midtevangan dan te Eleteala. Su ruen mibpekibunù te derekelà ne inged ne midtavan dan. Ne ruen mibayàbayà te inged dan ne metidtu se ulaula ran, ne netelimà dan ke impasad kandan te Eleteala. Ne ruen imbehey te Eleteala ne gehem te edtelawà ke mewarew ne erimaung su iring te pinedtiem ke bèbà dut te erimaung su apey ran kenà mekekahat. ³⁴ Ne ruen rumà pà ne intimbag te apuy ne warà mengetutung, inemulà te neevukan ke apuy. Ruma pà maa ne nekeliyu te kegkeimetayi kandan. Misan meluvey sikandan, ne mibaher dan te Eleteala. Ne mevurut dan se ebpekibunù su midtevanan dan ke kunterà dan te meriyù ne inged. ³⁵ Ne sabap dut te sarig te menge meritan ne ke menge anak dan ne minatey ne nevanew red maa.

Duen duma pà ne menge etew ne mevaher se sarig dan te Eleteala ne nesikgem wey mibpekesekitan. Ne misan pà te nerasey ran taman te kinepatey ran ne iyan dan pinedtumù se ebpatey tumin dè be ke ebpekeengked dan dut te kebperetiyya ran, su netuanan dan ne egkevanew red maa te Eleteala ne meupiya pà se ked-ubpà dan diyà te kandin. ³⁶ Ruen pà ruma ne mibpegkeyà wey mibpenruug. Ne ruma pà ne mibakù te kedina ne impevilanggù. ³⁷ Ne ruen pà lavew mid-imetayan te ebpentrumbehan te batu, ruen edtemperen ke lawa ran te havas, ne ruen pà se ibpetibas. Ruen duma ne nengesegseg dut te ubpaan dan ne ebpekelauglaug dan en se iyan den dà ibevelegkas se lundis te menge kambing wey bilibili. Neayuayu ran nevenar, ne nerehenan dan, ne meraat se imped-ulaula kandan. ³⁸ Ne ebpekelauglaug dan su warà netail ne ubpaan dan. Ne riyà dan med-ubpà te lawed etawa riyà te buvungan etawa riyà te surung te dempilas wey riyà te vudsi te tanà. Ne geina te ruen sarig dan ne iring keta, ne kenà dait ne ebpekiduma ran dut te menge meraat ne etew kayi te dunya.

³⁹ Langun kayi ne menge etew ne nehuhud ku geina, ne sabap dut te sarig dan te Eleteala ne nekesuhat dan nevenar te hinawa rin misan warà den pà metelimà ke impasad te Eleteala kandan. ⁴⁰ Su ruen pà maa meupiya ne netahù te itungan te Eleteala ne ini se kiyug din te sikandan se ebpeteharan pà kenitew su apey ke langun tew ne keseveka rà ebpeketelimà dut te impasad din ne arà se keditidtuwa rin kenitew.

12

Insempità te ini se keduma tew te Eleteala kayi te Ampew te Dunya ne Ebpekeiring dut te Egkuya kiyu

¹ Ne sikitew ke edsarig te Eleteala, ne ini se keduma tew kandin kayi te ampew te dunya ne ebpekeiring te egkuya ki te ebpelelahuy. Ne ke merakel ne menge mibperetiyya rengan se mibpesabut kenitew te

egkeserihan nevenar ke Eleteala, ne iring te sikandan ke edtengteng kenitew kayi te kegkuya tew. Tembù be ed-engked kiyu en iya te piya engkey en ne ebpekeungen dut te keduma tew te Eleteala, ne ed-engked kiyu te piya engkey en ne meraat ne ulaula ne ebpengunguripen kenitew. Uya, ed-engkeran tew ke langun ne ebpekevangel kenitew su apey meabet se kebpelelahuy tew taman dut te edtemanan.² Ne kenà kiyu ebbenlingilingì te keduma tew ki Hisus su sikandin ke edirigan tew su sikandin ke rudsuan te kedsarig tew wey sikandin ded ke edtemanan. Midtigkeran din en ke kerasyen te kinelensanga kandin diyà te pinebelavag ne kayu, ne warà din ingkeyeyai te kedimetayi ran kandin ketà su netuenan din te ruen igkehalew rin embiya egkeipus din ini se helevek din te ebperiliu kenitew. Ne guntaani ne ebpepinuuwen en sikandin diyà te egkekewanan ketà te ebpinuuwan te Eleteala ne edatù.

³ Iyan niyu pegpegitunga ne ke rasey ne impevayà ni Hisus dut te ulaula te menge mekesesalà ne etew ne mid-engkenà kandin. Iyan niyu pegpegitunga ne apey kew kenà egkeperà wey apey kew kenà ed-engked te ebperetiyaya.⁴ Su arà te ked-engked niyu te meraat ne ulaula ne ibpenggeram keniyu, ne warà seveka rà ne ed-imatey keniyu atag dut te kebperetiyaya niyu.⁵ Menu, nelipatan niyu en ke impesurat ne Lalag te Eleteala ne ebag-et keniyu ne menge anak din? Su migkahi rin te,

“Anak ku, pemineg ka
embiya ebpetidtuwen te Eleteala ke ulaula niyu.
Ne kenà kew pekeluvey te eduma kandin
ke embiya edsewayan kew rin.

⁶ Su ebpetidtuwen din ke ulaula rut te langun ne igkelimù din
ne ebpekesekitan din ke langun ne egkevirangan ne menge anak
din
ke embiya ed-ulaula ran te meraat.”

⁷ Engketà be, ne tigkeri niyu ke kemerehenan su Eleteala se ebbenurù keniyu iring dut te ed-ul-ulaan te amey dut te anak din. Tigkeri niyu su arà se kemerehenan ne tuus te anak kew nikandin. Su ke amey, ne kenà din ebedtedayen ke anak din ne ed-ulaula te meraat, ugaid ne ebpekesekitan din ke anak din su apey ke ulaula rin ne ebpeketidtu.⁸ Su embiya kenà kew ebpekesekitan te Eleteala rut te meraat ne ed-ul-ulaan niyu iring dut te ulaula rin te rumà pà ne menge anak din, ne iring te in-anak kew te ingkehingey rà ne kenà kew venar ne menge anak din.

⁹ Su kayi te ampew te dunya ne ebpekesekitan ki te amey tew, ugaid ne ed-edatan tew red lavew sikandan. Na, iyan pè be kenà ta edati wey perumdumai ke Eleteala ne Amey tew riyà te langit, su kayi te keduma tew kandin ne ebpekehaked ki te umur ne warà edtemanan din.¹⁰ Su ke amey tew kayi te dunya ne mibpekesekitan ki ran te mehaan dà ne hewii te batà ki pà, ne endei rà ke ingkeupiani te itungan dan mekeatag kenitew ne arà dà ke edumaan dan. Ugaid ne ke Eleteala ne Amey tew riyà te langit, ne iyan din kebpekesakit kenitew su netuenan din ne arà se ebpekegkeupiya kenitew su apey ki egkevaluy ne metidtu iring kandin.¹¹ Ne embiya ebpekesekitan ki te Eleteala ne kenà tew igkesuati su igkereheni ta gewii te ebpekepevayà ki ketà. Ugaid ne ke egketemanaan tew ne meupiya ne sabap dut te kinepekesakit din

kenitew ne ebmetidtu ke menge ulaula tew ne rutun ne ebmelintad ke hinawa tew.

¹² Engketà be arà ne ehet-eheta niyu ke kedsarig niyu te Eleteala su apey misan ebpekepevayà kew te kemerehenan ne kenà medlukgà se peretiyyaya niyu. ¹³ Ne kenà niyu engkeri te tidtu ne ralan ne ed-ikulen niyu su apey kenà medlukgà ke menge ruma niyu ne meluvey se kebperetiyyaya rin ki Hisus, inemulà se ebpekevaher dut te kebperetiyyaya ran.

¹⁴ Ne uram kew te kenà kew ebpekevaal te kewahaan su apey ke itungan niyu dut te langun ne menge etew ne ebmelintad. Ne heleveka niyu te mevaher se kebmetidtu te ulaula niyu ne ebpekesuhat te hinawa te Eleteala, su embiya kenà iring ketà se ulaula tew ne kenà ki egkekita te Eleteala. ¹⁵ Uram kew te kenà kew ebpekeiniyug dut te tavang wey limù te Eleteala. Su ke etew ne ed-ulaula te iring kayi se ebpekepeneheewit te ruma pà ne etew su iring en be te sagbet ne ebehas te mepait ne ebpekeilu. ¹⁶ Ne uram kew te kenà kew ed-ulaula te meredsik etawa ke ebpekewaraan niyu te hinawa niyu ke Eleteala iring ki Esau rengan. Su geina te pengenayan si Esau rut te amey rin ne ruen impasad kandin te Eleteala, ugaid ne insambì din dà ini se kewaris din te pengenayan te egkeenen ne keseveka rin dà egkeena. ¹⁷ Ne neiseg-iseg dutun ne netuenan ta te nepegpegitung din se ebpekelived ded diya te kandin ke kewaris te pengenayan su apey red dema egkepenaub sikandin te Eleteala. Ugaid ne kenà en egkepakey ne ebpekelived pà ini se kewaris ne insambì din su arà se ned-ulaula rin ne kenà en egkesembian, misan pà te midsinehew sikandin te kinepekedsendit din.

¹⁸ Ne kayi te ini se behu ne ralan te kebpekeuvvey tew te Eleteala, ne kenà kiyu egkeandek iring dut te impepevayà dengan te menge Hudiyanan. Su ketà te kineuvvey ran te buvungan ne ed-ingaranan te Siney, ne ruen nekita ran ne egkereggreg ne apuy, ne ruen mevandes ne keramag, ne mibmerusireman dan misan meandew pà. ¹⁹ Ne nerineg dan ke ebperiyupen ne budyung wey ke merahing. Ne guna su nerineg dan en ke Eleteala, ne mibuyù dan en te ibpeengked su nengeandek-andek dan, ²⁰ su nengeandek dan ketà te migkahi te Eleteala te, “Embiya ruen ed-uvvey kayi ne misan binatang dà ne ebpeimetayan te edrumbahen te batu.” ²¹ Ne ketà te mekeandek ne nekita ran ne migkahi si Moises te migkerker sikandin te kinekeandek din.

²² Ugaid ne sikitew ve guntaan, ne ini ke ralan te kebpekeuvvey tew te Eleteala ne kenè en iring dut te menge Hudiyanan dengan su iring te nekeuma ki en dut te buvungan ne ed-ingaranan te Siyun ne ed-ubpaan te Eleteala ne warà kemetayan din. Ne ini se inged ne riyà te langit ne ed-ingaranan te Behu ne Hirusalim ne ruen enggivungivuwan ne menge suluhuen din dema ne edeyù kandin. ²³ Ne nekeamung kiyu en dut te ruma pà ne mibperetiyyaya te Eleteala ne ke menge ngaran dan dema ne ingkesurat en diyà te langit, su langun tew ne menge anak te Eleteala. Ne iring te nekeuvvey kiyu en ketà te langun ne mibperetiyyaya ne minatey en ne mibmetidtu en nevenar te Eleteala riyà te langit. Ne iring te nekeuvvey kiyu en dema te Eleteala ne egkukum dut te langun ne menge etew ²⁴ wey riyà te ki Hisus ke midtuman dut te behu ne pasad te Eleteala, su impepevayà dut te

lengesa rin ne netilik kiyu rut te salà tew. Su ke lengesa ni Hisus ne imbùbù din dut te kinepatey rin, ne muna pà se keupiya rin su tuus ini te limù te Eleteala te kebpeliyu kenitew, kenà iring dut te lengesa ni Abel rengan su ke lengesa rin ne tuus te kedusa te Eleteala rut te suled ni Abel ne mid-imatey kandin.

²⁵ Na itaan niyu ve ke telinga niyu te eduma rut te lalag te Eleteala. Su ke menge etew rengan ne warà mebpemineg dut te kedseysey kandan ni Moises te penduan te Eleteala, ne midusaan dan te Eleteala. Na iyan ki pè be kenè ki dusai embiya kenè ki ebperumaruma rut te impepenudtul din kenitew te Anak din ne riyà ebpun te langit.

²⁶ Su rengan te mibpekidlag ke Eleteala ki Moises diyà te buvungan te Siney, ne nekugal ke dunya rut te kerekelà te suwara rin. Ugaid ne guntaani ne ruen pasad din te, “Ne egkugalan ku red maa te kenà ke dunya rà su misan ke langit dema.” ²⁷ Ini se migkahi te Eleteala te keuremà ne egkugalen din ded maa ke dunya ne ibpesabut din te ini se dunya ne nelimbag din dengan ne egkepupus en su edsembian din te behu pà ne kenà egkepupus. ²⁸ Engketà be ne ebpeselamat ki te Eleteala su ebpekeamung ki kandin te edatù ketà te behu ne dunya ne kenà egkevinasa taman te taman. Ebpeselamat ki wey ed-erapen tew ke Eleteala dut te ulaula ne ebpekesuhat te hinawa rin. Ne ed-edatan tew sikandin ne iduma se kegkeandek, ²⁹ su ke Eleteala tew ne ruen gehem din te kedusa iring te regreg te apuy ne ebpekagetutung te langun taman.

13

Menge Suhù dut te menge Mibperetiyyaya

¹ Na sikiyu ke ebpenusuled te kineperetiyyaya ne iyan niyu ibpeiseg ne ke kebpelimlimuey niyu. ² Ne kenà niyu lipati se kegalàhalà niyu rut te menge etew ne ebpekepemenayik diyà te baley niyu misan kenà niyu sikandan egkekilala. Su rengan ne ruen nehalàgalà te menge etew ne warà dan metueni te suluhuen te Eleteala ne egenat te langit ini. ³ Ne kenà niyu lipati se kedadavang niyu te ruma niyu ne riyà te bilengguan su iyan niyu kebpegitunga ne sikiyu red dema arà se nevilanggù. Ne tevangi niyu red dema ke menge ruma niyu ne egkerasey iring te sikiyu red ke egeram ketà.

⁴ Ne edati niyu ke kediwelayà niyu ne kenà kew edlangkadlangkad dut te esawa nu. Su edusaan te Eleteala ke etew ne ed-iring ketà misan nekeesawa sikandin etawa kenà. ⁵ Uram kew te kegkiyug niyu te pirak, ne endei rà taman se nearen niyu ne igkehalew niyu en arà. Su migkahi te Eleteala te,

“Kenà ku sikiyu ed-ewaan,
ne kenà ku sikiyu ebpedterayen.”

⁶ Tembù be kenà ki egkeyeyaan te egkahi te,
“Ke Eleteala se edtavang kedì,
tembù kenà a egkeandek
misan engkey se ibped-ulaula
te menge etew kediey!”

⁷ Kenà niyu lipati ke menge mibpeneheewit keniyu ne mibpenurù keniyu te Lalag te Eleteala. Iyan niyu pegpegitunga ke meupiya ne ulaula ran wey ke sarig dan ne warà mebparin taman te minatey ran,

ne arà be se iringi niyu. ⁸ Su ingenat dà te warà pà limbaha ini se dunya taman guntaani en ne warà mebparin si Hisu Kristu, ne iring ded lavew sikandin taman te taman. ⁹ Uram kew ke egkepeneheewit kew rut te merakel ne kenà tidtu ne penurù su ini ke kebpekesuwey niyu rut te benar ne impenurù keniyu. Ne warà duma ne ebpekevaher te kedsarig niyu te Eleteala ke kenà ke tavang din keniyu ne kenà kayi te keduma niyu te suhù mekeatag te liiyan te egkeenen, su ke kedadnud niyu ketà ne kenà ebpeketavang te kebperetiyyaya niyu ki Hisus.

¹⁰ Sikitew ke mibperetiyyaya en ki Hisus ne ruen en ingkepelengesa rin ketà te kinepebpatey rin ne mid-awà dut te salà tew. Ugaid ne sikandin ke eduma pà te penduan ni Moises mekeatag te ebpelengesa te binatang diyà te ebpengerapan te menge Hudiyanan, ne kenà dan ebpekeamung dut te langun tew ne nekepeliyu ni Hisus te menge salà. ¹¹ Embiya ruen ibpelengesa te Mepurù te Terebpelengesa mekeatag te salà te menge etew, ne ke lengesa rut te impelengesa rin ne ed-ewiten din diyà te lusud te Punggus ne Berekat ne Ruhu su ibehey rin te Eleteala. Ugaid ne ke lawa rut te impelengesa rin ne ed-ewiten dan diyà te liyu te inged dan ne ketà dan be edtutunga. ¹² Ne ke netemanan ni Hisus ne iring din ded dema ketà su mid-ewit dan sikandin diyà te liyu te inged te ked-imetayi kandin, ne ketà ne ke lengesa rin ne impetudà din se keditlak dut te salà te menge etew. ¹³ Engketà be ne impeliyu ki en dut te suhù te penduan ne intahak ki Moises. Ed-awà kiyu langun ketà ne ebpekeamung kiyu en ki Hisus dut te kinepekegkeyà din te kebpebpatey rin diyà te liyu te inged te menge Hudiyanan misan ebpekesekitan ki atag dut te keduma tew kandin. ¹⁴ Su ini se ampew te dunya ne eranà tew rà su kenà ini se ubpaan tew taman te taman. Ugaid ne ruen ebpenerengen tew ne inged ne egkeubpaan tew riyà te langit. ¹⁵ Ne ketà te kedadavang ni Hisus kenitew ne kenà kiyu ed-engked te kedeyù tew te Eleteala. Ne diyà dut te lalag tew ne ibpesabut tew ke kesebenaran te si Hisu Kristu rà ke Kerenan tew, su iring te ini se ibehey tew riyà te Eleteala. ¹⁶ Ne kenà niyu lipati ke meupiya ne ulaula niyu rut te menge ruma niyu wey ke kebpetebtevangey niyu su ini ne timbang te ibehey niyu te Eleteala ne ebpekesuhat te hinawa rin.

¹⁷ Perumaruma kew te idsuhù dut te menge etew ne ebpeneneheewit te menge mibperetiyyaya keniyan. Su sikandin ke midsuhù te Eleteala te edtuganur keniyu te meupiya, ne ruen hewii ne ebpekeuma ne ebpenegetuvang dan diyà te Eleteala se ebpenudtul ke engkey se kinepenurù dan keniyu. Ne embiya edumaan niyu ke idsuhù dan, ne egkevag-et ke hinawa ran te edtuman dut te ibpehelevk kandan te Eleteala. Ugaid ne embiya kenà kew ebpmineg te suhù dan, ne egkerehenan dan ne warà keupianan ne egketelimà niyu.

¹⁸ Ne kenà kew ed-engked te kebpengeningen niyu kenami. Melintad se hinawa rey su warà netuenan dey ne mid-ulaula rey ne meraat, ne iyan dey kiyug ne layun ki metidtu rut te ulaula tew. ¹⁹ Ne ebuyuen ku keniyu te ipengeningen a te Eleteala te mehaan ku kebpekeulì keniyan te keniyu.

Ubpu te Surat

²⁰⁻²¹ Ne ke Eleteala ke mibanew ki Hisu Kristu rut te kinepatey rin, ne sikandin en ke pinekemepurù ne egkeunutan tew ne iring sikandin

te tumetuganur dut te sikitew ne bilibili rin. Su ke lengesa rin ne impetudà ketà te kinepatey rin diyà te pinebelavag ne kayu ne arà ke tuus dut te behu ne pasad te Eleteala keytew, ini se pasad din ne warà kegkesembii rin taman te taman. Ne ibpengeningeni ku te Eleteala ne ebehey te melintad ne hinawa, ne ibehey rin kenitew ke langun ne ebpeketavang kenitew te kebpekeiseg te kedmumana tew te kandin ne kiyug. Ne ibpengeningeni ku red dema te sikandin se edtavang keniyu su apey kew ed-ulaula te ebpekesuhat te hinawa rin ibpepevayà dut te tavang ni Hisu Kristu keniyu. Ketà be ne edeyù kiyu ki Hisu Kristu taman te taman. Ne metuman be ini!

²² Menge suled ku, up-upiani niyu te ebpemineg ini se migkahi ku ne ibag-et te hinawa niyu su kenà be ini melayat se surat ku. ²³ Iyan dema ibpesabut ku keniyu te si Timoteo, ke suled tew, ne nekeliyu en te kinekevilanggù din. Embiya mehaan ne ebpekeuma sikandin kayi, ne edumaan ku sikandin te ebpengkeniyan a te keniyu.

²⁴ Ne penudtuli niyu ke langun ne ebpeneheewit te menge mibperetiyyaya riyà wey langun ne menge etew te Eleteala ne ebpeng-penginginsà key kandan. Ini se menge ruma tew te ebperetiyyaya ne riyà ebpuun te Italya ne ebpengpenginginsà dema keniyu.

²⁵ Iyan ku kiyug ne langun niyu ne ebpekeheram te tavang te Eleteala.

Ke Surat Ni Santiago

¹ Siaken ini se edsurat ne si Santiago. Sugsuhuen a te Eleteala wey ke Kerenan tew ne si Hisu Kristu.

Edsuratan ku sikiyu, ke langun ne menge Hudiyanan ne mibperetiyyaya ki Hisu Kristu ne nekesivurak kayi te ampew te dunya ne ebpenginginsà a kenyu.

Ini ne Mekeatag te Kedtigker ta te Kemerehenan su apey Ed-iseg ke Peretiyyaya Ta

² Menge suled, misan merakel ne kemerehenan ne ebpekeuma riyawà te kenyu ne pekehalew kew, ³ su netuenan niyu ne ini se kemerehenan ne penggeram dut te peretiyyaya niyu su apey ebmevaher ke hinawa niyu te kebmetigker. ⁴ Na peketigker kew nevenar su apey mevag-et ke kebperetiyyaya niyu. Su embiya ini se ed-ul-ulaan niyu, ne kenà kew ebpekesurang ne warà idsawey kenyu su metua en ke peretiyyaya niyu wey warà kurang te ulaula niyu.

⁵ Ugaid ne embiya duen kenyian te kenyu egeram te kemerehenan su kenà din egketuenan ke engkey se meupiya ne ed-ul-ulaan din, ne mebuyù sikandin te Eleteala te behayi te ketampas te pegitungan din. Su ke Eleteala se ebehey te langun ne etew ne ebuyù kandin, su metulanged sikandin ne ebehey ne kenà din dema ebpegkeyaan sikandan. ⁶ Ne embiya ruen ebuyuen niyu te Eleteala, ne kenà eduwaruwa se hinawa niyu ugaid ne peretiyyaya kew te ebehayan kew te Eleteala dut te ebuyuen niyu. Su ke etew ne eduwaruwa se hinawa rin ne edsambisambì ke itungan din iring te baleg te rahat ne edumaruma te keramag piya endei edsamber. ⁷⁻⁸ Ne embiya iring ketà, ne duwaruwa rema se peretiyyaya rin wey kenà egkeserihan ke langun ne ed-ul-ulaan din. Ne kunaan din ke ebehayan te Eleteala.

Ini ne Mekeatag te Kehelawan dut te Ayuayu wey Kewasa

⁹ Ne sikiyu ne menge ayuayu ne mibperetiyyaya ki Hisus ne galewhalew kew su mibelielehà kew riyawà te etuvangan te Eleteala. ¹⁰ Engketà ded dema ke sikiyu ne menge kewasa ne mibperetiyyaya, iyan meupiya ne egkehalew kew embiya ebpendedereiseken kew te Eleteala, su ke Eleteala se serihi niyu ne kenà ke kewasai niyu. Su ke kewasa ne etew ne mehaan egkeawà iring dut te kevukaran te sagbet ne mehaan ne egkeleyulù. ¹¹ Su embiya egkevuntarà te mèmemeinit ne andew, ne egkehangu en ke sagbet ne egkepadpad en ke kevukaran din ne neawà en ke keupiya rin. Iring be imbe kayi te egketemanan dut te kewasa ne etew, su gewii ran te ebpemegelep te kekewesai ran ne egketekew se kemetayen dan ne langun ne kearen dan ne egketahak en.

Ini ne Mekeatag te Ebpuunan te Kebpenggeram kenita

¹² Na ke etew ne misan ebpekeanuyanuy te kemerehenan ne eduma red lavew te Eleteala, ne sikandin ne ruen kehelawan din. Su netuenan din se egkeipus ke kedtigker din te kemerehenan, ne ebpeketalimà te lalaw rin ne arà se umur ne warà edtemanan din ne impasad dengan

te Eleteala dut te langun ne egkelimù kandin. ¹³ Ugaid ne embiya ruen etew ne ebpenggeraman te ed-ulaula te meraat su atag dut te kemerehenan ne ebpekeuma kayi te kandin, ne kenà din kehiya se egenat te Eleteala ini se ebpenggeram kandin. Su kenà ebpenggeraman ke Eleteala, ne kenà sikandin dema ebpenggeram te misan engkey ne etew. ¹⁴ Su iyan ebpenggeram te etew te ed-ulaula te meraat ne ke kiyug din ne meraat ne iyan ebpekeliteg kandin. ¹⁵ Ne embiya edumaan din arà se kiyug din ne meraat, ne ebpekevaal sikandin te salà. Ne embiya edsaup pà maa ebaal te salà, ne iyan din egketemanan se edusaan sikandin te Eleteala taman te taman.

¹⁶ Na menge suled ne igkelimù ku, kenà kew pegitung te Eleteala se ebpeketuyuk te etew te ked-ulaula te meraat, su kenà benar arà. ¹⁷ Su iyan ebehey ke Eleteala te kenà meraat, su nasì pà te langun ne meupiya. Ne warà dema kurang te ibehey rin su langun ne riyà ebpuun te Eleteala ne riyà te langit. Ne sikandin se midlimbag te langun ne edsilà diyà te langit. Ne misan edsambisambi dan se edsilà diyà te langit, ne ke Eleteala ne kenà ebparin misan deisek dà su warà ebpekeralung te keupiya rin, ne langun ne ibehey rin ne meupiya. ¹⁸ Ne sabap dut te kandin ne kiyug ne ebelyuen ki rin ne anak din ketà te kebperetiyaya ta te benar ne impenurù din. Ini se mid-ulaula rin su apey ke sikita se belielehà dut te langun ne midlimbag din.

Ebperumaruma kiyu te Lalag te Eleteala ne Egkerineg Tew

¹⁹ Menge suled ne igkelimù ku, tentenuri niyu ini. Iyan meupiya ne langun niyu ne tegtehami niyu te ebpemineg ke lalag te Eleteala. Ne iyan meupiya ne kenà kew pà edtekew edlalag su pegitunga niyu pà, na kenà kew melemu ne egkeepes. ²⁰ Su embiya edlanget se etew, ne kenà ebpekeruma dut te metidtu ne ulaula ne ebpekesuhat te Eleteala. ²¹ Tembù be id-awà niyu ke langun ne meredsik ne netahù te itungan niyu wey ke meraat ne ulaula niyu. Ne ipeembavà niyu ke hinawa niyu su apey ke lalag te Eleteala ne intahù din te hinawa niyu ne mibperetiyaya niyu se egkerumaan niyu, su ini se ebpekepeliyu keniyu rut te salà niyu.

²² Na dumai niyu nevenar ke lalag te Eleteala. Su embiya ebpemineg kew rà ne kenà kew eduma, ne egkeekalan kew te hinawa niyu. ²³ Su embiya ruen etew ne matag dà ebpemineg dut te lalag te Eleteala ne kenà din edumaan, ne iyan din egkeiringan se etew ne ed-aalung dut te pehelungan, ²⁴ ne iyan din dà kegkekita dut te paras din se ebpepehalung pà, ugaid ne mid-awà dà ne nelipatan din en ke paras din. Iring ketà se etew ne ebpemineg te lalag te Eleteala ugaid ne kenà ma eduma. ²⁵ Ugaid ne ke etew ne ebpemineg dut te impemandù te Eleteala ne kenà din egkelipatan su edumaan din iya, ne arà imbe ke etew ne egketevangan te Eleteala te piya engkey ne ed-ul-ulaan din. Su ke impemandù te Eleteala ne meupiya nevenar, ne ini se ebpekepeliyu kenitew wey iyan edtavang te kenà tew kebpekedsalà.

²⁶ Na embiya ruen etew ne egkahi te eduma te Eleteala ugaid ne kenà ed-uram te kedlalaglag din, ne warà atag din se kinekahi rin te eduma te Eleteala su nelimbungan din ke hinawa rin. ²⁷ Su ke etew ne edtelimà dut te Amey tew ne Eleteala ne metidtu nevenar se kebperetiyaya rin ne arà imbe ne etew ne metau ne edtavang te menge

ilu wey ke menge balu ne egkerehenan. Ne kenà dema sikandin eduma rut te meraat ne ed-ul-ulaan te menge etew kayi te ampew te dunya.

2

Kenà Meupiya ne ke Ked-elit-elit ta te Menge Etew ne Kenà Ebpeked-iring

¹ Menge suled, sikiyu ne mibperetiyaya en ki Hisu Kristu ke Kerenan tew ne mepmepurù, ne kenà meupiya ne ke ked-elit-elit niyu te langun ne menge mibperetiyaya ne kenà megidsan misan ayuayu etawa kewasa. ² Upama ke ruen edlusud te kevurunan niyu te ebpengeningen i te Eleteala ne kewasa ne etew ne ebevelegkas te meupiya wey edsisising te bulawan, ne egkeiseg-iseg ne ruen ayuayu ne edlusud dema ne ebevelegkas te ebpendriteyritey, ³ ne embiya ed-el-eliten niyu arà se mibevelegkas te meupiya ne egkahi te, “Kayi ka pinuu te meupiya ne ebpinuuwan,” ugaid ne ke ayuayu ne egkahi ka te, “Itindeg ka riyaw etawa pinuu ka kayi te saag ne uvey te ebpinuuwan ku,” ⁴ na embiya ini se ed-ul-ulaan niyu, ne meraat arà su ke ked-elit-elit niyu te menge rumu niyu ne mibperetiyaya ne warà meked-iring su kunaan niyu ke kewasa ne etew ne iyan pà belielehà dut te ayuayu. Ne ini se mid-ulaula niyu ne ebpuun arà te meraat ne itungan niyu.

⁵ Na menge suled ku ne igkelimù ku, pemineg kew kayi te egkehiyen ku. Misan ke kearen dut te menge ayuayu kayi te ampew te dunya ne reisek dà, ne sikandan dema iya ke menge etew ne nepemilì te Eleteala su apey ke sarig dan kandin ne edekdekelà, ne sikandan dema se edlusud dut te Edetuan din su ini se impasad din dut te langun ne egkelimù kandin. ⁶ Ugaid ne sikiyu, ne warà niyu el-elita ke menge ayuayu su iyan niyu ed-el-eliten ne ke kewasa. Meambe warà niyu metenuri te ke kewasa se mibpenlupig keniyu wey mid-ewit keniyu diyà te kukuman? ⁷ Ne sikandan se ebpenlalag te meraat mekeatag ki Hisu Kristu ke Kerenan tew ne igkelimù tew.

⁸ Na iyan meupiya ne ed-ul-ulaan niyu ne edumaan niyu ke dekelà ne penduan te Eleteala ne impesurat din ne egkahi te, “Ikelimù nu ke rumu nu iring ded te kegkelimù nu te hinawa nu.” ⁹ Ugaid ne embiya iyan niyu ed-el-eliten ne ke kewasa ne etew, ne ke ayuayu ne warà niyu el-elita, ne nekedsalà kew ne egkesuhat kew te kedusa te Eleteala su nekerimpas kew rut te penduan din. ¹⁰ Su ke etew ne eduma te merakel ne penduan te Eleteala ugaid ne nekerimpas sikandin te seveka rà, ne nekedsalà sikandin diyà te etuvangan te Eleteala iring dut te etew ne nekerimpas te langun ne penduan. ¹¹ Su migkahi ke Eleteala dut te penduan din te, “Kenà ka edlangkadlangkad te esawa nu,” ne migkahi red maa te, “Kenà ka imatey.” Misan warà ka medlangkadlangkad te esawa nu ugaid ne nekepatey ka, ne nekesalà ka ne nekerimpas ka rut te penduan te Eleteala. ¹² Tembù be uram kew te keddalaglaglag niyu wey ke ulaula niyu apey kew kenà ebpekerimpas te penduan din. Su ke penduan te Eleteala se ebpekepeliyu te etew te salà din. Ne Eleteala se egkukum te langun ne etew keuremà mekeatag te keduma ran te penduan din, ne iyan din igkukum ne ke kandin ded ne penduan. ¹³ Ne ketà te kegkukum te Eleteala te langun ne etew ne kenà din igkeyru ke etew ne warà meyru te menge rumu rin kayi te ampew te dunya. Ugaid

ne ke etew ne egkeyru nevenar te menge ruma rin ne kenà egkeandek te Eleteala ne egkukum kandin.

Tidtu ne Peretiyaya ne Egkekita kayi te Ulaula Ta

¹⁴ Menge suled, embiya ruen etew ne egkahi te mibperetiyaya rin si Hisu Kristu ke Kerenan tew ugaid ne kenà egkekita kayi te ulaula rin, ne warà atag din arà te kinekahи rin te mibperetiyaya rin su arà se kegkahi rin te mibperetiyaya sikandin ne kenà ebpekegaga ne ebpeliyu kandin dut te salà din. ¹⁵ Upama ke ruen menge ruma nu ne mibperetiyaya ne egkerehenan su warà belegkas dan wey warà egkekaan dan, ¹⁶ ne ebpendiyà ka se egkahi te, "Kerenan en se metau keniyu! Kukumbalà kew su apey kew kenà egkeadsil ne kaankaan kew!" Na embiya iring ketà se migkahi nu kandan ugaid ne warà ka medtavang te kerehenan dan, ne warà ded atag din arà te kinekahи nu. ¹⁷ Ne iring ded dema ke kedsarig tew. Embiya egkahi ki te ebperetiyaya ki te Eleteala ugaid ne kenà egkekita kayi te ed-ul-ulaan tew, ne kenà benar arà se peretiyaya tew.

¹⁸ Na kema ke ruen egkahi te, "Senge etew se ebperetiyaya te Eleteala su apey ebpekeliyu, ne seveka se ed-ulaula te meupiya su apey ebpekeliyu." Ugaid ne ini se tavak ku ketà te etew ne edlalag te iring ketà. Iyan meupiya ne ebperetiyaya ki, ugaid ne kenà tidtu se peretiyaya ta embiya kenà egkekita kayi te ed-ul-ulaan ta. Iyan meupiya ne ibpekita ta ini se peretiyaya ta ibpepevayà dut te meupiya ne ed-ul-ulaan ta. ¹⁹ Embiya egkahi ka te mibperetiyaya ke en te sebseveka rà ke Eleteala ne meupiya arà, ugaid ne kunaan nu ke kebperetiyaya nu se ebpekegaga. Misan ke busew ne ebperetiyaya ne egkerkeren dan te kegkeandek dan kandin, su netuenan dan se edusaan dan pà te Eleteala. ²⁰ Kenà metau ne ebpegitung ke etew ne edlalag te iring ketà! Ebpesebutan ku pè be sikiyu kayi te kebperetiyaya ta, embiya kenà egkekita ibpepevayà te ulaula ne meupiya, ne warà rantek din ke peretiyaya ta.

²¹ Tentenuri nu ke apù tew rengan ne si Abraham su nevaluy sikandin ne metidtu diyà te etuvangan te Eleteala su ke mid-ulaula rin, su midumaan din nevenar ke insuhù te Eleteala kandin ne indenà din ke anak din si Isaac diyà te ebpelengesaan te menge binatang ne ibehey ran te Eleteala. ²² Kayi ta ve imbe egketueni se tidtu se peretiyaya ni Abraham su impekita rin kayi te mid-ulaula rin. Ne ini ve se kinsuma rin dut te kiyug te Eleteala se kinemevaher te sarig din. ²³ Ketà be ne ke lalag te Eleteala ne impesurat din dengan ne netumanen en, ke sikandin te, "Mibperetiyaya si Abraham te edtumanen te Eleteala ke impasad din kandin, tembù be nevirang te Eleteala si Abraham ne metidtu." Ne arà imbe se kineingerani kandin te sepekat te Eleteala. ²⁴ Ketà ne nesebutan ta te ke etew ne metidtu diyà te etuvangan te Eleteala ne arà se etew ne eduma te lalag din. Su riyà te Eleteala ne arà se egkahi ki te ebperetiyaya ki ne kenà ebpekegaga embiya kenà egkekita kayi te ed-ul-ulaan tew.

²⁵ Iring ded dema ketà ke sarig ni Rahab ke sundal ne meritan dengan. Mibmetidtu sikandin diyà te etuvangan te Eleteala su sabap dut te meupiya ne ulaula rin su mibpepemenayik din ke deruwa ne suhù ni Josue ne nekeuma su edsirib te inged din ne Hiriku,

ne midtevangan din sikandan apey ran ebpekepelelahuy se ed-ulì ibpepevayà te sengebias ne ralan.

²⁶ Na ini se kebperetiyyaya tew te Eleteala ne iring te lawa te etew, su embiya warà hinawa rin ne warà atag din su minatey. Iring din ded dema se peretiyyaya tew, su embiya warà ed-ul-ulaan tew ne meupiya ne edruyud te peretiyyaya tew ne warà atag din ke peretiyyaya tew.

3

Ini ne Mekeatag te Kebpengahikahi ne Erangan

¹ Menge suled, iyan meupiya se kenà merakel keniyu se egkesuat ne ebpenurù, su netuenan tew te sikami ne ebpenurù ne embiya kenà ebpekeruyud ke ulaula rey dut te ibpenurù dey ne iyan pà dekelà se kegkukum te Eleteala kenami. ² Na sikitew ne menge etew, merakel se ibpevayà te kegkesayep tew su layun ki ed-ulaula te meraat wey ebpengahikahi te meraat. Ugaid ne embiya ruen etew ne kenà egkesayep se kebpengahikahi rin ne warè en idsawey kandin su metau en sikandin ne ed-erangan te langun ne ed-ul-ulaan din. ³ Pegpegitunga niyu ke kudà su misan dekelà se lawa rin ne eduma te etew piya endei ta ibpevayà su arà se reisek ne kakang ne ingkakang kayi te bèbà din. ⁴ Ne engketà ded dema ke kapal ne diyà te rahat. Misan dekdekelà ne kapal ne egkeewit dut te mevandes ne keramag, ne egketandang te etew se ibayà din su ibpevayà ketà se reisek ne pura ne ibpengulin piya endei se kiyug dut te kepitan ne ebpesineruwan. ⁵ Iring din ded be rema arà se rilà te etew, su misan deisek ini kayi te lawa ta, ne pulù nedantal se kebpengahikahi.

Pegpegitunga niyu ma ini te misan meluag ke ketelunan, ne langun din ne egkevinsulan dut te reisek dà ne apuy. ⁶ Na, iring te apuy ini se dilà te etew. Su ke dilà ta se ebpuunan te langun ne edsusunan te meraat ne ebpekereraat kenitew. Misan deisek nevenar ke dilà kayi te lawa ta, ne embiya edlag te meraat ne ebpekereraat te itungan wey hinawa ta. Igenat te batà ki pà taman te hewii te kebpatey ta, ne ini se dilà ta se ebpekegaga ne ederaat kenita, su iring te apuy ne riyà ebpuun te apuy nerakà.

⁷ Netuenan ta te ke etew se ebpekelayam te langun ne susunan te binatang kayi te ampew te dunya, su ruen merakel ne leew ne binatang wey merakel ne pepenuk wey merakel ne serà wey misan menge uled ne nelayamen te etew. ⁸ Ugaid ne warà etew ne ebpekegaga ne ederen te dilà din. Su ini se dilà ta ne ebpekeiring te bisa dut te uled ne ebpekepatey, ne kenà edsanggel se kebpengahikahi rin te meraat.

⁹ Ini se dilà ta se ebales te kebpselamat ta te Amey tew ne Eleteala ne ke Kerenan tew riyà te langit, ne ke dilà ta red maa se ebales te kebpenrawak ta te ruma ta misan Eleteala se midlimbag kandan iring te paras din. ¹⁰ Iyan din meana ne kayi ebpuun te sebseveka ne bèbà ne egemew ke lalag ne ebpselamat ki te Eleteala wey ke lalag ne ebpenrawak ki te ruma ta. Menge suled, kenà meupiya arà! ¹¹ Su upama ke tuhunan, ne kenà egkepakey ne ruen mepait wey meremismis se edtevir ne wayig ketà.

¹² Iring ded dema dut te merakel ne edsusunan te kayu. Su upama ke manggà ne kenà ebehas te kelemunding. Engketà ded dema ke

beyabas, kenà ebehas te berungkut. Ne iyan pè be iya ke tuhunan ne mepait kenà edtevir se meemis ne wayig.

Ini ne Mekeatag te Metampas ne Itungan ne Riyà Egenat te Eleteala

¹³ Ne embiya ruen etew riyà te keniyu ne metampas wey dekelà se netuenan din, ne iyan meupiya se ibpekita rin ini se egenat te meupiya ne ed-ul-ulaan din ne edumaan te kebpeembavà te hinawa rin. Su kayi ve imbe egkekita se dekelà se netuenan din. ¹⁴ Ugaid ne embiya egkesihì ke etew wey mepereyù, ne kenà meupiya ne ibpendantal din mekeatag dut te meupiya ne ulaula rin wey ke dekelà ne nesebutan din su teruen sikandin wey nekerimpas sikandin dut te tidtu ne penurù. ¹⁵ Ne embiya iring ketà, ne kenà arà se metampas ne itungan ne riyà ebpuun te Eleteala, ugaid ne riyà ebpuun te datù te pekaid wey ke itungan te etew rà dè duen kayi te ampew te dunya ne kenà ebperetiyyaya te Eleteala. ¹⁶ Su embiya ruen etew ne egkesihì wey mepereyù, ne arà se puunan te kegkehuvar wey merakel ne meraat ne ulaula. ¹⁷ Ugaid ne ke etew ne riyà ebpuun te Eleteala se ketampas din, ne arà se etew ne metidtu diyà te etuvangan te Eleteala. Mehalewhalew se hinawa rin dut te menge ruma rin, melimù sikandin, ne laus ne edsepekat. Igkelimù din ke menge ruma rin, ne layun meupiya se ed-ul-ulaan din diyà te kandan. Warà ebpelebien din su negidsan se ulaula rin dut te langun. Ne kenà asal-asal dà se peretiyyaya rin su tidtu se hinawa rin. ¹⁸ Ne ini se meupiya ne ulaula ne ebpekesuhat te hinawa te Eleteala, iring arà dut te bahas dut te impemula te etew ne ebped-ulit te menge ruma rin su apey ke ked-ubpà dan ne merinew.

4

Kenà kiyu Eduma te Kiyug te Menge Etew ne kayi rà te Ampew te Dunya ne Egkunterà te Eleteala

¹ Na duen menge etew keniyan te keniyu ne ebudemekidrimbur wey ebpekidlewaney. Ne igkahi ku keniyu ke endei ebpuun ini, su ini ne ebpuun te kiyug te lawa niyu te ed-erehey rà kayi te ampew te dunya ne egkunterà te kiyug niyu te ebpekesuhat te hinawa te Eleteala. ² Su upama ke ruen igkesuati niyu nevenar ugaid ne kenà niyu egkekuwa, ne ebpebpatey kew en. Ne embiya kenà niyu egkekuwa ke igkeima niyu dut te menge ruma niyu, ne egkeepesan niyu wey edrimburen niyu. Iyan niyu kenà kebpekekuwa su kenà niyu ebuyuen te Eleteala. ³ Ne misan Eleteala se ebuyuan niyu, ne kenà kew ebehayan su kenà meupiya se ebpeetahan niyu su ke ebuyuen niyu ne ibpatà niyu rà te nanam.

⁴ Meraat kew ne menge etew su mid-awà kew te Eleteala iring dut te etew ne ed-awà te esawa rin su apey ebpengingniyug! Meambe ke warà niyu metueni te ke etew ne eduma rut te meraat ne kiyug te menge etew kayi te ampew te dunya, ne arà se etew ne egkunterà te Eleteala? Ketà be ne piya engkey ne etew ne egkiyug ne eduma rut te meraat ne ulaula te menge etew kayi te ampew te dunya, ne egkevaluy sikandin ne kunterà te Eleteala. ⁵ Kenà niyu pegitunga te kenà benar ke lalag te Eleteala ne impesurat din ne egkahi te, “Ke hinawa ne imbehey te Eleteala kenitew rengan, ne nevaluy ne igkesuat din se meraat ne ulaula.” ⁶ Ugaid ne ke kedadavang te Eleteala kenitew ne mevaher pà su

apey ki kenà ebpekeruma dut te meraat ne kiyug te lawa tew. Su ruen dema ini se lalag din ne impesurat din ne egkahi te,
“Egkunteraan te Eleteala ke etew ne mepereyù,
ugaid ne edtevangan din ke etew ne ebpeembavà
te hinawa rin.”

⁷ Ketà be ne perumaruma kew neveran te Eleteala. Ne embiya kenà niyu ibpememantag ke datù te pekaid, ne ebpekepelahuy sikandin.
⁸ Embiya ed-uvvey kew te Eleteala, ne iring ded dema ketà ke ked-uvvey rin keniyu. Sikiyu ne mekesesalà, ne engkeri niyu ke ed-ul-ulaan niyu ne meraat. Ne sikiyu ne asal-asal dà ne ebperetiyaya, ne peketidtuwa niyu ke hinawa niyu te kebperetiyaya. ⁹ Iyan meupiya ne keuru kew wey sinehew kew rema su atag dut te meraat ne neveelan niyu. Kenà kew ed-engit, ugaid ne sinehew kew. Uya, kenà kew egalew, ugaid ne rungkug kew. ¹⁰ Su embiya ibpeembavà niyu ke hinawa niyu riyà te Eleteala ne sikandin se eburù keniyu.

Ini ke Imbaag ni Santiago Mekeatag te Kedsawey ta te menge Ruma ta ne Mibperetiyaya

¹¹ Menge suled ku, kenà kew ebpeserserupetey su ke etew ne edseserupet wey ebpendedisek te ruma rin ne mibperetiyaya, ne timbang te ebpendediseken din ke dekelà ne penduan te Eleteala. Ne embiya ebpendediseken niyu ke penduan te Eleteala, ne kenà kew ebperumaruma te suhù din su iring kew te iyan ebayàbayà dut te penduan. ¹² Na seveka rà se ebpuunan te penduan ne ke Eleteala rà, ketà be ne sikandin ded ke egkukum te langun ne menge etew. Ne sikandin dà se ruen gehem din te kedusa etawa kebpeliyu te menge etew. Tembù be sikitew ne warà ketengdanan tew te egkukum wey edsawey te ruma ne etew.

Ini ke Imbaag ni Santiago Mekeatag te Kedantal Ta

¹³ Na embiya ruen diyà te keniyu ne egkahi te, “Guntaan etawa keremà ne ebpendiyyà key te senge inged su ebpendahang key taman te senge rahun apey key ebpekeuntung,” na pemineg kew kayi te egkehiyen ku. ¹⁴ Kurang kew pà te pegitungan niyu, su warà etew ne raan din en ne egketuenan ke engkey se egketemanan din keremà. Su ke umur tew kayi te ampeg te dunya ne edsahad dà su iring dut te sehulapun ne egkekita te mehaan ne iseg-iseg dà ne warà en. ¹⁵ Iyan pà meupiya ne egkehiyen niyu arà se, “Embiya edluhut ke Eleteala ne biviyag ki pà ne egketuman ini se ed-ul-ulaan dey.” ¹⁶ Ugaid ne sikiyu mulà ne menge mepereyù su idantal niyu ke ed-ul-ulaan niyu. Ne meraat arà se idantal niyu diyà te etuvangan te Eleteala.

¹⁷ Tentenuri niyu ini se egkehiyen ku te embiya ruen etew ne netuenan din ded ke engkey se kiyug te Eleteala kandin ugaid ne warà din ul-ulaa, ne nekedsalà sikandin diyà te etuvangan te Eleteala.

5

Ke Ibpenurù ni Santiago dut te Menge Etew ne Kewasa

¹ Na sikiyu ne menge kewasa, pemineha niyu ini se egkehiyen ku. Peninehew kew wey penderawit kew su ke kemerehenan ne ebpekeuma keniyan te keniyu ne rekèlè. ² Su ke kearen niyu ne egkereetan wey ke belegkas niyu ne egketketen te kekava. ³ Ne

misan ke bulawan wey pirak niyu ne edtengisen su tuus te salà niyu su midtibpes niyu rà. Ne arà se ederaat keniyu iring dut te etew ne egketutung te apuy. Midrerapug kew te rekèlè ne kearen ketà te kegkepupus te dunya.⁴ Midlimbungan niyu ke menge etew ne egelevek diyà te pengengewiran niyu su warà niyu mesukayi sikandan. Menu, nerineg niyu ke pemivihan dan? Ne ini se ebpengehani keniyu, ne ke Kerenan ne Eleteala ne mekegehem se nekerineg te id-isuhat dan keniyu.⁵ Sikiyu ne menge kewasa, ne warà kurang niyu su ebpekegaga kew te piya engkey ne kiyug niyu wey ke ked-ubpà niyu kayi te ampew te dunya ne meupiya nevenar. Ugaid ne iring kew te binatang ne impelambù su edsumbelien su kunaan niyu ne ke kedusa te Eleteala ne kenà ebpekeuma riyà te keniyu.⁶ Ne misan ke menge metidtu ne etew ne mid-ewit niyu diyà te kukuman ne mid-isuhat niyu sikandan su apey ran edusai. Ne ruen mid-imetayan niyu misan warà dan medatu.

Ini ne Mekeatag te Kedtigker te Kemerehenan

⁷ Na menge suled ku, tigkeri niyu ke menge kemerehenan taman te kedlived te Kerenan tew. Pegitunga niyu ke etew ne ebasuk su edtigkeran din se edtahad taman te edsebpet arà se impemula rin su berepantag diyà te kandin. Edteharan din ke uran ne ebpetuvù te pinemula rin, ne edteharan din dema se kebmetesan te pinemula rin su apey rin ed-eheniyen.⁸ Ne sikiyu rema, ne peketigker kew te kedadhad dut te kedlived ni Hisus. Beg-eta niyu ke kebperetiyyaya niyu su ke Hewii te kedlived te Kerenan tew ne mehaan en.

⁹ Menge suled ku, kenà kew pepempemivihey su apey kew kenà edusai te Eleteala. Mehaan en ebpekeuma ke egkukum su iring te edtviltilv en an te gumawan.

¹⁰ Na menge suled ku, pegitunga niyu ke menge ebpelambas te lalag te Eleteala rengan. Misan ke Kerenan ne Eleteala se midsuhù kandan te ebpmenumudtl te lalag din, ne merakel se kemerehenan ne midtigkeran dan. Na, iringi niyu ve rema ke kedtigker dan.¹¹ Ne netuenan tew te nehalew ran mulà su midtigkeran dan ke kemerehenan dan. Ne netuenan niyu rema ke kinetigker ni Job dut te kemerehenan din, ugaid ne warà medlugkà ke sarig din. Ne ketà te kegkeipus ke kemerehenan din, ne meupiya se imbehey te Eleteala kandin su impekita rin ke kegkeyru rin wey ke tavang din su iring ketà ke ulaula te Eleteala dut te menge etew ne edsarig kandin.

¹² Na menge suled ku, ini se dekelà dut te langun ne suhù ku keniyu. Kenà kew edsesapà. Embiya ruen ibpasad niyu te menge ruma niyu, ne kenà kew edsesapà te langit etawa tanà etawa piya engkey en, su langun ne lalag niyu ne tidtuwa niyu. Kehiya niyu rà se “Uya” etawa “Kenà” su apey kew kenà egkeumai te kedusa te Eleteala.

¹³ Na embiya duen diyà te keniyu egkerehenan, ne iyan meupiya ne ebpengeningeni sikandin te Eleteala. Ne embiya ruen egkehalew, ne iyan meupiya ne ebpembeyveyuken din te kebpselamat din te Eleteala.¹⁴ Ne embiya ruen ederaru, ne iyan meupiya ne ed-engayen ke menge pekilukesen dut te langun niyu ne menge mibperetiyyaya keniyan su apey ran ibpengeningeni sikandin, ne edsepwan dan te lana sikandin gewii te ebpengeningeni ran wey edtawag dan te ngaran te Kerenan.¹⁵ Ne ini se kebpengeningeni ran ke embiya tidtu se

kedsarig dan se igkeulii te ederaru, su ke Kerenan ne Eleteala se ebawì kandin. Ne embiya duen salà ne neveelan din, ne ebpeseharen en te Eleteala.¹⁶ Ketà be embiya ruen salà nu ne mibeelan nu te ruma nu, ne idtarem nu kandin su apey rin egkepesehad ke salà nu. Ne pengeningeni kew rema te menge ruma niyu su apey ke etew ne ederaru ne meulii. Su ke kebpengeningeni rut te etew ne metidtu diyà te etuvangan te Eleteala ne ebpekegaga nevenar.¹⁷ Pegitunga niyu si Elias dengan. Misan etew rà sikandin iring kenitew, ne mibpengeningeni sikandin te midsepuntung din se hinawa rin te kenà med-uran ne warà dema med-uran lusud te tetelu ne rahun wey tengà.¹⁸ Netaman ne mibpengeningeni maa sikandin medsaup su apey ed-uran, ne ketà ne mid-uran te merehes ne nengeuyag ded ini se pinemula.

¹⁹ Menge suled ku, embiya ruen etew riyà te keniyu ne nekesuwéy rut te tidtu ne penurù, iyan meupiya ne ruen etew ne edtavang kandin su apey ebpekelived ded sikandin te tidtu ne penurù.²⁰ Ne tentenuri niyu ini se egkehiyen ku. Embiya edtevangan nu ke etew su apey rin ed-engkeri se keduma rin te meraat, ne ibpepeleyu nu sikandin su apey kenà edusai taman te taman. Ne egenat ketà, ne Eleteala se ebpesehad dema dut te merakel ne salà din.

Ke Neuna ne Surat Ni Pedro

¹ Siaken si Pedro ne edsurat kayi. Ne epustul a ni Hisu Kristu ne iyan din meana ne kedserihan a nikandin. Ne idsurat ku ini riyà te kenyu ne menge mibperetiyyaya ki Hisus ne nepemilì te Eleteala ne nekesivurak diyà te menge inged ne Puntu, ne riyà te Gelasiya, Kepedusiya, Asiya wey Bitanya. ² Su rengan ne nepemilì kew te Eleteala ke Amey tew su ini se netahù te itungan din. Nepemilì kew nikandin ne egkevaluy ne menge etew rin ne lunsey se hinawa ran egenat te gehem te Kedesenan ne Ebpetuntul te Menusiyà. Ne iyan din kebpemili kenyu su apey kew egkevaluy ne menge etew ne eduma ki Hisu Kristu ne ebmetilàk ke hinawa niyu rut te lengesa rin ne impetudà din kenyu ketà te kinepeimatey rin su apey egkeawà ke salà niyu.

Iyan ku ibpengeningen i ne ebpeneuven kew nikandin wey ebmelintad nevenar se hinawa niyu.

Ini se mekeatag te kenà eduwaruwa se Hinawa ta te Kebperetiyyaya tew

³ Ne edeyuen tew ke Eleteala ke Amey rut te Kerenan tew ne si Hisu Kristu. Dekelà se kegkeyru rin keyta su egenat te kebanew rin ki Hisu Kristu ne mibehayan kiyu rin te behu ne umur ne nevaluy ki ne menge anak din. Tembù be ruen ebpenerengen tew ne egkevanew ki red te Eleteala ne ebehayan te umur ne warà edtemanan din diyà te ubpaan din. ⁴ Ne elin dema egkepenareng tew ini se impegadir te Eleteala ne intail din keytew riyà te langit. Ne ini se keupiya ran ne kenà egkesembian su riyà ne kenà egkereetan, ne kenà egkeawà. ⁵ Ne ini se impegadir din ne kenitew en. Ne sabap te kedsarig ta te Eleteala ne ebentayan ki rin egenat dut te gehem din su apey kenà ki ebpemekedsuwey gewii te edteharan tew ini se ibehey rin keyta ketà te mewri ne hewii.

⁶ Ne egenat dutun ne egkehalew kew en misan egkemutuwan kew te mehaan guntaani su sabap te merakel ne keresayan ne egketigkeran niyu. ⁷ Su ini se keresayan ne iyan ibpenggeram rut te kebperetiyyaya niyu embiya meilut etawa kenà. Su misan bulawan ne ebpenggeraman diyà te apuy su apey egkevaluy ne lunsey ne bulawan ne warà sawug din, ne ini se bulawan ne edsahad dà. Ugaid ne muna pà ne belielehà ini se kebperetiyyaya niyu rut te bulawan. Tembù be embiya meilut pà se kebperetiyyaya niyu rut te kebpenggerami te keresayan ne ebpekeuma riyà te kenyu, ne egkereyù kew wey ibpurù kew te Eleteala ketà te hewii ne edlived si Hisu Kristu kayi te ampew te dunya. ⁸ Ne misan warà niyu pà mekita si Hisus ne ikelimù niyu sikandin, ne ebperetiyyaya kew kandin misan kenà niyu egkekita sikandin guntaani. Ne egkekita ini dut te dekelà ne egkehalew niyu ne kenà egkerepengan wey kenà igkeupama. ⁹ Ne iyan kegkeiring ketà su ruen umur ne warà edtemanan din ne egketelimà niyu sabap te mibperetiyyaya kew kandin.

¹⁰ Ini se kebpeliyu keytew rut te kedusa te salà tew ne rengan dà ne nekahai en ini rut te menge ebpelambas te lalag te Eleteala,

tembù be layun dan ebpengedii te meupiya mekeatag kayi. ¹¹ Su ruen mibpeketuenan kandan neraan dut te Kedesenan ne Ebpetuntul te Menusiyà ne riyà ebpuun te ki Hisu Kristu te ruen kemeresayan ne egkeheraman ni Hisu Kristu kayi te ampew te dunya, ne embiya egkeipus arà ne egkekita ini se kebmepurù din. Ne mibpekid-inseey ran te keenu ed-ul-ulaa te Eleteala ini wey engkey se ralan te ini ne egketuman. ¹² Ne mibpeketuenan dema te Eleteala dut te menge ebpelambas te lalag din te ini se egked-ulaula ne kenà egketuman dut te hewii ran pà, ugaid ne kayi te sikitew en guntaani ne egketuman ini. Ne benar arà. Su ini se nekahи ran neraan ne ini se Meupiya ne Tudtul ne impesabut en diyà te keniyu dut te ini se ebpmenumurù keniyu guntaan. Ne ke Kedesenan ne Ebpetuntul te Menusiyà ne impecengkayi te Eleteala egenat te langit se ebpesabut kandan te ini se ibpemenumurù dan. Ne misan ke menge suluhuen te Eleteala riyà te langit ne egkiyug dan ne egkesebutan ini.

Ini se Mekeatag dut te Ked-iring tew ki Hisus Kayi te Ed-ul-ulaan tew

¹³ Tembù be iyan iya se ibpenehana tew ke hinawa ta neraan te keduma te suhù te Eleteala. Ne ebpekerumbahat ki rut te langun ne ed-ul-ulaan tew su apey iyan dekelà te hinawa ta ne ini se meupiya ne ibehey te Eleteala keytew ketà te hewii ne edlived si Hisu Kristu kayi te ampew te dunya. ¹⁴ Ne iyan iya se edtumanen tew ke kiyug te Eleteala su apey kenà ki en edlived dut te meraat ne kiyug te hinawa ta ne nelayaman tew rengan te warà ta pà metueni ke benar ne penurù te Eleteala. ¹⁵ Su ke Eleteala se mibpemili te sikitew ne egkevaluy ne menge anak din. Ne embiya ke Eleteala ne warà nekesawug ne meraat dut te langun ne ed-ul-ulaan din, tembù be iyan iya se warà ebpekesawug ne meraat kayi te ed-ul-ulaan ta. ¹⁶ Su ruen impesurat ne Lalag te Eleteala ne egkahi te,

“Siaken ne warà iya salà ku,
tembù be siaken se iringi niyu.”

¹⁷ Ne embiya egkehiyen ta ne Eleteala ke Amey tew ketà te kebpengeningen tew ne iyan iya se meilut se ked-edati ta kandin taman te ini ki pà te ampew te dunya. Su metidtu se kegkukum din, ne edtuntul te langun ne ed-ul-ulaan tew ne warà ibpelabi rin. ¹⁸ Ne netuenan ta ne mibelukasan ki te Eleteala rut te kegkeuripen tew te menge ulala tew rengan ne warà rantek din ne intetahak te menge keep-epuan tew. Ugaid ne sika se imbelukas kenitew ne kenà bulawan etawa pirak ne egkeawà ke elehà din. ¹⁹ Su iyan din imbelukas keytew ne ke impelengesa ne Anak din ne si Hisu Kristu. Ne sikandin ne iring te nati te bilihili ne nepemili dan su warà sarir din ne ibpelengesa ran su ibehey te Eleteala. Ne iring ketà si Hisus Kristu su sikandin ne warà iya salà din. ²⁰ Ne rengan te warà pà limbah ke kelibutan ne intail en si Hisus te Eleteala ne ebpeimatey su ebpeliyu keytew rut te salà tew. Ne ketà te nekeuma en ke netendù ne hewii te Eleteala te ed-ul-ulaan din ini, ne nekeuma en sikandin su apey kiyu mevelukasi. ²¹ Ne geina te ini se mid-ulaula ni Hisus ne nekeperetiyyaya kiyu te Eleteala. Su sikandin ke mibanew ki Hisus wey mibpepurù dema kandin diyà te langit. Tembù be sikitew ne iyan tew ebperetiyyayaan wey edserihan ne Eleteala ne ebanew keytew rema keuremà.

22 Na geina te mibperumaruma ki en dut te tidtu ne penurù ne egkepakey ne meilut se limù tew rut te menge ruma tew te ebperetiyyaya su mibmetidtu ke itungan tew. Tembù be ebpelimlimuey ki egenat te hinawa ta ne kenà kayi rà te bèbà ta. ²³ Su ketà te mibperetiyyaya ki te Lalag te Eleteala ne nevaluy ki ne anak din su iring te insaup ki in-anak, ne kenà etew se iyan mid-anak kenitew su Eleteala ne warà kemetayen din. Ne ini se behu ne umur ta ne ibpepevayà din ini dut te lalag din ne mibperetiyyaya key ne ebpekevehey te umur ne warà edtemanan din wey kenà egkesembian. ²⁴ Su ruen impesurat ne Lalag te Eleteala ne egkahi te,

“Kenà melayat se umur dut te menge etew,
su iring te sagbet ne mehaan ne egkehangu.

Ne ke kevantug din ne iring te kevukaran
su kenà meuhet se egkekita nu, ne egkeleyùlù en.

²⁵ Ugaid ne ke Lalag te Eleteala ne kenà iring ketà
su warà edtemanan din.”

Ne ini se Lalag te Eleteala ke Meupiya ne Tudtul ne iyan impesabut en kenyu.

2

¹ Na embiya nevaluy ki en ne menge anak te Eleteala, ne ed-engkeran ta ke langun ne meraat ne ed-ul-ulaan ta. Kenà ki en edtarutarù, kenà asal-asal dà te keupiya ta, ibpekeriyù ta ke kegkesihi, ne kenà ki edlag te meraat mekeatag te menge ruma ta. ² Su embiya iyan ta kiyug ne ed-iseg ini se peretiyyaya ta, ne ed-iring ki te deisek ne batà ne layun edsusu su apey edekelà. Ne embiya iring ketà se egkiyuhan ta te ebpengadì ke Lalag te Eleteala ne ebmeilut se kebperetiyyaya ta te Eleteala ne mibpeliyu keytew. ³ Iyan ta ed-ul-ulaan ne iring ketà su neheraman dey ke limù te Eleteala keytew.

Ini se Mekeatag te Segkad ne Berepantag ne kenà Egkiyuhan te Menge Etew ne Ibpengawid te Baley ran

⁴ Egawed kiyu en rut te Kerenan tew ne si Hisus ne iyan ebehey te umur ne warà edtemanan din. Su sikandin ne iring te pelaus ne intimbag dut te menge ebpemevaley su kunaan dan ke warà rantek din, ugaid ne iyan en iya ini ne pemili te Eleteala ne segkad ne berepantag dut te valey. ⁵ Ne sikami ne mibehayan te umur ne warà edtemanan din, ne iring key rema te menge pelaus ne ibpengawid te Eleteala te baley ne ibpeitindeg din. Ne iring key rema te menge terebpelengesa rin ne ebpelengesa su ibehey riyà te kandin. Ne iyan dey ibehey kandin ne ini se kebpselamat dey wey ke kedeyù dey kandin, ne edtelimaan din su sabap te ned-ulaula ni Hisu Kristu. ⁶ Su ruen impesurat ne Lalag te Eleteala ne egkahi te,

“Duen mibpemili ku ne edatù
ne iring te pelaus ne berepantag

ne iyan segkad dut te baley

ne ibpeitindeg ku riyà te inged ne Siyun.

Ne piya engkey ne etew ne ebperetiyyaya kandin

ne kenà ebpekedsendit dut te kebperetiyyaya rin kandin.”

⁷ Ne ini se segkad ne mibpemili te Eleteala ne si Hisu Kristu, ne mepmepurù kayi te sikami ne mibperetiyyaya kandin. Ugaid ne ke

menge etew ne kenà ebperetiyaya kandin ne sikandan se edtuman dut te impesurat ne Lalag te Eleteala ne egkahi te,
 “Ini se pelaus ne intimbag dut te ebpemevaley
 su kunaan dan ne warà rantek din,
 ne iyan en iya ini nepemilì ne segkad dut te baley.”

Ini se Mekeatag te Edresayan ta te Ulaula ta ne Meupiya

⁸ Ne ruen dema impesurat ne Lalag te Eleteala ne egkahi te,
 “Ne sikandin ne iring te batu
 ne nesiud te menge etew ne ebpekepiley kandan.”
 Iyan dan kebpekesiud su warà dan mebperetiyaya te Lalag te Eleteala
 mekeatag dut te ini se Impasad din ne Ebperetuen te langun, tembù
 be ini se kedusa kandan se netahù te itungan te Eleteala.

⁹ Ugaid ne sikami ne mibperetiyaya kandin ne mibpemilì te Eleteala
 ne egkevaluy key ne menge anak din. Ne iring key te menge
 terebpelengesa ne egelevek diyà te Eleteala ne datù tew. Ne sikami
 rema ke ebeyveyaan dan, ne sikami red dema se nepemili din ne
 kandin ne menge etew su apey rey ibpemenudtul ke meupiya ne mid-
 ulaula rin keyta. Su rengan ne iring key te riyà te merusirem, ne
 guntaani ne Eleteala se midrayag kenami. ¹⁰ Su rengan ne warà key
 pà mevaluy ne menge etew te Eleteala, ugaid ne guntaani ne menge
 etew key en nikandin. Rengan ne warà dey pà meherami ke kegkeyru
 te Eleteala kenami, ugaid ne guntaani ne neheraman dey en.

¹¹ Menge suled ku ne igkelimù ku, ebpenehaad ki pà kayi te ampew
 te dunya. Su kenà ini se kelibutan se tidtu ne ubpaan tew su riyà te
 langit. Tembù be ebuyuen ku kenyi te kenà niyu dumai ke meraat
 ne egkiyuan te lawa niyu, su ini se kebpeneheewit niyu te salà ne
 ebpekesanggel te keduma niyu te Eleteala. ¹² Iyan iya se meupiya
 ke ed-ul-ulaan niyu su apey egkekita dut te menge etew ne warà pà
 mibperetiyaya. Su misan ke egkehiyen dan ne meraat se ed-ul-ulaan
 niyu, ne egkekita ran ded te ini se ed-ul-ulaan niyu ne meupiya ne ketà
 te hewii ne edlived si Hisus kayi te ampew te dunya ne edeyù dan te
 Eleteala su atag dut te meupiya ne ed-ul-ulaan niyu.

Ini se Mekeatag te Eduma ki rut te Egkamal keyta

¹³ Na geina te mibperetiyaya ki ki Hisus, ne eduma kiyu te menge
 ureding dut te menge egkamal keytew. Ebperumaruma ki rut te piya
 engkey en ne ebpengulu te inged tew. ¹⁴ Ne ke ruma pà ne egkamal
 dema, ebperumaruma ki kandan. Su sikandan se midsuhù dut te
 pengulu te ebpedsalà te menge etew ne edsurang te ureding wey
 edeyuen dan dema ke menge etew ne ed-ulaula te meupiya. ¹⁵ Su
 ini se egkiyuan te Eleteala ne ed-ul-ulaan tew ne meupiya su apey
 egkeengked ke menge lalag ne warà rantek din dut te menge etew
 ne egketalengtaleng ne edtarutarù mekeatag keytew. ¹⁶ Ne geina te
 impeliyu ki en dut te salà ta ne egkepakey ne sikita se ebpemilì ke
 engkey se ed-ul-ulaan tew. Ugaid ne kenà egkepakey ne iyan tew
 ebpegitungen ne ini se kebpekeliyu keytew ne idtaleb ta dut te meraat
 maa ne ed-ul-ulaan ta. Ugaid ne ebperumaruma ki te Eleteala su sikita
 se sugsuhuen din guntaani. ¹⁷ Ed-edatan ta ke langun ne menge etew.
 Ne edlimuan ta rema ke menge ruma ta ne mibperetiyaya. Iring din

dema ne igkeandek ta ke ed-ulaula ki te kenà ebpekesuhat te hinawa te Eleteala. Ne ke pengulu rema dut te inged ta ne ed-edatan.

¹⁸ Ne sikiyu ne menge uripen, iyan se med-adat kew rut te tehiuripen keniyu ne perumaruma kew kandan. Ne kenà ke metulangled dà ne tehiuripen su ke tehiuripen dema ne meraatdaat. ¹⁹ Embiya edtigkeran ta ke kerasayan ne ebpekeuma keyta misan pà te warà ki mekesalà, ugaid ne edtigkeran te pà lavew su edumaan ta ke kiyug te Eleteala, ne ebpekesuhat ini te hinawa te Eleteala ne edlelawan kiyu rin. ²⁰ Ugaid ne embiya sabap dut te salà ta ne ebpekesekitan ki, ne misan edtigkeran ta ne warà idlalew rin keyta. Ugaid ne embiya edtigkeran ta te kerasayan ne ebpekeuma su atag dut te meupiya ne ed-ul-ulaan ta, ne ebpekesuhat te hinawa te Eleteala ne ini se kadtigker ta. ²¹ Su iyan egkiyuhan te Eleteala keyta ne edtigkeran ta te misan engkey ne kerasayan ne ebpekeuma keyta. Su netuenan ta ne si Hisu Kristu ne nerasey nevernar mekeatag kenitew, ne sikandin se ledawan ne edirangan ta.

²² “Su sikandin, ne warà iya salà din,
ne warà misan seveka ne tarù ne migkahi rin.”

²³ Su misan ke menge etew ne midsumpalit kandin, ne warà din tevaka te meraat. Ne iring ded ketà te mibpekesekitan sikandin, ne warà sikandin migkahi te edsuli. Insarig din dà diyà te Eleteala ne iyan metidtu ne egkukum dut te langun ne egketemanan din. ²⁴ Su ketà te mibpeimatey si Hisus diyà te pinebelavag ne kayu ne mid-ewit din ke langun ne menge salà ta su sikandin se midusaan mekeatag te salà tew. Iyan din mid-ulaula te iring ketà su apey tew ed-engkeri ke ed-ul-ulaan ta ne meraat ne edtidtuwen ta ini se ed-ul-ulaan ta te ulaula ne meupiya. Su ketà te kegkepelii rin ne impeliyu ki rut te kedusa te menge salà ta. ²⁵ Su rengan te warà ki pà mebperetiyaya ki Hisus, ne iring ki te menge bilibili ne nenetarin. Ugaid ne guntaani ne impeuli ki en diyà te Tumetuganur ne si Hisu Kristu ne iyan ebantey keytew.

3

Ini se Mekeatag te Penurù te Teledesawa

¹ Ne sikiyu rema ne menge meritan, iyan iya se ebpesakup kew rut te esawa niyu. Su embiya ruen warà pà mibperetiyaya te Lalag te Eleteala ne kalu ke ebpekeperetiyaya ran dema ke egkekita ran ini se ed-ul-ulaan niyu ne meupiya. Misan warà en egkehiyen niyu ne ebpeneheewit kandan, ² ne egkepakey ne egkepeneheewit dan te ebperetiyaya ki Hisus kayi te egkekita ran ne mepmeupiya ne ed-ul-ulaan niyu wey ke dekelà ne ked-adat niyu te Eleteala. ³ Ne ruma pà, menge meritan, kenà niyu pegitunga te ini se ibmerayirayi niyu ne ini se pegadir dut te lawa niyu iring te kebputus te bulvul niyu, wey dayandayan te lawa niyu te bulawan, wey mepurù ne menge belegkas. ⁴ Ugaid ne iyan tidtu ne ibmerayirayi niyu ne meupiya ne ulaula ne ebpun te hinawa niyu ne warà kegkeawà din. Su iyan belielehà diyà te etuvangan te Eleteala ne arà se mepened se hinawa niyu wey meredtan ne betasan. ⁵ Su iring kayi iya se kebmerayirayi dut te metinumanen ne menge meritan rengan ne insarig ke hinawa ran te Eleteala wey mibpesakup dan te esawa ran. ⁶ Ne iring kayi si Sara rengan, ke esawa ni Abraham, su mibpesakup sikandin te

esawa rin ne mid-edatan din iring te mepurù din. Ne iring kew te menge inenakan ni Sarah embiya ed-iringan niyu ini se ulaula rin ne mepmepiya wey embiya kenà niyu idtuhut ke itungan niyu ne egkesamuk dut te kegkeandek.

⁷ Ne iring din ded dema ke sikiyu ne menge meama, ne upiani niyu ke kebpeneheewit niyu te esawa niyu. Tugenura niyu sikandan ne edati niyu rema su kenà mevaher sikandan iring te meama. Ne tentenuri niyu te sikandan ne ebpeketelimà dema te limù te Eleteala ne ini se umur ne warà edtemenan din iring te sikiyu. Tembù be edati niyu sikandan su apey warà ebpekealang te kebpengeningi niyu.

Ini se Mekeatag te Edresayen ta te Ed-ul-ulaan ta ne Meupiya

⁸ Ne ruen dema egkehiyen ku keniyu te langun ne menge mibperetiyya, iyan iya se medseveka se itungan ta wey ke hinawa ta. Pelimlimuey kiyu rut te menge ruma ta iring te telteledsuled, ne ebpetultulengerey kiyu ne kenà ki mepelevawen. ⁹ Embiya ruen etew ne ed-ulaula te meraat kayi te keyta etawa ed-undaunda keyta, ne kenà ki edsulì ugaid ne iyan ta ed-ul-ulaan diyà te kandan ne meupiya. Su ini se kiyug te Eleteala keyta ketà te kebpekeperetiyya ta su apey kiyu rin metevangi te meupiya. ¹⁰ Su ruen impesurat ne Lalag te Eleteala ne egkahi te,

“Piya engkey ne etew ne egkiyug
te meupiya se ked-upbà din kayi te ampew te dunya
ne egkehalew te hinawa rin ne melinew,
ne iyan iya se edtiemen din ke bèbà din
ne ed-engked sikandin se edtarùtarù.

¹¹ Ne med-engked sikandin dut te meraat ne ulaula
ne iyan din ed-ul-ulaan ke meupiya,
ne layun din ebpmengaa te meupiya ne kederepità
dut te menge ruma rin.

¹² Su ke etew ne ed-ulaula te meupiya
diyà te etuvangan te Eleteala,
ne arà se ebentayan din,
ne ebpminehen din ke kebpengeningeni rin.
Ugaid ne igkeepes din arà se ed-ulaula te meraat.”

¹³ Na embiya meilut se kegeweri ta rut te meupiya ne ed-ul-ulaan, ne engkey se ebpmekaid keyta! ¹⁴ Ugaid ne misan ebpeketigker ki te kegkesihi te menge etew atag dut te ed-ul-ulaan ta ne meupiya, ne kenà ki ed-engked su egkehalew ki. Iyan meupiya ne kenà ki egkeandek wey kenà ki egkeuru. ¹⁵ Ugaid ne iyan ta ibpeuna te hinawa ta ke ked-adat tew ki Hisu Kristu su sikandin se Kerenan ta. Ne ed-andam ki neraan ke engkey se idtavak ta te menge etew ne ed-insà mekeatag dut te kebperetiyya ta. ¹⁶ Ugaid ne kayi te kdtavak ta ne mananew se kedlag ta ne ed-adat ki kandan. Ne iyan meupiya ne ed-uram ki ne warà salà te ulaula ta ne ebpekesamuk te hinawa ta su apey ke menge etew ne edsumpalit keyta mekeatag te kebperetiyya ta ne egkeyeyaan dan dut te migkahi ran. ¹⁷ Embiya kiyug te Eleteala ne egkerasey ki su atag dut te meupiya ne ed-ul-ulaan ta, ne iyan pà meupiya rut te iyan ta egkerasey te ed-ulaula te meraat. ¹⁸ Su misan si Hisu Kristu ne warà salà din ne mibpeimatey sikandin su atag dut te sikitew ne mekesesalà su apey ibpelived ta ke hinawa ta diyà te

Eleteala. Keseveka rà se kinepatey rin atag dut te salà ta, ne kenà en edseupan su nepasad en. Ugaid ne misan mid-imetayan te menge etew ke lawa rin ne biviyag ded sikandin su warà mibpatey ke gimukud din,¹⁹ ne mibpendiyà ke gimukud din te bilengguan te gimukud dut te menge minatey ne mibpatey rengan su mibpesabut kandan te Lalag te Eleteala.²⁰ Ne ini ke menge gimukud dut te menge etew rengan ne warà mibperetiyyaya te Eleteala ketà te hewii ni Noe. Rengan te biviyag den pà ne midtigkeran dut te Eleteala ke meraat ne ulaula ran su midtahad sikandin embiya ebpekeperetiyyaya ran gewii te ebelayan pà ni Noe ke avang ne ed-ingaranan te arka. Ugaid ne guna su nekeipus si Noe te arka ne mid-urug ke ralem, ne ruen walu rà ne menge etew ne mibperetiyyaya kandin ne midlusud te arka ne nekeliyu ran dut te kegkelened.²¹ Ne ini se kebpekeliyu ran ne egkeiringan ta ini te kebunyahai ta su tuus te kebpekeliyu ta te kedusa te Eleteala dut te salà ta. Su ini se kebunyahai keyta ne kenà ke kedlùlù te putting kayi te lawa ta, ugaid ne tuus ini te iyan ta ebuyuen te Eleteala ne id-awà din ke menge salà ta ne edtilaken din ke hinawa ta su apey kenà ki egkeyeyaan te ed-itindeg diyà te etuvangan din. Ne iyan din kebpeliyu keyta su minatey si Hisus su atag dut te salà ta ne mibanew rin.²² Ne guntaani ne diyà si Hisus mid-ulì te langit ne ebpiniuu diyà te rapit te egkekewanian te Eleteala. Ne langun ne suluhuen te Eleteala wey langun ne rumu pà ne ruen gehem dan ketà ne sikandin se ebayàbayà kandan.

4

Ini se Mekeatag te Ed-ul-ulaan ta ne Ebpekesuhat te Hinawa te Eleteala

¹ Ne netuenan ta te nerasey si Hisu Kristu gewii te kayi pà sikandin te ampew te dunya, ne iyan iya se ed-andam ki te edtigker te keresayan iring kandin. Su ke etew ne edtigkeran din te keresayan ne iring te egkeawà ke kiyug din te ed-ulaula te meraat.² Tembù be taman te kayi ki pà te ampew te dunya ne iyan ta ed-ul-ulaan ne kiyug te Eleteala, ne kenà iyan ta edumaan ke kiyug te sikitew ne menge etew.³ Ustuen ketà te hewii ne mid-usar ta te iyan ta ed-ul-ulaan ne engkey se kiyug te ed-ul-ulaan te menge etew ne kenà ebperetiyyaya te Eleteala. Su rengan ne ruen ed-ul-ulaan ta ne meredsik, wey ini se ulaula ne ebpatà ki te nanam. Lelayun ki ed-inum te ebpeketevereg wey ke kebpengingniyug ta. Ne ruen betasan ta ne egkevurun ki su edhubughubug wey ke kebpengarap ta te ledawan dà ne kenà tidtu ne Eleteala ne medmeraat ini diyà te etuvangan din.⁴ Ugaid ne guntaani, ne ini se menge etew ne kenà ebperetiyyaya te Eleteala ne neinuinu ran te meambe ke kenà ki eduma kandan te ed-ulaula te meraat wey ini se ulaula ne ebpatà te nanam. Tembù be edsumpeliten ki nikandan.⁵ Ugaid ne ketà te akir din ne hewii ne ebpekeetuvang dan te Eleteala su ed-insaan din sikandan te meambe ke mid-ulaula ran te meraat. Su mibpenehana en ke Eleteala su egkukum dut te menge ulaula te langun ne menge etew ne biviyag pà wey ke menge minatey.⁶ Tembù be ke menge minatey en ne daan ne ke Meupiya ne Tudtul se impesabut kandan su apey ruen ebperetiyyaya te ini se gimukud dan se ed-ubpà diyà te Eleteala.

Ugaid ne misan mibperetiyyaya ran ne nekeragkes dan te kebpatey te lawa ran su iyan kegkukum te Eleteala dut te langun ne menge etew.

⁷ Mehaan en se kegketapus kayi te dunya, tembù be sikita ne menge etew ne iyan iya se editihel ki rut te egketuenan ta ne ibpevayà ta wey ibmeupiya te hinawa ta su apey warà ebpekealang te kebpengeningeni ta te Eleteala. ⁸ Ne iyan ta ibpeuna te hinawa ta ne egeweran ta te meilut ini se kedlimù ta dut te menge ruma ta ne menge mibperetiyyaya. Su embiya tidtu se limù ta dut te menge ruma ta ne misan duen salà dan keyta ne egkepakey ne ebpeseharen ta. ⁹ Iyan ta iya ed-ul-ulaan ne egalàhalà ki rut te menge ruma ta ne menge mibperetiyyaya ne ebpepemenayik ki rut te valey ta. ¹⁰ Su sikita ne ruen edsusunan te ketau ne imbehey te Eleteala te uman senge etew keyta. Ne iyan din kebehey su apey kiyu mekedtevangey, ne iyan iya se id-usar ta te meupiya ini se insarig din keyta. ¹¹ Embiya ruen keyta ne nevehayan te ketau te ebpesabut se Lalag te Eleteala, ne iyan iya se edtentenuran din te ini se Lalag te Eleteala ne ibpesabut din. Ne embiya ruen ketau ta te edtavang te menge ruma ta, ne iyan iya se kenà ta egkelipatan ne ini se kevaher ta te edtavang ne riyà ebpuun te Eleteala. Piya engkey en ne helevk ne imbehey keyta te Eleteala ne ebeelan ta, ne iyan iya se ed-ey-eyaran ta te ebaal egenat dut te tavang ne ebpuun ki Hisu Kristu su apey Eleteala se edeyuen dut te menge etew. Su sikandin dà se edait ne edeyuen, ne sikandin dà se warà ebpekerepeng dut te gehem din taman te taman.

Ke Kedrumerasey ta Atag dut te Ed-ul-ulaan ta ne Meupiya

¹² Menge suled ku ne igkelimù ku, kenà kew meinuinu rut te mepasang ne keresayan ne nekeuma en kayi te keniyu su sabap dut te kebperetiyyaya niyu ki Hisus. Su Eleteala ke ebpenggeram keyta ke engkey kerekelà se kedsarig ta kandin. ¹³ Ne iyan meupiya ne egkehalew ki kayi te keresayan ta te keduma ta ki Hisu Kristu su iring te ebpekeamung ki te egeram dut te ingkerasey rin. Ne embiya edtigkeran ta iring te sikandin, ne ebpekeamung ki rema te kehelawan din ketà te akir din ne hewii ne ibpekita te Eleteala ke raman dut te kinepepurù din ki Hisus. ¹⁴ Ne embiya edsudian ki su sabap dut te keduma ta ki Hisu Kristu ne tuus arà te kayi en te keyta ke Kedesenan ne Ebpetuntul te Menusiyà ne iyan ke raman te Eleteala, tembù be egkehalew ki. ¹⁵ Ne ed-uram ki su apey warà kayi te keyta ne ebpekesekitan su sabap dut te ed-ul-ulaan ta ne meraat iring te ebunù, etawa ebpenakew, etawa misan engkey ne ulaula ne mereatey, etawa ed-amung-amung te warà kandin. ¹⁶ Ugaid ne embiya ke keduma ta ki Hisus se puunan te igkerasey ta, ne kenà ta igkeyeyai. Ugaid ne edeyù ki te Eleteala su sikandin ke mibpebaluy keyta ne menge etew ne mibperetiyyaya ki Hisu Kristu. ¹⁷ Su iyan keddutuh te Eleteala ne egkerasey ki su ini en ke hewii ne edrudsù ke Eleteala te egkukum dut te menge etew ne iyan ed-unaan ke menge etew ne eduma kandin. Ne embiya iring ketà se egketemanan te sikami ne menge anak din ne iyan pè be kenà merasey ke egketemanan dut te menge etew ne kenà ebperetiyyaya te Meupiya ne Tudtul te Eleteala. ¹⁸ Su ruen impesurat ne Lalag te Eleteala ne egkahi te,

“Embiya merehen ne ebpekeliyu dut te kedusa te Eleteala
ke metidtu ne menge etew,

ne iyan pè be mekeliyu ke menge etew
ne warà kayi te hinawa ran ke Eleteala
wey meraat se ulaula ran!"

¹⁹ Tembù be, menge suled, embiya edrumerasey ki su sabap dut te kiyug te Eleteala keyta, ne kenà ta igkebungas te keditigker ta. Ugaid ne idsarig ta ke hinawa ta te Eleteala ne iyan midlimbag keyta, su kenà ki ed-engkeran nikandin ne ke impasad din ne edtumanen din kayi te keyta.

5

Ke Kedtugenura dut te Menge Etew ne Mibperetiyaya te Eleteala

¹ Ne ruen egkehiyen ku riyà te keniyu ne menge pekilukesen te menge mibperetiyaya su siaken ne pekilukesen a rema iring keniyu. Ne nekita kayi te mata ku ke kegkerasey ni Hisus, ne netuenan ku ne ketà te akir din ne hewii ne egkekita ke kebmepurù ni Hisus ne ebpekeamung ki ketà te kebmepurù din. Tembù be iyan niyu tumana ini se ebuyuen ku ² ne tugenura niyu ke menge mibperetiyaya te Eleteala su iring sikandan te menge bilibili ne insarig din keyta ne edtugenuren. Ne iyan meupiya ne mehalew ki se edtuganur kandan su ini se kiyug te Eleteala keyta. Ne arà te kedtugenura ta kandan ne kenà meupiya ne ke puunan te kedadvang ta ne sabap te edsukayan ki, ugaid ne sabap dut te limù ta te kedadvang ta kandan ketà te keduma ran te Eleteala. ³ Ne arà te kebpeneheewit ta kandan ne kenà ki edsuhù dà. Ugaid ne iyan meupiya ne ibpekita ta kandan ke ulaula ne meupiya su apey sikita ne iyan dan ed-iringan. ⁴ Su ketà te kedlived ni Hisu Kristu kayi, ne iyan mepurù ne tumetuganur, ne ebpekeamung ki dut te ed-andlag ne raman te kebpepurù kandin ne kenà egkurang ke raman din.

⁵ Ne sikiyu ne menge menguwed, ne iyan iya se pevayàbayà kew rut te pekilukesen. Su iyan meupiya ne langun tew ne mebpeembavà te hinawa ta ne ebpesugsuhuey ki rut te menge ruma ta. Su ruen impesurat ne Lalag te Eleteala ne egkahi te,

"Egkunteraan te Eleteala ke menge etew ne mepereyù,
ugaid ne edtevangan din te rekелà

ke menge etew ne mebpeembavà te hinawa ran."

⁶ Tembù be ebpeembavà ki te hinawa ta diyà te Eleteala ne warà repeng te gehem din su apey ibpepurù ki nikandin embiya egkeuma ke hewii ne kiyug din. ⁷ Ne idsarig ta te Eleteala ke piya engkey ne kemutuwani ta su iyan sikandin ke edtuganur keyta.

⁸ Ne ed-uram ki ne ebanterey ki rut te langun ne ed-ul-ulaan ta su ini se kunterà tew ne si Setanas ke datù te pekaid ne egkiyug ne ebpekesuwey ki te keduma ta te Eleteala. Su edlauglaug sikandin ne ebpmengà te etew ne egkpeneheewit din te ed-ulaula te meraat iring dut te mekeandek ne erimaung ne ebpmengà te egkekaan din. ⁹ Tembù be ed-iluten ta ke kebperetiyaya ta te Eleteala su apey ebmevaher ke hinawa ta te ed-atu ki Setanas. Ne netuenan ta te kenà sikami rà se egeram te keresayan su langun ne menge ruma ta ne mibperetiyaya te piya endei ne inged. ¹⁰ Ugaid ne mehaan dà ini se keresayan ne egeramen ta. Ne embiya egkeipus en ne ed-iluten te Eleteala ke kebperetiyaya ta su apey mevaher se hinawa ta te edtuman ki iya te

keduma ta kandin. Su sikandin ke ebpuunan te langun ne tavang keyta. Ne sikita ne mibpemili din su apey ebpekeamung ki dut te raman din duma ki Hisu Kristu. ¹¹ Ne edeyù ki te Eleteala ne warà ebpekerepeng te gehem din taman te taman.

Ke Ketepusan dut te Neuna ne Surat ni Pedro

¹² Ini se mevavà ne surat ku riyà te keniyu ne impesurat ku ki Silvano. Ruma ta sikandin te mibperetiyyaya ki Hisus ne dekelà se kedsarig ku kandin. Iyan ku kedsurat keniyu su apey ebeg-eten ku ke kebperetiyyaya niyu wey apey ibpesabut ku keniyu te benar ini se impenurù ku keniyu mekeatag te melimù ne kedavang te Eleteala keniyu. Tembù be iyan se idsarig niyu iya ke hinawa niyu ketà se melimù ne kedavang din keniyu.

¹³ Ne ini se menge ruma ta te mibperetiyyaya kayi te inged ne Bebilunya ne mibpemili rema te Eleteala iring keniyu, ne ebpenginginsà keniyu. Ne si Marcos ne iring te anak ku ne ebpenginginsà rema keniyu. ¹⁴ Ne iyan meupiya ne ketà te egkevurun kew ne ebpesegsehipaey kew su ibpekiti niyu te edsusuled kew. Na langun niyu ne mibperetiyyaya ki Hisu Kristu, ne egkiyuhan ku ne ebmelinawen te Eleteala ke itungan niyu.

Arà dà taman.
Pedro

Ke Ikeruwa ne Surat Ni Pedro

¹ Siaken si Simon Pedro ne edsurat kayi. Sugsuhuen a ni Hisu Kristu wey epustul din dema ne iyan din meana ne kedserihan a nikandin.

Edsurat e red maa dut te sikiyu ne menge ruma ta te mibperetiyaya ki Hisus. Ne ini se kebperetiyaya rut te langun tew ne neked-iring su ebpuun ded langun te Eleteala wey si Hisu Kristu ne mibpeliyu keyta. Su sikandin, ne iyan din ed-ul-ulaan ne metidtu, ne warà misan engkey ne etew ne ibpelavi rin.

² Na iyan ku egkiyuhan ne ed-iseg ini se kebpekesabut niyu mekeatag te Eleteala wey si Hisu Kristu ke Kerenan tew. Su embiya ibpeiseg niyu ini, ne ibpeiseg te Eleteala rema ke kebpenuab din keniyu, ne ibpeiseg din ded dema ke kebmelinawen dut te itungan niyu.

Ini se Impenurù ni Pedro Mekeatag dut te Kebpeliyu te Eleteala keyta

³ Ne sabap dut te rekелà ne gehem te Eleteala ne sikandin se edtavang keyta su apey ebmetidtu ke langun ne ed-ul-ulaan ta te ked-ubpà ta kayi te ampew te dunya. Egkeapekey ne ed-ulaula ki kayi su netuenan ta en si Hisu Kristu ne iyan midtawag kenita su apey ki ebpekeamung kandin dut te kepurù din wey ke keupiya rin. ⁴ Ne sabap te netuenan ta en si Hisus, ne imbehey te Eleteala keyta ke rekdekelà ne tavang din ne belielehà ne impasad din. Ne kayi se kedadavang din keyta ne ruen gaga ta te ed-engked dut te arà se meraat ne kiyug te kememenusiyai ne ebpekederaat keytew su apey ki ebpekeiring te metidtu ne ulaula te Eleteala.

⁵ Ne geina te ini se intavang din keyta, ne iyan iya se ebeelan ta ke taman ne egkegaga ta su apey ke kebperetiyaya ta ne meilut ne ebpekesumpat ke meupiya ne ed-ul-ulaan ta. Ne igkesumpat ta rema ke ketampas te itungan ⁶ su apey edtihelan te hinawa ta, abpeg ke keditigker ta dut te keresayan. Ne kenà arà dà su igkesumpat ta te idamin te hinawa ta te keduma te kiyug te Eleteala. ⁷ Ne kayi te ked-amin ta te hinawa ta te keduma te kiyug te Eleteala ne igkesumpat ta red maa ke kebpesegsehipaey ta su ibpekita te edsusuled ki, ne igkesumpat ta ketà ke limù ta rut te menge ruma ta ne mibperetiyaya. ⁸ Ne embiya id-iseg ta te ed-ulaula te langun kayi ne embiya kenà ki egkebungas ne ruen dema dekelà ne atag din ke kebperetiyaya tew rut te Kerenan tew ne si Hisu Kristu. ⁹ Ne embiya ruen etew ne mibperetiyaya ugaid ne kenà din ed-ul-ulaan ini, ne iring te nelekevan se itungan din su warà din pà mesebuti te arà ne kinepeliyu kandin te Eleteala. Ne warà te hinawa rin te mibpeliyu sikandin dut te raan ne menge salà din.

¹⁰ Tembù be, menge ruma ku ne mibperetiyaya, iyan iya se mebpegelep ki te eduma te Eleteala wey mekita te benar iya ini se kebpemilì din keyta. Su embiya ini se ed-ul-ulaan ta, ne warà ebpekesuwey keytew te keduma ta te Eleteala. ¹¹ Ne embiya iring ketà, ne Eleteala se egalàhalà keyta ketà te kedadelimà din keyta te edlusud dut te Edetuan ni Hisu Kristu ke Kerenan tew ne mibpeliyu keytew. Ne ini se Edetuan din ne warà edtemanan din.

¹² Tembù be ebpetentenuran ku ini keniyu misan nerineg niyu en ini se meilut se kebperetiayaa niyu rut te benar ne tuluuwen ne impenurù ku keniyu. ¹³ Su taman te kayi e pà te ampew te dunya ne iyan meupiya ne ebpetentenuran ku keniyu ini su apey kenà niyu melipati. ¹⁴ Su netuenan ku te mehaan en egkepupus ini se umur ku kayi te ampew te dunya su ini se impesabut kedi dut te Kerenan tew ne si Hisu Kristu. ¹⁵ Tembù be idsurat ku ini riyaw te keniyu su embiya warà a kayi te keniyu ne kenà niyu egkelipatan ini se impenurù ku keniyu.

Ini se Lalag ni Pedro su apey Egketuenan ta te Benar ke Impesabut mekeatag ki Hisu Kristu

¹⁶ Ne ini se impesabut dey keniyu mekeatag te kebmepurù ni Hisu Kristu ke Kerenan tew ketà te kedlived din kayi te ampew te dunya, ne kenà mibèbeelan dà dut te itungan te menusiyà dà dè duen. Ugaid ne ini se impesabut dey keniyu ne benar su nekita rey iya ketà te kebpepurù kandin te Eleteala. ¹⁷ Su gewii te kayi pà si Hisus te ampew te dunya ne miduma key kandin dengan te ebpendiyà te arà ne buvungan ne impekita te Amey tew ne Eleteala ke kedeyua rin ki Hisus wey ke rekelà te kebpepurù din kandin. Su nerineg dey ke lalag dut te Eleteala ne Amey rin ne iyan pinekemepurù te langun, ke sikandin te, "Ini se Anak ku ne dekelà te hinawa ku; ne ebpekesuhat sikandin te hinawa ku kayi te langun ne ed-ul-ulaan din." ¹⁸ Uya, nerineg dey iya ke suwara te Eleteala su miduma key ki Hisus dengan te ebpendiyà te buvungan te mid-uvey te Eleteala kandin.

¹⁹ Ne arà se nekita rey wey nerineg dey te riyaw key te buvungan, ne arà se mibpeketuenan keyta ne benar iya ini se migkahi neraan dut te mibpelambas te Lalag te Eleteala rengan mekeatag te si Hisus se ebperetuen te Eleteala. Tembù be iyan meupiya ne ey-eyari niyu rema te ebpmineg kayi te lalag dan, su ini se mibpenudtul dan ne iring dut te sulù ne ebpekerayag diyaw te merusirem taman te edsilà ke mekebangas embiya egkeriwaswas en. Su ketà te egkeriwaswas en ne egkerayahan ki rut te mekebangas ne iyan din meana ne egkeuma en ke kegketuman te kedlived ni Hisus kayi te keyta. ²⁰ Na, itahù niyu neveran ini te itungan niyu su apey kenà niyu melipati. Warà misan senge etew rà ne metau ne ebpesabut te lalag te ebpelambas te Lalag te Eleteala rengan embiya kayi rà te itungan din dà su iyan iya se medsarig sikandin dut te Kedesenan ne Ebpetuntul te Menusiyà te ebpesabut kandin. ²¹ Su ini se Lalag te Eleteala ne impesurat dut te ebpelambas te Lalag te Eleteala rengan ne kenà ebpuun diyaw te itungan den dà dè duen su ke Kedesenan ne Ebpetuntul te Menusiyà se mibpesabut kandan ke engkey se idsurat dan.

2

Ini se Mekeatag dut te Menge Etew ne Engkungkun ne Ebpenurù te Lalag te Eleteala

¹ Duen dengan menge etew ne engkungkun ne ebpelambas te Lalag te Eleteala. Ne iring ded dema guntaan ne ruen menge etew ne edlepew ne deisekdeisek ne ebpenurù te tarù diyaw te keniyu. Iyan dan ibpenurù ne ederaat te kebperetiayaya niyu te Eleteala su kenà

dan ebperetiyaya te si Hisu Kristu ke Kerenan tew ne mibpereliyu keyta te kedusa te salà ta. Tembù be ruen hewii ne ebpekeuma ne egketekew ne edereetan dan te Eleteala. ² Ne misan iyan dan ibpenurù ne meraat, ne ruen merakel ne menge etew ne egkeekalan kandan ne eduma te menge ulaula ran ne meredsik. Ne sabap dut te keduma ran kandan dut te ulaula ne meredsik ne ke duma ne menge etew ne edsumpeliten ke benar ne dalan te Eleteala ne edumaan ta su kunaan dan ke iyan ed-ul-ulaan te sikami ne menge mibperetiyaya ne meraat. ³ Ne ini se ebpenurù te tarù ne merakel se ibpenurù dan ne ebèbeelan den dà su ebplementiyari ran kayi te keniyu su egkeeram-am dan te pirak. Ini se menge etew ne neuhet dà ne impenehana te Eleteala ke kedusa rin kandan. Ne kenà edlipereng ke Eleteala, tembù be ke kedusa rin kandan ne ebpekeuma iya.

⁴ Uya, benar ne edusaan te Eleteala sikandan su midusa rin ke menge etew rengan ne mid-ulaula te meraat. Su misan ke menge suluhuen din diyà te langit ne nekedsalà dengan ne warà din pedtedaya, ugaid ne in-antug din sikandan diyà te apuy nerakà ne ebekuen dan te sengkali diyà te mermerusirem taman te ebpekeuma ke hewii te kedusa kandan te Eleteala. ⁵ Ne iring din ded dema ke menge etew rengan te hewii ni Noe ne medmeraat se mid-ulaula ran. Warà pedtedaya te Eleteala sikandan su mibperalem din ke wayig kayi te ampew te dunya ne neherà dan langun ke mid-ulaula te meraat. Ne iyan dà nesamà ne warà nelened ne si Noe wey ke telteleanan ne pitu ne etew. Su si Noe ne mibpesabut din te ulaula ne metidtu. ⁶ Ne midusaan dema te Eleteala ke menge etew diyà te menge inged ne Suduma wey Gumura rengan su midereetan din ini te apuy su sabap dut te salà te menge etew ne mid-ubpà ketà. Ini se mid-ulaula rin su apey egkekita te langun ne menge etew ke kedusa te Eleteala ne ebpekeuma ketà te menge etew ne kenà ebperetiyaya kandin. ⁷ Ugaid ne si Lut se mibpereliyu rin su metidtu ne etew sikandin. Ne neuru nevenar sikandin mekeatag dut te meredsik ne mid-ulaula te mekesalà ne menge etew ne mid-ubpà ketà ne menge inged. ⁸ Su ini se metidtu ne etew ne mid-ubpà diyà te kandan. Ne gewii te ked-ubpà din ketà ne langun ne nekita rin wey nerineg din ne arà se meredsik ne mid-ulaula ran, tembù be merasey nevenar se hinawa rin dutun. ⁹ Ne iring te kebpeliyu te Eleteala ki Lut se ed-ul-ulaan te Eleteala dut te menge etew ne eduma kandin su metau sikandin te ibpevayà din te keddavang kandan ketà te kerasayan dan. Ne ini se menge etew ne kenà eduma kandin, ne impenehana en ke kedusa rin kandan ketà te Hewii ne Egkukum kandan. ¹⁰ Na iyan pè be kenà din dusaa ke menge etew ne iyan den dà edumaan ke kiyug te lawa ran abpeg ke menge etew ne ed-engkenà dut te kebayàbayà te Eleteala kandan.

Ne ini se migkahi ku ne menge etew ne ebpenurù te tarù ne warà kegkeyeyai ran wey mepereyù. Warà ed-edatan dan nasi pà te edsumpeliten dan ke menge suluhuen te Eleteala diyà te langit. ¹¹ Ugaid ke menge suluhuen te Eleteala, misan mepurù pà sikandan wey rekelà pà se gehem dan dut te ini se ebpenurù te tarù, ne kenà dan mulà edsumpeliten ke menge rumah ran embiya ruen idsumbung dan diyà te etuvangan te Eleteala. ¹² Ugaid ne arà se menge etew ne ebpenurù te tarù ne iring sikandan te leew ne binatang ne warà

itungan su iyan dan ed-ul-ulaan ke piya engkey ne nelayaman dan, ne iyan dan dà atag se edsikmen su edsumbelien. Iring din ded dema ke menge etew ne ebpenurù te tarù su edsumpeliten dan ini se kenà dan egkesebutan, ne iyan dan egketemanan ne egkeherà dan iring dut te leew ne binatang.¹³ Ne edresayen dan dema su atag te daan ne kdrasey ran dut te menge ruma ran. Su sikandan ne misan meandew ne kenà dan egkeyayaan te ed-ulaula te kiyug dan ne meraat ne ibpatà te nanam dan. Kenà edait ne ebpekituhu dan diyà te kevurunan niyu su mekeyayà se ulaula ran, su iyan dan kiyug ne edekalan kew ran mekeatag te meredsik ne ed-ul-ulaan dan.¹⁴ Warà ruma ne ebpemengaan dan ke kenà ke menge meritan ne meredsik, ne ke kiyug dan te ibpatà te nanam dan ne kenà dan igkevulung. Ebaal dan te litag ketà se ed-ul-ulaan dan su apey ran mepeneheewit te ebpekedsalà ke menge etew ne warà pàmekadalid se kebperetiyya ran. Iring din ded dema ne egkeeram-am ke hinawa ran, ugaid ne nepenehana en ke kedusa kandan te Eleteala.¹⁵ Midsuwey ran dut te tidtu ne ralan ne nengetarin en su miduma ran dut te ralan ne ed-ikulen ni Belaam dengan ne anak ni Busur. Si Belaam ini ne senge etew ne ebpelambas te Lalag te Eleteala rengan, ugaid ne iyan dekelà te hinawa rin ke kureta ne egkekuwa rin dut te ked-ulaula rin te meraat.¹⁶ Ne ruen kudà din ne impekahi te Eleteala iring te suwara te etew ne midawey ki Belaam dut te meraat ne ed-ul-ulaan din. Tembù be warà din ilaus ke merupangdupang ne ed-ul-ulaan din.

¹⁷ Ne embiya idsempità ta ini se menge etew ne ebpenurù te tarù ne iring dan te tuhunan ne neiratan ne warè en pantag din, etawa iring dan te kivel ne idlayap te keramag ne warà misan senge tihis dà ne uran. Impenehana en te Eleteala ini se medmerusirem diyà te apuy nerakà ne ed-ubpaan dan.¹⁸ Engkungkun te sikandan ne meralem se lalag dan, ugaid ne warà benar dutun. Ne ebpehuyatan dan ke menge etew ne behu pà ne mid-engked dut te raan ne ulaula ran ne meraat ketà te mibperetiyya ran. Su egkahi ini se ebpenurù te tarù te kenà kun meraat ke eduma dut te egkiyuhan te lawa ta. Tembù be egkepeneheewit maa ke menge etew te Ebpekedsalà.¹⁹ Su iyan dan ibpenurù ne embiya ruen etew ne eduma rut te ibpenurù dan ne warè en penduan ne ebpekeiket kandan. Ugaid ne sikandan se ebpenurù te tarù ne ed-uripenen dut te menge ulaula ran ne meraat ne ederaat dema kandan. Su netuenan ta ne uripen iya ke etew dut te piya engkey ne ebayàbayà kandin.²⁰ Ke ruen menge etew ne midawà dut te daan ne ulaula ran ne meraat su atag dut te mibperetiyya ran ki Hisu Kristu ke Kerenan tew, ne ebpekeliyu ran dut te meraat ne ulaula kayi te ampew te dunya ne ederaat kandan. Ugaid ne embiya edlived dan ded maa dut te meraat ne nelayaman dan ne ingkeuripen dan, ne tuwas pà ne meraat se egketemanan dan dut te warà den pà mibperetiya.²¹ Ne iyan pà meupiya ke warà dan metueni ke tidtu ne ralan te Eleteala tumin dè be te ruen netuenan dan ugaid ne edengkenà dan dut te insuhù kandan te Eleteala ne impesabut din.²² Su ke etew ne ed-ulaula te iring ketà ne ebpekeiring te beseanan ne egkahi te, "Ke asu ne egkeenin din ded se utà din." Iring din ded dema "Ke bavuy ne misan midihù en, ne edtunà en maa."

3

Ini se Mekeatag te Kedlived ni Hisu Kristu kayi te Ampew te Dunya

¹ Menge suled ku ne igkelimù ku, ini se ikeruwa ne surat ku diyà te keniyu. Iyan ku kedsurati keniyu su ebpotentenuran ku keniyu maa ke benar ne penurù ne nerineg niyu su apey egkepukew ke itungan niyu mekeatag ketà. ² Egkiyuhan ku ne kenà niyu melipati ke impesabut dut te menge ebpelambas te Lalag te Eleteala rengan, abpeg ke insuhù dema ni Hisu Kristu ke Kerenan tew ne ebpeliyu keytew, su ini se suhù din ne impepevayà dut te menge kedserihan din.

³ Ini se egkeuna ne ebpesebutan ku keniyu. Ketà te mehaan en ebpekeuma ke mewri ne hewii kayi te ampew te dunya, ne ruen menge etew ne edlepew ne iyan ebayàbayà kandan ke meraat ne kiyug te lawa ran. Ne edsumpeliten kew ran se egkahi te, ⁴ “Kenà be migkahi ni Hisus te edlived sikandin kayi te ampew te dunya? Ne endei buwa sikandin? Mibpenareng kandin ke menge keep-epuan tew rengan ne neuhet dà ne minatey ran en, ugaid ne taman guntaani ne warà nesembian kayi te inged tew egenat dut te rudsuau te kinelimbag te Eleteala kayi.” ⁵ Iring kayi se egkehiyen dan su kenà dan ebpehimbenar te pehaney en ne ke Eleteala se midlimbag te langit wey tanà ibpepevayà te lalag din dà. Ne ketà ne nevaluy rin ke wayig ne tanà, su ini se tanà ne riyà ebuun te wayig. Ne iring din ded dema ke wayig ke puunan te igkeuyag dut te langun ne kayi te tanà. ⁶ Ne ibpevayà te wayig dema ne langun ne menge etew rengan ne neherà ketà te nekeuma en ke dalem. ⁷ Ne kayi te Lalag te Eleteala rema ne ebpesebutan din te ebpeiseg pà ini se langit wey tanà ne egkekita ta guntaani taman te edereeetan din ketà te akir din ne hewii, ugaid ne kenà wayig su apuy se idsuhù din ne ederaat. Ne edereeetan din iya ke menge etew ne ed-ulaula te meraat, ne idtehaad din dà ke ebpekeuma ke hewii te kegkukum din kandan.

⁸ Na menge suled ku ne igkelimù ku, iyan niyu peginunga ne diyà te itungan te Eleteala ne ke senge hewii ne warà ebiraan din dut te sengivu ne rahun, su diyà te itungan din ne neked-iring se keuhet din. ⁹ Ne misan egkahi ke menge etew ne edlanganlangan ke Kerenan ne edtuman te impasad din te edlived kayi te ampew te dunya, ne iyan din kenà pà kebpengkayi su ke Eleteala ne mid-inuman din te meadsil mekeatag dut te menge etew. Su iyan din egkiyuhan ne warà seveka rà ne kenà ebpekeliyu rut te kedusa rin, ugaid ne kiyug din ne langun ne menge etew ne ed-engked dut te meraat ne ulaula ran ne ebpeneheewit kandan te kegkereeti ran.

¹⁰ Ugaid ne benar iya ne edlived ke Kerenan tew ne si Hisu Kristu kayi. Ne ketà te Hewii te Kedlived Din ne egketekew ke menge etew su iring te kebpekeuma te tekawen ne kenà egketuenan. Ne egkerineg dan te dekelà ne edriyubriyub, ne ketà dà ne egketunag en ke langit dut te apuy wey ke langun ne egkekita ketà ne egkeamin-amin egketutung. Iring din ded dema ke tanà wey ke langun ne egkekita kayi ne egketutung en. ¹¹ Na embiya netuenan tew te ruen hewii ne edereeetan te Eleteala ke langun ne egkekita ta, ne iyan se nasì ne ke meupiya se ed-ul-ulaan tew. Iyan iya se eduma ki te Eleteala su apey ini se ulaula ta ne metidtu diyà te etuvangan din ¹² gewii te edtehad ki pà dut te arà se Hewii Rin. Ne id-amin ta ke baher ta te egelevek

dut te ini ne impehelevek din keyta su apey mehaan ne ebpekeuma arà se Hewii Rin. Na benar iya ini se migkahi ku ne egkeamin-amin egketutung ke langit ne langun ne egkekita ketà ne egketunag te apuy.

¹³ Ugaid ne sikitew, ne edtehad ki rut te ebpenerengen tew ne behu en ne tanà wey langit ne impasad keytew te Eleteala. Ne iyan edatù ketà ne si Hisus ne metidtu se kedatu din.

¹⁴ Na menge suled, tehaad te arà ne hewii se edteharan tew, ne id-amin tew ke hinawa tew te ed-ulaula te kiyug te Eleteala su apey warà meraat kayi te keytew ne igkesawey rin ketà te kebpekeuma rin wey apey melinew se hinawa ta diyà te kandin. ¹⁵ Na kenà niyu lipati te iyan kenà pà kedlived ni Hisus ke Kerenan tew kayi su apey ruen hewii dut te menge etew ne warà pà mebperetiyaya ne ebpekedsendit ne ebpekeliyu rut te salà dan. Ne iring din ded dema ke impesabut keniyu te suled tew ne si Pablo diyà te surat ne impeewit din keniyu su insurat din ke impesabut kandin te Eleteala. ¹⁶ Diyà te langun ne surat din ne impenudtl din mekeatag te ini se hewii te kedlived ni Hisu Kristu kayi. Duen dema impenurù din diyà te menge surat din ne merehen ne egkesebutan, tembù be ke menge etew ne warà netuenan dan dut te benar ne penurù wey ke menge etew ne melemu ne eduma dut te kenà benar su mibèbeelan dà ne ebpekesuwéy ran dut te meana rin. Ne kenà arà dà se insurat ni Pablo ne midsuwéy ran dut te meana rin su iring ded se mid-ulaula ran dut te ruma ne impesurat ne Lalag te Eleteala. Tembù be edusaan dan te Eleteala kayi te mid-ulaula ran.

¹⁷ Ugaid ne sikiyu ne menge suled ku, tehaad te impenudtl ku en keniyu neraan mekeatag te ini se ebpenurù te tarù, ne uram kew su apey kew kenà ebpekeruma dut te tarù ne penurù dan. Su embiya ebperumaruma kew kandan, ne egkereetan kew su ke benar ne penuruan ne mibperetiyaya kew ne egkeawà diyà te keniyu. ¹⁸ Na iyan meupiya ne edtentenuran tew ne ibpeiseg tew pà ini se neheraman tew ne penaub ni Hisu Kristu ke Kerenan tew ne milpeliyu keytew su apey ini se nesebutan tew mekeatag dut te impesabut din ne ibpeiseg dema. Ne sikandin dema ke edeyuen ta guntaani wey taman te taman.

Ini rà taman se surat ku.
Pedro

Ke Neuna ne Surat Ni Juan

Mibpebaluy ne Etew si Hisu Kristu ke ed-ingaranan ne Lalag te Eleteala

¹ Ini se surat ku riyà te keniyu ne mekeatag ki Hisu Kristu ne iyan ed-ingaranan te Lalag ne ebpuunan te umur ne warà edtemanan din. Daan en sikandin te warà pà limbaha misan engkey en ne nelimbag. Ne ketà te mibpebaluy sikandin ne anak te menusiyà ne nekita rey ini se ed-ul-ulaan din, ne nerineg dey ke lalag din, ne midsinggur dey sikandin ne tidtu ne etew. ² Uya, ketà te nevaluy rin ne etew, ini se ebehey te umur, ne nekita rey sikandin. Tembù be ebpenudtul key keniyu ini se nekita rey ne ibpesabut dey mekeatag te sikandin ne ebpuunan te umur ne warà edtemanan din. Daan en sikandin ne rumatut te Amey rin ne Eleteala, ne mibpengkayi ne mibpekita kayi te kenami. ³ Na ini se nekita rey wey ini se nerineg dey ne ini en se ibpenudtul dey keniyu su apey sikiyu ne duma rey su mibpekidseveka key rut te Amey tew ne Eleteala wey ke Anak din ne si Hisu Kristu. ⁴ Tembù be edsuratan ku sikiyu su apey ruen keilut te kehalew tew.

Ke Eleteala ne Ebpuunan te Rayag

⁵ Iyan dey nerineg diyà te ki Hisu Kristu ne ini se ibpesabut dey riyà te keniyu: ne Eleteala ke ebpuunan te rayag su warè en misan deisek ne merusirem diyà te kandin. ⁶ Ne embiya egkehiyen ta ne mibpekidseveka ki en te Eleteala ugaid ne diyà ki pà ed-ubpà te merusirem ne iyan din meana ne meraat pà se ulaulata, ne edtarùtarù ki su ini se ed-ul-ulaan ta ne kenà eduma te kiyug te Eleteala. ⁷ Ugaid ne embiya ed-ubpà ki riyà te rayag iring te riyà te rayag ke Eleteala, ne ruen meupiya ne kedsusuled ta. Ne ebmelinis ki rut te langun ne salà ta su atag dut te lengesa ni Hisus ke Anak din ketà te kinepatey rin. ⁸ Embiya egkahi ki te warà salà ta, ne edlimbungan ta ini se hinawa ta ne ke benar ne tuluuwen ne kenà kayi te hinawa ta. ⁹ Ugaid ne embiya ebpehimbenar ki riyà te Eleteala te ruen salà ta, ne ebpeseharen din ini se salà ta ne ed-ihewanen din ke hinawa ta rut te langun ne ulaulata ne meraat. Su ini se migkahi rin ne edtumanen din ini se impasad din. ¹⁰ Ugaid ne embiya egkahi ki te warà salà ne mid-ulaulata, ne ebpehinteruan ta ke lalag te Eleteala ne warà te hinawa ta ke lalag din.

2

Ini ne Mekeatag te si Hisu Kristu ke Edtindeg Keyta diyà te Eleteala

¹ Edsuratan ku sikiyu, menge anak ku, su ralan te edtavang keniyu su apey kenà kewmekedsalà. Ugaid ne embiya ruen ebpekesalà, ne ruen edtindeg keytew diyà te Amey tew ne Eleteala ne si Hisu Kristu ini ne metidtu nevenar se ulaula rin. ² Su sikandin se midtihis se lengesa rin dut te kinepatey rin apey meawà ini se salà ta, ne kenà ini rà se salà ta su misan ke salà dema dut te langun ne menge etew kayi te ampew te dunya.

³ Ne iyan egkekita ne benar ini se mibpekidseveka ki en te Eleteala ne ini se edumaan tew te idsuhù din. ⁴ Ne embiya ruen egkahi te mibpekidseveka sikandin te Eleteala ugaid ne kenà din edumaan te idsuhù te Eleteala kandin, ne edtarùtarù sikandin ne ke benar ne tuluuwen ne kenà riyà te hinawa rin. ⁵ Ugaid ke etew ne eduma te lalag te Eleteala, ne sikandin se ruen meilut ne limù te Eleteala. Ne egkekita te benar ne mibpekidseveka ki te Eleteala. ⁶ Piya engkey en ne etew ne egkahi te mibpekidseveka sikandin te Eleteala, ne iyan iya se metidtu se ed-ul-ulaan din iring te ketidtu ne ed-ul-ulaan ni Hisus te kayi pà sikandin te ampew te dunya.

Ini ne Mekeatag te Behu ne Suhù

⁷ Na menge suled ku ne igkelimù ku, ini se suhù ne idsurat ku en keniyu kayi ne kenà behu pà su rengan ini se impenurù keniyu. Su egenat te behu kew pà ne mibperetiyyaya ki Hisus ne nerineg niyu ini se suhù mekeatag te kebpelimalimuey tew. ⁸ Ne misan daan en ini se suhù ne iring te behu pà su iyan nesebutan ta mekeatag te ini se suhù ne neumanan pà maa te impekita ni Hisus ini kayi te kinepatey rin ne ini se suhù se edumaan niyu rema. Su egkeawà en ke kerusirem kayi te keyta, ne egkerayahan ki rut te tidtu ne tuluuwen.

⁹ Ne embiya ruen egkahi te riyà sikandin te kerayahan ugaid ne ebpekidkunterà sikandin te menge ruma rin te ebperetiyyaya, ne kayi red sikandin te kerusireman. ¹⁰ Su ke etew ne ruen limù din te ruma rin, ne arà imbe ke ed-ubpà diyà te merayag ne warà netahù te hinawa rin ne ebpekedsalà ke ruma rin. ¹¹ Ugaid ne ke etew ne ebpekidkunterà te ruma rin, ne sikandin ne diyà pà lavew te merusirem. Su iring te ebpekeyangapyangap sikandin, ne kenà din egketuenan ke endei sikandin ebpesinaru su nerusireman ini se itungan din.

¹² Edsuratan ku sikiyu, menge anak ku,
su etew kew en ne nepesehad se menge salà dan
su atag dut te kinepatey ni Hisus Kristu.

¹³ Ne sikiyu ne menge lukes ne meama, edsuratan ku sikiyu
su mibpekidseveka kew en ki Hisu Kristu,
ne daan en sikandin te warà pà limbah te misan engkey en.
Ne sikiyu ne menge menguwed, edsuratan ku sikiyu,
su warà kew megaga te kebpenggeram dut te datù te pekaid.

¹⁴ Na, menge anak ku, edsuratan ku sikiyu
su netuenan niyu en ke Amey ta ne Eleteala.
Ne sikiyu ne menge lukes ne meama, edsuratan ku sikiyu
su mibpekidseveka kew ki Hisu Kristu,
ne daan en sikandin te warà pà limbah te misan engkey en.
Ne sikiyu ne menge menguwed, edsuratan ku sikiyu
su meilut se kebperetiyyaya niyu,
ne intahù niyu te hinawa niyu ke Lalag te Eleteala
ne warà kew megaga te kebpenggeram dut te datù te pekaid.

¹⁵ Kenà niyu ipeuna te hinawa niyu ke meraat ne betasan kayi te ini se dunya etawa ini se igkenuhuni rut te menge etew kayi te ampew te dunya. Su embiya ruen etew ne ini se rekèlè te hinawa rin, ne egkekita se warà limù din dut te Amey tew ne Eleteala. ¹⁶ Su langun ne igkenuhuni rut te menge etew kayi te ampew te dunya iring te ini se egkiyuan dut te lawa ran, ke ebpatà te nanam dan

wey kebpereyùdeyù dan mekeatag te kearen dan, ne langun kayi ne kenà riyà ebpun te Amey tew ne Eleteala su kayi rà ebpun dut te menge etew te ampew te dunya. ¹⁷ Ne ini se kelibutan wey langun ne igkenuhuni rut te menge etew kayi ne egkeawà. Ugaid ke etew ne edtuman dut te kiyug te Eleteala ne kenà egkeawà su ed-upbà diyà te Eleteala taman te taman.

Ini ne Mekeatag te Iyan Ed-ingaranan te Egkunterà ki Hisu Kristu

¹⁸ Menge anak ku, mehaan en ne ebpekeuma ke ketepusan dut te ini se dunya. Ne nerineg niyu en te embiya mehaan egkepupus ini se dunya ne ruen edlepew ini se ed-ingaranan te Kunterà ni Hisu Kristu. Na guntaani en ruen merakel ne midlepew iring kayi ne egkunterà ki Hisus, tembù be netuanan tew ne mehaan en ke kegkewarà kayi te dunya. ¹⁹ Ne ini se menge kunterà ni Hisu Kristu ne engkungkun ne menge ruma tew te egkevurunan te menge mibperetiyyaya ki Hisus, ugaid ne midsuwey ran kayi te keyta su kenà dan tidtu ne ruma tew te ebperetiyyaya. Su embiya sikandan se tidtu ne ruma tew te ebperetiyyaya, ne warà dan medsuwey keyta. Ugaid ne midsuwey ran, ne kayi te ini se kedsuwey ran ne egkekita te kenà dan tidtu ne ruma tew te ebperetiyyaya.

²⁰ Ugaid ne sikiyu ne kenà iring ketà su midtelimà kew en dut te Kedesenan ne Ebpetuntul te Menusiyà ne midsuhù ni Hisu Kristu, tembù be netuanan niyu langun ini se tidtu ne penurù. ²¹ Kenà ku iyan kedsurati kenyi su warà niyu mesebuti ke tidtu ne penurù, ugaid ne iyan ku kedsurati kenyi su nesebutan niyu en. Ne nesebutan niyu rema ne warà misan deisek ne tarù ne riyà ebpun te benar ne penurù.

²² Engkey rapit se teruen embiya kenà ini se etew ne egkahi te kenà si Hisus ke Impasad te Eleteala ne Ebperetuen te langun. Su piya engkey se egkahi te iring ketà ne kunterà sikandin ni Hisu Kristu, ne kenà din edtelimaan ke Amey tew ne Eleteala wey ke Anak din. ²³ Su piya engkey ne etew ne kenà ebperetiyyaya ki Hisus ke Anak te Eleteala, ne kenà ded ebperetiyyaya dut te Amey rin ne Eleteala. Ugaid ke etew ne mibperetiyyaya ki Hisus ke Anak te Eleteala, ne sikandin dema se intahù te hinawa rin ke Eleteala.

²⁴ Tembù be ini se penurù ne impesabut kenyi te pehaney kew pà mebperetiyyaya ki Hisus, ne ini se penurù ne iyan niyu idtahù te hinawa niyu. Su embiya kenà egkeawà ini se neketahù te hinawa niyu, ne kenà egkepakey ne kenà kew red egkeseveka rut te Amey tew ne Eleteala wey ke Anak din ne si Hisu Kristu. ²⁵ Ne ini se impasad ni Hisu Kristu keyta ne ibehey rin ini se umur ne warà edtemanan din.

²⁶ Ini ne ebpesebutan ku kenyi kayi te surat ku ini su atag dut te ini se menge ebpénurù te tarù ne edlimbung perem kenyi.

²⁷ Ugaid ne sikiyu, ne midtelimà kew en dut te Kedesenan ne Ebpetuntul te Menusiyà ne kenyian ded te kenyi. Tembù be kenà kew ebpekepemengà te ebpénurù kenyi su sikandin ne kenyian ded te kenyi se ebpénurù kenyi te langun ne egkiyuhun te Eleteala ne ebpesebutan kenyi. Ne iyan din ibpenurù ne kenà tarù ugaid ne tidtu nevenar. Tembù be dumai niyu ini se ibpesabut din kenyi su apey kew ebpekidseveka ki Hisu Kristu.

²⁸ Uya menge anak ku, embiya layun meilut se kebpekidseveka niyu ki Hisu Kristu ne kenà ki egkeandek ne kenà ki egkeyeyyaan ne editindeg diyà te etuvangan din ketà te kedlived din kayi. ²⁹ Netuenan ta te metidtu si Hisu Kristu, dutun ne netuenan ta rema te piya engkey ne etew ne metidtu se ed-ul-ulaan din ne nevaluy en sikandin ne anak te Eleteala.

3

Ini ne Mekeatag te Menge Anak te Eleteala

¹ Dekelà nevenar se limù dut te Amey tew ne Eleteala keyta! Su sabap dut te ini se rekèlè ne limù din ne ed-ingaranan kiyu rin te menge anak din, ne benar ne menge anak kiyu rin. Ugaid ke menge etew te ampew te dunya ne egkunterà kandin ne kenà dan egkesebutan te anak kiyu rut te Eleteala su warà dan medtelimà kandin. ² Menge suled ku ne igkelimù ku, menge anak kiyu en te Eleteala. Ne misan warà dey pà metueni se egkevaluy ki keuremà, ugaid ne netuenan ta te ketà te kedlived ni Hisus kayi ne egkesembian ki iring kandin su ketà ne egkekita tew en sikandin. ³ Tembù be piya engkey ne etew ne edsarig te edtumanen te Eleteala ini se penareng din, ne iyan iya se mebanter te hinawa rin su apey warà ebpekesawug ne meraat dut te ed-ul-ulaan din iring te warà misan deisek ne meraat ne nekesawug dut te mid-ulaula ni Hisu Kristu.

⁴ Piya engkey ne etew ne nekesalà ne midsurang dut te penduan te Eleteala. Su ke ulaula ne ed-ingaranan te salà ne piya engkey ne ulaula ne edsurang te penduan te Eleteala. ⁵ Netuenan niyu en te mibpebaluy si Hisu Kristu ne etew kayi te ampew te dunya su apey ebpebpatey ne egkeawà ke salà dut te langun tew ne menge etew. Né netuenan niyu rema ne warà misan deisek ne salà din. ⁶ Tembù be ke etew ne iyan se layun meilut se kebpekidseveka rin ki Hisus, ne kenà din idlaus ke ked-ulaula rin te meraat. Ugaid ke etew ne idlaus din ke ked-ulaula rin te meraat, ne ini se etew ne warà din intahù te hinawa rin te iyan kinepengkayi ni Hisus, ne warà din pà peretiyyaya sikandin.

⁷ Menge anak ku, ne uram kew su apey warà etew ne ebpekepesuwéy kenyu. Su ke etew ne iyan din ed-ul-ulaan ini se metidtu iring ki Hisus, ne sikandin se metidtu. ⁸ Ugaid ke etew ne idlaus din ke ked-ulaula rin te meraat, ne si Setanas ke datù te pekaid se ebayàbayà kandin su igenat dà te rudsuan din dà te ini se kelibutan ne iyan ed-ul-ulaan ni Setanas ne ke meraat. Tembù be mibpengkayi te dunya ke Anak te Eleteala su apey egketalew rin ini se gehem te ulaula ni Setanas.

⁹ Piya engkey ne etew ne nevaluy ne anak te Eleteala ne kenà din idlaus ini se ked-ulaula rin te meraat, su ketà te nevaluy en ne anak te Eleteala ne midubpù sikandin te Amey rin ne Eleteala. Ne geina te iyan din Amey rin ke Eleteala, ne kenà egkepakey ne idlaus dan pà ke ked-ulaula ran te meraat. ¹⁰ Tembù be egketuusan ke menge etew ne midubpù te Amey ran ne Eleteala wey ke menge etew ne anak ded ni Setanas. Su ke etew ne kenà ed-ulaula te metidtu wey warà limù din te menge ruma rin, ne kenà sikandin ke anak te Eleteala.

Ini ne Mekeatag te Kebpelimlimuey tew

¹¹ Iyan impenurù keyta egenat te rudsuan te kebperetiyyaya ta ne epelimalimuey ki. ¹² Kenà ki med-iring ki Kain te midtuhut ne si

Setanas se mibayàbayà te hinawa rin, ne mibunù din ini se ari rin. Ne meambe ke mibunù din ini se ari rin? Mibunù din kayi te kegkesihi rin su iyan mid-ulaula te ari rin ne metidtu, ugaid ne ke ulaula rin ne meraat.

¹³ Tembù be menge suled, kenà kew meinuinu embiya ebpekidkunterà keniyu ini se menge etew kayi te ampew te dunya ne warà pà mibperetiyyaya. ¹⁴ Ugaid ne sikami ne menge mibperetiyyaya ne midawà key rut te raan ne mibpesekupan dey te iyan dey rà egkepenareng ne kemetayen, su ketà te mibpesakup key te Eleteala ne nekekuwa key te umur ne warà edtemanan din. Netuenan tew ini su ruen en limù tew te menge ruma tew. Ne ke etew ne warà limù din dut te menge ruma rin ne iyan din pà egkepenareng ne kemetayen ne warà edtemanan din. ¹⁵ Su piya engkey ne etew ne ebpekigkunterà te ruma rin, ne riyà te etuvangan te Eleteala ne iring te terevunù. Ne netuenan tew te ini se etew ne ebunù, ne warà din pà metelimà te umur ne warà edtemanan din.

¹⁶ Iyan tuus te tidtu ne limù ne ke kinepebpatay ni Hisu Kristu su apey ebpeliyu keytew dut te salà tew. Tembù be iyan iya se ruen limù tew rut te menge ruma tew misan ibpatey ta sabap te tavang ta kandan. ¹⁷ Ne embiya ruen etew ne ruen id-uyag din ne egkekita rin ini se ruma rin ne kurang nevenar ugaid ne kenà din edtevangan su warà kegkeyru rin, ne kenà egkepakey ne ruen limù din te Eleteala. ¹⁸ Menge anak ku, ini se ralan te kebpekita ta te limù ta kayi te menge ruma ta ne kenà kayi rà te lalag ne egemew te bèbà ta, ugaid ne kayi te kedadavang ta kandan ne egenat te limù ta.

¹⁹ Na embiya iring ketà se kebpelimlimuey tew ne egketuenan tew te sikitew iya ne menge anak dut te tidtu ne Eleteala. Ne ebmelintad ke hinawa tew riyà te etuvangan te Eleteala ²⁰ misan iyan ta egkesenditan ke hinawa ta su atag dut te daan en ne salà tew. Melintad ke hinawa tew su netuenan tew te iyan pà dekelà ke Eleteala su netuenan din te langun taman.

²¹ Na menge suled ku ne igkelimù ku, embiya ini se hinawa ta ne kenà edsedit keyta, ne ruen kegkesirihi keyta embiya ebpengeningeni ki riyà te Eleteala ²² ne piya engkey ne ebuyuen ta riyà te kandin ne ibehey rin keyta su ini se idsuhù din ne iyan ta edtumanen ini se kiyug din ne iyan edumaan ta. ²³ Ne iyan din insuhù kenitew ne ebperetiyyaya ki rut te Anak din ne si Hisu Kristu wey ebpetuntul te Kedesenan ne Ebpetuntul te Menusiyà ne imbehey rin keyta. ²⁴ Ne piya engkey ne etew ne edtuman te suhù te Eleteala, ne mibpekidseveka en te Eleteala wey riyà ed-ubpà ke Eleteala te kandin. Netuenan ta te kayi ed-ubpà ke Eleteala te keyta su atag dut te tavang te Kedesenan ne Ebpetuntul te Menusiyà ne imbehey rin keyta.

4

¹ Menge suled ku ne igkelimù ku, kenà kew peretiyyaya dut te langun ne egkahi ne impekahai ran kun te Kedesenan ne Ebpetuntul te Menusiyà. Ugaid ne perisaan niyu pà ke ebpenurù dan apey niyu metueni ke riyà be ebpun ini te Eleteala etawa kenà. Su merakel se middlepew kayi te ampew te dunya ne uvag kun te ebpelambas sikandan te Lalag te Eleteala. ² Ne iyan dalan te kegketueni niyu embiya ke Kedesenan ne Ebpetuntul te Menusiyà ne riyà ebpun

te Eleteala se ebpekahi kandan ne ini. Embiya egkahi ke etew te impeanak te menusiyà kayi te ampew te dunya si Hisu Kristu, ne riyà ebpuun te Eleteala ke lalag din.³ Ugaid ne embiya ruen egkahi te warà impeanak te menusiyà si Hisu Kristu, ne kenà riyà ebpuun te Eleteala se lalag din ugaid ne ini se ebpenuurù din ne riyà ebpuun te Egkunterà ki Hisu Kristu. Su nerineg niyu en te ini se Egkunterà ki Hisu Kristu ne ebpekeuma, ne guntaani ne ruen kandin ne menge etew ne ini en.

⁴ Ugaid ne sikiyu, menge anak ku, sikiyu ne nevaluy ne menge anak te Eleteala, tembù be netalew niyu ini se uvag kun ne ebpelambas te Lalag te Eleteala su warà kew melimbungi rut te lalag dan ne kenà ebpuun te Eleteala. Su ke Eleteala ne ed-uprà diyà te hinawa niyu ne muna pà se gehem din dut te ki Setanas ne ed-uprà ketà te hinawa te ini se menge etew rà kayi te ampew te dunya ne egkunterà ki Hisus. ⁵ Su sikandan ne uvag kun ne ebpelambas te Lalag te Eleteala ne iyan dan ibpenurù ne kayi rà dè duen te itungan te menge etew te ampew te dunya. Tembù be ini se menge etew te ampew te dunya ne kenà eduma te Eleteala ne idtaan dan ke telinga ran te kegkesuat dan te ebpemineg. ⁶ Ugaid ne sikitew, nevaluy kiyu en ne menge anak te Eleteala, tembù be ke menge etew ne kiyug ne eduma te Eleteala ne idtaan dan ke telinga ran su ebpemineg dan te penurù ta. Ugaid ke menge etew ne kenà egkiyug ne eduma te Eleteala, ne kenà dan ebpemineg te penurù ta. Ketà be ne egketuusan tew ke menge etew ne eduma rut te penurù ne benar wey ke menge etew ne eduma rut te tarù.

⁷ Menge suled ku ne igkelimù ku, pelimlimuey kiyu iya su riyà ebpuun te Eleteala ini se limù. Ne ke menge etew ne ruen limù dan te menge rumu ran, ne ini ke menge etew ne nevaluy ran ne menge anak te Eleteala ne midtelimà dan sikandin. ⁸ Ugaid ne ini se warà limù dan te menge rumu ran, ne tuus te warà dan medtelimà te Eleteala. Su kayi te langun ne ed-ul-ulaan te Eleteala ne egkekita ke limù din. ⁹ Impekita rin ke limù din keyta kayi te midsuhù din ke budtung ne Anak din kayi te ampew te dunya su apey ruen umur tew ne warà edtemanan din kayi egenat te kinepeimatey rin. ¹⁰ Na ini ke tidtu ne limù. Su kenà sika ke midlimù te Eleteala, ugaid ne sikandin ke midlimù keyta kayi te insuhù din ke Anak din su apey ebpekepeliyu keyta rut te kedusa te salà tew sabap dut te kinepebpatay ni Hisus kenita.

¹¹ Menge suled ku ne igkelimù ku, geina te iring kayi te rekèlè ne limù te Eleteala kenitew, ne sikitew iyan iya se ebbelimlimuey ki. ¹² Warà etew iya ne nekekita te Eleteala. Ugaid ne embiya ebbelimlimuey ki, ne egketuusan ne kayi en te hinawa tew ke Eleteala, ne ebpeiseg ini se limù din kayi te hinawa tew taman te meilut.

¹³ Ne netuenan tew te mibpekidseveka ki te Eleteala wey kayi en te keyta sikandin su atag dut te Kedesenan ne Ebbetuntul te Menusiyà ne impeubrà din kayi te hinawa ta. ¹⁴ Nekita rey kayi te mata ta ke Anak te Eleteala ne midsuhù din kayi te ampew te dunya ne ebpebaluy ne etew su apey ebbeliyu te menge etew te kedusa te salà dan. Ne ini se nekita rey ne ebpemenudtulen dey diyà te menge etew. ¹⁵ Ne piya engkey ne etew ne egkahi te si Hisus iya ke Anak te Eleteala, ne kayi en te Eleteala te kandin ne iring din ded ne mibpekidseveka sikandin te Eleteala. ¹⁶ Ketà be ne netuenan tew te igkelimù kiyu rin ne miduran ki kayi te limù din keyta.

Su kayi te langun ne ed-ul-ulaan te Eleteala ne egkekita ke limù din. Ne ke etew ne ruen limù din te Eleteala wey ke menge ruma rin, ne meilut se kebpekidseveka rin te Eleteala wey riyà dema te kandin ne ed-ubpà ke Eleteala.¹⁷ Ne ini se limù ta te Eleteala wey kayi te menge ruma ta ne ed-ilutan te Eleteala su apey ki kenà egkeandek ketà te ed-itindeg ki diyà te etuvangan din dut te hewii ne kedtimbang din keyta. Iyan dey kenà kegkeandek su ini se ulaula ta misan kayi ki red te ampew te dunya ne ebpekeiring kiyu ki Hisus.¹⁸ Su embiya tidtu se limù ta te Eleteala, ne kenà ki egkeandek su warà andek ne nekesawug dut te tidtu ne limù. Ugaid ne ke etew ne egkeandek, ne ini ke etew ne ebpenareng te kedusa te Eleteala ne ebpekeuma kayi te kandin ne tuus ini te warà pè meilut ini se limù din.

¹⁹ Duen limù ta te Eleteala su sikandin ke neuna ne nelimù keyta. ²⁰ Ne embiya ruen etew ne egkahi te igkelimù din kun ke Eleteala ugaid ne warà limù din dut te ruma rin, ne teruen sikandin. Su embiya warà limù din dut te ruma rin ne egkekita, ne iyan pè be ikelimù din ke Eleteala ne kenà din egkekita?²¹ Su iyan insuhù keyta te Eleteala te piya engkey ne etew ne ruen limù din te Eleteala ne iyan iya se igkelimù din dema ini se ruma rin.

5

Engkey se Kebpeketalew ta te Penggeram dut te Datù te Pekaid Kayi te Ampew te Dunya?

¹ Piya engkey ne etew ne mibperetiyaya te si Hisus ke Impasad te Eleteala ne Ebperetuen te langun, ne anak en sikandin te Eleteala. Ne piya engkey ne etew ne egkelimù dut te Amey tew ne Eleteala ne egkelimù dema ini se menge anak din. ² Ne embiya tidtu se kedlimù tew te Eleteala wey ke kedmuman tew dut te insuhù din, ne egketuenan tew te tidtu rema ini se kedlimù tew te ruma tew ne menge anak te Eleteala. ³ Su ke tuus te igkelimù tew ke Eleteala ne iyan keduma tew rut te insuhù din. Ne kenà merehen ini se keduma tew rut te insuhù din⁴ su sikitew langun ne nevaluy ne anak te Eleteala ne ebpeketalew ki rut te penggeram te datù te pekaid ne ebayàbayà kayi te ampew te dunya. Su iyan tew kebpeketalew kandin ne ini se kedsarig tew ki Hisu Kristu. ⁵ Uya, ke etew rà ne mibperetiyaya te si Hisus iya ke Anak te Eleteala se ebpeketalew dut te datù te pekaid ne ebayàbayà kayi te ampew te dunya, warà ruma.

Ini ne Mekeatag te Iyan Edtitihus keyta te si Hisu Kristu iya ke Anak te Eleteala

⁶ Ne si Hisu Kristu ke Anak te Eleteala ne impepengkayi te ampew te dunya. Egketuousan ini kayi te mibpebunyag te wayig wey mibpetudà te lengesa rin kayi te kinepebpatay rin. Kenà kayi rà te kebpebunyag din te wayig se tuus su kayi rema te kebpetudà din te lengesa rin. Ne ke Kedesenan ne Ebpetuntul te Menusiyà se iyan edtitihus kayi te keyta te si Hisus ke Anak iya te Eleteala, ne netuenan ta te sikandin ne kenà edlalag te tarù. ⁷ Ketà ne tetelu ini se ebpesabut keyta te si Hisu Kristu ke Anak iya te Eleteala: ⁸ ruen ke Kedesenan ne Ebpetuntul te Menusiyà, ke wayig, wey ke lengesa rin ne impetudà din. Ne neuyun ini se tetelu kayi te impesabut dan keyta. ⁹ Embiya ebperetiyaya ki ke keditithus kayi te menge etew rà duen, ne lavi pà ne ebpekeperetiyaya

ki te kedtitihus te Eleteala. Ne sikandin se mibpesabut keyta te si Hisus iya ke Anak din. ¹⁰ Ketà be embiya ruen etew ne mibperetiyaya kayi te Anak te Eleteala, warà keduwaruwa te hinawa rin te benar ini se kedtitihus te Eleteala mekeatag ki Hisus su intahù te hinawa rin. Ugaid ke etew ne kenà ebperetiyaya dut te migkahi te Eleteala te si Hisus ke Anak din, ne iring te mibpehinteruan ke Eleteala kayi te ini se etew ne kenà ebperetiyaya te benar ne impesabut dut te Eleteala. ¹¹ Su iyan impesabut te Eleteala keyta ne ruen umur ne warà edtemanan din ne imbehey rin keyta, ne imbehey rin ini se umur impepevayà te Anak din ne si Hisus. ¹² Dutun ne piya engkey ne mibpekidseveka ki Hisus ke Anak te Eleteala, ruen umur din ne warà edtemanan din. Ugaid ne piya engkey ne warà mebpekidseveka ki Hisus ke Anak te Eleteala, warà umur din ne warà edtemanan din.

Ini ne Mekeatag te Umur ne Warà Edtemanan Din

¹³ Langun kayi ne insurat ku keniyu ne mibperetiyaya en dut te Anak te Eleteala su apey mevag-et se kegketueni niyu te ruen en umur niyu ne warà edtemanan din. ¹⁴ Ne mevag-et se kedsarig tew ke ebpengeningen iki riya te Eleteala, su netuenan tew te piya engkey ne ebpmuyuen tew ne egkeayun rut te kiyug din ne ibehey rin. ¹⁵ Su netuenan tew ne ebpminehen din ke langun ne ebpmuyuen tew riya te kandin, dutun ne netuenan tew rema ne imbehey rin en kenitew ini se ebpmuyuen tew.

¹⁶ Ne embiya egkekita nu te nekesalà ini se ruma nu te ebperetiyaya ugaid ne ke rimahas te salà din ne kenà iyan ebpekeated kandin diyà te kemetayen ne warà edtemanan din, ne ipengeningen iki riya te Eleteala sikandin te ebpsesehad te Eleteala kandin ini se salà din. Ne ebpekevehey kandin te Eleteala te umur ne warà edtemanan din embiya ini se salà din ne kenà iyan ebpekeated kandin diyà te kemetayen ne warà edtemanan din. Ne embiya ruen etew ne nekesalà te iyan ebpekeated kandin diyà te kemetayen ne warà edtemanan din, ne kenà ku egkehiyen te ini ne etew ne ipengeningen iki riya te Eleteala. ¹⁷ Langun ne meraat ne ed-ul-ulaan ne salà, ugaid ne ruen salà ne iyan rimahas din ne kenà ebpekeated kandin diyà te kemetayen ne warà edtemanan din.

¹⁸ Netuenan tew te warà etew ne nevaluy ne anak din ne edlaus te ed-ul-ulaan ne meraat, su ke Anak te Eleteala se edtuganur kandin su apey kenà meewit sikandin ni Setanas.

¹⁹ Netuenan tew ne menge anak ki en te Eleteala. Ugaid ne ini se menge etew dè duen kayi te ampew te dunya, ne ebeyveyaan sikandan ni Setanas.

²⁰ Ne netuenan tew rema te ke Anak te Eleteala se mibpengkayi te ampew te dunya su ebperayag te itungan ta su apey egkeheraman te hinawa ta ke tidtu ne Eleteala. Ne mibpekidseveka ki en kandin ne iyan tidtu ne Eleteala su mibpekidseveka ki en dut te Anak din si Hisu Kristu. Sikandin ke tidtu ne Eleteala ne sikandin ke ebpuunan te umur ne warà edtemanan din.

²¹ Menge anak ku, pekeriyù kew te ked-erapa niyu rut te langun ne kenà iya tidtu ne Eleteala.

Arà dà taman.

Juan

Ke Ikeruwa ne Surat Ni Juan

¹ Siaken se edsurat ini ne pekilukesen dut te menge mibperetiyaya ki Hisus. Ne idsurat ku ini riyà te keykew ne meritan ne nepemili te Eleteala wey ke menge anak nu. Su rekelà ku sikiyu te hinawa, ne kenà siaken dà se rekelà se hinawa rin kenyi su langun ne nekesabut en dut te benar ne penurù mekeatag ki Hisus ne rekelà kew red dema nikandan te hinawa. ² Ne iyan din atag te rekelà te hinawa rey sikiyu su sabap dut te benar ne penurù ne neketahù kayi te hinawa tew ne warà kegkeawà din taman te taman.

³ Ne ebepeneuven ki rut te Amey tew ne Eleteala wey ke Anak din ne si Hisu Kristu, ne igkeyru ki nikandan wey ebehayan kiyu red te melintad ne hinawa. Su ini se ibehey kenitew ne mibperetiyaya en te tidtu ne penurù wey ebpelimlimuey.

⁴ Nehalew ad utew te netuenan ku ne ruen menge anak nu ne eduma en te tidtu ne penurù ne insuhù keytew dut te Amey tew ne Eleteala. ⁵ Tembù be ruen ebuyuen ku keykew, Bayi, te sikitew ne menge mibperetiyaya ne iyan iya se ebpelimlimuey ki. Ne kenà behu pà ini se suhù ne idsurat ku kayi, ugaid ne ebpetentenuran ku kenyi ke suhù ne imbehey keytew te pehaney ne mibperetiyaya ki ki Hisus. ⁶ Su kayi te kebpelimlimuey tew ne edumaan tew ke insuhù te Eleteala kenitew. Ne ini se insuhù din kenitew ne nerineg niyu te pehaney en, ne iyan iya se ebpelimlimuey kiyu.

⁷ Su ruen merakel guntaani ne midlepew kayi te ampew te dunya ne ebpenurù te tarù, su iyan dan ibpenurù ne warà kun in-anak si Hisu Kristu ne etew. Ne ini se ebpenurù te iring ketà ne sikandin ke edlimbung te menge etew wey egkunterà ki Hisu Kristu. ⁸ Tembù be uram kew su apey kenà meawà diyà te kenyi ini se lalew rut te migelevek niyu, ugaid ne ebpekekuwa kew te langun ne impenehana te Eleteala kenyi.

⁹ Su ke etew ne edsuwey rut te benar ne impenurù ni Hisu Kristu etawa ed-umanan din pà maa te tarù, ne warà mebpekidseveka sikandin te Eleteala. Ugaid ne ke etew ne iyan din egeweran te mevaher ke benar ne impenurù ni Hisu Kristu, ne mibpekidseveka sikandin dut te Amey tew ne Eleteala wey ke Anak din. ¹⁰ Tembù be embiya ruen ebpekeuma riyà te kenyi ne kenà ebpenurù te ini se tidtu ne penurù ni Hisu Kristu, ne kenà niyu ipepemenayik diyà te baley niyu. Ne kenà niyu rema gelhelawa sikandin. ¹¹ Su misan kegalewhalew niyu rà sikandin, ne iring te ed-amung ka rut te ulaula rin ne meraat.

¹² Merakel perem se egkehiyen ku kenyi, ugaid ne kenà ku en idsurat kayi. Su ruen pegitungan ku ne ebpendiyan e red te kenyi apey kiyu ebpemekebitiyara su apey meilut se kegkehalew tew.

¹³ Ne ebpengingsà kenyi ini se menge anak dut te eteveyn nu ne nepemili dema te Eleteala iring kenyi.

Ini rà se egkehiyen ku.
Juan

Ke Iketelu ne Surat ni Juan

¹ Siaken se edsurat ini ne pekilukesen dut te menge mibperetiyaya ki Hisus. Ne idsurat ku ini riyà te keykew, Gayu, ne meheget ne suled ku ne rekelà kayi te hinawa ku.

² Suled ne meheget, ibpengeningen iku sikew te Eleteala ne meupiya se egketemtemenan nu wey ebehayen ka te meupiya ne kedlelawu nu, su netuenan ku ne mevaher se kebperetiyaya nu. ³ Nehalew a nevenar dut te kebpekeuma kayi te menge suled tew riyà se ebpenudtul te meilut se keduma nu rut te tidtu ne penuruan, su ke langun ne ulaula nu kun ne ebpekeayun iya rut te benar. ⁴ Su warà en ebpekelawan ne ebpekehalew kediey embiya ke kenà ke kerineg ku ne ke menge anak ku te ebperetiyaya ne edlaus te keduma ran dut te tidtu ne penuruan.

⁵ Ne suled ku ne meheget, egkeserihan ka nevenar dut te kettuganur nu te menge ruma tew te ebperetiyaya ne mibpelinawet diyà te kenikew, su misan warà nu mekilala sikandan ne midtuganur nu red. ⁶ Su ketà te mid-ulì dan kayi ne mibpenudtul dan dut te nengevurun ne mibperetiyaya atag dut te limù ne impekita nu kandan. Embyia ed-awet dan pà maa diyà te keniyu, ne iyan meupiya ne edtevangan nu sikandan su apey ranmekelaus dut te ipanewan dan. Su ini imbe ke ebpekesuhat te hinawa te Eleteala. ⁷ Su ini se ipanewan dan ne ebpmesabut dan te Meupiya ne Tuttul mekeatag ki Hisu Kristu, ne kenà dan edsarig te tavang dut te menge etew ne warà pà mibperetiyaya. ⁸ Tembù be iyan iya meupiya te sikami ne menge mibperetiyaya se edtuganur te kurang dut te menge etew iring ketà su apey kiyu red dema ebpekeamung dut te helevék dan te kebpemesabut dut te tidtu ne penuruan.

⁹ Ne ruen insurat ku mekeatag te ini riyà te menge mibperetiyaya ne egkevurun ketà. Ugaid ne si Diyutripis ne kenà din ebpminehen ini se lalag ku, su iyan din igkesuat ne sikandin se edlingekaan dut te menge mibperetiyaya riyà. ¹⁰ Tembù be embiya ebpekeuma a riyà te keniyu, ne ibpenudtul ku ini se langun ne meraat ne ed-ul-ulaan din wey ke tarù ne livakan din kedì. Ne kenà pà dutun dà taman, su kenà din edtugenuren ke menge ruma tew te ebperetiyaya ne ebpekeuma riyà te keniyu. Ne embiya ruen edtuganur kandan ne ebengenen din su kenà din idtuhut te ebpekeamung dan ketà te kegkevurun niyu te menge mibperetiyaya.

¹¹ Na suled ku ne rekelà te hinawa ku, kenà nu dumai ke menge meraat ne ulaula iring ketà, ugaid ne iyan nu dumai ne endei ke ulaula ne meupiya. Su ke etew ne ed-ulaula te iyan ebpekesuhat te hinawa te Eleteala, ne sikandin ke mibpesakup te Eleteala. Ugaid ke etew ne edlaus pà te ini ne ed-ul-ulaan ne meraatey, ne warà diyà te hinawa rin ini se Eleteala.

¹² Ugaid ne si Dimitriyu ne nereyù sikandin dut te langun. Su nekita ran en ne ingenat dà te rudsuau ne midumaan din ke benar ne impenurù kandin. Ne misan sikami ne edeyuen dey rema sikandin, ne netuenan nu se benar ini se egkehiyen ku.

¹³ Merakel pà perem se egkehiyen ku keniyu, ugaid ne kenà ku en idsurat kayi. ¹⁴ Su ruen pegitungan ku te kenà en meuhet ne ebpendiyan e red te keniyu, ne ketà ne ebpemekebitiyara kiyu.

¹⁵ Iyan ku kiyug ne ebeheyen ka te kebmelilintad ne hinawa nu.

Langun ne menge suled ta kayi ne ebpenginginsà kenikew. Ne ipeingguma nu red dema riyà te langun ne rumà ta riyà ini se pengingingsà ku kandan.

Ini rà taman se egkehiyen ku. *Juan*

Ke Surat Ni Hudas

¹ Siaken ini se edsurat ne si Hudas ne suled ni Santiago wey sugsuhuen ni Hisu Kristu.

Ne edsuratan ku sikiyu ne mibpemilì te Eleteala ne Amey tew ne nevaluy ne menge etew rin ne igkelimù din, ne ebentayan dema ni Hisu Kristu.

² Iyan ku kiyug ne egkeheraman niyu ke kegkeyru te Eleteala wey kebmelinew te itungan niyu wey limù ne egenat diyà te kandin.

Ini ne Mekeatag te Egketemanan Dut te Ebpenurù te Kenà Metidtu

³ Menge suled ne igkelimù ku, mibpenemaran ku se kedsurat ku keniyu mekeatag te peretiyyaya tew ne egkeheram te langun tew ne mibperetiyyaya. Ugaid ne iyan migavan te itungan ku ne edsuratan ku pà sikiyu te kegkevag-et te itungan niyu te ed-itindeg dut te peretiyyaya niyu su ini se penurù se imbehey te Eleteala dut te menge etew rin ne kenà en egkeumanan te misan deisek dà. ⁴ Su ruen menge etew ne warà adat dan te Eleteala ne nekeamung te kevurunan niyu ne engkungkun ne ebperetiyyaya te Eleteala ne ebpenurù te senge bias dut te peretiyyaya tew ne egkahi ran te neked-iring ded. Ed-eraten dan perem ke benar ne penurù mekeatag te kegkeyru te Eleteala su ebpenurù dan te egkepakey ne ed-ul-ulaan tew te meraat su egkeyru nelaus ke Eleteala ne kenà ki kun edusaan nikandin. Kenà dan ebperetiyyaya te si Hisu Kristu rà ke edumaan ne Kerenan tew. Ugaid ne rengan dà ne impesurat en te Eleteala se kedusa rin kandan.

⁵ Na ruen ebpetenuran ku keniyu ne netuenan niyu en atag dut te mid-ula-ula te Eleteala rengan. Su midtevangan din ke langun ne inenakan te Israyil te ebpeliyu rut te kinepengunguripen kandan te inged ne Ihiptu. Ugaid ne netaman ne langun dut te kenà ebperetiyyaya ne neherà. ⁶ Ne tentenuri niyu rema arà se menge suluhuen te Eleteala diyà te langit dengan ne mid-una dut te ketengdanan ne imbehey kandan te Eleteala su mid-ewaan dan ke kandan ne ubpaan. Ne nevilanggù sikandan te Eleteala riyà te merusirem, ne mibakù dan te sengkali ne kenà egkepeka taman te kenà pà egkeuma arà se hewii ne kegkukum din ne kedusai kandan. ⁷ Ne tentenuri niyu rema ke menge inged ne Suduma wey Gumura wey ke menge inged ne nekelingut ne nereetan en. Su iring se mid-ulaula ran dut te menge suluhuen te Eleteala rengan ne nekesahad se keredsik te perangey ran te edsalàsalà ne ebpeulirey ke elin ded meama. Ne edresayen te Eleteala sikandan diyà te apuy nerakà ne kenà egkeevukan su apey egkeendekan ke menge etew ne ed-iring ketà.

⁸ Iring ded be iya ketà ke egketemanan dut te menge etew ne ebpenurù te kenà benar diyà te keniyu. Edtumanen dan dà ke meraat ne kiyug te lawa ran su ingkahi kun kandan te tehinep dan. Ne edsumpeliten dan su kenà dan eduma te lalag te Eleteala, ne edsudian dan ke ketulusan ne suluhuen diyà te langit. ⁹ Ne misan si Miguel ke mepurù te menge suluhuen te Eleteala ne kenà iring ketà se mid-ulaula rin. Su ketà te kinepatey ni Moises ne mibpelewaney en si Miguel ki

Setanas ke engkey kandan se egkuwa rut te bangkey ni Moises, ne warà megaga ni Miguel te ed-isuhat te meraat ne lalag si Setanas su iyan din dà migkahi ne, "Eleteala en se ed-isuhat kenikew." ¹⁰ Ugaid ne ini se menge etew ne ebpenurù te kenà benar, ne misan engkey en ne kenà dan egkesebutan ne edsumpeliten dan. Ne iyan dan nelayaman ne ke meraat ne ulaula iring dut te perangey te asu, ne ini ve iya se kegkekeiri ran.

¹¹ Mekeandek nevenar se egketemanaan dan! Su ini se ulaula ran ne warà bira rin dut te ki Kain dengan. Ne iring dan dema ki Bilam rengan te misan netuenan din ded se meraat ne mibpenguwa te pirak te dalan te tarù din. Ne iring ded dema ke ulaula ran ki Kura rengan su mibpekidlawan sikandin ki Moises ne mibpemekeiran sikandin te Eleteala, ne iring ded be imbe se kegkekeiri ran ketà.

¹² Su egenat dut te meraat ne ulaula ran ne ebpekekaid dut te kevurunan niyu te edtenuran niyu ke kinepatey wey kinekevanew ni Hisus. Warà angkà te kegkaan wey ked-inum dan su iyan den dà ed-epasen ke kegkaan dan. Ne iring dan dema te dadtem ne kivel ne kunaan ke ebpekeuran, ugaid ne inlayap te keramag. Ne iring dan ded dema te kayu ne nevuwar en su misan timpu te kebpemehas ne warà bahas din su nehangu en. ¹³ Ne iring dan ded maa lavew te dekdekelà ne baleg te rahat ne kenà ebpeeneng-eneng su ke meraat ne ulaula ran ne iring dut te meredsik ne ebpekeampil te buràburà diyà te kilid te rahat. Ne ruma pà maa ne iring dan te menge bituen ne neparin dut te ebinuuwan din ne kenà en egkepakey ne edtenuran te menge etew. Ne ruen en intail te Eleteala kandan ne meitem en te kerusirem din ne ubpaan ne kenà dan ebpekeawa ketà taman te taman.

¹⁴ Su si Enoc ne ikepitu ne kevuwaran igenat te si Adan se impekahih te Eleteala rengan mekeatag te egketemanaan dan ne ini se impekahih rin, "Ebpekeuma si Hisus ke Kerenan tew ne edumaan te suluhuen din ne egngivungivuwan ¹⁵ apey egkukumen din ke langun ne menge etew wey ed-isuhaten din te kevenar ke langun ne menge belidsalà dut te ulaula ran ne meraatey wey atag dut te meraat ne lalag dan ne id-isuhat kandin!"

¹⁶ Ini se menge etew ne ed-engkenà dut te benar, ne merehen egkesukul se hinawa ran wey metehel ne ebpmivig. Iyan den dà edumaan ke meraat ne kiyug te lawa ran. Sahad se kepereyù dan, ne metau ran ne edlana te hinawa te ruma ran su dalan ini te kedsikep dan.

Ke Menge Imbaag wey Impemandù ni Hudas

¹⁷ Ugaid ne sikiyu kenian ne menge suled ku, tentenuri niyu ke ingkahi rut te menge kedserihan dengan ni Hisu Kristu ke Kerenan tew. ¹⁸ Su migkahi ran te, "Ketà te egketketapus en ini se kelibutan ne ruen menge etew ne egemew ne edsumpalit kenyi ini te ebperetiyyaya ki Hisus. Menge etew ini ne iyan dan edtumanen ke kiyug te lawa ran ne igkeepes te Eleteala." ¹⁹ Ne sikandan se puunan te kegkehuvar dut te neseveka ne menge mibperetiyyaya. Su iyan dan ma edtumanen ne ke kandan dà ne kiyug, ne ke Kedesenan ne Ebpetuntul te Menusiyà ne warà te hinawa ran.

²⁰ Ugaid ne sikiyu ne menge suled ku, ne ibpeunsad niyu ke langun ne ed-ul-ulaan niyu kayi te sarig ne imbehey kenitew te Eleteala.

Ne kayi te kebpengeningeni tew te Eleteala ne ignganey tew rut te Kedesenan ne Ebpetuntul te Menusiyà te iyan mebayàbayà te itungan tew su apey ta egketueni ke engkey se egkiyuhan te Eleteala ne kebpengeningeni tew. ²¹ Ne ikehat niyu te tivang ke rekèlè ne limù te Eleteala kenyu apey kew egkevaher gewii niyu te edtahad ketà te hewii ne edlived si Hisu Kristu ne Kerenan tew. Su ketà ne hewii ne ibpekita rin kenitew ke iru rin su ebehayan kiyu en te umur tew ne warà edtemanan din.

²² Upiani niyu te ebpesabut ke menge etew ne alang-alang pà se kebperetiyyaya ran apey ran kenà en mevangen te ebperetiyyaya ²³ ne ke menge rumu niyu ne riyà ebpekesinaru te apuy nerakà, ne tevangi niyu su iring te edsekedlawen niyu sikandan diyà te apuy. Ibpekita niyu ke kegkeyru niyu te menge etew, ugaid ne inteng kew imbe ke ebpekeiring kew rut te meredsik ne perangey ran.

Kebpengeningeni ne Edeyù te Eleteala

²⁴ Ne arà be ne edeyrey kiyu te Eleteala su sikandin dà se ebpekegaga ne edtavang kenitew apey kenà ki mekesuwey riyà te kandin. Ne sikandin dà se ebpekegaga ne ebpeliyu kenitew su apey warà meraat ne egkekita rin kayi te kenitew ketà te hewii ne ed-itindeg ki diyà te etuvangan te raman din ne ed-andlag te kesihey rin ne dekèlè imbe ne kehelawan tew. ²⁵ Kenà kiyu ed-engked se edeyrey te Eleteala su sikandin dà se benar ne Eleteala ne ebpeliyu kenitew su sabap dut te mid-ulaula ni Hisu Kristu ke Kerenan tew. Su sikandin dà se mepurù te langun ne warà repeng dut te keupiya wey gehem din, su mibayàbayà sikandin te aney en te warà pà limberha ini se kelibutan taman guntaani en ne warà ketepusan din taman te taman! Ne metuman be ini.

Arà dà taman.

Hudas

Ke Imperayag Ni Hisu Kristu Ki Juan

¹ Ini se insurat ne imperayag ni Hisu Kristu. Imbehey ini kandin dut te Eleteala su apey igkepesabut diyà te menge mibperetiyaya te Eleteala ke engkey se mehaan ne egkenged-ulaula. Impayag ini ni Hisu Kristu diyà te ki Juan ne sugsuhuen din ibpepevayà te suluhuen din ne midsuhù din diyà te kandin. ² Ne insurat ni Juan ke langun ne impekita kandin. Ne ini se insurat ni Juan ne ke Lalag te Eleteala wey ke benar ne impekita ni Hisu Kristu. ³ Ne dayirayi ke etew ne ebasa kayi te insurat ini ne egkenged-ulaula, ne dayirayi rema ke menge etew ne ebpemineg wey edtuman te insuhù kayi su mehaan en ke hewii ne egketuman ini.

Ke Menge Surat Diyà te Menge Mibperetiyaya te Pitu ne Menge Inged
⁴⁻⁵ Siak si Juan ke midsurat kayi. Ini se insurat ku ne riyà te langun niyu ne menge mibperetiyaya ne diyà te pitu ne menge inged te pruvinsiya ne Asiya.

Egkiyuhan ku ne ebpeneuven kew rut te Eleteala wey ke Kedesenan ne Ebpetuntul te Menusiyà wey si Hisu Kristu. Egkiyuhan ku rema ne eбmelintad ke hinawa niyu mekeatag kandan. Ini se Eleteala ne daan en sikandin te warà pà limbaha ke misan engkey en, ne kemulu pà sikandin guntaan wey sikandin ded lavew taman te taman. Ne ke Kedesenan ne Ebpetuntul te Menusiyà ne pitu se ralan te kebpekita rin dut te gehem din ne diyà ed-ubpà te etuvangan te ebpinuuwan te kedatù te Eleteala. Ne si Hisu Kristu ke egkeserihan ne titibus mekeatag te Eleteala. Sikandin ke neuna ne mibanew te Eleteala dut te kebpatey rin, ne sikandin rema ke benar ne datù ne ebayàbayà dut te langun ne ruen kebayàbayà din kayi te ampew te dunya.

Dekelà ke limù din keytew, ne ketà te imbùbù din ke lengesa rin kenitew dut te kinepatey rin ne sikandin ke mibpeliyu keytew rut te kedusa te Eleteala te salà tew. ⁶ Ne nekelusud ki rut te edetuan din wey mibaluy ki nikandin ne iring te menge terebpelengesa su apey egelevek ki rut te egkiyuhan te Eleteala ne amey rin. Tembù be iyan meupiya ne edeyuen sikandin ne edatù sikandin te warà kegkepupus din. Egketuman ini.

⁷ Na kelimùlimù ne pegitunga niyu ini.
 Ebpekeuma si Hisu Kristu
 ne edumaan dut te menge sehalapun.
 Egkekita sikandin dut te langun ne menusiyà
 abpeg dut te mid-imatey kandin.
 Ne ebpenehew ketà ke langun ne menge etew
 kayi te ampew te dunya
 su egkeandek dan te kegkukuma rin kandan.
 Egketuman ini.

⁸ Ini se Kerenan tew ne Eleteala ne mekegehem, ne daan en sikandin te warà pà limbaha ke misan engkey en ne kemulu pà sikandin guntaan wey sikandin ded lavew taman te taman. Tembù be migkahi te, "Siaken ke Alpa wey Omega." Ne ke meana kayi ne warà kurang

din su sikandin ke ebpuunan te langun taman ne sikandin dema ke ebpeengked dut te langun.

Ke Kebpekita ni Hisu Kristu ki Huan

⁹ Na si Juan a ne midsurat kayi ne suled niyu te ebperetiwaya ki Hisus. Ne iring a keniyu su midtigkeran ku rema ke kemeresan ne nekeuma kediey su atag dut te kebpsakup ku te Edetuan te Eleteala. Su neepes ke gubirnu te ini se kebpenudtul ku te Lalag te Eleteala wey ini se kebpenuurù ku te imperayag ni Hisus, ne midsegseg a te ebpendiyà te punul ne ed-ingaranan te Patmus. ¹⁰ Ne ketà te hewii ne edeyù ki te Kerenan, ne midlumun kediey ke Kedesenan ne Ebpetuntul te Menusiyà ne ruen merahing ne suwara ne nerineg ku diyà te iniyuhan ku ne iring te dahing te budyung. ¹¹ Ne migkahi te, “Isurat nu ini se egkekita nu ne ibpeewit nu diyà te menge mibperetiwaya diyà te pitu ne menge inged: diyà te inged ne Ipusu, Ismirna, Pircamu, Tiyetira, Sardis, Piledilpiya wey riyà te inged ne Lewdisiya.”

¹² Ne guna su nerineg ku ini se merahing ne suwara, ne midlilingey ku su apey ku egkekita ke engkey se edlalag kediey, ne ketà ne iyan ku nekita ne ini se pitu ne sulù ne bulawan. ¹³ Ne riyà te luuk dut te menge sulù ne ruen nekita ku ne iring te paras te menusiyà. Ne mibevelegkas te melayat su nekeuma te paa rin ne ruen inselauy kayi te kumeng din ne vulawan. ¹⁴ Ini se bulvul din ne mepmeputi iring te gapas, ne ke mata rin ne iring te regreg dut te apuy. ¹⁵ Ne ini se paa rin ne iring te galang ne intuug diyà te apuy, ne ke suwara rin ne iring te dehuus dut te wayig te sampew. ¹⁶ Kayi te kewanen ne belad din ne ruen migeweran din ne pitu ne bituen, ne ruen migemew te bèbà din ne sundang ne meharang. Ne ke buked din ne ebpekesirang iring te rayag te neudtu ne andew. ¹⁷ Nekita ku rà sikandin, ne midlumpeng ad diyà te sineruhan din iring te minatey. Ugaid ne indampen din kediey ke kewanen ne belad din ne migkahi te, “Kenà ka meandek su siaken ke ebpuunan te langun taman ne siaken dema ke ebpeengked dut te ketepusan te langun taman. ¹⁸ Siaken ke ruen umur din ne warà edtemanan. Ne misan mid-imetayan a nikandan ne nevanew a iya, ne guntaani ne kenà ad ebpatey. Siaken ke egawed dut te umur te menge etew, ne siaken ded ke ebayàbayà dut te Iveyaan.

¹⁹ “Na isurat nu ini se ibpekita ku kenikew ini, se egked-ulaula guntaan wey ke egked-ulaula pà keuremà. ²⁰ Na ibpesabut ku kenikew ke meana rut te pitu ne bituen ne nekita nu ne migeweran ku kayi te kewanen ne velad ku wey ke meana rut te pitu ne sulù ne vulawan. Ini se pitu ne bituen, ne ini ke pitu ne suluhuen te Eleteala ne ebantey rut te pitu ne inged ne menge mibperetiwaya. Ne ini se pitu ne sulù, ne ini ke pitu ne inged ne menge mibperetiwaya.”

2

Ke Surat diyà te Menge Mibperetiwaya te Inged ne Ipusu

¹ Migkahi si Hisus te, “Surati nu ke suluhuen ne ebantey rut te menge mibperetiwaya diyà te inged ne Ipusu, ne ini se menge lalag ne isurat nu.

“Ini se menge lalag ku kenian te keniyu. Siaken ke egawed te pitu ne bituen kayi te kewanen ne belad ku, ne siaken ded ke edipanew kayi te luuk te pitu ne bulawan ne sulù. ² Netuenan ku

ini se langun ne ed-ul-ulaan niyu. Netuenan ku rema ne metehel kew ne egelevek ne metigker kew te kemerehenan su atag dut te kebperetiyyaya niyu kediey. Ne netuenan ku rema te kenà kew edtuhut te ruen menge ruma niyu ne meraat se ed-ul-ulaan din, su migeraman niyu ke menge etew ne egkahi te kedserihan dan ni Hisus ne rutun ne netuenan niyu ne kenà benar ne kedserihan su midtarùtarù dan.³ Netuenan ku te midtigkeran te hinawa niyu ke keresayan ne mibpekesekitan kew su atag dut te kebperetiyyaya niyu kediey, ne misan iring ketà ne warà niyu engkeri ke kebperetiyyaya niyu wey keduma niyu kediey.

⁴ “Ugaid ne ruen en ed-ul-ulaan niyu guntaani ne idsawey ku keniyu. Ketà te pehaney ne mibperetiyyaya kew kedì ne dekelà se limù niyu kediey, ugaid guntaani ne nasi en ne mideisek.⁵ Tentenuri niyu ke dekelà ne limù niyu kedì dut te pehaney, ne pedsendit kew dut te meraat ne ed-ul-ulaan niyu guntaani ne lived kew dut te neuna ne limù niyu kediey. Su embiya kenà kew ebpedsendit, ne ebeyaan ku sikiyu ne id-awà ku ke sulu niyu diyà te netehuan din.⁶ Ugaid ne duen ed-ul-ulaan niyu ne ebpekesuhat te hinawa ku su neepes kew te meraat ne ed-ul-ulaan dut te menge etew ne eduma ki Nikulayi ne ingkeepes ku rema.

⁷ “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiyà diyà te langun niyu ne mibperetiyyaya. Piya engkey ne etew ne kenà egkegaga dut te penggeram te datù te pekaid, ne edtuhutan ku ne ebpekekaan dut te bahas te kayu ne ebpuunan te umur ne warà edtemanan din ne impemula ketà te ed-ubpaan te Eleteala.”

Ke Surat diyà te Menge Mibperetiyyaya te Inged ne Ismirna

⁸ Ne ketà ne migkahi pà maa si Hisus te, “Surati nu red ke suluhuen ne ebanney dut te menge mibperetiyyaya diyà te inged ne Ismirna, ne ini se menge lalag ne isurat nu.

“Ini se menge lalag ku keniyan te keniyu. Siaken ke ebpuunan te langun taman ne siaken rema ke ebpeengked dut te langun. Minatey a ugaid ne nevanew a red.⁹ Netuenan ku te dekelà se kebpekesekiti keniyu ne neheraman niyu. Netuenan ku rema ne menge ayauyu kew, ugaid ne misan iring ketà ne kewasa kew iya riyà te langit. Ne netuenan ku ke meraat ne eddelahen mekeatag keniyu dut te menge etew ne engkungkun ne tidtu ne menge Hudiyanan, ugaid ne kenà ma benar su sakup dan ni Setanas ke datù te pekaid.¹⁰ Kenà kew meandek dut te keresayan ne mehaan en ne ebpekeuma keniyu. Ugaid ne pemineha niyu ini se egkehiyen ku su ruen keniyan te keniyu ne ebilengguen dut te datù te pekaid su ebpenggeraman din ke kebperetiyyaya niyu, ne edresayen kew te mehaan iring te menge sepulù ne hewii. Ugaid ne kenà kew edlekà te kebperetiyyaya niyu kediey misan ibpatey niyu pà su ruen lalew ne ibehey keniyu ne umur ne warà edtemanan din.

¹¹ “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiyà diyà te langun niyu ne mibperetiyyaya.

“Piya engkey ne etew ne kenà egkegaga dut te penggeram te datù te pekaid ne kenà ibpependiyà te Eleteala te apuy nerakà ne arà ke ikeruwa ne kemetayan.”

Ke Surat diyà te Menge Mibperetiyaya diyà te Inged ne Pircamu

¹² Ketà ne migkahi en maa si Hisus te, “Surati nu red ke suluhuen ne ebantey dut te menge mibperetiyaya diyà te inged ne Pircamu, ne ini se menge lalag ne isurat nu.

“Ini se menge lalag ku keniyan te keniyan. Siaken ke ruen meharang ne sundang ne egemew kayi te bëbà ku. ¹³ Netuenan ku ne riyà kew ed-ubpà te inged ne ruen merakel ne etew ne edetuan ni Setanas ke datù te pekaid. Ugaid ne misan iring ketà ne metidtu ke keduma niyu kediey, ne warà kew medlekà dut te kebperetiyaya niyu kediey misan dut te ked-imetayi ran ki Antipas dengan, arà se metinumanen te ebpemenudtul te lalag ku ne mid-imetayan dan diyà te inged niyu ne edetuan te datù te pekaid.

¹⁴ “Ugaid ne ruen dema ed-ul-ulaan niyu ne kenà ku egkesuatan su ruen keniyan te keniyan ne eduma te impenurù ni Belaam dengan. Si Belaam ini, ne impenurù din dengan ki Balak ke ralan te kebpeneheewit dut te menge etew ne kevuwaran ni Israyil te kebpekedsalà. Su mibpeneheewit din sikandan te egkaan dut te egkeenen ne inrenà ne siparat diyà te ledawan dà ne kenà tidtu ne Eleteala wey mibpeneheewit din dema sikandan te kebpengingniyug. ¹⁵ Ne ruen dema keniyan te keniyan ne eduma rut te tarù ne penurù te menge etew ne Nikuleyta. ¹⁶ Engkeri niyu ini se meraat ne ed-ul-ulaan niyu, su embiya kenà ne mehaan ku ebeyai sikiyu ne edusaan ku ini se menge etew kayi te sundang ne egemew te bëbà ku.

¹⁷ “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiyà diyà te langun niyu ne mibperetiyaya.

“Piya engkey ne etew ne kenà egkegaga dut te penggeram te datù te pekaid, ne ebehayen ku te egkeenen diyà te langit ne warà pà mekita te menge etew. Ne ebehayen ku rema sikandin te meputì ne batu ne isurat dutun ke behu ne ngaran din ne iyan dà netau ne ke ebehayen.”

Ke Surat diyà te Menge Mibperetiyaya te inged ne Tiyatira

¹⁸ Ketà ne migkahi en maa si Hisus te, “Surati nu red ke suluhuen ne ebantey dut te menge mibperetiyaya diyà te inged ne Tiyatira, ne ini se menge lalag ne isurat nu.

“Ini se menge lalag ku keniyan ne siaken ke Anak te Eleteala. Ke mata ku ne iring te regreg te apuy, ne ke paa ku ne iring te galang ne intuug diyà te apuy. ¹⁹ Netuenan ku ke langun ne ed-ul-ulaan niyu. Ke limù niyu kediey ne dekelà ne ke kebperetiyaya niyu kediey ne mevaher. Metinevangen kew te menge ruma niyu ne mibperetiyaya, ne metigker kew te kemeresayan. Netuenan ku rema ne guntaani ne mid-iseg ini se meupiya ne ed-ul-ulaan niyu rut te pehaney. ²⁰ Ugaid ne ruen en ed-ul-ulaan niyu ne idsawey ku keniyan su ke meritan ne si Isibil ne engkungkun ne ebpelambas te Lalag te Eleteala ne edtuhutan niyu ne ebpenuurù keniyan. Ne kayi te penurù din ne midlimbungan din ke menge sakup ku su

mibpeneheewit din sikandan te egkepakey ne ebpengningiyug dan wey egkaan te egkeenéne inrenà ne siparat diyà te ledawan dà ne kenà tidtu ne Eleteala.²¹ Neuhet en ne midtigkeran ku su apey rin meengkeri na ebpekedsendit dut te meredsik ne ed-ul-ulaan din, ugaard ne kenà din ed-engkeran.²² Tembù be idadsang ku sikandin diyà te ed-irehaan din su ebpederuwen ku abpeg ke menge ruma rin. Ne egkeheram dan te mepasang ne keresayan embiya kenà dan ed-engked ne ebpekedsendit dut te meredsik ne mid-ulaula ran su atag dut te ini se meritan.²³ Ne ed-imetayan ku rema ke menge etew ne eduma rut te impenurù din su apey egkekita te langun ne mibperetiyyaya te siaken ke netau te langun ne netahù te itungan dut te menge etew wey ke egkiyuhan dan dema. Ne edusaan ku red dema ke uman seveka kandan te piya engkey se edait dut te menge ulaula ran.

²⁴ “Ne ruen igkahi ku kenyi te menge ruma ne riyà te inged ne Tiyetira ne warà pà meduma rut te meraat ne penurù kayi te meritan ini, su warà kew pà medtelimà te iyan din egkehiyen ne metampas ne itungan misan riyà ebpuun te ki Setanas ke datù te pekaid. Ne iyan ku igkahi kenyi ne warà en duma pà ne ebpeveelan ku kenyi,²⁵ ugaard ne iyan iya se geweri niyu te mevaher ke kebperetiyyaya niyu kediey taman te ebpekeuma a.²⁶⁻²⁷ Ne piya engkey ne etew ne kenà egkegaga dut te penggeram te datù te pekaid ugaard ne edumaan din ke kiyug ku taman te kepatey, ne arà se etew ne ebehayan ku te gehem iring dut te gehem ne imbehey kediey dut te Amey ku ne Eleteala su ebehayan ku sikandan te kebayàbayà te edatù dut te langun ne inged kayi te ampew te dunya.

Ne ke kebayàbayà dan ne mevaher
iring te kevaher dut te putew ne kenà egketamped.
Uya kayi te kedtevani ran dut te menge inged
ne edrupeten dan iring te kuren.

²⁸ “Ne sikandan ne eduma kediey taman te kemetayen ne ibehey ku rema kandan ke mekebangas ne bituen ne edsilà te egkeri-waswas.

²⁹ “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiyà diya te langun niyu ne mibperetiyyaya.”

3

Ke Surat diyà te Menge Mibperetiyyaya te Inged ne Sardis

¹ Ketà ne migkahi en maa si Hisus te, “Surati nu red ke suluhuen ne ebantey dut te menge mibperetiyyaya diyà te inged ne Sardis, ne ini se menge lalag ne isurat nu.

“Ini se menge lalag ku kenyian te kenyi. Ke Kedesenan ne Ebpetuntul te Menusiyà ne pitu ne ralan ne ebpekita te gehem din ne ini en te kediey. Ne kayi en dema ke pitu ne bituen ne egeweran ku. Netuenan ku ini se langun ne ed-ul-ulaan niyu. Ne misan nevantug kew te ruen behu ne umur niyu ne kenà egkekita kayi te ed-ul-ulaan niyu.² Tembù be himerat kew ne geweri niyu te mevaher ini se reisek dà ne kebperetiyyaya niyu su apey kenà egkeawà ini. Su netuenan ku ne ini se ed-ul-ulaan niyu ne kenà ebpekesuhat te

hinawa te Eleteala. ³ Kenà niyu lipati ke benar ne penurù ne nerineg niyu wey midtelimà niyu, ne dumai niyu ini wey engked kew dut te meraat ne ed-ul-ulaan niyu. Su embiya kenà kew ebpekedsendit, ne ebpekeuma a te warà kew mebpenehana su edusa keniyu. Ne ini se kebpekeuma ku ne iring te kebpekeuma dut te tekawen ne kenà egketuenan ke kedlepew rin.

⁴ “Ugaid ne ruen duma niyu diyà te inged ne Sardis ne warà mevuringi ke belegkas din. Ne iyan din meana ne warà med-amung te meraat ne ulaula. Ne sikandan se ebpekeruma kediey ne ebevelegkas te meputì, ne edait ini su mid-up-upiya ran te ed-ul-ulaan dan. ⁵ Ne piya engkey ne etew ne kenà egkegaga dut te penggeram te datù te pekaid ne ke ibevelegkas din ne meputì, ne kenà ku id-awà ke ngaran din dut te riberù ne midsuratan te menge ngaran te langun ne egkevehayan te umur ne warà edtemanan din. Ne egkehiyen ku riyà te etuvangan te Amey ku ne Eleteala wey ke menge suluhuen din te ini ne sakup ku.

⁶ “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiyà diyà te langun niyu ne mibperetiyaya.”

Ke Surat diyà te Menge Mibperetiyaya te Inged ne Piledilpiya

⁷ Ketà ne migkahi en maa si Hisus te, “Surati nu red ke suluhuen ne ebantey dut te menge mibperetiyaya diyà te inged ne Piledilpiya, ne ini se menge lalag ne isurat nu.

“Ini se menge lalag ku keniyan te keniyu. Siaken ke ed-ulaula te metidtu, ne egkeserihan a. Ne mibehayan a te kebayàbayà su apey edatù te iring dut te kedadù ni David dengan. Ne embiya ebpuwasan ku ke gumawan su apey ruen etew ne ebpekelusud ketà te edetuan ku, ne warà etew ne ebpekelekeb kayi. Ne embiya edlekevan ku ini su apey warà etew ne ebpekelusud, ne warà ded maa etew ne ebpekepuwas kayi. ⁸ Netuenan ku ini se ed-ul-ulaan niyu. Ne netuenan ku rema te sikiyu ne kenà kew utew merakel ne ke gaga niyu ne reisek dema, ugaid ne metinumanen kew te keduma rut te impenurù ku keniyu ne warà in-eles niyu ne sakup niyu kediey. Ketà ne ruen iring te gumawan ne mibpuwasan ku su apey kew ebpekelusud, ne warà ebpekegaga ne edlekeb su kenà dan ebpekevangen dut te ibpeaula ku keniyu. ⁹ Ne arà ne menge etew ne engkungkun ne tidtu ne menge Hudiyanan ugaid ne tarù su sakup dan ni Setanas ke datù te pekaid, ne ibpeembavà ku sikandan ne ibpepenimbuel ku diyà te etuvangan niyu su apey ran egketuenan te sikiyu ne menge etew ne igkelimu ku iya. ¹⁰ Ne sabap te keduma niyu rut te insuhù ku keniyu te edtigkeran niyu ke kemerehenan, tembù be ebentayan ku sikiyu su apey kenà ebpekeuma kayi te keniyu arà se keresayan ne ebpekeuma kayi te ampew te dunya ketà te hewii ne ebpenggeraman te Eleteala ke menge etew.

¹¹ “Na mehaan ad edlived kayi te ampew te dunya. Tembù be geweri niyu te mevaher ini se kebperetiyaya niyu kediey guntaani su apey warà etew ne edlimbung keniyu ne ebpekekuwa dut te lalew ne intail keniyu. ¹² Ne piya engkey ne etew ne kenà egkegaga dut te penggeram te datù te pekaid, ne arà ne etew ne ebeelan ku ne iring te pelaus ne metigker diyà te nekepurù ne baley te Eleteala

diyà te langit ne ed-upbà ketà taman te taman. Ne idsurat ku riyà te kandin ke ngaran dut te Amey ku ne Eleteala wey ke ngaran dut te inged te Eleteala ne ed-ingaranan te Behu ne Hirusalim, ini se inged ne ebpenaug diyà ebpuun te Eleteala diyà te langit. Ne idsurat ku rema diyà te kandin ini se behu ne ngaran ku.

¹³ “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiyà diyà te langun niyu ne mibperetiyaya.” ”

Ke Surat diyà te Menge Mibperetiyaya te inged ne Lewdisiya

¹⁴ Ketà ne migkahi en maa si Hisus te, “Surati nu ke suluhuen ne ebantey rut te menge mibperetiyaya te inged ne Lewdisiya, ne ini se menge lalag ne isurat nu.

“Ini se menge lalag ku keniyan te keniyan. Siaken ne mid-ingaranan te “Amin” su egkedserihan a wey benar iya ke menge lalag ku. Ne langun taman ne nelimbag te Eleteala ne impepevayà din kayi te kediey. ¹⁵ Netuenan ku ke langun ne ed-ul-ulaan niyu. Netuenan ku ne iring kew te ed-inumen ta ne kenà meinit ne kenà ded maa meadsil su eduwaruwa ke hinawa niyu kayi te keduma niyu kediey. Angin perem ke egkeseveka se hinawa niyu iring te wayig ne meinit nevenar etawa meadsil. ¹⁶ Ugaid ne geina te iring kew te ed-inumen ne mehelimendew rà, ne idsempilà ku sikiyu. ¹⁷ Egkahì kew te, “Kewasa ki en ne meupiya ini se kebpekesavuk ta ne warè en kurang ta te misan engkey.” Ugaid ne warà niyu rà metueni te mekeyruwiru kew ves. Su iring kew te menge etew ne nepisek, ne egkeauayu wey etew ne warà belegkas din. ¹⁸ Tembù be ibpemandù ku keniyan ne pemesaa niyu kayi te kedi ini se tidtu ne bulawan ne intuug diyà te apuy ne in-upama te kebperetiyaya niyu kediey su apey ke kegkewasa niyu ne benar. Ne pemesaa niyu rema kayi te kedi ini se meputì ne belegkas su apey ibevelegkas niyu ne egkeawà ke kegkeyeyai niyu te nekegedew. Ne pemesaa niyu rema kayi te kedi ini se bawi te mata su apey ibawi te mata niyu ne ebmerayag se kadtengteng niyu.

¹⁹ “Na ke langun ne menge etew ne igkelimù ku ne ebpenuruuen ku, ne edusaan ku rema sikandan su apey ke ed-ul-ulaan dan ne ebmeupiya. Tembù be pedsendit kew ne engkeri niyu ke meraat ne ed-ul-ulaan niyu. ²⁰ Pemineha nu, su ed-itindeg a kayi te gumawan te baley nu ne ed-umew a kenikew. Embiya ebpmineg ka kediey ne ebpuwasan a nikuna, ne edlusud a ne ebpetuheney ki te egkaan.

²¹ “Ne piya engkey ne etew ne kenà egkegaga dut te penggeram te datù te pekaid ne ebpepinuuwen ku kayi te uvey ku ketà te edetuan ku su ed-amung kedi te edatù. Iring dema kediey te warà a megaga te penggeram te datù te pekaid ne mibpepinuu a diyà te uvey te Amey ku ne Eleteala su ed-amung a te edetuan din.

²² “Itaan niyu ke telinga niyu ne pemineha niyu ini se egkehiyen dut te Kedesenan ne Ebpetuntul te Menusiyà diyà te langun niyu ne mibperetiyaya.” ”

¹ Ketà ne ruen pà maa rumा ne imperayag kediey te Kerenan su nekita ku te ruen gumawan diyà te langit ne mibpuwasan en. Ne ini se midlalag kediey geina te merahing ne suwara iring dut te budying ne midlalag pà maa kediey ne migkahi te, "Pengkayi ka su ibpekita ku keykew ke engkey se egketemanan dut te akir din ne hewii." ² Arà dà ne midlumunan a rut te Kedesenan ne Ebpetuntul te Menusiyà ne ruen impekita rin kediey su riyà te lusud te langit ne nekita ku ini se ebpinuuwan dut te edatù te langit ne ruen mibpinuu ketà. ³ Ne mesihey ke paras din iring dut te ebpengilak-ilak ne menge batu ne mepurù ne ed-ingaranan te hasper wey karnila. Ne ruen neketerung ketà te ebpinuuwan din ne meilem ne beluntu iring te paras te mepurù ne meilem ne batu ne ed-ingaranan te ismiralda. ⁴ Ruen deruwa nepulù wey epat ne ebpinuuwan ne nekelingut kayi te ebpinuuwan din ne ruen deruwa nepulù wey epat ne pekilukesen ne ebpinuu ketà. Mibevelegkas dan te meputì ne ruen inseluluy ran ne bulawan. ⁵ Ne egkesuvid ke kilat diyà te ebpinuuwan din te edatù ne ruen nerineg ku ne eduruhung wey ebpemberansi. Ruen pitu ne sulù ne egkeregreg diyà te etuvangan te ebpinuuwan din, ne ini ke tuus te ruen pitu ne ralan te kebpekita dut te Kedesenan ne Ebpetuntul te Menusiyà te gehem din. ⁶ Ne ruen dema nekita ku diyà te etuvangan te ebpinuuwan din ne iring te meluag ne rahat ne metmetingew iring te pehelungan.

Ne ruen dema epat ne nelimbag din ne ed-itindeg diyà te epat ne pediyulu dut te ebpinuuwan din. Ne neeneb ke lawa ran te mata kayi te sineruwan wey riyà te peka ran. ⁷ Ruen seveka ketà te nelimbag ne iring te paras te erimaung, ne ke ikeruwa ne iring te paras te nati ne sapi, ne ke iketelu ne iring te paras te etew, ne ke ikeepat ne iring te paras te banug ne edlayang. ⁸ Ne uman seveka ketà te epat ne nelimbag ne ruen nem ne pakpak din. Ne neeneb te mata ini se lawa ran misan kayi te diralem te pakpak dan. Merukilem meandew ne iyan dan ebpulungan ne egkekanta. Ke se bayuk dan te,
"Metmetidtu neveran ini se ed-ul-ulaan te Eleteala.
Ne sikandin ke Kerenan ne ebayàbayà te langun.

Dengan dà sikandin,
ne kemulu pà sikandin guntaani wey taman te taman."

⁹ Ini se bayuk dut te kanta kayi te epat ne nelimbag ne edeyù wey ebpeselemanan dan arà se ebpinuu diyà te ebpinuuwan din te kedatù, arà se warà kemetayen din. Ne ketà te kegkanta ran, ¹⁰ ne edlumpeng dema ini se deruwa nepulù wey epat ne pekilukesen diyà te etuvangan dut te ebpinuu ne edatù se ebpengarap kandin arà se warà kemetayen din. Ne inrenà dan ke seluluy ran ne bulawan diyà te etuvangan te ebpinuuwan din se egkahi te,

¹¹ "Na, ke Kerenan dey ne Eleteala, mepmepurù ka,
tembù be edeyuen ka wey egkeedatan,
su ke gehem nu ne dekdekelà.

Su sikuna se midlimbag dut te langun taman,
uya, nebiviyyag dan su sabap dut te kiyug nu."

5

Ke Midlulun ne Kelatas wey ke Nati te Bilibili ne ruen Gaga rin te Eberat

¹ Ketà ne nekita ku te ruen migeweran dut te ebpinuu riyà te ebpinuuwan din te edatù. Ne riyà te kewanan ne belad din ne ingawed din te midlulun ne kelatas ne ruen insurat ketà te idsengeriveluyà, ne ruen pitu ne tuus ne impereket dutun su apey kenà egkeverat. ² Ne nekita ku ne ruen mevaher ne suluhuen te Eleteala ketà ne mibpekerahing te suwara rin se egkahi te, “Engkey se egkepakey ne id-awà din ini se tuus su eberaten din?” ³ Mibpemengà dan diyà te langit, kayi te ampew te dunya, wey diyà te insekednar, ne warà netuen dan ne egpekegaga te id-awà din arà se pitu ne tuus su apey egkeverat wey ebpekevasa ketà. ⁴ Tembù be nekesinehew a su warà netuen dan ne ebpekegaga ne ebekar dut te kelatas su apey ebpekevasa ketà. ⁵ Ketà ne ruen seveka rut te deruwa nepulù wey epat ne pekilukesen ne midlalag kayi te kediey se egkahi te, “Kenà ka edsinehew, su ini se ed-ingaranan te Erimaung ne si Hisu Kristu su ke baher din ne dekelà, ne sikandin ke inenakan dut te bansa ne Huda wey ke inenakan ni David dengan. Ne sikandin ke neketalew en ki Setanas ke datù te pekaid, tembù be sikandin se ebpekegaga ne ed-awà dut te pitu ne tuus wey ebekar kayi te kelatas ne midlulun.”

⁶ Ketà ne ruen nekita ku ne iring te Nati te Bilibili ne ed-itindeg diyà te luuk dut te ebpinuuwan te edatù wey ke epat ne nelimbag wey ke deruwa nepulù wey epat ne pekilukesen. Arà se Nati te Bilibili ne iring te nekepevaya en te minatey su ruen menge tulak dut te palì din te kineimetayi kandin. Ruen pitu ne sidung wey pitu ne mata rin ne tuus dut te pitu ne ralan ne ibpekita rut te Kedesenan ne Ebpetuntul te Menusiyà ke gehem ne idsuhù din diyà te lusud te ampew te dunya.

⁷ Ne ketà ne mid-uvey ke Nati te Bilibili diyà te ebpinuuwan dut te edatù, ne migkuwa rin ke kelatas ne midlulun ne migeweran te kewanan ne belad dut te ebpinuu te ebpinuuwan te edatù. ⁸ Guna su egkuan din en, ne midlumpeng en ini se epat ne nelimbag wey ke deruwa nepulù wey epat ne pekilukesen diyà te etuvangan din su ebpengarap te sikandin ke Nati te Bilibili. Ne uman seveka rut te pekilukesen ne ruen kandin ne egkevitne ed-ingaranan te harpa, ne ruen dema migeweran dan ne lediyà ne bulawan ne nepenu te rukut ne edtutungen su ke evel ne ed-itindeg ketà ne arà ke iring te kebpengeningi rut te menge sakup te Eleteala. ⁹ Ne migkanta ran te behu pà ne kanta, ke se bayuk dan te,

“Sikuna rà ke ebpekegaga ne ebpekekuwa te midlulun ne kelatas ne ebpekeawà dut te menge tuus ne impereket ketà.

Su mid-imetayan ka rengan
ne sabap dut te kedadu te lengesa nu
ketà te kineimetayi keykew,
ne mid-awun nu ke menge etew
ne meraat se ed-ul-ulaan din
dut te langun ne menge inged, bansa wey kinehiyan
su apey sikandan ne egkevaluy ne sakup te Eleteala.

¹⁰ Ne in-amung nu sikandan dut te menge etew ne edetuan nu
ne in-amung nu rema sikandan ne menge terebpelengesa
ne egelevek dut te egkiyuhan te Eleteala,
ne ebperetuen nu sikandan kayi te ampew te dunya.”

¹¹ Ketà ne midtengteng a ne ruen menge suluhuen te Eleteala ne nekita ku wey nerineg ku ne egkanta. Egngivuwan dan ne nekelingut

se ed-itindeg ketà te ebpnuu te ebpnuuwan te edatù, ke epat ne nelimbag wey ke deruwa nepulù wey epat ne pekilukesen.¹² Ne mibmerahing ke suwara ran se egkanta te,
 “Ini se ed-ingaranan te Nati te Bilibili ne mid-imetayan dan, sikandin ke dait ne ebpengerapan, ne sikandin ke ed-edatan tew wey edeyuen. Su ke gehem din ne mevaher, ne warà tedtab dut te kekewesai rin, ke itungan din ne metampas, ne edatù sikandin te langun.”

¹³ Ketà ne nerineg ku ke kegkanta rut te langun ne ed-ubpà diyà te langit, langun ne ed-ubpà kayi te ampew te dunya, langun ne riyà te insekednar wey langun ne ed-ubpà diyà te rahat. Langun ne nelimbag te Eleteala kayi te linengkevan ne migkanta te,
 “Edeyuen tew ini se ebpnuu kayi te ebpnuuwan te edatù, wey edeyuen rema ini se Nati te Bilibili.

Ed-edatan tew sikandan ne ibpepurù tew sikandan taman te taman, su sikandan dà ke warà ebpekerepeng te gehem din.”

¹⁴ Ne dutun migkahi ke epat ne nelimbag te, “Egketuman ini.” Ne midlumpeng ke deruwa nepulù wey epat ne pekilukesen ne mibpengarap kandan.

6

Mid-awà dut te Nati te Bilibili ke Enem ne Tuus ne Impereket dut te Midlulun ne Kelatas

¹ Rutun ne nekita ku ne in-awà dut te Nati te Bilibili ke ikeseveka ne tuus ne impereket dut te midlulun ne kelatas, ne nerineg ku ke lalag dut te seveka dut te epat ne nelimbag. Merahing se kedlalag din su iring te dahing te eduruhung ne migkahi te, “Gaangaan ka kayi.”² Ne nekita ku te ruen meputì ne kudà ne migemew ne ini se ed-untud dutun ne migawed te panà. Ne ruen mibehey kandin te seluluy ne impeipanew rin en su ebpekibunù dut te menge kunterà din diyà te ampew te dunya ne edtavan sikandin.

³ Ketà ne in-awà kayi te Nati te Bilibili ke ikeruwa ne tuus ne impereket dut te midlulun ne kelatas, ne nerineg ku ke lalag dut te ikeruwa kayiteepatnenelimbagseegkahite, “Gaangaan ka kayi.”⁴ Ne ruen migemew maa ne kudà ne merihà. Ne ini se ed-untud dutun ne insuhù kandin te ebpekevaal te kebunuey diyà te ampew te dunya su apey ebpemekebpetayà ke menge menusiyà. Ne imbehey kandin ke kempilan.

⁵ Ketà ne in-awà dut te Nati te Bilibili ke iketelu ne tuus ne impereket dut te midlulun ne kelatas. Ne nerineg ku ke lalag dut te iketelu kayi te epat ne nelimbag se egkahi te, “Gaangaan ka kayi.” Ne nekita ku ne ruen migemew maa ne kudà ne meitem, ne ini se ed-untud ketà ne ruen timbangan ne ed-ewiten din.⁶ Ne ruen iring te suwara ne nerineg ku ne riyà ebpuun te epat ne nelimbag se migkahi te, “Tengà dà te gentangan ne bahas se egkepemasa dut te idsukey te senge hewii, ne senge hantang wey tengà dà ne ginaling se egkepemasa dut te idsukey te senge hewii. Ugaid ne kenà niyu ipeiseg ke elehà dut te lana wey vinu.”

⁷ Ketà ne in-awà dut te Nati te Bilibili ke ikeepat ne tuus ne impereket dut te midlulun ne kelatas. Ne nerineg ku ke lalag dut te ikeepat kayi te epat ne nelimbag se egkahi te, "Gaangaan ka kayi." ⁸ Na nekita ku ne ruen migemew maa ne kudà ne meputiputi. Ini se ed-untud ketà ne ed-ingaranan ki Kemetayan, ne si Iveyaan se ngaran dut te edtundag kandin. Ne imbehey kandan te kebayàbayà te kebpengimatey te ikeepat ne vaad dut te langun ne menusiyà. Ebpengimatey ran ibpepevayà te kebunuey, bitil, daru wey menge leew ne binatang.

⁹ Ketà ne in-awà dut te Nati te Bilibili ke ikelima ne tuus ne impereket dut te midlulun ne kelatas, ne iyan ku nekita ke ebpelengesaan te menge binatang ne ibehey ran diyà te Eleteala ne riyaw te siyung ne ruen menge gimukud dut te langun ne menge etew ne mid-imetayan su sabap dut te kebpesabut dan te Lalag te Eleteala wey atag dut te kebpemenudtul dan te lalag din. ¹⁰ Ne mibpemensag dan langun se egkahi te, "Sikuna rà ke Kerenan ne dekdekelà se gehem din, ne langun ne ed-ul-ulaan nu ne metidtu ne egkeserihan ka. Engkey se keuhet din se kedadahad dey te kedsuli nu te menge etew kayi te dunya atag dut te ked-imatey ran kenami? Keenu nu edusaa sikandan te ked-imetayi ran kenami?" ¹¹ Ne ketà ne mibehayan dan te meputi ne belegkas ke uman seveka kandan, ne midlalag ke Kerenan kandan te medtehad dan pà te mehaan taman te egkepatey ke menge rumá ran te eduma te Eleteala iring dut te ked-imetayi kandan.

¹² Ne nekita ku ne in-awà dut te Nati te Bilibili ke ikeenem ne tuus ne impereket dut te midlulun ne kelatas. Ne netekew ne midlinug te mevaher, ne mibmeitem ke andew iring dut te saput ne meitem, ne mibmerihà ke bulan iring te lengesa. ¹³ Ne langun ne bituen diyà te langit ne nengeulug kayi te ampew te dunya iring dut te menguwed pà ne bahas te kayu ne igira su nesuhat te mevandes ne keramag. ¹⁴ Ne neawà ke langit iring dut te kelatas ne midlulun, ne langun ne menge buvungan wey menge punul ne neawà diyà te netehuan din. ¹⁵ Ne dutun ne langun ne menge etew kayi te ampew te dunya ne neandek piya ke edatù, ne ke rumá pà ne egkamal, ke egkeunutan te menge sundaru, ke kewasa ne menge etew, ke menge etew ne ruen gaga rin wey langun ne menge uripen etawa kenà ne mid-eles dan diyà te menge surung wey diyà te menge ringkab diyà te buvungan. ¹⁶ Ne migkehiyan dan ke menge buvungan wey ke menge rekelà ne batu te, "Ketempahi key en ne buvungan ne kevunbuni key en su apey key kenà egkekita rut te Eleteala ne ebpiniu ne edatù wey kenà key en meumai rut te kedusa te Nati te Bilibili. ¹⁷ Su neuma en ke hewii ne kedusa ran keytew ne warà en iya ebpekeliyu ketà."

7

Ke Mehatus wey Epat nepulu wey Epat Nengivu ne Menge Etew ne Hudiyanan ne Midtiyapan su tuus te Miduma ran te Eleteala

¹ Neipus arà ne ruen nekita ku ne epat ne suluhuen te Eleteala ne editindeg dut te epat ne pediyulu kayi te ampew te dunya, ne mibangen dan ke epat ne keramag su apey kenà edsamber kayi te tanà, rahat wey menge kayu. ² Ne ruen rumá pà ne suluhuen te Eleteala ne nekita ku ne migemew riyaw te edsilaan ne mid-ewit te tumbuk te Eleteala ne warà kemetayan din. Ne mibmerahing se kegkahi rin dut te epat ne

suluhuen ne mibehayan te Eleteala te gehem te edereetan ke tanà wey rahat.³ Migkahi rin kandan te, "Kenà niyu pà dereeti ini se tanà, rahat wey menge kayu taman te kenà dey pà egketiyapan ke menge buked dut te langun ne menge etew ne eduma te Eleteala tew.⁴ Dutun ne nerineg ku ke kerakel te menge etew ne netiyapan te buked dan ne mehatus wey epat nepulù wey epat nengivu ran, ne riyà dan ebpuun te sepulù wey deruwa ne bansa rut te menge inenakan ni Israyil.⁵ Sepulù wey deruwa nengivu ne menge etew se netiyapan dut te inenakan ni Huda. Ne iring ded dema ne sepulù wey deruwa nengivu ne menge etew riyà te inenakan ni Rubin wey sepulù wey deruwa nengivu ne menge etew riyà te inenakan ni Gad.⁶ Ne sepulù wey deruwa nengivu ne menge etew riyà te inenakan ni Asur, ne sepulù wey deruwa nengivu ne menge etew riyà te inenakan ni Neptali, ne sepulù wey deruwa nengivu ne menge etew riyà te menge inenakan ni Manasis,⁷ ne sepulù wey deruwa nengivu ne menge etew riyà te inenakan ni Simeon, ne sepulù wey deruwa nengivu ne menge etew riyà te inenakan ni Levi, ne sepulù wey deruwa nengivu ne menge etew riyà te inenakan ni Isakar,⁸ ne sepulù wey deruwa nengivu ne menge etew riyà te inenakan ni Sabulun, ne sepulù wey deruwa nengivu ne menge etew riyà te inenakan ni Jose, wey sepulù wey deruwa nengivu ne menge etew riyà te inenakan ni Benjamin.

Ke Denda ne Menge Etew ne Mibevelegkas te Meputì ne Kumbalà

⁹ "Neipus arà ne ruen nekita ku ne denda ne menge etew ne kenà egkevirang. Riyà dan ebpuun te langun ne edsusunan te menge etew, diyà te langun ne bansa, diyà te langun ne inged wey langun ne kinehiyan te menge etew. Mid-itindeg dan diyà te etuvangan te ebpinuuwan dut te edatù wey riyà te etuvangan dut te Nati te Bilibili. Ne mibevelegkas dan te melayat ne meputì ne kumbalà ne mid-ewit dan te dawun te niyug.¹⁰ Ne mibmerahing se lalag dan se egkahi te, Edeyuen ta ke Eleteala ini se ebpinuu ne edatù, ne edeyuen ta rema ini se Nati te Bilibili, su sikandan ke mibpeliyu keyta rut te kedusa te menge salà ta."

¹¹ Ne ruen ketà langun ne menge suluhuen te Eleteala ne midlingut med-itindeg dut te ebpinuuwan te edatù wey ke deruwa nepulù wey epat ne pekilukesen wey ke epat ne nelimbag. Ne midlumpeng dan diyà te etuvangan te ebpinuuwan te edatù ne mibpengarap dan te Eleteala¹² se egkahi te,

"Egketuman ini.

Edeyuen tew ke Eleteala tew.

Ebentuhun tew sikandin.

Ne ed-edatan tew sikandin

su ke itungan din ne metampas,

ne ke kebayàbayà din te edatù ne dekelà

wey ke gehem din ne mevaher.

Ebpeselemanan tew sikandin taman te taman."

¹³ Ne migkehiyan a rut te seveka te menge pekilukesen, ke sikandin te, "Engkey ini se menge etew ne mibevelegkas te meputì ne kumbalà ne endei ran ebpuun?"

¹⁴ Ne midtavak a te, "Kenà ku egketuenan, Datù. Ugaid ne kehiya nu su sikuna se netau."

Ne migkahi rin te, "Ini se menge etew ne nekepevayà dan te mepasang ne kemeresanay diyà te ampew te dunya. Né mibpempiian dan en ini se menge kumbalà dan dut te lengesa te Nati te Bilibili su apey ran ebmepmeputì, ne iyan din meana ne neawà en ke menge salà dan.

¹⁵ Tembù be
diyà dan ebpekeitindeg te etuvangan
dut te ebinuuwan te edatù,
su apey egelevek dan kandin
diyà te Nekebpuru ne Valey rin
te merukilem meandew.

Ne ke Eleteala ne ebinuu ne edatù se edtuganur kandan.

¹⁶ Ne kenà dan en egkevitil,
ne kenà dan en ebpekeinum.

Kenà dan en egkepesangan dut te meinit me andew
etawa piya engkey ne meinit.

¹⁷ Su ini se Nati te Bilibili ne kayi te etuvangan
te ebinuuwan dut te edatù,
ne sikandin se edtuganur kandan,
wey ebeneheewit kandan diyà te ebuunan te menge wayig
ne ebpekevehey te umur ne warà edtemanan din.
Ne ke Eleteala ne id-awà din ke kemutuwān dan
ne kenà dan en ebpekesinehew."

8

In-awà dut te Nati te Bilibili ke Ikeepitu ne Tuus ne Impereket dut te Midlulun ne Kelatas

¹ Dutun ne in-awà dut te Nati te Bilibili ke ikeepitu ne tuus ne impereket dut te midlulun ne kelatas. Neipus arà ne mibpeeneng-eneng ke langun ne riyà te langit lusud te tengà te uras. ² Ne nekita ku ini se pitu ne suluhuen te Eleteala ne ed-itindeg diyà te etuvangan din, ne ruen budyung ne imbehey rut te uman seveka kandan.

³ Ne ruen pà ruma ne suluhuen te Eleteala ne nekita ku ne midewit te bulawan ne edtehuan te rukut, ne nekeuma sikandin ne miditindeg diyà te uvey rut te ebpelengesaan te menge binatang ne ibehey ran diyà te Eleteala. Ne ruen dekelà ne rukut ne imbehey kandin su edtutungen su apey ke meemut ne ngareg din ne ebped-umanen dut te kebpengeningeni te menge etew ne mibperetiaya te Eleteala. Ne edtutungen ini riyà te ebpelengesaan ne mibeelan ne bulawan ketà te etuvangan te ebinuuwan dut te edatù. ⁴ Dutun ne ini se evel te rukut ne midtutung dut te suluhuen ne ed-itindeg diyà te etuvangan te Eleteala ne mibpevayà ini diyà te Eleteala seretà din te kebpengeningeni dut te menge etew ne mibperetiaya te Eleteala.

⁵ Dutun ne migkuwa dut te suluhuen te Eleteala ini se edtehuan te rukut ne mid-ipenù din te baha ne ebuun dut te ebpelengesaan, ne in-antug din ini diyà te ampew te dunya. Ne ketà ne miduruhung, ne mibpemberansi, ne migkikilat, wey midlinug.

Ini ne Mekeatag dut te Pitu ne Suluhuen te Eleteala ne Ebperiyup te Budyung dan

⁶ Na ini se pitu ne suluhuen te Eleteala ne neimes dan te ebperiyup dut te budyung dan. ⁷ Ne ini se neuna ne suluhuen te Eleteala ne mibperiyup en te budyung din, ne netekew ne ruen midadsang diyà te tanà ne biyew wey apuy ne nekesawug te lengesa. Ne netutung ke iketelu ne baad kayi te kelibutan abpeg ke menge kayu wey ke langun ne sagbet ketà.

⁸ Ne mibperiyup en te budyung din ini se ikeruwa ne suluhuen te Eleteala, ne ruen in-antug diyà te rahat ne iring te metikang ne buvungan ne egkereggreg. Ketà ne ke iketelu ne baad dut te rahat ne nevaluy ne lengesa, ⁹ ne ke iketelu ne baad dut te langun ne ed-ubpà te rahat ne minatey, ne ke iketelu ne baad te menge kapal diyà te rahat ne nereetan.

¹⁰ Na mibperiyup te budyung din ini se iketelu ne suluhuen te Eleteala, ne ruen neulug ne riyà ebpun te langit ne dekelà ne bituen ne neregreg iring dut te sulù. Neulug ini riyà te iketelu ne vaad ne lawa te menge wayig wey menge tuhunan. ¹¹ (Ke ngaran kayi te bituen ini ne neulug ne “Mepait.”) Ketà ne iketelu ne vaad dut te langun ne wayig diyà te ampew te dunya ne ebmepait, ne ruen merakel ne menge etew ne minatey su nekeinum dan ketà te wayig ne mibmepait.

¹² Na mibperiyup te budyung din ini se ikeepat ne suluhuen te Eleteala ne iketelu ne vaad dut te andew ne nereetan, ne iketelu ne vaad dut te vulan ne nereetan wey iketelu ne vaad dut te menge bituen. Ketà ne iketelu ne vaad dut te kerayag dan ne neawà. Ne merusirem ke iketelu ne vaad dut te meandew su warà rayag te andew, ne iring ded dema ne merusirem ke iketelu ne vaad dut te merukilem su warà en rayag te bulan wey menge bituen.

¹³ Ne gewii te edtengteng e pà, ne nerineg ku ke lalag dut te banug ne edlayang diyà te kewkewangan. Ne ketetelu rin leleha te merahing se egkahih te, “Mekeyruwiru ke egketemanaan dut te menge etew ne ed-ubpà diyà te ampew te dunya! Uya,” ke sikandin pà maa, “mekeandek ke keresayan ne ebpekeuma riyà te kandan ketà te edahing te budyung dut te ini se tetelu pà ne suluhuen te Eleteala!”

9

¹ Na mibperiyup te budyung din ini se ikelima ne suluhuen te Eleteala ne iyan ku nekita ne iring te bituen te langit ne neulug diyà te tanà. Ne ruen imbehey kandin ne gunsì ne ibpuwas dut te liyang ne ebpependiyà te diralem te tanà ne warà edtemanaan te keralem din. ² Ne mibpuwasan dut te bituen ini se liyang dut te tanà, ne ruen midlepew ne dekelà ne evel iring te evel te dekelà ne apuy. Dutun ne neelangan ke kedsilà te andew dut te mekepal ne evel ne mibmerusirem ke ampew te dunya te evel ne midlepew dut te liyang te tanà. ³ Ne rutun te evel ne ruen merakel ne tepuri ne nekeuma diya te ampew te dunya. Ne nevehayan dan te bisa te ebpekekaid te menge etew iring dut te bisa te selipitsipit. ⁴ Ne intelaan kandan te kenà dan dereeti ke menge sagbet, ke menge pemulaan etawa ke menge kayu, ugaid ne iyan dan pemekeiri ke menge etew ne warà tiyapi te Eleteala ke buked dan. ⁵ Intuhut kandan te kedresaya dut te menge etew lusud te lelima ne vulan, ugaid ne kenà egkepakey ne ed-imatey ran kandan. Ne ke kedresaya ran te menge etew ne iring dut te kesakit te kegkahat te selipitsipit. ⁶ Ne rutun te hewii te ini se lelima ne vulan ne egkiyug

ke menge etew ne ebpatey ran en perem, ugaid ne kenà egked-ulaula. Uya, kiyug dan te ebpatey ran, ugaid ne ed-elihu kandan ke kepatey.

⁷ Ne ke lawa dut te menge tepurì ne iring te lawa te kudà ne ed-unтурan te etew ne ed-amung te ebunuey. Ugaid ne ke paras dan ne iring te paras te etew, ne ruen iring te bulawan ne seluluy diyà te ulu ran. ⁸ Ne melayat se bulvul dan iring dut te bulvul te meritan, ne ke ngipen dan ne iring dut te ngipen te erimaung. ⁹ Nelepisian ke kumeng dan te iring te putew ne limbutung. Ne kedweweheheswes dut te kebpeperakpak dan ne iring dut te kedebakdebak te merakel ne kudà ne eguyud te menge kerumata te ed-amung te ebunuey. ¹⁰ Ini se ikug dan ne egkahat iring dut te kegkahat te ikug te selipitsipit. Ne kayi te kegkehat te ikug dan ne edresayen dan ke menge etew lusud te lelima ne vulan. ¹¹ Ruen egkeunutan dan ne mid-ewit kandan ne ke sugsuhuen dut te datù te pekaid ne si Setanas ne egkamal dut te liyang te tanà ne warà edtemanan te keralem din. Ini se ngaran din ne si Abadan dut te kinehiyan ne Hibruhanen, ne Epuliyun se ngaran din dut te kinehiyan ne Gerisiyanen (ne iyan din meana ne “Ebpenderaat”).

¹² Na ini se neuna ne merasey ne egketemanan ne ebpekeuma dut te menge etew kayi te ampew te dunya ne neipus en, ugaid ne ruen deruwa pà ne merasey ne egketemanan ne ebpekeuma.

¹³ Dutun ne mibperiyup te budyung din ini se ikeenem ne suluhuen te Eleteala ne ruen nerineg ku ne midlalag diyà te epat ne pediyulu rut te bulawan ne ebpelengesaan diyà te etuvangan te Eleteala. ¹⁴ Midlalag diyà te ikeenem ne suluhuen te Eleteala, ke sikandin te, “Ibpeawà nu ke epat ne sugsuhuen dut te datù te pekaid ne mibakù diyà te dekelà ne wayig ne ed-ingaranan te Yopratis.” ¹⁵ Ketà ne impeawà din ini se epat ne sugsuhuen. Impenehana ran neraan te ini ne rahun, ini ne vulan, ini ne hewii, wey ini ne uras su apey ran meimetayi ke iketelu ne vaad dut te langun ne menge etew te dunya. ¹⁶ Ne intarem kediey ke kerakel te menge sundaru ran ne egkukudà, ne ke kerakel dan ne sepulù nengivu midtakep dut te deruwa nepulù nengivu.

¹⁷ Ne kayi te imperayag kediey ne nekita ku ke menge kudà wey ke menge ed-untud ne ke paras dan ne iring kayi. Nelimbutungan arà se ebpengukudà te merihà ne iring ke riha din te apuy, ruen meilem ne iring dut te mepurù ne batu ne ed-ingaranan te Sapira, ne ruen mekelawag dema ne iring dut te sendawà. Ne ke ulu rut te menge kudà ne iring te ulu te erimaung, ne ruen egemew dut te bèbà dan ne apuy, evel, wey sendawà ne egkeregreg. ¹⁸ Ne neherà ke iketelu ne vaad dut te menge etew te dunya ibpepevayà te ini se tetelu ne ibpemekaid, ke apuy, evel, wey ke sendawà ne egkeregreg ne migemew rut te bèbà te menge kudà. ¹⁹ Su ruen ibpemekaid dut te menge kudà kayi te bèbà dan ne duen dema diyà te ikug dan, su ruen ulu diyà te ikug dan ne iring dut te ulu te uled ne ebpemekaid te menge etew.

²⁰ Ugaid ne ke nesamà ne menge etew ne warà mebpatey rut te kinepekaid te menge kudà, ne warà dan med-engked dut te meraat ne ed-ul-ulaan dan. Warà dan dema med-engked te eppengarap te busew wey ke menge ledawan ne mibeelan dan te bulawan, pirak, galang, batu wey kayu. Ne ini se ledawan ne mibpengarap dan ne kenà ebpekekita, ne kenà ebpekerineg, wey kenà ebpekepanew. ²¹ Ne

warà dan dema med-engked te kebpengimatey ran te menge etew, ke delemetan dan, ke kebpengingniyug dan, wey ke kebpenakew ran.

10

Ini ne Mekeatag te Reisek ne Kelatas ne Migeweran dut te Suluhuen te Eleteala

¹ Dutun ne nekita ku ne ruma pà ne mevaher ne suluhuen te Eleteala ne mibpenaug ne egenat te langit. Ne iring te mibevelegkas te sehulapun, ne neterungan ke ulu rin te beluntu. Ke buked din ne iring te ebpeneringsing ne andew, ne ke menge paa rin ne iring dut te pelaus ne regreg. ²Diyà te velad din ne migawed te reisek ne kelatas ne neverat en. Guna su nekerenà en sikandin ne ingiek din ke kewanan ne paa rin diyà te rahat, ne ke divaluy ne paa rin ne ingiek din diyà te tanà. ³ Ne mibmerahing se kedlalag din iring dut te ked-iniher te erimaung. Ketà te kedlalag din ne midsulian te pitu ne duruhung te beransì. ⁴ Neipus ke eduruhung ne idsurat ku en perem ini se nerineg ku, ugaid ne ruen edlalag diyà te langit ne nerineg ku ne egkahi te, “Kenà nu isurat ini se ibpesabut dut te pitu ne eduruhung, ugaid ne itahù nu rà te hinawa nu!”

⁵ Dutun ne ini se suluhuen te Eleteala ne nekita ku ne ed-itindeg diyà te rahat wey tanà, ne migkayew te kewanan ne belad din. ⁶ Ne ruen mevaher ne impasad din diyà te Eleteala ne warà kemetayen din taman te taman ne iyan midlimbag te langit, tanà, rahat wey langun taman ne netahù ketà. Migkahi ke suluhuen te, “Kenà en iya ed-uguheten! ⁷ Su ketà te ebperiyup en ke ikepitu ne suluhuen te Eleteala te budyung din, ne edtumanen en dut te Eleteala ini se netahù te itungan din ne in-eles dengan, ini se impesabut din dut te menge sugsuhuen din ne mibpelambas te lalag din dengan.”

⁸ Dutun ne midlalag maa ini se nerineg ku ne edlalag kediey diyà te langit. Ke sikandin te, “Pendiyà ka te suluhuen te Eleteala ne ed-itindeg diyà te rahat wey tanà ne kua nu arà se deisek ne kelatas ne egeweran din ne neverat en.”

⁹ Ne mibpendiyà a te suluhuen te Eleteala ne mibuyù ku en ke reisek ne kelatas ne neverat en ne egeweran din. Ne migkehiyan a rin te, “Kua nu ini ne keena nu. Meemis su iring te nanam te teneb diyà te bèbà nu, ugaid ne embiya ed-ivelengen nu en ne ebmepait diyà te hetek nu.”

¹⁰ Ne migkuwa ku arà se reisek ne kelatas diyà te belad din ne migkaan ku, ne meemis ini kayi te bèbà ku su iring te teneb. Ugaid ne ketà te mid-iveleng ku en, ne mibmepait kayi te hetek ku.

¹¹ Ne rutun ne migkehiyan a nikandin te, “Ibpemenudtul nu pà maa ke Lalag te Eleteala ne impesabut din keykew mekeatag te egked-ulaula dut te menge egkeunutan wey ke menge etew ne riyà ebpuun te langun ne menge edsusunan te menge inged ne nekebira ke paras dan wey kinehiyan.”

11

Ini ne Mekeatag dut te Deruwa ne Etew ne Ebpesabut Mekeatag te Eleteala

¹ Neipus arà ne ruen tembu ne iring te tuked ne imbehey kediey ne migkehiyan a te, “Pendiyà ka ne tembuwa nu ke Nekebpuu ne

Valey te Eleteala wey ke ebpelengesaan ketà te menge binatang ne ibehey ran te Eleteala, ne biranga nu ke menge etew ne ebpengarap en ketà. ² Ugaid ne kenà nu tembuwa ke lama dut te Nekebpuru ne Valey te Eleteala. Beleharan su ibehey en arà diyà te menge etew ne kenà Hudiyenan. Su lusud te epat nepulù wey deruwa ne vulan ne edtekutaken dan en arà se inged ne Hirusalim, ke inged te Eleteala. ³ Ne ketà te epat nepulù wey deruwa ne vulan, ne sengivù wey deruwa nehatus wey enim nepulù ne hewii ini, ne ruen deruwa ne etew ne edsuhuen ku ketà su apey ran ebpesabut mekeatag kediey. Ne iyan dan igkukumbalà ne sakù ne tuus te iyan iya se ebpekedsendit ke menge etew ne ebpesebuten dan.”

⁴ Na, ini se deruwa ne etew ne edsuhuen dut te Eleteala ne ebpmesabut mekeatag kandin ne ini ke egkesuhat dut te sempità dengan mekeatag te deruwa ne kayu ne Ulivu. Ne sikandan dema ke egkesuhat dut te sempità mekeatag dut te deruwa ne sulù ne intahù diyà te etuvangan te Eleteala ne Kerenan dut te langun ne menge etew. ⁵ Ne embiya ruen ebpmekaid kandan, ne ruen apuy ne egemew rut te bèbà dan su apey egketutung ke etew ne egkunterà kandan. Tembù be ed-imetayan ke piya engkey ne ebpmekaid kandan. ⁶ Ne ruen gehem dan dema te ebangen te kivel su apey kenà ed-uran dut te hewii ne ebpesebutan dan ke Lalag te Eleteala. Ruen ded dema gehem dan apey ke menge wayig ne egkevaluy ne lengesa, ne ruen ded dema gehem dan te edresayen dan ke langun ne menge etew kayi te ampew te dunya te biasbias ne menge keresayan piya keenu se kiyug dan.

⁷ Ne ketà te kebpekeipus dut te deruwa ne ebpmesabut te Lalag te Eleteala, ne ruen ebpekibunù kandan ne mekeandek ne binatang ne egemew ketà te liyang ne ebpependiyà te diralem te tanà ne warà edtemanan te keralem din. Ne ini se mekeandek ne binatang se edtavan ne ed-imatey kandan. ⁸ Ne ke menge bangkey rut te deruwa ne diyà dà mekeirehà te ralan dut te rekelà ne inged ne mevantug su ketà inlansang te pinebelavag ne kayu ke Kerenan dan dengan. Ne riyà te sempità mekeatag ketà ne inged, ne ed-ingaranan te Suduma wey Ihiptu su ke ulaula kayi te inged dan ne meraat iring dut te meraat ne ulaula ketà te deruwa ne menge inged. ⁹ Merakel ne menge etew ne riyà ebpuun te langun ne inged wey langun ne bansa wey langun ne kinehiyan wey langun ne edsusunan te menge etew ne edtengteng dan dut te deruwa ne bangkey ne minatey en lusud te tetelu wey tengà ne hewii, ne kenà dan idtuhut ne igkeleveng. ¹⁰ Su igkehalew rut te langun ne menge etew te kelibutan su atag dut te ked-imetayi ketà te deruwa. Tembù be ruen kevurunan dan wey ruen ibpevegbahayà dan su minatey ini se deruwa ne ebpelambas te Lalag te Eleteala, ini se puunan te kedresaya kandan. ¹¹ Ugaid ne embiya egkeipus en te tetelu wey tengà ne hewii, ne ibpeulit en dut te Eleteala ke hinawa ran su egkeuyag ded ne ed-itindeg. Ne egkeandek nevenar ke langun ne menge etew ne ebpekekita kandan.

¹² Dutun ne egkerineg dut te deruwa ne ebpelambas te Lalag te Eleteala te ruen edlag te merahing diyà te langit, ke sikandin te, “Kayi kew en te langit.” Ne egkevatun dan diyà te langit te edumaan te menge sehulapun, ne egkekita ini rut te langun ne menge kunterà dan. ¹³ Arà dà ne edlinug te mevaher, ne ikesepulù ne baad dut te

inged ne egkereetan wey pitu nengivu ne etew se egkeherà. Ne ke nesamà dut te menge etew ne egkeandek nevenar, tembù be edeyù dan te mekegehem ne Eleteala diyà te langit.

¹⁴ Ini se kegkeipus dut te ikeruwa ne merasey ne egketemanan ne ebpekeuma kayi te menge etew te ampew te dunya, ugaid ne ke iketelu ne mehaan en ebpekeuma.

Mibperiyup te Budyung din ke Ikepitu ne Suluhuen te Eleteala

¹⁵ Dutun ne mibperiyup te budyung din ini se ikepitu ne suluhuen te Eleteala, ne ruen nerineg ku ne merakel ne menge suwara ne merahing diyà te langit ne migkahi te, “Egenat guntaani ne warà en duma pà ne edatù kayi te kelibutan ke kenà ke Kerenan ne Eleteala wey ke Impasad din ne Ebperetuen te langun ne si Kristu, ne edatù sikandin taman te taman. ¹⁶ Dutun ne ini se deruwa nepulù wey epat ne pekilukesen ne ebinuu diyà te etuvangan te Eleteala ne midlumpeng dan ne mibpengarap te Eleteala. ¹⁷ Ne migkahi te,

Is, Kerenan ne Eleteala rey,
sikuna rà ke ebayàbayà te langun.

Sikuna ne daan en te warà pà limbah te misan engkey en,
ne sikuna pà lavew taman guntaan.

Ebpeselemanat dey nevenar sikuna,
su impekita nu ke dekelà ne gehem nu
ne nekerudsù ke en te edatù kayi te ampew te dunya.

¹⁸ Misan neepes nevenar ke menge kunterà nu
ne nekeuma en ke hewii te kedusa nu kandan,
wey ke hewii te kedtimbang nu
rut te ulaula te menge etew ne minatey en.

Ne nekeuma en rema ke hewii te kedlalew nu
rut te langun ne menge sugsuhuen nu ne mibpelambas te lalag nu,
ne langun ne menge sakup nu
wey langun ne ed-adat keykew,
misan mepurù mevavà.

Uya nekeuma en ke hewii ne edereetan nu ke langun
ne mibaal te kederaat kayi te dunya.”

¹⁹ Dutun ne nekita ku ke Nekebpuru ne Valey te Eleteala diyà te langit ne mibpuwasan, ne nekita ku ketà ke baul ne ruen intahù ke menge surat dut te impasad te Eleteala diyà te menge etew rin dengan. Netekew ne egkesuvid se kilat, ne miduruhung, ne mibpemberansi, ne midlinug, wey mid-uran te biyew ne mekepal.

12

Ini ne Mekeatag dut te Meritan wey Tendayag

¹ Ketà ne ruen dekelà ne tuus ne mekegeyip ne nekita ku riyà te langit. Su ruen meritan ne nekita ku ne iring te mibevelegkas te andew ne ed-itindeg diyà te bulan, ne ruen seluluy rin ne sepulù wey deruwa ne bituen. ² Mehingey sikandin ne nekeerang su ebeliliten en.

³ Ne ruen seveka maa ne dekelà ne tuus ne mekegeyip ne nekita ku riyà te langit. Ruen dekdekelà ne merihà ne tendayag ne pitu se ulu rin wey sepulù se sidung din ne diyà te uman seveka ne ulu rin ne ruen seluluy rin. ⁴ Ne midrapay kayi te ikug din ke iketelu ne baad ne menge bituen diyà te langit, ne in-antug din diyà te ampew te

dunya. Ne ed-it-itindeg diyà te sineruwani te meritan ne mehaan en ed-anak su egkaan dut te batà embiya egemew en.⁵ Ne mid-anak ke meritan te meama, ugaid ne warà mekaan dut te tendayag ke vata su migègeenan geweri dut te Eleteala ne mibatun din diyà te ebpinuuwan din te edatù diyà te langit. Su sikandin se ebperetuen dut te langun ne menge etew te ampew te dunya, ne warà ebpekegaga ne ed-atu kandin su mevaher se kedadù din.⁶ Ne mibpelahuy ke meritan diyà te tanà ne kenà egkeubpaan te etew su ketà ne ruen ed-ubpaan din ne mibpenehana te Eleteala kandin. Ketà ne sikandin ne edtugenuren te Eleteala lusud te sengivu wey deruwa nehatus wey enim nepulù ne hewii.

⁷ Dutun ne ruen gira diyà te langit. Si Miguel, ke seveka ne egkeunutan dut te menge suluhuen te Eleteala, wey ke menge ruma rin ne menge suluhuen se mibpevunuey dut te tendayag. Ne mibpekibunù dema ini se tendayag wey ke menge sakup din.⁸ Ugaid ne netevanan dan ne impeawà dan en diyà te langit.⁹ Su in-antug dan diyà te ampew te dunya ini se rekèlè ne tendayag wey langun ne sakup din. Su ini se tendayag ne arà se engkungkun ne uled te rengdengani rà nevenar ne ed-ingaranan ki Setanas ke datù te pekaid, ne metau ne edlimbung te langun ne menge etew kayi te ampew te dunya.

¹⁰ Dutun ne ruen nerineg ku ne middlag te merahing diyà te langit ne migkahi te,

“Ini en ke hewii te kebpeliyu rut te Eleteala te langun ne menge etew, ne impekita en te Eleteala ke gehem din te edatù.

Ne iring ded dema ke Impasad din ne Ebperetuen te langun, ne impekita ke baher din te edatù.

Su impeawà din si Setanas diyà te langit, arà se egkunterà te menge ruma ne mibperetiyaya diyà te dunya, su merukilem meandew ne edsumbung kandan diyà te etuvangan te Eleteala.

¹¹ Ugaid ne ke menge mibperetiyaya te Eleteala ne midtevanan dan arà se edsumbung kandan impepevayà dut te lengesa ni Hisus ke ed-ingaranan te Nati te Bilibili

ne mid-imetayan diyà te pinebelavag ne kayu.

Uya, midtevanan dan si Setanas impepevayà dut te benar ne penurù ne ibpemenudtul dan.

Ne warà dan menuhuni ke umur dan misan ibpatey ran su atag dut te kebperetiyaya ran.

¹² Tembù be sikiyu ke langun ne ed-ubpà diyà te langit, ne egkehalew kew su impeawà si Setanas!

Ugaid ne egkeyruwan kew ne ed-ubpà diyà te tanà wey rahat su in-antug en si Setanas diyà te keniyu!

Ne neepes nevenar sikandin su netuenan din te mehaan en egkepupus ke hewii rin te ebaal te meraat.”

¹³ Ketà te netuenan dut te tendayag te impeawà en sikandin diyà te langit ne in-antug kayi te tanà ne midlayas din ke meritan ne mid-anak te batà ne meama.¹⁴ Ugaid ne ini se meritan ne ruen imbehey te Eleteala kandin ne deruwa ne pakpak te dekelà ne banug su apey

ebpekelayang sikandin diyà te ed-ubpaan ne impenehana kandin diyà te tanà ne kenà egkeubpaan te etew. Su riyà ne kenà egkesaut sikandin dut te tendayag su edtugenuren te Eleteala lusud te tetelu wey tengà ne rahun.¹⁵ Ne ini se tendayag, ne mibpehemew te rekèlè ne wayig diyà te bëbà din su apey egkeanud arà se meritan.¹⁶ Ugaid ne ke tanà se midtavang dut te meritan su migintaang ini se tanà ne ketà midsenep ke wayig ne riyà ebuun te bëbà te tendayag.¹⁷ Tembù be dekdekelà se kegkeepes dut te tendayag kayi te meritan, ne mibayaan din ke ruma ne inenakan dut te meritan su ebpekibunù kandan. Ne ini se menge inenakan dut te meritan ne ini ke menge etew ne eduma dut te insuhù te Eleteala wey meilut se kegawed dan dut te benar ne impenurù ni Hisus.¹⁸ Neipus arà ne mibpendiyà ke tendayag te beyvey te rahat ne mid-it-itindeg ketà.

13

Ini ne Mekeatag dut te Deruwa ne Mekeandek ne Binatang

¹ Neipus arà ne ruen nekita ku ne mekeandek ne binatang ne mibpantew riyà te rahat. Ruen sepulù ne sidung din wey pitu ne ulu rin. Ne diyà te uman seveka ne sidung din ne ruen seluluy rin, ne diyà te uman seveka ne ulu rin ne ruen meraat ne menge lalag ne idsumpalit te Eleteala ne insurat ketà.² Ne ini se mekeandek ne binatang ne nekita ku ne iring dut te paras te dekdekelà ne tinggalung ne ed-ingaranan te liyupardu. Ugaid ne ke paa rin ne nekevira su iring te paa te binatang ne ed-ingaranan te biyir, ne ke bëbà din ne iring te bëbà dut te erimaung. Ne ke tendayag se mibehey kayi te mekeandek ne binatang te gehem din, ke edetuan din wey ke kebayàbayà din te edatù.³ Diyà te seveka ne ulu rut te mekeandek ne binatang ne ruen dekelà ne tulak din su nepelian te ibpatey rin, ugaid ne neulian en. Tembù be negeyip ke langun ne menge etew te ampew te dunya, ne miduma ran ketà te binatang.⁴ Ne mibpengarap dut te langun ne menge etew ke tendayag su sikandin se mibehey te kebayàbayà dut te mekeandek ne binatang. Ne mibpengarap dan dema ke mekeandek ne binatang, ke sikandin te, “Warà ebpekerepeng kayi te mekeandek ne binatang! Warà ebpekeatu kandin!”

⁵ Ne lusud te epat nepulù wey deruwa ne vulan ne midtuhutan dut te Eleteala arà se mekeandek ne binatang te edatù wey edantal te hinawa rin ne edsumpalit te Eleteala.⁶ Uman egkevekà se bëbà din ne edsumpalit te Eleteala wey ke ed-ubpaan te Eleteala diyà te langit wey langun ne sakup te Eleteala ne ed-ubpà diyà te langit.⁷ Ne midtuhutan dema te Eleteala te ked-atu dut te mekeandek ne binatang kayi te menge sakup din ne ebpeketalew kandan. Ne midtuhutan te Eleteala te ruen kebayàbayà dut te mekeandek ne binatang te edatù te langun ne menge etew diyà te langun ne menge inged ne nekebira se kinehiyan wey paras dan.⁸ Sikandin se ebpengerapan te langun ne menge etew te ampew te dunya ne warà ngaran din ne insurat diyà te riberù ne nesuratan te menge ngaran te langun ne menge etew ne mibehayan te umur ne warà edtemanan din. Ini se riberù ne midsuratan dut te Nati te Bilibili ne mibpeimatey, ne ini ne insurat din en neraan te warà pà limbahana ini se kelibutan.

⁹ Itaan niyu ke telinga niyu ne pemineg kew.

¹⁰ Ke etew ne ibpepevayà te Eleteala te egkesikem, ne edsigkem iya.

Ne ke etew ne ibpepevayà te ebpatey te sundang, ne sundang iya se ibpatey rin.

Tembù be langun tew ne sakup te Eleteala ne iyan iya se edtigker kiyu te keresayan wey idsarig ke egked-ulaula tew te Eleteala.

¹¹ Ne ruen ded maa mekeandek ne binatang ne nekita ku ne migemew riyà te tanà. Ruen deruwa ne sidung din iring dut te sidung te bilibili, ugaid ne ke lalag din ne iring dut te kedlalag te tendayag. ¹² Ne migeheluan din ke kebayàbayà dut te neuna ne mekeandek ne binatang ne iyan midsuhù kandin. Mibpehes din ke langun ne menge etew te ampew te dunya te ebpengarap dan dut te neuna ne mekeandek ne binatang, arà ne nepelian te ibpatey rin ugaid ne neulian en. ¹³ Ruen merakel ne mekegeyip ne ed-ul-ulaan ne mibbeelan dut te ini se ikeruwa ne binatang su misan apuy ne ebpum te langit ne impeuran din ne nekita rut te langun ne menge etew. ¹⁴ Ne sabap dut te mekegeyip ne ed-ul-ulaan ne mibpeveelan kandin dut te neuna ne binatang, ne nelimbungan din ke langun ne menge etew kayì te ampew te dunya. Ketà ne insuhù din kandan te ebaal te ledawan ne ebpekeiring te paras dut te neuna ne mekeandek ne binatang ne ebpengerapan dan, arà se binatang ne nepelian te sundang ugaid ne neulian en. ¹⁵ Ne ini se ikeruwa ne mekeandek ne binatang ne mibehayan te gehem te ebpekeghinawa ke ledawan te paras dut te neuna ne mekeandek ne binatang. Tembù be ebpekelalag ke ledawan ne insuhù din te ebpeimatey ke langun ne kenà ed-arap kandin. ¹⁶ Ne mibpehes dema dut te ikeruwa ne binatang ke langun ne menge etew te ebpetiyap kayì te kewanana ne velad dan etawa riyà te buked dan misan mepurù mevavà ne menge etew, kewasa wey ayuayu, uripen etawa kenà. ¹⁷ Su warà etew ne ebpekepemasa etawa ebpekepemendehang embiya kenà dan ed-una te ebpetiyap te ngaran dut te neuna ne mekeandek ne binatang etawa ke rumiru ne tuus te ngaran din.

¹⁸ Iyan dà ebpekesabut dutun ne ke etew ne mibehayan te Eleteala te metampas ne itungan. Ne ke etew ne metampas se itungan din ne egketuenan din ke meana dut te rumiru te arà se mekeandek ne binatang su ngaran arà te etew, ne arà se rumiru rin ne nem ne hatus wey enim nepulù wey enim.

14

Ke Nati te Bilibili wey ke Mehatus wey Epat Nepulù wey epat Nengivu ne Menge Etew ne Impelyu Rin

¹ Neipus arà ne nekita ku ke mid-ingaranan te Nati te Bilibili ne edit-itindeg diyà te buvungan te Siyun. Ne ruen ruma rin ne mehatus wey epat nepulù wey epat nengivu ne menge etew ne ruen insurat diyà te buked dan ke ngaran dut te Nati te Bilibili wey ke ngaran dut te Eleteala ke Amey rin. ² Ne ruen nerineg ku ne edlalag diyà te langit ne iring dut te dehuus te dekèla ne wayig te sampew wey iring dema dut te eduruhung te beransi. Ne arà se suwara ne nerineg ku ne iring dema dut te meupiya ne ebpeminehen te merakel ne egkevit te harpa. ³ Na ini se mehatus wey epat nepulù wey epat nengivu ne menge etew

ne riyà mid-itindeg te etuvangan te ebpinuuwan te ebpinuu ne edatù wey ke epat ne nelimbag wey ke menge pekilukesen. Ne migkanta ran te behu ne kanta ne sikandan dà se metau ne ed-iring ketà te behu ne kanta su sikandan ke impeliyu rut te Nati te Bilibili te salà dan diyà te ampew te dunya.⁴ Ne ini se menge etew ne metilak se ulaula ran su warà dan mebpengingniyug ne warà dan med-esawa. Ne edurumaruma ran dut te Nati te Bilibili te piya endei ebpesinaru. Impeliyu ran nikandin dut te salà dan diyà te ampew te dunya, ne sikandan ke neuna ne ibehey riyà te Eleteala wey riyà te Nati te Bilibili iring dut te edsewitan ne parey.⁵ Ne warà tarù ne migemew te bëbà dan, ne warà ded dema ne igkesawey kandan.

Ini se Migkahi rut te Tetelu ne Suluhuen te Eleteala

⁶ Neipus arà ne ruen pà suluhuen te Eleteala ne nekita ku ne edlayang diyà te kewkewangan ne ebpemenudtul dut te Meupiya ne Tudtul. Ibpemenudtul din ini te warà kegkepupus din diyà te langun ne menge etew dut te ampew te dunya piya engkey ne edsusunan ne menge etew, piya engkey ne bansa, piya engkey ne kinehiyan te menge etew, wey piya endei ne menge inged.⁷ Ne midlalag sikandin te merahing se egkahi te, “Edati niyu ke Eleteala wey deyua niyu ke gehem din su nekeuma en ke hewii te edtimbangen din ke menge ulaula rut te langun ne menge etew. Pengarap kew kandin ke midlimbag te langit, tanà, rahat wey menge wayig.”

⁸ Ketà ne ruen ikeruwa ne suluhuen te Eleteala ne nekita ku ne migkahi te, “Na, nereetan en! Nereetan en ini se dekelà ne inged ne ed-ingaranan te Bebilunya! Su mid-ewit din ke langun ne menge etew te ampew te dunya te ed-inum te binu rin ne ebpeketevereg su tuus ini te meredsik ne ed-ul-ulaan din su mid-ubpaan en te karang ini se inged.”

⁹ Na ruen iketelu ne suluhuen te Eleteala ne nekita ku ne neketundug ne midlalag te merahing se egkahi te, “Embiya ruen etew ne ebpengarap dut te binatang wey ke ledawan ne iring te paras din, ne embiya ebpetyiap sikandin dut te tuus te binatang diyà te buked din etawa belad din,¹⁰ ne ebpeinumen din dut te mepait ne binu ne warè nekesawug ne wayig. Ne ini se mepait ne binu ne tuus te dekelà se kegkeepes te Eleteala. Uya, piya engkey ne etew ne ebpengarap dut te binatang ne sikandin ne edresayen diyà te apuy nerakà wey sendawà ne egkeregreg, ne ke Nati te Bilibili wey ke menge suluhuen te Eleteala ne edtengteng ketà te egked-ulaula.¹¹ Ne ini se apuy ne edrasey kandan ne egkeregreg taman te taman. Ne ini se keresayan dan te merukilem meandew ne kenà egkeawà su mibpengarap dan ke binatang wey ke ledawan ne mibeelan dan ne iring te paras din, ne mibpetiyap dan dema dut te tuus te ngaran te binatang.”

¹² Tembù be sikiyu ne menge sakup te Eleteala ne eduma en te suhù din wey egeweran te mevaher ke kebperetiyyaya niyu ki Hisus, ne iyan iya se tigkeri niyu se keresayan.

¹³ Ne ketà ne ruen suwara diyà te langit ne nerineg ku ne edlalag kediey ne migkahi te, “Isurat nu ini: Igenat guntaani ne egkehalew ke menge etew ne ebpatey embiya mibperetiyyaya en ki Hisus ke Kerenan.

“Benar iyan,” ke migkahi te Kedesenan ne Ebpetuntul te Menusiyà. “Egkehalew ran su ebpekeimeley ran dut te mepasang ne helevek dan su ruen lalew ran dut te meupiya ne mid-ulaula ran.”

Ini ne In-upama Mekeatag dut te Ked-ehani kayi te Ampew te Dunya

¹⁴ Na nekita ku ke meputi ne sehulapun ne ruen mibpinuu ketà ne iring te paras te menusiyà. Midseseluluy te bulawan ne migawed te meharang ne garab. ¹⁵ Ne ruen ruma pà ne suluhuen te Eleteala ne migemew rut te Nekebpuru ne Valey te Eleteala ne ruen dema meharang ne garab din. ¹⁶ Ne ruen pà ruma ne suluhuen te Eleteala ne migemew dut te ebpelengesaan diyà te Nekebpuru ne Valey te Eleteala ne sikandin se ebanter te apuy ketà. Ne midlalag te merahing ne suwara diyà te suluhuen te Eleteala ne migawed te meharang ne garab se egkahi te, “Garab ke en ne eheniya nu ke livas dut te pemulaan ne ed-ingaranan te paras diyà te kelibutan su nelutuan en.” ¹⁷ Ne mibpendiyà ini se suluhuen te Eleteala se egarab dut te paras diyà te kelibutan, ne intahù din diyà te mibeelan ne edtehuan te egkekeres te bahas te paras su tuus ini te kedusa te Eleteala ne ebpekeuma riyà te menge etew ne egkunterà kandin. ¹⁸ Ne ini se edtehuan te egkekeres ne bahas te paras ne riyà te liyu te inged. Ne ruen lengesa ne midtudà ketà iring te dalem ne nekeuma te tetelu nehatus wey deruwa nepulù ne kilumitru, ne ke keralem din ne senge meyterù wey tengà.

15

Ke Pitu ne Suluhuen te Eleteala ne Ed-ewit te Pitu ne Susun ne Keresayan dut te Menge Etew

¹ Ketà ne ruen duma pà maa ne tuus ne mekegeyip nevenar ne nekita ku riyà te langit. Ruen pitu ne suluhuen te Eleteala ne ed-ewit te pitu ne susun ne idrasey ran te menge etew. Ne embiya egked-ulaula ini ne ini en ke ketepusan te kedusa te Eleteala te menge etew dut te ampw te dunya.

² Dutun ne ruen nekita ku ne iring te ranew ne metingew nevenar su iring en te pehelungan, ugaid ne nekedsawug te apuy. Ne nekita ku rema ketà ke langun ne menge etew ne neketavan dut te mekeandek ne binatang, su warà dan mebpengarap kandin ne warà dan mebpengarap te ledawan ne iring dut te paras din, ne warà dan dema mebpetiyap te tuus ne rumiru te ngaran din. Ne ebpengitindeg dan diyà te beyvey te ranew ne metingew, ne ruen egkevit dan ne ke ed-ingaranan te harpa ne imbehey kandan te Eleteala. ³ Ne egkanta ran te bayuk ni Moises ini se miduma te Eleteala rengan, wey ke bayuk dut te Nati te Bilibili, ke sikandan te,

“Is Eleteala ne Kerenan dey
ne rekkelà se kebayàbayà nu.

Langun ne ed-ul-ulaan nu ne rekdekelà wey mekegeyip.

Sikuna se edatù dut te langun ne menge inged,
ne metidtu wey nekesuhat ke langun ne ed-ul-ulaan nu.

⁴ Is Kerenan, sikuna ke ed-edatan
wey edeyuen dut te langun ne menge etew
su sikuna rà ke ed-ulaula te metidtu nevenar.
Tembù be ke menge etew diyà te langun ne menge inged
ne ed-uvey keykew ne ebpengarap,
su impekita nu en kandan
ke langun ne mid-ulaula nu ne metidtu nevenar.”

⁵ Neipus arà ne nekita ku ne nepuwasan ini se Nekebpuru ne Valey te Eleteala diyà te langit, ne nekita ku diyà te lusud te ruhu ne tuus te ke Eleteala ne dutun. ⁶ Ketà ne nekita ku ne midlihawang ini se pitu ne suluhuen te Eleteala ne ed-ewit te pitu ne susun ne idrasey ran te menge etew. Mibevelegkas dan te mèmeputì ne velegkas ne ebpeneringsing, ne inselauy ran te kumeng dan ke vulawan. ⁷ Guna su nekelihawang dan en ne ruen seveka rut te arà se epat ne nelimbag ne mibehey te pitu ne bulawan ne lediyà diyà te pitu ne suluhuen te Eleteala. Ne ini se pitu ne lediyà ne nepenù te kegkeepes te Eleteala ne kenà ebpatey taman te taman. ⁸ Neipus arà ne nepenùpenù te evel ini se Nekebpuru ne Valey te Eleteala su atag dut te raman te Eleteala wey ke gehem din. Ne warà ebpekelusud diyà te Nekebpuru ne Valey te Eleteala taman te kenà egkeipus ke pitu ne kedresaya te menge etew ne mid-ewit dut te pitu ne suluhuen te Eleteala.

16

Ini ne Mekeatag te Ked-ulà dan dut te Pitu ne Bulawan ne Lediyà ne Netehuan te Kegkeepes te Eleteala

¹ Rutun ne ruen nerineg ku riyà te Nekebpuru ne Balev te Eleteala ne midlalag diyà te pitu ne suluhuen te Eleteala. “Pendiyà kew te ampow te dunya,” ke sikandin, “ne ulai niyu ini se intahù te pitu ne bulawan ne lediyà su ini ke kegkeepes te Eleteala.”

² Na mibpendiyà ini se neuna ne suluhuen te Eleteala ne mid-ulaan din ke idrasey ne netahù dut te lediyà din diyà te tanà. Ketà te ked-ulà din ne langun ne menge etew ne netiyapan te tuus te ngaran dut te mekeandek ne binatang wey langun ne mibpengarap te ledawan ne iring te paras din ne midtuvuan te tepal ne memawù wey mesmesakit.

³ Iring ded dema ke ikeruwa ne suluhuen te Eleteala ne mid-ulaan din ke idrasey ne netahù te lediyà din diyà te rahat. Ketà ne nevaluy ke rahat ne iring te lengesa te etew ne nevunù, ne langun ne netahù ketà ne mibpematey.

⁴ Na ini se iketelu ne suluhuen te Eleteala ne mid-ulaan din ke idrasey ne netahù te lediyà din diyà te menge wayig wey menge tuhunan, ne nevaluy ne lengesa. ⁵ Ne nerineg ku ke lalag dut te suluhuen te Eleteala ne edtuganur te menge wayig ne migkahi te,

“Is, Eleteala, sikuna rà ke ed-ulaula te metidtu nevenar.
Sikuna ne daan en te warà pà limbahaa ke misan engkey en,
ne kemulu pà sikuna taman guntaan,

ne ke kedusa nu ne nekeuma kayi te ini ne menge etew
ne metidtu nevenar.

⁶ Su sikandan se mibpeimatey dut te menge etew

ne mibperetiyyaya keykew,
wey ke mibpelambas te Lalag nu rengan.
Tembù be lengesa se ibpeinum nu kandan guntaan
su ini se edait ne idsuli kandan.”

⁷ Ne ruen pà maa nerineg ku ne edlalag diyà te ebpelengesaan te
menge binatang ne ibehey te Eleteala ne migkahi te,
“Uya, Kerenan ne Eleteala, ne ruen dekdekelà ne kebayàbayà din,
ini se kedusa nu te menge etew
ne nekesuhat wey metidtu nevenar.”

⁸ Na ini se ikeepat ne suluhuen te Eleteala ne mid-ulaan din diyà te
andew ke idrasey ne netahù te lediyà din. Tembù be mibmèmeinit
nevenar ke andew ne ebpeketurutung dut te menge etew. ⁹ Ne netutung
dan dut te mèmeinit nevenar ne andew ne midsumpalit dan ke
Eleteala su sikandin se ebayàbayà ketà te kedresaya kandan. Ugaid
ne warà dan med-engked dut te meraat ne ed-ul-ulaan dan, ne warà
dan dema med-adat se Eleteala.

¹⁰ Na ini se ikelima ne suluhuen te Eleteala ne mid-ulaan din ke
idrasye ne netahù te lediyà din diyà te ebpiniuwuan te mekeandek ne
binatang ne ebpiniuu se edatù. Netekew ne mibmerusirem ke langun
ne inged ne edetuan din. Ne ini se menge sakup din, ne nengekahat
dan ke dilà dan su atag dut te kerasayan ne nekeuma diyà te kandan.
¹¹ Ne midsumpalit dan ke Eleteala diyà te langit su atag dut te mesakit
ne neheram dan wey atag dut te tepal dut te lawa ran. Ugaid ne warà
dan med-engked dut te meraat ne mid-ulaula ran.

¹² Na ini se ikeenem ne suluhuen te Eleteala ne mid-ulaan din
ke idrasye ne netahù te lediyà din diyà te dekelà ne wayig ne
ed-ingaranan te Yopratis, tembù be neiratan ini se wayig su apey
egkepenehana ke ibayà te menge datù ne egenat te Edsilaan. ¹³ Dutun
ne ruen nekita ku ne tetelu ne busew ne mekeandek ne iring te paras
te bakkak. Seveka se migemew rut te bèbà te tendayag, ke ikeruwa
ne migemew rut te bèbà te mekeandek ne binatang, ke iketelu ne
migemew rut te bèbà te ebpelambas te lalag ne tarù ni Setanas ke
datù te pekaid. ¹⁴ Ini se tetelu ne busew ne ruen gehem dan te ebaal
te mekegeyip. Ne sikandan se nesuhù dut te datù te pekaid diyà te
langun ne menge datù te ampew te dunya su ibpevurun kandan ke
menge sundaru su ebpekibunu dan te Eleteala ne mekegehem embiya
ebpekeuma en ke mevantug ne hewii te kedadù din te langun ne menge
etew.

¹⁵⁻¹⁶ Dutun ne miburun dut te tetelu ne busew ke menge datù wey ke
menge sundaru ran diyà te ed-ingaranan te Armegidun te kinehiyan
te Hibruhanen.

Na midlalag si Hisu Kristu se egkahi te, “Tentenuri niyu ini. Ini
se kedlived ku,” ke sikandin, “ne iring te kebpekeuma te tekawen
su warà etew ne netau ke endei egketahù ke andew ne ebpekeuma
a. Egkehalew ke etew ne kenà edlipereng ketà te kedlived ku su
ebpenareng kediey. Uya, egkehalew ke etew ne mibpenehana te
belegkas din se ebpenareng kediey su apey warà kegkeyeyai rin ketà
te kebpekeuma ku.”

¹⁷ Na ini se ikepitu ne suluhuen te Eleteala ne mid-ulaan din
diyà te kewkewangan ke idrasey ne netahù te lediyà din. Ne ruen
merahing ne suwara ne nerineg ku ne riya ebpuun te ebpiniuwuan

dut te edatù diyà te Nekebpuru ne Valey te Eleteala diyà te langit ne migkahi te, "Nepupus en!"¹⁸ Dutun ne migkikilat ne miduruhung ne mibpemberansi ne midlinug te mevaher. Warà etew ne nekeheram te linug ne iring ketà egenat dà dut te kinelimbaha te Eleteala te menge etew su newaleng ke tanà te mevaher.¹⁹ Ne ke rekelà ne inged ne Bebilunya ne migintaang ke tanà te tetelu ne vaad, ne langun dema ne menge inged te ampew te dunya ne nereetan en. Uya, warà melipati te Eleteala ke meraat ne ed-ul-ulaan dut te menge etew te inged ne Bebilunya, tembù be ibpeinum din kandan ke binu diyà te basù din ne tuus te kegkeepes din su midusa rin sikandan te mevaher.²⁰ Langun ne menge punul riyà te rahat ne warè en, ne ke menge buvungan ne nengetempag.²¹ Ne mid-uranan ke menge etew te derekelà ne biyew, ne menge lelima nepulù ne kilù se kevehat dut te uman senge timan. Dutun ne nasì midsumpalit dut te menge etew ke Eleteala su midrasey kandin te derekelà ne biyew ne idusa te Eleteala kandan.

17

Ini ne Mekeatag dut te Mevantug ne Tengerihen ne Meritan

¹ Ketà ne ruen seveka rut te pitu ne suluhuen te Eleteala ne mid-ewit te menge lediyà ne mid-uvey kediey ne migkahi te, "Kayi ke en su ibpekita ku keykew ke kedusa te Eleteala ketà te mevantug ne tengerihen ne meritan ne ed-upbà ketà te inged ne ruen merakel ne wayig.² Ne mibpengingniyug kandin ke langun ne menge datù dut te ampew te dunya, ne langun ne menge etew dut te ampew te dunya ne mibpeewit dema kandin kayi te binu rin ne mibpearig kandan."

³ Dutun ne midlumunan a dut te Kedesenan ne Ebpetuntul te Menusiyà ne mid-ewit a rut te suluhuen te Eleteala diyà te tanà ne kenà egkeubpaan te etew. Ketà ne ruen nekita ku ne meritan ne ed-untud te merihà ne binatang, ne pitu se ulu rin ne sepulù ke sidung din. Ne riyà te lawa dut te mekeandek ne binatang ne ruen merakel ne lalag ne insurat ketà ne edsumpalit te Eleteala.⁴ Ne ini se meritan ne mibevelegkas te merihà wey mehuridtem ne iring te belegkas te bai, ne ruen indayandayan te lawa rin ne mibeelan ne bulawan wey mepurù ne menge batu wey pirlas. Ne ruen migeweran din ne bulawan ne basù ne nepenù te meraat wey meredsik ne ulaula rin dut te kebpenarig din.⁵ Diyà te buked din ne ruen insurat ne menge lalag ne ruen meana rin ne in-eles se egkahi te,

"Bebilunya ke inged ne mevantug.
Kebpuunan te langun ne Tengerihen
wey langun ne meredsik ne ulaula
dut te ampew te dunya."

⁶ Ne nekita ku rema ne netevereg ini se meritan kayi te lengesa ne mid-inum din, ini se lengesa dut te menge etew ne mibperetiyyaya te Eleteala ne mibpeimetayan din su kenà dan ed-engked dut te kebperetiyyaya ran ki Hisus.

Ne ketà te nekita ku ini se meritan ne neinuinu a nevenar.⁷ Ugaid ne midlalag kedì ke suluhuen te Eleteala ne migkahi te, "Meambé ke egkeinuinu ka? Na ibpesabut ku kenikew ke in-eles ne meana mekeatag keniyan te meritan wey ke binatang ne ed-unturan din ne ruen pitu ne ulu rin wey sepulù se sidung din.⁸ Ayan se binatang

ne nekita nu ne biviyag dengan ne minatey en. Ugaid ne kenà dà egkeuhet ne egkeuyag ded ne egemew rut te liyang ne warà edtemanan te keralem din. Ne ketà te kegemew rin, ne id-antug diyà te apuy nerakà su edusaan. Ne dutun ne egkeinuinu ke langun ne menge etew te ampew te dunya ne warà mekesurat ke ngaran dan diyà te riberù ne ruen en insurat ne menge ngaran te langun ne ebehayan te umur ne warà edtemanan din te warà pà limbaha ke kelibutan. Uya igkeinuinu ran su biviyag dengan ayan se binatang, ne minatey en, ugaid ne egkeuyag ded maa.

⁹ “Ne iyan dà ebpekesabut dutun,” ke se suluhuen te Eleteala, “ke etew ne mibehayan te Eleteala te metampas ne itungan. Iyan in-upama dut te pitu ne ulu te binatang ne ini ke pitu ne buvungan ne rutun ebpiniuu ini se tengerihen ne meritan. Ne kenà ketà dà taman su iyan in-upama maa ne ini se pitu ne datù. ¹⁰ Ne lelima ran se minatey en, ne kemulu pà edatù ke seveka guntaan, ne ke senge etew ne datù ne warà pà mebpiniuu te kedadù. Ugaid ne embiya ebpekeuma ke hewii rin te edatù ne kenà meuhet se kedadù din. ¹¹ Ne ini se mekeandek ne binatang ne biviyag dengan ne minatey en, ne arà ke ikewalu ne datù ne duma rut te pitu ne datù kayi te ini se pitu ne edetuan, ne ketà te egkeipus din ke ikeruwa ne kebpiniuu rin te edatù ne edusaan ded dema sikandin diyà te apuy nerakà.

¹² “Na ini se sepulù ne sidung ne nekita nu ne ini ke sepulù ne datù ne warà pà mebpiniuu te kedadù, ne ebpiniuu ran te edatù elin ke mekeandek ne binatang ugaid ne mehaan dà. ¹³ Ne egkeseveka se itungan dut te sepulù ne datù ne ebpesakup dan dut te mekeandek ne binatang ne eduma ran dut te suhù din kandan. ¹⁴ Ne ebpekibunù dan dut te Nati te Bilibili, ugaid ne ini se Nati te Bilibili wey ke menge sakup din se edtavan kandan. Su sikandin dà ke Mepurù dut te langun ne kerenan wey sikandin se Mepurù dut te langun ne menge datù. Ne langun ne sakup din ne ke menge etew ne mibpemilì te Eleteala ne mibpeperetiyyaya wey metinumanen kandin.”

¹⁵ Ne midlalag pà maa kediey ini se suluhuen te Eleteala ne migkahi te, “Ini se menge wayig ne nekita nu ne rutun mibpinuu ke tengerihen ne meritan, ne in-upama ini te menge etew diyà te langun ne menge inged, wey ke langun ne edsusunan te menge etew, wey ke langun ne menge bansa, wey ke langun ne menge kinehiyan te menge etew. ¹⁶ Na ini se sepulù ne sidung ne nekita nu ne in-upama te sepulù ne datù, ne sikandan wey ke mekeandek ne binatang ne igkeepes dan ke tengerihen ne meritan ne ed-ehawan dan ke langun ne kearen din taman te warà nesamà misan belegkas din, ne egkeenen dan ini se sapù din wey ebinsulan dan sikandin. ¹⁷ Arà se ed-ul-ulaan dan su behey kandan te Eleteala ke pegitungan su apey egketuman dan ke kiyug din. Tembù be egkeseveka se itungan dan ne ebpesakup dan dut te mekeandek ne binatang ne eduma ran te suhù din taman te egketuman ke langun ne migkahi te Eleteala rengan. ¹⁸ Na ini se meritan ne nekita nu ne in-upama ini te inged ne mevantug ne iyan ebayàbayà te langun ne menge datù dut te ampew te dunya.”

18

Ini se Meraat ne Egketemanan dut te Inged ne Bebilunya

¹ Dutun ne ruen nekita ku ne rumà pà maa ne suluhuen te Eleteala ne mibpenaug ne ebpuun te langit. Ne ini se kebayàbayà din ne rekèlè ne ke keluag dut te ampew te dunya ne egkerayahan te raman din. ² Ne midlalag te merahing se egkahì te,

“Na nereetan en!

Nereetan en ini se mevantug ne inged ne Bebilunya!

Guntaani ne neubpaan te langun ne mekeandek ne menge busew, ne neubpaan dema te meraat wey meredsik ne pepenuk.

³ Uya, arà se egketemanaan din

su neewit din ke langun ne menge etew

te ebpetevereg dut te binu rin;

ne mibpearig kandan

te ed-amung te ulaula rin ne meraat.

Ne mibpengingniyug kandin ke langun ne menge datù dut te ampew te dunya;

ne migkewasa ke menge ebpemendehang

kayi te kiyug dut te meritan

ne mepurù ke kebpemasa rin.”

⁴ Na ruen pà rumà ne suwara diyà te langit ne nerineg ku ne migkahì te,

“Sikiyu ne menge sakup ku,

ne awà kew en kenian te inged!

Pelahuy kew su apey kew kenà ebpekeruma

te meraat ne ed-ul-ulaan ketà te meritan,

su apey kew kenà ebpekeragkes te kedusa ku kandin.

⁵ Upama ke idtambù ta arà se menge salà din,

ne egkesugkur din en ke langit su medmerakel en.

Ne warà melipati te Eleteala

arà se meraat ne mid-ulaula rin.

⁶ Arà se meraat ne mid-ulaula rin keniyu

ne iyan ded dema ed-ul-ulaan diyà te kandin,

ugaid ne edtekepen arà se kedsulii kandin.

Ne ke basù din ne nepenù te mepait ne binu

ne impeinum din te menge etew,

ne edtekepen arà se kepait din te ibpeinum kandin

ne idledawan te kedusa te Eleteala kandin.

⁷ Su mibpereyudeyù sikandin ne midtuman

dut te meraat ne kiyug din,

ne arà rema se kevehat dut te keresayan wey kemutuwán

ne ebpekeuma kandin.

Su migkahi arà se meraat ne meritan

ne in-upama te arà ne inged, ke sikandin te,

‘Irìng a te bai su warè en egkepemengà ku.

Kenà a balu, tembù be warè en keresayan

ne ebpekeuma kayi te kedi!’

⁸ Ne geina te arà se pegitungan din,

tembù be egketekew ne ruen ebpekeuma diyà te kandin

ne merakel ne keresayan.

Su lusud te senge andew rà

ne ruen menge daru, kemutuwán wey bitil ne ebpekeuma.

Ne ed tutungen dema sikandin su dekelà se gehem

dut te Kerenan ne Eleteala ne edusa kandin.”

⁹ Na ini se menge datù dut te ampew te dunya ne mibpengingniyug kandin wey miduma rut te meraat ne kiyug din ne ebpeninehew wey ebpemenderawit te egkekita ran ke evel dut te arà se inged ne edtutungen ne in-upama te tengerihen ne meritan. ¹⁰ Ne ebpekeriyù dan se edsandeng su egkeandek ke ebpekeragkes dan dut te kedusa kandin ne egkahi ran te,

“Ey mekeyruwiru ini se egketemanan nu,
sikew se mevantug wey mevaher ne inged ne Bebilunya,
su lusud dà te senge uras
ne nekeuma en ke kedusa te Eleteala keykew!”

¹¹ Ne ini se menge ebpemendahang kayi te ampew te dunya ne ebpeninehew wey ebpemenderawit dema su atag dut te kedereeti te arà ne inged su warè en ebpemasa te menge dehangan dan.

¹² Uya, warà en ebpemasa te dehangan dan ne bulawan, pirak, menge mepurù ne batu, menge pirlas, menge saput ne meputi wey mehuridtem, menge sida, menge meemut ne kayu, wey menge pekearen ne neveelan dut te ungal te elipanti, pekearen dut te mepurù ne kayu, pekearen dut te galang wey putew, wey pekearen dut te senge susun ne batu ne ed-ingaranan te marbil. ¹³ Warè en dema ebpemasa te ibpemendahang dan ne menge edsusanun te peninù, menge periyemut ne ed-ingaranan te insinsu wey mira wey frankinsin, menge binu, menge lana, menge tapung wey menge trigu, menge sapi, menge bilibili, menge kudà wey menge kerumata, wey menge uripen ne ibpemendahang dan.

¹⁴ Ne egkahi rema ini se menge ebpemendahang ketà te inged ne in-upama te meritan ne tengerihen, ke sikandan te, “Langun ne kearen ne migkiyuhan niyu ne midereetan en. Ini se kekewesai niyu wey ke impereyudeyù niyu ne nereetan en dema, ne kenà en egkekita maa.”

¹⁵ Ne ini se ebpemendahang ne migkewasa rut te kebpemendahang dan ketà te inged ne ebpekeriyù dan se edsandeng su egkeandek ke ebpekeragkes dan dut te kedusa kandin. Ne ebpeninehew ran wey ebpemenderawit ¹⁶ se egkahi te,

“Ey mekeyruwiru arà se egketemanan din
dut te arà se mevantug wey mevaher ne inged ne nereetan en!
Rengan ne mibevelegkas ke menge etew ketà
te kumbalà ne sida ne mehuridtem wey merihà.

Ne ruen indayandayan te lawa ran ne mibeelan te bulawan,
mepurù ne menge batu wey menge pirlas.

¹⁷ Ugaid ne lusud dà te senge uras
ne neamin nereeti ke langun ne kekewesai rin!”

Dutun ne langun ne menge kepitan te menge kapal wey ke menge etew ne ed-untud ketà, ne ke menge etew ne ebpenggelevek diyà te kapal abpeg dut te menge etew ne ebpenginsedà diyà te rahat ne ebpekeriyù dan ¹⁸ se edsandeng dut te evel te arà ne inged ne netutung ne ebensag dan se egkahi te, “Warè en inged ne ebpekerepeng te kevaher te ini ne inged!” ¹⁹ Ne ebpemeluhu ran te lipupuk te kegkemutu ran ne ebpeninehew wey ebpemenderawit dan se egkahi te,

“Ey mekeyruwiru ini se egketemanan din
su ini se mevantug wey mevaher ne inged ne nereetan en!

Su ini se kekewesai rin se igkewasa
 rut te langun ne kemuney te menge kapal.
 Ugaid ne lusud dà te senge uras
 ne neamin nereeti ke langun ne kekewesai rin.

²⁰ Ugaid ne sikiyu ne ed-ubpà diyà te langit,
 ne egkehalew kew su nereetan en ini se inged.
 Ne egkehalew rema ke sikiyu ne mibperetyaya te Eleteala
 wey sikiyu ne menge kedserihan ni Hisu Kristu
 wey sikiyu ne mibpelambas te Lalag te Eleteala,
 su midusa en te Eleteala ini se inged
 atag dut te mid-ulaula rin ne meraat keniyu.”

²¹ Dutun ne ruen ruma pà ne mevaher ne suluhuen te Eleteala ne
 migkuwa rin ke batu ne iring dut te kerekelà te gelingan ne in-antug
 ini diyà te rahat. Ne migkahi te,

“Iring ketà se kegkereeti dut te mevantug ne inged ne Bebilunya
 su egketekew egkereeti ne kenè en egkekita.

²² Kenè en egkerineg ini ne inged
 ke egkevit te menge harpa wey ke kegkanta te menge etew,
 wey ke ebpemulendag wey ebpembudyung.
 Kenè en egkekita ne ruen etew ne metau
 ne ebpandey te misan engkey en.

²³ Ne iring ded dema ne kenè en egkerineg ke gelingan.
 Ne warè en rayag dut te sulù ne egkekita ketà,
 ne warè en egkerineg ne mehalew ne menge lalag
 diyà te kevurunan te kewingan.
 Ini se kedusa te inged ne Bebilunya
 su ke menge etew ne ebpemendahang diyà te inged din
 ne mevantug wey sikandan se migkewasa
 dut te langun ne menge etew te ampew te dunya.

Ne ruma pà maa ne midlimbung dan te kedwelweliyan dan

dut te langun ne menge etew te ampew te dunya.

²⁴ Edusaan ke menge etew dut te inged ne Bebilunya

su sikandin se mibpeimatey
 dut te menge ebpelambas te Lalag te Eleteala
 wey ke menge sakup din.

Uya su rutun ne egkekita ke lengesa
 rut te langun ne mibperetyaya te Eleteala
 ne mibpeimatayan atag dut te kebperetyaya ran
 te Eleteala diya te ampew te dunya.”

19

¹ Dutun ne ruen nerineg ku ne iring te kehurub te denda ne menge
 etew diyà te langit se egkahi te,

“Edeyuen tew ke Eleteala,

su sikandin dà se ibpurù tew,

uya, sikandin dà se ruen dekelà ne gehem din,

ne sikandin dà se ebpeliyu keyta rut te salà tew.

² Su ini se kegkukum din ne metidtu wey egkeserihan.

Ne midusa rin ayan se mevantug ne tengerihen ne meritan,
 su mibpearig sikandin te langun ne menge etew te dunya

te ebpeamung te meraat ne ed-ul-ulaan din.

Midusa en sikandin te Eleteala,
su mibpeimetayan din ke menge etew
ne miduma en te Eleteala.”

³ Ne mibensag dan maa se egkahi te,
“Edeyuen tew ke Eleteala,
su ke apuy ne ebpekevinsul keniyan te inged
ne ed-evel taman te taman.”

⁴ Ketà ne midlumpeng ke deruwa nepulù wey epat ne pekilukesen
wey ke epat ne nelimbag te Eleteala su ebpengarap te Eleteala ne
ebpinuu diyà te ebpinuuwan din te edatù. Ne migkahi ran te,
“Egketuman ini. Edeyuen tew ke Eleteala!”

Ini ne Mekeatag te Kevurunan te Kewingan dut te Nati te Bilibili

⁵ Dutun ne ruen midalag diyà te uvey te ebpinuuwan te Eleteala ne
edatù ne migkahi te,

“Deyua niyu ke Eleteala tew,
langun niyu ne eduma te Eleteala tew,
ne langun niyu ne ed-adat kandin misan ke mepurù mevavà,
deyua niyu sikandin!”

⁶ Ne ruen nerineg ku ne iring te kehurub te denda ne menge etew
su iring ke suwara ran te kedehuus te dekelà ne wayig, ne iring dema
dut te ebpemberansi. Ne migkahi ran te,

“Edeyuen tew ke Eleteala,
su ini se Kerenan ne Eleteala tew
ne iyan edatù te langun.

⁷ Egkehalew ki ne edeyuen tew ke Eleteala,
su ke kewingan te Nati te Bilibili ne nekeuma en.
Ne ini se raha ne ebpengesawaan
ne ini ke menge etew ne mibperetiyyaya kandin
ne mibpegadir en.

⁸ Ne ruen imbehey kandin ne belegkas ne mepmeputì wey mesihey
ne mepmeputì wey mesihey te ebpengesawaan.”

(Ne iyan meana dut te mepmeputì ne belegkas din
ne ke metidtu ne ed-ul-ulaan te menge etew
ne mibpesakup te Eleteala.)

⁹ Ne migkehiyan a ketà te suluhuen te Eleteala, ke sikandin te, “Isurat
nu ini. Langun ne menge etew ne impemetelavuk ketà te kewingan te
Nati te Bilibili ne mehalew ran nevenar.” Ne migkahi pà maa sikandin
te, “Ini ke benar ne menge lalag te Eleteala.”

¹⁰ Ne midlumpeng ad diyà te sineruwan din su ebpengarap a kandin.
Ugaid ne midawey a nikandin se egkahi te, “Kenà ka ebpengarap
kediey. Iyan dait ne ebpengerapan nu ne ke Eleteala rà su siaken ne
seveka a ne sugsuhuen te Eleteala iring kenikew wey ke menge ruma
nu ne eduma rut te benar ne tuluuwen ne impesabut ni Hisus.”

Su ini se benar ne tuluuwen ne impesabut din ne ini rema ke
impapurù dut te ebpelambas te Lalag te Eleteala.

Ini ne Mekeatag dut te Etew ne Ed-untud dut te Meputì ne Kudà

¹¹ Neipus arà ne nekita ku ke langit ne nepuwasan ne ruen ketà
meputì ne kudà. Ne iyan ngaran dut te mid-untud ketà ne si
Kedserihan wey si Benar su ini se kegkukum din ne metidtu ne ini

se ked-atu rin dut te menge kunterà din ne metidtu red dema.¹² Ini se mata rin ne iring te apuy ne egkeregreg, ne ruen seluluy rin ne merakel. Ne ruen dema ngaran ne insurat diyà te kandin, ugaard ne ke meana ketà ne iyan dà sikandin netau.¹³ Ne ini se belegkas din ne iring te in-ered diyà te lengesa, ne ke ngaran din ne "Lalag te Eleteala."¹⁴ Langun dan ne diyà te langit ne ebpeninundug kandin iring te menge sundaru ne edtinundug dut te mepurù dan. Ne ebpenguntud dan dema te meputì ne menge kudà, ne mibpengbevelegkas dan te memeputì ne velegkas ne mesihay.¹⁵ Ne ini se edtunduhen dan ne ruen migemew te bèbà din ne meharang ne sundang, ne arà se metarem din su apey edtavan sikandin dut te etew diyà te langun ne menge inged te ampew te dunya ne egkunterà kandin. Ne ini se kebayàbayà din kandan ne mevaher su kenà egkepakey ne kenà edumaan ke langun ne menge lalag din. Ne ini se egkunterà kandin ne edusaan din iring dut te etew ne egkeres te paras su ebaal te binu, su ibpekita rin ke rekelà ne kegkeepes te Eleteala ne iyan ke rekelà se kebayàbayà din.¹⁶ Iyan insurat diyà te kumbalà din wey diyà te buvun din ne,

"Datu dut te langun ne menge datù

wey Mepurù dut te langun ne ruen bayàbayà din."

¹⁷ Ketà ne midlingakà a ne ruen suluhuen te Eleteala ne nekita ku ne ed-itindeg diyà te andew. Ne mibmerahing se ked-umew rin te langun ne menge pepenuk ne riyaw edlayang te kewkewangan, ke sikandin te, "Sikiyu ne edsusunsunun ne menge pepenuk ne burun kew kayi su ruen idsavud te Eleteala keniyu.¹⁸ Burun kew ne penuktuka niyu ke sapù dut te menge datù, menge kepitan wey menge sundaru. Penuktuka niyu rema ke sapù dut te menge kudà wey ke menge ed-untud ketà. Burun kew ne penuktuka niyu ke sapù te langun ne menge etew, uripen se kenà uripen, mepurù se mevavà."

¹⁹ Ketà ne nekita ku arà se mekeandek ne binatang ke mibpantew diyà te luuk te rahat wey arà se menge datù te ampew te dunya ne edumaan te langun ne menge sundaru ran. Ne nevurun dan su ebpekibunù dan ketà te ed-untud diyà te meputì ne kudà wey ke menge sundaru rin ne riyaw ebpuun te langit.²⁰ Guna su mibpekibunù dan ne nesigkem arà se mekeandek ne binatang wey arà se mibpelambas te tarù ne lalag ni Setanas ke datù te pekaid, arà se mibaal te mekegeyip ibpepevayà dut te gehem te mekeandek ne binatang. (Su kayi te arà se ulaula rin ne mekegeyip, ne nelimbungan din ke langun ne menge etew ne netiyapan dut te mekeandek ne binatang wey langun ne menge etew ne mißpengarap dut te ledawan iring te paras din.) Ketà ne in-antug te biviyag pà arà se mekeandek ne binatang wey ke ebpelambas ki Setanas diyà te apuy nerakà ne egkeregreg ne sendawà.²¹ Ne mid-imetayan ini se menge sundaru rin dut te sundang ne migemew rut te bèbà ketà te mid-untud te meputì ne kudà. Ketà ne langun ne pepenuk ne nevulung dan dut te sapù te menge etew ne minatey.

20

Ini ne Mekeatag te Kegkedina ki Setanas ke Datù te Pekaid Taman te Sengivu ne Rahun

¹ Neipus arà ne ruen suluhuen te Eleteala ne nekita ku ne ebpenaug egenat te langit ne egawed te rekèlè ne sengkali wey gunsì dut te liyang te tanà ne warà edtemanan te keralem din. ² Ne midsigkem din arà se rekèlè ne tendayag arà se uled te rengdengani rà nevenar ne iyan ke datù te pekaid ne ed-ingaranan ki Setanas, ne migkedinaan din taman te sengivu ne rahun. ³ Neipus te kegkedina rin ketà ne in-antug din diyà te liyang ne warà edtemanan te keralem din, ne midlibpeng din arà se liyang ne midtehuan din te tuus su apey kenà egkepuwasi. Arà se mid-ulaula rin su apey kenà egkelimbungi ke menge etew dut te ampew te dunya taman te egkepupus ke sengivu ne rahun. Egkeipus arà ne ibpelihawang si Setanas te mehaan dà.

⁴ Ketà ne nekita ku arà se menge ebpinuuwan te edatù, ne arà se ebpeminuu ketà se mibehayan te bayàbayà te kegkukum. Ne nekita ku ketà ke menge gimukud dut te menge etew ne mid-imetayan su atag dut te kebpemenudtul dan te ini se impayag ni Hisus wey ke kebpemesabut dan te Lalag te Eleteala. Mid-imetayan dan su kenà dan ebpengarap dut te mekeandek ne binatang wey ke ledawan ne iring te paras din wey warà dan mebpetiyap te tuus dut te binatang diyà te buked dan etawa belad dan. Neviviyan dan wey imperatù dan duma ni Hisu Kristu lusud te sengivu ne rahun. ⁵ Ne ini se kegkevanew ran ne ini ke neuna ne kegkevanew rut te menge minatey. (Ugaid ne ke rumu ne menge minatey ne kenà pà egkevanew taman te kenà egkepupus arà se sengivu ne rahun.) ⁶ Ne ke langun ne menge etew ne neamung te neuna ne kebanew te Eleteala dut te menge minatey, ne egkehalew ran nevenar wey ebpenieuven dan. Su sikandan ne kenà dan en ebpekeamung dut te ikeruwa ne kemetayan te menge etew ke in-upama te kedusa te Eleteala te menge etew diyà te apuy nerakà. Ugaid ne sikandan ne menge terebpelengesa te Eleteala su apey egelevek dut te egkiyuhan te Eleteala wey si Hisu Kristu, ne edatù dan dema duma ki Hisu lusud te sengivu ne rahun.

Ini ne Mekeatag dut te Ked-antug ki Setanas Ke Datù te Pekaid diyà te Apuy Nerakà

⁷ Na, embiya egkepupus en arà se sengivu ne rahun, ne ibpelihawang dan pà si Setanas ke datù te pekaid ketà te liyang ne mibilengguan kandin. ⁸ Ne edlihawang sikandin ketà ne edlimbungan din ke menge etew dut te langun ne menge inged te epat ne pediyulu te ampew te dunya. Ne arà se menge etew ne egkelimbungan ne sikandan ke egkunterà te Eleteala ne ed-ingaranan dan te Gug wey Migug. Ketà ne eburunen dan ni Setanas ke datù te pekaid su ebpekibunu te Eleteala, ne medmerakel dan su kenà egkevirang iring dut te pantad te beyvey te rahat. ⁹ Ne ebengkar dan dut te ampew te dunya su edlingutan dan arà se inged ne Hirusalim ne ingkelimù te Eleteala ne ed-ubpaan te menge sakup din. Ugaid ne mid-uranan dan te apuy ne riyaw ebpuun te langit ne neherà dan. ¹⁰ Ne si Setanas ne midlimbung kandan, ne id-antug sikandin diyà te apuy nerakà ne egkereggreg ne sendawà, ne dutun ke mekeandek ne binatang wey ke ebpelambaste tarù ni Setanas ne in-antug en. Ne merukilem meandew ne egkeresay ran taman te taman.

Ini ne Mekeatag te Kegkukum dut te Eleteala ketà te Mewri ne Hewii

¹¹ Neipus arà ne ruen nekita ku ne meluag ne ebpiniuwawan ne meputì ne ruen ebpiniuu ketà. Ne neawà ini se tanà wey langit diyà te etuvangan din ne kenè en egkekita. ¹² Ne nekita ku ke langun ne menge minatey ne nevanew en ne mepurù mevavà ne ed-itindeg diyà te etuvangan te ebpiniuwawan dut te edatù. Ruen menge riberù ne miberat wey arà se riberù ne ruen insurat ne menge ngaran dut te menge etew ne mibehayan te umur ne warà edtemanan din ne miberat dema. Ketà ne midrenaan din te kukuman ke langun ne menge etew su atag dut te insurat kayi te menge riberù mekeatag te mid-ulaula ran te biviyag dan pà su langun ketà ne insurat diyà te menge riberù. ¹³ Uya, langun ne riyà te Hades te Ivayaan ne nevanew en misan mibpatey ran kayi te tanà etawa nelened ran diyà te rahat, ne nepasad en te kukuman kandan su atag dut te mid-ulaula ran te biviyag dan pà. ¹⁴ Neipus arà ne in-antug ke Kemetayen diyà te apuy nerakà wey arà se Ivayaan dema ne ed-ingaranan te Hades. (Ne ini se apuy nerakà ne ed-ingaranan te ikeruwa ne kemetayen.) ¹⁵ Ne ke menge etew ne warà mekesurat ke ngaran dan diyà te riberù ne midsuratan te menge ngaran dut te langun ne mibehayan te umur ne warà edtemanan din, ne id-antug dan diyà te apuy nerakà.

21

Ini ne Mekeatag te Behu ne Langit wey Behu ne Tanà

¹ Dutun ne nekita ku ke behu ne langit wey tanà su neawà en ke raan ne langit wey tanà, ne warà en rahat. ² Nekita ku ke inged ne ed-ubpaan te Eleteala ne ed-ingaranan te Behu ne Hirusalim ne ibpehunrerènà te Eleteala genat te langit. Mekempet ini se inged su iring te raha nemekempet se belegkas din su mibpegédiran su ed-esawaan. ³ Ketà ne ruen merahing ne suwara ne nerineg ku ne riyà ebpuiun te ebpiniuwawan dut te edatù ne migkahi te, “Na, ke ed-ubpaan te Eleteala guntaani ne diyan en te menge etew. Ed-ubpà sikandin diyà te kandan ne egkevaluy ran ne menge sakup din. Uya, sikandin se ebpekiduma kandan ne sikandin ke Eleteala ran. ⁴ Ne id-awà din ke kedsinehew ran su warè en ebpatey. Ne warè en kemutuwan dan, ne warà kebpekesinehew ran. Ne warè en dema keresayan dan su neawà en arà se raan ne kelibutan.”

⁵ Na migkahi ini se ebpiniuu diyà te ebpiniuwawan te edatù, ke sikandin te, “Guntaani ne ebehuwen ku ke langun taman.” Ne migkahi rin maa kediey te, “Isurat nu ini su langun kayi te lalag ku ne benar wey egkeserihan.” ⁶ Ne migkahi rin ded maa te, “Nepupus en ini se langun. Siaken ke Alpa wey Umiga su siaken se ebpuiunan te langun taman ne siaken dema ke ebpeengked dut te langun taman. Piya engkey en ne ebpekeinum, ne ebpeinumen ku te wayig ne kenà egkepemasa ne ebpuiun te tuhunan ne ebehey te umur ne warà edtemanan din. ⁷ Ne piya engkey ne kenà egkegaga rut te penggeram te datù te pekaid ne ibehey ku kandin ini se umur, ne siaken ke Eleteala rin ne anak ku rema sikandin. ⁸ Ugaid ne ke langun ne negaga rut te penggeram te datù te pekaid ne iring dut te menge etew ne kenà edtikà ne eduma kediey, ne ke menge etew ne ed-engkenà te kebperetiyyaya ran kediey, ne ke menge ebpengingniyug wey ke menge mekeyeyà se ulaula rin ne id-antug diyà te apuy nerakà. Ne iring din ded dema ke menge

terevunù, ke duen menge ketuenan din, ke menge ebpengarap te ledawan ne kenà tidtu ne Eleteala wey langun ne menge teruen ne iyan dan egketemanan ne id-antug diyà te apuy nerakà ke egkeregreg ne sendawà ne ke ed-ingaranan te ikeruwa ne kemetayen.”

Ini ne Mekeatag te Inged ne Ed-ingaranan te Behu ne Hirusalim

⁹ Guna su neipus din te egkahi arà ne ruen seveka rut te pitu ne suluhuen te Eleteala ne mid-ewit te pitu ne lediyà ne netehuan te pitu ne mewri ne idrasey te menge etew ne mid-uvvey kedì ne migkahi te, “Kayi ke en su ibpekita ku keykew ini se ed-esewaan dut te Nati te Bilibili.” ¹⁰ Ketà ne midlumunan a rut te Kedesenan ne Ebpetuntul te Menusiyà ne mid-ewit a dut te suluhuen diyà te metikang ne buvungan. Impekita rin kediey ke inged ne ed-ubpaan te Eleteala ne ed-ingaranan te Behu ne Hirusalim ne impehunrerènà te Eleteala diyà te langit. ¹¹ Ebpeneringsing nevenar ini se inged su ke raman te gehem te Eleteala ne ketà. Ed-anlag ini iring dut te mepmepurù ne batu ne ed-ingaranan te hasper ne metmetingew iring te pehelungan. ¹² Ne metikang nevenar ini se pehalad ne nekelingut dut te inged ne sepulù wey deruwa se bengawan din, ne ruen suluhuen te Eleteala ne ebantey ketà te uman seveka ne bengawan. Ne ruen insurat ketà te uman seveka ne bengawan ne menge ngaran dut te sepulù wey deruwa ne menge bansa te inenakan ni Israyil. ¹³ Ruen epat ne pesahì dut te pehalad te inged, ne uman senge pesahì ne ruen tetelu ne bengawan. Ruen tetelu ne bengawan diyà dapit te edsilaan, ruen tetelu ne riyà dapit te edsenlepan, duen tetelu ne riyà dapit te ebelevahan wey tetelu te riyà dapit te ebelengkayan. ¹⁴ Ruen sepulù wey deruwa ne batu ne mibpeunsaran dut te pehalad te inged. Ne ruen insurat ketà ne menge ngaran dut te sepulù wey deruwa ne kedserihan dut te Nati te Bilibili.

¹⁵ Ne ini se suluhuen te Eleteala ne mibpekidlag kediey ne migawed te tembu ne bulawan su edtembuwen din ini se inged, ne ke menge bengawan din wey ke pehalad din. ¹⁶ Ne midsurungsurung ini se inged su ke tilenduwan din wey se belevahan din ne neked-iring. Arà se kedtembu rin te ini se inged ne ke tilenduwan din ne deruwa nengivu wey epat nehatus ne kilumitru, ne arà dema ke belevahan din wey ke ketikang din. ¹⁷ Ne midtembu rin dema arà se pehalad dut te inged, ne nem nepulù wey epat ne miterù se ketikang din. Ne ke kelayat dut te tembu rin ne iring dut te tembu te menge etew. ¹⁸ Ne arà se pehalad ne mibeelan te mepmepurù ne batu ne ed-ingaranan te hasper, ne ke inged ne mibeelan te lunsey ne bulawan ne metmetingew iring te pehelungan. ¹⁹ Ini se sepulù wey deruwa ne rekèlè ne menge batu ne mibpeunsaran dut te pehalad ne ruen indayandayan ne merakel ne susun ne mepurù ne menge batu. Ini se neuna ne rekèlè ne batu ne indayandayan ne batu ne ed-ingaranan te hasper. Ne ke ikeruwa ne rekèlè ne batu ne indayandayan ne batu ne ed-ingaranan te sapira. Ne ke iketelu ne rekèlè ne batu ne indayandayan ne agata, ke ikeepat ne rekèlè ne batu ne indayandayan ne ismiralda, ²⁰ ke ikelima ne rekèlè ne batu ne indayandayan ne unisi, ke ikeenem ne rekèlè ne batu ne indayandayan ne karnila, ke ikepitu ne rekèlè ne batu ne indayandayan ne kelisilitu, ke ikewalu ne rekèlè ne batu ne indayandayan ne berilu, ke ikesiyew ne rekèlè ne batu ne indayandayan ne tupasu, ke ikesepulù ne rekèlè ne batu

ne indayandayan ne kelisupelasu, ke ikesepulù wey seveka ne rekèlà ne batu ne indayandayan ne hesintu, wey ke ikesepulù wey deruwa ne rekèlà ne batu ne indayandayan ne amatista.²¹ Na, ke sepulù wey deruwa ne bengawan ne sepulù wey deruwa ne pirlas, su uman seveka ne gumawan ne mibeelan te seveka ne rekèlà ne pirlas. Ne ke menge ralan ketà te inged ne mibeelan te lunsey ne bulawan ne metmetingew iring te pehelungan.

²² Warà nekebpuru ne valey te Eleteala ne nekita ku ketà te inged su iyan iring dut te nekebpuru ne valey te Eleteala ne ke Kerenan ne Eleteala ne mekegehem wey ke Nati te Bilibili ne dutun en. ²³ Warà en atag din ke rayag te andew wey bulan su egkerayahān din dut te raman te Eleteala ne iyan din sulù ne ke Nati te Bilibili. ²⁴ Ne langun ne menge etew te ampew te dunya ne egketawayan dut te rayag ketà ne inged. Langun ne menge datù te ampew te dunya ne ed-ewit te menge kearen dan dutun te inged. ²⁵ Ne arà se menge bengawan din ne warà en gewii ne kegkelekevi rin, ne kenà en edlekevan su warè en merukilem dutun. ²⁶ Ne ed-ewiten dut te langun ne menge etew te ampew te dunya ke menge mepurù ne kearen dan su ibehey ran ketà. ²⁷ Ne warà piya engkey ne meredsik ne ebpekelusud ketà te inged, ne engketà ded dema ke menge etew ne ed-ulaula te mekeyeyà wey ke menge teruen. Su iyan dà ebpekelusud ketà ne ke menge etew ne ruen ngaran din ne insurat diyà te riberù te Nati te Bilibili ne nesuratan te menge ngaran dut te menge etew ne mibehayan te umur ne warà edtemanan din.

22

¹ Ketà ne impekita kediey dut te suluhuen te Eleteala arà se wayig ne ed-ingaranan te Wayig ne Ebpekevehey te Umur ne Warà Edtemanan din. Metmetingew arà se wayig iring te pehelungan ne riyà ebpuun ini te ebpinuuwan te Eleteala ne arà ded ke ebpinuuwan dut te Nati te Bilibili. ² Ne edtudà arà se wayig ketà te luuk te ralan te inged. Ne riyà te idsengeriveluyà dut te wayig ne ruen menge kayu ne impemula ne ebpekevehey te umur. Lusud te senge rahun ne ebahas te kesepulù wey deruwa su uman bulan ne ebahas. Ne arà se dawun din, ne ebpekevawì te langun ne menge etew dut te ampew te dunya. ³ Warè iya meraat ketà te inged diyà te etuvangan te Eleteala.

Ne ketà te inged ke ebpinuuwan te Eleteala ne iyan ded ebpinuuwan dut te Nati te Bilibili, ne ebpengerapan ke Eleteala dut te langun ne menge sakup din. ⁴ Ne egkekita ran arà se paras din, ne midsuratan ini se menge vuked dan te ngaran din. ⁵ Warè en kerukileman ketà ne warè en atag dut te sulù etawa rayag te andew, su ke raman dut te Kerenan ne Eleteala se ebpekerayag kandan. Ne edatù dan duma kandin taman te taman.

Ini ne Mekeatag te Kedlived ni Hisus kayi te Ampew te Dunya

⁶ Ketà ne migkahi ke suluhuen te Eleteala kediey, ke sikandin te, "Langun ne menge lalag ne nerineg nu ne benar iya ne egketuman en. Su ke Kerenan ne Eleteala ne mibpelumunan din dut te Kedesenan ne Ebpetuntul te Menusiyà arà se menge mibpelambas te Lalag din dengan ne sikandin se midsuhù te suluhuen din kayi te kediey su apey

a ebpesabut dut te langun ne menge sakup din ke engkey se mehaan en ne egked-ulaula.”

⁷ Imi se lalag ni Hisus, ke sikandin te, “Pemineha niyu ini su mehaan ad edlived. Ne langun ne menge etew ne miduma en dut te lalag ne insurat kayi te ini se riberù ne egkehalew ran nevenar!”

⁸ Siaken si Juan ke nekerineg ne nekekita te langun ne insurat ku kayi. Guna su nerineg ku wey nekita ku ini, ne midlumpeng a riyaw te sineruhan te suluhuen te Eleteala su ebpengarap a kandin te ini se impekita rin kediey. ⁹ Ugaid ne midawey a nikandin se egkahi te, “Kenà ka ebpengarap kediey. Su siaken ne seveka ne sugsuhuen te Eleteala iring keykew wey ke menge rumu nu ne ebpelambas te Lalag te Eleteala wey iring dut te langun ne eduma rut te insurat kayi te ini se riberù. Iyan dait ne ebpengerapan nu ne ke Eleteala rà.”

¹⁰ Ne migkahi red maa te, “Kenà nu ieles ini se menge lalag ku ne imperayag ku kenikew ne insurat nu kayi te riberù ini su langun din ne mehaan en egketuman. ¹¹ Ne embiya edrudsù en ini se egketemanan, ne ke menge etew ne ed-ulaula te meraat ne ed-iseg pà ed-ulaula te meraat wey ke menge etew ne ed-ulaula te mekeyeyá ne ed-iseg pà ed-ulaula te mekeyeyyà. Ugaid ke menge etew ne metidtu se betasan din ne ibpelevundus din ke ed-ululaan din ne meupiya. Uya, ke menge etew ne sakup te Eleteala ne ibpelevundus dan te ed-ulaula te kiyug te Eleteala.”

¹² Na ke si Hisus, “Pemineha niyu ini. Mehaan ad edlived, ne ruen lalew ne ibehey ku rut te uman seveka su sabap dut te mid-ulaula rin.

¹³ Siaken ke Alpa wey Umiga su siaken se ebpuunan te langun taman ne siaken dema ke ebpeengked dut te langun taman.”

¹⁴ Ne ke menge etew ne mibpemipì te belegkas dan ne in-upama te menge etew ne edlinis dut te salà dan ne egkehalew nevenar, su egkepakey ran ne edlusud dut te bengawan ketà te inged te Eleteala wey egkepakey ran ne egkaan ketà te bahas te kayu ne ebpekevehey te umur. ¹⁵ Ugaid ne iyan kenà ebpekelusud ketà te inged te Eleteala ne ke langun ne mekeyeyà se ed-ululaan din, ne ke duen menge ketuenan din, ke menge ebpengingniyug, ke menge terevunù, ke menge ebpengarap te ledawan dà ne kenà tidtu ne Eleteala, ke menge teruen, wey ke menge limbungen. Warà etew ne ed-ulaula te iring ketà ne ebpekelusud ketà te inged.

¹⁶ Ne migkahi pà maa si Hisus te, “Siaken si Hisus ne midsuhù te suluhuen ku su ibpesabut din ini se lalag ku riyaw te keniyu ne menge mibperetiyyaya kediey. Siaken se kevuwaran dut te Datù rengan ne si David ne siaken dema ke mesihay ne mekebangas ne bituen ne edsilà te egkeriwaswas.”

¹⁷ Ketà ne ke Kedesenan ne Ebpetuntul te Menusiyà wey ke menge etew ne mibperetiyyaya ne in-upama rut te ed-esawaan te Nati te Bilibili ne ed-umew ran se egkahi te, “Kayi kew en su apey kew ebpekeamung.”

Iring ded dema ke langun ne nekerineg kayi ne iyan iya se medumew ran dema se egkahi te, “Kayi kew en.” Langun niyu ne ed-umew ran keniyu su apey piya engkey keniyu ne ebpekeinum ne egkiyug ne ed-inum kayi te wayig ne mebpengkayi su ibehey ini dè duen, ne ebehey te umur ne warà edtemanan din.

Ini ne Mekeatag te Ketepusan ne Menge Lalag ni Juan

¹⁸ Siaken si Juan ne ruen ibpetiraan ku te langun niyu ne nekerineg kayi te imperayag kediey ne impesabut ku kayi te riberù ini. Embiya ruen etew ne ed-uman te lalag kayi, ne ed-umanan dema te Eleteala te kedusaa kandin kayi te kerasayan ne impesabut ku kayi te riberù ini. ¹⁹ Ne embiya ruen etew ne ruen id-awà din kayi te menge lalag ne nekesurat kayi, ne id-awà dema te Eleteala ke kegkepakey rin te egkaan dut te bahas te kayu ne ebpekevehey te umur, ne id-awà din dema te kegkepakey rin te edlusud ketà te inged te Eleteala ne impesabut ku kayi te riberù ini.

²⁰ Na si Hisus ke mibperayag te langun ne insurat ku kayi ne migkahi te, “Uya, benar iya ne mehaan ad edlived!”

Egketuman ini! Is, Hisus ne Kerenan ku, egkiyuhan ku ne ebpengkayi ke en!

²¹ Na egkiyuhan ku te langun niyu ne sakup te Eleteala ne ebpeneuven dut te Kerenan tew ne si Hisus.

Ini rà se langun ne lalag ku.

Juan